

F. F.
h
4



69013/B

MEDICAL SOCIETY
OF LONDON



ACCESSION NUMBER

PRESS MARK

ADOLPHI, C.M.

T8

OF LONDON · MEDICAL

CHRISTIANI MICHAELIS
ADOLPHI

PHILOSOPH. ET MEDIC. DOCTORIS, FACULT. MED. ITEMQVE
COLLEGII B. M. V. SENIORIS, S. R. I. ACAD. NAT. CVRIOS.
SODALIS ET MED. PRACT.

DISSERTATIONES

PHYSICO - MEDICAE

QVAEDAM SELECTAE, VARII ARGVMENTI

QVAE

IN VNIVERSITATE LIPSIENSI

AB EODEM

DIVERSIS TEMPORIBVS ANTEHAC CONSCRIPTAE

ET PRAESIDENDO PRO CATHEDRA

PVBlice HABITAE SUNT,

NVNC AVTEM REVISAE, HINC INDEQVE AVCTAE

AC IN HOCCE VOLV MEN

COLLECTAE

LIPSI AE,

IMPENSIS IOHANNIS GOTHOFREDI DYCKII

ANNO MDCCXLVII



LECTORI BENEVOLO



nimus equidem mihi nunquam esse potuit,
has dissertationes jam propositas, ante
aliquot lustra conscriptas primum cum
singulæ earum lucem viderint, editioni solenni-
ori destinare, cum ob festinatam sæpe & inter-
ruptam operam infumtam, vel subactus tractandi
modus, vel lima ingenii, vel dictionis elegantia,

P R A E F A T I O.

etiam & æqualitas desiderari possit. Enim vero ut animum nunc mutarem meum, quamvis diu hæserim multumque dubitaverim, reprehensionem Eruditorum meque ingenii abundantia excellentium nec non Vitilitigatorum morsus & Aristarchorum virgulas censorias veritus, partim docti Amici quidam exteri, partim Bibliopolæ effecere, qui, quod illæ, non de argumentis plane ignobilibus atque vulgaribus, sed selectis quibusdam ac non ubivis obviis, ab aliisque jam pertractatis, agerent, sicque proficuas atque acceptas forte futuras, illis quidem qui sincero eas sint excepturi animo, mihi persvaserunt, ut illas præsertim (dissertationes) quas varii Bibliopolæ jam dudum sub Triadum quarundam titulo typis mandaverunt; Illis plerisque distractis denuo colligendas ac unum quoddam volumen excudendum traderem. Unde

si

P R A E F A T I O.

si tuæ expectationi forsan non undiqvae respondeant, veniam quasi ætatis ultro exposcunt. Atque memineris diversis temporibus, eas, pro Iuvenibus, Respondentibus, elaboratas, vel potius in calammum, non continuo quidem, sed interrupto, sæpius festinatoque labore dictatas, Iuvenibusque & Opponentibus & Auditoribus publicæ ventilationi expositas esse. Plus enim illis, nos indulgere solemus, ut pro iudicii modulo, opinionem suam tutari queant. Multa etiam in ejusmodi exercitationibus disputandi materiam dando, exercitii & inquisitionis gratia, proponuntur, quæ serio non æque probamus. Nec ita mihi Suffenus sum, ut hunc meum conatum omnibus Eruditis, nostri temporis, adprobatum iri confidam, bene conscius, quam difficile sit omnibus placere, præsertim cum & pro Lectorum captu li-

P R A E F A T I O.

bri, sua fata habeant, quam facile vero, se ipsum decipere. Quin potius ingenue fateor, in me illud plane non cadere, quod dicitur: Suum cuique pulchrum, adeoque & mihi met etiam in his singulis minime satisfecisse, sed displicuisse potius ac aliquid hinc inde vel incautius vel indoctius, a me positum esse, atque multa addi iis, multa etiam adimi potuisse, ultro profiteor. Hæc demum mea, Amice Lector, placebunt, si Tuæ benevolentiae facilitas iisdem modo annuat. Vale & fave. Lipsiæ d. XXVI Sept.

Ao. MDCCXLVII.



Con-



* * * * *

Conspectus Dissertationum.

I.		
De Aere, solo, aquis & locis Lipsiensibus.		pag. 1
II.		
De Salubritate Silesiæ.		69
III.		
De Incolatus montani salubritate.		108
IV.		
De thermis Hirschbergensibus.		149
V.		
De Fonte soterio Kukusensi in Bohemia.		227
VI.		
De Fonte Carolino, Molari sic dicto ad Thermas Carolinas.		275
VII.		
De Balneis particularibus.		294
VIII.		
De Equitationis eximio usu medico.		344
IX.		
De Frictione.		429
X.		
De Motu ventriculi & intestinorum peristaltico.		475
XI.		
De Tunica intestinorum Villosa plurimorum morborum foco illo- rumque curationis subjecto.		517
XII.		



	XII.	
De Colo Intestino multorum morborum nido &c.		556
	XIII.	
De Morbis frequentioribus & gravioribus pro sexus diver- sitate.		589
	XIV.	
De Aegrotantium conclavi,		630
	XV.	
De Morborum per manuum adtrectationem curatione.		735
	XVI.	
De Ligaturis dolorificis.		757
	XVII.	
De Vinculis Chirurgicis.		778
	XVIII.	
De solvendo bono corporis habitu.		814
	XIX.	
De statu convalescentiæ.		847
	XX.	
De morbis convalescentium.		940





Q. D. B. V.

I.

DISSERTATIO
PHYSICO - MEDICA
DE
AERE, SOLO, AQUIS ET LOCIS
LIPSIENSIBVS.

PROOEMIUM.

EXploratum est atque manifestum, pro vario cœlo variam esse hominum naturam, variam sanitatem & vitam, varios morbos, imo mores quoque varios. Magni ideo interest, quali aëre fruamur, puro tenui, sereno, & salubri valemus, reficimur, atque gaudemus, ab impuro crasso, inconvenienti, languore afficimur & ægrotamus. Quodsi autem aëris (quo nomine & aquam & terram & ignem & astra intelligi volumus, quia hæc omnia intercedente prope ipso aëre nos afficiunt) qui in nullo loco est qui in alio, consideratio adeo sit necessaria, optandum omnino esset, ut jucundum pariter atque utilissimum hoc studium a curiosis naturæ & medicinæ indagatoribus ulterius ex dignitate investigetur, promoveatur, ampliatur, ita futurum esset speramus, aërologia ut perficiatur magis, & Chorographia medica instauretur, quæ ab H. VEESCHIO, in *Somn. vind.* & LINDENIO, in *manuduct. ad med.* inter desiderata medica merito adhuc reponuntur. Me-
A dico

dico itaque hic labor, hoc opus sit, imprimis patriæ, cui vitam debet & sanguinem, amanti, aut certo in loco medicinam facienti, ut secundum ipsius Hippocratis ductum exacte consideret aërem & affectiones potissimum ejus perspectas reddat sibi, quomodo ille se habeat pro urbium & locorum situ, telluris & aquarum indole, atque pro diverso solis & ventorum accessu & recessu, &c. ex quibus omnibus mutationes & alterationes suas mutuatur, & in ea consideratione ad specialia quoque descendat, ut salubritatem aut insalubritatem loci perspiciat exinde, quæ ad morborum Epidemicorum maxime & Endemicorum procreationem faciunt, quæque hominum ad morbos dispositiones indicant, & quæ in salutem rursus eorum cedere possunt, &c. Natura enim loci, quæ per urbes, oppida & pagos variat, ubique & mala habet sua peculiaria, eaque format, ac non raro etiam temperat ea ac corrigit, ut sæpius diversa admodum vix unquam plane eadem facie appareant. Adeoque in salutari medica arte, in cognoscendis iis, quæ exinde debemus expectare, quæque quibusve avertere, juvare, moderari, corrigere aut contrahere, & in historiis & observationibus medicis conscribendis, quibus medicina certior redditur, augetur & stabilitur, ac Medicus consummatus rerumque suarum certus evadit, magnæ hæc sunt considerationis, maximæque utilitatis, &c. Sed de his & similibus etiam Pathologorum libri ut plurimum silent. Agnoverunt quidem hoc optime jam Veteres, quibus examinandi nimirum naturam cujuscunque regionis corpori humano an nocivæ an proficue methodus ideo usitatiores erat, ac huic potius quam pharmaceuticis remediis studebant. Etenim laudi maximæ, magno illò medicinæ parenti Hippocrati ducitur, quod per varias regiones itinera fecerit, ut in patria interea ægris mederetur, Polybum interea aliosque discipulos civibus suis, Cois relinquens, medicamina exotica collegerit, variam medendi methodum investigaverit, naturam & artem illarumque variationes ac uberrimum penarium diligentissime sit perscrutatus, experimentaque instituerit & medicinæ effectus & successus per multa loca cognoverit, simulque constitutiones aëris cujusque temporis exacte observaverit, ut habent WIGANDVS in *Tr. de Philiatror. German. itiner.* atque SORANVS, conf. & D. SIMON PAVLI in *Orat. inaugur.* GALENVS & varias peregrinationes terra marique discendi causa laudatissime suscepit. Juxta hos hoc nomine quoque præcipue notissimi atque celebratissimi sunt DEMOCRITVS, XENOCRATES, CRANTOR, LACYDES, THEOPHRASTVS, MELCHIOR SEBITZIVS, TH. BARTHOLINVS,

NVS, IAC. SPONIUS & nostro ævo PITTON. de TOVRNEFORT. BERNIER, & E. KAEMPFFERVS. Ideo & sua laus merito ac commendatio manet eos Viros cordatos ac diligentes, qui nostra hac ætate meditationes suas ac studium in indagandis iis, quæ ab aëris constitutione, ac victu, ac vivendi ratione cuius loco propria, atque ex manifestis mechanico-physicis causis proficiscentibus, ac quæ tam ex præcedenti quam præsentī tempestatum constitutione dependent, iisdem prædicendis riteque curandis collocarunt, quorum celebr. SYDENHAMVS, RAMAZZINVS laudatissimi sunt antesignani. Atque cum viderim operæ pretium fuisse MARSILIO CAGNATO ac LANCISIO de aëre Romano, RENATO MOREAVVIO de aëre Versaliensi, CAES. GRAMMIO de aura Chiloniensi, BARTHOLINO de aëre Hassniensi, aliisque egregiis Viris de aliorum locorum aëre illorumque conditione peculiare libellos comparandi, convenientissimum hinc & ego iudicavi, esse hic aëris Lipsiensis, celebris loci, soli felicitis, inclytæque telluris, qualemunque etiam considerationem, esse & descriptionem, visumque mihi fuit semper ex bono publico omnium fore, si cognitio ejusmodi nostrorum locorum, physico-medica non inculta aut deserta penitus jaceret. Cum hoc firmiter persuasum mihi habeam, intentionem hanc meam eo utiliore fore si & alii hanc utilissimam materiam ulterius & amplius perscrutandam tractandamque susciperent. Svadet hoc pergratæ mihi habitationis locus, hortatur ac movet reiteratis etiam vicibus communis Medicorum Præceptor HIPPOCRATES in elegantissimo tractatu DE AERE, AQUIS ET LOCIS. Equidem ex specula quasi jam prospecto censuram, quam Tu, L. B. qui paginas has de Lipsiensi aëre, a. & l. conscriptas evolvere vel inspicere dignatus fueris, sis laturus, nempe in illis parum esse Lipsicæ elegantiae, parum convenientiae, parum accuratæ elaborationis, atque operis docta arte parati, quod Lipsiensium gustui judicioso & delicatissimo placere vel iis arridere posset. Fateor lubenter, eas esse rudes adhuc & non satis exasciatas, esse pro politissima Lipsia non satis politas. Non solum sistunt amœnissimos & bene cultos hortos ac ædificia elegantissima sed & aërem tradunt & ventos instabiles, interruptos, intempestivos, sæpius parum suaves, horridos, asperos, non raro oculis mentique adversos. Tractant terram sentibus impeditam, incultam, inæqualem, sterilem, sibi relictam passim non nisi inanem, proferentem zizaniam loliumque urendum. Tractant eadem sylvas incomptas hispidis vepribus ubique interdistinctas & lucos obscuros formantes, multas, di-

verfas lignis adhuc impolitis arbores alentes. Loquuntur de pratis, agris, herbis & floribus, plantisque acceptis atque adversis sine ordine abundantibus. Exhibent eadem simplicem & turbidam aquam, sistunt copiosam in urbe hominum turbam, ac inconditum sæpius accurentium agmen. Quod si itaque non satis excultus tibi labor videatur, cogites, hunc genium atque indolem aëris, ventorum, terræ, aquæ, & tumultuantium turbarum referre, cum rei que ipsius natura convenire, ideoque veniam dabis scriptis, interrupta conturbataque meditatione, literis consignafis; Insuper & habebis me excusatum; si forte tibi quædam non arrideant, quia vera sunt (nam secundum illud tritum dictum: veritas odium parit) utilia noxiaque tradantur necesse enim est; neque cum Demetrio, sculptore censura verenda, quam quondam incurrebat quod in efformandis suis columnis naturam potius quam decorationem spectasset, eoque hæc magis utiliter afferuntur, e quibus ad emendationem gradus sit.

§. I. **L**ectissima Lipsia est flos ac decus Misniæ, gemma urbium, cuius considerationem jam aggredimur physico medicam. Primum igitur oculis metiamur singula fixis. Contemplemur ejus interiora pariter ac exteriora circumjacentia loca, regionem, situm, ventos, aquam, tellurem, campos, prata, sylvas, hortos, & quæ in hoc genere præcipua cognituque digna sunt, ut ad singulorum pensitationem nobis constet, quæ ad aëris nos undique ambientis, & quem continuo inspiramus, salubritatem faciunt, quæ minus.

§. II. Aëris enim, (fluidi illius humidi, pellucidi, rari, gravis ac elastici indeque spirabilis; ex diversis particulis conflati, immenso spatio diffusi, omniaque complectentis, omniaque pervagantis) status diversus quoad compagem per affectiones conspicui, juxta solem, lunam, planetas reliquos, cœteraque forsan sydera secundum eorum adspectum ac influxum varium, ut autumant Astrologi, ex varia regionum natura, variaque conditione aut positu, quomodo ea se habeant invicem, qualiaque effluvia in aërem mittant, potius deducitur. Nimirum, quod aër alius non solum sit humidus magis, alius ficcus, frigidus alius, alius calidus &c. sed & quoque alius his, alius aliis effluviis sit imprægnatus, alius foetidus, putridus, nocivus, alius rursus fragrantibus, laudabilibus blandis, balsamicis, salibus volatilibus (ob quæ in nostra Europa præ aliis aër avinionensis celebris habetur) & similibus, iisque quandoque, diversissimæque naturæ particulis, quoad magnitudinem, figuram, texturam & motum

tum inibi congestis, dictis debetur: pro varietate enim tempestatum, solis & aquarum terrarumque diversi generis exspirations in aërem semper emittuntur. Per solem ex humidis &c. partibus innumeræ attoluntur & traiectione ipsius aëris pro diversis telluris locis perpetuo partes quædam a reliquarum compage separantur & in aëream massam sub exhalationum, halituum, vaporum, atomorum forma deferuntur, & non raro admixtæ in fauces ac nares per aërem vel sapore odoreque percipiuntur. Quæ cum non sint eadem omnes simul & ubique semper, & si quædam junctim adsint, ab aliis iterum causis dissimilisque naturæ effluviorum non pari æqualitate discurrente occursum invicem facto ac mixtione quandoque & confectione quasi disjiciuntur, avertuntur, impediuntur, destruantur, immutantur, alterantur, corriguntur aut implicantur. Pro effluviorum igitur horum in atmosphæra abundantia aut paucitate, diversitate, rarefactione, aut condensatione, agitatione intensiori aut remissiori eadem ut aut crassa magis est aut tenuis, pura aut impura, calidior aut frigidior, ita & salubris quoque aut insalubris magis &c. Nec minus aëris pondus pro vario locorum ac regionum situ & positu admodum variat; cum enim partes illius elasticæ sint ac plicabiles aliæque aliis superincumbant, ut inferiores a superioribus incumbantibus premantur, sequitur quod inferiores pressæ arctius inter se jungantur densiores magis & spissiores reddantur & graviores; superiores vero tenuiores, expansæ explicatæque magis sint. Quo magis igitur eadem terræ sunt propiores, eo graviores quam terra remotiores & altiores, eo tenuiores. Quod ex varia mercurii currentis in tubo Torricelliano contento suspensione satis elucescit, prout in locis excelsioribus & vel declivioribus aut etiam subterraneis experimentum instituitur, quales observationes bene multæ legendæ sunt in *P. Fr. Tert. de LANIS Magist. art. & nat. T. II. L. VI. c. V.* Per hanc aëris gravitatem aut levitatem majorem aut minorem & hinc pendentem pressuram liquidi interioris ad tuendum vitalem in animalibus circulum necessarium elaterium varie afficitur, intenditur aut remittitur & temperatur atque simul solidarum partium in corporibus animalium renitentia augetur aut minuitur, propulsioque sanguinis per vascula pulmonum, muscutorum, cutis aut promovetur aut inhibetur, aut conservatur, quod ex animalculis campanis vitreis inclusis & aëris extractione antliæ pneumaticæ ope colligere est, ubi illorum vita varie mutari potest. Ejusmodi causæ, salubritatem aut insalubritatem aëri inferentes; non nobis patent statim & semper, ut etiam halitus nunc visibiles sunt, nunc invisibiles, nec di-

ligentiori indagine, nec altiori, etiam non raro impetrantur, si accipiamus, quæ referuntur nobis, ut fertur a PLINIO, *Lib. II. c. 96.* Crotonem & Locros ob ignotam cœli quandam benignitatem pestem sensisse nunquam, viciniam sæpissime. De Charonia & Siciliæ oppido habetur, eam adeo esse insalubrem, ut pauci adolescant ibi, licet optime alias posita sit. Nondum pariter Scriptorum consensus convenit (habita & forte victus reliquorumque ratione) cur incolæ urbis Roterodamensis & præcipue vici Mahchland Schluys præ aliis Belgis laborent calculo v. W. WOLFFII *Observat. Med. chirurg.* cur vulnera colli in Hungaria felicius curentur *Ephem. C. IV. Curios. D. 1. An. IV. & V.* cur Florentiam, quæ cum quavis Italiæ urbe salubritate certat, petechiæ & apoplexiæ frequentes infestent, & cur Neapoli, quæ huic vix ea ratione secunda urbs censetur, paucissimi senescant, cur Carpetanos, tertianæ quartanæque febres frequentes afficiant, cum tamen universa eorum regio una cum Metropoli omnium consensu aëris salubritate & aquarum bonitate emineat, adeo, ut Hispaniarum Reges quondam permoti sint, hanc cum Toleti urbe antiquissima Regum Regia permutandi eligendique Madritum. Curque Venetiis ea pars urbis, quæ ad D. Nicolai tractum protenditur, morbis minus obnoxia sit, & magis longævos homines producat. EGNATIVS *Lib. VIII. exempl. c. IV.* Conf. FIDELIS, *de Relat. Med. p. 13.* Rursus ejusmodi est, quod e contrario quoque sint quædam regiones & loca, quæ insalubria videntur, quarum tamen incolæ fani, vegeti atque vivaces deprehenduntur, imo dantur quædam, quæ a certis quibusdam morbis plane immunes, tamen vix aliis bonitate aëris præditi sunt, ut in Hungaria insalubri alias regione ob aërem humidum & gravem morbus comitialis, æque ac in Belgio spasmus rarus, & in Scotia quartana febris ignota plane est, vid. DONIVS, *de rest. salubr. agri Rom. p. 7. & p. 11.* addit idem Romæ stationem equitum custodiæ pontificiæ ac inquisitionis carceres in insaluberrimo manifesto loco esse positos, salubrius tamen ibi homines vivere & præ aliis Romæ locis senio confectos reperiri; quod etiam LANCISIVS confirmat *Hist. Rom. epidem. cap. 2.* In magna ægrotantium epidemica lue frequentia ædes Inquisitionis nullo morbo tentatas fuisse, qua de re hic hanc quidem rationem addit, quia aër e vicinis fornacibus tepefactus esset & loci situs ab aquilonibus tectus. Ejus modi est, quod refert. KOZACK *in Tr. de Sale p. 42. Sect. XXVII. Cap. 1.* in Bohemia, cives Litomerienses non nisi podagra & calculo laborare, sed Melnicenses nisi phthisi & tussi cum ingenti manuum tremore, quamvis non nisi tribus milliaribus ab invicem distanti-

diffideant. Locis enim quibusdam (ut loquitur *Helmont. in Tr. de Lithiasi Cap. V. p. 31.*) infunt semina morborum aliquot, euduntque aptas sibi materias, si easdem non reperiant sibi obsequentes aut desponsatas. Etenim ad remotas terras Europæ nostratibusque cibis usi affliguntur peregrinis morbis atque topicis. Alibique passim idem indicat ut *Tr. de Tum. pest. p. 245*, inquit: *Suntque namque in aëre quædam quæ odore narium percipiuntur, alia denique, quæ per canes solum distinguuntur, suntque & alia demum omnis odoris expertia licet non contagii.* Quare quando ejusmodi perspexit *Illustr. Baco de Vorulam. in Hist. Vitæ & Mortis p. 517.* notanter dixit: occultam esse rem salubritatem aëris & potius experimentis quæ simul indicat, quam discursu & conjectura elici.

§. III. Atque aër cum effluviis omnis generis, quæ in eo volitant quibusque ille est imprægnatus, & quibus vehiculum se præstat, per varias vias, meatus eosque abstrusos & media, per os, nares, aures, œsophagum, asperam arteriam, per alimenta salivam, inspirationem, &c. De quibus consulendi sunt *PECHLINVS, Part. I. Medico-Phys. Observ. 52.* *POTERIVS, Obs. Cent. II. 62.* *J. B. SCARAMVCCIVS, in M. C. Decur. II. an. 9. Obs. 204.* subtilibus crassioribus magis humidis & terrestribus, etiam (quas *Dygbæus* speculo caustico calcinatos asserit) medicamento-
sis bonis malisque, morbosis, contagiosis visceribus massæ sanguineæ ac humoribus advehitur; eosque & eorum motum & mixtionem afficit & alterat varie, iis maxime, quæ sunt e genere salino sulphureorum, tenuiorum agiliorum, fermentativorum, causticorum quarum tenuitatem & subtilitatem, penetrationemque ex illis experimentis colligere potes, quibus sulphur vulgare & antimonii in spiritum fumantem redigi potest, ut argentum cistis ligneis inclusum fusco colore induat, aut quando argentum vivum corpori humano inungitur, aut cantharides manu detentæ vel emplastro applicatæ in meatibus urinariis dolores excitant, ut expertus est illustris *BOYLE, v. ejus tr. de subtil. effluv.* Et ut corporum partes fluidæ varie sic afficiuntur, ita, & solidæ earumque tonus pro indole aëris alterantur quoque, quali enim aër temperie afficitur, tali etiam corpora afficit. Quis est, qui nesciat, a frigore cutem constringi, ab humido & tepido eam rariorem reddi atque flaccescere, coria molliora fieri & funes longiores, fides relaxari, carnem ac vasa interjacentia ab aëre calido langescere? &c. Ex quibus haud obscure colligere licet, qualem indolem ac naturam aër possidet, eam similemque spiritibus animalibus, simulatque singulis humoribus demumque corporis aliis partibus eum impertiri. Amplius inferendum est aërem cum variis

riis mixtus omnia ambiat, feriat, penetret, cumque præsertim in omnia fermentescibilia & fermentescentia magnam habeat potentiam, ut hominum & animalium corpora, ita & vegetabilia esculenta & potulenta alterare, &c.

§. IV. Jam jamque recta adeamus Lipsiam nostram, ut quæ habemus instituta persequamur. Oculis primum itaque si metiamur, undique urbem curiosis atque attentis, ac ordiamur ab ortu, & ab interioribus urbis in urbe quasi constituti, deprehendimus ejusdem ædes illarumque frontispicia, fenestras & ostia maxima ex parte orientem (optimam plagam) salutare, oppositas autem e regione totidem fere occasum; minorem earum propemodum numerum meridiem & vice versa pari ordine septentrionem spectare. Forum ut amplum est. planum atque spatiosum, ita & plurimæ plateæ largæ & longæ ac regiæ; quibus vel urbs Panormitana, vel Parisiorum Lutetia, vel Granata Hispaniæ & Linzium Austriæ, utpote quæ urbes hoc nomine præ aliis apud Autores celebres sunt vix elegantiores monstrabunt; interjacentibus tamen nonnullis arctioribus minoribusque; quæ transversæ majores dividunt, pauciores earum ad orientem & septentrionem, plures ad meridiem & occidentem directæ excurrunt, & ventorum ex his oris spirantium incursus liberius excipiunt. Et licet illarum aliquæ sint paululum inflexæ atque angulosæ & rursus aliquæ ita dispositæ, ut ædificia habeant objecta atque quas aura minus libere possit transire, adeo magni tamen momenti id vitium apud nos esse vix existimamus, uti quidem multi existimant, & si ambabus largimur, inflexas præ rectis & liberum exitum habentibus minus esse commodas, ut intuentibus minus illis jucundum etiam præbent spectaculum: Flexura eidem umbrosas aut tenebricosas reddit & sol & venti oblique magis petunt eas, nec libere, & per rectam lineam perflant, nedum ex omni parte admittuntur, & attingentes obstaculum quoddam & plura quasi inveniunt latera, aërem ibi conclusum quasi collidunt & turbant, inæqualemque reddunt, hic dividunt; illinc in unum velut colligunt agmen & exhalationes pulveresque in iis non satis ejiciuntur, sed diversimode moventur ac retinentur magis, sicque aër ibi crassus atque impurus manet, atque aëri in civitate alteratio haud satis conveniens inducitur. Nihil quoque causæ nobis est, ut nos existimemus cum veteribus Romanis platearum angustias salubritati nobis uti ipsis magis conducere, de quo tempore Neronis I. R. post urbis incendio excidium palam conquerebantur atque veteris Urbis formam, ut tutamen adversus solis æstum & inclementiam ventorum præfe-

præferebant, ut habet locus apud TACITVM in *Annal. Lib. XV. n. 43.* ubi sequentia leguntur. „Erant qui crederent veterem illam formam „salubritati magis conduxisse: quoniam angustiae itinerum & altitudo „tectarum non perinde solis vapore perumperentur; ut nunc patulam „latitudinem & nulla umbra defensam graviori æstu ardescere. Ratio statim liquet, quoniam in angustis viis aer umbrosus, impurus, variisque exhalationum modis infectus ex iisdem urbis locis excitatis crassus, densus atque retentus, & in seipsum quasi restrictus ob defectum motus & ventilationis est. Hæc civitatum illarumque viarum atque itinerum conditio tantæ considerationis est, ut observet & referat QVERCETANVS, vid. *Dietet. polyhist. p. 195.* Tolosanam urbem sæpe peste fuisse tentatam, ex putridis humiditatibus marini venti inquinati, advectis, dilatatis verò urbis vicis & compitis purgatisque ex iis diligenter stercorebus, aëre captato libero liberaque ventorum tramite, sicque ventilatione meliore aëris procurata, urbem ab illo consveto contagio liberatam fuisse: Varia adhuc insuper interiora urbis ita quoque se habent, ut ibi semper fere sensibilis aëris ventilationi inserviens, efficiatur ventus, ut sunt forum atque imprimis templorum areæ spatiosæ quippe si aer in aream amplam transit in ædificia non solum alliditur, resilitque & expanditur magis, sed & in angulos angustioraque loca circumposita se recipit & in adjacentes plateas inæqualiter licet sic spirans pertransit. Non alibi vero ventorum copia major, quam in area templi Divi Thomæ: oppugnatur hæc urbis pars usque quaque maxime ab occidentalibus ventis, & eorum primum impetum recipit, qui ordinario cum strepitu & vehementia spirant, multasque densas & aquosas caligines & nubes suscitant. Majori enim copia in ista cœli plaga ex humidorum & paludosorum istorum locorum exhalationibus vernali præsertim autumnalique tempore in aëre generatur, ac liber aditus per demissiorem situm conceditur, ibique per arctiores fauces & angustias comprimuntur, sicque acuuntur repercussione ædificiis publicis objectis sinuationeque per angulos agitati, inter se quasi pugnant ac multiplicantur, ac die nocteque sonitu magno sæviunt.

§. V. Urbis ea pars, quæ ad orientem & meridiem protenditur, elatiorem obtinet situm patentes nec impeditos obstaculis agros longe lateque protensos spectantem, firmioremque propemodum & sicciorem terram, unde & infestantibus atque obsidione cingentibus quondam hostibus urbem, hæc regio opportuna modo fuit ut cuniculos agerent, reliqua enim undique occultum opus & munitiones

non accepit. Ubi huc oculis ventum est, ante omnia meridiem versus adhuc muri crassi celsique atque elatæ moles portarum, arcis & ædificiorum publicorum prominent, quas extus alti aggeres eique fortes in quoddam sanitatis tutamen circumveniunt, qui ventos meridionales insalubres ab interioribus urbis avertunt simul & coërcent commode, quamvis etiam non negandum sit, eosdem foetidos halitus retinere nec eos excludere. Hacque situs conditione Lipsia auram refocillantem captat, æstate & solis exorientis aditum emissos collectosque vapores levantem calore ac dissipantem etiam ante productam diem admittit, temporem recipit hyeme; nec languescentem eum circa vesperam habet. Urbis pars reliqua, quæ ab occidente ad septentrionem excurrit decliviori magis humidoque loco fundata est, maxime ea in longitudinem urbis porrecta platea, quam incolæ Prulium vocant, quæ ut plerique non sine causa credunt, a palude nomen accepit. Imprimis vero occidentalis angulus, quo per portam itur Ranstadiensem omnium declivior est, unde & omnes sordes, sive ex ductibus platearum communibus, sive ex latrinis repurgatis redundantes, ibi ex tota propemodum urbe, vel saltem hac ejus parte confluunt, & per aquagium commune effluunt. Hinc de hac civitatis parte observatum est, conclavia in plurimis ædibus præsertim in Prulio ad terram madida esse, adeo ut solum & parietes exsudent fereque humore suffundentur atque reposita ibi facile madefiant, situm contrahant, & mucore quodam lanuginis instar molliusculo & candido brevi obducantur & vermibus exedantur. Ex his itaque memoratis infraque ulterius memorandis statim apparet, Lipsiensis aëris salubritatem quoque pro ipsius urbis partium varietate variam esse. Nemo facile nostratium inficias ibit, v. gr. in plateis Grimmeni & Petrina proximeque adjacentibus & confiniis in majoribus spatiosis & rectis, ut iis quæ der Neumarck vocatur & qua ad arcem itur, salubrius vivere, quam in Prulio, plateis sylvæ (Haynstrasse) & macellariorum Fleischer-Gasse &c. & minoribus arctioribus & reflexis atque conclusis.

§. VI. Domus privatæ, quas plateæ primariæ continent, magna ex parte ex lateribus coctis exstructæ sunt, decenti fenestrarum dispositione, numero & magnitudine conspicuæ & quoad interiora quoque sat spatiosæ ac amplæ, quorum plurimarum splendida structura, splendidusque ordo, forma certantium omnium intuentium oculos in semet convertit atque allecat pedesque quasi illaqueat haud immerito, ut & semper inter tres elegantissimas Germaniæ urbes juxta Wratislaviam & Mona-

Monachium numerata sit, vid. *CLVVERIVS Geograph. Lib. III. c. XIII. §. 4.* ast nulli harum quam sibi similis. *Ædes ephyreas* eas esse dixeris, de quibus dici posset:

Arcibus æquandæ sunt & sunt turribus ædes,
Principis est magni regia quoque domus.

Jampridem Lipsia Magna (intensive) vocata atque Lipsiæ aureæ sublimia tecta & marmora huc longinque advecta & a Jul. Cæs. Scalig. memorata sunt, & forte non ingratum erit, totam hic legere Inscriptionem ab ipso compositam, ut ea invenitur in M. STEPNERI *Lauro Lips.* p. 362. seq.

Lipsia, se ostentans sublimibus aurea tectis
Lumina dum saturat mens perit icta fame
Vecta quibus ratibus longinquæ marmora terræ?
Unde frequens flavi pura nitela Tagi?
Huc Cyprum huc Temesum huc Arabas huc Serica dices
Sedibus evulsa huc Indica regna suis.
Cum gemma bibitur vincuntur nectare gemmæ:
Sed linguæ varius vincit utrumque nitor
Nec Germana tamen vitatur Lipsia luxu
Ast hunc Germanum Lipsia magna facit.

Sed o domus antiqua, quam dispari domino dominaris! quæ verba Ciceronis huc commode quadrare videntur. Longissime hodie mutata, longissime decora atque amœna aucta Lipsiæ facies est, & splendor oblectans, dives commerciorum fœnus atque sublimis dignitas eminent, & adhuc in dies ad delitias & decorem omnis lapis eruitur, cæduntur gentium sylvæ, æris ferrique usus jam auri argentique quoque in extruendis & decorandis domibus, ut Fabii Papirii verba apud *SENECAM Libr. II. Contr. 1.* huc mihi trahere liceat. Eadem insuper ubique fere in fastigia alta insurgunt, quæ tres contignationes in plurimis, in multis quatuor explent, imo quædam altius adhuc extolluntur. Hæc plurimarum Lipsiensium ædium conditio est, hoc fastigium hocque culmen ad quod Lipsia pervenit, haud tamen negandum (quod omnibus urbibus est commune) multas etiam esse arctas, ligneas, quasque facile caries exedit, male materiatas atque quarum fragilem materiam celat pictura, minus perspirabiles, minusque illustratas a sole, umbrosas, tenebrosas & fenestris parvis, angustis, raris instructas, quæ olim ratio ædificandi fuit, an aëris vitium hoc ipso modo avertere voluerint (ut quon-

quondam fert sententia Medicorum) jam affirmare aut disquirere, nostrarum partium non est, neque hujus loci. Hoc potius addere nobis jam convenit, habitationes longe esse salubriores, quarum fenestræ in optimas coeli plagas, quæ orientales sunt, bene sunt dispositæ, sique sint altæ & largæ, ut perspiratio liberior concedatur, & salubrioris, auræ accessus & illustratio solis, sique aër forte avertendus sit aut alterandus, ex facili obturando easdem id fieri potest. Reliqua eo nomine in medicam veniunt considerationem, quod ædificia ex lateribus coctilibus, & lapidibus erutis extructa frigidiora sint, & salubrius & amœnitus ibi æstate imprimis vivatur; frigidior enim efficiunt aërem ipsa hæc ædificia & plateas perspirantem, quia ætherem rarefactum licet ad quandam distantiam a se repellunt & reflectunt densiora eundemque intra se ad centrum premunt coguntque. Si modo ulteriorem adhuc hac scilicet re comparisonem instituere velimus inuendum est ædificia ex lapidibus erutis extructa inhabitantium sanitati non æque conducere ac ea quæ ex lateribus coctis sunt coagmentata, quoniam per ignem hi magis sunt temperati. Lapides autem eruti pariter ac ligna aëris indolem assumere videntur, hinc mutationem aëris per humiditatem quam tunc temporis amittunt indicare solent. Quæ vero parietibus ligneis, luto saltem vel calce coagmentatis, sunt ædificata, aër quidem ficior sed tepidior, æstate igitur minus conveniens ibi existit. Conf. VERV-LAM. *Hist. N. p. 954*. Atque domus bene materiata & ex crassis & firmis parietibus, nec facile rimis obnoxiiis constructæ tempestatibus resistunt atque adversus coeli flatuum vaporumque injurias tutum inhabitantibus præstant præsidium. Hinc Cartaginenses, ut se contra aëris ventorum, imbrium & maris halituum inclementiam magis se munirent ædificiorum parietes pice obducebant. Spatiosa vero ædificia, & ampla, & in quibus præsertim transitus conceditur, a sole magis illustrantur & aëre ventisque perflantur, adeoque ad aëris puritatem & salubritatem multum confert id ipsum. Domus cæterum nimis altæ, si imprimis plateæ sint arctiores aërem ibi minus salubrem, obscurum, suffocatum, minus illustratum minusque perflatum & impurum magis efficiunt, quare ædificia nimis alta in nostris temporatis terris minus probanda ac quidem in calidioribus uti in nostra Europa, in Hispania atque Italia præcipue Genuensi urbe. Hanc aëris impuritatem & densitatem eo magis percipiunt, quo propius ad terram habitant, superiores enim contignationes in ejusmodi locis ordinario sunt salubriores, effluvia enim heterogenea impura, humida, crassa, adeoque graviora circa terram

ram potius retinentur, pura vero ac tenuia altius moventur. Dicto faciunt fidem plurima Italiæ loca, exhalationibus nocivis famosa, præsertim ad lacum avernum, spelunca canina, ubi exhalationes animantia necant circa humum exceptæ, ad certum nam saltem spatium ascendit noxa, ultra quod sine ea spiritus ducitur. Sic etiam in Insulis ubi Piper nascitur, quæ Bantam, Pedir, Sumatra, Mozambiqua Java vocantur, eam esse soli effluviorum malitiam, ut advenis terra insistere sit periculosum & humi dormire lethale. uti H. MUNDIVS in *operibus medico-physicis* p. 47. scribit. Spectat huc hocque pariter declaratque Mariotti experimentum in nitri collectione, per quod deprehendit in contignatione domus quarta nitrum non regenerari ex terra nitrosa elixiviata. Siquidem & constat in inferioribus ædificiorum partibus salia deliquescere citius, imo omnia corpora, quo sublimius in aëre hærent, eo sicciora sunt, argumento, maiorem esse in locis terræ vicinis aëris humiditatem & gravitatem, &c. Qui rem e propinquo magis arguunt, in modo domus Lipsienses olim quidem construendi, leve quoddam vitium ponunt, nec sine ulla prorsus ratione: nimirum multas earum ex veteri adhuc ævo relictas fastigia per contignationes habere exerta longiusque propendentia vias deformiter obscurantia ac tecta prominentia super imposita propemodum omnibus, plurimis adstructa esse meniana & inferioribus partibus suggrundia, cum aërem hic caliginosum reddant ac quasi concludant, angusto superius spatio relicto, ac effluvia inibi retineantur magis, obversis egrediendi obstaculis etiamsi tempore æstivo ferventes molestosque solis radios arcent, æstumque nimium temperant ac umbram concedunt, quod commodum, quam delectationem forsan Veteres spectaverunt. Hoc incommodo imprimis Londinum Angliæ caput laborat, in quo exporrecta ædium tecta magnam quoque platearum contegunt partem, quod in LANSII reprehenditur *consultationibus contra Britan.* pag. 567.

§. VII. Ipsa urbs una cum suburbiis numerosissimam alit incolarum copiam, Mercurio atque Minervæ amica, grata hinc peregrinorum hospita. Academia enim præclara omnium bonarum literarum custode atque altrice celeberrima & florentissima, multorum eximiorum literatorum confessu illustris, atque emporio magno, copioso frequentissimo & opulento mercatus celebratissimos concelebrante multa undique apportante multisque impartiente artificum, opificum & mechanicorum omnis generis officinis admodum insignis. Quotidie hinc inde com-meantium & discurrentium multitudo vias occupat & obstrepunt, fre-

muntque, ut in emporiis magnis confuevit negotia, frequentissime hic exteri commercia quærunt, magna hinc mercatorum copia emtores & venditores etiam longissime remoti huc accedunt sæpissime præcipue nundinarum tempore, ubi properantibus in multos incurſitandum eſt: Merces enim quæcumque de quibus modo cogitare quis poteſt hic congregatæ ac expoſitæ inveniuntur easque tanta in copia ut non e multis civitatibus ſed ex orbis univerſi regionibus eas conquiſitas fuiſſe ſit crediturus. Atque Academiæ alumni magno in numero, quam vix alibi, per horas per plateas curſitantes frequentant collegia. In foro vero præſertim a meridie & circa vesperam qui ſpectatum veniunt ſpectentur & ipſi & qui obambulando animum recreant turmatim oberrant. Nulla hic ſolitudo, nullus hic locus vacuus eſt, nullus angulus, quem frequentia inhabitantium non occupet, nulla domus deſerta eſt, imo ædificiorum conclavia hinc inde populo ſunt tota repleta. Idcirco de Lipſia dicendum, quod de urbibus magnis & frequentibus civitatibus dicitur propemodum omnibus, aërem ibi non ſatis exiſtere purum & tenuem, ſed variis & copioſiſſimis effluviis heterogeneis, foetidis, impuris, ex hominibus, animalibus, hypocauſtis, officiis, ſtabulis, cloacis, latrinis fimi cumulis & ſcrobibus, quiſquiliis, purgamentisque variis continuo exhalantibus, imprægnatum, & ex omni parte quaſi concluſum atque retentum. Horum effluviolorum variorum & noxiorum ut plurimum, in urbibus undique concurrentium turba & copia omnis omnium ibi convenit, & in unum quaſi agmen coacervatur, ſi maxime in anguſtum coeunt ſpatium, aliorum in alia diverſorum impuſus ſit & arietatio nec facile depelluntur. Non ſolum impurus ideo redditur aër & craſſus, ſed & calidior, is enim majorem ſemper calorem concipit, quam tenuis & purus. Hinc in minoribus oppidis & pagis ac rure, quæ loca liberior, purior & ſalubrior aër afflat, quæ ros matutinus, occultum vitæ pabulum, humectat, quæ fragrantia florum in prætis, agris, ſylvis, montibus convallibusque recreat, homines in domiciliis humilibus & arctis luto, ſtramine ac ligno ſaltem coagmentatis, licet degentes, firmiori ac conſtantiori ordinario fruuntur ſanitate, vigore atque longævitate iis, qui urbes majores & populofas, pallatiaque ſuperba, alta ac ſpatioſa optimeque materiata inhabitant. Expertis omnibus conſtat, quando in aëre ſereno & ruſtico verſantur homines, corporis & animi vires eſſe liberiores, eſſe auctiores, atque ſe ſentire alacriores protinus, appetitum augeri omnesque actiones inſtitui expeditius &c. Imprimis vim liberioris aëris deprehendere licet ſi convaleſcentes morbo diuturno cubiculo

culo lectoque affixi, imprimis qui phthisi aut laborarunt aut adhuc laborant, in rus conferant se, sensibilibus enim ibi recreantur. Rursus urbium foetorem percipient certius rure redeunt. Hinc apud Medicos morbi certi urbibus populosis & magnis frequentes, in pagis autem & ubi liberiori aëre & limpidiori fruimur, rarissimi noti sunt, ut asthma, tussis, phthisis, pestis, catarrhi, febres malignæ, malum hypochondriacum, colica, podagra, ventriculi debilitates, nephritis & calculus, hæctica, scorbutus, & speciatim parturientium gravissimi & periculosissimi labores, & similes plures, qui aëris vitio adscribuntur, si excipias quosdam, qui ex vita sedentaria, curis, inordinata diæta, crapula &c. procedunt. Memoratu dignum hinc est, quod PLVTARCHVS in *Problem.* habet, Templum Æsculapii Romæ ideo extra urbem ædificatum fuisse, quia major ibi aëris salubritas concederetur. Nam ex hominum, pecudum, merciumque multitudine & opificum laboribus aliorumque adeo multorum & diversorum corporum multa quoque peregrina in aërem mittuntur effluvia, vix enim corpus tam solidum est, quod poros non habet, nullum adeo compactum, quod non effluvia emittit. Hoc haud difficile credat, qui curiosissimo Sanctorio credit, tantam fere effluvi-
orum copiam per insensibilem transpirationem excerni in solo homine, quantam vix plurimis diebus per alias vias sensibiliores & ex sola exspiratione singulis diebus ad semilibram vaporum exire, aut qui semel saltem frigidiori aëre equorum v. g. corpora fumantia vidit, qui manum speculo vel disco stanneo polito admovit &c. Adeatur hac de re Celeberr. D. D. VATERI *Disput. de Transpiratione.* Horum omnium plurima effluvi-
orum scilicet sunt insalubria, paucissimi enim hominum perfecte sunt sani & qui laudabiles possident humores, plures sunt hypochondriaci, scorbutici, cachectici, tabidi, qui pædorem spirant, hircumque olent. halitumque emittunt foetentem, &c. paucissima quoque alia ex aliis corporibus animatis & inanimatis salubritati conducunt. Accedit multitudo foedarum latrinarum, cloacarum, sterquiliniorum atque stabulorum frequentia, in quibus & circa ea fimus in cumulos congeritur & in scrobibus colligitur fimetaque struuntur atque ad plures quandoque menses remanent & putredinem concipiunt, fumosque densos & calidos, adversos spargunt, ex quo demum per urbem in rus exportatur commota camarina totam inficiens foetore viciniam. Ob ejusmodi foetores & juncta platearum arctitudine v. g. Constantinopolim sæpius pestis invadit, vid. HEBERER. *Lib. II. Servit. Egypt. cap. 48. p. 303.* & Vienna Austriæ adeo multis morbis obnoxia censetur, de quo conf.

GERBEZIVS in *Chronolog. med.* p. 125. Ex eadem sordium cumulatione febres malignas & pestilentes inductas esse refert DIMERBROCK de *peste* p. 154. Lutetiæ Parisiorum & Tolosæ Gallorum. Conf. & PALMARIUS in *Epist. & præfat. in Lib. de Febre pestil.* Quare necessaria prorsus cura sanitatis civium, ut nempe conservetur salubritas locorum publicorum & morbi verendi profligantur omnino ad Magistratum pertinet, hinc & præclare & ex dignitate a Jctis factum est, ideoque querna corona dignidem censendi vid. PLUTARCHVS *Quest. Rom. in Oper. T. II. p. 285.* Conf. DIONIS CASSII *Hist. Rom. Lib. III. p. 750.* qui salubritatem aëris, in qua omnino salus etiam civitatum est posita, sibi habent commendatissimam: Inveniuntur enim apud eos circa hoc ipsum passim multa peculiaria interdicta Prætorum v. g. ut cloacæ purgentur, hyeme non æstate, GLOS. in c. XXI. §. 1. ff. *quod vi aut clam.* COEPELL. de *servit. rust. præd. Cap. XLIII. de nocte non de die,* RIPA de *peste* c. 4. de *rem. præf. contr. peste* N. 65. ne in vias publicas stercorea projiciantur & morticina & pelles L. I. §. 5. ff. *de via publ. & si quid in ea fact.* &c. Ne intra moenia porci, anates, aliave animalia sordida alantur. STRYCK de *J. Sens. D. V. c. II. n. 32.* Atque apud Romanos veteres jam constituti erant ædiles plebis curules, ut Halicarnassæus refert, curantes, ne aëri per cloacas, aquæ ductus, vias &c. immundities aliqua inferretur. Ejusmodi certius nocent, si loci solum per se est lutosum & humidum platearum spatium arctum & cœli situsque ratio his famulatur. Sicuti enim homines refocillantur & confortantur, odoratui gratis spiritus animales augendo, incidendo ac attenuando, ut in cerebro volatiles partes majori in copia secernantur, ac reficiendo oblectandoque, ut odorum hinc maximus in medicina usus: Ita ingratis & maxime iis, quæ a corruptione & putrescentia proveniunt, humores & spiritus male afficiuntur, conturbantur, corrumpuntur &c. Hoc probe perspexerunt, qui hic L. Publico summa cum laude prospiciebant, nam auctoritate eorum, haræ (quoniam sterces suillum propter graveotentem admodum atque adversum foetorem, insensum & spiritibus ingratum aptissimumque infectioni perhibetur) Anno 1680. metu pestis ingruente ad eam avertendam lege publica indictaque multa sunt ejectæ vid. VOGEL. *Annal. Lips.* p. 785. Ob hanc quoque hominum pecudumque multitudinem hancque excrementorum copiam & ex cura neglecta & immunditie in castris adeo multi morbi imprimis si, in regionibus calidis & palustribus locata sunt, incumbunt militibus, ex adverso vero si hi puriori aëre sæpius reficiantur, adeo multas calamitates sitim famemque atque defatigationes continuas perferunt.

ferunt. In hanc rem notabile est, quod Deus T. O. M. uti videre est ex *Deuteron. c. XXIII.* populo Israelitico munditiem in castris sapientissime præcepit. Hinc forte magna ex parte magna calamitatum Ilias, quam miles germanus in Hungaria per tot annorum series in expeditionibus expertus est, cum in Turcarum castris omnia salva essent, qui munditiei sunt studiosissimi. Mirum itaque non est, si & in urbe nostra non raro æstas foetor adversus ex cura neglecta nares feriat, in plateis inprimis minoribus & arctioribus (compita enim atque plateæ majores ad munditiem satis sunt exactæ) & in suburbiis ubi ima plebs habitat, quæ messe tenuis, ut dicitur vivunt sua, ubi & ædes plerumque lignæ & calce aut luto saltem coagmentatæ sunt, & quarum hypocauftorum cubiculorumque spatium arctum, in quibus sole meridiano caligant, neque ventis perflatum satis, in quibus tot cloacæ, & magna illuvies & immundities affluit, quarumque interdum canales & ductus, communes quoque sunt minores & arctiores neque satis repurgati, sed sordes & aquæ retinentur & stagnant diutius in ipsis repletis, quæ sola causa fuit, Lugduni Batavorum & Alexandriae Ægypti, luis perniciosissimæ diu grassatæ vid. PECHLINVS *Obs. p. 244.* & DAPPER *in Descr. Africa.* Quin cives nostri norunt hos ductus per ædificia vicina serpentes diuque conclusos neque purgatos, purgantes derepente mortuos esse aut morbo maligno correptos. Quare salutis publicæ interesset, si infima plebs, quæ ut plurimum minus munditiei gerit curam, & opifices multi in spatiosis & ventis patentibus domiciliis plateisque & insulis separatis habitationes suasque officinas ponerent.

§. VIII. Equidem, (ut ad antecedentia paululum recurramus) incolarum frequentia, si modo habitationes, ædificia atque plateæ sint spatiosæ satis, & si purgatio quotidie & sedulo instituat, adeo aeri non obesset; Siquidem per multiplices observationes constat, civitates, pagos, arces, domos quamdiu frequentia incolarum & inhabitantium flourerunt aeris salubritate gaudebant optima & vice versa, quemadmodum LEONH. FIORAVANTIVS *in Regim. pestis Lib. I. Cap. LVI. p. 135.* de aliquibus Italiae locis ac urbibus, Terracina, Baja, Neptunio aliisque Romaque ipsa, advertit alique Italorum id ipsum sibi optant crasso aere pressi, ut Pisarum speciatim incolæ. Hæc enim insalubritas ex parte corrigitur tam per ipsam hominum per domos atque plateas currentium discurrentiumque frequentiam, qui itu redituque aerem movent & ventilant, quam & potissimum per ignem, qui in culinis & fornacibus accenditur, accenditur vero eo frequentius, quo frequentiores urbes

C

inco-

incolis sunt, imprimis si ligna concremantur resinosa, qualia sunt abietum, fagorum, pinorum, juniperi, per eum item, qui inter ipsas ædes instruitur pro doliorum impicatione &c. Ignis enim celerrimo suo motu & ventilatione aeris purgat eum ab omnibus vaporibus humidis, noxiis, malignis &c. eosque exturbat, partes balsamicas, oleosas, salinas, volatiles, spirituosas, acidulas, laudabiles, ex lignis concremantis putridas figentes corrigentesque, aeri per vapores communicat. Sicque per ignem corrigitur aeris quies, gravitas & intemperies. Notissimum est, quantum valeat ignis luculentus accensus in plateis & ædificiis, conclavibus in peste & morbis malignis & contagiosis. Ad quem ipsum scopum veteres jam pice, sulphure, asphaltu optimo cum successu usi sunt. Memorabile ad hoc præcipue est, (ut plura exempla non addam) pestem, quæ Venetias An. 1556. afflixit, Murani incolis (insulæ 2. mill. ipsis remotæ) qui omnes fere artem vitriariam exercent pepercisse dicitur, fornacum causa assidue ibi succensarum. Hoc adhuc præcipue scitu ac memoratu dignum est, ex observatione Illustris D. D. FRID. HOFFMANNI ex illo tempore ex quo carbonibus fossilibus Halæ usi sunt salis coctores, incolas propemodum nescire purpuras, petechias atque malignos morbos ejusmodi ob virtutem, quæ exinde exsurgit balsamicam. Cum enim ea ex quotidiana salis in urbe coctura incredibilis ferme aquæ quantitas in auras propellebatur, fieri non potuit, quin illa de causa totus aer humidus fieret urbiq; incumberet, unde tunc ea, ibi morborum genera maxime regnabant, quæ littus boreale accolentibus sunt familiaria scorbutus &c. quæ correxit ille ex fossilibus carbonibus vapor commixtus. Conf. ejusdem *propempt. inaugurale de vapore carbonum fossilium innoxio*. Quare (ut incidenter saltem hoc addam) responsio facilis fuisset & expedita, cum aliquando quæstio exorta, num urbi ejusque salubritati conducere, si in ipso agro Lipsiensi ex lignis e longinquo allatis carbones ustularentur.

§. IX. In specie indicandum est, civitatibus populosis ex consuetudine, ut Lipsiæ quoque ea invaluit in ipsis ædificiis sordida linteamina purgandi aeri imminere labem, eoque magis, quo arctiora sunt eadem aereque liberiori non perflata. Frequentes lotiones linteaminum ejusmodi sordidorum aquis saponatis ferventibus ac laboriose agitatis particulas excrementitias salinosulphureas exhalantibus evehentibusque viscido subtilisato junctas, aerem insalubrem reddere imo pestem inferre refert DIMERBROCK *de peste c. XII*. Curiosa in hanc rem est observatio, pestem, quæ superiori seculo in Bohemia & Silesia grassata est, frequen-

quentius in illas ædes irrepsisse, in quibus sordida lota essent lintea, confer. BEHRENS *select. dietet. pag. 25.* Saponem illitum notat BOCCONE *Observ. curios. p. 463.* ad putredinem conferre maxime in pannis lineis. Præter hæc aer ejusmodi ex linteaminum sordidorum lotionibus inquinatus mirum obest maxime pulmonibus & infert asthma, tussim, imo phthisin atque vomitum. Conf. RAMAZINI *de morbis artif. c. XXIII.* Amplius adhuc & speciatim magis quoque dicendum est, effluvia alkalina ex coctione lixivii & cinerum evoluta aerique communicata, alias licet sint laudabilia, quandoque esse nociva, ubi nimirum variolæ, morbilli, purpuræ, putridique alii morbi sæviter infestant: In his enim acidula profunt, alkalica vero acidum destruant, sicque & curationi horum morborum & reconvalescentiæ resistunt. Hoc ut credam, me movet observatio haud simplex, qua constat, in illis Silesiæ oris, ubi pro linteaminibus candefaciendis lixivium quotidie coquitur & in linteamina effunditur, pueros variolis morbillis, ut purpura & similibus putridis morbis laborantes, in illis habitationibus & in vicinia decumbentes citius interire aut ægrius convalescere. Quare consuetudo illarum civitatum merito venit laudanda, qua lotiones ejusmodi extra urbem ac ad profluentes instituunt aquas.

§. X. Sed saturati interiorum spectaculo atque relicto paulisper urbis fumo ac ineptut. ædificiorum umbra mephiti hominumque turba atque aere intra interiora ejusdem delibato, per proximam viam, qua porta patet, extra urbem paululum pedes quoque moveamus, apertum cœlum visuri & liberiores puriorique nitro aereo præditam atque ventorum flabro magis purgatam modo auram extra pomeria capiamus viridesque agros & patulos hortos, floribus, plantis arboribusque vernantes, nemora, prata rivosque adeamus. Ubi in nostro curiosæ exspatiationis itinere statim urbem egressi videmus, quod eam cingant fossæ fat largæ, quæ in parte elatiori, qua orientem nimirum spectat, siccæ sunt, demissiori & majorem partem complectente, qua in meridiem scilicet occidentem & septentrionem vergit aquis stagnantibus, crassis, refertæ & fœculentæ, magno sordium cumulo squalidæ, quæ tetra, mala effluvia reddunt & insalubria. Si tales igitur fossæ sedulo repurgarentur exinde in incolas haud vile emolumentum purioris aeris omnino posset redire. In hoc argumentum notat P. SALIVS *Diversus de Feb. pestil. cap. XX. §. 143.* Patriam suam exsiccatione aquarum in fossis publicis stagnantium a febribus pestilentialibus quotannis autumnio grassantibus fuisse liberatam. Et notabilis in hanc rem locus apud HIPPOCRATEM

occurrit *Epid. Lib. I. S. IV. Ægr. 1.* ubi de Philisco loquitur die sexto febre lethifera mortuo, memoratque, quod ad muros ejus habitatio fuerit, quo & mihi commendatio Mercurialis placet, qui optime advertit Hippocratem ex destinato habitationem addidisse, ut omnibus constet ejusmodi locum maxime esse insalubrem, quia maximus ibi sordium esset confluxus atque affluxus ac cadavera pecudum, aliæque impuritates conjicerentur. Similiter RAMAZINVS notat de *Princip. Valet. tuend. p. 22. seq.* Mutinæ febres malignas epidemicas multos e medio tulisse, circa murorum ambitum habitantes, salvis omnibus civitatis interioribus domicilia habentibus. Ex hoc quoque FORESTVS *Lib. VI. de febre & morbis epid. p. 162.* Civitatem Delphensem insalubrem esse dicit & febribus pestilentialibus imo ipsi pesti sæpius obnoxiam, quod in declivi aquas non habeat currentes & fossas angustas ab aquis stagnantibus putridisque non purgatas. Huc etiam Cl. R. LENTILII observatio facit, quam in *Epist. ad Cl. Lancisium* addidit, quod ad moenia civitati Stutgardiae olim stagnum amplissimum fuerit, & eam ob causam hæc civitas febribus intermittentibus endemiis iisque diuturnis & pertinacissimis afflicta; & ex quo hoc stagnum exsiccatum sit, dictæ febres & de frequentia & de indole remiserint. Agnoverunt hoc optime hujus urbis Primates, qui A. 1680. ob pestis metum inter alia etiam fossam Hallensem expurgandam curabant, vid. VOGEL. *Annal. Lips. p. 785.* Cives ideo, qui ad moenia & fossas habitant, gaudeant equidem de concessio ipsis amoeno prospectu, sed suspecta quoque sua merito habeant bona suasque quas ex hoc sibi capiunt delicias. Nec adeo impense sibi ideo gratulentur hujus urbis alumni de exspatiationibus illis ordinariis & quotidianis circa moenia & fossas ambulatione & curruvectione recreationis & sanitatis gratia factis, quoniam tunc hæc squalida effluvia exinde emanantia propius & certius sub motione corporis, respiratione & inspiratione exinde aucta (corporis enim exercitia jove malo, male cedunt) in sese recipiunt atque afficiuntur. Quare nostrates exspatiationes potius ad ambulacra, agros & hortos, præsertim orientem septentrionemque spectantes, & ad quos per Grimmensem atque Hallensem præsertim portas itur, sibi eligant.

§. XI. Non procul a moenibus præterlabitur civitatem atque adeo arcem alluit a parte australi occidentem versus Plisna fluvius ex Nariscorn montibus decurrens. Confluunt etiam alii Alyster & Para remotiori tamen spatio, hic ex Suderis montibus, ille ex Colditiano nemore devolvuntur. Singuli infra mediocritatem fere subsistunt, tortuosa

tuosa faciunt itinera, & per præruptas ac profundas vias relictis altis ripis serpunt, & aquas si verum fateri volumus tepentes, turbidas, foeculentas, gustui ingratas vehunt, tardius moventur & in coenosa viscida & pingui gurgite decurrunt, inde & pisces numerosos, (imprimis Para,) alunt & ab urbis suburbiique fordibus magis inquinantur, & si per æstatem fervidiorem deficiunt aquæ, remanente coenoso limo, putridas exhalationes foetoremque emittunt, multas ranas, hirudines, & vermes generant & nutriunt. Igitur iterum iterumque hic optandum esset horum loco, purior & velox beneque positus & ob commoditatem & ob salubritatem fluuius, ut semper optatum est, ut Plisna, Elystra, Vultavia, Albi committantur. Refert. DIOG. LAERT. Empedoclem cum Selmunt. ex vicini fluuii foetore pestis exorta esset, alios duos in aquas illius corruptas misisse, ut expurioris commixtione, corrupta corrigeretur motusque ejus velocior redderetur, eoque solo medio ac remedio regionem a corruptione permansisse immunem. Exploratum est, ipsos lacus, alias insalubrem regionem reddentes, si currentes amnes eos percurrant, minus noxios esse. Aqua enim fluendo quam magnus & velox purusve fluuius trahit, & qui per terram arenosam & remotam procedit, &c. ventos aërem ventilantes & purificantes atque eum salubrem reddentes, movet, circa eos enim semper spirantem ventum quendam senties, quo nomine Nilus semper imprimis est laudatus atque ejus aquæ adeo magno in pretio sunt habitæ. Cum aqua enim res propemodum ita se habet, ac cum aëre, ambo ex motu plurimum mutuantur salubritatis, ambo a vitio, quod remisso motu mox contrahunt vindicantur. Ex fluminibus etiam rapidioribus particulæ aqueæ subtiles sub vaporum specie exfluxæ magis eleuantur, quæ atmosphæram humectando tempore æstivo eoque sicciore nimis, effluvia forte noxia & maligna, sulphurea, volatilia ac tenuia egregie temperant, mutant ac figunt. Romæ insalubris est omnis aër, juxta Tiberim autem habitantes, meliori fruuntur sanitate. De cœtero fluuiorum ex meridie decurrentium mala conditio notatur ex HIPPOCRATIS effato, *vid. de a. a. & loc.* cum ejusmodi aquam vehant falsam, crassam atque male olentem, idem sentit ac scribit AVICENNA 2. p. d. II. c. XVI. Præterea fluuius, si imprimis lente procedat in coenoso gurgite, aërem austrinum per se insalubrem effluuiis humidis replet, magisque insalubrem reddit. Ejusmodi quoque fluuii, qui tarde moventur ad instar aquarum stagnantium a sole tepescunt facile, veloces & qui cum impetu magis suas undas trahunt difficilior; hinc Padus fluuius apud Italos eo nomine audit male & Phasin in Colchide per regionis depressam

planitiem serpentem omnium lentissimum jam Hippocrates noster damnat, referens accolas, totos pallidos esse atque inflatos. Aquæ dein & soli vitium, (ut obiter modo hoc attingamus) non modo inde in potum &c. sed & in incolas aquarum, pisces transit. Notissimum enim cuilibet est, pisces in aquis limpidioribus enutritos, suaviores gustui salubrioremque carnem & dapes mensis concedere iis, qui in aquis cœnosis, viscidis, turbidis, lentis, impuris & stagnis, piscinis capiuntur, similem enim dant cibum, simileque nutrimentum, viscidum nimirum & crassum, unde pisces fluviatiles, & imprimis ii, quos saxatiles vocant, communi ore saluberrimi & gratissimi habentur, imò differentia in carnibus, oculis statim observari potest, v. g. eorum, qui Albi, Sæla, Mulda, & Rheno capiuntur, longe est candidior, eorum, quos Spreha & Havela, fluvii alunt, illi nam limpidiorem & claram, hi vero turbidam aquam vehunt. Ex hoc harum aquarum scrutinio antea indicato sequitur facile indicium, qualis sit indolis aqua, quæ in ipsa urbe, ubi tot latrinæ, cloacæ, & quotidiana impurarum aquarum proluvia, quorum humiditates redundantes tandem cum ipsis fontibus subterraneis commiscuntur, ac suburbiis ex ipsis puteis hauritur, aut per canales adducitur. Illa, si per noctem in vase fervetur aut in olla coquatur aut oleum tartari per deliquium instilletur albidum colorem induit aliquid terræ calcareæ aut gypseæ in fundo relinquit, hæc turbida, vapida fœculenta & situ quasi corrupta male olet. Etiam si non desunt qui talem aquam ut saluberrimam & potui & cerevisiæ coquendæ maxime idoneam extollunt ut sentit MICHAEL PEAGET Parisiis Doctor, ut ex *Quæst. med. in scholiis Medicorum anno MDCCXXXV.* proposita: an aqua fluviatilis cæteris salubrior? colligere est. Is enim aquam Sequanæ fluvii Lutetiam Parisiorum interfluentis lutosam ab ipsis teterrimis sordibus atque adeo mortuis putridisque piscibus mire laudat experimentisque probat in ea diversa salia atque mirabili Glauberi æquiparanda, inveniri adeoque pro humoribus malis in visceribus stagnantibus discutiendis ac repurgandis admodum proficuum esse asserit. Qui peregre ad nos accedunt & aqua nostra præsertim fontana se lavant, dicunt, quod ea hispidam quasi cutem reddat salium mineralium in ea solutarum haud obscuro indicio; nec negari potest eam paulo largius & crebrius potam quosdam in ventre & hypochondriis flatus, imò tormina non raro excitare & ventriculum debilitare. Ulterius de aquarum nostrarum indole non æque bona ex effectu iudicium desumendum, videlicet, lintamina nunquam ita candida lota evadunt ac quidem v. gr. in Silesia

ex

ex quâ adportantur, sicut & aquæ vappescentiæ adscribitur, quod nulla bona charta in agro Lipsiensi præparari possit: Verum notum est atque perspectum, molas in quibus charta bona paratur dari in tractibus montanis, qui rigantur aquis puris, claris & levibus. Qui artem equitandi & medicinam veterinariam tractant, cavent, ne equos frequenter in fluvios & aquas Lipsienses ducunt pedesque iis lavant, quoniam observaverint, quod equis facile paralyfis, ulcuscula aut alia pedum vitia exinde contrahantur. De reliquo quidam culpam in aquam rejiciunt, (forte etiam aër accusandus, quoniam is fermentationes varie alterat;) quod panis Lipsiensis minus sapidus sit. Res fere se habet cum pane Lipsiensi ac cum Parisiensi, nam etiam ille qui ex vicino pago Gonetio advehitur, præfertur, quippe qui meliori aqua subactus est. Conf. RENAT. MOREAU *Comment. in Schol. Solern. Cap. XVII. p. 273.* Alias etiam hæc puteorum constructio a Medicis non probatur, qua tectis teguntur ac concluduntur ac per antliam hauritur aqua, ejusmodi enim subterranea, nec solis radiis pervia, ut deses stagnansque minus salubris censetur, & homines ejusmodi bibentes præsertim morbis & febribus putridis, hydropi, alvi profluviis, internis obstructionibus magnis lienibus viscerum scirhis, inflationibus, tumoribus, aliisque multis morbis obnoxios reddi. Hinc ab incolis ipsis unicus saltem puteus, salubrem aquam distribuens, ille enim, qui ante portam Grimmensem (der Bettel-Brunn) conspicitur, habetur, quod tamen in comparatione aliorum intellectum volumus; nam alius adhuc reperitur in vico per quem ex suburbio Grimmensi ad pagum qui Schönfeld vocatur, itur, qui clariorem illo lenioremque aquam concedit, ad cujus bonitatem putei quidam intra urbem reperibiles, v. g. illi in collegii Paulini area, in foro, in platea cœnobii, fere accedere videntur, si inter se conferuntur. Cerevisia tamen, quæ ex coctura ejus recipitur, non adeo culpanda, ac quidem vulgo ubique fieri solet, si quidem multas bonæ & salubris cerevisiæ notas possidet, si imprimis per hyemem bibitur, si recens est, sed bene defæcata, nec corrupta & acida, gustui non adeo ingrata, cito enim per diuresin redditur, laxat alvum, appetitum excitat ac nutrit, nec caput offendit nec hypochondria; ac permultos scio, qui pro salubritate eam, exclusis multis aliis cerevisiis pro salubribus habitis, cum sperata euphoria biberunt, si quidem & quondam in optimis Germaniæ cerevisiis numerata est. Ast & in aquarum & cerevisiarum delectu speciatim observandum est, quomodo hæc ut illa diversi hominum naturis conveniat, si quidem non omnibus & patriæ solum, aër atque aqua & potus genera

genera æque conveniunt, sed alii ejusmodi peregrina quærere habent necesse.

§. XII. Ab oriente meridiem versus, & rursus ab occidente ad septentrionem suburbia, modico distantia intervallo, ab ipsius urbis mœnibus ædificiis, frequentia sunt, interjacens spatium hortis aut pratis paludosis complectitur. In occidentali lanienæ sunt locatæ ac postrema pars septentrionalis officinis coriariis relicta est. Quemadmodum enim ejusmodi sordidæ officinæ ex necessitate extra urbem & ad flumen, ita & utilitate sunt ablegatæ. Apud Romanos jam olim lege cautum erat, ut cerdonum officinæ extra urbem ultra Tiberim essent, ut ex ARTEMIDORO *de somn. interpr. Lib. I. cap. LIII. p. m. 29.* & MARTIALI constat *L. VI. c. IV.* item legitur in sacris Bibliis Actor. X, v. 6. extra pomæria Joppæ cerdonem habitasse; aër enim ob tetrum odorem iis erat adversus atque abomitationi, ea propter Judæi, qui ibi habitabant, ut PHILO *de Lege ad Cajum* refert, male olebant, qua de re & locus apud JUVENALEM notus est *Sat. XI.*

Nec te fastidia mercis

Ullius subeant ablegandæ Tiberim ultra.

Præter sordium enim putridarum & cadaverosarum, quæ a præparatione coriorum conjiciuntur, quoque adipis, quo coria inunguntur, foetor, viciniam replet atque inficit, de quo, & quod imprimis officinæ ejusmodi in medio urbis Lutetiæ Parisiorum locatæ essent, conqueritur PALMARIUS *in epist. & præfat. in Lib. de feb. pestil.* Ab his opificiis coriariis aërem infici & pestem procreari etiam asserit IOH. COSTÆVS. DIMERBROCKIUS *Lib. II. de peste p. 150.* refert, observatum fuisse, pestem nunquam in ulla alia Parisiorum urbis parte gravius sævisse, quam in qua sordidi ejusmodi atque alii opifices habitabant. Sed uti alias habetur illud: ubi venenum, ibi remedium; ita & coriariis gratis nascitur, quo corrigere aërem possent; segmenta puto e præparatis coriis, ungulæ & cornua, ossa subarida, corii præparati præsegmina in ignem conjicienda. Licet eadem concremata foetidos insuavesque odores atmosphæræ inferant, ideo tamen etiam illi salubres esse possunt, distinctione habita foetida, corrupta, putrida inter & insuavia, sic assa foetida, sulphur accensum, & pulvis pyrius foetent, sed profunt, foetidus plumarum aut tingularum fumus suffocationi hystericæ aliisque morbis spasmodicis prodest. Variis in locis plebs habet expertum ejusmodi igni injecta illorumque exinde insurgentem nidorem habitationes suas a pestis lue tutas & salubres præstare; imo arbitrat

bitratur RANCHINVS *de purit. rerum* p. 279. ejusmodi foetida efficacius contagiosa effluvia depellere. Non solum coriarios sed & fullones eundem in locum ablegarunt Romani, qui dum laneos pannos sulphureo fumo lotioque putrescente a sordibus purgaverunt viciniam pædore infecerunt. Vid. PLINIVS *Lib. XXVIII. cap. VIII. & Lib. XXXV. cap. XV.* Plura de his ipsis legi possunt apud OCTAV. FERRARIUM *de re vestiaria P. II. Lib. IV. cap. XIII.* GRAEVIVM in *Theaur. Antiq. Rom.* p. 887. Conf. & RAMAZZINI *de morb. artif. cap. XIV. in Oper. p. 529.* De cetero apud Romanos lanionibus describatur certus locus, ne si passim habitent, totam urbem redderent pestilentem. Pariter Jenenses referunt Annales, urbem olim ex maētatis in ædibus atque plateis, pecudibus ob foetidos vapores & redundantibus copiosis aquis, quibus purgabantur, magnum sensisse incommodum, adeo, ut Div. Joh. Fridericus II. Saxon. Dux jussit An. 1551. demum extra urbem ad Salæ ripam communes lanienas locandas. Licet etiam per exhalantes e maētatis pecudibus quotidie spiritus animales, spirituosæ aëris partes augeantur, quas si spiritum mundi, quem Hermes Trismegistus, Pythagoras, Plato, Stoici affirmaverunt, vocare velles, jam non refragabor; laudabiles vero hæc minus laudabilibus his superantur longe, vix enim ullum foetoris genus animantium cruore sevoque pestilentius est. Nec sine ulla ratione alibi macella in civitatis extremitate collocantur, quoniam Celeb. LANZONIVS in *Ephed. German. N. curios. Cent. III. Obs. 68. de morbis Lanionum*, loca ejusmodi suspecta fere quoque reddidit ob exhalationes cadaverinas ex maētatis evaporantes. Inde foedo faciei colore laniones tinctos esse perhibet & cachexiæ, hydropi, obstructionibus viscerum, scorbuto, ictero pertinacissimo, vertigini, pedum intumescentiæ, vomitui &c. obnoxios. Ejusmodi exhalationes cadaverinæ, licet exeant, recenter maētatis animalibus, nocivas tamen gratiosissima Facultas nostra Medica Lipsi. eas esse dixit, vid. B. AMMANNI *Med. Crit. Cas. 82.* ubi de pellibus recenter abstractis res agitur. Si igitur pelles modo abstractæ, in quibus paucissima carnis & pinguedinis quantitas superest, putredinem concipiens, suspectæ, ea ratione sint, multo magis esse possunt adeo multa animalium cadavera in macello per plures dies imprimis tempore æstivo venum exposita. E re quoque esset, si & aliæ officinæ extra urbem proscriberentur, ex quibus quotidie effluvia minus salubria & adversa aëri accedunt, ut sunt pellionum, conf. P. AMMANNI *Med. Crit. p. 538.* & eorum, qui ex sevo sæpissime rancido coctione candelas sebaceas & saponem præparant, simulque foedas exhalationes aëri

D

immit-

immittunt &c. Per observationes enim constat penes has habitantes, & magis adhuc hos labores tractantes, inappetentia perpetua, nausea & doloribus capitis, vertigine, oculorum rubore, respiratione difficili laborare, ac foeminas uterinis affici passionibus. Conf. RAMAZZINI *de morbis artif. Cap. XVI.* & BORRICHIVS *in Obs. 86. Vol. V. Act. Hafn. p. 209.* ZACHIAS *Quaest. med. legat. T. VI. Lib. V. Quaest. VII. p. 442.* Ejusmodi casus tragicus in hac ipsa nostra urbe non ita pridem accidit in operario qui aperta cloaca in quam acre & foetidum hoc saponariorum lixivium confluebat, ex attenuato hoc halitu aërem nimium expandente & elasticitate sua debita privante repentina suffocatione mortuus decidit. In hunc censum quoque veniant olearii, & ii, qui chordas ex animalium intestinis præparant, vid. ZACHIAS *Tom. I. Lib. V. 4. 97.* Modo laudatus RAMAZZINVS verendas quoque habet Stannariorum & omnium eorum, qui mercurium tractant, opificinas. vid. *p. 41. conf. & B. ET TMVLL. Colleg. Consult. Cas. 17.* His adderem tabernas eorum, qui falsamentorum varia genera, pisces induratos saleque confectos haleces, asellos &c. & sæpius corruptos, veteres caseos item & lardum, adipem & sebum vendunt, quæ sane non aromaticum spirant odorem prætereuntibus quæ fuga, quæ obturatio narium, quæ sputa, atque exscreationes! certe nullus est putror cum piscium foetore conferendus. Jam dudum item Romani reputabant per falsamentarios inquinari civitatem, infici terram, aërem, flumina atque adeo ignem, quod prudenter ex Jureprudentibus præter medicos admonet RIPA *de Peste Tit. de remed. præserv. quare & A. 1680.* ad avertendam pestem lege publica cautum erat, ne hæ tabernæ in medio urbis in posterum essent locatæ, vid. VOGELII *Annal. Lips. pag. 785.*

§. XIII. In suburbii orientalis parte extrema cœmeterio pro exportandis funeribus locus, optimo consilio, ut decet, concessus est, paucissima enim funera intra mœnia aut in ipsis templis humanantur. Effluvia nam ex sepulchris per ipsos humi poros in auras exhalantia, imprimis non satis profundis & eorum frequenti apertione, exspirantia non possunt esse non nociva, sicque mortui vivos interficere valent, adeo, ut dubium sit, an viva an mortua corpora contagio magis noceant, quare & JCTi utilissime præceperunt ut sepulchra satis profunda sint CARPZOV. *J. E. l. II D. 373.* & demortui debito tempore sepeliantur FINCKELTH. *tr. Conclus. 25. 26.* SCHILT. *J. J. c. I. 2. tit. 14. §. 16.* Si enim in aliis cavernis & locis diu conclusis aër innibi corrumpatur, quod paucis & conclusis accidit facile, adeo, ut apertis eis, venenatus halitus exhalet, cujus

cujus rei notabilia exempla legere quis potest apud IULIUM CAPITOLINUM in *Vero* & GVAINERIVM de *peste* Cap. I. num. III. magis aër in sepulchris, in quibus cadavera in tenuissimam, volatilem materiem attenuantur, diu conclusus & iis apertis exiens putridis miasmatibus repletus erit ejusmodi. Damnum hoc certius exurgit, ubi sepulchrorum spiraculis exitus in cœmeterium aut in ipsas ædes sacras conceditur, quod ubique plane abesse deberet. Refert SCRETA *Tract. de febre castrensi. Sect. I. §. 5. p. m. 72.* quosdam curiositate ductos subterraneas Romæ collapsorum sepulchrorum speluncas intus videndi, a foetidis exhalationibus fuisse necatos. Hanc causam & ulterius exponit Celeber. MVRALDVS *colleg. anatom. lect. 3. p. m. 58. seq.* Namque in templis ejusmodi & cœmeteriis sæpius putridus foetor nares offendit interioresque partes lædit, licet & non is semper eas feriat sensibiliter, ea tamen est multorum effluviolorum vis, ut per multa notissimum est, quæ afficiat, modo non perceptibili semper, hinc refert RAMAZ. *de morb. artif. Cap. XVIII. p. 128.* quod nullum senem vespillonem viderit, eosque febribus malignis, cachexia, catarrhis suffocativis aliisque gravioribus affectibus pressos deprehendit. Taceo quod solus terror atque averfio, metus & nausea quæ plurimis hominibus naturales sunt, quas excitant defunctorum corpora, varias noxas, possint inferre. Salutis ideo publicæ interest in urbium interioribus & templorum pomœriis, multo minus in ipsis templis, utpote locis ut plurimum diu clausis liberamque expansionem & ventilationem denegantibus, & ubi magna hominum concio convenit locum sepulcrarum non dare. Eapropter merito LILIVS GREGORIUS GYRALDVS FERRAR. *de variis hum. modis Cap. V.* consuetudinem notanter taxat, funera in templis humandi, cum olim loca ista sub Christianæ imprimis religionis initiis solum, martyribus relicta essent. Nec desunt, qui autumant adversus hic odor ut pellatur, morem illum Romanensium introductum esse in templis thure & myrrha similibusque suaveolentibus vapores excitandi. Nec minus veteres Græci atque Romani hoc in passu cautissimi erant, ut ex monumentis historicis & ex lege 12. tabul. in urbe ne sepelito, est notum. Nam Imperatoribus saltem apud eos, virginibus vestalibus, & viris de patria optime meritis, famaue clarissimis, ut P. Valerio Publicolæ & Aposthumio Tuberto. &c. Conf. SERV. *ad l. II. Aeneid.* KIRCHMANNI *de funere Romanor. l. I. c. XX. Eutrop. l. VIII.* vid. GRVTER. *P. CCCCLX. No. I.* locus lege publica erat concessus, ut vetus marmor monstrat. Quæ lex a THEODOSIO M. v. *cod. de sepulch. violat. l. VI.* est repetita, & a Concil. Bracarensi *l. can. 18.*

A. DLXIII. fancita, vid. SPANHEIM. *Hist. Eccl.* p. 1081. Atheniensibus hoc a Solone v. CICERO II. *de LL.* Corinthiis PAVSAN. l. II. Si-
cyoniis PLVTARCH. *in Vita Arati*, Siracusanis CICERO V. *Tusc.* Smyr-
næis *id. pro Flacc.* erat interdictum. Sic & legimus Priamum Trojæ He-
ctorem extra urbem Darem dictam humo mandasse. Quamquam hoc
mandatum eo respiciebat, ne sanctum municipiorum jus pollueretur,
ISIDORVS tamen *Lib. XIV. Orig. C. I.* hanc rationem expresse addidit:
ne foetore ipsa corpora viventium contacta inficerentur. Apud alios
non minus hoc observatum esse scimus, sic legimus in sacris Bibliis,
filium viduæ demortuum, cui noster Salvator restituit vitam, extra ur-
bis portam portatum fuisse. Ipsum Christum in sepulchrum in horto
extra urbem repositum esse, item Abrahamum locum sepulchri emis-
se in agro, quo omnes Patriarchæ sepulti essent &c. Quid? quod ut ad
rem, Lipsiamque redeamus, cui simile accidit. Refert enim PFEIFFERVS
in Lips. Lib. IV. p. 508. de obsidione A. 1546. facta sequentia: *Moris erat, ne
terram hyberno frigore tum asperam magno labore sæpius aperire necesse esset,
ut quolibet die unam tantum eamque grandem foveam in Paulinarum ædium
vestibulo, quod vicum Grimanum respicit, egerent, in quam simul omnium
quotquot illo die aut mortis aut hostium telis absumti essent, mortua corpora com-
ponebantur. Unde factum est, ut cumulo cadaverum defossorum humo non sa-
tis alte ingesta contecto, æstivis deinde diebus ingrata dulcedine noxius quidam
putrescentium corporum halitus, solis excitus radiis, spiraret, necessitasque af-
ferretur, Paulinarum ædium procuratoribus, locus illum ad tres & amplius pe-
des terra aggesta attollendi. Unde aream illam in altitudinem crevisse nonnihil
etiamnum hodie animadverti potest.* Ad hoc notatu adhuc dignum mihi
epitaphium Celeberr. VERHEYENII propria manu scriptum, ac pro
omni testamento relictum, videtur, uti est videre Anat. C. H. *secunda
edit. compendio vitæ addito*, quod ejusmodi est: P. VERHEYEN *Med. Doct.
& Prof.* Partem sui materiale hic in cœmeterio condi voluit, ne templum de-
honestaret aut nocivis halitibus inficeret. *Requiescat in pace.* Quo SIMO-
NEM PICTREVM, Parisiensem Medicum, sequutum hunc esse videtur, de
quo idem LA MOTTE *d. l. p. 8.* refert. Re itaque se habente, Lycurgus
Spartanorum Legislator sapientissimus ex alia ratione cum Plutarcho
laudandus, vid. PAR. *Lib. I. p. m. 97.* quod fanciverit, ut, omni supersti-
tione ablata, mortui intra urbem humarentur, monumentaque pone-
rentur prope templa, ut hujusmodi spectaculis adolescentes adsue-
fierent, & ne mortis recordatione perturbarentur, neque eam exhor-
rerent.

§. XIV. Undique extra urbem ædificiis interdistincti sunt horti amœnissimi atque nitentes omnis generis floribus, herbis, arboribus fragrantissimi, & adspectu odoratuque jucundissimi in magnum ornamentum magnamque civium peregriinorumque ad nos iter facientium voluptatem, quorum non alibi facile major reperitur copia, atque non modici modo, quales Platonis olim aut Catonis fuerunt, panduntur, sed & plures maximam admirationem tibi movebunt, ejusmodi, qui omnium deliciarum sunt sedes, & quos Acetæ Colchorum Regis Chloridis, Pomonæ Adonidis aut Alcinoi Hesperidumque Boeticis vel Corcyræis aut Romanorum, Pompeii, Salustii, Lucilli, viridariis quæ prisci adeo mirabantur & celebrabant similes atque vix in Insulis fortunatis quidquam jucundius, forte esse dixeris, quique vel in media hyeme veris opes & gratias atque amœnitates monstrare & oculos pascere atque exhilarare naresque recreare & spiritus animales reficere possunt. Qua vergit ad orientem extra suburbia amplum agrorum spatium olitorii horti complectuntur, in quibus olera, legumina, plantæ, herbæ, radices edules feruntur, coluntur ac irrigantur. Quæris, an copiosi horti salubritati etiam aeris conducant, aut an aer in hortis ac circa eos sit salubris? De his constans multorum, Autorum est sententia, copiosos eos maxime in loco & aere humido, tepido, crasso, impuro, ad oblectamenta concessos minus salubrem aerem reddere ob finum ibi coacervatum diutius non raro fervatum & stercorationes plantariorum frequentes atque pulvinorum, ut enim GALENVS 3. *Epid. 1. conc. 14.* loquitur, cloacas latrinasque in hortos repurgant. Hanc in rem notabile est, quod Hesiodus stercorationes agrorum circa urbes damnet, ratus magis salubritatem aeris quam fertilitatem esse spectandam. Subsunt quoque aliæ causæ insalubritatis, æque si non magis verendæ, ut zizaniæ, lolii, olerum, leguminum recrementorum, variorum vegetabilium in hortis rejectorum cumulatorumque putredines, qua de re funestum exemplum refert A. LVSITANVS cent. 3. *curat. 814.* Annumerantur his ab iis quotidianæ repetitæque irrigationes, quibus aeris humiditas inducitur, quare aerem eo nomine hortorum insalubrem Galenus pronunciat, siccioribus vero naturis convenire eum FIDELIS *de Relat. Med. cap. V. p. 41.* scribit. His addunt multi culturam vegetabiliorum noxiorum, ut buxi, taxi &c. quam tamen utpote in regione temperata soloque subhumido nos adeo vix amplius timemus ac ne manducata quidem. Nec prorsus secundum alios alienum est, aerem in ipsis hortis eo modo etiam esse insalubrem, qui earum respicit positum, ad foecunditatem enim facit positus hortorum

rum versus meridiem & occidentem, quarum vero plagarum adspectus sanitati contrarius est, septentrionalia & orientalia latera, quæ saluber-
rima ob frigiditatem plantis contrariam ut plurimum vario modo vitili-
bus, dumis, vepribus, arboribus proceris &c. conteguntur, auraque refi-
ciens impeditur & avertitur. In specie quoque eos suspectos magis ha-
bent hortos, quibus permultæ insunt pergulæ aut ambulacra, quorum
parietes ex dumis aut vepribus superne committuntur ad radiorum so-
larium molestiam mitigandam, quia vapores ibi retinentur diutius. Ad-
dere quis posset, quod examina insectorum frequentissima habeantur
ibi & quod ex Anglorum sententia, sub maturatione fructuum horeo-
rum effluviis multis fermentescibilibus, acidis, atmosphæram implerent,
quæ ad humores perducta similem motum inducerent iis, unde in pri-
mis dysenterici, diarrhœæ tunc temporis frequentissimæ & epidemicæ eve-
nirent, quibus, qui in hortis & circa eos habitant, propius certiusque
corriperentur. Insuper hortulani morbis multis, febribus putridis at-
que malignis, purpuris, cachexiis, obstructionibus viscerum, hydropi,
doloribus capitis, dentium, paralyti atque similibus obnoxii observantur.
Conf. iterum RAMAZZINVS *de morb. artif. cap. XL*. Simile observatum
reliquit P. ZACHIAS P. Q. M. *lib. V. tit. 4. Q. 7*. Conf. & modo addu-
ctus GALENVS *3. Epid. com. 14*. Eo & eorum collimat commentatio,
qui *3. Epid. com. 13*. notant, Hippocratem notanter addidisse, ægrotum
in Dealcis horto habitasse. Idem sentiunt ac scribunt JCTI prohiben-
tes, ne quisquiliæ olerum, leguminumque putredines habeantur. Vid.
STRYK. *de Jure sens. Diff. V. n. 35. sq.* His pariter jungunt similia in vi-
cinis aquis macerationem lini aut cannabis (cujus tamen apologiam P A-
SCHALIUS *inf. lib. 2. de cur. morb.* scripsit) aut sparti & fimi intra ædes re-
tentionem. Conf. & sæpius adductus atque laudatus RAMAZ. *l. c.*
SCHENCKIUS *Obs. lib. 7. obs. 8. de febr.* KIRCHERVS *scrut. pestis Sect. 1.*
§. 1. ut & SIM. PAVLI *in quatripart. botan. Petr. a Castro punctic.* aliique
plures.

§. XV. Ejusmodi equidem allegantur ad aerem hortorum suspe-
ctum reddendum, sed juxta illud quod in liberiori aere sint locati, sub-
est ipsis in hortis quoddam, quod aerem quoque, si minus etiam lauda-
bilis sit, salvere ac corrigere potest: Arborum, herbarum, florumque
suavium & præstantium fragrantiam, aurantiorum, limoniorum, rorisma-
rini, caryophyllorum, jasmmini, rosarum menthæ, rutæ, nardi, lavendulæ,
amaraci, ocymi, salviæ hyacinthi, narcissi liliorum, rubi idæi, atque lau-
ri &c. Vid. VERVLAM. *h. n. p. 954.* (ex cujus arboretis salubritas aeris

Antiocheni collecta est,) atque similium, quorum oris atque temporibus nostris frequentissimus iam usus est, imo omnium vegetabilium gratum odorem recreantem & confortantem aëremque puriorem ac instaurantem atque efficacem reddentem (qui quidem non semper percipitur, bene vero a pluvia & imprimis mane vespertino & vernali tempore,) si nominaverimus rem ipsam certe indicavimus. Commemoremus porro repercussionem aeris ac ventilationem per arbores a parietibus, quibus circumdantur ac defenduntur horti, maxime, si vepres in altum ascendant, aut si ad septa arborum series sint positæ, aeris accessum admittentes ventilationemque juvantes, ibi enim putaret quis ventum semper lenem in partes spirare oppositas. Quæ præponderent rationes, videat æquus Censor. Est & alia aliqua adhuc salubritatis causa, quæ obtinetur fodiendo terram, ex qua, si solum solidius sit, & macrum magis, salubris atque reficiens odor in auras exsurgit, facile perceptibilis maxime iis, qui in terram procidunt & aliquantum manent ibi, ex quo vegetiores agilioresque, cibumque appetentes surgunt, quo nomine imprimis humus Ægyptiaca præclara est. Plura *vid.* apud. FER. IMPER. *Hist. nat. p. 289.* Hinc imprimis asthmaticis & phthisicis atque hecticis conferre probat BAGLIVIVS suadens ipsis ut arva colant iidem, *vid. oper. p. 387.* & BACO DE VERVELAM *H. N. cent. X. p. 954.* ubi viri amplissimi meminit longævi, qui mane semper ex gleba recenti, pura, odorem excepit. Mihi nondum memoria excidit, me in novellis Gallicis ante aliquot annos legisse, Regem Galliarum Lud. XIV. forte mortalis vitæ fastigio haud contentum ex multis per multa expertum, nullum genus hominum, iis, qui terram colerent foderentque esse vivacius, in horto, qui Versailles est, ejusmodi labores exercuisse quotidie.

§. XVI. Ut nostra contemplatio non debet saltem intra urbis suburbiique mœnia, aggeres, maceries, vacerras plancasque claudi, ita & in patulo campo ulterius spectanda est conditio rerum, secundum Hippocratis præceptum, volentis, ut universa terra consideretur, nudane sit, an arboribus confita, an densa, & aquosa, an aquis carens, & an concava sit, & æstiosa, vel alta & frigida. Urbem igitur eaque quæ ea complectitur loca, paulisper relicturos, nos statim vel invitos invitat & allicit amœnum illud Lipsiense nemus, sive illa, quæ a parte occidentali urbi proxime jungitur sylva, (der Rosenthal dicta) ad meridionalem & septentrionalem plagam arboribus proceris varii generis quercubus imprimis densa serie oblita, dumis ac virgultis copiosissimis intercrescentibus opaca atque umbrosa & in magnum spatium, in longitudinem multo
ma-

magis quam latitudinem extensa. Ad australem regionem qua unius horæ itinere itur hanc rursus, ad occidentem protensam iter facientes offendunt. Hoc nemus frondosum, licet magnum oblectamentum Lipsiensibus afferat, in solo tamen cœnoso, humido, (quod ordinario arboribus dives est,) ac palustri, aerem spissum, humidum, suffocatum, a sole minus illustratum, turbidum, gravem & corruptum reddere magis potest, si eam medica censura feriat: Sub sylvarum enim umbra variis exhalationibus ex soli indole excitatis, nec attenuatis, nec dispersis aer imbutus manet, namque & ibi hyeme, nive liquescente, vere, autumnino vero maxime ex pluviis frequentibus humiditates diutius subsistunt, lacunæ fiunt cœnosæ, neque facile exsiccantur, sed sensim aere calidiori accedente putredo concipitur, quæ putredinosæ particulæ, per totum fere, (utpote in loco depresso condensoque,) annum ibi detinentur & ad civitatem vento semper imprimis ex occidente superveniente feruntur. Per sylvas etiam nebulæ non ejiciuntur, & ubi commorantur eadem, ibi & aer & aqua nocent. Insuper & in vulgus notum est, loca ejusmodi sylvis altis densisque interdistingta frequentioribus humectari pluviis, aere humido circa illas collecto, alliso, compacto, circumactō. Sic observasse refert *Excellent. & Clariss. D. G. E. STAHLIUS in Introd. in nov. Meteoroscop. cap. IX. p. 75.* Circa Martisburgum & Lipsiam sæpius pluvias decidisse; Halæ vero minime. Memoriam proditum est passim, Antiquis in usu fuisse positum, aerem sylvarum succisione purgare. Atque hodie adhuc loca paludosa optime corriguntur, si opacæ sylvæ demantur & per canales apertos perpetuo liber aquarum decursus instituat. Equidem ab aliis nec effluvia solum a soli vitio accusantur, accusantur quoque ea, quæ ab arboribus proveniunt ipsis in sylvis crescentibus. Sic de quercu forte, quæ numerosissima hic inest quibusdam causa suspicandi quædam erit, Helmontio qui credunt referenti *vid. Tim. pest. p. 52.* ex numerosa quercu in sylva quadam existente aerem aliquando lintea in proximis ædibus spirante austro, colore imbuisse flavo. Conf. & *DIOSCORIDES L. IV. c. XXIV. BAVHINVS Ins. plant. L. a. c. III.* an autem prægnantem causam adeo habeant, videant ipsi, & annon numerosa in specie quercus effluvia potius salubria communicet, de qua exempla ex *PAVLINI erbaulichen Lust. p. 543.* ut & de tilia, quæ hinc inde haud raro luxuriat, de qua & urbs nostra quondam die Linden Stadt nominata est, petantur. Ast ut offendiculum ita & juvamen aliquod aeri nostro addit hæc sylva, quemadmodum ex Dei omnis bonitatis fontis immensa sapientia & providentia, cuivis propemodum

terræ

terræ vernaculum pharmacum, vernaculis morbis oppositum, donatum est, nimirum, quod ea proferat ac alat magna in copia allium præsertim sylvestre, adeo ut & aerem atque atmosphæram per totam fere æstatem admodum forti odore ejusmodi impleat, cujus sale volatili proficuo aer ambiens ex parte corrigitur, & quod magnum in spatium longe lateque extensa proceris atque frondosis arboribus frequens ventos occidentales & meridionales nobis insaluberrimos ex parte avertere possit. Si & paulo elatiori loco locata esset, simul ventorum orientalium & septentrionalium circa urbem agitationem reflectendo eos ut replicato motu peterent eam, augere posset commodius & utilius. Seorsim hic memoratur, ut quoddam in nostra humo rarum, sylva nempe abietina, hyeme quoque virens, quoniam in siccis, arenosis & montosis crescunt locis, ad septentrionale latus prope Breitenfeldiam clade Cæsariorum quondam nobilem sita, quæ resinosa, balsamica adeoque salubria effluvia in viciniam mittit, vix vero tanta est, quæ aeris per ventos septentrionales ventilationem impedire posset, neque vepribus & virgultis intricata, sed, ut abietum indoles est, earum cacumina sursum ascendunt, ut stemmata aerem transmittant liberius.

§. XVII. Situs cœterum, si ulterius in nostra contemplatione & consideratione procedamus, universæ urbis licet undiquaque per multa milliaria obtineat planitiem, liberos aeris agitationes admittentem depressior tamen ratione vicinorum & circumjacentium locorum, licetque ipsa in acclivi paulo loco posita sit: Si enim quis undique se convertat oculis, aut iter instituat, elatiorem sensim regionem videbit, excepta sylva, hæc quousque etiam protenditur, humiliorem propemodum præ ipsa urbe obtinet situm. Depressior ejusmodi ac declivis situs, humiditatum collectioni atque effluviorum, cum aere majori commistioni difficiliorique ejectioni famulatur, atque aer ejusmodi in locis quasi concavis a sole contactus calidior est aperto, nec eo tamen minus densior tanquam minus purgatus. Attamen is vix tantus est, qui aerem penitus concludat aut intercipiat adeo notabiliter, aut radios percutiat solares &c. Insuper ex modo adductis & ex modo adducendis fit palam: Lipsiam ob situm suum hyeme habere solem, æstate ex parte umbram, quæ pro optima locorum conditione semper est habita. Unde VARRO *L. I. de re rust. c. XII.* qui villam suam ad orientem posuit conversam dixit se habere æstate umbram, hyeme solem.

§. XIX. Obtingit præterea, ut quotannis nec unica saltem vice præterfluentes fluvii circumjacentem declivem occidentalem & septentriona-

trionalem regionem inundent, quando a copiosis pluviis aut nivibus liquefcentibus, aquæ præsertim ex altioribus & remotioribus locis, ex quibus affluunt, redundant in campos Lipsienses & maxime in sylvam ac prata adjacentia ibique persistunt diutius, ordinario autem totum latus sat spatiosum pratenſe & tantum non paludosum ad septentrionalem plagam & orientalem usque excurrens (die Gerber-Wiesen) per totum autumnale, hyemale vernaleque tempus aquarum colluvie inundatur. Quæ in solo per se palustri atque cœnoso pessima est conditio. Etenim, licet, exundantes fluvii agris fertilitatem, propter limum maxime, quem talis aqua secum vehit soleant impertiri, quod de Nilo veteres jam notaverunt, attamen stagnantes aquæ effluviis lentis ejusmodi replent atmosphæram & inde eo magis ipsa stagnatione ac mora peiores redduntur. Tunc & gramina non solum pro fœno defecta non exiguo damno corrumpuntur, sed & solum mûcagine cœnosa piscibus & ranis forte ibi relictis corruptis & putrefactis commixtis obducitur, unde tandem putredinem concipit tellus, ingratumve pessimum atque nocivum fœtorem de se spargit & putridis exhalationibus, quibus nihil nocentius, aerem inquinat, ex quo putridi, maligni epidemici morbi facile procreantur neque alio tempore apud nos magis ejusmodi ingruunt. Relatum habemus tali acredine corrosiva infectas fuisse hasce aquas, ut ii, qui nudis pedibus eandem ingressi sunt ingenti atque molestissimo pruritu, ardore, tumore, tensione, pustulis rubentibus, atque adeo inflammationibus inde correpti fuerint, idque non solum in hominibus sed & anseribus, anatibus, canibus observatum. Dicto faciunt fidem, inundationes frequentes Nili (saluberrimi alias fluvii) totam regionem inundantes, frequenter pestem inferentes, si diu nimis, in terra etiam licet salubri persistant, ut paludosa exinde fiat & putrida tellus, & venti australes aut æstus accedant, ut immodicis vaporibus aqueis repleatur aer, & putridus evadat. vid. DAPPER in *Descript. Africae* p. 127. seq. Atque inundationibus ejusmodi atticam pestem adscribit DIODORVS SICVLVS *Lib. XII.* Ab aliis multis observatum est per aquarum inundationes frequentes & magnos morbos subnasci imo novos atque malignos prodire, cujus rei exempla possunt legi apud BONFINIUM *Decad. i. Lib. VIII.* BENED. SYLVATIC. *Consil. 14. cent. i.* MONTANVM *Eph. G. N. Curios. anno IX.* ex RAMAZZINI *observ.* PECHLIN. *observ. XVII.* COBER. *de morb. castrens. D. III. obs. 5.* FOREST. *Lib. VI. de febr. & morb. epid. grassant. p. 162.* LANCIS. *Tr. de noxiis palud. effluv.* LIVIVM, VALLERIVM MAX. &c. Ab excell. atque longe Celeberrimo D. FRID. HOFFMANNO, Hallensi recen-

recensitum habeo, D. SCHAEFFERVM Practicum quendam Magdeburgicum solertissimum ex ventis orientalibus per inundationes Albis ad urbem Magdeburgicam accedentibus, purpuras petechias, atque ejusmodi febres exanthematicas atque malignas copiosas brevi insequuturas prædixisse observationibus per multas annorum series factis. Hinc omnes illæ civitates maris fluminumque inundationibus subjectæ, frequentem patiuntur pestem, ut Roma, Venetiæ, Ancona, Constantinopolis, Smyrna, Cairus, Alexandria & circa universum Archipelagum, totus item Danubii propemodum per Hungariam tractus, &c. Pessima circa has inundationes quoque causa est, & incolas proxime lædit, si aquarum inundationes in domicilia, in hypocausta ac cellas atque puteos redundant adeo, ut aquis tota sæpius repleantur hæc loca, cui incolæ suburbiorum Halensis & Ranstadiensis maxime sunt subjecti, quoniam variae simul quoque impuritates ex sterquiliniis aliisque angulis eo abripiuntur longiusque ibi subsistunt, raroque aut nunquam evehuntur & recurrentes uda pavimenta ac parietes relinquunt ex quibus locis prodeuntibus vaporibus tetrus, aer certius citiusque corrumpitur & corporum transpiratio adeo necessaria præpeditur. Hanc ipsam non minimam esse causam suspicor, nullibi urbis nostræ locorum frequentiores esse morbos incolis familiares ex putredine maxime oriundos & præsertim febres easque varii generis acutas, purpuratas & chronicas, apoplexias, paralyfes soporosos affectus, pectoris destillationes, tussés, phthisin, pleuritides, peripnevmonias, rheumatismos, arthritides tumores œdematosos & similia mala, frequentioraque funera quam his ipsis in locis, maxime si postea ejusmodi colluvies venti frigidi flaverint.

§. XIX. Cum regio ipsa universa plana undique pratenfis & ad orientalem & septentrionalem plagam fere campestris nuda atque aperta sit, calidior ideo censetur merito atque minus tempestatum variationibus subjecta, quibus obnoxia maxime sunt loca, quæ circumpositos habent montes. Cæterum tamen amœnissima & adspectu perjucunda est, quoque te vertas objecta variarum rerum facie acceptissimus tibi conceditur prospectus, mire oculos mentemque delectans ac recreans, & qui spectatores moratur. Pulcherrimum sane spectaculum virentissimam planitiem longe lateque patentem variisque quæ summa voluptate afficiunt, interdistinctam videri. Visuntur viridaria ac horti lectissimi, visuntur gemmantia prata, Hipponiensibus Brutiorum aut interamnæis in Umbria laudæisque apud Insubres graminum florumque ubertate haud inferiora, fluctuantes segetes, pascua, læta nemora, quæ Lu-

cania nemorosa his vix potiora ostendet, ariarum alitum concerta resonantia, visuntur fluvii, qui proserpendo regiones ambiunt ac rigant amœnitatemque augent &c. Attamen non quoque negandum, magna ex parte eam esse uliginosam & paludosam in meridionali & occidentali præsertim regione & non ad unius saltem milliaris spatium. Talis palustris regio juxta alia jam indicata etiam ob aeris inæqualitatem insalubris, nam circa meridiem calidior aer est, circa vesperam & per noctem imprimis autumno frigidior, quo nomine ideo etiam Hungaricus aer male audit. Ad orientalem vero plagam stratis interstincta est tellus firmioribus, arenosis, ficcioribus. Hinc vere præsertim & autumno matutino vespertinoque tempore fumi crassi & nebulae æque admodum spissæ frequenter apparent, nam quo viscidior & crassior uliginosa terra eo spissiores ibi sunt nebulae. Seorsim hic nebula illa pessima memoretur quæ bonam Lipsiam Anno M. DLXXX confoedavit atque affectos gravissimis deliriis conturbavit, citante Tab. HEIDENREICHIO in *Chronico Lipsiensi* p. m. 74. Regio atque talis insalubrior est, si ad occidentem & adhuc magis si ad meridiem libere magis exposita sit, quoniam ventorum per se insalubrium, (quia nimirum humidi) per has oras spirantium augetur insalubritas, ut per ventos earum particularum atmosphære inhererentium: Venti enim agitatione sua magna moleculas salino sulphureas, si quæ jam adsint acuunt ac illas cum reliquis, corporibus hominum altius invehunt inprimuntque. Ideo e. g. eo nomine in Latio loca ob promptinas paludes suspecta sunt maxime, atque omnis tractus in Italia ab Histria Ravennam usque, Samnii item regio campestris & tractus Beneventanus circa Telesiam, in Apulia circa Salapiam, in Campania Romana, Ostia & Terracina &c. potissimum autem ager Patavinus, qui æstivo tempore fere lethalis habetur vid. DONIVS de *restit. agri Rom. salubr.* p. 86. Ob hanc ipsam causam Hungaria insalubris quoque censetur. Ea propter & FR. VALLERIOLO *Locor. Com. Lib. II. p. 3m.* cives Arelatenses adeo impense hortatur ac movet, ut paludes incolis infensissimæ adjacentes exsiccentur, animum curamque intendant omnem. Hinc non adeo mala inventione, pessima tamen profecto intentione Clearchus, Tyrannus, ut cives occulto crimine tolleret e medio, sub media æstate educens exercitum castra civium in plano paludosoque loco, militum vero in altis, umbrosis, horridis aspectu montibus posuit interfluentibus aquis, longiusque expugnationem protraxit, donec cives exorientibus a vitio loci morbis perdidisset suos, notante SABELLICO *Lib. VIII.* Aer quippe frequentius omnium a vaporibus ejusmodi qui

con-

continue ex paludosis locis exspirant, humidis crassescit, qui inter mixtas sæpius foedas habent impuritates salino sulphureas, acres, malignas, corruptas, putridas, ex variis exhalationibus certis temporibus per mixtionem productas, & per reactionem forte exaltatas, calore solis intenso, Cujusmodi illæ sint, apparet, dum rores atque pruinae quandoque arborum atque plantarum foecunditatem perdunt eisque variegatas maculas inurunt & eas corrugant corrumpuntque. Magis hoc confirmant observationes, referentes degustata vegetabilia tali nocivo rore, (qui frequens locis calidioribus & humidis Hungariæ, Siciliae, Hispaniæ & Indiæ est) atque pruina imbuta, labiis atque faucibus ulcuscula, & nudis pedibus contacta, pustula excitasse. Conf. *Misc. N. C. Dec. III. an. 9. Obs. 93.* Hinc & nebulae non raro odore gravi foetido infectæ atque nocivæ habentur. Nullibi etiam adeo multos morbos endemios & epidemicos scorbutum maxime & alios similes imo malignos videbis, quam in locis declivibus, palustribus, densis sylvis frequentibus &c. Atque adeo aer pratorum insalubris censetur. Conf. RAMAZZINVS *de morb. artif. c. XL.* a quo varii morbi eorum, qui circa prata habitant, memorantur. Experientia vero exploratum est, paludes si exsiccentur & aquæ palustres deriventur, redire regioni & emendationem aeris & salubritatem, testatur hoc P. Sal. Divers. de sua patria & TH. IORDANVS *de pest. phæn. tr. III. c. II.* de agro pisano.

§. XX. Ex alio aliud sequitur vitium. Per regionem enim uliginosam fungorum & foetidarum herbarum copia est, ac non solum ranarum, bufonum &c. multitudine scatet ea, sed & scarabæorum, muscarum, papilionum, araneorum, erucarum atque bruchorum edacium, in turmas sæpe edito stridore prodeuntium locustarum & culicum aliorumque vermium magnus est ea propter infelix proventus atque ejusmodi insectorum densa colluvies & intra ædificia speciatim & cimum præsertim magna propago, quæ cubilia præsertim infestant. Ex insectis ejusmodi campestribus, quæ quandoque spaciosos agros quasi contegunt, fila meteorica vulgo dicta procedunt, quæ pascua sæpe animalibus noxia reddunt, quæ hic magno numero majorique quam qui alibi videtur, verno autumnalique tempore circumvolitant, arboribus plantisque adhærent, quæ quidem a Physicis vulgo ex soli glutinosi fibrosis particulis coalescentibus adscendere dicuntur, quod tamen conceptu difficilius est; Mihi vero ex propinquo examinanti observare licuit genus esse insectorum, minutissimarum araneolarum, quæ in agris ejusmodi atque pratis per gramina & stipites &c. telas suas arachnæas texunt ducuntque, quæ a

ventis dein abripiuntur perducunturque hic inde. In hujus asserti illustrationem & aliqualem probationem eam sistam relationem, quæ invenitur in *Actis philos. Societ. Angl. ab H. OLDENBURGIO collect. p. 665. Mens. Octobr. A. 1668.* de araneis in Insula quadam inter Bahamas quæ filant telas suas inter arbores ab invicem septem octoque Orgyas distantes quas ventus ab una arbore ad aliam abripit, adeo crassas ut avem magnitudine turdi irretiant. Terra enim ejusmodi uliginosa, non modo si armatis inspicatur oculis, copiosa foliorum, seminum, florum, cauliculorum, radicum, herbarum putrescentium se istis congeries sistit, conf. LEIGHIUS *Actis Erud. Lips. Ao. 1701. p. 512.* sed & tota scatet vermicibus, quod experimento fit palam, si hyeme frustum in calidum deportetur hypocaustum. Insectorum vero & malorum animalculorum copia, quæ in regionibus paludosis ut v. gr. de Hungaria habetur frequentissime invenitur notam aëri haud bonam imprimit quod VERVLAMIVS exponit, vid. *Opér. pag. 923.* ea propter etiam Roma ac in Hispania Valentia sunt famosæ. De Hungaria modo nominata mihi in mentem incidit, me aliquoties legisse, ibi in certis præsertim locis ad Danubium sitis muscas invenire in magna quantitate, adeo venenosas ut si equos aut boves ictu læserint, eorum corpora præter modum inflari & intra paucos dies mori & si musca talis quidam aures aut nares irreperit, animalia extemplo interire. Certissimum signum diu habitum fuit infrequentium morborum, malignorum imo non raro pestis &c. quando ingentia insectorum examina observata sunt. Testimonia petantur a IOH. DAMASCENO *aph. 132.* RIVERIO *obs. 9. p. 697.* VERVLAM. *oper. pag. 923.* VALERIOLA *observ. Lib. II. p. 95.* Hæc cuncta sale caustico gaudent & aërem similibus nocivis imprægnant particulis, atque juxta alia mala phthisin dein præsertim inducunt facile, quod exemplo eorum probatur, qui bombyces alunt & serica tractant. Hæcque in plantis copiosissima ovula ponunt, quæ dein homines iisdem manducatis simul in corpus assumunt. Major adhuc aëri labes impendet si moriuntur & putrescunt ranæ, locustæ &c. cujus exempla passim reperiuntur multa, vid. PETRVS a CASTRO *de pest. Neapol. & Genuens. p. 43. seq.* Ipsæ sacræ literæ memorant quoddam *Exod. cap. VIII. 14.* AVGVSTINVS *lib. de civit. Dei cap. XXXI.* & OROSIVS *lib. V. cap. XI.* scribunt, in Numidia a locustis mari demersis & inde a fluctibus in littus rejectis pestilentiam ortam esse, quæ ingentem hinc inde hominum stragem edidit. Notabile illud est, quod annales nostri referunt de magnis insectorum examinibus ex Lithuania venientibus An. 1542. & 1553. & Poloniam, Silesiam, Misniam &c. infestanti-

stantibus. In recenti erit memoria, magna illa locustarum copia An. 1693. Misniam, Thuringiam, Voigtlandiam &c. pervadens, quam in sequentibus annis multi morbi maligni atque petechiales infecuti sunt. Hinc naturæ consulti autumant (ut obiter hoc adjiciam) ex Dei sapientissima providentia singulari, aves quasdam hirundines, rubeculas, corruccas, passerres &c. culices, muscas aliaque ejusmodi insecta captantes esse creatas, ut aërem iis purgarent.

§. XXI. Solum quoque de reliquo reliquum omne pingue est atque foecundum & alendis frugibus mite, nusquam hic steriles dominantur arenæ, unde agri feracissimi alaudas opimas adeo undique laudatas alentes & ruris foecundi, dives ibi copia, quæ pleno fluctuat arvo & concredita quæque semina multiplici reddit fœnore, nec interquietii (ut ajunt,) unquam indigent, quæ etiam loca semina non ferunt, pabulis opimis vigent atque luxuriant, ut ter quaterque falces patiantur. Felices ideo agri Lipsienses felicitis Arabiæ parum secundi aut Ægypti, Campaniæ, aut Siciliæ. Arboribus insuper fructibus, plantis & herbis varii generis frequens nostrum est solum. Lucrosum idcirco quidem est ac ea propter quidem merito laudandum, sed & ob hoc ipsum non adeo salubre censetur, ut ex contrario arenosum, aridum, montanum & sterile quidem, sed salubrius magis habetur. Id testantur Africæ regiones, vid. P. DV VAL. *Geogr. General. P. I. p. 210. &c.* & in nostri Orbis Terrarum parte Marchiæ Brandenburgicæ, Voigtlandiæ, Helvetiæ, Rhetiæ septentrionaliumque climatum incolæ, qui præ aliis Europæis juxta Anglos & Gallos sunt sani, robusti atque longævi. Quippe talis viscosa & humida humus corrumpit aërem effluviis viscidis, lentis, humidis, crassioribus suis. Hinc Sardinia Insula ut fertilissima laudatur, culpatur vero ut pestilens. Hinc Romanæ eloquentiæ Parens, Cicero Q. Fratrem monet, ut valetudinem curet, memor, quod cum optime valeret, tamen eum in Sardinia esse. Atque in epist. Tigellium quendam Sardonium hominem esse ait, patria sua pestilentiozem. Atque ejusmodi mitis terra æstate & tempestate sicca facile ac cito aërem copioso pulvere replet. Ex soli deinceps (ut obiter saltem hoc moneamus) indole ut aëri ita & frumentis oleribusque, herbis, plantis, arborum fructibus imo animalibus & cibis potibusque per consequens quoque qui exinde parantur, vitium etiam subnasci patet, v. gr. de pascuis agro Lipsiensi interdistinctis hoc in vulgus notum est, oves in iis nutritas, ut viscidioribus & pinguioribus intra trium annorum spatium ulceribus pulmonum & hepatis non raro vermiculis copiosis scaturientibus morte

morte interire (sie fressen sich faul) ex quo indicio quondam quidam insalubritatem regionis æstimabant, VITRUVIUS enim ita scribit: *Veteres oppida & stativa castra condituri inspiciebant jecinora pecorum, quæ pascebantur in his locis, quæ si livida & vitiosa deprehendebant, solum vertebant, alio commigrantes.* Atque ex agris uliginosis, limosis, inquinatis & viscosis vegetabilia succrescunt; quæ simile nutrimentum deinceps concedunt. Cibi enim exinde parati ob frigiditatem, ut dicunt, ac humiditatem maxime sunt insalubres. Sic fructus, qui circa Phasin fluvium in Getarum regione nascuntur, omnes insalubres esse dixit HIPPOCRATES lib. de aëre, aq. & loc. conf. FERRANDI IMPERATI *Hist. Nat. Lib. VIII. c. XII. p. 284.* & LEMNIUS in *O. N. Mir. P. II. Lib. VI. cap. XIX.* Sub nimia enim humiditate putredo concipitur, feminaque inficiuntur, salina & sulphura caustica luxuriant & corruptio quædam insurgit. Hinc ejusmodi frumenta citius a vermibus arroduntur, citiusque situm contrahunt & corrumpuntur & liquores exinde parati citius acescunt. Verum frumenta, quæ in aridis & arenosis agris & collibus succrescunt meliora & a Medicis habentur. Pariter (ut plura non adducamus ne longius discedamus) vinum, quod, ut exploratum est in locis præaltis, circa fluvios fitis, fabulosis, lapidosis, aridis, salubrius longe est, eo quod planis a fluminibus remotis, pinguibus subnascitur locis, illud tenue atque subtile invenitur, quod per angustissima emunctoria citius transit, nihilque crassi heterogenei in corpore relinquit; hoc vero calculus obstructionsque varias viscerum producit, illud ejusmodi mala curat atque præservat. Nullum enim est dubium, terram, quæ vegetabilia alit ac fovet, succum, quem accipiunt per eorum radices & tubulos, suam quoque indolem, suas proprietates singulares impertiri. Imo ex solo gustu differentiam percipimus: Sic in Belgio ob solum præhumidum arborum fructus, plantæque minus sapidum referunt saporem, nec vulgo ignotum est æstatem siccam præ humido meliores sapidioresque fructus proferre. Confirmat hoc ipsum vegetabilia effluvia, eorum, quæ sub terra conduntur, alterare, sic v. g. notissimum est vineas Hochheimenses celebratissimas, quoniam magna ex parte continent carbones fossiles, vinum inde succinum quasi spirans concedere &c. Cochleæ porro, quæ in locis arenosis, montosis, circa vineas, reperiuntur longe teneriores & salubriores iis, quæ in terris limosis, censentur. Conf. LEMNIUS in *Occult. Nat. mirac. P. I. Lib. V. Cap.* Præferuntur etiam carnes ferarum juxta alias etiam ex ea causa, quod animalia domestica, quæ aluntur in stabulis impuris ac foetidis, talem hauriant aërem

aërem & quod similes procreentur humores carnes quoque alterantes, conf. WIRDIGIVS in *Medic. spirit. curiosa* P. II. c. XII. Interest huius, quod præter alia & HIPPOCRATIS testimonio *Lib. de a. a & L.* haustum habemus fructus, plantas, animalia, gemmas, mineralia, quæ in eo terræ tractu, qui orientem solem respicit, crescunt, bonitatis, præ cæteris nota gaudere. Conf. modo cit. FERRAND. IMPER. l. c. c. IX. p. 280. Tandem etiam applicatione facta explicatius de nostro solo simul perspicere jam licet, quoniam est pingue, molle & nigrum, quod facile humescat ac dissolvatur, facileque iterum a calore humorem extrudente are scat: etenim si per paucas saltem horas pluvia cadit, cœnum mox abundat, rursum si per paucos saltem dies ardor solis fervet, protinus exsiccatur, adeo ut pulverem copiosam mox spargat, cujus miscela tunc elevatis nimirum in aërem pulverulentis & arenosis particulis incommodus redditur, exinde enim & oculi & pectus atque pulmones læduntur, si copiose illæ illabantur, & inspirentur, de quo vitio Arabia deserta ac loca vicina ut & in nova Hispania urbs Mexicana laborant, ut peregrinatores scripto testantur.

§. XXII. Circa aëris considerationem denique venti, qui aëris sunt sensibilis agitatio & fluxus ab ejusdem mutato æquilibrio pendens, imprimis non ventis (ut ajunt) tradendi, quos Summus rerum Arbiter ac Moderator Deus, ad custodiendam cœli terrarumque simulque aquarum temperiem dedit, (ut cum SENECA loquar *quest. natur. Lib. VII. c. XVIII.*) Quietus & non satis motus aër magis magisque noxia colligit & retinet effluvia, magis vel ex ipsa sua ignavia corrumpitur & ad putredinem est valde proclivis, verbo venenum æmulatur, ut recte agitated ventisve expansus soleque attenuatus atque illustratus medicinam universalem: a motu enim plurimum habet salubritatis, quo quicquid squalidum est & insalubre, ejicitur, qui quo agilior est eo magis a labe vindicatur aër. Notissimum est Austriam aut ventosam (ventosam autem eam esse atque generari ibi plures flatus abundantiae nitri & sulphuris exinde tonationibus plurimis factis adscribit PAUL. de SORBAIT in *Operib. med.* p. 380. dici, aut venenosam, (ob multos foetidos vapores ex Danubianis lit- toribus & insulis sordidis exsurgentes) & de Avenione speciatim habetur, morbos ibi, si non venti regnent, regnare, quale etiam de nostris regionibus est observatum, quemadmodum IOHANN. FIED- LERVS, in *der Müglischen Chronica* P. I. p. 88. scribit, quod Anno 1382. per totum annum nullus spiraverit ventus, ex quo multi morbi epide- miæ insecuti fuerunt. Hi namque sunt scopæ terræ gentis humanæ fe- dis

dis & domicilii, quæ eam simulque aërem everrunt & mundant, ut verba BACO de VERVLAM. *in præfat. ad hist. vent.* jam mea faciam. Igitur sunt maxime attendendi, sensibiles illi aëris motus, quique sensibilibus aëris mutationem sive in melius sive in deterius sæpius quoque inferunt, adductis ex aliis locis aut bonis aut malis qualitatibus: Omnis enim aëris constitutio a ventis potissimum dependet: ac si aër tantam potentiam possideat, tanto majorem ventus. Singula autem loca certis quibusdam ventis sunt exposita. Et sunt quidam, quorundam imo multorum satis vernaculi quasi venti, qui non adeo longe lateque vagantur, sed proximum tantum feriunt locum & ad alios non facile transmittuntur, quique non immediate semper magis ab Universi cardinibus & ex longinquo procedunt, ac privatim quasi regioni aut obsunt aut profunt, sic v.g. Scythion Athenas, Japix Calabriam, Apuliam Apulus, Pamphyliam Chagneus, Galliam Circius pervadit, & Galliam in specie Narbonensem, Narbonensis ideo dictus, Neomagum in Delphinatu urbem exagitat. De deleterio illo vento & Samiel & Bade Sambour dicto Arabiam adjacentesque regiones æstivis mensibus conturbante TAVERNIER *in Itiner. Pers. Lib. V. p. 301.* legendus. Causa horum est situs regionum aut urbium, quoad vicinos montes, specus, valles, directionem venti præsertim producentes & turbantes, ut & aquas, maria, lacus, fluvios, sylvas, ad solem situm, effluvia subterranea forte. v.g. Vaporibus resolutis, in angustum aliquod spatium intra montes a nubibus coactus aër si cum impetu transit, aut si ventus, ex quacunque etiam ora spirat & in contraria parte montes aut densas sylvas petit objectas, transitum vero per eas non inveniens retrovertitur, in majus spatium disjungitur aucto nisu interjacentem civitatem redit &c.

§. XXIII. Equidem Lipsia peculiarem sensibiliorem & notabiliorrem adeo ventum, aut stationarium aut periodicum aut continuum, qualis v.gr. in Zona torrida imprimis sub æquatore observatur ab oriente proveniens regularemque dictum, aut certo anni tempore, certo die horaque, certo mense aut anno revertentem, per certumque saltem tempus durantem, qui seorsim nominetur & describatur, nescit, cum nesciat montes, maria, flumina, littora grandia aut alia, quæ præcipue ejusmodi producere possent, & modo sunt indicata. Nec adeo etiam ea id dolet, cum universalibus ventis sint inferiores, quoniam sunt segniores, non adeo agitati neque adeo expurgati. Ventos nam similes esse fluminibus AVERHOES ait 2. *Meteor. cap. II.* qui excurrendo fiunt majores, accedente in progressu subinde materia, pabulo augmentoque a vaporibus &c.

His

His prælibatis ulterius dispiciendum est, quibusnam ventis urbs nostra frontem habeat adversam quibusve averfam. Frequentiores ex irregularibus dictis apud nos primum occidentales quibus ut plurimum miscentur meridionales demum, venti observantur, atque mane potissimum sentiuntur, quod commune fere habent omnes venti circa aquas majores conflantes, ut advertit BACO de VERVLAM. *Hist. ventor. p. 449.* qui in nostram temperatam regionem & quidem Lipsiam super copiosiores paludes sylvis obsitas per non unius milliaris spatium jacentes delati, in nubes densas condensantur & quasi conglobantur, hinc & impetuosissimi hi omnium sunt & procellosi, quique insuper pluvias pariunt, & si cum septentrionalibus junguntur, quod sæpissime etiam accidit, vehementissime sæviunt & damnosissimos atque lugubres producunt effectus, ut arborum dejectionem, tectorum deturbationem, imo ædificiorum integrorum horrendam ruinam ac subversionem, suntque humido frigidi, nebulosi, pluviosi, nubilosi, copiosissimos enim ex Oceano Atlantico vapores aquosos jam ingerunt, quos cum illis palustrium locorum nostrorum propinquorum ac ex iis corruptis & perniciosis miscent atque coinquinant, peioresque eos faciunt atque adversos, unde catarrhi hisque consimiles morbi inducuntur. Dein frequentes & sensibiliores sunt nobis aquilonares, quorum ubique major est numerus, quia in hac plaga plus nivis & aquarum depellitur, quibus liberior, nullo interjecto notabili per multa itinera impedimento, patet aditus. Ex alto hi magis feruntur e terris nive glacieque contactis ac gelu constrictissimis ex mari glaciali prorumpentes, hinc aërem crassiores inferunt atque imbres largiores frigusque humidum progignunt rectilinei, elastici, frigidi, sicci, sereni, limpidi, subtiles, particulis nitrosis copiosis, utpote summe laudabilibus referti & violenti sunt, æquales tamen & constantiores, adeoque intimius penetrant, refrigerant, stringunt constricti corpora, terram &c. sicque impediunt ne tot atomos immittant aëri, siccant, putredinem arcent & excrementa & effluvia crassa, humida dissipant, repurgant, corrigunt, abripiunt. Cum enim humidæ particulæ resistent minus sublato æquilibrio dejiciuntur aëremque sic ad salubrem redigunt modum, nubes fugant & serenitatem aëri, sensibus, animisque alacritatem afferunt, appetitum augent fibras roborando & instigando motrices, spiritus in corpore detinendo &c. Robustiores, saniores, coloratiores, vegetiores, langævosque reddunt homines &c. Hi ab HIPPOCRATE *lib. de morb. sacro* saluberrimi omnium habentur, nam licet etiam in loco sint paludes modo detur accessus Boreæ aër ab iis ut & orientalibus

libus corrigitur. Ob hanc ipsam rationem juxta eam, quod mari proximæ sint, per cujus motionem perpetuam stagnorum putredo avertitur, & altiores VITRUVIVS *Lib. I. c. IV.* paludes circa Atinam Ravennam & Aquilegiam, ut & ORIBASIVS *S. Collect. c. III.* Ægyptiacas minime damnant, eæ namque simul exsiccantur, ex quarum exsiccatione exoritur ventus, is namque qui ex humiditatibus crassioribus, quales sunt paludosæ, generatur, diutius durat, ut observatio fert BAC. DE VERVL. *in hist. vent.* Adhuc GVILIELM. PISO *Hist. Nat. & Med. Lib. I.* Brasiiliæ quandam regionem lacustrem licet tamen salubrem esse narrat. Hinc notante COELIO RHODIGINO *Lib. XX. c. XVIII.* in Lesbo insula incolæ ægrotantes extussi maxime, flantibus Coro austroque septentrionali superveniente, convalescunt citius. Constat observationibus, eas regiones ac urbes, quæ ventis septentrionalibus patent pauciores levioresque experiri morbos, conf. iterum VERVLAM *H. N. p. 451.* PLINIVS *Lib. II. c. XLIX.* CELSVS *Lib. II. c. I.* RHAZIS *Lib. V. de re med. c. IV.* HIPPOCRATES *Lib. de A. A. & Loc.* pariter affirmat, incolas regionum, quas venti frigidi & sicci afflant, esse sanos atque vivaces, atque Aristoteles illas urbes his expositas saluberrimas pronunciavit. Apud nos idem experimur, æstate imprimis existente sicca & temperata, quæ ad spirituum animalium adeo utilium elaborationi omnium aptissima est, frequentibus ventis orientalibus & septentrionalibus paucissimos nobis esse morbos, paucissimaque funera. Quinimo in genere hoc affirmandum est. Æstate calida maxime & sicca, per quam nimirum transpiratio corporum liberior est, jugis & ordinata bene, humorum circulatio optimaque fibrarum constitutio, apud nos quoque pauciores dari morbos, ideoque hic minus illud ARISTOTELIS valet, quod per æstatem magis adversa valetudine homines laborent, vid. *Problem. XXIV. Sect. I.* quod quidem etiam alias & in multis locis verissimum est, sic apud LIVIVM legitur *Decad. I. Lib. IV. c. XVI.* pestilentiam olim ortam esse a siccitate æstatis, & *Lib. V. c. VIII.* similiter esse natam pestilentiam in agro Romano ex siccitate & caloribus nimis; menses enim æstivi juxta alias causas ob ventorum requiem & exhalationum densitatem aërem habent magis caliginosum alioque modo minus convenientem. Atque ob defectum humidi blandi irrigantis solidorum corporum partium tonus nimis intenditur & rigidus evadit, & salia & sulphura fluidorum præter naturam exaltantur, volatilifantur, acuiuntur, resolvuntur & effervescent. E contrario autem quo magis æstate calida & sicca, Lipsiæ salubrius vivitur, eo magis humida & frigida etiam insalubrius, utpote aëre per se humido

humido & crasso. Sequuntur in nostro ordine intermedii venti & ex his imprimis nobis notatur Euro-Boreas, hic quoniam occidentalibus & septentrionalibus intermedius est, vehemens, humido-frigidus est, procellas, imbres, grandines, nebulas, pluvias, nives, tonitrua, affert, æstate vero æstum temperat &c. Hunc excipit Africus, sive meridionalis qui inquietus est, nubilosus, nivofus, pluviosus, humidus, frigus temperans, fulgura tonitruaque inferens, atque nobis quoque præsertim æstate atque autumnò insaluberrimus est. Quoniam urbs ita est sita, ut non per unius miliaris saltem spatium campi pateant ad solis ortum, liberior quoque subsolanis panditur accessus, quamvis raro puri esse soleant sed septentrionalibus sæpe mixti. Hi ex exsiccatis quidem proveniunt locis & per vastissima Asiæ spatia transeunt, calidi ideo sunt sicciores purioresque, & aërem intenso æstu exagitant alias; nobis vero non raro vernali tempore frigus inferunt satis intensum, quia ad nostram regionem supra Bohemiæ, Misniæ & Variscorum altos montes nive tectos proveniunt, secumque ex nivibus liquefactis partes subhumidas & frigidas advehunt, hinc & eo tempore pluvias per aliquot dies durantes efficiunt, hieme vero rariores nobis æque ac aquilonares impertiuntur nubes. Aërem enim considerare oportet, non tantum eum qui singulis locis incumbit, sed & qui ex discitis longe huc illucque versatur vel vi sua leniter fluente, vel ventis atque aëris impetu. Sunt insuper mites quoque atque æquales & temperatæ magis attenuant quoque atque expurgant, indeque animantibus salutares habentur. Nec etesiis anniversariis illis refocillantibus æstuante æstate ventis iisque satis non raro frequentibus regio nostra destituitur. Notanter supra dictum est aquilonares nobis esse omnium sensibiliores, iis nam urgentibus ineunte vere maxime febres intermittentes, urinæ suppressiones, calculi dolores, alvi adstrictionem, ophthalmias, pleuritides, peripneumonias, raucedines, tussès, coryzas, catharrhosque alios & similes in sensibilibus aut excitant aut certe exasperant contumacioresque reddunt, eosque ad ferventem protrahunt æstatem. Hinc & non inconsultum erit monere atque hortari, suadente aëris indole, corporumque constitutione eos imprimis, qui ab ortu habitus laxioris & mollioris, tenerioris atque sensibilibus sunt naturæ, quorum corpus humoribus ferosis aliisque tumidum atque distentum est, atque plethora molestat, vel qui doloribus omnis generis omniumque partium præsertim oculorum plerumque inflammationibus obnoxii sunt, & ad calculum, difficultatem urinæ & phthisin, hæmoptysin, apoplexiam, paraly-

lysin, proni, ut & ex morbis gravioribus convalescentes, & ratione sexus quidem foeminæ & ætatis pueri, ut consulant sanitati & saluti suæ, & vere ineunte imprimis atque autumno, sub his, (quæ sunt asperi nervis ideo inimici & violenti qui intimius penetrant fortiusque afficiunt, & insensibilem transpirationem impediunt, eaque suppressa præter alia si plethoram generant, fibras tendunt & stimulant & ad humiditates superfluas fundendas sensibiles partes irritant, quo quidem per accidens potius iidem alias salubres nocere videntur,) proximum aëris contactum avertant, bene vestibis se muniant neque incaute iis corpus exponant. Etenim si hominum corpora ab aura & ventis humidis & tepidis magis consuetis laxata magis sint atque aperta, repente exorientibus & furentibus rigidis ex Borea ventis citius, facilius pejusque læduntur. Insuper aëris æqualitas sat bene apud nos se habet, quæ æque ac bonitas ejus spectanda, quæ ut advertit BACO DE VERVL. in *Hist. Vent. M. p. 517.* in loco mansionis mala, verum mutatio aëris in peregrinatione bona.

§. XXIV. Cæterum clementi sat vultu respicit & bona utique temperie conservat ac sustentat Lipsiam, ut totam Misniam Cœlum. Atque est melior longe nostrorum locorum conditio, quam multorum aliorum; nec habet quidquam de quo seorsim conqueratur. Anni tempestates secunde inæquales; & æstas & hyems modo sat bene ferendo excipiunt sese; calor longior frigore, hyems ei sera rarior. Non eam æstus cœli & aëris violentus & torrens exagitat; qui Lemptæ & Sarræ Africæ Ormuz æque exurit eremos, & qui usum vetat vestium, atque sudores colliquativos provocat, nec Mauritanorum latibula subterranea eapropter desiderat. Non eam asperum ac sævum gelu hyemale adstringit, quo Novazembla & terra Corterialis riget. Non perpetuis ea ventis quassatur ut civitas Gonæssensis in Aetolia de quo loquitur SENECA in *Troade: an carens nunquam Gonæssa vento.* Nec dies ob æstum nec noctes ob frigus infelici repentina mutatione, adeo incommoda sunt, ut quidem in Japonia, Italia, & præsertim Romæ, Brasilia item ac in vicina Silesiæ, Hungaria ac huic annexa Transsylvania, ubi facies totæ sudoribus de die continuis perfunduntur, de nocte pruina, rigent capilli. Non affligit eam malus Jupiter, qui Cimmericos, Arcticos & Antarcticos, Magellanicos contristat. Nobisque ob hanc cœli solique infelicitatem nulla hominum paucitas. Raro nobis flatus sonitusque horribiles ventorum atque procellæ aut terræ motus metum incutiunt, raro cœli minæ, tonitrua, fulgura, fulminumque ictus & ignium celestium ingluvies hanc regionem hancque urbem feriunt, quæ urbes alibi,
uti

uti v. gr. in Carniola vid. ILLVSTR. BAR. WEICH. VALVASOR *Topogr. Carniolæ* sæpius fieri solet, sylvasque concutiunt atque evehunt. Non frequentes & incommodi cadunt imbres paludes foedas ingerentes ac conservantes atque eluentes abripiennesque terras. Neque solem nobis tegit aut avertit nebula continua, quæ Constantinopolim aut per hyemem maxime Angliam; sed salubribus pluviis interdum irrigatur ac rore quidem fere perpetuo recreatur in quo saccharum dulcissimum & occultus optimus vitæ cibus & naturæ nostræ gratissimus latet. HELMONTIO perhibente *Tr. Imag. ferment. p. 33.* quoniam condensatio aëris per se humidi & crassi de nocte major extremam partem noctis magis rorifluam efficit. Lacus hic nullus perniciosos halitus spirans hominibus pariter, ac gressilibus volatilibusque animalibus exitiosus. Nulla caverna specusque, aut terræ hiatus ex qua lethales spiritus exhalant, de quibus conqueruntur Itali, in Soracto oppido, & Sinuessano Puteolanoque agro colle Luculliano & Hierapolitani. Non conturbatur atmosphæra nostra tempestatum, nubium & turbinum occursum, concursu, flexu & gyratione quales aëreæ collisiones & disruptiones ejusmodi cum gravissimis tonitrualibus & fulminantibus fulminibus sæpius ibi commorantibus, antequam loco moveantur & dimota discutiantur atque impetuosius imbribus (*Wetterscheidungen*) vicina quædam loca circa Numburgum & Portam (*Schul-Pforte*) quædam in ditione Vinariensi aliaque alibi frequenter molestant. Cum enim in ejusmodi tractibus sulphurei nitrosique halitus tempestates excitant frequentes, fit itaque postea, ut quo major atque vehementior sit tempestas, eo fortior etiam & valentior requiritur propulsatio ventusque hinc adagationem impetuosior. Quare non prorsus vana ratione illas admittendas esse existimamus, quoniam juxta hæc commemorata aëris commotio nubiumque pressus transitus per montes convallesque, ut & ipsos in fluminibus turbines admodum alterari potest. Sic D. IOH. HEN. SCHVTTES in *Oryktogr. Jenensi p. 19.* scribit: Salam fluvium certo quodam loco prope ipsum Numburgum notabilem turbinem afficere, adeo, ut aquæ fluctus forti allisu littus quatiant valideque aërem ibi exagitent eumque ipsum in turbinem rapiat quo densæ pluviaque plenæ nubes accedentes in Salam fluvium eique adjacentem terræ regionem copiosam pluviam effunderent. Cum inferis parum habet commercii ac nescit plana Lipsiensis terra metalli fodinas & quæ ad eas pertinent varias ustinas terras exhalationes sulphureas, narcoticas, salinas, acres, acidas, mercuriales, saturninas, arsenicales, terrestres, spargentes & phthisin, dyspnœam,

spnœam, apoplexiam, paralyfin, artuum tremores, morbosque varios contagiosos eosque malignos atque adeo pestem inferentes. De quibus conf. E. D. BROWN *Act. Angl. p. 33. p. 811. & seq.* quæ certe hic magis essent perniciosæ si humidis & paludosis & heterogeneis ejusmodi atmosphæræ nostræ effluviis miscerentur & satis habet magisque gaudet forte, apportari ipsi aurum atque argentum, apportari dives lucrum per bene stabilita commercia rerum suoque exemplo clare comprobatur, verum esse illud quod dicitur, auriferos montes, non aureas monstrare regiones. Rariores hic sunt epidemii morbi & si obvenire brevi & sine singulari incolarum strage cessarunt iterum: Pestis, quæ Lipsiam afflixit aliquoties, non tam inclementi aëri adscribenda, sed per alios & vestimenta ex aliis locis infectis labes transportata in Lipsienses vulgata est, neque diu duravit neque urbem exhaustit atque infimam plebem saltem, quæ vix diætæ studere aut nequit aut non vult, affecit. Tacemus jam amœnum atque gratissimum vivendi genus, atque conditionem ingenuam, qua vivitur hic, gentis genium ad omnem humanitatem compositum, festivitatem ac urbanitatem, ingenuam libertatem, cultum bonarum artium, propensionem erga omnia honesta, quibus animum multis modis pascere, atque omni licita voluptate explere possumus abundantiam omnium eorum, quæ ad victum cultumque pertinent, & quæ in commendationem commoditatis & suavitatis venire queant, multa enim, quæ in deliciis haberi solent, & multis aliis negata, indulgentia almæ Naturæ indulgit, quæque forte non sunt hujus regionis, importantur ubertim, ut frui cujusunque fere regionis commodis, bonisque Lipsienses possint, iis his velut communibus factis, adeo hic noster locus omnibus humanæ vitæ desideriis satisfacit; ut nova etiam delicatissimos Apicios stimulari possit. Nihil alibi usquam tam rarum carumque invenitur quicquam, quod Lipsiensibus non domesticum etiam esse possit. Eximia est varietas voluptatum rerumque omnium condimentum. Mirum est, quantopere Lipsiæ suavitas, quam possidet, alliciat, atque adeo, ut qui aliorsum profecti Lipsiam adierunt, locum adeo decantatum illum delicatissimum fructum dulcis sub adstringentisque saporis gustasse videantur, vixque inde ut septentrionales in austrina loca delati ab austri Sirenibus, ut MUNDIVS loquitur *de aëre vitali cap. II. p. 8.* abduci possint, licet patriæ fumus alieno igne luculentior sit, (ut in proverbio habetur) quod Ulyssis fociis, quorum mentionem Homerus facit, in Africæ insula, Gerbes aut Ptolomeo Latophagites dicta contigit, qui apud Lotophagos manere atque qui simul & semel voluptatem degustarunt

runt eam deinceps etiam consecrari perpetuo decreverunt. Hoc certe Lipsiensis fortunæ decus paucis, paucioribus hoc commodum, paucissimis hæc suavitas data est. Dictu difficile est, quanta bonitatis & gratiæ divinæ affluentia in Lipsiam præ multis aliis Germaniæ urbibus opulentissime se effundat, ubique benignitatis Divinæ vestigia elucent. O felicissima Lipsia, terque quaterque beata. Hinc & de nostra urbe proverbio dicitur, plus in ea consumi quam acquiri. Incolæ Portugalliæ dicunt, quem Deus amaret, illi domum aut sustentationem Lisbonæ concederet, quod & Hispani de Hispaliensi civitate affirmant. Hoc merito quoque de felicibus Lipsiæ sedibus dicere fas est, cum pro quavis fere conditione hominum, commoda habeatur sustentatio. Notum apud nos atque notabile est, Percelebrem illum summæque existimationis atque autoritatis Lipsiensem Jctum, I. B. CARPZOVIVM, ex quo ex aula Dresdensi relicto splendidissimo ibi officio, rediit, albis Studioforum eum accedentium adscripsisse:

Extra Lipsiam non est vita, & si est vita, non est ita;

aut: *Extra Lipsiam vivere est misere vivere.*

Verbo: Lipsia omnium deliciarum & elegantiarum humanarum epitome vocanda. Neque tamen effœminat atque enervat corrumpitque animos loci amœnitas nimia; ac felix uberque terræ proventus aut ad corrumpendum illorum vigorem & integritatem sua natura operatur aliquid, ut quidem ordinario ferme aliis alibi commune est in affluentia & copia rerum hebescit animus, & enervatur, necessitate ipsa virtus retinetur. Sic & inquit SENECA *Epist. I. Loca seria sanctaque eligere oportet, effœminat animos amœnitas nimia, nec dubie aliquid ad corrumpendum vigorem potest regio; sed loci disciplina firmat ingenium aptumque magnis conatibus reddit.* Sicilia quæ laudes fœcunditatis possidet non vulgares eamque M. Cato sapiens cellam penariam reipublicæ & nutricem plebis Romanæ nominavit; sed & testatur CICERO *de L. Agraria contra Rul. Campanos* semper superbos fuisse bonitate agrorum & fructuum magnitudine, urbis salubritate, descriptione, pulchritudine; verum e contrario steriles loci, ingenia hominum ad exercitationem virtutum & variarum artium disquisitionem acuunt & duritie loci cœlique acrius animantur. Hinc & videmus, quod, ubi maxima loci inopia, sæpius tamen necessariorum omnium rerum affatim copia sit. Ideo hæc, ad quæ amor gratæ habitationis meæ locus abripuit, addere convenit, quod amœnitas loci & grata hinc ibique contenta vivendi conditio, ægritudinem quoque pellere possit, quia animus mire recreatur & anima contenta com-

municat atque operatur corpori vigorem sanitatem ac vitam: Sic ampliant vitæ spatium homines pacati, contenti ac hilares. Si enim sanitas, quæ formaliter certus ordo & motus est, atque conveniens actionum omnium corporis exercitium dependeat (dependet autem certissime) a libero æquabili & moderato sanguinis & humorum per vasculosam compagem corporis circuitu, apparet, animum contentum & tranquillum ad hanc maxime facere, ea enim est in corpus animi vis, ut spirituum motum potentissime alteret; alterant hi vero cordis & arteriarum motus atque partium tonum & qualis hinc cordis atque arteriarum motus & partium tonus, talis quoque est circulatio, & quomodo se hæc, ita & se sanitas habet. Notabile est, quod ex Celeb. SANCTORII *Medicina Statica v. Sect. II. aph. 49.* discitur in hominibus animi contenti, pacati & hilaris perspirationem insensibilem, liberiores & auctiores esse pondusque corporis levius. Pulchra hanc in rem sunt, quæ PLATO in *Charmide* BARDVS in *med. polit. p. 310.* & KVHNIVS ad *Laërtium p. 517.* habent. Experiuntur hinc subinde medentes si attentius & curiosius rem omnem perspiciant, quantum in curatione morborum valeat, quando ægrorum animus bene compositus est atque pacatus. Non vana hinc est eorum sententia, magnum esse præservationis momentum, si tempore pestis & sub contagiosis aliis grassantibus morbis, amicis, hilaribus atque contentis consortiis fruerentur amici.

§. XXV. Non vacat jam observationes prolixas addere barometrico-meteorologicas &c. circa gravitatem, elasticitatem, &c. ac constitutiones & variationes earumque causas & rationes tempestatum aëris Lipsiensis atque ventorum epidemicasque affectiones atque effectus exinde secutos per annos, tradere, hoc olim acturus forte an, ubi maturiori tentamine & experientia observationes instituere per singularia ejusmodi datum erit, quod laudabile & proficuum institutum, curæ merito esset omnibus, ut vel nativitatis vel habitationis suæ solo, quæ accidunt penitus observarent, colligerentque, ita futurum est ut multa adhuc nobis non satis probata tam in physicis quam medicis, melius in apricum deducerentur, ut a veteribus jam Herodoto, Hippocrate atque Galeno hoc ipsum suatum est atque observatum. Post horum tempora æstumatio hujus atque tractatio fere jacuit. Quare tantum ex observationibus curiosis barometrico-meteorologicis tulerunt laudis, quantum in iis egregiam iterum industriam collocarunt varii Excellentissimi Viri, & quidem in nostra Germania bina ista eximia Rei medicæ lumina & columnina eminent illustris nempe Dom. L. Schroëckius, Acad.

Acad. Cæsareæ-Leopoldino Carolinæ Præses. Et Excellentiss. Dn. Frid. Hoffmannus, Consiliarius Regius & P. P. longe celeberr. Laudandi quoque hic sunt celeberr. Collegæ Acad. Nat. Curios. in specie Vratislavienses, Rosin. Lentilius &c. In Italia a Sagaciss. Ramazzino primum hoc laudabile institutum exstitit, In Anglia Sydenham, Cok & Parker, Goad, in locis borealibus G. Krieger ideo commemorandi atque commendandi sunt.

§. XXVI. Si hæc tandem omnia, per series recensita, sub incudem, (ut ajunt,) revocemus atque utilia noxiaque tradendo invicem conferamus, ac pictores velut imitati, qui in facie bene exprimenda colores quoque condiunt nigro umbramque intermiscunt atque indolem vultus non negligunt & nævos quoque indicant juste quibus simul expressis quandoque fit ut quidam etiam illorum pulchritudinem evehant magis atque exaltent, hanc effluviorum ac exhalationum ex adeo diversis corporibus copiam, hunc fossarum squalorem hocque solum uliginosum & pingue hunc declivem urbis situm, si & aquarum indolem minus laudandam, hos ventos humidos nobis familiares frequentes nebulas atque nubilosas tempestates, inundationes, aliasque loci conditiones & incolarum labores, & consuetudines perpendamus, si experimenta instituamus per baroscopia, hygrometra atque varios aquæ magnetes, ut salia acida meracissima itemque alkalia siccissima &c. sique item alia indicia colligamus, aërem hunc humidiorum & putridum indicantia inter quæ mucor viridis copiosus & muscus tectorum tegulis, lateribus, suggrundiis &c. adhærens, qui Constantinopoli & Romæ tectis ædium copiosus adnascitur & effluviis humidis, & putridis aliisque morbosus non sine causa adscribitur. Conf. PR. DELLA VALLE *Itiner. P. I. p. 22.* ac feramenta exiguo tempore rubiginem contrahentia muri nigro, flavo & viridi colore inquinati, cita pellium & lintheaminum corruptio, tinearum cimum &c. copia &c. numerantur, in promptu erit notare atmosphæram hanc sua natura & in se consideratam esse in comparatione aliarum fœculentam, impuram, crassam, gravem atque humidam calidamque, atque multoties mox pulverulentam sæpius ac si rem sine studio & odio fateri, ut fas est velimus non adeo salubrem. Humidus & tepidus enim aër in se quidem minus conveniens & insalubris si uliginibus crassioribus fœdisque impuritibus aliis simul commixtus, magis talis est, quod ordinario quidem accidit. Quod vitium si quando adsit inhabitantes certe possunt augere deteriusque reddere (ut cursim hoc monemus) nimis in domiciliis atque hypocauftis & frequentioribus pro-

lutionibus & albariis inductionibus. Tametsi etiam ad conservandam sanitatem omnino pertinet, in ædibus atque domiciliis omnia bene repurgata fervare, attamen ejusmodi superflua certissime nocent. Ex his causis inter se collatis haud obscure jam colligere est, quomodo se habere possint hominum corpora eorumque partes tum solidæ tum fluidæ, atque in iisdem secretiones & excretiones, transpirationes &c. quæ pro varietate harum variæ sunt, aliter v. gr. ratione cœli se habent Angli, aliter Itali &c. Ejusmodi aër humidus nimirum & tepidus crassus, densus, heterogenitatibus continue exhalantibus inquinatus aqueis suis particulis anguilliformibus circumplicatis spirarum aërearum aut ætherearum, vim elasticam involvit, hebetat, & quasi extinguit, corrumpit, & prohibet, quo minus ea subtilis aëris pars quæ sanguinem volatiliorem reddit, intricata particulis vaporosis satis in pulmonibus separari possit. Præ omnibus aliis infelices dotes possidet inducendi ipsos morbosos affectus, moles puto corporum agentium augetur, corpora rigidiora evadunt arietantia ac in fluidiora quæ minus resistunt agentia, occasio laxatione nascitur ut poros atque meatus aliorum corporum cum attritione ingrediantur & aptitudo accedit motus augendi consuetos secessioque corporum promovetur. Ab eo speciatim pulmones afficiuntur male, respiratio difficilis redditur, majori justo cum vi illorum vesiculæ premuntur, sanguinis, feri reliquorumque humorum imò spirituum animalium motus & circulatio lenta magis ac præpedita (quod quivis in se ipso sentit tempestate nebulosa organa respiratoria plus premi,) & mixtio labefactata evadit, hinc stagnationibus & obstructionibus, quæ rursus obstructioni & circulationi sanguinis impedimentum adferunt, panditur via: Particulæ minus elasticæ, minusque activæ massæ sanguineæ permixtæ non tantas in depuranda ea ferunt opes unde retardatio. Cutis pori etiam & totus corporis habitus laxatur, dejicitur partium, fibrarum musculosarum, motricium, nervosarum tonus, non justè resolvuntur partes densiores & ad cutem deturbantur, rursus panditur via ut vapores noxii per apertos poros & cutis & pulmonum ad interiora usque facile possint penetrare, secretiones & excretiones impediuntur omnes, & humorum refluxus, humoresque densi, visceri crassique redduntur, lymphæ vero præsertim crassior reddita acescit, unde & fugam capiunt partes balsamicæ & tubulos simul obstruit, hinc salia acria, salino sulphurea, excernenda, cumulantur & ex nexu suo facile extricantur & evadunt etiam alias recondita, atque hæc corpora agentia extensionem majorem obtinent (laxatis sc. poris) quod in productione variolarum & pur-

purpurarum apparet, ac tota massa humorum in vappam quasi vertitur, & visceribus labes imprimitur &c. vid. SANCTOR *in med. stat.* Nihilque magis inprimis ad putredinem disponit, quam ejusmodi aër humido-calidus partium constituentium illarumque unionis mixtum constituentis disjunctionem, in qua corruptio consistit inferens, dum poros invadit eosque relaxat. Satis igitur causæ est, aërem ejusmodi inspiratione spiritus sanguinem humoresque inquinantem multiformes ægri- tudines capitis gravitatem atque dolores, gravedines, epilepsiam, scorbu- tum, gingivarum & dentium vitia, exesiones, vacillationes, nigredines affectum hypochondriacum, viscerum obstructions, inflammationes, pectoris præsertim, sopores, vermes, cachexiam tandem, hydropem, tu- mores pedum œdematosos illorumque impotentiam, sensuum gravita- tem, torporem, languorem, atonias, resolutiones, apoplexias, vitia ocu- lorum, visus hebetudinem, auditus gravitatem & aurium susurros, re- spirationem difficiliorem, præcordiorum angustiam aliaque pulmonum vitia, stomachum nauseosum, colicam, variolas, morbillos, purpuras, ma- culas, febresque varias intermittentes irregulares, imo malignas, pete- chias, arthriticos affectus atque rheumaticos, contracturas, defluxiones falsas, tibiæ ulceræ, fluorem album, cutis impuritates pustulosas & ul- cerosas, scabiem, diarrhoeas, prægnantibus vel ex levi occasione abor- tum, multosque labores parturientium eosque periculosos (unde HIP- POCRATES *lib. de a. a. & l.* hæc mala indicium etiam insalubris aëris ha- bet & ideo civitates orientem spectantes laudat: quod ibi foeminæ fa- cile pariant,) & similes plures morbos inferre. Aëri ejusmodi denso gravi- que incubum & febres semitertianas Galenum atque alios apople- xias adeo frequentes, adscripsisse legimus Conf. & BAGLIVIVS *in Praxi p. m. 126.* qui inter alia & crises eapropter rarissimas esse ibi, perhibet. PETRONIVS *de Victu Rom.* cœlo Romano humido ac si comparatio quæ- dam ineatur nostro in multis haud dissimili inter cœteros tres potissi- mum morbos familiares capi plenium scilicet sive assiduam capitis gravi- tatem, virium lassitudinem & alvi siccitatem adscribit. Ideo & Alexan- dria ut paludosa, febribus maxime est opportuna adeo, ut si quis ubi etiam eam accesserit febre illico deprehendatur. Ideo Smyrnæ autumnus fe- bres ordinario epidemice grassantur. Galli Lugdunenses si Dumben- sen Provinciam paludibus frequentem adeunt, febribus eos ut pluri- mum corripit, constat. Pariter Montanus refert quod in Cypro Insula prope Famagostam lacus quidem per æstatem putrescat, ex quo ordi- nario febres pestilenciales exorirentur. Mantuani ob solum paludosum

aëremque humidum thoracis hydropes familiares iis esse perhibent. Impotentia pedum nostratibus præsertim foeminis familiaris quæ incolæ Athenienses olim vexavit aëri adscripta est. Qui prope aquas ac loca uliginosa habitant, dentium cariem citius percipiunt; in Ægypto vero ubi aëris clementia insignis raro vel dentes decidunt vel cariosi fiunt, ut narrat Radzivilius P. ac refert HELMONTIVS *Lib. de Alem. tart. in potu p. 250.* Porro aëri ejusmodi particulis præcipue acribus & salinis turgido humores corporis inquinanti arthridides frequentes, quibus Carriæ & Alexandriæ incolæ vexantur Coelius Aurelianus Gravissimus scriptor adscribit, id quod etiam de Constantinopolitanis MERCVRIALIS *Var. Lect. Lib. I. Cap. XXIV.* refert: Et hæc dubio procul ratio est, cur in locis maritimis ut in Dania, Belgio &c. multos torqueat hocce malum, unde etiam vernali & autumnali tempore juxta HIPPOCRATIS effatum *Lib. III. Aphorism. 16. 17. & 20.* ejusmodi mala moventur. Herniam intestinale terram limosam & aquosam causari auctor est FORESTVS *vid. Lib. I. Obs. 21.* Imo Strabismum, claudicationem, gibbositatem, luxationem vertebrarum spinæ dorsi atque adeo balbutiem (hinc & oraculum forte apud Herodotum balbutienti quodam dedit responsum, ut in Lybiam, regionem calidam se transferret) aëri ambiendi soli acceptum referre alii non dubitant. Hi si non omnes plurimi tamen apud nos frequenter observantur morbi. Observatur & præterea Lipsienses esse uti in genere Misnici, qui eo nomine Svevis quoque comparantur in comparatione aliorum v. gr. Saxoniarum inferioris incolarum, imbecilliores, quæ corporum qualitas juxta reliquum quoque diætæ regimen aëri non minus humido-tepido tribuitur. Hinc & crises perfectæ apud nos raræ, quod regionibus inprimis quas aër aqueis & crassis impuritatibus foedatus ambit commune est, utpote qui humores quoque corporis magis reddit impuros, ut ad debitum hoc despuationis officium raro aut nunquam pervenire possint. Quare BAGLIVIVS præsertim præter alios autores *Prax. p. 140.* non sine ratione rejicit, quod in Græcia perfecte & sæpissime crises succedant, quoniam ea aëris puritate tenuitate atque elasticitate gaudet. Hanc aeris nostri constitutionem certius peregre ad nos inprimis ex regionibus salubribus, montanis, arenosis, frigidioribus & ficcioribus ex Silesia, Lusatia, Marchia Brandenburgica v. gr. venientes experiuntur; siquidem plurimi de pleno & turbulento capite & ventre conqueruntur referto & appetitu imminuto, multique morbos supra nominatos & ordinario fere scabiem pertinacem incurrunt. Hinc & apud nos præ aliis menses

Februa-

Februarius, (quia non raro jam tunc apud nos frigida tempestas remittit, tepore suo nives solvens & pluvias afferens) maxime Martius atque Aprilis ac autumnales, quoniam tunc humiditates abundant, accedente imprimis tepore, morborum eorumque perniciem apoplexiarum maxime catarrhorum suffocativorum &c. sunt feracissimi atque funesti. Atque experimur si maxime apud nos in reliquis etiam temporibus, habetur constitutio aeris diuturna, humida, tepida, austrina & tranquilla, ventisque salubribus carens, atque pluviae continuæ, inundationes aquarum, (aucta sic nimirum nativa quasi indole) accedunt, aut sub ipso statim tempore morbos epidemicos, oriri atque febres &c. purpuras, (quæ hic inter endemios numerantur morbos,) frequentius haberi in iis & periculosiores, & quæ ut plurimum junguntur petechiis, aut sequenti etiam insequi certius. Observationibus enim multis constat, morbos epidemicos non tantum dependere a præsentis aeris, ventorum, tempestatum, constitutione ac mutatione, sed sæpius & jam prægressa. Namque sæpius videbis, aere existente optimo, morbos oriri, & malo bene se habere homines, & rursus, malo & diuturniori cœli statu, per plures interdum annos existente, licet convenientissima dein aeris constitutione morbos ejusdem moris ac indolis grassari, argumento, prægressum aeris vitium, humores atque partes corporis adeo contaminasse, ut difficillime ab insequenti bona temperie, inducta labes in integrum restituatur, emendetur, corrigatur. Namque & alienum non est, ut malus aer morbos parit, ita bonum, vitium a malo prægresso diuque ingestum in actum potius deducere, quam corrigere, maxime, si subito fortiusque mutatio in contrarium fiat, v. gr. ex austrina & humida, aeris constitutione regnante diutius, humores redundant, impuri evadunt, cumulantur in vasis, supervenientibus dein subito ventis orientalibus, & septentrionalibus violentioribus, fibras porosque stringentibus, humores p. n. collecti & ferosi magis, imprimis in succulentioribus interiora ad vasa majori vi pelluntur iisque intruduntur, inde fit in partibus sanguineis intumescencia major atque infarctus, ex quo serum circulatione ex parte impedita ac turbata moram nactum secedit a reliqua humorum massa &c. & hinc illæ lacrymæ. Id quod modo diximus suo tempore HIPPOCRATES jam indicavit, ut colligere est *ex Aph. 13.* ubi dicit. Si vero æstas sicca & aquilonia fuerit, autumnus pluviosus, & australis, capitis dolores ad hyemem fiunt, & tusses &c. Ad hyemem dicit, & non æstatem, aut autumnum, quæ tempora tamen vitiose constituta fuere. Similiter in *Lib. I. Epid. sect. 1.* non in autumno, mox

ac in Thaso, Insula, pessima illa, quam ibidem pluribus enarrat, aeris intemperies inceperat, neque in hyeme, qua ea duraverat, sed primo in vere quibusdam obortas fuisse febres &c. Et tandem *sect. 2.* & alibi: Quum autem totus annus esset humidus & frigidus, & aquilonius, per hyemem plerumque sano modo degebant: ante ver autem multi quidem & plurimi morbi detegebant &c. Ante ver dicit, non autem autumno, aut hyeme antecedente, etsi sub utraque prava illa aeris constitutio viguerit. Imo dicit hyeme plerosque, & vere multos sano modo degisse. In *Aphorism. Sect. III. Aph. 22.* maniam ad morbos æstivos, qui autumno demum deteguntur refert. Effectus ejusmodi mutationum aeris & tempestatum in humidum & siccum & in calidum & frigidum optime & ulterius idem HIPPOCRATES ostendit *Lib. de a. a. & l. §. 25. & seq. & aphor. II. S. 2. & aphor. XII. Sect. III.* Certissime fluit exinde tempestates prægressas, ut causas detegunt, ita in curatione morborum epidemicorum maxime esse considerandas. Vix mihi tempero, quin exemplum quoddam & curationem eo quoque dirigendam adjiciam: In Silesia ante aliquot annos circa curam febrium epidemicarum ex acutarum familia grassantium maculis variis stipatarum inter Medicos primum magna quæstio orta est, an venæ sectio adhibenda sit nec ne. Plures eam primum adhibuerunt sed infelici eventu, quam tamen alias proficuum fuerunt experti. Ex propinquo considerantibus constabat, cum anno prægresso constitutio aeris ibi fuerit humida, pluviosa, austrina, ventisque carens, diuturna, venæ sectionem plane inutilem esse imo lethiferam ob vires exhaustas, dispositionem inductam ad putredinem sanguinemque hinc esse corruptum magis, quam copiosum.

§. XXVII. Hinc etiam (ut ad aërem nostrum Lipsiensem iterum revertamus & quandam quoque ejusmodi observationem practicam indicemus) remedia quædam, nimirum humores figentia, concentrantia nostratibus maxime autem foeminis non semper feliciter cedunt, quod alias & alibi de aëre humido, crasso & gravi est annotatum, atque hinc v. gr. experitur chinam chinæ febrium intermittentium famosum illud antidotum Lipsiensibus nisi iis qui duriore victu aluntur stomachisque robustioribus gaudent atque durioribus laboribus quotidianis corpus suum exercent & cholericis temperamenti rarius conducere, præsertim si in substantia ac majori dosi qua Angli & Batavi solent, vel secundum Sydenhamianam & Mortianam methodum ac in substantia præscribitur; felicius vero tutiusque opitulatur ejus extractum essentia, infusum vino, electuarium. Observavi si vere, autumno & hyeme humido exhibea-

tur

tur tumores pedum œdematosos atque adeo hydropem & contabescen-
tiam exinde, ex facile sequi & difficillimam esse in integrum restitutio-
nem. Neque desunt qui perhibent per experientiam quam simul affe-
runt edocti, capitis lotiones hic esse damnicas, quod quidem quidam
Autores de aliis Regionibus & locis humidis, ventosis flatibusque expo-
sitis referunt, imo nonnulli idem de omnibus propemodum balneorum
generibus affirmare volunt, quod ad ulteriorem observationem est per-
ducendum. Siquidem etiam Lipsienses ea persuasio tenet, ac si balnea
ipsis non essent conducibilia, quare & apud nos hodie rara, sed potius cre-
do vanam eam tantum persuasionem esse. Porro læsiones capitis hic cu-
ratu admodum difficiles esse, trepanationemque ut plurimum male cede-
re plurimorum experti asserunt, quemadmodum alii de aliis locis idem
tradunt: Sic Chirurgorum celeberrimus A. PARAEVS *Lib. X. cap. VIII.*
p. m. 491. refert vulnera capitis contumaciora & difficiliora curatu esse
Parisiis quam Avenione & e contrario vulnera tibiæ hic molestiora
quam ibi, ac AMATVS LV SIT. testatur itidem vulnera capitis pericu-
losiora esse Bonnoniæ quam Ragusæ, *Cent. VI. cur. C.* Idem J. B. CORTE-
SIVS in *Miscellan. medic. Dec. V. p. 229.* & J. B. SYLVATICVS *Controvers. IV.*
p. 22. notant. Hæc quæ de aëre Lipsiensi modo diximus adeo vera sunt
ut constet infinitimis locis duobus saltem aut tribus milliaribus Lipsia
sejunctis diversam harum rerum faciem esse. Grimma, Colditium, Leif-
nizium, Eilenburgum, Wurzena speciatim & exempli loco nominanda
orientalem versus plagam aliquot milliaribus a nostra urbe recedentia op-
pida, ob aeris inprimis & aquarum salubritatem per multa jam tempora
percelebrata sunt. Hæc & alia ideo argumento sint, Medici & natura-
rum, locorum & regionum differentias intelligant videantque quid in
unaquaque unicuique conveniat. Prudenter enim & exercitati in arte
hæc probe considerant, quæ pro cœli solique ratione varia sunt atque
nunc hoc, nunc illo utuntur remedio perspiciuntque quæ hac in tempe-
state prodesse, in rursus alia obesse possint.

§. XXVIII. Rebus itaque sic stantibus, ut ad id iterum redeamus,
a quo digredi paululum volupe fuit, de restituenda aeris Lipsiensis salu-
britate aut corrigenda interim ejusdem insalubritate, cogitandum erit
sedulo, idque iterumque commendandum, atque adversus noxas, quas
inferre hominibus possit convenientibus remediis laborandum. Maxi-
me cum Medicorum sit arcere & compescere morbos populares hæc
quoque aeris correctio præ aliis pro vario modo adeo impense per suf-
fumigia & vapores balsamicos resinosos, sulphureos salinos, volatiles &
fixiores,

fixiores, item aqueos &c. a multis quæsitæ est & instituta. Laudamus imprimis fossarum, quæ urbem circumdant, adeo jam diu optatam repurgationem circulationemque per eas limpidarum aquarum ac puteorum & canalium, qui in publicum usum sunt destinati atque excitati, extersionem, ex plateis omnimodam quisquiliarum putidarum foeditatem, & ex tota vicinia ejectionem, ut & cellarum, quæ sordibus redundaverint extersionem ac exsiccationem. Ad quam purgationem etiam opus est, ut circa hiemis finem Februario puto ac Martio mensibus humiditates cœnosæ a glacie liquefactæ aut ipsi integræ inhærentes mature ac longe extra urbem evehantur, ne cœnum colligatur humiditatesque a liquescente ea augeantur. Ad eam non minus opus est, ut canales in plateis pro evehendis sordibus contacti sedulo vertantur, ne cœno obstruantur. Consultum quoque esset ne fœculentiæ variæ in culina, cubiculo alibique collectæ situque non raro corruptæ & putrescentes & pessime foetentes in publicas vias effunderentur, neque fimus & quisquiliæ hinc inde tam in urbe, quam suburbiis in cumulis congestæ colligerentur diuque asservarentur, quod quidem quondam anno 1607. lege quadam publica vetitum erat; sed in loca congererentur a suburbiis longius remota, ut & ne latrinæ tempestate calida & humida existente evacuentur & evehantur, sed hyemali saltem tempore, aere nimirum frigido ac sicco. Huic munditiei urbis Romanæ ac commoditatibus publicis civiumque valetudini Tarquinius Superbus Romanorum Rex olim laudabiliter prospexit, qui ejusmodi repurgationis causa cloacas laborioso pretiosoque admodum opere, quamvis non sine magno Quiritum tædio construendas curavit, per quas ingentis molis fornicibus subterraneis efformatis corrivatisque septem annibus præcipiti aquarum cursu purgamentorum receptacula repurgata & in Tiberim omnes sordes, quæ vias publicas infestare solent derivatæ fuerunt. Hæc etiam de re a LANCISIO vid. *Tr. de noxiis palud. effluviis Lib. I. P. I. cap. II. p. 67.* maximæ laudi Ludovico XIV. Galliarum Regi ducitur, quod nempe ut Lutetiæ Parisiorum, quæ a luto antiquitus nomen accepisse videtur, viæ (publicæ) bene repurgentur, mandaverit. Hoc si decenter spes haud inanis enascitur, fore, ut catarrhi, pectoris varii morbi, febres rheumaticæ, intermittentes, malignæ aliique fontici morbi, qui præsertim circa vernum autumnaleque tempus incurrunt aut novantur, averterentur. Ad damus & hoc quod vitium aquæ pertinet ejusdem nempe quæ ad potum & cibos coquendos recipitur, quod commode vel addito cornu cervi usto, vel coctione, vel destillatione corrigatur, quo & commen-

danda

danda venit aqua pluvialis Mense Martio præsertim collecta, quæ optima eaque quæ cum tonitru præcipue decedit.

§. XXIX. Commendandus autem hinc nostratibus venit ex medicamentis eorum præsertim usus, quæ energeticis suis partibus spiritus torpidos excitant, majorem motum iis conciliant, humores quietos, lentos, viscidos, vappescentes atomis suis exiguis acuminatis incidendo & dividendo mobiliores reddunt, juxta universalia dicta laxantia nimirum, tempore præsertim hyemali, vernali & autumnali ex salinis præsertim aloeticis, rhabarbarinis, fol. fennæ &c. quandoque adhibita ac blanda vomitoria æstare magis. Ejusmodi vero illa sunt spirituosæ, salia volatilia, macra & oleosa temperata cumque aliis remixta, v. gr. spiritu nitrî dulci &c. spiritus elixiria balsamica essentiæ stomachicæ amara, modica aromatica cinnamomum præsertim nuxque moschata, antiscorbutica, alexipharmaca bezoardica balsamus vitæ Hoffmanni, Tinct. antimonii tartarisata aut acris, omniaque in genere propemodum diaphoretica temperata antiscorbutica, item vini bonæ notæ generosi, Rhenani, Burgundici, & qui tam aeris quam aquarum pravitatem apprime corrigit spiritus vini, spirituum ardentium, tabaci item moderatus usus. Non minus e re erunt infusa & decocta calida veron. melissæ, salviæ, scord. trifol. fibrin. & similia cort. sassafras, anisi stellati &c. & opulentioribus plegmaticis & senibus maxime radicis exoticæ Ninsi a Sinenſibus pro panacea & mortis & morborum averunco habitæ, ad ℥j. ℥iſſ usque ℥ij theæ, coffeè, succolata, & vinum aromatizatum & calefactum (glüenden Wein.) Aquæ usuales potabiles colentur & decoquantur. Sola quoque masticata hic eximio suo fructu non destituuntur, ut cinnamomum, semen sinapi, mastiche, passulæ majores & minores & similia, mane præsertim sic usurpata. Nec non quoad externa debite adhibita suffumigia ex resinosis, gummatibus, aromaticis svadenda sunt. Confert quoque in camino luculentos ignes tempestate maxime humida instruere, serena vero & calida soleque illustrata patentibus fenestris præsertim iis, quæ ad orientem spectant, portisque aliquem perflatum admittere. Verbo omnia tam interna quam externa hic locum habere possunt, quæ circulationem sanguinis & humorum motum moderate augent, secretiones & excretiones blande provocant, & quidquid alieni vitalibus humoribus admixtum est, convenienter eliminant, naturam roborant, corruptioni, putredini, resistunt, atque sic omnem ad suscipiendum contagium dispositionem auferunt &c.

§. XXX. Præ omnibus cæterum aliis moderamen in rebus non naturalibus bene observandum, in victu imprimis & venere, utpote quæ maxime nocet, maximeque debilitat, si natura ad excretionem aeris vitio languida sit. Circa illius rationem adhuc cumprimis cibi solidiores affati potius utpote qui tonum & firmitudinem ventriculo afferunt melioremque solutionem & nutritionem efficiunt, (melior enim pars elixarum carniū in jusculum abit, quare eæ concoctæ ut ajunt difficiles sunt) atque bene saliti commendandi, maxime cum constet, in hoc in defectu magis Nostrates peccare; quo melius & cibi & humores exinde præparati, chylus, sanguis aliique omnes melius dissolvantur, spiritusque animales melius eliciantur, melius distribuuntur, conserventur & a corruptione præcaveantur, calculus scorbutus aliaque cacoehymia genera avertantur: Tantum enim abest ut ejusmodi mala, falsamenta inferant ut potius arceant. Conf. HELMONTIVS *de Lithiasi* p. 17. Sale enim, quod condimentum condimentorum jure vocatur, & sole, ut Plinius præclare dixit, nihil magis proficuum est. Ideo etiam, quod nempe cibos sale non sufficienter condiant, P. H. GVIBERTVS *de tuenda sanitate*, Parisienses reprehendit, & observasse se scribit plurimas hinc esse obortas ægitudines, & unam ex primariis causam hanc esse, cur Parisienses præ aliis renum & vesicæ calculis laborarent. Historiæ referunt gentes, quæ salem non gustant, obtusi ingenii & excordes esse. Parciores tamen sint in carniū esu. Vitanda insuper sunt flatulenta & humores incrassantia, acida excessiva, item dulcia, pingua, farinacea, placentæ &c. quibus Lipsienses tamen maxime delectantur. Ejusmodi enim pingua tanquam oleosa facilius corruptioni & putredini obnoxia sunt. Expertus sæpius sum varias ex exteris Regionibus præsertim ex Suevia & Franconia ad nos accedentes nostras ossas præpingues ægre ferre potuisse, sed appetitu dejecto, nausea &c. ac febribus ipsis affectos fuisse, quæ incommoda ex propria observantia demum cognoverunt: vitandæ vero omnium sunt nimia & copiosa computationes & omnes luxuriæ, cupediæ, nimia ciborum præsertim intemperatorum copia, sufficientem tamen potum assumant ut salia scorbutica temperentur per vias urinarias educantur, quare & lenia diuretica prosunt. Inter potuum genera conceduntur cerevisiæ variæ, quæ hic habentur, ut Wurzenis, quæ bene sapida est beneque nutrit, licet viscidiuscula sit, Eilenburgensis magis diuretica est magisque resolvit & extenuat, quamvis quidam ob infrigidationem ventriculo inferendam suspectam eam habeant, Lebigensis diluit commode & diuresin convenienter movet.

Martis-

Martisburgensis stomachica est ut &, quæ vini simul aliquid Garlegiensis ad instar habet, ideoque palato maxime arridet Tucksteinensis, etiamsi stomacho aciditatem atque acorem contrahere videtur. Vitandum etiam omnimode jejunium; quoniam in jejunis vehementior aeris inspiratio & ad interiora admissio est, quare modo aliquot thee, caffèe, succolatæ, calidæ forbillationes aut frustum panis saliti, aut butyro illiti, matutinis horis antequam in publicum exeatur, assumtum, sufficiunt. Vitandus & aer frigidus matutinus, vespertinus & nocturnus, qui sua natura humidus & crassus, tunc magis nocet; omnis enim generis effluvia, etiam animata, quæ in locis paludosis frequentissima sunt, quæ per diem solis ardore ac potentia disjiciuntur & altius evehuntur, sole occiduo frigida facta tempestate magis condensantur atque cum humiditate quadam descendunt. Quare nocturnæ hic deambulationes magnum detrimentum asferre possunt. Pariter summo mane virulentum quoddam ros non raro in ejusmodi locis decidit. Ideo & modice gaudeant Lipsienses tempore æstivo in hortis suis præsertim in loco declivi & humido prope fossas & fluvios ac prata sitis, frequenter per noctem commorantes, obambulantes & dormientes, sibi, quoque caveant cum cura, ne aeri liberius præsertim mane ac vesperi, absente sole corpus suum committant, quo liberior perspiratio maxime inhibetur, ac præcalidæ bilioso sulphureæ atque salinæ excrementitiæ partes humores inficientes, intus retinentur, ex quo morbi graves & periculosi, febres omnis generis sæpe etiam malignæ & cachexiam spasmi hypochondriaci affectus præsertim & dolores inflammationes, hæmorrhagiæ epilepsiæ, rheumatismi, & id genus alia mala facile exsurgunt, in iis præsertim subjectis quorum sanguis multis corruptis & malis humoribus ex inordinata diæta jam est repletus. Quantum in locis calidioribus ut Hungaria & Italia æstate fervida aura horis vespertinis atque nocturnis sub dio degentibus noceat abunde notum est atque perspectum. Tunc enim aer refrigescit & humescit exhalationes condensantur ac colliguntur, ex alto decidunt facileque dein per poros corporis solis prius fervore adaperptos se insinuant, ubi magnas multasque noxas ingerunt. Juxta hoc monitum illud quoque salutare ab ALEX. PETRONIO *de Romanor. victu lib. IV. p. 245.* iis qui in diætis suburbanis villis & vineis suis circa urbem Romanam frequenter se exhilarant, datum, Lipsiensibus quoque, qui voluptatis gratia, hortos & villas suburbanas adeunt, considerandum sisto; dicit ibi enim: *Sæpe in vineis istis aer nocere consuevit, quia homines consuetudinem in omni victu mutant.* Nam soli sese citra

tempus exponunt intempestive multumque non solita comedunt, bibunt aguntque crepusculo sub dio cœnant, subinde plerumque sudantes, vineam perambulant postea noctu domum revertuntur. Paulo largius somno potius indulgeant, quam nimis vigiliis & nocturnis ingenii laboribus & lucubrationibus animi pariter ac corporis robur frangant ac spiritus animales dissipent, dormientibus pedes & coxæ bene contactæ sint. Frictiones corporis sæpius instituantur & inunctiones ex nervinis salinis spiritibus, oleosis, balsamicis, ex lavend. melissa, majorano, roremarino &c. in vertice, temporibus, nucha & collo præsertim. Cubicula profunt dormitoria ab humo longe remota, serena, repurgata, sicca, spatiosa & alta ventisque ficcioribus exposita, in quibus tempestatibus humidis & nebulosis igne luculento excitato aer alteretur & depuretur, ac per noctem fenestræ clausæ servantur, quare non satis commoda, si salubritatem quidem respicias, interiora ac angustiora illa Alcoven vocata, quoniam a luce & aere libero nimium sunt remota. Aere enim puro ac temperato fruamur, ut cum maxime quando somnum capimus æque quando cibum potumque assumimus atque corpus exercitiis movemus, quia magis tunc aerem in interiores recessus corporis, pulmones, ventriculum, imo sanguinem recipimus. Ut & rectius valeat mens in corpore sano, modicis convenientibusque excitent motionibus, & exercitiis corporis; præsertim ii, qui alias agunt sedentariam vitam, & meditationibus seriis diuturnis occupati, qui arti plus invigilant quam sanitati, quorum negotia otium sapiunt, quibus calor natus non excitatur, & vigor non acquiritur, milites quasi imitati, qui media etiam in pace supervacuis laboribus se exercent ut sufficere necessariis possint; Quemadmodum Plato duas has artes civitatibus necessarias esse judicavit, Gymnasticam scilicet & Musicam, hanc animorum, illam corporum nutricem. **GEORGIVS BAGLIVIVS** multæ memoriæ clarissimus urbis Romanæ incolis, cujus coelum nostro quoad multa simillimum & æque humidum minusque elasticum esse, antea diximus, ad præcavendos morbos populares, equitationem præ aliis exercitationum generibus, tanquam arcanum sedulo commendat, *vid. ejus lib. I. Prax. med. §. 4. p. 138.* Vires tandem quantum fieri potest, conservandæ, & ne, ut Celsus loquitur in secunda valetudine adversæ præsidia consumantur. Diætæ enim imprimis convenientis studio id efficimus, ut in regione etiam alias intemperata bene longeque vivamus, quod in Italiam præ aliis deprehendimus, atque ideo illorum industriam exactam accuratamque rationem, quam in hoc collocant ac exhibent laudamus merito. Speciatim pro iis, qui subur-

bia

bia inhabitant, alluviei aquarum obnoxia hoc monendum esset, ut post ejusmodi colluvies omni modo humectatas ædium partes usque iterum resiccatae fuerint, relinquunt accenso interim igne exsiccent, subterranea loca, cellas ab humiditatibus sordidis repurgent, suffumigia per omnes ædium partes exsuscitent, quorum materiam plebi hæc loca inhabitanti commodam & optimam præbent, cornua, ungulae & segmenta e coriis præparatis relicta igni injecta, aut sublimes potius incolant.

§. XXXI. Optime & sibi, vitæ & sanitati suæ consulunt, quoniam aer non semper emendari potest; (emendatur autem aer in locis præfertim humidis, paludosis, stagnosis & concavis perdifficile aut nunquam) qui frequenter aerem urbanum, qui ordinario in ædibus & plateis retentus densior, crassior & impurior est, ob densum nimirum incolarum congeriem, opificiorum tetros halitus densosque fumos, quibus ordinario est stipatus, eum rusticano, qui solutus & apertus levis & ventilatus, multis exhalationibus peregrinis expers, a solis cæterorumque forte siderum calore & lumine explicatus magis est, mutant. Melius adhuc agent ii imprimis, qui de appetitu ciborum prostrato digestionem & nutritionem difficili conqueruntur, morbis chronicis & contumacibus præter naturali spirituum constitutione detenti, in affectus hypochondriacos & pulmonum vitia proni aliique valetudinarii & quibus alias noster aer minus convenit, æstate atque autumno comoda tempestate peregre abeant, seque in loca, quæ sereno, puro, libero sicco & aquis claris salubribus fruuntur & præ aliis in montanos quosdam tractus ad tempus quoddam recipiant, cumque aere vitæ dispositionem & concatenatarum curarum mutant simul, ut ex quo ibi recreati novi quasi hospites domum redeant. Celeberr. LANCISIUS lib. de advert. Rom. cæli qualitat. Cap. IX. §. III. De Romanæ urbis incolis ac accolis refert: si post solstitium æstivum spirante maxime austro, tam male se habeant, ut, nisi ad montes confugiant, facile e vita decedant. Mirum quippe est, quantopere aeris cum aere mutatio, itinere facto feriorum cum otio, corpus pariter ac animum excitet, firmet & recreet: atque habet quidem loci mutatio voluptatis nonnihil, quam in rem EROTIANVS belle ait: *Migratio interdum medicina, & in morbis mutatio loci sæpe salutifera.* Præter hunc & passim alia loca egregia apud HIPPOCRATEM lib. IV. Epidem. Sect. V. t. 19. AVICENNAM lib. I. tit. 4. SENECA de tranquillit. animi & quæst. nat. lib. III. c. III. epist. it. 85. STRABONEM lib. V. p. 238. occurrunt. Mihi præ aliis placet CICERONIS lib. de Clar. Orat. cap. XVI. & ille ad GALLVM lib. VII. Epist.

Epist. 26. quæ tamen jam ob chartarum angustiam transcribere nolo. Exemplo sint Angli, qui ex vitio atmosphæræ suæ in phthisin sunt proni, hi quandoque itinere in Galliam & præsertim Avenionem facto aut immunes ab ea diutius manent, aut optime ab ea penitus liberantur. Ita qui in Hispaniola Americæ Insula & vicinis Insulis morbo ab aëre loci insueto corripuntur advenæ, hoc unico remedio sanitatem recipiunt, si alta loca adeant montosa, ac si per mensem unum aut alterum ibi commorentur. Videbis hinc Imperatores, Reges, Principes Magnos atque Magnates pro anni temporibus atque tempestatibus mutatis, loca, itinera faciendo mutare & quas frequentes cœli mutationes Regibus Hispaniarum leges antiquæ imponunt. Legesque id ipsum jam olim hoc institutum fuisse apud CVRT. l. 5. c. 8. TREVNERVVM ad Cluverium p. 172. NEANDR. in Præfat. ad Erotem. græc. lingu. p. 44. ATHENAEVM Lib. XII. inter quæ exempla illud nimirum notissimum est, Reges Persarum Susis hiemasse, æstatem degisse Ecbatanis, per autumnum versatos fuisse Persepoli, ac reliquam anni partem in urbe Babel. SCIPIO AFRICANVS dicere solitus est, eum repuerasse, quoties ad Cajetam se contulisset, & conchas cum Lælio, Amico collegisset suo. Ex variis longeque plurimis insuper literarum monumentis passim constat, veteres, si aër ipse emendari nequeat, aërem commutandum diligenter suasisse. Sic apud CELSVM legitur Lib. III. Cap. XXII. phthisieos in Ægyptum navigasse & apud GALENVVM Method. Med. IV. V. & XII. Tabias profectos esse. Navigationem in Cyprum desperatis quibusdam morbis detentis profuisse testatus est ALEXANDER BENEDICTVS IX. Prax. XXXII. Catarrho falso pertinacissimo cuidam afflicto in metu tabis Murani habitationem suasit I. B. MONTANVS in Consil. 156. & I. C. CLAVDIVS Consil. XXI. & LIII. Alia testimonia præsertim ex recentioribus Autoribus collecta inveniuntur apud D. WOLFF. in observ. med. chirurg. Valet etiam hic, quod CELSVS dixit Lib. III. Cap. I. Pessimum ægro est cœlum, quod ægrum fecit. In aliis quoque morbis qui ex aëre non nati sunt, æque commigratio utilis est, de quo item multæ hinc inde prostant observationes, ex quibus singularis illa HILDANI est, quæ modo exemplo sit p. m. 935. de homine quodam ultra annum gravissime ex vulnere quodam ægro-tante & a primo statim die itineris aërisque mutati insigniter, sicque deinceps indies melius habente. Ita VESLINGIVS in Not. ad Prosp. Alpinum Cap. IX. ait, vidi sæpe pessime affectos & in ossa ipsa sæde sæviente veneno morbo cum extrema alibi omnia frustra tentata essent in Ægypto citra magnam præsidiorum vim, noxiam luem evasisse. Insulæ Bourbonicæ,

bonicæ, ab ægrotantibus in eam delatis sunt cultæ, ubi recuperaverunt sanitatem ac foecunditatem. Notæ mihi ipsæ quædam foeminæ Lipsienses sunt, altera affectioni hypochondriacæ, altera albo fluori obnoxia, quibus Lipsiæ semper male est; in Marchiæ vero Brandenburgicæ & Lusatiae inferioris certis quibusdam urbibus, ubi quotannis per aliquot tempus commorantur (utpote regionibus ac locis arenosis, siccisque aëre, eapropter etiam salubriori) semper se habent optime; imo, quod curiosum, observatum est, reduces Lipsiam saltem appropinquantes protinus iterum mala sensim redire sentiunt sua. Atque scio multos, qui Lipsiæ commorantes de vertigine, capitis doloribus, anxietatibus, lassitudine, appetito imminuto &c. semper conqueruntur, in vicina saltem oppida, aut Dresdam, aut in Lusatiam aut Silesiam &c. provecti, nihil horum incommodorum sentiunt. Si aliud adhuc forte exemplum desideres. De B. D. Grapio Theolog. Rostoch. quondam eximio proficit vid. *Rostoch. literat. pag. 192.* cum semper Lipsiæ valetudinarius esset ex consilio Medicorum Lipsiensium aërem Lipsiensem cum Rostochiensis commutavit, ex quo mox convaluit meliorique valetudine deinceps fruitus est. Hoc enim medio ac remedio permutatum & insuetum licet aërem nova quædam natura molitur conamina, quibus sibi consilere intendit, suumque scopum feliciter attingit, quando hunc aërem per gulam potissimum & nares in se admittit sanguinis sic per pulmonis pressionem suscipit, transpirationemque insensibilem per poros cutis alteratam experitur.

§. XXXII. Ut ut hæc sunt & quæ correctione ac remedio opus habent, non tamen desunt varia, quæ ad salubritatem aëris potius faciunt, quæque de ea testantur. Quare declarandum arbitror, juxta alias passim traditas salubritatis causas ex variis, insalubritatem aliis maxime corrigi subvenientibus; corrigitur vero optime juxta solis statim exorientis illustrationem, cui acclivis ratione circumjacentium versus hanc coeli plagam ad meridionale latus usque se extendens urbis positus, feliciter expositus est, ventis orientalibus & septentrionalibus noxiam vaporum copiam disjicientibus, serenantibus corruptionis vindicibus per situm urbis sic etiam opportunum liberius admissis a quorum afflatu potius aëris salubritas merito deducitur ut modo est indicatum, qui dominantes salutem constantem promittunt. Qui & jamjam causam meam juxta alia alibi jam indicata agere & de excusatione mihi gratulari videntur, ne injurius in Lipsiensem aërem videar. Quo frequentius igitur hi tempestatibus quoque convenientibus nostram urbem accedunt eo

magis salubritatem quoque atmosphærae ingerunt. Hinc humorum, qui in nobis sunt validior circulatio & a corruptione & putredine conservatio; & eorum quæ extra nos sunt, noxiorum correctio & ejectio. Sic & v. gr. Cairus Provinciæ ægyptiacæ caput quotannis febre pestilentiali ab hyeme ad æstivum solstitium misere vexatur, quæ tamen etesiis ventis accedentibus cessat. Conf. *MUNDIVS in operibus* p. 47. *ALEX. PETRONIVS de victu Rom. Lib. IV. p. 245.* Si Romæ æstate aquilo aut Favonius flaverint, Romanarum vinearum aërem non insalubrem esse censet. Sic Venetorum urbs in ipso medio stagno locata & morbis sæpius pressa, perflantibus vero eam septentrionalibus ventis sensibilibiter mitigantur & depelluntur. Adeo hoc quoque verum est, ut apud Medentes nostrates etiam in confesso sit, mutatis ventis subito mutari in ægrotantibus imprimis affectus atque ejusmodi effectus, in convalescentiæ statu succedere rem notabiliter in melius &c. Juxta enim Hippocratem lib. de flat. mortalibus vitæ & ægrotis morborum aër potissimum est autor & dominus. Nec hæc insuper suo destituuntur effectū; fruuntur enim incolæ vegeta sat sanitate & longævitæ quæ certè bonam notam in urbe aliqua prodit. Siquidem passim non pauci apud nos inveniuntur, qui vitam vegetam & sanam in seros, Pylios atque Cumæos annos extendunt, octogenarii, qui nonagesimum & centesimum annum atque adeo ultra attigerunt, & vivendo adscenderunt, ut ex annuis, schedulis, observationibus & annalibus constat ut videre est in *VOGELII Annal. Lipsiens. p. 15. 17. 43. 73. 538. 561. 665. 723. 730. 737. 821. 894. 966. 998. 1065.* *HEIDENREICH Chronic. Lips. An. 1592. p. 198.* *MATH. MERIANI Topogr. Super. Saxon. p. 121.* Inter macrobios Lipsiensis præ omnibus aliis memorabilis est Joh. Hutterus Aedilis qui ætatis suæ 114. anno mortuus est vid. *SAL. STEPNERI Laur. Lips. p. 155. No. 596.* Porro quoque ad aëris salubritatem cognoscendam sunt nobis aliæ adhuc notæ, inter quas corporis habetur habilior habitus, hinc Croto Italiæ civitas ob athletarum multitudinem saluberrima visa est. Præterquam quod aër quoque chylickationem adjuvet, uti per experimenta ope machinæ papinianæ facta videmus; humidus efficit pulchra corpora candida & tumida, opima, macilentaque restituit, sub hoc nutritio felicius absolvitur, quoniam hæ aeris particule solidorum expansorum & laxatorum poris sese facilius insinuare possunt, quo & via sanguini & cum ea partibus nutritiis paratur, & occasio expansioni & appositioni nascitur. Hinc Prosper Alpinus affirmat se non alibi tam pingues homines vidisse quam in urbe Cairo, adeo, ut & mares æque opimas mammas ac foeminæ habeant, ob
aerem

aerem humidum ex inundatione Nili redundantem diætamque humidam, quam fervant ac refrigerantem. Amplius dicendum est ejusmodi aerem (humidum) prodesse quatenus siccitatem corporum quæ calorem nimium eundemque infensum producit, emendat. Hinc jussit GALENVS *Metb. med. Lib. X. C. VIII.* ut gratum aeri refrigerium concilietur, aquam frigidam de vase in vas transfundere atque domum ea undique respergere. Unde & scimus omnes nos in aere humido majus frigus sentire quam in sicco. Strabones, herniosi, claudicantes, gibbo deformati, hic si causam curiose perquiras, non tam aeris & aquæ vitio, quam nutricum & gerularum suarum supinæ negligentiae & ruditati & aliis evidentibus causis, potius sæpissimeque sua hæc incommoda ab ineunte ætate debent. Alias quoque corporum deformitates oppido raras hic offendes, quales capitones, buccones, labeones monstrant. Habentur & aeris commodi signa, laudabilis Lipsiensium temperies utplurimum sanguinea notabili sæpius, maxime in foeminis phlegmate permixta, cutis bene colorata & florida satis, non rubicunda nimium, quæ Celso suspecta, quoniam sanguinem nimis calidum indicat; nec adeo pallida, flava & lurida, quæ omnium pessima; sed suavis & visui grata ab Hippocrate commendata. Iis præterea accensetur vocis claritas, hinc ipse Phasia nos hominum omnium gravissime loqui ob aeris crassitiem & aquam palustrem dicit; e contra incolæ Bliterræ Galliæ urbis gratissima omnium loquela gaudent, quam bonitati aquarum adscribunt. At nostratibus non solum volubilis est lingua satis, nec os seratum, unde affabilitas grata & sermo clarus atque decorus. Foecunditas item mulierum, vid. O. RVDBEKIVS in *Atlant.* ex his signis non excluditur, qua prærogativa foeminæ Lipsienses jure non excludendæ veniunt. Acuta tandem incolarum & festiva ingenia ad studia & artes aptissima, suaves mores & elegantes, animi vis cum prudentia conjuncta, quæ omnia de Lipsiensibus uti in genere de Misnecis merito deprædicari possunt, his annumerantur quoque eorum mores & qualitates laudatissimas longius deprædicant DRESSERVVS in *Isag. hist. P. V. § de urbib. p. 391. § p. 389.* CAMERARIVS in *Arithmolog.* ALBINVS in *Chron. Misnensi Tit. XXIII. fol. 318. § in Annal. f. 174.* HEIDENREICH in *Chron. Lips. p. 32.* Hinc PLATO in *Timæo* ac in *Menexeno* Atticam terram esse ingeniorum fertilitati præcipue accommodatam autumat, atque Crotoniatarum locus saluberrimus olim habitus fuit, etiam hoc nomine quod brevi temporis spatio quamplurimos produxerit, tum atletas, tum philosophos seu corporibus pariter ac animo præstantes viros. Hodie adhuc a Geo-

graphis hoc argumento China ac Insulæ Orcades inter alia loca celebrantur. Ut enim & aer & aqua & terra & tempestas differunt, ita etiam hominum formæ & mores. Conf. qui de moribus gentium scripserunt celeberrimi Auctores IOH. BRILAJ. SCIP. CLARAMANT. Aliique. Audiamus modo hac de re HIPPOCRATEM loquentem *lib. de aëre, aquis & locis, in fine*: Magna enim ex parte hominum formas, & mores regionis naturam imitari reperias: ubi enim terra pinguis est, & mollis & aquosa, aquæ vero valde sublimes, ita ut æstate sint calidæ & hyeme frigidæ, quæque ad anni tempora probe habet, ibi homines carnosæ sunt, articulis non discreti, humidi, labores non ferentes, ac ut plurimum pravi animi. Quin etiam segnes sunt & somnolenti, & ad artes crassi, neque subtiles neque acuti. Ast ubi regio nuda est, non munita, aspera, quæque hyeme prematur & sole exuratur, ibi duros, graciles, articulis discretos, carnosos & hirsutos homines cernis & qui ad aliquid agendum natura sunt industrii & vigilantes; mores autem habent superbos, in iram proclives & pertinaces, magisque feritatis quam lenitatis participes, eosque ad artes acutiores & solertiores & ad res bellicas gerendas meliores deprehendes. Quin & reliqua omnia, quæ e terra producuntur, terræ ipsius naturam sequuntur. Atque maxime quidem contrariæ naturæ & formæ sic se habent, ex quibus conjectura ducta, si reliqua consideres, minime aberrabis.

§. XXXIII. Hæc est commodi incommodique sicuti fere ubique ita & apud nos miscela: Etenim nulla plaga est, cujus felicitatem nulla flagellat calamitas, nulla adhuc urbs in loco adeo salubri constituta est, si etiam Locridem Crotonemque Italiæ oppida mihi nomines, quæ saluberrimæ omnium urbes semper ob miram aeris salubritatem, quam PLINIVS II. Cap. XCII. deprædicat, & refert, ibi etiam pestilentiam nunquam serpsisse, habitæ sunt (unde vetus proverbium: Crotone salubrius) quæ a morbis & morte sit immunis, nullaque ita munita est, ut cladem fatumque excludere posset. Ipsa Macrobiorum regio dicta, quam Æthiopia continet, ideo olim adeo celebrata, eam inhabitantes tandem non sine omni prorsus morbo evita sustulit. Difficile reperies civitates, quibus positus situsque a Medicis desideratus, atque omnibus numeris absoluta hæc felicitas contigerit. Difficile videbis agrum, quem vis major novercantis fortunæ nulla conturbet; quæque suas & rosas habeat & spinas; neque usquam cælum sine nube apparet; quævis fere regio, imo quævis civitas suos patitur morbos, quos endemios vocant, & a conditionibus certis aeris, ventorum, aquarum, telluris, fructuum &c. oriundos & juxta alios solis atque stellarum aspectibus. Non omnia enim optima ubique obtinere possumus, sed prosperitatem semper ali-

qua

qua comitatur labes atque injuria. Ipsa felix Arabia a suavibus & salubribus odoribus, quos longe lateque spargit, aliisque vitæ commoditatibus ita nominata, sed eadem pestilentibus morbis ex gravitate aeris contractis male impedita, ac China apud omnes audit amœnissima, sed & eam multa pericula multæque miseriæ subinde obruunt. Madritum Hispaniæ Metropolim serenus aer, tenuis & salubris ambit, sed non raro infelix infrigidans ventus ex Gallicia veniens & incautum, dum blanditur, lædit, manus pedesque resolvit. Atque aliæ regiones alia habent de quo conqueruntur: Ægyptus, fertilissima illa regio, ab aeris salubritate, situs commoditate, soli bonitate, aquarum Nili nobilissimi fluminis fœcunditate, satietate, hilaritate & deliciis, quas affert, per tot secula adeo commentata. Crocodilos quadrupedes, immanes & pessimos flumine pariter ac terra infestos timet eorumque devorationes dolet &c.

§. XXXIV. Jam æstuantibus hæc, constabit, aerem Lipsiensem non adeo esse insalubrem, ut a plurimis equidem habetur & creditur; magna enim ubique est & frequens Lipsiæ versantium, non advenarum solum, sed civium etiam querela, ad florentissimæ Lipsiæ felicitatem nihil præter aeris salubritatem posse desiderari. Intueamur igitur eum ut providum parentem, qui vitia & interitum præcoccem, nisi impeditur, a suis avertere studeat alumniis. Et sic habes, Benevole Lector! urbem Lipsiensem, Lipsiensia loca, aerem, terram, aquam, habes valetudinem, habes remedia.

* * * * *

II.

DISSERTATIO PHYSICO - MEDICA DE

SALVBRRITATE SILESIAE.

PROOEMIUM.

HIPPOCRATEM, qui merito summus Medicinæ Parens salutatur, ut ob multa præclara, quæ reliquit, Medicinæ dogmata, quæ non finxit, sed invenit, & non apicibus, sed nervis est metitus, omnes admirantur, in eo præsertim iterum iterumque laudandum censeo, quod

non modo studium physicum & Anatomiam & Chirurgiam Medicinæ jungendam commendavit, atque naturæ processum, modum & ductum in curatione monstravit, eumque ut sequantur ubique Medentes est hortatus, sed & quod ex victus, aëris, tempestatum, anni temporum, aquarum, locorum varietate ac mutatione, mutationes quoque & alterationes in humanis corporibus & originem variorum morborum deduxit scitissime & quibus vitiis certæ ætates hominum, temperamenta, sexus, Regiones, Climata sint exposita, explicavit. Inter cætera hinc maxime *Liber de A. A. L.* & ille *de morb. vulg.* eminent, magnamque utilitatem donant. Hæc ut percognosceret varias Regiones itineribus factis, adiit ipse, & indolem conditionemque, affectus atque successus, ejusmodi permulta loca scrutatus est diligentissime. Sequutus hunc & laudabiliter GALENVS, qui pariter varias peregrinationes terra, marique discendi causa suscepit atque sollicitum diligentissimumque etiam rebus in minimis se exhibuit. Optandum esset, ut posteri Physici & Medici horum eminentissimorum in Medicina Virorum etiam in hoc utilissimo studiorum genere observandi sedulitatem fuissent secuti, longe hodie feliciores essemus in aëris, ventorum, aquarum locorum essentia, indole, proprietatibus &c. exponendis quæ adhuc in multis valde sunt abstrusæ. Hos itaque Antesignanos eximios Medici quoque sequantur & curæ merito omnes habeant, ut Chorographia medica jucunda non modo sed & utilis instauretur, perficiatur, tantoque magis, quanto ardentius hæc desideratur. Congruunt ad hanc rem verba SENECAE *questiones naturales tractantis*: *Quod, inquit, erit pretium operæ? quo nullum majus est. Nosse naturam. Neque enim quicquam habet in se hujus materiae tractatio pulchrius, cum habeat multa futura usui, quam quod hominum magnificentia sui detinet, nec mercede sed miraculoso colitur.* Nobis hac vice communis istius Medicinæ Præceptoris Hippocratis præceptis exemplisque aliorum quam & potissimum suavissimæ Silesiæ gratissimæ dilectissimæque Patriæ dulcis sc. miro amore gaudentibus eam esse suam vera æstimatione jucundaque memoria, atque adeo sæpius eam repetendi cupidine, quæ firmiter insident animo, voluptateque maxima repetitur ductis, curiosa contemplatione natali solo digna debita solvere atque commoditatem & salubritatem prosperitatis certe haud infimam partem paucisque aliis bonis anteferendam, his literis celebrare ratio constat, ac tantum non religione quasi jubemur atque Minerva Hygea dixit in aurem, imo jussit. Instituamus proin bonis verbis optimam Silesiam salutantes curiosæ peregrinationis (quanquam festinatione & in transitu quasi)

quasi) iter, ac in eo non modo Silesiæ limites, sed & interiores recessus, eorumque conditiones, aërem, aquam, terram, incolarumque vietus item consuetudinis rationem &c. ut vel potiora potius & breviter magis quam prolixè & ornate proferamus, quæ ad Silesiæ exinde faciunt salubritatem. Veniam itaque concedat nobis B. L. si parum meditationis compositæ, parum elegantiae inibi inveniantur, ac si omiſſa quædam annotentur aliqua saltem docebuntur, quæ eam docebunt & nos jam satis habeamus esse hic Silesiæ, esse Patriæ nostræ Charissimæ quoddammodo salubritatis documentum. Quod si frustra laboraverimus hoc saltem effecerimus, ut plura & meliora cogitandi atque scribendi ansam dederimus, & si possibile maturiorem aliquando nos fructum edamus. Jam igitur divina ope non sine suavi animi sensu rem ipsam aggrediamur.

§. I. **S**Vavissimæ Silesiæ prærogativarum adeo multa illustria concurrunt & affluunt argumenta, ut tanto confidentius laudes quasdam Nobilissimæ huic Provinciæ debitas, præ aliis multis & jure quidem tribuere possimus. Tanta certe Summi & Clementissimi Numinis in Silesiam Clementia est, ut totam multifaria atque amplissima longe coronet augeatque benedictione. Nemo enim hic facile quicquam desiderabit eorum, quæ Regionem amœnam, gratam atque acceptam commendant. Hac certe nulla fere Provincia domi forisque celebrior est, quæ coeli indulgentia, soli clementia, situs opportunitate, ubertate frugum omnibusque aliis donis & muneribus, Cereris, Bacchi, Pomonæ & Venatricis Deæ Dianæ, nec non metallorum reconditorum, commerciorum cum exteris & dissitis longissime mercatorum pretio, urbium, arcium, vicorum multitudine, magnitudine, ingeniis, moribus & studiis incolarum &c. cum aliis facile comparanda. Nil jam attinet, ut singulæ Silesiæ eximiae dotes ac opportunitates ad cultum hominum & abundantiam longius petantur, cum ad aliarum artium ordines id attineat. Etiam proprio nitore corruscat atque floret per se laudibus suis supra laudem posita insignissima celeberrimaque Silesia, ut ejusmodi prædicatione parum videatur acceptura splendoris, digna quæ ab aliis ex asse celebretur; illud tantum, quod jam muneris nostri est nostrique instituti magis, officii & gratitudinis jure monente sequamur, & quod in quolibet loco primum propemodum in laudem gloriamque vocatur, quoniam Generi Hominum sanitate ac commoda vita nil dulcius exoptatiusque est unquam, vitalem nempe ac perennem illam salubri-

lubritatem, qua præ multis aliis Regionibus gratissima patria gaudet, scripto memoremus.

§. II. Attribuimus vero salubritatem omnibus iis rebus naturalibus congrue se habentibus, ut sunt aër, venti, aquæ, fluvii, terra, arbores, plantæ, herbæ, quæ sub terra conduntur, animalia, alimenta, esculenta & potulenta, medicamenta, quæ sanitatem s. omnium in corpore humano actionum integritatem, quæ in convenientia motus atque mixturæ partium fluidarum, & in congrua solidarum conformatione, robore atque organis viisque liberis aptisque consistit, juvant, præbent, stabiliunt, ampliant præsentem, atque restituunt & instaurant labescentem læsam atque amissam. Quoniam hæc magnam potentiam in harum temperiem & motum obtinent. Quæ ejusmodi sint in Silesia jam æstimemus ut innotescant eadem.

§. III. Atque locorum salubritas, quæ hominibus, animalibus, imo & vegetabilibus salubritatem quoque dat & integritatem potissimum ab aëre qui & de telluris, ac aquæ participat indole dependet, quare ab eo recte incipere posse videmur. Immensum hoc fluidum, diffusum undique, omnia complectens omniaque pervagans, quod sine intermissione inspiratione haurimus, corpora quævis ad intimos usque recessus penetrat & afficit motu suo continuo, varie, pro variis, quas continet, particulis crassis & tenuibus, terrestribus, humidis, salinis, sulphureis &c. Si igitur bonis iisdem utilibus subtilibus spirituosissimis æthereis temperatis concinne quoad humiditatem, siccitatem atque ejusmodi, quæ calorem frigusque &c. inferunt, quæque jugiter moventur, est præditus, actiones in corpore vitales omnes conservat integras diu, i. e. sanitatem sua salubritate & vitam concedit; hinc jure veteres scitissime aërem occultum vitæ cibum, spirituum pabulum, animam ore haustam & auctorem omnium, quæ corporibus accidunt, habuerunt. Contra si vitatus est, a vitiosis, impuris, crassis, vappidis, inertibus, intemperatis, humidis nimis, salinis, sulphureis, impuris, foetidis, acrioribus, malignis contagiosis &c. totam Oeconomiam animale afficit, pervertit, conturbat, ac destruit &c. Luculentum hujus rei suppeditant testimonium, morbi populariter grassantes, quorum communis indoles communisque origo a nulla alia causa commodius certiusque deduci potest, quam a communi universalique medio, in quo versamur, aere. Atque si tanta vis per se aëri inest afficiendi, multo magis venti, qui sensibiles imo sensibilissimi sunt aëris motus, atque ipsum potissimum alterant varie, majorem adhuc possident potentiam, quoniam fortius allidun-

alliduntur fortiusque atque intimius penetrant. Hinc si vehementissimus ille est, mirandos imo horrendos videmus effectus, maris vastissimi molis & fluminum fluctuationes & inundationes, arborum dejectiones, ædificiorum deplorandas ruinas; quorum omnium tristitia exempla non ita pridem atque non simplici vice audita oculisque comperta habemus.

§. IV. Varia sunt, quæ aërem alterant eumque vel in melius, vel in deterius mutant, &c. Situs positusque locorum quoad solem, Cœli plagas Ventorum exortum, aquarum, fluminum, marium, telluris, montium, sylvarum, subterraneorum quoque, aliæque ipsorum locorum conditiones, & quæ inibi crescunt atque inveniuntur, maximæ hac ipsa in re, imprimis sunt considerationis, quoniam hæc omnia atomos in aërem atque atmosphæram nostram propius mittunt. Etenim aër non nisi velut terræ & aquæ lanugo est, ex multifariis adeo effluviis conflata & vastissimo spatio cœlum inter terramque diffusa. Pro his non omnes terrarum tractus & loci similes, sed pro harum varietate varii sunt, quoniam & non omnes ab omnibus semper atque ubique æqualiter afficiuntur, sed dantur variæ vicissitudines & causæ, quæ impediunt aut promovent effectus alias certe subsequuturos, daturque certis finibus coercitum earum pondus & motus, ut non ultra ferantur &c.

§. V. Felices igitur, terque quaterque felices istæ regiones, quæ felicem & opportunum situm ac positum salubremque aërem obtinent, salubriaque alunt & proferunt. Felices beatique gaudeant incolæ, qui talem felicem terram inhabitant, quoniam per medium hoc corpore pariter ac animo valent, ac valent diutius. Hac felicitate nihil felicius a Deo mortalibus datum est. Silesia vero quoque habet ejusmodi, nec unum, sed plura, de quo sibi jure gratulari potest. Namque eam benigno sat vultu respicit totam cœlum. Si situm spectemus in orientem commodissimam cœli plagam vergit, atque speciatim dicendo, minus longe in latitudinem ad meridianum & occidentale latus, quam recta regione spatiosam ad orientem atque septentrionem, temperato, subfrigidiori paulo, sed non ideo insalubriori climate totam locatam regionem videmus. Hinc temperies atque vicissitudo, quæ hominibus, animalibus pariter & vegetabilibus perquam accommodata est: Aer enim temperatus, temperatis naturis saluberrimus est, & nulla qualitate excedens, qualis vernalis omnibus convenit, omnes temperato, sereno reddimur hilariores. Non ut Africam violento sole Silesiam torret, & licet magna portio autumnii pariter & veris, hiemi accenseatur atque eam

longissimam anni experiatur, ut universa propemodum Germania, tamen non riget aspero & perpetuo, ut septentrionales regiones, gelu. Nec assiduis procellis, ut Gallia turbatur. Nulla paludum gravi nebula inficitur. Non malo premitur Jove, qui Cimmericos, & Magellanicos affligit. Non afflat eam urens quidam ventus solo halitu exceptus encans, qualis interdum ex assyriis babyloniisque eremis exit, quem Samiel vocant. Non ea pericula, eæque miseriæ eam impetunt, quam quidem Chinam, felicem alias regionem, cui nunc ignis coelitus immissus totos pagos, tota oppida, atque urbes totas, imo provincias devorat, nunc inundationes & diluvia diglutiunt, nunc terra diductis suis faucibus absorbet. Non terræ motibus, ut Italia, terretur. Non bestiarum terra fluminibusque infestarum, & vel solo nomine terrentium, laniatus non dolet. Nec dies ob æsturn, nec noctes ob frigus adeo incommodæ sunt, ut in vicina Hungaria. Solem non tegit aut avertit Silesiis nebulosa nebulosaque tempestas continua, quæ per hyemem maxime Angliam, coelorum matulam a quibusdam ideo dictam, obscurat. Nulla hic aquarum fœditas, nullus hic lacus, nullus hic specus, nullæque cavernæ, halitus lethales, spirantes. Fungi, qui Silesiis copiosum ac gratum edulium præbent, non venenati ac exitiosi sunt ac quidem in Dania vid. BARTHOLINI *Acta med. Hassn. Vol. II. p. 294. Observ. CXVI.* Non molestant Silesios, culicum insectorumque, aliorum densa examina, quæ Guennam Galliæ aut Careliam Sueciæ provincias. Non terrarum tractus informes, difficiles, cultu adspectuque tristes ac horridos monstrat Silesia, quales Hispaniæ plagæ ad pyrenæos montes imprimis, (unde quidam in Hispania mori optaverunt sibi) sed ejusmodi, qui oculos non modo mire delectant, sed & animum reficiunt. Nescit felix Silesiæ terra morbos endemios notabiles; morbi epidemici contagiosi quoque ibi sunt rariores, & si quidam quandoque fuere, non diu tamen grassati sunt. Potius amicæ sunt Silesiæ, roscidæ æstatis, noctes dulcissimum vitaleque saccharum afferentes, amicique suaves etesiæ, quia nivibus liquefactis in jugis tauricis longinque & montibus hungaricis, bohemicis & moravicis propius accedunt, oriundi, flatu nimium æstivum æsturn temperantes, ut alias jam amœnas dotes taceamus, quibus quiete atque secure fruitur, & uberrimam sine omni periculo aut omnium commodorum colligit messem.

§. VI. Qua parte oriens est ex parte adhuc Poloniam Majorem dictam, planam regionem, (quæ etiam a planitie nomen accepit, Slavonica enim lingua planities Polo vocatur) ex parte quidem altos sarmaticos montes

montes decurrit. Per illam venti orientales omnium ad valetudinem, ut ordinario, ita maxime Silesiis accommodati, liberius accedunt, quoniam subfrigidi sunt & sicci beneque temperati, sole super eam quotidie oriente, calorem & frigus aptissime moderante. Nec adeo obstat, neque Silesia lugeat, quod horum salubrium ventorum alia ex parte ab Hungaricis altissimis montibus accessus impediatur, cum potius humidi, ab Hungariæ vastis paludibus elevati transvectique vapores, per hos ipsos excludantur, sanitati vitæque nocivi. Hungaria enim ob hunc soli squalorem & visciditatem aërisque humiditatem maxima ex parte insalubris habetur. Hinc BALBINVS *Miscell. R. B. lib. I. c. V.* notanter advertit, Imperatores ac Reges quondam Bohemiæ, ut Sigismundum, Albertum II, Uladislauum II, Ludovicum II, Ferdinandum I, Maximilianum II, Rudolphum II, Matthiam cum conjugē suā Anna, Ferdinandum II, in Hungaria & Austria (de qua notissimum illud est: Austria aut ventosa aut venenosa) ægre se habuisse semper, adeo ut coacti fuissent, has regiones cum Bohemia sæpius permutare, ubi infirmi etiam pristinam valetudinem brevi recuperassent.

§. VII. Meridiem versus perpetuo in longitudinem partim montibus Bohemiæ altissimis, (quos sudetes Ptolomæus dixit, qui partem vastissimæ herciniae sylvæ relictam esse putantur, quorum maxima pars Rhippei aut Riphæi, a Riphato forte Gomeri filio Riphæorum Principe vocatur, qui locum quorundam mendacio fecerunt, quippe traditum est, cum Diis hic olim gigantes pugnasse, unde gigantei sunt nominati) complectitur, partim Moraviæ sylvæ Gabretæ Lazio dictæ, summis montium cacuminibus tota cingitur; etenim hic tractus ad Bohemiam, Moraviam Hungariamque versus ad meridionalem & occidentalem nimirum plagam se extendit. His densis sylvis simul obsitis non solum ferventior & magis molestus solis ardor lenitur ac temperatur, sed & (quod adhuc utilius est) forti quasi propugnaculo adversus meridionalium ventorum malignitatem Silesia defenditur, his cohibiti ad interiora non penetrant. Nam notissimum est ventos meridionales omnium nobis esse insaluberrimos, quoniam sunt humidi & calidi, impuri, lentissimi, (unde & plumbei non male appellantur) atque sublimia vix ascendant; adeoque non elevant vapores, ut potius detineant eos. Ex horum indole memoratis facile cognoscent animum advertentes, hos esse sanitati & vitæ infensissimos, quippe non modo debitam elasticitatem debilitant pessime, sed & omnes fibras partium solidarum motrices, carnosas, tendineas, nerveas de suo tono dejiciunt, laxando nimis ac destruendo,

struendo, ut plus justo dein ab affluentibus onerentur, extendantur præter modum, humores quoque ipsos, imo spiritus animales corrumpunt, vappidus reddunt illorumque motum circulatorium inhibent, & quoniam hæ ambæ corporum partes inter se mutuam sic quasi ferram trahunt, labem illatam communicant & per hanc ad impuritatum retentionem, stagnationes, corruptiones atque ad cachexias, scorbutum, tumores, epilepsiam, paralyfin, sensuum conturbationes, segnitiam, affectus soporosos, memoriæ debilitatem, surditatem, dolorem capitis, visus caliginem, guttam serenam, catarrhos cerebro ingenti repleto humore & similes nec non ad inappetentias pravasque digestionis causas ac tandem quoque ipsam putredinem & malignitatem concipiendas reddunt aptissimas. Malam hanc indolem exinde acquirunt. Scilicet: Licet calore magno inficiantur propter solis descensum, radiis ad perpendicularum magis ferientibus, atque ex præcalidis Africæ locis & Libyæ aridis arenis proficiantur, tamen dum mediterraneum transeunt mare vapores calore elevatos secum abripiunt nobisque inferunt ad nos delati; nam venti qui terræ siccivapores sunt, non solum indolem referunt eorum, a quibus proveniunt, sed & eandem illorum, per quæ transeunt. Horum labem non modo in microcosmo, homine, sed & animalibus, brutis atque in toto macrocosmo variis luculentis argumentis percipimus, sic aves, hirundines, galli &c. imprimis aquaticæ, mox vel insculturam humidam tempestatem, quam ordinario secum afferunt, prænunciant, dum plumas, alas rostris fricant & explicant, insolitasque & modificationes & actiones edunt & cantus &c. sic granaria, cellæ &c. meridionali auræ expositæ citius suam bonitatem perdunt citiusque & fructus, semina &c. vermibus exeduntur, vina, cerevisiæ &c. quæ inibi aservantur, corrumpuntur, imo ædificia huic exposita detrimentum ruinantque citius minantur, ut plura taceamus.

§. VIII. Ad occidentem Bohemiæ saluberrimæ quoque Regionis & utriusque Lusatiae limitibus, ad Marchiam usque circumscribitur. Qua parte adhuc limites Bohemiæ, alta montium juga itidem protenduntur, qua parte Lusatiam imprimis inferiorem spectat & novam Marchiam Brandenburgicam densæ sylvæ hinc inde, terris & agris arenosis aridis magis, sunt interdistingtæ, quæ ventos occidentales impetuosos, procellosos, nubilososque humidos quoque, pluvias copiosas & nives ex Oceano atlantico advehentes, (hæ enim particulæ humidæ in vapores prius solutæ, dum ad frigidiora nostra loca perveniunt, ibi densatæ æstate pluvias, hyeme nives concedunt) parum quoque salubres, impediunt,

diunt, quo minus libere Silesiam accedere, eamque transire possint. Quoniam & per Lusatiæ Inferioris & Marchiæ oras transeunt, in quibus copiosæ arenæjacent, a regionum harum siccitate, humidi hi venti in transitu temperantur. Ejusmodi enim regiones siccæ, aëre gaudent saluberrimo, incolasque sanos alunt atque longævos, quippe aër non adeo siccus & moderate calidus adeoque non multum a recta temperie recedens, humorum motui conservando & spirituum elaborationi omnium aptissimus est.

§. IX. In Septentrionem, secundum longitudinem ad Majorem Poloniam ad Neo-Marchiam Brandenburgicam usque in magnum salubritatis momentum se explicat. Cum enim in longitudinem hac in plaga universa Silesia extendatur & Polonia pateat latissima & vastissima, æqualis, arenosa & sicca, quæ demissiori in loco, Silesiæ respectu posita est, nullique montes interjaceant notabiles, liberum ventorum septentrionalium admittit aditum, adeo ut nulli in Silesia sint frequentiores, quod de Marchia Brandenburgica itidem idem dicendum est. Hi vero ab ipso HIPPOCRATE jam *Lib. de Morb. Jac. conf. & Lib. de A. A. & L.* saluberrimi omnium & merito quidem habiti sunt, nec ab illa sententia alienus Aristoteles est. Licet enim ob remotiorem solis cursum frigidi sint sicci & violenti & ex parte incommodi, æquales tamen sunt & constantiores: per experientiam enim constat, homines, quos venti ejusmodi afflant, & has regiones incolunt, coloratiores, vegetiores, robustiores, saniores, longævosque, paucioribusque morbis obnoxios expositos atque levioribus conf. & PLINIVS *Lib. II. C. XLIX.* CELSVS *Lib. XI. C. I.* RHASIS *Lib. V. de re med. C. IV.* BACO DE VERVL. *H. N. p. 451.* præ aliis esse. Nam ex alto deorsum feruntur, rectilinei magis & vividi particulas salinas, nitrosas, advehentes refrigerant, stringunt terram & corpora omnia, quæ tenet, & hoc ipso impediunt, ne atomi forte nocivæ ex variis & innumeris adeo corporibus humidæ, crassæ, excrementitiæ, putridæ &c. cum aëre misceantur, & si infectus iis est aër, dissipant, abripiunt, repurgant, corriguntque eundem. In hominibus pari modo, fibras roborant motrices earumque tonum firmannt atque restituunt ac armant, ut fortius impellant humores, ut impelli dein & fortius ab humoribus rursus queant. Spiritus animales laudabilissima corpora, in corporibus detinent earumque dissipationem jacturamque inhibent &c. quibus mediis circulatio humorum, eorumque depurationem, a quibus sanitas vitaque animalium pendet omnis, debita & integra servatur atque redditur promptior, omnesque actiones instituuntur meliores, sicque ut aëri serenitatem afferunt,

ferunt, ita hominibus corpora sana, sensus mentesque alacres reddunt atque præstantes.

§. X. Causa salubritatis Silesiæ quoque primaria & universalis magis est ejus situs positusque altus: quo altiori enim excelsoque loco, loca sunt locata, eo puriori, tenuiori, ficciori atque salubriori fruuntur aëre. Nostri Silesia vero Regni Bohemiæ altissimæ Regioni vicina, altum quoque in Germania obtinet situm: Hinc & adeo multi fontes fluminumque scaturigines & rudimenta atque incrementa ex ipsa Silesia & ejus limitibus profluunt. Eorum enim, quos primæ hic magnitudinis vocare liceat, primum Vistula est, quæ in Teschinensi Ducatu initium sumit. Albis hunc sequitur, unus ex nobilissimis Germaniæ fluviiis, qui circa Ducatum Jauroviensem ex ipsis, montium sudetorum radicibus ad Bohemiam Saxoniamque utramque devolvitur. Ipsa Oderam amnium Silesiæ maximus per mediam Silesiæ decurrens e limitibus Oppaviensis Ducatu procedit. Mediæ magnitudinis amnes, qui hic nascuntur, sunt, Nissus in Comitatu Glacensi atque alius ejusdem nominis Lusatiam rigans prope Ducatum Jauroviensem. Barcha in Baronatus Militiensis confinibus. Boberus sive Hebrus & Vistricius in Ducatu Svidnicensi. Quissus cum Catto Isera, Upava Zakeloque in Jauroviensi, Olava in Monsterbergensi. Morava & Desna Moraviam transiens ad fines Oppaviensis D. Weida in Baronatu Wartenbergico. Bilus ad Nissam, Stobra ad Bregam miscetur Oderæ, Sprotta ad Sprottaviam Bobrum influunt in ipsa Silesia profluentes. Infimæ magnitudinis fluvii ortum ex Silesia trahentes, multo sunt plures hic non longius recensendi, ut & jam innumeros rivulos atque torrentes, limpidos atque crySTALLINOS in nominatos nedum incolis ipsis satis notas taceamus. Longam eorum seriem potes videre in HENELII *Silesiogr. ren. P. I. a. p. 566 usque 593*. Nec solum Silesia in universum sumta altius locata est, sed & ejus urbes, oppida, arces & ædificia & pagos in editiori loco in collibus & montibus in quibus aër, COLVMELLA teste *Lib. de re rust. Cap. IV.* calore & frigore temperatus est & defœcator, majori ex parte, excitaverunt Majores.

§. XI. Atque ipsæ dein Silesiæ aquæ, fontes, fluvii, rivi atque torrentes non minimum salubritatis Silesiæ symbolum conferunt, quoniam atm. osphæram reddunt salubrem. Si enim aër non totus consistet ex aqua calore resoluta ex multorum Chymicorum sententia, certissimum tamen est atque exploratum, aërem immensas particulas aqueas elevatas continere. ut argumentari exin liceat, talem quoque aërem esse, qualem aquam atque assensum simul Vitruvio præbere, qui ex habitu corporis inco-

incolarum pulchro & deformi naturas aquarum illius regionis exploravit. Omnes vero hi rivi fere perennes, gelidas, limpidas, claras, pellucidas, crySTALLINAS, gustui gratas, dulces atque a priori posteriorique comprobatas salubres undas, quas nec in vicina Hungaria Danubius, aut Nilus forte nec Tiberis aut Arethusæ fons apud veteres adeo decantatus, meliores, & ut alii loquuntur, nectare scatentes, & aëreo melle fluentes trahunt atque evehunt, ex arduis & montosis, saxosis & glareosis locis manantes & per terras bonas dulci strepitu excurrentes, talis est etiam aqua qualis terra. Insuper quoque celeri sat cursu feruntur, quoniam ex altissimis montibus profluunt, ubi & plures rivi accedunt & per angustatas montium eorum sæpe petrosorum fauces quasi ad celeriores cursum coguntur. Per quam aquarum per se salubrium velocitatem, ventus semper quidam lenis efficitur, ambientem atmosphæram movens ac ventilans, sicque ad salubritatis modum redigens. Ambo enim, si non moveantur, mox capiunt vitium, motu autem conservantur, corriguntur, aliaque corpora corrigunt &c. Convenientissime hinc CARDANVS pronunciat L. II. Cont. c. in Hippocrat. inquires: *Flumina velociter currentia aërem attenuant faciuntque corpora tenuia, macilentia, mobilia &c.* Ideo Danubius, Rhenus, Tigris, Malmistra in Cilicia a celeritate, qua defluit, celebres amnes inde celebrantur, ut e contrario Phasis omnium lentissimus damnatur referturque accolæ ejusdem Regionis totos palidos esse atque inflatos, ideo quoque Padus apud Italos audit male; si vero sic moveatur aqua particulis & effluviis sub vaporum specie elevatis adeoque tenuibus, aeri atmosphæræque communicatis eum refrigerat & humectat, ut effluvia peregrina tempestate imprimis ficciori, squalida ac calidiori, ventis experte, maligna & noxia immutentur atque figantur &c. Hujus rei exemplum in orbis terrarum urbe Romana habemus (ut alia non memoremus loca, ibi enim insalubris aer est omnis, juxta Tiberim vero habitantes minus habent, de quo conquerantur. Unde etiam circa fluvios agri solent esse fecundiores, quia humidiores, molliti oblimatique ad ferendum; ros enim desideratissimus ex vaporibus collectus de nocte delabens subtili suo succo laudatissimum præbet nutrimentum vegetabilibus. Præter hoc aquæ claræ leves & puræ quæ optimæ atque adeo salubres ad cibum potumque adhibitæ sanitatem integram conservant aut restituunt, ut e contrario crassæ atque impuræ lutulentæ, paludiferæ, quæ quovis etiam modo assumptæ difficile egeruntur neque nutrimentum debite distribuunt variaque vitia & ægritudines maxime calculosas concreciones contrahunt, ac si rem penitus pensitare velimus

limus affirmemus necesse est, aquam majorem corporibus alterationem ipso aere inferre, quoniam aqua, aliquo in loco diutius manet, cum aer de repente hinc vel inde evagetur. Est & aliud harum aquarum emolumentum haud vile, quod earum incolæ, pisces sanitati dein accommodatas escas præbeant. Notior est res, quam ut explicationem commemorationem desideret. Pisces in aquis limpidioribus & puris glareosis & fluviatilibus captos, gustui suaviorem, firmiorem, salubrioremque carnem concedere iis, qui ex cœnosis, tepidis, viscidis, turbidis, lentis, impuris, stagnis, & piscinis habentur, quorum caro mollior & viscidior est. Hinc fluviatiles & maxime saxatiles omnes, truttæ, funduli, &c. quorum in Silesia uberior est proventus interque dapes manet eos gloria prima, saluberrimum dant cibum. Ex his adductis fit palam, non unum in modum aquam facere ad salubritatem, unde recte RHASIS *Lib. I. de Reg. princ. Cap. II.* asseruit, nihil esse præter aeris puritatem magis pertinens ad sanitatem, aquarum salubritate.

§ XII. Hæc plurimorum annium laudabilis est conditio, de paucissimis saltem si eos perspectes curiosius, scrupulus quidam tibi posset oriri. Nec etiam inficiari possumus, Bartham mediæ magnitudinis saltem, lentum pigrumque & tepidum magis fœculentumve alias piscosum valde esse fluvium, quippe multiplicia aquarum divortia facit & sæpius se longius diffundit ac terras adiacentes camposque inundat & interdum diutius quoque ibi persistit extravagatus. Hæc quidem inter malas causas referuntur, quoniam quandoque multæ inde relinquuntur paludes & lacunæ cœnosæ, solum nimis humiditatibus imbuentes cœnosaque mucagine obducentes, cui deinceps accedente tepore, putredo infertur, quæ ingratum foetorem & exhalationem putridam de se spargit aeremque afficit male, copiosorum insectorum examinum generationi non raro inservit, quæ aeri labem sive vivant, sive moriantur (viva effluviis causticis, quibus scatent, mortua putredinosis) malignam contrahunt. Observationes circa hanc rem institutæ confirmant, multos semper morbos malignos, contagiosos, imò pestem, copias Insectorum insequutos fuisse. Testes si requiras (ne plures nominemus) adeas JOH. DAMASCEN. *aph. 132.* RIVERIUM *obser. 9. p. 697.* VERVLAM *p. 923.* VALERIOLAM *obs. Lib. II. p. 95.* Quid quod? ipsa Silesia seculo superiori simile a locustarum copia pervadente est experta. Atque non ignotum est, has aquarum inundationes morbos provocare frequentes ac graves, imò novos, malignos, putridos, contagiosos, ipsamque pestem, ut multorum ferunt observationes. Evolvi igitur possunt BONFINIUS *Decad. 1. Lib. VIII.*

VIII. SYLVAT. *Consil.* 14. cent. 1. DIOD. SICVL. *Lib.* XII. *Eph.* G. N. C. an. 9. ut & MONTAN. VAL. MAX. &c. Faciunt quoque his fidem omnes illæ urbes, quæ frequentibus inundationibus obnoxia sunt ut Roma, Constantinopolis, Venetiæ, Ancona, Smyrna, Cairus, Alexandria, & in Archipelago pleræque &c. Hæc licet vera sint omnia, tamen non adeo verenda & ideo salubritas tractus quem alluit, nedum totius Silesiæ suspecta reddenda est. Siquidem hic fluvius & in mediocritate subsistit & per tractum Trachenbergensem & Wolaviensem duntaxat decurrit; hoc enim egresso Odera accipitur. Atque longius quidem quandoque se diffundit, sed rigat tantum prata ac agros ac non ibi squalores, ut alibi accidit, deponit, sed refluxis aquis solum rigatum quidem sed purum iterum conspicitur. Ad hoc, venti septentrionales, quibus ad hæc loca liber aditus patet, sicci & frigidi noxam, si quædam etiam adest, corrigunt commode. Hinc legimus, quod ob hanc causam VITRUVIVS *Lib.* I. *Cap.* IV. paludes circa Atinam, Ravennam & Aquilegiam minime metuat, neque ORIBASIVS *S. Coll.* C. III. Aegyptiacas ideo damnat. Afferit ad hoc ac in hujus ulteriorem probationem COELIVS RHODIGINVS *Lib.* XX. C. XIII. in Lesbo Ins. ægrotantes ex tussi maxime, austro coroque flantibus, superveniente Borea convalescere citius. Quippe hi venti accedentes humiditates exsiccant omnes, ex quarum exsiccatione quoque dein lenis exoritur ventus, (quoniam ubi aquarum copia est, ibi ventorum patria) & per hunc aeris ventilatio, aeris salubritati inserviens, efficitur. Lacus in Silesia ita sunt comparati, ut circulationem quandam subterraneam habeant, ut de binis istis in Lignicensi diœcesi constat, vel ut fluvios eos percurrant, quales sunt in Schwibusensi, Wolaviensi circulo &c. Quoniam sic undæ moventur, non possunt esse aeris salubritati adversæ, nec tanti ipsi etiam sunt, ut tantam noxam alioquin possent afferre.

§. XIII. Huc etiam spectant aquæ, acidulæ, thermæ & fontes salutares, vi sua medicata ad medicinam facientes. Horum quam plurimi in Silesia reperiuntur. Alii celebritatem jam dudum acquisiverunt, alii forte hodie ideo saltem ignobiliores, quod nondum satis cogniti sint atque perspecti; alii dein olim laudatissimi hodie ab antiqua iterum recesserunt gloria, an per injurias temporum, an hominum incuriam, an virium deperditionem, incertum. Ex fontibus salutaribus adhuc noti sunt imprimis fons Regius prope Boleslaviam ad Boberum & a celebr. OPITIO *Lib.* IV. *Sylv.* carmine celebratus. Hermsdorffensis prope Goldbergam & ad Frankensteinam ille, olim famigeratissimus, hodie

vero minus frequentatus, sulphur & alumen imprimis vehens. In Duc. Nissenfi alium, A. CALAGIVS celebris Silesiæ Poëta *epigram. Lib. V.* descripsit. Adeatur de hoc *Silesiog. renov. N. HENELII P. I. Cap. V. pag. 598. seq.* Salsula dicta ab arce Furstenstein vix horulæ itinere sejuncta pariter mire laudatur in ventriculi & intestinorum imbecillitatibus ex tono destructo & laxitate enatis, in malo hypochondriaco, calculo, ventris doloribus, hydrope, phthisi & hectica, cachexia, scorbuto &c. Hodie perfrequentis usus est fons ille salutaris Lignicensis in multis ægritudinibus apprime præsertim in arthritide proficiuus Vid. *Annal. Physico-Med. Vratislav. A. MDCCXVII. M. Augusto.* In Ducatu Jauroviensi in pago Sendorff ad radices montium sudetorum videndus fons (der Kirch-Brunn) in suffusione oculorum illorumque hebetudine, colica scorbutica flatulenta aliisque ægritudinibus huc usque comprobatur. Prope Hirschbergam in Pago Straubitz, quidam fons reperitur (der Schwefel-Brunnen) ob odorem sulphureum, quem refert, ita vocatus, aqua ejus gratissima ad potum est, & laudatur ab incolis atque a Medicis, probatur imprimis in febribus tertianis continuis, ardentibus, viscerum infarctu, doloribus nephriticis curandis, præcavendis, & in pluribus forte corporis vitiis avertendis, dignusque, qui ad majorem usum perducatur. Alius quoque hic fons ad radicem montis quem den Hausberg vocant ad Boberum Zakelumque confluentes, datur, Quekenfi Boleslaviensi illi modo laudato non inferior, cujus aquæ produnt omnes bonitatis & salubritatis notas ac dotes, quondam celebratissimus fuit adeo ut miraculosus dictus fuerit, siquidem & hodie ab incolis corrupte der Mörkel-Brunn, loco Miracul-Brunn nominatur. Nec obliviscendus est alius salubris in vicinia fons, sed omni laude commemorandus qui in ditione Seiffersdorffiana scaturit, atque alius prope pagum Kuntzendorff circa Fridebergam qui singulari frigiditate se commendat & ambo aquam perquam puram, pellucidam sapore, admodum grato & dulci præditam vehunt. SCHWENCKFELD in *Catal. stirp. & fossil. Siles. p. 357. seq.* binorum acidulorum fontium quos vocat Biërbrunnen mentionem facit, quorum unum non procul a Quisso, fluvio juxta pagum Fegesbeutel alterum in pago Liebswerda undas emittit suas & utrumque febribus & calidioribus morbis mederi perhibet. In Ducatu Olsnensi in pagis Secursine & Wersingrave fontes foterii balneo potissimum inservientes adduci quoque merentur. Ad Silesiæ fontes salutares hodie adhuc, ut quondam Fons St. Johannis fervidus intra ipsos sudet. Mont, in confinibus annumeratur, cujus meminit SCHWENCK-

FELD in *stirp. & fossil. Siles. Catalogo* p. 404. nec non HENELIVS in *Silesiograph. P. I. p. 613.* arthriticorum, calculosorum, asthmaticorum, paralyticorum convulsionibus, luxationibus & omnibus pene frigidis morbis laborantium refugium ac solatium. Acidularum plures sunt, ut illæ in Ducatu Carnoviensi, Gurenſes in Jauroviensi, Tanhausenses & Reichenovienses; in Svidnicensi, celeberrimæ vero omnium sunt, quæ in pago, cui nomen inditum est Altwasser, scaturiunt. In Comitatu Glacensi, qui Silesiæqueque quondam pars fuit, vid. JOH. DVBRÁVIVS *rerum bohemicarum Scriptor. L. VIII.* ut & GOLDAST. *de jure Bohemiæ Lib. I. C. XV.* plures adhuc reperiuntur, inter quos tamen primatum fere obtinent & quæ peregre transferuntur, Saltzburnienses, Reichenavienses, Oberlanginaviensesque.

§. XIV. Nec defunt Silesiis calidæ salutares aliæ scaturigines, quas etiam Summus & Benignissimus Creator Deus Ter. Opt. M. ultro gratisque ad hominum sanitatem custodiendam restituendamque dedit. Thermæ Hirschbergenses sunt longe lateque celebratissimæ, eo nomine insignes, binis separatis scaturiginibus scaturientes quarum altera ad Illustriss. Excellentiss. Dn. Comitem de Schaffgotsch &c. alter ad Cœnobium pertinet. Has Præses in peculiari differt. exposuit. Vulgo Thermæ Landekcenses Silesiæ adhuc adscribuntur, calore tamen Hirschbergensibus longe inferiores, adeo ut dubitet BALBINVS in *Misc. Hist. Bob. Lib. I. Cap. XXIV.* an thermæ jure vocari possint quod & de fonte Sti. Johannis modo nominato propemodum esset dicendum. Vis siccandi, extenuandi, abstergendi, roborandi iis tribuitur, & in spasmodicis, convulsivis affectibus, contracturis, arthritide, visus debilitate, oculorum diuturnis pertinacissimisque doloribus, ventriculi, Intestinarum, renum & vesicæ vitiis & imprimis mulierum sterilitate commendantur. Plura de harum virtutibus apud D. A. FR. KREMERM in peculiari Tract. & Celeberr. Vratislav. Collegas Acad. N. Cur. Leopoldino-Carolinæ in *Hist. Morb. Vratisl. An. 99. p. 33. seqq.* possunt videri. Ejusmodi sine dubio plures fontes foterii reperiri possent, si curiosi scrutatores diligenter suam collocarent operam: orandi igitur atque hortandi sunt omnes Ingenui, ingenio, doctrina arteque præstantes Silesii, quorum magnum numerum Silesia genuit, ac alit, ut Patriæ ejusmodi dotes salutares ex dignitate ulterius investigent, promoveant, amplient.

§. XV. Hæ primariæ causæ salubritatis hæc firmissima vitæ fulcra sunt quæ modo recensuimus aer nimirum & aqua quæ ad mentem Plinii sapore, odore & consistentia illum referat. Nam si rem, ut par est momentis suis ponderamus, duo hæc sunt, quæ motus vitales in corpo-

re nostro, in quibus vita & sanitas atque actionum omnium integritas versatur, efficiunt, conservant atque tuentur, quippe vitæ & sanitatis fundamentum in eo positum est, & cardo totius vertitur, ut tam spirituum animalium natura, crasis, motusque conveniens sit, quam ut omnis generis humores in corpore nostro non interrupto impeditoque motu ita, transitu redituque per debita expeditaque vasa circulentur, adeo ut arctissimum vinculum intercedat utrisque, his salvis, his integris vita ac sanitas integerrime quoque se habent manentque, his læsis ambæ mox quoque læduntur. Ex omnibus autem iis, quæ spirituum generationi, conservationi, impulsioni & sanguinis atque humorum circulo perenni extrinsecus inserviunt, adeoque sanitatem præstant ipso aëre aquaque nihil datur præstantius nihilque magis est necessarium. Aëris accessu ne per momentum quidem carere possumus, hic proximum spirituum est elementum. Aqua sanguini, omniumque corporis H. liquorum laudabilium fluxilitatem ad vitalem motum adeo necessarium concedit &c.

§. XVI. Proxima terræ cujus naturam ac conditionem aquæ quoque assumunt, ex qua profluunt, Silesiacæ consideratio. Hæc rursus ad salubritatem simul conferendam aptissime se habet, nam neque generatim loquendo humidior justo neque aridior, siccior, sterilisque &c. ubique fere deprehenditur, utilissime in commune commodum, optime mixta variisque interdistingua ac temperata, levis ac rara. Etenim planities plurimis in locis præsertim ad meridionalem & occidentalem plagam montibus quidem excelsis de reliquo vero hinc illic collibus potius ut & qua septentrionem spectat in Ducatu Olsnensi superbit. Mite sat alendis proficuis frugibus solum est, & amica hinc arvis Silesiis Ceres, præsertim Uratislaviensibus, Bregensibus Strelensibus, Glogoviensibus, Carnoviensibus, Francosteinensibus &c. Quare hoc quidem respectu de tellure silesiaca certe non dicendum est, quod de Orgeleto oppido Burgundiæ Comitatus dicitur: quod ejus incolæ habeant campos sine graminibus, fluvios sine piscibus, montes sine nemoribus MER. COSM. P. II. L. III. Cap. XLVII. Nec tamen tota nimis pinguis est atque viscida, quæ salubritati posset obesse, quoniam, ut apud Medicos in confesso est, ejusmodi ob lenta crassaque effluvia, que aëri semper immittit, non potest esse satis salubris. Exemplo Sardinia Ins. sit, de qua notissimum est, eam fertilissimam esse, sed & insaluberrimam, quare Cicero, a quo romana eloquentia exstitit, Q. fratrem monet notanter, ut diligentissime valetudinem curet, licet optima utatur, cogitet tamen se

in Sardinia esse, atque hinc quoque quendam Sardoum Tigell. hominem patria sua pestilentiorum in epistolis nominat: Taceamus quod hæc ipsa ejusmodi licet fertilissima tellus proferat vegetabilia alimentosa & fruges non adeo salubres & sæpius frumentacea & esculenta venenata ut lolia temulenta & fungos deleterios &c. atque rorem vermiculosum &c. Vel in vulgus notum est, frumenta v. gr. quæ in agris & collibus ficcis qui non rari hinc inde in Silesia sunt, succrescunt, rarius a vermibus corrodi, rariusque situm contrahere atque corrumpi, atque liquores exinde paratos rarius acescere, pollinem & tandem panem quoque longe subtiliorem, tenuiorem, leviolem adeoque salubriorem concedere iis, quæ in agris humidioribus, limosis, viscosis subnascuntur. Exinde quoque colligitur Silesiacam terram, quia bene temperata, frumentorum quoque salubritatem in cibis tandem adhibitorum afferre hominibus. Nec inanis hæc saltem est conjectura, sed fidem experientia implet, siquidem per totam fere Silesiam bonus, palato gratus, levis, rarus bene nutriendus paratur panis fecalinus æque ac similagineus. Nemini Silesiorum & vicinorum facile præ aliis ignotæ sunt, Landshutensium & Uratislaviensium similæ adeo celebratæ & panis sic dictus bis coctus & Schwidnicensium ac Hirschbergensium panes similaginei (Zweilinge) & varii generis placenta. Nec in postremis est, quod Silesii ubique fere locorum pollinem parare soliti sint molis aquaticis, quæ pnevmaticis, tenuium & æqualium magis partium, farinam & talem quoque dein panem concedentem, adeoque salubriorem, conficiunt. Ex frugum generibus multifariis illud adhuc nominandum, quod Silesiæ fere peculiare est, Schwaden dictum, graminis mannæ semen; hoc enim milio, oryza longe facilioris digestionis bonæque nutritionis est, ut enim subtilitate ita & salubritate illam antecedit, id eo non fanis solum sed & ægrotis & valetudinariis pro usu familiari & cibo commendandum.

§. XVII. Amplius dicendum est terram Silesiacam arboribus fruticibus, plantis, herbis, ac floribus aromaticis, resinosis, balsamicis, bona effluvia spirantibus adeoque valde salutaribus salubritatem aëri quoque addentibus & quæ ad valetudinem tuendam quovis modo adhibita admodum proficua sunt, feracissimam esse atque luxuriare. Ex his enim æque atmosphæræ salubritatem metiri licet, quoniam non modo hæc & illa ejusmodi vegetabilia blande ac bene temperata gaudent aëre, sed & succo nutriuntur sat diluto, molli, resinoso satque alioquin laudabili. Latus campus hic panditur de illis verba faciendi, quæ ambrosios ut ajunt spargunt odores & tam salubria in aërem effluvia mittunt,

quam quæ ad salubritatem inter alimenta & medicamenta adhibita hominibus symbolum suum conferre possunt. Sed quoniam tractatum, nec mediocrem de his conscribere quis posset, plura non addamus, & B. L. ad SCHWENKFELDII librum, quem de *vegetabilibus Silesiæ* conscripsit, remittamus. Hic saltem abietes, fagos, betulas, pinos, quæ totæ antiscorbuticæ, arbores cædis sylvis exoriuntur, quarumque eximia & perennis viriditas est, resinosa & balsamica vis, ut nec brumæ sæviente eæ algeant, arescant & deleantur, & pauca in Medicina vegetabilia crocum, lupulum, angelicam, gentianam, serpentariam, carlinam, serpillum, acorum, calamum aromaticum ac bina ista quarum alterum agris Silesiacis speciatim Lignicensibus, Olaviensibus, Strelensibus & opimis Uratislaviensibus præsertim, alterum montibus fudet: quasi propria sunt, bulbum nempe majalem & rubiam tinctorum & illam quidem illi quam Selandia profert præferendam quoque in medicina laudatissimam singularique vi præditam (ut comesta animalium ossa rubore tingat,) quibus Silesia abundat, si nominare vellemus, confectares esset satis. Quibus modo addamus Caryophylla Uratislaviensium ob fragrantissimum præ aliis omnium odorem præstantissima, quare & ad pulveres sternutatorios assumuntur hincque in exterarum regiones transvehuntur. De arboribus adhuc in Silesia frequentibus betulis & pinis his oris notandum venit, illas vernali interdum tempore pulverem citrinum non inutilem ac bonum fumare ut pluvie mixtus pluviam sulphuream referat, aut terra subtili lutea pluvisse videatur, de quo alias etiam videndus CRUGNER *im chymischen Tannenbaum*; talem pluviam & in aliis locis observaverunt alii, exemplum vide apud AGRICOLAM *lib. V. de ortu subter. p. 552.* Seorsim dicendum, in sylvis Nissensis Ducatus comam subtilem rubellam faxis & lapidibus adhærere moschi odorem referentem, quæ a nonnullis speciatim pro arcano in calculo vesicæ habetur, quamvis alii vitriolo temperato hunc odorem adscribant. Ejusmodi quoque lapides odoriferi violarum suaveolentium spirantes odorem, in Ducatibus Jauroviciensi & Svidnicensi montosis in locis præsertim in montibus Rphæis & circa arcem Kinaft ipsas thermas Hirschbergenses spectantem magna in copia inveniuntur. Interim addendum adhuc convenit, simul, herbas plantasque salubres ex humo salubri crescentes & pascua & pabula salubria pecudum domesticarum & agrestium, ferarum ut & altitium, nec non reptilium, limacum &c. carnes salubres quoque concedere, quæ in cibis deinceps sapidas escas & salubre nutrimentum præbent; æque ac frumenta fructus, plantæ, herbæ & olera salubri in solo crescentia & pisces

pisces in aquis capti salubribus, quæ omnia jam apud Medicos sunt in confesso, adeo ut jam non necesse habeamus longius petere hujus rei probationem. Unicum duntaxat testimonium addamus, quod de vervecibus Galliæ Narbonnensis *QVERCETAN. Diet. Polyb. S. iii. c. IV. p. 430.* refert: Hos in sterilibus atque thymi tantum serpilli & id genus odoriferarum herbarum feracibus pascuis educatos, carnes sapidissimas & saluberrimas atque lanas etiam pro conficiendis vestimentis optimas præbere, quod & in Silesiam nostram, quadrat apprime, siquidem & lana Silesiaca tenuis & præstantissima est. Nec silenda esse volumus vegetabilia varia eaque exotica, quæ ex hortorum cultura proferuntur, siquidem ubique locorum non modo in pomariis frugiferæ arbores & in viridariis olera saluberrima omnis generis magno proventu succrescunt, sed & ab artis instructissimis hinc inde flores & arborum fructus expromuntur, quales ad usum cultumque atque delicias comparati alcinoui horti quamplurimi, ambulacris, pergulis, fontanis, diætis &c. amoenissimis exornati ad urbes atque oppida, Principum, Comitum, Baronum, Nobiliumque prædia, monstrantur ut Uratislaviam, Nissam, Saganum, Hirschbergam; Hirschbergensesque thermas, Leobusium, Freiburgum, Glogoviam minorem, ad pagos in Circulo Uratislaviensi Brock, Goldschmiden, Carolatum, in Ducatu Glogov. Sibyllen Ohrt, in Ducatu Olsnensi, in Svidnicensi, Sylvam Petri ad pagum Profen in Ducatu Jauroviensi, adornati aliisque plures longius non recensendi ac collaudandi. Hic quoque mentio licet brevis facienda est fossilium, & quæ ex terra oriuntur, huic titulo adscribenda veniunt. Terras sigillatas seu axungias solis ac lunæ si nominaverimus Silesiacas adversus varios morbos in foro medico usitatissimas satis jam erit, inter quas & celebratissimæ sunt terræ sigillatæ Strigovienses a Joh. Montano celeberrimo Medico primum inventæ atque descriptæ & a Sennerto terræ lemniciæ & meliteni prælatæ, quippe copiosam subtilem oleaginositatem in se continent, pro acrimonia & spiculis salinis morbificis malignis venenatis infringendis, & in affectibus cordis, febrilibus, malignis, dysenteria, diarrhæa, morsibus animalium venenatis peste &c. apprime utilem. *ETMULLERVS* in *Schrædero dilucidato* spiritum auri ei adscribit. Post has Lignicenses, Goldbergenses, Schwidnicenses, Jaurovienses, Jenewizenses, Seichavienses, Brechelwizenses, Hasalienses, Kupferbergenses, Reichenavienses, Maslovienses novissime inventæ &c. laudandæ. Nec scio, an alia ulla regio, adeo plures ejusmodi terras proferat. Ex his Strigovienses præsertim figuli varia testacea vasa in commodum usum ut urceos,

urceos, ollulas, patinas, scutellas, lagenas, pocula &c. efformare solent peregre quoque evehenda. De mineris hoc saltem jam addere libet quod D. FRIBENIVS in *Ephem. N. C. Germ. D. I. Ao. VII. p. 283. in append.* refert, in Silesia æque ac in Hungaria & Bohemia nempe inveniri mineras sulphur auri volatile pariter ac fixum concedentes. Taceamus jam de magnete, carbonibus fossilibus circa Waldenburgum, oppidum Svidnicensis Ducatus ac Gotsbergam, ac ad fines Bohemiæ ad Boberi fontem inveniendis, item, gypso, lapidibus calcareis, marmoribus &c.

§. XVIII. Nec intermittamus de cerevisiis Silesiacis dicere atque innuere, iis non solum gustui gratis, sed & sanitati admodum conducibilibus non adeo crassis, viscidis, nec sulphureis, vaporosis, ferocibus & temulentis caputque gravantibus Silesiam abundare, cum ex levioribus & purioribus aquis, bonis frugibus, & in laudabili aëre a quibus gratiam & salubritatem recipiunt decoquantur, nec lupulo nimis saturentur, quæ & subtili gratoque acore linguam titillant & digestionem, dilutionem & distributionem alimentorum & nutritionem maxime promovent, addunt, faciliusque per vasa transeunt & excernuntur. Quædam quondam celebratissimæ fuerunt, multæ adhuc hodie ideo maximo in pretio habentur. Omnium primaria hoc nomine adhuc fere hodie est Strigoviensis de qua vere dici potest, quod Philip. Melanchton de cerevisia Belgrana in Misnia dixit: Belgrana est omnibus sana. Sequuntur Uratislavienses, Schoeps (de qua Celeb. D. H. Muhlpsfortius integrum tractatum conscripsit Conf. & HENELIVS in *Breslograph. renov.*) & Lammel dicta ut & eæ quæ in Cœnobiis Sti. Vincentii, Adalberti & Dorotheæ coquuntur, item Olaviensis quæ copiosissima ad ipsam Uratislaviam vehitur. Lignicensis triticea, boni nutrimenti, Goldbergensis & Haynoviensis quæ singulari levitate & diuretica virtute se commendat, caput nullo modo gravat, & quæ alias longinque, ideo est transvecta. Ea quæ ad radicem arcis Gradisbergensis adeo æstimata est ut quondam ad aulam Lignicensem transvecta fuerit. LVCAE *Chron. Silesiæ p. 1239.* Proximæ his sunt multæ aliæ in Ducatu Jauroviens. Boleslaviensis, quæ ex famigeratissimo fonte Quekeni paratur, & ideo in panegirico Silesiæ a Pancratio Vulturino, Patavii olim edito celebrata, & Girsdorffensis, Boberroersdorffensis, Spillerensis, Voigtdorffensis, Seiffersdorffensis nec non Glogoviensis, Svidnicensis & Steinaviensis, olim alias adeo decantatæ. In Ducatu Bregensi Bregensis & præsertim Arcis dicta, Schwanizensis, Ketzendorffensis jam Karolimarckensis, Mankschuzensis, Crosnensis vini æmula Teschinensis adeo decantata & a vicinis Hungaris præsertim

præsertim quæsitâ Maznoz vocata ac Oppaviensis, quæ primo loco nominanda fuisset, martiana dicta, cujus tanta commendatio est, ut referente Hagecio sæpius tam præstantissimi medicamenti, quam boni alimenti expleat vicem; ut plures alias fileamus, laudandæ sunt. Hoc quoque scire licet, Silesios quantum mihi equidem notum est, polentam ex qua dein cerevisiam decoquunt, ut plurimum & sæpius igne torrere, quod optimum est, rarius aëre, quod minus laudabile; cerevisia enim ejusmodi ex polenta aëre torrefacta parata crudior est & obstructions &c. nauseam potissimum gignit. Ex cerevisiis dein cibos quoque parant utilissimos eosque varios nec non medicamina eaque alimentosa, gratissima, atque juscula simplicia, cum butyro & pane dulci, oleo, cum ovorum aromatumque seu croci, cinnamomi feminisque cumini & similium additione. Multis in locis Poloniam & Bohemiam versus præsertim superioris Silesiæ cerevisias condiunt, radicibus, seminibus, herbis, floribus, quo non modo valentiores fiunt illæ, sed & efficaciores & pro variis morbis sanandis admodum conducibiles, ut sunt ex absinthio, stomachicis & hepaticis salubres, melissatæ, salviatæ cephalicis utiles, heleniatæ pulmoniacis & asthmaticis commodæ, laurinæ & juniperinæ calculosis, hydropicis colicisque proficuæ. Ad cerevisias magis accedit potus, multis Silesiæ oris haud infrequens ex branca ursina coctione ac fermentatione, qua saporem gratum acidiusculum contrahit, paratus, proficuus ac bonus, quem Silesii a Polonis ac Litthuanis acceperunt. Quo non modo potus loco ordinarii atque ad juscula conficienda, sed & in febribus ferventioribus, medicaminis, utiliter utuntur. Grunbergensia vina, Crosnensia, Guraviensia, Bethaniensia, Carlatensiaque &c. ut & Winzigensia, Parchwiziensia quamvis hæc bonitate illis inferiores censeantur, licet palato equidem ob acerbitem non arrideant & venalia ideo opus habeant suspensa hedera & de quibus vulgo dicitur, quod plus sint quam vappa; tamen cum contra arthritidem, podagram, calculum scorbutumque &c. commendentur sanitati non æque sunt adversa. Nam in vinorum delectu, medico respectu, non tam regionis, neque grati palato saporis ratio est habenda; secundum tritum illud proverbium Germanicum Ferdinando I. Roman. Imperatori usitatum: Nach eines frommen und tapfern Mannes Herkommen und eines guten Weines Heimat mus man nicht genau fragen. Sic v. gr. vinum omne in deliciis alias habitum, sive sit Hungaricum, sive Rhenanum, Mosellanum &c. sive etiam infimæ classis nomines & quod a delicatis respuitur, quod in locis peraltis, saxosis, asperis, salebrosis, aridissimis

M

crescit,

crescit, sanitatis conservatione, podagræ calculique (communium pedisequorum) &c. præservatione longe præfertur eo, quod in locis pinguibus, lutosiis, terrestribus magis & a fluminibus remotis subnascitur. Ideo vinum austriacum, quoniam permultis in locis in planis agris ac in viscido solo ad instar fere frumenti crescit, non potest esse salubre, sed arthritidem fixam, calculum, obstructions viscerum internas causatur; illud vero quod in montibus præaltis & aridis proxime ad Danubium sitis profertur, ut NUSDORFFENSE &c. bonum & salubre est. In Hispania circa Madritum & in Andalusia vinum quod crescit, minus dulce est atque austerum, saluberrimum tamen præ aliis omnibus viniis Hispanicis dulcibus habetur. Sic notum vinum Jenense ob hanc rationem saporis æque ac Silesiacum minus gratum, peregre transfertur etiam ad illa loca, quibus Rhenanum atque Franconicum uberrime affluit, ubi contra podagram & calculum, quos a dictis metuunt, loco remedii bibunt, de quibus testatur celeberr. SCHELHAMMERVS *de natura* p. 229. quod nimirum vina Jenensia recentia cruda sint, vetustiora vero calidissima & crassa, tartaroque ditissima, quod autem arthritidem non producant, ut nemo unquam indigenarum & qui a peregrinis abstinet ea laborans ostendi potuerit, & quondam jam GREGORIUS GROITSCHIVS in *Sala fluvii descriptione*, vina salica præsertim Jenensia nobilia & præcipua laude digna censuit. Quippe ejusmodi licet crudiora tamen tenuiora subtiliora, aquasiora sunt atque plus salis minus olei & sulphuris minusque visciditatis ut quidem vina secti, frontiniac & multa ex hungaricis & educibilem, quamvis uberiores præ aliis longe continent tartarum, ceu futuri calculi pabulum, qui pro varietate vinorum se varie habet omnis & vel ad lapidis vel luti vel calcis naturam accedit. Tartarus vero vinorum Silesiacorum non adeo est spirituosus ac aliorum, sed crassior magis qui in prima & secunda digestionem facile separatur, per alvum & urinam secedit simulque alias materias crassas secum excernit, hinc magis diluunt, sitim sedant, absterunt, humores pituitosos & biliosos temperant, tollunt ac ejiciunt promte, & per angustissimos canaliculos citius faciliusque transeunt, somnum placidum procurant &c. nihilque crassi, heterogenei multorum magnorumque morborum rudimenta ac incrementa in corpore post se relinquunt. Vina enim quæ continent plures partes phlegmaticas & tartareas, acidulas, citius & facilius ex stomacho exeunt ac virtute laxante & diuretica pollent minus inflammant, humores & magis singulis hominum temperamentis conveniunt; quæ vero plures oleosas sulphureas possident forti odore & sapore

sapore imbuta non tam facile per corpus transeunt sed diutius manent, sanguinem augent & plethoram ingenerant corpusque exagitant atque exsiccant sicque caput potius quam renes petunt, spiritibus vini in vasis manentibus. Atque morbi tartarei ut podagra & calculus ex emuncto-riorum obstructione proveniunt & viscositatem ac densitatem pro fun-
damento agnoscunt, arthritidis etiam plerumque a ventriculi debilitate, spirituaſcentiæ sanguinis defectu, circulo ſegniori ortum ſuum ducit, vi-
num autem tale dilutum magis per renes morbificam materiam educit, ventriculi quoque vitia emendat, quare qui ejuſmodi vina bibunt, non colligunt in ſtomacho & inteſtinis maſſaque ſanguinea ejuſmodi. Ad hoc vina talia auſtera & acida corroborant ſtomachum laxum, minus officiunt cerebro, ut quidem dulcia, hispanica &c. adſtringunt & minus calidos inebriantes & ſemulentos fumos exhalant. Talia etiam ſunt
vina in Miſnia Jeſſenſia & Gombergenſia in pura arena naſcentia, Benſ-heimenſia & Auerbacenſia in ſtrada montana. Hujus quoque notæ eſt vi-
num Tigurinum, quod tamen a Celeberr. J. J. SCHEVCHZERO lauda-
tur atque commendatur *in der Naturgeſchichte von Schweitz P. I. p. 19. & 21.*
&c. Veteribus ejuſmodi vina jam erant maxime commendata & oli-
gophora dicebantur. Ipſe HIPPOCRATES *de rat. victus* in acutis præ-
fert ejuſmodi vina & dulcia damnat, quod hæc tumores hepatis & lie-
nis augeant & ſanguine copioſo ac craſſo pares has infarciat. Expe-
rientiam de noſtris vinis Sileſiacis (ſi apud te valeat) allegat COLERVS
in Oecon. rurali & domeſt. Lib. II. Cap. CXXXIX. Alia adhuc ſc. experien-
tia mihi jam occurrit, quam quidam celebris hiſ oris Practicus mihi
transcripſit, quod vinum Croſnenſe in ſpecie in cordis palpitatione mi-
ra præſtet, quæ virtus alias moſellanis maxime attribuitur. Laudatio
noſtrorum vinorum inſuper quoque exſtat apud celebr. C. B. BEHRENS
in ſelect. dietet. p. 365. ſ. 32.

§. XIX. Addendum & commode convenit cibis veſci Sileſios in
univerſum ut plurimum ſalubribus, atque ejuſmodi, qui bene nutriunt:
Compertum namque eſt: alimenta magis in uno loco quam in altero
& differre inter ſe quoad nutritionem majorem aut minorem pro loco-
rum varietate, quod diſerte THEOPHRASTVS docuit *Lib. VIII. de Plan-
tis Cap. IV.* & dixit: Athletas in Boeotia vix tritici ſextarios ternos abſu-
mere, qui athenis quinas comederent. Ejuſmodi deſumuntur ex pecu-
dum & avium ſylveſtrium, montanarum, campeſtrium & domeſticarum,
imprimis turdorum, alaudarum, perdicum, attaginum, caponum, pul-
lorum gallinaceorum, gallopavonum, leporum, cervorum, aprorum &
piſcium

piscium saxatiliū, truttarum, apuarum, (Gründlinge) percarum, mul-
 lorum, thymallorum, gobiorum fluviatiliorum, aschiorum, luciorum
 præsertim cancrorum &c. carnibus, & qui aliis præferuntur, siquidem
 Silesia alit ejusmodi sat magna in quantitate exquisitissimique saporis ta-
 lesque quales Claudius Aesopus Histrio, in Africa invenisset. Vid. BO-
 DIN. in *Theat. N. Lib. III.* & quæ in commoda & promptum venientia
 forte desunt, ipsi ex vicina Bohemia atque Polonia importantur. Aves,
 palustres ut anates atque anseres magis respuuntur in Silesia. Carnes
 imprimis agninæ, vervecinæ, bovinæ & vitulinæ recentes sapidæ ibi sunt
 & laudatissimæ, & frequenti in usu sunt ut & hædorum castratorum &
 caprarum juniorum carnes, sal tam volatile quam fixum augentes, unde
 vigor ac vivacitas. Inter hæc esculentorum genera farcimina, lucani-
 cæ Schwidnicenses & Jaurovienses, ut & Hirschbergenses & Greiffen-
 bergenses, quia palato admodum gratæ maxime laudantur. Suilla ca-
 ro, quam HIPPOCRATES *de rat. vict. in acutis S. IV.* optimam & præ-
 stantissimam dixit, plebis & opificum mensæ familiarior. In specie di-
 cendum est, quod verveces in parte præsertim Silesiæ cis Oderam edu-
 cati & enutriti, multo in pretio sint, adeo, ut etiam multæ greges eorum
 in vicinam Saxoniam educantur, siquidem non modo sapidiores eorum
 carnes sunt, sed & ipsi majores, saniores & longæviores, nam oves no-
 stræ Saxonicae, misnicae, quæ ut plurimum in pascuis & agris planis, de-
 clivibus & humidis aluntur, sæpius ægrotant, & vel duorum annorum
 spatio moriuntur. Nec desunt alia, quæ in victum frequentem Sile-
 siis veniunt bonitatis ac salubritatis nota prædita obsonia, olera fructus,
 endivia, brassica rubra (quæ loco medicinæ populus Romanus DC. an-
 nos usus est, teste PLINIO *Lib. X. C. IX.*) ut & nasturtium palustre, chæ-
 refolium, cichorium, sisara, rapæ recentes ac ficcatae, raphanus major
 minorque, petroselinum ejusque radices, quæ salubria vegetabilia par-
 tim pituitosam, crassam materiam resolvunt, partim humectant, lubri-
 cant, expectorant, diaphoresin, alvum & vesicam stimulant, partimque
 aperiunt atque alio modo egregie profunt &c. In Silesiæ montosis in
 locis Svidnicensis Jauroviensisque tractus casei parantur caprini, molli-
 um, subtilium rariorumque partium & delicatissimi, quos Joh. Langius
 laudavit eosque imprimis pro secretionem lotii aptissimos censuit. De
 caseo notum apud eruditos alias ex PLINIO est *N. H. Lib. XI. C. XLII.*
 Zoroastrem in deserto per annos 20. caseo saltem vixisse, ita ut sene-
 ctutem non sentiret. Panis pinsitur fere ubique horum locorum ex si-
 ligine a suo furfure bene separata beneque candida beneque fermentata
 atque

atque mediocriter salita paulo acidior, sapidus ac optimum alimentum præbens, qui & alvum temperate solvit cui haud similagineus ex hordeo nimirum paratus, respectu bonitatis, cedit. Ex illo cerevisarium (panem) utile nutrimentum, præsertim macilentis & exhaustis, frequentissime nostri assumunt. Panes autem saccharatos & mellitos inter bellaria cupedias eosque vino sublimato imbutos, sæpe numero admittunt, non solum ob gratum saporem sed & optimum nutritum, saluberri- mum pro tussientibus, asthmaticis aliisque pulmonum affectibus frigi- disque sic dictis ægitudinibus multifariis, usum. Ut insignes in Silesia cibi, ita & eos præparant Silesii, ut sanitati bene sint accommodati: modicis quippe aromatibus, inprimis zingibere, croco non satis laudando, nuce moschata, salvia, majorana, laurifoliis & baccis, roremarino, aniso, fœniculo, allio, baccis juniperi, non equidem pipere nimio aliisque nimium irritantibus, ut Hungari ac Poloni vicini, de qui- bus vulgo dicitur: Sie fressen und fauffen Feuer, quia scilicet vino ge- nerofo ustulato, ac pipere, allio, cepis & similibus delectantur, faleque recte condiunt eos, quantum nimirum dissolutioni, digestioni, & di- stributioni alimentorum, exclusioni recrementorum, flatuum discussio- ni, & conservationi a corruptione, sanguinis generationi & dissolutioni, spiritumque animalium secretioni sufficit. Inter cibos etiam amant im- primis saccharum, mel quod nectar divinum a Virgilio appellatur, in quo quia plurimum salis dulcis universalis, ad vitam longam non parum momenti afferre jam dudum credidit antiquitas, atque butyrum recens, & lacticia, passulas majores & minores, amygdalas, limonia condita cappares, quæ sanitati proficua obsonia sunt, siquidem mel potenter viscidum resolvit, putredinem arcet, nutrit, temperat, laxat alvum, uri- nam prolicit, excretionemque omnes stimulat, longævus facit. Fertur solo mellis odore Democritum Philosophum per dies aliquot produxisse vitam. Atque PLINIVS narrat *Lib. VIII. C. XLV. & Lib. VI. C. XXVIII. & XXX.* gentes solo lacte viventes sanos longævusque esse, CARDANVS pariter *de subtil. Lib. IX. de animal. pag. 656.* vitam longam lac facere per- hibet GALENVS *Lib. V. de sanit. tuend. c. 7.* mentionem facit viri cujus- dam, qui ultra centum annos vixit solo lacte nutritus. Lactis commen- dationem quoque colligimus ex Tacito, Justino, Cæsare, Salustio. Hel- veti atque Belgæ lac in deliciis habentes idem loquuntur, qui sani, ve- geti ac corporis proceritate & robore præditi, conspiciuntur. Butyrum pariter recens cum pane sumtum bene nutrit, acidum & acre inprimis viis egregie temperat, anxietates præcordiorum, vertiginem, capitis

dolores, virium exsolutiones avertit & præcavet, morbosa aëris effluvia destruit, & ideo in constitutione aëris epidemica multum valet. Inter potuum genera hic juxta cerevisiam, quam frequentius roremarino, caryophyllis aromaticis, cinnamomo, cort. citri & similibus condiunt, hungaricum vinum bonæ notæ ac creticum vinum dulcedine sua vincens, hydromel Polonorum, Lithuanorum, Hungarorum, Borussorum, Russorum gratissimi saporis, ut sæpe pro malvatico eo bibatur calidæ tum ratione mellis tum aromatum qualitatis hincque ad diuresin diaphorisin alvumque movendi, sputum item educendi & pulmones emolliendi abstergendique vim, commendabile hincque iis, quorum ventriculus nerviet cerebrum, tenaci tartaro implentur, quem incidit admodum, utile: Hinc ista mulsa composita Hippocratica pocula dicuntur. Inferioris vero conditionis hominibus juxta aquam bonam, cerevisia secundaria, serum lactis caprinum supra omnem laudem positum ob abstergendi, acrimoniam destruendi, diluendi, temperandi & aperiendi obstructos viscerum reliquarumque partium meatus, vires, vinum adustum juniperinum &c. sanitati sat conducibiles potus frequentissimo in usu sunt. Amant & præ aliis cibos assatos & paululum duriores, qui ventriculum firman, & habitui corporis robur addunt. Quæ alimenta enim secundum Hippocratem de alim. ægre immutantur, ægre dissipantur & quæ facile apponuntur, facile consumuntur. Assata enim præsertim præter robur, quod ventriculo addunt, melius mollescent, & digestionem solvuntur, leviolemque licet parciorem materiam præbent; vim elixorum vero in jusculum maximam partem abire, jam GALENVS de *Alim. Facult.* observavit, unde juscula nutritiva, carnes vero concoctæ non ita faciles sunt, oleosum enim principium assatione sui juris fit, ex admixtarum partium vinculis evolutum & igne exaltatum. Ex reliquis esculentorum generibus usitatissima sunt ex tritico non ex corticato & juscula furfuracea, quæ ideo præsertim laudanda, quia tunnicam intestinorum villosam egregie abstergunt. Loco medicinae domesticæ ipsis sunt præsertim nasturtium aquaticum, rob sambuci, quod theriaca Germanorum merito vocatur & sorbi baccarum &c. A falsamentis, oleribus similibusque prandium (quod CELSVS voluit *Lib. I. C. II. de Med.*) & carnibus cibisque aliis paulo durioribus incipiunt, juscula sequuntur. Inferioris conditionis homines æstate semper coenam lactuca (incipiunt) De reliquo cibatum saluberrime in tria tempora partiuntur, jentaculum, prandium & coenam non pauci tamen & merendam adjiciunt atque illud quidem (prandium) undecima ordinario,

rio, per sæpe decima antemeridiana hora instituitur, quo hoc commodum sibi parant, ne æstate flagrantis solis meridiani ardor appetitum perdat, atque ventriculo digestionique officiat. Quem morem etiam antiqui servabant: nam medio die ordinario fere dormiebant. Præter hæc acidulis delectantur quia observant, quod ii, qui iisdem frequenter utuntur longevitate gaudeant. Potionibus insuper frigidis, ad quas non solum homines sed & bruta quævis innato desiderio feruntur, quasque necessitas & deliciæ commendant magis quam calidis sunt adsuæti; nec ita male quidem, quippe calidi potus glutinosiores nutritibiles partes nimium attenuant, fluidiores & tenuiores reddunt; frigidi vero biliosas cruditates destruant, condensant colliguntque laudabiles partes. Cæterum in victu & amictu magis simplicitati nitori tamen & munditiei student nimiumque luxum damnant atque gulosos odio habent. In cæteris denique diætæ partibus laudabilem quoque consuetudinem servant; sic v. gr. juxta frequentes ac quotidianas ablutiones manuum ac faciei collutionesque faucium gelida aqua balnea calida & frigida & corporis exercitationes, per modicos labores, ambulationes, quandoque honestas saltationes atque tripudia aliosque varios lusus qui motionibus corporis sunt conjuncti brevique recreationis gratia itinera, per equitationem maxime ut & curru vectionem frequenter suscipiunt, quibus ad sanitatem conservandam, valetudinem recuperandam & longævitatem efficiendam nihil magis necessarium nihilque magis utile est. Ipsos quoque recens natos tepida sæpius abluunt diutiusque fasciis arcte involvunt semperque fere in cunis & gestatione agitant. Hyeme trahis libenter vehuntur & torpidum corpus gelu excitant. Non solent diem ignavia transmittere aut chartis lusoriis, somno &c. indulgent tamen interdum honestæ lætitiæ, quando causa monet, quandoque tempora poscunt secundum illos versiculos:

Tum coit excussis concors vicinia curis.

Explicat & frontem, risus sermoque modestus,

Dulciaque unanimi studio convivia servant

Nulla dies alias sterili consumitur lusu.

Frequenter quoque in ædificiis & conclavibus suis suffumigia ex baccis & ligno juniperi instituunt. &c.

§. XX. Si ulterius causas salubritatis particulares magis scrutari vellemus, aliæ plures nobis ejusmodi præsto essent. Sic v. gr. non in postremis est, quod multis in locis, oppidis Ducatum Jauroviensis & Swid-

Swidnicensis, inprimis Hirschbergæ, Landshutæ, Schmidebergæ, Greifenbergæ, &c. & circumjacentibus pagis, pro linteaminibus candefaciendis, quibus necessitas pariter ac utilitas, his oris, exterorum non veteris modo, sed & novi orbis mercatorum & amplissima commercia & pretium fecit, frequentes & quotidianos ignes struant ex lignis abietum, pinorum, fagorum, juniperi & similium, resinosis & balsamicis, qui non solum aerem purgant, sed & ipsum eiusmodi balsamicis resinosis, oleosis, subtilibus, salinis volatilibus spirituosus, acidulis, quæ salubria sunt, imprægnant effluviis. Per ignem enim corrigitur aeris quies, gravitas & intemperies, ut in foro medico notissimum est, saluberrima ea esse loca & tuta a morbis grassantibus, putridis, malignis, peste &c. manere, in quibus multi accenduntur ignes. Vix mihi tempero quin unicum saltem exemplum adducam: Fertur, pestem quæ Anno 1556 in Venetos est multa hominum strage vulgata, Insulæ 2. Mill. Venetiis remotæ Muran. incolis pepercisse ideo, quia omnes artem vitriariam tractassent & fornaces hinc quotidie instruxissent. Non solum etiam Jauroviensi & Svidnicensi, sed in aliis, ut in Meziboriensi Districtibus &c. multæ fornaces quotidie succenduntur ab iis, qui vitra conficiunt. Aliibi & Pyracmones, Brontes, Steropesque, vulcanios in ferrariis officinis, quæ atmosphæram ab omni contagio tutam semper tueri dicuntur, ut Girsdorffii, Schmidebergæ, in Saganensi, Meziboriensi &c. ditionibus tractant labores. Ne alios hinc inde longius ignivomos caminos memoremus, ad quos pertinent etiam in Ducatu Glogoviensi in loco Neusalz inde dicto, & in Oelsnensi in pago Offen &c. salis coctura &c. In Jauroviensi & Svidnicensi multis in locis, Kauffungæ, Seittendorffii, Rursdorffii, Lauterbachii, Kammerswaldæ, Apendorffii &c. fornaces calcariæ multæ habentur, in quibus calx ex saxis calcariis fortissimo igne paratur &c.

§. XXI. Hoc quoque salubritatis momentum adducamus, quod ab ipsarum urbium, oppidorum & ædificiorum & conclavium habitudine, dispositione & constructione desumitur. Licet oppidorum Silesiæ domus magna ex parte lignæ sint, eæ tamen firmos crassosque parietes habent, qui contra aëris quasvis injurias, inhabitantes satis tutos præstant atque immunes, quæ ædium conditio loco notabilis præsidii est: hinc Cartaginenses, ut se contra aëris ventorum, imbrium & maris halituum inclementiam magis munirent, parietes pice obducebant. Multæ etiam lapideæ sunt, quæ optima quidem domorum conditio est: Siquidem civitatum majorum ædificia ex lapidibus tota fere exstructa sunt

sunt, eaque parietibus crassioribus instructa, quæ hinc aërem non transmittunt & concamerationes non raræ, quoniam lapides in Silesia hinc inde, maxime montosis in tractibus magna copia eruuntur. Sunt quoque in universum propemodum ædes privatæ Silesiacæ, spatiosæ, laxæ & amplæ in longum latumque patentes, quorum fastigia recta insurgunt, neque tecta prominent, sic aërem neque superiori, neque inferiori parte concludunt, sed libere transmittunt. Sicque etiam in iis conclavia ac cubicula eundem in modum sunt comparata, ampla nimirum spatiosa & alta majoribusque fenestris ornata. Plateæ in civitatibus bene sunt ordinatæ ut plurimum rectæ & latæ, ut aëre ventisque debite perflari & effluvia heterogenea, quæ quotidie affluunt ventilari atque ejici possint, frequenterque per eas interfluunt rivi, sordes & excrementa eluentes secumque abripietes. Hoc nomine præ omnibus aliis celebres, Silesiæ Caput, Uratislavia & Nissa, Swidniciumque nec non Leoberga, Boleslavia, Olavia, Brega, Lignicium, Crosna sunt, quæque hac gloria urbi Panormitanæ, Lutetiæ Parisiorum aut Lintzio Austriæ, Bremæ aut Flensburgo, Lubecæ, Erfurto Regiomontioque in Borussia vix cesserint, quæ omnia ad salubritatem civitatum faciunt multum. Confer. *Dissert. Præfid. de Aëre Lipsiensi* §. 6. Insuper Silesii munditiei in habitationibus suis atque plateis student, ut sordes frequenter ejiciantur atque decenter, ob quarum foetorem putredinosum multi putridi morbi atque pestilentes non raro sunt exorti. Exempla petantur v. gr. de Vienna Austriæ a GERBEZIO in *Chronol. Med.* p. 125. De Lutetia Parisiorum & Tolosa Gallor. DIMERBROKIO de *peste* p. 154. PALMARIO in *epist. & præfat. in Lib. de febr. pestil.* de Constantinopoli ab HEBERER *Lib. II. Servit. Egypt. c. XLVIII.* p. 303. Hinc hac in re veteres Romani cautissimi erant, refert enim Halicarnas: apud eos constitutos fuisse Ædiles plebis, quorum officium fuit, ut munditiei urbis prospicerent atque curarent, ne aëri per vias publicas, cloacas, aquæductus, qui adeo sumtuosissimi erant, immundities quædam accederet, quam legem salutarem etiam Jure Consulti adhuc retinent atque injungunt, vid. *Gloss. in l. XXI.* §. 1. ff. STRYK. de *Jure sens. D. 5. c. 11. n. 32. &c.* Hinc hunc laudabilem morem ut servant a Magistratibus utpl. publicis legibus cautum est, ne impuritates in vias publicas ejiciantur, quam legem diligentissime imprimis Bregenses observant, vid. *Topographiam allegatam Silesiæ* p. 136. Ad hoc commodum facit dispositio pagorum in Silesia, qui dispersas hinc inde domus habent, ad quas fumi ex fimi cumulis & pecudum stabulis &c. in vicinia congestis, non attingunt &c.

§. XXII. Neque defunt multæ salubritatis in Silesia notæ, ex quibus a posteriori magis eam, humores bene solutos, dilutos, temperatos, bene mixtos partesque solidas laudabiliter se habentes, cognoscere possumus. Nam fruuntur Silesii, ut plurimum bona constantique sanitate. Sunt vegeti, proceri, alacres ac perveniunt ad summam virentem vegetamque senectutem Nestoreosque annos; Conf. FR. LVCAE *chronic. Siles. p. 2139.* nam ut eleganter HIPPOCRATES dixit *Lib. de flat. mortalibus vitæ ægrotis vero morborum potissimum aër est autor.* Inter longævos Silesios præsertim eminet nobilitate ac virtute Clarissimus Georgius de zedlitz, qui 108. annos felicissime attigit, numerosam sobolem post se reliquit siquidem 185. nepotes, abnepotes & atnepotes, vidit An. 1550. mortuus, atque Familia Kretschmeriana Hirschberga oriunda ac florentissima, ex qua Pancratius Kretschmar 78. ejus Pater Jacobus Kretschmar 90. avus ultra 100. proavus 120. annos vegeti ac sani attigerunt. Nec hic obliviscendus est, Macrobius ille dictus Uratislavienfis, M. Georgius Seidelius. Inter horum exempla quoque notabile quoddam occurrit de rustico quodam in pago Rothe prope Oelsnam, cui cum annum 64. ageret cani defluerunt & capilli sublutei iterum & anno 78. suæ ætatis dentes denuo pronati sunt vid. SINAPII *Oelsnogr. P. II. p. 414.* quare Silesii æque ac Angli, Galli, Bononienses & in India Musficani, Scribi, Cyrni, Brachmanes & quidam ex Septentrionalibus populis, Macrobiis dicendi. Morbi acuti & contagiosi raro videntur in Silesia, etsi alicubi locorum oriantur haud late serpunt aut diu regnant, sed brevi iterum evanescunt. Neque adeo morbis chronicis & diuturnis pertinacibus detinentur Silesii etsi detineantur iis atque aliis potius ex prava, immoderata atque perversa victus ratione, nimioque excessu, quam ab aliis causis per se laudatissimis sunt deducendi. Attamen eorum corporis habitus sæpius ad plethoram inclinat, hinc & multos carnosos, opimos athleticaque constitutione conspicuos homines paucissimos tamen, quos admodum quadratos non sine vitii indicio nomines, offendes. Hinc & hæmorrhagiis narium, pectoris cephalalgis, rheumaticis, hysteris, arthriticis, epilepticis, febrilibusque moliminibus, affectibus catarrhalibus, phthisi ac calculo potissimum obnoxii sunt. Præditi & sunt Silesii concinna & eleganti decoraque partium corporis compositione & habitu externo corporis optimo atque formæ bonitate naturali, venustate, robore, colore faciei, ut plurimum candido, nitido, vivido paululum rubicundo & florido, imprimis, qui montosa & alta loca incolunt (adeo ut suaviorem colorem ibi sensim acquirant alii) vultuque

tuque leni cum capillis candidis & flavis ut plurimum, rarius fuscis, rarissime nigris ut & vocis claritate (hinc Hippocrates Phasianos præ aliis gravissime loqui ob aëris crassitiem & aquas palustres dixit) adeo, ut vel ex vultu & hoc decore membrorum statim colligi possit, quam elegans animus inhabitet eos. Gaudent hinc etiam Silesii laudabili corporis temperamento sive particularum sanguinis illa varietate, temperatione & motione, quæ incolatus regionum sive aëris, aquæ & locorum atque juxta hæc victus rationem & conditionem sequuntur, in quo blandus sanguis abundat; in effrenos tamen motus minime pronus. Atque parum cum Clariss. Curæo ac Uratisl. Collegis censeo abesse, quin ad sanguineo cholericum, si valde temperatum id existimes, Silesiorum temperamentum accedat, illud scilicet, in quo sanguis subtilis & fluidus satis, pori & interiores canales & vasa, per quæ ille movetur modice, ampla reliquæque partes simili modo sat spatiosæ atque extensæ, non nimis constrictæ, neque nimis relaxatæ sunt, adeo ut vividus, moderatus ac bene temperatus, fortis tamen magis quam lentus exinde oriatur sanguinis humorumque motus, ita in specie, ut juvenes illo, senes hoc magis conspicui sint, rarissima certe omnium melancholica temperies. Indicium salubritatis quoque mulierum fœcunditas præsertim habetur, de qua fœminæ Silesiæ quoque jure gloriari possunt, ut alias salubritatis regionum jam non longius adducamus notas, quæ de Silesia prædicari quoque possent.

§. XXIII. De salubritate Regionum haud dubitanter suspicari licet, si non modo corpore, sed & animo valeant incolæ, quæ & utraque valetudo secum amice conspirat atque rectus animus corpori sanitatem vitamque tribuit, aut ut eleganter Seneca expressit: ampliat sibi ætatis spatium vir bonus. Ingenium certe dependet magna ex parte constitutione & dispositione corporis, quæ ordinario adscribitur constitutioni & disparitati terræ & climatis, aëris qui inspiratur, aquarum quæ bibuntur & escarum quibus nutriuntur & mores atque animi affectiones quantum ad timiditatem, audaciam, voluptatem &c. spectat, regioni respondent. Hac de re HIPPOCR. jam loquutus est *Lib. I. de diet. a Sect. 32.* perhibens aëris regimine homines sapientiores & ingeniosiores reddi & *Lib. de flat. Sect. 20. §. 3.* opinatur prudentiam in sanguine consistere, atque Galenus variis in locis idem demonstrat & scitissime explicat: temperamenta, sive rhythmus isti certi atque determinati motuum vitalium, a proportionem inter partes solidas, & fluidas corporum humanorum dependentes, quæ regionum conditionem atque incolatus sequuntur ad peculiare

mores & inclinationes disponere, quod & eleganter fatis OVIDIVS II, *de Pont. el. 7. 15.* expressit:

Temperie cœli corpus animusque juvatur.

Qualis enim aër, cibus & potus, tales etiam sunt humores ac spiritus, qui ex his suam sumunt originem, ac quales hi sunt ad tales etiam mores feruntur homines: hinc nota notissima illa regula: Natura facit habilem. Ab insalubri aëre & victu animus quoque turbatur, aëre enim v. gr. crasso & humido, consveta & debita evaporatio capitis totiusque corporis impeditur, impuritatesque excernendæ retinentur, quæ deinceps cum sanguine iterum unitæ totam humorum crasin & temperamentum cerebri præsertim obnubilant atque deperdunt, ex quo spiritus crassi inertesque exsurgunt, conf. HIGHMORVS *Lib. III. anat. disquis. P. I. c. IX. p. m. 22.* In palustribus, uliginosis, declivibus, planis locis degentes, corpore animoque minus præstantes; in altis, montosis, asperis, ficcis ex utroque valentissimi, fortes, bellicosi, acuti ingenii &c. habentur, de quo in nostra Europa, vel sola Helvetiorum Natio testatur. Videbis alios alibi multos crasso ad instar Bœotum in aëre natos, inter arcadica pecora nutritos, in regione aëreque thebano educatos, alios a mendaciis fallaciisque Cretensium non abhorrentes, Siculis, Sardis, Ætolis, Numidis, Chiis, Cappadocibus, Cilicibus Argivis, Brutiis, Mauritanis pejores & Jonibus, Abydenibus, Medis, Arabibus, Tarentinis magis molles & effeminatos & Asiaticis libidinosiores, Campaniis magis elatos atque superbos, aliosque inconstantia perfidiaque notatos &c. unde sine dubio factum est, quod secundum illud: omnes Insulanos esse malos, PLATO 4. *de Lege*, ut civitates 80. Stad. a mari distent, voluerit. Rursus alios alibi ex Attica, Ægyptiaca, Arabica, Syriaca tellure, quæ ficca, arida, salebrosa, & saxosa, & ubi aër subtilis & aquæ leves, perfectos reperies, qui purissimo tenuique cœlo fruuntur, & ex quibus alias per longas temporum series adeo multa tantaque egregia, acutissima atque felicia ingenia Heroum, Doctorum, Sapientum prodierunt. Nostris adhuc temporibus ob hanc ipsam rationem in nostra Germania Tirolis, Carinthiæ & Stiriae superioris &c. vid. GERBEZIVS in *Chronol. med. p. 23.* in Hispania Biscajæ, Galliae Provinciæ Lemovicensis &c. incolæ stupidi habentur. E contrario veteres quondam communi velut consensu Asiaticos facilitate morum & humanitate cæteros ideo superare contendebant. Hodie plurima in nostra Germania loca, Gallia atque Anglia præsertim hanc laudem, hancque gloriam sibi vindicant.

Hæc

Hæc cum Silesia nostra apprime quadrant, & cœlum Silesiacum beatissimus ingeniorum pater nominandus. Quemadmodum enim felici ac commodo situ gaudet salubresque fruges atque fructus profert &c. quod per series hucusque est recensitum, ita & morum facilitate atque rectitudine aperta inhabitantium celebratur. Nam Silesii, ut perspectum est, probitate & jucunditate morum, ingenua & integra mente, candore, æquitate, veracitate, comitate, suavitate, integritate, facilitate, lenitate, urbanitate, humanitate, affabilitate, amabilitate, propensione in omnia honesta, præditi sunt, & pietatis, religionis cultusque divini amantissimi & observantissimi, adeo, ut quidam superstitionis plurimos eorum nota mallent notare. Facile quidem irascuntur, sed facile iterum placabiles neque vindictæ cupidi, neque odia amicitiae titulis velant, mira facilitate tolerant etiam difficillimos. Vera bonitatis antiqua simplicitate, a blandientis seculi lenociniis longe remota, cujus vix alibi dicitur nomen, & fidei veterum Germanorum sunt observantissimi, secundum verum:

Moribus antiquis restat Romana Virisque.

Siquidem paucis tractant negotia verbis atque nuda boni viri verba multis apud eos æquiparantur, juramentis & plus plurimis scripturis & maximis sigillis valent. Certe, si unquam alibi, in Silesia, sincera & antiqua fides atque nuda veritas. Amicitiam non utilitate sed fide colunt. Ingenia bona at sinistra nata fortuna stipendiis liberalibus libenter juvant ac felicitant, quorum permulta hinc inde in exteris etiam regionibus collocata sunt. Munifici pariter volentes sunt atque donis benignitatem apponunt, liberalitatem tamen ingeniosam esse quam prodigam volunt. Summis suis Magistratibus obedientissimi sunt & fidelissimi. Cæterum & vivunt libenter sua sorte contenti, honoresque non ambitiose postulant & anxie quærunt, sed cum modestiæ laude expectant oblatosque tamen non pertinaciter recusant. Amant Divino præcepto apud MARC. VIII. v. 8. IOH. VI. v. 12. alibique inveniundo obedientes continentiam & frugalitatem ac parsimoniam, quæ magnum est vectigal, quidem sed sero in fundo qua, quæ labore quæsita sunt tanquam parta tuemur atque augescere facimus, rati quod & in parcitate sit lucrum, unde apud eos proverbium notum: *Der ersparte Pfennig sey redlicher als der erworbene*; Neque tamen avari sunt habendi, ut quidem quidam hanc virtutem in illud vitium iisdem vertere volunt, potius reputantes, quod nec minori teneantur culpa, qui per avaritiam seponunt,

quam qui abjiciunt per luxum & licet quidam iniquissimi censores nostram gentem gulosam esse dixerint, censuræ tamen hujus malevolæ eam vindictam studiumque calumniandi jam castigatum invenies in HENELII *Silesiograph. renov. P. I. Cap. VI. p. 682. & pag. 680.* Verecundia & pudore in vita, vultuque conspicui sunt, quam ob rem rursus sinistri censores non intactos eos morositate, torvitate, ruditate ac stupiditate falso censent. Ut fortitudo etiam iis & jure quidem adscribitur ita tamen temeritatem fugiunt & res suas domesticas diligenter indefesso labore tractant. Tarde & cunctantibus consiliis ad severitatem concitantur; sed excitos longa tempestas & hominibus digna exercet. In omnibus acrem indolem, quam a natura obtigerunt, ratione temperant animumque omni fortuna æquabilem servant. Ingenioque docili conjuncta industria & improba solertia valent nec aspera modo ardua reformidant. Ad literas & bonas artes liberales musicam (cujus cives oppidani Patschkoviæ Ducat. Niss. præ aliis admodum studiosi deprædicantur in HENELII *Siles. Renov. p. 424. Parte I.*) Eloquentiam & poësin præsertim Germanicam, quæ a Silesiis unice exstitit, excolendas, sunt proni. Herbariæ quoque rei præ aliis cum vicinis Bohemis æstimatores & cultores nihilque hominibus necessarium ac utile pariter atque jucundum censentes, quam Dei gratiam in vegetabilibus admirando propriis subvenire usibus, adeo ut matres quoque filiolas in campos secum deducant, omnesque herbas, quas exspatiando offendunt, monstrent, nominent, usum explicent, æstimationemque illarum & curam commendent. Sic & literarum studia multifaria studio habent, atque ea itineribus, quæ in exteris longinque regiones instituunt libenter, exasciare moresque simul optimos exprimere, non neglecta prudentia ac solertia satagunt, eosque dum se receperint domum, diligenter retinent potius quam modo simulant. PHILIPPVS MELANCHTON in *Comment. Siles.* apud CL. THEOD. CRUSIVM in *Miscel. Siles. Ao. 1722. edit. p. 7.* æquissimus nostratium hominum censor, quondam apud Henricum Ducem Silesiæ Ligium palam testatus est: nullam gentem plures eruditos Viros in tota Germania quam Silesios, & in nulla alia Germaniæ parte plures ex populo discere & intelligere doctrinas. Nec non artium mechanicarum egregie illorum docilia ingenia capacia sunt. Artem simulandi dissimulandique sine tamen fallacia eos callere dicitur. Amant munditiem & elegantiam in amictu sine fastu. Peregrinos ad accessum aut notitiam, consortium convictumque liberaliter admittunt hospesque hic bene manebit, aderit hospes hospitalis, humanus. Gaudentque aliis benefecisse,

fecisse, ostendunt se libentius factis quam verbis, non ostentatione neque innani simulatione. Atque in Silesia ubique sæpius nihil molle deprehendes, imprimis in educatione liberorum, maxime in tractibus ipsius montanis. De foeminis seorsim Siles. hoc habetur, licet, ut Mich. Neandri verbis utar: Veneres & puellæ sunt tales, ut vel silicem subigere possent ad amandum, tamen pudicitiam servant sine labe. Id testimonium addit Chronici Norimbergici Autor, sexum foemineum in Silesia venustum esse & affabilem, sine tamen pudicitiae labe (quamvis ad voluptatem veneream, quidam illum inclinantem dicant) scribens: Facies enim illarum color succi plenas & solidas alabandicarum rosarum ac alborum liliorum condecorat, roseaque labella gratiam conciliant, ut hinc vividissimæ videantur, ea propter Gallorum respuunt genium, qui pulchras existimant quæ pallescunt, potius Germanorum sententiam præferunt, qui pulchritudinem in eo potius ponunt, quod & sanitati magis congruit, si genæ candore lenique rubore imbuantur. Vox clara & tenera, qualis in orientalibus civitatibus annuente Coo, esse solet. Iis insuper jure hæc laus tribui potest, quod non solum rerum domesticarum suarum diligentissime curam agant, & quod laboriosissimæ sint, adeo, ut virorum quoque labores vicesque obeant. Vratislavienses speciatim foeminæ apud justos rerum æstimateores tam ex corporis pulchritudine, animi virtutibus, quam arte coquinaria, multum laudis tulerunt. conf. CVRAEI *Chronic. Siles. P. II. fol. 24.* Illorum virorum omnibus togæ artibus Clarissimorum Silesiorum non solum apud suos, sed etiam apud exteros effulgentium & nobilitatorum, qui magna numero numerantur & qui inter reliquos eminent, ab eruditis hominibus hinc inde & passim recensio facta est atque laudatio. Quorum catalogum si perquirere velles, vix oppidum in Silesia erit, quod non plures eorum, Claros suos Varrones, Quiritesque &c. genuit; quos & quantos modo putes, Wratislavia, Hirschberga, Boleslavia, & Leoberga foecundæ bonorum ingeniorum matres dederint? quam ultimam seorsim ideo Clarissimus Fechnerus amplissimo carmine celebravit. Conf. præter alios celebres Viros Silesiographos HENELIVS ejusdemque *Silesiographia renovata* quam & JOH. CASP. EBERTVS *Cervim. Literat.* Nec pace quam ferre possunt Silesii saltem, sed & bello atque armis egregii domi forisque sunt clari, quorum multa quoque prostant exempla, quare non amplius attinet, ut longius de fortitudine Silesiorum afferamus probationes. Bellicosam nationem Silesiacam semper fuisse ex Historiis patet, quæ referunt veteres Silesiæ Incolas, omnes illas regiones, quas

Albis,

Albis, Sala, Vistula, Danubius alluunt, atque adeo quæ ad mare glaciale usque excurrunt, forti armataque manu subegisse. Hanc laudem Matthias Hunniades, Rex & Bertijs iis tribuit, quæ notabilia testimonia, quia hic ob chartarum angustiam vix locum inveniunt, legantur in HENELII *Silesiographia Renovata P. I. p. 690. & seq.* Phil. Melancht. cuius ipsa verba iterum possunt legi apud modo laudatum HENELIUM *l. c. p. 679.* Silesios & Misnenses ejusdem genii & ingenii esse quondam opinatus est. Ast, quo ferar? Alii potius Silesiorum laudes computent atque ad vivum depingant.

§. XXIV. Evidentes hæ potissimum causæ salubritatis Silesiæ sunt, dari possunt forte adhuc plures, sive ejusmodi earum, quas privativas vocare malles, quibus mala a nostra Silesia prohibentur, sive positivæ, quibus salus ipsi exhibetur & quæ forte sub halituum invisibilium sensibusque alias vix patentium forma, sive etiam a superioribus, sive inferioribus locis ad aërem veniant, atque tales, quæ non statim ac semper, neque vel diligentiori altiorique scrutinio cognosci & detegi possunt. Sic refertur a PLINIO *Lib. II. Cap. XCVI.* Locridem atque Crotonem saluberrimas urbes ob ignotam quandam cœli benignitatem constanti salubritate gaudere pestemque sensisse nunquam; viciniam autem sæpissime. Subest in multis locis quoddam ejusmodi, quod nec dici, nec scribi potest: ut igitur in salubritate consideranda experientia quoque in auxilium vocanda sit. Plura de hac re leguntur in *Dissert. allegata Præsidis de aëre Lips. §. II.*

§. XXV. Cum in his paragraphis quædam proposuimus, quæ ad salubritatem regionum facere possunt, in aprico jam esse nulli dubitamus, Silesiam inter saluberrimas regiones, & in quibus saluberrime vivitur, numerari jure posse. Namque insunt illi quæ prosunt, quæ juvant, quæ delectant, aëre, aqua, tellure & locis & quæ in iis reperiuntur in commune velut inhabitantium commodum atque salutem amice conspirantibus. Felix igitur Silesia reputanda est, Campi Elysii felices & omnibus deliciis affluentes in Silesia (Elysia antiquitus secundum plurimorum sententiam, etiam bono omine dicta,) ibi reperiundi. Hæc fortunata terra est, cujus eximiæ dotes, Insularum Canariensium fortunatarum dotibus facile æquiparandæ essent. Laudat maxime PLINIVS Cretam Insulam, *v. Lib. IV. C. XII.* & PAVSANIAS in *Achaic.* Joniam ob cœli clementiam & salubritatem, qua fruuntur, maximam. Extollunt alii ideo Hispaniam, Brasiliam alii, Alexandriæ tractum, alii rur-

rursus alias regiones salubres, nos merito Patriam nostram extollimus, quia salubritas eam extollit.

§. XXVI. Hæc laudabilis universæ Silesiæ in universum considerata conditio est. Si ad specialia rursus descendere & Silesiæ loca ac civitates contemplari libeat, inter hæc diversitatem quandam, ut diversi quoque sunt situs locorum, prout nimirum in montibus, collibus, aut vallibus, in planitie, in humida aut arida terra, ad fluvios, paludes, lacus &c. sunt locata, ut ubique locorum fieri affolet, si sine studio & odio rem fateri volumus, quamvis non adeo notabilem deprehendemus. Nam nulla regio ex omni parte est æque beata ac felix, ac omnium prosperitates semper aliqua alias comitatur labes. Sic optimæ Vratislaviæ aliquo ponitur in vitio, quod in palude exsiccata sit collocata, & quod adhuc variis paludibus juxta solum humidius viscidum atque cœnosum circumdata sit, quod littus Oderæ fluvii depressum & inundationibus ideo aquarum obnoxia regio, quod aër tepidus & humidus vaporibus obscuris & foetentibus frequentibus obnubilatus atque crassior, aquaque fontana limpida atque clara sapidaque rarior quodque diæta ibi accusanda quoque veniat, quæ variis morborum generibus præsertim congestoriis, ferosis, malignis, febrilibus exanthematicis, rheumaticis, apoplecticis atque paralyticis vitæque brevitati commoda molliori lautaque potissimum vivendi ratione ansam præbere facile potest. Ex quibus fontibus causis febres varii generis gravissimæ, nephritis, arthritis & similes alique morbi ibi frequentissimi essent. vid. *Topographia Silesiæ* M. MERIANI, p. 129. Similiter D. JOACH. CVRAEVUS in *Chronic. Siles.* P. II. f. 43. seqq. scribit: Eleutheropolim Silesiæ frui quidem ex sua natura integra salubritate, at paludes quasdam limitare eandem, in quas opifices varias sordes conjicerent, ex quo aër foetoribus inficeretur ac corrumpereetur, qui alioquin nimis frigidus & penetrans esset, quare & incolis, præsertim foeminis, ut plurimum phthisis, malum endemium ac lethiferum esset. At hæ causæ partim hodie sunt mutatae ac averse aut haud difficili negotio emendari & præcaveri forte possent, partim non tantæ, quæ Silesiæ salubritatem destruere totam & nostrum de ea assertum evertere aut saltém dubium reddere possent. Si quidem etiam hodie Vratislaviæ optime vivitur, cum enim hæc urbs in læta planitie sita sit, ac ideo ventis præsertim septentrionalibus pateat, iidem omne vitium, si quoddam ex soli natura exurgeret, iterum valide depellunt & totam atmosphæram ibi in salubrem redigunt modum. Equidem: Jauroviensem & Svidnicensem, Munsterbergensem,
O Nissen.

Nissensem, Oppaviensem, Teschinentem Ducatus, cum saluberrimis Silesiæ, imo & Germaniæ Provinciis, ne audacius quid dicamus, conferamus, vix possumus dubitare. Quicquid salubre in aliis seorsim censetur, in his collectim omnia pene videntur, vix oppidum ibi, vix pagus est, in quo non singulare quid ejusmodi inveniatur. Altissimi hi omnino sunt & montosi, interjacentibus tamen campis passim latis & lætis, apricis convallibusque amœnissimis, nullo facile ardoris æstusque solaris impetu nimium agitantur, torrentur aut uruntur. Hyeme equidem gelu acerbius paulo propemodum tanguntur nivesque etiam æstivas sæpe experiuntur; ast clementiores tunc & ut plurimum sine damno, sed ideo non insalubriores cæteris sunt, quoniam in duram glaciem splendidamque crySTALLUM nives congelantur molles & diffluent & occlusis magis terræ poris exclusisque crassioribus & heterogeniis impuris, vappidis, humidis, effluviis, semper lætior atque defœcator refulget atmosphæra ibi, siquidem & in frigidioribus locis vegetiores, longævioresque reperiuntur incolæ candentibus nivibus montibus varietate delectantibus eos, ac salubritate conservantibus. Ad hoc contra frigus optime se munire sciunt Silesii pellibus, quarum usus in tota Silesia, frequentior & maturior est, quo vicinos suos, Polonos imitantur, unde & proverbium de nostris monticolis ortum jocosum, quo dicitur: Sie legen zwey Tage vor Johannis die Peltze ab, und zwey Tage nach Johannis legen sie solche wiederum an; quo indicatur quod corpus decenter tegere norunt. Remedium sane prophylacticum adversus varios morbos non infimum habetur, quam verno tempore, tarde hyberna vestimenta & tegumenta corporis, deponere ac minuire, autumnali vero tempestate cito matureque induere atque augere. Speciatim thoracibus & amiculis pectoris ac ventriculi regionem probe tectam quisque domi forisque habet, bene gnarus, nihil hisce corporis partibus magis inimicum quam frigus esse, esseque loco transpirationis juvandæ, promovendæ conservandæque ex qua impedita febres, inflammationes aliaque innumera mala insurgunt, certissimæ tutissimæque præservationis. Per totam vero æstatem temperata tempestas est, verno alias tempori fere similis, ad quod etiam multum contribuunt ab hyeme relictæ & sensim liquefactæ nives, quibus sic suaviter aër temperatur ac amœnitate sua homines recreat ac reficit, atque omnes anni partes pari salubritate percurrit. Nolo amplius adducere atque probare, sed potius credendum pro cuiusvis placito relinquo, quod quidam afferunt atque affirmant atmosphæram in montibus sudet: maxime juxta alia mon-

tana Silesiæ loca, circa Goldbergam, in tractibus Münsterbergenfibus & Niffenfibus montanis &c. & circa eos totam effluviis aureis atque argenteis ex reconditis ibi mineris effluentibus magnum & incomparabile falubritatis momentum refertam esse. Hinc & corporis animique viribus & longævitate præditos, erectos & sola canitie senes ad instar Apenninorum montium generant aluntque præ cæteris, quales fere in omnibus locis montanis spectantur, quod Plato jam olim retulit. Exinde intelligitur quantum sit montes accolere. Nec nostri monticolæ apoplexiis frequentioribus & peripnevmoniis &c. afficiuntur, aliis familiaribus. In his tractibus omnes urbes & oppida speciatim Schwidnicium, Leoberga, Stregovia, Boleslavia, ab MART. OPITIO supra laudato carmine commendata, &c. a puro, sereno & salubri aëre, cœlique clementia, & gelidorum fontium scaturigine aquis limpidissimis & salubribus in Silesiæ Topographiis a celeberrimis illis viris Schikfusio, Henelio, Lucæ aliisque passim conscriptis per series laudantur. Laudanda vero seorsum veniunt patriæ Hirschbergenfis diœcesis vicina loca, quæ & Thermas Hirschb. complectuntur, quique delicias jucundioris regionis cum omni-genis falubritatis momenti habent conjunctas & lætitiâ quandam ingentiam. Conf. *Præsidis Dissert. de Thermis Hirschbergenfibus* §. 1. & 2. Finitimum oppidum Schmideberga, tria milliaria ab Hirschberga recedens, pariter ob aëris falubritatem celebratissimum est, adeo, ut ad posteros notum sit, hoc nunquam peste aut aliis morbis contagiosis tactum fuisse. Incolæ ejus quidem & accolæ alias strumis & scrofulis colli, endemio quasi malo notati erant, sed ex quo aquæ ex certis quibusdam rivulis ex metallifodinis profluentibus usus cessavit, non amplius hodie ac quondam experiuntur ejusmodi. Plura de pluribus ejusmodi addamus chartarum angustia vetat, nam diximus saltem quædam, cum restent plura laudanda. Salva sis diu, suavissima Silesia, calamus Te deserit. Tu vero, Candide Lector, excuses, quæ mala sunt.





* * * * *

III.

DISSERTATIO PHYSICO-MEDICA DE INCOLATVS MONTANI SALVBRITATE,

PROOEMIUM.

Plurima magnaue sunt argumenta, montium in prima jam creatione a Deo T. O. M. Sapientissimo hujus universi Effectore, conditorum, incolatum commendantia. Haud certe postremum est illud ac multum dignitatis concilians, quod sacra teste pagina Deus ipse montibus sit delectatus, & quod quandoque ex altis in terram descendens, in iis utpote qui cœlo sunt propinquiore, ut plurimum versatus sit, homines advocaverit & omnia fere sua mysteria in iis celebraverit, atque sua immensa beneficia hominibus exhibuerit ac donaverit. In monte enim post diluvium arcam Noë non sine divina sua directione deposuit; in montē legem, humano generi profuturam, solenniter promulgavit, & cum Moyse loquutus est. In monte ædem sibi Sacram a Salomone Rege ædificandam, in qua Deus exauditurus erat supplicantium vota, magnificentissimo curavit apparatu. Jussit Deus Abrahamum ad montem ascendere ac ibidem filium sacrificare suum. In montibus Salvatorem nostrum optimum, de quo SALOMON vaticinatus est. *Cant. II, 8. ecce ille venit saliens super montibus saltans super collibus*, cum discipulis suis atque aliis sæpius versatum esse legitur; cum sive prædicare, sive pro genere humano orare, sive beneficia illi conferre atque benedictionem elargiri, sive corporis sui glorificati revelare præstantiam, sive sacrosanctum sacrificium, passionem & mortem (in monte Calvariæ) offerre salutemque æternam nobis recuperare, sive solennem in cœlos ascensionem celebrare Ipsi constitutum esset. Juxta montem sepultus esse voluit & benedictio a Domino promittitur in adscensu ad montem Domini. DAVIDES Rex montes nominat a quibus auxilium Ei venit. *Psalms.*

Pſalm. CXXV. v. 1. Quid quod, ipſa vita Beatorum æterna æquatur conferturque cum monte, ut ex *Ep. Pauli ad Hebr. XII. v. 22.* claret. Paſſimque præterea ſacris in literis quorundam montium celebris memoria eſt, ut montis Grifim dicti *Deut. XXIII.* Gilead. *Genef. XXXI.* Carmeli, Horebi, Libani &c. Sic & Jeſaias Propheta, montem adſcendit & ibi preces fudit ac in montibus Sancti adorarunt Patriarchæ. Montana elegit Abraham, Loth vero planitiem. Cœlum Beatorum ſedes cum monte Sion comparatur, infernus abyſſus vocatur. Ut hinc non incommode forte, mos ille ethnicorum, divinitatem quandam in montibus admirantium & forte ſentientium, ac ſi non alibi quam in montibus melior deorum cultus inſtitui poſſet, in imitationem vere credentium verſus, derivetur, montes colles, valles, diis ſuis conſecrandi, ſibiſque multos fingendi deos deasque tutelares monticolas, Oreades & Hamadryades, Faunos, Satyros, Sylvanum Jugatinum, Collatinum, Vallonianos ipſum magnum Panem quos pineo ideo etiam ſerto ſymbolo montanæ dotis decorisque redimitos facie, pedibus caprinis (quoniam hæc animalia montes amant) pinxerunt, Nympharum item omne genus locorum montioſorum amore retentum ibi conſidere dixerunt. Ita Apollini Cynthium, Cybele, Cybelum, Veneri Idalium Taygetum excelſum Laconix montem Spartæ imminentem & Cythereonem Libero Patri Baccho dicatum legimus, atque etiam Dianæ venationum deæ montium amantiſ lætiſſime ibi feras inſequentis, ſacrum fuiſſe, ex CALLIMACHI *Hymno in Dianam verſ. 188.* diſcimus, paſſimque in antiquis monumentis librisque ac nummis memoria templorum fanorum delubrorumque in montium verticibus Jovis ἀγκάϊς colligere eſt: In his tractibus pariter variæ cryptæ ſubterraneæ religioſæ ſunt inventæ ut in Marca Anconitana Italiæ, ſpelunca Pilati in Gallia ad Vienneſem, cluſeau prope Miremontium, ſiquidem ATH. KIRCHERVS in *Mundo Subterr. & Itinerar. Hetruſco Lib. VIII. cap. XI.* harum cryptarum incolas adducit. Atque in bicipiti Parnaffo & Helicone Pimpla Aonumque & Pieriæ cacuminibus elatis Muſarum Virginum, muſicæ aliarumque artium inventricum & tutricum, ſolitudinis amantiſ ſedes fuit atque ſeceſſus a ſtrepitu turbis remota, cujus amœnitates multis nominibus celebrantur. Apud Romanos Septimontium dies feſtus erat Decembri, menſe celebratus, quod in ſeptem montibus nempe Palatino, Capitolino (alias Tarpejo & Saturnio) Quirinali, Aventino, Cœlio ad Saburam, Eſquilino, Viminali, ſacra fierent. Veteres ethnici deos monticolas non modo valde ſuſpiciebant ſed & eos

omnium potentissimos verebantur: Legimus enim *I Reg. CXX. v. 23.* Assyrios cum Regibus Israëlit. bellum gerentes, coram Rege suo Benhadad pavidos, formidine cladis, sic conquestos fuisse: *Ihre Götter sind Berg-Götter, darum haben sie uns abgewonnen, o daß wir mit ihnen auf der ebene streiten müßten, was gilt's wir wolten ihnen abgewinnen.* Ecquis non miratur ingentis molis montes, quorum culmen nubibus coeli occultatur & absconditur? Ecquis non miratur saltem sed & rimatur, Vesuvium in Calabria, Heclam in Islandia, Aetnam in Sicilia &c. diversis vicibus saxa, glebas, cineres flammisque & fumos imo igniferos torrentes ex suis, visceribus exhalantes & eructantes. Quis non singulari attentione montes novos, derepente exortos, rursusque aliorum interitum, memoratur? Montosis in locis certe rarissima & admiranda, quæ Dei, qui nihil unquam frustra fecit, mirandam potentiam, sapientiam ac gratiam ostendunt, inveniuntur &c. Profecto si quid in regno naturæ attentam considerationem meretur, montes omnino sunt: Montium enim non solum grata elegantia ac decus quod terræ conciliant sed & insignis usus ac summa necessitas ut ii ipsi præ aliis eminent, qui tanquam ossa terræ fulcra fundamenta & catenæ, quæ, illius singula membra utilissime connectunt & tanquam ubera formosæ almæ matris concinnam elegantiam cum structura, tum natura efformatam addunt atque simul multa commoda foenerantur inter quæ divites auri argentique &c. venæ non postremum sunt ac fontium fluminumque exortus, ut ideo dubium sit, an planities, an has Dei Creatoris, res creatas magis necessarias pariter ac esse utiliores. Hinc notabile est Mosen antiquissimum scriptorem regionem Populo Israëlitico promissam exinde etiam laudasse, quod montes vallesque, insint: dicebat enim populo Israëlitico ut legere est, *Deuter. XI. v. 10. 11.* *Das Land dahin du kommst, es einzunehmen, ist nicht wie Egyptenland, davon ihr ausgezogen seyd, da du deinen Saamen saen und selbst træncken müßtest wie ein Kohlgarten: Sondern es hat Berge und Auen die der Regen vom Himmel træncken muß.* Atque constat sane montium quos ideo Sapientissimi Omnipotentis & Gratosissimi atque amantis hominum Architecti elegantissima pariter ac utilissima opera esse Xenophon eleganter dixit, non minor etiam utilitas, quam præstant planitiebus adversus omnem procellarum impetum; cujus præsertim Lybia testis esse potest, quæ ob montium defectum tot in solo experitur, hominum a ventorum vehementia & arenarum copia, oppressiones & ubi ut Hippocrates dicit de victus *rat. Lib. II.* Homines latenter exsiccantur, quot vix in salo contingunt naufragia, atque immanes, horrendasque oceani & fluminum

minum inundationes. Rursum ventos alibi utilissimam illam aëris commotionem nunc producunt montes nunc augent, nunc infringunt atque imminuunt, nunc omnino repellunt, atque ab eorum violentia valles defendunt. Nec non inserviunt non solummodo regionum fines distinguendi sed & fortissimis muniminibus securæque tutelæ ac rectissimo refugio hostiles insultus excludendi, quod HERODIANVS *Histor. Lib. II. c. XI.* & POLYBIVS *Hist. III.* scribunt: Esse Alpes nimir. insuperabile Italiæ munimentum atque murum quasi ac propugnaculum. Hocque non solum fastigio suo præstant montes atque reconditis suis recessibus, sed & angustis faucibus, claustris atque clausuris. Helvetis hinc v. gr. montium juga munimenta sunt tutissima quorum ope maximis etiam exercitibus hostium parva manu resistere possunt. Adhuc admodum probabile est quondam ut se tam contra hostium insultus quam pestis contagium se tutos atque immunes præstarent catervas hominum in hos abditos recessus inaccessis culminibus, rupibus opacisque sylvis munitos se recepisse eosque diu inhabitasse, quemadmodum Judæi olim Caspios montes adierunt ac Philippi III. Hispan. Regis tempore ferocium genus quoddam hominum est inventum atque Crantzius scribit quod anno DCCCC in Transylvania ex montanis tractibus ignoti ejusmodi coloni prodierint. Hi non solum delectamenta sunt atque refugia, sed etiam exuberans penus ad cultum usumque varium hominum pabulumque pecudum atque instructissima pharmacopolia, remedia omnis generis & quæ alibi non progerminant, proferentia. Quam maxime etiam montium incolatum commendat summa eorum salubritas, quæ hominum salutem, incolumitatem ac vitam, maxima Dei, quæ hominibus concessit dona, foeneratur, unde Rex & Propheta David justis hominibus in monte Domini habitationem promittit, quam locutionem Helmontius interpretatur, longævus in optimo monte victuros. Qua de re ut semper nos montium fastigia præ cæteris aliis terræ conditionibus, & admirationis & amœnitatis deliciarum commodorumque, plurimum habere existimavimus & nobiscum existimant quoque plurimi, fufius de hoc paulo agere, præsentis jam est instituti, quod & rei operæ pretium nos facturos arbitramur, si, quantum ingenii vires permittant, in hoc pergrato argumento pauxillum laboris ponamus & montes excelsos contemplemur eorumque incolatum salubrem commemoremus. Divina modo hoc secundet bonitas, animitus precamur! Condonabis autem B. L. si ordine interrupto hic fuerint forte congeſta, ut etiam montium, de quibus agitur forma irregularis conspicitur ac in situ velut

lut ordinis neglectus, qui quandoque etiam varietate quadam interjecta sine tædio legitur & si circa montium potius radices saltem, versati simus, ipsos montes nondum supergressi. Neque enim nos illi fumus, qui neque montium altitudines in statera appendere possumus, neque magnos promittere montes atque eos fumo repletos dare, ut ajunt, volumus.

§. I. **T**ellus, quam benignissimum in cœlis Numen inhabitandam mortalibus dedit, ab isto summo rerum Creatore mirificum in modum sapientissime varia ratione in multifarium creaturarum commodum est interdistincta & non eodem modo ubique se habet, sed variae conditiones ejus spectantur. Atque unaquæque regio diversas habet proprietates, ut neque virtus cœli eadem etiam omnibus ratione immittitur, neque a cunctis cœlorum partibus eadem dimanant. Sunt nempe loca maritima, sunt littoralia, insulæ, terræ continentes, campestræ, sunt pratenses, sunt tractus sylvestres. Hic nudæ, illic arboribus proceris obsitæ regiones, nunc siccæ & aridæ fontium aquarumque penuria laborantes, nunc humidæ & paludosæ inveniuntur. Ibi rursus demisso humilique loco, aut plano atque æquali, alibi elato locata loca, atque collibus montibusque insurgentibus interdistinctis spectabis. Hæc regio loca conclusa, alia patentia, hæc aprica, alia umbrosa monstrat. Hæc violento æstu torrentur terræ spatia immo exuruntur, alia aspero constringuntur frigore. Hæc ventis secundis illa adversis afflantur, & rarius alia aliis frequentius procellis exagitantur, atque non raro conquassantur immo pervertuntur. Hos districtus molesta non modo, sed & nociva nebula tectos, alios continua pluvia madidos videbis. Hos bono aspectu gaudentes, illos malo exosos, ac Scolon Asopiæ pressos experieris. Hos lætus irradiat Phœbus, alios cimberia obscurat densa caligo & monstrat Aphannas. Hic Arabiam felicem, odoribus suavissimis spirantem, illic Judæam Asphaltiten foetentem videbis. In hoc grato & amabili hilarique vultu, bono & sano, in alio foedo, squalido, exsucco elumbique & tristi incedunt facie habituque conspicui. Hos exhilarant claræ profluentes aquæ, illos adverso stagna inquinant halitu. Hæc grato humus salubrique cibo & potu pascit alma mater incolæ, alia contristat, immo necat iniqua noverca. Verum non omnes terrarum adeo diversas conditiones, non earum tractus omnes peragrarè & enarrare longius, sed jam optimos tantum celebrare nobis constitutum est. In his & circa hos commoremur ergo paululum, quia optimi sunt,

&

& corpus & animum recreant, & sanitatem vitamque concedunt, conservant, & augent.

§. II. Omnium autem optimus ad valetudinem, vitam, sanitatem & integritatem hominum, qua nihil exoptatius feliciusque iis in his terris Deus Ter Optimus Maximus dedit, maxime accommodatus est situs positusque acclivis, altus atque elatus, qualem habent regiones & tractus montosi quibus humus superbit supra alios porrecti, a quo regionum salubritas maxima ex parte dependet, cujus conditio talis est, ut non facile alia aliorum locorum eam superet immo æquet, quas alibi sparsim, hic junctim reperies, omnes salubritatis causas, quæ perennem salutem apportant & morboniæ locum esse non facile patiuntur, quoniam ibi singula quæ arctissimum inter se commercium habent, cœlum, aër, aqua, terra subterranea, arbores, plantæ, herbæ, flores, vegetabilia & animalia, quæ ibi crescunt & educuntur & quæ in alimentum dein inhabitantibus cedunt, quæque alias in ejusmodi scrutinio, in considerationem veniunt, in commune quasi bonum atque emolumentum monticolarum amice conspirant. Licet & oppida & pagi quidam in vallibus jaceant, solum tamen ibi est satis solidum ac exsiccatum fœdisque exhalationibus expers, cum palam sit, valles montium planitie esse altiores. Quia vero non eadem ubique potentissimi solis, non aëris & ventorum est vis, cum etiam multifaria dentur, quæ eam mutant & alterant, debilitant, minuunt, ac impediunt & quæ etiam effluvia sua a toto evoluta ipsi immittunt, quæ dein in eo tanquam vehiculo afferuntur ac ingeruntur. In qua consideratione circumstantia atque interjecta inprimis adducuntur. Ex quo v. gr. etiam est, quod quibusdam in locis & saluberrimus ventus non æque conducat. Sic refertur ab autoribus, in Hispania, excepta sola Murcia, orientalem ventum, nobis Germanis alias optimum, plerumque esse incommodum ac Judæis septentrionalem fuisse infensum. Ideo etiam situs montium felicitas perficitur, si circa mediocritatem subsistant habitabiles montes & quibus undique conceditur liber aëris atque ventorum aditus, qui valles, arenosas aridas habent subjectas, ut eo nomine præsertim v. gr. celebres sunt montes Barbariam cingentes, qui non aliis majoribus circumpositis sunt præpediti, si meridiem versus & occidentem eminentes montes & saltus editiores habent, qui frigidiorum siccioremque auram efficiunt & eorum impetum cohibent, intercipiunt, non transmittunt tanquam forti vallo opposito. Licet etiam ipsi non adeo hic noceant etiam si liberius appellant, quia jam temperatur immo impeditur, cohibetur multum eorum vis per ipsorum

P

locorum

locorum montanorum aliorumque v. gr. sylvarum &c. conditionem atque affectiones & si rursus ab oriente & septentrione spirantes ventos frigidos & siccos, declivis positus admittit &c. Limitatur autem ea fateor & ut nihil dissimulem, si montes ad austrum vergunt, si valles subjacent humidæ & paludosæ, vapores frequenter & nebulas immittentes, adeoque ærem humidiores reddentes, si aliquo in loco angustus tantum aditus pateat ventis, qui ob angustiam ibi loci cum impetu irruant, nimium fortiusque ferunt, turbant & exsiccant &c. Ad ulteriorem hujus rei descriptionem referamus locum apud DIETERICVM in *Fatroo* p. m. 1412: *Urbes in montibus apertioribus, quas aer ferit vehementior, salubriores merito habentur, sed si montes montibus, collesque collibus jungantur per flexuosa intervalla obscurarum vallium, sæpe mephitis exhalationum, urbes incommodat, ut insalubriores sunt civitatibus, quæ in declivibus vallibus ipso in luto jacent.* Apposite hoc contentione urbium Hassiacarum, Marpurgensis & Gieffensis ex D. Dan. Horstii manu ductione potest monstrari scribentis testisque esse possum; ipse ego utrarumque urbium incola pluries infestatum fuisse montanum Marpurgum morbis pestilentibus, quam depressam situ Gieffam. Sæpius febricitat septicollis Roma quam *ὀρεσὶν* Heidelbergæ. In hanc quoque rem non intempestivum hic erit referre, quod HIPPOCRATES habet de *Diatæta* L. II. vicinos nempe montes semper efficere, ut venti sint, illinc spirantes parum salubres, verba sunt sequentia: *Quibus in locis aquilones montes vergunt, in his aquilones perturbationes & morbos pariunt, ac rursus: Quicumque venti relictis montibus ad urbes accedunt, non solum siccant, sed etiam turbant spiritum, quem inspiramus & corpora hominum morbosa faciunt.* Equidem alias communi veluti ore in sanitatis longævitatique atque staturæ magnitudinis, consideratione, vita in antris atque speluncis prævita in montibus magis adhuc est æstimata atque prælata, quod antro Epimenidis quondam indicare voluerunt. Ast si omnes conditiones spectare vellemus anceps adhuc judicium esset, cui hæc gloria potiori jure esset tribuenda, de quo autem jam non longius erimus solliciti.

§. III. Etenim depressa, demissa, declivia, humiliaque, collibus montibusque eminus magis circumsepta & concava loca multa scatent forditie, humiditates immixtas copiosiores colligunt a vicinis affluentes & inundationibus fluminum præterlabentium inundantur, & pene suffocantur, pluviis sæpe maleolentibus humectantur, paludibus foedis confœdantur, densis insectorum examinibus molestantur, putridis exin effluviis conspurcantur pessime & corrumpuntur, ventorum liberum aditum & solis radiorum necessarium accessum & ventilationem excludunt, unde

unde ventis vacant, exhalationes ejiciendas concludunt & retinent; unde aër humiditatibus, impuritatibus ac tepore noxio & crassitie imbutur ac vappidus fit, adeoque insalubris, qui talem indolem corporibus quæ ambit communicat & ingerit, ac elaterem vividum fibrarum omnium infrangit atque inertem reddit, unde segnior atque impeditior fit transpiratio, excrementitiæ salino-sulphureæ fordes intus retinentur, quæ pessimam sanguini & humoribus inducunt intemperiem, quæ matrem multarum earumque gravium ægritudinum, fœcundam se præbet. Et hinc morbis varii generis, pessimæ notæ, malignis, febribus intermittentibus, irregularibus, cachexia, hydrope, œdematibus in pedibus, scorbuto, asthmate variis exulcerationibus, sanguinis egestionibus debitis salutaribus per menses & hæmorrhoides imminutis, scabie, immo morborum principe peste, afficiuntur incolæ. Rursus aperta, plana, æqualis, campestris, atque pratensis regio incommoda magis ob calorem æstate majorem ægre ferendum, (quoniam aut nimis exposita est radiis solis aut illorum geminatorum & reciprocatorum repercussioni, locis ita dispositis,) virium & vitæ prædatorem, habetur. Si qui etiam venti perflant, non adeo temperant eum, aut alia ratione adeo notabile emolumentum afferunt, quia magis sunt languidi, tepidi & vaporosi. Ea propter nives non raro in montium fastigiis per æstatem citius vero colliquatas ad radices & in demissioribus locis videbis. Unde febres & morbi continui, acuti, ardentes, diarrhœæ, dysenterix, cholæræ, iliaca passio, hæmorrhagiæ effrenes &c. ibi frequentius reperiuntur. De pratensibus regionibus speciatim bene monet experientissimus RAMAZZINVS *de Morb. artif. cap. XL.* quod eæ non satis sint salubres & varios morbos recenset eorum, qui circa prata habitant, ac legem adducit, vi cujus prohiberi possit, ne vicinus agrum suum pratum faciat, de qua lege Icti judicent. Conferatur & ZACHIAS *Q. M. L. Lib. V. Tit. IV. n. 14.* De aliis terrarum & regionum conditionibus non plura jam afferamus, in sequentibus simul forte tradendas.

§. IV. Salubritatis atque longævitalis causa est primario & proxime aër, communis ille sanitatis vitæ pariter & morborum mortisque faber, autor & dominus, cujus plena sunt omnia, plenumque corpus humanum. Huic tantum tribuit antiquitas, ob effectus præstantissimos, ut divinitatis illum nomine insigniverit eundemque Diogenes Apollinaris Deum appellare non dubitaverit. Nihil enim in tota rerum natura invenitur, quod præter animi pathemata & sic dicta venena, tam subitam tamque fortem mutationem, motibus & functionibus in corpore nostro efficiat,

efficiat, quam aër mutatus, quoniam & maxima ejus necessitas est, adeo, ut ne per momentum quidem eo carere possimus & qui omnia ambit omniaque pervagatur, etiam intimos recessus non intactos relinquit, sic etiam indefinenter per adeo multos patulos poros inter respirandum deglutiendumque maxime etiam cum cibo & potu, quos assumimus, ad corporis interiora pertransit, atque tenuia ac sensibus vix perceptibilia effluvia, quæ cum aëre feruntur, ac cum eo sive conducibilia sive noxia promiscue etiam in intima penetralia ingeruntur, cujus rei testimonium addit experimentum illud, per quod sulphur vulgare & antimonium in spiritum fumantem redigitur adeo penetrantem, ut argentum in cistis ligneis asservatum, undique bene obturatis & clausis tectisque, fusco colore imbuat, aut si quando mercurium inunctum, omnes partes pervadere, aut cantharides in emplastro in meatibus urinariis, dolores excitare experimur, quod BOYLE primum est expertus, *Tr. de subtil. effluv.* Permagis ideo, (quoniam humorum motum afficit & mixturam alterat,) ad hominum sanitatem & incolumitatem conservandam interest, quali fruantur aëre: puro, sereno, tenui salubri valent diu, impuro, corrupto crassoque minus convenienti languent, ægrotant ac citius moriuntur. Aër vero omnium saluberrimus est, qui crassis, vappidis, humidis, foetidis, putridis, acribus, verbo, minus convenientibus particulis expers est, sed purus, simplex, serenus, satis fluidus & elasticus, temperatus bene, vel ut HIPPOCRATES *Lib. I. de Diet. §. 8.* loquitur, qui ignis & aquæ habet temperamentum, qui crassiusculum aërem in sedatas pluvias dissolvit, qui tenuis, ficcus, laudabilibus effluviis, sale quodam volatili, in quo ut ait ROBERTVS *de fluctibus Cap. V. Lib. I. de Urom.* sinceri delitescunt & resident vivifici cœlorum influxus, turgidus atque gravis, suaveolentibus, spiritus recreantibus imprægnatus, frigidiusculus, paulo gravis pauloque sic gravis ac stringens, elasticus & liber est. Æstas, regnante aëre tenui, & sereno, sicco ac hyems frigido, gravi, elastico magis siccoque aëre prædita præ vere & autumnio nebuloso, nubiloso, humido, pluvioso, saluberrima tempora sunt. Eo facilior ejus vis ac actio est, quo liberi accessu ad loca conceditur, ut corpora quævis libere permeare & afficere jugiter possit. Ejusmodi aër intra corporis penetralia admissus, humoribus immixtus, imprimis respiratione intra pulmones receptus calore, tenuitate, gravitate, & elasticitate, humores molliter expandit, eosque & simul partes solidas optime movet, illorum progressum harumque actionem adauget, sanguinem circulantem per eas urget, propellit, promovet ad cor, tanquam fontem alioquin languescentem & emoriturum.

rum. Atque aer juxta vim suam hanc elasticam & gravitate, qua pollet, & simplicissimo & agilissimo ætheris elemento, quod vehit, ut & multis effluviis accessoriis, quæ suo ambitu detinet & solidas, quæ filamentis sunt contextæ, quæ premi se patiuntur iterumque resistunt, magis minusque pro varia textura & structura, roboris conditione afficit ac premit, eoque elasticam & expansivam vim in sanguine quasi in æquilibrio servat, ut nifus & renifus utrarumque æquabilis sit.

§. V. Ejusmodi, qui nimirum allatas jam possidet dotes, præ aliis est aer montanus & ideo totus vitalis, aerem benignum semper recensans & sic volatilisationem cruoris humani summopere juvans. Quoniam enim montes & loca, urbès, oppida, pagi, ædificia quæ iis sunt superadstructa vel in summitatibus atque jugis illorum, vel ad latera sæpius atque & circa eos locata eminentiorem obtinent situm, a terrarum coluvie recedentem, per quem aeris liber accessus ad ea, nullo interjecto obstaculo patet, meat ac permeat ea, ac afflat. His enim in locis lenis semper, sæpius validus spirat ventus, qualem etiam ordinario loca maritima præsertim Anglia sentiunt, qui atmosphæram optime ventilat, & effluvia impura & nociua fortè eo delata, agitantur, ventilantur, disjiciuntur ac extruduntur. Per eundem & temperatus bene minus deprædatorius, qui omnibus convenit, ibi aer est apte gravis atque non nimis calidus verno alias tempori similis; siquidem & æstiosa æstate ipsa aëris ventilatione fervor suaviter lenitur & adhuc copiosis etesiis aliisque a liquefacta copiosa nive refrigerantibus gaudet, qui immodice æstuantibus solatio ac refrigerio sunt; Aprica etiam sunt, ut sol illustrare ea ac motu suo aërem movere magis possit, is purpurante statim auro-ra & vesperscente cœlo bis de die lustrat ea, quæ præ aliis patent tota, aëremque mox nunc tepidum reddit, nunc fuligines dissipat nocturnas. Purus hinc est, serenus, siccus, sudus & tenuis, elasticus. Ea enim montium conditio est, ut pro vario positu situque utilissimam illam aëris commotionem nunc producant iidem nunc augeant nunc omnino repellant atque ab eorum vi forte nociva, qui subjacent loca, defendant atque vel sola umbra obtegant simulque a caloris nimio, magno sanitatis & longævitatatis emolumento, præmuniant. Pluvia quidem debite & frequenter rigantur loca montana, sed ea non remanet diutius, & defluit. Frequentius rore recreantur, in quo saccharum dulcissimum & occultum optimum vitæ cibum & naturæ nostræ gratissimum latere dixit HELMONTIVS *Tr. imag. ferm. p. 33.* Is ut legere est *Oper. p. 743.* de se ipso scribit quod aliquando uno mane in Alpibus tantam suavitatem

aëris inspirati sentierit, quem ante vel post tota vita nunquam. Effluvia crassa, graviora ob ponderositatem & humida, palustria, foetentia, putrida, contagiosa, adeoque nociva, rarissime ruunt in altum atque eo usque non facile ascendunt, neque etiam cum aliis, qui in superiori magis aëris regione, volitant, connubium possunt inire, sique quædam adscendunt per motum aëris liberiolem ac fortiolem omnia dissipantur, ut non diu inhærere possint, hinc & pestis aliique morbi contagiosi non facile ad elata loca perveniunt. Datur enim certis finibus (nempe usque dum ad illam propulsa sint aëris regionem, quæ cum iisdem æquali gaudeat gravitate) tantum coercitum eorum pondus & motus, ut ultra non ferantur, quemadmodum videmus fumum in auras ascendentem sensim evanescere; aëris enim superioris major moles incumbit & inferiorem aërem coarctat, & si hanc rem exacta æstimatione metimur, comperimus, vapores singulos vix ultra dimidium milliare germanicum ascendere; quamvis alii perhibeant eos ad quatuor (milliaria) in altum ruere. Hinc in maximis & summis montium quorundam jugis, ut de Olympo Thessaliæ, multum Aristotele, alii de aliis, ut Atho Macedoniæ, Atlante Africæ, Pico Tenariffæ, Monte Veneris in agro Patavino, Periacaco Americæ, &c. narrant, ob nimiam aëris tenuitatem, subtilitatem & siccitatem, quæ neque ad respirationem animalium (quatenus cellulas pulmonales non satis expandit, sed hinc inde collapsas eas relinquit molesto anhelitu, traiectione per eos sic impedita) neque ad sanitatem & vitam apta est, æquilibrio sublato aereo, sive æquali, aeris resistentia spiritum trahere adscendentes nequeunt, nisi humidas spongas ante os teneant. Historiæ referunt, per excelsa aliquorum Americæ montium cacumina peregrinantes, repente una cum equis, ob hanc causam exspirasse, si fides habenda; ego quidem adeo exsiccatum ac tenuem aerem etiam in excelsissimis montium cacuminibus nondum mihi concipere possum, ut partibus ad vitam sustendendam dicatis prorsus careat, quamvis lubens concedam, quod ibi venti ac imbres nulli observentur. Hoc eo facilius mihi patior persuaderi, quod expertus est Josephus a Costa, qui, referente BOYLEO *Nov. Exper. Phys. Mechan. p. m. 137.* Tenariffæ montis apices, altos Peruvix montes illorumque imo totius terrarum orbis editissimum Pericacum, transiens, una cum sociis vomitu violento & sanguineo est correptus, non nisi iterum aeris mutatione compescendo, qui tamen spongiis madidis non opus habuit, sed sine iis hos altissimos montes ascendendo superavit. De Madrito idem referunt, ibi adeo subtilem & tenuem esse aerem, sanitati & vitæ incolarum nocentem,

tem, ut, ad corrigendum hunc & crassiores reddendum, varias scæculentias crassas in plateas conjiciendi, summo statim mane, necesse habeant, quæ vero a meridie exsiccantur immo absumuntur in halitus atomosque resolutæ. Ubi enim levior justo aer est, improporionatus animalibus est, siquidem æther se expandit nimium, necessaria pressione ab extra negata, in superficie corporum, unde internus aer majori nisu ac vi sese expandit, vasa ampliat simulque renitentiam debitam eorum notabiliter minuit & sanguinem, humores & spiritus præter modum rarefacit, ex qua rarefactione atque expansione non modo cutis intumescit rubet ac humescit sed & vasa præter modum distenduntur & disrumpuntur, ut contenti liquores profiliant, Hinc ejusmodi varii morbi & symptomata proveniunt, hæmorrhagiæ, hæmoptyses, febres continuæ, ardentes, scorbutus calidus, quem vocant (ob salia in sanguine hærentia ab efferato æthere acuata) dolores variarum partium capitis, imprimis (ob distenta subtilia vasa dentium, artuum epilepsia, (ex acrimoniæ volatilis in subtilissimas & summe sensibiles nerveas, fibras & nervos impetu irruente & vellicatione.) convulsiones, vertigo, vigiliæ involuntariæ, syncopæ, cholera, inflammationes, bubones, carbunculi, sudores colliquativi, diarrhœæ dysenterici, exanthemata cutis, petechiæ aliæque plura ejusmodi mala. Nec ut ad prius paulisper iterum redeamus, loca elata, a præterfluentibus fluviis aquarum inundationes adeo nocivas, putridas atque malignas ejusmodi partes, vermium copiosissimum proventum ac insectorum densam colluviem &c. uberrime atmosphæræ ingerentes, patiuntur. Cum & frigidior in locis montosis semper sit aer, elasticus magis est, quod jam ad liquidum satis perductum existimamus, cumque per eluitionem validiorem ex alto aquarum loca subjacentia non modo repurgata atque nitida, sed & sicciora adeoque salubriora reddantur. Vel ex his jam liquido constat, ejusmodi aerem omnes in corpore actiones integras conservare atque augere, i. e. sanitatem & salubritatem corpori & integritatem menti, sua salubritate impertiri; vitia vero contracta emendare, sic LEONH. FIOROVANTVS II. P. *Aphorism.* notat, quod læsiones atque ulcera crurum montosis in locis facilius citiusque sanentur, quam in planis atque campestribus ob frigidiusculum ac sicciorem aerem. Nec vana hinc ratione existimant, qui vel conjectura JOSEPHI. *Antiquit. Jud. I. Cap. V.* ducti, homines a diluvio primum regiones elatas atque montanas, tam ob commoditatem & amœnitatem quam salubritatem inhabitasse, usque dum eorum multitudine aucta circumjecta demissa loca quærenda adacti fuerint ob eandem rationem

tionem notatur ut PLVTARCHVS habet *Quæst. Roman. p. m. 216* templa olim non nisi locis excelsis quibus luci erant iuncti, maioris salubritatis orantium causa, fuisse exstructa. Illustris BACO de VERVLAMIO *Hist. Vit. & mort. p. 536.* hinc proximam vitæ longævæ in antris atque speluncis vitam, in montibus merito ponit.

§. VI. Plures montosis in locis dantur causæ salubres, quæ partim ipsam aeris salubritatem augent, partim alio modo reliquas salubris diætæ partes explent atque constituunt. Rectissime RHASIS monuit *L. I. de Reg. princ. C. II.* nihil esse præter aeris puritatem magis pertinens ad sanitatem, aquarum salubritate. Proxima itaque modo aquæ, quæ in montosis tractibus per tot mæandros & canales occultorum fluviorum scaturit, provolvitur, manat atque hauritur, consideratio fit, quæ & facile in aerem transit evecta atque resoluta, ac ad potum & cibum incoquendum adhibetur, quam & quotidie assumimus & cuius usus ad nutritionem, sanitatem ac vitam conservandam adeo necessarius est, quoniam per eam intime varia ac diversa sanguinem & nutritionem constituentia corpuscula miscentur, nec non modo nutritionis, augmentationis, sed & excretionis omnis, utilissimum negotium instituitur atque omnis humorum motus vitalis perficitur; quare interest multum, qualis sit ea. Hæc ex fontibus ipsis & scaturiginibus, quarum aquas, quas montes acceperunt, prius transcolatas, temperatas, depuratas (quo diutius enim & longius atque profundius per puræ magis terræ poros ejusdemque ingenti pervagatæ tractu, descendunt, & a particulis fixioribus, crassioribus, limosis mediante filtratione, liberantur & defæcantur, eo puriores redduntur) & bene quasi digestas & coctas motuque celeri ac valido, per silices arenam puram, saxa rupesque provolutas præcipientesque actas atque allissas adeoque attenuatas levesque reddunt & tribuunt quæ aliis tribuunt, ut dicitur, melius dulciusque hauritur. Hæ enim ibi copiosissimæ sunt & confluunt, ut rudimenta & incrementa unice dent ac addant largissime, quæ deinceps satis sunt multas amplissimas regiones easque disfitas irrigando. Ejusmodi rei testimonium jam affert ORIBASIVS *Lib. Collect. Mat. Cap. VIII.* sequentibus verbis: *Colles & montes, ad bonas aquas eruendandas, potiores sunt humiliore & planiore solo, nam & puriores, & tenuiores dulcedineque suaviores aquas emittunt.* Hæc certe optimas notas, quæ alias requiruntur, possidet uberrime, aqua montana; v. g. cito calefit, cito evaporatur, solis aut ignis calore citoque refrigeratur &c. Ex locis altis, saxosis, glareosis magna promanans in copia, liberiori aeri exposita manet & eximias dotes secum affert hominibusque offert gratis ad usum.

Hæ

Hæ pellucidæ, gelidæ, leves, tennes, subtiles, dulces, claræ, limpidæ, crySTALLINÆ, argenteæ (ut Apulejus effert) & vel in media æstate gelidæ, visui gustuique pariter gratæ, amœno fluctu prorumpentes undæ, non possunt esse non laudabiles, quibus meliores & jucundiores Cydnus, Melas, Hales, Gorthynius, Choaspes Susam præterfluens Conf. HERODOTVS *Lib. I. Cap. CXXXIX. p. 76.* Eulæus, Alpheus adeo ob id decantati fluvii vid. PLIN. *Lib. VI. C. XXVII. L. XXXI. C. II.* SOLINVS *L. LI.* aut aquæductus ex Tiburtinis montibus in urbem Romam aquas Marcias dictas Conf. TIBVLLVS *Lib. III. Eleg. VI. v. 58.* S. JVL. FRONTINVS *de Aquæduct. Rom. & JOH. POLENI in eum Comment. p. 162.* ut & RAPHAEL FABRETTVS *de Aquis & Aquæduct. Veteris Romæ Diff. II. p. 109.* vix vehant, atque aquæ destillatæ alias chemica arte aut pluviali, quæ secundum Hippocratis testimonium lib. de aere, aquis & locis, optima ob dulcedinem, levitatem subtilitatem & putritatem, est æquiparandæ. Etenim aquæ de terra quam perfluunt indolem & gustum assument & referunt. Ejusmodi aqua adhibita maximopere refocillat ac recreat, nullos in ventre flatus & tormina excitat, ventriculum magnis haustibus etiam pota non gravat & debilitat, facile per omnes vias distribuitur atque per vasa lactea in massam sanguineam & per minutissima etiam vascula transit, transpirationem & urinam provocat, alvum lubricat, appetitum excitat, bene digerit & dividit, solvit etiam in subtilissimis canaliculis hærentes humores, qui impedimento sunt, pituitosos, lentos, crassos, obstruentes aut constringentes & acres vellicantes temperat ac edulcorat eosque per sua emunctoria simul educit, facile transit & calculum imprimis & arthritidem, lienum intumescencias, passionem hypochondriacam & iliacam imprimis præcavet. Si dein in integros fluvios confluunt, (siquidem omnes fere majores amnes ex magnis montium jugeribus ortum suum trahunt Albis, Nissa ex monte Giganteo, Rhenus ex Alpibus, ex Suevicis jugis Danubius, ex Pinifero M. Moenus, Egra, Sala, Nabus &c.) ac exinde colliguntur rivuli atque torrentes, qui vel in media æstate non tepescunt ac media hyeme non congelantur, aërem & atmosphæram, undarum motu excitato, ex præcipiti, per arenarias vias profluentes faxeosque scopulos alluentes, agitant, placido & leni vento exinde enato. Eæ vero undæ, quæ per campestris & planas, lutosas terras manant, lento gradu procedunt, aquam trahunt turbidam, impuram, salisam, crassam & male olentem. Quemadmodum etiam aquæ ex vivis montium fontibus fluentes fortiori cursu actæ prolabentes molarum fortius movent rotas, quam quæ lentæ, constrictæ quasi paludibus

& impuritate cœnosaque putredine impeditæ difficiliter moventur difficiliusque movent. Audiamus de his CARDANVM L. III. *contrad. Flumina velociter currentia aërem attenuant faciuntque corpora tenuia, macilenta, mobilia &c. cœnosa vero & quæ tarde moventur, ut Phasis & Padus, corpora minus valida reddunt & sana. Quoniam aër aquarum attenuatis & sursum elatis vaporibus alitur atque augetur & humectatur, infrigidatur atque sic ardentissimus solis æstus æstate temperatur commode simul alia peregrina effluvia & noxia, acria maligna fiunt, immutantur, dejiciuntur & sic atmosphæra quoque depuratur in magnum emolumentum movent, ventilant atque attenuant egregie.* Præter harum aquarum salubrium dotes, quæ in potu, ut & dein in cerevisiis ex illis paratis atque in coctis cibis ut & parandis medicaminibus præbentur, & hæc est, quod in victu concedant pisces omnium saluberri- mos faxatiles ob carnem sapidissimam, suaviorem, firmiorem, duriusculam, minus viscidam quam afferunt cocti, truttæ, funduli &c. qui in locis saltem montosis habentur, siquidem & alii, v. g. lucii, carpiones, percæ &c. quæ in his aquis capiuntur, ob id præferendi sunt iis, qui in piscinis, stagnis, fluminibus cœnosis, tepidis, turbidis, quæ in planis regionibus & humidis ut plurimum visuntur, sunt enutriti, hi enim præbent nutrimentum magis viscidum & crassum. Hoc GALENVS testatur III. *de Aliment. Cap. XXX.* In Tyberi pisces pravos ali: Quemadmodum enim ubi lucidior est & purior aër, ibidem homines & cætera animalia, inculcata magis valetudine fruuntur, pari quoque ratione, quo aqua purior erit ac melior, eo pisces suaviores magisque probati erunt. Idem dicendum de fluviatilibus cancris, qui delicatissimi ibi sunt, quos vel Aesopus vid BODINVS in *Theatro n. 1. pag. 3.* meliores non optaret sibi. Illustrat hæc WILH. PISO *Hist. N. & Med. Brasil. L. I.* longævitatatis & incolumitatis causas aquæ adscribens sequentibus: *Dum aër, olea, fructus, animalium carnes, aquarum naturam sequuntur, per continuam generationem eo deveniunt, ut hominum temperies fere sit qualis aquarum.* Verbo: aqua ex montibus scaturiens omnibus aliis præferenda.

§. VII. Juxta aquas, quæ, sive ex communibus ubique fontibus & puteis hauriuntur, sive ex scaturiginibus per torrentes & rivulos promanant; aliæ quoque singulares aquariæ dotes hinc inde montosis in tractibus, magno Dei T. O. M. beneficio, innumeræ non raro reperiuntur, quæ licet simplicem aquam referant, singulari tamen tenuitate, spirituositate, puritate & claritate se commendant. Hinc tales in vitrum aquæ effusæ, bullulas multas emittunt. Rursus alibi profiliunt fontes salutares, qui notabilius magis vi medicata, majorive ingredientium nume.

numero & pondere præditi, ut vitrioli, sulphuris, aluminis, falis &c. hominum infirmitatibus medentur; quales aliquot recensentur in Silesia reperiendi in *dissertatione Præsidis de Silesiæ salubritate* §. 13. alios alibi plures ejusmodi in locis invenies. Notiores acidulæ sunt, ex quibus in nostris regionibus celebritatem imprimis acquisiverunt, Schwalbacenses, Egranæ, Selzenses, Tincsteinenses, Wildungenses, Pyrmon-tanæ, Spaadanæ, in Silesia in Pago Altwasser ut & Giren, Tau-hausen, profluentes &c. quibus etiam accensetur fons in vicinia nostra Lauchstetensis. Ejusmodi in variis tractibus montosis ex superfluo Dei beneficio, numerosi maxime habentur, quæ vero, ob eorum frequentiam & multitudinem, vix æstimantur, siquidem in genere hoc tenendum est: dato aliquo in loco uno fonte tali, aut acidulas aut thermalem aquam concedente, circa hanc regionem dari quoque alios multos si-miles, licet quandoque viribus inferiores. Sic circa thermas Carolinas spatio V. milliarium plus quam CC. fontes aciduli numerantur, licet vel incolis saltem III. vel IV. noti sint, qui in usum vocantur. Notif-simi sunt thermales fontes, quales in Germania nostra celebratissimi sunt Carolini, Teplicenses, Hirschbergenses, Emsenses, quos præsertim non immerito cum GREG. NAZIANZENO *Dei gratuita munera appella-veris pauperibus æque ac divitibus libera, qui omnem artem humanam in sanan-dis morbis longe superant*, Divina plane præstantes. Sunt vero isti offi-cina, quibus alma natura ipsa medicinam facit, & artis suæ majestatem infinitis miraculis confirmat, quanta beneficia istis aquis, putas, debe-mus? abdito tam stupendo naturæ miraculo. Hi omnes salutares fon-tes ex montosis locis proveniunt, adeo vix tales in planis reperies.

§. VIII. Aestimato aere & aqua, in ejusmodi scrutinio utique & terræ observatio necessaria est, quia exterior ejus cortex variis exhala-tionibus imprægnatus, succisque diversis distemperatus sic ambos afficit, atque de indole propria participes, facit. Mirum sane est, quam multifaria atque diversa natura atque indoles soli & terræ sit, quod ex odore, colore, consistentia, textura, porositate, rarita-te, crassitie & ex multis experimentis in destillatione aliisque chymicæ processibus ac mechanicis laboribus obviis probari potest & in ipsis ve-getabilibus, quæ nutrit, se exerit. Terra vero montosis in locis, quo-niam hi vertices, solis radiis ventisque expositi sunt exsiccantibus, im-bres percolat, transmittit, atque tantum intra se succi vice continet eos, ut plurimum, sicca, macra, arenosa, saxosa, fabulosa & argillosa, rarif-sime lutosa & viscida; nunquam vero humida præter modum est. Hu-

miditates enim omnes defluunt & in locis declivibus, humilioribus & planis, bibulis, potius colliguntur. Quinimo differentia vel odore colligi potest. Recens enim gleba eruta ex terra montana, odorem suavem acidulum reficientem & confortantem, cujus commendatio magna apud BAGLIVIVM in *Op.* p. 387. & FERRAND IMPERAT. *Hist. Nat. Lib. XIII.* p. 289. extat; naribus admota, spirat, de quo etiam Aegyptiaca humus imprimis commendatur. vid. ORIBASIVS *Collect. C. XVII.* confer. & BACO DE VERVLAMIO *H. N. cent. X. pag. 954.* ex terra vero pinguiori, molliori & uliginosa, qualis est pratenfis atque campestris desumptum frustulum terræ, gravem atque adversum magis redolet odorem. Hyeme speciatim solum montanum diuturnibus nivibus est opertum quæ velut pelles, calorem ejus foveant ac quasi fermentant fertilitatemque promovent. Nec nebulis ideo crassis perpetuisque obnubilatur, tegitur atque sensibilibus male afficitur. Nec silenda hic sunt, quæ ex terra eruuntur, inter quæ juxta metalla terras sigillatas salia, quibus secundum illud tritum: sole & sale nihil utilius, saltem adduxisse sufficiat.

§. IX. Cum & inter signa regionis præstantiam declarantia sit illud, si fata in copia, eaque majora proveniant sique boni saporis sint, diuque durent, atque herbæ ibidem plures, boni odoris & absint venenatæ & tetri odoris plantæ, si fructus magni, suaves & minime corruptioni obnoxii succrescant, iam de herbis, plantis, oleribus, fruticibus & arboribus, floribus, fructibus, vinis &c. omnis generis laudatissimis, quos humus montana profert, quosque planities non ostendit quique meliores præstantiores præ aliis censentur seorsim mentio fiat atque laudatio, præ aliis modo commonefaciendo, aerem montanum utpote purum, subtilem & vegetum cum succo vegetabilium nutritio ex terra ejusmodi quam optimam jam nominavimus, proveniente, adeoque per se etiam bono ac bene digesto, se intime miscere atque insinuare, ipsique majorem subtilitatem atque energiam conciliare eaque magis salubria reddere. Conf. modo laudatus FERRANDVS IMPERATVS *Hist. Nat. Lib. VIII. Cap. XII.* p. 284. LEV. LEMNIVS in *O. N. M. P. II. Lib. VI. Cap. XIX.* ut alios taceam, qui de ejusmodi rebus testantur. Sic e. gr. Senna quæ in Britannia succrescit Alexandrinæ admodum dissimilis est, sicque montium Helvetiæ juga quædam vinum exhibent ad Hispanici naturam accedens sed capiti vehementer infestum, cum montium istorum viscera sulphure abundant. vid. ROB. BOYLE in *Tent. physiol. p. m. 33.* Atque quemadmodum ordinario montosa vallibus interdistincta loca opacarum sylvarum admodum feracia sunt, quoniam alimenti copiam habent uberri-

mam

nam, quod ex aquarum scaturiginibus, imbrium frequentia, & nivium ubertate sensim liquefcentium atque defluentium, per poros terræ hinc inde adducitur, ita patet imprimis, eam non abundare modo, sed & esse prodigam, ut plurimum herbis, plantis fruticibus, arboribus gummosis, resinosis, balsamicis, antiscorbuticis, quales sunt abies imprimis, fagus, pinus, betula, Cedrus, larix, cornus, carpinus, castanea, aquifolia, quæ loca præsertim montana & siccas arenosasque amant terras, quod salutare principium nec bruma sæviens vix potest auferre, unde & hyeme illud possidentes comam alunt, nec diverso colore eam mutant, sed perpetua viriditate superbiunt eæque magis piceæ & resinosæ sunt quæ in montosis locis succrescunt. Hæ arbores etiam præter ordinario effluvia vernali interdum tempore pulverem sulphureum, citrinum proficuum fumant, ut pluvia mixtus. pluviam sulphuream referat, aut terra lutea pluuisse videatur. De quo alias videndus KRVGNERVS in *Chymischen Tannen-Baum*. AGRICOLA *Lib. de Ort. Subterr. Lib. V. p. 552.* Clariss. J. J. SCHEVCHZERVS *Meteorol. & Oryctographia Helvet. p. 14.* Hæc quando commentor verba PLINII, quæ habet in *Præfat. Libri XXIV* mihi succurrunt: *Ne silvæ quidem horridiorque naturæ facies medicinis cavet, sacra illa parente rerum omnium nusquam non remedia disponere homini ut medicina fieret etiam solitudo ipsa.* Hæ cum aliis fruticibus, sambuco, aca-cia, junipero, herbis, ut beccabunga, nasturtio aquatico &c. plantis, fructibus, floribus odoriferis & aromaticis, non modo aspectu jucundis & optime coloratis, beneque tinctis, graminibusque bene virentibus, (a quorum egregio colore indicium salubrioris quoque regionis desumpsit ORIBASIVS IX. *Collect. C. XVII.*) suaviter fragrantibus, maximaque penetrantia præditis, angelica, serpillio, origano, carvo, hormino, liliis convall. pulegio, polio montano, caryophyllo montano, chamæd. millefol. tanaceto, stœch. citrina viola &c. quorum ibi magnus est proven-tus, quam vel Colchidis regiones, Hammoniusque saltus majorem monstra-rent, juxta comam illam lapidibus adhærentem, moschi & violarum odorem fragrantem referentem, (quales lapides hinc inde montosis in copia inveniuntur, ut & de Silesiæ ejusmodi oris nobis constat,) ad va-letudinem tuendam, saltem in ipso loco natali succrescentia ac radices figentia, proficua vegetabilia sunt, quoniam effluvia continuo grata, sua-veolentia, salubria, energetica, aeri immittunt, atmosphæramque replent & meliorem reddunt, attenuant &c. atque animalibus, quæ spiritibus robur addunt, blandum massæ sanguineæ, motum concitant, viscidita-tem corrigunt, incidunt, attenuant, spiritualescentiam promovent, ut

fic in cerebro, volatiles particulæ, majori in copia possint secerni. Ob hæc etiam pura & suavia effluvia, quæ hauriunt ruricolæ, imprimis saniores, vegetiores & longæviores sunt, iis qui civitates civibus frequentes inhabitant, Confer. *WVRDIGIVS de Mod. sp. C.* Hoc nomine præcæteris Campania, Delphinatus, atque India Orientalis, celebratissimæ regiones sunt, ut & speciatim floriferus omniumque deliciarum plenus mons Nalban in Persia. Ob hanc florum fragrantiam ægros ad Tabianum montem ideo commendabilem misit *GALENVS* vid. *I. Method. 12.* Nam dicit: quoniam sponte per agros nascuntur, & agrestis lotus, bulbus, & hedera, & cythius, alique his similes frutices. Hæc vegetabilia omnia montosis in locis crescentia, ordinario longe præstantiora sunt, ut scite asserit & rationes addendo fuse explicat, multus in hoc argumento diligens & acris rerum naturalium Censor. *J. J. SCHEVCHZERVVS in den Natur-Geschichten des Schweitzer-Landes P. I. p. 64.* plantas in Helvetia majores possidere vires, iis, in Germania, Italia, Gallia, Belgio, Anglia provenientibus. Hic referatur etiam, in locis montosis, altis, siccis, rarius quam in locis planis, humidis, pinguibus, tempore imprimis vernali, (quod ut plurimum effluviorum malorum & heterogeneorum est ferax,) accedente subito solari æstu, frequenter evolvi effluvia putrida, rore caustico, & vermiculoso, fruges, herbas, plantas, & arbores inficientia earumque non modo frondes, folia, flores, gemmas, fructus, stemmatumque ipsorum fibras & tubulos erodentia, intimius se insinuando, ut marcescant & pereant, efficiunt, quod vitium rorationem carbunculationem, vermiculationem vocant. Vegetabilia ejusmodi malis tacta ab hominibus animalibusque in cibis assumpta, cardialgias enormes, tormina ventris atrocia, faucium inflammationes, febres acutas malique moris, dysenteriam, & morbos alios malignos procreant. Taceamus de aliis salutaribus montium dotibus, inter quas, non in postremis est vinorum præstantia, quæ, quo montes & vineæ in quibus crescunt vites, salubriori aëri amicæ altiores, apricæ, fabulosæ, saxosæ, aridæ sunt, eo magis æstimantur. Nec longius adducamus ea, ad victum quoque pertinentia, & quæ domi ipsis nascuntur, vitæ & sanitati admodum proficua, & familiaria monticulis opsonia, lac & præsertim caprinum quod copiosum ita quoque optimum in montosis tractibus habetur, & lacticia veteribus jam sanitati conducibilia habita, unde *OVIDIVS Fast. L. IV. v. 36.*

Lacte mero, veteres usi, memorantur, & herbis

Sponte sua, si quas terra, ferebat, ait.

Succus betulæ & serum lactis caprini pro potu fere ordinario sunt. Sic

VALVA-

VALVASOR in *Gloria Carniol. P. I. L. III. p. 254.* adducit, in Carniola (regione montosa) incolas potum ordinarium admodum salubrem ex baccis juniperi præparare. Neque denuo recenseamus eximiam virtutem, quæ ex terris maxime montosis effodiuntur, ut sunt lithanthraces, terræ medicamentosæ, sigillatæ, &c. De hac soli bonitate Helicon, Bœotiæ mons, maxime a Pausania in Bœoticis laudatur, quod ibi omnia hominibus salutifera sint, ut & serpentum virus infirmetur, atque adeo, ut si quem serpens momorderit, is ubi aliquod ejusmodi ad id medicamentum nancisci potuerit, facile periculo liberaretur.

§. X. In specie tamen hic adhuc dicamus, collinis ac montosis in tractibus omnis generis frumenta provenientia, si in granariis ad futurum usum reponantur ac asserventur, non adeo facile ac adeo cito situm contrahere, corrumpi & excedi a vermibus, atque si liquores exinde parentur, eos non adeo citius acescere ac subtiliorem dare pollinem, subtilioremque & leviolem (adeoque digestioni magis conducibilem panem,) iis, quæ in locis planis, declivibus, humidis, paludosis crescunt. Ex qua corruptione salia & sulphura peregrina, caustica, vaporosa, subtilia, volatilia contrahuntur, quæ sua virulentia nocent. Nec ibi facile inveniuntur zizaniæ illæ, veteribus jam cognitæ & descriptæ, ut ex THEOPHRASTI ERESII *Histor. plantar. Lib. VIII. Cap. V.* GALENI de *Aliment. facult. Lib. I. Cap. ult.* aliisque colligere est, quæ subinde inter avenam, hordeum, triticum & fecale frumentum nec una saltem specie succrescere solent, & quæ in locis planis & humidis frequentissime succrescunt, & de quibus Scotiæ Sabaudiaque incolæ maxime & præ aliis conqueruntur, ut lolium temulentum a Caspares Hoffmanno nominatum, & gramen loliaceum a RAYO *Hist. Plant. Lib. XXII.* descriptum, & fecale corniculare nigrum dictum. Arva plana, humilia & humida horum zizaniæ generum proventu adeo infelicia sunt, ut compertum sit, si sementum fecerint agricolæ tempore imbrifero triticum maxima ex parte in ea degenerasse, sed & eadem semina terræ sicciori acclivi, atque montanæ temporeque non nimis humido commissa, in triticum rediisse. Hæc non modo minuendo frugum proventum ruricolis detestabilia sunt, verum etiam sanitati & vitæ hominum admodum adversa atque nociva, ob sulphur enim quoddam crassum, quod possident, impurum, vaporosum & narcoticum quoque vim narcoticam possident, & venenatæ prorsus, & causticæ & vaporosæ indolis sunt, ut etiam alia ejusmodi narcotica & virosa, vegetabilia, hyoscyamum, solanum furiosum datura, opium &c. de quibus exempla varia a J. D. WEPFERO in *histor. cicut.*

cicut. aquat. petantur, quæ manducata præsertim calidâ quovis modo assumpta, cum chylo in succum quoque & sanguinem mutata atque injecta, nobilissimas corporis humani partes, nervos præsertim atque spiritus animales aggrediuntur ac lædunt, tonum illorum destruunt &c. functionesque illarum mire perturbant, pessimaque symptomata inducunt. Ex quorum uberiori miscela, si cum genuino frumento in cibis miscantur aut cerevisias (quæ pergrati quidem coloris & saporis & fortiores exinde fiunt) simul & panes ingrediantur, mox ab assumptione, nauseam, vomitum, cephalalgias vehementes, balbutiem & loquelæ totalem abolitionem, vertigines, torpores, tremores, stupores, sopores, temulentiam, (temulentum lolium ideo dictum) & non raro deliria, spasmos, convulsiones, contracturas atque incedendi brachiaque movendi impotentiam, colicas passiones, epilepsias, præcordiorum angustias, cardialgias, inquietudines, vigilias, singultus, frigidos sudores, animi deliquia, diarrhœas, dysenterias, choleram, externe ulcera maculas, & tubercula ardentia aliaque prava symptomata excitant eaque sanatu difficilia, quales observationes invenies apud GALENUM Lib. I. de aliment. Facult. c. XXXVII. in Miscell. N. G. D. II. A. VIII. obs. 173. A. III. obs. 186. an. IX. & X. obs. 93. p. 171. & Append. An. 1712. p. 48. seq. & apud SCHOCKIUM de Cerevisiis cap. XIX. SCHENCKIUM obs. med. Lib. VII. p. 133. de ven. ex plant. observ. 4. p. 880. ZAGVT. LVST. de P. med. Hist. Lib. V. Hist. 21. fol. 871. J. WIER- RVM de præst. dem. Lib. III. c. XIIIX. THEOPHRASTVM Lib. VIII. H. P. c. V. VALENTINI in diss. de Novell. publ. usu & abusu in reb. phys. & med. Præsertim semen hujus lolii manducatum visum lædere & lusciosos reddere dicitur, hinc servus apud PLAUTVM Mil. glor. A. II. Sc. III. alterum sic cavillatur:

Mirum est lolio victitare te tam vili tritico

Quid jam? quia luscitosus.

Et OVIDIVS Lib. I. Fast. v. 691. testimonium affert his:

Et caveant loliis oculos vitiantibus agri.

Nec ignota sunt ea proverbia, quibus lolio victitare dicuntur, qui aut hebetiori visu laborant, aut socordes, temulenti ac somnolenti subinde sunt. Imo observatum est, quod exinde atque adeo epidemica mala, pericula gravissima & maligna varia deinceps symptomata producta sint, quales morbi endemii & epidemici quondam Hassiam universam graviter afflixerunt, quos Inclyta Facult. Med. Marburg. 1597. descripsit. Iis-
dem

dem causis a doctis hominibus adscripti sunt morbi populariter grassantes, qui superiori seculo Variscorum tractum, Lusatiam & Misniam pervagati sunt. Confer. *Ephem. N. C. Dec. III. A. VI. obs. 234. & Cent. V. obs. 82.* Atque armenta jumentaue non possunt hoc nocivum vegetabile perferre, de quo ridicula historia succurrit, quæ legitur in *Eph. G. N. C. D. II. an. 3. Observ. 186.* ibi eam refert DN. IOHANN. IACOB. WAGNERVS his verbis: In mentem hoc mihi tunc revocabat lepidam historiam, quam prope Tigurum A. 1342. contigisse apud F. Joannem Victoduranum, Minoritam *σύνχερον* legi, cuius *αὐτογέγονον* in Bibliotheca Tigurinorum Civica asservatur, quam hunc in modum vapulante licet Prisciano in Historia sua recenset: *In villa quadam apud Thuregum equus quidam tantum de lolio commedit, quod a Domino suo putatus mortuus extra villam vectus fuit & excoriatus, qui tandem post somni consummationem evigilans, domum rediit & Domino & aliis hominibus, eum cernentibus, stuporem incussit.* Plura qui de isto lolio infelici legere cupit, legat Dissert. Clariss. D. D. R. I. CAMERARII de Lolio temulento inscriptam *Tubingæ.* Hinc jam probe monet GALENVS *Lib. I. de alimentor. facult. c. XXXVII.* hortaturque eos, qui saluti publicæ præsumt & rei frumentariæ provident, atque molitores, pistoresque, ut frumenta prius ejusmodi nociva & deleteria sedulo feligant, cribrisque separent. Quod salutiferum consilium sit omnibus merito commendatissimum. Attamen (ut obiter saltem hoc addam) œconomi & hoc ipsum temulentum lolium in suum quoque usum convertere norunt, siquidem, præterquam quod non suis noceat, speciatim gallinaceo generi in optimum alimentum venit, & illo molito ac pisto paratur pasta saginandis caponibus & gallis Indicis aptissima ac idonea, a qua mire impinguescent, quamvis ab hoc pastu per totum diem in soporem quasi deducantur. Idem de fungis deleteriis in locis planis declivibus & humidis sæpius reperiundis, coloris nigri miniati punctulisque diversis coloribus notatis, dicendum est, qui manducati præcordiorum oppressiones, vomitus cardialgias, tormina ventris, diarrhœas, dysenterias, singultus, partium tremores, epilepsiam, convulsiones, frigidos sudores, animi deliquia, insaniam similiaque alia gravissima, maligna & lethalia symptomata, imo mortem repentinam inferunt, qualia exempla leguntur apud J. SCHENCKIUM in *Obs. Med. Lib. VII.* STALPART VON DER WIEL *Cent. 1. obs. 40.* HILDAN. *Cent. IV. obs. 35.* PLINIUM in *Hist. Nat. Lib. XXII. cap. XIII.* GALEN *Lib. II. de med. facult. c. LXIX.* Atque adeo talia pessima symptomata ex solo manuum contrectatione soloque odore accidisse, quædam observationes testantur. Amplius hic

se occasio offert dicendi, quod observamus, rorem vermiculosum vegetabilibus esculentis inhærentem, sæpius in locis planis, humidis & fecundis, rarius montosis, aridis ac asperis inveniri, quæ maligna vermiculosa propago cum esculentis assumpta, dysenterias aliosque morbos malignos producit, præsertim notabile est, quod si armenta ejusmodi vescantur, lue longe lateque vulgata intereant atque in ovibus maxime & præsertim in earum hepate copiosi vermiculi reperiantur.

§. XI. Perinde (quoniam animalia etiam bruta pingua magnaue cum visceribus integris regionis præstantiam declarant) de montivagis pecudibus altilibus, feris aliisque & alitibus quæ & plurimæ ejusmodi optimum aërem qualis montanus est quærunt, ut attagines, gallinagines, tetraones, turdi, palumbes, ulterius se habet, eas in locis montosis optime nutriri ac increescere, quod de vaccis helveticis vulgus quoque nescit. Sic notat SIBBALDVS Scot. *Illustr. p. 22.* scribens: *Observatu dignum, quod in locis lacui (in Straglash ad locum, dictum Glen Canich, inter celsissimi montis cacumina sito, qui nunquam est sine glacie,) proxime adjacentibus semper vireat gramen, quasi perpetuum ibi ver esset, idemque gramen pecudes una tantum septimana melius pascat, & pinguiore reddat, quam ullum aliud gramen id præstare potest.* Ideo & oves in Anglia, præ aliis multis præferuntur, non solum, quod lanam sed & quod carnes attinet, quoniam, in collinis & aridis locis pascuntur, ut POLYDORVS VIRGILIUS in *Histor. angl.* advertit, quodque VIRGILIUS in *Georg. Lib. III.* jam indicavit, dicens: oves a pascuis in locis planis & humidis jacentibus arcendas esse. CARDANVS pariter *Lib. VII. de rer. Differ. XXXI. Cap.* scribit, carnem vervecinam in regione peruviana sapidissimam esse, quoniam ex altis siccioribusque locis depromitur. Pariter carnes porcorum montes incolentium & glandibus nutritorum præferuntur secundum ipsum GALENVN *Lib. III. de Alim. fac. Cap. XIII.* Et apud Medicos, secundum Aristotelis monitum, in confesso est, illas (pecudes) quæ in pascuis montosis, subaridis, firmisque saluberrima pabula, gramina, herbas, & plantas proferunt, nutritas & saturatas quæque hinc parum biberunt atque vel ætherea saltem aqua vitali resectæ, juxta aëris huius salubritatem atque motum quo ascendendo descendendoque exercentur, ut vegetiores, vivaciores & robustiores corpore, ita saniores esse, illarumque mactatarum carnes salubriores, quam earum, quæ in pratis humidis educuntur ac saginantur. Ex ejusmodi enim pabulo confectus chylus per omnes vias & vasa facilius distribuitur & relictæ tandem, partes, uberius per glandulas separantur. Sic in vulgus notissimum est,

oves,

oves, e. g. enutritas in planis declivibus, humidis agris & pascuis, non ultra tres annos vivere: Pereunt enim dein ex ulceribus pulmonum & aliorum viscerum, quod & de agris Lipsiensibus nostris a plebe confirmatur. Ex animalibus fanioribus, salubrius quoque lac mulgetur, salubrior caseus paratur, sapidiores non modo, sed & salubriores carnes mactata concedunt. Sic *QUERCETANVS* *Diat. polyb. S. III. c. IV. p. 430.* de vervecibus Galliae Norbonensis refert, eos in siccis thymi, serpilli & similium odoriferarum herbarum feracibus agris, pastos, carnes sapidissimas & saluberrimas præbere (quia & eorum lanæ meliores inde evadunt). Ast in locis declivibus, planis, humidis, (ut modo est adductum) insalubribus, educati, morbidi fiunt, & carnes similes, simileque hominibus mactatæ præbent alimentum & putredinem a morbo inductam quæ ordinario sui est multiplicativa, inhærentem iisdem corporis succis, qui ad putredinem per se sunt valde proclives quoque affricant. *GALENVS* *Lib. de atten. dieta Cap. VI.* inquit: *Apri suis domesticis in cibo sunt anteponendi & Lib. VIII. Meth. med. Cap. II. ex ipsis suillis carnibus optima est montana, cujus causam Lib. III. de Aliment. Facult. C. XIII. hanc esse tradit: Domestici sues humidiores sunt quam agrestes, tum aëris in quo degunt humiditatem, tum vero etiam ob vitæ ignaviam; qui vero in montibus degunt multum exercentur & fatigantur, præterea in aëre sicciore vivunt, qua propter eorum caro est durior nulliusque propemodum pinguidinis aut paucissimæ particeps, & alimentum quod inde provenit, minus habet excrementi. Hoc & indicat WILHELM. PISO* *Hist. Nat. & Med. Bras. L. I. dum advertit sequentia: Experientia constat multa quadrupedia pisces & aves in cœnosis & paludosis locis viventia, non idcirco, adeo in Brasilia atque ejusmodi oris postponenda esse montanis & fluviatilibus, sicut plerumque fit in septentrionali Europa, quod in hisce regionibus calidioribus eximia aëris temperies & serenitas, correctoris vicem quasi subire videatur, circa naturam ejusmodi animalium. Hujus rei exempla passim legas & audias licet. B. AMMANNVS* in *Irenico* *p. 177.* revocat animum ad ejusmodi calamitatum memoriam, quæ convictorio Lipsiensi culpa œconomi acciderunt. Tales quoque *ATH. KIRCHERVS* notat in *scrut. de Peste* *p. 97.* Simile & referunt (ut plura non addam) *Eph. N. C. D. I. A. VI. obs. 91.* In hanc rem notabile est: Veteres olim locorum captantes salubritatem, pecoribus immolatis, quæ in iis pascerentur, ubi oppida constituere aut stativa habere concepissent, ex jecinore, aëris qualitatem conjectasse: nam si livescens vitiosumque in pluribus compertum esset, insalubritatis videri argumentum, putabant, pabuli & aquarum ratione, ut advertit conceptis sic verbis *IOH.*

VESSENIUS *Anat. Prag. p. 44.* Pariter & cochleæ & limaces montosis in locis atque vineis ac longe a paludibus diffitis odoriferas herbas depastæ, in usum salubriorem veniunt. Paucis modo verbis adhuc de materia, qua constant hinc inde montes, optima agam: de falsa scilicet & nitrosa, ut est mons altus ad Rossanum in Calabria, qui salis copia dives est & in Hispania ex mero sale montes sunt teste Catone Majore apud AVL. GELLIVM *Lib. II. Cap. XXII.* & in Polonia prope Vieliscam OLAO M. *Lib. XIII. C. V.*

§. XII. Præter hæc varia hic quoque accedunt, quæ egregium salubritatis momentum ingerunt, & quibus loca montosa propemodum fruuntur unice, ut v. gr. non immerito possumus afferre, quod scilicet in his ut plurimum multæ officinæ, hinc inde, ob commoditatem lignorum sint structæ, in quibus quotidie copiosa & magna vi lignorum, ignes accenduntur, quoniam locorum & regionum etiam vitia, vel ignis vel aquæ beneficio corriguntur: Tales sunt officinæ ferrariæ, vitriariæ, calcariae, carbonariæ & in quibus fornaces diu noctuque pro fossilibus excoquendis, alumine, vitriolo &c. atque linteaminibus candefaciendis, (quibus Silesiæ & Lusatiae superioris præsertim tractus montani celebrantur) fumant. Atque in his locis, cum frequentiores sint arbores hæc balsamicæ & resinosæ, ita hæc hic in hunc usum vulgo veniunt, quarum ligna concremata, salino oleosas, sulphureas, volatiles, balsamicas particulas impertiuntur, unde & copiosam fuliginem in caminis colligunt. Nam ignis luculentus per se atmosphæræ quietem, gravitatem & intemperiem alterat, & respiratione in se suscipiendum aërem ventilat & exturbat omnes vapores noxios, humidos, crassos, heterogeneous, putridos, malignos & ipsi communicat partes laudabiles, balsamicas, oleosas, salinas, volatiles, spirituosas, acidas, putridas, figentes ac corrigentes. Poloni & Westphali, (rustici) in suis domiciliis & casis, tectisque saltem vix cohærentibus, inter pecudes, porcos, super sparsi fimi cumulos, ligna camino undique patulo accendunt, eoque magna ex parte sal hoc oleosum volatile pleno ore hauriunt, adeo ut totum spatium spissus & exteris iter facientibus, molestissimus repleat fumus & vigorosiores, longævioresque vivunt, iis, qui ædificia spectabilia, & exquisita calcem foedam spirantia, inhabitant. Perspectum satis est, cum vitium aëris omnium optime, vento & igne corrigatur, quantum valeat ignis luculentus & tempore pestis accensus in plateis ac ædificiis. Hoc omnium potentissimo remedio Hippocrates Athenas peste liberavit, dum proximam sylvam cremari iussit. Non pigebit ad majorem illustrationem
comme-

commemorare quod ad posteros adhuc commemorabile est, sc. peste in Venetos anno 1556. magna hominum strage grassata, insulam Muranam, duarum saltem milliarium spatio Venetiis remotam, liberam plane ac intactam mansisse, cujus incolæ artem vitrariam tractantes, quotidie in fornacibus ignes accenderunt.

§. XIII. Hæ potiores salubritatis sunt causæ, quæ ab aëre, aqua & terra desumuntur. Hinc in hanc sententiam HAMDOLLAHI CASSVINENSIS in *Hist. Nat. terræ Ispahannæ* salubritatem prædicans, (ut refert & interpretatus est WELSCHIVS *de ven. med. p. m. 204.*) Si in uno loco jungerentur terræ Ispahannæ & borealis ventus Hæratæ & aqua Chovorezmæ non contingeret homines unquam mori. Aliæ dein circumstantiæ considerandæ veniunt, ut vivendi est modus & consuetudo, quæ montosis in regionibus, sanitati integræ & longævitati maxime est accommodata, inter durum & molle media, qua a teneris, quod multum est, corpora firmant. Frigus atque calorem apud monticolas optime reciprocare dixeris quo contra frigidioris pariter & calidioris aëris injurias, harumque alternationes valde sua corpora firmant morbisque exinde provenientibus non adeo facile obnoxia sibi parant. Videbis hinc interdum vel media hyeme, parvulos pueros indusiis saltem indutos, cæterum nudos, in nive ambulantes atque ludentes, & non raro in torrentibus lavantes, neque ullam noxam in iis deprehendes, a perspiratione insensibili impedita, inductam, catarrhos & similes affectus procreantem. Videbis rursus monticolas per totam etiam æstatem ac fervente Sirio flammeum in hypocaustis fervorem optime sustinere, in quæ hyemali tempore congelati mox irruunt & vice versa. Victus quemadmodum secundum adducta ex sanitate admodum conducibilibus constat, ita etiam ut plurimum simplex est, adeoque magis salubris, & frigida magis quam calida potus genera placent. Nec etiam contemnendum emolumentum, quod ex sola locorum montosorum contemplatione juxta oculorum optimam atque salubrem exercitationem perpetuo mens capit & ea recreatur, corpori quoque deinde profuturum. Certe enim ad gratiam conspectus, decorem, pulchritudinem & elegantiam conferunt montes, qui quasi minantur altitudine sua in cælum juxta illud MARONIS:

- - - - - *Geminique minantur*

In cælum scopuli.

Pergama non tristia incolunt monticolæ. Tristis locorum facies, animum contristat, deprimit, languidum reddit, unde quidam in Hispania

(ob tristem faciem, horridum aspectum, tristes cogitationes & mundum spernentes inspirantem, vitæque tædium, desideriumque mortis) mori, ut nasci in Italia (ob aëris salubritatem) in Gallia (ob lætam amœnamque ejus faciem) vivere sibi optaverunt. Nam mira hic undique locorum amœnitas est, quæ & Thessalica Tempe, Thermopylas, & Taurum montemque Libanum atque circa Aleppum, Alexandriam Antiochiamque regiones in Asia, ac eas circa Romam & Florentiam constituunt. Mirum etiam est, quantopere amœnus prospectus, qui circa montes & loca excelsa optimus est, quæ supra alia omnia eminent, ut ferri oculi in longum latumque possint, oculos, mentes ingenuas & sapientiæ studiosas oblectet, recreet & excitet, immo ad cœlestia vocant, terrestres hujus paradisi spectacula, corporis animique oculis contemplantium. Atque nescio, quo pacto altitudine mens alta meditans ac spectans extollatur gaudio rapiaturque in summa summi Architecti, Dei considerationem, videturque montes e terra ideo esse porrectos, ut homines hortentur imo cogant ad attentam sui contemplationem. Hæc mentis recreatio corpori quoque benefacere potest, dareque sanitatem, vigorem ac vitam. Est enim ea in corpus animi vis, ut animalium spirituum motum alteret potentissime, qui cordis & arteriarum motus, atque solidarum partium tonum alterant, pro quarum habitudine se sanitas habet. Ibi enim ut plurimum rident omnia, varietas amœna quæ delectat, & varia ibi amœnitas & hilaritas sese offert oculis mentique immo ingerit sese ac admirandæ raræ, multifariæ rerum species videntur undique. Est autem cum omnium rerum vicissitudo & varietas, tum vel maxime sensibilibus jucunda. Circumjacentium regionum deliciæ, suavissima quadam jucunditate vel invitos invitant, ac spectatores morantur. Quis non lætis & hiantibus oculis videat hæc omnia? Quis non summam hic voluptatem ponat? Quis enim sensuum hic sua non fruitur voluptate? Spectantur enim tot uno pene adspectu terrarum tractus etiam dissi, si visum dispergere velis, ac oculorum intendere aciem, infraque supraque quasi in theatro longe lateque omnia atque mundi totius elegantiam, circulo quasi conclusam, ut in alio tanquam mundo, ore sublimi erectoque vultu & inferiore forte superato & cœlum ac sidera simulque subjacentia & inferiora contemplari atque perspicere & circumspicere licet. Spectantur undique montium eminentium moles & vertices atque fastigia, adeo, ut de iis dicatur, quod caput inter nubila condant, quæ hic recto insurgunt dorso, illic veluti sinu quodam flexuque vario curvata, in diversas cavitates dividuntur, quæ
in

in circumjecta loca quantamcunque acceperere vocem, multiplicato sono referunt. Spectantur aprici & jucundissimi colles, spectantur humiles valles amabilissimæ, pratensibus aquis lucentes. Monstrant sese inaccessa montium præcipitia, illic arduæ rupes, hic scopuli prærupti, velut ex industria pendentes. Hic viæ atque accessus ampliantur, illic angustantur, mox cacumina. Inter hos se produnt speluncarum mirabilia atria excavata, quæ operosa hominum industria exstructa esse, ut domicilia præbeant, videantur. Elucent his interdistingtæ suaves planities, virentes, densæ & opacæ sylvæ, proceris & frondentibus arboribus frequentes refertæ, ferarum vario genere, nemora umbrifera, facta quasi ad ambulationum voluptatem & grato diversarum avium oscinum cantu resonantia. Pascit oculos tam varia viriditas pene in diversos colores distributa, atque ea per varias commutationes lucis & umbræ multifarie variatæ regiones. Propinqua virore nitent; remotiora velut cœrulea incumbentis cœli facies opacat. Arrident fluctuantes & germinantes segetes fragrantibus herbis floridæ, & nitentia prata & pascua læta, quæ densi pecudum greges inerrant atque occurrunt obiter cervi & pro oculis mira luxuria vagantur. Visuntur campi amœnissimi; visuntur hic fontes ex fornicibus suis sensim & blande profluentes, illic salientes, & cum pleno multoque agmine erumpentes. Ibi confluentes, lacus, stagna, rivuli atque torrentes suavi cum strepitu per ambages interfluentes, flumina integra, qui cursum suum circumflexum in proximos campos derivant, eosque rigant, conspectui patent. Visuntur oppida, pagi, arces, hæ interdum vetustate memorabiles, hæ novitate sese ostentantes splendidæ, &c. Atque adeo uno prospectu uno eodemque loco, uno eodemque tempore, singula anni tempora & videbis & senties. Summa hinc inde montium dorsa media etiam in æstate quandoque nive glacieque contexta splendent & frigidi venti constringunt, nivesque magno sæpe cumulo cadunt, infra hanc regionem verò cum pascuis perpulchre viridantibus atque herbis plantisque vernalibus floribusque ornatis habebis, in vallibus tandem fruges maturescentes jam conspicere licet. Hoc intuitu loca montana totius universi compendium haud inconvenienter dixeris, in quibus summus rerum Opifex in cumulum quasi congeffit, quod alias per longos terræ tractus distribuit. Quare nihil pulchrius nihilque acceptius montosis locis effinxisse Alma Natura videtur. Quæ delitiæ advenas ita titillant, ut, quo accedunt sæpius, eo recedant illibentius, & spectando diu expleri vix possint: Non mirandi igitur causa est, cur Heraclitus, Ephesius planities ac urbes contem-
ferit.

ferit atque molestas censuerit, montes habitationi suæ elegerit herbisque saltem ibi crescentibus se aluerit. Quod ad ambulationes per loca montosa attinet, licet laboriosæ interdum magis sint iis, quæ in planitiibus instituuntur, sanitati tamen conveniunt magis, quia ascendendo plus exercentur, tolluntur & tenduntur muscoli, omnes, fibræ, nervi, viscera, omnesque partes, & circulatio humorum & spirituum animalium influxus melius fortiusque instituitur. Atque descendendo dein magis placent, quæ sine labore & fatigatione fiunt, & sic ascendentes descendentesque alternatim exercentur, & hi muscoli etiam adscendendo exercentur, & laborant, alii quiescunt & feriantur; ascendentis enim manifeste genua defatigantur, descendentis vero coxæ, quoniam corporis onus genibus incumbit in descensu femoribus; siquidem ad hoc ARISTOTELES in *Problem. v. 1.* scribit: *Ambulantes per inæqualia loca minus defatigari, quam per æqualia* & C. CELSVS de *Med. Lib. I. Cap. II.* idem innuit, ambulationes quæ ascendendo & descendendo fiunt, esse laudabiliore, quoniam varietate hac universum corpus movetur, quod utique salubre, nisi corpus debile sit & pedes affecti. Meretur legi de hoc J. A. BORELLVS de *mot. anim. P. I. Probl. 160. p. 193. seqq.* & HELMONTIVS *Oper. p. 352.* Hinc & ii, qui montes altos sæpius ascendunt descenduntque exemplo eorum, qui alpina itinera faciunt, præ aliis robusti ac vegeti sunt. Et licet adscensus in montes molestus difficilisque videatur, superatis his tamen magna delectatio mox accedit.

§. XIV. Hæc omnia fide ipsorum eventorum ubique comprobantur, & experientia testis & vindex est. In aëre montano versantes bene dormiunt, bene appetunt, bene digerunt, beneque egerunt. Non equidem per diffationem & transpirationem, sed per diuresin magis (quæ egestio certo modo ea præstantior est) atque alvum expurgantur, aër enim calidus subtilis humidus in venis ac humoribus corporum contentus expansus ab externo, frigido, graviori incumbente in sua expansione alteratur, quo contrario in se in vicem nisu motuque eoque plus minusve propemodum æquali (pro altitudine nimirum montium levitas ac subtilitas aëris se habet) circuitus humorum promovetur, transpiratio vero per poros cutis ex parte inhibetur, spiritus animales subtilissimique halitus retinentur intus, sicque vires corporis conservantur integræ. Hæc aëris extensio experimento illo declaratur atque probatur, quando vesica suilla aut bubula in valle non remissius inflata atque filo constricta ad summum aliorum montium cacumen portatur, vesica ad maiorem extensionem inflatur. Per quam mature adolescunt, senescunt tarde, canities &

& calvities rara est, & viridis senectus non aliter se habet ac si fervor Juvenilis algore senectutis repressus, temperatior efficeretur, (ut verbis WILH. PISONIS *Hist. nat. & med. Brasl. L. I. utar.*) Inter monticolas ubique fere conspicies tanto in numero longævos, ut territorium Macroborum montes, dici mereantur. Iidem præterea ordinario sunt fani, alacres, vegeti, robusti, qui quasvis cœli injurias secure contemnunt ac perferunt, proceri statura, habitiores, pulchri, florida, vivida, ac bene colorata & nitida facie, candida cute talibusque capillis conspiciui, succulenti minus tamen pinguedine superflua farti, atque artubus lacertosis, carne firma, compactiori, vasis amplioribus, verbo, laudabili temperamento sanguineo, aut sanguineo cholericò ut plurimum, & concinna, & eleganti corporis forma, membrorum conformatione atque compositione præditi. Rarissime inter eos deformatos, claudos, strabones, lusciosos, gibbosos offendes. Alibi infantes nati debiles sæpius sunt & ex multis morborum generibus moriuntur, quæ labes aëris & mala nutritio producant, vix attingunt virilem ætatem & per totam vitam languent. Pulchre de hac re PALLADIVS loquitur *Lib. I. tit. 3.* inquiens: *Qui optimum aërem inspirant, colore sunt bono, firma illis capitis sinceritas, inoffensum lumen oculorum, purus auditus ac fauces commeatum liquida vocis exercent.* Et rursus: *Somnos ibi capies suaviores, & animum a visis insomniis nequaquam perturbari contingit. Quin immo autores hanc præstantiam, non modo in hominibus, sed & in brutis advertunt, quorum catuli & pulli meliores, præstantioresque habentur, quam in aliis regionibus nati, minus salubribus.* Atque hinc compertum habetur, loca montosa rarissime aut nunquam morbis contagiosis, putridis, malignis, peste, tangi, immo valetudinarios & morbis chronicis pertinacissimis detentos, & quos alia remedia in integrum restituere vix possunt, ad hæc perlatos brevi convalescere, & præstare loca montana certissimum asylum languentium: Hectici, phthisici, hydropici, hypochondriaci, scorbutici, alique viscerum debilitate laborantes, hic imprimis sunt nominandi. Sic urbis Romæ quondam incolæ rheumatismis perpetuo vexati & pulmonum ulceribus correpti, ad loca editiora mittebantur. vid. GALENVS *Lib. V. Meth. C. XII.* Ita advenæ, qui in Hispaniola Americæ Insula atque vicinis morbo endemio ab aëre loci maritimo & non adsveto corripuntur, hoc uno medio ac remedio sanitati restituuntur, si per mensem circiter unum & dimidium alterumque montes, adeant. Huic aëris salubritati Helvetii adscribunt, quod ad loca remota profecti, nostalgia & febribus periculosissimis afficiantur. vid. Clarissimus SCHEVCHZERVVS *Helvet. Hist.*

Hist. Nat. P. I. p. 12. & in den Natur-Geschichten des Schweitzerlandes. P. I. pag. 57. Atque hæc ex multis adhuc Authorum, qui de montibus illorumque incolatu præclare sentiunt, observationibus & testimoniis sunt comperta. Hinc etiam incolatus montanus veteribus jam fuit commendatissimus. Hinc & speciatim ORIBASIVS IX. *Collect. C. XI.* Sublimia loca omnibus thoracis affectibus & teneriorem ibi aërem, capite laborantibus & omnium sensuum instrumentis accommodata humilia vero ante dictis haud idonea esse, dixit. Coincidit fere AETIVS qui in *Lib. III. C. CLXIII.* hæc verba profert, *Aer ille qui in montosis altisque regionibus est, & nullam auram suscipit, commendandus est erecta cervice spirantibus, & tabidis & omnibus thoracis & capitis affectibus &c.* Apennini montes a salubritate incolarum & longævitate ubique celebratissimi sunt, ac valde memorabiles. Compertum quoque habemus, altas & montosas in Germania nostra, ipsique propinquas regiones, ut Saxoniæ, metalliferas dictas, Variscorum, Bohemiæ, Silesiæ, Lusatiae, Helvetiæ, Rhætiæ &c. saluberrimo aëre gaudere atque alere incolas sanos atque longævos. Bruschiusscribit: universam Nariscorum regionem elatam, circa montem piniferum, quatuor flumina Moenum nimirum, Nabum, Egram & Salam effundentem in finibus Palatinatus superioris & Bohemiæ situm (Fichtelberg) Bonsideliam & Weissenstadium &c. ideo saluberrimam totius Germaniæ esse, quod & Maximilianum I. Gloriosi. Mem. Rom. Imp. affirmasse, fertur. Aegyptus ideo ob positum quem obtinet in orbe terrarum altum, saluberrima regio semper est habita, de qua Plato dicit in Timæo, quod nunquam diluvium, quod olim reliquum orbem inundavit, sit experta. E contrario Belgium, Arcadia, Syria &c. humiles regiones, ob aërem parum salubrem suspectæ non immerito & variis morbis subjectæ redduntur. Ita satis superque constat observantibus, in demissis & conclusis, humidis locis sive mari propinqua sive ab eo longissime remota sint ea, præsertim regnare scorbutum & phthisin, hydropes, febres purpuratas, malignas &c. Idem & alibi PLATO retulit, se in altissimis regionibus invenisse valde longævos, qua de re *Leg. Lib. IV.* urbes totas in locis sublimibus & in circulum constitui voluit, ut munitiores & mundiores fiant AVICENNA XXI. *Dec. 2. C. II. & caut. 1. Num. 105.* alta loca certa ratione semper esse frigidiora & magis salubria ibique diutius homines vivere ac laborum patientissimos esse dixit, ac ARISTOTELES ait 14. *Probl. 7.* qui alta loca aperta que incolunt, tardius senescunt, qui cava & palustria ocysus. Similiter ORIBASIVS IX. *Collect. Cap. II.* montana loca ob siccitatem maxime salubria deprædicat. PLIN.

Lib. VII. C. XLIX. a Mutiano gravissimo Authore acceptum, recenset, in Tmoli Lydiæ montis cæcumine, quod Tempſin vocant, incolas 150. annos ordinario vivere. Solino jam commemorante etiam ERASMVVS FRANCISCI *im ausländischen Kunst-und Sitten-Spiegel*, scribit: Quod Athos celeberrimus ille inter Macedoniam Thraciamque mons, incolas alet sanos, vegetos ac valde longævos. V. BAQVIERE *ſen. Med. p. 22.* Extat etiam hanc in rem perelegans locus apud JOHAN. BAPTISTAM DONIVM in *Lib. de reſtit. ſalubr. agri romani*, dum ait: *Illud perquam dignum notatu eſt, ea maxime loca temperatiſſimo aëre frui ac longævos homines progignere, quæ elata quidem ac ſublimia, ſed non præaltis ac perfrigidis montibus edita, verum quæ longiori terrarum faſtigio latenter aſſurgunt, ut in multarum regionum mediis & a mari procul recedentibus ſpatiis, quorum altitudinem flumina illinc in diverſum dilabentia oſtendunt, ut in Umbriæ tractu circa Spoletum, ubi Apennini juga modice attolluntur. Ibi enim, ſi uſpiciam in Italia, vivaciſſimi homines reperiuntur.* Pulchre etiam montium ſalubritatem demonſtrando prædicat JOH. BAPT. VON HELMONT. *Tract. mons Domini p. m. 743.* ſequentibus: *Naturaliter, intelligo, in montibus malignitate endemia carentibus, eſſe aerem puriſſimum, procul a face & corruptione remotum, ab erroribus, & defectibus ſegregatum, & propter frigora depuratiſſimum ab omni inquinamento; verum etiam ibidem eſſe locum, quorſum per magnalis continuationem, expeditiſſima cœleſtium irradiatio eſt; Quia ætheris puriſſimi potatio.* Memini enim, uno mane me jejunum ſenſiſſe in Alpibus ſuavitatem inſpirati aeris, quam ante vel poſt, tota vita nunquam. Certum eſt etenim, quod Omnipotens tantum gippum in natura non fruſtra condiderit, certumque eſt, omnes mundi divitias e montibus erui. Deinde optimi fontes atque celeberrima flumina nobis e montibus, ratione declivitatis verſantur. Denique omnes nationes monticolæ durioris ſunt corporis vitæque vegetioris, aliis, qui campos amœnos colunt. Qui effectus ſuis cauſis conſtant, quippe ſuavior puriorque aer ibi inſpiratur, & Gas omne ſuis privatum ſordibus, redit in materiam puram aquæ. Poſitis hiſ, atque ſatis ut opinor evictis, elucet, quam inutilis illorum, ut LVCRETII & TH. BURNETTI vid. *eius telluris Theor. ſacra Lib. I. Cap. IX.* opinio ſit, qui perhibent, montes eſſe inutiles, horrendos omnique elegantia & venuſtate deſtitutos.

§. XV. Atque adeo etiam eadem memoratæ conditiones, aer imprimis animos hominum mire afficiunt, alterant, commutant, atque faciunt ad mores, qui temperamenta hominum, ut hæc illos ſequuntur, ut qui de moribus gentium diſſuſe ſcripſerunt animadvertunt: Americanos barbaros eſſe & incultos, Africanos aſtutos & fraudulentos, Asia-

ticos molles & inflatos Europæos fortiores omniumque cultissimos. Quo nomine Galenus noster maxime laudandus, quod nempe animam multorum morborum causam, statuerit, quando passionibus vehementioribus commovetur, & quod temperamenta ad peculiare mores & inclinationes disponant, in qua doctrina multum atque diligentissimum se præstitit censorem, quam ab HIPPOCRATE accepit, qui *L. I. de Diet. sect. 32.* aëris regimine homines sapientiores & ingeniosiores reddi posse, testatus est, unde & *Lib. de flat. sect. 20. §. 3.* prudentiam in sanguine consistere, scitissime opinatus est. Quales enim aëris, ex soli conditione varie temperati qualitas, aqua, cibus & potus, quæ ore nari- busque adtrahuntur & assumuntur sanguinique miscentur, tales etiam sunt humores & spiritus animales & quales hi, tales etiam animi inclinationes. Purus, serenus, temperatus bene & tenuis aër, ventis orientalibus & septentrionalibus alteratus, vernalis, tenuis cibus & potus, tennes etiam & volatiliores dant humores & spiritus, qui ad mentis regimen convenientissimi sunt atque accommodatissimi, & homines ideo sunt ingeniosi, acres, expediti in omnibus suis actionibus &c. Atque vice versa argumentatio valet. Cælo humido, putrido, caliginoso, nebuloso, impuro, tonus partium laxatur, libera transpiratio inhibetur, particulæ crassæ, impuræ, excernendæ, remanent in massa humorum, unde ea impura redditur, secretiones & excretiones sufflaminantur, secreta conspurcantur, crasis humorum & spirituum obnubilatur &c. Palam enim certe est, ut quemadmodum plantas, semina &c. sic hominum mores ad regionis habitum mutari. Victuque pariter crasso, fœculento, similes quoque humores & spiritus generantur, & exinde homines torpidiores, stupidiore & tardiores redduntur. Hinc veteres quondam, communi velut consensu Asiaticos facilitate morum & humanitate ceteros superare contendebant, atque hinc atticam, ægyptiacam, arabicam, syriacam tellurem adeo feracem felicemque fuisse tantis multisque egregiis ingeniis, Sapientibus, Doctoribus, Heroibus producendis atque alendis. In hanc rem MEVRSIVS tradit *de Fœrt. Athen. C. III. p. m. 22.* Supra urbem Athenas totius Græciæ magistræ terrarum paladium, templum disciplinarum, & commune quoddam sapientiæ oraculum, aërem purum tenuemque & salubrem, unde ingenia ibi etiam acutiora fuisse. Locridem & Crotonem etiam saluberrima loca olim eo argumento sunt habita, quod brevi temporis spatio, quam plurimos produxerint tum Athletas, tum Philosophos. E contrario rursus aëri humidiori, putrido, crasso adscribitur, quod Arcadiæ, Bœotiæ regionis-

nisque Thebanæ incolæ adeo male eo intuitu audiant, & quod hodie Gallia Provinciæ Lemovicensis, Hispaniæ Biscajæ & Germaniæ Tyrolis, Carinthiæ superioris, Styriæ incolæ, de quibus vide GERBEZIVM in *Chronolog. Med. I. pag. 23. &c.* hanc censuram incurrant. Omnes insulani mali jam dudum & qui magnos fluvios & mare accolunt, mercaturæ dediti, ab avaritia, mendaciis, fallaciisque non abhorrentes, habebantur. Unde notanter PLATO *Lib. IV. de Leg.* civitatem a mari LXXX. stadiis distare voluit, siquidem & Cicero maritimos versutos & Ligures montanos suapte natura duros & agrestes esse dixit. Romam ideo olim Reginam Orbis Terrarum fuisse, & forti animo, prudentique consilio barbarorum horrida ingenia superasse, quod in egregia regione exstructa sit, VITRUVIVS *L. VI. Architect. C. I.* affirmare non dubitavit. Neque P. PÉTIT. *Disp. de Amaz.* Amazonum solertem fortemque animum, climati, quod inhabitaverunt, adscribendum esse, ambiguum habet. Ob hanc rationem & in specie ob eam, quæ victum respicit, Galli, qui victu faciliore, leviori, jussulis nutrientibus, potu dilutiori, aqua & vino utuntur, fusque deque habent Germanos eosque eo nomine les esprits de bierre, (ob crassum & foeculentum potus genus) appellant, ut & in hos satis iniqui censores sunt Joh. Bodinus, Joseph. Scaliger, Perronius Cardinalis Dominicus Bauhours aliique exterorum plures. ADRIANVS BAILLET Germanos ad eruditionem non, nisi per immensos labores pertinacemque patientiam, posse pervenire, in *Fugem. des savans*, scribit; contra quos tamen ex dignitate sunt defensi a Morhofio, Schurtzfleischio, Cramero, Richey aliisque hic non recensendis. At homines, qui montana, alta, excelsa, aspera, sicca inhabitant loca, ingenio gaudent diverso illorum, qui loca plana incolunt, atque præ omnibus aliis corpore & animo valentissimi sunt, integritate mentis atque candore, acuto ingenio, animoque forti & bellicoso, ad labores alacri, ad artes proclivi &c. præditi, quod existimo jam multis per multa loca indiciis & exemplis esse compertum. Certe non solum Diana, virgo montium nemorumque custos, sed etiam Pallas atque Apollo montibus saltibusque inerrant. Nec ideo est, quod altitudo, quam paulo ante notavimus §. nimirum XV. corporum monticolarum ingenio & virtuti aliquid deroget, alias vitio vel Julio Cæsari atque Scipioni Africano excelsa quoque statura esset vertenda: Ut enim plerumque arces & palatia excelso loco posita incolunt summates viri, ita & natura ipsa monticolarum procera statura conspicuorum magnis montibus domicilia corporum digna plerumque metatur. De iis hoc jam HIPPOCRA-

TES testatus est *Lib. de aëre, aquis & loc. text. 58.* Tale testimonium & legitur apud FIDELIEM *de Rel. Med. L. I. cap. XIII. p. 68.* Illud etiam satis constat, in montosis atque asperis regionibus, plebem ac secundæ sortis homines plurimum inter alios posse, ac prævalere: nec nobilibus primatibusque facile cedere: plus enim in his valere corporis vires, quibus vulgares præstant: in planis vero Magnates sunt potiores ac magis dominantur: Nam aptior is est imperandi locus. Præterea, qui aspera incolunt loca & quæ nihil ferunt nisi multa cultura & magno labore quæsitum, quales Ligures a Cicerone (in *Lege agraria*) memorantur, duri atque agrestes sunt. At qui agrorum bonitate, & fructuum magnitudine urbis aut salubritate & rerum copia perfruuntur, ut de Campanis idem affirmat, semper superbi sunt atque arrogantes &c. Certe hoc fere exploratum habetur, quod ubicunque bonitate agrorum & fructuum abundantia præcellit, ibi quoque vitiorum & omnis pravitatis messis succrescat plerumque copiosissima, quo nomine Umbri quondam famosissimi erant. Marius Pompejus, Julius Cæsar, celebratissimi illi Romanorum Heroes, habitationes in altis montosis locis elegerunt spretis urbibus magnis & civibus arctis, in quibus ne voluptatibus, quæ ibi ut plurimum regnant, vario modo caperentur. Cyrus Persarum R. nolebat montosam asperamque regionem cum campestri & molliore commutare, ratus, se velle duros homines & laboribus accommodos. PLUTARCHVS in *Reg. Apoph.*

§. XVI. Enim vero, ut omnem pene alias felicitatem quædam flagellat calamitas & ubique fere quædam quasi mellis & fellis conjugatio est: Ita vulgo etiam montium incolatui ponitur in vitio, accolæ non modo sæpius tempestatum varietates subitaneas, atque in uno sæpius die, mox excessivum æstus, mox intolerabile frigus experiri, quibus repentinis vicissitudinibus, aër Constantinopolitanus imprimis etiam est subjectus, ut habet P. DE LA VALLE *Itiner. Part. I. pag. 22.* sed & frigidiorum & acrem molestumque Jovem, nives copiosas sæpiusque æstivas atque pruinas non bene ferendas pati, a quo duriori frigore constrictivo partes nervosæ membranaceæ, notabiliter lædantur, transpiratio impediatur & innumeris atque velocibus mutationibus exponatur, humorum impetus & copia ad caput, pectus, artus, & partes extremas pellatur, unde rebelles fiant stagnationes, humorum & vasorum obstructiones, periculosæ cephalalgia, apoplexia, pleuritides, peripneumonia, vertigines, affectus soporosi, paralyses, oculorum lippitudines, rubedines, obfuscationes, tussis, rheumatismi & fluxiones, arthritides, dolores acuti &c. Ulterius quidem contendunt, hæc loca effluviis acrioribus, sali-

salinis, fulphureis, impuris, acidis, venenatis, malignis sæpius afflari, quæ ex mineralibus effluunt, & circa montes ascendunt, gramina etiam depascentibus. Quæ exhalationes, interdum referente BECHERO in *Physica subterr.* p. 71. per aliquot milliaria pertingunt. Denique asserunt, ut plurimum loca montosa radiis solaribus nimis esse exposita, qui sua præsentia, reflexione ac effluviis terræ sicciorum elevatione molestiam creent atque exæstuationem magnam, ut Chimæra Lyciæ juxta illud HORATII:

Me nec Chimæra spiritus ignea

Divellet unquam - - -

Monticolasque aquas bibere minus sanas nivales constringentes, ex quibus scrophulis fœdis notentur. In hujus rei exemplum atque probationem montium Pyrenæorum, Alpium, accolæ, Stiriam, Carinthiam, montanas Hungariæ civitates, imprimis Cremnitium, metalli fodinis celebratissimum, & Silesiæ Schmidebergam, oppida circumjacentesque varios pagos, ad ipsorum montium sudetorum radices sitos, inhabitantes recitant, qui exinde his aliisque morbis afficerentur.

§. XVII. Equidem etsi concedamus, quod in locis montanis aër frigidior sit atque asperior ob lateraliter incidentes solis radios, qui hic se minus expandere ac colligere possunt, aëre etiam rariore ætherem libere transmittente, campestribus, ubi cuncta gelu rigent canaque nive, pruina, glacie grandineque teguntur, atque haud raro, mediis etiam in canicularibus, ventis perflantur, adeo frigidis, ut contra illorum injuriam in hypocaustis calefactis refugium remediumque quærant, hyememque præcocem ac longiorem patiuntur, ut quidam horum locorum asperitatem SILII Poëtæ verbis exaggerare satagunt:

- - - Cælum intercipit umbra.

Nullum ver usquam, nullique æstatis honores.

Sola jugis habitat diris sedesque tuetur,

Perpetuas deformis hyems: illa undique nubes

Hac atras agit & mixtos cum grandine imbres

Jam cuncti flatus ventique furentia regna

Clivosa posuere domo, Caligat in altis

Obtutus saxis, abeuntque in nubila montes.

Ejusmodi præ aliis dicuntur de montibus Riphæis, de Argio, Sythone, Peta, Crinone, Scarfo & Sula in confinio Suædiæ apud OLAVM M.
Lib. II.

Lib. II. Cap. XIII. IOH. JACOB. WEPFERS in *Observ. de apopl.* p. 260. scribit: Accolæ montis S. Gothardi in Helvetia singulis fere annis experiuntur ignavius transeuntes primum sopore opprimi atque dein totos congelascere, spiritum animalium culpa, quos primum pati dormiendi magna necessitas docet. Frigus tamen hoc siccum est & purum, exsiccans & confortans, per contractionem agens, quod hic adeo simpliciter & directe non nocet, si modo non prorsus intemperans ac si non improvide admittatur, & vestibis sint homines bene & debite contra illud muniti ac tecti, ut potius profit & conferat ad sanitatem, agilitatem, mentis & corporis, ac longævitatē, quia calorem, spiritus animales, vires ne diffilentur, poros opstipando cohibet, sed intus potius detinet, condensat, conservat & auget, corruptionem atque putredinem avertit excrementitiorum humorum accretionem inhibet, viscerum secretiones promovet, corpora reddit mobilia, expeditiora, elaterem fibrarum, fluida impellentem, roborat, tonum & robur partium præstando. Quivis enim in se ipso percipit, tempore hyemali, aëre existente frigido & sicco, corpus & animum esse alacrem ad quasvis functiones obeundas & perficiendas aptissimum. Videmus etiam, quando excedit aëris qualitatum naturalis, secundum tempora constitutio, vel quando hyems humore & frigore æque ac æstas calore & siccitate exsuperat, morbos succedentes per tempora minus periculosos esse; secus quando hyems calida & sicca existit, æstas vero hyemis naturam induit, tunc morbi ingruentes majori pernicie homines afficiunt. Sicuti HIPPOCRATES *Sect. III. Aphor. 11. 12. 13. 14.* explicuit. Quare factum est, (ut paulisper huic contemplationi inhæreamus) ut incolas septentrionales præ aliis feliciores & beatiores dicere necesse habuerit GOCLEN. *de Vita prerog.* p. 20. Insuper nives æstivæ æstum æstivum temperant commode, adeo hæc mira coeli inclementiæ indulgentissimæ Naturæ lenientis beneficio liberaliter pensatur. Terræ pori magis constringuntur, & effluvia crassiora, humida, impura, avertuntur & detinentur. Hoc nomine Orcades Insulæ etiam memorabiles sunt. POLYDORVS *Lib. I. & H. Boeth. in Scotia.* Jam dudum HIPPOCRATES prædicavit *Lib. de aëre, aquis & loc.* incolas regionum, quos venti frigidi & sicci afflant, diuturnioris vitæ quam alios esse. Notissimum quoque est septentrionales populos Suecos &c. esse præ aliis robustos atque firmiora habentes corpora & animi etiam mores ad tolerantiam magis formatos, statura proceros, sanos atque longævos foeminasque in specie admodum foecundas (haud leve aëris salubris indicium.) De iis enim OLAVS

RVD BECKIUS in *Atlantica* refert: in Suecia tantam hominum esse fertilitatem, ut foeminae ordinario VIII. IX. X. XII. imo XIV. nec raro XIIIX. XX. XXIV. XXIX. & XXX. pariant infantes, atque vivere homines ordinario LXX. LXXX. annos, nec insoliti quid esse, illic videre homines C. & plurium annorum. Hanc foeminarum foecunditatem inter indicia salubris aëris quoque reponit W. PISO *Hist. Nat. & Med. Brasil Lib. I.* Sic enim scribit, Brasiliæ aërem laudans: *Fœminæ non deformes ab octennio ultra sexagesimum annum supra fidem foecundæ, immo septuagenariæ infantes lactantes visæ sunt, facili negotio & nemini obstetricante pariunt, rarissime abortientes*, Quamvis minime negandum, quod non parum etiam ad summam harum rerum valeat longa, imo veluti connata, consuetudo. Nec rursum pruinæ loca montana adeo offendunt, potius rore quotidiano eoque miti, pingui, tenui, sale subtili, volatili, nitroso, imprægnato, insigni roborante virtute prædito, humectantur & recreantur, quod saccharum utilissimum & occultum, optimumque vitæ cibum, & naturæ humanæ gratissimum ex HELMONTII sententia *Tr. imag. ferm. pag. 33.* continet. Hinc & BACODE VERVLAM. ut legere est *Hist. Nat. Cent. VIII. p. 917.* suadet, si in usus medicos ros majalis colligendus esset, in montibus illum esse quærendum, quoniam multum is dissipatur, antequam ad valles perveniat. Largi imbres, frequentes, felices & tempestive decidentes æstum nimium temperantes & extemporaneos & novos torrentes facientes, ibi atmosphæram, si quid caustici effluviis forte insit, depurant & corrigunt optime. De iis enim ex historiis constat, pestilentiam frequentem in Ægypto cessare protinus, in media æstate imbribus nimium assiduis decidentibus, a quibus ideo & notanter salubritatem Brasiliæ deprædicat, quod ea multis imbribus irrigetur, supra multoties laudatus WILHELMVS PISO *Hist. Nat. & Med.* Videntur & videantur etiam sæpius circa montes forte editiores nebulæ, quod inter alios Silefii de monte Giganteo suo norunt; de quo dicitur, quod caput intra nubila condant; nihil tamen & hoc impedit, quo minus hætenus affirmatum teneamus, quod vel hoc ipsum aëris levitatis indicium sit, siquidem effluvia minus a premente aëre impediuntur. Ipsæ enim rariores sunt & tenuiores, nec diutius ibi hærent, sed exoriente operanteque sole, brevi iterum solvuntur, discutiuntur ac abeunt serenaque tempestas iterum exhilarat, quando in campestribus planisque locis pluvia frequenter, largiter atque præter modum humectat. Altissimi rursus montes neque ventos neque pluviam experiuntur, quemadmodum Athos ingens Thraciæ mons, de quo Pomponius Mela tradidit, in aris, in ejus

T

vertice

vertice exstructis, cinerem in eodem cumulo semper manere. Rursum montium, aër æstivo tempore aliquando damnosus est secundum Platonem in Thymæo, nempe quando siccitates maximæ oriuntur, tunc enim, ut ipse asserit, tutius est, circa fluvios degere, quam in locis editis & aridis. SENNERTO item facile annuere possumus, *Instit. Med. L. IV. P. I. c. II.* scribenti: *Loca metallica venenosam sæpe & malignam auram exspirant, & de acrioribus & causticis, quæ sæpe spargunt, effluviis, quæ arsenicalia, saturnina, & mercurialia vocant, participant.* Item pari asseveratione affirmamus, ob hæc accolæ, varia mala variosque casus, vertigines, colicam eamque convulsivam, cordis palpitationes, luridum faciei colorem, lipothymias, phthisin, tremores & dolores artuum vitæque brevitatem experiri: Verum enim vero, non de omnibus incolis atque accolis, sed de iis maxime, qui ipsos metallarios labores tractant, aut qui circa has officinas habitant, non de omnibus ejusmodi locis, neque de omnibus temporibus, neque de omnibus effluviis metallicis hoc intelligendum est. Nam si eadem blanda sint, temperata, acidula, adeo non nocent, ut potius profint, quippe spirituosæ & acidulæ particulæ volatilitatem atmosphæræ augment & putredinem præcavent, ex quo magnum salubritatis aëri momentum accedit. Nolumus equidem seorsim & longius hic probare atque laudare effluvia aurea atque argentea, ob quæ multi ejusmodi loca horumque locorum atmosphæram iisdem refertam ratione salubritatis adeo extollunt, ut constat atmosphæram tractus montium Sudetorum Bohemiam inter atque Silesiam, Carpathicorum, Alpinarum, Pyrenæorum item Piniferi ideo laudari, ac si tota eorum aurea atque argentea esset, atque ubi naturale aurum & argentum potabile quasi gratis haurire quis posset. Qui velit, legat *die Beschreibung des Fichtel-Berges p. 134. seqq.* Hinc ad fertilitatem vegetabilium faciunt eadem, siquidem, ut perspectum est, illa loca pulcherrimos producant fructus & cito maturescentes, plantas, herbas & flores balsamicos. Atque compertum est, ab ejusmodi exhalationibus obduci superficiem terræ, calce quadam subtili, quæ pluvia accedente, leniter incalescit; quæ incalescentia terræ foecunditatem & atmosphæræ salubritatem majorem foeneratur. Hoc argumentum exponit BASILIUS VALENTINVS *Lib. de metalli fod. & ear. orig. C. V. & VII.* non indiligens harum rerum censor, qui in *Cap. XXIII.* rationem causamque repetit, quamobrem Hungariæ regio tota metallifera, frugum omnium fertilissima, & (alioquin si cætera essent paria, si paludes, quibus ea admodum frequens est, non adversarentur &c.) sit saluberrima. Porro cum non desint, qui perhi-

perhibent, loca montana maxime tempestatum variationibus esse obnoxia, quia Hippocrates dixit: Mutationes temporum parere morbos, & in ipsis temporibus magnas mutationes aut frigoris aut caloris esse. Tempestatum vero æqualitates magis experiuntur regiones planae atque campestres, quam ob rem loca sub Æquatore sita atque vicina, adeo salubria deprædicant plurimi, (merito ne an secus, jam quidem non dirimemus) Ast ea tantum loca sunt ideo suspecta, quæ circumpositos certo modo habent alios montes, & quæ palustria simul sunt, in quibus circa meridiem calidior aër est, circa vesperam & per totam noctem frigidior imprimis autumnus, quam ob rem Hungaria imprimis accusatur. Fulgura etiam atque tonitrua, montanis in locis crebriora, quia ut metallorum ita & sulphuris quoque venæ sunt ibi frequentiores atque ejusmodi evaporationes hic dissipantur, illic iterum colliguntur collectæque firmiter detinentur sicque fortius quam alibi effectum suum edunt & cum magno fragore incidunt, corruscant ac intonant &c. Verum monticolæ ea vehementius adeo non metuunt, sed potius atmosphæram bene temperatam atque a nimio æstu liberatam, a fumis purgatam atque sic bene depuratam & liquidiores, agitatas salubribusque particulis subtilibus, nitrosis & sulphureis imprægnatas, exinde sibi certissime promittunt; siquidem & ordinario fere imbres salubres hominibus pariter ac vegetabilibus admodum proficuos fertilesque simul effunduntur. Nec alia ejusmodi meteora lucida hic etiam satis frequentia ob eandem rationem a vana superstitione intactis sunt suspecta, ut dracones volantes, dicta, & stellæ cadentes, quæ materiam gelatinosam, quæ cœli flos appellatur & in pratis, agris aliisque locis, mane ante solis ortum adhuc reperibilis est, exoriente enim sole liquefit, ex qua medicinam magnarum virium quidam parare solent, vid. *Eph. G. N. C. An. VI. App. BORRELL. Cent. III. obs. 4. PARACELSVS de vita longa Lib. IV. c. II. & VIII. item de signat. rer. nat. 1. 9.* Siquidem & vecordes saltem spectra diabolica qualia olim Sphinx in montibus Thebanis & hodiernum Riebenzahl in monte Giganteo Bohemiæ eorumque tumultus ac illusiones atque tinnitus Aegipanorum Satyrorumque loca montana solitaria atque non habitata, inhabitantia formidant, æque ac mugitus ac strepitus indices futuræ tempestatis, quales assidue Paonis Chinæ mons edit. Verendæ quidem hic quandoque & quibusdam in locis montanis sunt haud exiguæ illæ strages globorum niveorum, quas SCHEVCHZERS in *den Natur-Geschichten des Schweizerlandes T. I. p. 147. seq. & in Stæchiograph. P. I. p. 145. seq.* adducit; sed sunt etiam cautelæ quibus his obviam

iri potest. Metum etiam cuivis facile incutere & incolatum montanum periculosum reddere possunt montium casus, inter quos cum primis memorabilis est, qui celebre illud oppidum, Plurium & pagum Schillanum in Rhætia derepente defodit, cuius mentionem injicit modo Laudatus SCHECHZERVVS l. c. p. 127. *seq.* conf. & FORTVN. SPRECHER in *Histor. motuum & bellor. Rhetiae* p. 63. *seq.* rariores tamen hi casus sunt quorum contingentia plures non deterrent.

§. XVIII. Ambabus licet tandem largiâmur, experientia edocente, monticolas quosdam quandoque apoplexiis & peripneumoniis, (quas & alias aëri arenoso adscribunt, unde & in Nova Hispania, imprimis in urbe Mexicana frequentissimas eas esse referunt, vid. GOTTFRIED *Hist. Antiqu. P. III. p. 608*) & præ aliis esse obnoxios; Quod vero maxime saltem de illis est intelligendum, qui circa metalli fodinas habitant, aut potius ejusmodi labores tractant, (metallarii enim præsertim iis laborant) metalla & lithargyrium imprimis fundendo & fumos saturninos, antimoniales, mercuriales, vitriolicos, aluminosos, arsenicales & malignos improprie ore excipiunt. Quanquam non negandum est, ipsorum tractuum montosorum conditionem, quandoque ad hæc mala aliquid contribuere, si nimirum ita sunt comparati, ut radios solis frequentes nimis reflectant, quibus si ibi degentes caput nudum præsertim diutius exponant, facile periculum hoc incurrere possent; nec abs re est, hæc mala iis facile accidere, qui auræ frigidiori, qualis magis montana est, corpus calefactum, imprimis labore & exercitiis, incaute exponunt. Ad utrumque accedit, quod ut plurimum monticolæ sanguinei & plethorici sunt, qui status humorum ad ejusmodi fere est proclivis. Sed contra hos casus facile datur præsidium, modo indicata si prævideantur. Strumæ & scrofulæ colli potissimum adscribuntur aquæ, quæ ex certis rivulis promanat & natos ibi fontes sæpe inquinat, vel quæ ex nivibus colliquatis magno impetu a montibus defluit, a cujus potu si abstineant non facile a reliquis causis metuenda est noxa, quod mihi notum exploratumque de patria est: in iis nimirum locis, quorum supra modo mentio facta est, incolæ strumis & scrofulis colli quondam notati ut plurimum erant, sed ex quo ab usu certorum quorundam rivulorum, ex metalliferis montibus, abstinuerunt, non adeo frequentes ac quondam eas experiuntur. Hanc aquam cum subjecit Præses examini, limpidam & claram saporis & odoris fere nullius deprehendit, ex decoctione & evaporatione vero pinguis, & flavescens ex nigricante limus est

est relictus, acrem constringentemque linguæ imprimens saporem. Prompti tandem concedamus quoque, quod ambulationes per montana loca attinet, epilepticis & vertiginosis, has maxime esse verendas, quoniam sic facile certeque paroxysmos sibi conciliare possunt.

* * * * *

IV.

DISSERTATIO
PHYSICO-MEDICA

DE

THERMIS HIRSCHBERGENSIBVS.

PROOEMIUM.

DEus in omnibus suis operibus plane mirabilis est; maxime vero in hoc universo Deus T. O. M. mirandam omnipotentiam, sapientiam, providentiam, summam rectricem manum atque gratiam suam, quas hominibus, quos perpetuos sapientiæ divinæ spectatores esse voluit, monstravit atque largitus est, celebrasse, in aquis videtur, quæ & ex merito pensitantibus plenæ sunt mysteriorum divinorum, adeo, ut vel simplicem aquam simplicem, seu innanam æstimare simplicitas ingenii esset: Si modo adeamus Librum librorum, Scripturam puto Sacram, præcipua & miranda ibi inveniuntur hujus rei exempla, quæ non tam ad cognitionem historicam, quam ad summi atque sapientissimi Creatoris reverentiam commemoro. Aqua ex petra producta solo baculi Moïsis contactu, ut sitienti populo subveniret *Exod. XXVII, 6.* Aqua amara in dulcem mutata. *2. Reg. II, 20.* Piscinæ prope Aream templi Salomonis virtutes. *Job. V.* Vis cœlitus concessa Jordano a lepra mundans. *2. Reg. V, 10. 14.* Fons Siloha cœco visum restaurans. *Job. IX, 7.* Divisio maris, ut transitum concederet Populo Israëlítico. *Exod. XIV.* Diluvium. *Gen. VI. VII.* Mutata aqua in nuptiis Cananæis in vinum. *Job. III.* Transmutatio fluminum, lacuum in sanguinem &c. *Exod. VII, 20.* uberrima hujus rei argumenta sunt & documenta. Quanta quæso aquis prærogativa, quanta dignitas accessit! dum de illis legi-

tur, quod Spiritus Dei *Genes. I.* in prima creatione ferebatur supra aquas, & dum aqua Sacro - Sanctum Baptismatis foedus hoc salutiferum, nobis Christianis instituere & regenerationem ad æternam vitam largiri Deo T. O. M. placuit, declaratque: Nisi quis renatus fuerit ex aqua & Spiritu Sancto, non intrabit in regnum cœlorum. Conveniens satis S. AVGVSTINI lectio est *de cat. C. III.* talem aquæ virtutem deprædicans: Aqua Baptismi non solum corporis fordes mundat, sed animam a peccato quoque liberat: Quin immo Deus ipse in verbo suo tanquam fontem salientem se manifestavit *Jerem. II, 13.* Si historiam naturalem prælibare paulisper velimus, mira ubique contemplanda in aqueo regno sese offerent, Majestatemque summam sapientissimi Creatoris exinde præclare elucescentem admirari laudareque argumenta sunt & stimuli. Si consideramus aquarum saltem originem, distributionem, conjunctas & sæpius prodigiosas proprietates, effectus & usus, nihil magis necessarium, nihilque magis utile ac admirandum reperimus. Aqua enim a qua omnia variarum in natura mutationum causa existit; omnia repurgat, magno foenore ditat, innumeris multifariisque creaturis scatet, & sine aqua nihil crescit, aut nulla generatio, foecundatio, nutritio vel auctio in omnibus naturæ regnis celebrari potest; nihil sine ea vivit, nulla sine ea humorum vel sanguinis progressio in vasis animalium, vel secretio, aut inutilium excretio perficitur; verbo, si pro utilitate juste æstimetur, nullis naturæ aut artis opibus valore cederet. Quis non miratur Nili excursionem statò semper tempore & ordine procedentem, præclarum providentiæ divinæ signum, aridas & steriles terras irrigando & foecundando? Quis est adeo a religione, quis ab humanitate adeo alienus, qui non singulas pluviarum guttas Benignissimi Dei mirabilia dona existimet? Quis intuetur fluxum & refluxum maris, qui non statim in admirationem rapiatur? Etsi omnia admiratione digna circa aquas, fontes & flumina animo volvere & literis consignare velimus, ingens fane volumen ea vix caperet, quare coactus mihi tempero, ut illa silentio jam prætermittam & nihil quam hoc addam: non indignum esse Christiano, qui reputet: Singulos fontes ostendere Dei T. O. M. magnitudinem. Scite PLINIVS, prodigia hujusmodi propemodum humana fide superiora suspiciens, inquit *L. XXXI. Hist. Nat. C. II.* Si quis fide carere ex his aliqua arbitratur, discat in nulla parte majora esse miracula. Accepimus apud ethnicos multam aquarum dignitatem fuisse, oracula & numina ibi habitare, Græcos Latinosque putasse, quare sacram illam nominabant, atque omni reverentia dignam HESIO DO Auctore *Oper. 5. dier. 256.* habebant.

bebant ut & de Aegyptiis legimus Vid. COEL. RODIGINVM in *Antiquis lect.* L. XXVII. L. V. illos aquam adorasse, conspersamque in populum vitia delere credidisse. Eandem virtutem Persæ aquis Mithræ, Græci Hissi, Justinus, Virgilius, Curtius, Romani generatim aquæ Mercurii adscribebant. Divinum cultum tribuebant Cares fonti Salmacidi, Syracusani Aretusæ, Samii fonti Junonis, Græci Hippocrenes, Romani Blandusiæ & Chamænarum & sacrificia offerebant. Lacedæmonii stagnum non procul ab altaribus Aesculapii, Phrygi Mæandrum & Marsiam fluvios, Aegyptii Nilum, Indi Gangem pro sacris habebant, Romani quovis anno Id. 3. Octob. ut ex Varrone accepimus, Fontanalia sua celebrabant, fontes fertis cingebant, & in aquam flores spergebant, hinc natum illud: Si aquam hauris, fontem corona. Atque adeo jurantis sponsione facta ad ejusmodi fontes perjurii ultores accedebant, ut Aristoteles de Acadino, Solinus de Sardinia, Philistratus de frigido Thyana fonte notant. Credebant etiam, quod dii & sidera nutrentur vaporibus ex mari & fluminibus ascendentibus. Quare optime monuit Hesiodus, ut ne quisquam aquam transenderet, nisi effusa prius devotione precum.

Si denique ad fontes soterios & thermas accedimus, quam miram aquarum dignitatem deprehendimus in illarum natura, calore, effectibus! Quis est, qui illas non mirabiles plane dixerit? Sacras illas jam olim Aristoteles nuncupavit; alii ex priscis ethnicis ut morbos ad iram deorum immortalium referebant, ita & ideo deorum manus illas vocabant, & eas maxima reverentia velut deorum munera adire relicto aut sacro & voto solebant. His fontibus ut morborum domitoribus Ephydriades præesse putabant; Calderianos Junoni, Granios Apollini, Borbonicos Mammonæ, Albulas Hyegeæ, Clusias Aesculapio sacrabant. Immo inter Christianos quoque obtinet, ut a Divis nomina gerant: Nec immerito GREG. NAZIANZ. L. II. *Theol.* hæc balnea Dei gratuita munera appellat, pauperibus æque ac locupletibus communia & libera. Et profecto, ubi artis opus deficit humanæ, natura hic loco artis est, immo longe illam superat. Nam si vera fateri velimus, optimam medicinæ partem hoc aquarum genus constituit, divina plane præstat in morborum curatione, & quæ ab aliis remediis frustra expectantur, ubi omnes etiam auxiliorum apparatus vix sufficiunt, divinum auctorem Deum T. O. M. agnoscens atque non nihil ex benignitate miraculorum divinorum participans; unde & illud ultima appellatio Medicorum dicitur. Hæc officina est, in quibus Natura ipsa medicinam facit, artis suæ Majestatem infinitis miraculis quot diebus declarat atque confirmat.

Inter

Inter ejusmodi primas facile hodie numerantur Thermæ Hirschbergenſes grato & dulciſſimo patriæ ſolo memorabiles; eas idcirco dignas habui, quas curatius conſiderandas aggrederer. His auſibus Deus T. O. M. veritatis & bonitatis fons inexhauſtus ex alto clementiſſime indulgeat.

C A P V T I.

Thermas Hirschbergenſes ſecundum ſitum, ortum faciem conditioneſque alias externas deſcribit.

§. I.

Sileſiæ felicis felicitati quoque thermæ Hirschbergenſes famulantur, quæ in Sileſiæ inferioris Ducatu Jauroviendi juxta fines Bohemiæ, & montes, quos Ptolomæus, Sudetos videtur appellafſe, verſus meridiem ſpectantes, ſitum ſuum obtinet. Hirschbergenſes vulgo vocantur, quia ſupra Hirschbergam (haud ignobile oppidum, ædificiis ſat elegantibus ornatum, civibus non infrequens, atque mercatura linteaminibus candefactis, aquæ exteris quoque celebre) in pago quodam, ad quem ab ipſa campeſtri & amœno unius ſaltem horæ itinere itur, cui a thermis nomen (Warm-Brunn) inditum eſt, promanant, ut ſolent fere hi calidarum aquarum fontes locis in quibus ſcaturiunt, aut nomen & celebritatem afferre, aut a vicinis aſſumere, neque alio modo multa in Germania, Bohemia, Hungaria, Helvetia, Anglia, Gallia, Hiſpania alibique clara ſunt loca. In medio enim hujus pagi ipſæ thermæ monſtrantur, ædificiis binis ſeparatis circumſtructis conſpicuæ. Regio edita & tota eſt ferme montana, vallibus arborum virentium ſerie obſitis, ſylvis in magnum ſpatium diffuſis, & ſaltibus, præceris arboribus umbroſis, pratis gemmantibus, ſegetibusque ad proſpectum jucundis interdiftincta, plana tamen & recta regione magis, minus in latitudinem ſpatioſa. Qua vergit ad orientem & ſeptentrionem, ad latera utrinque montes interpoſiti depreſſi magis, ventorum aditum concedunt, qui vario limine exſurgentes tandem paulatim cum aliis iisque altioribus cœunt, concatenatis eorum tractibus planitiem claudunt. Verſus meridiem præſertim in agros fertiliffimos ac prata lætiſſima oculis ad milliariſ ſpatium ad uſque arcem elatam decurrit, ubique objecta rerum facie qua nihil cerni jucundius venuſtiſque poteſt. Claret merito hujus loci ager ea amœnitatis laude, qua Flaccus Bajæ celebrat. Exinde elati
montes

montes ab hac plaga ad occidentem maxime se extendunt, pone quos perpetua præaltaque atque giganteæ prorsus molis montium, Sudetorum jugera jacent, quorum summus apex (*die Schnee-Koppe*) inter nubila sæpe conditur. Cum itaque regio alta sit & montana, saluberrima illa habetur. Hinc & Plato jam memorat, se in altissimis & temperatis regionibus invenisse valde longævus. Hinc & Apennini montes Lydiæ, Athos inter Macedoniam & Thraciam mons, eo nomine celebres sunt, quod incolas sanos alant atque longævus.

§. II. Solum est modice siccum & alendis frugibus sat mite, ac arboribus & fruticibus resinosis, balsamicis plantis & herbis varii generis suave fragrantibus, (quarum major copia, quam vel in Hæmonio saltu & Colchide) quæ aërem attenuare & salubriorem reddere possunt, & pascuis pecorum pinguibus & salubribus frequens existit, ibidemque lætis inerrant collibus densi greges. Interfluit pagum liquidissimus fluvius ex ipsis montium jugis promanans Zacka dictus, qui cum Bōbera prope Hirschbergam suas aquas miscet, nomenque suum dimittit, quibus ibi confluentibus, jucundo spectaculo duos hos fluvios, colore aquarum differentes, aquis quasi separatis, ad tempus profluere (quod & de Rheno Lemantum lacum præterlabente & de Benaco memoriæ traditur) cernimus, usque dum magis magisque inter se commisceantur, & deinceps montes, utroque latere prominentes, nemoribus obritos recto alveo stringunt, & inter illorum angustias ad septentrionalem regionem simul inter se uniti decurrunt. Insuper variis aliis & perennibus crySTALLINIS aquis, glareosis, dulcibus dulcique strepitu per rivulos torrentesque decurrentibus, & vel in media æstate gelidis, gustui non ingratis & optimis, salubribus (nec Nili ideo aquis secundis) abundat iisdemque rigatur. Nulli lacus nullæque paludes ibi inveniuntur, vel non tales, quæ aërem inquinare possent; Sic & perflatur aëre elastico, æquali, sereno, puro, salubribus ventorum flatibus agitato, ad frigiditatem tamen potius inclinante. Idcirco placida Cœli temperies verno alias tempori maxime similis, omnesque deinceps anni partes, pari salubritate percurrit; nec alia regio in tota Silesia (ne majus quid dicam) salubrior habetur. Adeo benigno vultu respicit illam Cœlum, quam florida Silesiæ Tempe non inconvenienter dixeris cum valli Sedunensi & Carbathi convallibus comparandam. Jactet vicina Bohemia vid. BALBIN. C. V. *Misc. hist.* R. B. aëris sui salubritatem, Neapolis Neapolitani. Jactent Hispani ea propter Madritum & Granadam, Regnum & urbem Valentia, Asiæ Aleppum ac Antiochiam, Asiæ ac montem Libanum

banum, Brasiliam alii. Jactent antiqui insulas Canarias, Fortunatas, urbem agrumque Atheniensem, nos aeris nostri salubritatem merito extolimus, quia patriam nostram commendat. Jure ipsa illi vendicat gloriam, quam Nonius Brasiliæ & Hispaniæ tribuit. Hinc & non facile morbi illi, qui ad levitatem & gravitatem sive tenuitatem & densitatem aëris adeoque ejusdem pressionem corporumque resistantiam facientem rationem vitiant, contagiosi, epidemici maligni, pestis &c. obveniunt, nec si aliunde forte illuc transferantur, diu durant. Incolæ ac accolæ inde quoque sani, vegeti, robusti, alacres, longævi, moribus integris & jucundis, apparent. Quo speciatim memoria subit VALER. HENR. VOGLE-
RVM in *Dict. Comment. Cap. XXVI. p. 184.* observasse in thermarum accolarum corporibus atque adeo eorum facie, vim aeris ex igne subterraneo, quem supponimus, ejusque vaporibus exeuntibus calidioris ac sicci-
oris deprehendi. Sicque in illis reperiuntur agris; quæ delectent, quæ juvent, aere, aqua & loco in communem quasi salutem conspirantibus.

§. III. Quumque regio ista plurima ex parte montosa sit, non modo varii salientes & irrigui fontes, innumeraque proficua vegetabilia, sed & multæ mineræ, metalla, etiam nobiliora (atque lapides &c.) illam commendant, quæ condit. Quare montes illos non telluris inania tubera, sed ubera non modo necessaria, sed & maxime utilia atque quæ ad elegantiam & perfectionem globi terraquei faciunt, verius habeas, ut & olim maximum lucrum ex illis redundabat. Siquidem hoc nostro quoque ævo per aliquot abhinc lustra variæ metallorum nobiliorum venæ hinc inde inventæ sunt, immo hodie adhuc debito instrumento adhibito, multis in locis vicinis illæ patefiunt. Ne multus nimis in recensendis illis videar, de singulis remitto B. L. ad Schwenckfeldium, Hen-
nelium aliosque, saltem additurus, quod magis ad præsens facit institutum, atque ad ortum, indolem & ingredientia thermarum demonstranda, (aquæ enim a mineris locorum suorum natalium participare solent) nimirum dari circa Hirschbergam & in montibus Riphæis fama celebratissimis illis a Riphato Gomeri filio, Riphæorum Sarmaticæ gentis Principe, (ut Ptolemæi lectio habet) dictis & fabulosis infamibus larvis, varios fontes sulphure scatentes, dari & alios vitriolum & ferrum continentes; quin immo acidulæ binæ in ipsis montibus Sudetis & adjacentem pagum Seidorf reperiuntur. In ipso pago juxta molendinum, rivulus a pagis & montibus adjacentibus excurrit, qui secum copiosam terram luteam, particulas ferreas continentem, advehit, Schmi-
deber-

debergæ divites ferri fodinæ habentur, in pago Schreiberfau alumen & vitriolum confectum est, argillæ quoque varii coloris, nigræ, albæ, luteæ, rubræ circa Hirschbergam, circaque pagos thermas adjacentes se produnt.

§. IV. Aestimato loco, cœlo & terra, quorum æstimatio in ejusmodi scrutinio utique necessaria est, atque ansam concedit, ut natura & particulæ specificæ, quæ ingrediuntur, felicius evolvantur, simulque salubritatem quandam indicat, quoniam aquæ de illorum puritate participant, jam propius accedamus, ut fontes nostros perspiciamus. In ipso pago Warmbrunn thermæ nostræ ex duobus diversis fontibus, exiguo intervallo inter se distantibus, placide scaturiunt: uterque hodie ædificiis binis separatis circumdatus est atque conclusus; intus totum thermarum ambitum tepidaria atque apodyteria in usum balneantium circumveniunt. In medio illorum ædificiorum colliguntur thermarum aquæ in scrobibus effossis, qui uterque circulo fere sexangulari lapideo inclusus est. Alter ex his fontibus ad Illustriss. Familiam Schafgotschianam & sanguine & virtute claram propaginem, alter ad Abbatiam Grünsensem ejusque Præposituram ibi constitutam pertinet. Uterque æquali fere ambitu, latitudine quinque circiter pedes, profunditate totidem fere cubitus complectitur, ut in singulo XX. homines simul sedere ad mentum usque aut stare possint. Quo longius ad inferiora versus protenditur ille, qui ad Cœnobium pertinet, paulatim subjectæ petræ arctius coeunt, & angustius inter se spatium aquis relinquunt. Ex his saxi partim arte, partim natura, partim vi aquæ profluentis excavatis, continuo & æqualiter aqua scaturit non sine curiosorum spectatorum oblectatione ac admiratione, fundus glaream, cum lapillis albis lævibus atque rotundis a Schwenkfeldio Tr. de Sil. foss. ophthalmicis dictis, & lutum, tanquam fontium matricem atque fomitem, quo vapores quidam subtus exhalantes concentrari & in aquam converti possunt, sulphure, bitumine, granis ferreis mixtum, fusco ex viridi luteo cœruleoque colore variegatum, tenet. In altero ex saxoso quidem strato, sed argilla & luto molli, pingui, lento, cœrulescente, copioso, arena intermixta tecto, diversis in locis diversæque scaturigines profiliunt. Si ad summum fastigium pervenerint aquæ defluentes, per canales educuntur, & deferuntur ad lavacrum pauperum dictum, pauperi nimirum plebeculæ liberum relictum, & ex hoc tandem iterum in alia scrobe colliguntur, quæ deinceps balneum equorum dicitur, in quod nempe equos paralyticos, defatigatos, debilitatos variisque morbis cor-

ruptos, equifones ducunt, ex quo in præterfluentem fluvium, Zakam defluunt. Si exhauriuntur fontes ad summum repleti, ille, quem Dn. Præpositus Cœnobii possidet, intra III. cum dimidia horas circiter, tardius vero ad dimidiam ferme horam Illustrissimi Domini Comititis fons aquis iterum adimplentur, & ad fundum usque descensos (homines) aquæ sensim scaturientes in altum simul evehunt atque protrudunt.

§. V. Thermas intrantes in limine statim odorem lixiviosum, sulphureum fumum ac tenebrosum offendunt; plus autem odoris sulphurei & lixiviosi in Thermis Schafgotschianis deprehendes. Aqua in utroque fonte limpida, clara, pellucida, ex albo cœrulea est; Schafgotschianarum tamen Thermarum color ordinario magis turbide albicat, cum multis exorientibus & candentibus bullulis conspicitur, & ad cujusvis tolerantiam calida utraque aqua deprehenditur. In superficie tenuis quasi cremor rarus, pinguiusculus, interdum integræ bituminis, maxime in thermis ad Abbatiam pertinentibus, particulæ, plumarum instar flocculorumque interdum & cinerei pulvisculi quasi internatant. Ubi iterum defluxit aqua & per aliquod temporis intervallum subsistit, ex condensatione forte particularum exhalantium a premente aëre, cuticula crassior & ex cœruleo obscura, flavis ac splendentibus punctis & maculis distincta, odoremque sulphureum ex parte redolens, cernitur. Subjectæ petrae, tabulae lignæ, mucus viscidus, immo interdum materia sulphurea florum ad instar sulphuris asseribus succinctis adhæret. Sic & in faxis, super quæ defluunt aquæ, relinquunt tenuem & viscosam, & in transitu tandem ochram albam, gypseam, atque ex atro cœruleum lutum & spumam, friabilem & in fistulas quasi (quod singulare) digiti & manus longitudinem æquantes cuspidatas formatam, ad canalium latera deponunt, quæ ex molecularum in aere frigidiori separatione, præcipitatione, exsiccatione & coagmentatione per defluxum aquarum thermalium subnascuntur, simili propemodum modo, ac videmus, naturam in coralliorum generatione procedere, de quo videndus *Boccone observ. III. p. 53. & 57.* æque ac artem, quando e marmore aut lapide detricto addita quantitate quadam resinæ aut olei lini massa formatur, quæ a coctione in durissimum lapidem abit. Atque suspicor, fundamentum illarum (fistularum) fibras esse ex canalibus ligneis avulsas, ad quas ejusmodi materia tartarea præcipitata apponitur, ac sic fundamento quasi posito & apice deorsum aqua stillante, fistulas has quoque formari.

§. VI. Duos hos fontes circumveniunt domus, ad usum quidem potius quam cultum exstructæ, in quibus advenæ commoda domicilia

inveniunt. Cæterum omnia ad victum, necessitatem ac commoditatem vitæ pertinentia, mediocri pretio venalia prostant, nihilque deest, quod ad suavem sustentationem requiri possit, & quod forte pagus negat, Hirschberga facile dabit. Multa enim, quæ in deliciis alias haberi solent, indulgentia almæ Naturæ huic nostræ regioni indulsit, & quæ non sunt hujus regionis, importantur a finitimis Bohemis, Hungaris, atque Polonis. Ad ambulationes instituendas, motioneque corpus exercendum, simulque per eas animum recreandum & oblectandum, non tantum ab Illustr. & Excellentiss. D. Comite in hortum prope arcem conspicuum exspatiandi libertas conceditur; sed & invitant & vel aspectu suo movent circumjecti patentes virentesque campi amœnissimi & nemora, quæ oculos animosque, jucundissima varietate, oblectant: Namque invenies atque conspicias in oblongo quasi amphitheatro ut dictum, hinc inde jucundissima ambulacra, mirifice hominum animos recreantia. Si enim planitierum æquabilitatem, camporum ac pratorum viridaria amas, virentia ubique germinantis & fluctuantis segetis arva videbis. Si colles mavis, non procul diversos eosque amabilissimos arborum frondentium multiplici umbrifera serie delectantes, florum fragrantium suavissimos odores spirantes, offendes. Si vallium delicias perlustrare velis, si vertices montium editiores quæris, in quibus circumjacentium regionum, ac amœnæ varietatis naturæque parturientis variegatæ voluptatis, in longum latumque, intuitus est amœnissimus, undique præsto sunt hæc omnia. Si petrarum declivitati adhærere aut si antrorum latibula perreptare tibi volupe sit, si nemora & sylvas umbriferas & grato diversarum avium cantu resonantes, si flumen, rîvulos, torrentesque suavi cum strepitu excurrentes, gammæ & pisciculis plenos, quos vel manu posses prehendere, præferas, in vicinia spectabis Visuntur undique egregio spectaculo cominus eminusque pagi, visuntur arces, hic vetustate, illic novitate se ostentantes. Ut taceam jam de multis ingenua libertate & festivitate conjuncta, mutuis urbanitatis officiis, honestis, hilaribus, amicis colloquiis & conversationibus, quibus in ipsis balneis, omnique tempore opportune convenientium conciliantur animi. Dignantur hic singuli eos amicitia, qui accessum & notitiam quærunt & pro sua sorte unusquisque ad consortium comitate admittitur, inferiores gratiam ineunt superiorum, hi largiuntur eam illis, amica & hilaris familiaritas inter æquales stabilitur. Est hic certe major quam alibi animorum voluntatumque consensio, & societas, fides ac benevolentia mutua, quibus sociabilitas locupletatur atque auge-

tur. Nec non obvenit varia alia non raro animum laxandi occasio. Quæ cum ita sint, non mirum esse debet, si peregrini his commoditatibus allecti, quotannis ex diffitis etiam locis, non solum incolumitatis recuperandæ, aut saltem stabiliendæ & in plurimos dein annos conservandæ, sed & integra (valetudine) etiam alias valentes, auræ vitalis ac salubrioris hauriendæ, atque suaviter vivendi animumque recreandi oblectandique causa, primæ quoque dignitatis personæ atque ejusmodi, quibus in deliciis vita est posita, numerose accedant ac aliquandiu ibi commorentur.

§. VII. De initiis, quibus ortæ sunt thermæ nostræ, hoc scire licet, prout accepta a majoribus memoria refert, quod nimirum inventio & instauratio earum Boleslao Crispo Silesiæ Duci Anno MCLXXV. debeatur, qui amore amœnitatis loci venationumque opportunitate ductus, has oras sæpius accessit, diuque ibi confedit, cui venatores, cum feras prosequeretur, hos fontes calidos casu inventos, indicaverunt, ex quo sic excitatæ sensim in annos augeri cœptæ sunt, atque celebritatem magnam, qua hodie gaudent, acquisiverunt.

C A P V T II.

Originem & causas thermarum generatim & speciatim Hirschbergensium exponit.

§. I.

Thermæ eandem sine dubio originem, ac alii fontes simplices agnoscunt; unde autem fontium origo atque aquarum varietas sit deducenda, autores variant sententiis. Existimant multi, aërem condensatum esse fontium causam, esse vapores aqueos a calore ignium subterraneorum resolutos & per poros terræ elevatos, atque demum frigore torpescerent, sicque in aquam iterum conversos &c. Et dum ex mari per anfractus terræ aquam deductam & collectam præsupponunt, usque dum a calore in vapores resolvatur, dulcedinem huic destillationi quasi adscribunt, mediante, qua partes salinæ in poris terræ deponerentur, atque remanerent, ex quarum collectione & concretione sal fossile, salinas &c. deducunt. Quæ a R. DES CARTES P. P. IV. p. 122. egregie ficta atque picta apparent.

§. II. Verum judicet, qui volet, statuatur, qui potest. Cur ego ab illis

illis dissentiam, causæ mihi bene multæ suppetunt, quæ me hortantur ac movent, ut illa in aquam, quod ajunt, mittam, & Bartholini vestigia premam, qui faciliorem & commodiorem viam demonstravit, & ratione & sensibus magis consentaneam experimentisque firmatam, ut non necesse habeamus circuitione hac uti, & longius petere argumentum. Explicaboque illud, ne ratio desit asserto, nec vires rationi: Scilicet non negandum est, quod jam lateant latices, a Deo Omnipotentissimo & sapientissimo hujus universi conditore, tertio creationis die concreati hinc inde, & hydrophylacia, stagna, lacus, rivi, in terræ visceribus, ibique simul distributam esse per diversas terræ partes magnam aquæ copiam etiam in altissimis sæpe montibus uti de Canato Citerioris Hispaniæ, de Meliboco & monte Pilati prope Lucernam & Cimino Hetururiæ refertur, habentur & in ipsis vicinis montibus Riphæis binæ istæ piscinæ vel potius lacus, quorum aquæ subterraneæ & per canales suos fluunt, refluuntque; Constat hoc ex multis Autorum observationibus & relationibus, testes & hujus rei sunt qui terras confodiunt qui fere ubique terrarum spatio ad summum viginti pedum, vel saltem sex ulnarum interdum perfosso, aquas profilientes, ad minimum terram, arenam aut argillam humidam offendunt. Sic P. Kircherus, Vossius, Colbertus, aquarum receptacula, Seneca & Plinius in subterraneis regionibus magnam inveniri vim aquarum jamdudum tradiderunt, minusque hinc Platonem atque Poëtâs fabulosos pronunciamus, qui in imis terræ oceanum tartareum, Stygem, Cocyrum Phlegethondaque confinxerunt. Ad hoc, in propatulo quoque est, plurimis in locis ubi fero raroque pluit multijugi scaturigine fluentes rivulos reperiri, ut fuse probat R o b. P l o t. in *Tentam. Phil. de Orig. font.* Largiamur Aristoteli, hinc inde, aliquam ex vaporibus subterraneis in luto tanquam receptaculo collectis atque concentratis aquam generari posse, fluuntque & fluant multi fontes & flumina ex Oceano & mari immediate, quæ hinc falsugine abundant & æstuante mari effluunt, recedente decrescunt, per pressionem, per gravitatem, perque fluxum refluxumque ejus atque per occultos cuniculos arenosos, non tantum vicinis ei in locis, sed & interdum per arctos exitus satis remotis; (quamvis compertum sit, loca mari proxima fontibus fere destitui.) Quis tamen temere credat, fontem thermarum nostrarum & vicinorum fluviorum Boberæ atque Zakæ in Silesia e mari excurrere? Hic usque aqua hæret. Minime igitur existimandum est, hanc vel illam causam solam sufficere ad constituendos tantorum & omnium & semper & ubique fluminum perennes fontes atque illorum originem.

Taceam,

Taceam, a staticæ & naturæ legibus valde alienum esse, aquas ex mari tam longe lateque penetrare, & subterranei ignis ope per compactam terræ compagem destillari; aqua enim vix ac ne vix quidem in tantam altitudinem potest ascendere; nam montes ad adeo altum fastigium supra superficiem maris, cujus computum Clariss. Scheuchzerus iniit, ascendunt. Hoc etiam posito, fontes semper atque constanter eandem aquæ copiam redderent. Quod dentur hujus rei plures causæ, exponit multus in hoc argumento, nec indiligens censor J. VOSSIVS de Nili & aliorum *flum. orig. c. V.*

§. III. Perinde pro vero accipio, quod maximum non modo incrementum augmentumque sine dubio a pluvialibus aquis nive, quæ in altioribus montibus per totam æstatem remanet, liquescente, grandine, pruina, rore vaporibusque humidis ubique præsentibus quotidie ingenti copia ex mari aliisque stagnis & fluminibus evectis aërique immixtis in media ejus regione nocteque frigefactis sicque in humorem aquosum atque pluviæ rursus conversis atque in terram recumbentibus maxime hæ aquæ subterraneæ suscipiant, quæ per porosam, arenosam telluris substantiam per lacunas, hiatus, rupium rimas commissurasque penetrant, destillatione quasi perpetua usque dum & quandoque per CCC. pedes descendendo secundum Joh. Raji computum loca lutosa, argillosa & faxea, quorum ingentia strata sub terra & frequentius ad montium apices dantur, de quibus Kircherus in *Mundo subter.* testatur, offendunt, quæ ita sunt comparata, ut tabularum ad instar super tabulas posita sint, eum propemodum in modum, quo flumina inundantia diversis temporibus loca demissa, variis materiis replent, quæ quoad figuram, magnitudinem, extensionem, ductus, varia sunt, quibus in stratis fundamentum generationis fontium consistit, ubi in pelvi velut colliguntur aquæ, & cum sæpius hoc fiat, alveos sibi formant & postea subinde aliarum affluxu auctæ & ex plenis receptaculis suis qua data porta, per occultos meatus perque certos canales, ex terræ gremio, aut ex his stratis effluunt, atque sursum tanquam sponte sua in illa & per lapidum exiles amellas quæ huc faciunt ut experimentis demonstrat EMANVEL SWEDENBOVRGIUS in *Miscell. Observ. circa res nat. p. 48. seq.* feruntur. Adscendunt ac profiliunt pro diversitate diversæ altitudinis scaturiginis variis saltibus quemadmodum videmus in plantas, arbores, ramos foliaque earundem succum sursum & ad usque cacumen eniti; atque aliunde scimus, in tubulis vitreis quo exilioris cavitatis iidem sunt eo altius aquam assurgere. Hinc & obvenit, ut diversæ indolis aquæ ex uno quasi loco & acidulæ nempe
prope

prope aquas simplices calidæ, prope frigidas, uti in nostris fontibus, &c. profiliant. Nec absolum hoc consideranti videtur: fontes reperiri maxime in locis humilioribus, vallibus, montium radicibus, in quæ loca ordinario major imbrium copia quam in planum cadit, & omnia fere grandiora flumina, ex perennibus, arborum reliquarumque plantarum, ex quibus copiosissimæ exhalationes humidæ continuo excitantur, denso agmine consistorum montium altissimorum, vastorum atque in longam seriem dispositorum jugeribus, atque ex illorum occultis meatibus provenire, atque non facile aliquis reperietur mons, e quo nullus vel fons vel rivus vel amnis neque mediate neque immediate derivetur & quo longior, quo magis continuus montium tractus; quo montes altiores, eo copiosiores, diuturniores & in altum magis profilientes, limpidiores quoque, puriores & salubriores (quoniam altius feruntur, ubi impuritates separantur) dari fontes; In campis vero patentibus flumina omnino pauca ac fontes fluere, uti pulcherrime evidenterque præ aliis locis in valle in Kachimiro a Bermierio descripta in Descript. Regni Mojolis cernitur. Conveniens, nec inelegans Regis Prophetæ DAVIDIS lectio est, *Pf. CIV. 10.* Tu scaturire facis fontes in convallibus, ut inter montes fluant &c. Ob quam solam causam, ad fontes nempe constituentes, juxta bene multos alios usus, montes perquam necessarios pariter ac utiles esse censeo, ac ideo etiam Dei Omnipotentis & Sapientissimi rerum Conditoris opera ejusque providentiam admiror ac veneror. Neque impossibile æstumanti apparet, tam vastum jugerum montium spatium & tantam copiam aquarum pluvialium capere & in sinu colligere posse, ac guttas pluviales vel in exiguo temporis v. gr. unius saltem horæ spatio, magnam aquarum copiam conferre; cujus rei calculum congestum legere potes in HAPPELII *Mundo Mirabili P. I. Lib. II. Cap. V.* Si & ulterius perpendimus, res evadet certior, in illis nempe montium cacuminibus, ubi aër semper frigidior existit, nubes & vapores, concentrans, condensansque per continua & integra illorum dorsa frequentes dari vapores, unde quotidie fere observantur nebulæ & spissæ nubes pluviam continuo stillantes, licet in vallibus serena tempestas existat, vel in convallibus quoque illorum, qui nubes excedunt, quod de Olympo, Acho, Tenariffa, Pericaca (monte Peruviano,) monte Veneris in agro Patavino, Apennino &c. dicitur, quorum ad cacumina, neque ventus, neque pluviae unquam pertingunt, quoniam atmosphæræ humidiores exhalationes adscendere usque ad horum apicem vix possunt. Immo quandoque serena satis tempestate ex improvviso imbres

ingentes inibi cadunt; quod in vicinis nostris montibus Riphæis ordinario fere experiuntur ibi degentes, & spectri illius notis vel ficti verius ludibrio, vulgo Rûpicinæ (Riebenzahl) adscribunt creduliores.

§. IV. Dictis facit fidem Halley, qui in montibus S. Helenæ Insulæ tantam condensationem vaporum etiam serena tempestate expertus est, ut intra XV. minuta vitra guttis ita madefierent, ut essent abstergenda, & charta tam brevi tempore ita inficeretur rore, ut atramentum humore dilueret. Quantum decrementum per dies singulos fluvii experiantur aëre sicciore existente, quantumque e contrario crescant pluvia per paucos saltem dies durante, vel nive liquecente, nemo non novit, atque præter alios RAYVS *l. c. p. m. 135.* de Anglia literarum monumentis testatur. Hinc in desertis Arabiæ, aliisve locis calidioribus, ubi raro pluit, rarissimi quoque sunt fontes, & perpauci amnes, vel plerumque mox deficiunt & qui fluunt, ex longe distantibus locis deferuntur. Quin immo observamus, quod ista flumina, quorum præcipua primordia ex altissimis & vastissimis montium jugeribus, devolvuntur, non adeo facile exsiccentur. Sic celebratissimus fluviorum, Nilus Ægyptum ejusque arenosum durumque solum, Niger Nigritiam inundant atque fecundant, existente maximo solis calore, quia nimirum in Abyssina, unde fluunt, ex montibus forte Lunæ & Thala tunc temporis imbres cadunt copiosissimi, per longum temporis intervallum, & nives liquecunt. V. P. DV VALL. *Geogr. G. P. I. p. 189.* Pariter Menam fluvius regnum Siam rigat, quod accidit vernali tempore, quando per tres integros menses pluit, vid. MANDELSLOH. *Itinerar. P. III. p. 184.* Jenifcea & Divina Moscoviæ fluvii Martio & Aprili ex liquefacta nive & pluviis adeo augmentur, ut ille regionem LXX. milliarium, quam ad latitudinem excurrit, riget. Vid. TALANDERS *historische Reisen B. II. p. 7.* Hinc modo laudatus Halley, fluvii alicujus magnitudinem aquarumque, quas exonerat, quantitatem, proportionem respondere longitudini atque altitudini jugerum, unde ejus scaturigines exsurgunt, asserit. Qui fit, quod thermæ piperinæ in Rhætia magno strepitu aquarum erumpant quotannis circa initium Maji, & desinant fluere circa medium Septembris? Non est, cur dubitemus, causam hujus fluxus esse nives, tunc temporis in altissimis montibus liquecentes. Similiter fons Tophanus, dictus Ananiæ, in Campania hyeme siccatur, ineunte vere vero & per totam æstatem aquis abundat. In Vallesia reperiuntur fontes quoque tales & in Hispania & Scotia. Rhodanus fluvius & lacus Lemanus æstate semper majores sunt, quam hyeme. Et si (quod cursim saltem addo) in regionibus

bus calidioribus rariores sunt pluviae, copiosiores tamen accidunt rores
tanquam pluviarum vicarii; (hinc etiam apud nos videmus, quod quan-
do mane ros non decidit, eadem die pluat) quare a PLINIO *H. N. L.*
II. c. LXII. roscidae aestate noctes Africa memorantur. Addendum &
hoc est, quod fluminum fontes parvis & diversis rivulis ex diversis &
diffitis saepe locis exorientibus, primum erumpant, usque dum in itinere
plures rivi illis accedant & molem aquarum magisque augeant, & omnes
in progressu majores fiant. Nec est, cur S. Scripturae locus *Eccles. I, 7.*
ubi dicitur, quod omnia flumina ex mari fluant & iterum refluant in il-
lud, ab hac sententia nos deducat, cum facile conciliari possit, statim
quoque comparet indicium, quod vapores ex mari & deinceps flumini-
bus adscendentes, per ventos forte in longinquum propulsi, fluminum
futurorum incrementa sint & rudimenta, quae omnia iterum tandem se
in mare exonerant. Ut quis aestimare possit, quanta vis vaporum ex-
inde toto die adscendat, demonstratum reperiet in D. CLERICI *Phys.*
T. III. L. II. c. VIII. p. 189. Hunc in modum Mariotte & Perrault com-
putaverunt, quod solum plures imbres per annum cadant, quam singuli
fontes aquam reddant. Nam praeter mare & fluvios vapores quoque
ex terra, quae quidem sua natura siccissima, attamen ubique humida
(alias ejus partes ita non cohærerent, nisi per aquam compingerentur)
aliisque corporibus elevantur, quod observare licet die calidiori & aëre
quieto existente, ex terra humida tantam vaporum copiam adscendere,
ut crassae exinde nascantur nebulae. Exacte huic quadrat illud Herme-
tis simulque mira & perpetua fluidorum in terra circulatio colligitur.
Quod est superius, simile est ei, quod est inferius. Quae res adeo ma-
nifesta est, ut existimem, non ulterioris egere probationis: Hinc sta-
tim a principio mundi vapores e terra adscendisse, & ejusdem totam
superficiem irrigasse, in Genesi legimus, & nubem de mari adscendisse
& largissimos fudisse imbres. Altiora flumina caeterum & lacus, deinceps
alios fontes & rivos humiliores, dum intus ab iis emanant, conce-
dunt, & hi rivuli collecti aliud iterum flumen &c. hinc videre est circa
grandiora flumina copiosiores fontes, rivulos, thermas, acidulas scatu-
rire: quamobrem reperies fontes, qui pro illorum incremento aut de-
cremento decrescunt aut augentur. Rursum multi dantur lacus & flu-
mina, quae per cryptas subterraneas se abscondunt, & longe diffito de-
mum terrarum spatio iterum proveniunt, interdum longe minora, in-
dicio, in itinere sub terra rivos aliorum mittere, quo nomine noti sunt
fluvii, Rhenus, Albis, Tigris, Alpheus in Achaja, Anas in Hispania, (ho-

die Guadiana) Lycius in Asia, Timavus in Istria, quidam in Carniola rivi & lacus vid. VALVASSOR. *Ehre des Hertzogthums Crayns T. I. p. 161. seq. & p. 541.* Exinde si revocare animum ad præcedentium memoriam libet, ratio causaque repeti potest, cur fluvii interdum, si aquis præter modum abundant, annonæ caritatem præfagiant, deficiente nimirum deinceps humiditate in poris terræ, quod inprimis notatur de Lucalibus aquis, in agro Senensi, Sancti Reguli fonte ad Pientiam, lacu Vadimonis in Italia. De alio fonte Candia idem accepimus. Adeo hæc vera sunt, ut jam existimem fontes nostros ortum suum trahere non ex Oceano, (quoniam hæc petitio nimis esset dissita) sed ex vicino fluvio Zaka, vel ex montibus vicinis.

§. V. Quando igitur hæ aquæ subterraneæ totum orbem terraqueum undique mediantibus fontibus inibi latentibus transeuntes per mineras, vel juxta illas decurrunt, & variæ partes illarum solutæ illis vel solidæ vel fluidæ vel sub vaporis specie, pro varia partium minerarum indole atque conditione, copia, mixtura varie componuntur, miscentur atque in poros illarum tanquam vehiculi percipiuntur, ad superficiem tandem terræ simul vehendæ; (sub terra enim æque ac supra eam semper mutationes occurrunt atque destillationes, filtrationes, coagulationes aliæque chymicæ operationes instituuntur, caloris potissimum subterranei ope) varias constituunt aquas minerales medicatas, fontes foterios, acidulas, & thermas, quoque citius ex terra mixtæ & calefactæ &c. effluant; eo calidiores, eoque vegetæ magis deprehenduntur. Memorandus inter exempla hujus rei Hymera Siciliae fluvius, qui postquam egressus aquarum facit divortium, ea pars, quæ vergit ad Ætnam, ob purum solum, gratam dulcedinem, altera vero, quæ falsas præterfluit fodinas, ingratham falsedinem refert. Pariter Hyparis fluvius in Ponto per multa milliaria a fonte suo dulcissimus est; in transitu vero fontem quendam recipit, ex quo per multa iterum milliaria amarulentus fluit.

§. VI. Rursus ipsæ hæ aquæ, de mineris aliis illarumque exhalationibus minus laudabilibus, arsenicalibus, participantes varia nocumenta, morbos afferunt; ut annotatum est: aquas, quæ per plumbeos canales excurrunt, colicam, dysenteriam, tremores artuum & pallidum corporis habitum efficere; Multæ ejusmodi in Æthiopia inveniuntur aquæ, in Alpibus, & quibusdam Italiae locis circa Ligerium, Duriam & Padum fluvios, in Insula Chio, Sufis Persarum, Insulis fortunatis. Alias, recensent Vitruvius, Seneca, Plinius &c. In Trœcenis, Vitruvio teste potæ pedibus

pedibus vitium contrahunt. Plura collegit AGRICOLA L. II. p. 544. In vicinia circa Schmidebergam & pago Hermans-Seiffen plurimi scaturiunt fontes, quorum aquæ potæ strumas procreant; Fontes hi limpidi conspiciuntur, saporis & odoris expertes, aquæ decoctæ, vel evaporatæ, limum flavescens relinquant in fundo, cum residuo pingui subnigricante distincto, acrem referente saporem.

§. VII. Dari vero exhalationes minerales aëreas metallarii sciunt, quæ non raro adeo sunt fortes, ut arbores, herbas &c. afficiant, atque comburant; eapropter & vulgus loca, in quibus frutices, arbores & gramina non crescunt, vel arida & exusta & marcida quasi conspiciuntur, metalla intus continere, nec sine ratione affirmat. Quin etiam referente BECHERO in *Phys. subterr. p. 71.* ejusmodi exhalationes ad aliquot milliaria, nares hominum petunt. Porro in ipso mari observamus ejusmodi exhalationes oleosas, pingues & sulphureas, cum variæ coagulationes ibi reperiantur, quales sunt: succinum, ambra &c. Quin immo multi reperiuntur, qui virtutes lignorum, florum, herbarum, fruticum, exhalationibus mineralium adscribunt.

§. VIII. Ab aqua ad ignem, corpus illud fluidum, particulis sphaericis reflexilibus constans, ubique in rerum natura, in terra, aëre, dispersum, ne aquam (ut ajunt) perdamus. A calore thermæ dicuntur, ac nil nisi calidum foveant, spirantque. Unde vero calor illarum proveniat, hoc opus, hic labor est, qui eruditorum omni tempore torset torquetque adhuc ingenia. Et sane calor iste perennis isque in quibusdam thermis maximus, omnibus illum intuentibus potest esse mirabilis. Fateor equidem, maxime Ciceronis effati memor: Multa esse, quæ nos fallunt, probabilitate magna, quanto subterraneorum, utpote abditorum fiendi modus abstrusus & obscurus, tanto difficilem aditum in naturæ laboratorium, tantoque difficiliorem ejusdem censuram esse. Et quis est adeo oculatissimus Argos, qui in hanc officinam perspiciat? Quis quæso lapidum, quis metallorum &c. genesin vel ad oculum vidit, vel evidenter exposuit? Attamen si experientia & principia mechanico-physica & chymica in auxilium vocentur, non dubito, quin afferri possit vel adeo probabilis conjecturæ argumentum, quod quemvis facile consentientem promittat. Mitto itaque baratrum Platonium, ex quo, tanquam ex centro terræ inibi perpetuo hospitantes ignes per meatus terræ apertos, continuo spargi & aquas has calefieri, quidam somniant: Nondum enim nobis satis illud probatum, stabilitum atque explicatum, cur tam pauci tantum fontes calidi profluant, &c. dederunt.

Aristotelis sententiam, lavacra calida a sulphure admixto calefieri, cum multæ thermæ omni sulphure destituantur. Mitto flatus, spiritus calorificos, vapores, unde calorem terræ proprium cum Mileo & de Don-
tis Jul. Alexandr. Leon. de Capua & Horstio derivant aliqui, & aquam calefieri exinde volunt. Mitto ventos, quos per terræ meatus patulos intus penetrantes, ibidemque vapores calidos in centrum quasi ad instar vaporum in nubibus colligentes, & tandem fulgura & tonitrua producentes, aquas fervidas efficientes, sibi alii fingunt. Sed unde illi vapores jamdum calidi, vel ista calorifica virtus in terris? Annon calor illorum aliam adhuc causam præexistentem requirat? Unde dein calor ventis absentibus & finitis? & quis sibi facile concipiat, quomodo calentes ex profundissimis terræ abyssis vapores divagantes iterum in uno quasi puncto coire possent? Possibile an sit vapores per frigidas terras vagantes calorem tantum diuque retinere? Mitto & aquarum velocem cursum, & illarum ex alto descensum, quem aliqui allegant, motu suo aquas calefacientem, sicuti aliæ res motu solo calefieri assolent. Sciant motu quidem illa calefieri, quæ sulphur secum vehunt; illud vero ubique in aqua non dari, constat: Neque argumentum ab incallescencia maris ventis, biduo vel triduo agitati omni exceptione majus est, alias & flumina, quæ velociori præsertim feruntur cursu, uti Tigris, vel ubi magno aquarum strepitu cadunt, vel illiduntur, & aquæ in machinis hydraulicis varie exagitata, commota & ex alto descendentes incallescunt. A vero longe quoque aberrare videntur illi, qui calorem ab antiperistasi quadam, a frigore facta cum Joh. Nardio Tr. de igne subter deducunt; hoc enim si esset, ubique etiam terrarum, ferventes ex parte terræ corticali, scaturire deberent aquæ. Multo minus illorum argumenta philosophica sunt, qui radiis solaribus per terrarum poros penetratis, lac in profundo roboratis, fortiusque calefactis fervorem thermarum adscribunt: Quomodo hi in tam remota & dura sæpe ac saxosa loca atque profunda aquæ penetrare possent, cum constet ad duos saltem passus, solem pertingere? Quomodo æqualem & constantem hyeme & æstate, nocte dieque, semper calorem efficeret? & cur non etiam calor solis ubique interdiu præsens alios & omnes fontes atque rivus calefaceret? Idem iudicium esto de illa opinione ac si fulmen calefaceret aquas. Philosophos Stoicos, Zenonem, Cleantem, Chrysippum &c. insitum aquarum calorem volentes, secutus forte est Paracelsus, opinatus, & aquas calidas a Deo in creatione mundi statim & frigidas conditas segregatasque denuo esse. Fabula statim se prodit hoc indicio, quod

quod iterum refrigescant, quod vero minus fieret, si calor iis concreatus esset, sed & indefesso HEINRICI ROCHAE Autoris Galli, labore refellitur, qui deprehendit, aquam frigidam demum calefieri. vid. *ejus Scrut. therm.*

§. IX. Majorem paulo speciem præ se fert ex Chymicorum schola desumpta sententia, qua calorem ex effervescencia acidæ & alcali calcis vivæ, vel similis materiæ & aquæ invicem coëuntis esse asseritur, hinc præsupponunt in terra latentem calcem, quam, aqua frigida accedens accendat &c. Verum enim vero minime respondet opinioni calculus; quare hæc ex Oraculo Apollinis Pythii tibi edita, haud putes. Unde tanta spirituum copia & unde æqualis semper & immediatus illorum concursus ad excitandum uniformem caloris gradum & per tot annorum secula durabilem? Cur non etiam sal tertium semper superest? Et licet existant montes, quibus copiosi lapides calcarei insunt, ignem tamen præexistentem & extinctum, sibi fingere necesse est. Accedit & hoc, quod si aquæ hæc ex lapidibus calcareis uitis calorem acquirerent, isti quoque disrumperentur magno impetu, ut calx viva assolet; atque ita necessario integri montes & spatia terrarum, brevi corruerent, semelque facta exustione nullum plane amplius ignem conciperent, quod vero cum diuturnitate thermarum pugnat.

§. X. Ecquis non videt, omnes hos atque alios de calida hac materia frigide nimis sensisse atque scripsisse? Quorum quædam sententiæ adeo frigida sunt ut possent hunc ignem penitus extinguere. Si itaque negotium hoc, sicut par est, momentis ponderamus, res ita confici potest, ut statuamus: Calorem (qui ignis diffusus est) thermarum ab ipso calore & igne subterraneo esse, (quæ quidem hypothesis antiquissima est, verum multi minus recte eam intelligunt, minus recte explicant atque applicant) non equidem semper igne luculento pabulo indigente, cum licet in fodinis venæ metallicæ calidæ inveniantur, nullus tamen ejusmodi ignis videatur, sed qualis ille sit, ex sequentibus patebit, quare ad rem: Scilicet præsuppono iterum iterumque ignem subterraneum. Quod vero calor & ignis in terræ visceribus evenire possit, docent montes ignivomi, campi flagrant, motus immanes, tonitrua subterranea, horrenda flammarum fulgura, coruscationes igneæ, incendia &c. Ejusmodi loca, ubi ignes subterranei exarserunt, aut ardent, non solummodo adusta videntur, sed & testacea & exusta & calcinata effodiuntur. Terræ quoque ejusmodi locis & circumjectis calidæ observantur, nam v. g. constat, quod ad thermas Carolinas in Bohemia, ubi
nimi-

nimirum thermæ calidissimæ facile omnium reperiuntur, propter calorem subterraneum non possint fodi cellæ, & quod nix tempore hyemæ si mox diffluat, vel saltem non diu persistat. Præterea & calorem subterraneum in variis fodinis & locis subterraneis experimur, ut non procul ab oppido Schwarzenberga, aliisque in locis in Misnia nostra; in Bohemia circa pagum Altsattel; in Hungaria, quæ pene tota præsertim inferior ardet subterraneo igne, nam si prope Danubium & Dravum scrobes effodiuntur, balnea & sudatoria ex tempore quasi possunt parari. Confer. CONRINGIVS in *Theatr. rer. publ.* Ex Beguino, Edm. Broun, J. B. Morino, de aliis passim regionibus ex Galeno, Agricola, Bottono, Solenandro, Lohneisio &c. idem scimus. Imprimis hoc nomine memorabiles sunt cellæ, sudatoriæ dictæ D. Germani prope Anianum lacum.

§. XI. Physica docet: Varia esse ignis genera, aliumque esse lucidum, & non calidum sive imperfectum v. g. qui in vermiculis S. Joh. guttulis aquæ marinæ collisis, ligno putrido &c. conspicitur, alium calidum & non lucidum e. g. in fœno madido, fimo, frumento aqua macerato & in acervum collocato, in corio per alutarios tractato, in fermentationibus quibusdam &c. alium calidum & lucidum simul. Docet eadem, (1) ignem nihil aliud esse, quam motum tertii elementi ætherei particularum in corporibus solum mixtis sulphureis, salinis, resinosis & celerrimum quidem a centro accensorum ad peripheriam, adeoque aërem cum Rege Alphonso in Clave Sapientiæ, ignem crassum dicere convenire. Ubique enim flamma vel calefactio solum est; ibi semper motus videtur & tactu sentitur; quo motu omnia corpora penetrat; impedito vero statim ignis exstinguitur. Unde flammam tantum concipiunt & conservant sulphurea, i. e. quibus sulphur minus dispersum & occultatum est, resinæ, bitumen, olea, pinguedines & similia. Ad hæc omnia, quæcunque motum expansivum, vehementem & perturbatum ejusmodi ætheris in corporibus præcipue salino-sulphureis exci:are & continuare sufficiunt, causam ignis constituunt: Quoque liberior & citatior aëris motus est; eoque commodior ad ignem accendendum & propagandum. (2) Corporibus pinguibus sal associatum pabulum ignis efficacius & durabilius constituere; oleum enim, cui sal inspersum, duplo diutius flammam alit. (3) Non quælibet corpora, sed duriora vehementer attrita & collisa, scintillas effundere. Horum enim stamina propter duritiem & rigiditatem attritioni, non facile cedunt, sed resistunt potius; resistendo vero eo magis contremiscunt, quo ipso simul æther inclusus forti-

fortiter colliditur, & in motum ejusmodi perniciosissimum redigitur. Neque omnis motus localis calorem atque ignem excitat, sed vehementissimus tantum atque varius, neque scintillulæ collisione e corporibus exilientes ab illo motu producuntur, sed latentes saltem educuntur atque eliciuntur: (4) Ipsum deinceps ignem semel in corporibus salinis excitatum, angustius inclusum, agitat, collisum, novum ignem in corporibus ejusmodi aliis circumstantibus proximis, suscitare, a sola tritura, frictione e. g. ligna duriora & metalla incallescere, vel plane accendi atque ex una scintillula, maximum subinde incendium posse oriri, uti videmus ab exiguo carbone in magno camino ferreo bene occluso dissipari in totum carbonum cumulum. (5) Ferrum imprimis esse metallum valde sulphureum, adeoque præ omnibus aliis ad ignem concipiendum aptum; quare & in fusione continuo scintillulæ profiliunt. Idem fit, si limatura martis subtilissime pulverisata flammæ candelæ inspergitur. Inde evenit, ut circuli ferrei igniti angustiores fiant & baculi (ferrei) crassiores, quam antea erant, cum impetuosus ille ætheris motus in igne stamina illa licet durissima extendat. (6) Motu isto diutius continuato & aucto, flammam tandem erumpere, ex quo haud obscure colligitur, quod calor & flamma gradu tantum a se differant, ita quidem, ut calor sine flamma, flamma autem sine calore non esse queat. (7) Aquam igni affusam, nisi sit major illius copia, non posse illum extinguere, sed proportionata in quantitate potius ignem aquæ misceri, inde incallescere, vehementiam ignis augere & impedire, ne citius ignis pereat; (quod videmus, quando fabri ferrarii, prunas candentes, aqua inspergunt) imprimis si copiosiores adfuerint partes sulphureæ, oleosæ, simili modo naphthæ, camphoræ, bitumini &c. aquæ exigua quantitate affusa, videtur ardor augeri. In pyrotechnia parant artifices massam, quam materiam albam vocant, ex nitro, antimonio, sulphure pauxillo & carbonibus &c. quæ accensa difficulter aqua extinguere potest, potius illa affusa magis incendium augetur, diutiusque durat. Quin etiam legimus, regnante Constant. Imper. R. Callinicum Mathem. ignem invenisse, ne quidem aqua, nisi solo aceto, extinguiibilem.

§. XII. Quid obstat, exinde inferre; Calorem & ignem quoque subterraneum ex mineris sulphureis & martialibus esse? Scilicet mineras, marcasitas ejusmodi sulphur solo odore saltem perceptibile & ferrum (contritæ enim & ustæ ejus particulæ magnetem accedunt) continentes, calidas, ferventes atque fumantes, reperiri in illis locis, qui calent, vel ignem condunt, non modo Scriptores testantur; sed & qui-
vis

vis conspiciat, licet. Rem sequens probat experimentum: Si sumitur sulphuris vivi pulverisati, limaturæ martis anatica portio, & hæc invicem bene miscentur & affunditur aqua, ut consistentiam pultis adipiscatur, massa, paucis elapsis horis in spumam attollitur, ebullit, incallescit, imprimis aëri libero exposita, atque demum manifestam flammam cum fumo sulphureo emittit. Ad hoc videmus, marcasitas & glebas sulphureas, ex quibus vitriolum conficitur, aëri humido pluvioso expositas, brevi tempore, æstum intensum concipere. Idem fit, quando ex marcasitis sulphureis sulphur fuerit sublimatum, caput mortuum pluvioso aëri expositum est. Ad hoc observamus in illis locis, ubi alumen præparatur, quod mineræ illæ effossæ, in acervos congestæ vel accedente solis æstu accensæ, vel etiam a pluviis humefactæ, motu intestino rapidiori factæ, turgescant, vehementer incallescant, fumum & non raro luculentam flammam emittant, ex eo nimirum, quod a pluviis sal aluminis solvatur & incipiat agere in terram ejus bituminosam.

§. XIII. Ex his itaque fontibus rivum quoque nostrum ducere licet. Non equidem satis cavet veritati Le Mery, qui casu primum hoc experimentum invenit, dum acido sulphuris aquis soluto, terras pererrante & obvias mineras sulphureas, bituminosas, ferreas aggredienti ignem & calorem subterraneum adscribit, quia discrimen intercedit inter sulphur accensum & integrum, interque ferrum ipsum confectum & ferrum in vena sua adhuc contentum. Nam notum est, sulphur, acidum, non nisi igne accensum largiri, & ferrum quidem jam confectum spiritibus acidis quidem incallescere, nequaquam vero illud in venis suis adhuc latens. Quamobrem in hac sententia, præeunte Excellentissimo D. D. BERGERO in *Tract. de Therm. Carol.* mihi etiam omnis stat opinio: quod, quando in terræ visceribus, aqua imprimis salina spiritu subterraneo acidulo, turgida, sicque principio activo armata, scaturiens ad mineras, marcasitas, sulphur & ferrum continentes & ipsa natura sua vaporosas, deferatur, harum poros ingressa, laxet nexum & compagem sulphuris & martis, ob sal copiosum quod continet, facile solubilis atque inter se concitet atque impellat, qua soluta & libera deinceps actione & reactione sulphuris in ferrum & motu intestino magis magisque collidantur, rarefiant, ferveant, vapores sulphureos, calidos, copiosos emittant. Quibus subinde ab exiguo etiam principio oriundis auctis, in spatio minus libero coercitis & inter se mutuo iterum allisis, attritis, magis adhuc hæc exhalationes exardescunt, magisque reliquas partes, imprimis quæ supra incumbunt minerarum incitant, compellunt, concu-

concutiunt atque motus hi augentur, (ut fossores metallarii testantur, quod vapores, qui sine dubio ex marcasitis egrediuntur, multoties sponte inflammentur) compages illarum solvitur ac destruitur, salinæque spirituosæ eliciuntur, usque tandem totæ in aquis diffuant, quo demum tantus calor & per ingens terræ spatium dissipatus, immo sæpe flamma exoritur, si justum spatium, iustoque fortior aëris motus conceditur, ut experimur, fœnum quoque madidum repositum plane in flammam quandoque abire. Etenim ignis semper desinit in verticem mucronatum, sicque superna petens rarefacit; terminatur tamen vis ignis paulo infra summitatem, alias emergeret, ut in ardentibus montibus, habetque terram & saxa non raro densissima velut operculum, quod non penetrat conus ignis, jam velut in summo attenuatus nimium ac imbecillis, terra graviori & solidiori opprimente; ubi autem, ac si quantum sit, quoddam spiraculum nascitur sublime, rapit secum multum teneræ substantiæ, quod in Aetna aliisque ignivomis montibus apparet. Ex his porro infero, quod his effluviis ex mineris exhalantibus aqua reliqua præterfluens denuo imprægnetur atque calefiat, & ignis deinceps semel genitus, cum velocissime moveatur, (hinc in conflagratione sensibiles gyri se mutuo turbantes & interferientes conspiciuntur,) pluraque corpora vicina salino-sulphurea secum rapiat & accendat: Ut eo magis hæc credam, me movet, præter adducta, observatio HAVPTMANNI in *descript. Therm. Wolkenstein*, p. 220. qua memorat, quod illæ thermæ, quæ non adeo ex profundo scaturiunt, tempestate pluviosa existente, magis caleant, & quod circumjecta terra & colles & montes fument, (quod & alias aliis quoque in locis experimur) & calefiant.

§. XIV. Idcirco in plurimis thermis sulphur juxta vitriolum & martem manifeste reperitur; Campi Vulcani dicti in Italia, Puteolos inter & Neapolim, intus & extra assiduo fervore crepitant & vivo sulphure fumant, intercorruscant aquæ salientes & fervidæ, additque SOLENANDER, de *Cal. font. med. caus.* C. IX. quod quidquid in foro Vulcani in crateribus adhæret, si multa illud solvatur aqua, eandem sulphure, vitriolo & alumine imbuat. Simile videtur, in Volaterrano ad montem Cerberum, in cujus balneis sulphur ebullit, & in marginibus lacunæ passim reperitur. De multis aliis aquis, quas imprægnat sulphur, vel volatile, vel crudum, vid. BECHER. *Phys. subterr.* p. 701. Ad hæc HAVPTMANNI de *therm. Wolkenst.* modo laudatus scribit: Se deprehendisse in illis aquam limpidam, simplicem prima facie ex petra de-

stillantem, igne, in sulphuream mutatam. Quæ eleganter certe genesin thermarum nobis ante oculos ponunt non minus, quam sequentia. Nimirum in agro Patavino ad balnea S. Bartholomæi in fonte aliquo, in quem aqua manifeste frigida ingreditur, & paulo postea ex subdito naturali calore ferverescit; immo in tota valle aqua, limus, arena, filices ardent. In hunc censum venit purgatorium dictum in Hungaria. Immo quod curiosum, in ipso mari alicubi & mediis ipsius fluctibus visa sunt aliquando incendia. In sinu Bajano & insulis Aeoliis, terra & undæ maris allisæ subinde fervent, fumos non raro & ignes emittunt, motus & sonitus edunt insolitos. Materia, quæ circa crateres colligitur, si aqua diluitur, sulphur, alumen & vitriolum largitur, & si pluviae cadunt, puteos, & torrentes iisdem inficiunt. PLINIVS L. II. C. CVII. & C. CVI. refert, Thrasimenum lacum arsisse totum, & inter campos Babylonis flagrasse piscinam. Mare incendium quoque passum esse adducit LIV. L. XXXIII. L. VI. Autor est STRABO vid. *Trans. Angl. phil.* 26. in Cycladibus ex mari exivisse flammam per dies IV. tantas, ut ipsum ferveret. Hic commemorandus fons saliens, qui conspicitur prope urbem Gratianopolitanam, ejiciens simul cum aqua ignem, & si lingua injiciuntur, comburuntur, ac ille in Palat. Cracov. inflammabilis, aliusque in Anglia talis. Plura vid. apud PLIN. l. c. Lib. II. C. CVI. & CIII. AGRICOL. de nat. quæ effl. ex terra C. XXII. &c. Quamobrem in Italia præsertim, ubi sulphurea corpora ardent in terra, copiosæ thermæ inveniuntur. Siquidem L. GRYLLVS scribit in *Orat. de peregr. Med.* quod in agro Senensi supra XV. scaturigines hinc inde habeantur. Quid multa? Clarissime hoc declarat HENR. ROCHAS solertissimus rerum naturalium scrutator p. 5. in *Scrut. therm.* hic enim perfodiendo magno labore montes usque ad thermarum pervenit principium, ubiprehendit scaturientem ex terra aquam frigidam gustui inspidam, imbibentem deinceps sal quoddam minerale, quæ aqua postmodum, ubi attigerit marcasitam sulphuream, mox intensam ebullitionem, spumam ac intensum æstum concepit.

§. XV. Prout igitur major aut minor fit terens motus, & prout calor conceptus longius ab ipsis venis, canalibus, fontibus distat, aut materiæ sulphuræ, martialis, vaporosæ major aut minor copia adest, quo magis fervet, vel sensim tardeque, vel repente & subito agitantur, partes minus aptæ ad talem æstum concipiendum magis minusque commiscuntur; quo majori in copia expirationes aquas replent, thermæ intensius aut remissius quoque calent, unde in eodem sæpe tractu, ut in
thermi

thermis Carolinis, variæ reperiuntur hinc inde scaturigines, circa illum primarium & furentem dictum, calore a se invicem differentes. Manifestum id in Siculis balneis conspicitur, uti testes oculati referunt: quæ venæ aquarum emanant propius Ætnam versus, calidiores, quo remotius, tepidæ sunt. Quin etiam notum est, in nonnullis thermis, ignem adeo esse vicinum, scaturigini, si agantur cuniculi, ut una cum aquis flammæ erumpant. In præsens dicendum est, quod, quo calidiores thermæ, eo copiosiores & firmiores secum vehant atque deponant ochram; quo tepidiores, eo pauciores. Exempli loco sint thermæ Carolinæ, quæ intensissime calent, magnam copiam ochræ deponunt non tantum in canalibus, quos percurrunt, sed & res alias circumpositas illa afflant atque afficiunt. Nostræ vero tepidæ æque ac Teplizenfes, Wolkensteinenses, Landeccenses, S. Johannis in Bohemia & tepidus fons (*der Muhlbrunn*) ad Thermas Carolinas &c. minorem quantitatem secum vehunt, minusque exhalant. Undenam ochra in omnibus thermis reperibilis? Illam esse marcasitæ illius sobolem, sub ipsa actione & reactione erosæ, solutæ atque paulatim diffluentis, (cum marcasitæ alias solutæ similis sit) merito reputandum est, ut ex modo dictis apparet. Idcirco & omnes bene calcinatæ & magnete tractatæ partes reddunt martiales.

§. XVI. Pari ratione se habent incendia montium, quos ignivomos vocant, Ætnæ, Vesuvii, Heclæ, Hephæstionis Lyciæ, Theonochemetis Nigritarum &c. Vid. VARENIVS in GEOGRAPH. GENER. & agrorum, terræ motus, quæ singula nostram hanc hypothesin probant, stabiliunt atque confirmant; nam hi montes & agri sulphure, bitumine rebusque facile ardentibus referti sunt atque plurima ex parte ex pyrite constant, & imbribus accenduntur augenturque incendia: sic verb. gr. in provincia Romandiola ex terra infernali dicta, pluviosa tempestate existente, flamma luculenta, erumpit, atque Ætna, vento meridionali, humido flante, multos ignes evomit, nullos vero septentrionali exsiccante; vid. BOCCONE in *annotat. curiosis* VI. p. 126. seq. & BAGLIVIVS in *Oper.* p. 512. qui & in hanc ipsam rem, hoc notabile affert, de vegetat. lapid. Vesuvium ardentem per subterraneos specus, absorpsisse ingentes maris aquas easque paulo post evomuisse in vicinos agros, ingenti exinde inundatione devastatos. In tractibus enim subterraneis spatiosis, ubi major & liberior aër conceditur per spiracula admissionis & emissionis luculenta flamma tandem excitatur, unde halitus vagantes & conclusi, terræ superficiem quatiunt, usque dum per fissuras terræ, sæpe magno cum strepitu, flamma & fumo erumpant imo, torrentes ardentes effun-

dant. Hinc circa hos montes magna in copia reperiuntur marcasitæ exustæ, in pulverem facile, si cultro scinduntur, aut malleo cuduntur, ad instar antimonii resolubiles, conf. idem B O C C O N E *l. c. p. 248.* quarum pulvis ferreas juxta alias partes concedit, emittunt & sulphur, alumen, vitriolum aliaque mineralia sub ipsis incendiis, atque fontes dulces circa illa loca, sulphureo sapore, durantibus terræ motibus & ante aut post illos, imbuuntur. Nec est, cur dubites de sufficienti aëre, immo ventis in cryptis subterraneis, qui folium vicem obtinent, movent ac excitant fomitem: Si enim nihil usquam vacuum, si datur transitus aquarum, facilius & dabitur spatium aëri & ventis, qui adhuc magis penetrare possunt. Hi potissimum oriuntur ex lapsu & appulsu aquarum, per canales prius ex mari (cujus fluctus interdum per aliquot milliaria agitantur, antequam repercussionem, ut regrediantur, offendant) vel fluminibus suscepto & dein per illos continuato, (aërem enim nihil aliud esse quam aquam subtilem, constat ex Torricelliano instrumento & Æolipilæ experimento). Quo major ventus, majorem ignem & flammam concitat, quo minor, (ut fere in tota Germania accidit) ab impellentis præsentis defectu, maris sc. variis quoque salibus sulphuribusque prægnantis, pabulum simul quoque apportantis, remoti, cum flumina tantam vim non habeant, æstus maximus quidem excitatur, sed ignis quasi conclusus manet, qui tamen per tellurem calidissimas exhalationes circumspargit. Quod vero mare ad ejusmodi montes ignivomos perveniat, Dominicus Bottonus in Topograph. Pyrologiæ declaravit, referens Vesuvium non raro pisces, saburramque, arenam &c. maris ejecisse. Ac modo citatus B O C C O N E *l. c. IX. p. 242.* refert, ex ejusdem montis cacumine quandoque ingentes aquarum eluvies defluxisse exsiccato prope urbem Neapolitanam portu. Compertum præterea est ex Strabone, Mela, Plinio, cavernas subterraneas spatiosissimas reperiri. Videntur & multæ in Italia, Sicilia, Hispania &c. ex quibus ingenti & horrendo strepitu venti efflant, ut nemo sine periculo accedere ausus sit. Patet & hoc ex terræ motibus, hiatibus & voraginibus, & tot urbium atque fastorum agrorum montiumque jugerum ruinis, si enim nullæ ejusmodi essent spatiosæ cavernæ, tam vasta terrarum spatia in se recipere non posset terra; ea propter non adeo infelici conjectura ductus Aristoteles causam explicans, cur repente interdum navigia in mare absorbeantur, ita scribit: Cavernosus locus terræ subditæ mari quandoque disrumpitur, diductoque hiatu absorbetur navigium. Amplius adhuc constat, sub mari spiracula esse ventorum, ut in littore

Aqui-

Aquitanico non procul a Bajona, ubi mare sine ullis ventis extrinsecus adeo turgescit, ut terram mox occupare videatur, moxque iterum subsidet. Plura exempla recessuum vastorum sub mari recenset Baccius. Gassendus in vita Paireschii ignes subterraneos per venas subterraneas ad instar aquarum longissime serpere & sibi invicem communicare afferens, refert: eodem tempore incendium in Semo Æthiopum monte An. 1631. contigisse, quo contigit Vesuvii in Campania; ita ut Vesuvius cum Aetna, hic cum Syria, hæc cum Arabia felice, ista denuo cum Semo monte, communicent, quam rem etiam descripsit SENECA *Lib. III. Quest. Cap. XVII & XVIII*. Indicant illos varia incendiorum antecedentium signa & effectus; præcedunt enim subterranei mugitus, horrendi terræ motus, fulgura, tonitrua subterranea sequuntur, terra in hiatus sæpe magnos secedit, rumpitur, ingentes glebarum saxorumque moles projiciuntur &c. Ad hæc quemadmodum ex motu aquarum ventus sub terra exoritur ita & augetur ipso deinceps igne, ubi enim ignis, ibi etiam ventus statim se prodit. Notabile insuper est, maritima loca ab æstu maris tepescere.

§. XVII. Omnium vero conceptu difficillimum videtur, quod per tot secula continuus calor in thermis permanere potuerit, & quod dictæ mineræ non absumantur. Sciendum autem est, quod ingentia dentur in terra mineralium fossilium strata, unde & ordinario circa istam regionem plures thermæ, acidulæ &c. conspiciuntur, sic circa thermas Carol. V. mill. spatio ultra CCC. acidulæ numerantur, circa Halam Sax. item per aliquot milliaria, & in Bavaria in regione VI. mill. hinc inde multi fontes salini reperiuntur. In nostrarum *Thermarum* vicinia quoque circa pagos Hermsdorff, Voytsdorff & Gottsdorff diversi tepentes, lacus inveniuntur. Ex his fodinis licet quotidie notabilis quantitas evehatur, tamen vix exauriri possunt, & si in ipsa origine non tanta strata essent, nihilominus tamen illa aqua in transitu per longum interdum iter, aliis in locis ejusmodi strata attingere non impossibile videtur, quas mineras iterum contactu suo in similem motum concitat. Ibi eoque magis calor perdurat, quod si halitus tantum exinde spargantur. Pyrites & imprimis alias præ omnibus aliis mineris durabilem fomitem huic igni præbere valent, quod LYSTERS in *obs. de nat. & orig. terræ mot. & fulm.* confirmat, quod carbonēs fossiles, tanto plus igni resistent, quo plus pyritæ in se habent. Quis nescit in occluso non dari ignem actuale, ergo nec in terræ cavernis, & flammam omnem non interveniente aëre restringi atque ignem occlusum, tectum & compressum, ac sub-

subterraneus est, diu durare multumque calefacere, & minus corpora sulphurea &c. tam cito destruere atque exurere. Cui simile arridet, consideret modo vulgarem illam carbonum ligni confectionem, ubi ignis occlusus & non tam amplum spatium habens se explicandi & ob aëris, motoris sc. aduantis suffocationem, refrenationem (quin etiam in cellis & cryptis subterraneis ejusmodi occlusis, licet sat spatiosis, ob crassum aërem candelam accensam cito exstingui reperimus) diutius continetur, & subjecta ligna per longum sat temporis spatium ab ipso uruntur, minime vero destruuntur, sed deinceps carbones integri & pristinae lignorum magnitudinem æquantes, eruuntur, qui & deinceps in vase clauso candescunt plurium annorum ferent, neque tamen in cinerem fatiscunt. Simile exemplum videmus in igne diu interdum sub cineribus latente & in incendiis ædificiorum, ubi per plures septimanas in ruinis ignis tectus servatur. Idem videmus in caminis repletis carbonibus, ubi subdito per inferiora igne, clauduntur, diffundit se calor per totum acervum carbonum ac intra aliquot septimanas sine multa eorum consumptione durat & in dies fit intensior. Pariter in furnis, in quibus orichalcum paratur, si orificia claudantur adeo, ut nulla pateant exhalationi foramina, ignis sine carbonum notabili consumptione, diu vivere potest. Sic in machina Papiniana firmissime occlusa, adeo, ut vapores aëris & aquæ non possint exire, paucissimis carbonibus diu ignis servari & carnes coqui possunt. Tandem & ipsa concreta resinosa atque oleosa, terebinthinata, mastiche, succinum, spiritus vini quamvis sub aëre libero ab igne exiliori statim exardescant & tota absumantur; in vase tamen clauso ab intensiori licet igne, lente & in vapores solummodo facessunt. Simul & perspicere ex supra adductis jam licet, aquam ignem etiam diu conservare, ut in vulgus quoque notum est, aquam frigidam ignitis silicibus affusam majorem fervorem in balneis excitare. Addo quod DIOSCORIDES *Lib. VI. de lapide Thracio* refert, eum aquæ aspersione accendi, idem AELIANVS *de animal. Lib. IX.* testatur. In vertice Chimerae montis, ut Thesias Cnidius tradit in Phaselide, ignis atque limus ex stagno Comagenæ, aqua quoque accenditur. Altissimi Norvegiæ, Sueciæ atque Islandiæ montes nive superne contecti, inferne sulphuream eructant flammam. Legatur OLAI MAGNI opus *de gentibus septentr. Cap. X. & XI.* Addo ad hoc e contrario, quod in Tartaria, herba crescat cannabi similis, nisi quod caulem tam durum tamque validum haud habeat, & quasi coenum fieri soleat, si aquæ injicitur, igni vero injecta nunquam consumatur, ut habent *Ephemer. Erudit. a M. F.*

NITSCHIO editæ XXXII. *An. 1666. p. 365.* Nisi conjectura aberro, alumen pyriti conjunctum symbolum suum conferre posse, cum Anniano existimo. Autor est Plinius ligna & tabulata, alumine, illorum poros forte obstipante, unde pabuli defectus, illita non ardescere. Legimus, Syllam turrem quandam ligneam, alumine, jussu Archelai, Regis Mithridatis præfecti, oblitam exurere non potuisse. Sunt, qui ex sulphure & alumine ut & ex sale & oleo inter se certa enchiresi commixto, æternum ignem (qualis Romanorum Maximi Olybii &c. quondam fuit v. PANCIOLEVS *Lib. I. Tit. de oleo incombustibili*) parare posse, gloriantur. Illud quidem necesse est, fateamur, ex parte illas mineras minui, & spatium, ubi continentur, excavari & possibile esse, thermas deficere olim; ita multa balnea, fontes foterii, acidulæ, thermæ, quæ olim fluxerunt in Germania, Italia, alibique, necdum fluunt; aut a pristinis viribus & effectibus longe recedunt, aut penitus exsolvuntur, ut quoque scimus, thermarum subinde calorem minui aut loco illarum frigidos fontes scaturire & vice versa. Nam possunt marcasitarum venæ calorem, quem antea non habuerunt, concipere, possunt quoque defervescere, deficere, obrui, præcludi, alioque divertii aquæ profluentes. In nostro modo Ducatu Jau-rovienfi in pago Gieren acidulæ quondam fluxerunt maxime salutiferæ, quæ tamen hodie ab antiquo valore ac vi longe sunt mutatæ. Neque absolum est, dari & mineralium æque ac plantarum vegetationem, seu mineras varias, metalla (quæ licet solidissima sint, attamen maxime sui per semina, communicabilia) iterum in fodinis exhaustis ac lapides succrescere, atque ex mollibus indurescere nutririque per eorum poros, quod præter rationem id suadentem multi fide digni auctores ac rerum metallicarum scriptores auctoritate & experientia sua confirmant ac stabiliunt BARBA *de re metall. Lib. I. c. XVIII.* JORDANVS *de balneis nat. Cap. II.* MATTHES, *in Sarrept. Conc. III.* PETR. ALBINVS *in der Meisnischen Berg-Chronica tit. XVI. §. 7.* GERHARDVS *Decad. Quæst. Physic. Chym. I.* BORRICHIVS *in Epistol. ad Barthol. Cent. 4. ep. 92.* AGRICOLA *Lib. XII. p. 455. seq.* ERCKER *Lib. V. p. 315.* GEORG. BAGLIVIVS *de vegetat. lapidum adamantes certo annorum spatio renasci notat STENO de solido intra solid. f. 49.* Visæ sunt stanni venæ, quæ dum eas infra suffodiebant, superne iterum recrescebant, quod jam olim de maris Hetrusci Insula Isva, Virgilius protulit. Sulphur & bitumen semper post decursum quatuor annorum regenerari, adducit FALLOPIVS *L. de aquis thermal. & metall. c. V.* Idem de bitumine in agro Mutinensi Italicæ memorant historiæ. Sal fossile in valle Oeni intra V. vel VI. annos iterum

Z

renasci,

renasce, ut & sal fossile Polonicum, vulgo fertur. Pluribus hæc illustrat KIRCHERVS in *Mundo Subterr.* L. IV. S. I. p. 168. Conf. & CAMER. M. N. M. c. X. p. 207. Comparet exinde, quod natura etiam hoc in passu perennem instituat circulum, ut ad aliarum rerum propagationem & quod manifesta sint etiam in metallis aliisque fossilibus vegetationis indicia, cujus non in postremis & illud est, quod in Femora maris Balthici insula habetur, ubi reperiuntur loca, ex quorum solo, ingens lapidum copia prominet, qui quotidie succrescunt. Certum cœterum est, ad incendia subterranea quoque materiam unctuosam suppeditare, mare, crassas, salinas, unctuosas partes vehens, (partim in illo genitas, partim a fluminibus e terrestribus mineris adportatas) ut reputat BACCIVS L. c. p. 188. vid. BECH. *Phys. Subt.* L. I. S. II. c. II. Per instrumenta enim compertum habemus, aquam marinam fundo propinquam bituminosam esse, succinum, ambra & similia forte idem monstrant.

§. XVIII. Perinde non habeo ambiguum, propemodum id se habere cum acidulis, atque omni asseveratione affirmo: acidulas fieri, quando marcasitæ paulatim magis aqua forte minori copia accedente, & motu partium sulphurearum, martialium exigue hinc suscepto fervere, vaporant, ut sulphureæ successive abeant, quibus exutis, emergentibus copiosioribus hujusmodi halitibus acidulis, salinæ magis magisque exacuuntur, partes martiales, immo totæ quantæ, marcasitæque solvuntur, ac in vitriolum (non æque maturum, nam hoc demum in aëre liberiori germinando lanuginis instar quasi efflorescit) & in ochram rediguntur. Quæ deinceps partes, mediante aqua, aliorum deponuntur atque colliguntur, ubi moram neſcunt, vel longe itinere defluunt, vel interfluente majori in quantitate aquæ defervescentis, vaporibus sulphureis, adhuc iterum plurima ex parte dimissis, relictis solis ut plurimum particulis sulphureis fixioribus & denuo concretis (hinc in lagenarum fundo acidularum sulphureæ particulæ conspiciuntur) usque dum ex terra frigefactæ, scaturiant acidulæ. Hæcque liquido constant; fodinæ enim, ex quibus effoditur vitriolum, calidæ sunt, quod rerum metallicarum scriptores testantur, v. g. Lohneisius &c. Imprimis hanc in rem præclare scribit GALENVS L. IX. *simpl. med.* qui locus certe, rem exacte declarat. Notum quoque est, marcasitas abire in vitriolum plus minus, & sulphure evaporato ex illis majorem vitrioli partem recipere, quod deinceps ex aëre humido quasi progerminat atque frondescit; hinc usta marcasita flammam emittit, sulphuris odorem spargentem,ustum vero nec flammam emittit nec sulphur redolet. Id ipsum mon-

strat

strat conficiendi ars, vitriolum, quando nempe ex marcasitis vitriolum excoquunt. Affero pariter, huic principio marcasitis nimirum ut calorem subterraneum atque thermarum, ita & alias quoque aquas frigidas salubres & subtilis vitrioli quas continent plurimæ, partes nec non salium acceptas ferendas esse.

CAPVT III.

*Naturam & Contenta Thermarum Hirschbergensium
examinat, rationemque operandi expendit.*

§. I.

Maxima thermarum vis a mineris, illarumque diversarum partium intima atque varia solutione & mixtione est, quoque magis intimiusque mixtæ sunt atque unitæ, eo quoque meliores jure censentur. Unde VITRUVIVS *Lib. VIII. cap. III.* rectissime auguratus est, dicens: Omnis aqua naturaliter calida ideo est medicamentosa, quod in præviis rebus percocta aliam virtutem recepit ad usum. Ut ergo illæ nostrarum thermarum nobis patefiant, necesse est, ut exactum instituamus examen, & in ejus contenta & quæ præ aliis prævaleant copia, inquiremus, ex quibus ex parte concludere possumus, quid conferant aut noceant. Quod vero quam difficile, quam arduum & quam incertum de eo sit judicium, exercitatissimi etiam Philosophi ac Medici agnoscunt atque fatentur. Quædam enim aspectum oculorum aufugiunt, & varia varie & intime inter se permixta atque soluta difficulter dignoscuntur atque aliorum similitudine nos facile decipere possunt, quavis etiam via aut modo tractentur, quovis etiam microscopio inspiciantur. Apprimè hinc HIPPOCRATES *l. de vet. med. §. 3.* dicit: Si quis de sublimibus in aëre rebus, aut de subterraneis dicat & quomodo sese habeant, sciat tamen, neque dicenti neque audientibus manifestum satis fuerit vera ne sint, an secus. Antiqui Philosophi Peripathetici ex defectu veræ scientiæ physicæ & chymicæ non nisi commenta proferebant atque in explorandis aquarum medicatarum contentis, iisque saltem signis multum tribuebant, quæ tactus, odor, sapor, color concedunt. Cum vero illa insufficientia plane deprehendantur; siquidem varia sunt, quæ hoc vel illo colore aquas tingunt, sunt quoque varia, quæ linguam v. g. acredine, adstrictione &c. afficiunt, nostro maxime sæculo dissimiles in

concretis substantias adminiculis chymicis eruere satagunt, & varias præcipitationes, solutiones, filtrationes, evaporationes, destillationes, aliorum affusiones, combinationes ac coagulationes, instituunt. Equidem præ omnibus aliis chymia ad intricatos naturæ labyrinthos filum Ariadnæum concedit, & naturam imitari in operibus suis videtur. Hac potiori potimur analytica, quæ corpora naturalia dissolvit, componitque, & indolem & principia sua rimatur ac detegit, non æque physica simplicia, extrema, sed chymica, i. e. in quibus chymia in resolutione corporum acquiescere, cogimur. At enim verò, ingenue etiam confiteri necesse habemus: insufficientes & incertas esse operationes chymicas, quævis etiam sint, ad omnium omnino corporum naturam exhaustiendam, declarandam, demonstrandam. Ignem, qui corpora solidissima intrat & penetrat penitissime enim, Chymicorum quidem cultrum anatomicum dici posse, sed non verum esse & genuinum corporum mixtorum analytam, jam dudum Philosophi agnoverunt. Demonstrant id optime omnium Illustr. BOYLE Vir, de rerum naturalium sublimiore scientia, meritis in *Chym. Scept. Dissert. Chym.* & Cl. BOHNIVS *Dissert. Phys. I. p. 17. & seq.* Quare dubitandum est, an ex illis semper constant corpora naturalia, in quæ per ignem fuerint soluta, dum equidem compagem & texturam corporum is, magna suavitateque patente actione dividit & resolvit, sed inter dividendum simul quoque partes eorum ratione figuræ, texturæ, situs & magnitudinis naturalis, miris agendi modis rapidissime immutat, alterat & suo motu, (motus enim est causa efficiens omnium formarum ac qualitatum) novum ipsis situm, ordinem ac nexum inducit. Quare ignis ab Helmontio creatura destruens, & mors artificialis corporum ea destruens, vocatur. Unde alia diversa plane, aliæ prorsus vires, aliæ qualitates proveniunt. Immo imprimis subtiliores & mobiliiores (ut nihil jam de fixioribus magis dicam, cum constet præter particulas sulphureas, subtiles, aqueas, salinas & terras quoque per ignem dissipari) prorsus destruit & in auras dissipat, adeo ut tenuissimæ partes quorumvis commissuras vasorum & licet hermetice sigillatorum, adhibito quamvis leni ignis sæpe gradu, aufugiant per poros vasorum non deprehendendos. Enimvero ejusmodi minima certe dantur, quæ sensus plane non incurrunt, si tamen inter se coeunt atque cohærent, corpora satis magna componuntur, a quibus deinceps iterum exhalant, quod ex variis experimentis constat. Quare, ut incidenter moneam, illi utilitati minus consulunt, qui fontes foterios & acidulas non bene obturatis lagenis iisque arctioris orificii calefaciunt.

Tantum

Tantum enim abest ut juvent, potius observavit TH. TABERNEM in *hydrogaz.* p. 177. acidulas Sualbacenses calefactas, obfuisse. Ad hæc quædam intacta prorsus relinquit. Nova se objicit dubitatio: Separatæ sic partes, si iterum commiscantur, nulla arte tamen possunt ita combinari, ut prius composita omni modo emergant. Anne cum aliis commixtio ac magis adhuc præcipitatio tutior, certiorque? Dubito, suspicor, five pori a tertii interventu constriuantur, five laxentur, five impleantur magis, quod concreta alterationes secundum situm atque figuram patiantur; novam subinde reactionem efficere enixaque inde oriri possint. Probandi ratio aliqualis non erit difficilis, mercurii vivi & sublimati in aqua vel aqua forti solutio, si cum ol. tart. p. d. præcipitatur, rubicundum pulverem, si cum calce viva flavum, si cum sp. sal. ammon. album præcipitat, quæ tamen omnia sunt alcalia &c. Taceo, ex plane diversis eosdem effectus prodire, quod colligitur ex liquore, qui e calce, vel cum sale communi vel ammoniaco fusa extrahitur; solutio per aquam per filtrum trajicitur, exhalatur leni igne, sal remanens in cella dissolvitur, hic liquor tam ab ol. tart. p. d. quam sp. vitrioli coagulatur. E contrario cernimus, diversa & contraria sæpius eundem edere effectum, quod in alcalibus quibusdam lac coagulantibus experimur &c. Non prolixius quoque attingam, quod pro vario ignis modo adhibito, v. g. in aëre aperto vel vase clauso, vel coctione, calcinatione &c. longe diversa eliciat ignis, v. g. ex vegetabilibus per coctionem educuntur falsa, nitrosa & tartarea, per destillationem simplicem, acida, per incinerationem, lixiviosa &c. Similia exempla habemus in camphora, succino, sulphure & aliis. Idem de aliis probationibus v. gr. per putrefactionem &c. sentiendum. Neque id attingam, quod quædam concretorum ingredientia inter se confusa, ægerrime adeo exacte separari possint, ut cujuslibet eorum exquisitum pondus determinari valeat.

§. II. Quibus ita positis, (ut ad propositum redeam) examen atque tentamen docimasticum horum ope institutum aquarum thermalium esse ejusmodi, quilibet sentit. Hinc non mirandum, quod ejusmodi probationes thermarum & fontium foteriorum a multis laboriose magis, quam utiliter institutæ fuerint, & quod multæ in lucem prodierint descriptiones thermarum, aliarumque aquarum salubrium, quæ minus rem accurate exhauriunt, multa illis adscribendo, quæ minime iis insunt, aut illa, quæ insunt, omittendo. Quodsi autem itaque res ita se habeat, quod a priori non semper valeat bona consequentia, i. e. quod non sufficiat, thermas ratione contentorum saltem indagasse, altera a

posteriori, experientia sc. eaque multis exemplis stabilita, in auxilium potius vocanda. Qui ambo conjungit, certius atque securius procedet. e. gr. mercurii currentis vis vehementer salivam movendi, & nitri refrigerans & antispasmodica, arsenici deleteria, rhabbarbari purgans, feminis hyoscyami narcotica, cantharidum diuretica & aliorum multorum medicamentorum non a priori sed a posteriori innotescit. Etenim hactenus plurima ex parte, si vera fateri volumus, thermæ, quæ celebritatem hodie acquisiverunt, sunt inventæ, ampliatae atque stabilitæ. Licet itaque, inquam, virtutes aquarum mineralium experientia magis sive per experimenta therapeutica, quam rationibus & contentorum eorumque mixtionum conceptu difficilium recensitionibus, dignosci possint, ac debeant, ob mirandam scil. mineralium varietatem diversissimamque illorum modificationem & mixturam; nihil tamen impedit, quin per diversa examina contenta in illis quodammodo patefacere possimus. Faciam itaque id, circa nostras & thermas brevissima ac facillima via, quantum potero, & quantum mihi concessum est, quantumque res & scopus ferunt atque permittunt.

§. III. Prosequar strictim. Primo statim intuitu pinguedo quædam in superficie innatans se prodit in defluxu, aëri liberiori & frigidiori dein ex posita aqua, corpus aliquod viscosum, album & læve inter se cohærens lacti sulphuris simile cernitur; in cryptis vero suis flores quidem sulphuris inflammabiles experiuntur. Si lapilli in fontes utrosque immittuntur, per curvatas lineas & præpediti quasi deorsum delabuntur. Aquæ thermæ, si ex fontibus suis hauriuntur, in iis copiosissimæ bullulæ e fundo vitri ad superficiem tendentes & lateribus adhærentes margaritarum instar, conspiciuntur. Calidæ haustæ & frigefactæ lib. I. gr. V. & ultra ex cœnobii, ex Comitæ fonte gr. VIII. quantitas decrescit. Instrumenti statici ope calentes & juxta scaturiginem paulo leviores etiam aqua fontana, graviores vero frigefactæ deprehenduntur. Nam notum est aquas spiritu copioso gaudentes leviores esse, quoniam aër & æther ut omnis rarefactionis ita & levitatis causa, existit. Hæc sola aquarum levitas, quæ præsertim etiam in aqua pluviali reperitur indicium aquarum salubrium haud infimum est; nam talis aqua subtilis, levis atque spirituosâ, facile & citius per exilissima vasa ac porulos transit, pota, aperit subtilissimos ac tenerrimos etiam ductus, qui in quamplurimis morbis sunt obstructi, & fundamentum illorum constituunt, quare illud sine studio & odio necesse est, fateamur, quod thermæ nostræ ob partes spirituosas copiosiores, temperiem & eximias plane virtutes
si

si non omnibus aliis in Germania, anteferendæ, postponendæ tamen sint nullis. Ad tactum sunt viscidæ, lubricæ, molles & temperato & non modo tolerabili, sed & tam jucundo calore, adeoque calori nativo humano maxime conveniente præditæ, ut optimo jure id de nostris dicere possim, quod G. Wernherus de therm. Budens. dicit, quod tam jucundo sint calore, ut velut humano studio temperatæ naturæ singulari benignitate ad hominum lavacra datæ esse, videantur. Admoto thermometro uterque fons eundem caloris gradum servat. Præter odorem sulphureum & lixiviosum saporem subdulcem primo subadstrictorium & in fine subacrem, lixiviosum & ex parte subamarum ac nauseosum in lingua ac faucibus reliquunt, quo plus autem fervent, eo gratiorem habent: Odorem exacte lixiviosum, sulphureum & saponarium referunt, & adhuc magis fragrantiores, si inferius exhausto prius scrobe de novo iterum scaturiunt. Ab injectis in aquam, quæ in hoc procedendi genere adhibere solent, nullam alterationem notabilem deprehendes, nisi in residuo demum a destillatione & evaporatione relicto. Si per unam aut alteram diem in vase quodam reponantur, variegatæ, crassæ partes sat copiosæ subsident. In coctione ipsa, evaporatione inspissatione, ut nempe qualitates atque contenta eo melius concentrari queamus atque ad examen ulterius chymicum idonea magis reddere, ac destillatione denique in vitreo vase, arctissime lutato ac clauso nihil recipitur, præter corpus terreo-salinum, quam aqua insipida fontanæ similis. Neque tunc ullus odor sulphureus percipitur, sed saltem lixiviosus & foetidus nares ferit, nisi quod alembicum suspensum ad orificium retortæ denigrat, (haud obscuro sulphuris avolantis indicio.) Inter destillandum nihil notatu dignum apparet, donec ad paucas libras aquæ quantitas abierit, tunc magis magisque colorem puniceum, imprimis ex Schafgotschiano fonte, induit. Quod si imprimis in vase colli angustioris & fundi amplioris destillantur, lateribus sal volatile hinc inde maxime ex eodem fonte sub forma crystallorum minimarum adhæret. Superficieï crusta salina innatat, odor & sapor tunc quoque magis magisque lixiviosus redditur, sali tartari similis, nisi quod magis nauseosus mihi quidem videatur, & spiritu acido instillato effervescentia sentitur, deponiturque sedimentum crassum & puniceum, liquore supernatante pellucidiori statim facto. Aliquando aqua ad paucas libras destillata, similique modo adhibita & reposita, deinceps post aliquot dies multæ crystalli majores & minores pellucidæ, præter propter magnitudine grani hordei ejusdem fere figuræ & badio colore, apparebant. Si diutius
in

in vase detinentur, reponuntur, aut longius vehuntur, nunquam præcipitatum quoddam deprehendi potuit. Corpus terreo-salinum, quod ab evaporatione & destillatione in vase remanet, colorem refert ex albo puniceum in superficie inæquali magis cum bullulis quasi disruptis, albicantibus, nitentibusque. Linguae saporem hoc imprimit lixiviosum, subadstringentem & nauseabundum, atque odorem lixiviosum itidem & graveolentem & aliquantum sulphureum spargit. Si diutius reponitur aut transfertur in vase vitreo, aqua non facile corrumpitur aut putrescit.

§. IV. Omnibus tandem adhibitis, quæ ad probationem aquarum afferri possunt; (quæ vero hic ordine ulterius recensere non vacat,) atque rem multum diuque pensitata, in promptu erit notare: Thermas nostras duplici gaudere principio, volatili spirituofo (quod maximum) atque fixo perutili, intimo connubio unito. Spiritus probatur secundum notas spirituum in aquis: Ejusmodi enim aquæ spirituosæ sunt tenues, lenes, bullulas habent multas, celeriter transeunt per alvum & urinam, vel sudorem, non adeo copiosa residua relinquunt, evaporata cum ebullitione notabili ex fonte profiliunt, nares blanda titillatione feriunt, & caput non raro nidore totum implent, in antliæ vacuo, bullulas copiosiores emittunt: Omnes hæ notæ in nostris quoque aquis fortius habentur. Spiritus illi aquarum, qui animam quasi earum constituunt, sine dubio nihil aliud sunt, quam spiritus sulphurei, salini & vitriolici aciduli, universales, primigenii, per quorum energiam motum atque activitatem singula producuntur ac vigent, ex incalcescente resolutione, sulphure & marcasitis martialibus evoluti, sub forma vaporis aërem æque ac aquam terramque pervagantes, in ejus poros insinuantes, ibique concentrati eam leviolem & validam reddentes. Vocantur vero vitriolici ea potissimum ratione, quod in vitriolo copiosiores & puriores concentrati inveniantur & facilius exinde iterum colligi possint. Hi enim sunt, qui lintea alkali saturata lanugine salina mediæ naturæ inficiunt, aut cineres clavellatos aliaque salia alcalia aëri libero exposita in sal nitrosum convertunt, & alumen calcinatum omnique sale exutum intra aliquot dierum spatium, sale acido de novo imprægnant. De reliquo refert DV CLOOS *de aquis Gallie* p. 93. se destillatione prima ex spirituosis aquis spiritum exigua quidem quantitate obtinuisse, qui aquam Tornæ Solis coeruleam rubedine infecisset. Præter CAMERARIUM vid. *M. N. & M. Cent.* X. p. 211. & BECHER *phys. subt. Sect. II. Cap. III.* p. 73. testatur: aquam non raro fontanam non nihil spiritus habere, quia omnes

omnes fontes calidi quid in se habent, atque dantur aquæ fontanæ hyeme non congelascentes, quia ex fontibus fumantes vapores interdum adscendunt, & si ejusmodi aqua primum ex fonte hauritur, ore detenta, nonnulli spiritus nares ferientes emittuntur. Acidum spirituosum pariter aquis inhærere colligimus, quod, si alkali diutius aquæ incoquitur & solvitur, materia remaneat crySTALLIFANDA neutrius naturæ. Mediante hoc principio imprimis subtili, activo, elastico, thermæ, fontes foterii plurimi, (cum multi dentur, quorum aqua in destillatione & evaporatione nullum relinquit sedimentum,) tam admirandos edunt effectus; hinc observatur, quod ejusmodi exorti fontes in principio non raro saltem vegeto & præsentī spiritu maxime se exferant, subsequētibz vero annis, deficiente, debilitato illo vim illam amittant: aliorum forte his vaporibus per apertas cavernas conversis, tales v. g. fuerunt in nostra vicinia, quorum alter anno 1677. Pegaviæ exortus & contra scabiem & paralyfin eximius fuit; alter 1684. Illeburgi infra arcem pluribus quondam commendabilis profluxit.

§. V. Sicque porro inter partes his aquis contentas volatiles magis juxta modo nominatas, eminent vitriolicæ, salinæ & sulphuræ nativæ & purissimæ indolis, communi sulphure & empyrevmatico atque vitriolo arteque omni parato martiali, illorumque spiritibus aliis exinde præparatis, longe excellentiores. Inter fixas magis numerantur itidem sal & sulphur, bitumen, alumen, mars, & terra. Namque non precario ista admissa esse ulterius demonstrat sensus, comprobât ratio, confirmat experientia. Etenim quando juxta scaturiginem & statim recens haustæ & calidæ aquæ libræ i. pulverem gallarum, vel foliorum quercus aut ejusmodi aliorum adstringentium scrup. ad drachm. sem. injicis, non equidem satur color niger, sed ex atro purpureus, (obscurior tamen magis ex Schafgotschiano fonte,) exinde emergit, a scaturigine vel alveo remota & frigefacta aqua, nullam ejusmodi mutationem, sed solummodo turbationem percipies. Vitriolum enim volatile in omnibus pene thermis invenitur, cum illud ordinario in mineris istis, ex quibus ignis, calorisque subterranei origo reperiatur. Insuper non modo ex Lohneisio constat: omnes pyrites posse in vitriolum plus minusve abire; sed & in valle gigantum in ipsis montibus Sudetibus & in pagis vicinis Schreiberfau & Zischdorff, in Misnia circa Duben videmus & Schwartzenbergam, erutas marcasitas paulatim in vitriolum efflorescere, hinc & ordinario fere thermæ tepidæ minorem partem vitrioli ejusmodi volatilis; calidiores vero majorem possident, siquidem in ipsis Ca-

rolinis thermis, utpote calidissimis, sum expertus, gallarum pulverem mox ad fontem aquæ ferventissimæ injectum, colorem nigrum magis; minus vero tepefactæ inducere. Quo simul hariolari licet, subtilissimum sulphuris vaporem arctius sese conjungere cum rudioribus quibusdam ferri partibus atque exinde fixum quoque sal vitriolicum emergere & thermas ingredi. Sulphureum odorem quivis statim percipit, & argentum cumprimis aquam immissum colore subnigro tingit, ejusque splendorem obfuscat, auri vero colorem exaltat, quam coloris mutationem horum metallorum ordinario sulphur efficit, præsertim si in alcali id est solutum, linteamina sublutea reddit, quin & interdum parietibus ad instar florum sulphuris adhæret. Præsertim Schafgotschianus fons plus sulphuris redolet atque sensibiliter magis nares ferit, immo pungit efficacissime; salia enim, quo plus sulphuris eis accedit, magis fiunt volatilia. Si reponitur aqua, aut destillatur, evaporatur, nullum deinde odorem deprehendes sulphureum, pauxillumque illius fixi in residuo remanet inflammabilis, solo odore ex parte perceptibilis, quod tamen eo magis confirmatur, si illud prunis candentibus adspergas, & si misceas cum sale tartari, transit in hepar sulphuris. Oleaginositatis quoque quid subesse, clare demonstratur. Sæpius vidi illud, & charitam, in qua residuum corpus terreo salinum imprimis ex illustr. Comitum fonte asservabatur, oleaginositate lutea infecisse & digitos unctuositate quasi obduxisse. Substantiam illam sulphuream & oleosam eo melius aqua misceri, cum eam comitentur aluminosæ & vitriolicæ, nitrosæ particulæ (utpote salinæ, quæ facile cum aqueis connubium ineunt) habetur. Accedit & hoc quod hæc aquæ potæ nauseam & subversionem, ut loquuntur, stomachi inferant. Ex quibus sat clare uti opinor colligitur, hæc phænomena sulphuri potius quam vitriolo, esse adscribenda.

§. VI. Inter partes fixas primas tenet sal fere alcalinum, quod si nitrum illud vocare malles, non refragabor; ad naturam enim nitri veterum proxime accedit: Huic nec immerito thermis, quod & in singulis fere reperitur, potior virtus juxta partes volatiliores, spirituosas, adscribitur; huic soli fere omnium vim adsignare videtur Clariss. WEDDELIVS *Amœn. Mat. Med. & Pharm. acroam. p. 432.* Et sane alcalia sanguini maxime amica & illius naturæ fere affinia ac polychresta sunt. Hujusque salis alcalini aquæ thermalis libræ XX. per lenem evaporationem (si destillantur, semper minor quantitas remanet) dant ordinario, ex Schafgotschiano fonte scrup. i; ex altero drach. sem. circiter recipitur, quam quantitatem in utroque duplo corpus terreum excedit. Hinc etiam

etiam in plurimis, si non omnibus sal alcalicum invenitur, uti & longe majori in quantitate in Granensibus, Burboniensibus & Vichiensibus in Gallia, in thermis Carol. Embsens. Teplizensibus, immo acidulis & fontibus, lacubus, rivis. Hoc prima fronte statim odore in nostris manifestatur, nares enim ferit exacte lixivioso odore, & post evaporationem remanet sal alcalicum ex residuo elutriandum, quod tamen in fine quandoque plus minusve (inprimis ex Coenobii fonte) subamaricat, gustu ipso ordinariisque experimentis manifestatum. Ex quo quivis me non monente intelliget, hoc sal in thermis contentum ex parte esse volatile, ex parte esse fixum. Constat enim, omnia salia fere alcalia fixa, si igne tractentur, quo per motus varios atteruntur, digeruntur, & in moleculas tenuiores rediguntur, aliquid volatilis de se spargere. Exempli loco saltem sit ipsum lixivium ex cineribus saltem factum, odorem satis fortem reddens. Perinde præter Illustr. Boyle, Tournefort. Læwenhoeck, Græwius & Bohnius annotarunt, dari diversi generis terras argillaceas, ex quibus spiritus & sal volatile urinosum, destillando elici valent, quamvis non pure & excessive tale alcalicum sal sit, quia compertum per rationes atque experimenta est alcalia volatilia & fixa pura, raro dari, ad horum classem saltem ob prævalentiam referri. Alias subtilissimum est, facile & æquali propemodum aquæ portione solvitur; carbonibus vero ardentibus injectum non crepat & cum pulvere carbonum subtilissimo mixtum in crucibulo, totum avolat, sulphureo quodam fumo relicto. Si hoc sal alcalinum in libero aëre asservatur, in sal quasi tertium (quod ordinario iis accidit) mutatur, quæ mutatio spiritu universali aëreo acidulo acceptum fertur. Hoc sale alcali foetæ quoque sunt multæ terræ, saltem in nostra Germania, ager Rupinensis, Marchiæ, Pragensis in Bohemia. In Misnia & Thuringia multis in locis in cellis efflorescit & ex terra eruitur &c. Ex Smirna aliorum magna in quantitate effossum adportatur. Ast unde hoc sal in terræ visceribus producit, cum constet, quod nulum sal lixiviosum non nisi artificis arte per ignem eumque fortissimum atque concremationem paretur? Quo scire licet, quod quemadmodum ars supra terram ex aliis concretis, sal lixiviosum conficit, ita etiam natura infra terram ejusmodi, ex alia quoque materia producere possit. Jam perspectum est parari herbarum fixa alkalia salia, per mixtionem intimam salis cujusdam acidi cum alkalina quadam atque sulphurea terra, vi ignis, singulas materias intime inter se uniente: Etenim ejusmodi plantæ quæ tartareum acidum quoddam sal vel principium oleosum &

acidum continent, sal copiosum sal ejusmodi alkalicum largiuntur; siquidem & harum rerum gnaris non ignotum est, quod ex nitro, arcano duplicato, tartaro vitriolato, juxta combustibilem sulphuream terram, carbonum simul jungendam, mediante igne salia lixiviosa possint produci, item si acetum distillatum aut ejusdem spiritus aut etiam spiritus salis communis alkalicis terreis, ut coralliis lapidibus cancrorum, testis ovorum &c. affunditur, solvendo exsurgit sal quoddam, quod per præcipitationes & solutiones tales operationes exserit ac quidem sal alkalicum. Si miscetur vitriolum aut sal commune cum calce viva ac coquitur, mixtura exinde sal & sapore & virtute, sali lixivioso haud absimile, exsurgit. Hæc haud obscure præmonstrare videntur salis alkalini sub terra productionem; ibi enim eadem materiæ, quæ ejusmodi sal hoc modo constituunt, hinc inde in magna sal quantitate reperiuntur: nimirum lapides calcarei atque scissiles per ignes subterraneos concremantur & in materiam porosam & friabilem & sapidam convertuntur, atque ibi mineralia acida atque vitriolica sulphureaque salina principia præsto sunt, unde non recondita quadam ratione cernitur atque hinc inferre licet, perinde in hoc subterraneo naturæ laboratorio pariter ac arte, fieri salia lixiviosa. Quo simul monuisse e re erit, quod, ubi locorum thermæ inveniantur, quæ tale sal lixiviosum concedunt, ibi etiam acidulæ atque mineræ vitriolicæ, sulphur & alumen circum circa reperiuntur; siquidem memorabile est, quod circa thermas Carolinas spatio V. milliarium vel trecenti acidularum fontes numerentur & quod ibi ut & ad Falkenaviam tam martis mineræ, quam sulphuris & aluminis, effodiantur. Bitumen, quod & ordinario fere invenitur, ubi sulphur habetur, non solum odore, acuto nitore, acerbitate, amaritie cognoscitur; sed & ipsis oculis conspicitur, præsertim & ordinario magis in Abbatiae fonte, floccorum & pennularum subalbidarum instar, internatans, unde sæpius non potantur ejus aquæ, cum tunc nauseam, dolores ventriculi & capitis causentur. Præterea liquida bituminiformis pinguedo notatur, quæ salibus tenaciter inhærere assolet & salia in nitroforum vim exaltat, quare nitri coctores difficile eam a nitro separare possunt; siquidem, ut finem suum eo facilius obtineant, suum lixivium per cineres depuratos trajiciunt, ut pinguedo hoc medio separetur atque remaneat. Hinc etiam sine dubio est, quod indusia balneo exuntibus firmiter cuti, tanquam glutine quodam, affixa adhæreant, adeo ut vix possint avelli, quare necesse est, in ipso adhuc balneo indusia exuant, atque quod ipsa cutis glutine quasi & oleaginositate oblinita,

&

& aquosorum ad instar globulorum obsita, visu tactuque experiatur. Neque existimandum omne bitumen nigricans esse atque fuscum, quoniam variae bituminis species albicantes inveniuntur, ut naphtha alba, succinum album, sperma ceti &c. qua de re videndus Mich. REVDENIVS in *Observ. Carol.* N. 4. p. 9. & 68. Licet ejusmodi primum omnem cum aquis mixturam respuant, longa tamen mora & mixtione devicta iis confuse uniuntur, uti omnes fontes bituminosi monstrant. Hoc, si hic conjecturae locus sit, ipse calor ex igne subterraneo eliquat. Mars non solum ex terra post salis elutritionem residua probe calcinata magneti capillamentorum ad instar adhæret; & quandoque grana iij ad IV ex aquæ libris XV. imprimis ex Schafgotschiano fonte, qui illius majorem copiam ordinario possidet, collecta sunt; sed & ex ochra, quam in transitu deponunt thermæ, eodem modo extrahitur. Fallunt, itaque admodum, aut fallentes nominatim Zwelfferum, Fallopium, Solenandrum, Tabernæmontanum &c. incaute sequuntur, statuentes: thermis ferrum aliaque metalla immatura saltem inesse, & qualitates saltem illorum. Paucae partes aluminis ex acido universali spirituosissimo terræ cretaceæ macriori styptico juncto, oriundi, levissimi illius quidem, quamvis non æque exacte forte puri & simplicis remanent, & pauciores ex Schafgotschiano fonte. Hoc alias demonstratu difficile, optime evaporatione dignosci potest. Testatur hoc quoque odor acidulus foetidus, gravis, imprimis, si ad modicam siccitatem evaporata sit aqua, qui exacte refert illum, qui ex alumine & sale ammoniaco in mortario terendo, exsurgit & spuma & bullulae quasi nitentes quæ remanent & sapor aciditatis & adstrictionis, acrimoniæ in amarulentiam paululum desinentis, & quod solutionis cochenillæ colorem non mutet, potius exaltet & sedimentum in igne fustum ad instar lactis liquecat, quodque carbonibus ignitis inspersum a concrematione intumescat atque præcipitatum, præsertim per oleum tartari per deliquium igni impositum, spongiosum fiat, nec fumum spargat aut ardeat, quod & igne alio modo tractatum, albedinem non mutat, quale productum etiam ex solutione aluminis per oleum tartari obtinetur. Hoc quoque observatur, ubi pyrites exæstuat, ibi & sulphur, vitriolum & alumen (quæ ambo progenies sulphuris sunt, singulorumque acidum singulis congruit, adeo, ut ex his omnibus sulphur quoddam atque exinde vitriolum & alumen possit produci) inveniri ac fodi, immo pyritæ aliquam aluminis partem concedunt, uti annotavit Excell. BERGERVS l. c. p. 102. Siquidem & hic, circumjecti montes venis pyritæ aluminosi & chalcantosi abundant. De ejus productione desinet dubitare, qui

alumen coquere unquam vidit, & quod hic naturæ operationem ars imitari videatur. Quoad hoc præcipue Aquenses in sabaudia nostræ æmulantur. Hæc ingredientia, sulphur nempe, bitumen atque alumen & ferrum CRATO A KRAFTHEIM, vid. *Epist. med. pag. 242. seq.* nostris his thermis inesse jam cognovit atque eas pro alvo & urina movenda interne, & roborando, emolliendo & discutiendo ac adstringendo, externe adhibuit, hincque podagricis, ischiadicis, in tendinibus scirrhis & fluxionibus ad scapulas vel spinas, in colico dolore item & articulari, efficacissimas eas deprehendit. Tandem mentio facienda est terræ residuæ ex evaporatione & elutitione, quæ quandoque ex luteo albicat, quandoque cinereum plane colorem refert, commixtis quandoque filamentis velut minoribus inter se contortis atque inflexis, & subpinguis non raro deprehenditur. Ulterius reperitur & alia species terræ longe subtilioris, salinæ, unctuosæ, quæ aquis thermalibus, cremoris instar, supernatat. Cuticula ista, quam format terra hæc subtilis una cum partibus salinis & oleosis crassior & conspicua magis apparet, quando aqua defervuit.

§. VII. Hæc vel superficialia etiam recensio jam sufficiat, cum quantitatem exactissimam ex chymica vel mathematica subtilitate petitam singularum contentorum ac omnium expiscari quis vellet; res esset irrita ac incerta, si non vana. Secundum enim veterum Sapientum placitum præcipuum prudentiæ officium est, ne nimis magnam curam multamque operam in res abstrusas, obscuras, difficiles easdemque non necessarias conferamus; nec nobis jam adeo multum interest specialissimam nosse, imprimis cum singulis fere annis pro diversitate temporum aliqua variatio in his circa scaturigines nostras foterias advertenda veniat, secundum particularum singularum maiorem & minorem copiam, quare nihil pro immutabili naturæ lege reputes, v. g. hoc anno maiorem quantitatem salis alcalini, bituminis, martis; altero minorem concedit. Hoc residuum terreo-salinum subalbum, aut ex luteo albicans, nec aquam affusam colore puniceo & simili odore graveolenti ex lixivioso foetido inficit; altero rursus sulphureæ magis & graveolentes thermæ atque hoc calidiores, altero tepidiores deprehenduntur &c. Proin quoque non omnibus annis æqualis operatio semper sequitur. Ut explicatius loquar; ante biennium thermæ Schafgotschianæ maxima & plane inconsueta bituminis copia, a medio Aprilis ad finem usque Octobris conspicuæ erant, quæ ideo potum impediēbat; (potæ enim statim ardores stomachi & dolores capitis gravissimos excitabant) diaphaneitas aquæ

aquæ & calor tamen perstitit immutatus, & visum est, hos binos fontes ordinarios suos effectus inter se quasi commutasse. Hocque annotatum est, quod frigidioribus annis magis laxent, quam calidioribus, ut & quod Schafgotschianæ, si prægressa hyems frigidior fuerit & plus nivis deposuerit in montibus Sudetis, tunc & parum bituminis effundant; Abbatix vero alias ferme æqualiter se habent ad externum hoc accidens. Utræque thermæ tempestate pluviosa fortius spirant sulphureum odorem & imminentibus ventis plus quoque emittunt vaporum, immo die una vel dimidia ante pluviam, calidiores apparent & caput balneantium magis afficiunt.

§. VIII. Unde vero variationes hæ eveniant, haud meum facio nunc prolixius explicare, disputare & dirimere. Nobis parum interest; an quis ex siderum aspectu vario, conjunctionibus, oppositionibus, an alius ex pluviis, imbribus, alius ex flatibus, exhalationibus, ventis, illas procedere affirmet. Certas aliquas cæterum mutationes a tempestatibus calidioribus, aut frigidioribus, siccioribus, aut humidioribus adscribi posse ex modo allegatis observationibus facile crediderim, imprimis cum alias quoque alterationes fontium ab ipsis pendere, clare percipiamus. Quin immo etiam hoc in nostris accurate æstimantibus & observantibus notatum est, illas imbribus præter modum cadentibus aliquid virium suarum amisisse, quod & alii, ut Aristoteles jam, alii de Magnesiis de aliis imprimis & frequentius de acidulis observaverunt. Facile enim tunc fieri potest, ut in transitu affluentes copiosæ aquæ pluviales vel a nive copiosa liquefacta, affluant, æque ac observamus, si latiori fossa forte augeantur, accedente quædam fera vena, quam vocant (ut aliquando propemodum in Schafgotschiano contigisset vel in illo fonte prope Franckensteinam contigit) virtute, qua antea, non amplius pollent. Illud quoque a vero haud abesse censeo, quod aquæ sæpe fluant non per fodinas mineralium tantum, sed & juxta eas, ita saltem, ut particulæ quædam ipsis communicentur, & quod perfluendo assumant tales alias particulas, ut earum usus debeat existere varius, immo plerumque incertus, videmus hoc, sicuti in nostris quovis fere anno, ita & in aliis. Quare falluntur ii & fallunt, qui forte concedunt, aquarum thermalium perennem virtutem adesse; Sic ulterius Sebizius de acidulis Alsatix scribit: eas esse quandoque adeo acres, ut dysenteriam commoveant, non nunquam effœtas & pristino vigore privatas. Injuriosi vero in thermas videntur, qui, si vel levi mutatione aëris, eoque pluvioso & nebuloso existente, vel ventis minus secundis agitato, minus bene se habeant,

beant, vitium in thermas conjiciunt, cum potius accusare deberent ambientem aërem mutatum, qui in corporibus illorum ejusmodi alterationem efficit, quod non solum ægri, sed & satis alias sani toto die experiuntur. Plura & certa hucusque in illis non invenire potui, quanquam diu multumque scrutatus sum, irritus tamen labor, irritumque duntaxat scrutinium, dubiumque judicium fuit. Alii thermis nostris & aurum & argentum, immo gemmarum tincturas assignant, eoque nomine Ficuncellensibus, Budensibus in Hungaria, Favariensibus &c. ut vulgo fertur, æquiparant, ut ante aliquot annos metallurgus quidam aut avaritia aut adulatione forte ductus, fabulum ex Schafgotschianis thermis, addito pulvere fusorio, in regulum aureum fusisse gloriatus est. Ast plumbeus ille mihi visus est. Ego nullum aurum nullumque argentum in his aquis ferratis (nec vel iis inferioribus ad minimum, cum adhuc earundem efficacia major neque experientia, neque ratione satis probari possit) invenire aut demonstrare hucusque potui, quamvis non simplici vice sedimentum aqua Regis solutum & præcipitatum fuerit, nulla tamen punctula nigricantia examine eodem modo instituto aquaque forti instillato & s. a. præcipitatione facta in lamina cuprea se manifestaverunt.

§. IX. Sed ad rei cœptæ seriem redeamus. Aqua simplex eaque pura, levis, subtilis qualemque nostræ thermæ vehunt, quæ vehiculum harum mineralium constituit, haud vilis habenda neque inutilis deprehenditur, sed sicuti ad omnes facultates concipiendas est aptissima, a veteribus panspermia appellata, ita & ipsa maximas vires & medicamentosas possidet, quippe humiditate, mollitie, levitate, fluxilitate, tenuitate & copia sua in morbis insignem affert utilitatem, utpote salia morbosa diluit, eluit, & crassos humores tartareos emollit, attenuat, & superfluum excrementitium per colatoria educit, vias aperit ac excretoria aperta servat, obstructionsque referat, ariditatem partium solidarum corrigit & sanguini, omnibusque humoribus fluxilitatem ad vitalem circulum desideratissimam conciliat, secretiones & excretiones omnes juvat, somnum conciliat & pene omne curationis punctum absolvit, huic in quantitate nimirum majori assumptæ, majorem, quam vulgo creditur atque perpenditur, partem in sanandis morbis tribuo ac profiteor simplicem aquam puram, subtilem levem solam quam plurimorum fontium foteriorum, in quibus ne mica quidem principii mineralis, metallici aut salis continetur, utramque, ut ajunt, paginam facere, exemplo ex notissimis sint Favarienses, Schlangenbadenses &c. Atque quoniam deinceps

ceps falia illa soluta sunt, magis ob id penetrant aguntque. Ac ne id quidem mihi reticendum est, quod calor, & ut partes subtilifat unitque, ita & horum ingredientium vires haud parum adjuvet efficiatque, ut intestina sua agitatione calefaciant, ut magis penetrare & transire possint, humores circulantes ad maiorem motum cieant, magis aperiant, magis diluant. Nam tenendum & hoc est, quod & alias aqua calida magis diluat, quam frigida, vis enim diluendi per calorem intendi videtur: aqua enim calida, magis secundum minimas suas particulas agitatur, magis movet, motu & vigore suo promptius intimiusque penetrat, viscida potenter resolvit, humores falsos acriores imbibit & diluit, ad fluiditatem reducit, solvit, detergit, ac secum ad emunctoria abripit, fecerit exacuitque. Hocque vivido suo calore & blando partes corporis humani fovet, ac reficit jugiter. Namque thermarum aquæ hoc habent peculiare, quod & aëri expositæ calorem suum diutius retineant, quam aqua communis calefacta. Hujus causa & ratio ex adductis repeti potest, quod sc. motum ab igne excitatum aër frigidus subito cessare faciat, thermarum vero calidos vapores cohibeat, ne tam cito dissipentur. Habent & hoc, quod licet sint fervidissimæ, uti thermæ Carol, tamen non linguam & fauces, potæ adeo adurant, neque excitent vesicas, ut quidem aquæ vulgares igne calefactæ.

§. X. Si non tædio, operæ pretium erit, ut singula ingredientia, prout nempe sunt extra compositum, ulterius ac seorsim inspiciamus, & illorum vires & modos operandi perpendamus, ut faciliori via ad usum deinceps illarum deveniamus. Quæ tenuium partium sunt in poris vehiculi detentorum volatiliū, spirituosarum atque ætherearum ad modum activarum sub forma vaporum adscendentes, copiosas bullulas monstrantes atque penetrante odore saporeque organa afficientes maximam vim medicamentosam, (utpote qui immediate agunt in spiritus animales,) explent, totum pervadunt corpus, immo totum genus nervosum, tam nobilissimo fluido perfusum, elastico quasi stimulo afficiunt, humores rarefaciunt, sive ad maiorem molecularum suarum discontinuationem adigunt, circulum illorum intendunt, organa stimulant secretoria & excretoria & virtutes, alexipharmacas aliasque longe antecellunt. Tenues istæ partes primam hic sibi vendicant gloriam, cum fixæ minori in copia insint, a quibus tantæ virtutes, quas præstant aquæ nostræ salutare, vix sperandæ veniunt; Speciatim de reliquis & dicendum est, quod primo principium sulphureum ex phlegmaticis, salinis, oleosis particulis conflatum, in medicina admodum utile, acidum obliniat, temperet,

peret, emolliat, leniat, soletur nervos, spasmos sopiat, relaxet, demulcet, sedet dolores, somnum cieat (sulphur enim & aqua sunt somni materiale principium) discutiat, calefaciat, exsiccat, aperiat, penetret, digerat, putrefactionem avertat, veneno resistat, &c. Intus assumptæ ejusmodi thermæ subvertunt stomachum, alvum solvunt, & urinam pellunt &c. Vitriolum necat vermes, exsiccat, constipat, extergit, roborat, aperit, digerit. Sal alcali purgat urinam & sudorem movet, ut omnes aquæ (nam salia aquosa proficua magis diuretica) sale alcali turgidæ; magis vero urinam adhuc, si sal illud quoque sit aluminosum, acidulum concitat, incidit, attenuat, atque viscidum resolvit, aperit, siccat, acidum invertit, abstergit, secretiones & excretiones juvat, progressum sanguinis celeriores reddit, faciliat, cum partibus terreis conjunctum, roborat &c. adeoque in conservanda sanitate & profligandis morbis, maxime chronicis ab acido imprimis oriundis, eximie se gerit. Præstat hæc omnia imprimis juxta spicula sua tenuissima, divisa æther copiosus, in pororum interstitiis hærens, utpote causa efficiens omnium motuum materialium, omnisque fluiditatis, ob maximam suam subtilitatem & celeritatem. Ob has partes spirituosas sulphureas & salinas per aquas solutas & activas factas caloreque exaltatas, utpote principia magis activa, possident egregiam vim per subtilissimos poros & canales penetrantem, qua propter ad affectas corporis partes intimiores pervenit, maximeque ad motum stimulat. Quibus modo indiciis me non monente quivis percipiet, thermas nostras, in contumacissimis & abstrusissimis corporis vitiis, minimorum canalium & tubulorum obstructionibus, referendisque dyscrasiis humorum & per consequens etiam spirituum animalium corrigendis non solum interne, sed & externe egregiam ferre opem, &c. Bituminis vires affines propemodum sunt viribus sulphuris; ut aluminis, vitrioli, minus tamen efficaces; bituminosæ tamen aquæ, purgando, vitiis corporis magis medentur. Mars adstringit, roborat, & aperit, simul cum gravitate, attenuandi ac rarefaciendi virtute præditus, quam contrariam actionem (ut cursim hoc addam) ita mihi concipio, quod vasis obstructione liberatis eorum latera adstringi s. contrahi necesse sit; fibræ enim sanguine stagnante relaxantur, remota hac vero elasticitate sua, tonum restitunt & pristinam contractionem exercent, acidum porro destruit & ad morbos corporis diuturnos, salinos, tartareos, multi est usus. An mars, ut solidissimum & durum corpus, aquas, s. ejusmodi liquores, qui manifeste tales non apparent, inficiat, hac vice multis argumentis & experimentis non declarabo. Terreæ refrigerant, siccant,

cant, roborant, absorbent, temperant. Quin immo in toto mixto ex oleaginositate humectantem, emollientem, anodynam; ex odore forti penetrantem; ex sapore subdulci concoquentem, emollientem, &c. ex subadstringenti refrigerantem, condensantem, replentem, roborantem; ex subamaro purificantem, aperientem, attenuantem; ex falso siccantem, resolventem, a putredine præservantem diureticam, laxantem hauriolamur qualitatem, & sic porro.

§. XI. Ob varias has concretorum in se invicem mixturas operationes variæ quoque oriuntur, ut ideo non tantum ingredientia mineralia, sed & crasis & modus, vel secundum veteres, temperies substantiæ, attendenda. Namque ob unionem adeo intimam & novum quoddam quasi enascitur, nova componitur vis, ut illud in multis videmus, v. g. mithridatico, & theriaca, cortice peruviano, pulvere pyrio &c. in quibus conjunctæ atque unitæ saltem partes, effectum edunt. Optime inquit GALENVS *de med. facult. L. II.* remedia quædam specifica, quæ tota substantia, i. e. non juxta certas suas partes, sed quatenus omnes hæ partes totum quoddam constituunt, agunt. In hanc rem testimonium quoque affert B. ETTMÜLLERVS *Op. M. T. XI. p. 1907.* Sicut videmus, inquit, in antimonio, cujus neque substantia acida, neque alcalina separata, sed ambæ saltem combinatæ catharticæ sunt. Quare satius est, & multi momenti, ita sentiente GALENO *L. V. de sanit. tuend.* thermas & aquas medicatas experientia ipsa cognovisse, cum modus unionis, (non simplicis cujusdam mixtionis) adeo intimæ nondum satis perspectus sit. Ideo monet HOFERVS in *Herc. Med. T. I. p. 345.* de aquarum, dicens, medicatarum qualitatibus temere non judicandum. Si enim videmus tales aquas constare v. g. ex alumine, sulphure, ferro, nitro, non statim pronunciandum: ergo eas habent virtutes, quibus constant mineralibus, &c. Quin immo refert A. LIBAVIVS *de Nat. Metall. p. 93.* inveniri aquas ollas corrodescentes & lapides, eorumque halitus mentem eripientes, quæ tamen salubres sunt medicinæ, quod & de Wolkenst. Gœbelius narrat.

§. XII. Ac si omnia sub incudem revocamus atque perpendimus, hauriolari licet, quod nostræ aquæ foteriæ sive externe sive interne usurpentur, caloris & contentorum ope virtutes calefaciendi, diluendi, emolliendi, maturandi, siccandi, corruptionem ac putredinem avertendi, relaxandi, acrimoniam temperandi, leniendi ac mitigandi, dolores sistendi, attenuandi, resolvendi, detergendi, aperiendi, confortandi, consolidandi, evacuandi præsertim, obtineant. Exindeque colligitur,

quod ventriculo, intestinis, utero, vasis sanguineis, pulmonibus, &c. auxilium ferant & quod magnum usum præstent in morbis ex lymphâ crassâ, viscida & falsa acidâ, acri oleosâ, in obstructionibus, in atonia fibrarum ac earundem crispatura, in exulcerationibus, tumoribus &c. atque uno verbo in plerisque morbis, si non restitutionem in integrum, levamen ad minimum maximum concilient. Licetque vel exterius saltem in balneo adhibeantur, vim tamen penetrandi egregiam per poros corporis undique possident, immo ad fluida usque. Calida enim aqua, utpote magis mobilis atque pervadens primario, cui ingredientia tanquam vehiculo insunt, non solum laxat fibras & dilatat, aperit, rarefacit poros cutis, ut hæ particulæ salino-sulphuræ, magis activæ, spirituosæ, libere eoque melius intimiusque per eas se insinuare & operationes suas perficere possint, sed & ipsa, per poros particulis suis lubricis, flexilibus promptissime se recipit ad intimiores corporis usque recessus, quæ res licet a multis in dubium vocetur, per multa tamen experimenta multosque effectus demonstratur, adeo ut vix de ea dubitare liceat. A peripheria ad centrum sic recepta aqua thermalis, undique operationes suas perficit; & rursus a centro ad peripheriam agit. Unde aptæ sunt, quæ causas morborum etiam in remotissimis locis destruant; Penetrantiæ resolutionisque humorum coagulatorum, earum vis exinde vel nudis oculis patet, quia in balneis limpidis interdum post infessionem, levis quædam pinguis atque interdum nigricans cuticula supernatat, ex balneantibus sine dubio, non ex ipsis thermalibus aquis, profecta. Amplius dicendum est, quod aquæ in balneo mole, densitate ac pondere, quo ipsum aërem adhuc antecellit, undique nitentes agant, cutem cum subjectis musculis & vasis omnibusque reliquis organis impellendo, comprimendo eoque humores ex glandulis & poris excretoriis etiam ex intima corporis regione exprimendo, sicque circulum sanguinis augendo, ut variis experimentis demonstrat L. BELLINI *de miss. sangu. p. 144.* ad quod efficiendum majorem vim possident, dum ex inferioribus scaturiunt calidæ, quæ vis ex aqua in fontibus artificialibus aut thermometris inclusa & calefacta æstimari potest, dum in altissimum spatium evehitur ac expanditur, vel vasis firmissime etiam solidissimis inclusa, accedente calore, dum ea magna vehementia disrumpuntur. Quam actionem adjuvant spiritus & salia, maxime in ipsis aquis thermalibus contenta, quæ titillatione levique vellicatione sua & stimulo in papillis nerveis facto, eam sollicitant. Et ut in compendio illarum faciem exhibeam: s. intus, s. extus adhibeantur, duo illa summa capita reme-

remediorum explent, alterant sc. & evacuant totum corpus sensibilibiter & per omnia emunctoria, insuper præservant & curant, juvant per se & per accidens morbos internos æque ac externos, operantur tam quantitate, quam qualitate.

§. XIII. Operatio autem ipsa his resultans, secundum varia subiecta variat, ut hoc quidem commune omnibus propemodum remediis est: In aliis efficacior, in aliis minus talis est; nunc enim v. g. balneum imprimis obstruit alvum, nunc solvit eam, nunc potius alvum magis aperit, nunc magis urinam pellit, nunc sudorem, quandoque & salivationem concitat, non raro per nares, interdum per aures & ductum Fallopiæ, ad fauces, pone uvulam excernit atque deponit recrementa. Eadem operatio rursus in aliis per narium spontaneas hæmorrhagias, per hæmorrhoides & scæminarum mensium fluxum aliasque uterinas excretiones se exserit. Alii citius, tardius alii a thermarum adhibitione moventur. Nonnunquam simul omnes hos effectus edunt, nonnunquam aliquos & seorsim; hocque pro utentium vario vigore & sensibilitate ventriculi & intestinorum, pulsu cordis & arteriarum copia, consistentia & fluxilitate humorum, amplitudine pororum & meatuum accidit, unde etiam facilius aut difficilius transeunt aquæ, distribuuntur, solvunt, secernuntur & excernuntur. Ordinaria vero nostrarum thermarum operatio, quam omnes propemodum maxime balneantes experiuntur, & quæ iis quasi propria censetur, est, quod post aliquot modo ex balneo dies, cutis rubris maculis aut purpura totius corporis cum maxima euphoria suffundatur, quæ efflorescentia modo in his per unius saltem septimanæ spatium, modo in aliis per plures III. IV. V. atque quandoque VI. hebdomades & ultra subsistit, & vel balneo continuato iterum decedit, vel etiam non raro post usum balnei absolutum, protrahitur. Immo nota sunt exempla eorum, qui domum jam reversi per tres menses purpurati manserunt, & quibus hæc cutis efflorescentiæ tribus vicibus inter hoc tempus redierunt, & sponte sua temperato regimine habito, cum euphoria etiam decesserunt. De reliquo operatio earum ut lenium satis, leniter sensimque, sed secure certeque procedit.

§. XIV. Alioquin nostræ temperatæ thermæ ferme omnibus temperamentis, cujuscunque fere ætatis, sexus, atque conditionis sint, convenientes maxime sunt & acceptæ, conferunt medenturve affectibus chronicis itidem & acutis, calidis sic dictis ac frigidis &c. Nimirum refrigerant transpiratione, quam movent, & poros aperiunt, rarefaci-

unt, partes sulphureas, calidas temperant, ejiciunt, relictis terreis aqueis frigidioribus vel ebullitionem & obstructionem tollunt; calore vero suo frigidos foveant, resolvunt, ut in auras abeant, superfluæ humidæ partes, fibras & roborant ut se contrahant, promoveant, neque superfluum quid iterum admittant. Sicca vero humectant corpora, dum aquæ copia & mora sua partes diluunt, humectant, emolliunt, & humores rastos colliquant. GALENVS *Lib. de marasmo & Lib. III. de offic. Med.* simile annotavit *de balneis & Hipp. L. de affect. circa finem*, ut notum est; alias frigida quandoque calorem revocare (cutem refrigerando, contrahendo, effluvia calida ut retineantur,) & quædam calefacere per se, per accidens vero refrigerare (v. g. camphora, sp. vini, opium) & quædam per se refrigerare, per accidens calefacere (ut aqua frigida, acetum.) Verum enim vero si exacta ac strictiori æstimatione hoc ipsum perpendimus, in genere dicendum est, omnes thermas manifeste calidas, balneo præsertim adhibitas subjectis humidis & frigidis, serosis, laxioris habitus, foeminis magis convenire, morbis quoque frigidis & humidis; calidis jam existentibus vero minus, ut febribus ardentibus & inflammationibus &c. ubi vero morbus talis nondum factus, sed in fieri adhuc & ubi dispositio saltem adest, &c. thermæ utique concedi poterunt, ita sentiente BACCIO *L. III. p. 131.* experientiaque comprobante.

§. XV. Priusquam hinc abeamus, differentiam quoad operationem & effectus, quæ duobus his fontibus intercedit, seorsim & explicatius lustrabimus. Equidem maxima ex parte inter se conveniunt, differunt tamen, si exacta pensitatione æstimantur. Nimirum minus calefaciunt Schafgotschianæ thermæ, magis emolliunt, magisque resolvunt, atque abstergunt, adeoque in ulceribus iisdemque malignis & contumacioribus, & scabie atque catarrhis & similibus obnoxiiis magis profunt; cachexiam, tumores quoque duros magis sanant, averunt, præcavent, resolutionibus, contusionibus, immobilitatibus, tremori, obstructionibus, in fluidi nervei impedito ad partes defluxu &c. magis sunt utiles; in dyspnœa, asthma, hypochondriaco malo & melancholia hypochondriaca (potæ) certiore præstant usum, excretiones omnes cutaneæ ex illarum usu magis proveniunt, plus alvum laxant & diuresin augent; attamen quadantenus ventriculum debilitant & appetitum destruant, citiusque suas vires perdunt. Alteræ potæ, si in ventriculo vel ejus orificio bibentis, aliqua saltem acris vel biliosa materia hæreat, excitant magis gravitatem & dolorem ventriculi & capitis
cum

cum inflatione abdominis citra frequentiore alvi dejectionem. Cumque calidiores sint, frigidioribus sic dictis subjectis, mulieribus, frigidioribusque ac humidioribus magis affectibus quadrant externo usu commendatæ, magis afficiunt, penetrant, imprimuntque contenta, atque roborant, condensant, leniunt, siccant magis, quare morbi, ex laxitate partium, uteri &c. nati, facilius restitutionem nanciscuntur & fluxiones pertinaciores atque rheumatismos, scapularum, spinæ, coxendicis, juncturarum manuum & pedum validius abigunt, conferuntque magis podagricis, gravidis, fluxui mensium nimio aliisque fluoribus obnoxiiis, & accidentia, ut vertiginem, capitis dolorem, gravedines &c. concepta ex usu forte fontis Schafgotschiani his curantur.

CAP V T IV.

*Usus specialem Thermarum Hirschbergensium
trahit.*

§. I.

JActis jam fundamentis ad usum thermarum nostrarum devenimus, ut specialius hunc penum instruamus. Habent utique thermæ suos insignes & varios usus, tum medicos, tum medico-politicos (ut mere politicos taceam) ut scilicet v. g. non tantum diæta paulo melius ordinetur sed & ut sæpe immorigeri ægri domi præcepta medicorum negligentes, aut fastidientes, suo genio ex consuetudine domestica indulgentes, recepta universali observantia ibi locorum strictiori, teneantur, quo sæpe miratus sum ægros vix 20. vel 30. guttulas tincturæ aut dr. β pulveris alias assumere negantes in thermis tantam copiam aquarum thermalium bibisse. Ut porro animus in ejusmodi amœnis gratisque diverticulis a seriis curis, negotiis gravioribus, concatenatisque laboribus & domesticis occupationibus, ad tempus quoddam abstrahatur, pacatus & tranquillus reddatur, novitate & mutatione loci, jucundo convictu & hilari familiaritate, amica & læta conversatione, quæ in ejusmodi consuetudine eminent, colloquiis amicorum & variorum peregrinorum recreetur; hoc pacto enim mire animus roboratur & erigitur, excitatur, & hinc sanguinem & humores temperate movendo & spiritus excitando, non adeo facile morbos admittit, vel citius ejicit. Non facile dictu est, quantum faciat hilaris animus ad prolongandam vitam atque sanitatem conservandam amissamque restituendam, immo
ad

ad promptiorem remediorum operationem. Qualis enim animus est, talis spirituum motus, talis motus cordis arteriarum, tonusque partium, talis circulatio; & qualis circulatio, talis est sanitas. Scite in hanc sententiam scribit BARDVS in *Med. polit.* p. 310. Cor lætum benefacit medicinæ; tunc enim medicamentum proficit & iuvat, dum alacri animo est, qui illud accipit. In præsens notatur, quod MENEDEMVS Philos. apud Laërt. L. II. 133. dicatur φιλυπόδοχος exinde, quod ad loci insalubritatem vel evitandam, vel minuendam frequentius inter amicos, hospitesque in conviviis exhilaraverit animum, (quo corpus quoque sustinetur) & quod Romani olim & Byzantini, inter summa deliciarum genera, peregrinationes retulerint. In horum numerum referre non dubito eum, quo obtinetur, ut a medicamentorum farragine devoranda ad tempus aliquod feriantur miseri, a quibus medici atque pharmacopœi indies solvunt tributum. His & jungitur eximius usus motionis corporis, mutationis aëris, victus, consuetudinis &c. Quantum illa omnia ad sanitatem conservandam, præcavendos morbos, & præsentis fere omnes chronicos atque rebelles immorigeros conferant, nemo non novit, aërem enim (quem occultum vitæ pabulum veteres jamdudum esse dixerunt, & recte quidem dixerunt:) istis in locis, ubi thermæ habentur, longe alio salubriorem esse, constat, & quæ sunt alia, non longius jam recensenda.

§. II. Sed ad Spartam nostram, quam tuendam suscepimus. Equidem usus primarius thermarum Hirschbergensium, (ut cæterarum quoque) olim duntaxat externus atque balneum fuit; verum etiam illarum internus sive potus etiam æque probatur. CRATO A KRAFTHEIM uti legere est in *Epistol. med.* p. 251. suo tempore frequentissimum eum vidit atque commendavit, hodie is magis iterum negligitur; balneum usitatissimum est multifariis commoditatibus plurimis commendabile. Quocunque etiam alio modo adhibeantur salutares sunt, immo solus earum vapor utilitate sua non destituitur. Quamvis hoc fatendum sit, quod ob longe forte minorem, quam continent, salis partem aliis, v. g. Carolinis quoad potum non æquiparandæ sint, purgant tamen æque sine notabili corporis perturbatione atque debilitatione, minori longe quantitate ac Carolinæ, siquidem unus saltem alterque haustus alvum pluries movet ac non raro vomitum creat & licet per plures sæpe dies istæ operationes instituantur, utentes tamen vix exinde debilitantur, quod omnibus thermalibus aquis commune est, & in hoc mirabile quoddam præ omnibus aliis pharmacis evacuantibus habent, utpote quæ sub pur-

purgatione & sudatione quam efficiunt, vires simul notabiliter perdunt cum ventris torminibus, anxietatibus circa præcordia imprimis, siti, fastidio ciborum, vertigine, lassitudine & quandoque animi deliquio, aliisque sat gravioribus symptomatibus. Nec non urinam potenter cient, & sudorem quoque simul movent. Utrumque remedium, balneum scilicet & potus, in usum duci convenit, ubi viscidum, pituitosum, glutinosum, crassum firmiter plicis & parietibus ventriculi & intestinorum impactum, imprimis est resolvendum, emolliendumque & educendum, acidum temperandum, & mineræ morbosæ intimiores circa membranas & nervos &c. hærentes tollendæ, & ubi pertinacissimi & abstrusiores affectus & frigidiores sic dicti subsunt, vel ubi hæc vel illa pars affecta majori remedio præ reliquis opus habet, ubi & affectus & pars affecta majorem vim ac impetum celerioremq; operationem exposcunt. Atque ubi majori energia citiorique penetratione opus ascensus ex puteis thermalibus cum scaturientibus aquis (das Aufquellen) jungendus ac stillicidium quoque in auxilium vocandum.

§. III. Proximum jam est, ut thermarum nostrarum multiplici experientia non per unius saltem seculi decursum, in morbis corporis humani adeo innumeris probatum usum, & ex universalibus adductis colligendum, fusius tradamus. Scilicet diligenti & quotidiana fere annotatione constat, quod nullum prope morborum genus sit, quod in medicatis nostris aquis suum remedium non inveniat, atque quod præsertim virtus illarum optime se manifestet rite exhibitarum in omnibus morbis diuturnis, chronicis & pertinacibus, & qui lyssi maxime solvuntur, pneumatosi læsa, chylosi læsa & inde natis cruditatibus & humoribus corruptis, acidis, salinis, tartareis, biliosis, viscidis, & inde dependentibus stagnationibus & obstructionibus, viscerum infarctu, humorum decubitu illorumque impuritate, nec non a tono fibrarum læso oriundis, aut ubi fibræ sunt tensæ, rigidæ, contractæ, in motibus spasmodicis, doloribus, tremoribus, impotentia motus &c. In specie dicendum est, eas prodesse in omnibus affectibus capitis, si deuteropathici & a causa, ut dicunt, frigida sint, si vero idiopathici & inveterati, plurima ex parte non tam certe, non tam facile, opem conferre. Tumque miros præstant effectus in vertigine, cephalalgiis, vigiliis immodicis, affectibus soporosis (in declinatione præsertim) memoriæ debilitate, stupore, resolutione, contractura, paralyfi, paræsi, &c. Utile quoque est balneum post perpeffos melancholiæ paroxysmos, item in oculorum affectibus multis, doloribus, visus hebetudine, fi-

stula lacrymali & gutta serena, aurium susurro, tinnitu, gravi auditu, furditate, humiditate superflua, apostemate, dentium gingivarum affectibus, qui fiunt ex condensatis crassisque humoribus & acrimonia. Observatumque etiam est: restitutum inde fuisse gustum atque olfactum abolitum, & loquelam amissam. Conducunt porro in dyspnœa, asthma humido, extra paroxysmum, tussi ferina similibusque affectibus pulmonum, si sunt a simplici stagnatione, perfrigeratione, pressione, infarctu & per consensum hypochondriorum, phthisi incipiente, & exulceratione pulmonum superficialia, quæ non est exedens aut putrefactiva, pulmonum scirrhus nondum inveterato, nec non palpitatione cordis, incubo (potæ). Juvant affectus ventriculi & intestinorum viscerum dyspepsiam, cibi fastidium, lenteriam, coeliacam passionem, diarrhœam, dysenteriam, vomitum, choleram in declinatione (balneo) revellendo humores, glandulas salivales & gastricas sollicitando & influxum spirituum concitando. Tenesmus, tonum ventriculi adstrictum solvunt, si bibuntur, laxatum firmant, tormina ventris & colicam flatulentam, pituitosam immo & spasmodicam sedant, flatus discutunt, singultum sistunt, intus extusque exhibitæ. CRATO A KRAFTHEIM *Epist. med. p. 250.* Vratilaviensem quendam civem primum, multo tempore colicis & articulorum doloribus diu excruciatum, præter spem ex potu thermarum convalescere vidit. Potæ & in alvi segnitie & iliaca passione, in incipiente hydrope, ejusque speciebus, in anasarca, leucophlegmatia præsertim æque ac in balneo fuadentur. Item in malo hypochondriaco & scorbutico, quia temperant, diluunt, demulcent massam sanguinis, saliaque abstergunt eaque per debita emunctoria educunt, optimæ sunt. Nec est quod in calido, ut ajunt, scorbutico eas metuas, ut quidem quidam scrupulum movent, quoniam moderate sat agunt, neque adeo debito modo usurpatæ nimis calefaciunt, exsiccant, liquidas partes necessarias absumunt, neque salia scorbutica magis exaltant. Aliæ quoque tales temperatæ thermæ, ut Empsenses & Teplicenses in hoc morbo innoxie sunt inventæ. Hic occasio obvenit recensere historiam de viro quodam Ministerio ecclesiastico in Lusatia constituto, hypochondriaco, scorbutico, a me notatam, cujus postquam per II septimanas thermis nostris usus esset, extrema digitorum, manuum pedumque, præsertim ungues, nigro ad instar atramenti, colore obducebantur, qui post III septimanas demum ex continuato balnei usu auspicato, sensim decessit. Ad hæc in febribus intermittentibus diuturnis, quartana præsertim, & ephemeris (cæteris paribus) non modo

modo in declinatione, sed & in principio & statu, (nam tales curant æque ac præservant) iis præsertim quæ a transpiratione sunt impedita, vel si secundariæ illæ sunt, v. g. a scabie retrocessa &c. extra praroxysmum tamen conceduntur. Certior tamen effectus sperandus, si alia remedia febrifuga, ut salia aliaque repurgantia, ut & amara ac tonica in hac aqua therma mali tanquam accommodato vehiculo, assumuntur. Comendantur illarum potus in pathematibus, febribus ex præpostero chinæ chinæ vel adstringentium usu, supervenientibus, ubi exinde hæctica & hydrops imminent &c. GALENUM idem sentire in genere de balneis calidis, patet ex *I. ad Glauconem* & *L. V. de sanit. tuend.* adducitque, quosdam, balneo sine, quotidie febricitasse: Siquidem & ego novi potu illarum febre tertiana continua & lenta, varios liberatos esse. Nihilque vetat balneum adhibere, in metu inflammationum, erysipelatis &c. (præservandi & roborandi, transpirationem promovendi fine) in inflammationibus quibusvis internis & externis desinentibus, v. g. pleuritide, peripnevmonia, tunc enim suppurationem maturat, dolores mitigat, solvit, educit. Herniam intestinalem non adeo inveteratam & repositam in sede firmant sine dubio juxta alias dotes, quas afferunt, leniter constringente firmanteque sua virtute, peritonæum in pristinum suum statum reducente; flatuosam autem discutunt, & singulas consolidant, quibus in casibus fons Præposituræ præfertur. Hæmorrhoidum fluxum nimium compescunt, hæmorrhoides vero cœcas aperiunt, hæmorrhagias sistunt maxime potæ, quo & vermes necant educuntque. Scirrhum hepatis, lienis, aliorum viscerum & glandularum & vasorum & obstructionem immo & nervorum resolvunt, aperiunt, secretiones humorum per suas glandulas adjuvant, rarefaciendo humores partesque laxando, indeque natum icterum flavum, nigrum, curant. Renum, ureterum, vesicæ dolores, a calculo nimirum oriundos, omnium immatissimos demulcent ac sistunt, exulcerationes, excoriationes, tumores, læsionesque alias harum partium sanant, quo nomine nostræ non inferiores forte sunt aquis ferratis in Tuscia, quæ vesicariæ ea propter nominatæ sunt. Urinam proliciunt, poros aperiendo, aliasque suppressiones humorum excrementitiorum solvunt, saburram viscidam, tartaream, destruunt, calculorum, sabulorum, renum & vesicæ educationem promovent, atque expellunt, imprimis intus sumtæ, si nimirum non sint nimis grandes calculi & per multos annos jam non cum illis luctati sint ægri, & ubi in fieri magis sint, & in vasis tartarus ille adhuc fluctuet fluidus, & inflammationem insequentem præcavent. Curant

præsertim Abbatia thermæ, diabete[m], incontinentiam, difficultatem, ardorem urinæ, (imprimis puerperarum) mictionem cruentam & purulentam. Uterum sanant, meatus illius recludunt, impuritates, humiditates extergunt, foveant, resiccant, roborant imbecillem, tumores ejus emolliunt, resolvunt, mensium obstructioni (tum emolliendo vias, tum fluxiles reddendo humores, & excitando) sterilitati mulierum & impotentia virorum, subveniunt ac venerem languidam in utroque sexu instaurant, priapismum vero corrigunt, ulcera prostatica sanant, læsionibus aliis pudendorum, rimis & prolapsui uteri & intestini recti insessu, inserviunt. Balneum præcavet abortum, partum in iis, quæ alias cruciatu & labore gravi pariunt, circa instans tempus adhibitum, immo foetus mortui & molæ exclusionem faciliat, menses superfluos & inordinatos, fluores albos mulierum, pallidos & discolores ac genituræ involuntariam emissionem in viris, maxime Præposituræ fontis, compescit, uteri suffocationem atque hysterica[m] passionem, ut & potus avertit, ac furorem uterinum componit. Profunt ejusmodi thermæ in obesitate minuenda & impedienda, si diutius & largos usque sudores, illarum usus protrahatur, succum nutritium evacuando, robur addunt fibris laxatis, illudque restitunt. Foveant refrigeratos nervos & tendines, exindeque dolentes perniones, dolores artuum etiam ex lue venerea residuos, sistunt & corrigunt, & a mercurio forte in corpore restitante vitia alia inducta emendant, idque ob sulphur præsertim quod mercurium ligat: quinimmo sub fine luis venereæ permittuntur. Quoniam evacuatoria omnia aperta nostrarum thermarum usus servat, excrementitios accumulatos humores variæ indolis educit, & obstructiones salium genetrices potenter resolvit, calore pariter blande demulcet & roborat. Catarrhos, rheumatismos in quibusvis corporis partibus & fluxiones ad scapulas præcipue, spinam dorsi, juncturas manuum & pedum, malum ischiadicum & arthritidem maxime fixam, podagram, si ex imbecillitate partium collecta materia articulis est impacta, tutius certiusque quam ex defluxione vaga volatiliori, si non adeo inveteratum sit malum & ad senectutem usque productum, vel hereditarium, vel ubi callum & nodos non apposuerit majores, balneum maxime sanat & vitiosum tendinosus & nervosis partibus altius insidens, humidum peccans discutit & dissipat, omnibus ideo morbis spasmodicis, utile & aptum; quanquam etiam potus hos dolores aufert. Consulto itaque utrumque in usum in his casibus ducatur, & potus præmittatur, ut materia peccans per vomitum, alvum & urinam ejiciatur, & dein

dein balneo, debilia membra roborentur. In ipso tamen paroxysmo & in principio horum morborum minus (balneum) idoneum est. Egregiæ utræque quoque sunt thermæ, in podagra in corpus retrocessi. E-nervatis, refrigeratis & debilitatis, paralyticis, resolutis, tremantibus, convulsis, contractis & spasmus crispatis, duris, inertibus, claudis, nutritione depravata & impedita & tabe & atrophia marcescentibus & ex-fuccis membris explanandis ex contusione, ictu, casu, fractura, luxatione articulorum (tum emolliendo, tum roborando nervosas partes) defatigatis item (hinc juvenes olim Romani in palæstris fatigati se mox in thermas iis ordinario junctas recipiebant, ut suas inibi vires pristinas recuperarent,) ut & ambustis callosis, balneum egregie subvenit. Hæ in his casibus gravioribus præ omnibus aliis balneis nobis notis palmam præripiunt, adeo ut ad nostras, artuum articulorumque affectibus capti, ad ultimum quasi asylum, ob tot felices, quos in iis percurandis edere solent effectus, longe lateque notos, confugiant. Apprime etiam illud (balneum) utile est post morbos chronicos diuturnos perpeffos. Tumores duros, flatulentos, oedematosos pedum &c. & ab erysipellate, podagra potu aquarum &c. provenientes & tophos articulorum strumasque sic emolliunt, attenuant, resolvunt & varices auferunt. Abscessus, exulcerationes & apostemata omnia non solum externa, sed & intus collecta in capite, pectore, hepate, renibus, utero &c. maturant, emolliunt, aperiunt & per proximas & expeditas, naturæ vias repurgant, imprimis Schafgotschianæ extus quidem adhibitæ. Sanguinem congruatum in interioribus & læsione partium (*Verbrechen*) resolvunt, læsionesque ipsas atque adeo nervosarum partium persanant atque complacant. Vulnera, fistulas & ulcera brachiorum & crurum, abdominis reliquarumque partium inveterata, callosa, maligna, cancrofa, rebellia, fluida & corrosiva & male curata, gangrænam, cariem ossium, spinam ventosam, rhachitidem, non adeo inveteratam eam quidem, sanant, affluxum ulteriorem inhibent, acidum ichorosum domant, carnem sphacelatam & putridam separant, novamque renascere faciunt, fibras nerveas roborant, latera glutinant, cicatricem inducunt. Vulnera jam dudum, sed non rite sanata, aperiunt, saniem & globulos, festucas, frustula ossium fractorum aliaque profunde hærentia, sanationem impediencia, eliciunt. Conveniunt fracturis calli inductione egentibus; Commendantur etiam ad vulnera a telo, globulo venenato &c. illata, ad morsus venenatos animalium, venena assumpta (pellendo per circulationem ad exteriora.) Immo in morbis ab incantationibus nostræ thermæ a nonnullis laudan-

tur. Omnes foedos virginum colores auferunt, omnesque maculas cutaneas, varii generis, diversæque indolis, scorbuticas & vitia alia, quales sunt impetigo, vitiligo, verrucæ, herpes miliaris, serpigo pinguis, lychenes, scabies foeda, humida, lepra, pruritus, item variarum partium, phthiriasin, foetorem alarum & pedum abstergunt & corrigunt, ac discutunt, humores in poris cutaneis hærentes, sic & unguium vitia, scabritiem, emendant, suffusiones dissipant, membris lividis colorem naturalem restitunt, sanguinem aliqua in parte coagulatum, stagnantem resolvunt, cuti nitorem inducunt, & cosmetici vices implent. Insuper quandoque a recte valentibus adhibitum balneum sanitatem integram diu servat atque longævitatem conciliat, siquidem balnea etiam simplicia quandoque atque debito modo adhibita, præcipuum medium ad senium retardandum & propagandam vitam esse existimo, quoniam per ea fibrarum & membranarum nimia ariditas & exsiccatio, soliditas & durities atque canalium angustia, quæ crescente ætate inducuntur, & secretiones & excretiones debitas influxumque liquidorum laudatissimorum, ad motum ac nutritionem necessariorum, impediunt & circulationi humorum obicem ponunt, sicque vires subinde absumunt mortemque naturalem inferunt, emolitione avertuntur & præcaventur. Pro quo scopo præsertim, in quotidiano fere usu, talia fuerunt olim Græcis atque Romanis. Si vero balnea simplicia hoc egregium emolumentum addunt, majorem adhuc nostra ejusmodi præstabunt, quemadmodum sunt temperata ac blanda omnibusque hominibus, qualis etiam sint constitutionis, convenientia, & quia egregie emolliunt & partes solidas ita disponunt, ne fluidis circulantibus impedimento sint, atque commoda memorata melius expediunt.

§. IV. Juxta hos primarios & universales usus, balneum nempe & potum, alios quoque eosque particulares, & secundarios magis thermæ obtinent. Nimirum quandoque & loco fomentorum adhibetur aqua thermalis. Sic incolæ quando oculorum vitiis, hebetudine, suffusione multisque aliis, immo inflammatione laborant, eos illa cum laudata euphoria fomentant, sed oculi clausi tunc teneantur, ne forte vapores sulphurei molestiam creent; externe vero sic admotæ aquæ thermæ egregie discutunt. Hoc modo adhibitis in foemina quadam fistulam lacrymalem feliciter sanatam esse scio. In nares etiam adtrahi possunt aquæ thermæ pro abigenda ozæna, & restituendo odoratu amisso &c. In hydrocephalo egregiam tulisse illas externe sic usurpatas, opem constat. In maniacis item, capitiluvia ex thermali aqua adornata proficua inven-

inventa sunt. Hæc vicini Poloni contra morbum suum endemium, pliam polonicam, cum successu adhibere solent. Nec dubium est, quin & in aliis capitis vitiis, locum inveniant, iis præsertim, qui in memori- am revocare vellent, quantas morborum curationes solis capitis lotioni- bus Georgius Anwaldus, a quo panacea anwaldina procedit, instituerit. De lutatione, fots specie, multis in thermis apud nos pariter ac apud veteres teste Plinio usitata pro emolliendi, resolvendi roborandique scopo, hoc tantum referam, quod & ex nostris ea adhiberi posset. Nam ille præcipue qui Schafgotschianus audit, fons sat copiosum lutum ejus- modi mineralibus talibus imbutum, concedit, neque contemnendos ef- fectus exinde esse sperandos, in nervis, articulis, artubus graviter affectis &c. omni asseveratione affirmo, & expertus hoc saltem testor, hocce lu- tum inter duo linteamina, per aliquot dies cervici applicatum, in resol- venda & derivanda gravissima in oculis congestione sanguinis, insigne levamen attulisse. Stillicidium quoque illorum auxiliorum genus est, Græcis olim usitatissimum quod & magnarum virium esse deprædicat GALENVS 13. *Method. Med. l. c. ult.* Huic ad majorem penetrationem membra indurata, resoluta, contracta, insensibilia, immobilia & tumori- bus duris frigidis & abscessibus, nec non rheumatismo & arthritide ob- fessa, caput, aures, collum, humeri, hypochondria, pedes morbis frigi- dis seu humidis, quos vocant vitiata, subjiciuntur. In linguæ paralyfi idem efficacissimum nuchæ applicatum est deprehensum. Præsertim clysteres ex illa aqua imprimis ex Cœnobii fonte hausta, parati, haud spernendum usum, & quandoque majorem quam potus præstant, in hy- drope præsertim, colica, calculi dolore, illiaca passione. Frequens cum aqua thermalis oris collutio, gingivarum vitiis ac tumoribus, illis erosio & ulceribus medetur, illas firmat, foetorem oris corrigit. Gargarisatio cum ea, tumores consillarum & anginam tollit. Si calidæ auribus in- stillantur, dolores earum sedant. Maximi tandem usus pediluvia sunt, quæ non solum juxta infessum in pedum affectibus, sed & in aliarum superiorum partium corporis morbis fere quibusvis, capitis præsertim, in omnibus doloribus, vertigine, melancholia, mania, fomno turbulen- to & vigiliis immodicis, &c. admodum conducibilia sunt, quoniam san- guinem in pedibus lente circumferentem diluunt, in circulum pristinum & debitum concitant ac cutem laxant, quo simul efficiunt, ut sanguis atque humores ab aliis partibus in has laxatas magis affluant, illæ vero ab one- re liberentur; Nec non ad ulcera & fistulas interiores intestini recti &c. magno cum emolumento per siphones injiciuntur aquæ thermæles.

§. V. Novum invitat de potu argumentum: an etiam thermæ inter pastum convenient potæ & an e re sit, cibos illarum aquis coquere & juscula forbilia atque cerevisiam exinde parare. Damnat ejusmodi usum imprimis BACCIVS *l. c.* & PANAROLVS *Pentec. III. p. 105.* Ast ut ut omnem inter pastum illarum usum & juscula exinde cocta jam non longius probare volo; novi tamen colica, cardialgia, inappetentia, bradypepsia, tono deperdito laxato & similibus ventriculi & intestinorum vitiis affectis, tunc potas calidas optime contulisse. Potantur & eundem in finem optimo cum successu quoque aquæ Bathonienses in Anglia GUIDOTTO referente *pag. 268.* Acidulis alibi incoquantur cibi.

§. VI. Quod modum adhibendi spectat, ut felix faustusque sit eventus, sequentia sunt tenenda. Nam omnia Medicorum præsidia per se & sola nihil sunt, nisi recte habeant utentem, quando demum ea veluti Deorum manus recte dixeris, ut Herophilus dogmaticorum Medicorum doctissimus dixit. Ante omnia salutem suam desiderans, Summum in cœlis Numen devotis precibus exoret, ut divino suo favore adspirando suam gratiam & benedictionem largiatur ac addat, a qua omnis salus unice expectanda; dein experti & prudentis Medici opera in consilium vocanda erit, ut præhabita exquisita notitia thermarum simul æque utentis constitutionis & conditionis, ætatis, sexus, virium, consuetudinis, causarum, partium affectarum, tempestatum anni, victus vivendique rationem habeat, utpote quæ remediorum effectus alterare & variare solent, ut præterita commemoret, præsentia dirigat ac moderetur, futura avertat, & prospiciat & expendat; si affectus urgeant, si aliqua minus consentiant, a noxiis tueatur. Hoc namque omnibus propemodum remediis commune est, ut non in omnibus subjectis & eodem morbo laborantibus eadem operatio, idemque sit effectus atque eventus, exinde quod humorum temperies valde discrepent & quod habeant temperamenta, immo individua suos mores, morbos & peculiarem ad hunc vel illum motum suscipiendum proclivitatem. Nam generales vulgares regulæ a diversis medicis circa thermarum usum præscriptæ & in thermologiis suis consignatæ, in genere & saltem late sunt accipiendæ: hinc adeo multa videntur tristia exempla in thermis, quæ de noxa exinde secuta sat superque testantur; thermæ vero tunc infontes, perverse accusantur. Inanis certe tibi erit usus thermarum, si non omnino nocivus, si regimen debitum & administrationem juxta leges prudentiæ & artis institutam non observes.

§. VII.

§. VII. Præsertim corpus bene præparandum est: Summa vero præparationis consistit in eo, ut ab excrementitiis, vitiosis & exuberantibus humoribus per alvum laxantibus & lubricantibus lenioribus, salibus deterfivis &c. junctis interdum clysteribus pro re nata etiam vomitoriis blandis & diureticis salinis, præsertim fixis & volatilioribus &c. corpora liberentur & educantur illa, quæ debent educi, ne abundantia & impuritas humorum, aquarum operationem impediat, distrahat, frustretur, commoti varias turbas excitent, difficiliorem transitum reddant, & simul cum iis ad massam sanguineam transeant, docente id CL. SENNERTO, *de febb. Hung. p. m. 551.* sequentibus: *Ii, qui pravis scatent humoribus, quicquid cibi, aut medicamenti assumitur, corrumpitur, evacuandi sunt, antequam alexipharmacum exhibeas.* Quod imprimis de thermarum usu valet, ut (cum ea quæ thermas, simul purgationem indicent, & v. v.) scilicet obstructions tollantur & lubricentur, purgentur, evacuentur & sic expeditæ reddantur viæ, per quas thermæ operationes exequi debeant. Præmittantur his digestiva, aperientia ex martialibus, tartareis, amaris, salinis, terreo salinis, aromaticis &c. (ut purgatio eo melius succedat) iteratis etiam vicibus. Imprimis præparatio hæc magis necessaria est iis, qui balneum ineunt, quam illis, qui potum eligunt, cum potus quandoque vi sua deterforia & purgante neglectam purgationem suppleat, balneum vero non item, movet quidem, sed non promovet & confundit, subtiliores partes educit, crassas aut intactas relinquit, aut subtilioribus discussis magis incrassat, figit, impingit, exinde obstructions, vigilæ diuturnæ, anxietates, capitis dolores, tormina ventris, catarrhi, febres, ulcera, exanthemata, urinæ ardor & obstructio, icterus, apoplexia, alvus adstricta, passio hysterica & similia mala enasci possunt. Ast caveant sibi omnes a vulgaribus & drastrictis purgationibus, resinosis, præsertim potaturi. Nocentissimum enim imprimis est interno aquarum thermalium usui purgantia fortiora præmittere: nam valida illorum operatione in fibras teneras, tonus ventriculi & intestinorum maxime destruitur, tunicæ illorum glandulosæ & crusta villosa, per quam omne humidum abit in vasa lactea, ulterius promovendum, constringuntur, eroduntur penitusque perduntur. Hinc quando dein aquæ potantur, nec bene per alvum neque per urinam transire possunt, sed retentæ, maximas anxietates aliaque mala pariunt. Si plethora adsit onerosa, altero die ab assumpto laxante sanguis evena extrahatur venæ sectione, vel vicaria scarificatione, maxime in iis, qui ætatis vegetæ sunt & qui plenius vivunt, vitam sedentariam agunt, vel quibus obstruitur hæmor-

hæmorrhoidum & mensium fluxus &c. vel qui illi adfueti sunt: ne rarefactione forte humorum subsequente ruptiones, hæmorrhagiæ, graves febres aliaque multa incommoda producantur. In plethoricis enim calidæ aquæ potæ, difficulter per debita emunctoria, ob difficile jamdum humorum circuitum secedunt. Insuper experientia præter alia constat, phthificos speciatim propemodum thermas bene ferre, sanguine prius ventilato. His namque præmissis omnia generatim tunc felicius succedent.

§. VIII. Advenæ ergo unum alterumque diem ex itinere fatigatum corpus curent ac requiescant, ut alterna requie, delassati reficiantur & pares sint, curæ thermarum eo melius sustinendæ, & deinceps medicamenta debita præscripta adhibeant. Præparato sic corpore cura ipsa thermalis in nomine Dei est inchoanda. Igitur sive potaturus, sive balneaturus statim mane somno sufficienter peracto, alvo urinaque prius reddita & jejuno ventriculo per dimidiam vel integram horam prius placide, neque ad lassitudinem usque ad levem tamen incalescentiam maxime si habilior, musculosior, robustior, cute densiori præditus sit, obambulando, vel alia ratione & exercitio corpus moveat & fricet, quæ frictio in debilibus, paralyticis, arthriticis &c. etiam loco exercitii erit, vel gestatio quoque in lectica, & si neque hæc fieri possint, commodum erit ante prandium aut cœnam suppositorio ex melle tantum, vel sapone uti. Nimirum juxta HIPPOCRATIS *L. II.* de diætâ effatum matutinæ obambulationes humores attenuant, caput aliasque partes alleviant, alvi ac aliarum partium excretionem promovent. A meridie post prandium hora Vta vel VI. digestionem sc. absoluta, ne chylus justo citius exturbetur & confundatur, observatis, quæ modo diximus, balneum æque ac potus repeti potest. Namque lege moreque statutum est, ut semper duarum horarum ad balneum terminus, maribus & foeminis alternis vicibus præfigatur, ita ut qui matutinis horis ineunt, vespertinis eundem repetant, immo vix ulla diei hora contingit, quin iterum sit ab aliquibus occupata. Balneaturi lente descendant atque primum per gradus sese immergant, tandem ad mentum usque, ut thermas bene tolerare adsuescant. Insidentes primum non modo attolluntur nantes quasi, adeo ut cum renisu quodam se mergant, sed & formiculationis quasi sensum in inferioribus corporis partibus persentiscunt, iisque primis diebus valide abdomen quasi comprimitur & constringitur & spinam versus valide contrahitur, quam validam contractionem vix in aliis thermis adeo sensibiliter experiuntur & me iudice, tam a mole ac pondere

pondere aquarum, cutem subjectos musculos cum vasis comprimente quam calore blando fibras demulcente, maxime vero a particulis activis atque divisis subtilissimis, spirituosiss, salinis, sulphureis in poros cutis se insinuantibus sensibilibiterque vellicantibus, ut fibræ fortiter se constringant, deducendam. Hæc vulgo pro bono signo & merito quidem habetur, atque tunc appetitus capiendi cibos mire augetur; Si autem infletur & torminibus afficiatur & uratur abdomen & totum corpus inhorrescat, malum, & balneum inutile futurum, significat. Quidam scilicet qui abundant humoribus acribus, dumque ii promoventur & transeunt, in primo ingressu uri & rodi interius sentiunt, & deinde inhorrescunt, (quod & alias experiuntur, quando in sole stant, aut ambulant, aut fricantur, aut corpus exercent) qui horrores tamen continuato paulisper usu cessant, quod pro bono signo pariter habetur; indicat enim humores peccantes ad extra ferri, tuncque æque augetur cibi appetentia.

§. IX. Quamdiu in balneo commorandum, & utrum semel in die an bis balneum ineundum sit, tolerantia cujusvis & vires ægri, morbi & aliæ circumstantiæ & medici prudentis consilium indicabunt, v. g. juniores consistentis ætatis, homines crassi, obesi, phlegmatici, robusti alias diutius frequentiusque senioribus balneum protrahant; cholericis, debiles, rarioris texturæ, macilenti, debiles & teneri longiorem evitent in balneo moram. Optimo cœterum consilio ad horam tantum dimidiam, vel integram primis diebus insideant, & semel tantum in die, dein & sequentibus per duas horas & iterata quoque vice balneum ingrediantur, ut aquæ vis, sensim irrepens in laxum corpus agat. Haud sine ratione alias vulgo dicitur, tamdiu in balneis commorari debere, usque sudor promanare incipiat; indicat enim serofas superfluitates excerni. Balneo egressi & post embrocham, summo studio, ab aëre ambiente frigido se muniant, ne pori cutis ab eo occludantur, incommodaque varia inducantur, quæ alioquin deinceps non balneo quam aëris mutationi aut verius propriæ incuriæ adscribant, & in tepidariis proxime adstructis, linteis calidis abstergantur & indusiis calefactis & vestibus commodis induantur, & refrigeratione sic bene omnique modo evitata, domum se recipiant, fricentque membra imprimis resoluta, ad horam unam vel alteram in lecto decumbant, imprimis imbecilliores & dormiant, quiescant, transpirationem & lenem sudorem expectent atque permittant, ad quem ab ipsius lecti blando calore expansionem modicam ipsis humoribus procurante invitantur.

balneum digerunt, transpirationem promovent, protrahunt, humores motusque ex balneis humorum & spirituum irregulares forte exortos componunt. Qui & causa & signum erit percommodum speratae utilitatis; Attamen plethorici post balneum potius ab eo abstineant, & per breve tantum temporis spatium non tam in lecto quam sella, ac sedentes magis quam recubantes requiescant. Deinceps, usque ad prandium modice per semihoram circiter ambulent, demum, postquam corpus ad calorem temperatiorem & consuetum iterum se receperit. Quemadmodum enim nec ab assumpto cibo uti oportet balneo; sic neque mox a balneo cibo, potu imprimis frigido; & cum quandoque balneum alvum adstrictam reddere, & sitim intendere soleat, multum bibant tam inter prandendum ac coenandum, quam reliquo tempore, neque inconsultum erit, ut illae molestiae melius praecaveantur, ante balneum bibere; siquidem utentibus balneo in Thermis Carolinis suadere solitus sum, ad praecavenda nimirum ejusmodi incommoda, haustum aquae frigidae, assumere. Insuper clystere emolliente & leniente alvus eluatur vel suppositorium applicetur, interque cibos & ante prandii coenaeque tempus laxantia, ut pruna damascena cocta, pasculae cum tartari cremore & similia assumantur. Non facile iterum est determinandus certus dierum & horarum balneo impendendarum numerus, ratio circumstantiarum supra adductarum & commodorum, quae aeger consequitur, habenda est. In his enim balneum mox, in aliis serius operatur, adeoque longius alii, alii brevius ad hoc expectunt tempus. Alias vulgo usque ad iv hebdomades, extenditur cura, aliqui tamen tantum per xx aut xxiv dies balneum perferunt eoque habent necesse & sic porro, vel aliorum ad C. horas computatione; quamvis multi ad XL. L. LX. dies, vel CXXX. & CXL. horas sine detrimento terminum protrahant. Si ad summum terminus protractus fuerit, & salus sentiatur per aliquot dies, consulto persistendum est, dein iterum sensim desinant balneantes. Nec est, cur in vulgi opinionem discedamus, ac si semper tamdiu esset lavandum, donec cutis rubesceret, & corroderetur & usque dum iterum sanata & deterfa esset. Nam haec cutis efflorescentia, quamvis ordinario insequatur, non semper & in omnibus ex necessitate accidit, & non raro est signum omissae debitae purgationis vel dietae errorum demum commissorum, vel etiam balnei longius justo protracti, (cum potius tunc desistendum sit.) Si vero observatis observandis rubores, maculae, exulcerationes cutis appareant, non temere tunc est a balneo statim desistendum. Si haec diutius remaneant,

neant, domum præsertim reversi, decocto quodam calido ex vino & herba veronicæ, flor. rosarum chamomillæ sambuci adjecto alumine tandem ad desiccandas illas abstergendasque partes purpuratas abluere possunt. Immo per venæ sectionem denique purgationem & sudorifera abigantur. Si forte quandoque balneantes ob aëris inclementiam ægre se habeant, adeo ut & per aliquot dierum intervallum, balneum omittere necesse sit: in illo nobis stat consilium, ut tunc clysteribus singulis diebus iteratis, aquæ thermæ nihilominus tamen injiciantur, longiusque retineantur. Si æstus forte corporis insolitus, febris aut mensium fluxus in foeminis, aut hæmorrhoidalis in viris præsertim accedunt, per aliquot dies intermittendum est balneum æque ac potus: attamen hic securius conceditur, immo non raro eas foeminas præsertim juvat, quibus menses alias ægre succedunt.

§. X. Peculiare balnei genus est & thermis Hirschbergensibus quasi proprium, quod in aliis vix habetur & adscensus vulgo, das Aufquellen, vocatur. Aemulatur hic balneandi modus illum qui Neapolim inter & Puteolos præsertim ad Bajas & ad Aponianas thermas in cellis sudatoriis celebratur, quemque assam sudationem CELSUS vocat *L. II. 21.* Hoc autem ita se habet, & in utraque scrobe institui potest: exhaustis nimirum penitus aquis, balneaturi ad fundum usque descendunt & una cum scaturiente iterum aqua sensim, non sine sensu voluptatis, nec sine insigni efficacia, adscendunt (aufquellen.) De quo scire licet, quod ut per duplo longius tempus in illis sedent, ita etiam adhuc plus simplici balneo balneantes hic adscensus afficiat ac conferat: Spiritus enim atque vapores exorientes thermarum ac integri, qui etiam solidas materias in se recipiunt, illius profundo arctiori scrobis spatio conclusi detentique magis sunt, diutiusque sicci retinentur & siccum quasi balneum seu laconicum quoque & vaporosum efficiunt, ut duplicata quasi vis exoriat & fortius operetur, atque pravi succi, sudore solvantur evocenturque. Quare non citius in usum trahatur, nisi quis prius per aliquod tempus ordinario balneo adsuëfactus fuerit, & bene illud ipsi convenire sentiat: nam non omnes, imprimis tenerioris & delicatæ constitutionis, item calidioris temperamenti, exsiccati, biliosi habitu corporis gracili atque macilento conspicui longoque morbo consumti homines, præsertim foeminæ & quibus alias caput, ut ajunt, debile est, quique facile animi deliquium incurrunt, hoc balnei genus, quod adscensum vocant, perferre possunt. Alioquin præclaram sæpe operam hoc balnei genus præstat in articulorum speciatim & juncturarum indu-

ratis affectibus & doloribus, in cutaneis vitiis & nervorum, quæ ex repletionem vocant, in oedematibus & omni tumore frigido, in hydrope, ascite, leucophlegmacia & similibus.

§. XI. Potaturi, mane statim priusquam quisquam insideat, vel ex fundo ex fonte Schafgotschiano præsertim (hic enim potus magis ob minorem bituminis quantitatem conveniens est) siphone extractam, & quantum fieri potest, aquam calidam adhuc ambulando in conclavi tepido, (ut melius moveatur, in actum deducatur & facilius distribuat-ur;) vel stando, aut sedendo, continuatis diebus sorbillatim, sensim-que & per vices spatio unius horæ hauriant. Quantitatem quotidie augeant, simulque operationem attendant, & si legitime omnia eveniant, per aliquot dies VI. VIII. &c. in eadem quantitate persistant. Incipiunt ordinario ab unciiis v. libra β ad j semis, vel ij. usque dum aliquoties singulis diebus moveantur atque purgentur. Sensibiliores & teneriores, vasa habentes ampla, spasmodicis affectibus obnoxii, uti minorem mensuram, ita quoque brevius tempus exposcunt. Robustiores vero, crassiores, pingues, spissiores multosque humores alentes & fibras torpidiores, consistentisque ætatis homines majorem mensuram, longioremque terminum desiderant, & per II aut III septimanas quotidie optimo cum successu bibunt. Signum autem erit efficacis purgationis, si talia dejiciantur, quæ debent dejici, pituita nimirum maxime crassa, si libere per alvum & vesicam transeant, si fiat cum euphoria & levamine. Sub potatione ut plurimum percipiunt blandum titillationis sensum per totum corpus ad extremas usque partes, energiæ & penetrationis signum. Non facile interponatur balneum, ne operatio hæc forte impediatur, quod & inconveniens, GALENVS ex comm. 4. aph. 5. comm. 5. in L. VI. Epid. tr. 29. jam agnovit, quamvis & sciam, in certis casibus, potum in ipso balneo optimo cum fructu institutum fuisse, ita tamen, ut per aliquot dies, potus solus antecesserit; Si ambo indicentur, potus præcedat balneum; Si vero a potu intumescant membra, tunc balneum per diem unum saltem aut duos adhibendum, iterum diaphoresi discutit intumescentiam. Neque si primis diebus, aqua pota vomitu forte rejiciatur, statim desistendum est, sed per-gendum, quia deinceps melius operatur, meliusque plerumque se habent bibentes, præsertim cum thermæ nostræ potæ, maxime per vomitum operentur. Si primo aut secundo ad summum die restitent in corpore potæ aquæ, neque per vomitum, alvum & urinam reddantur, tertio necessitas omnino exigit, ut convenienti remedio educantur; vulgo

vulgo salina, liquefcentia, stimulantia, diuretica, purgantia vel pro re nata emetica lenia exhibentur, & recte quidem exhibentur, ut nimirum materia peccans a pota huc usque emollita atque attenuata, cum aqua certius atque facilius excernatur. Dantur tamen casus, de quibus medicus præsens judicet, qui hujus regulæ exceptionem patiuntur, v. g. in calculosis, hypochondriacis, hyſtericis, ejusmodique affectibus spasmodicis affectis, a spasmodica fibrarum ventriculi, intestinorum &c. contractione excretio impeditur: contra methodum sane quis faceret, qui fortiora ejusmodi stimulantia tunc adhiberet, cum potius antispasmodica &c. desiderentur. Si vero frequentius & continuatis diebus vomitus quoque accedat, clyſtere forte parum stimulante poterit divertiri; sin minus, & si post v. vi. vii. dies aquæ fastidium, flatus, ructus, gravis abdominis tensio, fluctuantis hinc inde aquæ perceptio perſentiantur, medicamentis aliis appropriatis occurratur, ſtomachusque juvetur aromaticis, balsamicis & aliis ejusmodi ſtomachicis, ſique hæc non ſuccedant, penitus potius omittendus erit potus. Non vero te deterreat, ſi primis diebus acerbius paulo afficiaris, quod validioribus fere remediis commune eſt, v. g. dictante experientia decocta ex quajaco, ſarſaparilla &c. exhibita in principio magis ægros affligunt, quam in progreſſu; cauſa ſine dubio eſt, quod primum validius operentur, attenuent &c. factisque tenuioribus fluidis humoribus pravis corpus perturbent, donec ſubacti penitus fuerint. Ubi poſtquam urina ſaturata colore & turbida hucusque excreta fuerit, aqua talis iterum per aliquot dies reddatur, qualis ſumta eſt, ulterius ab ejusmodi potu cœteris paribus abſtinere licet. In potu ipſo, rite obſervent leges huic debitas & quemadmodum poſt balneum requies, ita potius poſt potum ambulatione & lenis exercitatio, per horam aut dimidiam confert, cum frictionibus linteis calidis per totum corpus inſtitutis, ut circulus ſanguinis liberior, liberiorque diſtributio, tranſitus, ſecretio & excretio humorum facilius feliciusque promoveatur, neque ſe ſtatim aëri liberiori, frigidiori exponant, ſed potius in conclavi tepido ea inſtituantur. Quibus peractis, decubitus in lecto per horam aut duas quoque conceditur, ut lenis ſudor ſuperveniat, qui dein linteis calidis bene abſtergatur; arbitrorque iis, in quibus ſudor difficilis ſed utilis, hauſtum unum aut alterum quoque aquæ thermalis in ipſo lecto convenire. Poſt aliquot, iv. v. aut vi. horarum ſpatium quantum ad reddendas aquas easque tinctas quidem requiritur, prandium aſſumatur. Poſt prandium iis, quibus aquæ potæ per alvum & veſicam rite redduntur, ſomnus quoque

que ad unam v. g. horam, in sella tamen potius & erecto corpore sedendo magis, quam in lecto cubando concedi potest; sin minus, interdicens potius est, cum somnus has excretiones retardet; Plethoricis præsertim somnus meridionalis interdicens, quoniam sitim, capitis dolorem, temulentiam & non raro febres facile inducit. Reliquum tempus inter honesta sodalium atque amicorum ac hilaria colloquia aut jucundas meditationes transigatur. Ante coenam placida iterum ambulatio proderit: Quam male ideo illi sibi sanitatique consulant, comparet, qui per totum diei tempus inter ludendum defixi, immotique manent. A coena consulto abstineant habitiores, obesiores, æque potantes ac balneantes, post illam parcam tamen in somnum se componant, noctemque quietam sibi reddant, ut suavis fessos sopor erigat artus.

§. XII. Si instillandæ aquæ, (prius purgato quoque corpore, observatisque de balneo & potu dictis) in membra nuda affecta, in os sacrum atque femur, tibias, humeros, cervicem (caput rasum, imprimis circa futuras,) & paulatim aut pro re nata confertim aqua calida ex alto & impluvio velut quodam stillata ex colo, gutturnio, epistomio & simili machina ac antlia veteribus usitata decidat atque veluti fontis in modum irruat. Quo majori vi, majorique impetu, motu nimirum magis aqua thermalis adjuncta penetret, lentos humores hærentes firmissimeque impactos, magis dividat, solvat, magisque intimiores obstructions referet membra infirma, luxata, tumida, dolentia, marcescentia emendet & tonum restauret. Certe, si aquæ thermæles epotæ, quæ sic celeriter cum sanguine in amplioribus vasis feruntur, in iisdem vero minimis reticulatis viscerum aliarumque solidarum partium lentefluunt, nihilominus tamen mucilagines liquant potenter & fibras abstergunt simulque vias faciunt expeditas; sique rursus externis aut parum absconditis partibus exoptato cum successu balneando aut fomentando adhibentur, multo magis hujus stillicidii validior actio est, quam efficacissimam hic motus ac impetus eam quas præcipue a particulis salinis & sulphureis hæ ipsæ aquæ mutuuntur virium excitatarum auctarumque multo, reddit. In dies hoc stillicidium rursus augeatur, v. g. initio per unam, deinde per unam, cum dimidia ad duas usque horas donec membrum morbidum confudet & tamdiu, donec speratum auxilium accidat, cujus spes affulget, si æger ad partis affectæ penetralia penetrasse caliditatem aquæ sentiat. Inter instillandum solent præsertim etiam oculos obtegumento munire. Finito illo singulis vicibus membrum

brum detergeatur calidis linteis beneque fricetur: Notandumque est, quod ut plurimum ægri tunc graves somno fiant, qui vero omni studio est interrompendus, quare in Hetruria, quibus aliisque Italiæ oris usitatissimum probatissimumque hoc auxilii genus est, in more positum, ut conductæ mulieres in his locis illos stillicidio utentes canendo excitent. Post stillicidium maxime pars subjecta affecta bene obtegatur, calidaque servetur. Tempus commodissimum est matutinum & post hoc vespertinum. Reliqua se habent, ac in balneo & potu observanda. Qui stillicidium hoc præsertim in caput, minus ferre possunt, ii, ut impetus leniatur, spongia tegant caput, ac ad eam demum aquam thermalem ex alto effundant. Fomentatio commodissime adhibetur, si spongia illis imbuatur, vel linteamina & panni in illis madefiant, calidique adhuc sic applicentur & bene obtegantur. Illutatio fieri potest, observatis observandis, quæ de balneo diximus, calida parte illutanda prius in ipsis aquis thermalibus immersa, & vel cum ipso balneo, vel post balneum per aliquot dies VIII. X. vel XII. &c. potest etiam aliquoties in die mane nimirum & vesperi, repeti. Veteres eam quidem duplici modo adhibebant, ut ex PLINIO videre est *Lib. XXXI. Cap. VI.* vel enim lutum applicabatur parti affectæ solique exponebatur vel alveolum subiciebatur. Peracta illutatione, pars affecta abluenda linteoque calido siccanda atque aleo quodam apto atque idoneo inungenda. Pediluvia extra balnei horas quoque possunt parari, præsertim vero ante lecti ingressum. Præstat immo necesse est, ut usque ad genua & supra quoque ea pedes iis immittantur & per horam cum dimidia ad duas usque detineantur. Ante immersionem pedes fricare convenit, & post eam eos linteis calidis abstergere aëremque frigidum arcere.

§. XIII. Utrum non prius desistendum, quam morbus ex toto sit sanatus, respondendum per distinctionem. Si æger sentiat suis viribus & naturæ thermas s. potas, s. balneo adhibitas convenire, morbum vero de die in diem minui, autor suasque essem, pergat, donec desierit. Et si semper fructus felix non adeo sit manifestus, modo non desint vires, non tamen temere statim desistendum atque desperandum est. Nam experientia testis ac vindex est, multos per totum ipsius curæ tempus, nihil levāminis, nisi post plures demum menses, persensisse. Pauciores enim in magnis præsertim morbis experiuntur statim sensibilem & insignem utilitatem. Quin immo longa observatione compertum est, balneorum ejusmodi utilitatem longe firmiorem & certiore esse,

Ee

quæ

quæ non subito, sed interjecto aliquo temporis spatio, (de magnis affectibus, non de levioribus loquor) sentitur. Bono igitur esto animo, cum tempore interdum operantur thermæ, illarumque juvamen progressu temporis, Deo dante, senties. Quarundam enim (quod curiosum) thermarum certus terminus efficaciam est, quod & de Thermis Carolinis dicitur. Sic AND. BACCIVS *de Thermis Lib. III. Cap. V.* aliquas earum commemorat, nonnisi post decursum anni desideratum effectum afferentes. Atque quandoquidem notabile illud videtur, thermas huic quidem semel profuisse; illi vero semel inutiles, secundo aut tertio anno fuisse utiles.

§. XIV. Optimum thermas adhibendi tempus & commodissimum est vernal, æstivum & autumnale. Verum non est, cur existimes, thermarum usum, si occasio aliter non ferat, hyberno tempore esse nocivum, aut frustraneum. Nam hyeme æque viribus suis constant, (si non majoribus, cum frigus non sinat spiritus exhalare, ut sentit Morellus de balneo Patavino, tunc & videbis majores in illis vapores) ac quidem æstate. Ut hoc in passu temperies & clementia aëris potius, quam anni menses spectandi. Perinde quoque acidulæ hyeme cum effectu potantur. Sic memini acidulas Swalbacenses cum fructu exoptato potas fuisse hyeme, confirmat & hoc J. TH. TABERN. *im Wasserschätz p. 176. & sq.* Ridet secus opinantes Morellus, rident & omnes Medici experti; rident ægroti sanati. Ipse novi multos, qui alias æstate castra sequuntur, tempore hyemali thermas Carolinas adiisse, expectatumque fructum reportasse, novi etiam adhuc plures ex incolis, qui nostras thermas ex experientia æque laudant hyemali tempore adhibitas. Nec video (salva Hippocratis auctoritate) cur ardente Syrio imprimis in his montium temperatioribus recessibus nocivæ sint futuræ; alias autem hoc non inficiari possumus, existente nimio folis ardore vires nostras languidas esse, & spiritus animales resolutos nimis atque deperditos, quare natura humana non satis perferendo atque thermarum longiori usui sufficiens est. Quod vero æstate magis suadendum sit, statim comparet ratio, quod cœlum tunc temperatum, aut etiam magis calidum, corporaque perspirabilia magis, & ne frigus, quod ægre sub ipso balnei usu in egressu præsertim devitari potest, (ut de aliis hyemis incommodis taceam) noceat ac lædat.

§. XV. Fallunt autem admodum, aut fallentes incaute sequuntur, qui putant: thermas anno bis sextili, s. anno saturnino semper esse non modo inefficaces, sed & nocivas, quemadmodum & vana æque opinio est,

est, & forsitan eo desumpta, tunc non esse plantandas arbores, quia minus felices fructus proferrent. Quis est, qui non statim, me non monente, sentiat fucum? Hoc superstitionis genus a Romanis sine dubio ad nos pervenit, quibus bis sextum rebus romanis semper infestum habitum est, notante MARCELLINO *Lib. XXVI.* quod & in medicinam est translatum, in qua, numerus senarius & dies sextus infestissimus habetur. Nec est, quod adeo metuas, illas a sideribus quandoque corrumpi. Aliis exosæ sunt thermæ pariter ac acidulæ, ob vapores arsenicales (communes atque familiares mineralium fere omnium) conjunctos. Non nescius sum, multa de multis exempla prostare. Sic de balneo aliquo in agro Pisano Savanarola memorat, quod illud interdum morbosum sit, & quod tunc temporis aqua turbida & lutea fiat. De alio fonte in Aethiopia alii referunt, quod rubram aquam vehat & delirium inducat. De nostris vero thermis illud sine studio & odio necesse est, fatear, nunquam tale quid deprehensum fuisse. Inanes quoque falsique rumores sunt, qui in hanc sententiam afferuntur, ac si ii, qui thermis usi fuissent, raro diu viverent, & quod inter tres annos plerumque moriantur, quod B. D. Michaëlis quondam confidenter affirmavit, teste aurito V. A. MÖLLENBROCCIO *de Varis p. 282.* Affirmat & hoc F. HOFFM. *L. II. M. M. C. VI. p. 445.* Ast experientia nullam dictis facit fidem, & si id eveniat, non tam thermis, quam vi morbi & illegitimæ administrationi infelix ille successus potius erit adscribendus. Scitu hoc denuo est necessarium, necesse esse, ut ex ipso statim fonte & in ipso adhibeantur, ubi enim alio portatæ, frigefactæ & recoctæ fuerint, debitum effectum æque non edant: (quod sulphureis & spirituosis thermis commune est, cum partes volatiles avolent) uti quidem aqua Villensis & Aquarina, aquæ S. Cassiani, Porretanæ, Sal-sulæ, montis Catini, aquæ Scarburgenses, quæ perferunt retinentque suam naturam atque virtutem ad plures septimanas, & quando jam fœtent. Attamen a SCHWENCKFELDIO *de therm. Hirschb. p. 78.* annotatum est, peregre transportatam aquam nostram thermalem podagricis solatium attulisse. Pariter irritum negotium suscipies, si illas arte chymica concentrare, aut in essentiam, aut Quintam Essentiam redigere velles.

§. XVI. In præsens quæri adhuc oportet, annon usus thermarum medicamentis adjuvari possit, ut balneo, imprimis quidem medicamenta? Nam si in egressu aut ingressu ejus exhibeantur, & in calidum & solutum ac bene ita præparatum corpus perveniant, ea operationes suas & vires ef-

ficacius exerere possunt. Pauca tantum sufficiunt, nam sola thermarum vis plerumque sufficit, (si modo sufficienter atque debite adhibeantur) cum remediorum farrago confortantium, stomachicorum, cephalicorum, similiaque gloriosæ sæpius ignorantiae nomina frustranea magis adhuc externa linimenta pro avertendis noxis ex balneo vana erunt. Tantum abest epotas aquas tonum ventriculi & intestinorum perdi, destrui, laxari, quin potius ipsa thermalis aqua robur, tonumque justum fibris conciliet. Ejusmodi vero in casu, quando potarum aquarum non sufficienter aut segnius succedat per alvum & urinam operatio, necessaria idonea laxantia, diuretica, aperientia &c. assumenda interponendaque erunt. Ex quibus non excludenda veniunt diaphoretica a balneantibus quandoque assumenda, ut junctis his ferum excrementum eo melius & impellente simul interno ex glandulis subcutaneis & M. S. exturbetur, neque male agerent, si ante prandii & coenæ tempus, vel inter cibos sal volatile oleosum vel cum sp. nitri dulci temperatum, ess. absinth. & similia stomachica assumerent. Ratione tamen id exemplisque notum est, atque manifestum, cum ipso balneo non absre esse & ante ingressum ejus, convenientia & specifica sic dicta pro morborum pertinacium & gravissimorum conditione, remedia propinare. Ipse scio medicamenta aperientia, pellentia obstructionibus mensium dicata & in tumoribus, obesitate nimia, diuretica, tartarea, acida, resolventia &c. in vitiis cutis sanguinem purificantia, in paralyticis consueta, cum balneo adhibita egregiam opem tulisse, & sic de reliquis etiam est sentiendum. Symptomata omnia, quæ interdum evenire solent, quorum frequentiora præsertim ex balneo & primaria sunt fitis, sudor nimius, catarrhi, alvi segnities, dolor & gravedo capitis, æstus, vigiliæ, alvi constipatio, febris; ex potu vero præsertim somnolentia, ardor urinæ, dolor ardens circa scrobiculum cordis versus dorsum extensus &c. ex embrocatione dolor capitis, suffusiones, tinnitus aurium, vertigo &c. ad amissum recensere, & quibus illis occurrendum fit, definire, jam in me non recipiam, cum non vacet jam revocare animum ad incommodorum ejusmodi omnium memoriam: hæc enim provincia præsentis medico potius est relinquenda, qui hæc omnia accuratius providebit.

§. XVII. Diætæ præ reliquis studendum, quæ fere hodie ubique in thermis negligitur ex cujus neglectu deinceps noxæ contractæ balneis haud jure imputantur. Quicquid occinas, furdus narratur, ut ajunt, fabula. Aër igitur efflagitatur temperatus, qui ad calidum potius inclinet,

net, & purus; vitentur frigidus, nebulosus, crassus, pluviosus, nimius solis æstus & venti insalubres. Etenim aëris vitium balneantibus imprimis nocet, quoniam eorum corpora a calore atque humiditate mollia, ac eorum pori undique aperti redditi sunt, unde frigus, omniaque miasmata facilius in se recipiunt. Eligatur hypocaustum & cubiculum commodum, non humile illud sit, neque humidum & foetidum. Esculentorum & potulentorum regimen secundum ægrorum conditionem & morbi & thermarum qualitatem &c. instituendum. Cibis vescantur thermis utentes, boni succi, bonæque notæ ac morbo convenientibus, eupeptis, euchymis, omnibus ad mediocritatem ac temperantiam ordinatis: Ideo absit crapula & ebrietas (communia certe in thermis vitia, mediis in aquis sitiunt, exposcunt vinum) unde variæ capitis, ventriculi, hepatis aliorumque viscerum affectiones, naturalium actionum atque virium imbecillitates, catarrhi, inflationes & inflammationes, febres aliaque id genus mala, accersuntur. Carnes eligant animalium juniorum, minorum avium & caponum, perdicum, phasianorum, &c. pisces in aquis limpidis & rivis inventos, truttas, fundulos, percas, lucios, mullos &c. Ova forbilia, juscula avenacea, ex carne elixata bubula, gallinarum, aliaque similia, pultes ex avena, hordeo, amygdalarum dulcium, oryza &c. pruna tosta, cerasa, poma cocta conducunt. Abstineant vero a viscidis, acidis, fumo induratis, butyro frixis, nimis salitis, nimisque aromatisatis, crassis, pinguibus, nauseosis, facileque corruptibilibus fructibus horræis, flatulentis, fermentescibilibus, leguminosis, lacticiniis. Caveant a varietate ciborum atque satietate. Pro potu utantur cerevisia bene defæcata, non acore corrupta. Vinum bonæ notæ inter prandium aut coenam assumptum, moderata in quantitate & quæ pro usu tantum medico sufficit, præsertim adsuētis, concedi potest; ii vero, qui nives, ut cum Plinio loquar, atque glaciem potant, poenasque montium ingulæ voluptates vertunt; i. e. gelidum potum amant, gravia certe experientur mala. Coeterum exacta semper instituatur relatio, exactumque moderamen inter cibum & potum. Victus tamen ad humidum magis inclinet. In longius tempus prandium non protrahatur. Fumus tabaci hodie a plurimis receptus, non nisi moderate in adsuētis admittatur, & omnia in genere dirigantur, prout subiecta, vires & affectus desiderant. Caveant sibi balneantes a somno nimio atque interpestivo sive eo qui fit præter naturæ ordinem, non noctu nimirum sed interdiu, vigiliis nimis, saltationibus, fatigantibus delassationibus, aliisque fortioribus corporis commotionibus, longiusque & in feram

usque noctem protractis, sed moderate moveatur corpus. Primæ viæ servantur semper apertæ, habitus corporis perspirabilis, & motus sanguinis naturalis. Exulet Venus, quæ cum Nymphis his male convenit. Animus liber sit a curis, sollicitudinibus, omnes perturbationes animi eliminentur præcipue a cibo, tristitia, timor, ira, impatientia. E contra omnem suavitatem ac hilaritatem procurent, & grato amicorum conventu & amœnis colloquiis indulgeant, ac bene de futura salute sperent, firmaque fruantur fiducia.

§. XVIII. Absoluta cura corpus iterum laxantibus erit purgandum. Nam uti purgando corpus præparatur, ita & finis curæ imponatur, ne reliquiarum tam humorum alteratorum, quam aquæ thermalis a potu quicquam supersit adhuc restitantis, sed dissipetur excernaturque. Ethnici olim recepta valetudine diis suis fictis non modo grati animi indicio publica solvebant vota & gratiarum actiones coram universo populo, sed & ad perpetuam felicitatis recuperatæ memoriam, tabulas votivas templorum Æsculapii maxime vel Isidis vel Serapidis, parietibus affigebant, iisque & morbum & remedium inscribebant, ut TIBULLVS habet *L. Eleg. 3.*

Nunc Dea, nunc succurre mihi jam posse mederi:

Picta docet templis multa tabella tuis.

Indignum christianis esset ethnicis pietate cedere, sed cura absoluta ante omnia yero Deo Ter Optimo Maximo felicissimum successum adscribendo, ei dignas gratias exhibeant, & pro firmanda & conservanda incolumitate, humillimis atque ardentibus precibus orent, & salutis suæ recuperatæ, aut spei saltem conceptæ læto animo, rationem habeant. Non statim iter suscipiant, verum ad posterum vel tertium diem discessum differant, maxime qui longo intervallo abfuerint, ut requiescant & vires recuperent, ut itineri perficiendo pares sint, ne permutatione tam subita aëris, cum scilicet thermæ in corpus adhuc operentur, malum adveniat, imprimis si minus commoda cœli tempestas nebulosa, pluviosa, frigida incidat, (ex usu enim balnei calidi eo magis frigoris impatientes sunt) neque in ipso itinere, corpus nimis fatigetur. Domum reversi laudabilem ac ordinatam per aliquod tempus servant diætam æque ac antea in ipso thermarum usu; e abs re erit tunc quavis septimana semel aut bis balneum ex aqua fontana saltem, vel etiam pro re nata thermas artificiales parare easque in usum trahere, nec non medicamenta tam alterantia appropriata, quam per alvum, urinam

urinam ac diaphoresin evacuantia quandoque assumere, ut forte reliquæ humorum vagorum excernendorum per usum balnei attenuatorum excernantur, ne in aliquas partes nobiles corporis cum malis hominum rebus affatim ruant, sed ut pacatus œconomix animalis status firmiter certiusque conservetur. Qui scopus eo majoris atque singularis observantiæ esse debeat, quoniam non pluris est aliquid bene incipere ac diligenter proficere, quam feliciter absolvere.

§. XIX. Ad extremum nihil reliquum est, nisi ut quædam de abusu subiungam. Quod enim Pergameni est assertum; nullum esse tam optimum remedium, quod non alia ex parte noceat & nunquam sine incommodo magna sæpius commoda proferantur, quodque verum alibi, quo major rei est usus, eo quoque major esse abusum, id quoque de thermis valere non negandum est. Tantum quoque abest ab usu adeo multiplici, ut omnes in universum morbos sanent, corruptamque prorsus naturam inveteratumque malum redintegrent atque corrigant vitia conformationis, ut gibbositatem & similia auferant aut senibus atque vetulis juventutem reddant, vel vitæ æternandæ præsidium certius promittant atque a morte prorsus liberent: Etenim absena Paracelsi sententia est, credentis, perinde in humana esse potestate, ut quamdiu velimus vivamus, quam possumus arte ignem servare. Est sane hodie thermarum usus confusus, ac vulgari corruptela erroneus. Plurimi vel proprio saltem instinctu, levitate, superstitione, libidineque vel ignaræ plebis, vel nasutulæ mulierculæ suasu, sine ulla habita ratione, sine delectu, sineque Medici periti consilio ad thermas advolant, immo integra interdum Medicorum turba ne quicquam potest efficere, ut tumultuariam ejusmodi frequentiam ad balnea cohibeant, avertant, ac abrogent. Quapropter mirum non est, quod magnum sæpe periculum incurrant ejusmodi ægri, operam & oleum, ut ajunt, perdant, & si non moriantur, tamen non solum incurati, sed & infirmiores sæpissime redeant, vel paulo post morte intereant, quod mortis genus, aquis scilicet perire, hodie hoc intuitu non adeo invisum, ac olim fuisse videtur, sed multi quod mirum hoc moriendi genus haud detrectant: gentiles enim stoicæ philosophiæ addicti, animam igneam esse putantes aquam tanquam contrarium medium maxime reformidabant; Ægyptii vero e contrario homines, ex lignis confectos esse credentes, aquam potius exposcebant, & immergi amabant. Talia exempla multoties vidi, dum in ejusmodi locis commorari occasio tulerit. Ad minimum hæc tria ordinaria quasi incommoda ex thermarum nimio aut præpostero usu, sitim nempe, ventriculi

tricoli debilitatem ac maciem reportant. Unde non adeo inconvenienter P. Clemens Alexandrinus lavacra in excessu usurpata, fullonicas hominum officinas vocavit, quoniam sic citius, quam par esset, corpora efficerent pannosa, & ante tempus nimium abstergendo cogerent conflescere, dum non secus ac ferrum caro ita mollicaretur. Taceo de illis, qui ex longe alienis causis, thermas frequentant, non ut sanitatem curent, sed ut genio suo indulgeant, comessentur, ludant, ferientur, omni intemperantia, illecebris, voluptatibus libidinibusque simul litent; velut soluta legibus luxuria non tantum peccante sed publicante quo certe in passu Nostrates Romanis luxu non inferiores censendi sunt. Quæ irritamenta malorum apud Romanos SENECA & PLUTARCHVS atro carbone notarunt: Ille præsertim ejusmodi sequentibus detestatur. *Quid mihi (inquiens) cum istis calentibus stagnis? quid cum sudatoriis, in quibus siccus vapor corpora exhauriens includitur? Omnis sudor per laborem exeat.* Pontanus item apprime carmine taxavit, digno quod hic legeretur, nisi chartarum harum angustia obstaret. Olim in Italia Bajanæ vidisse a severioribus dicebatur specie adagii, pro signo libidinum cum ille locus esset vitiorum diverforium: Sic quoque hodie de nostris thermis hinc inde dicere propemodum necesse habemus: Sed non potest quoque non damnari multorum medicorum circa hæc remedii genera negligentia nec non imperitia, qui parum solliciti de exacta illorum cognitione ægros suos ad thermas ablegant, vel, ut Plinii verbis utar, diviticulis aquarum fallunt ægrotos, illosque Tantali instar ad aquas condemnant, ut tædiosas forte morborum rebellium curationes effugiant, vel posteaquam longo remediorum usu fatigata eorum natura ita fuerit, ut omne etiam remedii genus eludat, vel quod non satis prospiciant, attendant, cum irreparabili eorum damno neque minori medicæ artis dedecore, eoque magis, cum fatendum sit, quod perpaucae certe thermarum vires & indoles adhuc satis cognitæ sint, & pleraque ficta, & in Democriti puteo submersa, quæ de illarum adhuc contentis atque effectibus vulgo venditantur. Insuper & dubium non est, eos ipsos quandoque nimium illis non raro tribuere, Nymphas has suas supra modum amantes.

§. XX. Licet temperatæ satis sint thermæ nostræ ac mitiores ingredientiaque, quibus gaudent innocentia adeoque naturæ humanæ optime convenientes neque adeo magna noxa statim exinde metuenda, utpote ejusmodi vulgo habentur, quod si non profuerint, saltem non obesse; tamen si imprudens, immoderatus & excessivus nimis sit illarum
 usus,

usus, & excessiva corporum impuritas adsit &c. varia incommoda causari possunt, cum & omne nimium vertatur in vitium; hinc Helmontius inter impedimenta vitæ longioris refert frequentem thermarum usum. Plura enim vitia nimius illarum afferre potest usus, atque cum thermis æque comparatum est ac cum aliis, quæ a necessariis primum orta, pervenerunt ad nimium. Ad illud declarandum paucis huc illud HIPPOCR. *Aph. 16. Sect. 5.* mihi trahere liceat. *Calidum* (inquit) *ubi quis sæpius eo utatur, hæc mala affert, carniū effæminationem, nervorum incontinentiam, mentis torporem.* Namque balneum calidum omne, frequenter & ultra modum adhibitum, præter alia, magnam crudorum humorum copiam, in massam sanguineam rapit ac extrahit succos laudabiles compagemque corporis solvit. Conspicies ideo calidis balneis nimis deditos præsertim si jejuno existente corpore ea administrant, lymphæ benigna nimirum nutritioni dicata, simul abrepta & a cibis nova non refarcita, carne flaccida, colore invenusto, viribus languidis, hæmorrhagiis & deliquiis animi obnoxios, ciborum dejecto appetitu, ut plurimum memoria debili, nervis debilitatis, spiritibus torpidis, vitiatos. Atque consultius abstineant infantes teneriores, pueri & adolescentes, succorum pleni, senio confecti, constitutionis siccæ nimis homines atque calidioris, cholicæ, quibus humores nimis fusi sunt, inque motu nimio constituti, maxime salino sulphurei, summe item infirmi & imbecilles & qui animi deliquiis facile corruunt, scæminæ præsertim (minerales enim omnes aquæ ex effato Galeni manifeste exsiccant, incraissant & resolvunt) siti diuturna vexati, exsanguis, & qui immoderatos fluxus humorum sanguinis & feri passi sunt, sudore nimio colliquativo, tabe, hectica, lue venerea, obstructionibus contumacioribus (coagulatis & spissis nimirum nimis humoribus velut duris nodis fortiores quærendi sunt cunei) affecti, asthmate convulsivo & sicco sic dicto, valde tussientes, phthisici veri, consummati (ob vapores præsertim & aërem in balneo crassum) phrenitici, maniaci, pollutione nocturna, gonorrhœa virulenta laborantes, febribus acutis, contagiosis, malignis correpti, quo laudandus venit CL. WEDEL. *de M. c. ext. p. 98.* sentiens balneationes & grassantibus morbis epidemicis, imprimis peste, cum poros magis aperiant, contagioque faciliorem aditum concedant, minus locum habere. Conf. IOV. B. *de Peste Cap. X.* Thermas quoque nostras non ferunt ob odorem gravem, quem spirant sulphureum, Schafgotschianas præsertim ii, quibus caput & oculi infirmi sunt. Inutiles & in genere deprehenduntur in omnibus fere morbis nimis inveteratis. In specie vero hic

indicandum opinamur, balnea sulphurea, qualia hæcce sunt, nocere, ut bene advertit Hugo Tenensis, iis, qui juncturas articulorum omnino liberar non habent, quoniam etiam aquosa pituita in juncturis per ejusmodi balnea crassescit, tenui humore resoluto & crassiori excremento relicto & in gypseam & nodosam podagram solutu impossibilem digenerare potest, quod sua experientia comprobat S. SANCTORIVS *de Remedior. Invent. p. 95.* Interdicendæ etiam sunt impuris, non rite purgatis corporibus, quia impuritates copiosiores alicubi latitantes commoventur, excitantur, funduntur, exaltantur aliæque prius secretæ conjunguntur aut fusæ in alias partes in massam sanguineam, cerebrum & viscera principaliora deferuntur, ac febres aliæque symptomata deinceps concitant. Minus quoque e re sunt, quibus viscus aliquod nobile imbecillum est; periculum enim subest, ne humores attenuati eo detrusi inflammationes & obstructions & atonias pariant. Abstineant etiam potius ab usu harum aquarum thermalium ii, qui alvum nimis constipatam habent; sudor enim & quæcunque transpiratio major, alvum sistit, & qui viribus sunt exolutis, quoniam calidum balneum nonnihil debilitat, qui stomachi fastidio laborant, nec non vomituriæ, & biliosum eructantes eo, quod humores fluidiores reddendo & tepore vias lubricando vomitum provocet, ut & quibus ex naribus fluit sanguis, in quibus colliquat & fluidiorem sanguinem efficit, unde & ejus fluxus augeri potest. Quibus vero balneum nocet, plus adhuc nocebit, si ex scaturigine evacuata prius scrobe evehuntur (*aufquellen.*) Potæ thermæ magis obsunt iis, qui venas habent angustas & parvas, longo morbo debilitatis, quibus viscera vitalia, colatoria non sana sunt corrupta aut inflammata & non satis pervia, obstructa, scirrhusa & stasibus ulcerascensibus obnoxia, ubi tonus eorum penitus labefactatus, destructus, & laxatus est. Aquæ enim tunc non legitime sed languidius circulantur, stagnant, remanent, hydropem multaque alia incommoda exinde parant. Nocent etiam in abundantia lymphæ atque morbis lymphaticis in stagnatione ejusdem extra vasa sua debita, imprimis si ab erosione lymphaticorum vasorum fuerit, tunc enim facile illam colluviem adaugent. In specie contraindicantur potæ in affectibus capitis idiopathicis, maxime qui a spirituum animalium defectu, a mala conformatione, tono laxato, destructo vasorum & sinuum cerebri proveniunt; aquæ enim potæ vasa tenera cerebri & medullæ spinalis onere suo gravant, dilatant, premunt, laxantque magis. Vixque potus est concedendus in fluxionibus alvi variis. De stillicidio paucis adhuc nosse sufficiat, illud bilio-

biliosis, calidis & siccis, & qui frequenter ex simili causa dolore capitis & oculorum laborant, fugiendum esse. His præfatis concludo cum AVGVSTINO *Epist. V.* Ego fateor me ex eorum numero esse conari, qui proficiendo scribunt & scribendo proficiunt. Unde si aliquid vel incautius vel indoctius positum est a me, quod non solum ab aliis, qui id videre possunt, merito reprehensum est, verum etiam a me ipso nec mirandum est, nec dolendum.

* * * * *

V.

DISSERTATIO
PHYSICO-MEDICA
DE

FONTE SOTERIO KVKVSSENSI
IN BOIEMIA.

PROOEMIUM.

Naturæ tria vastissima regna, minerale, animale ac vegetabile largissimum penum suppeditare, a quo tanta medicinarum genera petuntur, apud omnes in confesso quidem est, quodnam autem eorum reliquis sit anteferendum, nondum satis neque doctissimis quidem est expeditum, licet etiam a multis eminentibus in medicina viris hæc controversia sit agitata diu; quippe contenderunt inter se hæc ipsa quasi, jam dudum de principatu & adhuc forte sub iudice lis est: Minerale, fortissima & validissima eaque concentrata atque quæ ob minorem dosin palatui magis placent auxilia atque consymbolismum, quam cum humo, quæ ea recondit, corpus humanum ex humo a Deo primum creatum habet, præ aliis jactat: Animale sua animalibus rationalibus, hominibus illorumque naturis ceu convenientissima commendat: Vegetabile regnum de antiquitate, copia & abundantia imprimis gloriatur. Non dirimere jam in nos recipiamus, cui præ aliis prærogativa sit discernenda. Stet modo statque utique sua cuivis apud nos debita laus debitaque

debitaque dignitas ac honor, atque omni asseveratione affirmare necesse habemus, singula, singulis pereximia largiri emolumenta ac multifaria remedium genera. Minerale equidem regnum, palmam reliquis præripere ex illo videtur, quod laude præcipua digna, atque quædam reliquis facile anteferenda medicamina, quicquid etiam alii in contrarium proferant, atque talia in quibus alma natura ipsa medicinam facit, quæ divina quasi in morborum curatione præstant talesque monstrant effectus, qui ab aliis vix expectari possunt, gratis largiatur. Vel aqua simplex, dulcis, quæ ad hoc regnum pertinet, hoc nomine valde est memorabilis, quæ sola sane multas nobilissimas longe qualitates continet, ac præsertim thermæ, acidulæ & fontes soterii vix cum aliis in comparisonem gloriæ referendi, cum quando alibi deficere videatur, minime hic deficit natura. Ultimum hic datur miserorum confugium, tanquam ad unicos morborum averruncos. Talia miranda & gratuita dona, in generis humani salutem benignissimum in coelis Numen per omnes orbis terrarum partes utilissime distribuit. Regiones quoque, quas nos incolimus, quæque conterminæ sunt, ejusmodi habent, de quibus jure sibi gratulari possunt. Vicina nobis, Misnicis speciatim Bohemia plures & propemodum innumeros varii generis salubres fontes eosque famigeratissimos pariter ac præstantissimos monstrat. Inter hos non infimum certe locum meretur fons Kukussensis dictus, cujus atque eorum, quæ de eo deprehendi aut deprehendere licuit, in præsentiarum qualemcunque etiam descriptionem in hac celeberrima Academia Lipsiensi, publica jam dissertatione, publici speciminis loco tradamus. Suadet hoc pergrata memoria, quæ nondum mihi animo excidit, cum ante aliquot annos hunc amœnum gratumque locum invisere mihi licuit. Movet atque hortatur ad hoc, maxima utilitas ejus, quam saluti hominum ultro concedit atque largitur. Quod conamen Deus T. O. M. ex voto secundet. Benevoli vero Lectoris, qui Nymphis Kukussensibus has sacratas paginas perlegere dignabitur, humanitatis erit condonare, si parum pro dignitate argumenti præstitisse videbimur, conabimur impofterum, Deo dante, ubi occasio sic tulerit, severiori novacula, institutis experimentis & ulterioribus observationibus collectis, maturiorem perfectioremque aliquando edere fructum. Interim hæc pauca ac levia eo utilius censeo congesta, e quibus ad ulteriora & meliora gradus sit. Coeterum quoque omnes ii æqui & solertes harum rerum eximiarum censores atque scrutatores, quibus sæpius citius & facilius conceditur gratissimum hunc adire locum, hunc ipsum fontem Kukussen-

Kukuffensem jure meritoque habeant dignum, qui ulterius investigetur & amplietur emolumenta, quæ generi humano possit afferre, sedulo perpetuis observationibus declarentur, quo me satis felicem reputabo, si aliqui ad similem suscipiendum laborem, hisce pagellis excitentur, qui defectum hunc sua sarciant affluentia & ego plura quoque, certa, idonea & utilia tandem de eo resciam & fruam, aliisque ut iis etiam fruantur, commendare possim.

§. I. **O**ptimæ regioni, Bohemiæ Regno adeo multæ eæque pereximiæ dotes ex superabundanti Dei benignitate tributæ sunt, quæ tam provinciam quandam amœnam, lætam, gratam atque acceptam commendant & quæ ad usum commoditatemque humanæ vitæ faciunt, quam salubritatem hominibus afferunt atque conservant vitamque prorogant, ut vix aliæ alibi his pares, inveniantur. Quippe Bohemia ob situm positumque altum, quem in orbis terrarum parte, quam nos incolimus, obtinet, ob ventos orientales & septentrionales gelidos, ac ad vitam & sanitatem omnium hominum accommodatissimos, quibus frequentissime perspiratur, atque ob aërem indeque purum, tenuem, serenum, elasticum, quo perpetuo fruitur, ob aquas frigidas, limpidas, claras, pellucas, dulces, spirituosas, tenues, quæ ipsi quasi domesticæ sunt, ob terram bene temperatam & in salubritatis modum comparatam, ob vegetabilia, item quæ ex hac succrescunt eaque præstantissima, nec non ob fossilia terras sigillatas nobilissimas &c. & mineralia optima pretiosa ac conducibilia, ut & animalium pecorum, ferarum, alitum, piscium eorumque qui in deliciis habentur, foecundam procreationem cœteraque, quæ in hoc genere ad conservandam hominum vitam ac integritatem præcipua sunt & necessaria, fertilis & copiosa omnium rerum, si salinas modo excipias, (hinc Balbinus atque Barclajus asserunt, eam Imperatorum Germanorum per aliquot Secula, culinam, cellam, mensam atque ærarium fuisse) laudatissima ac saluberima regio jure meritoque dici meretur. Hinc ex sua sententia Tycho de Brahe, Astrologorum longe præcellentissimus, qui diu in Bohemia vixit ibique mortuus est, asserit, eam felici syderum influxu præ multis aliis regionibus gaudere. Quæ etiam causa est, cur Reges quondam Bohemiæ, in Hungaria & Austria degentes, ægre se habuerunt semper, adeo ut harum regionum aëris inclementia, eas cum Bohemia permutandi necessitatem imposuerit, ut BALBINVS *Miscel. R. Bohem. L. I. C. V.* habet. In horum beneficiorum a

Deo O. M. Conditore Summo, Sapientissimo ac Munificentissimo, largissimo fœnore concessorum numero ante omnia quoque numerantur thermæ, acidulæ & fontes foterii, quales non pauci hinc inde ibi inveniuntur. In sola thermarum Carolinarum regione & vel quatuor saltem milliarium ambitu CC. fontes aciduli inveniuntur, licet vel tres illorum incolis accolisque noti sint usuque probati, qui tamen inferiores quoad vires famigeratissimo illo Egrano fonte habentur, cujus etiam ager in longitudinem & latitudinem longe protensus acidularum itidem dives est, licet quoad saporem, vigorem atque effectum æque disparium. Eorundem cœnobii Tepelnensis regio LX. aliquos Circulus Bechinensis & Comitatus Glacensis numerant. Nec penitus ille ad oppidum Aufchwitz, vocatum (der Stæncker) vitriolo & sulphure admodum divis, celebritate caret. Quis est qui nesciat longe lateque celebratissimas thermas Teplicenses? Cui nomen aquarum hodie Bohemiæ etiam adscriptarum Landeckensium inauditum & beneficia, quæ ægrotantibus affert, ignota? Quis facile inficias ibit universam pene Europam, stupendum illud benedictionis divinæ opus, thermas Carolinas mirari atque ad eas ex diffitis longissime etiam locis, confugere medicinamque ab iis petere sibi, maximis atque gravissimis & pertinacissimis morbis detenti? Præter hos fontes ejusmodi foterios nominatos adeo multos, qui olim jamdum innotuerunt ac summam celebritatem hodie acquisiverunt, haud postremi juxta istos, non ita pridem inventos binos falsos, purgantes, amaricantes dictos, Sedlitzensem & Seidschützensensem, admodum proficuos, quibus similes nulla unquam ætas, quod ego quidem scio, vidit, sunt quoque fons Sti Joannis, ad fines Silesiæ situs, atque fons qui argumentum præsentis nostræ tractationis constituit, Kukussensis, quem fusius paulo in sequentibus ibimus celebratum.

§. II. Nimirum fontem, quem vocant Kukussensem foterium, Bohemiæ Regni Circulus Regio Gradeziensis, ad Albis atque Orlitzæ confluentes fluvios ac in eo ditio quædam & dynastia, quæ Excellentissimo Sacr. Rom. Imper. Comiti, Domino Francisco Antonio de Sporck, Dynastæ in Lyssa, Gradlitz & Koneged, Sacr. Cæsar. Majest. Consiliario Intimo, Ejusque Cubiculi Comiti & Regio Gubernatori Supremo in Regia Sede & totius Regni Capite Pragæ, paret, Gradlitz vocata, non procul a Jaromiria, haud ignobili oppido, habet, qui in regione ibi elata, montana, amœnissima, nemore amabilissimo, non nimium alto, scaturit, cui juxta hunc tota adstructarum ædium compages insidet sensimque in meridiem, donec per
scalas

scalas quasi fiat humilis, sese explicat, amœnissimum contemplantibus præbens aspectum. A fronte Albis præterfluit fluvijs, vident prospicientes trans amnem ambulacrum jucundissimum, arboribus amœne virentibus confitum, quod ad cœnobium ducit, mirifice cultum atque ornatum. Interjacent prata, in longitudinem maxime spatiosa, a quibus collis, qui magnificum hospitale cœnobium & templum, splendore eximio atque oblectante conspicuum, cum Mausoleo sublimis operis dignitate splendide donato, ab ipso Illustrissimo atque Excellentissimo Domino Comiti erectum monstrat, insurgit. A tergo rursus mediocriter alti montes prominent, partim salebrosi, partim lenes & densis comati arboribus; ex quorum sinu saxoso, terreo, arenoso ac argillaceo ipsa Fontis Kukussensis scaturigo profluit ac ex alto descendit atque tribus separatis fontibus componitur, quorum alter ab oriente, alter a septentrione, tertius ab occidente uberrimis undis gelidis promanant. Confluentes omnes in unum alveum se exonerant unamque in scrobem colliguntur, qui in circulum efformatus, lapidibus erutis quadratis elegantiori opere est exstructus crepidineque ferrea circumdatus, quo simul rei utilitati est prospectum; lignum enim in hunc modum adstructum, aquis mineralibus, non æque conducibile ac lapides observatur, quoniam ex assensibus ligneis, præcipue recentibus, aquæ plures particulas fermentescibiles sulphureas extrahunt; hinc aqua in ligneo vase asservata brevi & ex facili corrumpitur, cum in argillaceis & vitreis longius duret. Similem in modum compositus tegit eum superinstructus spatiosus fornix, quem subsellia circumveniunt, super quibus commodè supersedere possunt potantes. Aqua ex hoc fonte per ministros hausta pone hunc fornicem, qui continet ipsum fontem, in ahenis super ferrum ignitum positis, in separata vicina ædicula coquitur & calefit, ex qua ad utrumque latus per canales ex metallo confectos ad balneariam domum, calefacta deducitur. Supereminet his, super testudine nempe & balnearia domo, non adeo magnæ quidem sed concinnæ molis sacellum atque Diæta inhabitationi pro Illustrissimo & Excellentissimo Domino Comiti accommodata. Ipsa balnearia domus in declivi locata, affabre & commodissimum in usum est exstructa, nam ad latus utrumque balnearia, quæ apodyteria labraque velis distinctis, binæ ubique junctæ, ut duo balneantes seorsim insidere possint, continent, sunt adstructa & operculis ligneis tecta, ne vapores exeuntes humidi forte imbecilli capiti balneantium obsint. Ad singula labra per aquæ ductus canaliculosos, subterraneos, duplices & separatos tam
aqua

aqua calefacta, quam frigida ducitur, ex quibus canalibus per epistomia pro lubitu utraque promi & balneum temperari potest. Medio inter hoc relicto spatioso atrio infra hæc balnearia, duo alia separata sunt efformata, quibus Illustrissimus Possessor ac Dominus pauperum egestati & indigentiae gratiosissime consulere voluit, his enim libera hæc gratisque relinquuntur. In hoc inferiori fornice, per cujus parietes redundans ex labris in balneario, aqua defluit, in toto parietum ambitu topiarii varii & maxime in conos cuspidatos efformati adhærent, immo tota hujus circumferentia friabili & molli salina & sulphurea arena, ex albo lutea, ex ipsa aqua medicata separata, est superinducta. In parte magis superiori hujus fornicis, flavescentes particulæ, totæ sulphureæ sublimatæ possunt abradi. Ubique vero, ubi defluit aqua, ad parietes pulvis subtilis albicans terreo-salinus deponitur. Singula conclavia ubi nimirum aqua coquitur ac dein in labra affluit & defluit, vaporosi, tenebrosi ac humidi, ad instar nebulæ sulphureo lixiviosi, odoris quid habent.

§. III. Fontem ipsum ac domum balneariam circumveniunt non modo magnum illud diversorium, omni supellectile necessario instructum, cum popina atque caupona donata ad usum, refectiorem & inhabitationem optime accommodatum, sed etiam alia, spatium quoddam interjecto, pro adventantibus ædificia, cum aliis quibusdam publicis, in quibus consortia, saltationes, musici concentus aliaque, ad delectationem & corporis exercitia facientia, institui ac colligi possunt. Huic universæ rerum faciei acclivi, declivis hortus cum ambulacris, parietibus viridibus, pergulis, statuis, fontanis aquis concinne ornatus, jungitur. Inferius, qua præterfluens Albis fluvius lætaque prata patent, fontanis distincta, cancelli pro hastiludiis equiriisque erecti sunt, nec non diæta ad varios lusus variamque delectationem adornata aliaque plurima, quæ animum oculosque delectant, visuntur. Mentio etiam quædam facienda est Bibliothecæ, das Philosophische Haus dictæ, ubi libri & instrumenta physica & mathematica, mechanicaque, curiosa varia asservantur. Nam hic eximia est voluptatum varietas, rerum omnium condimentum & quodquod in aspectum atque usus hominum natura solet proferre, id omne huc sese magna infudit copia atque adeo, ut nusquam alibi ejusmodi invenies. Unusquisque fere sensuum hic sua afficitur voluptate, tantis suaviis mulcetur & visu irritatur ad gaudium. Hic undique diverticula hujus otii patent. Hic pene omnia, quæ in deliciis & oblectamentis haberi solent, mira indulgentia Illustrissimi & Excellentissimi Domini Comitis indulgit. Dignatur atque adeo singulos,
eos

eos qui accessum & notitiam quærunt, pro sua forte unumquemque magna comitate & gratia facile admittendi, immo ultro invitandi. Tanta Illustrissimi Domini Comitis gratia est, ut multifaria atque amplissima accedentibus largiatur beneficia, ac dona atque his omnibus singuli ibi commorantes frui possunt. Si ambulationes & parva itinera instituere atque oculos animumque pascere velis, non modo tibi præsto sunt horti, ferarum, cervorum vivarium, eremitarumque cellulae eleganter positæ, magnæ areæ ac singulares aucupatoriæ, sed & in hoc loco, qui florida Thessalica tempe æmulatur, apertum aëris saluberrimi æquor panditur, eminent ex longinquo montium editiorum vertices & jucundissimi colles, in quibus circumjacentium regionum ac amœnæ varietatis intuitus est amœnissimus. Hic apricæ se offerunt valles, illic prata, variis melleorum florum coloribus roreque scintillante lucentia & interdistincti florentissimi campi. Hic segetes fluctuantes & germinantes, illic opacæ virentesque sylvæ, proceris & frondentibus arboribus frequentes ac nemora umbrifera & grato diversarum avium, oscinum cantu resonantia, arrident. Præ aliis autem invitant te ad conspectum, plausum atque adeo admirationem, cœnobium, templum, splendore operibusque plenum, diætæ & in iis tam pulcherrimæ & artificiosissimæ multifariæ, quibus decorantur picturæ. Quicquid uspiam artis atque ingenii est, hic conspicitur ac legitur. Ubi enim faciem verteris ac omnia quæ opificum manus erexerunt, ne vel ullus sine summo ingenio & fructu remaneret locus, sed vividus, loquens & docens redderetur, sublimium atque ingeniosarum argutiarum, inscriptionum, sententiarum, symbolorum depictorum atque carminum, quæ ex Illustrissimi Domini Fundatoris & Possessoris genio & affectu, qui ad cuncta pietatis, prudentiæ, sapientiæ, justitiæ omniumque virtutum studia atque cultus fertur, fluxerunt, plena sunt, sublimis sapientiæ exemplo inimitabili propemodum docendi, mentes erigendi, ad pietatis atque virtutum cultum pectora exhortandi, ad similes laudabiles motus, monendique simul atque implendi atque instruendi pariter atque delectandi causa, ut spectantibus cupide vivis posterisque quasi templa atque oracula essent. Si aures delectare velis, suaves musicos concentus, tam inter balneandum, quam prandendum cœnandumque alioque tempore non raro audies. Ad hæc ex singulari Illustrissimi Domini Comitis liberalitate, quam gratiose concedere ibi ac impetrari voluit, singulis advenis summa aucupandi, piscandi, venandi facultas datur eosque libera atque aperta theatra, quæ ludos scenicos, non scurriles,

sed modestos illos quidem materiamque virtutum tractantes atque re-
præsentantes, quotidie publicos, advesperascente die, producunt, ma-
nent. Quid mirum igitur, cum hic secessus gratissimus ita positus at-
que comparatus sit, si annuatim ex aliis longe disitis etiam locis, tan-
ta amœnitate illecti visentes accedant, mirabilem hanc rerum faciem
curiosis oculis inspiciant, commoditatibus & oblectamentis illis, qui-
bus Illustrissimus Dominus Comes gratiose hospitibus communicare di-
gnatus est, fruantur, atque tam valetudinem ac integritatem sibi acqui-
rant & procurent, quam & firmatis corporibus, animos simul vegetos
atque contentos reportent, atque tandem qui primum saltem erant spe-
ctatores, amatores admiratoresque discedant.

§. IV. Nomen fonti nostro inditum esse memoratur, a portione
putei fodinæ metallicæ, quam metalli fossores Kux vocant, cum quon-
dam hi tractus metalli fossoribus multum negotii fecerint, aut a pago
in vicinia sito quam incolæ Kuka aut Gugga vocant. Non jam quæra-
mus longius, quando hic fons noster Kussussensis inventus sit, cum il-
lud vel conjectura vix assequi liceat; commune enim is cum plurimis
aliis hoc fatum experitur, quod de inventione illarum nulla certa no-
titia constet, quippe magna hac etiam in re priscorum seculorum accu-
satur incuria. Et licet varia de illius originē tradantur, multa tamen
incerta, plura superstitiosa, plurima, nostro quidem iudicio, falsa sunt
atque fabulosa. Hoc omnes uno ore communique assensu incolæ acco-
læque profitentur, quod patres ab avis, avi a proavis jam acceperint,
quod casu inventio hujus fontis sit facta, & quod per experientiam at-
que per usum olim, quod ut plurimum in ejusmodi fieri solet, magis
magisque sit comprobatus. Cum enim primum quidam, sitim saltem
explendi causa hanc aquam expeterent, unus alterque febricitantium
& caloribus præter naturam æstuantium levamen & refrigerium sentiret,
per tot annorum series deinceps permulti, fama, quæ sanitatem resti-
tutam commendabat, adducti, ut ex vicinia accederent & tam potando
quam balneando a variis subinde morbis se liberarent, factum tandem
est, ut semita tota ad illum fieret, ac tam ad commoditatem, quam
utilitatem majorem, a fundi Dominis, charitate imprimis christiana lau-
datissima erga egenos miserosque atque infirmos permotis, ædicula li-
gnea est erecta atque folia & labra quædam ad balneandi commodita-
tem sunt addita adstructaque domicilia, usque eo, dum nostris his tem-
poribus ab Illustrissimo ac Excellentissimo Possessori Ipso, Domino Co-
miti Francisco Antonio de Sporek, ad hunc splendorem hancque com-
modi-

moditatem est evedus atque compositus simulatque gratiose jussit, ut tam experientissimi Medici per medicationes in pluribus perinde morbis periculum facerent, quam naturam ipsam atque contenta ejus per varia experimenta indagarent, quod & ab inclyta Facultate Medica in Academia Pragensi diversisque Clarissimis Medicinæ Doctoribus dexterritate atque solertia, nec sine felici successu, est susceptum atque per varias morborum historias illorumque curationes & per adeo plura retro jam lustra comprobatum. Tamdiu in cunis quasi vagiit hic fons salutaris, qui hodie magnifice jam triumphat & gloriose deprædicatur plus ultra indies evehendus. Nec morabimur in disquirendo diutius, unde hic fons suam originemumat & per quod terræ spatium profluat atque an ex stanni fodina, quæ in vicinia reperitur, ut vulgaris opinio fert, an ex præterlabente Albi, Fluvio, quod minori quidem probabilitate quidam volunt, sit deducendus? Nihil autem causæ est, cur longius vias quæramus, cum a tergo ad septentrionale latus adjacens mons, haud obscure eas demonstrat: Nam per hunc, non tantum ex fastigio ejus superiori torrens delabitur, qui aquam similem vehit similemve ochram tenuem profluendo deponit, ut ideo admodum probabile sit, fontem ipsum huncque torrentem ex communi fonte originem producere, sed & dictus mons alios fontes monstrat simplicem aquam vehentes, licet ex dissitis locis per hunc montem adducantur, ac ex separatis fontibus rivi promanent: Etenim verosimillimum est, omnes fontes medicatos, ut acidulæ &c. etiam si etiam frigidi sunt, qui ochram quandam simul advehunt, ex pyrite sive mineris marcasitis, sulphureis & martialibus eisque aqua salina, spiritu subterraneo omnia ubique pervagante turgida, tanquam principio admodum activo armata, solutis concitatoque sub ea solutione intestino reciproco motu, actione & reactione, effervescentibus atque exardescantibus vaporesque calidos emittentibus, originem trahere, ut videmus ex sulphuris vivi pulverisati & limaturæ martis admixtione aquæque affusione intra aliquot horarum spatium, accedente præsertim aëre liberiori, ebullitionem, incalescentiam tandemque luculentam flammam cum fumo sulphureo exoriri, qui si aut ex profundo magis & per fissuras amplioresque terræ poros ascendat, frigidos præterfluentes latices inficiunt, aut si per magnum terræ spatium profluunt, sensim refrigerant sensimque exsolutis penitus mineris arenam, calcem & ochram ejusmodi aquæ deponunt, quæ atque alia phænomena vix ex alia, quam modo descripta ratione deducenda veniunt. Probabile enim hinc omnino est, inter fontes foterios, thermas, acidulas, insignem, uti

vicinitatem, ita & ratione originis, ingredientium & virium convenientiam, affinitatem mutuamque dari consymbolismum.

§. V. Equidem de copia & indole aquarum mineralium, ex terrarum stratis harum rerum periti & mineris, quæ ea componunt, haud obscura quandoque conjectura hariolantur. Hic etiam circumjecti undique montes, præsertim qui a tergo in magna fastigia attolluntur, variorum mineralium, metallorum, lapidum pretiosorum & fontium perennium, saluberrimas undas vehentium, admodum divites sunt. Proximiores, Fonti ipsi Kukussensi chalybem & stannum manifestis indiciis monstrant, atque incolæ ac accolæ, de vaporibus acidulis & sulphureis, qui sæpius exspirant loquuntur, quales diffusiones in ejusmodi locis, ubi thermæ, acidulæ fontesque alii salutares dantur, non raro ipsis oculis videntur odoreque percipiuntur. Testimonia Autores quoque multi afferunt e. g. SOMMERVS in *Descript. Thermar. Carol.* p. 7. PECHLINVS *Lib. III. Obs. 44. de Swalbacensi tractu.* RAMELOVIVS in *Descript. Wildungensium aquarum &c.* ut & ubique circa metalli fodinas vapores metallici, ex terra adscendentes sæpius habentur. Supra montem ipsum Kukussensem, cui arx antiqua exstructa, fons quidam, cui nomen Hertzogs- & Augustusbrunn vulgo inditum est, profundus & magno opere per rupes & saxa in strata collecta, confossus, sulphur & sal quoddam cum aqua limpidissima egerit, dignus ideo, qui in majorem considerationem majoremque ad usum ducatur. Isti quoque montes vicini eorumque jugera, quæ Albim fluvium respiciunt & versus meridiem excurrunt, per duorum milliarium terræ spatium, præcipue collem, cui adstructum splendidum illud cœnobium est, adamantes, amethystos, granatos, carneolos, turcoides condunt, quorum mineras ibi erutas vidi; nec non hinc inde cinnabaris eruitur. Immo tota reliqua vicinia circa hunc tractum excurrens, per non unius milliarii spatium, variorum perinde mineralium vestigia prodit.

§. VI. Sequentia vero de hoc fonte, quæ laudatissimam suam indolem, contenta, vires & usus spectant, jam constant, quæ prout vel in transitu quasi & per laboris atque temporis compendium videre, audire, scire experiri mihi licuit. Propius accedenti ad eum, ex quo optima hauritur aqua & originem ejus, curiosis oculis contemplantis animumque advertenti patescit, aquam hanc soteriam ex tribus separatis venis confluere, sed quoad contenta, quæ vehunt mineralia, disparibus: Siquidem non auditu saltem, sed oculis quoque compertum est atque ex gustu judicium venit, illum fontem, ex orientali plaga pro-

manan-

manantem, totum ad instar acidularum martialem, alterum ex occidentali, quoad hanc qualitatem priori inferiorem esse, tertium adhuc cedere secundo; Aqua omnis conflua & toto ex fonte scaturiens, frigida erumpit, immo frigidissima, hyeme tamen, etiam sævissima, circa suum ortum vix congelascens, clara & crystallina pelluciditate oculis sese ingerit. Si ex vitro in vitrum funditur vel fortiter agitatur, bullulas ad instar parvarum margaritarum subsilientes copiosissimas emittit, agminatim ex fundo ad superficiem adscendentes vel lateribus adhærentes conspiciuntur & si per aliquot horas reponitur aqua, ad fundum vasis sensim sensimque deponuntur, quales & in vino generoso transfuso videmus aliisque aquis salubribus & acidulis deprehendimus. Totis undis defluens, ochram sat copiosam, porosæ spongiosæque substantiæ ex albicante-luteæ, in viis, per quas transit, relinquit.

§. VII. Aliæ aquæ aliis ponderosiores sunt, quod particulis heterogeneis iisque crassioribus, quibus mixtæ sunt, acceptum fertur, quod HIPPOCRATES indicavit *Lib. de a. a. & l.* dicens: *Multum inter se differunt aquæ & gustu & pondere & statione & virtute aliæ aliis præstant.* Aqua Kukussensis cylindri lignei ope examinata simplici fluviatili, ex præterfluente Albi desumpta, satis alias levi, levior, non obstante ingredientium quantitate, quæ habet commixta, præsertim ex fonte modo hausta, deprehenditur: Nam in cylindro ligneo quinque puncta in eo notata, in aqua vero fluviatili vix quatuor apparebant & bilancis hydrometricæ suspensæ ope, libræ X. aquæ fontis drachm. 3. sem. leviores deprehensæ sunt. Causa levitatis est spiritus ille mineralis catholicus, qui aëreo-æthereo elemento & elastica sua vi, sursum nitente, aquas illas leviores reddit, de quo in sequentibus plura adducenda erunt. Hac levitate multi etiam alii alibi locorum fontes ejusmodi salutares, ut acidulæ, thermæ &c. clari sunt, alio loco adhuc nominandi. Interim satis erit quædam saltem afferre exempla v. g. H. AB HEER in *spadacr. cap. VI. p. m. 47.* scribit; *fontis Savenirii aquam, exhalationibus tenuioribus fossilium spirituum refertam, esse leviolem aliis aquis & per Chemistarum organa destillatis.* In Italia hoc charactere insigniti sunt Tettuctianæ, Aponitanæ, Pisanæ, Calderianæ, Nocerianæ aquæ; In Gallia inveniuntur ejusmodi fontes, de Mans, de Capuert, de Jonas, de St. Reyne, d' Aurevil, de Bievre, de Chateau Goutier, de Vaujour, de Rocheposay, de Verteric de Belesme plurimique alii in Anglia.

§. VIII. Ex fonte hausta atque extemplo odoratu examinata aqua, nares spiritus ad instar, non nimis quidem fortis, quasi leniter pungit,

immo totum quasi caput ferit, non tamen molestat. Grato gustu linguæ sese commendat eamque suavi quadam titillatione veluti afficit, simulque odorem quendam, sulphuris adusti quid spirantem, emittit atque similem saporem gustatu, imprimit linguæ. Hæc qui attendet, a vero longe abesse censebit, quod vulgares illi rumores afferunt, hanc aquam plane inodoram esse, aut ab aqua simplici vix differre. Ast etiamsi inodora esset, inde tamen non inferri posset, eam non esse medicatam, cum infinita exempla fontium salubrium, odoris ac saporis expertum, qui tamen magnarum virium sunt, possent adduci. Sensus hic etiam non semper satisfaciunt atque non absoluta per eos horum nobis constat natura: Ejusmodi exempla in §. XI. sequente adducenda erunt. Alibi quoque invenimus medicamenta inodora, quæ tamen ut efficacissima præscribuntur & de quorum efficacia nemo dubitat. Similis hæc inculpatio est, quam a pelluciditate falso petunt, ac si hæc omnes alias ingredientibus partes excluderet, cum minus etiam respondeat calculo sententia: Nam non obstat, pellucidam aquam aliis particulis posse esse imprægnatam, modo illæ particulæ ita sint compositæ, ut globulorum coelestium pressionem impedire possint. Rideret hos rerum censes Ant. Lævenhoeck, qui in variis liquoribus limpidissimis & diaphanis, varias diversi generis, figuræ & magnitudinis particulas, microscopiorum ope detexit. Aqua marina pellucida maxime est, quis vero negat, eam multas continere particulas falsas? Multa dantur vini acetique genera, quæ summa pelluciditate in vitris conspiciuntur, quis vero temere asseveraret, eos liquores tantum simplices & aqueos esse? Gustui magis patefiunt quædam ejus ingredientia, si enim calefacta in ore paululum tenetur, non modo sulphureum, sed & salinum, vitriolicum & martialem saporem linguæ imprimit. Ore hausta, ad instar aquæ simplicis, nullam nauseam nullumque ingratum saporem excitat & imprimit, sed accepta frigiditate fauces solatur totumque corpus recreat. Si oculis instillatur aqua, iis sat sensibilem punctationis & vellicationis sensum, cum salini principii manifestatione, mox inducit: Ad ignem coctione velocius evaporatur & ut cito incalescit, ita & cito iterum refrigerescit: A solutione aluminis aqua non mutatur: Solutio sacchari saturni vero eam turbat, particulis martialibus præcipitatis & saturno a sale abrepto: Ast liquore alkalino instillato paulum lactescit. Si destillatur etiam fortissimo igne, nihil nisi aqua simplex, parum empyreumatica alembicum ascendit: Rursus alia vice destillata & experimento modo consueto facto, parvæ crySTALLI obtentæ sunt, ex capite mortuo,
aqua

aqua soluto, liquor subadstrictorius emergit: Sanguini vitulino adhuc calenti instillata, eum non condensat, aut coagulat, sed potius diluit, subtilizat & floridum reddit: Lac vaccinum non coagulavit, sed sine notabili alteratione illud remansit. Fel-bovinum sine turbatione dilutum & attenuatum reddidit: Picem notabiliter solvit sibi que unit, adeo ut in destillatione simul adscendat, aquamque sapore tali induat, indicio incidendi & resolvendi virtute, eam præditam esse: Si pisciculus aut rana recens ad fontem aquæ haustæ immittitur moxque probe vas tegitur, is intra XII. minutorum & rana intra XVIII. eorundem spatium extinguatur a spiritu acido, vitriolico & sulphureo, piscibus & ranis adverso, ab haustu quo longior vero mora, eo longius viva hæc subjecta conservantur; si hæc animalcula, immota jacentia & morti vicina, in aquam simplicem transferuntur, reviviscere quasi incipiunt.

§. IX. Examine ejusmodi ulterius hujus fontis aquæ tentato, per varia experimenta physica, chymica, quæ in hoc genere præcipua sunt, per mixtionem nimirum variorum liquorum acidorum & alcalinorum, pulverum, per destillationem, digestionem, evaporationem, calcinationem tam ab aliis jam clarissimis viris facta, quam a me quoque instituta, quantum mihi tunc per temporis, occasionis & loci conditionem licuit, sequentia contenta inesse constat. Scilicet hæc aqua continet spiritum mineralem subtilissimum & penetrantissimum acidulum: Hunc spiritum bullulæ & perlæ in transfusione subsilientes, odor qui nares promptissime ferit, sapor suavi titillatione linguam afficiens & levitas magna, juxta alia indicia jam indicata ostendunt. Quo intimius hic spiritus subterraneus catholicus cum reliquis ingredientibus fixioribus est unitus, eo efficaciorum ipsis tribuit effectum eoque longius hæ aquæ suam retinent vim. Ad hoc argumentari licet, spiritum illum elasticum graviores quoque partes martiales, ochreas, terreas intimius aquæ unitas & sociatas servare, ex eo, quod ille ubi secesserit, brevi temporis spatio materiæ illæ graves fundum vitri, in quo detinetur aqua, petant. Talis spiritus terræ salinus universalis alibi etiam in succis vegetabilium observatur ac in magna sat copia exhalat, atque verno tempore a sole extrahitur, talis etiam est, qui a quibusdam ex rore majali colligitur, atque exinde medicina universalis paratur, æque Borellus aurum solvit & in liquorem redigit. Is certe ubique terrarum fecunditatem præstat, omnia pervagatur suaque præstantia, motione atque activitate producit. Juxta hunc (spiritum) vitriolum quoddam tenue, volatile inest, si enim miscetur ea cum pulvere gallarum statim prope fontem, puniceum colorem

rem induit, si aliorum & in vicinam modo domum defertur & reposita miscetur, color ex pallido rubescens saltem & tenuior exinde resultat: Nigricantem ab affuso spiritu nitri, ab aceto destillato subviridem, ab aqua forti subalbidum referebat colorem, ex quo itidem vitrioli volatilioris, motibus aëris promptissime obsequentis & subtilioris oritur suspicio, si enim illud crassius fixumque foret, ad nigredinem magis, ab indito præsertim gallarum pulvere accederet. Si mixtura ex pulvere gallarum cum aqua per aliquot horas in vitro reponitur, saturatus color per gradus quasi deorsum sensim protenditur. Hoc vitriolum aëreum curiosi in capite mortuo, sive terra penitus eluta omnique falsedine orbata & aëri liberiori aliquandiu exposita, iterum colligunt. Tale vitriolum subtile aëreum, tanquam sal mundi & naturæ universale per aërem nimirum, aquam terramque dispersum & concentratum, in maximo pretio habetur & a chymicis inter summa arcana summarumque virium habetur. Parum porro sulphuris mineralis, plus minus volatilis spirat hæc aqua, quod non solum olfactu, tam in ipsa aqua, quam etiam in conclavibus, per quæ evaporat, percipitur. Si evaporatur, & coquitur, odorem penetrantem, nidorosum, sulphureum, acidulum spargit & sensim sensimque, quando in crassiorem massam redigitur, spadiceum colorem assumit & si gustatur, saporem ejusmodi salsum, sulphureum, subacrem linguæ imprimit. Ad hoc scire licet, exploratum esse, ubicunque bitumen occurrit inflammabile, ibi etiam sulphur inveniri, quod bitumen ex sulphure madefacto succrescit, observante CARDANO *Lib. I. de var. rerum C. VII.* & universa illius substantia nihil aliud est, quam quædam sulphuris soboles, ut scite argumentatur BACCIVS *Lib. I. de therm. c. XXI.* Ubi etiam vitriolum subtile in aquis medicatis habetur; ibi etiam ordinario fere sulphur volatile datur, quod terram ferreatam solvit intineque cum ea se jungit, unde illud deinceps exsurgit. Præter hæc plus minus volatilia principia, præsto sunt etiam fixa, ut terra quædam tophacea & ex parte calcaria, quæ particulis salinis ordinario se adsociat, quæ vero fere tota ustione in crocum martis redigitur. Dein affert sal quoddam, quod ad alkalinorum classẽ ob præpollentiam referres. Sal enim evaporatione remanens, bene dilutum & iterum evaporatum, cum acidis mixtum, conflictum edit, atque cum syrupo violarum adjecto, viridem colorem assumit & carbonibus candentibus injectum fluit & crepitat. Hujus salis drach. VI. cum gr. VIII. ex libr. XX. aquæ digestæ & lenissime vaporatæ recepti, quando vero forti igne coquitur, quantitas ejus decrescit, evolutis multis

multis particulis volatilioribus, per ignis gradum volatilifatis. Ex metallorum familia luculenter & copiose se manifestant subtilissimæ, plus minusve chalybis particulæ: Nam si residuum ex destillatione & evaporatione elutritioneque relictum, ut & pulvis ille subalbidus, qui in aheni fundo, in quo aqua coquitur, residet, quique labris & viis, per quas defluit, copiose adhæret, nec non ochra, quam deponit, porosa, ignita & calcinata, magnete tradantur, copiosi pili quasi ferrei illum accedunt ei atque adhærent, quarum subtilissimarum particularum martialium, ex data quantitate libr. XX. ad unciam unam collectæ sunt. Hæ partes ferreæ quibusvis fere aliis aquis, terris, vegetabilibus insunt, adeo ut copiosissimum præ omnibus aliis sit metallum undique quoque dispersum. Quoties enim terras, luta, ochras, tophos, argillas calcinavi & quæque vegetabilia, ligna & herbas incineravi atque concremavi magnetemque superinduxi, ferri particulas accepi. Omnes quoque ejusmodi propemodum fontes, qui constantibus viribus sunt, ordinario ferrum aut crocum martis secum gerunt, unde & ferratæ aut martiatæ aquæ veteribus sunt vocatæ. Immo sedimentum luteum, quod deponit aqua defluens, non est nisi subtilis quidam crocus martis, qui cum sale ammoniaco sublimatus, flores martiales luteos concedit atque appropriato menstruo v. g. spiritu vini rectif. rursus martiales tincturæ exinde parari possunt, quæ in febribus intermittentibus & stomachi infirmitatibus variis, optimam præbent medicinam. Stannum atque bitumen, quæ quidam viri fide digni asserunt, me sollicitum diu tenuerunt, quoniam, iteratis etiam primum vicibus experimentis institutis, nil quidquam eorum invenire potui, in data nimirum aquæ, ex fonte haustæ, XX. librarum quantitate, tandem in ochra illa alba, quæ hinc inde apponitur, præsertim ad ahenum, ut vocant, magno igne calcinata, contrita aquaque diluta ac rursus evaporata, in fundo vasis stannum ad drachm. sem. collectum est, alia iterum vice moleculæ hæ joviales plures obtentæ atque denuo calcinatæ & in fluorem solutæ, integrum frustum drachm. sem. pondere ostensum. Bitumen vero, etiamsi plures hinc inde varioque modo quæsi, luculentum tamen certissimumque ejus vestigium vix assequi potui, tandem quoque in folio quodam, aqua prius tepefacta & rursus frigefacta, repleto duos saltem flocculos ejusmodi bituminosos innatantes conspexi. De his scire licet, stannum quoniam non solum illud est & in sal quoddam conversum, uti omnia alia metalla, non in ipsam aquam ingressum habere vel cum ea misceri, sed ob gravitatem deorsum deponi; bitumen vero, ut materiam unctuosam,

Hh

ctuosam, viscidam, oleosam, sulphuream, mixtionem unionemque cum aquis respuere, nisi aliquando longa forte subactione ac particularum salinarum interventu, devictum, intimius jungatur. Atque quoniam ad instar aquæ simplicis fontanæ, magnis etiam haustibus pota aqua nostra, neque nauseam, vomitum, neque ardoris quendam in ventriculo sensum molestum, cum siti magna & anxietatibus circa præcordia & similia incommoda inducit, ut quidem sæpius assolent aquæ bituminosæ, præsertim si cruditates biliosas in ventriculo & primis viis offendant, hario- lari mox licet, perparum bituminis aquam Kukussensem secum vehere. Per experimenta ab aliis egregiis viris facta quoque habetur, alumen posse demonstrari. Verum enim vero de existentia ejus hic, pace il- lorum, adhuc dubius sum, licet concedam illud quandoque inveniri, ubi bitumen invenitur, quoniam & ex bituminosa terra paratur: Nam quamvis diligentem disquisitionem tentaverim, irritum tamen scruti- nium fuit: atque v. g. præcipitatum cum oleo tartari p. d. ignique im- positum, neque spongiosum fiebat & intumescebat, neque odore & sa- pore illud cognosci potuerat. Circa hanc ipsam rem advertentibus ani- mum, est observare atque rescire, oleo tartari per deliquium affusionem aquis calcariis ac salinis æque ac solutioni aluminis, album lacteum co- lorem inducere atque adeo aquam calcis vivæ limpidam, albam & turbi- dam inde evadere. Ad hoc de alumine idem dicendum est, ac de bi- tumine, quod aquæ aluminosæ austeritate constringendique sua vi, in- terno usu, neque palato arrideant, neque ventriculo admodum gratae & conducibiles sint. Rursus mercurium atque cinnabarin inesse asse- runt, sed mihi hæc nondum constant & ut verum fatear de eorum præ- sentia, ob prægnantes rationes, magis adhuc dubito. Non desunt qui aurum, argentum, tincturas gemmarum ipsumque auri sulphur hunc fon- tem vehere, affirmant; Ast ego iterum nihil horum deprehendere po- tui, aut ego valde cœcutio, aut manus meæ non satis oculatæ sunt, ut minus in productis hæc videant, quibus mens assentiri postulatur. Po- tius suspicor sane precario tantum hæc esse admissa & popularia asserta, aut ab in adulationem composito animo magis, quam veritatis amante quandoque facta, ficta atque depicta: Nam licet aliæ atque aliæ plures mineræ hinc inde circa hunc vel illum fontem medicatum in terris in- veniantur, tamen non semper sequitur, omnes illas mineras simul vici- num fontem ingredi. Valet etiam hic illud Philosophorum dictum: a posse ad esse non est concludendum. Etiam si ejusmodi nobiliores prin- cipia adessent, vix ideo præstantiorem, medico quidem intuitu, fontem pronun-

pronunciarem, cum mars, quo superbire potest, metallorum facile sit saluberrimus, hinc aquæ ferratæ salubritate aliis omnibus superiores, a curiosis plurimis harum rerum censoribus, habitæ sunt. Tincturæ autem gemmarum, aut aquas difficile & rarissime, aut forte etiam nunquam ingrediuntur, aut ob minorem quantitatem parum fructuosæ sunt. Vitriolum etiam auri, argenti, stanni, plumbi vix in visceribus terræ reperitur. Neque nitrum verum & purum inflammabile seorsim in hoc examine demonstrari potest, quoniam & hoc præsertim ex terra non effoditur neque in aquis invenitur, sed potius est sal aëreum ex pingui alkalina terra aëreque liberiori supra terram generatum.

§. X. Hæc qua facie deprehendere saltem mihi licuit, his chartis consignare volui. An hæc ingredientium proportio omni tempore ita sese habeat, aut an secundum tempestatum aut aliorum accidentium, parum nobis hucusque patentium, variationes modo inter se augeatur & minuatur, mihi nondum certo constat, cum semel tantum, æstate sat temperata & serena menseque Augusto hunc celebrem locum videre & experimenta quædam, vel in transitu & prout occasio & tempus concesserunt, instituere mihi licuerit: Admodum enim probabile est, quod hi latices a mineris, variis de causis, v. g. ventis forte in cavitatibus subterraneis &c. agitati & deflexi, quandoque ex parte aliqua declinari possint & quod inconstantibus veris atque autumnii tempestatibus, inconstans quoque mineralium proportio accadat, nec non aquæ pluviales vel nivales in transitu simul affluant, ut in thermis Hirschbergensibus observavi, in quibus æstatibus calidioribus & liquefactis in montibus Sudetis, nivibus, aut frequentibus imbribus mineralia, in iis alias contenta, minuuntur, quam alterationem & alii de aliis salutaribus fontibus, v. g. de Magnesiis Aristoteli jam notis aquis, veteres observaverunt. Sic & SEBIZIVS de acidulis Alsatia refert, eas esse quandoque adeo acres, ut dysenteriam commoveant, nonnunquam adeo effætas, ut speratos effectus parum largiantur. Pariter H. AB HEER in Spadacr. Cap. XII. p. 108. de aqua Spadana refert, illi multum de viribus & præstantia decedere aëre pluvioso existente, immo æstate tota pluviosa, inspidam ferme reddi. IOH. BAVHINVS de aquis medicatis Lib. I. cap. III. scribit, fontem cui nomen Rappenzagel inditum est, nisi præcedente pluædie, superficiem albam, ad instar floris lactis habere; quod equidem non de omnibus dicendum est, cum dentur iterum causæ impediētes, contrarium statim ex modo allegato BAVHINO l. c. C. VI. p. 6. occurrit, qui de acidulis Sti Petri in valle Grisbacensi observavit, eas neuti-

quam turbari, limpidissimasque remansisse ac viribus integris, licet per plures dies copiosissime pluisset.

§. XI. Indicatis fontis nostri soterii ingredientibus, vires, virtutes ac efficaciam ejus, nec indocta quadam conjectura assequi licet. Primum summa levitas subtilitas ac puritas aquæ hujus, qua aquam simplicem fontanam & fluviatilem superat, pluviam vero aut destillatam æquat, jam bene de ea quasi sperare monet, siquidem talis aqua pota facilius citiusque per poros, vasa ac omnes ductus, etiam exilissimos, qui in quamplurimis morbis obstructi sunt & fundamentum eorum constituunt, transit ac penetrat in intima fibrarum quæ tensæ & constrictæ sunt easdemque relaxando & emolliendo ad naturalem statum reducit. Quippe hujus eximie qualitatis causa præstantissima, spiritus ille summe volatilis, æthereus & elasticus acidulus est, & cui primaria & hic debetur laus ac gloria, ut in plurimis, pene dixerim omnibus salutaribus fontibus, cum a reliquis sæpius ingredientibus aliis fixioribus, si quantitatem eorum æstimes, tanti effectus, qui exinde procedunt, vix sperandi veniant. Quare mirandum est, qui factum sit, cur veteres hunc spiritum in aquis non observaverint atque descripserint. J. W. TABERNÆMONTANVS quod scio primus fuit, qui utilia de hoc spiritu deum in aquis in *Hydrograph. p. 441.* tradidit. Etenim spiritus iste per subtilissimos poros, per totum corpus ejusque omnes partes dispersos, in nervos usque ipsosque spiritus animales immediate forte ingreditur illosque cum toto nervoso genere suavissime afficit ac stimulo quasi blande titillat, humores reliquos, sanguinem & lympham rarefacit, sive ad majorem molecularum discontinuationem allicit, circulationem adauget, spirituscentiam juvat, secretoria excretoriaque organa illorumque ductus & orificia eaque etiam minima potenter expandit, aperit & stimulat. Uti enim elasticitate sua humores expandit, ita & elaterem ac tonum solidarum omnium partium juvat & sollicitat, labefactatum erigit ac restituit & sic roboratæ atque armatæ motus suos, qui in systole & diastole consistunt, expeditius exercent. Hic spiritus naturale & optimum alexipharmacum constituit ac æmulatur artificiali, qui ex terris & lutis chymicæ ope destillatur, de quo plura præter supra laudatum *Tabernæmontanum* legere licet in I. R. CAMERARII *Memorabil. Cent. V. p. 33. seq. Cent. X. p. 210. seq. Act. Med. & Philos. Hassniens. an. 71. 72. obs. 10.* Spirituum in aquis virtutes HELMONTIUS in *paradox. 3. Tackius in Phas.* aliique explicatius descripserunt, ad quos curiosi in hac re remittuntur. Principium sulphureum tenue ac volatile nervinum,

num, anodynum atque hypnoticum, discutiens, calefaciens, exsic-
cans, aperiens, penetrans, digerens, putrefactioni & venenis resistens,
diureticum, laxans alvum, ut & diaphoreticum est. Sal stimulat
carneas, nerveas, sensibilibioris texturæ fibras atque membranas, pur-
gat, laxat alvum, urinam & sudorem movet, resolvit, discutit
inciditque, aperit, siccat, abstergit, secretiones & excretiones pro-
moveret & promptissime superfluos & inutiles succos ex emunctoriis
secernit, exprimit & elicit, circulationem humorum expeditiorem
reddit & putredini resistit, atque adeo aculeis suis, quibus donatum
est, sanguinem subire cum eoque per totum corpus circumire ibique
itidem difficilius progredientia impellere & movere canaliculisque ad-
hærentia intus abraderet potest. Chalybs subadstringit, roborat ejus-
que subtiles particulæ, per poros in fibras partium solidarum se insinu-
antes inibique aliquandiu hærentes, eas ad actionem illarum armant sic-
que totius sanguinis circuitum una cum reliquis ingredientibus promo-
vent & augment, a balneo, incallescencia & rubore totius corporis habi-
tus, pulsû arteriarum fortiori, aut etiam, regimine debito accedente,
sudore eoque copioso, cum vasis sanguiferis turgescantibus & subsequen-
te leni siti ac ejusmodi aliis subinde phœnomenis testantibus. Huic
jam suo tempore quoque fidem fecit TH. WILLISIVS in *Pharmac. rat.*
P. II. Sect. II. C. V. scribens: se observasse, a chalybis usu vultum faciei
floridum & mensium fluxum evenisse. Hinc etiam hæ particulæ chalybis
subtilissimæ aperiunt quod est obstructum alibique hærentes acidos, acres
& corruptos humores imbibunt, temperant, resolvunt destruuntque.
Tophacæ partes siccant, roborant, refrigerant, absorbent acidum,
acrimoniam causticam, salino sulphuream temperant. Nec est cur me-
tuas hunc tophum interno usu adeo esse suspectum atque nocivum ex
eo, quod rudimenta & incrementa calculorum generationis in corpo-
re humano constituat & addat. Per instantiam saltem tibi dubium sol-
vam: Nimirum dantur multi alii fontes, & calidi & frigidi, silices &
tophos eosque copiosissimos deponentes, qui tamen eos, a quibus po-
tantur, salvos atque incolumes diu & a morbis hypochondriacis, cal-
culo, podagra &c. immunes præstant. Quo nomine in Bohemia, ne
longius quæram alibi hanc probationem, ex calidis, thermæ Carolinæ
sunt notissimæ. Exemplo, ex frigidis saltem sint fons petrescens prope
Erfordiam atque ille in Austria reperiendus, quem GLAUBERVS de-
scripsit *Tr. de Natura sal. pag. 194.* Ejusmodi aqua est, quam BORRI-
CHIVS ad *Barthol. Cent. IV. Epist. 92.* adducit, quæ ex specu quodam

emicans, in lapideas strias concrefcit, contra stranguriam tamen atque calculos accolis exploratum remedium est. Vitriolum conftipat, ficcat, abftergit, roborat, confolidat, digerit, refiftit vermibus: Et fic de reliquis. Nec aqua vel fimplex, ab omni fpirituofa principio abftrecta quali, confiderata, quæ quantitate reliqua contenta plus plusque fuperat & vehiculum reliquarum partium eft, in aquam, ut ajunt, hac in confideratione mittenda, fed potius dicendum, eam etiam maximas vires medicamentofas poffidere, operationesque falutares, quas fontes foterii præftant, multum adjuvare: Quippe tam externe quam interne fumma levitate, mollitie, fluxilitate, tenuitate & copia, qua reliqua ingredientia in his remediorum generibus longiffime antecellit, in curandis morbis magnum fuum fymbolum addit, quoniam enim non folum qualitatibus aliquibus, fed & maxime quantitate, copia ac mole fua efficax eft, falia morbofa diluit & craffos, compactos, tartareos, vifcidos humores humectat, emollit, dividit, attenuat omneque fuperfluum excrementitium per colatoria fua, foras educit, nec non vias fimul, per quas illud ducendum, lubricat atque difponit, poros omnes apertos fervat, fulphur expanfivum in fuccis effrenum domat atque refrigerat, obftructiones referat & fanguini omnibusque humoribus fluxilitatem, ad vitalem circulum continuandum, impertitur, fecretiones & excretiones fingulas faciliat, verbo, omne ea propemodum in fanandis humani corporis morbis punctum abfolvit. Exploratum eft, plurimos dari fontes falutares, quorum beneficia, quæ hominibus conferunt, aquæ faltem, fimplici, ut quidem apparet, fed puræ, levi, tenui & fpirituofæ, omni principio alio minerali & metallico omnique colore, odore atque fapore experti, debent, quare fimplices i. e. inanes has aquas cenfere, fimplicitatis, ingenii atque iudicii effiet, ut, multo & longo eximio etiam ufu probati, argumento funt ex notiffimis, ipfæ Teplicenfes in Bohemia thermæ, Favarienfes in Helvetia, Paffyenfes aquæ in Gallia in confiniis Lutetiæ Parifiorum, cujus examen phyfico-medicum invenies in Hiftoria Academiæ Regiæ fcientiarum, ac in Haf-fia Schlangenbadenfes & famigeratiffimus quondam fons Hornhufanus, de quo plura in libello ab Aulæ Caffelanæ Medicis confcripto, *de Natara, Viribus & Ufu aquarum medicatarum agri Caffelliani Cap. II.* legi poffunt. His Schleufingenfis (Wilhelms Brunn) in Comitatu Hennebergenti, Bebranus in Thuringiæ confinio & quidam in Sylva Hercynia prope Offerodam adfcribuntur. Hæc enim aqua in aliis atque aliis fontibus falutaribus purior, mollior, mitior & levior, rurfus in aliis gra-vior

vior & durior est, hæc illis magis repellunt hincque non raro febres, cephalalgias, sitim &c. facile accendunt & mala externa in interiora convertunt, e. g. Thermis Carolinis molliorem possident aquam Fmsenses & acidulis Pyrmontanis Spadanæ, Selteranæ, Wildungenses &c. Hujus vis medicata eo modo & ex parte augetur, si aut natura in ipso naturæ elaboratorio, uti in thermis incalescat, aut demum gelida arte, ut hic fit, igne coquatur, quo intestina agitatio fortior instituitur, calore, qui partes subtilizat, exaltat & acuit, versus circumferentiam agit & ut majus spatium affectent cogit, sulphur magis expanditur & attenuatur, salia magis solvuntur omniaque concreta mineralia, si forte quædam insint, intimius cum ea uniuntur, & in se invicem miscentur ac dein fortius & facilius quoque agitatur, transit, penetrat, dividit, diluit, aperit, resolvit, humores circulantes rarefacit & expandit, materia sua aëreo ætherea, quam spargit & ad majorem motum concitat, ac vivido suo calore & blando partes omnes humani corporis fovet ac reficit vasorumque efficit dilatationem aqua ejusmodi medicata.

§. XII. Hæc itaque & spirituosæ volatiliores & subtilissimi sicci vapores ab aqua coerciti ejusque poros ingressi & fixiora, quæ aquæ tanquam vehiculo insunt, contenta, felici connubio permixta & unita, compositum quoddam constituunt, adeo a singulis constituentibus longe diversum, ut novæ aliæ ac singulares virtutes exinde emergant, quas hoc vel illud per se non possidet, cum non iisdem omnibus nec qualitas nec quantitas relativa adsit & quædam junctim quæ adsunt, ab aliis numero superentur, disjiciantur, alterentur, permutentur aut destruantur, corrigantur aut exaltentur & juventur augeanturque, quemadmodum v. g. in pulvere pyrio singulæ partes ad operationem, quam edit, conferunt, sulphur nempe ad accensionem repentinam, pulvis carbonum subtilium ad flammam sustentandam & ad solvendum nitrum, nitrum vero ad fortiorem accensi pulveris expansionem, quarum partium componentium neutra unum eundemque effectum edit. Sic etiam cum his & aliis medicamentorum generibus est comparatum, qualia exempla plurima eorum suggerunt e. g. nitrum, quod ex alcali & spiritu nitri producitur: Ex mercurio & sulphure fit cinnabaris; Ex aqua forti & argento præparatur crySTALLUS amara purgans, quæ singula producta ab ingredientium textura, viribus atque effectibus maxime disparia sunt, de ejusmodi GALENVS de Med. Facult. Lib. II. plura loquitur scribens: *Sunt quædam remedia specifica, quæ tota substantia, i. e. non juxta certas suas partes, sed quatenus hæc partes totum quoddam constituunt,*
agunt

agunt & B. ETTMÜLLERVS *vid. Oper. Med. T. II. p. 1907.* eundem pro-
pemodum in modum idem affert, inquiens: *Sicut videmus in antimonio,*
cujus neque substantia acida neque alcalina separata, sed ambæ saltem combi-
nata catharactica sunt. Ac si conjectura, haud tamen inanis, a priori
valeat, aquæ hæ compositæ possident diluendi, emolliendi, relaxan-
di, leniendi, refrigerandi, absorbendi, roborandi, consolidandi, at-
tenuandi, resolvendi, penetrandi abstergendique, aperiendi, foven-
di, impellendi, temperandi, digerendi, repurgandi & a putredine
præservandi dotes, qui adjuvantur augmenturque, si aqua rite ad ignem
calefit ac hoc pacto ad contentorum actuationem disponitur. Si ad hanc
a priori cognitionem, ea etiam a posteriori sive experientia, quæ omni-
um rerum magistra, accedit, certum aliquid demum est determinan-
dum, ita, ut ex effectibus potius, quam ex mineralibus, vires hujus
vel illius aquæ, tanquam ex fructibus arbores cognoscantur. Scite hoc
monet GALENVS *Lib. V. de Sanit. tuenda* & confirmat HOEFERVS *in*
Hercule medico T. I. p. 345. scribens: *De aquarum mineralium medicatarum*
qualitatibus temere non est judicandum, si enim videmus, tales aquas constare
v. g. ex alumine, sulphure, marte, nitro &c. non statim pronunciandum, ergo
ear habent virtutes, quibus constant mineralibus. Nec ab eo multum ablu-
dit LENTILIVS, longe harum rerum usu peritissimus, *vid. M. N. C.*
D. II. an. 5. obs. 201. p. 406. seq. quando dicit: *Firmiter persuasus sum, vir-*
tutes omnium aquarum soteriarum nos non nisi a posteriori, nunquam a priori
indagare posse & cognoscere, scire nos quod agant, nescire, quomodo & quibus
ex principiis, illas sese habere ad instar panaceæ, quin agere ejusmodi qualita-
tibus, quæ, hætenus ad minimum, sunt occultæ. Quin immo A. LIBAVIVS *de*
Nat. metall. p. 93. memorat, dari aquas, ollas lapidesque corrodescentes &
earum vapores mentem eripientes nihilominus tamen salubrem medici-
nam præbentes: Simile tale GOEBELIVS *de aquis Wolckensteinensibus* re-
censet. Re ita se habente, utroque scrutinio sedulo inhæreant medi-
ci, qui tales curas cum fructu salutari atque optatu subsequente suade-
re ac dirigere debent, ut exacta jam cognitione, juxta perfectam, non
superficiariam historiæ morborum notitiam instructi sint, qui ex colla-
tione naturæ viriumque aquarum mineralium ægrorumque constitutio-
nis ac morborum quibus detinentur, possint dijudicare ac enunciare,
in quibus casibus ac quo exhibendi modo conveniat usus, in quibus ve-
ro minus.

§. XIII. Jam jamque ex universalibus adductis colligendum & ex
multiplici experientia probatum fontis soterii Kukulensis usum tradam
&

& emolumenta, quæ, si rite debiteque adhibeatur, corpori humano in integra sanitate ejusdem conservanda atque in vitiis maxime illius corrigendis, potest afferre, indicabo. In hoc naturaliter constituto, omnia redeunt in circulum: Sanguinis cursu pulsanæ arteriæ, quem, sepositis in partibus nutritiis particulis, refluxum revehunt venæ; Humores, ex multiplicibus arteriarum poris in fibrosos tubulos depositi, in lympham abeuntes redduntur vasis lymphaticis; Lactea lacteum chylum, in ventriculo & intestinis elaboratum atque perfectum, afferunt, ac sic omnes liquores corporis animalis per partes solidas, justa consistentia ac elasticitate, textura justoque tono gaudentes, i. e. non nimis relaxatas ac imbecilles neque nimis rigidas ac insensiles difficilesque ad actionem debitam, jugiter ac continuo feruntur. Spiritus animales per nervos adfluentes intimos partium recessus pervadunt &c. Harum partium itus reditusque si impediatur obexque imponatur, sistatur aut pervertatur, innumera exsurgunt in corpore mala: Quo propius humorum principia ad exactum æquilibrium accedunt, eo diuturnior erit machina, eoque magis sanum humanum corpus; quo potentius vero unum elementum prævalet cæteris, eo citatior erit hominis ad interitum cursus. Crassæ, viscidæ, pituitosæ, tenaces, lentæ, acerbæ, austæræ atque tartaræ sordes humoribus laudabilibus permixtæ, partium poros & fistulas obturant, obstructiones fiunt & stagnationes lymphæque maxime redeunti intercipitur via, unde vario modo corpus ejusque partes gravantur & cachexia nascitur: Si falsi, acidi, acres humores nervosas, membranaceas, summe sensibiles partes pungunt & vellicant, sensum molestissimum neque non raro ferendos dolores hinc inde efficiunt, spasmos & motus convulsivos producant; Si colliguntur hic aut alibi corrosivi magis malignique humores, carnes depascuntur; Si crudeles illi tortores corporis membra contorquent, contracturæ remanent ac si penitus interclusis viis etiam spiritus animales arceantur, motus impotentia, paralytes &c. relinquuntur, e. f. p. His atque aliis morbificis causis exindeque dependentibus morbis, fons Kukulensis egregia est medicina, tam curando, quam præservando.

§. XIV. Hæc vero therapia puncta evacuatoria laudabiliter & manifeste explet, fons præsens vario modo adhibitus. Nimirum & præsertim interne operationes suas, quæ cuivis modo in oculos incurrunt, præcipue & ordinario quidem per transpirationem, per poros cutis & quandoque per salivationem, nec non vomitum, sine omni humorum perturbatione ac virium deperditione & externe per sudorem ut & lo-

tii proritationem exerit, plurimos eorum effectus, speciatim diuresin nominatam, per notabile temporis spatium, in feram usque noctem, immo non raro ad alterum diem mane, aqua pota sæpius extendit. Juxta hæc summa evacuationis genera, non minus alterum curationis scopum, quem alteratorium vocant, egregie etiam fons noster utroque adhibito modo explet; siquidem illas in antecedenti §. XII. descriptas facultates, a priori posteriorique perspectas, possidet. Nec balneum derivatorio revulsorioque; usu destituitur, quando enim corpus ad scapulas vel ad collum mentumque; immergitur, materia forte peccans in parte superiori, capite &c. hærens & humores circulantes, emollitis, relaxatis ac bene præparatis inferioribus partibus & viis, deorsum magis tendunt & onus, quo illi premuntur, alleviatur & amovetur ac circulatio per omnes partes instauratur. Hunc balnei finem præsertim Galli hodie spectant ac laudant & in plurimis capitis morbis, in §. seq. nominandis, commendant, cujus vestigia jam apud veteres exstant, de quibus legantur A. TRALLIANVS *Lib. I. p. 107.* ARETAEVS *Lib. VII. p. 134.* COEL. AVREL. *Lib. I. morb. chron. p. 335.* PROSP. ALPIN. *M. Aegypt. p. 115.* Immo curiosum atque notabile plurimisque aliis thermis & fontibus salutaribus, intus extusque usurpatis quoque commune est, quod ferme omnibus temperamentis, calidis, siccis, humidis convenient: Nam poros aperiendo & transpirationem liberiorrem adjuvando sicque evaporando & ventilando sulphureas partes, calores fuscitantes nimium, ejiciunt adeoque præcalida temperamenta temperant, humidis plus justo, calore, qui in humores semper agit resolvendo & abigendo, succurrunt, frigida nimis, calore foveant, sicca vero humectant & emolliunt aquæ copia & mora. Ideo etiam contrariis affectibus per eorum usum prospicere utilissime ac secure quandoque possumus, excretiones nimirum quasdam imminutas atque deficientes promoveri & restitui, nimias vero sisti experimur. GALENVS hoc testatur, qui in *lib. de marasmo* dicit: *Hoc habent mirabile balnea, quod caliditates & frigiditates & siccitates juvent: quemadmodum & hoc, quod non sitientibus sitim accendant eandemque sitientibus tollant.* Et in *3. Lib. de offic. Med.* *Fere mortuos, inquit, illuc profectos calefaciunt balnea, etiam si valde frigefacti fuerint, exustos vero atque incensos non ledunt.* Et quamvis balneum externum remedii genus sit adeoque externe saltem, operari videatur, longius tamen ejusdem operatio certissime extenditur atque internis etiam medetur malis emolliendi relaxandique virtute & penetrantia sua mole, densitate ac pondere, undique nitente indeque compref-

pressionem cutis, musculorum, vasorum reliquorumque organorum impulsuque in humores per glandulas & poros excretorios, cum circulationis sanguinis promotione atque augmento, longe etiam a balnei tempore durante hincque viscidarum particularum dissolutione meatuum, etiam exiliorum, apertione, obstructionum reseratione relaxationeque totius corporis habitus, quo simul humores apti redduntur, ut per secretoria & excretoria vascula & instrumenta eo melius faciliusque trajici possint. Hinc & per plures horas habitus corporis valde inturgescit, facies florido colore tingitur, calore quasi scintillante suffunditur, immo, si paulo calidius fuerit aut longius protractum balneum, phlogoses adscendunt atque sudor copiosus, si præcipue in lecto requiescant & bono quidem indicio, boni effectus profluit. Ad relaxatum enim corporis habitum & ad meatus tenuiores apertos & pervios sanguinis ad ambitum corporis, liberius instituitur circulatio & superfluarum exclusio. Aequae ac pondere aquarum pressum eundem, muscoli suam pristinam habitudinem recipiunt atque ad motum perficiendum magis dispositi redduntur. Ut pluribus jam non attingam experimentisque comprobem, aquam vi sua medicata, per ipsos cutis poros laxatos, ad intimiores totius compagis recessus pertransire, tepentem & præsertim vigente calore adhuc attenuatam, magis mobilem & penetrantem redditam, sine perspirationis, quam multi sine causa satis prægnante metuunt, imminutione, cum halitus etiam per aquæ poros facile transire queant, quam rem multi effectus ex balneis provenientius testatam faciunt. Nimirum a balneo subinde eosdem propemodum deprehendimus effectus in partibus interioribus, v. g. violentæ constrictionis, membranosarum maxime partium internarum, relaxationem, dolorum sedationem, calculi vesicæ & renum &c. secessionem, congestionum gravantium, allevamentum, infrigidationis sensus ablationem &c. ac quidem in exterioribus membris. Insuper & conferri possunt præ aliis SANCTORIVS in *Sect. II. de Aëre & aquis*, & D. BELLINI de *Sangu. miss.* p. 146. *seq.* Præter hanc balnei operationem, corpus immediate magis afficientem, adhuc quædam alia emergit, quæ a vaporibus humidis, aqua medicata ac calefacta exhalantibus, procedit, qui totum balnearium replent, caput feriunt ipsumque in os & nares se insinuant.

§. XV. Multiplici autem modo aqua nostra salutaris, ut pluribus aliis fontibus salutaribus solenne est, adhibetur, balneo autem primario ac potu & juxta hos primarios maxime modos, aliis quoque; balnei particularis externi speciebus. In his subjectis, in his affectibus externus usus, in

aliis internus magis in quam plurimis uterque expetitur. Frequentius hodie balneum frequentatur, quod etiam commodissimum, ut ex descriptione jam dum superius data, non ignotum est, ut nunquam alibi facile commodius inveniatur. Quare & primum de illo agamus atque ejusdem efficaciam & medium adhibendi lustremus. Quemadmodum balnea in genere, uti Medici communi assensione profitentur, ita & hoc, præsertim in morbis ab acido viscido, ab obstructionibus iisque inveteratis & pertinacibus, a spasmodis atque stricture, congestionibus & stagnationibus humorum, lymphæ maxime, oriundis & ubi tam externa quam interna corporis frigent, & ubi ab impuris etiam subtilibus acribus immo virulentis fordibus humores sunt inquinati, utilissimum ac efficacissimum est remedii genus, siquidem experientia multiplici est comprobatum atque experientissimi Medici & Practici Bohemici æque ac Silesiaci testantur, ac variis a se curatorum historiis adducunt atque describunt. Nimirum primo eos effectus hic seorsim transcribere haud inutile erit, in quibus maxime comprobatum balneum calidum fuit, quorum prima series sit eorum, qui tota occupant corpora, quibus per balneum curatione prospicitur, qualesque sunt febres intermittentes, quotidianæ, tertianæ, quartanæ, quarum tempora a paroxysmis vacua hæc quoque medicationum genera admittunt. Nondum apud omnes in confesso est, an etiam ejusmodi balnea tepida aliis febribus, ut continuis &c. quadrent: Si aliquid hic discernere foret, putarem, balneum in ejusmodi neque periculosum neque inutile esse, quoniam corrupti humores, qui causæ febrium sunt, per relaxatos cutis poros & per diaphoresin auctam, præsertim si ante infessum debita febribus hujusmodi quædam medicamenta propinentur, commodissime expurgantur. Ut constat ex *Hippocrate*, *Celso*, *Galeno*, *Alexandro Tralliano*, quod veteres balnea tepida non solum in intermittentibus, sed & aliis, continuis atque adeo in putridis felici cum successu adhibuerint. Legimus idem apud *PROSP. ALPINVM de Med. Aegypt.* Amicus quidam & non ignobilis in medicina Practicus Silesius, mihi per litteras significavit, quod ipse hujus balnei ope a febre purpurata contumacissima feliciter fuerit liberatus. Ad hoc notabile est, quod refert *GALENVS Lib. V. de sanitate*. de Primigene, Philosopho, qui, qua die se non lavasset, febricitabat. Post febres hoc nomine nobis patefcunt scorbutica humorum impuritas, tam calida quam sicca sic dicta, atrophia, cachexia, resolutiones nervorum eorumque distensiones sive spasmi rigoresque atque adeo partium convulsiones. Secunda series complectitur capitis ejus-

que

que partium quosdam morbos, quos sympathicos vocant, debilitates atque dolores, hemicraniam præsertim ejusmodi, quæ inferiorum partium vitio, fieri solent. Huc quadrat HIPPOCRATIS *aph. 22. Sect. V. calida aqua cutem emollit, attenuat, dolores eximit, rigores, convulsiones, distensiones mitigat, capitisque gravitatem solvit.* Idem dicere possum de epilepsia extra quidem paroxysmum v. g. a mensibus obstructis oborta, quod medicationis genus in hoc casu expertissimum jam habuit ALEX. TRALLIANVS vid. *Lib. I. p. 75.* Porro memoriam debilitatam nominare hic licet, quam divertendo præcipue juvare potest, & tristitiam, melancholiam, si ex vitio hypochondriorum & spasms in ventre sit & forsan alia ejusmodi quædam mala, in quibus mens errat, maniam, cupidineos affectus varios depravatos, furorem, qui a morfu rabiosi canis infertur, commode enim subtile virus ad corporis peripheriam adducitur atque educitur, ideo hos ægros CELSVS vid. *Lib. V. C. XXVII.* in aquam calidam demittere iussit. Amplius passionem hysteri- cam, incubum, vertiginem, oculorum vitia, inter quæ præsertim lippitudo, ophthalmia, immo ipsa cæcitas, quarum etiam contumacissimæ balneando abiguntur. Quo spectat HIPPOCRATIS *aph. 31. Sect. VI. oculorum dolores vinum & balneum solvit.* Sequuntur catarrhi, aurium dolores & effluxiones, parotis, auditus difficilis, odontalgia. Præserva- tione magis inservit & longe ante ipsos paroxysmos, nedum imminen- tibus iis, (alias major noxa inducitur) affectibus soporosis, lethargo, ca- ro, catalepsi, comati, morbo comitali & attonito. In tertia numerasse faucium tonsillarumque tumores ac columellæ laxationem variasve alias ex glandulis obstructis constipationes, sufficiat. Quo in loco seorsim nullus dubito affirmare, quin in anginae decremento eoque in suppura- tionem tendente, tuto balneum adhiberi queat. Quarta de pectoris, pulmonum cordisque morbis loquitur, ad quorum equidem non tam curationem, quam præservationem, præmissis præmittendis, temperan- do, resolvendo educendoque facere quandoque potest balneum. Plu- rima inferioris ventris vitia & quæ hic quintam constituunt classem, sunt, quibus hoc modo medetur, ut ventriculi imbecillitatibus, in qui- bus frigiditatem subesse vulgo dicitur, ciborum fastidio ut & appetitui penitus prostrato, de quo varias habeo easque singulares observationes aliisque multis ejusdem vitiis, nausæ, vomitui, singultui, colicæ & qui- dem convulsivæ, obstructionibus & tumoribus viscerum, hepatis, vesiculæ felleæ, lienis, mesenterii, insequentibus inflammationibus, immo ipsis illorum scirrhescentiis incipientibus, hydropi, anasarcæ, præsertim

inflammationibus ventris: Sigillatim dicendum est, hypochondriacum, gravissimum illud nostraque ætate familiarissimum hominibus, speciatim vitam sedentariam & speculativam agentibus, malum, præstantissimum in nostro fonte invenire levamen, ideo in Silesia, quod scio, admodum famigeratissimum est & adhuc non paucos ea alit alumnos, ex usu hujus fontis ab hoc molestissimo & variis iisque gravissimis symptomatibus, per longum tempus & sine intermissione affligente, medicosque mirum in modum fatigante ac omnia medicinæ genera eludente malo, feliciter liberatos; nec nullus dubito Bohemiam non minorem eorum numerum numerare. Perinde eximie valet in alvi obstructione pertinaci, iliaca passione, vermibus, tenesmo & peritonæi doloribus, hæmorrhoidum obstructione & ex hac dependentibus pathematibus, fistulis ani recentibus, difficultate & suppressione urinæ, mensium impedito & dolorifico negotio, obstructione pertinacissima aliisque uteri vitiis, fluore muliebri &c. Dolores a calculis tam renum, quam vesicæ ut & alias cavitates, ut folliculum fellis &c. occupantibus, potenter lenit, spasmos exinde perductos sedat & calculorum educationem faciliat. Præsertim sterilitati mulierum hunc fontem unice quasi dicatum esse videtur, adeo ut nullus dubitem affirmare, quod is alteri Bohemiæ fonti, Landeccensi, haud secundus hac eximia dote censendus, si non antefereendus sit, cujus tamen ideo magna laudatio atque commendatio est. Nec a vero multum aberraverim, si confidentius affirmem, nostras nymphas Sinuessanis in Campania & nitrosis in agro Volaterano aut Thespiarum fontis in Bœotia & Elati fluminis aut ipsius Nili aquis similibusque aliis, ob fœcunditatis, quam conciliant, quondam, laudem celebratissimis, quarum plures Plinio innotuerunt, merito æquiparandas esse. Permulta certe prostant exempla fœminarum, per X. XII. XIV. annos in sterili matrimonio vixisse & per hujus fontis usum voti sui compotes factas fuisse, ut mihi nota quædam est Silesiaca, quæ post X. annorum decursum demum per hoc auxilii genus, Deo benedicente, gravida facta. Si balneo potus aquæ hic jungitur, spes eo certior redit. Operationis ratio comparet, quæ quidem ex parte in roborando, maxime vero sæpius in relaxando strictiores atque arctiores factas, gestationi destinatas partes & repurgando eas ab inhærentibus fœculentiis consistit: *Quæ enim frigidos & densos habent uteros non concipiunt, neque quæ prætumidos habent, siquidem in iis semen extinguatur.* HIPPOCRAT. S. V. aph. 62. inquit. Nec dubium est, quin & impotentiam virilem, partibus omnibus genitalibus justum tonum, amplificationem, permeabilitatem &

& aperturam conciliando, ut spermatis iusta quoque elaboratio, depositio & tandem ejaculatio institui possit, corrigere valeat, quemadmodum constat, alios huc facientes defectus, eum emendare: v. g. genituræ involuntariam in viris genituram, compescere. Porro in arthritide vaga pariter ac fixa aliisque ejusmodi articulorum vitiis utilissimum deprehensum est. In lassitudine artuum & eorundem atonia, malo ischiadico, rheumatismo, a frigore aëris læsionibus, atrophia, contabescencia, contracturis, rigiditatibus atque in iis vitiis quibus cutis exposita est, nimirum in ictero, scabie foeta & inveterata, impetigine, psoa, vitilagine, in similibus aliis ejusmodi speciebus, laudatissime se gerit. Similiter leucophlegmatiam atque omnes foedos ac luridos virginum colores auferit. Pari modo vulnera & exulcerationes abstergit, repurgat ac consolidat, abscessus, tumores & apostemata, non modo externa, sed & interna, hic inde etiam e. g. in renibus & vesica collecta, maturat, emollit, aperit & per proximas, expeditiores naturæ vias, educit sanguinem congruatum in interioribus resolvit, læsionesque alias sanat, in fracturis calli generationem promovet & membra ab iis, ut & dislocatione debilitata firmat, in ulceribus crurum antiquis, immo cancrois atque malignis, balneum conducit apprime. In his præsertim humani corporis morbis usu, jam fons noster multiplici, probatus est, de quibus curationibus historiæ & exempla notabilia & ampla quis legere potest, in *Clariss. D. D. C. V. KIRCHMEYER de Reichwitz, & D. D. C. J. Langii libellis quos de virtutibus hujus fontis concinne conscripserunt*. Præter hos recensitos morbos, quorum jam nymphæ Kukussenses celebrantur victrices, supersunt forsitan adhuc alia nondum nominata mala, quæ abigere possent, si periculum quis facere vellet, sperandumque est, fore, ut ejus usus in annos amplietur, qui seris venit ab annis, communem enim etiam hoc remedii genus cum aliis fatum experitur, ut casu & fato inventum, sola ut plurimum experientia, immo erroribus sit ampliatur.

§. XVI. Quemadmodum morbos sic balneum curat, ita & a longis, gravibus & pertinacibus morbis, v. g. phthisi, febre tertiana & quartana, gonorrhœa vera, dysenteria, enormi hæmorrhagia, ut & febribus malignis, utpote qui morbi, licet curati longas tamen molestias & languores relinquunt, exantlatos, debilitatos & adhuc infirmos, in convalescentiæ statu constitutos, ut & e puerperio egressas fœminas optime juvat & efficit, ut pristina vires citius restituantur, citius appetitus dejectus redeat, digestio ciborum facilius instituat, nutritio melius succedat, recidiva & alia accidentia familiaria, ut tumores pedum œdematosi, cum aliis

aliis multis morbis, quibus convalescentes a morbis obnoxii sunt, præcaveantur sicque restitutio in integrum adornetur. Nimirum tunc relictæ lentiores sunt attenuandi, calor naturalis animalis suscitandus, sanguificatio & boni novi sanguinis elaboratio, influxus, & spirituum animalium nova generatio & atonia, partibus solidis inducæ, emendanda ac partes roborandæ, quæ beneficia omnia, balneum certissime promittit. Si & recte valentibus quandoque semel, bis ac ter, in septimana tepidum, vel etiam saltem frigidum balneum ingredi volupe sit, non a scopo aberrabunt, sed evexiam corporis conciliabunt, & sanitatem diu conservabunt atque longævitatē comparabunt sibi; Exempli loco saltem sistam ex GALENI *Lib. V. de sanit. tuend.* Telephum, Grammaticum, qui ultra centum annos, sensibus illæsis, membris validis & inculpata omnino sanitate, per frequentes balneationes vixit. Balnea enim quævis temperata, lenientia, lubricantia, emollientia vel ex simplici aqua parata, inter optima, sanitatem ac vitam prorogantia media & remedia merito repono, quoniam non modo nativus calor fovetur, conservatur atque firmatur, sed & per ea fibrarum & membranarum nimia ariditas & exsiccatio, soliditas & durities atque canalium omnium angustia, quæ cum crescentibus annis consistenteque ætate atque appropinquante senio, sensim sensimque inducuntur & humorum circulationi, secretionibus atque influxui laudabilium liquidorum, ad motum & nutritionem necessariorum, in quibus vitæ & sanitatis punctum ponitur omne, remoram injiciunt, ex quo, ut in confecto senio accidit, itus redditusque humorum lentior difficiliorque redditur, vires subinde absumentur, morsque naturalis, ultima linea rerum. pressa quasi pede insequitur, avertuntur; balnea vero modica, emolitione & lubricatione, quam partibus solidis earumque elateri præstant, eas in justa mollitiæ & flexilitate & laxitate, justa soliditate, capacitate justoque tono ac impulsu diutius omnium conservant, ut juvamento sint circulantibus fluidis, simulque efficiunt, ut ea rursus moderato debitoque impetu, velocitate, tenuitate naturali protracta omnique præternaturali acrimonia & crassitie exuta, & morbosæ ariditates, tensiones & crispaturæ in solidis præcaveantur. Cujus rei non ignari primi medicinæ parentes nihil magis in morborum curatione pariter ac præservatione quam balnea, fustus, lotiones, unctiones & frictiones & omnis generis exercitationes proponebant. Nec aliud sentit ac scripsit BEGANVS, Gallus, in libello *Anno MCDXVI edito de arte bis juvenescendi*: nam juxta juvenum consuetudinem quotidiana balnea tepida, cum lenibus frictionibus & inunctionibus

nibus nervinis circa articulos pro tali scopo præsertim commendavit, ut nimirum articuli roborentur, muscoli flexiles redderentur, cutis emolliatur, pori ejus aperiantur & perspiratio intendatur. Nec inutiliter gravidæ circa ultimos menses balneum hoc tepidum moderate aliquot per septimanas vicibus ingrediuntur, quo foetum roborabunt atque præparando, emolliendo & lubricando vias, partui destinatas, facilem & felicem enixum futurum sibi promittere poterunt.

§. XVII. Balneum hocce haud absimili modo ac alia ejusmodi adhibetur. Quemadmodum autem ea, passim usu aliquo commendabilium rerum, est conditio, præsertim quæ qualitate eximia præpollent, quovis modo etiam adhibeantur, si non legitima accedat administratio certusque utendi modus, aut sine sperata utilitate usurpentur, aut noxam inferant; rursus autem si ordo, modus, tempus & præparatio rite observentur, optatum successum certius polliceantur: Ita & nostræ aquæ foteriæ (ut singula alia remedia) ex eorum censu plane eximendæ non sunt. Nimirum quod balneum quidem hic concernit calefactum & convenientissime præparatum, corpus ad collum usque & mentum potest immergi & subinde addita aqua calida calor augeri & semper ita pro lubitu frigida calidaque ex epistomio emissâ temperari, ut cuivis conveniens sit, quæ temperatio & ad frigidum potius, quam calidum inclinans, a juvenibus præcipue & plethoricis circumspecte observari debet, ne febris forte accendatur, animi deliquium, dolores capitis, imo funesta in cerebro pathemata, apoplexia, affectus soporosi, propter magnam ibi vasorum copiam minoremque resistentiam, aut alia quædam incommoda, sitis, spirandi difficultas, vigiliæ, hæmorrhagiæ, catarrhi, rheumatismi & sudores præternaturales &c. inducantur. Atque ita hunc modum servant balneantes, ut primis diebus per semihoram inibi saltem commorentur, sequentibus ad horam integram & ultra, donec demum ad duas usque ascendant. Pariter primis diebus una tantum vice, matutinis aut vespertinis horis & levato prius naturæ onere, sequentibus duabus vicibus, mane nimirum ac vesperi balneum repetant, si indoles morbi aut pertinacia ejus id exigat, secundum enim illud duro durus etiam hic quærendus cuneus est hicque illum trudet. Hæc si præstiterit ratio & si hæc temperatio hicque levis tepor bene observeatur, omnis ætatis, sexus, conditionis aut constitutionis hominibus sine metuenda noxa quadrabit. Attendendum nihilominus tamen est, an æger alias sanus asuetus balneis fuerit, & an bene illud ferre possit? quæ conditionis moram in balneo aut breviorē aut longiorē determinant.

nant. Non statim a meridie & prandio balneum ingrediantur, sed digestionem fere absoluta, tertia aut quarta a pastu hora. Consultum tamen, immo necessarium est, ne forte inter alia incommoda, secundum GALENI effatum *V. de sanit. & III. de rat. vict.* membris affectis fluxio concitetur, ut ante ineundam curam, corpus prius bene, præcipue in cacochymicis præparetur, alvum per consueta medicamenta laxando & purgando, iteratis etiam vicibus, per leniora saltem, ut aloëtica, rhabarbarina, salia detergentia, sal Epsomense, vel quam ipsa Bojemica terra offert, aquam amaricantem Sedlicensem ejusque sal evaporatione obtentum, ut & illud quod ex thermis Carolinis ac acidulis Egranis paratur. Pariter vesica exoneretur urinaria per diuretica salina usualia, e. g. liq. terræ fol. tartari salia alia nitrosa & lixiviosa, sal ononidis, absinth. stip. fabarum &c. & pertinet tartari acrem &c. & si præsertim status plethoricus adsit, vena secetur, ne forte balneum calidum humores expandendo vasaque nimis dilatando, eorum ruptionem aut ad minimum anxietates præcordiales, anhelitum molestissimum, phlogoses &c. inferat. Balneum sensibili modo alvi laxationem & diuresin promovet, nam si per aliquod tempus, ad horam v. g. saltem infederint, protinus ad vesicam levandam & brevi post balneum tempore ad alvum depoenendam, ut plurimum sollicitantur. Qui nimiam balneando corporis incalcescentiam metuunt, aut qui diuresin alvi que laxationem adjuvare velint, ante balnei hujus usum, cyathum unum aut alterum aquæ ipsius fontis frigida hauriat, quod haud absolum esse, etiam de thermis Hirschbergensibus observavi. Non nimis diu balneo calido infideant, ne virium debilitas contingat. Balneo egressi summo studio ab aëre ambiente frigidiusculo se muniant, induendo statim indusia calida & vestes, ne pori, mox ab eo, claudantur incommodaque multa inducantur. In cubiculum suum regressi, commodius per horam quieti se dent, aut etiam levi cubatu dormiant simulque transpirationem & lenem sudorem expectent, qui ordinario tunc largius succedit, quam in ipso balneo; nam circumfusæ corpori in balneo aquæ gravitate vapores per spiracula cutis exituri quodammodo reprimuntur; hac autem remota in lecto expansis magis tubulis per universum corpus jugiter magisque sudor prorumpit, quem jusculum calidum aut decoctum conveniens assumptum, utiliter adhuc juvabit. Hoc tamen commune plethoricis incommodum est, quo caput offenditur & temulenti torpidique redduntur, si sive balneis artificialibus, sive naturalibus, usi fuerint, sive etiam pransi modo sint, si dormiant etiam in sella saltem sedentes. Quiete hac
fructu

fruiti per semihoram aut horam integram placide corpus ambulatione, equitatione vel curruvectione movere possunt. Executa dein exspatiatione, prandium aut coena sequantur. Insuper quoque salutare Galeni monitum hic legatur, quod iis quovis balneo observandum indicavit: ne praesertim ullum viscus imbecillum sit, & ne multitudo crudorum humorum in primis viis adsit.

§. XVIII. Balneum hujus fontis calidum tantum huc usque in usum venit, qui cum frigido periculum quoque vellet facere, sine dubio in plurimis indicatis etiam superius affectibus opem haud contemnendam exinde sentiret. Si enim balneum aquae frigidae simplicis, hybernis etiam algoribus, adeo efficax, tam refrigerando quam vapores calidos, ne exhalent impediendo adeoque & calefaciendo & roborando fibras motrices eorumque tonum firmando restituendoque & easdem ad contractionem firmando, ut fortius impellant humores, & impelli dein fortius ab humoribus rursus sicque humorum cursum perennare, velocitatem eorum augere atque accelerare simulque inibi haerentia dimovere queat, ut multi veterum, qui adeo imbecilla corpora balneis calidis calefaciebant, ut ad frigida ea praepararent, asserunt ac multis literarum monumentis hodie Angli, inter quos eminent *Job. Floyerus & Fullerus* & Galli imprimis perhibent, consignant & multiplici laudis encomio deprædicant, certe naturalia sic medicata & etiam nostrum, ob ingredientia, quæ secum vehit, longe essent præferenda. Quippe contenta mineralia, nempe spiritus mineralis, sal & sulphur conjuncta ac energia quadam notabili prædita principia, potentius longe penetrant, discutunt, digerunt, partes martiales virtutem roborantem & contrahentem adjuvant, aliæ aliam operationem suam simul exerunt. Equidem mirandum hinc est, cur apud nos hodie balnea negligantur, cum olim semper prævaluerit eorum usus atque adeo Carmis, Massiliensis, Medicus, regnante Nerone, Imp. R. damnatis prorsus calidis, ægros merfit in flumina & lacus. Tuncque vidit *PLINIVS* vid. *Hist. Nat. Lib. XXIX. Cap. I. Senes Consulares in ostentationem usque frigida rigentes*. Conf. *DION. CASSIVS Lib. XIII. GALENVS Lib. III. c. VI. de tuend. sanit.*

§. XIX. Qui aquae nostræ foteriæ quoque potum, ad quem visus ipsius grata crystallina limpiditas invitat ac movet ultro salivam, appetunt atque pro certiori in longis ac magnis morbis effectum & successum expetunt, potus enim & balneum omnium aquarum salutarium, si invicem interponuntur, longe efficacius ambo operantur & in commune quasi bonum ægrotantium junctis viribus laborant, uno altero auxiliatri-

ces velut manus porrigente, & si præcipue integram curam sibi propositam habent, bene præparati æque ac ad balneum accedant, i. e. detracta vasorum plenitudine, ne difficulter per debita emunctoria, ob difficilem jamdum humorum, statu plethorico, circuitum secedant, multasque molestias patrent, atque liberatis, ab abundantia succorum minus laudabilium primis, per laxantia aut lenia vomitoria, viis, ne hæc copia capiendæ moli aquarum obstet, ad hæc impuritas vim earum & operationem frustraneam ac difficilem per corpus transitum reddat, per curæ tempus subinde inflationes hypochondriorum & tormina similiaque symptomata excitentur atque una cum iis in vasa & ad humorum massam usque abripiatur, atque sic intempestive multis casibus verendis materia subministretur, consulto jejuno aut vacuo ventriculo, quo celerius & efficacius operantur, ad ipsam scaturiginem se conferant, & hauriant modo ex ipso fonte aquam, spiritu illo minerali adhuc turgidam, quo dulcius & utilius semper bibitur omnis, cyathos aut vitra aliquot atque exiguis haustibus per intervalla ebibant & una alterave vice ad fontem redeatur reitereturque haustus. ut exiguam aquæ quantitatem viscerum calor facile superet & per vasa bene ea distribuatur. Si minus ad fontem accedere, aut ante haustus ambulare liceat, in lecto, a calore ejus laxiori corporis habitu reddito, sic poris magis apertis atque meabilibus, fontis aquam recens haustam, ac in vase bene tecto apportatam bibere, quoque e re erit. Nec dubito quin eadem sic efficacia his nostris aquis erit ac Borbonniensibus in Gallia & Bathoniensibus in Anglia, de quibus MAYERNIVS *Op. Med. p. m. 344.* & GVIDOTTVS *de thermis Britan. p. 251.* observaverunt, eas longe citius & facilius per alvum atque vesicam, a decumbentibus in lecto, quam deambulantibus reddi. Certam autem & hic bibendi quantitatem, quæ pro cujusvis constitutione aut habitudine, ventriculi & intestinorum vigore, pulsu cordis & arteriarum, copia & consistentia atque fluore humorum, amplitudine & libertate pororum & meatuum aut tolerantia, aut affectuum indole variat, determinare otiosum est. Si autem singulis diebus ter quaterve modo alvus purgatur & urina copiose satis redditur, spes enascitur, fore, ut per duas aut tres septimanas, continuato usu, peccantes humores intus indolentes sensim foras proscribantur ægrotansque levetur. Minori quantitate, duobus, tribus aut quatuor vitris incipiant & indies ad majorem quantitatem aut vitrorum numerum adscendant, atque primis diebus semel, in iis sequentibus bis, mane vesperique quatuor aut quinque ante prandium aut cœnam horis, haustus repetant. Qui
potum

potum in initio forte non ferre possunt, non jejuni penitus eum assu-
mant. Consultum idem est, qui potum balneo jungere volunt, pro
cura integra instituenda, ut duabus, tribus aut quatuor horis ante in-
gressum balnei bibant, & dein per semihoram aut integram aut
etiam diutius corpus exspatiando & ambulando aut equitatione &
curruvectione moveant; Etenim balneo potus junctus hic optime nul-
lo subsecuturi incommodi metu convenit: Qui vero non compendium
temporis spectare debet, consultius quoque esset, si integram per po-
tum prius curam absolveret, quo absoluto balneum demum frequen-
taret, haud aliter atque plures, thermas Carolinas per aliquot hebdo-
madas potasse, deinde vel balnea Carolina vel Teplicensia demum adi-
isse, observamus. Ex antecedentibus etiam colligere est, ob rationem
jam semel ibi indicatam haud quandoque absolum esse, si ante ipsum
ingressum balnei cyathus unus aut alter frigidaë aquæ fontis exhauriatur;
Hic jam seorsim adhuc indicandum est, hunc potum hocque tempore
adhibitum aptum & utilem esse, quoniam acres humores simul & faci-
lius temperantur faciliusque diuresis promovetur, alvus laxatur, quod
in cruditatibus & fœculentiis nidorosis acidis ac pituitosis, in primis
viis ac ipsa sanguinis massa hærentibus, temperandis educendisque, in
calculo renum atque vesicæ, in dysuria & ardore urinæ, vesicæ & sphin-
cteris eluendo mucum, temperando & tollendo, alvi obstructione,
item viscerum, in scorbuto, cujus salia microcosmica quotidie educan-
tur, necessarium est. In thermis Carolinis, acidularum Egranarum cy-
athum unum aut alterum, ante ipsum balnei ingressum haustum, opti-
me cum balneo convenisse, æstum præternaturalem, phlogoses, ex ca-
lore forte nimio thermarum obvenientes, temperasse & præcavisse, al-
vum semper lubricam servasse & urinæ redditionem auxisse, quod &
in thermis Hirschbergensibus, ab haustu fontanæ saltem frigidaë, ob-
servatum esse supra modo est indicatum. Nec absolum est, immo
in quibusdam casibus necessarium ac utile, prius aquam, lagena firmiter
clausa ac obturata, vel super fornacem posita, vel ea in aquam calidam
paululum immissa, tepesactam, ne multum spirituosæ substantiæ ipsi de-
cedat, bibere. Cum enim aqua frigida, ut scaturit, sufficiente quan-
titate, ore hausta, par sit, obstructas vias ac poros perrumpendo ac re-
ferando, potentia hæc ejus adhuc auctior reddetur, si modice calefit,
aut potius tantum tepescit, bene sic clauso obturatoque vase, quoad hoc,
quod mineralia, quæ secum vehunt, ingredientia quædam, fixiora
præsertim, in motum magis actumque vertantur, qui motus etiam con-

sequenter humoribus impertitur & fibris motricibus adactus majorem adhuc motum imprimere majoremque efficaciam conciliare potest, ut etiam calida magis alvum laxat & diaphoresin uberrimam excitat, quam frigida pota, quæ e contrario diuresin magis procurat. Frigidam enim aquam sexus foemineus imprimis, quoniam facile ob nativam ac respectivam ejus præ virili, teneritudinem, meatuum angustiam, ac debile magis systema nervosum, passioni hystericae & similibus spasmodicis malis obnoxius est, ut ex virili ea subiecta, quæ præsertim cruditates pituitosas in primis viis alunt tumenteque corporis habitu conspicua sunt & ventriculo debiliori & solutiori prædita, aut quoad teneritudinem, debilitatem & sensibilitatem ad sequiorem proxime accedunt, ut & infirmiora senioque confecta, non commode ferre possunt. Quam aquæ frigiditatem in causa esse suspicor, quod acidulæ, non circumspicte factis potæ, sæpe plus damni afferant, quam thermæ, ut frequens observatio docet. Pota ventriculum aqua, non gravat, neque nauseam aut vomitum facile excitat, mox facile transit, per renes vesicamque redditur, alvum lubricam efficit ac sine omni molestia sineque torminibus laxam, appetitum excitat & erigit, sicque his aliisque laudabilibus indicibus indolem suam egregiam prodit, spem ac fiduciam quoque ingerit, eam, hoc modo etiam adhibitam, pituitam crassam, tenacem, acerbum austerumque resolvere, attenuare, destruere, succos salino sulphureos, excrementitios, acres, acidos, nidorosos diluere, temperare, edulcorare & educere, non modo in ventriculo & intestinis illorumque flexuris, plicis & valvulis, sed & in ipsa massa humorum nidulantes, sitim restinguere, pulmonalia vasa ab infarctu viscido liberare ac sic in asthmate humido respirationem reddere liberiores. Nec in ipsa phthisi potus nostrarum aquarum est verendus, præsertim si ea hypochondriaca, quam vocant pathologi, sit, i. e. ex viscerum obstructione; In vera certius emolumentum deprehenditur, si aqua cum lacte asinino mixta hauriatur: Quapropter præcavendo MORTON, vid. *ejus Phthisiolog. Lib. II. C. II.* aquas soterias Islingtonienses multiplici experientia, tam in aliis quam in se ipso edoctus, potandas suadet, ut & apud nos Selteranæ aquæ hoc modo, in usum veniunt. De aquis, quæ in secessu illo Angliæ amoenissimo, Richmond dicto, emicant, utique ejusmodi ac nostræ propemodum sunt, idem auxilium vidi. Porro vel solus potus, plurimos eosdem morbos, qui supra occasione balnei jam nominati sunt, curat, præsertim autem atque speciatim colicam atque nephriticos arthriticosque dolores sedat, cardialgiam, nauseam, sodam abi-

abigit, pertinacem alvi obstructionem & ipsam iliacam passionem solvit, anorexiam & bradypepsiam corrigit, claustra obstructionum internarum, viscerum, lienis, hepatis, mesenterii potenter reserat, itemque tollit, vermes omnis generis, lumbricos, tænias &c. horrenda sæpe symptomata excitantes, enecat ac expellit, hæmorrhoidum difficile negotium facile reddit, malum hypochondriacum juvat, scorbutum, calidum æque ac frigidum quem vocant, depellit sicque totam massam sanguineam fluidam reddit, rheumatismos, morbos articulares, malum ischiadicum, persanat, calculosas in cavitatibus vasorum & ductuum concretiones impedit, & jamdum factas educit, ad quod ejusmodi aquæ ferratæ, falsæ, bituminosæ, omni tempore commendationem meruerunt, stranguriam & dysuriam curat, tumores, dolores & exulcerationes renum & vesicæ emendat. Extollant ideo alii aquas ferratas in Thuscia adeo, ut eas vesicarias appellent, nos merito & ideo etiam aquam Kukussensem extollimus, quia usus æque eum extollit. Sed primo loco hoc nomine indicandæ fuissent febres, tam intermittentes, quam continuæ, quoniam hæc fonti huic primum inventionem & quandam celebritatem dederunt: Nam a majoribus acceptum hodie fertur olim ab accolis, ad sitim sedandam, (ut in antecedentibus est memoratum) febres abigendas & æstum illarum levandum, tantum hanc aquam haustam fuisse. Hæc aliaque emolumenta, quæ alias a potu thermarum & acidularum expectantur, ulteriori experientia & periculum faciendo clarius certiusque stabilienda, affert. Inter observanda circa modum atque regimen potationis, hæc primaria & necessaria sunt, ut nunquam sub ipsis morborum paroxysmis, sive motuum morbificorum exacerbatione & dolorum, spasmodum & convulsionum aggressu ea adhibeatur: quoniam ob constricta emunctoria non solum operatio impeditur, sed & augentur anxietates & symptomata præsentia, immo nova alia subsequuntur. Convenienter potationi per VIII. X. vel XII. dies protractæ interponi fortius paulo quoddam laxans poterit eoque curæ finis imponi, ut digesti bene humores crassi & visceridi alicubique forte adhuc hærentes penitus educantur.

§. XX. Non absolum erit, ex nominatis, per balneum & potum curandis atque re ipsa curatis morbis aliquot saltem historias eorum easque notabiles mihi visas, in gratiam præsertim eorum, qui exemplis moveri ac doceri malunt, tradere, quas per brevem meam commorationem, tunc temporis observare mihi, ibi datum est. Prima sit sequens: Virgo XXII circiter annorum, per IV annos obstructione mensium & ex

ex hoc suborta tandem epilepsia, certis temporibus recurrente, laboravit, quæ aliis remediis pellentibus pertæsa, hunc fontem adiit & ante duos menses, in brachio venæ sectionem admisit, sed, ut referebat, sanguis adeo spissus atque pituitosus fuit, ut fœces cerevisiæ potius, quam sanguinem esse, quis putaret, postquam vero per IV fere septimanas, aquam nostram soteriam, tam inter prandendum coenandumque, quam extra hoc tempus potasset singulisque diebus balneo usa & domum reversa, ex pede iterum vena secta esset, floridus & optime constitutus sanguis libere effluxit. Alteram vidi in cive quodam Silesiaco, qui malo ischiadico per annum cum dimidio misere excrucietur, elapso anno, altero Bohemiæ fonte, quem Sti Joannis vocant, usus, ex quo vero nullum levamen, potius dolorum immanium incrementum reportavit, subsequente tandem anno fontem Kukussensem adiit, eumque tam interne, quam externe adhibuit, ex quo a malo hoc pertinacissimo atque molestissimo liberatus domum rediit. Tertia de alio viro quadragenario majore, hypochondriaco & scorbutico, doloribus artuum & præsertim iis, quos osteocopus nominant, vexato recensenda, qui ex usu fontis nostri interno externoque lenem alvi fluxum cum euphoria talemque acrimoniam excretorum, expertus est, adeo, ut rosiones intestini recti, molestissimæ ac summe dolorificæ, cum ardoris sensu atque harum partium externarum, excoriatione essent. Ex quo paulisper melius se habere, sentit, cuticula pinguis, fusca, cum fœtore balneo, innatavit. Quarta de summe calculoso notanda, qui per plures annos calculi doloribus vexatus est, a quibus, excretis a Vto die VIII sat grandibus calculis, usu balnei & inter balneandum saltem, potus tepidi, liberatus est. Quinta sequitur de fœmina XXXVI ann. anasarca contumaci laborante, per balneum modo intra III septimanas, ex asse curata. Sexta occurrit de viro juvene XXIII annorum febre tertiana pertinacissima infecto sæpiusque recidivam passo, qui ante insultum paroxysmi febrilis balneum iniit quaterque tantum balneationem repetiit, ex quo paroxysmus, exacto semi horæ spatio, in balneo cessavit, quintaque vice repetito balneo penitus siluit ac nunquam rediit. Septima loquitur de juvene XX annorum, sanguineo cholericò & plethorico, qui ex febre tertiana male curata pessime se habuit, ex potu & balneo per IV hebdomades pristinae sanitati restitutus est. Octava hanc seriem claudat, de virgine XXIII annorum, multis symptomatibus spasmodicoconvulsivis hysteriis in capite, pectore & abdomine, diu excruciatâ, quæ intra mensis spatium convaluit.

§. XXI. Isti quoque non tantum laudant fontis hujus aquam, qui ipsi thee, quæ herba hanc aquam cito saturateque tingit, coffee aliaque vegetabilia, herbas, flores, radices, ligna, cortices incoquunt, aut juscula ex illa parant cibosque conficiunt; tantum enim abest, ut ventriculo & intestinis molestias creet, quod tamen in aliquibus thermalibus aquis experitur, ut potius ii, qui decoctis ejusmodi utuntur, bene appetant, bene digerant beneque egerant. Idem judicium esto, quando quæritur, an etiam aqua Kukussensis inter pastum loco potus ordinarii potari possit? Attendendum, quod ii notabile exinde levamen sentiant, qui cardialgia & concoctione quam vocant depravata, debilitate & atonia ventriculi subinde conqueruntur, quod ab aliis de aliis aquis foteriis & thermis invenio affirmatum atque probatum. Hanc auctoritatem & experientiam confirmat & sistit GVIDO R T V S, qui in tractat. *de thermis Britannia* p. 268. aquam Bathoniensem inter prandendum atque coenandum potam, in dyspepsia & bradypepsia depravatoque ventriculi & intestinorum tono, efficacissimam expertus est. Eadem asseveratione curiosis respondendum ulterius, an quoque haustus aquæ cubitum ituris (der Schlaff-Trunk) ad sedandam sitim, suavem somnum procurandum, conveniat, siquidem somnus omnino placidus atque mane alvus laxata redditur. Si forte potantibus balneantibusque in fortioribus ut ajunt naturis, alvi laxatio & urinæ redditio expectata protinus non succedit, tertio quartoque die, pilulæ laxantes cubitum ituris deglutiendæ, & salia quædam dissolventia similiaque lenia diuretica ordinentur de die, per aliquot vices assumenda. Ii coeterum, qui in morbis gravissimis & pertinacibus, pro eorum indole medicamenta pharmaceutica, morbis & causis eorum dicata, ante balnei ingressum assumere vellent, non male agerent; etenim tam ratione, quam exemplis mihi exploratum est, in thermis Carolinis & Hirschbergensibus medicamenta aperientia, pellentia, obstructionibus mensium idonea, in tumoribus, obesitate nimia, diuretica, tartarea, acida, resolventia, in vitiis cutis, sanguinem purificantia, in paralyticis, appropriata, cum balneo simul adhibita, non contemnendam opem tulisse, quod & de aliis sentiendum est: Nam balnea etiam hanc singularem sibi vindicant efficaciam, quod usum atque virtutem medicamentorum valide agentium, in persanandis gravibus morbis, apprime promoveant augeantque. Facile insuper & me consentientem habent ii præsertim, qui simul potum aquæ nostræ foteriæ, balneo jungunt, si inter prandendum coenandumque vel ante hoc tempus stomachica quædam dicta & ad spiritua-

scientiam facientia v. g. sal volatile oleosum Sylvii, vel solitarium, vel cum spiritu nitri aut vitrioli dulci, mixtum similiaque assumerent. Hæc quæ de balneo & potu & circa exhibendi modum dicta sunt, si diligenter observentur & teneantur, nullum dubium est, quin hæc medicationum genera omnibus ferme hominibus conveniant, licet comparatione scrupuloser instituta, huic præ alio magis conducant.

§. XXII. Præter balneum & potum alia quoque datur ratio eaque non simplex sed varia, qua etiam hæc aqua in utilissimum ducitur usum. Ab accolis quibusdam accepi, quod felicissime ophthalmias & gravissimas oculorum inflammationes ac rubedines, calida sæpius oculis admotæ, auferat. Visum acuere frigidam oculis instillatam, in multis expertus sum, quare id concludere licet, eam frigidam adhibitam conservare oculorum aciem, calidam vero suffusiones & cataractam incipientem similiaque oculorum vitia, curare, ulteriorem accretionem impedire, quo lentorem quendam oculos, præsertim mane obturantem & in concretionem quasi purulentam abeuntem, elicito exinde cum euphoria expectata subsequente observare licet. Si os frequenter sive calida sive frigida eluitur, gingivarum vitia, tumores, erosiones, ulcerationes, vacillationes corrigit, tollit ac foetorem oris sanat atque emendat. In ore detenta aqua calida æque ac frigida, cruentas & corrosas gingivas, corrigit, dentes in sede sua confirmat carnemque recrefcere facit. Gargarismata exinde parata calida tumores tonsillarum & relaxationem uvulæ, colli fauciumque incipientes, maxime inflammationes aliasque intumescencias atque faucium affectus, discutunt, resolvunt ac deglutitionem commodam restitunt. Si calida auribus instilletur, earum dolores ac susurros mitigat, sistit, amissum auditum restituit. Nec dubium est, quod de thermis Hirschbergensibus, etiam spiritu minerali, alcalino, salino principio, bitumine, ferro & alumine præditis, expertum habeo, capitiluvia talia maniacis egregiam posse afferre opem.

§. XXIII. Stillicidium aquarum medicatarum sive embrocationem passim commendari leges ac audies, nec contemnendos effectus eosque, quos juxta potum quoque balneum, aut fomentationes, longe etiam continuato usu, non efficere possunt, sæpius videbis. Siquidem aqua sive frigida apud veteres usitatissima, sive calida pro ratione indicationum impluvio velut instillata, motu fortiori ac impetu, partes subjectas fortius & efficacius longe, simplici quantumcunque etiam continuato infessu aut fomentatione juxta usum quoque internum, penetrat, lentos,

lentos, impactos profundiusque hærentes humores potenter attingit, emollit, movet, dividit, solvit dissolvitque & fibras impeditas ac rudes ad motum edendum & contractionem instigat sicque tonum imbecillem atque amissum penitus restaurat, attenuatis modo aquarum thermalium particulis sulphureis & salinis toties repetitis ictibus intrusis sicque vim suam, concitatissimo motu mire exercentibus. Adeoque magnarum virium est ejusmodi, in partium corporis humani inveteratis & pertinacioribus malis, in deliriis, in paralyfi, in stagnationibus & obstructionibus profundioribus, imbecillitatibus, tumoribus majoribus, rheumatismis & arthriticis doloribus, indurationibus, scirrhis, distortionibus, gangliis, spina ventosa, strumis, nec non aliis morbis: sic JOH. ZECHIVS in *Consult. med. pag. 461.* pro ignavia partium genitalium curanda, stillicidium ejusmodi supra os sacrum efficacissimum præsidium censet. Hoc medicationis genus adornari potest, in ipsis balneariis & inter balneandum, vel in conclavi proximo, bene calefacto atque disposito, ubi ex alto aqua fervida ad tolerantiam ex vase aliquo ad hunc usum accommodato, vel colo, gutturnio, epistomio & simili guttatim paulatimque, aut pro rei exigentia confestim ad subjecta membra affecta & denudata priusque interdum fricata cum impetu fluat. Indies hoc stillicidium æque ac reliqua medicationum ejusmodi genera, augeatur, ut per aliquot primum dies, ad dimidiam horam, dein per integram, ac tandem per integram cum dimidia, immo per duas horas & ultra, modo semel in die mane aut vesperi, modo bis, circa idem tempus, prout pertinacia morbi indiget, ac ægri tolerantia fert, instilletur. Quo sperati inchoati effectus indicium erit, si æger, ad partis affectæ penetralia penetrasse, caliditatem aquæ sentiat. Majorum adhuc virium hoc stillicidium erit, si herbæ, flores, baccae, semina & similia vegetabilia, nervina, roborantia, aromatica, resolventia, penetrantia, &c. ut mentha, melissa, majorana, rosmarinus, calamintha montana, serpillum, malva, herba & radix levistici, baccae juniperi, semen erucæ, sinapi & similia aquæ incoquantur. Quibus aptis atque idoneis stillicidia discutientia anodyna, atque somnum conciliantia emollientia &c. parari possunt. Melius res succedit, si cura cum balneo prius est absoluta corpusque sic bene præparatum partesque affectæ cum materia peccante, inibi profundius adhuc hærente, bene sint dispositæ. Si stillandum in caput erit, illud prius novacula radatur & capillis denudetur ac instillatio in verticem, præsertim ad futuras fieri assolet, ut vero fortius tutiusque agat hoc remedii genus, præparatio cum majori quoque

cura antecedit eaque exactius teneantur, quæ de balneo dicta sunt, scilicet corpus bene hic quoque prius expurgatum sit, & demta plethora. Biliosi, præsertim sic dicti, calidi temperamenti & sicci, vertiginosi, catarrho suffocativo obnoxii, habent quod vereantur, ne improvido abusu majus damnum sibi contrahant. Inter prohibentia hoc stillicidium quoque sunt ulcera & quælibet soluta unitas immo & nonnunquam mala compositio partis. Commune hoc stillicidio accidit, quod ut plurimum ii, qui illi sibi subjiciunt, somnolentia graventur, quæ vero operationi impedimento esse potest, quare in Hetruria, in illis locis, in quibus ejusmodi stillicidium adhibetur, conductæ mulieres, canendo, stillicidio utentes, solent excitare. Absoluto hoc negotio, pars, præsertim affecta stillicidiumque passa, calidis pannis bene obtegatur calidaque semper fervetur. Neque noxa facile ex aqua nostra Kukussensi, in stillicidio adhibita, verenda, ut quidem quidam alibi ex aqua thermali ferventi, sulphurea præsertim bituminosa & aluminosa solent, de quo conf. JOH. FANTONVS de *therm. Valder. Diff. I. p. 42.* J. GÜNTHER. ANDERNACVS in *Dial. de baln. & aqua medic.* SOMMERVS *l. c.* GUIDOTTVS *l. c.* Pro iis, qui stillicidium renuunt atque verentur, lotiones substitui possunt. Levioribus malis fomentatio sufficit, qua, pars affecta, aqua calida fovetur, commode vero vel spongia vel linteamina duplicata, aut panni illa imbuuntur sicque applicantur, superintectis pannis ficcis calefactis, ne humiditas refrigescat & pejus damnum afferat. Extra balnei tempus morbis pedum particularibus fere quibusvis pediluvia tepida cum fructu simul parari possunt, sed ejusmodi, quæ totas tibias ad genua usque pertingunt. Qui & hæc extra balneum, aliis partium superiorum morbis, balneo jungere vellet, majorem exinde fructum reportabit. Non a scopo aberraret, qui in colica, dolore calculi, alvi obstructione ipsaque iliaca passione, in hydrope & similibus viscerum morbis, ut & pro ulceribus iisque simul intestini recti, sanandis, per syphonem hanc aquam calefactam, clysteris loco injicere curaret. Quæ injectio pedibus a potu forte tumefactis, etiam remedio erit. Sub fortis specie, spongia imbuta calida & huic vel illi parti applicata adhiberi etiam poterit, quod remedii genus Aetio familiare fuit, quo oculis præsertim applicato, non modo visum instauravit, fluxionesque fugavit sed & tabem, illorum ganglia & atheromata sustulit. Hæc enim particularia omnia beneficia partibus illis, quibus applicantur, ac balnea universalis universo corpori, impertiri possunt. Hi recensiti modi adhibendi, pro rei exigentia, aut seorsim, modo hic, modo illic, aut conjunctim

etiam omnes simul haud incommode in usum duci possunt, ut duplicata quasi virtute morbum depellant atque ejiciant.

§. XXIV. Difficile rursus est certum tempus certumque dierum numerum, sumendæ aut adhibendæ, balneo, potu aliaque ratione, aquæ circumscribere, ut cura penitus absolvatur, cum alii morbi altiores egerint radices & inveterati ac pertinaciores sint, alii recentiores, leviores curatuque faciliores, cum juxta ipsum Hippocratis effatum longo curentur tempore, quæ longo tempore contracta sunt vitia, quæ vero brevi, brevi. Taceamus haud raro hunc vel illum unum eundemque morbum, in diversis ægris, pro illorum constitutione, tempus curæ infundendum, variare, quare potius putandum est, tamdiu hac cura persistendum, donec curatos penitus aut saltem levatos se sentiant ægrotantes. Ut plurimum II. III. IV. V. VI. septimanæ sufficiunt. Immo nec tunc spes modo abjicienda est omnis, siquidem omnes propemodum aquarum mineralium curæ id commune habent, quod elapso aliquo tempore elapsisque aliquot mensibus, domum redeuntibus demum expectatum perfectumque impertiantur effectum, quod de alteris Bohemiæ fontibus, præsertim Carolinis thermis, vulgo perhibetur. *Baccius de thermis* thermas aliquas recenset, quæ non nisi post decursum anni prosint, immo hoc de balneis habetur in genere, quod in magnis gravioribusque affectibus, fructus longe firmiores, certiores constantioresque sint, qui ex iis reportantur, si non subito, sed interjecto aliquo temporis spatio, consequuntur. Nec a veritate alienum est, quod dicitur, hanc aquis mineralibus institutam curam, semel adhibitam, quidem placere, sed bis, ter quaterve repetitam ex asse juvare. Quibus igitur & in sequentibus annis sæpius hunc amœnum locum huncque saluberrimum fontem repetere volupe sit, illis continuatus usus, causas poenitendi nunquam relinquet.

§. XXV. Omnia hæc medicationum genera, quovis anni tempore, etiam hyemali locum possunt invenire, modo horum temporum habeatur ratio ac adtemperatio frigoris aut caloris, rite attendatur. Vana enim tantum persuasio est, minerales aquas hyeme per se esse non tantum viribus exutas, verum etiam nocivas, nam satis jam notum est atque perspectum, illas, cujuscunque etiam sint naturæ, sive calidæ sive frigidæ, viribus æque constare, ipso id comprobante effectum. Immo sentit MORELLVS *de Bal. Patav.* ejusmodi aquas minerales hyeme longe esse efficaciores, cum frigus ambiens, poros terræ claudens, non sinat spiritus minerales exhalare. Confirmat hoc ipsum TABERNAEMON-

TANVS *im Wasser-Schatz* p. 196. *seq.* Novi multos, qui exoptato successu hyeme, thermis Carolinis, Hirschbergenfibus, acidulis Swalbacensibus, Egranis, aquis Lauchstadiensibus usi sunt; quare nulli dubitamus, quin de his aquis idem affirmandum sit. Nec est cur metuamus, æstu existente æstivo, aut ardente Sirio, ut omnia alia remediorum genera, quæ tunc adeo veretur, Hippocrates noster, ita & hoc, noxium, si modo convenienter, cum debito regimine, tempore, moderatione ac balneo debita, calori aëris accommodata utantur, ne sanguinem, ab æstatis calore ad pauperiem redactum & spiritus animales diminutos non magis exsolvat, destruat atque absumat. Si vero quicquam veri, quod tempestatum nempe variationes concernit, subest, causa noxæ aut auxilii potius a pluvioso aut sereno aëre vel æstuoso nimis & frigidiori, constantiori aut vario & mutato sæpius, quam anni mensibus, petenda est. Quippe, ut in superioribus per varia exempla jam indicatum est, de pluribus ejusmodi exploratum habemus.

§. XXVI. In præsens quæstio oritur, an etiam hæc aqua aliorum transportata, potu æque ac balneo adhibita aliisque recensitis modis, vim suam medicatam retineat! Ad hoc scire licet, nullum dubium subesse, eam, si sub cœlo, præsertim sereno, frigido, ac tempore matutino in vasis infundatur & iis bene obturatis & plenis, frigidior potius quam calidiori aëre, de nocte magis, quam de die, radios nimirum solares evitando, transportetur, utique tam ad potum, quam balneum reliquosque modos, idoneam esse, pro iis, quibus non licet hanc ipsam amœnissimam adire Corinthum, quamvis non negandum sit, multum de partibus volatilioribus perdi, quasdam partes minerales ad fundum vasis præcipitari & lateribus ejus apponi; Habetur etiam, tunc, aquam fortio rem propemodum saporem, acquirere, quod de acidulis, quæ in dissitas regiones transyehi solent, compertum est atque manifestum, adeoque & ea in comparatione, quæ in ipso loco in usum ducitur, præferenda. Reliqua tamen ingredientia fixiora tota remanent & ad usum adhuc idonea, etiamsi præcipitata atque ex parte alterata sint, si enim postea calefit aqua, vis medicata non minus excitatur, ac si in loco ipso, ubi suos natales sumsit, decoquatur. Immo si aqua hæc in vitrea lagena reponitur diuque asservatur, non modo non multum turbatur, sed limpidior potius manet. Quod experimentum Illustrissimus atque Excellentissimus Dominus Comes per triginta & aliquot jam annos instituit, & singulis annis certam quandam quantitatem, in vitrea lagena reponendam jussit. Hoc tamen comperi, in lagena non cooperta, in liberiori aëre

aëre, per aliquot dies asservatam aquam turbidam apparuisse, nec mirum, quoniam liberior accedens aër atmosphæricus, ut liquidorum omnium, ita etiam & præsertim aquarum medicatarum mixturam motu suo immutat & spirituosum, quod iis inest, abripit & aufert. Cum aliis quoque mineralibus aquis, quæ hodie peregre evehuntur, factum est, ut id nunc non metuamus, quod antea adeo metuebant, immo eorum laudamus felices effectus. Sic notissimum est, thermalem Carolinam aquam superioribus annis, in Saxoniam superiorem & inferiorem, Misiæ, Marchiam Brandenburgicam, transportatam, potu balneoque per multiplicem usum esse probatam. De aqua Lauchstädiensi & Hirschbergensi thermalis idem novi: Immo ipsam aquam Kukussensem non modo in Silesiam, sed etiam Saxoniam, Lipsiam usque transportandam curavi, per plures menses servavi, ac pro hebetudine oculorum corrigenda, optimo cum successu adhibui. Ulterius a curiosis quæritur, an etiam pars aquæ, maxime energetica, quam spiritum illum mineralem nominamus, separari & in magnam medicinam concentrari possit? Respondeo affirmando, licet magnarum difficultatum plenus labor sit, atamen non plane impossibilem & infructuosum eum futurum suspicor, si recens hausta spirituosa aqua in obturatis bene vitris lenique igne debitoque adhibito modo destilletur. Quod ut eo potius credam, me movet observatio DV CLOOS in libro *de aquis gallicis* p. 93. qui, cum destillasset aquam de St. Mion, Alvernæ, deprehendit, id, quod prima destillatione exigua in quantitate prodiit, aquam tornasolis cœruleam rubedine infecisse, quod nec ante destillationem, nec post eam continuatam factum est, cœruleum autem hujus colorem acidulus spiritus, cujus indolis spiritus hic mineralis catholicus est, rubedine tingit. Irritum autem negotium suscipies, si universam aquam cum omnibus suis ingredientibus concentrare & in essentiam aut Q. E. arte chymica redigere velles.

§. XXVII. Non tamen putes hunc fontem nostrum foterium, ut alia quævis auxilia, in universum omnibus morbis omnique adhibendi modo simpliciter & absque adhibitis debitis cautelis quadrare. Subesse enim & hic, ut & alibi propemodum semper aliquis potest error. Nam inutilis inanisque ejus usus erit, sive balneo sive potu adhibeatur, in inveteratis nimis ac pertinacissimis malis & ubi tota natura, ut asserunt, corrupta prorsus est, atque humores summe impuri ac depravati existunt, & tonus partium solidarum ac robur penitus debilitatum atque dejectum. Et quis potest alibi, hisce malis expugnandis, pares medicinas

dicinas invenire? Nam secundum illam tritam regulam, omnia in universum remedia non tantum secundum activitatem suam agunt sed & receptivitatem. Et si innocens alias est & naturæ humanæ optime conveniens ac ejusmodi indolis, de quibus dicitur, quod si non profuerint, saltem non noceant, inanis tamen non modo, sed & nocivus erit ejus usus, maxime potus, in plurimis capitis & cerebri affectibus iisque inveteratis nimium & qui ex cerebri nimia humiditate & tono relaxato, spirituum defectu, utpote in quibus difficilius per cerebri vascula circulatio sanguinis succedit, oriuntur, quosque affectus idiopathicos vocant, quapropter ab eo abstineant, qui apoplexiam & affectus soporosos timeant, iique, quibus sensuum internorum, maxime memoriæ vigor, perit: Sic & inconvenienter & potus & balneum a pleuriticis instituentur. Exulet porro, me quidem iudice, ubi consummata phthisis ex erosione pulmonum, hæmoptysis, asthma convulsivum, mictus cruentus infestant, ubi viscera jam sunt corrupta, putrida aut maxime impacta, indurata atque scirrhusa, ubi humores vitales putredinis labe jamdum infecti, ab aqua enim accedente magis commoti, tandem eodem vitio imbuuntur & aqua, corruptam partem rumpit. Et licet aquæ nostræ vim emolliendi, attenuandi, dissolvendi, aperiendique merito assignaverim atque ideo in obstructionibus, a non nimis incrassatis concretisque humoribus oriundis, superius laudaverim, tanta tamen vi non instructæ sunt, ut scirrhusas confirmatas concretiones & indurationes aut tartareas solidiores coagulationes, emollire, dissolvere & hujus indolis obstructiones resolvere & perrumpere possint; Ibi enim aquæ potæ in vasis subsistunt, redundant, stagnationes & hydropes relinquunt. Ubi & jam inveniunt humorum quasdam extravasationes & effusiones potæ aquæ, in cavitatibus quibusvis capitis, thoracis, abdominis, ipsas augent: Perinde in inveteratis hydropis speciebus, præsertim ascite, pectoris hydrope, hydrocephalo, ut & hectica & tabe vera, ex corruptis visceribus, inflammationibus, præsertim internis provectioribus atque in summo augmento & statu constitutis, ubi ventriculus & intestina, mesenterium, renes abscessibus & ab empyematibus obsessi sunt, & cavitates atque vasa, polypis crassis repleta, vix tutus est usus internus, in copia & pro cura integra institutus. Æque in angina & peripneumonia, in principio, maxime incremento statuque eum vix admitterem. Sic & majori lateribus vesicæ adnato aut nimis impacto calculo renum, pariter atque vesicæ, ut & gonorrhœæ virulentæ haud proficius est. Externus usus speciatim minus conducit podagræ valde nodosæ & cancro, præfer-

præsertim quem noli me tangere vocant. Pariter nondum satis constat, an etiam lue venerea talibusque ulceribus affectis medeatur, observationibus cum aliis aquis mineralibus factis, factum est, ut suspectæ & inconvenientes hic omnino redditæ sint. Etenim in hac lue sanguinis serum miasmate corruptivo infectum, coagulatur maxime spissumque redditur, adeo, ut his & similibus remediis licet sat efficacibus ac tutis vix evinci queat, quam pessimam conditionem omnia phænomena & symptomata, quibus hoc morborum genus sunt stipata, monstrant atque AMBR. PARAEVS *Chir. Lib. XVIII. Cap. III.* validis rationibus comprobant. Et N. MASSA *Epist. XXX. T. I.* in lue venerea laborantium & demortuorum cadaveribus dissectis se invenisse materiam albam pituitosam in venis, sanguinem longe superantem refert.

§. XXVIII. De convenienti diætâ, quæ morbi & curæ eventum haud parum variat, quam servare debent hoc fonte utentes, merito solliciti sint omnes, cum sine hac frustraneus, si non periculosus hujus sit usus. Certe nulla magis secunda est ad universa pericula cautio, quam ubi thermarum atque balneorum certo ac ordinato victus regimine administratur. Equidem hujus unam omnibus regulam præscribere, admodum difficile est, cum varii casus etiam varias subinde exceptiones postulent. De ea in genere saltem tenendum, ut omnia ad mediocritatem ac temperantiam sint ordinata atque servata: Igitur omni studio vitetur nimius solis ignisque in camino æstus ac frigus matutinum vespertinumque, & regimen hoc semper sit temperatum, potius ad calidum & siccum, quam frigidum & humidum inclinet, quo & cubiculi, lecti & vestimentorum ratio habenda: Venti importuni & insalubres austrini, humidi calidi & humidi frigidi, aër crassus, nocturnus, pluviosus, nebulosus, foetoribus refertus, arceantur. Victus in humidum & laxum pro balneantibus, potantibus vero in siccum aut spissum magis sit compositus & ad mediocrem satietatem usque assumatur, tamen ne gravet, sed agiles servet homines. Esculentis vescantur facilis digestionis, gustui & naturæ acceptis ac gratis (quod enim bene sapit, bene nutrit) & quæ parva quantitate ingesta satis sunt, ut fami & siti satisfaciant, quæ diutius paulo in corpore retinentur & moderate per alvum secedunt, iisque & bene præparatis coctisque, aut, quod melius, assatis, bene sale & aromatibus, sive exoticis sive domesticis, macere, nuce moschata, cinnamomo, croco, calamo aromatico, radice helenii, &c. conditis, præsertim potantes, nec non carnibus animalium juniorum, anatum, columbarum, pullorum gallinaceorum, gallinarum, caponum, alaudarum avium.

que aliarum, vitulorum, agnorum, leporum, cuniculorum, hoedorum, damarum, caprearum & similium. Ex piscibus ii, quos saxatiles vocant & his oris non rari præferuntur, ut truttæ, funduli, percæ & alii ut lucii, cancri minores, &c. porro ova forbilia, pultes & juscula avenacea ac hordeacea ex oryza, poma tosta ac bene cocta, nec non decocta cum herbis, floribus, radicibus, feminibus & ejusmodi vegetabilibus, quæ alimenta medicamentosa simul constituunt, qualia medicamentis eo sunt præstantiora, quod naturæ magis amica sint, e. g. acetosa, acetosella, endivia, cochlearia, nasturtio, borragine, seleri, foliis salviæ, majoranæ, flor. cardui benedicti, rad. cichorei, pastinacæ, petroselini, capparibus, limoniis, asparago, sem. anisi, fœniculi, baccis juniperi aliisque similibus vegetabilibus aperientibus, diureticis, alterata, conveniunt. Nec dulcia tenuia respuenda, utpote quæ urinam & alvum movent atque humectant. Potulenta sint cerevisia, bene cocta beneque defæcata, non acore corrupta, laudatur ea, quibi ordinario venditur & vinum Hungaricum, ut & Bohemicum bonæ notæ, pellucidum & purum, quod conducibile satis est, quoniam diureticum, facile pertransit & alvum apertam servat, immo laxationem ejus procurat, præcipue nobilissimum illud dulce & generosum quod circa Leutomiriam & Austiam crescit & Poskalsky vocatur atque Millicense rubellum aut etiam aliud, corticibus citri & aurantiarum, absinthio, helenio, cochlearia &c. medicatum, subamarum, inter prandium cœnamque assumtum. Extra hoc tempus infusa atque decocta consueta, thee, coffee, & ex gelidi potus generibus, limonada quandoque addi possunt. Omnia hæc ad mediocritatem ac temperantiam sint ordinata, ne in crapulam ebrietatemque abeant, quæ certe in ejusmodi locis communia vitia sunt. Nec avide cibi devorentur, sed spatium consumptioni concedatur. Abstinentium vero ab alimentis viscidis, crassis, duris, nimis acidis, austeris, constringentibus, pinguibus, butyro frixis, nauseosis facileque corruptibilibus, fermentescibilibus & flatulentis, præsertim quando aquæ potantur. Tabaci fumus in adfuetis moderate, sive mane, sive vesperti admittendus. Excernenda & retinenda per alvum, vesicam, uterum, cutem, debito modo suo semper respondeant: Exulet venus ex hoc nympharum domicilio: Somnus sit moderatus, vigiliæ nocturnæ absint moderateque corpus moveatur, præsertim ante prandium & cœnam; Maxime vero potantes aquam soteriam, post potum deambulationibus, curru equoque vectione, decentibus & modicis saltationibus, mane ac vesperti frictionibus exerceant. Animum nunquam angat anxietas, non affligat cura,

non

non moleſtet ſollicitudo, metus non exterreſcat, non tremor concutiat, mala concupiſcentia non abducatur, non conturbet triſtitia, mœror vitales vires non abſumat, non contriſtet turbatio, ira & impatientia non commoveat, potius ille ſpe, fiducia, amore, hilaritate, gaudiis, grato amicorum conventu & confortio, honeſtis jucundisque colloquiis, ſuavi concentu muſico paſcatur & recreetur atque licitis illis ac honeſtis voluptatibus fruatur omnibus, quæ ibi undiquaque ac quotidie offeruntur, & quæ ultro accedentes vel invitos invitant, oculos cupiditate morantur ac deſiderio trahunt. Neque minus harum rerum bonum moderamen, poſt uſum thermarum per aliquod temporis ſpatium & in ipſo itinere, quantum fieri poteſt, ſervandum; Atque ante omnia ſalutem animæ ſuæ & corporis ardentibus & humillimis precibus Deo ſummo & benigniſſimo rerum arbitro, hoc eximio divino dono utentes, commendent ea-que feliciter obtenta Ipſi fauſtum ſucceſſum pie adſcribendo devotas gratias exhibeant & de reliquo divinæ ſuæ voluntati ſe totos commit- tant. Ad extremum hæ nymphæ cuius ſemper proſint iterum iterum-que ex animo opto.

VI.

DISSERTATIO
PHYSICO-MEDICA
DE

SIC DICTO MOLARI AD THERMAS
CAROLINAS FONTE.

PROOEMIUM.

SAL & ſulphur omnium activæ medicamentorum partes ſunt, motibus, qui vitæ negotium abſolvunt, tuendis inſtaurandisque perquam idoneæ, quæ inſigniter alterant pariter & evacuant leniter atque concinne, & quæ ea propter pro curandis chronicis & pertinacibus morbis efficaciffima exiſtunt. Etenim ſal omnium principiorum maximum

& basis omniumque mutationum causa, in aqua facile solubile atque vi fermentandi præditum, idque alcalicum æque ac acidum nec non neutrum, rigidis atque penetrantibus spiculis, quibus instructum est, tam crassas, viscidas, quam glutinosas omnium potentissime dividit, resolvit, attenuat atque abstergit, fibras nervosas omnium solidarum partium, atque motrices vellicat easque adigit, ut se contrahant, ac velut ad motum edendum armentur, quo pacto efficitur, ut non solum illæ inertes & ad motum difficiles partes excernantur, sed & itus & reditus laudabilium humorum fartus tectusque servetur. Hoc rerum condimentum est, per quod naturæ digestio optime perficitur. Sulphur autem, quod a sale quidem exaltatur, ut sal quoque a sulphure atque ejusdem amicabilis socius, ex tenuibus, pinguibus, oleosis, phlegmaticis atque salinis particulis inter se bene commixtis ac temperatis conflatum emolliendo, maturando, relaxando, demulcendo, temperando, acidum obliniendo, fopiendo, penetrando, calefaciendo, siccando, discutiendo, a centro ad peripheriam tendendo, aperiendo, digerendo, putrefactionem avertendo, venenisque resistendo &c. vires suas commodissime exserit, atque eapropter anodyna & antispasmodica vi, in curandis morbis adeo proficua & necessaria pollet. Quæ agilia & præstantissima principia eo facilius & certius suas operationes perficiunt, si amico & intimo connubio inter se unita sunt atque conjuncta, ubi alkalinae præsertim naturæ sal, sulphur magis attenuat, resolvit atque exaltat. Talia præsertim principia hypostatica laudatissima & efficacissima minerales, salutares fontes ex benignissima Sapientissimi Dei ter Optimi Maximi concessione possident. Equidem paucissimi calidorum foteriorum fontium sunt, qui sulphur notabile & manifestum vehunt, si forte notissimos Aquisgranenses & Hirschbergenses &c. excipias; verum tam calidi quam frigidi quam plures hinc inde inveniuntur, qui salia eaque alcalia pura ac neutra magna sat copia continent. Scimus nimirum Selteranas, Emsenses, Bollenenses, Aquisgranenses, Buchenses, Wildenburgerenses, Spadanenses, Deinaenses, & in Gallia Borbonenses aquas medicatas, merum alcalicum sal in sinu suo fovere. Egranas & Sedlicenses medium cum Seydschützensibus in Bohemia, Elsteranas in Voigtlandia, Wiesbaadenses, Ratzeburgerenses, & quondam Hornhusanas, Ebshamenses in Anglia utrumque simul alcalicum nimirum sal & neutrum, Carolinos thermales fontes utrosque, & fervidissimum illum maxime & tepidum molarem vulgo dictum magis junctum habere. Et hic ipse est, quem descriptioni, commentationi & laudationi publico quidem nomine per hæc literarum

monu-

monumenta levidentia, licet, bono cum Deo jam destinavimus. Faxit ille Summus Archiater, ut qualiscunque hic labor cedat in Maximi sui Nominis gloriam atque proximi commodum.

§. I. **I**N Bohemia aquarum præsertim omnis generis mineralium proventus feracissima regione, ad ipsas thermas ubique famigeratissimas atque omni commemoratione dignas & per aliquot seculorum decursum frequentatas, omnium propemodum calidissimas Carolinas, dictas a Carolo IV. Romanorum Imperatore, detectas, propter amnem per medium oppidum volventem illudque rigantem non noviter quidem exorta modo sed non ita pridem frequentata scaturigo, quoque invenitur temperato ac perjucundo calore prædita. Fons vulgo molaris, der Mühlbrunn, vocatur, quoniam infra forum juxta molendinum istius loci, ex interioribus terræ visceribus & quidem ex rupibus editis & radici montis insidentibus levi raraque atque perenni semperque æquali ebullitione promanat, unde in alveo ablongo & quadrato ligneis tabulis circumdato hæ salutares lymphæ colliguntur, redundantes vero subtus in profluentem exonerantur. Ad latus atque juxta scaturiginem balneola & apodyteria pro balneantibus adstructa sunt. Tegunt fontem ex assëribus superinstructæ binæ camerae, fornace instructæ, ad commoditatem his aquis foteriis utentium adaptatæ.

§. II. Tamdiu neglectui atque derelictui & tantum non despectui habitus hic fons foterius est, jacuitque omnino ignota nocte per omne ævum pretium ejus, atque prædicatore omni curioso ac intelligente caruit, usque dum Celeberrimus Fridericus Hoffmannus, Archiater & Professor Regius in Academia Hallensi Excellentissimus, Vir in erendis atque tradendis rebus physicis pariter & medicis sicut diligentissimus, ita acerrimus, ante sex circiter lustra curatius examini subjecit, multoque usu atque variis observationibus collectis curisque institutis, utilitatem ejusdem monstravit ac confirmavit aliisque commendavit. Ex quo multi quoque Experientissimi Medici tam exquisite, quam candide ad rationis atque experientiæ lydiū lapidem, illum revocaverunt, & utilissimum ac præstantissimum eum, tam interno, quam externo usu invenerunt, unde sensim crevit illius celebritas, adeo, ut per faustam multiplicem experientiam factam, jam gloriose undique prædicetur, & non amplius difficilis sit plurimorum applausus. Subiit ante multos jam annos, inde mihi etiam animum curiositas amorque veri, ac inferendi meis ægrotis cupido, ulterius circa illum explorandi, id quod

res & occasio obtulerunt, atque singulis vicibus, quibus hunc locum adire mihi contigit, contemplando & observando curandoque compertum & exploratum mihi magis magisque eum reddidi, atque quale quale etiam hoc meum scrutinium sit, satis jam habeo, esse hic hujus foterii & laudatissimi fontis aliqualem descriptionem atque laudationem secundum diligentiam atque censuram, quam pro modulo meo adhibere potuit, in tradendis & expendendis omnibus, res rebus comparando necessariis. Spectemus ergo, quid de illo, de ejus indole, contentis, viribus usibusque conscribere institutum est.

§. III. Contemplantibus atque curam animumque advertentibus constat, hanc aquam foteriam primum tepidam modo lenique scaturigine provenire, cum alter primarius fons ferventissimam omnium aquam magna vi eructet, quoniam ab illo remoto spatio promanat, aut aliis frigidis lymphis miscetur. Ad latera ac fundum alvei, in quem colligitur aqua, ut & ad canales, per quos iterum defluit, ochram ex luteo & candido subrubram, paucam illam quidem ac levem tenuemque deponit, nullum autem cremorem ac quidem primarius alter ac ferventissimus fons frige facta in superficie super natantem concedit. Hausta aqua & in vitrum transfusa limpida, clara atque pellucida cum multis agminatim exorientibus ex fundo vitri iisque candentibus bullulis ad instar perlarum inter se conquassatarum & internatantium apparet; Minus vero tales bullulae sub frigido Jove ac tempestate nubila conspiciuntur. Naribus excepta titillatione quadam eas ferit. Cylindri lignei ope si ponderatur, ex ipso fonte statim deprompta, levior, simplici, fluviatili ex præterfluente fluvio, Tepla, oculis deprehenditur & de optima indole spes modo concipitur. Quæ phænomena de principio æthereo, spirituofo atque elastico ac generoso in poris aquæ nidulante & calore & motu intestino rarefcente & expandente fursumque petente & hoc motu suo omnes humidas, phlegmaticas, graves, salinas, quibus commixtum est, evehente, ad integritatem corporis humani conservandam admodum utili momento testantur, quod eo luculentius ac citius apparet, quo aër atmosphæricus & crassior talem aquam premit, sicque hanc elasticam partem cogit, & ejusdem expansivam vim depriimit. Hinc & obtingit, quandoque ut a calore externo lagenæ, in quibus ejusmodi aqua spirituofo asservatur, magna vi rumpantur, quod sæpius in acidulis Egranis, quæ præsertim tali spirituofo elemento totæ foetæ sunt, adeo, ut & ex fonte modo haustæ plurimis temulentiam quandam inducant, factum esse vel in vulgus quoque notum est.

Hinc

Hinc & eadem aquæ, si non bene lagenæ eadem refertæ sunt, peregre & longinque vel calente sole transvehuntur, viribus suis exuuntur. Ore hausta & in eo paululum detenta non nauseosum, sed satis gratum, subacrem subsalsumque acidulum martialem acidularum calidarum æmulum, saporem exinde linguæ imprimit, hinc & hæc majori in quantitate una vice quam quidem altera hauriri potest. Si miscetur aqua cum gallarum pulvere ex atro puniceum & purpureum colorem induit magisque saturatum atque obscurum quam quidem ea ex altero fonte fervidissimo nimirum atque primario desumpta. Si sirupus violarum ei additur, subviridescente tingitur colore, quæ mixtura si per aliquot dies in vitro aperto liberiori aëri exponitur, subinde viridis ille color magis saturatus redditur, indicio, totam atmosphæram ibi alcalicis effluviis a calore attenuatis atque atomis esse imprægnatam. Si oleum tartari per deliquium instillatur, neque turbatur neque obscuratur, neque adeo notabili lacteo colore inficitur, nec alia aliqua alteratio observatur, haud obscuro indicio, quod nullas præsertim aut paucissimas, quæ in hoc quidem examine observari possunt, calcareæ terræ particulas in se contineat. Si lacti infunditur, & seponitur lac, minime coagulatur, sed potius fluidior redditur. A spiritibus acidis quibusdam ut aqua fortis, sulphuris, instillatis, nulla notabilis alteratio occurrit, nisi quod nitri spiritus additus solique per aliquot horas exposita aqua, in vitro quædam bullulæ exsurgant, & levem quendam fumum nares titillantem, emittant. A vitrioli vero spiritu addito effervescentia quædam exsurgit. A solutione vitrioli martis aliqua præcipitatio aliquique flocculi lutei se manifestant. A solutione aluminis lactescentem magis induit colorem. Si libræ quatuor evaporantur, lenique calore digeruntur, drachmæ duæ cum scrupulo dimidio (ut ego calculum quidem duxi,) residui in fundo vitrei vasis manent, quod residuum ex evaporatione debito procedendi modo adhibito, drachmæ duæ puri falis & candicantis dimidium tantum scrupulum terrei pulveris concedit. Duplex fal exinde elicitur alcalicum & neutrum, atque ex parte amaricans, quod fali ex acidulis Egranis educto proxime accedit. Quando enim hujus falis libra integra in duabus quidem simplicis aquæ libris in lagena vitrea amplioris orificii solvitur & calidæ fornaci imponitur, pars quædam neutri falis atque propemodum amaricantis fundo & lateribus vitrei vasis, quoniam gravior illud est, conspicitur, alcalicum vero fal ob levitatem aquæ intimius commixtumprehenditur.

§. IV. Vel ex hisce paucis indicatis differentiam modo atque simul prærogativam, si ingredientia pariter ac indolem atque effectus spectes præ altero Carolino fonte, qui & fervore quidem multum fumum exspirante, & impetu, murmure & copia aquæ antefertur, colligimus. Cujus aqua gravior quoque est durior ac quasi saponacea, adeoque saponi ingrata atque nauseosa magnam quantitatem terræ calcareæ aut lapidosi spissamenti minorem quidem salis illiusque purioris continet, nam ex eadem quantitate aquæ unicam saltem drachmam, & scrupulos ferme duos ochræ martialis particulas possidentis atque calcareæ terræ obtinuerunt curiosi scrutatores. Hinc & sine dubio minori quantitate intus assumpta hæc nostra aqua alvum movet, citiusque & expeditius per omnia vascula exilia, omnesque poros ac emunctoria corporis humani transit. Si quidem de hac sedecim v. g. vascula ad movendam & purgandam pluribus quidem dejectionibus alvum sufficiunt, de illa vero vix triginta illud efficiunt, & ægrius transit atque secedit pota. Hinc magis temperat excrementitias partes salino sulphureas easque commodius per alvum & urinam educit, sudores vero non adeo copiosiores efficit, quo materias hæc peccantes in primis viis adhuc stabulantes non adeo fortiter commovet, neque ad massam humorum atque adeo ad cutem usque urget atque traducit, phlogosesque simul molestas excitat cum pruritu imo inflammatione cutis, purpura aliisque multifariis efflorescentiis atque affectibus cutaneis item cephalalgis nec non moliminum arthriticorum revocatione ac quidem altera, adeoque & gratius & commodius & tutius nostra tam interne quam externe adhiberi potest: Nam ad hoc altera calidissima aqua calidioribus & plethoricis subjectis aliisque minus quadrat, quoniam nimis exagitat corpus, nostra vero pluribus hominibus ac ægris, si eorum ætatem, naturam & temperamentum & morbos materiasque peccantes spectes, convenit. Ob copiosam præsertim calcaream terram ochramque martialem constringentem difficilius per fibrosæ & mollis compagis ac minoris capacitatis, capitis inprimis vascula & canaliculos volvitur, sed onere gravat, premit eos ac laxat, & facile in debilibus hisce partibus læsisque forte visceribus stagnat ac extravasata corruptionem magis auget & quosdam morbos efferaiores reddit ac magis rebelles, atque novos etiam excitat, cum partes humorum peccantes, acriores & liquecentes calidissima illa aqua fusæ magis & eliquatæ majori sævitia membra impetant, aut lentæ, crassæ, viscidæ, duriores fortius justo commoveantur, adigantur & impingantur, sicque obstru-

obstructiones contumaces, ex quibus multi morbi exoriuntur, efficit. Hinc ut plurimum non modo pedes elapsis aliquot a potatione diebus notabiliter & præter modum intumescunt, sed & lassitudinem atque torporem totius corporis, capitis gravitatem & somnolentiam quandam satis molestant & non raro vix superabilem, post se relinquit. Quare ejus usus internus in affectibus ex atonia & debilitate cerebri & nervorum oriundis suspectus, merito esse debet, quia irregulares sanguinis motus inducit & crasin sanguinis naturalem insigniter lædit, particulas biliosas intensius justo exagitando, & per quam facile hinc capitis dolores, vertiginem, animi deliquium, cordis palpitationes, febres intermittentes atque acutas, improvido usu exhibita, infert. Quare & cura cum hac instituta imo pluribus affectibus præsertim spasticis & similibus curandis alteri consulto præmittitur, sanguine & humoribus attenuatis magis & subtilisatis, salibusque temperatis. Extus vero sive balneo usurpata, ob easdem crassiores partes, poros cutis & nervosas partes constringit & obstruit, repellit; hinc spasmodicis atque convulsivis affectibus & flatulentis detenti, doloribus colicis & tensionibus hypochondriacis, alvi segnitie atque abdominis duritie vexati hincque arthritici, podagrici exinde male imo pessime se habent, non sine medicorum dedecore & opprobrio. Hinc & tumores præternaturales membra corporis obsidentes, subito exinde evanescunt, atque cutis impuritates, ut scabies immo ulcera citius abiguntur. Si & paulo calidius balneum initur, æque capitis dolores, vigiliæ involuntariæ, difficultates spirandi, cordis palpitationes, inquietudines, animi deliquium, inappetentia, inflammationes internæ, febres acutæ aliaque mala symptomata exinde concitantur; nostræ vero aquæ molares, nec tumores excitant, nec in balneis usurpatæ repellentem vim exserunt.

§. V. Satis exinde constat, fontem hunc salutarem non modo alteri vicino sed & pluribus aliis ejusmodi longe esse anteferendum, eumque optimis & saluberrimis elementis levissimis, subtilissimis, spirituosiss, volatilibus, elasticis, expandentibus, salinis & mediis & alcalicis, vitriolicis, martialibus, energeticis atque præstantibus & penetrantibus, bene tamen inter se temperatis, & quæ capiti præsertim & nervis admodum proficuis atque toti naturæ humanæ, sive vitæ vigori que hominum, omnibus ferme temperamentis, omnisque fere ætatis, sexus & habitus subjectis, gravidis etiam foeminis, nec non debilitatis & convalescentibus atque succis eorumque fluxui corporum humanorum, uti & affectibus frigidis sic dictis ac chronicis præsertim admodum con-

venientibus atque amicis jucundoque calore se commendantibus, totum esse refertum, ut Almæ Naturæ singulari benignitate humanis temperamentis, studio veluti temperatus calidus & gratus factus, prout Casiodorus loquitur, tanquam pro deliciosa sine tormento cura, sine horrore remedio datus videatur; adeoque multis tam præservandis, quam curandis morbis, iisque ex asse non tantum palliative, ut aliqui iniqui censores sine ratione & experientia de omnibus ejusmodi curis, frivole perhibent, eum præstantissimum esse, clara argumentatio valet. Etenim vana saltem vulgi persuasio est, aquas ejusmodi foterias, ægris tantum, non sanis prodesse: Sane ambo impune, ut per multa constat exempla, ferunt eas ac assumtas peroptato iterum reddunt. Ad hoc quoque scire licet, omne tempus adhibendo usui hinc opportunum haberi.

§. VI. Jam vires, operationes & emolumenta quoque eximia colligere æstimareque ex facili possumus, quæ humanis corporibus, blande jucundeque calefaciendo, excitando, refocillando, expediendo conferunt, justum ac debitum partium solidiarum tonum & robur conservando & perditum restituendo, circulum & pulsum humorum i. e. itum reditumque sanguinis per subtilissimos canaliculos, juvando, atque spirituum animalium influxum & ad nervos usque penetrationes subtilissimæ hujus & maxime activæ & quaqua versum nitentis materiæ ad quaslibet corporis partes solidas actuandas intimaque penetranda absolute necessarium, intendendo ac instaurando, spirituascentiam facilitando, crassas, viscidas, pituitosas, tenaces, acidas, falsas, acres, biliosas, austeras acerbæque, tartareas, scorbuticas particulas quæ iis præter naturam hypochondriis præsertim insunt, repurgando & abstergendo, simulque incidendo, resolvendo, invertendo, temperando, diluendo, attenuando & ad motum aptas reddendo, induratas, rigidas contractasque partium solidarum, carnearum nervosarumque fibras emolliendo & relaxando, simul tamen etiam relaxatas nimis partes roborando, confortando expandendoque, cutis poros calore suo præcipue aperiendo eosque capaces reddendo, ut cum aqueis particulis, reliquæ, quæ insunt, in interiores corporis recessus usque penetrare valeant, obstructions tubulorum atque canalium in visceribus & singulis emunctoriis referando & aperiendo ac eluendo, quo simul excretiones sollicitantur & restituuntur, noxias & superfluas partes, per emunctoria omnia, per sudores moderatos, urinam & dejectiones alvinas &c. foras educendo. Siquidem potenter purgant & quidem sine appetitus natura-

naturalis imminutione sineque ulla virium prostratione aut languore, potius cum earum instauratione, sine sanguinis commotione, sineque toni ventriculi & intestinorum destructione.

§. VII. Duplici nimirum modo hodie hujus fontis aqua, potando pariter ac balneando æque adhibetur. Primum itaque clare intelligitur, usum hujus aquæ salutaris internum in multis omnino morbis eorumque causis destruendis, præstantissimum esse. Cum enim quanta satis est ejus copia pota, ventriculum cum intestinis eorumque præsertim tunicas, glandulas & plicas non modo, sed & vias lacteas vasaque sanguifera, quæ viscera & membra alia perreptant, abstergunt, eluunt, & cruditates ibi, sive colluvies serosas, biliosas, tenaces & pituitosas, terrestres temperant, corrigunt ac attenuant atque resolvunt, easque per alvum, vesicam, cutis poros aliaque subinde emunctoria emungunt atque foras educunt, indeque morbis iisque pertinacissimis, gravissimis, chronicis, habitualibus & abstrusissimis, atque in quibus causa altius inhæret & medicorum etiam prudentissimorum labores plerumque fatigant, & vires omnium aliorum remediorum ut plurimum eludunt, apprime medentur. Qui ab impuritatibus primarum viarum ipsiusque sanguinis & aliorum humorum atque hinc oriunda fibrarum motricium, ex quibus singulæ corporis partes suam compagem fortiuntur, atonia ac minus expedito humorum itu redituque & secretionem exoriuntur, affectus quales sunt, ventriculi imbecillitas & hinc profecta appetitus & chylicationis vitia, sive cacochymia, anorexia, apepsia, nausea, ructus, vomitus, fames canina, sitis immoderata, inflationes & dolores intestinorum, colica, (de qua ex podagra intra corpus recessa notabilia aliqua habeo exempla) juvamentum exinde accipiunt, dolores item, qui per consensum ex aliis corporis partibus iisdemque remotioribus, capiti & ejusdem partibus accidunt, ut & alia illa vitia, vertigo, aurium tinnitus, auditus imminutus, mædelam acquirunt. Non minus pulmonum a pituita infarctus cum humido asthmate & tussi, hoc medio auferuntur, quatenus vasa & glandulas ramis asperæ arteriæ inhærentes, vel induratas emolliunt, viscidum attenuant & ab eo liberant partes obsessas, eaque parte respirationem liberiores reddunt, vel relaxatum & deperditum tonum restituunt, & humiditates superfluas eo confluxas aliorum divertunt & per intestina evehunt, immo imminens exinde phthisis & hæctica per hoc remedium feliciter avertitur, præsertim si ex obstructione viscerum natum fuerit hoc morborum genus, qua propter in præcavendo eo

MORTONVS in *Phthisiologia Lib. II. Cap. II.* aquas medicatas Islingtoni-
Nn 2 enses

enses iterum atque iterum commendat. Obstructiones alvi ejusdem pertinaces fluxiones pariter, causa mali exclusa, ut & tenesmus, intestini recti relaxatio, stranguria, dysuria, mictus cruentus & præsertim lerna illa malorum, malum hypochondriacum ipsaque hypochondriaca melancholia, hac ratione efficacissime curantur. Cachexia omnis, chlorosis, scorbutus, hydropes, icterus isque niger, obstructiones viscerum, atque; illorum vasorum & glandularum ventriculi, duodeni intestini, hepatis, lienis præsertim ut & pancreatis subtilem blandèque fermentantem & utilem succum præparantis, & exinde sanguinis circulus impeditus, hoc quidem pacto, optime abiguntur atque tota massa humorum pura redditur, naturalisque temperies revocatur. Affectus spasmodici porro, ubi fibræ sunt tensæ, rigidæ, exsiccatae, passio hysterica, atque dolores variarum partium, arthritides vagæ & fixæ, rheumatismi in coxendice, aliisque locis humani corporis, sævientes, contracturæ, paralyxis, membrorum stupores varii, imbecillitates & languores, luxationes, rachitis, sic egregie depelluntur, juvantur atque in pristinum sanumque statum rediguntur. Tumores atque exulcerationes intus latentes in mesenterio, renibus & vesica urinaria, non adeo quidem inveteratæ maturantur, aperiuntur, exonerantur, mundificantur atque sanantur. Si & eadem partes ut & vesica fellea calculosis concretionibus, vel materia earum viscidis & falsis, tartareis fordibus obsessæ sunt, hæc calculorum futurorum rudimenta & incrementa & ipse calculus jam factus, his lymphis destruuntur & emollitis bene & expansis partibus citra singularem dolorem, ejiciuntur. Hinc sæpe observavimus, cum reddita urina eaque turbida magnam sabulosam & viscidam materiam varioque colore infectam fuisse excretam. Vermes, quibus ejusmodi salia alcalia, ut & sulphurea & vitriolica & martialia sunt adversa, exturbantur, atque bilis acrior corrigitur & temperatur ac in optimam indolem convertitur, ut commoda satis ac apta sit confectioni chyli motuique peristaltico, adeo necessario & utili, œconomiae animali, instigando & perennando. Cutis affectus, scabies eaque tam sicca quam humida, impetigines, vitiligines, abscessus & ulcera eaque inveterata & tumores duri aliaque ejusmodi vitia deturbantur. Mensium præterea tam obstructiones ac defectus, quam fluxus inordinatus & nimius, quod quibusdam mirum videtur, ut & difficile hæmorrhoidale, in viris præsertim negotium, nec non fluor albus, ut & conceptionis vitia, sterilitas, uteri prolapsus, optimam exinde correctionem accipiunt. Alii quoque mulierum morbi hic nominandi & in iis hoc medi-

medicamen laudandum Lyciæque quibusdam conceptum foeminarum specificè custodientibus, ut Scriptores quidam referunt, æquiparandum, ut abortus frequenter contingens, molæ & ejusmodi in utero concretamenta, ægritudines ex lochiali sanguine & purgamentis retentis ut & languore ex puerperio laborioso & minus secundo, vel alio morbo prægresso residuo. Febres tandem intermittentes easque contumacissimas & sæpe recurrentes, talesque, in quibus nimis mature causâ adhuc vigens materialis suppressa fuit, insigni cum levamine fugat, ac illa detrahit incommoda, quæ festinata illorum suppressio solet relinquere, si diebus intercalaribus & in declinationis tempore tam externe quam interne adhibetur nostra soteria aqua. Febribus item lentis, post febres intermittentes in specie male & intempestive per constringentia maxime tractatis hoc modo egregie occurritur. Speciatim indicare convenit, quod abditos & latentes in humano corpore morbos ipso earum usu prodere soleant. Quibus indicatis, satis pereximias virtutes mirandosque effectus hujus fontis, nos declarasse arbitramur. Tametsi plures observationes, quæ de illius effectibus testari queant, colligere possemus, interim, qui horum intelligentes adducta rite perpendunt, haud difficulter plura possibilia per bonam consequentiam præsumere valebunt.

§. VIII. Circa hunc usum hancque administrationem observandum est, ut non irrita aut nociva, sed felix faustaque hæc cura futura sit, quod pleræque res, usu aliquo commendabiles, requirunt, ut ante illum sive internum sive externum nempe usum, ne abundantia & pravitas humorum capiendæ copiæ ac moli aquarum hauriendarum obstet, & impuritates primarum viarum vim earum eludant, & cum iis ad massam sanguineam abripiantur, illamque confœdent atque conturbent, varia symptomata & incommoda multosque morbos ingenerent, aut laxante, aut purgante, ex salibus detergentibus & colliquantibus, ut sale ebsoniensi, tartaro vitriolato, sale sedlizenfi Bohemico, ex Egranis acidulis vel ex hoc aut altero fonte Carolino desumpto, terra foliata tartari & ejus liquore cremore tartari, rhabarbaro, manna aut pilulis de ammoniaco Quercetani, de succino Cratonis, aut mixtura aliqua ex aqua menthæ, gummi ammoniaco in aceto soluto, sale tartari cum scammonio sulphurato & sirupo menthæ, similibus confecta, vel nodulo quodam laxante per aliquot dies usurpato, nec non clysmatibus ex emollientibus, laxantibus & discutientibus paratis, aut etiam vomitorio ex radice ipecacuanhæ cum uno grano tartari emetici, aut cui alia forma arri-

deret, ex tartaro emetico gran. ij. vino Hispanico infuso bene primæ viæ repurgentur & venæ sectione aut scarificatione orgasmus sanguinis imminuetur, ac vasorum plenitudo detrahatur, & insueta sanguinis quædam suppressio tollatur, ne operationibus instituendis obsint & ne copia & calor aquæ sanguinem, nimis expandat vasaque ejus nimis dilatet, cephalalgias & anxietates præcordiales, difficilem respirationem, phlogoses, hæmorrhagias, sudores immoderatos, vigilias involuntarias, ruptiones venarum & apoplexiæ periculum inducant. Simulque tamen iterum iterumque præsupponimus, ut a provido & sciente Medico omnes rerum ad hanc curam pertinentium circumstantiæ observatæ prius fuerint, an satis tuta & commoda hæc cura futura sit, an nimirum viscera sint sana atque integra, quod ex appetitu vegeto digestionem laudabili, excretis secundum naturam procedentibus maxime colligitur, aut non penitus indurata ea atque scirrhusa, aut alicubi locorum in corpore, in capite, pectore, abdomine, vasa sanguifera ac lymphatica rupta fuerint, & stagnationes talium humorum exinde factæ, an exulcerationes internæ pulmonum, hepatis, lienis, renibus, pancreate, mesenterio aliisque in partibus graviores & inveteratæ, putrosæ & sinuosæ & metuendæ, aut an affectus cujusdam soporosi apoplexiæ idiopathicæ i. e. a feri extravasatione in ventriculis cerebri præsertim oriundæ, epilepsiæ, inflammationum internarum suspicio adsit, aut constet, memoriam usumque integrum & sanum sensuum & rationis perditum esse. Item an polypi in cavitatibus variis cum asthmate convulsivo, nec non hæmorrhagiæ enormes ac contumaces & ex facili recrudescentes, ut & hydro pes consummati & a vasis lymphaticis corrosis facti, & hæctica confirmata aut etiam lues gallica aut ex gonorrhoea virulenta, ulcera cancrosa depascentia subsint. His præmissis & bene pensatis, simulque mensium in foeminis & fluxus hæmorrhoidalis in viris, ratione habita, an nimirum fluant (nam sub his fluxionibus usus aquæ thermalis neque inchoandus neque continuandus maxime balneando) & in requiem tam corpore quam animo bene composito, tempore electo & commodo, horis nimirum matutinis atque relictis satis nocturna quiete, viribus, exonerata, si fieri potest, alvo atque vesica urinaria, nec non discusso durante somno per insensibilem transpirationem, omni superfluo humido principioque activo ad pristinam energiam reducto, potatio bono cum Deo invocatoque ejus Summo Numine horis matutinis, (quod tempus bibendi aquas ejusmodi medicatas commodissimum & utilissimum, immo necessarium censetur, quoniam hæ ipsæ aquæ tunc aëre existente frigi-

frigidiori viribus integris adhuc i. e. partibus spirituosius instructæ existunt,) ex recens hausta fonte aqua bene calida instituenda & cum ea universa cura incipienda, inchoando a X. XII. XV. ollulis aut vitris, & adscendendo atque augendo indies usque ad XX. XXV. Quæ quantitas ut plurimum sufficit ad evacuanda ea, quæ debent evacuari, siquidem plurimi ex hac sexies, septies, decies, undecies & pluribus adhuc vicibus deiciunt. Cum ea quantitate assumenda, qua confert, & sita lia excernuntur, qualia excerni oportet, ad V. VI. VII. & plures dies pro subjectorum & morborum conditione & indole continetur, & bis terque hic ordo, quem curam vocant, observetur & repetatur, interposito singulis vicibus laxante. Efficacius quidem ex ipso fonte statim hauritur pro cura aqua thermalis; quibus vero non licet, fontem ipsum adire, aquam, domum adportatam, prius in lagena, angustioris colli bene obturata, ne spirituosius ac energetica pars abeat, ferventi aquæ Carolinæ alteri ut fervidissimæ imponere, sicque calefacere convenit. Quo & animadvertendum, quod utilius sit, si lagenæ, in quibus aqua medicata adportatur, non penitus exhauriantur, quoniam in superiori parte aqua levior & spirituosior existit. Potatio in conclavi bene inter frigus atque calorem temperato inter deambulationem modicam, operationem atque secretionem & excretionem apprime adjuvantem, ordinario atque consultius instituitur, delicatioribus, debilioribus, tenerioribus, sensibilibus ac infirmis difficileque perspirantibus tamen, non adeo scrupulose refragari vellem, si in lecto, evitando tamen somnum, eam adhibere visum esset. Quandoque talem potandi modum commendare soleo, quando nimirum de ultima cura, quam vocant, agitur, & sudores ut augeantur, e re esse videtur, succis prius præmissis primis curis tenuioribus factis salibusque morbificis bene temperatis. Siquidem & in variis subjectis variisque morbis decumbentibus & ex lecto resurgere non valentibus salutarem talem aquæ usum deprehendi. Fuerunt enim plures subinde talis constitutionis personæ, quibus hic potationis modus optime profuit. Sunt quoque certi quidam morbi, in quibus magnum emolumentum exinde ægrotantes reportant v. g. affectus pedum spasmodici & arthritici. Etenim licet motus externus magis distributionem & excretionem promoveat, attamen & de utilitate hac bene sperare possumus tam aquæ apprime quoad calorem temperatum & urgentis copiam virtutemque stimulantem, quam naturam solidorum elaterem ac tonum fluidorum circulum dirigentium, considerantes. Si ulterius quærat, an etiam alio tempore & speciatim inter cibandum

bandum has thermales aquas potare conveniret, affirmando ad hanc quæstionem, nec sine ratione respondemus, quoniam æque ad cibos bene conficiendos, atque infirmum & laxatum ventriculi & intestinorum tonum emendandum ac juvandum, multum valent assumptæ aquæ thermales. Nec desunt variæ personæ, præsertim fœminei sexus, quæ ventriculi & intestinorum affectibus gravioribus & contumacibus, ut colica, cardialgia &c. vexatæ, quæ cum euphoria paulo ante & inter pastum debito moderamine observato, talem potum adhibuerunt. Perinde non ambiguum habemus, balneum mox ingressuris, immo eo jam insidentibus aliquot vascula vel IV. VI. VIII. ollulas sive ad unam libram circiter hujus aquæ thermalis, ut epotent quandoque, nec sine euphoria semper subsequuta commendare, quo obstructions internæ & scirrhescentiæ atque tumores duri, mesenterii glandularum &c. facilius præsertim fotu quasi valente juncto, expediuntur, alvusque magis fluida servatur. Cœterum neminem statim terrere & ab incepta cura arcere debent symptomata quædam, forte interdum intervenientia, ut purpura rubra, pustulæ scabiosæ, immo inflammatio quædam erysipelatoza, nausea, subversio ventriculi, ventris inflatio, dolor tensivus præcordiorum intestinorum fluctuatio, capitis etiam gravitas, somnolentia vel pedum tumores, vel etiam consueti morbi quidam v. g. arthritis, ex calculo dolores &c. sub ipso aquarum thermalium usu redeuntes: hæc omnia enim aut utentes deferent, ubi aquæ viam sibi expeditiorem reddiderint, & validius operationem suam exercuerint, aut salibus acribus morbosus ad habitum corporis fausto omine dejectis, cum felicibus ægrotantium rebus evanescent.

§. IX. Quodsi, quod ut plurimum fieri expetitur, potu & balneo utendum ad fortiorem penetrationem ad patentes cutis poros, intimiorem accessum aquæ tepore subtili activaque sua virtute procurandum, ad emolliendas, magis relaxandas contractas induratas fibras, & ad motum sanguinis magis promovendum, eumque ad externas & inferiores partes alliciendum, atque ad derivationem aliorsum, revulsionem instituendam, perspirationem cutis adjuvandam augendamque, & congestionem sanguinis atque humorum, quæ a spasmodicis inferiorum partium frequenter fiunt, solvendas, atque ad affectas partes extremas occupantes abigendas, absoluta potatione & præmissa laxatione balneum, ut aqua superflua & a potu relicta ab eaque commota & soluta inquinamenta prius ex corpore excernantur, sive horis matutinis sive vespertinis, vel etiam bis in die, atque vel in balnearia ipsi fonti adstructa, sese recipere possunt

possunt sic lavari cupientes, vel ut aqua domum transportetur, curare, ubi labro aqua hac pleno infideant atque successive ad umbilicum primum, ad axillas dein ac etiam ad mentum tandem se immergant. Ordinario hic duæ horæ balneo impenduntur, quod & per III. IV. V. aut VI. dies continuari potest. Quæ vices bis terve ferventur, prout ægrorum constitutio morborumque conditio exigit. Inter balneandum si venter statim primis diebus ipinam versus contrahitur, boni futuri eventus faustum erit signum. A balneo præsertim cavere oportet, ne frigidiore auræ, visceribus & nervis præsertim inimicæ & in apertos a calido balneo corporis poros promptissime penetranti, corpus exponatur, quare cum cura, integumentis illud velandum est, ex quo in lectum se recipiant & ibi bene coniecti, in sudorem proni atque proclives ad tolerantiam eundem promoveant, hoc regimine probe observato, sudorem calidis linteis abstergant, & corpus fricationibus paululum exerceant, quo modo vires & servabunt integras & amissas recuperabunt.

§. X. Præter hos magis consuetos usus, potum nimirum & balneum, alii quoque esse possunt haud contemnendi, quibus aqua nostra æque ac aliæ ejusmodi inservire solet. Tales ii quidem magis consueti magisque noti sunt, si pediluvia ex ea parentur, quæ ipsi aquarum thermalium curæ & imprimis balneo præmitti, jungi ac postea aliquamdiu continuari possunt, quoniam concinne præparant, adjuvant ac sustentant, conservant & continuant ejus operationem. Ordinario ea magis ad pedum tumores & languores discutiendos & avertendos adhibentur. Si porro clysmata exinde componantur, in quam plurimis morbis proficua & necessaria. Si os ea colluatur, pro ejus vitiis emendandis. Si gargarismata exinde formentur pro tonsillarum tumoribus resolvendis, colli & faucium inflammationibus discutiendis, pro relaxatione uvulæ restituenda. Si auribus instilletur pro susurris abigendis, doloribus mitigandis, pro auditu deperdito juvando. Si oculi cum ea calida laventur pro inflammationibus, suffusionibus incipientibus, aliisque eorum vitiis corrigendis. Siquidem & multoties expertus est Præses quod & frigida & aliorum transportata diuque etiam per integrum annum asservata, aciem oculorum mirum conservet non modo, sed & augeat, si quotidie ea, illi laventur. Aequè notum habet, scirrhus, cancro, albo fluore mucoque crasso obsessum muliebre uterum per metrenchytem injectam abstersum, ut & ulcus in vesica nidulans mundatum & ad cicatricem, injectionis ope, perductum fuisse. Virginibus etiam solo fotu, ad menses albos profuisse, memoratur &c. Stillicidia quoque sunt

ex earum medicationum generibus, quæ variis corporis partibus, ut capiti, nuchæ, & collo, ventriculo, artubus roborandi, discutiendi, emolliendi, penetrandi &c. fine, atque pro variis affectibus gravioribus & abstrusioribus abigendis, adhiberi solent.

§. XI. Non abs re erit, immo utile & quandoque necessarium, usum aquæ tam internum, quam externum pharmaceuticis remediis atque medicamentis non modo incipere ac finire, sed & eum interpolare, cooperari, juvare, immo supplere interdum atque jungere, eaque per aliquot septimanarum spatium domum reversi continuare, prout rerum ac circumstantiarum ratio suadet, ut auxiliatricibus quasi manibus consociata quasi auxilia, in commune bonum ægrotantium amice conspirent. Omnis generis medicamenta pro hoc scopo solent adhiberi evacuantia, laxantia, diuretica, vomitoria, ut & clysmata alterantia, præcipitantia, resolventia, confortantia, stomachica, singulis morbis convenientia, antispasmodica, antiarthritica, antinephritica &c. Quibus in genere prospiciendum, ut debitus partium tonus conservetur ac instauretur, singulæ secretiones & excretiones secundum naturæ leges, bene procedant, correctio & sanatio adjuvetur atque sic natura omni onere levata, pristinum ac novum vigorem recipere possit. Speciatim dicendo stomachica magis ordinaria sunt singulisque propemodum communia, qualia ex amaris præsertim ut essentia absinthii, centaurei minoris, ut & cardui benedicti & corticum aurantium nec non alia, ut tinctura tartari composita, essent: chacarillæ, elixir proprietatis, sal volatile oleosum Sylvii cum spir. nitri dulci temperatum præscribi assolent. Integra tandem cura sic absoluta, rei omnino intererit, ei adhuc colophonem laxante aut etiam clystere, iterum imponere, ubi ordinario magna humorum suburra exoneratur, quoniam ab aqua medicata largioribus his haustibus assumpta, ventriculus & intestina impleta fuerunt, atque in coli præsertim plicis atque recessibus multæ adhuc inertes, phlegmaticæ & pituitosæ partes solutæ relictæ, quæ si remanerent, varia mala symptomata iterum concitare possent, ut inquietudines, languores, colicam, ac febres &c.

§. XII. Præsertim ne frustraneus aut omnino nocivus futurus usus omnis hujus curæ sit, convenientis diætæ leges ut semper, quoniam vitæ conservatio tota in victus ratione reposita est, ita & hic quoque observandæ, tam per ipsum curæ tempus quam post absolutam eam. Ante omnia abstinendum a nimia cibi & potus repletionem, assumendis aquis thermalibus admodum adversa, licet etiam illi ex salubribus sint, quare

quare & lauta præsertim coena, utilius intermittatur. Quoniam vero non omnes adblandientes sunt corpori & speciatim curæ hujus tempore, salutare cibi, tales assumant qui sunt facilis digestionis & distributionis. Ex carnum censu laudantur carnes teneræ, ut boum, juvenculorum, vitulorum, agnorum, leporum, caponum, alaudarum, turdorum, perdicum, pullorum gallinaceorum & ova, quæ conducibilia admodum sunt, ea quidem recentia & forbilia &c. Pisces conceduntur saxatiles, funduli, truttæ, percæ, lucii. Ex fructibus amygdalæ, pineæ, ficus, asparagus, radices petroselini, pastinacæ coctæ, cichorei, oriza, alica. Juscula parentur ex atriplici, beta, buglossò, chærefolio, endivia & similibus vegetabilibus & juribus recentium carnum &c. Vitent vero omnes cibos viscidos inprimis pingues, butyro frixos, ova præsertim sic parata eaque dura, salitos, acidos, fermentescibiles, inprimis aromaticis nimis, pipere præsertim confectos, animalium jecora, intestina, pedes, capitaque vitulina &c. carnes item anserum, anatum, pernas, lardum, farcimina, placentas pinguiore & calentes, pisces palustres, ut anguillas, tineas, carpiones, eosque fumo aut aëre induratos, fructus horarios, legumina flatulenta, nimia farinacea, lacticina, casearia. Potus sit tenuis & defecatus & diureticus. Hauriatur non frigidus nimis, præsertim a balneo, corpore adhuc calente: Largior tamen assumatur, quam quidem pro consuetudine assolent, balnei tempore. Ex cerevisiis, quæ in isto loco haberi possunt, Joachimsthalensis, Neukirchenensis, Schneebergensis præferuntur. Ex vinis, parce tamen, ut nimirum usum medicum obtineant & efficaciam suam largiantur, quæ in roborando, refocillando, resolvendo, discutiendo consistit, inter prandium ac cœnam, concedi possunt Bohemicum, Hungaricum, Rhenanum; Mosellanum vero & Neckarinum inprimis calidioris constitutionis hominibus, qui biliosas cruditates in primis viis alunt, magis convenient. Quibus volupe erit, loco potus ordinarii etiam leves acidulas, qui haud procul a thermis Carolinis scaturiunt, quas vulgo *den Buch Sauerling* appellant, & in oppido venales circumferuntur, usurpare possunt. Non inconvenienter vinum præsertim Rhenanum cum acidulis illis modo nominatis miscetur. Nec adeo morosè atque rigorosè, ut plures etiam medici assolent, post horam unam aut alteram, a potu thermalis aquæ assuetis & qui in deliciis habent, præsertim foeminis potum moderatum decocti coffee immo etiam succolatam cum aqua coctam tanquam confortans, atque adeo viris tabaccophilis tabaci fumum per tubulum testaceum hauriendum, vetare possumus. Vinum vero adustum, quoniam

alvum constipat, & humores coagulat, consultius omittitur. A prandio atque a potu aquæ thermalis, somnus studio arcendus. Motui ac exercitio moderato corporis, ut ambulationi atque exspatiationi, honestæ saltationi etiam ad sudorem lenem usque protractæ, equo & curru vectioni, tornatione &c. post potum assumptum, per unam & alteram horam ex necessitate vacandum, quoniam valide & utilissime aquarum operationem juxta ac secretionem excretionemque adjuvant. Qui vero a morbo prohibentur his corporis motionibus uti, frictiones artuum assidue loco exercitii erunt. Non possumus autem probare nimia exercitationum genera, ut quam plurimos hæc falsa persuasio tenet, usque ad multam lassitudinem & virium prostrationem magnumque sudoris effluxum protracta, per quæ laboriosam illam adscensionem per plures horas ad circumjacentium montium vertices atque fastigia intelligimus. Nam vires integræ, ad operationem omnem thermarum rite perficiendam omnino requiruntur. Hinc observamus, quod extreme debilitatis aut decrepita ætate constitutis hominibus curæ thermales omnes, minus proficiant. A balneo vero consultius omnis motus intermittitur, sed potius, ut supra monitum est, quies & somnus, ad quem ipsum balneum quasi invitat, per unam alteramque horam in lecto conceditur, immo injungitur, expectando lenem cutis madorem. Vigiliis nimis non corpus fatigent & exhauriant: Alvus procuretur laxa & quotidie aperta per jussula alimentosa & lenientia & emollientia; per suppositoria & clysteres. Singulæ reliquæ excretiones successive, tempestive & non excessive atque constanter instituantur. Studiose arceatur ac corrigatur omnis aër adversus, qui præsertim temperamentis sanguineis & sanguineo-phlegmaticis noxam infert, quod, uti hoc temperamentum, ubi sanguis nempe prævalet, præ reliquis felicius est & constantiori firmiorique gaudet sanitate, ita & hoc præ reliquis incommodum habet, ut quo subtilior, tenuior ac volatilior sanguis in consistentia sua, eo etiam alterationibus, ac ebullitioni, aëris ac tempestatum alterationibus & variationibus, imprimis subitaneis vicissitudinibus alteretur magis, & in inordinatum motum vertatur atque ad intemperiem sit valde proclivis. Nam licet ibidem locorum salubris in se ipso ut plurimum aër existat, quoniam calidus, siccus & tenuis salibusque alcalicis & spirituosus effluviis refertus est, quæ optimæ qualitates ab igne subterraneo, qui hoc in loco ejusque vicinia per multa vestigia se prodit, ac vaporibus exhalationibusque hinc inde ex copiosis, ex fonte fervido & balneis evolutis exeuntibus, quoque acceptæ feruntur: est tamen juxta subitaneam quandoque

doque ejusdem alterationem & mutationem, quod curæ tempus & conditio præsertim circa hunc ipsum observare moderarique præcipit. Speciatim frigidus, pluviosus & nebulosus, matutinis & vespertinis maxime horis, huic curarum generi adversus, quoniam transpirationem & liberam circulationem sanguinis impedit, fluores condensat, ac solidarum partium, maxime nervosarum, debitum tonum vimque movendi potenter impedit, per totum curæ tempus, maxime autem inter potandum vitandus. Nemo eorum inprimis, qui hac cura utitur, talibus objectis inhæreat, quæ mœrorem tristitiamque ingerunt, eo enim occasionem subministrabit, ut motus vitales & totius corporis animique vires labascant & successive magis imminuantur, contra quod ægritudinis genus nullum in pharmacopoliis invenitur medicamentum, quod in animum agere aptum sit, hinc nec corporis morbis facile medici medentur, nec cura adhibita feliciter succedit, quamdiu animum hi mali affectus conturbent. Immo ad hoc scire licet, quod ex sedula attentione observatione colligitur, curas per aquas soterias, sive calidæ sive frigidæ illæ sint, institutas, haud feliciter cedere in ejusmodi, morbis ex anomalibus motibus per diuturnum antegressum mœrorem inductis, genus nervosum & cerebrum debilitantibus, curandis, ob debilitatum nimis cerebrum nervorumque tonum, qui impedit, quo minus haustæ in copia aquæ, per cerebri minutissima vascula, volvi revolvique queant. Quare hæc atque omnes graviores curæ, profundæ meditationes, lucubrationes & alii immoderati animi affectus & commotiones omni cura fugiendæ, sed mens potius spe atque fiducia erigatur, atque animi continentia integra sit, ejusque ex gratis rebus quæsitæ delectatio procuretur, atque is ad omnem lætitiā, ac gaudium naturæ humanæ semper proficuum, componatur; Nec ibi loci etiam deest varia amœnitas, animis reficiendis & feriis laboribus corporis proscribendis, idonea.

§. XIII. Tandem etiam accidentium morbosorum, usui thermarum subinde supervenientium habenda ratio est, qualia sunt cephalalgia, quibus clysteribus, pediluviiis, laxantibus, unguentis & frontalibus succurritur. Vigiliæ involuntariæ, quibus juxta hordeata & emulsiones quoque conveniunt. Somnolentia, per frictiones clysteres acriores, caput purgantia, cessationem a balneo &c. abigenda. Sitis quæ per julepos acidulos emulsiones & similia sistitur aut fallitur. Inappetentia evacuationum ope appetituque excitantium curanda. Alvi constipatio assumendis prunis dulcibus, coctis, spinachia, beta, malva, pilulis

lulis laxantibus, v. gr. Imanuelis de succino Crat. &c. cremore tartari, mannatis & similibus, clysteribus atque suppositoriis emendanda. Colica forte suborta clysteribus & ab ulterioris potus abstinencia sedatur. Nauseæ & vomendi conatui a ventriculi debilitate stomachicis aromaticis & subamaris succurritur. Effloriscentiæ & exulcerationes cutis, quarum per continuationem balnei blandioris, tepidioris, vel si etiam exuberantes nimis sint, tandem venæ sectione, sudoriferis, purgationibus, ratio habeatur. Mensium fluxus subortus ut & febris, cessationem a balneo exigunt.

§. XIV. Quæ adhuc forte monenda atque indicanda essent, ut & omnia in his paragraphis conscripta, ut eo felicius cedant, directioni & moderationi intelligentis Medici harum rerum optime gnari, relinquenda, commendanda committendaque ulterius erunt: Talis enim usum disponere, curam ordinare, copiam aquarum bibendam & repetitionem aut dilationem, tam potationis quam balneationis ad utentium atque balneantium naturam, morborum indolem & symptomatum intervenientium, rationem dirigere, observare, discernere, corrigere, avertere, componere, futuris prospicere, (ut nempe ab usu thermarum salubria & quæ juxta naturalem statum invenerit, conserventur & si quid a propria natura recesserit, ad pristinam symmetriam reducatur) atque per omnia tam ægrotantibus quam convalescentibus recte consulere, sciet.

* * * * *

VII.

DISSERTATIO MEDICA DE BALNEIS PARTICVLARIBVS.

PROOEMIUM.

AD avertendos, debellandos, profligandos, ejiciendosque belli tempore hostes, ut pax aurea atque securitas publica reparetur, varia agitantur consilia, varii intenduntur labores, variique conquiruntur bellici apparatus: Colliguntur arma tam defensiva, galeæ, loriceæ

ricæ, cataphractæ, &c. quam offensiva, gladii, acinaces, pugiones, hastæ, bipennes tormenta, bombardæ, sclopi, ac ejusmodi bellicus apparatus, pulvis pyrius, globuli plumbei &c. Imo non semper ex armamentatorio, sed etiam non raro exigente sic rerum statu ac necessitate ex horreo stabuloque depromuntur, sæpeque flagellis, vectibus, falcibus scœnariis, perticibus, furcis, fustibus, rastris, clavis, lapidibus irruentes insidiæ depelluntur; nec his, res omnis, semper & statim potest decidi, sed pro varia occasione ubi etiam sive cominus sive eminus pugnandum vis vique pellenda atque arcenda est, variis aliis machinis & instrumentis opus est. Hic cuniculi agendi, illic aggeres exstruendi sunt, & gerræ ponendæ, hic fossæ ducendæ, hic valla erigendæ, alibi viæ commeatusque ac aquæ ductus obstruendi, modo arietibus muri diruendi, scalis transcendendi, portæ exostris irrumpendæ &c.

In Medicina, quæ ex his tribus: ægro, morbo & medico constat, qui inter se quasi pugnant, æque ac in bello *πολυμηχανία* valde necessaria est, varia instrumenta sunt afferenda, varia consilia capienda; varique scopi formandi & in ipsum actum deducendi, qui in commune bonum & salutarem futurum exitum, una conspirant, ut vitia tollantur homoque servetur, inprimis iis in morbis, qui præ aliis magnitudine eminent, ægriusque auferuntur & lethum magis inferunt; Tum præsidia multifaria ex variis classibus a medentibus sunt petenda, qui omni modo eo allaborare debent, ut morbum evertant, variisque in locis applicanda quæ evacuant, alterant, avertunt, derivant, revellunt, intercipiunt atque repellunt. Eaque non semper ex pharmacopolio & armamentario chirurgico deprimuntur, sed sæpius ex ipsis domus partibus, ex puteo, foco &c. afferuntur, quæ sæpius æque, si non magis ac illa, proficua sunt. Ex iis quæ eo conferunt, quæque haud simplicem vicem explent singularesque dotes largiuntur, & quæ tam ad therapeuticam quam diætetica medicinæ partem referuntur, quoque balnea particularia sunt, quæ licet particularia audiant, & parti huic vel illi applicentur, ex asse tamen etiam illi prospiciunt atque quædam ut præsertim pediluvia maxime toti propemodum corpori opitulantur. Pedum itaque, ut ajunt, visa est via, ac placet jam nobis, de quorundam eximiis auxiliis atque emolumentis, quæ humano corpori præstant, in medium quædam proferre, illorumque usum commendare, cui labori ut summi Numinis benignus adspiret favor, supplices precamur,

§. I. **I**Nter notissima & antiquissima auxiliorum genera, balnea quæque particularia sunt, eo nomine insignita, quod huic vel illi parti, ut capiti, collo, humeris manibus pedibusque applicentur. In veteri enim ævo, si revocare animum ad istorum Authorum monumenta velimus, ii, qui aut valetudinis suæ rationem habuerunt, aut quibus curæ fuit ægrotantium salus, frequentissime ac multiplici felici comprobante successu, adhibuerunt ea nihilque magis pro his scopis spectabant, quam balneorum, fotuum, lotionum, stillicidiorum, epithematum V. AETII *Tetrabib. Lib. II. S. I. C. LXXIIX.* unctionum, frictionum & ejusmodi exercitationum & motuum usum. Cujus præcipua laude & commendatione dignæ, diætæ partis, Pythagorici Philosophorum omnium facile Principes, primi autores fuerunt. Atque multis forsitan non ignotum erit, quantas morborum curas solis pedum, manuum & capitis lotionibus ex herbarum decoctis Georg. Anwaldus (famosus ille empiricus & Juris quondam Licentiatus ob panaceam quam invenit alias etiam notus) perfecit. Quæ autem hodie, pene magis ignota evadunt, quo frequentius negliguntur. Et sane, si rem recte suoque modulo pedeque æstimemus atque metiamur, nos, quoque omni asseveratione affirmare necesse habemus, ea, multa eaque eximia, tam in conservanda, quam recuperanda sanitate, commoda præstare, quatenus nempe debitum, in solidis conservant tonum, elaterem & mollitiem ne impedimento sint circulantibus fluidis & vice versa, ne fluida nimio impetu nimique tenuitate velocitateque & excedente acrimonia, præternaturales ariditates, tensiones, vellicationes, spasmos & crispaturas, convulsiones in solidis inducerent &c. Adhibentur potissimum, ubi vires sunt debiles, ubi non necesse est balneare totum corpus & ubi balnea deficiunt. Hæc primaria eorum, jam levi modo opera, delineabimus.

§. II. Quemadmodum pediluvia ut notissima & usitatissima ita & omnium propemodum balneorum particularium utilissima censentur merito. Ab his ideo & tractationis nostræ initium facturi a calce quasi ad caput usque procedamus. Ut vero hanc tractationem summis, ut ajunt, pedibus ingrediamur, & ab iis quæ omnibus ante pedes & notissima sunt, ad magis ignota, pedem promoveamus, sequentia indigitemus. Nemini jam potest esse ignotum, pediluvia, lavipedia, aliis pedilotia & balnea pedum, esse e genere balneorum, & esse non nisi balnei particularis species, varie adornatas, in quas pedes, pro variis usibus ac scopis ad certum tempus immerguntur; hinc & non solum particulare
quid

quid præstant, sed omnia ea præstare propemodum possunt, quæ universalialia balnea & infessus alias efficiunt.

§. III. Sex maxime notatu digna pediluviorum genera sunt, calida (sub quibus tepida comprehenduntur) & frigida, simplicia & composita, naturalia & artificialia. Horum enim materia, ex qua componuntur, pro intentionis aut scopi varietate, varia est, prout magis abstergendum, revellendum, emolliendum aut confortandum, aut solvendum ac resolvendum, discutiendum atque penetrandum, refrigerandum aut calefaciendum. Quippe modo ex aqua simplici dulci frigida, calida aut tepida saltem, aut salsa marina, aut aliis liquoribus naturalibus (ac ideo naturalia audiunt,) ex aquis thermalibus, acidulis, salfulis aliisque ex aliis foteriis fontibus haustis parantur. Rursum aliis atque aliis adornantur, ut ex cerevisia eaque secundaria, aceto, aqua ferrariorum, coriariorum, jure halecum, vino, musto, spiritu vini, fœcibus vini. Modo adduntur aut incoquuntur, aut saltem infunduntur, ut vapores placide ad abdomen atque caput adscendant, varia ingredientia, quæ artificialium nomine veniunt, ut decocta herbarum, florum, radicum, foliorum, seminum, ex mollientibus & solventibus, lenientibus, paregoricis, subadstringentibus foliis & radicibus parietariæ, malvæ, althææ, brancæ ursinæ, hyssopi, chamomillæ vulgaris & romanæ, petroselinæ, chelidonii majoris, fumaris, absinthii, rutæ, matricariæ, serpilli, hypericonis, calaminthæ, origani, majoranæ, pulegii, bursæ pastorii, floribus tilis, acaciæ, rosarum, papaveris cum capitibus integris, foliis salicis, quercus, &c. feminibus pœoniæ lini, fœniculi, nigellæ, nasturtii, apii, carvi, fileris montani, &c. baccis lauri, juniperi, furfuribus &c. Animalia quoque & eorum partes aut quæ ab iis desumuntur, ut formicæ & eorum ova, lumbrici terrestres, sperma ranarum, pedes vitulini, suilli aut vervecini cocti, quandoque lac, serum lactis, sanguis, nec non lotium sanorum hominum, puerorum aut etiam brutorum animalium vaccarum, caprarum, ingrediuntur. Ordinario & salia & sulphurea a quibus præcipua remediorum virtus atque agendi alias potentia pendet, ubi major vis ac actio ac penetratio requiritur, solvuntur aut affunduntur, lixivium ex cineribus lignorum & saponariorum, sal commune, gemmæ calx viva, alumen, sulphur. commune & vivum, bitumen, sapo communis aut venetus incoquuntur. Ubi major inprimis emollitio & calefactio exoptatur, oleum olivarum, lini, eorum materiam constituunt. Oleum enim maxime particulis æque ac aqua flexilibus atque plicabilibus & glabris, glutinosis & vi ignis inprimis cale-

factum penetrat ac intimius se quoque insinuat; Visciditas etiam ejus gluten ac lævitas, qua facillime adhæret, adeo non impedit penetratorem, ut quoque eam adjuvet, quippe adhæsione, quando particulæ quælibet olei cuspide quasi sua penetralia cutis penetrant, inter cutis villos firmitus hæret, difficillimeque abripitur, retrocedit, divellitur ac deturbatur, unde trusionis ac nisus vi, continuo urgente, tota perducitur oleosa molecula, ut ulterius scitissime explicat L. BELLINI *de sangv. miss. p. 152.* Hæc olei penetratio ante oculos est, ubi oleum coriis affunditur, & ubi calculo renum laborantibus, balnea oleosa a medicis præscribuntur, quibus corpus laxatur & penetratur, successu exoptato & doloris sævientis imminutione aut cessatione ex asse. Decocta pro pediluviiis vel decantantur, cum vel sine colatura ac cum speciebus ipsis usurpantur. Species coquendæ sufficere pro tribus & quatuor vicibus possunt, quamdiu odor fragrantium durat. Ubi locorum occasio est opportuna, scorix variæ, metallicæ, quæ nimirum a fusione mineralium & metallorum remanent, martiales, venereæ, antimoniales; a cobalthi fusione residuæ, aut a fusione adhuc candentes, modo de novo aut calefactæ calcinatæque afferuntur, & in aquam tepidam injiciuntur. Alibi locorum lutum aut argillam recipiunt, aut arenam calidam aquæ injiciunt, aut etiam lateribus, silicibus, ferramentis candentibus eam affundunt. Peculiare quoddam ac inconsuetum paucisque forte notum addam. Nimirum, in imitationem, quando quidam pro salivatione excitanda & securo sat modo, soleas amalgamate mercurii infectas, plantis pedum supponunt, pediluvia quoque mercurialia pro hoc scopo atque non minus secure ex mercurio dulci cum aqua fervente possent parari. Mercurius quidem sublimatus injectus fortius ageret, ast quia corrosionis metus subest, non facile hunc svaserim, delicatiores & foeminae maxime ad gratiam conciliandam, varios flores & folia fragrantia nitentiaque rosarum, papaveris, jasmini, leucoii, iridis species, caryophyllaromatiticos aliaque odorifera ejusmodi injecta, aut etiam liquores svaevolentes infusos, amant.

§ IV. Paratis modo pediluviiis, loco bene temperato pes uterque ad genua ac crura usque immergatur. Commodi quoque atque utilitatis majoris gratia, ne denudatas partes frigus adspiret, & ut vires quoque ipsius pediluvii medicatæ ferventur simulque augeantur pannus lineus aut laneus supra crura trimodiumque suppositum tendatur; sic enim vapores ex aqua concinne alterata & resoluta adscendentes, utpote aëris elastici accessu, promptissime poros subjecti corporis ingrediuntur. Atque

que ut ipsius balnei calor debite ac diutius permaneat, aut novum subinde decoctum calidum affundatur, aut siles candefacti in eo extinguantur. Expedit primum, aquam bene temperatam, sat tepidam, & ad frigiditatem potius inclinantem asserre, quam temperationem pedes magis ferre possunt, & subinde huncce calorem calida situla hausta & affusa augere. Rursum eadem ratio valet, si frigida pediluvia præsertim non adfvetis sint adhibenda; ut primum immersio in tepida aqua fiat, & paulatim ad frigidiorē progrediatur. Expedit quoque, ut ante immersionem pedes, maxime si frigescant, prius bene & ad rubedinem usque, vel sola manus opera, vel panno linteo aut laneo eoque non raro calido fricentur, quæ frictio non solum præparat, sed & ipsam pediluviorum operationem adjuvat, nec non inter ipsam lavationem manus, ab hac reciproca contēntione ferientur. Nec male ageret is, qui veterum more, pedes pro ratione exigentiæ prius spiritibus, oleis & linimentis inungeret aut suffumigiis infumigaret, quod etiam post balnea varia morborum exigunt genera. Medici quoque est, cum (ut Herophilus Dogmaticorum Medicorum doctissimus præclare dixit;) omnia præsidia medica per se & sola nihil sint, nisi recte habeant utentem; ac Hippocrates Medicinæ Parens hortetur omnia medicæ artis opera sic perficere ut juvent vel saltem non offendant, hic simul monere, esse consentaneum magis, si jejuno ventriculo, alvo & vesica urinaria prius solutis atque exoneratis adhiberentur, item si pro morborum curatione pediluvia calida sint sæpius iteranda, consultum maxime esse plethoricis atque cacochymicis curæ inchoandæ præmittere, vasorum per venæ sectionem, depletionem & cruditatum ex primis viis per laxantia educationem. Mora, quam vulgo neſtunt aut neſtere debent lavantes, a semi hora ad integram & ultra extenditur, usque dum pedes mollescant, rubedine suffundantur, eorumque digiti & plantæ monticulis notentur. Quo tepidiora illa sint, eo longius, quo calidiora, eo brevius in iis morerentur balneantes. Si per aliquot tempus singulisque diebus continuare ea quis voluerit, ac si integra cura, ut ajunt, sit instituenda, a minori temporis spatio incipiendo ad majus in dies progrediatur, bisque quandoque in die mane ac vesperi pediluvia alioquin singulis diebus semel aut alternis repetantur, prout id rerum circumstantiæ, scopus & morborum gravitas, ac pertinacia hominumque lavandorum constitutio & indoles requirunt. Peracta lavatione & pedibus e vase extractis, ii linteis calidis leniter rursus fricando bene abstergantur siccenturque, involvantur, aut tibialia mox calefacta paululum induantur; aut lectus

petatur, evitando semper infrigidationem, quæ nocentissima est, si nimirum humectatam, tumefactam, calefactam & emollitam corporis partem, porosque laxatos atque apertos, aër forte frigidus appetat. Atque si sudor lenis forte sit excitandus, aut si expectandus & is continuandus in lecto commode longior mora protrahatur.

§. V. Conveniunt pediluvia commode adhibita, omnis ætatis, sexus & temperamenti hominibus. Novi, infanti trium mensium gravi asthmate convulsivo pressò, utiliter calida aqua singulis diebus aliquoties lotos fuisse pedes. Aetas senilis præsertim ea utilissime adhibet ex confortantibus aromaticis emollientibus mixta, quoniam in senio sanguis per pedes, corporis partes extremas & infimas lentius circulator, ac non solum sale volatili plurimum & ad varia emolumenta conducen- te, sed & medulla, blandis, mollibus, lenibusque, lubricis, temperan- tibus, oblinientibus particulis, constante, ossa tunc destitui incipiunt. Sequiori sexui præsertim, tam ob nativam temperiem & constitutionem corporis teneram, sensibiliorem atque habitum laxiorem & spongiosio- rem, quam ob excretiones sanguinis consuetas, ut nempe e multis in- commodis, quæ exinde partibus præsertim superioribus, accidere possunt, immunis præstetur ac tributa illa ordinaria, ipsique propria rite se ha- beant pediluvia calida, eaque frequentia apprime conferunt. In spe- cie foeminæ inferioris conditionis quibus manus lavando in aqua frigi- da, frequenter frigescunt, atque pedes eodem labore madefiunt & ri- gescunt, pediluviiis calidis vesperi exactis per diem laboribus, metuen- das exinde noxas ut varias spasmodicas contractiones &c. in quas ma- xime hæ pronæ sunt, ut facile parabili remedio, optime possent avertere. Nec gravidæ atque lactantes habent, quod ab iis timeant, potius eas ad ventilationem sanguinis faciunt, quæ in illis sæpius necessaria est, i. e. liberiorem sanguinis motum, quod in sequentibus ibimus explicatum, efficiunt. Conveniunt quoque, ut omnibus propemodum morbis, ita & singulis eorum ferme temporibus spasmiis tamen forte subortis parti- um inferiorum, remittentibus. Temporibus quoque anni singulis; æsti- vo maxime, magna utilitate usurpari possunt; nam exsiccatas partes emolliunt atque humectant, & membra motu ac labore delassata, refici- unt. Commodissimum cæterum convenientissimumque adhibendi pe- diluvia tempus est matutinum atque vespertinum, quod nempe pran- dium, coenam, ac horam somni consuetam præcedit. Prout etiam in- tentionis ratio est, aut affectuum gravitas minor aut major exigit, se- mel aut bis in hebdomade, aut alternis diebus, aut singulis, imo etiam bis

bis in die, exigente circumstantia rerum, possunt adhiberi. Notandum tamen hoc est, quod observatio docuit, quod si præter necessitatem frequenter nimis adhibeantur, speratum tandem effectum vix præstent, iis enim natura, ut & aliis facile adsuescere solet. Nec est, quod climatū diversitas eorum usum facile prohibere possit, ut quidem quidam de aliis balneis particularibus in sequentibus adducendis volunt.

§. VI. Subjectum ergo pediluviorum, etiam me non monente, primum & proximius sunt pedes, & omnes quas continent partes, nimirum non tantum cutis cum sua cuticula, tegmen illud corporis extremum atque commune ex variis stratis varie inter se connexis contextum, sed & quæ subjacent ipsi fibræ carneæ, musculosæ, tendines membranæ, venæ & arteriæ, miliares illæ glandulæ a Stenone inventæ cum suis excretoriis vasis ac poris, nec non nervi cum papillaribus Malpighii eminentiis nerveis, tactus organo, atque ipsa tandem ossa cum cartilaginibus blande afficiuntur, & vel emolliuntur, aut subadstringuntur, roborantur, firmantur &c. prout materialium, quæ balnea hæc constituunt, indoles fert; Simul p. n. forte his partibus illarumque poris inhærentia, ut humores extravasati & subsistentes, coagulati, impacti, ut serum & sanguis, quorum schemata tumores & fuggillationes sistunt, ac indurationes in clavis pedum, tophi in podagra nodosa, arénulæ in scorbuto &c. iis attinguntur, emolliuntur, diluuntur, resolvuntur, dimoventur ac excernuntur. Nec unguis excludendi, quorum succrescentiæ suppeditabitur major commoditas, cum quibus ex corpore quædam mala, integrum corpus sæpe inquinantia foras protruduntur, quare pro sanitate juxta pedum munditiem atque callorum sic emollitorum abrasionem quoque unguium frequens resectio est. Hoc simul illorum, novorum successioni occasionem dabit. Secundarium magis & remotius subjectum sunt, influi humores, sanguis & lymphæ ab eo sequestrata, cum spiritibus animalibus, qui simul ac varie afficiuntur, aut diluuntur, rarefiunt, moventur & abducuntur atque adducuntur, ut alibi ad minorem molem se recipiant, in motu sistuntur, refrigerantur aut repelluntur &c. Verum non in solis pedibus pediluviorum operatio immediata magis clauditur omnis, sed latius longiusque extenditur ea: Etenim vapores madidi, si imprimis sit denudatum a vestibis corpus ac tegumento superintecto, ut decet, colliguntur, ex vase subdito exhalantes, ascendunt, non modo ad abdomen, sed & ad pectus usque, collum caputque ac nares feriunt, ipsumque in os se insinuant. Quapropter volente G. FABRICIO HILD. vid. ejusd. *observ. Medic. Chir. p. m. 849.* pro clarifi-

canda oculorum acie & digestionis ventriculi instauratione ex appropriatis herbis cocta, sunt usurpanda. Qui vapores, imprimis si calidiores fuerint, sudorem magis ipso adhuc pediluvio per totum corpus eliciunt, porosque aperiunt, eosque ingrediuntur, quia tenuiorum partium sunt. Taceamus, quod exhalationibus his, aër ambiens in conclavi alteretur, alteratusque bene ad corpora redeat.

§. VII. Jam operatio pediluviorum, quæ sub administrationis tempore instituitur, & ut plurimum extra illius momentum quoque extenditur, haud obscure colligitur. Ea autem primo consistit in premendo & comprimendo, gravitate aquæ totam pedum compagem, & in ea omnes canales, vasa sanguifera, fibras carneas omniaque reliqua organa eaque secretoria, excretoria, glandulas &c. qua pressione & canalium angustatione materia inibi contenta & forte morbifica, exprimitur. Nam cum pediluviiis, ut balnei particularis speciebus, æque ac cum balneis universalibus comparatum est. Omne enim liquidum, quod ejusmodi constituit & in quod totum corpus, aut saltem quædam ejusdem partes immerguntur, densitate ac gravitate sua, qua aërem adhuc antecellit, (siquidem aqua, secundum Boyleum vid. Experiment. in tensam. physico-mechanicis, octingentis, imo millenis vicibus ætherem superat) impositum a peripheria ad centrum undique æqualiter undarum nitentium vi, circum circa premit, afficitque ac stringit, eo magis si aqua salibus gravida ac gravis sit, aut si ejusmodi ingredientium virtus accedat, titillatio lenisque vellicatio & stimulus in papillis nerveis factus, simul sollicitet; quæ actiones eo facilius instituuntur, quoniam muscoli, in motu constituti naturaliter in semet ipsos, contrahuntur. Fibrarum membranacearum fibris carneis motricibus intertextarum, beneficio, quæ a spiritibus animalibus tensæ & turgidæ, omnes tales crispantur. Quod & illud experimentum edocet, quo brachium nudum in tubum vitreum ampliolem aqua plenum immittitur, ex quo aqua musculis contractis descendit. Quam valida hæc pressio atque expressio sit, ex rugis & monticulis in supremis digitis, in quibus nimirum minor est musculorum vis, quæ cutem detinet, minorque inter ossa ac cutem distantia, qui balneo, vel per quadrantem horæ immorantibus fiunt, videre licet. Ex quo sanguis, cum humoribus ad canales subinde angustiores adactus ex pressione ibi majori hujus motus magis acceleratur, dividitur, discontinuatur, subtilior & fluidior redditur, atque simul id quod hæret liquidi aut movetur, in canaliculis quibusvis subtilissimis, vasculis, fibris, glandulis dimovetur, abripitur, derivatur, exsudat, & evacuatur foras, glandulis

dolis subeutanais, cum vasis suis excretoriis effectis & effluuiorum perpetuo transpirantium impetu in actum magis deducto.

§. VIII. Deinde pediluvia maxime agunt emolliendo atque laxando humiditate & lubricitate omnis generis fibras, quorum effectuum testis atque indicia esse possunt intra balneum vel per horulæ spatium commorantium flacida, rugosaque cutis. Quippe ad hoc sola & simplex aqua juxta modo indicatam pressionem fluxiditate & humiditate sua sive particulis suis subtilibus, lubricis, lævissimis, ramosis, oblongis, flexibilibus & mobilibus quibus prædita satis apta est. Quæ emollitio augetur, si emollientium incoctorum mucilago jungitur. Hæc vero in pedibus eo necessaria & utilis est, quoniam in iis cutis maxime indurefcit, crassescit ac callosa redditur, unde deinceps transpiratio sensibilis & insensibilis imminuitur aut penitus inhibetur, haud parvo totius corporis incommodo: etenim moderatus calor & sudatio pedum sanitatis integerrimæ indicium præbet. His simul diluunt eluuntque omnia, sive continentia sive contenta & acres humores obvenientes demulcent, temperant, illorumque motum sedant, ferocemque componunt.

§. IX. Insuper calida vel simplicia corporis calorem naturalem promouent & excitant, calefaciunt non solum pedes quos attingunt atque perfundunt, sed & totum corpus ejusque habitum turgentem mollem madidumque efficiunt, poros aperiunt, diaphoresin per eos augent, sanguinem mitem atque temperatum, tenuem, subtilem fluxilemque reddunt, spirituum animalium influxum in membra mobilia exsuscitant, quo simul particulæ crassiores & viscidæ inertes innatantes promouentur, attenuantur ac abripiuntur, laudabilis vero sanguis ad caput usque & cerebrum adigitur, ut spiritus animales ibi uberius generentur, omnesque secretiones & post eas quoque excretiones expeditius in toto corpore instituantur, ejusque difficiliorem circuitum per pedes ut remotas longe a corde impellente parte promouent, verbo, circulum sanguinis sic per totum corpus liberum & æquabilem, expeditum auctumque efficiunt totumque corpus ita disponunt, ut criticæ evacuationes optime fieri possint: Hinc facies florido colore superfunditur ac si postea pulsus tangas, celeriores eum deprehendes, quod nec chirurgis ignotum est, si ex pediluviiis venam aut in pede aut etiam brachio secant, sanguis floridior fluidiorque faciliusque e vena secta exit, atque etiam hac ratione universo corpori profunt. Hæc vero composita magis & vi medicata, quæ incoquuntur ingredientium adjuncta fortius pro earum ratio-

ratione se exerunt, magis penetrant, discutiunt magisque rarefaciunt sanguinem atque humores, &c. Sic enim ordinario invitatur & sollicitatur iisdem rarefactus & mobilior factus circulans sanguis, ut ad partes has inferiores prius bene fricatas leniterque vellicatas & emollitas atque fibrarum tensione & resistentia ac crispatura forte dolorifica temperata, imminuta correctaque sicque dispositas, ut humorum affluxui minus resistent, laxatas apertas majori nisu affluat influatque & quasi adducatur & majori impetu quaquaversum nitatur, ac superiores deserat partes. Sanguinis enim, ut omnium fluidorum motus & affluxus, ita se habet, ac canalium & vasorum resistentia, adeo, ut hac imminuta plus adfluat, ea aucta plus alteri accedat, quo & demto, quod molestabat, doloris mitigatur exacerbatio. Ea etiam motus fluidorum, sanguinisque circuli, in partibus consensio est, ut si in aliqua ejus parte sanguinis circulatio acceleratur, in universa sanguinis & humorum massa motus & circuitus quoque intensior fiat, & incallescere incipiat, ut a vehementiori vocis & loquelæ exercitio, a cantu tubarum, & vel a manuum saltem fortiori frictione ac agitatione, id evenire quivis comperitur. Ejusmodi mutationem in sanguinis humorumque motu & ad partes adfluxu, quæ sæpissime admodum notabilis est, solidarum partium, fibrarum tensio & remissio efficit, quæ motus species hodie motus tonicus vocatur, & ejus usus in pathologia ac therapia a binis illis celeberrimis Viris Baglivio atque Stahlio præclarissime iterum est ostensus, cujus vestigia equidem jam apud HIPPOCRATEM inveniuntur, quando *lib. de locis in homine §. 15.* scribit: *Fluxiones propter frigus fiunt cum caro in capite & venæ tensæ fuerint. Hæ enim horrente carne & ad angustias perveniente adstrictæque & excludente humiditatem exprimunt, & simul carnes ipsæ contra exprimunt ad angustias pervenientes, & capilli sursum erecti fiunt, utpote simul undiquaque fortiter compressi.* Alibi quoque passim & in specie *Lib. de Virg. morbis* sanguinis motum ex una parte ad alteram translativum notanter expressit. Hoc modo deinceps paregoricam & dolores sedativam virtutem, edunt pediluvia, tam relaxando fibras, quam poros aperiendo, & retentos acres humores, dolorum causas, transpirare faciendo: A pediluviis enim bene conquiescunt & dormiunt lavantes & pedum calli molesti & dolorifici protinus possunt removeri. Simul quoque obstructions tolluntur, cum coagulatae impactæ hærentesque moleculæ, simul abripiuntur & quasi abrasuntur. Ob influentis aut influxuri humoris in superioribus sanguinis quantitatem imminutam, pedes tali modo calida aqua perfusi, tument, rubent, ac extracti adhuc madore

&

& sudore perfunduntur. Intererit in memoriam revocare, quod compertum sit, quando humor, serum aut sanguis alicubi effluit, vasa depleta ex reliquis partibus corporis, liquida quasi imbibere, sicque ex toto ad unum exitum tendere, quod non modo sanguinis per venam sectam fluxus sed & serum in purgantibus, maxime in hypercatharsi, etiam per glandulas intestinales, ex universo habitu eductum, atque lethalis tristisque eventus, quando purgantia in, variolis, morbillis, purpura, petechiis cutem jam occupantibus, imprudenter propinata, ostendunt, ex quibus revocata ad interiora malignitate, brevi temporis intervallo maculæ disparent, cum summa virium prostratione, præcordiorum anxietate, torminibus ventris atrocibus, convulsionibus immanibus aliisque symptomatibus funestis subsequenter, conf. DIMERBRÖCK *Histor. Variolar. & morbil.* & HAGENDORN. *Obs. Cent. I. Hist. 77.* Ad hæc perspectum est, stimulantia in distans quoque operari, sive remotissimarum quoque partium materiam peccantem ad stimulorum emissaria derivari, quemadmodum v. gr. vel digitorum saltem torsiones vehementiores & velociores apoplecticos excitant, ut Laurent. Bellini de sanguinis missione habet. Ex quibus patet, quantum sit necessitatis in Physica ac Medicina, ad rationalem remediorum modum operandi declarandum, nosse doctrinam de motu.

§. X. Ex his hucusque memoratis sequitur, levamen inde capere partem, quæ circulatione tardiori seu imminuta & irregulari hætenus premebatur. Exinde etiam sequitur, quod per poros patulos transpirent rarefacti, liquati, divisi, discontinuati atque resoluti humores ac secedant, & per transpirationem non modo insensibilem sed & per sensibilem sæpissime eliciantur; per quas motiones & diminutiones, sanguinem ad quamlibet mutationem disponere possunt.

§. XI. Nec dubium est, quod jam antea præsuppositum, quin & per ipsos cutis poros laxatos, ad intimiores compagis recessus pertranseat, repens & præsertim vigente calore adhuc attenuata, magis mobilis & pervadens reddita aqua, sine perspirationis imminutione, potius ejusdem promotione, quod ex adductis de compressione aquæ & expressione, emollitione, fluxilitate humorum majori inducta, &c. hariolari licet. Quanquam hæc aquæ penetratio per poros cutis, quæ ob squamulas a Malpighio & Læwenhoeckio detectas, quæ ceu valvulæ introitum & difficiliorem ab extra intro reddunt, & contrarios motus quos involve-
rent, multos haud infimi subfellii Viros adegit, ut nesciant quo pede in hoc bivio utantur; Adeo dubia est sententia iis.

idonea est, ob particulas suas lubricas, flexiles, five simplex ea sit five medicata. Videmus enim eam tepidam quidem & in vapores resolutam, vel durissimas animalium partes sic emollire, ut diffuant fere, rursum videmus, eam, non solum, per poros vesicæ urinariæ inflatæ, per quas aër haud trajicitur, in ejus cavitatem transire, ac indita salia fixa per deliquium solvere, sed & notum in vulgus est, sicca ac densissima boum coria, sola aquæ affusione tota madefieri ac mollescere. Ulterius per experimenta per funem madidum affixumque ei lapidem atque pelliculam a cranio detractam aliaque e. gr. cum folliculo vitreo &c. instituta probavit, supra laudatus BELLINI *de sangu. miss. p. 146. seqq. usque ad p. 152.* Conf. & SANCTORIVS in *Sect. II. de a & a.* Testes quoque hujus rei sunt multi effectus, qui ex balneis proficiscuntur, ut sitis mitigatio, a calculis doloris sedatio, illorum facilis secessio aliique eventus, in sequentibus indicandi, aut qui alias ex balneorum usu aliisque effectibus medicis adeo multis ex epithematum aut fomentationum emollientium &c. applicatione, scabie pedum retroacta, &c. perspiciuntur. In hoc balneorum usu, præsertim pedes illorumque conformationem & structuram, circa quos versatur, considerare juvat, qui ob ossa, quæ cedere non possunt, quoque in furis majorem in cute distantiam supra pedem stricte sic vulgo dictum, & intra calcaneum & suras minorem a cute distantiam, obtinent, quæ pressionem penetrationemque fluidi moderatur atque determinat.

§. XII. Per se adhuc sequitur frigida pediluvia ex aqua frigida, refrigerantibus & adstringentibus, nitro victriolo, foliis rosarum rubrarum nymphææ albæ, sedi minoris, portulacæ, & similibus parata, partes stringere & poros constipare, sanguinemque & humores intro pellere, cingere, adeoque & refrigerare, vapores calidos, ne exhalent, prohibere, illorumque quantitatem inibi augere, roborare fibras motrices eorumque tonum firmare, restituere & ad contractionem eas armare, ut fortius impellant humores, ut inPELLI dein- & fortius ab humoribus rursus queant, sicque etiam humorum cursum eo convertere & velocitatem eorum augere atque accelerare simulque inibi hærentia dimovere. Hinc etiam fluit, quod dici possit: aquam adhibitam modice calidam calefactos refrigerare, frigidam frigefactos calefacere; conf. DVND. LIDDELIUS *Art. med. Lib. V. c. XXIX.* Quo velut in transcurso quodam, ad majorem tamen dictorum explicationem dicamus, vix nos habere censendi ambiguum, repellentibus, refrigerantibusque quandam intercedere differentiam, quam vulgo negligunt, aut non satis attendunt medici. Etenim

nim refrigerantia, quatenus actionem, quam tonum vocant fibrarum motricium, blande eas constringendo porosque interjectos arctando erigunt, restituunt, firmant, ad resistendum, aptam partem reddunt atque impellunt ut fortius agant, qua actione constrictoria materia in tubulorum cavitate hærens aut influens promovetur; exprimitur, expellitur & aliorum regurgitare cogitur, qua ratione ad discutientium resolventiumque naturam eatenus accedunt ac in principio inflammationum &c. conveniunt sæpiusque profunt ac rarius obsunt. Sic in palæstra læsi oculi aut genæ a globuli gladii frigidi opportuna applicatione, a sugillationibus & maculis cœruleis & fulvis defenduntur, & a contusione ista dilatata & expansa fibræ, blande constringuntur, & sanguis subsistens aut irruens ad suum motum reducitur; Repellentia vero vel poros penitus obstruunt, fibras corrugant, humores vel materiam vitiosam retrocedere fortius faciunt, ut mercurialia in scabie, unguentis illita & rarius ideo conveniunt, vel humores illos tantum & fortius coagulant ac potius detinent, ut v. gr. oculi debiles & inflammati a frigida aqua perditæ læduntur, imo visus, humoribus coagulatis abolitur, vel potus frigidus calenti corpori superfusus, phthisin & pleuritidem, animi deliquium aliosque effectus funestos, imo gangrænam & sphacelum atque adeo repentinam mortem inducit, de quibus atque aliis non una hinc inde observatio prostat. Nobiscum (ut ad rem iterum deveniamus) conveniet, pediluvia frigida eximium usum præstare, qui in animum revocet, quanto lavacra frigida, hybernis etiam algoribus apud veteres, ex usu fuisse, ut literarum monumentis prodiderunt DION. CASSIUS *Lib. LIII.* & ex hoc Xiphilinus. PLINIVS *H. N. Lib. XXV. C. VII. Lib. XXIX. C. I.* GALEN. *Lib. III. C. VI. de tuenda sanitate*, AGATHINVS, cujus fragmentum extat *apud Oribasium Med. collect. Lib. X. C. VIII.* Prævaluit semper balneorum frigidorum usus, atque calidis saltem imbecilla corpora præparabant, ut in frigidis corroborarentur, Carmis Massiliensis Medicus, ætate Neronis J. R. damnatis prorsus balneis calidis ægros in lacus & flumina immerfit. Tuncque scribit PLINIVS l. modo citato *Lib. XXIX. c. I.* videbamus senes Consulares in ostentationem usque rigentes. Quam frigidam lavationem recentiorum quidam probaverunt, quo satis erit nominasse Joh. Floyerum, Anglum de balneorum frigidorum usu tuto & utilitate. Eandem materiam tractavit F. Fuller in *Medic. Gymnast.* dicitque balnea frigida prodesse propter actionem, qua spiritus repellunt impelluntque, ut unitis viribus materiam morificam aggrediantur eaque calefacere, poros occludendo, ac effluvia ca-

lida cum spiritibus aëreis conservando, eorumque elasticitatem augendo, fibras ad contractionem armando movendoque. Ampliores atque specialiores operationes in sequentibus videbimus.

§. XIII. Fluunt exinde, vel tacito quasi pede, varii pediluviorum, in fanis ægrisque eximio cum fructu applicandi usus, aut qui tam ad sanitatem integram conservandam, & tam ad morbos præcavendos, quam eos curandos, utiles sunt ac apti. siquidem in antecessum & in genere hic monemus, omnes illos morbos in sequentibus recensendos, pediluvia quandoque & justo tempore adhibita, utilissime avertere. Nimirum tam alterant quam evacuant, abstergunt, secernunt & excernunt, laxant, resolvunt, discutunt, subadstringunt, dolores sedant, ad somnum placidum invitant, expansionem ipsis humoribus inducunt, dirigunt, derivant, avertunt, revellunt, attrahunt, roborant & transpirationes, sudores & urinam provocant. His forte ex his scopis, revulsorius cum derivatorio, qui motum humorum perversum & auctum restituendum & corrigendum respiciunt, scrupulum movere possit, quibus explicatu difficile est, quomodo hi cum circulatione sanguinis stare possint, & qui antispasmi veterum, cuius HIPPOCR. *Lib. VI. epid. S. II. T. VIII.* conf. & FOESI *d. i. § p. 65.* GORR. *p. 40.* atque GAL. *lib. de hirud. § revuls.* & *Cap. III. Lib. V. M. M. cap. III.* meminerunt, cum Helmontio ludibrio habent, ac si, post Harvæum, sanguinis circulatio incognitæ repugnent ejusmodi auxilia revellentia adeoque plane inutilia essent: Ratione tamen & experimentis confirmatur, revulsionum in morbis utilitas; simul ac enim minuitur vel tollitur resistentia sanguini per vasa propulsio, in quodam corporis loco, illico majori velocitate huc ruit atque derivatur. Quos tam ad GALEN. *de curat. rat. per sangu. miss. Cap. XIX. V. method. med. C. III.* FERNEL *Lib. II. de V. S. C. V.* SENNERT. *Instit. L. V. P. II. S. I. Cap. XVIII. § XIX.* B. D. BOHNIVM in *Dissert. de revulsione cruenta* qui fusius hanc rem declarant, remitto. Nec ego ita sentio, ac si pediluvia in revulsione (potius avulsione) quæ humorum in partem aliquam ad quam ferri non debent, cum impetu ac violentia quadam irruentium, per remedia & in parte contraria aut satis remota, adhibita, retractio & aversio est, aut in derivatione, qua humores membro affecto imprimis imminentes, ac jamdum inhærentes molesti, ad locum vicinum declinantur, humorem aut materiam & affectum parti remotæ, aut actu aut vicinæ incumbentem, in motu eoque leviori, vitioso adhuc constitutum, immediate retrahant aut morbificam materiam attrahant, sed quod affluens & ex toto ambitu uberius & mediate pedes versus regurgitet,

giter, ac materia peccans una cum laudabilibus humoribus mixta adhuc remeet ut v. gr. (taceamus jam rationes mechanicas theoreticas) videamus post purgantia, præter rationem exhibita ut & venæ sectiones, aut hæmorrhagias, efflorescentias ad cutem, maxime malignas, petechias, variolas, ad interiora denuo cum pernicie ægrotantis, recurrere atque in corporis habitu evanescere. Sic & empyematicis, dato sinistre purgante, a pulmonibus ad alvum divertit morbus & diarrhœa incurabilis necat ægros. Similiter in pleuriticis & suppuratis, donec alvus adstricta est, expectoratio feliciter succedit; verum alvo lubricata nimium, omnia deorsum trahuntur ac superveniente diarrhœa sputum supprimitur. Nam dum præsertim emolliunt has partes inferiores pediluvia, simul rarefaciunt, id est, ad majus spatium extendunt, ut quaquaversum majori impetu nitantur, humores & obvenientia quæque simul moveant, disjiciant atque abripiant, sanguinis versus superiora loca restrictionem relaxent ac canales forte adhuc arctatos, contractos, concidentes, conclusos, obstructos, per longitudinem excurrentes, extendant, erigant, recludent atque liberos reddant, viasque præparent & sic præter effectus alterantes & evacuates, etiam hunc præstent, ut influi humores aut parti alicui proxime imminentes & jamdum inhærentes in superioribus partibus, præter quantitatem & qualitatem, etiam motu aut impedito, aut ataxia & ferocia, quando nimirum ad partes impetuosius & confertim magis feruntur, ac ex his non commode nec secundum proportionem affluxus, sive quoad quantitatem sive velocitatem, remeant, peccantes, deorsum sollicitentur, deriventur, avellantur & avertantur, unde tendentia atque ipse affluxus eorum ac impetus, in pedibus major procuratur, ab aliis magis reflexus temperatusque atque immoderatio compositus, neque ulterius tantam molestiam creant, alia determinatione inducta & alibi relaxatione ubi sanguis etiam compingebatur quasi & hærebat ut & in statu naturali alias, spiritus ipsi animales æqualiter per nervos in corpore fluentes, ab objectis moventur, pro diversa conditione & modo afficiendi, quorum variis motibus & determinationibus agitantur. Quemadmodum in hunc ipsum finem etiam a practicis in variis morbis periculosissimis, ac ubi symptoma aliquod grave vehementius urget, aut humor peccans affluxus partem infestavit diu, excretiones nempe in aliis excretoriis promovere, præsertim in inflammationibus, hæmorrhagiis, & similibus venæ sectiones in pede, scarificationes, cucurbitulæ, frictiones, ligaturæ, fonticuli, vesicatoria, hirudinum suctus ut & alibi, vomito.

mitoria per alvum purgantia, clysmata, diuretica, sternutatoria, svadentur, celebrantur ac fide eventorum comprobantur. Siquidem & hoc tanquam regula practica bene tenendum, in morbis habitualibus, pertinacibus & longis, chronicis maxime evacuationibus revulsoriis iisque sæpius repitis pugnandum esse, ut nempe motus morborum vehementes adeo sæpius atque diu repetiti, humores versus certa loca dirigentes sic componantur ac sedentur, alias reliquus labor frustraneus erit, imo morbus peior redditur. Sic quondam Hippocr. V. aph. 5. Sect. V. mulieribus ad cohibendum nimium menstruum fluxum cucurbitam mammis apposuit, atque Aegyptii incisiones in furis cruentam instituebant, de quo medicationis genere PROSPER. ALPINVS de *Medic. Aegypt.* est videndus. Quid notius in foro medico est, quam quod v. gr. in tussi, humida purgantia, quibus mucum copiosum ex pectore ad alvum retrahunt, divertunt atque ejiciunt, præscribantur, aut quod per eadem in fluore albo, pertinacissimo malo & gonorrhoea, ubi ingens sæpius viscidorum humorum copia ad has partes affectas adfluit, eorum nimius apulsus avertatur, ac aliorum derivetur aut etiam quod laxantia saltem mature adhibita, aut morbum in prima modo herba suffocent, aut immania symptomata mire leniant, in cephalalgis, odontalgis, asthmatibus spasmodicis, doloribus, hypochondriacis & similibus enormibus pathematibus. Quis est, qui non potius crederet, laxantia ista non tam acrimoniam dolores producentem, ex partibus affectis subducere illico, quam motus aliorum dirigere & a partibus superioribus sensibilibus ad inferiora invitare. Si applicationem igitur ad pediluvia addere velimus, unicum saltem exemplum suppeditare placet: pediluvia ex simplici saltem aqua tepida constantia, in narium hæmorrhagiis symptomaticis enormibus, retrocessionibus exanthematum, variolarum morbillorumque ac multa mala & periculosa symptomata producentibus, utilia maxime ac necessaria sunt.

§. XIV. Ulterius, uberius ac explicatius de multifario ac amplissimo pediluviorum usu, verba facturus, statim in limine quasi haud in leve propositi momentum, præsuppono, pedibus utpote partibus nervis, membranis & ligamentis abundantibus, unde titillatio admodum sensibilis in plantis pedum, fluit, cum toto corpore singulisque propemodum membris ac partibus ejus cum capite maxime & pectore earumque functionibus intercedere, per nervos maxime, quorum propagines in soleas pedum usque excurrunt, singularem magnumque consensum ac commercium. Idcirco horum vulnera sævi dolores, horrendæ convul-

vulfiones & lipothymix subitæ atque verendæ comitantur. Condolent sic facile nervosa, nervosis. Etenim ut corpus secundum Hippocratem transpirabile, ita & eo modo sensibile est, quia machina, cujus structura ita est comparata, cujusque partes singulæ, tam solidæ quam fluidæ inter se junctæ ita cohærent, atque inter se communicant, ut vitium quoddam, hanc unionem in una saltem parte turbans, cæteras statim per motuum communicationem in consensum trahat, ut inde regulares motus in ea turbentur. Quem partium consensum describere voluit HIPPOCR. *Lib. de Alimentis* sic scribens: *Confluxus unus, conspiratio una, consentientia omnia.* Et *Lib. de locis in homine* §. III. *Si quis minimam corporis partem male afficere velit, tum corpus affectionem sentit, qualiscunque tandem ea fuerit, propterea quod minima corporis pars omnia habet quæcunque & maxima.* Quivis in se ipso experietur, pedibus frigore affectis, totum corpus algere; calidis vero iisdem servatis, inclescere; quare si pedes adversum omnem frigoris vehementiam muniverit etiam pluribus tegumentis, non peccabit, sed capiti unum idque leve vel exiguum sufficiet, atque adeo per calorem paulo intensiorem, reddet onerosum. Considerantibus liquet, in plurimis morbis nusquam vero magis quam capitis & pectoris catarrho, asthmate, phthisi &c. antecedere aut intercurrere pedum refrigerationes, easque ex errore inductas, ex frigore incaute admissio, varia in variis producere mala, quod innumeris exemplis confirmari posset, si circa hæc longius immorari animus esset, & nisi frequens & quotidiana experientia ipsa, id ipsum moneret. Sic v. gr. (ut ex multis pauca saltem indicemus) exempla obvia sunt, quod ex levi pollicis, in exsectione unguis claviq; pedum cum scalpello, læsione, in pede aut planta pedis, tendinis aut nervi punctione facta, insanabilis funestaque ut plurimum non modo inflammatio, gangræna sphacelus, sed & magna symptomata febris, deliria convulsionesque inducantur. Sic Critonem ex pollicis dolore insanum evasisse, & postridie mortuum fuisse, atque Harpalum ex pollicis luxatione; opisthotono periisse, apud Hippocratem in *Epidemiis* legitur. Plurimis notum erit, nudis pedibus super pavementum lapideum frigidum ambulantes, colicas & diarrhoeas experiri, unde & nota BRASSAVOLAE, quam refert *Cap. IX. Tract. de purg.* observatio est, qui Duci Ferrariensi, alvi obstructione pertinacissima laboranti, svasit, ut nudis pedibus, supra pavementum alabastrinum, aqua frigida conspersum, obambulet, ac postea quum quinquaginta saltem passus progressus esset Princeps, felici eventu alvus est ipsi soluta. De hoc pedum cum capite in primis consensu legatur Simon

Pauli de febribus malignis. Huc etiam faciunt observationes BARTHOLINI, quibus refert altera, fatuitatem ortam esse ex refrigeratione pedum, altera *vid. Epist. med. Cent. IV. 390.* quod pede sauciato convulsio maxillæ subsequuta sit. Illa item singularis N. TVLPII est *vid. observ. med. Lib. I. C. XXXIII.* quæ de dolore inter caput ac pedum reciproco, loquitur. G. FABRICIVS HILD. *obs. med. chirurg. p. m. 850.* curiosum satis consensum pedum, digitorum cum corde juxta illum cum capite recenset: Nimirum quidam thermis, Aquisgranensibus usi, calorem earum non potuerunt perferre, sed vertiginem, virium defectum notabilem, imo animi deliquium passi sunt; si vero digitos pedum extra thermalem aquam tenuerunt, nihil illorum symptomatum modo dictorum, perceperunt. A pedibus certe trahunt originem vehementissimi affectus ut epileptici alique plures morbi, continui & intermittentes. Ab istis periclitatur, integra spirituum animalium œconomia. Quemadmodum partes ad partes sua vitia mittunt, ita & sua levamina, ita etiam ut per pedum affectus multi superiorum partium præcaveantur & salvantur. Sicque v. gr. relaxatis his partibus in aliis, laxatio quædam per successum & consensum contingit &c. Præsuppono item, omnem motum nisi quid obstet ad rectilineam deorsumque inclinari, atque vias & glandulas ad recipiendos, transmittendos, secernendos & excernendos humores satis esse aptas & accommodas.

§. XV. Pediluvia itaque, (ut ad propositum magis pedem conferamus) optimo consilio practico atque cum eximio fructu adhibentur, non modo ubi vitium in pedibus cruribusque residet; sed & si alibi in parte aliqua vicina atque etiam longius remota, imo toto quandoque in corpore hæret, ubi humores, sanguis & lympa in aliqua parte superiori & quantitate & qualitate, motu & quiete & situ peccant, ac ubi non commode, nec secundum proportionem affluxus sive quoad quantitatem, sive etiam velocitatem remeant, (quod vitium a veteribus fere neglectum observatur) molestant, premunt, distendunt, vellicant, rodunt. fibras crispant, impetuosius hinc inde vagantur, ubi secretiones excretionesque debitæ, debitum successum ægre consequi possunt, sed stagnationes, vasorum distensiones tandem aut apertiones a vasis secretoriis & excretoriis glandularum a copioso sanguinis adfluxu dilatatis, aut inflammationes, morbi a ferosa colluvie oriundi, quos Piso per series egregie descripsit, & spasmi qui sanguinem maxime in plethoricis magno cum cumulo impediunt & ad caput reprimunt, ex quo multa verenda mala exsurgunt, atque convulsiones ataxiæ s. spirituum

tuum animalium, dolores, tumores &c. contingunt. Quibus casibus certe, pediluvii, & ejusmodi quæ sic divertunt, atque humorum adfluxum ad inferiora derivando & sanguinis circulum æqualem reddendo spasmorum quoque vim frangunt, melius prospicitur, quam si multis medicamentis natura saltem obruatur. Necessaria ideo imprimis sunt, quando natura certo ac statuto quasi tempore advescit tali modo per partes superiores & nobiliores humorum copiam excernere; sic enim ea optime quasi advocatur ac aliorum humorum impetus invitatur atque divertitur. Rursus felix eventus ab iis promittitur, quando natura per partes corporis infimas, crura & pedes excretionem molitur, aut alias adsveta transponere ac evacuare. Atque sic etiam occasionem suppeditant viamque sternunt atque faciunt expeditam, ut natura partibus, huic alterive affectæ subsidium latura, secundum suam dexteritatem, qua est donata, nobis tamen nondum satis perspecta, licet quotidie eam videamus, per vias ordinarias magis & propinquas aut extraordinarias alias etiam occultasque atque remotas adhuc exonerare contentumque depellere possit. Quorum motuum exempla occurrunt quando v. gr. in magnis suggillationibus aliisque sanguinis stagnationibus stagnantem per poros vasorum transsudare ac absorbere facit; aut pus in pleuritide per vias urinarias transponit, aut in ulcere pulmonum inveterato, per fonticulos factos, pus ejicit ejusque generationem avertit. Id quoque efficiunt pediluvia, ut inferioribus corporis partibus & sanis & integris applicata, avvocato humorum impetu, temperatior pacatiorque alibi fiat motus, ut expeditior efficaciorque remedii applicati institui possit operatio. Sit e. gr. tumor aut inflammatio in collo, avvocato sic magis ex illo humorum per pediluvia continuo impetu, medicamentata resolventia & discutientia intus propinata exteriusque admota citius faciliusque hærentes stagnantesque vel irruentes p. n. humores disjicere, depellere, resolvere queunt. Insuper ideo in omni morborum genere diaphoresi instituta, materiam evacuandam, mobilem, vias apertas, excretoria obstructa, vel spasmo constricta, expedita & libera reddunt, motus feroces moderantur & ad temperiem prius reducunt, quod in omnium imprimis chronicorum morborum curatione & ante omnia quidem, fieri debet.

§. XVI. Re itaque ita se habente, quod nimirum pediluvia non modo in pedum, sed & in reliquorum corporis partium affectibus utilissime adhibeantur, atque si igitur singularum partium, quibus miseri ægrotantes torquentur, vitia usumque pediluviorum in iis æstimare ve-

Rr

limus,

limus, recte a capite incipere posse ad calcem usque procedendo, videmur. A supremo modo rem aggrediamur, primumque id genus morborum idque frequentissimum, molestissimum, pertinacissimumque ponamus, quod cephalalgia vocatur, cujus variæ species dantur, ut cephalæa, hemicrania, ac clavus histericus, foeminino sexui magis proprius. Quippe caput propriæ constitutionis atque temperamenti, ut ajunt, occasione impotens, non difficile causam in sese etiam ex inferiori corpore tum admittit, tum gignit. In his omnibus speciebus iisque etiam inveteratis, siue dolores hos dicas gravativos & obtusos aut pressorios, lancinantes, pungentes, terebrantes, pulsatorios, ex quibusvis etiam causis proveniant illi, & qui continenter excruciant somnumque magno cum periculo tollunt, pediluvia egregie non quidem materiæ peccantis correctione, sed motuum saltem directione & avocatione, si modo non febris jungatur, succurrunt, tepida saltem & ex simplici aqua cum cineribus, lixivio aut herbis inodoris modo alterata ad genua usque, adhibita. Per experientiam enim didicimus, capitis doloribus affectos, herbas floresque quos vulgo incoquere solent, ut chamomillæ, quæ alias usitatissimum ordinarium pediluviorum ingrediens est, romanæ vulgaris & similes herbas odoratas atque fumosas vix ferre, sed majora exinde incurrere incommoda, vertiginem, maxime deliquium animi, immo non raro apoplexiam atque paralyfin, sexum imprimis muliebrem & eos quibus debile est systema nervosum: Siquidem de me hoc fateri necesse habeo, sc. foeminæ cuidam cephalalgia laboranti vesperi pediluvium parandum ex malva ordinavi, cui ea inscia chamomillam romanam ancilla incoxit, ex quo animi deliquium passa est, valdeque de sinistro pediluvii eventu conquesta, mox tamen ea ipsa noxam in chamomillam rejecit, cujus odorem vix unquam perferre se potuisse affirmavit. Notabilis observatio in *Ephemerid. G. IV. C. D. I. A. II. Obs. 247. p. 346.* ab Ehrenf. Hagendornio communicata legitur de cephalalgia statâ affligente hora, tanta cum atrocitate invadente, ut & futuræ capitis quasi hiarent illusis omnibus aliis remediis, solo pediluvio aliquoties repetito, felicissime curata, quo simul clariss. Observator advertit ex eo factum esse, ut aura frigidissima cum totius corporis horrore, a capite ad pedes descenderet. In erysipilate capitis periculosissimo cum tumentibus colli glandulis, in foemina, quondam, pediluvia singularis auxilii vidi, & recidiva sæpius ex ira aut terrore, aëris etiam non raro vitio revertens iisdem feliciter est aversa.

§. XVII. Aequae certa remedia in reliquis capitis affectibus pediluvia sunt: Ubi id in vertigine, maxime idiopathica rotatur & casum minatur, statim mane, quo tempore hic affectus frequentissime afficere solet, in tepidum balneum immittere, & per horam & etiam ultra se detinere expedit. De hac, observationem notam habeo, in viro quodam Silesiaco, qui ex hæmorrhagia narium, hæmorrhoidibus sive suppressis de vertigine per plures annos molestissima est conquestus, ex pediluviiis vero solis, auxilium reportavit. Qui apoplexiæ ut & catalepsi obnoxii sunt, & paralyfin metuunt, præsertim si pedum stuporem appropinquantis sævi hujus mali signum sentiant, aut si in abdomine spasmodici motus vagentur, qui sanguinem ad caput cum impetu pellunt, ii a pediluviiis simplicibus saltem aut lixivio alteratis mane aut vesperi tempestate imprimis pluviosa & nebulosa humida, crassa adhibitis, bene prius ad rubedinem usque ardorisque sensum fricatis pedibus, emolumentum haud vile optime possunt sperare: Et sicuti eadem ab his præservant ita & ad ipsam curam, utilissime adferuntur. Immo in iis capitis vitiis, quibus mentis error jungitur, qualia sunt deliria cum & sine febre melancholia hypochondriaca, pica & malacia, furor, ipsa phrenitis & paraphrenitis, mania, maxime vero oleosa calida pediluvia, quoniam magis lassant, laxantque corpus ac animum demulcent, somnum inducunt, apprime utilia sunt, qua de re & noctambulis svadenda; nec non lethargus carus comaque ea exposcunt. Non minus in epilepsia, in qua nimirum inæqualis circulus spirituum animalium est, ut in quasdam partes illorum influxus plane intercipiatur in aliis fortiori impulsu, impetu & motu celerrimo influant atque sanguis in capite cerebroque est congestus vasis capitis intumescantibus arteriis rubentibus valideque motis, facie intumescante, spuma ex ore fluente oculisque circumvolutis, auxilium afferunt, in ejusmodi præsertim, quæ habitualis & chronica appellatur & in abdomine partibusque extremis plerumque incipit atque cujus fomes in pede delitescit, ex quo ante paroxysmum frigidum quasi vaporem per totum corporis tractum ascendere sentiunt ægri, qualia exempla quædam vidi & hic inde legi ex. gr. in BORELLI *observat. Cent. 2. obs. 95.* in H. GRUBE *de Arcan. Med. p. 154.* Quemadmodum vero in tali, fonticuli in talo inuruntur, ita hic acria quoque exposcuntur. Incubum, si ante somni tempus in usum ducantur, avertunt. Vigiliæ in voluntarias, quas a nimia pororum cerebri tensione fluidique animalis impetuosiore per eosdem transitu, deducunt pathologi, quæ æstivi æstus tempore molestissimæ & in ardoribus febrilibus, quibus ni-

hil deterius accidere potest, in melancholia, deliriis maniacorum, furore aliisque morbis, ægre ferenda, & cum inquietudinibus frequentissimæ sunt, ac contra quas alia remedia interna sæpissime vix tuta ex emollientibus & anodynis, imprimis hyoscyamo, papavere erratico & sativo, malva, parietaria, atriplice, chamomilla, serpillio, foliis vitis, salicis viridibus nymphaea alba, endivia, lactuca, sulphure cocta, vel etiam frigida, saltem, melius tutiusque, aliis internis pariter & externis remediis, sistunt, demulcent somnumque placidum insomniisque turbulentis & anxiiis vacuum procurant & deperditum vigiliis & laboribus spirituum sensuumque vigorem reficiunt. In quem finem ALEXANDRVM APHRODISEVM *Lib. II. §. 47.* lotiones pedum olim frequentes adhibuisse atque dixisse; nervorum propagines in soleas pedum desinentes, aquarum mulcedinem, contrectationem blandam, ad cerebrum transmittere, legitur, ut & notum est, huic fini, ea Sennertum, Sylvaticum Platerum, Sim. Pauli & Celeberr. hodie Stalium magnis laudibus extollere. Quod beneficium vel a sola solearum pedum pingui illinitione aut etiam leni frictione expectatur, de quo observatio de Comitissa quadam prostat in *Eph. S. N. C. D. III. A. 7. & 8.* Pro hoc scopo si admittuntur, practici potius volunt, ut pedes extracti non abstergantur, sed humidi (cum humidum sit somni parens) relinquantur ac linteis saltem calidis involvantur, quo & magis ad somnum disponuntur isque longius protrahitur.

§. XVIII. Inter multiplicia curationum genera, quæ, oculorum affectus tam multi atque varii, adeo, ut secundum HIPPOCRATEM *epid. 6. text. 25.* multo plures habeantur quam ullius alterius partis, & Galenus CXX. eorum numeret, Jacobus vero Guillimæus centum observaverit & Joh. Verbrugge CXIII. prout refert STALPART VAN DER WIEL in *observ. Cent. Post. P. I. p. 772.* eique magni, exigunt, etiam non postrema pediluvia reponuntur, ex quibus suffusiones sive cataractæ, pterygium, hypopium, & præsertim lippitudo & ophtalmia frequentissimi sunt. In his enim omnibus valentia ea remedia ex emollientibus, anodynis, summit. anethi, foliis solami papav. albi ac specificis herb. verbenæ euphrasæ & rad. valerianæ &c. ipsis oculis deprehenduntur, qui humores cum impetu affluentes ibique hærentes avocant & divertunt, & accretiones cataractarum impediunt. Practici quidam pediluvium imprimis ex lixivio, ex cineribus ligni juniperini paratum ac mane vespereque, per spatium unius horæ calide usurpatum, laudant. In supra modo adducto H. GRUBE *tract. de Arc. Med. & S. PAULI tract. de febr. malign.*

malign. p. m. 80. legitur horum effectuum causam interdum in pedibus hærere, in quibus pediluvia ex appropriatis præ aliis necessaria erunt.

§. XIX. Quando gravedo & destillatio molestant atque nares intus materia obstruit, & frequentia sternutamenta fiunt, voxque offenditur, pedes in aquam calidam, lixivio, sulphure, serpillo, majorana & similibus herbis floribusque nervinis sale volatili oleoso præditis alteratam singulis diebus, vesperi præsertim immittere convenit, quia catarrhi id commune habent, quod circa vesperam increcant & extrema corporis, pedes maxime refrigescant, ac pedes fere percalidos servare juvat, ut e contrario refrigerationes pedum catarrhos inducunt aut eos exasperant pessime. In narium hæmorrhagiis symptomaticis seu præternaturalibus, in quibus alias & revulsio cruenta in inferioribus partibus cum successu administratur, pedes in simplicem saltem aquam tepidam fricationibus prius bene institutis, ponere quoque e re est; In his enim aliisque hæmorrhagiis nimis aut moliminibus eorum, quorum impetus ordinario, a spasmis sanguinem ad certam quandam partem adigentibus & vasa venosa ibi distendentibus originem trahunt, quæ variis congestionibus sanguinis, doloribus spasticis insequentibus, diversis in partibus corporis, ansam præbent, ante omnia necesse est, ut spasmodici illi motus componantur, & ad inferiora sanguinis & humorum impetus simul avocetur deriveturque, vel ut priscorum expressione adhuc quidam loquuntur, vapores ad caput & superiores corporis partes adscendentes revocentur, circulusque restituitur, obstructionesque referentur. Adhibita ea, a me sunt haud simplici vice, bono speratoque eventu, ex simplici tepescenteque saltem aqua constantia in narium hæmorrhagiis symptomaticis enormibus, retrocessionibus exanthematum variolarum morbillorumque ac multa mala & periculosa symptomata producentibus. Quod a tepidis fit, a frigidis imo frigidissimis quoque expectatur, si imprimis hæmorrhagias passi, subito & improvise quasi pedes immergant, ut alias, eo malo, frigidissimam copiosam aquam in hunc scopum; collo, scapulis, cruribus, lumbis affundere, quidam assolent, aut alii qui armata manu ferro ac igne patientes adoriuntur plantas pedum adurunt aut vulnera infligunt. Per eandem sine dubio rationem R. SOLE-
NANDER *Seçt. II. Consil. Med. p. 118.* pro foetore narium, lotiones pedum frequentes, cuidam præscripsit.

§. XX. Aurium licet affectus sint pauciores, attamen quidam etiam occurrunt, quibus pediluvia apprime conducunt, tam sanguinem quam

Rr 3

serum

serum deturbando, ut sunt hebetudo auditus, ipsaque surditas, aurium tinnitus atque parotis. Testimonium hujus rei si desideres, surditatem curatam esse, lotionibus pedum & frictionibus ex lixiuiis & herbis quas nominant capitales per duarum septimanarum spatium semel factis, legas in FEL. PLATERI *observat. Lib. I. p. 109.* Aurium molestum tinnitum a narium hæmorrhagiæ suetæ emanfione, in foemina quadam Lipsiensi pediluvii sublatam esse, memini. Qua occasione simul quoque recordor viri cujusdam 35. circiter annorum, qui a pueritia efflorescentiam & exulcerationem molestam, pone aurem sinistram passus, variis ad abigendam illam remediis usus est, nihil tamen unquam proficientibus, post annum dein ætatis suæ 20. sponte emanfit, sed per hoc tempus, sæpe ex terrore aut ira, pristinum repetiit locum, quem pertinaciter satis retinuit; jam vero ex quo ira, qua sæpius irritatur, commotum se sentit, simul erupturæ pruriginis sensum percipit, illico pediluvia adhibet, brevique sic ea cedit.

§. XXI. Proximum est, ut de oris fauciumque morbis, de labiorum tumore, de odontalgia, item de tonsillarum tumore, de columellæ laxatione, frequentissimo atque inflammatione ejus, rariori malo, de angina item vera nothaque id quoque dicamus, atque pediluviorum laudationem atque commendationem adjiciamus. In immani dentium dolore, singulare solatium pediluvia calida asferre notat, modo nominatus F. PLATERVS in *obser. p. 380.* In dentitione difficili, qua sæpe ob distensionem & lancinationem gingivalis carnis, ab erupturo dente indeque natam inflammationem & convulsionem &c. complures puerorum, intereunt; Multo vero usu est confirmatum, pedum in calidam aquam immersionem, dentitionem facilem felicemque reddere, atque sanguinem & spiritus animales, qui in dentitientibus copiosius & impetuosius continuo ad gingivas moventur, aliorsum avocare, motum extraordinarium infringere atque componere, sicque incommoda multaue alia pessima symptomata, ptyalismum, tussim, vigilias nimias, febrem, deliria, ventris tormina, asthma, catarrhum suffocativum, convulsiones, epilepsiam, singultum, alvi fluxus enormes, aut præcavere, aut lenire optime. Curiosum est, quod hic simul adducere libet, pedum duntaxat, in dulcem tepidam aquam immersionem sensibilibiter, calorem & sitim per eum excitatam mitigare, Conf. CL. H. VOGLERI *Dietet. comment. Cap. XXIX. p. 210.* Imo cum illo laudato Auctore facio, asserente, hoc pacto longe citius faciliusque magnam sitim posse sedari, præsertim quando corpus ab æstu, aut a laboribus nimium incaluerit, quam copioso potu ingesto; tantum

tantum enim sæpius abest, ut sitis magna extinguatur, ut quoque potius accendatur.

§. XXII. Quemadmodum sæpius jam nominatus FEL. PLATERVS *Prax. Med. Tr. 2. Cap. IX. p. 387.* & SENNERTVS *Prax. Lib. II. Part. I. C. XXIV. p. 112.* in pleuritidis acuto pungente distendenteque dolore, ex stagnante sanguine, ut humor a parte affecta omni opera revocetur, acres frictiones & ligaturas artuum extremorum corporis, valde necessarias habent, ita & ubi varia, in pectore, præsertim in ipsis pulmonibus morborum genera fiunt, ut sunt modo nominata pleuritis, peripneumonia gravissima, periculosissimaque afflictio, pulmonum erysipelas, (con simile valde, distinctum tamen, quoad certa symptomata ac superficiali minorique periculo conjuncto malum) Conf. LOMMII *obs. Med. p. 132.* ut & dyspnœa asthma maxime siccum, ubi materia morbifica subtilis & qualitate peccat, tussis ferina & sicca præsertim imo convulsiva, strangulationes præcordiales suffocatoriae foeminis inprimis familiares, ipsa phthisis alia pulmonum vitia, singularis usus, nostra quoque præsentia remedia esse omnino autumo ac mecum multi medicorum fatentur, ex eo maxime, quod divertunt & deorsum trahunt: laxatis his partibus: tumente panniculo adiposo & in illo pituitoso nocivoque humore collecto &c. Quoniam pulmones mire sæpe infarciuntur sanguine ab eoque molestissime & periculosissime distenduntur afficiunturque, arterias venasque vicinas, nimium distendit ac impedit molesta moles, quo minus sufficienter ac debita in quantitate aër a bronchiis pulmonum excipi queat; pediluvii vero ab hoc onere iis utilissime liberantur, simulque impeditur ne huic similis denuo magna copia ad pulmones deferatur. Hos, si hæmoptysis vexat non minus eadem bene tamen temperata neque longius protracta, auxilio sunt, quia obstructions a quibus procedunt, auferunt, irritationesque præternaturales sistunt ac sopiunt, impetumque sanguinis aliorsum avertunt ac dirigunt insuperque roborant. Ideo & placent Celeberr. D. VATERO pediluvia ex centinodio, plantagine, bursa pastoris, alchymilla, radice symphyti rubiæ tinctorum, astheæ, liliorum alborum & subinde notabile levamentum attulisse, perhibet in *Disp. de hæmoptys. Tr. 23. p. 27.* Contra hunc sputum cruentum ac peripneumoniam, quos affectus aliquoties passus est juvenis quidam Lipsiensis, hyemali tempore ex frigore contracto, hincque habitus externi constrictione, majoreque exinde sanguinis parte ad interiora & maxime thoracem redundante, pediluvii calidis vesperi adhibitis feliciter se munire solet. Aptissima item sunt, si latera pectoris, quibus cingitur,

gitur, costæ cum pleura atque musculis intercostalibus, ex sero acri maxime dolore obtuso & gravativo magis, laborant, quod ægritudinis genus apud Auctores aliud atque aliud nomen habet; Siquidem alii pleuritidem spuriam, alii rheumatismum ac arthritidem intercostalem vocant. Quando asthmaticos vehementissimus metus suffocationis angit, maxime in affectibus flatulentis & hystericeis a pediluviiis calidis, certissimum & promptissimum auxilium promittit J. G. Glantz uti legitur in *HOEFERI Hercule M. Lib. II. cap. II. p. 104.* In cordis, cum quo atque pedibus singularis quoque observatur consensus, graviore affectu, quem palpitationem atque in leviori illo quidem, quem tremorem cordis nuncupant, a palpitone diverso, licet vulgo cum illo confundatur, in præcipiti virium lapsu, quem lipothymiam atque syncopen nuncupant, eandem laudem merentur, quoniam nempe copiam præsertim flatuum, ob alvum adstrictam interceptorum & intestinum colon cum ventriculo & liene sursum versus prementium, ut cordis spatium angustetur, educunt. Historiam collectam de Juris quodam Doctore Hassniensi ex pedibus refrigeratis, lipothymiam gravissimam cum cordis palpitatione, aponia & pulsu penitus deperdito, ex orci faucibus, pediluvio vini albi, gallici revocato, inveniens in *BONETTI Sepulchreto Lib. I. Sect. 13. p. 272.* Quo memorare juvabit, syncopticos saltem in planta pedis frictione excitari posse. Hic in mentem incidit, suffocatos pene v. gr. a fumo carbonum aut submersione in aquam per pediluvia etiam refocillari & in integrum restitui posse, hoc ut pro vero accipiamus, ratio non adversatur, cum per hanc incalescentiam pedum, motus vitales iterum excitentur augeanturque. *SACHSIVS in Ampelogr. Sect. II. Cap. III.* observatione, quam profert, testatur, pedum forti ac diuturniori percussione in aqua submersos & sine vita & motu jacentes, vita iterum donatos fuisse. In anxietatibus præcordialibus, a varia causa protractis, opem ferunt haud parvam & fortiora quidem. Nulli dubitamus, nostra remedia atque adeo contra polypum cordis aliarumque cavitatum commendare, quia diluunt, attenuant, spasmus sistunt, evacuant, quales scopi hic primario sunt formandi, atque sanguinis copiosum nimis affluxum præcavent & impediunt, sicque progressum illius circa cor facilitant & promovent. Hic simul adhuc quoque commendare lubet, alio loco forte omissum, hæc nostra remedia in incubo haud contemnendum juvamen afferre.

§. XXIII. Nullum prorsus dubium est, quin & in reliquarum porro corporis partium morbis pediluvia egregia sint, ut in inflammationibus

bus quibusvis, nominatim ventriculi & intestinorum, hepatis, renum & vesicæ reliquorumque infimi ventris, viscerum. In stomachi quibusvis propemodum vitiis, ea quoque utilia esse jam ex *PLINIO Hist. Nat. Lib. XXVIII. Cap. VI.* colligitur; Similiter tormina ventris, cædialgiam, in qua ordinario pedum refrigeratio est conjuncta, colicam, nephritidem, ex calculo dolores (spasticas enim in intestinis stricturas potenter relaxant;) urinæ obstructionem ex emollientibus & lithontrypticis confecta, leniunt, ac soluunt quæ & vaporibus ad abdomen ascendentibus sive tepore laxando, sive imi ventris & vesicæ musculos stimulando, diuresin movent, & sic calculi excretionem promovent, ulteriorem vero calculosam accretionem impediunt, dum sanguinem uberiores ex renibus divertunt & congestionem illius circa has partes auferunt. Diarrhœa ipsaque dysenteria, in quibus præsertim pedes calefacere ad fluxum sistendum, oportet, sic quoque compescuntur. Quando singultus molestiam facit, is sedatur per ejusmodi, quæ spiritus distrahunt, & e diaphragmate revocant aliorumque derivant. Cumque & manus pro hoc scopo, in aquam ferventem, cum euphoria immerguntur, pediluvia ferventia etiam hic locum habere, nullus dubito. Item in vomitu cruento, ut & secessione nigra per superiora æque ac inferiora suum locum obtinent, quoniam avertunt, demulcent, sedant & dolores sopiunt. In malo hypochondriaco, ea singularis utilitatis esse affirmat *ROLFINGIUS in Cons. m. p. 725.* Ea modo dein passionem hystericam singulis mensibus circa instans mensium tempus, aliquoties repetita præcavent ac præsentem auferunt. Cum & humores fluxiles reddant, circulumque sanguinis & humorum liberum ac expeditum ac novum impetum concilient, asseveratione haud dubia affirmare possum, pediluvia calida, suum officium haud contemnendum locare, in obstructionibus internis viscerum, lienis, hepatis, mesenterii ad tumores, scirrhus, hydropes certissime insequentes pronis, in hæmorrhoidum item mensium & lochiorum suppressionibus, ubi menses aut hæmorrhoides per insolitas vias, erroneo motu, aliorum pererrant, aut feruntur; ut in suam viam iterum dirigantur, qua de re prostant multæ & notatu dignæ observationes Auctorum. Sic vir quidam, moliminibus hæmorrhoidalibus cum dolore capitis per plures annos vexatus, quorum incommodorum levamen sentit, ex quo, statotempore, in naso ulcuscula fero sanguineque scatentia est expertus; pediluvii tandem circa excretionis tempus adhibitis, hæmorrhoides viam suam debitam, invenerunt. Menses felicius expedient, ducent & promovebunt, si melissa, origanum, mentha, ar-

temisia & similes species intentioni huic, alioquin aptæ, incoctæ sunt, tam balneo pedum, qua tali, quam vaporibus calidis, abdomen calefacientibus. Nemini paradoxon videatur, si & ad internas obstructions & ad mensium nimium fluxum uterique hæmorrhagiam, ipsum fluorem album, pedum lotiones calidas, commendem: quoniam enim ut plurimum obstructions spasmodicasque quasdam & intervallatas arteriarum contractiones internas, causam agnoscunt, eas vero ea optime tollunt, rem jam indicatam esse censeo, ut venæ sectio alias ac salia volatilia, in utroque casu, cum successu adhibentur.

§. XXIV. Nec sicco pede prætereundum est, pediluvia speciatim egregie subvenire & noxas insequentes præcavere, affectibus animi enormibus, ira atque terrore, maxime incerore affectis; Nimirum v. gr. irascentibus, sanguis acris ac fervidus commotus, non solum tum caput offendit, sed & ex partium heterogenearum raptu, pororum obstructione & spirituum animalium irradiatione impedita, vel nervorum præternaturali irritatione, ut & malignitatis inductione, unde vertigo, vocis privatio, venarum ruptio, apoplexia, paralyxis, convulsivi motus & epilepsia, febresque malignæ, invadunt. Hic & alibi ob sanguinem per arterias rapidius commotum, sed difficillime iterum trajectum, ac proin quasi stagnantem, dolores & inflammationes, hæmorrhoidum mensiumque obstructions & similia mala inducuntur. Sanguis sic violenter ac irregulariter fertur, ordinarie etiam extrema corporis petit, difficulterque iterum ascendit, & lymphæ quoque motum reductorium impedit, unde arthritis & œdematosi pedum tumores exoriuntur. Rursus in tristitia cor maxime contrahitur atque a terrore inprimis plethoricis spongiosis & sensibilibus, spiritus animales & sanguis, ad interiora magis, caput, pectus, cor depelluntur, & circulatio ejus inæqualis redditur ac crasis male destruitur, & sexcenta alia insequuntur, quorum apoplexia, cordis palpitatio, animi deliquium, anxietas præcordiorum, hæmoptysis, cardialgia, asthma, icterus, hydrops, vomitus, alvi fluxus, spasmi, convulsiones, epilepsia extremorum tensiones, refrigerationes & contractiones frequentissima mala sunt. Hæc omnia inquam pediluvia cum frictionibus, hos irregulares affectus, certius avertunt, & si pedes male iisdem affecti sunt, & stupore depravati, quod ordinariè maxime ex terrore accidit, incommoda exinde nata (*wenn der Zorn und das Schrecken in die Beine geschlagen,*) efficaciter auferunt. sanguinem fluidiorem & motum debitum circulatorium liberum & ordinatum omnium humorum reddendo, inordinatum compescendo eumque ex capite præfertim

fertim ad inferiores partes, revocando, quo & animum sedant placantque & ad requiem disponunt. Horum igitur ingredientia erunt: radices valerianæ, asari, bryoniæ, astheæ, levistici, raphanus, aristolochia, cyclamen, folia, cucumeris asinini, herbæ, sabina, artemissia, melissa, matricaria, pulegii abrotani, mercurialis, bacca, juniperi semina, nigellæ, carvi fileris montani, aquæ & lixivio, incocta.

§. XXV. Nec non eo modo, eadem ad molæ foetusque educationem promovendam, adhiberi possunt. Neque tamen quid impedit, quin eadem ex floribus chamomillæ romanæ & vulgaris præsertim decocto parata, ad foetum roborandum, vaporibus maxime exinde evolutis, totamque regionem uteri blande calefacientibus & roborantibus, instituantur. Si & gravidæ ante partus tempus, provide pediluvia repetunt, iis ad facilem & felicem partum, disponuntur. Post partum vero dolores, ex eo mitigant ea & lochia debito in ordine, conservant. Sigillatim monendum est, pediluvia foeminis illis, quibus per ætatem menses desinunt, frequenter instituta, ad præcavendos morbos, qui ordinario exinde insequuntur, & quorum magnus numerus numeratur, admodum conducibilia esse. Per adducta nullus dubitationi locus est, pediluvia vim suam quoque exerere, in varicibus seu p. n. venarum dilatationibus & a sanguine intra valvulas contento, imprimis si frictiones, simul ab inferioribus versus superiora instituantur; quod remedium pro sanguine divertendo laudat (SOLINGEN in den Handgriffen der Wundarzney p. 433. Ex observatione superius a Brassavola allata, inducimur, ut credamus, pediluvia frigida, alvi pertinacissimam obstructionem vixque aliis remediis cedentem, solvere posse. Sed neque calida hic & in ipsa passione iliaca frigidis cedunt, quoniam mire internas stricturas relaxant & motus in pedibus inchoati ulterius transferuntur: si etiam emollientia ea ingrediantur humida sua vaporositate, fomentationis adeo proficue explent vicem. Utilissimum igitur hoc remedii genus erit, ubi alvi laxatio indicatur & tamen per morbi conditionem vix licet interna præscribere ut v. gr. quandoque in variolis, morbillis aliisque cutis excretionibus, hystericeis affectionibus. Hinc suspicari licet, ea etiam diuresin movere & hinc in urinæ suppressione, a quavis etiam causa ea sit, haud simplici modo afferre emolumentum, maxime & si fluidum nerveum in sphincteris vesicæ fibras copiosius influat, & per excessivam earundem tensionem & stricturam, urinæ fluxui obicem ponat. In artuum affectibus fixis, curatorie in vagis præservatorie magis pediluvia eligeremus.

§. XXVI. Restant adhuc morbi quidam, quibus tota occupantur corpora & ubi morbus distributus est, per omnia sanguinis vasa & partium receptacula. De quibus animadversio sit, pediluvia non saltem in cachexia, leucophlegmatia in phlogosis, quæ totum corpus invadunt, sed & in omnis ferme generis febribus, convenire. In intermittentibus die intercalari ac ante paroxysmum potius eliguntur & lixiviis & herbis aromaticis cum vino aut etiam S. vini camphorato adhibito, ut vellicantia etiam & rubefacientia, carpis manuum admota, illarum paroxysmos mitigant. Sic ea KOZACK *lib. de sal. Sect. XII. Cap. X. p. 455.* in intermittentibus quibusvis jubet pedes lixivio calido ante paroxysmum immergere. In tertiana legitima GALENVS-*l. ad Glauc. C. g.* ea approbat. Quartanam pediluvio sanatam esse legitur in *Ephemerid. Nat. Curios. D. II. An. VI. Observ. 144. A. VIII. Obs. 28.* In putridis sic dictis quoque concedit P. DE SORBAIT *Meth. medend. p. 138.* ast non nisi signis coctionis apparentibus, vel ægro prius purgato ac non in ipso augmento, quia alias Rhase annotante, putredinem augerent, apostemata & horripilationes procrearent. In iisdem malignis æque S. PAVLI *Tr. de febr. malign.* suadet, quia per pedes, multa tertiæ coctionis excrementa exonerentur. In continuis vehementibusque urgentibus febribus ubi totum corpus exsiccatum internecionem accelerat atque sanguinis æstus ita tumescit, ut suo impetu ac pressione, symptomata gravissima oppressionemque circuli vitalis minetur, omni propemodum tempore bis in die ac præsertim circa vesperam ac noctem, usurpata, tepida maxime ac tantum non frigida, ex refrigerantibus quoque composita, ut aceto, nitro maxime, rosis rubris siccis herbis prunellæ, sempervivi portulacæ foliis, nymphææ albæ salicis, cucurbitæ, acetosæ, acetosellæ & similibus, sanguinem tunc temporis magis versus corruentem revocant & ad extrema magis transferunt, æquabilitatem humoribus inducunt, effrenum & resolutum spirituum & sanguinis motum, belle compescunt & naturam, quæ sola sibi minus sufficit, juvant, onus, quo premitur, levant, æstum restinguunt, deliria mitigant, somnum & requiem conciliant. Conferatur RIVERIUS *prax. medic. Lib. XVII. p. 312.* In lentis & hecticis, corpus lente consumentibus, taliamodo descripta, circa exacerbationis æstus præternaturalis horas ejusmodi post prandium & circa vesperam multi usus sunt. In catarrhalibus aliisque symptomaticis febribus pedes moderato calore & transpiratione per pediluvia servare usui quoque egregio esse potest. Sunt qui Sylvium secuti in variolis ad avocandas eas & ex facie præsertim ad nitorem conservandum avertendas, pedes

totos

totos frequenter in lac tepidum, demergendos svadent, ex quo etiam copiosiores in pedibus, paucissimæ, in facie erumpunt. In aliis laudabilis, in aliis vero deplorandus eventus est visus, siquidem contractiones & distorsiones claudicatioque per totam vitam non restituenda, ex acrimonia variolosa, ad pedes ubertim translata hasque partes membranosas & tendinosas corrumpente & distorquente sunt inscutæ. Pariter in febribus inflammatoriis post sectam venam multi usus sunt, quoniam, uberiores sanguinis affluxum a loco affecto, ubi locorum etiam inflammatio fit, diutius tamen usurpata, solvendo laxandoque constrictas inferiorum partium fibras, affluxum ad pedes divertunt & invitant. Ad sudores colliquativos sedandos utilissima pediluvia deprehendi ex frigida beneque temperata aqua incoctis injectisque rosis rubris siccis, foliis salicis, herba bursæ pastoris, nymphææ albæ & ex similibus herbis refrigerantibus, pulvere gallarum, nitri vitrioli. Rursus si sudores repressi fuerint, ut restituantur, eadem valent, sed calida, herbis solventibus decoctis additis. In his atque aliis corporis humani constitutionibus, pediluvia, secundum modum indicatum, utilissima & appropriata remedia sunt atque ad citam faciunt nec molestam aut horrorem incutientem neque fastidium parientem, sed tutam blandamque promittunt medelam. Atque adeo tutiora hæc reliquis balneis sunt, nam si juxta ipsum HIPPOCRATEM *Lib. II. de victus rat. sect. 4.* perhibentem, lavandi cupidos si bis de die lavaveris, non peccabis, etiam his non facile peccabis, si & vel frequentius sic lavaveris: siquidem in genere omni asseveratione affirmare haud dubitamus, morborum genus nullum propemodum esse, cæteris quidem paribus, quod in pediluviis, suum remedium non inveniat eaque emolumenta varia jamjam etiam indicata aliaque afferre. Atque interdum in optima etiam sanitate timendis, & media etiam in pace velut minacibus malis singulis v. gr. septimanis semel, bis, ter, rite a sanis adhibita bonam integram constantem valetudinem impetus omnes verendos, a partibus nobilioribus avertendo æquilibriumque debitum conservando ac evexiam conciliant, atque a morbis permultis præservant egregie. Ab HIPPOCRATE *V. Lib. de internis affect.* & GALENO *V. Meth. medend. Lib. XIV. C. XVI.* aquæ calidæ perfusionis mentio fit, qua partes corporis humani ad ruborem disponebantur atque evsarcolis conciliabatur. Nam pro sanitate est, pedes extremas corporis partes & fonte caloris, corde, quod dicitur, longe remotas, (hinc & manibus iis invalescentibus morbis magis refrigerantur, in hydrope, pedes frequentius instantur & moribundis

mors a pedibus ordinario propemodum ingruit) calidas semper servare & quandoque præter ordinarium modum excalefacere, atque beneficia, quæ largiuntur pediluvia superius indicata, procurare. Nec dum causas sanitatis turbant ac impediunt. Fertur de Italo quodam CXV. annum vegeto adhuc atque sano agente, a Cardinali quodam rogato, quibus remediis, vitam ad tam multos annos perduxisset, eum respondisse: cibum bonum manducando, pedes focculis velando, caput sedulo tegendo, curas omnes fugiendo. In specie monere volo eos, qui solennes & salutare sanguinis evacuationes, quales sunt hæmorrhoidales ac menstruæ in foeminis, ut eadem in debito ordine servantur, neque natura ad has excretiones tendens, turbetur, ut maxime circa imminens fluxionis tempus, pediluviiis utantur ac iis liberiores sanguinis cursum sibi procurent, ac multa incommoda simul avertant: Hoc solo medio atque remedio foemina quædam Lipsiensis meo svasu, clavum hystericum, quem alias sæpius est experta, pediluvio alternis diebus circa instans mensium tempus adhibito, præcavere solet. In ejusmodi rei exemplum aliam & sequentem observationem adhuc referam: Vir quadragenarius, a juventute ad 30. usque annum, narium hæmorrhagias frequentius est expertus, ex illo tempore desierunt, & frequentes tandem atque continuæ fere cephalalgia enormes, capitis gravitas, anxia & tristitia, subinde deliria, non raro colli inflammationes, sæpius cataphora, perpetui artuum stupores, affligebant. Varia, per plures annos adhibita sunt remedia; symptomata vero semper redierunt, spicæ stramineæ setæque fortius naribus sunt intrusæ, sed nec his eruptio potuit procurari, adeo non potuerunt hæc pristina molimina perrumpere, cogitatum est de narium in morem Aegyptiorum sacrficatione interna, quam PROSPER ALPINVS *de Med. Aegypt. L. III. C. I. & XXI.* delineavit. Tandem alio consilio inito, venæ sectionem admisit vir, bis in anno celebratam, juxta alia remedia appropriata interna, pediluvia bis quaterque ante cubitum adhibuit, quibus per octo jam annos diligenter observatis, pancratice vixit.

§. XXVII. Presso quasi tandem pede, pedum sequuntur vitia, membrorum maximæ æque necessitatis, quæ columnas velut totius corporis constituunt, in quorum structura magnus & admirabilis ordo elucescit, licet hæc nobilitate alias cetera pleraque antecellant, & abjecta in animali habeantur, ut patet ex GALEN. *Lib. III. de usu part. Cap. X.* In horum vitiis cum fructu adhibentur, ubi relaxandum, emolliendum, abstergendum, resolvendum, refrigerandum, firmandum, attrahendum

ac implendum est, & ubi spirituum animalium & sanguinis, ad has partes debilitatas, major affluxus procurandus, humores in partibus lente circulantibus, frigidi, laffi diluendi, fluidi & ad citatiorem motum apti sunt reddendi. Ex quibus primum nominanda podagra est; tantum enim abest ut noceant, verum, non tam ex repellentibus, sed ex abstergentibus, aperientibus, discutientibus, roborantibus & tonicis & emollientibus, v. gr. lixivio, sulphure, alumine, origano, serpillio, hormino, ligno Juniperi, foliis malvæ, parietariæ, verbasci, atriplicis, absinthii, artemisiæ, musco, quercino, roremarino, baccis, juniperi, salviæ, pulegii, chamomillæ, chamæpyti & similibus, cocta pediluvia. Cognovi practicum, qui ad dolores podagricorum in ipso paroxysmo corrigendos, pediluvia ex foliis arboris, nucum juglandium virentibus coctis & sale, pro arcano habuit. Alias ex thermalibus aquis Teplicensibus, Hirschenbergensibus, Emsensibus, Wisbadensibus, Aquisgranensibus, Badensibus tam Austriacis quam illis inter Rhenum & Herciniam sylvam inveniendis aliisque multis, secundum Guntherii Andernaci de aquis medic. recensionem & laudationem talia fiunt: Nam poros aperiunt, transpirationem promovent, aut roborant aut relaxant, dolores sistunt, arefactiones & contracturas impediunt. Sicque tam curative quam præservative & extra paroxysmum indicantur, quod & nobis magis probatur, præsertim ad firmandos debilitatos exinde articulos. Pro hac, podagra nempe atque immobili pede, lotiones pedum calidæ ex musto fermentante a P. HOCHSTETERO vid. *obs. med. posth. X. p. 434.* sunt laudatæ, atque *p. seqq.* aliæ ex sale, nitro & vitriolo, ut arcanum maximeque probatum, propositæ sunt. Imprimis ab aliis practicis multis, pediluvia ex urina puerorum aut vaccarum, commendantur, cum quibus Clar. Colbatschs Anglus in Tr. de Podagra, facit, qui fotum & pediluvia ex urina vaccæ fervida, sale marino soluto, summis laudibus, extollit. Nonnulli Anglorum hypothesein laudati Colbatschii secuti ferum tophosque podagricorum alkalicos in dicto tractatu pronuntiantis pediluvia potius ex aceto calefacto ut alkali peccans destruyente, eligunt. Nec est quod metuas pedes tumidos rubentesque fieri conspicias, quod & modo laudatus R. Solenander loco citato affirmat. Ad roborandos in arthritide pedes L. SCHOLZ A ROSENAV, Celeberrimus quondam Vratislaviensium Medicus pediluvium aquæ ferratæ, cui hypericum salv. urticæ, rosæ, lignum juajacum incoctum sit, in *Consil. Med. p. 675.* præscripsit. MATTHIOL. *Lib. I. C. LXXXVII.* tale balneum ex Junip. ligno & baccis admirandarum virtutum esse dixit. In horum numerum sequitur gonagra,

agra, sequitur & illorum commendatio & laudatio, si ad has partes usque profunde pedes immergantur. Haud facile vero svadere vellem in ipsis podagricis doloribus pediluvia, ex aqua fontana frigida, qualia quidam tam veterum quam recentiorum concedunt, quosque Gallorum Anglorumque quidam imprimis imitantur ac pediluvia frigida inditis lumbricis terrestribus contusis, svadent; facillime enim deploranda noxa accidere potest, maxime si in principio morbi adhibeantur, de quo sinistrum effectum referam: Scilcet, vir quidam quinquagenarius plethoricus, frequentes ex vino compotationes, commestationes amans ex svasu sui chirurgi in primo statim paroxysmi podagrici ingressu, pediluvium ex frigida instituit, sequenti nocte sedatis doloribus affectum soporosum est passus, qui ægre medici consilio & auxilio potuit curari, curatus tandem vigorem ingenii memoriamque imminutam reportavit. De alio scio, qui in ipso dolore podagrico ejusmodi frequentius usus est, tophos plurimum eosque prægrandes in pedibus sibi contraxit.

§. XXVIII. Affines dolores pedum rheumatici sunt, affinis quoque hæc medicatio est. In usu imprimis probatissimo pro his ea sunt, quæ ex formicis & a coriariis (Loh. Bäder) aut etiam urina puerorum petuntur. Sunt quidam veterum quam recentiorum, qui lavacra frigida in his recensitis morbis, æque optima censent. Nobis constat ratio hujus curationis apud Floyerum Anglum & Guastallum Gallum, in quæst. Med. Avenionens. superioribus annis modo ventilatis. Aequè ego confidenter affirmo, contra theumatismos pedum, pediluvia frigida magni facienda præsidia esse, magis tamen præservativa quam curativa, quoniam roborando, harum partium tonum, impediunt, quo minus peccans in partem debilem, humor irruat. Perinde in aliis pedum vitiis, in spina ventosa, rhachitide, tumoribus duris, pediluvia, vel naturalia vel artificialia ex vegetabilibus & mineralibus, alumine, nitro, vitriolo, sulphure, cineribus clavellatis, herbis, serpilli, roris marini, majoranæ, betonicæ, absinthii, scordii, lappati ligno guajaco, radice levistici, helenii, baccis juniperi, lauri &c. vel etiam ex thermalibus aquis supra modo nominatis, similiter commendari solent. In pedum stupore, ex terrore contracto, cum obmutescencia, paralyfi, frictionibus durioribus præmissis, pro majori sensibilitate, fibris concilianda, in fluxu sanguinis & spirituum advocando, humorumque dissipatione, pediluvia penetrantia, ex sale ammoniaco, aqua calcis vivæ & fuligine, sulphure, auxilium præsentissimum, tulisse recordor. In eorum pariter tremore, quem non
solum

solum podagra, sed & omnes ferme alii morbi chronici magni & periculosi exantlati relinquere solent ex roborantibus, odoriferis herbis &c. ea valent multum. Ejusmodi & vel emollientia, solventia vel resolventia acriora, in pedum atrophia & paralyfi ariduris & mala conformatione, magna utilitate se commendant, siue etiam ea vitia sint ex succi nutritii defectu, siue a sanguinis crassitie, aut motu impedito, siue partium transmittentium pororumque obstructione aut angustatione p. n. Nihil enim magis, his, a centro ad circumferentiam, evocat humores, partes emollit, pressura atque contra nitentia obstacula perrumpit, poros obstructione liberat, angustatos expandit, calorem, nutrimentum & vitam restituit & adducit, musculorum siccitates corrigit. Inter hæc numerabimus casum, quem Præses Tiguri Helvetiæ quondam vidit, in viro quinquagenario, qui per duos annos pedum paralyfi laboravit, quem tandem scabies foeda occupavit (quam mortis prodromum nonnunquam esse duobus exemplis BIERLINGIVS in *Thesauro Theoret. Pract.* p. 891. declarat) in quo pediluvia ex emollientibus, abstergentibus, nervinis optime cesserunt, absterfa exinde scabie solutaque paralyfi. Nec non alibi habet expertum, in contracturis pedum a mercurii in corpus recepti noxa inductis, pediluvia ex emollientibus & solventibus, egregie profuisse. In hujus declarationem lubet commemorare, quod commemorat C. D. RIDLINVS *Linear. med. anno 4to Jun. Histor.* 5. De aurifabro, qui ex deurationis labore, cum mercurio tabe contracta, balneum aquæ dulcis per aliquot horas insedit & mercurium e corpore suo hoc medio elicatum in fundo vasis vidit. Addimus adhuc aliam huc facientem historiam, de foemina quadam, cui ex abscessu pedis sinistri, totus pes erat contractus, quæ emollientia saltem pediluvia optima est experta. Qua occasione juxta ejusmodi curam non possumus non indigitare, cum apud medicos notum sit, in membris paralyticis quam frequentissime gangrænam a spirituum animalium defectu, ac partium paralyticarum immobilitate, qua tubuli a decubitu continuo, assidue comprimuntur, accidere, ad præcavendam eam atque avertendam in pedibus pediluvia emollientia, solventia cum multa frictione quoque utilissima esse. In paralyfi alias pedum pediluvia potius eliguntur ad quæ formicæ ova nidusque totus recipiuntur. Ab aliis frigida pro hoc scopo quoque, ad augendum motum, svadentur.

§. XXIX. Ad alias adhuc pedum labes pedem promovebimus. Qui ex gelu perniones pedum contraxerunt, optime sibi consulunt, si frictionibus simul bene aspero cum panno institutis in frigidam pedes

Tt

immit-

immittant. Quod monachis illis ex ordine capucinatorum, discalceatis dictis, qui per sævissimam etiam hyemen denudatis pedibus incedunt, solenne est, ut vesperi in vas ligneum aqua frigida, plenum, pedes repellant, noxamque omnem, quam frigus alias infert, avertunt. Quod experimento constat, cum pomis congelatis facto, quæ, aquæ frigidæ injecta, crusta quasi glaciali, haud ingrato spectaculo, conteguntur & conservantur, a calida vero læduntur & corrumpuntur. Quare & medici ex consilio Sennerti præcipiunt, ut membris frigore graviore tactis, aqua frigida, nix, rapæ congelatæ, fragæ & similia, primum applicentur, ita enim pori blande aperiuntur, tubulorumque æqualitas servatur, donec humores coagulati & impediti sensim fluidi iterum fieri, in circulum suum ac calorem pristinum naturalem redire possint; verum si calida mox admoventur, moriuntur ac decidunt, quia humores compacti ac coagulati impetuosius resolvuntur, & versus interiora moventur ac intruduntur, ex quo fibræ flaccidæ relictæ ac atoniam insignem passæ, vix amplius reducendam, exitio intereunt. Ad ictus & morsus venenatos quos vocant animalium, canum, serpentum, apum, vesparum, non absona quoque sunt pediluvia tepida, quibus melissa, mentha, salvia, serpillum, pulegium, hyperic. similiaque cum sulphure aquæ, aut quod melius est, aceto incocta, qualia & in fugillationibus pedibus inductis ac sanguine in grumos coacto hinc indeque hærente, valent. Ejusmodi facile parabilia remedia sunt iis pauperculis & ruricolis, qui nudis pedibus incedentes a rubigine maligna, pustulas & ulcuscula nigricantia, inducta gerunt. Conf. RAMAZIN. *Miscell. N. Cur. Germ. D. II. an. 9. append. p. 38. D. III. an. 9. obs. 93.* Hoyerus l. c. Talia propemodum adjectis alumine vitriolo cineribus clavellatis, vel ex thermalibus aquis in ulceribus pedum antiquis instituuntur, ac pro squamosis, putridis, cariosis, lue scorbutica vel gallica infectis, admodum familiaribus, in quibus ex caryophyllis, cum aqua, vino & aceto cocto, speciatim ejusmodi Galli probant. Talia quoque acria ex formicis, thymo, siderite, serpillio inprimis parata, inductis ante & post frictionibus durioribus synapi imposito, urticis cæsiōne vel etiam vesicatoriis applicatis, ut obstructions referentur, spiritusque per nervos recte influant, sanguinisque in vasis motus retardatus acceleretur, ac ita sensus quem nervi subtiliores, ac motus quem duriores præstant, atque nutritio quæ per vasa sanguifera absolvitur, restaurentur, in atrophia, ariduris ex paralyfi pedum crurumque e re sunt. Imo in posteriori affectu veteres Græci ad motum inducendum augendumque frigidam affundebant. Referatur

tur etiam, si forte podagra retrocesserit, aut retro acta fuerit, vel si ejusdem excretio segnius procedat, pediluvia emollientibus præsertim incoctis, magnum commodum promittere. De aliis ejusmodi scopis alia habemus exempla. Nimirum in foemina quadragenaria, ex retrocesso pedum tumore, asthmatica facta, & juvene, bonarum literarum studioso, ex scabie crurum pedumque, a linimento a chirurgo non satis provide applicato, ad interiora recessa, febrem tertianam cum convulsiva colica exortam esse, pediluviiis vero intentioni satisfactum fuisse memini: Nunquam adstringentibus repellentibusque pedum sudor est coerendus, quoniam a morbis liberat quam plurimis ista excretio, sed potius juvandus secundum illud Hippocratis effatum: quo natura vergit & per loca conferentia, eo eam ducere oportet. Sic & non una tantum vice habemus expertum, quod foeminæ, quas pector distinxit, svasu anicularum, pulverem stypticum & ramenta orichalci, ad reprimendum foetorem, soleis indiderunt, asthma convulsivum, spasmos ventriculi & intestinorum immanes, febrem lentam, hecticam, ardentem, epilepticos insultus & similes spasmodicos motus, nullis medicamentis abigendos, passæ sint; quibus pediluvia optime subvenerunt, morbus enim brevi exinde est curatus, symptomata mitigata & pedum sudores pristini revocati & laborantes, valetudini restitutæ. Etenim pedes, licet juxta manus extrema humani corporis sint, tamen per eos, plurimi fuliginosi effluunt vapores, qui retenti plurima quoque incommoda excitant, ideo Sennertus docet calceatis pedibus dormire admodum noxium esse. Eadem enim est harum excretionum indoles, eaque sulphureorum salium natura caustica, quod si ex nexu viscoso sanguinis extricentur, & ad interiora iterum recedant, immediate, maxime in partes corporis motrices agant, easque torqueant atque ægerrime afficiant. Affinis observatio, de tumore œdematoso retrocedente in corpus in Verbi Divini quodam Ministro quinquagenario cachectico sedentario, occurrit, cui femora & pedes intumuerunt, qui tempore hyemali, in templo non satis contra gelu, munito, tumore, quem per multos annos gesserat, retrocesso & exinde asthmatico facto, medicamentis ex antimonio diaphoretico, nitro cinnabari, camphora & similibus, venæ sectione etiam administrata, malum quidem subinde levantibus, sed non auferentibus, cui pediluviiis tandem adhibitis tumor pedum cum pristina sanitate rediit. Hæ & similes observationes de erysipilate retroacta & pediluviiis restituto, plures possent adduci, si ulterius evagari animus esset. Ad tumores œdematosos resolvendos tuto applicari possunt pediluvia

diluvia ex lixiviis & cineribus solutis, aqua calcis vivæ quibus incoqui solent, calamus aromaticus salvia flores anthos, majorana, mentha, ruta flores chamomilli, beton. origani, absinthii, baccæ, juniperi &c. Vulgus equidem in his tumoribus œdematosis, omnia pediluvia suspecta habet ac si aqua fibras integumentorum nimium laxaret, hacque ratione lymphæ & materiæ peccanti locum spatiosiore pararent; ast resolventia ex aromaticis & nervinis, vino &c. tonum potius firmanent roborantque ac affluxui impetuosiori renitentiam præstant, refluxum vero juvant ac insuper transpirationem & sudorem, stagnantem aquam educunt. BRVNERVS in *Consil.* 48. p. 280. usum aquæ aluminosæ & falsæ & herbarum aromaticarum incoctarum svadet.

§. XXX. In vulgus notissimum est pediluvia, clavos pedum & unguium excrescentias præternaturales & dolorificas, callos, verrucas, cornea, etiam soliditate præditas, emollire, & abrasiones, concisiones atque extractions facilitare, doloresque inductos componere. Alias contra foetorem pedum adeo molestum, frequentes lotiones ex lixiviis quæ sulphur cœnosum acidum, uliginosum exterminant & abluunt, ex HB. plantag. origani floribus rosar. scordii folis quercus alumine, &c. in aqua simplici vel ferrariorum coctis, additoque soluto lithargyrio cum aceto tuto, frequentius adhiberi possunt. Sic & HELFR. JVNCKEN in *Fundam. Medic.* p. 578. ad foetorem axillarum & pedum lotionem, ex modo nominatis præscribit. Neminem facile latet, ea non modo molestum lassitudinis (quæ species est contusionis velut & compressionis partium) sensum pedibus auferre, partes emollire ac relaxare atque fibrarum tonum restituere & tensiones gravativas lenire, humores subcutaneos ad motum lentiores forteque refrigeratos promovere, excalescere eosque resolvere & dissipare, articulorum tendines emolliendo, temperando ac humectando, sed & nimio labore & motu corporis debilitatos, recreare ac vigorem universo corpori restituere, ex foliis nymphææ albæ salicis, vitis, capitibus papav. cum semin. ex falsa saltem aqua frigida tepidaque de quo vulgus effert: *Sie ziehen die Müdigkeit aus*: Ea certe de causa etiam legitur apud HOMERVM *Iliad.* X. Hæctori ex prælio redeunti, calidum balneum, fuisse paratum. Pediluvium inprimis ex itinere lassatorum ex artemisia cocta, pedes ita confortare scribit BODEVS in *Comment. in Theoph. Lib. IX. c. XVIII.* adeo, ut nihil ei sit conferendum. Imo non nemo credulorum, artemisiam herbam ita pro hoc scopo extollit, ut vane credat, si viator eam saltem secum gestet, eum non defatigari iter faciendo. Veteres hunc in finem oleum affere-

afferebant, hinc & oleo ungebant pedes, antequam calceos induerent, quod ex Hesychio Meursius notat, unde & ne deficeret lassitudinis remedium, lagenulam olei plenam, secum portabant, ad quod illud Plauti in Merc. tolle ampulam atque hinc eas &c. Alia ratione quoque his profunt; quod moderata ac debita lenientia, emollientia, roborantia blandequae resolventia ex aromaticis, sale volatili turgidis &c. ipsa stamina ossea, cellulas fistulasque osseas, firment, acrimoniam ex humoribus appellentibus segregatam ac molestantem temperent, sufficientem spirituum animalium accessionem faciliunt, debilitatibus, vacillationibus succurrant, nutritionem debitam procurent, minus convenientem p. n. avertant, & habitum surarum graciliorem impleant, oleum illud medullare, quod natura seu bonus promus condus in illorum cellulis fistulisque condere solet, debite sufficienterque elaboretur firmiorque hujus medullae concretio atque inaequalior distributio corrigantur, auxiliatrices manus porrigant, de quibus vitiis observationes non ignotae sunt. Hoc pacto simul ossa in debito, quod dicitur, temperamento conservantur, firmanentur, ab injuriis variis quae subinde accidere possunt tuta praestantur, ac ne fragiliora evadant, firmanentur. Siquidem ea interdum observata est ossium fragilitas, ut fracturae eorum etiam sine violenta causa externa contingerent, quorum exempla exhibent G VILH. FABRIC. HILDANVS *Observ. LXVI. Cent. 2.* SCHENCKIVS *Lib. V. observ. 7.* THEOPH. BONETVS *Med. Septentr. collat. Lib. I. Sect. XV. c. III.* IOH. M VYS, *Prax. Medic. Chir. rad. observ. I. Decad. 7.* Similem rarum casum ex Saxonia inferiori amicus quidam aestumatissimus mihi rescripsit, cujus historiam litteris insertam habeo: Senex scorbuticus alioquin sat bene valens, vesperi, lectum conscendit, sed titubans brachio dextro pulvinar corripienti, brachium fregit; Hoc confirmant etiam equisones, affirmantes, si equi quotidie in flumen ducantur, aut eorum pedes frigida bene fricentur atque laventur, robur pedumque ac celeritatem, eos obtinere. Ad pedum molliem a FORESTO *Lib. XVII. observ. 15.* IAC. HOLLERIO *observ. rar. 7.* FERNELIO *de abd. rec. causis Lib. II. cap. IX.* FABR. HILDANO *Cap. II. observ. 66.* TH. BARTHOLINO, apud H. Velschium in *observ. Med. 22.* observatam, pedum balneum frigidum ex sulphure, vitriolo, alumine & sale gemmae praeparatum, quale & descriptum apud ZACVTVM *Lib. III. Tr. adm. observ. 127.* invenies, valet. Ad maculas scorbuticas delendas DOLAEVS *Encyclop. m. de Lib. III. cap. XII.* pediluvium ex HB. absinthii rorismarini sabinae nasturtii nitro, praescripsit.

§. XXXI. Tandem hic addere quoque non supervacaneum quidem erit, atque ad imitationem proponere quod in ossium pedis fractura HIPPOCRATES atque GALENVS pediluviiis calidis usi sint, ut haud obscure colligere est, videatur *Seçt. VI. p. m. 793. & Lib. VII. Method. Cap. VI.* Nimirum, præsertim cum membrum coaluisset & fasciæ essent solvendæ, ut illud carne implerent & modo mollius redderent, modo firmitus, atque motum functionemque debitam iterum commodamque iisdem inducerent.

§. XXXII. Angli imprimis ex longo morbo convalescentibus pediluvia confortandi causa frigida suadent. Nec tepida ex aromaticis, solventibus, adstringentibus, ut absinthio, rosis &c: alkalinis ex cineribus & bitumine aut lixivio, vino &c. parata, cum leni frictione, minus dissuadere possum, maxime iis, quibus ab arthritide perpeffa debilitati & rigidi facti pedes fuerunt, aut qui œdematosos, tumores, qui convalescentium frequentissima & familiaria accidentia sunt, præcavere cupiunt. Calorem enim naturæ humanæ æmulum, iterum instaurant atque accendunt eumque diu custodiunt atque tam calore, quam salibus & partibus spirituosis, imbecillas partes fovant, stringunt, roborant ac firmant.

§. XXXIII. Ut hominum sanitati pediluvia, ita & eorum propagationi prospiciunt. In foro medico evicta res est, pedum infrigidationes concubitoris officere, & maxime seminis emissioni adversari, totumque corpus refrigerare, & siccare, quod & ARISTOTELES asserit, *seçt. 4. probl. 6.* & Avicenna affirmat, qui ideo priapismo & tentigine vexatis nudis pedibus obambulationem per pavementum lapideum injunxit. Hinc RHODIGINVS *Lib. XV. c. VI.* Clinopalin nudi pedalem flaccidum hebetemque veneris usum nuncupavit. Pedum nuditas ex veterum religione castitatis symbolum fuisse constat. Sic Pythagoras sacris Aegyptiorum edoctus in Symbolis suis, animo casto & a libidinibus remoto deos adorare, iisque sacrificia offerre, nudis pedibus iussit. Apud Mauros & Saracenos templa aut loca sacra alia calceatis ingredi pedibus per hanc ipsam forterationem, nefas erat. Pariter IOSEPHVS *de bello Judaico Lib. II.* refert Berenicen Agrippæ Regis sororem, ut Deo pro salute vota solveret, nudipedem ante tribunal Flori, Præsidis, stetisse. Ad hanc castitatis sanctimoniam servandam, sanctum Franciscum sui ordinis instituti, monachis præcepisse traditur, ut pedibus nudis, solis calopodiis applicatis, incederent, Conf. VIDVS VIDIVS *de tuend. Valetud. Lib. XIII. c. V. p. 370.* Quod doctè interpretatur multus in hoc argumento nec indiligens Censor LANGIVS *in Epist. Med. Lib. II. c. IX.* Hoc de hac pedum

pedum læsione certum, quamvis alias potius contrarium efficere perhibetur, ut cruribus & pedibus læsos salacissimos esse probat IOH. BENED. SINIBALDVS *Geneantropia Lib. II. Tr. II. p. 187.* Hinc Amazonum Regina Antiamira claudo nupsit dixitque: claudus optime virum agit; pede enim debilitato, genitales vires augeri quondam credebatur: Sic ARISTOTELES variis in locis asserit, penis naturam a pedibus aliquatenus dependere, & *lib. de generat. animal. Cap. V.* tradidit, apud quem etiam sit fides, ea animalia, quæ pedibus carent, testes non, aut saltem non, in eo loco habere. Ex his colligimus, legitimum honestumque concubitus juvare, pediluvia calida cum herbis fragrantibus & stimulantibus cocta, ut salvia, serpillo foliis abietis, radice eryngii sem. erucæ, urticæ, pastinacæ, cumini, cœpis cum formicis ac cantharidibus.

§. XXXIV. Paucis adhuc monendum subit, convenienter satis eos agere, qui venæ sectionem sive in pedibus sive in brachiis admittere velint, si I. II. III. IV. diebus ante ipsam administrationem circa noctem præsertim, pediluvia atque ea quæ totastibias pertingunt aliquoties repetant, eo enim pacto sanguis fluidior redditur & venæ sectio sic melius cedit. Amplius dicendum est, pediluvia tepida commode aliorum interne assumptorum medicaminum operationem tum ante assumptionem quam postea allata adjuvare & in actum magis deducere, quoniam præsertim corpus blande calefaciunt, sicque præparant atque disponunt, atque tam materiam vitiosam alterando & educendo, quam vias præparando per quas ea debet abduci, motus illorum secundant & secretiones & excretiones salutares, quibus totum curationis punctum maxime ponitur, facilitant & obstacula varia, ut stricturas internas &c. expediunt & levant &c.

§. XXXV. Hoc primario, notissimo ac præ reliquis adhuc usitatis-
simo balneorum particularium genere considerato, progressum ad alia faciamus atque memoremus, quas apud veteres reperimus foveas dictas, quæ certis corporis partibus, cruribus vel brachiis ut stuphæ quidem toti corpori aptæ fuerunt, quarum vero paucissima vestigia nobis relicta sunt. Modus utendi eas talis erat: purgato prius corpore atque fœcibus alvinis redditis, jejunoque ventriculo, pars affecta in eas inferebatur, inserta sensim movebatur, ut paulatim actioni naturali adsuesceret, ubi mansisset, quantum opus fuisset, extrahabatur, ficcabatur ac imungebatur oleo aliquo aut cerato muniebatur; pars vero, quæ non inferebatur, optime tegebatur. In illarum imitationem aliud excogitavit non incelebris Autor, a Lamswerden instrumentum, ex corio molli utris in modum confectum, in quod aqua & liquores convenientes & intentioni
ni

ni satisfaciētes infunduntur, & vel pes vel brachium immergitur, vel etiam dorsum sic irrigatur. Hoc podagricis, paralyticis, pedibus captis, brachiisque morbidis torpescētibz ex nutritione depravata & immunita, tabe, aridura, rhachitide obsessis ut & calculo renū affectis admodum commodum est; sic enim in lecto decumbere & hoc instrumento uti partesque nominatas laborantes indere atque fovere possunt patientes.

§. XXXVI. Magis forte notum est aliud balneorum particularium genus, quod stillicidium duciam & guttam vocant, quod Græcis pariter olim usitatissimum erat, embroche ab eis appellatum. HORATIVS hujus meminit *Lib. I. Epist. 15. ad Vallam Conf.* CELSVS *Lib. II. c. XVII. & Lib. III. c. XXI.* & GALENVS, magnarum virium hoc auxilium esse dixit *15. method. med. cap. ult.* Cujus insignem efficaciam experimento comprobavit IO. FANTONVS in *Dissert. I. de Thermis Valderianis p. 43.* De hoc fuscē prodita sunt a GABR. FALLOPIO, *de Thermis & Metall. Cap. XIII. in Oper. p. 249.* PROSP. ALPINO *de Med. meth. Lib. VI. p. 357.* ANDR. BACCIO *de Therm. Lib. II. cap. XIII. & XIV.* IOH. BAVHINO *de aquis medicatis & Fonte Bollenfi Cap. XV. p. 196.* TH. GVIDOTTO *de Therm. Britan. Cap. X. p. 190. & p. 242.* IOH. GODOFR. BERGERO *de Therm. Carol. p. 152.* IAQVES FRANC. CHOMEL *Traité des Eaux Minérales de Vichy p. 172. & 193.* Nimirum aqua calida thermalis aut medicata ex alto & impluvio velut quodam stillata ex collo guturnii per epistomium in subiectam laborantem denudatam corporis partem decidit. In thermis præsertim calidissimis, illis, ut Carolinis Bohemicis adornari solet; sed & extra ejusmodi loca, ubique locorum & omni tempore decoctis fortioribus & penetrantibus ex mineralibus, salibus, sulphure, bitumine & vegetabilibus, herbis, radicibus, lignis, baccis aromaticis, sale volatili & sulphure turgigidis ut & oleo & vino in materia pediluviorum sæpius descriptis confici potest. Adhibetur enim majoris penetrationis gratia, ut aqua medicata majori conciliato, majorique ab impetu ac vi adjuncta, fortius operationem suam inferat, ac lentos humores ac partes hærentes, dividat & solvat, fortius atque reconditas profundeque hærentes obstructions referet tonumque partium penitus deperditum & laxatum instauret. Atque subjiciuntur stillicidio membra indurata, resoluta, contracta, omni sensu ac motu privata, tumoribus duris & frigidis obsessis, affectibus aliis inveteratis ac contumacibus abscessibus profundis fœda, quibus ut duro nodo durus quærendus cuneus est. Talia nimirum membra, quæ instillationi huic subjiciuntur, possunt esse, caput,

caput, aures, collum, humeri, brachia, pedes, hypochondria quoque & regio præsertim hepatis atque lienis, si viscera hæc tumore & scirrho laborant. In linguæ paralyfi idem efficacissimum est deprehensum in thermis Hirschbergensibus adornatum. Pariter Præses in capitis & colli immobilitate, duritie ac rigiditate frigore contracta, in Magistro quodam equitum in thermis Carolinis quondam exoptatissimum ex hoc vidit successum. Commodissime adhibentur, quando in ipsis thermis aut balneis calidis privatis sedent lavantes, aut etiam in loco sicco & bene calido, in sella collocati. De reliquo adhibendo modo sequentia quædam scire licet: Consultius stillicidio, laxantia & venæ sectio præmittuntur, & jejuno ventriculo ante prandium aut cœnam, in usum ducitur. Si capiti adhibendum stillicidium, radatur illud prius & depiletur, & ad futuras præsertim depluvium ejusmodi fiat. Indies hoc stillicidium augeatur v. gr. initio per unam, deinde per unam cum dimidia, ad duas usque tandem horas, & una primum, deinde duabus vel tribus etiam vicibus, pro necessitate & ægri tolerantia, singulis diebus, in usum ducatur, & tamdiu, donec speratum auxilium accidat, cujus spes affulget, si æger ad partis affectæ penetralia, caliditatem aquæ, ac membro affecto naturalem calorem & sensum redire sentiat. Si in thermis instituatur commode tam potus quam balneum thermarum per aliquod tempus usurpatum, præcedant, ut tam stillicidium adjuvetur, quam corpus ejusmodi balneo sit bene adfuetum. Inter instillandum solent præsertim etiam oculos obtegumento munire. Finito illo singulis vicibus membrum detergatur calidis linteis beneque obtegatur & calidum semper fervetur. Notandumque est, quod ut plurimum ægri, tunc graves somno fiant, qui vero omni studio est interrumpendus; quare in Hetruria, quibus aliisque Italiæ oris hodie etiam adhuc usitatissimum hoc auxilii genus est, in more positum est, ut conductæ mulieres in his locis soleant illos stillicidio utentes, canendo excitare. Licet omnibus recte se habentibus stillicidium hoc magnum auxilium afferat; habeo tamen adhuc, quod circa illius adhibitionem moneam, ut caute cum illo mercandum sit, ac sine prudentis medici consilio temere non instituatur. Nimirum plethorici multos crassos lentosque humores in venis alentes, & præsertim in apoplexiam proni, vertigini & catarrho suffocativo obnoxii, ab eo consultius abstineant. Ut hæc moneam, observationes a Frid. Sommero in Lib. de thermis Carol. Joh. Gunterio, Andernaco, Guidotto Io. FANTANO, de *Thermis Valderianis Dissert. I. p. 42.* aliisque, qui de illis sinistro eventu loquuntur, communicatæ hor-

tantur ac suadent. Quidam in ea sunt opinione, inter quos præsertim eminens ille in medicina vir IOH. GODOF. BERGERVS in Tract. de *Therm. Carol.* p. 153. omnem etiam calidam aquam capiti viscerumque ventriculi & hepatis præsertim, regioni valide sic instillatam, præsertim autem thermalem, Germanis, utpote qui copiosiori utuntur, alimento, esse periculosam.

§. XXXVII. Huic stillicidio propemodum similis est & inter balnea particularia potius referenda quæ olim etiam veteribus usitatissima erat, aquæ calidæ, simplicis saltem, perfusio, de qua seorsim apud Hippocratem de inter. affect. legitur, quæque a GALENO allegatur *meth. med. Lib. XIV. cap. XVI.* qua multa aqua & magnis fusionibus per perfusoria partes corporis varias, tergum maxime & coxendices extra balneum ad rubedinem usque perfundebant, qua partibus corporis emaciatis, nutritione depravata correptis, torpescentibus, immobilibus, induratis, & vacillantibus membris succurrere & eufarcosin totique corpori evexiam conciliare & exoptato quidem successu, tentabant. Nec non iidem resoluta a paralyfi membra aliaque ratione immobilia facta ac inertia, frigidam ubertim & vi quadam ad motum inducendum augendumque affundebant. Sic CELSVS vid. *Lib. I. c. IV.* caput ejusmodi irrigationibus frequenter subjecit. HIER. MERCVRIALIS vid. *Consult. & Resp. Med. T. IV. p. 101.* imum ventrem cujusdam Principis, qui lateris sinistri dolore ex hypochondriorum vitio laborabat, irrigari curavit. IOH. ASTRVCCIVS vid. *Les Memoires pour l'histoire naturelle de la Province de Languedoc.* similiter, capiti infirmo, catarrhis, vertigine & cephalaligiis laboranti aquas Balazazenses cum exoptato successu superfundit, asserit. Pius II. Papa R. Aeneas Sylvius, cum cerebrum ipsi nimis humidum esset, usum insignem aquarum mineralium per fistulam in verticem capitis derivatarum, commemorat. V. *Flamini Pinelli Lettera de Bagni di Petrivolo.*

§. XXXVIII. Lotiones & lavacra manuum modo sequuntur, quæ & multa quidem in affectibus variis illarum, v. gr. rheumatismo, chira-gra, luxationibus, tumoribus duris, exulcerationibus, spina ventosa, paralyfi & aliis secundum seriem jam non longius recensendis, ex appropriatis æque ac in pedum affectibus pediluvia, adornari possunt. Sic in foemina Lipsiensi affectu rheumatico & paralytico manuum lotiones quotidianas sæpiusque repetitas ex infuso & decocto calido vinoso herbarum majoranæ serpilli rorismarini abrotani, origani, admodum proficuas quondam deprehendi. Verum, non modo manibus, sed & toti prope-

modum

modum corpori, præsertim autem cordi, cum quo notabilis sympathia iis intercedit, ejusque atque spirituum animalium affectibus, (quod etiam de pediluviiis in antecedentibus satis dictum est) tam frigida quam calida, singulis diebus, aliquoties, ante omnia & præsertim mane etiam in recte valentibus adhibita, movendo ac excitando æque detergendo, ac evacuando, profunt & prospiciunt. Quare, ne multa repetamus, hi sequentes paragraphi, qui longissimi esse possent, breves sint, quia finem spectamus. Saltem hic exempli loco notissimum illud singultus remedium in memoriam revocemus, quo manus ad brachia usque, sive in calidam, sive in frigidam aquam immergunt, simulque commemoremus manuluvium callidum hæmorrhagias præsertim in partibus inferioribus, ano, utero, renibus, vesica urinaria contingentes, revellendo, commode sistere. His annumerantur alii casus, qui sanguinis congestionem in abdomine fomitem agnoscunt, ut abortus, vomitus, cardialgia, colica, passio hysterica ac ejusmodi dolorifici affectus, quibus hoc remedio præservatio pariter ac curatio paratur. Quivis in se ipso experietur matutinam mox manuum lotionem alacritatem universo corpori mentique inferre. Hinc ii, qui perhibent, nec sine ratione, quod a Deo præscriptæ leges ceremoniales populo Judaico, etiam salubritatem corporis spectent, affirmant, lotiones manuum pro sanitate esse: nam sacerdotibus præsertim, ante benedictionem, quam pro populo pronuntiabant, injunctum esset, ut manus lavarent. Insuper modo adhuc legantur notissimi illi versiculi, de lotione manuum ita loquentes:

*Lotio post mensam tibi conferant munera bina
Mundificat palmas, & lumina reddit acuta;
Si fore vis sanus, ablue sæpe manus.*

His breviter indicatis missum facimus, Avicennæ commentum: ex manuluvio calido præsertim a pastu, vermes generari.

§. XXXIX. Quædam saltem adhuc de faciei & totius capitis ejusmodi lotionibus modo dicenda, hac quidem vice, restant. Scilicet illæ æque ac manuum lotiones quotidie institutæ admodum proficue deprehenduntur. Præter plurima eaque universalia commoda saltem commemorare libet, me, aliquoties in capitis frequentibus doloribus & visus imminutione, ex humorum oculorum conturbatione, solius faciei quotidianas & multas lotiones, ex aqua roris marini, fœniculi, majoranæ, menthæ, calcatrippæ, rosarum per aliquod tempus continuatas utilissimas expertum esse. Plurimi norunt ubi aqua frigida facies lavetur, aucta

aliquantum respiratione, imprimis a fomno, urinam provocari. Notissimum cæterum est faciei cum frigida saltem aqua aut albumine ovi & aliquot camphoræ granis alterata, lavationem, faciem a sole exustam restituere. Totius vero capitis lavationes licet non singulis diebus, sed singulis forte septimanis semel in Italia ac variis Germaniæ locis, & quod ego modo scio in multis Silesiæ ac Sueviæ oris, pro consuetudine veniunt, quibus totum caput calida diuque satis lavant, ex quo caput exoneratum animumque liberum & ad actiones magis expeditum, sentiunt. Quidam non modo capillis nitorem gratumque colorem his lutionibus conciliare assolent, (ut TACITVS *de Germ. 4. c.* retulit, veteres Germanos, ad adipiscendos crines rufos, qui ipsis ornamento erant, sapone & lixivio, caput sæpius lavasse,) sed & ad munditiem & lautitiam capitis sibi comparandam, ac omnia sensuum organa in capite constituta, integra servanda, adhibent. Non pauci, sæpius, in capitis ejusque partium affectibus iisque idiopathicis & tam externis quam internis v. gr. in capitis gravitate, cephalalgia, ex crapula præsertim contracta, hæmicrania, vigiliis involuntariis, oculorum suffusione & destillatione, nubeculis, catarrhis pertinacibus, aurium tinnitu, auditus difficultate exinde sibi speque haud frustrata, auxilium quærunt. Eas, cum ad sanitatem tuendam, tum morbos profligandos, crebro usu & recte & salubriter jam Hippocrates, Galenus & Avicenna accommodarunt. Non abs re, igitur ablutiones quoque capitis, hodie propemodum abolitæ, imitatione, in usum iterum essent trahendæ; nam hodie plurimi præsertim in nostra Saxonia speciatim Misnia, lotiones capitis vel simplices multo magis autem lixivio addito easque vel paucissimas, mire abhorrent. An prægnantem satis nostrates habeant causam, hic equidem, non determinaverim; Interim tamen existimarem atque cum multis eruditis Medicis affirmarem, pluribus, vanum esse metum, quem forte illud Scholæ Salernitanæ monitum incussit: Sæpe manus, raroque pedes, caput ablue nunquam; potius eas non modo utiles, (si modo regimen bene temperatum simul adhibeatur) cautelæ debitæ observentur ac subjecta discernantur, sed & quandoque necessarias esse, ut nimirum meatuum præsertim apertio, melius juvetur & instauretur, quæ in capite a sordibus collectis, & crinibus dense consitis, sæpe est impedita, quæ multorum in capite morborum incrementum est & rudimentum, ad quam vero præstandam, capitis lotiones, recte institutæ, efficacius remedium, quam ullum aliud sunt. Materiam quam adferunt iterum pro renata varia est, siquidem modo aqua simplex calida, tepida eaque frigida sufficit, quandoque

doque & certis in casibus v. gr. febribus ardentibus, animi deliquio, sæpius recurrente, hæmorrhagiis enormibus & secundum quorundam observationes, frigida capitis lavatio, e re magis est. Modo & frequentius lixivium addunt, aut saponem adhibent, modo alia etiam ingredientia solvunt atque incoquunt, quæ etiam ex parte ex iis, quæ de pediluviiis dicta sunt, sunt colligenda. Nimirum ubi discutiendum, diluendum, roborandum abstergendumque maxime est & lendes, pediculi item exterminandi sunt, & ubi capilli ut renascantur exoptatur, eadem capitis lavacra multa & continuata conveniunt. Sic e. gr. in capitis gravitate & crisi procuranda, ipse Hippocrates in Epidemiis in Metone, simplici saltem quodam lavacro, usus est, item alibi Fœsius in comment. aquam tepidam capiti affusam, somnum conciliare adeoque in vigiliis molestis in pluribus morbis frequentibus admodum utilem, quem effectum certius præstabit decoctum, fervorem & acrimoniam humorum temperans atque demulcens somnumque vaporosa sua substantia, inducens, sopitis & impeditis spiritibus animalibus, ne ad organa sensuum impetuose ferantur, ut præter experientiam testatur GALENVS *de sanitate tuend. cap. IV.* Qui & *Lib. III. de loc. affect. Cap. V.* medicos vigilantibus præter naturam, & phreniticis caput irrigare consuevisse docet. Pariter AVICENNA in febrium vigiliis *Lib. IV. fol. I. tract. 2. Cap. XX.* non tantum frigidam capiti adhibere, sed & istud, decocto tali calido, fovere præcipit. Plura C. CELSVS *Lib. de re med. IV. Cap. I. Cap. II. & III. IV. item Lib. I. cap. IV. & seq.* habet longius hic non exscribenda. Legimus Cleophantum Med. ante accessionem tertianæ febris caput ægri multa calida perfundere jussisse. BARTISCH. *im Augendienst p. 52. & 54. 89. 126.* ad oculorum suffusiones & cataractas, capitis lotiones, frequenter, ex speciebus ibi descriptis commendat. In furditate FELIX PLATERVS vide *observat. Lib. I. pag. 109.* Caput lixivio in quo herbæ cephalicæ decoctæ, quandoque abluere præcepit. Roborandi fini HOCHSTETERVS vid. *observat. med. p. D. C. X. p. 435.* suadet, caput lavetur lixivio, veronica, verbenæ, chamædri chamæpiti rosis, agarico, medicato. REINERVS SOLENANDER in *Consil. Med. p. 51.* ad præcavendos & curandos catarrhos, frequentes capitis lotiones ex cineribus solutis sarmentorum, & lignorum salicis cum betonica, verbenæ, foliis fennæ, rosarum item hordeo & id genus aliis decoctis confectas, & *pag. 467.* cuidam adolescenti vertigini obnoxio, decoctum rosarum, violarum, verbasci & similibus tali modo adhibendum suadet. In subjectis catarrhosis & apoplexiæ obnoxiiis, capitis ablutio, aqua calida aut vino incoctis

roremarino salvia, majorana & similibus post venæ sectionem, apoplexi-
am, poros aperiendo, & capitis robur firmando, præcavet. Nec non
epilepticos hæc & similis capitis lotio sic adhibita multum juvat. In hy-
drocephalo ex thermalibus aquis vel aliis appropriatis remediis compo-
sitæ capitis lotiones, opem haud contemnendam ferunt, quales etiam in
maniacis, proficuæ sunt expertæ. Pueris qui tineam capitis atque acho-
res, favos, porriginem ut & ulcera ipsa manantia in capite ferunt la-
vacra ex aqua calida, lixivio, furfuribus, sapone, vitello ovorum, her-
bis aromaticis & similibus alterata, a vulgo etiam, cum euphoria adhiben-
tur, quibus, per multum sæpe tempus, caput perfunditur. In pericu-
losis capitis vulneribus ac læsionibus profundioribus & ad præcavendam
præsertim ipsam cerebri putredinem, capitis lotiones exsiccentes calefa-
cientes & detergentes, veteres laudabant, ex vino austero, aut aceto,
in quo rosæ, betonica, absinthium, calamintha, cum farina hordei,
milii, melle rosato aliaque id genus, cocta erant. Poloni morbum suum
endemium, plicam nimirum, lotionibus, ex sale saltem gemmæ fossili solu-
to expugnant. In multis aliis capitis affectibus locum suum quoque in-
veniunt, quo saltem hic ut suo loco repeto, quod modo in §. statim, I.
hujus Dissertationis, de G. Anwaldo adductum est, quod nempe mul-
tas easque magnas morborum curationes, solis capitis, juxta pediluvia, lo-
tionibus, instituerit. Quoad modum exhibendi Zechius Consult. XXVII.
hanc cautelam addidit: ut caput lavandum ita in occiput declinet, ut
oculi sursum adspiciant, saponis loco amygdalæ amaræ tritæ usurpentur,
& ne calidioribus pannis, neve nimia commotione, caput plus quam par
sit, incalescat. Ex collectis observationibus, sedulo ego hortor, ut pro-
vide prospiciatur, ne materia acris, corrupta, repellatur, quæ ad cere-
brum ejusque membranas ac nervorum, principia perlata epilepsiam
aliasque graves capitis morbos, inducat. AMAT. LVSIT. Cent. I. Ob-
serv. 36. in puella obesa & sanguinea a capitis lotione, apoplexiam sub-
taneam supervenisse, notat. Ex capitis ulceribus obsessio lotione surdi-
tatem concitatam *Miscel. Nat. Curios. D. III. An. III. Obs. 9.* commemo-
rant. Simulque moneo, ut caput cum capillis præsertim a lotione be-
ne detergeatur & siccet, aërque frigidus & liberior omnimodo arcea-
tur, quoniam visus depravatio imo amissio, facile ex hac cura hacque
cautela neglecta, accidere potest. Sed cum jam longius, quam principio
volui, processisse me fatear, in recensendis per series affectibus capitis
& ejus nobilissimarum partium, per lavacra curandis, nolo rem trahere
longius, multaque circa hanc rem notabilia omittere ideo necesse ha-
beo,

beo. Perinde quomodo, quibus circumstantiis observatis caput lavandum quæque ante & post lavacrum agenda, tacitus quoque prætereo, eaque ex iis, quæ, itidem, circa pediluviorum exhibitionem, monita sunt colligenda relinquo v. gr. ut præsertim digestionem absoluta, alvo libera, plethora onerosa prius demta &c. in usum trahantur graciles vero, catarrhosi, capitis gravedini & doloribus obnoxii tutius abstineant. Hoc saltem adhuc adjicio, quod quædam Nationes caput nunquam lavent, an recte, an male, æque jam non determinabo; sed solis frictionibus modo & sordes & morborum causas detrahant, & salubriter se habeant, & quod etiam a doctis hominibus sit annotatum, capitiluvia non omnibus populis ac non in omni climate ac regione degentibus æque feliciter cedere atque regiones humidas ac magis ventosas, incolasque crasso victu utentes, adeoque Germanos magis præ Gallis & Italis, Hispanis, Indis, in hunc censum venire autument. Ex quibus unicum nominasse sufficiet, REINERVVM nempe SOLENANDRVM, qui in *Consil. Med. pag. 467.* cœlum quod inhabitavit, tales lotiones, non ferre, asserit. Ast de Silesiis non idem dicendum habeo, qui frequenter lotiones capitis instituunt, optime tamen eas, iis convenire, affirmant. In commendationem, ultimo loco adhuc addo, capitis lotiones ubique locorum infantes optime ferre.

§. XL. Fomentationes humidas & epithemata aliaque ejusmodi externa remediorum genera topica, collo, pectori, humeris, stomacho, igni, regioni speciatim hepatis, quibus imbecillitati, obstructioni, ejusdem obviam itur, admovenda, huc trahere immo collutiones & gargarismata oris & faucium, gingivarum & dentium atque clysteres eosque tam evacuantes quam alterantes e. gr. ex decocto centarii minoris, chelidonii, origani, eupatarii, fero lactis, in ictero &c. quæ balnea gutturis & intestinorum crassorum, nominare atque adere possemus; sed inviti jam hanc tractationem finimus, ne dissertationis ejusmodi limites excedamus, cum hæc omnia balneorum particularium genera, pro dignitate describenda, integros tractatus, desiderent. Ideo etiam in sequentibus breviores fuimus, cum plurima, quæ in prioribus dicta sunt, etiam ad sequentia facili negotio applicari possint.





* * * * *

VIII.
DISSERTATIO
PHYSICO-MEDICA
DE
EQUITATIONIS EXIMIO
VSV MEDICO

PROOEMIUM.

Mensis, qui agitur, Martius, nobis in memoriam revocat, Romanos olim Equiria sua, quæ dies festivi in fastis romanis solennibus, equorum cursibus dicati erant, altera tertio Kalendarum, altera pridie Id. Martii, a quo annum auspicabantur, in campo Martio propter Tiberim, aut in Monte Coelio, ab ipso Romulo, Romanæ Urbis Conditore instituta Martique belli deastro, sacra celebrasse. Occasionem exinde nacti, equiria, velut jam nostra meditemur quædam medica, eaque patulum in campum producamus ac circa ea ineamus certamen, id est, adeo prosperi motus, equitationis commoda referamus & de exercitio hoc eximio, exercitationem levem quandam componamus ac conscribamus atque eam in scena quasi publica, pro cathedra academica solenni ventilationi exhibeamus. Ea certe, (equitatio) ut ad varios necessitatis, commoditatis atque oblectationis usus ad vitæ humanæ functiones, pace belloque aptissima, ita etiam in medicina, ad sanitatem conservandam restituendamque admodum proficua est. Ut enim non desunt remedia, ab equis inventa, & multa ab iis adhuc desumuntur medicamenta, vectatio super equis incedentibus, quoque multis, egregio & præ aliis plus plusque valente remedio est. Nota alias parcœmia vetus est, necessitatem equitandi usum docere, quod ut notabile memorat atque exemplo declarat PONTANVS in *historia Danica* L. VI. Refert enim de Eschillo Archiepiscopo Lundensi, quod, cum senectute confectus atque infirmus, equum conscendere vix valeret, hostem vero adspiciens, mira agilitate, mox in equum insiliisset &c.

Hi-

Historici multa memoria & notatu digna adducunt de equis, qui se-
fores suos, ex præsentissimo mire reportarunt & eripuerunt vitæ peri-
culo, ut præter illud, quod de Bucephalo Alexandri Magni equo ha-
betur, modo laudatus PONTANVS *l. c.* singulare ejusmodi memoriæ pro-
didit. Cui simile est illud, quod refert PHIL. CAMERARIUS *op.*
subcis. cent. I. 122. Nec ab hac re abludit, quod de Justo Lipsio vulgo
recensetur. Huc etiam trahi posset, quod de Henrico IV. Rege Gallia-
rum, historica monumenta notarunt, postquam Ipsi curru vecto plu-
ries insidiæ structæ essent, eum dixisse, Reges semper equo vehi, ha-
bere necesse, ut undique circumspicere periculaque quibus expositi ef-
sent, a se avertere & præcavere possent. Hæc enim in medicina nostra,
alia equidem ratione & dici posse aut valere, jam indicavimus & in se-
quentibus fuse indicabimus. Ad remedium ejusmodi particulare de-
clarandum adhortatur ipse communis medicinæ Parens, HIPPOCRATES
L. I. loc. affect. inquiens: circa res particulares experiri medicum oportet,
qui singula artis opera, quæ universali ratione didicit, tuto & ce-
lerrime exercere voluerit. Assentitur GALENVS *Lib. IV. c. I. Method.*
Atque quondam, apud eum parvæ pilæ lusus, qui pueris modo famili-
aris est, tantæ æstimationis fuit, ut integrum de illo librum scripserit.
Multo magis operæ pretium quoque esse, de equitatione, ut momenta
atque monumenta afferantur, duxi. Fatentur & jactant Hispani, quod
equites potissimum equis suis, virtute, non armis, tormentis, hastis
aut balistis Indos vicerint atque subegerint, (ut BENZO in *Histor. Nov.*
Orb. Lib. II. c. VIII. habet) atque tantarum auriferarum Americæ regionum
potiti sint. Refert acceptum Scythica gens equis suis, vastum Chinæ
Regnum. Extollit Hippocrates maximas opes, ad quas per equitatio-
nem generosissimi Scytharum ascenderunt. Adscribunt Darius Persa-
rum, Monarcha V. JUSTIN. *Lib. I. p. m. 15.* & Primislaus Bohemiæ,
Rex Regiam Dignitatem, equis atque tantas victorias magnus Mogor
Scach Achabar ejusque Successores ipsis. Gloriantur hinc inde, mul-
ti generosi & nobiles Equites, per decoram equitationem insignem gra-
tiam Magnorum Principum, Imperatorum, Regum, honores, glori-
am atque brabea reportasse. Nos merito, equitationem commenda-
mus, simulque multis infirmis de ea, tanquam de certissimo auxiliorum
genere, gratulamur, quia ars nostra salutaris illam impense commendat at-
que de ea, haud vilia emolumenta promittit, quibus etiam gaudere merito
possunt. His autem nostris conatibus non phaleratis quidem fave B. L.
Deus vero T. O. M. cepta nostra fortunet!

§. I. **A** Deo verum est, voluntarias corporis exercitationes tam ad sanitatem tuendam, quam amissam restituendam, maximam facere partem, ut existimandum sit, esse illas omni spectatissimæ medicamentorum farragini, longe, multis de causis sæpius præferendas. Si etiam mihi per multas series numeres, omnes eas procul quæsitæ magnoque conatu elaboratas compositiones, & longo formularum ambitu conspicuas, quas & universam propemodum materiam medicam Dioscoridis ingressam esse dixeris, & ideo vel solo adspectu horrendas, omnia illa universalia, arcana atque adeo arcana, ut nemo unquam sciverit, ubi & quibus profuerint; Sique nomines panaceas, Azoth benedictas aquas, phalajas, Drief quintasessentias, elixiria vitæ, cordialia, visceralia, astralia coelestia, salutis; aliaque ejusmodi gloriosæ ignorantia, thraonica hyperbolica superstitiosa sæpiusque ridicula mendaciorum nomina; Sique omnes nugas illas venales procul, vel ab Herculis columnis, a Taprobanæ Insula, a Gange fluvio, a Nili ortu quæsitæ, rarissimis carissimisque, ex auro, argento, margaritis, ac si mavis unionibus, gemmis pretiosis confectiones confortantes, in fine tamen claudicantes, quæ, ut *LANGIVS epist. L. I. 21.* loquitur, sicuti marsupia fœnore, ita facultates corporis vitales viribus, exhauriunt, afferas; omnia tamen illa inquam eis vix sunt æquiparanda, quoniam iisdem certiora, tutiora, jucundioraque & quæ horrorem non inferunt, juvamina præstare possumus. Relatum habetur præter alia, hac sola ratione, sine elixirio vitæ aliisque ejusmodi speciosis artificiosisque figmentis Terentiam CIII. Xenophilum Musicum CV. Antonium Castorem insignem Botanicum CXX. annos integros ac sanos vixisse; atque Pythagoram Chrysippum, Platonem, Catonem Censor: admodum longævus se præstitisse. Hoc enim medii atque remedi genis optimam & constantem sanitatem, præstat & conservat, cum illa medicamenti adiuta, semper sit inconstans & fallax, cum quæ æque ac cum horologiis portatilibus aut aliis automatibus propemodum comparatum est, quæ eo sæpius corrumpuntur & fallunt, quo sæpius artificis experiuntur emendationem. Namque videbis eos, qui copiosa diversaque devorant medicamenta, ac quibus ea in quotidiano usu sunt, aut qui a pueritia, pharmacopoliis se manciparunt, debiles & languidos ex levissima injuria, quam errores in diætâ inferre solent, graviter læsos. Rursus pro comperto habemus, ægrotos, qui pharmacomania laborant, quales plurimi inter hypochondriacos præsertim inveniuntur, haud facile convalescere; e contrario vero eos maxime febricitantes, qui nausea medicamentorum tenentur, citius e febribus præsertim,

fertim, vitiorum generi hominum frequentissimis, evadere. Hi certi aliique morbi eo pertinaciores redduntur ac insolescunt quo magis cura adhibetur, eos per medicamenta varia auferre ut & perstrictiorem diætæ legum observantiam, aut corrigere aut avertere. De medicamentis enim, si verum fateri volumus, dicendum est: quod nullum fere sit eorum, quod si ex una parte, juvamen afferat, ex altera quoque nocere possit, item quod sint ut strictus gladius in manu furiosi, atque quod optimum sæpe sit medicamentum, medicamentis non uti. Hanc in rem pulchre IOH. LESSENIUS in *Progr.* loquitur. *Tanto instauratrix hæc medicina pars altera illa curatrice, habenda excellentior, quanto ipsius arduum magis opus & liberalius in hanc naturæ ipsius meritum; cumque in illa ager sufficiat cum natura, hæc sine medico hic sæpe nihil valet.* Asclepiades hinc maxime laudandus, qui hanc rem præ aliis curæ cordique habuit, quare blandimenta varia excogitavit, imo, ut cubantium optioni ac commodis subscriberet ac inserviret, eo usque processit, ut plane negaret ægris danda esse medicamenta, ratus, eam esse illorum conditionem, quæ artem medicam, non modo difficilem & operosam, sed & tædiosam, ac dubiam reddat. De hujus (Aesculapii) medicina quædam GALENUS suggerit. *Lib. I. de sanit. tuenda p. 218. seq. Edit. lat. Frob.* quem locum integrum ut adscribamus forte non tædiosum B. Lect. erit. *Nos agros quotannis non paucos persanavimus, solis animi motibus ad debitum modum revocatis. Est vero non spernendus hujus sententiæ testis, ipsum patrum nobis numen Aesculapius, qui multas scribi cantilenas mimosque ridicularum rerum fieri, & melodias quasdam, instituit iis, quibus vehementiores animosæ partis motus corporis temperamentum justo calidius efficerent. Aliis quibusdam, neque iis paucis venari, equitare, atque armatos exerceri jussit iisdemque statim tum ipsorum motuum speciem, utique quibus motus injungit, tum armorum, quibus armatis exercitari præcepit, definivit. Non enim quo pacto excitetur, erigaturque animosa pars, cum imbecilla sit, præcipere sat habuit, nisi etiam mensuram illius ab exercitationum idea definiret.* Adhuc alii jam pridem, ut Petronasac Herodicus etiam durioribus nimis exercitiorum laboribus atque molestiis, morborum molestias, depellere tentaverunt, ob quod tamen tanquam modum transcendentes ab Hippocrate damnabantur. Moderatiores hoc in passu fuerunt: Antyllus, Aetius, Avicenna, Celsus, Aurelianus, Galenus qui, v. gr. ut lethargici semitertiana, quotidiana febris decumbentes, phlegmatico capitis dolore, hydrope affecti, ut & (quod apud ALEXANDR. TRALLIANVM *Lib. IX. cap. III.* legitur) apoplectici, paralytici & resoluti, nephritici, podagrici, lectica circumferrentur, voluerunt.

§. II. Etenim corporis exercitiis, quæ sunt voluntariæ (nostro sensu) agitationes externæ, paulo plus minus fortiores validioresque ad respirationem mutatam auctamque, ut plurimum & sudoris usque eruptionem, citra tamen sensibilem fatigationem, sive illius ex loco in locum, sive corpori insitarum & propriarum motricium virium, sive ab extra advenientium ope, id efficimus, ut motum adeo ad conservationem & continuationem vitæ & sanitatis necessarium, in ovulo ab elatere masculo inchoatum omnium corporis partium fluidarum humorum ac spirituum pariter ac solidarum earumque tam simplicium, quam compositarum decompositarumque, quæ, commune quoddam vinculum habent & quodam consensu inter se continentur, atque conspirant, juvemus, impellamus ac intendamus i. e. (ut explicatius loquar) beneficio illorum fluidæ impelluntur partes, ut fortius solidas impellant, & rursus solidæ partium fibræ musculares, flexibiles redduntur ac aptæ ad vibrationem facilitandam stringuntur atque impelluntur, ut fluida majori nisu impulsæ citatori cursu per vasa volvanrur, quo reciproco motu, optime æquilibrium inter solidas & fluidas partes, conservatur & restauratur. Etenim in venis ut laxioribus ex sua natura arteriis, præsertim reducentibus sanguinem, intra musculos fitis, regressus ejus languidior est, qui maxime motu & exercitatione corporis adjuvatur, id quod clarissime conspicitur, quando vena incisa sanguis mittitur, tunc semper digitis compressis, celerius effluit. Si enim frequens & copiosus sanguinis est per vasa ad cor affluxus, major etiam ejus expansio est, & quo major hæc, eo etiam major est contractio, sicque liquores corporis nostri vitales atque laudabiles, æquali jugique motu progressivo mediante intestino juxta motum, veteribus ignotum, tonicum, sive proportionatam illam fibrarum carnearum extensionem, expeditius circulantur, non modo per cor, tanquam centrum, sed & per vasa omnis generis & omnes majores & minimos etiam tubulos & omnes partes extremas alluunt sicque concinnam fluiditatem nanciscuntur atque nativum calorem suscitant atque augent meliusque quam quid aliud: (calor hyeme prope fornacem inertes & debiles facit, valido motu vero excitatus alacres ac agiles) Immo quoniam videmus, procedente ætate multa aboleri vasa, sic hoc medio magnum quoque robor firmis partibus additur, quod nimirum plurima vasa exilia compressa concreverint in fortiores membranas, ut liquida dein per vasa majora ferantur. Omnes pori aperiuntur meatus & ductus & dilatantur quo in extremis præsertim artubus, nervi, membranæ, ligamenta, muscoli & ossa, roscida irrigantur humiditate & recrean-

recreantur simulque totius corporis agilitas & promptitudo ad agendum comparatur. Mediantibus his, partes sanguinis multifariæ adeo & mole motu indoleque diversæ intime miscentur, subiguntur, ac uniuntur, quippe quæ, ut principia sanguinem constituentia per se non sunt miscibilia, neque levia, non tenuia minusque inter se convenientia, atque ad corruptionem prona, sed asperæ, graves, rudes, rigidæ particulæ insunt, quæ ad se invicem pressæ, interventu motum suspendunt, unde facile in grumos abire potest tota commixta massa. Etenim insunt oleosæ, aqueæ, salinæ, terrestres, mucilaginosæ: quas chymicæ operationes & experimenta detegunt; quæ debita quantitate & qualitate invicem exacte misceri debent, ut homogeneous quasi humor exsurgat atque appareat simulque imminens corruptio avertatur. Quando vero non accurate miscentur, secedit aliqua pars remanetque rudis terrestrisque sicque tandem perit sanitas. Insuper ejusmodi corporis motus attritione simul viscidiores, lentæ, crassiores, quibus pleraque certe morborum debentur initia, dividuntur, attenuantur, abstergantur, sicque tenuitas debita fluiditas & spirituascentia augetur. Spiritibus ipsis animalibus qui reliquas partes animant actuantque, motum fortiozem imprimunt & influentibus faciliorem transitum concedunt, nervorum per quos fluunt, proportionatam tensionem efficiunt, ipsosque intime cum reliquis humoribus commiscent ac uniunt; Nam observare licet, copiam spirituum & minus subactam & per minima distributam, minus compositam, laxiorem cohæsionem, unionem, non adeo intimam, obesse durationi, quoniam sunt admodum activi; hinc dein statim fit illorum inæqualis & inconstans, inordinatus & subsultorius, & consequenter dissolvens, destruens, consumens motus, atterunt, & inter se atteruntur. Partes vero a nimio spirituum influxu corrumpi & lædi manifeste videmus in gonorrhœa, a semine nimis spiritioso & in convulsionibus, ubi insigni impetu & majori influunt: inæqualitas enim, est dissolutionis mater. Hinc spirituum compositionem ne nimis prædentur, id est, ne nimis acres vasa corrodant aut evolent, facere ad longævitatem, ignis exemplo declarat ac edocet Illustris BACO DE VERVLAMIO H. V. & M. p. 566. His secretiones naturales quarum præcipua ad illas perpetrandas prædispositio omnino plurimum in sufficiente tenuitate seu fluxilitate sanguinis versatur per glandulas nimirum perficiendæ, quæ reliquarum functionum sunt fundamentum, juvantur & stimulantur, omnibus bene prius sic præparatis nam his turbatis reliquæ mox suum patiuntur impedimentum, in quibus præ aliis ob structuræ horum

organorum teneritudinem flexuras & contorsiones motu subinde novo opus est. Juxta has (secretiones) excretiones eæque quoque superfluum eorumque subtiliorum maxime, circa quas ordinandas & corrigendas fere conservatio, præservatio & curatio versantur & absolvuntur, non minus promoventur simulque stagnationes & tandem corruptiones vel imminentes vel incipientes prævertuntur supprimunturque, ut corpora ad instar frumenti agitati conquascatique atque bene cribrati, cui nihil inest impuri ac vitiosi, se habeant. Diaphoresis imprimis commune universaleque humanæ naturæ emunctorium, qua nulla operatio tutior & utilior omnis inutilium superfluumque volatiliorum, sulphureorum maxime ejectio omnisque utilium atque congruorum in corpore nostro conservatio extat atque continuatur hoc medio atque remedio optime juvatur & plenitudo verenda avertitur. Quadrat huc Aphorism. SANCTORII in *Med. Stat. Sect. 5.* Exercitio corpora leviora fiunt item GALENI sententia 3. *Aph. comm. 20.* exercitatio supplet vicem purgationis humorum, qui sunt in profundo corporis, & 3. *aphor. comm. 15.* exercitia collectas singulis diebus superfluiditates expurgant. Etenim pulsus massæ humorum, vix aut admodum difficile potest stagnantium infarctum auferre; per motum vero externum fortiolem accedentem eæ, quæ obstructions efficiunt partes, moventur atque dissolvuntur potenter, omnes actiones, quæ in humano corpore instituuntur, expeditiores redduntur & meliores, pulmonum maxime, inspiratio scilicet & exspiratio liberiores instituuntur atque per eam non modo aër crassior e pulmonibus educitur citius, sed & simul spirituosum excrementum, fuliginosum vulgo dictum, per pulmones emitti solitum, promovetur commode, appetitus acuitur, alimenta assumpta a motu ventriculi subiguntur, melius digeruntur & in bonum chylum convertuntur etiam si ea mala fuerint, ulterius, promoventur, nutritiæ partes & laudabiles bene distribuuntur, apertis undique poris, affluxu earum invitatio ac suscitatio, ac partibus assimilantur, omnesque dein succi animales laudabiles debite elaborantur atque somnus & requies prompta, profunda, placida & jucunda recreans mentemque gratissimis imaginibus mulcens invitatur, corporis membra illorumque omnes partes componentes, fibræ nimirum carneæ & ex his conflati muscoli, vera motus voluntarii instrumenta, nervi ac tendines cum juncturis fiunt validi atque corroborantur vasa stringuntur & dilatantur & frictione hac blanda & assidua non modo ab adhærentibus forte ipsis impuritatibus repurgantur, ut cum aliis recrementis sanguinis simul possint excerni; sed & subindurantur, intendun-

tenduntur & confortantur, immo partes juncæ atque graciles assidua exercitatione crassiores evadunt (hinc dextrum brachium ordinario crassius validiusque cernitur) ut totum corpus reddatur levius, purius ac solidius compactius, duriusque, quod dein adversus causas externas munitum, externisque injuriis minus obnoxium permanet. Talem bonum corporis habitum talemque vim & robur non tam qui tenuis erat ut Mercurialis in Lib. de Gymn. testatur, sed continua corporis exercitatione, magnam vim, elaterem ac robur, solidarum partium fibris inducente, veteres Græcorum ac Romanorum athletæ atque gladiatores sibi acquirebant. Sicque ciborum digestio, chylicatio, sanguificatio, spiritualescentia rite perficiuntur, vita prolongatur, sanitas constans & integra simulque facies nitidior ac florida (sanguinis boni renascentis liberique per vasa fluidorum motus, indicium) atque formæ dignitas caloris bonitate tuetur atque habitus tandem athleticus adeo celebratus comparatur, imo omnium sensuum externorum vigor integer conservatur. Manifesta in ipsis equis videbis, qui si frequenter strigili depeuntur, non modo impinguescunt sed & alacres atque vivaces redduntur, adeo ut exinde æque ac ex nutrimentis, beneficium capiant. Fuerunt qui gustatu exploraverunt lac, ab asina emulctum bene strigili tractata, quod dulcius deprehenderunt quo documento asserunt, exinde humores attenuari atque repurgari. Ad hanc rem notata dignum est, ipsam almam naturam, ad commodam exercitationem admonere, cujusvis omnis, in motu posita est, eamque non modo infantes & pueros atque omnia animalia, bruta juniora, (quibus alias a natura est tributum, ut quæ ad vivendum sunt necessaria, prosequantur declinenturque ea, quæ nocitura videantur) statim ab ortu, ad motum, agitationem collusiones, cursus, subsultationes atque saltationes nec sine voluptate etiam ad summam defatigationem stimulare (ut nempe juncturæ membrorum flexiles & fortes mature reddantur, sanguis in puritate sua fervetur ejusque circulatio libera maneat, transpiratioque facilis atque omnia organa per gradus quasi extendantur usque ad mensuram proportionatam) sed & motum fortiozem tanquam exercitium involuntarium instituere, quo a morbis se liberare satagit, sternutationem puto pandiculationem, singultum, tussim, vomitum &c. (quæ omnia sanguinem accelerant) &c. aliosque in sanguine impetus vel saltem ad ejusmodi motus instituendos invitancia, pruritus & similia irritamenta excitare. Ad quos motus instituendos omnes corporis partes semper quasi se offerunt sponte & paratæ sunt nurusque expectant, ut ad sui modulum per tensionem illam

con-

constantem, quæ omnibus præsto est quaque, donatæ illæ sint, quæque tonus alias vocatur, agant, atque mira non raro agilitate & promptitudine ab externis injuriis imminetibus se tueantur etiam citra voluntatem mandantem. ex. gr. imprævisum casum, artus varia motitatione & jactatione avertere tentant, oculi, obveniente ictu aut plaga, protinus se claudunt, sub lapsu manus & brachia se prævertunt &c. Elegans commendatio exercitationis corporeæ Fulgentii Neapoli in muro horti Capellæ in tabula publica extat, ut sit omnibus cognoscenda: *Exercitium est humanæ vitæ conservatio, caloris naturalis lima, excitatio dormientis naturæ, virtutum corroboratio, superfluitatum consumptio, otio inimicum, temporis lucrum, juventutis debitum, & senectutis gaudium salutis adjutorium destructio omnium malorum V. N. Chytræus in deliciis Europæ p. 65.*

§. III. Plus dicam, exercitationes non modo corporis actiones factas fervare tectasque, vel imminutas aut depravatas concitare, corrigere, restituere, sed & animum mire (has magis tamen illas minus) ejusque robur, vires & operationes alere & excitare, sensusque internos, quos vocant, instaurare incolumitatem memoriæ vigoremque ingenii atque imaginationem in excogitando, inveniendo ac intellectum rationando, judicando valentem & illuminatum præstare. Hinc alta ingenia & erecta motu gaudent, motumque amant, passionēs sic dictas moderatas confirmant, & inordinatas moderantur ac ordinant, quod præclare sentit atque scripsit GALENVS l. de consuet. ab exercitiis animæ universæ virtutes augentur, & robur accipiunt. Rursus L. I. de san. tuend. exercitiis modicis, tum corporis tum animi custoditur intra sanitatis fines natus calor. Innuit PLINIVS Lib. I. Ep. 2. & 6. & SENECA Ep. L. I. p. 56. affirmat, illis animum ali, & p. 219. de tranquill. animi dicit: in ambulationibus apertis vagandum, ut cœlo libero & multo spiritu augeat attollatque se animus. Adolescentes Græcorum ex instituto Solonis Gymnasticam exercuerunt non solum bonæ habitudinis acquirendæ & sanitatis conservandæ causâ, sed &, ut animosiores fierent & ad rem militarem præparentur, ut plura jam non addam, cum rei testimonia ipsa adsint ubique. Visi sunt multi stupidioris ingenii, quos phlegmatici temperamenti esse, diceres, ex nimia humiditatum earumque crassarum & viscidarum copia, corporis motionibus frequentioribus sagaciores & prudentiores facti; Nec jam mirandi causa est, cur omni tempore corporis exercitia, ut modo prælibatum est, a magni nominis Principibus atque Heroibus, Sapientibusque frequentissime instituta fuerint, ut documento posteris quoque esse possint Hercules, Achil-

Achilles, Augustus, Marius, Antoninus Philosophus aliique multi, & eo ipso simul præluferunt virtuti, quam admiraturus postmodum esset terrarum Orbis. Pittacus Rex Mytil. rotam versabat, Lacedæmonii juventutem quotidie & varie exercebant laboribus, venationibus, cursu, immo fame, siti, calore, frigore &c. Hinc cum pueris Socrates sapientissimus, ludere & longa arundine equitare, (de quo differens adeatur P. HUGHVS *illustr. questionibus P. II. 19.*) non erubescibat; licet etiam ab Alcibiade risus esset, quod etiam ab Agesilao factum esse legimus. AELIANVS *Histor. Var. Lib. XII. cap. XV.* PLVTARCHVS *in Vit. T. III. p. 372. Valerius Maximus Lib. VIII. cap. VIII.* Scipio & Lælius bini isti sine exemplo integerrimi viri, concharum marinarum ad ripam prope Cajetam atque Laurentum collectione, se recreando certabant. Scævola Pontifex Maximus, Vir gravis, pila ludebat ac calculis vacabat, in rebus enim feriis Scævola, in lusibus hominem esse, volebat. Pariter GALENVS in agro tum ligna findere, tum fodere, hordeum in pila contundere ac deglubere ac alia quædam rusticatus opera facere, nonnunquam solitum fuisse, commemorat *Lib. II. cap. II. de sanit. tuend.* Nec frustra opinor, Aristotelem Peripateticum fuisse, qui pariter ac Plato in ipsis Gymnasiis philosophari solebat, ut simul cum corporis exercitio etiam spiritus ipsi & animus alacriores redderentur. Neque primum alium in finem exercitia, quæ equestria vocantur, instituta sunt præmiisque propositis, quam ad fortitudinem excitandam, ad emendandos & præparandos ad meliora corruptos mores & immodicas voluptates, quæ ex desidi otio exsurgunt, avertendas, ut de Agesilao & variis Persarum Regibus habetur. Alexander Magnus, postquam enim (ut CVRTIVS memorat *Lib. V. c. III.*) Asiam in suam potestatem redegerat, & in urbe Babel per sat longum tempus cum suis permanerat, iique otio &, quæ ab eo procedunt, vitiis, lusu, scortatione, furto, commestationibus aliisque illecebris voluptatis corrumpébantur, militaria excogitabat exercitia, ut haberent quod agerent, & a vitiis deflecterentur. Nec Romanis & Germanis &c. per postera secula alia mens fuit aliusque scopus, ut de his speciatim TACITVS de veterum Germanorum disciplina memorat, eos primæ juventæ honorem in labore atque exercitatione collocasse, quo id quidem consequuti sunt, ut plus ibi valerent boni mores quam alibi multæ leges. Ast & hoc est tenendum, quod, sicuti hoc circa motum regimen, rite institutum, ex stupidis secundum modo adducta, ingeniosos, ex debilibus robustos, ex morbidis sanos, ita & frivolos, ex ingeniosis audaces & tandem mali moris homines formare valeat.

§. IV. Quam infelix igitur eorum conditio est, quibus focors est animus, qui segni in otio, (quod ipsum vitium est,) nullum negotium tractante humores incrassante, quia non debito modo moventur, a quo motu particulæ, humorem quemlibet componentes, subtiliores & exiliores fiunt, (cum juxta se semper moveantur alteranturque) & quod secundum HIPPOCRATIS effatum 2. *de Dieta* 28. humectat & corpus debile facit, ex quo ingnavia crescit, torpent & velut attoniti aut ad instar Colossi immoti sedent aut jacent, & claudorum (ut ajunt) incurvatorumque ad modulum futorum domi corrumpuntur & perpetuo sentientes foetorem propriarum sordium & sui ipsorum latitant, vix noti viciniæ, in angulo ut glires per hyemem vel ut IUVENALIS *Lib. III. Satyra VII.* belle expressit: *genus ignavum quod tecto gaudet & umbra*; ex quo, tanquam equo Trojano, innumera mala exeunt, qui inter perpetuum illum ignaviæ comitem, lusum focordem atque inertem, inter alearum chartularumque lusoriarum petulantiam atque insane studium & ingluviem, Bacchi & Cereris illa lautissima munera, flagitiosa diligentia occupati, qui mollitie effœminati propemodum diffluunt & qui non sine mollitiei nota exercitationibus non oblectantur, hi corpore & animo pariter languent, hi mollitie membrorum quadam tenera & fragili præditi atque juncei ac graciles apparent aut obesitate quadam minime salubri tumescere videntur. His artus rigent & situs quasi contrahitur, vitia simul utraque emergunt & inolescunt, materia vitiorum impura collecta, retenta, sensimque aucta, sensimque magis corrupta, ac lentorem acquirente, particulis facile se intricantibus atque motibus singulis, qui justis alioquin calorem interni debitam, stagnationes verendas, impediunt languescantibus & imminutis, partibus torpescantibus aut laxatis aut infarctis. Quemadmodum enim ut notanter ARISTOTELES *VII. Polit.* loquitur: tempore pacis & otii homines petulantes evadunt ita & humores in humano corpore infesti atque inertes fiunt in quiete. Sicuti aquæ salubriores fiunt si agitentur, at si stagnent, corrumpuntur ac insalubres redduntur. In quam rem belle quoque SENECA loquitur: *otio paulatim effeminatur animus atque in similitudinem otii sui & pigritiæ in qua jacet solvitur*; Nec minus eam graphice describit LOMMIVS *Comment. in Cels. Cap. I. p. 14.* sequentibus: *Certe quantum incommodi neglectus ex toto motus desesseque illa vitæ inertia mortalibus afferat, ex eorum habitu cognoscere est, quas longi carceres arctarunt; nempe his calor omnis intermoriatur veluti color decorque perit, tum fœdissimo situ corpus tabescit & penitus, ut sic loquar, cadaveratur, adeo ut multos constet hujus rei grave periculum vitæ suæ*

sue impendio testatus fuisse. Hinc inter eos, qui ejusmodi vitæ dediti sunt, adeo multos invenies, qui non modo gravibus & diuturnis passionibus sunt correpti, ut asthmate malo hypochondriaco, calculo, arthritide, cachexia, scabie, scorbuto, hydrope, similibus, ex copia & impuritate humorum eorumque stasi infarctu & obstructionibus viscerum alibi locorum, (ubi scilicet vasa arctissima sunt,) imprimis oriundis, sed & animum habent demissum. Hic certe motus est Medea, quam Diogenes apud Stabæum non veneficam sed sapientem celebrat quæ incantamento quasi homines molles & effœminatos exercitationibus, robustos, vigentes, sanos atque longævos præstat, & rejuvenescere illos efficit, ut locum olim fictioni fecit, OVIDIVS *Lib. VII. Metamor.* quippe traditum est, ipsam regiam Colchidis Principem, Jasonis conjugem, Peliam Thessaliæ regem a filiabus suis trucidatum vitam atque coquendo juventutem restituisse. Superfluæ enim nutritiæ partes adultorum, senum, (utpote quorum corpus non amplius ad augmentum iisdem habet necesse, tamen adeo multa assumunt ac pueri & adolescentes) ad fibrosam habitus texturam, quotidie deponuntur, apponuntur illamque occalescentem velut reddunt, ut ad motum minus sit apta & agilis & perspiratio simul impediatur, atque circulo, dein segniori indies sic facto, vita sensim quoque tandem deficiat. Pollicetur hinc Galenus neminem ægrotaturum, si integer ante cibum exerceatur, ac a cibis pravis crassisque abstineat: atque adeo opinatur LVD. MERCATIVS *de Sanit. & ejus Conserv. p. 54.* quod corporis exercitium non solum benefaciat ipsi, sed & emendet victus rationes, quibus fiat, ut fere universa sanitatis ratio in exercitando corpore sita sit. Notanter Plato has artes civitatibus necessarias esse, judicavit, Gymnasticam scil. & Musicam, animorum, corporumque nutrices: Hac de causa Apollini Gymnasium ab Atheniensibus dicatum censet Plutarchus. Xenophon refert, Cyrum regem tanti corporis motus fecisse, ut injunxerit, ne, Persæ unquam sine labore cibum caperent, valetudini atque fortitudini perinde exercitationes necessarias ratus. Neque attinet dici, per exercitia ejusmodi deprædatorio motu atque calore quos efficiunt, multas laudabiles partes separari, dissolvi, immutari atque consumi, quæ quiete & otio conservantur. Sed neminem fugit ratio quod salva res sit, si & modus in his teneatur. In hujus aliqualem illustrationem insuper sistam dictum illud Marci Catonis ut apud Gellium habetur & quod sequentem in modum se habet: Vita humana probe ut ferrum est, si exerceas conteritur, si non exerceas, tamen rubigo interficit: melius tamen est conteri illud,

quam sic absumi, ita homines exercendo videmus conteri, si nihil exerceas inertia atque torpedo plus detrimenti facit quam exercitium. Aequae in hanc eleganter scribit PLVTARCHVS magni iudicii vir in *Lib. de Tuenda Valetud. T. II. p. m. 135.* *Sanitas non otio atque inertia venalis est, quae ut maxima mala morbis accidunt. Et nihil differt homo, qui bonam valetudinem inertia & quiete obtineri posse existimat, ab eo, qui ut oculis tueatur, non videt, & ut vocem nullum sonum edit. Et brevi post: Verum haud est, in otio viventes, magis valere.* Hunc etiam admodum perbelle causam egisse videtur, qui clepsammio adscripsit: *ipsa quies vitium est.* In hanc rem notabilis est ordo & ductus naturæ, quæ sedecim aut octodecim horas motibus & exercitiis corporis obeundis, octo autem vel sex aut septem saltem requiei destinavit, per quas delassata membra, defectumque virium iterum refarcire solet. Atque commodè hic quoque commemoratur, sanitati ac vitæ non adeo obesse excessum internorum motuum, quam illorum defectum.

§. V. Cum nihil tam certum, quam otii vitia negotio discuti, atque nihil tam salubre, quam superfluidatum mala, motu absumere, cumque inertiae dulcedo facile subeat atque invisæ primo desidia, postremo ametur. Ideo qui studet, ut recte valeat mens in corpore concinno, vegeto ac sano, frequentibus at modicis convenientibusque excitetur exercitiis, sine quibus & optime valentes & validi perdendi valetudinem suam periculum incurrunt, milites imitatus, qui media ac alta in pace supervacuis quasi laboribus se exercent, ut sufficere necessariis possint, & nobiliores spiritus ad martiam atque militare decus & opus optime præparent atque accendant. Præferenda igitur omnino sunt, secundum veterum sapientiæ & artium bonarum & salutarium Magistrorum præcepta, ne exercitia sed improbi labores evadant, quæ non minus bonam corporis habitudinem, sanitatem & convenientem membrorum compositionem, quam animi delectationes, agitationes, cogitationes (quæ secundum HIPPOCRATEM *Lib. VI. Epid. I. Sect. V. T. I. p. 810.* ejusdem ambulationes sunt) vires & virtutes atque generosos ad præclara impetus præstare, excitare, conservare & augere possint, quæque corpus nostrum ita præparant, ut rationis imperiis non adversetur ex quo duplex redit emolumentum: liber enim & excitatus animus simul benefacit corpori, ut Galenus jam recte monuit, quare Plato scitissime dixit, quod corpus nunquam sine animo, & animus nunquam sine corpore, exercendus sit. Nam quibusdam, qui in vili & illiberali arte versantur atque labores solius corporis viribus, nulla ingenii virtute perficiunt,

corpus

corpus quidem vehementer satis exercetur, mens vero ita sopita & quasi stupore oppressa, vel in alias cogitationes deducta jacet, ut vix corporis motum sentiat, & si sentit eo parum afficiatur. Placent magis & item conferunt exercitia, quæ citra tædium ac repugnantiam sed potius gaudio atque voluptate quadam animum afficiunt atque illam Græcorum ἀνταρκειαν ingerunt quæ & facilius perferuntur, licet etiam sint duriora (hinc mercenariis opificiis occupati rectius valent, qui alacriore & in spem lucri aut gloriæ erecto animo opus faciunt) ac quæ grata atque delectante quadam varietate, quæ æqualiter corpus & omnes partes & placide & optime movent. Quod CELSVS indicat *L. I. c. II.* Levat lassitudinem laboris mutatio; Eorum optima censentur secundum Transactionum philosophicarum Anglicanarum explicationem Ann. MCCXVI mens. Jul. August. Septembr. in quibus simul loca mutantur. Meliora etiam sunt, quæ propriis musculorum viribus peraguntur quæque fiunt sub dio & aura liberiori, ubi pacatum nitensque apertum cœlum spectatur ejusque serenitate fruitur, qualis est rusticanus, quam quæ sub tecto & inter urbium, platearum domorumque mephitim, melioraque quæ in umbra, quam parietes & viridaria efficiunt, instituuntur. Ex quo duplex capitur emolumentum: nam una opera & corpus movetur & a campestri illo aëre purissimo nimirum & sincerissimo spiritus egregie reficiuntur. Eligenda quoque quæ scopo, pro quo instituuntur, magis conveniunt. Permagni enim ubique interest, quibus motibus aut quomodo hoc aut illud moveatur, quod & de microcosmo, corpore humano valet, ad quasdam enim actiones, quasdamve agendi intentiones motus saltem tonicus, ad alias pressorius, ad alias quassatorius ad alias circulatorius motus, &c. requiritur, quæ res sane digna omnino videtur ut penitus consideretur, hinc & optime BACO DE VERVLAMIO ut ex *Lib. IV. de Augm. Sacent. p. 106.* constat, advertit, exercitationum species, quæ in sanitate tuenda plurimum pollent, neminem ex medicis bene distinxisse, cum vix inveniatur aliqua inclinatio in morbum, quæ non excitatione quædam propria corrigi possit, autumatque morbis renum globulorum lulum, pulmonum sagittationem, stomachi deambulationem, gestationem & sic porro magis convenire. Tales certe motuum differentias & has quidem v. gr. in motu musculorum in motu locali totius corporis, alias in respiratione, masticatione, chylicatione & sanguificatione, alias in fluidis promovendis & secernendis, in nutritione in utilium porro ac minus utilium secretionem, nec non horum excretionem observamus atque specialem simul cuilibet fere corporis parti tensionem

nem peculiaremque cuiusque structuram & actionem advertimus. Ita CLAVD. PERRAVLTIVS *Lib. de Sono P. I. Cap. IV.* observavit: sonos tymbani, tubæ aut chordarum panduræ majoris nonnunquam pectus percutere, neque tamen omnes sonos sed illos tantum, qui conformes sunt tono ac tensioni diaphragmatis, SCALIGER *Exercit. 134. Lib. VI. p. 230.* lepidam historiam recenset, de equite quodam Vascone, qui audito testudinis sono, urinæ involuntarium effluxum est expertus, de alio similem (historiam) Celeberr. ZWINGERVVS *Diff. de Antipathia p. 27,* habet. Ita Boylii servo, ob æqualem aut proportionatam membranæ aurium & tympani cum membrana gingivas investiente tensionem, quoties cultros cote acuebat, ingratus stridor gingivas cruentabat: Conf. BARTHOLINVS *C. IV. Epist. 152.* Si præter hæc alia adhuc quæras hujus rei exempla, exemplo tibi sit tarantismus, de quo BAGLIVIVS, qui ex ingenio magis quam commentariis sapit, testatur *de tarantula c. XIX.* eum sanari largo sudore oborto a saltatione, & non sequi sudorem idem præstare, provocatum ab ordinariis & vulgaribus diaphoreticis, ac illa venenum non eliminare ex massa humorum perinde ac saltationem, per quam viæ apertiores fiunt & corpusculorum stasis optime tollitur. Sic navigantes per mare & curru vecti in posteriori currus parte sedentes quidam, nausea ructu & vomitu modo tentantur sicque solo motu vorticofo vertigo inducitur & inconcinnæ musicæ harmonia si v. gr. in pandura pone ponticulum plectro nervi plectuntur, item tritura ferri &c. ingratam sensationem, horripilationem, stuporem dentium inferunt, sicque pertinax alvi obstructio non alio facilius corporis motu volutione in lecto solvitur &c. Porro perspectum est, quod reflexus tantum & reciprocus tremulus æëris motus sonum efficiat, ubi nimirum partes æëreæ sphaerulæ percussæ & vibratæ cedunt atque recedunt, & inter se invicem resiliunt & reflectuntur atque pro varia vibratione æëris in sono & vibrationum concursu vario, item proportionem, frequentia & combinatione soni oriuntur fortes, aut lenes, acuti & obtusi, harmonici & dissonantes, ac sic exinde spiritus in aurium nervis varie attinguntur ac moventur. Rursus per sonos certos, vitra rite collocata contremiscunt & franguntur, de quo vide celeb. MORHOEF. *de Scypho vitreo &c.* & in scyphis vitreis aqua repletis, motu digiti tremulo madefacti & in circulum acto in margine aqua contenta, in bullulas elevatur &c. Quidquod? in tota rerum natura videmus. (cum motus sit universalissimum medium productionis & operationis) varios effectus & mutationes varias, pro diversa motuum specie, proficisci comperimus, Facile exinde fluit, eodem modo in nobis motus ejusmodi fieri,

feri, atque hinc ad gaudium, tranquillitatem vel tristitiam & inquietudinem vel somnum componi, aut alacritatem excitari, exindeque varios morbos oriri, aut sanari.

§. VI. Sunt nempe exercitiorum corporis permulta paci belloque utilia & apta ac quæ tam ad corpus quam animum recreandum excitandumque inventa sunt & instituta & eorum quidem tantum non innumera, quæ tamen plurima *GALENVS Lib. II. de tuend. sanit.* enumerat, quæ secundum gradus, tempus, modum, quantitatem, qualitatem, vehementiam, celeritatem, locum, ordinem &c. differunt, quæ plurima, si provide & modice tractentur sanis, pauciora ægrotis sunt, congrua. Plurima æstivo, quædam hyberno saltem tempore institui possunt, ut traha vectio, super glacie currendi ratio, non modo apud Belgas, Cimbros, Danos, Suecos, Russos & reliquos populos septentrionales maxime familiaris & apud Saxones quoque non ignota atque a multis quæsitæ. Hæc ibi, illa alibi amantur. Sic Græci generatim dicendo cheironomiam choricomachiam atque celadium vid. *CAEL. AVRELIANVS de morb. chron. Cap. XI. Lib. V.* exercitia ac ludos atque speciatim Crotoniatæ & Bœotii, palæstram, Athenienses ludos navales, Lacedæmonii, pedestria, Thessali equestria exercitia, venatum Crentes, saltationes Sybaritæ, Thraces atque Carthaginenses alique ut notæ sunt saltationes Telesæ Pyrrhicæ, Floreales, Laconicæ, Siccineæ, Scænicæ, Castoria aut Tripudia, Lydii pilæ lusum, Jones eundem & chorum, Thebani tibiæ modulationem quondam aliis præferebant. Multa in veteri ævo celebrabantur, quibusdam nostro, adhuc multi delectantur; multa vero in desuetudinem abierunt, nihilque præter nomina ad posteras ætates pervenit, ut certamina & ludi varii, publici & privati, inter exercitia veterum Romanorum numerati pugilum, andabatarum, luctatorum, cursorum Lampadodromiorum &c. exercitationes &c. ludi Circenses, Olympii, ab Hercule instituti Pythii, Nemei, (in Nemea sylva in memoriam Archemori, Lycurgis, legislatoris illius eminentissimi, filii habiti) Isthmii Jovi, Apollini, Cyrrhœo, Baccho Nysæo, Neptuno, Herculi aliisque idolis nec non memoriæ Palæmonis & Melicertæ consecrati magnaue pompa celebrati, item Megalenses, Capitolini, Compitalicii, Conviuales, Florales, Votivi, Trojani, Castrenses Plebeji, Taurii, Secularia, ac Lupercalia, Boalia, Dionysia, exercitia, eaque quæ *JUSTINIANVS Imperator Lib. I. §. L. fin. Cap. de aleator.* Monabolon, Contomonopolon, Quintanum &c. appellat. vid. *PETR. GREGORINI syntagm. Juris Lib. XXXIX n. 3 seq.* lucta, disci-projectio &

& jaculatio aliique privati ludi, latrunculi, tali tesseræ, fritillus, harpastum, halteres, petaurus, &c. De quibus prolixè satis celebris ille Græcus Poëta, Pindarus & qui in eum sunt commentati differunt vid. in primis ERASM. SCHMIDIVM in *Pindaro* it. ARISTOTELEM *Lib. I. Rhetor. Cap. V.* Exolevit vero jam pridem omnis exercendi corpora nuda, consuetudo, sic ut neque olei jam neque pulveris vestigium ullum sit relictum: ita & hodierno tempore desiit *Αγοχηρεισμός* ut est apud Lucanum atque illa *χερσνομολα*, quæ species saltationis erat cum gesticulatione a Mauris olim in Galliam introducta. Apud Judæos, ut Hieronymus scribit, juvenis lapides e terra extollebat. Annumerantur quoque his illiberalia etiam ac mercenaria opificia atque labores diversi domestici, licet coacti, sanis pariter & quibusdam infirmis proficui, ut lignorum fissio, truncorum arborum ferratio, terræ fossio, remigium &c. atque ii opificum multifarii, quotidiani v. gr. pileorum, figulorum, textorum, tornatorum, eorum qui machinas calcant, qui coria pedibus subigunt &c. qui omnes diversimode corpus movent atque exercent. Singulorum aut certorum saltem morborum curandorum & individuorum &c. certa eorum differentia notatur; quænam enim corpus æqualiter exercent, quædam certas magis partes, hæc species huic parti altera alteri, aut pluribus corporis partibus ex usu sunt, imo aliæ aliis corporibus conveniunt, ab his anima magis, ab illis corpus magis accipit commodum aut incommodum v. gr. deambulatio optima etiam exercitiorum species, per loca munda & amœna, alta & diversa, æqualiter magis corpus præcipue tamen crura movet, & capiti, oculis, collo, pectori stomacho magis auxiliatur. Vid. ANTILLVS apud. *Oribasium*, 6. *Collect. C. XXI.* &c. non convenit vero iis qui tumoribus œdematosis vexantur, qui semper de die augentur, imprimis in stando vel deambulando. Notabile in hanc rem est, quod XENÉPHON notat, in *Fest.* Cursores, qui olim inter cancellos decurrebant, crura ac pedes magis crassos, at humeros leviores ac tenuiores, luctatores vero humeros crassiores & crura tenuiora habuisse. Parvæ pilæ lusus vero e contra partes superiores, magis brachia sc. & pectus, exercet atque confortat & epilepticis, vid. AVRELIANVS *Lib. I. Chr. C. IV.* in calculis extrudendis, (quare Augustus Imperator eam amavit, vid. SVETON. in *ejus vita C. LXXX. & LXXXIII.*) alvi profluvio, tumore, vid. CELS. *L. I. c. VI.* rheumaticis, senibus de quo MARTIALIS *L. IV. epigr. 45.* proficius, minus vero in lippitudine, de quo HORATIVS *L. I. serm. satyr. v.* Globulorum lulum calculo & renibus, sagittationem pulmonibus & thoraci conducere asserit

rit BAGLIVIVS *de Fibra moti. Lib. I. p. m. 363.* Saltatione (quæ Socrati vid. Laertius Lib. VII. & EPAMINONDÆ Theban. Princ. famigeratissimo illi *Alex. ab. Alex. Gen. dier. Lib. II. cap. XXV.* AESCHILO PLATONI vid. *Lib. II. de Legib. & Lacedæmoniis* imprimis placuit atque Lycurgus vid. PLVTARCHVS *Com. de laude scrips. & CHRYSIPPVS* præceperunt) totum fere corpus commovetur atque agitur præcipue tamen crura, eaque firmantur; gravidis autem secundum HIPPOCRAT. *l. de nat. puer. nauseabundis, herniosis, calculosis, asthmaticis, procidentia uteri adfectis & mensruis fluxibus nimis, & seminis profluvio, pedum doloribus & tumoribus obnoxiiis adversatur, & capitis gravedinem & dolorem sentientibus & vertiginosis, (si corpus nimis in gyrum frequentius vertatur) adeo molesta est, ut quoque choreas vix possint spectare.* Præterea de hac observatur, assiduos saltatores in senectute fieri arthriticos, & podagricos, conf. PANAROLVS *observ. med. 30. p. 162.* præ aliis vero deprædicatur in morfu tarantulæ, chlorosi & hysterica passione. Saltationem porro imprimis cum subsultu proficuum fuisse, viro quodam, intolerabili dentium dolore excruciato, ut & in auditus difficultate legitur in BARTHOLIN. *Act. Hassn. Vol. V. Obs. 126,* ORIBASIVS *Lib. VI. Collect. med. Cap. XXXI,* ex Antyllo refert. Exilire accommodatum remedium esse diuturnis morbis capitis, thoraci, atque materiæ quæ ad partes superiores propensa, fertur. De quo subsultu maxime Plautus dixit, quod loco, noxia materia pellatur quæ vel dentes vel aures occupat. Pariter puerum quendam febre quartana a longo abhinc tempore detento, saltatione curatum fuisse fertur in *Eph. G. IV. C. D. III. A. III. obs. 110.* Diglotione vero manus potissimum firmantur. Sic disci projectio, apud veteres usitatissima, ut validum satis exercitium, thoracis morbis adfectis, noxam haud exiguam sine dubio inferebat. Navigatio pariter per mare, cacochymicis propter fastidium & vomitum quem excitat atque aliis multis in morbis, phthisi maxime, remedio est, ob quod, quondam multa trans mare, itinera facta sunt; ast præter illud, quod multi, hæc ulcera sanandi virtutem, maris falsugini exsiccanti potius adscribant, v. ARETAEVS *de curat. morbor. diuturn. L. I. cap. VIII.* de hac etiam comperti sunt varii navigantium morbi, quorum quidem pervicaces satis sunt, atque adeo pervicaces, ut constet vertiginem v. gr. ab agitatione navis contractam, ægerrime posse curari, adeantur *Eph. G. N. C. D. 1. an. 3. obs. 196.* nam agitationem inæqualem & duram navigii, vi ventorum impulsæ, præsertim sub procellosa tempestate, transpirationem insensibilem impedire, & hinc plenitudinem nimiam atque

excernendorum humorum retentionem & accretionem efficere dicitur. Præterea & corpus male perturbat, quod jam HIPPOCRATEM dixisse, *ex 4. aphor. 14.* apparet, atque præsertim juxta vertiginem modo nominatam, alvi obstructionem, nauseam & vomitum excitat. Legatur Cokburni Angli de navigantium morbis liber. De curru-vectione hodie usitatissima, Avicenna speciatim dixit: eam ex oculis laborantibus valentem esse, quoniam tenet faciem a parte post; verum & observatio & æstimatio SANCTORII ejusmodi est, *Med. stat. sect. 5. aph. XXX.* Vectio in curru inconueniens est, non enim solum perspirabile incoctum exspirare facit, sed etiam solidas corporis partes & maxime renes offendit, nephritidem imprimis scil. inducendo, calculosque commovendo. Conf. BOERHAVEN *aphor. de cogn. & cur. morb. p. 371. &c.* Incommoda enim varia incurrere interdum ex curruum commoditate possunt, qui eam amant, quia perpetuo insident, iis & alternatim pedibus incedere negligunt, ex assiduo hoc ac nimis violento sæpe motu corpus concutitur & crurum præsertim ac reliquorum membrorum juncturae, enervantur, ac torpidæ redduntur; unde pedum tumores oedematosi aut contrahuntur, aut enormiter augentur: (hinc & in malo ischiatico, arthritide & podagra & calculo nocet) flatus fursum ventriculum versus adiguntur (quare hypochondriaci ægre illam ferunt) renes facile inflammantur insuper & nausea & vomitus quandoque inducuntur, & ad hæmorrhoidum molesta symptomata dispositio exsurgit. Quanquam & pro varietate & aptitudine curruum ut & aliorum accidentium quæ in ipso itinere occurrunt, variat ipsa quoque hæc vectio: nimirum currus pensilis & liber, longe commodius, æqualius, lenius molliusque, fluctuatione quasi convenienti, movet corpus, atque per locorum difficultates si inæqualia ea sint, ruposa, lapidosa, duriter sat insidentes concutiuntur.

§. VII. Singulare & maxime laudabile quoddam præ omnibus exercitiis aliis equitatio habet, quæ ideo optima exercitationum species merito habenda est. Quippe equitatio ex sessione & statione mixta atque duplicis etiam exercitationis vicem explet, illius nempe, quæ a nobis fit, & istius, quæ ab aliis perficitur. Namque equitatio est species motus translatici corporis, equo insidentis divaricatis conjunctisque firmiter cruribus, ab hujus gressu dependens. Gressus autem quadrupedis omnis fit, partim statione, partim translatione aliquarum animalis partium, quæ aliis partibus quiescentibus innituntur. Concipi enim potest equus velut machina quædam, mediante freno injecto flectenda regendaque oblonga,

ga, quatuor fulcris terræ innixa, quæ in statione equi firmissima constituunt rectangulum quadrilaterum, prope cujus centrum, e centro gravitatis equi, cadit linea directionis. Incipiente translatione per elongationem pedis sinistri postici ad instar conti, centrum gravitatis, antèrius promovetur, consequenter flexis tribus columnis erectis tota machina, antèrius protruditur. Deinde firmis manentibus tribus pedibus centrum gravitatis comprehendentibus, ut machina a casu præservetur, antèrior pes sinister transfertur antèrius, & centrum gravitatis cadit in centrum rhombi cujusdam, quod formant tres pedes, cum puncto in quod pes sinister transfertur. Confecto gressu duorum sinistrorum pedum incipit translatio, postici pedis dextri, & deinde antèrioris, atque ita gressus equi absolvitur. Crura autem equi erecta ob suam duritiem, pondus incumbens tum innixæ machinæ, equi corporeæ, tum insidentis, equitis, facile sustinent, dum eques sic equo vehitur atque movetur. Insidens & quiescens quasi duplicem corporis dispositionem & affectionem format & experitur; compositio vero ea corporis, in equitatione ex statione & sessione composita est, quoniam ex arte est, ut equites tam erecti in pedes, eos firmiter stapedibus infigant, constantesque ibi semper teneant, quam ut regione perinæi saltem ephippium attingant, non totis incumbentibus clunibus, ut in sella insideant; statio vero certa quædam motus etiam species est, ubi æquilibrîi tensione musculi magnopere tonico motu contenduntur, quatenus tota corporis moles, ad perpendicularum incumbit. Ejusmodi motus tonicus, in unam partem unumque angulum sine alteratione determinatus, omnium difficillimus est & corpus non parum fatigat, sustineri enim debet pondus, quod quo majus est eo quoque molestius, quoniam membra in eodem situ & statu saltem quoad sensum detinentur, non obstante, quod quasi quies hic quædam appareat, quod apposite Scaliger avium exemplo declarat, quæ in aëre pendentes nec alas movere videntur cum tamen eas movent, quia si quædam earum mortua, in aëre statuatur, decidet. GALENVS de Trem. rig. palp. C. IV. & Lib. I. de Motu muscul. C. VIII. hac de re ita scribit: *Non enim quæ moveri videntur, ea moveri sola pronunciaverunt veteres; multa siquidem circa motum esse videntur, unum eundemque locum obtinentia, nihilominus autem moventur.* Siquidem & quivis tota die percipiet stare majorem lassitudinem, ambulatione parere, unde qui certis motibus atque in unam partem sunt assueti, reciproci antagonistarum motionibus exequendis minus idonei sunt, hinc & adeo non delassatur corpus, ac quidem, sive in aliis corporis motibus, sive etiam sessionibus,

ut in navicula, lectica &c. in qua corporis positura alias, ut humorum descensus facilitatur, ita ascensus inhibetur, & muscoli certissime validiores redduntur, venter emollitur, urina provocatur; maximopere vero offenduntur, qui renum inflammationem, hernias &c. patiuntur; asthmatici vero levantur, unde etiam Hippocrates in ulceribus curandis, quietem imperavit, stare & sedere ipsis inimica pronunciavit, & Coelius Aurelianus stationem in epilepsiæ curatione stans exercitium vocat; sub hac vero corporis positura, ex sessione nimirum & statione mixta, quoniam & cum vicissitudine corpus minime adeo fatigatur: nam & optima hæc quoque ejus conditio est, quod instituatut tota, præcipue equis lenitur incedentibus in adsvetis citra molestiam atque laborem citraque notabilem defatigationem, spiritum animalium depreditionem atque virium dispendium, quod a paucis aliis exercitiis est sperandum. Insuper & hoc amplius commemorandum est, quod pedes commode inter equitandum varie & sursum & deorsum commoveantur, quando firmiter stapedibus insistant, qui ut frequenter exercean- tur maxime opus est, quoniam pedes remoti sunt a fonte vitæ, caloris & humorum vitalium, unde ut mora quam necit hic sanguis, quasi compensetur, nec stagnatio hic, tam facile fieret. Naturam iis motiones validiores per ambulationem, ut brachiis & manibus per labores, injun- xisse videtur.

§. VIII. Præsertim vero in hac (equitatione) juxta universarum corporis partium & æquabilem exercitationem palpitatoria quasi non dorsi crurum saltem & pedum, sed & totius corporis omniumque membrorum etiam capitis cum cervice ipsius cerebri, blanda succussio & motus tremulus pedetentim factus alternativus reciprocus sæpe adeo repetitus & continuus, sive sursum deorsumque agitatio tolutoria qua sanguinis moleculæ eunt quasi redeuntque retrogradusque sic motus liquidorum, in vasis quem certissima observata docent, atque commonstrant, augent seorsim notari & magni æstimari meretur, utpote qui præcipue sanguinis partes heterogeneous disponit, ut debitis in locis secernantur atque purus sanguis arteriosus ad partes veniat; circulatio enim per se, illum non æque reddit aptum ad disjungendas segregandasque particulas; sed has per conquassationem simul quandam eandemque continuam aptas reddit ad excretionum loca devehit, ubi singulæ, locis propriis deponuntur & transcolantur. Inprimis viscera in thorace contenta pendula, concinne concutiuntur sibi invicem leviter quasi affricantur, interim aër majori impetu in pulmones eorumque vasa agit atque illis suam

suam efficaciam tribuit omnibus his simul conspirantibus, permultæ fiunt mutationes. Maxime vero omnium omnis impetus & terminatio in abdomen fit, descendit ac terminatur, quo ventriculus, diaphragma, intestina (quæ per suas revolutiones omnes partes abdominis in eo contentas tangunt, easque ad suum officium exequendum excitant, ut bene RIOLANVS animadvertit in *opusc. anat. novis contra Pecquetum p. 161.*) & imi ventris omnia viscera, quæ plurima ex parte æque pendula sunt ac illa thoracis, illorumque glandulæ vasaque reliqua secretoria & excretoria &c. optime afficiuntur, agitantur, vibrantur, cedunt, recedunt, motus ventriculi & intestinorum peristalticus, qui præcipua causa & secretionis chyli & ejus progressus per vasa lactea, ut & scybalorum ejectionis foras, existit, quò nullus motus in œconomia animali propemodum magis necessarius & utilis est, egregie juvatur atque impellitur. Quam proficiuus, quam laudabilis ejusmodi motus reciprocus blandusque succussorius ac tolutorius sit, de motu v. gr. diaphragmatis sæpius repetito, constat, per quod ventriculus sursum deorsumque quoque continuo movetur & similis ideo ejus motus est propemodum illi, qui in equitatione fit; nam per hanc externam concussionem, solutio ciborum simili ratione facilitatur, sicuti videmus solutiones discontinuationesque ac subactiones concretorum, alias agitatione & conquassatione externa felicius citiusque institui. Quod tam necessarium, quam palam est, nulli fere in corpore humano quam per abdominis viscera, quæ motu satis non gaudent, (ut per eorum vasa sanguis jugiter feratur) impeditiorem, tardiozem ac difficiliorem circulationem sanguinis esse, sub quibus nimirum non solum ventriculum & totum intestinorum canalem, sed & potissimum mesenterium, pancreas, lien, hepar atque omentum intelligo atque de his hanc censuram addo. Per hoc in specie (omento) sanguis difficilius fertur, quod non nisi membrana tenuis est, ex venis arteriisque constans, fibris carneis, musculosis & nerveis sufficientibus tamen destituta, quodque forte inservit sanguini abundanti, in corpore toto diverticulo, ut spatium habeat ibi se diffundendi secedendique, ne cor atque pulmones, ceteraque viscera nobiliora graventur. Hinc Observationes practicæ ac anatomicæ passim testantur, atque confirmant, plurimorum morborum chronicorum sedem hic esse, quia repertum est illud scirrhusum, exesum ac putrefactum. Per venas enim sanguis in his partibus difficilius regreditur, quoniam debito impulsu sunt destitutæ, imprimis cum sursum per eas, sanguis debeat moveri, motu hoc naturæ legibus per se repugnante, quippe omne grave cor-

pus sponte sua tendit suoque motu, deorsum. Non minus causæ gravissimorum morborum chronicorum nidulantur in mesenterio, per quod omnis chylus omnisque lymphæ ferme ex toto corpore, ad receptaculum lymphæ & chyli pergit, ubi non debito impulsu fertur & circulatur hytaditum, lymphæ extravasationum, abscessuum, scirrhorum, obstructionum viscerum, causam subministrat. Pari modo se res cum hepate habet, per quod ut densum admodum viscus, liquorum fluxus refluxusque non satis est expeditus sed difficillimus. In culpa non levi sine dubio est & vena Portæ, cujus structura & usus est plane singularis, nam diversa plane est ab aliis venis omnibus: e minoribus enim canaliculis divaricatis, ad majores, & dein iterum in minores dividitur, in qua ejusque præsertim perpendiculari adscensu impulsus ab arteriis & motus diaphragmatis & muscutorum abdominis, sub respirarione, vix semper sufficiunt, qui omnem sanguinem ex tot visceribus redeuntem, per omnes & minimos tubulos, per hepar, ad bilis ibidem secretionem perficiendam hincque in venam cavam atque iterum ad cor propellere possint. Hinc ex circulatione hic impedita, multa magnaue incommoda ex hoc fonte promanant, & plura sane quam quidem medicorum vulgus satis perpendit aut credit; Ut vero sanguis omnis jugiter per hæc aliaque vasa propellatur, equitatio, singulari sua motione atque agitatione, omnium optime efficit. Quod perspicuus sagacissimus SYDENHAM in *observ. med. circa morb. acut. histor. & cur. S. IV. Cap. VII.* inquit; si enim nobiscum reputemus, ventrem inferiorem, in quo disposita sunt organa secretoria, hoc maxime exercitio vibrari, eaque succussionibus aliquot mille, uno in die agitari solere, facile credamus, eadem succum quemlibet recrementitium ibi impactum, ope dicti exercitii, posse excutere, & (quod majoris adhuc est momenti) validiora ista caloris nativi excitatione, ita corroborari, ut munere, quod iis mandavit natura, in sanguine depurando, recte defungantur. Nec in postremis est, quod erectio capitis, cervicis universique corporis, quæ in hoc exercitio præ omnibus aliis servatur, sanitati imprimis conferat ut ex arte est equitesque decet; hac enim recta corporis positura omnia corporis organa in suo naturali situ conservantur, plurimi muscoli in sua actione permanent hocque pacto, vasa sanguifera movent premuntque ut facilitetur circulatio, succique insuper ipsi occasionem stimulumque accipiunt, ut propria gravitate facilius descendant sicque partes inferiores, quæ a corde tanquam fonte atque origine motus ac circulationis, longius sunt remotæ, debite afficiantur ac incalescant hincque secretion-

cretiones & excretiones, ibi promptius instituantur simulque partes superiores liberæ ac expeditæ conserventur, quod certe haud postremum, sanitatis longævitatisque momentum est. Et licet has partes superiores erectas continere, equites annitantur, nihilominus in ipso renixu, succussionis effectus se exerit, quod similiter, de humeris & brachiis cum thorace usu venit. Quoniam vero pedes, stapedibus firmiter insistant, simul ascensus sanguinis atque humorum, dein iterum occasionem accipit atque impulsus. Alia denique equitibus accedunt commoda, ut varia aëris mutatio, per quem paulo validius transeunt &c. quæ singula corpori, novi quasi modi sunt, qui differenti ratione fibras nerveas, blande vellicant easque modo implicant modo explicant aut expandunt & contrahunt commode. Taceamus varia objecta quæ, hinc illinc, tanquam novas subinde scenas conspiciendas, non sine notabili animi accepta quadam occupatione atque jucunditate, se offerunt.

§. IX. Ex præfatis jam facile colligitur, hoc motu plane peculiari, cui par alius vix datur alibi, justum omnium fibrarum, tonum conservari ac firmari, elanguidum vero & flaccescentem restitui, sanguinem & humores omnes, ad promptiorem circulationem excitari, eos subtilisari fluidioresque reddi, secretiones & excretiones lymphæ, fermenti ventriculi, bilis, succi pancreatici, mesenterii & reliquarum omnium glandularum juvari, obstructions aperiri, digestiones instaurari, morbificas vero particulas humorales, a glandulis intestinorum, maxime secretas, immutari, excuti ex tubulis, stagnantes, spissas, lentas ac viscidas moveri, dissipari, resolvi vid. Celeberr. HERM. BOERHAAVE *Instit. med. p. 238. §. 913.* & omnia omnium optime præstari, quæ supra in genere recensita sunt. Hæc eximia commoda, quæ equitatio præstat, permoverunt Clariss. Baglivium, ut Popularibus suis, Urbis Romæ civibus, a malo Jove, aëre nimirum humido & nebuloso pressis, eam ut summum arcanum, contra ægritudines ipsis adeo familiares, commendaret. Specialius modo adducamus de hoc observatum SANCTORII vid. *loc. cit. aph. 30.* equitationem respicere magis perspirabile, partium corporis supra lumbos, quam infra. Hincque inferam transpirationem per cutis poros præter alias excretiones, præsertim eam quæ per vesicam fit urinariam, æqualius promoveri. Quare hoc genus exercitationis, cætera albis (ut ajunt) præcurrere equis mihi videtur, quod homine dignissimum eique convenientissimum, totum corpus omniaque ejus membra laudabiliter exerceat, & quæ ad quævis munia exercenda, facilia & expedita reddat, quodque omnis ætatis, omnis conditionis, sexus omnis-
que

que temperamenti hominibus, tranquillitatem amantibus, & animi impetus magis spectantibus, omnique tempore omnique fere loco convenit, & ad omnes modos peraccommodatum, vehementer, leviter, celeriter, tarde, mollius aut durius &c. instituendum. Puerilis ætas jam lenem equitationem optime ferre potest, ut modo Julius Cæsar exemplo esse potest, qui ut supra adductum est, in tenera ætate adhuc constitutus, equo insidere consuevit, equumque in orbem circumagere fortiter potuit. Siquidem & hodie nobis omne stat consilium cum GVMPELSHAIMERO *de Exercit. acad. p. 228.* ut omnia exercitia, ita & præsertim equitationem esse excolendam, antequam corporis habitus obdurescere incipiat. Etiam si & senes in hoc non parum peccant, quod molliter plerumque vivendo, propriam naturam minus quam par est exerceant, verum ex adverso sæpius conspicias octoginta annorum senes, qui cum assidue cursitando aut equitando in perpetuo sunt motu tam pedibus valent quam multi juvenum, quique & cibos bene appetunt & somnum quiete capiunt. Puellis etiam equitationem Plato suo tempore, præcepit. Præ omnibus autem aliis equitatio eaque frequentior & fortior, quadrat iis, qui spongiosum laxumque corporis habitum gerunt, & qui vasa habent angusta, quoniam in musculis debilis est circulatio sanguinis, unde & multa excrementa serosa, tartareo salina, in sanguine colliguntur, iisque quos sanguineo-phlegmaticos, & sanguineo-melancholicos, aut phlegmatico-melancholicos nominares. Præsertim etiam equitatio, ut Magnis Imperatoribus, Regibus, Principibus, Aulicis, Nobilibus, ingenuis & liberalibus hominibus, præ cæteris dignissimum exercitium, ita & medica æstimatione, iisdem, necessarium est, quoniam plurimi morbi, in sequentibus nominandi, per frequenter, in aulis regnantes, per eam averti præcaverique possunt. Nec non suadenda ea præ aliis est iis, qui vitam agunt sedentariam, speculativam, studiis, lectionibus librorum, lucubrationibusque assiduis, deditam, curis publicarum aut privatarum rerum, sollicitudinibus, cogitationibus profundis, & administrationibus perpetuis, gravibus & molestis, detentam atque constrictam, quoniam palam est, ejusmodi hominibus, ex vita sedentaria & laboribus animi immodicis, magnam præ aliis spirituum animalium jacturam facientibus, hincque visceribus ac reliquis mollioribus partibus eosdem detrahentibus sicque atoniam inducentibus phtisin, hydropem, morbum hypochondriacum & melancholicum, & viscerum obstructions, atrophiam, hæcticam, scorbutum, colicam, nephritidem, arthritidem, aliosque morbos in sequentibus quoque recensendos, esse familiares.

miliares. Accepimus, vide CASP. LOHENSTEIN *Armin. P. II. p. 421.* Germanos & Persas olim equitationem in tanto adeo pretio habuisse, ut dedecori ducerent curru uti, ubi equo vehi possent, atque BENZO in *Hist. novi Orb. Lib. II. c. VIII.* notavit de Hispanis in America, quod equites semper felicissime rerum potiti sint, dum scribit: quæcunque loca pedestres adire Hispani, quæque equi penetrare non potuerunt, in iis semper ab Indis victi sunt. Eundem in modum, sit mihi prope-modum censendi jus, exercitationes corporis, si quis vellet instituere, utilitati maxime sibi ducât, non alio modo quam equitatione (si datum sit) eas instituat, sicque felicius optatum obtinebit effectum. Hinc & ea semper maximum remediorum genus, tam quoad sanitatem integram conservandam quam amissam restituendam, habita est. CELSO referente *Lib. II. cap. XIV.* Asclepiades trium tantum communium auxiliorum genera posuit, equitationem nempe, frictionem & gestationem. Apud veteres, Xenophontē imprimis annotante, ac ipso Hippocrate, ut patet ex libris de Diæta, atque Antyllo, Aetio, Avicenna, GALENO, testibus, equitatio commendatissima fuit. Qui ultimo loco nominatus *Lib. II. cap. II. de tuend. valet.* speciatim equitationem ad bonum corporis habitum conservandum, & recuperandam sanitatem, multum valere, confirmat. Sic & Aesculapius, ut apud Marc. Antonin. Imperat. legitur, eam coordinavit. Antiqui, qui ordinario fere medio die dormiebant, levandi animi causa, excusso torpore meridiano, paulisper equitabant SIDONIO *Ep. IX. Lib. II.* memorante. Hodie in Anglia præsertim, in frequentem remedii venit usum, ut constat ex observationibus & commendatione Anglorum, Sydenhamii, Pechei, Fulleri, Bagnardi aliorumque doctissimorum Medicorum. Nec desunt alii clarissimi Medici, qui equitationem encomio suo illustrent, ut inter Italos Baglivius, & Germanos Frid. Hoffmannus, & G. E. Stahlius eminent. Agnovit etiam hoc, eminens in omni literarum genere vir, IUSTVS LIPSIVS, ut patet ex epistola 56. cent. 3. ubi ad amicos scribit, se alere equum & voluptati & valetudini. Hæc dicta atque dicenda de motu & exercitio, quod equitatione perficitur, referuntur; Verbo modo quasi adhuc memoremus, quod multi non in postremis habent, robur atque vigorem conciliare equitationem etiam, ob spirituum animalium, qui ab animali generoso & animoso, equo proflante spumanteque proficiscuntur, perceptionem, æque ac equi delassati, ab hominum sudore recreantur, unde aurigæ iisdem pileum aut mitram porrigunt atque naribus applicant. Quo simul considerant, circa equos, in itinere, noctu & suda tempesta-

re, ut BACO DE VERVLAMIO meminit *Novi Org. Lib. II. p. 334.* sudantibus, quandoque flammulas leves atque corruscationes quasdam, ut alibi de juvenibus quibusdam legitur, apparuisse. E converso etiam Lentilius de Hydrophobia observationem addidit, qua notat, in juvene quodam convulsiones & hydrophobiam, quæ mala quondam passus esset, ab exhalationibus equi contagiosis quo per horam vehebatur iterum excitata fuisse.

§. X. Ex modo descriptis colligere licet, inter omnia reliqua exercitia & motiones corporis, exercitium tornatorium, Principibus atque Magnatibus hodie quoque familiare & gratum, equitationi propius, aliqua ex parte accedere, quoniam in eo tornatores in sedili sedentes, super scamno tornatorio, torno tornant, pedes sursum deorsumque movent, simulque abdomen, ac universum pene corpus hujusque musculos fere omnes, æquabiliter & ad æquilibrium magis, etsi non simul, alternatim tamen exercent, tollunt atque attollunt. Quod exercitium ideo commendandum venit iis, quibus alias equitatione uti, minus licet, iisque, qui membra habent infirma, aut qui in abdomine & artubus sentiunt incommoda, qui malo hypochondriaco, obstructionibus lienis & hepatis tentantur. Exercitium tornatorium, in hac consideratione, sequitur curruvectio, quæ plurimis hodie magis placet, atque tanquam optima medicina, nec sine ulla prorsus ratione, probatur, qua & Seneca alias, anhelitu admodum difficili, quo premebatur, se liberavit. Nec eapropter quidam, ullum discrimen inter equitationem & curruvectionem admittunt; sed antecedentia modo advertenti statim constabit, hæc duo exercitationis genera, licet aliquo modo sibi similia, tamen etiam dissimilia esse. Præter alias etiam rationes, quæ equitationem ab hac, & similibus motionibus distinguunt, etiam ea notabilis est, quod horologia protalitia paucissima, (quæ forte non validioribus elateribus, beneque fabricatis rotulis, sint instructa,) equitationem sufferre possint; facile enim ex ea, non æque vero curruvectione alterantur, & illorum motus vitiatur. Affinis ideo illi & per mare navigatio est, ejusmodi licet etiam sint, cum equitatione tamen, nunquam in comparisonem gloriæ referenda, ex rationibus potissimum supra commemoratis, ut alia commoda taceam. Aliquam quoque eo nomine affinitatem habent labores illorum, qui folles ad organa musica inflant, vel ignem fabrorum ferrariorum, suscitant, aut rotas in officinis metallicis ducunt, atque textorum, qui in textrino sedentes, insilia pedibus, alternativo motu calcant, item pannificum, ut & coriariorum, qui corium pedibus versant.

Quibus

Quibus laboribus nimirum pedes majori nisu sursum, & eo simul musculos & viscera abdominis attollunt; quæ vero mechanicæ occupationes, suis potius relinquuntur.

§. XI. Utile quod, spectamus, honestum decorumve atque eximia dignitas præclare commendat atque condecorat. Regiam exercitationem non inconvenienter equitationem dixeris. Si quod enim exercitii genus, Imperatoribus, Regibus, Principibus, Magnatibus, Heroibus, Aulicis, Nobilibus, virtutisque amantibus conveniens quodque illos magis vel deceat, vel condecoret ex ipsius Serenissimi Angl. Regis IACOBI I. *institut. Lib. III. p. 188.* regia auctoritate, equitatio atque elegans ars equestris certe præ omnibus aliis est, qua velut per concinnam corporis compositionem ac agitationem, illud generoso animo congruens, reddere satagunt. Hanc Principibus propriam quasi esse Carneades celebris Academicæ sectæ Philosophus, quondam dixit, quoniam nobiles & ingenuos animos atque fortes excitat & ad varias alias quoque virtutes, magnis Heroibus dignas, exercendas media atque occasiones supeditat. Idem apud FRANCISCVM PATRICIVM de *Regn. & Regis institut. Lib. III. tit. 2.* legitur, sequentibus verbis expressum: *Omniū exercitationum, quæ ad futurum Regem pertinent, præcipua habenda est equitandi ratio.* Siquidem & ab equitatione, omnesque dignitates & ordines, qui Equestris vocantur, quibus nihil illustrius habetur, originem sumunt. Atque quondam Romanorum Reges in ipsis solennibus, Equites sunt creati, quem ritum præsertim graphice in Vita Guilielmi, Comitis Hollandiæ, describunt Historici. Apud istos (Romanos) ordini equestri adscriptis, Censores equum cum annulo offerebant. Nec non ubique apud nos suspensa modo epitaphiis & sepulchris Heroum ac Nobilium calcaria ad equitationem pertinentia, in hanc contemplationem notabilia fatis momenta sunt. Ejusmodi etiam est, Nobilium Clarorumque virorum, Heroum ac Regum defunctorum corpora cum armis & equis præsertim apud Græcos, Latinos, Romanos, Aethiopes, Gerros & Turos, Scythiæ olim populos, Thraces, Getas, Gothos & Vandalos, Gallos atque Germanos, quondam cremandi vel tumulandi consuetudinem fuisse ut ex ALEX. AB ALEXANDRO *Lib. VI. diæ. Genial. Cap. XIV. p. 609. edit. Lugd. Batav. de anno 1673.* HOMERO *Lib. XXIII. Iliad. p. 171.* HERODOTO *Lib. IV.* IULIO CAESARE *Lib. VI. de bello Gall. Cap. XIX.* C. TACITO *Lib. de morib. German. p. m. 647.* IOH. KIRCHMANNO in *Append. ad Lib. V. de funer. Roman. Cap. VI. p. 706. seq.* GYRALDO *Cap. I. de sepult. & vario sepeliendi ritu* potissimum colligere est. IOH. IAC.

SCHIFLETIVS testis ocularis est, qui repertas in tumulo Childerici I. Regis Franc. varias reliquias & inter alias equi quem diligebat, soleam ferream, ossa ejus capitis, & maxillas cum dentibus vidit ac perquisivit *in Comment. sub tit. Anast. Childer. Cap. XV. p. 225.* In summis Principum Aulis, festivis ludis & certaminibus ludicris seriisque Equestribus velut exercitiis Equestris ordinis propriis (quibus ibi nihil solennius aut dignius habetur) in decursionibus atque torneamentis, (per plurima jam secula, apud diversas gentes celebratis, ad leges censorias Imperatoris Henrici I. Aucupis strictissime servandas) Gottingæ & Magdeburgi, adornatis, virtutis fuscitandæ, pace belloque ac delectationis causa, in hastiludiis & equiriis, in conventibus publicis, ingressibus, exceptionibus, nuptiis aliisque lætitiis publicis, nec non funerum solennitatibus aut exequiis, multum gratiæ & decori venustæ & expeditæ artificiosæ equitationi accedit, qua nimirum ad pompam atque splendorem comparata, equites agilitatis suæ specimen edunt ac detinent spectantium oculos & merentur applausum. Hæc certe vel tacitam etiam aliquam commendationem habet, varia solertia atque agilitate & dexteritate instructos, in sublimes saltus scite instigantes, cursum incitantes generosorum equorum, eosque, pernices gyros atque exiguum orbem pulcherrima variatione ducentes atque circumflectentes &c. equites videre, artem admirari, phaleratorum equorum indolem discernere, docilitatemque laudare, atque quando equites ipsi mutua inter se æmulatione delectantur, atque armati, decursionem, ad præmia instituunt, Testantur hoc illi Ludi equestres singulari magnificentia atque splendore exquisitissimo præ aliis hinc inde celebratis admodum memorabiles, sc. qui An. 1475 a Georgio, divite cognomine, Duce Baviaræ Landshuti, vid. IOH. IAC. MULLER *im entdeckten Staats-Cabinet P. II. cap. XIV. §. 7.* illi ab Augusto Elect. Saxon. Dresdæ vid. ANTON. WECK *Beschreib. Dresden. p. 58.* & qui præterito quidem hocque præsentī seculo An. 1662. & 1666. Viennæ vid. LVDOLPH. *Schaubühne P. III. p. 137. vita Leopold. J. R. 1708. Lips. edit. T. II. p. 156. seq.* & eodem anno a Ludovico XIV. R. Gall. *ibid. p. 1405.* a Carolo XI. Suecor. R. 1672. Holmiæ ejusd. IV. Tom. p. 1371. atque illi, aliis facile præferendi qui Dresdæ 1719. illi qui Monachii an. 1722. tandemque Bononiæ 1724. habiti sunt. Equiriorum quibus utilia delectantibus miscebantur, apud Romanos jam celebritas tanta fuit, ut nullum spectaculum iis splendidius oculisque gratius edi potuerit. hinc & Circi illorum adeo sumtuosi erant, inter quos maximus ille, Antonii Caracallæ, admiratione dignus censebatur, de quo PLINIVS *Lib. XXV.*

XXV. Cap. XV. p. m. 642. videndus. Hinc & adhuc Julio Cæsari laudi a scriptoribus maxime ducitur, quod puer jam ad equitationem animum & corpus applicaverit, & agilem se præstiterit, ut & Alexandro M. qui industrius in equis tractandis fuit, quare & miratus Rex Philippus desilientem aliquando ex equo, osculo excepit, dicens ei, aliud jam Regnum quære, Macedonia enim te non capit. Xenophon, cum Cyri R. castra sequi apud animum constitueret, equorum venationisque disciplinam prius summo studio adsecutus est, reputans, inutilem esse militem, qui in illis non magnopere versatus esset. Simile quid habet STVCKIVS in *Carolo M.* cum Presbyterium munus dignitatemque Episcopo conferret atque eum lætitia gestientem absque suppedaneo, uno impetu, alacriter in equum insilientem, conspiceret, statim revocavit, vales inquit, ut video, viribus, & eques haud malus es, opera itaque tua, in bellis, ubi virtus tua eniteat, indigeo: proinde ignobili & imbecillo in ovium gregem dominium relinque. Ei pariter, ut & in universum Francis ab EGINHARDO in *Vit. Carol. M. Cap. XXII.* ponitur in gloria simulque equitationi singulare decus accedit, scribente, Carolum M. exercuisse assidue equitationem ac venationem eamque illi gentilitium quoddam fuisse, quia vix ulla in terris natio esset inventa, quæ in hac arte, Francis posset æquari. Quantumne decus, quanta dignitas & laus quantaque præmia Nobilibus Germanis a ludicris equestribus certaminibus (Turniere) tempore Heinrichi, Aucupis cognominati, Imperatoris R. inchoatis, a Gallis & Anglis desumptis ac certis legibus circumscriptis, sunt tributa! V. RVEXNERVS in *Præfat. des Turnier Buchs*, GOLDAST. in *Reichs-Satzungen edit. Anno 1609. p. 4. seq.* Nec in postremis est, quod apud Zonaram legitur, de Basilio ex fece plebis alias nato, sed ob equitandi peritiam, Michaëli Balbo Græcorum Imperatori præprimis charo, adeo ut successorem constituerit illum; Ut e contrario equitationis imperito Ramiro Arragoniæ Regnum, non alia ex causa est ereptum. Historici magnis extollunt laudibus Comitem Tyrol. Albertum, Teutonicam bellicosissimam alias nationem, in obsidione urbis Mediolanensis, anno 1158. dedecore vindicasse, a Longobardis illi adfecto, quod Teutones nempe, equitare nescirent: vid. ZEILER. *Epist. 314. p. m. 356.* Apud Longobardos enim imprimis magna fuit equitationis dignitas atque maxima illius, qui rei equestris curam apud eos gerebat In VANNEFRIDII *Tr. de gest. Longobard. Lib. II. cap. IX. p. 780.* legitur, Alboinum Regem, Gifulphum, suum nepotem, virum per omnia idoneum, quem lingua propria Marpachis appellant, Foro-Julianæ civitati

& toti Regioni Ducem præfecisse; ac de Cuniberto Rege dicit idem *l. c. Lib. VI. cap. VI. p. 898.* cum fratre suo, intima communicasse consilia. Helvius Pertinax Imp. Rom. neminem, aulicis, nisi aut arte equitandi conspicuum aut literis deditum, adscripsit, hinc etiam sine dubio (ut obiter hoc commemorem) procedit, quod hodie adhuc in summorum Regum ac Principum Aulis, Comitum stabuli officium sit nobilissimum, uti apud Romanos, Longobardos, Germanos & in specie Gothos aliasque germanæ originis gentes, fuit semper. Sic inter præcipuos Caroli M. Ministros, Comitem stabuli ponit Hinckmarus. Apud Persas & Parthos equo vehi, nobilitatem, a vulgo distinguebat, ut recenset ALEXAND. AB ALEXANDRO *Gen. dier Lib. V. fol. 29.* & in ludis Circensibus Romanorum pompæ ordinem sequentes, illi tantum equis vehebantur, quorum patres in equitum censu erant, ut habet JVL. CAES. BULENGERVS *de Circo rom. p. 102.* De eodem propemodum intelligendus est ille locus in sacris *Ecclesiast. X. cap. v. 4.* *Vidi servos super equis insidentes tanquam Principes, Principes autem euntes tanquam servos, supra terram.* Nec abscondunt alia ibi reperienda loca dignitatem, maiestatem, potentiam atque gloriam significantia ut *Apocal. Cap. XIX. v. 11. & 14.* ubi S. Johannes in Cœlo equum album & verbum Dei ei insidens, atque totum cœlestem exercitum, albis equis equitando insequentem vidit. Cœlestem exercitum per equos & currus denotatum *II. Reg. Cap. VI. Sirac. XLVIII. v. 9.* & sanctitatem æterni summi-que Dei, equorum cymbalis inscriptam *Zachariæ Prophet. Cap. XIV. v. 20.* legas licet. In profana historia & in augurali quidem disciplina per equos imperium significatum sæpe fuisse comperimus, ut legere est apud SVETONIUM in *Cap. I. CAESARE Cap. LXI.* Romani olim summo honori ducebant, quando alicui Heroi equestrem statuam ponebant, rati, Heroum gloriam per animal adeo nobile & generosum simul ostendentem, hanc maximum fastigium adipisci, quales ut prisco ita & novo ævo adhuc statui consueverunt. Atque iidem pompas ad ludos Circenses equestres spectantes, non solum hominibus, spectatoribus sed & ipsis diis gratissimas esse, in quibus quotquot deorum templa & simulacra in foro essent circumequissent, hos ludos sectantes, arbitrabantur. Quantæ in omni ævo de reliquo equitationis æstimationis fuisse inter omnes PLATO præsertim in *Hippia & in Lachete* declarat. Hodie adhuc Regibus Persarum, Legatos equitando admittere atque audire solenne est, quod & suo tempore factum esse P. DE LA VALLE in *Itiner. P. II.* meminit, quem morem apud eos usitatum confirmat Legatus, a Rege Persarum ad Regem

Regem Galliarum Ludovicum XIV. ante paucos saltem annos missus, de quo legimus, cum Rex Galliae ut adeundi eum potestatem ipsi faceret, currum regium obtulisset, Legatum vero negasse, accipere eum atque dixisse, se nolle in latibulum se recipere (sic currum nominabat) equumque conscendisse equitemque, Regem accessisse. Atque adeo isti Mahomedis asseclae in paradiso magnam gaudii felicitatisque partem in equitando ponunt. Hic subit recordatio, me ab amico quodam, D. Fr. qui ante aliquot annos Legatum Regis Angliae, Algeriam comitatus est, relatum habuisse, quod Praefectus ibi Turcicus, Legatum in stabulum duxisset equosque suos monstrasset, ac optionem dedisset, ut sibi aliquem eorum eligeret, unicum saltem reservando, super quem eorum aliquando in Paradiso equitaturus esset. NEITSCHVTZ in *Itiner. Lib. VII. cap. CCXV.* memorat de ingressu in urbem Hierosolymitanam, quod ibi adeo magni equitatio aestimaretur, ut nemo ex peregrinis & advenis Christianis in urbem equo vehi debeat. Notanter Plato illam liberum hominem cæteris decere, dixit in *Lachete* & in *Hippia* memorat. Quam utile, quam necessarium hoc exercitium a nostra Germanica gente semper habitum sit, satis superque constat, adeo ut proverbiiis quibusdam locum fecerit, quando alterum de sciente: *Er ist in alle Sättel gerecht*, alterum de ignorante, effertur. *Er kan weder reden noch reiten.* Rursus aliud non minus notum est quo dicitur: *Wer will fortkommen unter den Leuten, mus vier R. haben oder können Reden, Rechnen, Rathen, Reiten.* Guilielmi Comitis Nassoviensis symbolum fuit: *Rathen und Reuten thuts.* Adhæc, est certe inter mirandas Potentissimi & Sapientissimi Dei rerum Opificis creaturas, non postrema equus. Ut enim nobilissimum, formosum maxime & docile pariter simulque & corporis viribus ac ad multos hominum usus longe utilissimum, & tam in pace quam in bello admodum necessarium, quo adeo admiranda & illustria opera efficiuntur, ita & formidabile animal est, adeo ut audaces satis censendi sint illi, qui equos indomitos primum conscendere, ausi sunt. Hinc & sine dubio veteres paganorum, equitandi artem atque inventionem non hominibus, sed diis adscripserunt; Siquidem ea, Neptuno Hippios, ideo etiam dicto, ex Homeri Sophoclis, & Pausaniae sententia, acceptum est relata. Alii rursus, magnis Regibus, Heroibus & fortissimis hominibus, hanc inventionis institutionisque gloriam attribuerunt ut Bellerophonti Regis, Glauci filio, ut Plinius, Sesostris Ægyptiorum Regi, Dicæarchus & Ælianus, Amazonibus, secundum Lysiae mentem, ea assignata est, Post Bellerophon-

tem

tem speciatim Theſſalos iisque finitimos Lapithios, in bello, equitatione uti cœpiſſe eamque ob cauſam Centauros vocatos fuiſſe, MERCVRIALIS habet *Lib. III. cap. IX.* Hoc admirabile animal ejusque vires IOBVS jam notabiliter & diſſerte deſcripſit dicens *Cap. XXXIX. v. 20. 28.* *Num das equo robur? num veſtis collum ejus fremitu? Num facis ut exultet ſicut locuſta? Gloria narium ejus terror fodi in valle ungula terram tum gaudet robore; exit aduerſus arma. Ridet timorem, & non conſternatur: & non reuertitur a facie gladii. Super illum ſonat pharetra, fulgur hæſtæ & lanceæ. In concuſſione & commotione exhaurit terram (ungula) ubi audierit buccinam, dicit hui & e longinquo odoratur prælium, fremitum principum & clamorem.* Alibi quoque equorum virtutes deſcribuntur, ut apud ISIDORVM ſic loquentem: *Vivacitas equorum multa: exultant enim in campis, odorantur bellum, excitantur ſonitu tubæ ad prælium, voce accenſi ad currum provocantur, dolent cum victi fuerint exultant cum vicerint: quidam hoſtes in bello ſentiunt: alii etiam proprios dominos recognoſcunt obliti manſuetudinis, ſi irriterentur.* Ariſtoteles in Ethicis inter alias virtutes inequo eam præcipue laudat, qua ſit ad currendum portandumque hominem idoneus & ad invadendum expectandumque hoſtem minime formidoloſus. Xenophon de re equeſtri, equum nobilem & ingenuum & Galenus de partibus prævalidum animal & generoſum heroicumque appellat. Etenim pugnat acriter, mordendo, calcitrando, ſaliendo ac toto corpore; jubam erigit, ſpumam ore emittit, inflat nares, fremit & hinnit, nec ſonantibus tubis ac tymbanis nec fulgentibus gladiis terretur. Ob hanc fortitudinem generoſitatem & animoſitatem ſuam equus belli ſignum erat ut ex VIRGILII teſtimonio conſtat, quod habet *Aeneid. Lib. III. dicentis:*

Bella armantur equi, bellum hæc armenta minantur.

Marti belli Numini olim ſacer erat, ac ei Romæ & in Oriente hinc inde gratae victimæ loco Decembr. aut Octobr. Idibus immolatus. In hanc rem memorabile eſt, quod famigeratiſſimus ille Hetruſcorum Rex, Porſenna, audaci Clæliæ, Virgini Romanæ, in ſignum & præmium valoris, quem præclare exhibuit, equum admodum ſpecioſum, dono dederit ei-que in honorem, Romæ, ſtatua equeſtris erecta fuerit, & quod in condenda urbe Carthag. ex reperto equi capite in primis fundamentis ponendis, auſpicium lætum, bellicoſum potentemque populum futurum ſignificans, habitum fuerit, ut IUSTINVS *Hiſt. Lib. XVIII. cap. V.* habet. Hincque etiam ſignum & prærogativam Ordo Romanorum Equeſtris
atque

atque Generosa Nobilitas ab equis, quibus in bello maxime utebantur quibusve donabantur, accepit & exinde atque ab equitando appellati sunt equites. Siquidem etiam Nobiles Generosi & excitati animi equos & equitationem præ reliquis tanquam convenientissimam ipsis atque dignissimam occupationem juxta & oblectationem amant, uti in Nobili maxime juventute statim videmus. Apud SILIVM ITAL. *Lib. IV. bell. punic.* quod obediētes sint dominorum vocibus equi laudantur:

*Tunc stimulans grato plausæ cervicis honore
Cornipedem alloquitur, fulgur Martemque minorem.*

Item apud OVIDIVM *fragm.* quod fortitudinem & victoriam affectent, legitur:

*Hic generosus honor & gloria major equorum
Nam capiunt animis palmam gaudentque triumpho:
Seu septem spatiis circo meruere coronam
Nonne vides victor, quanto sublimius altum
Attollat caput & vulgi se vendicet aura,*

Apud LVCRETIVM hæc habentur,

*Quippe videbis equos fortes, cum membra jacebunt
In somnis sudare tamen spirareque sæpe,
Et quasi de palmis summas contendere vires.*

Equi in Numidia adeo dociles erant, ut neque frenis neque ephippiis opus esset, sed solis verbis aliisque significationibus facile regebantur, ut DAN. C. a LOHENSTEIN in *Armin. Lib. IX. P. II. p. 1370.* indicat. Equorum docilitatem ulterius comprobant exemplis SCALIGER *Exercit. 209. Sect. I.* LIPSIVS *Cent. III. ad Belg. Epist. 56.* SALMVTH. AD PANCIROL. *C. P. I. Tit. 48.* CAMERAR. *Cent. I. Subcisiv. Horar. Cap. XX. p. 107. Cap. XXIII. p. 122. Cent. II. Cap. LXXX. p. 315. Cap. LXXXII. p. 352.* ZEILER *Epist. P. I. Ep. 40.* DIGBAEVUS *de immort. animæ rat. Tract. I. Cap. XXXVII. No. 2.* SCHOOCK *de anima belluar. p. 136. & 198.* FRANCISCI *Geschichts-Spiegel p. 1381. seq.* De subtilis phantasie equorum effectibus quos sæpe numero produnt, ut præter jam adducta de Mithridatis Ponti R. equo apud IVSTINVM *XXXVII. Lib. II. cap. de Julii Cæsaris SVETONIVM Cap. Lib. XXXI. de aliis PLINIVM Lib. VIII. Histor. Nat. Cap. XLII. legi potest.* Insuper & de natura ac indole equorum Solinus & Plinius præ aliis prolixè scripserunt, quibus Claudius Poëta jungendus, qui egregio carmine Honorii Cæsaris equum laudavit. In hanc rem notabile est,

equum, inter bruta solum juxta dentium mutationem quam quoque obtinet, in cerebro reti mirabili (cujus usus forte est, impetuosiores sanguinis influxum ad cerebrum in illis diverticulis infrigere ac mitigare) carere, ut plena vis sanguinis mox ad interiora cerebri penetret, ex quo, quia nempe in iis quædam pars sanguinis ob id, (rete mirabile) præterlabitur priusquam sanguis ad ventriculos cerebri & plexum choroideum pervenerit, animalia ista minus generosa existere asserit TH. CRANNEN. *de homine* p. 390. Haud scio an aliud quoddam animal irrationale equo sit comparandum: Hinc veteres equos notabiles non solum maximo modo ornaverunt ut VIRGILIUS de Rege Latino refert *Lib. VII. Æneid.*

- - - - Jubet, ordine ducit
*Instratos ostio Alipedes, pictisque tapetis
 Aurea pectoribus demissa monilia perdent,
 Tuti auro fuluum mandunt sub tectibus aurum.*

Sed & memoriam eorum conservarunt, quod de Alexandri M. equo, Bucephalo, & Hadriani imperatoris, Borysteno, notum est, cui hoc monumentum in tabula marmorea in Provincia Gallorum prope Aquas Sextias inveniendum positum est:

*Borysthenes Alanus,
 Casareus Veredus,
 Per aquor & paludes,
 Et tumulos Etruscos,
 Volare qui solebat,
 Pannonicos in agros,
 Nec ullus insequentem.*

§. XII. Mihi autem ulterius dispicere destinatum est, qualia & quanta commoda equitatio afferre possit. Ut vero ad investigandum hoc viam mihi muniam, necessum est, ut innuam, hujus exercitationis rationem differentiarum ut & virium corporis, aëris, temporis, quantitatis, loci & modi esse habendam, ne quid nimis fiat & intempestive neque frustra, sed cum recta subsequente efficacia, cum equorum magnum sit discrimen variaque indoles & magnum ideo quoque equitationum. Ejusdem scil. modorum diversorum, variarum, constitutionum & conatuum actionumque conditiones sunt spectandæ. Hæ in leniores & graviores distinguendæ sunt, ac illæ his salubritate ut plurimum anteponuntur. Ex lenioribus equitatio gradaria est, quæ æquali nisu, omnes corporis partes

partes afficit ac quietum magis equitem tenet & movet, ac nullum virium decrementum ac corporis lassitudinem post se relinquit, adeoque universo corpori magis est proficua, & perspirationem imprimis æqualiter promovet; Hanc sequitur tolutilis, (Antrit. Pass.) quæ equo Thiel-done aut Asturcone leniter, celeriter, æqualiter & molliter non vulgari gradu incedente, seu ad numerum velut colligente ungulas ut Martialis effert vel ut PLINIVS *Lib. VIII. cap. XLII.* loquitur, molli alterno crurum explicatu glomerationem edente instituitur, quæ optima est, quoniam succussionibus repetitis frequenter, & celeriter, blande tamen & æqualiter equo attollitur eques, motusque subsultorius blandus & tremulus in eo augetur. Ad hanc propemodum accedit ea, quæ fit equo saltibus quasi currente (gallopiren;) licet equidem velociter ea fiat, moderata atque placida tamen etiam esse potest, si nimirum equus est levis. Hanc vero vehementia atque pernicitate ast ob perniciositatem quam sæpe affert, verenda, superat ea. Hæc equitationis genera hoc commodum habet conjunctum, quod ex hac in aëre commotione, ventus lenis, quidam, quem equitantes, hunc in modum, tempestate etiam tranquilla, adversum sentiunt, aërem ventilans, ambientem illumque ad salubritatis modum redigens, tanquam assidue renovatus, calore corporis equitantis tepescens simul, efficiatur. Hæc aëris hoc medio commotio, forsitan efficit ut ex BAC. DE VERVLAMI *vid. Histor. Ventor. p. 458. & p. 46.* colligere est, quod quandoque equitantes leves turbines, pulveres paleasque excitantes, neque tamen magnopere ventum sentiant, diciturque quod hi hic fiant prope ex auris his contrariis se mutuo repellentibus & circulationem aëris ex hac concussione facientibusquæ concitatis-simo cursu ac equis velut volantibus fit, & quæ ad equestris venationis genera pertinet, quibus cum vertagis cervos aut accipitribus, ardeas aut lepores insequuntur, venatores. Omnium violentissima & impetuosissima est ea, quæ, cum contentione ac violentius equo succussorio duriter & vehementer sese agitante & inæqualiter, instituitur, hæc quadrupedans alias dicitur ac molestissima, cum desultoria est. Rursus alia recto gradu & cursu sive recto itinere fit, alia, quando equus in hanc vel illam partem vertitur aut in gyrum agitur gyrique sic diversimode hinc inde variantur quam flexuosam & circularem vocant, quæ etiam cum ea, quæ cum variis & violentis equi saltibus est conjuncta, minus est conveniens, quoniam repentino vehementerque fit ac caput afficit, vertiginem excitat, pectus, adeoque anhelosos hæmoptysi obnoxios, qui pulmones infarctos, habent, offendit, ac facile rupturam vasorum potest

afferre. Nec minorem his attentionem meretur acclivis declivisque, nimirum quæ fit per ascensum descensumque, per quam motus attollens adjuvatur augeturque, ac cum quadam varietate eques movetur, quare & talem corporis motionem *CELSVS de Medic. Cap. II.* præ aliis laudat, ideoque ea præferenda qua per montosa collinaque loca itur, illis, quæ plana in regione instituitur. Tametsi non negandum est, seorsim considerando, ut quemadmodum ea quæ per aspera, arenosa, acclivia loca fit, magis corpus attollitur, ita illam qua per declivia descenditur, magis conquassare, addo illam inæqualem equitationem ascendendo nimirum descendendoque varietate quadam, (quæ alioquin delectat) universum corpus optime quoque moveri minusque fatigari cum ut *ARISTOTELES* dixit, *v. Probl. 1.* requiem mutatio præstet, adeoque illam magis esse salubrem. Aliquam adhuc meretur commemorationem atque laudationem ea, quæ per arva laxata ac emollita exercetur, quoniam motus ille attollens adeo laudabilis auctior redditur, dum equus altius pedes attollere per scissas vomere glebas cumulatasque cogitur. Si & aratores terram sic scindentes equo tunc insequi velis aliud quoque beneficium haud contemnendum afferre tibi poterit, effluvia nempe illa ex terra tunc spirantia saluberrima, ore naribusque hauriendo: Hic enim spiritus terræ catholicus, salinus, acidulus ac analepticus est, qui recreat spiritus animales, motus præternaturales in corpore humano exortos componit ac longævitatem conciliat, *Conf. BACO DE VERVLAM. H. V. & M. p. 530. FERRAND. IMPERAT. Histor. N. Lib. VIII. cap. XVIII. p. 289. BAGLIV. Op. med. pract. p. 387.* Sellarum denique constructio & habitudo haud leve etiam momentum confert ad equitationis tollerantiam, quo nomine Viennenses sellæ omnium commoditissimæ atque aptissimæ habentur. Equitantes omnes cæterum sibi caveant sedulo a cespitatoriis Virgilio suffossis ac sternacibus & incertis pedibus ingredientibus, a calcitronibus mordacibus, refractariis, statariis, pavidis, ferocibus atque indomitis equis, evitentque salebrosa loca. Porro perpendere oportet quantitatem, tempus, occasionem &c. sed de his inferius explicatius agendum erit. Hoc loco paucis saltem adhuc indicandum est: Mediocre, lenem, gradariam, æqualem, tolutoriam, celerem leniter attenuare per insensibilem transpirationem expellere, salutaria naturæ molimina quæcunque per narium hæmorrhagiam per hæmorrhoidum mensiumque fluxum &c. expedita reddere, secretionem juvare, excretionem facilitare, calorem modice suscitare &c. Validam vero equo vehementius se agitante, succussorio, &c. institutam musculos

musculos & nervos robustos efficere, sudores expellere, dissolvere, ob-
 structionum claustra, fortius perrumpere, exsiccare &c. Sicuti in genere
 de omnibus insuper exercitationibus dicendum est, mediocrem & le-
 vem & quandoque in usum ductam ad valetudinem servandam, longæ-
 vamque vitam contrahendam ut plurimum sufficere: paulo validiores
 vero & iteratas sæpius ac assiduas ad morbos graviores & pertinaciores
 curandos requiri, ita & de equitatione propemodum censendum esse,
 constat. Quæ cuivis morbo primario conveniat, per series in sequen-
 tibus observandas, deinde ubi necesse erit, indicabitur. Quantum &
 intersit num mulo aut camelo (quam vectionem Avicenna præsertim
 comprobat) ut & alce, quæ & ad equitandi usum, in Borussia, Ungaria
 & Illiria cicuratur, nec non elephante, qui mollissimo incessu corpus
 leniter agitat, ac si navigio veheretur, unde quondam Regibus tantum
 erat concessus, quis vehatur, quoniam apud nos non usitata est, jam su-
 persedeamus explanare. Insuper præsupponendum est, ut equitantes
 debite, ut equites decet, corpus teneant optime compositum, ut ante
 prospiciant, utrisque femoribus, equi costis concinne inhæreant, crura
 extendant, plantas pedum stapedibus paulo fortius figant, collum ac
 dorsi spinam rectam sustineant &c. (nam prono corpore equitan-
 tes molestias certius sentient, ut videmus labores prono corpore pera-
 gentes, caput cum omnibus sensoriis gravatum & infirmum sentire) ne-
 que instabiles se gerant sed infixi firmiter sedeant, alias citius lassatum fa-
 tigatumque corpus, aliasque molestias experientur.

§. XIII. Sed ne nos de commodis equitationis acturos, equi fesso-
 res (ut ajunt) rapiant, rem quam habemus institutam prosequamur stri-
 ctim. Me non monente jam quivis ejusmodi amans intelliget & ex-
 pertus affirmabit, motu suo modoque domandi, agendi tractandique
 equum, equitationem, animum ingeniumque excitare, oblectare, & vo-
 luptate, hilaritate & alacritate quadam longe majori aliis exercitati-
 bus afficere, erigere atque firmare, tristes vero cogitationes & sollicitu-
 dines fugare, simul tamen etiam arduis rebus atque negotiis meditan-
 dis ansam atque occasionem commodam suppeditare. Hispani prover-
 bio dicunt, quod equus equiti sit gratus comes, quoniam equites inter
 equitandum ex equorum forma, pulchritudine, obsequio, docilitate,
 actionibus, exercitiis, quæ secundum equitandi artem cum iis in-
 stituunt; jucunditatem quandam & beneplacitum accipiunt. Equita-
 tionem vero præ aliis animi hilaritatem & fortitudinem addere, & in-
 strumenta omnium sensuum purgare & acutiora reddere, Antyllus jam

olim apud ORIBASIVM *Lib. IV. cap. XXIV.* notanter dixit, a quo non alienus AETIVS quoque videtur *Tetrabl. I. serm. III. Cap. VII.* & GALENVS *II. de T. S. Cap. XI.* Agilitatem pariter corporis ac robur atque vigorem, ut ad omnes suos motus illud sit expeditum ac bene convenientem & concinnam membrorum corporis compositionem, formam & aceretionem corporis, vultum colore vividiorum &c. præstat, quod in pueris ac adolescentibus videmus, qui si mature, ad equitationem & saltationem se applicant, meliorem corporis posituram sibi acquirunt. Hæc modo prolata in summam eleganter contraxit HENR. RANTZOVIVS, Eques Hols. *de conserv. valetud. Cap. VIII.* ubi de equestri venatione sequentia verba facit: *Venatio non solum universas corporis vires & partes ex æquo exercet, sed etiam animum mirâ voluptate afficit. Facit nos ante lucem somno excusso levare, frigoraque & calores tolerare: totum corpus venatoris movetur, eoque pacto insitus calor augetur, lacerti, brachia manusque agitantur; canum strepitu, clamore & latratu, aurium sensus acuitur, vociferatione thorax & vocalia instrumenta exercentur; dum feras fugientes summo studio venator insequitur cursu, ad quodvis opus efficiendum agilior redditur. In velocitatem celeritatemque ferarum, atque in canum incursum insultumque acies oculorum intenditur; quare visus melior perfectiorque efficitur. Sæpe numero in venando animus, ubi ferox aliqua bestia sese objecerit, ardore quodam incalescit, deinde cupiditate & honoris studio captus, cæde ferarum mire afficitur; dumque omnibus corporis advocatis viribus, omniumque nervorum contentione certamen aggreditur, conficitque tandem, laboris victor reapse lætatur. Membra quoque & instrumenta reliqua venatoris, ex mutuo ipsorum attritu redduntur duriora & robustiora; spiritus vehementius movetur, muscoli & nervi validiores efficiuntur. Taceo quæ consilia in feris indagandis, quam diligentiam in capiendis, laborem in feriendis & percutiendis studium venatorium requirat; ex ipso etiam canatu ad multa meliores & sapientiores evadimus. Habetur apud Romanos, equo publico qui in Capitolium vehebatur, eum in jus vocare neminem potuisse; sic jure dicendum est nobis; equitatione legitime qui utitur, eum sanum, vegetum & saluum, ac a morborum insultibus tutum atque immunem diu manere. SYDENHAMVS equitationem confortans maximum vocat, in *Opusculis suis p. 521.* a quo non alienus est Pecheus, ut inferius mox patebit. MICH. ALOYSIVS SINAPIVS in *Paradoxis medicis p. 114. seq.* non dubitat, Polonorum vigorem ac robur præter alias rationes, etiam frequentiori equitationi, quam exercent, adscribere. Dehinc & jactis his fundamentis, jam paulo fusius spectemus, quibus in morbis loco remedii, & optimi etiam remedii sit. In genere*

genere prius dicendum est, illam fere omnibus gravissimis spirituum nervorumque affectibus, spasmodicis & convulsivis, (de quibus consilium vide in celeberr. FRID. HOFFMANNI *Med. Consult. P. IV. p. 120*) qui a spirituum perverso & irregulari motu, per habitumque acquisito, insensisque partium quæ exquisitè sentiunt, motusque vitales gubernant, stricturis, suos natales & origines ducunt, & chronicis tardis atque inveteratis iis, qui ab insigni quadam partium solidarum, vasorumque moventium debilitate & hereditariis, incurabilibus alias rebellibus & pertinacibus morbis, iisque qui a copia, languore, crassitie ac infarctu humorum ac meatuum obstipatione in visceribus maxime obstructione, atque diu suppressis excretionibus proveniunt, item cachexiæ salinæ & serosæ, ac illi corporis statui ubi effoeta languida & pene emortua massa humorum & spirituum primario peccat, & ubi sanguinis vigor deficit, optime mederi. Ingenue fatetur I. PECHEVUS in *Promptuario med. pract. Cap. XXV. p. 154.* esse nihil ex omnibus, quæ ipsi hætenus innotuissent, quod adeo impense sanguinem spiritusve foveat firmetque, ac diu multumque fere singulis diebus equo vehi. Hinc in corporis languore spirituumque defectu GALENUS equitationem commendat in *Lib. de uteri cura.* Fatetur idem BAGLIVIVS in *Dissert. de Tarant.* incurabiles morbos chronicos, se equitatione sola prorsus eliminasse irritis omnibus aliis herculeis medicamentis &c. Speciatim innuere convenit quod Celeberr. BOERHAVIVS in *Instit. Med. p. 237. & seq. §. 912. & seq.* equitationem liquorum tam nimiam fluiditatem quam spissitudinem corrigere, ut & morbos fibrarum debiliū atque laxarum sanare afferat. Atque ut curat morbos, ita quoque iis præservat cum secundum HIPPOCRATEM in *Lib. epid.* quæ facta tollunt, ante facta fieri prohibent. Hæc generatim dicta adeo vera sunt, ut constet, equites nullis aut certe paucissimis morbis recensitis & fusius modo recensendis, ne quidem quoque obnoxios esse. Et si etiam adeo pertinaces & inveterati sint morbi, ut eos equitatio penitus non auferre possit, ita tamen eos mitigat ea, ut facile tolerentur, nec magnopere functiones animi impendant.

§. XIV. Ast dicat quis forte otiosum & absonum esse, equitationem in quamplurimis morbis commendare atque paucam gratiam in medicum, hoc remedii genus suadentem redire, facile & patior mihi persuadere, plurimis hodie plerumque inconveniens remedium videri, atque delicatulis rude audire, ignaræque plebi aut nasutulis hoc ridiculum esse, si quis medicorum v. gr. colica habituali aut poæagra, aut febris

quar-

quartana &c. laboranti proponeret, ut lectum relinqueret, equum conscenderet, atque per aliquot milliaria equitaret, quod tamen a prudentibus necmodicæ auctoritatis viris factum est. Verum enim vero, cogitet mecum, cui hoc durum videretur, duro nodo, durum sæpius quærendum cuneum esse, neque id adeo, ac quidem primo intuitu appareat, factu difficile esse. Indulgeant etiam delicatuli genio suo, voluent se desides mollibus in plumis, contemnant atque abhorreant hoc, equitationis rudes aut meticulosi nimis; certum tamen propemodum habeo, quod si Nobili cuidam aut viro militari aliisque cordatis viris optio daretur, loco apozematum sive decoctorum herbarum, magnis haustibus ex Græcorum Arabumque speciosis commendationibus hauriendorum, aut thermarum aquarumque aliarum salubrium in diffitis ac inviis locis quærendarum, aut nauseosorum pulverum, bolorum &c. ipso saltem auditu aut visu, miseris nauseam, averstationem planctusque incutientium, quotidie aliquoties deglutiendorum, equitationem potius instituendam sibi hi eligerent. Asserti hujus veritatem, possibilitatem & facilitatem commonstrat fidemque facit ipsa experientia in Anglia præsertim longo usu confirmata, loquuntur, confirmant ac suadent magni nominis Virorum testimonia atque auctoritates, in sequentibus suo loco commemorandæ. Interim & in antecessum attendant ac audiant cordatum T. H. SYDENHAM. ac experientissimum G. BAGLIVIVM ille nempe in *Dissert. epistol. edit. Lips. p. 522.* cuidam in sacris Antistiti, affectu hypochondriaco gravissimo laboranti, omnibusque adeo multis variique generis medicamentis, per multos annos continuatis, incassum adhibitis, illisque partim morbo diuturno fracto, diarrhoea colliquativa (quæ in tabe aliisque morbis chronicis, ubi omnes omnino digestionibus sunt prostratæ, mortem anteire solet) accedente, suavit, pharmacis nullum amplius locum relinquendum esse reputans, ut statim se equo vehendum curandumque traderet, modico primum itinere, quale ferre posset valetudo ita infirma, (ut nisi iudicio valuisset, rerum interiora altius penetrante, nec ad tentandum quidem illud exercitii genus potuisset adduci) rogavit autem, ut quotidie in eo persisteret, donec ex animi sententia convalesceret; nec fefellit consilium, sed fidem felix implevit eventus: nam non convaluit modo, sed satis validum etiam vegetumque corporis habitum exinde acquisivit sibi. Hic, BAGLIVIVS nempe *Praxi med. Lib. I. p. m. 138.* equitationem variis in morbis proponens ita loquitur. *Neque obstat quod ager sit nimium debilis & viribus adeo prostratis, ut ne quidem in lecto moveri valeat, siquidem in tali casu exercitium*

in-

inchoandum primo erit rheda ad pauca stadia, exinde vero sensim ad plura miliaria equitatione absolvendum.

§. XV. Jam ad rei coeptæ seriem veniamus, & illos specialius adducamus morbos, in quibus singulare equitatio se commendat remedium. Unde autem potius quam a phthisi & tabe gravissimo ac periculosissimo morbo, musculorum totius corporis fibrarum, tonum ac robur omnium maxime evertente, ordiar? Quia certum est, melius equitatione remedium vix haberi. Præsertim ad ejusmodi apte quadrat, quæ fit ex hypochondriorum, sive primarum viarum ventriculi, intestinorum & viscerum abdominis, vitio, ob humores viscidos & acres, scorbuticos, vel erosive vel induratione & obstructione nimirum & circulo sanguinis tardiori quæ juxta M. Sanguineam subjectum causæ materialis constituunt, tamque ad eam quæ ab aliis morbis principalibus, ictero, scorbuto, lue venerea, chlorosi, sputo sanguinis, ulceribus internis in aliis visceribus latitantibus verum putridæ quandoque materiæ per pulmones exitum molientibus, de quibus notabilia exempla DIEMERBROCCIVS *Observ. LXVII.* & TVLPIVS *Lib. II. Observ.* consignaverunt, ut & externis, febribus, asthmate, variolis, hydrope, dysenteria, animi pathematibus, melancholia, utpote cum sit ut plurimum secundaria, ac exercitii neglectum sæpissime causam remotam agnoscat (ut & ferme omnes morbi chronici) dependet, quamque adeam quæ fit ex glandularum obstructione & intumescencia ipsarum, infarctu pulmonum, quam Rhases asthmaticam vocat, sique pulmones tuberculis scatent, si stagnatio ibi est feri corrupti. Nimirum ille succussionis motus continuum quasi descensum harum partium abdomen versus concitat, unde palam est, varias obstructions & infarctus hinc expediri. Nec non certam promittit medelam in ea, quæ ex nervorum vitio aliarumque partium solidarum earumque motu depravato juncta cum appetitu summe prostrato, virium languore & atrophia, quæ Anglis nervosa dicitur, sanguinisque circulum ibi debitum omnino impediante, promanat. Imo in ipsa exulceratione pulmonum atque adeo consumptione, locum invenit a liquorum nimirum serosorum maxime motu prius per minutissima vascula plus vel minus impedito iisdemque ibidem cumulatis & dein forte exagitatis, latera vasorum diducuntibus, extenuantibus eorumque poros ampliatis justo copiosius subeuntibus, ex quo aliter hinc fieri nequit, quam ut intimior particularum contextus dissolvatur tubuli que extenuati atque extensi elanguescant humoribus autem stagnantibus paulatim corruptis ac putrescentibus, labes contracta intimius se in-

sinuat usque dum humores corrupti tubulos vitalitate omni exutos ad putredinem pronos, discerpant atque in liquamen tandem haud absimilem vertunt. Atque non modo leviori malo & gradu affectis, sed & consummatis jam, & pro deploratis habitis, non crebriori tantum tussi, non hæmoptysi & macie excruciatas, sed nocturnis jam sudoribus & diarrhoea colliquativa fere confectis, (quæ præsentem modo mortem ante fores jam prænunciare solent, & esse ultimam lineam rerum, ut laudatissimus Autor Th. Sydenhamius loquitur, simulque hoc ipsum asserit) ex quotidiana, matutina tolutili equi gradu validiori quoque & incitatissime equo currente & diuturniori (cum etiam illa omnia lentius seu securius procedant & opitulentur) ad lenem usque sudorem in aëre vel in aërem salubriorem proficiscendo, spes optima redit. Ideo etiam ejusmodi debiles admodum, viribusque adeo prostratis, ut ne quidem se movere valeant, ex lecto trahuntur inviti & primum in rhedam deinde super equum ducuntur ut modo ex laudato Sydenhamio audivimus. Phthisis enim eorum est morborum, qui irritam sæpissime faciunt & spem ægri & gloriam medici atque quorum partem affectam pharmaca efficacissima alias, licet etiam eorum usus sit continuus, infracta nimis & debilitata attingunt; Quomodo enim pus efficaciter abstergent, aut saltem materiam tenacem impactam solvent, cum tuberculis & ulceribus illis applicari nequeant. Et quomodo sanatio ac consolidatio fieri poterint, nisi pus prius fuerit bene mundificatum, cum ut *GALENI Lib. IV. de l. aff.* loquitur, externas quidem putridas partes abscindere & urere possimus; pulmonibus vero horum auxiliorum neutrum adhibere liceat. Ad hoc, medicamenta, quæ in phthisi adhiberi solent, licet adeo numerosa sint, paucissima tamen non suspecta, ob tenerrima & delicatissima pulmonum stamina (omnia enim ejusmodi cum morsificatione quadam licet etiam leviori agunt, quæ huic tamen pulmonum conditioni est infesta) inveniuntur, quod facile per omnes series dare possemus probatum, si diutius his immorari vellemus & v. gr. de calidis balsamicis inflammationem inducentibus, adstringentibus, excretionem supprimentibus, exulcerationem augentibus, opiatis narcoticis repentinas virium dejectiones adferentibus, ab humorum cumulatione expletionibus ut & oppressionibus suffocationibusque accersitis, censuram addere. Certe, si etiam mihi nomines expectorantia dicta vel pectoralia adeo laudata sub decoctorum forma, largissimis haustibus propinata, vel balsamica illa, sive temperata, sive acriora magis, sive vulneraria stringentia, sive etiam opium aut calces antimonii aut bolum fabrilis & hæma-

hæmatiten cum conserva rosarum, vel emulsiones amygdalarum dulc. (egregia præ aliis virtute prædita medicamenta) vel spiritum sanguinis humani a Boyleo, Anglo, adeo commendatum &c. si & curam lactis asinini (quod alias detergit, febrim hæcticam contemperat, parte sua rosa caseosa consolidat, & butyrofa nutrit) addas, ac ne quid de specificis magis dicam, de pulmonibus vulpis, leporis, vituli, cum illorum hepate &c. (si illa specifica esse credas) si & tandem omnia & composita atque etiam decomposita, tot sirupos, conservas, looch, eclegmata pulverem Haly Abbatis adeo decantatum, Langianam trageam, & Mynsichti species diasaturni, aquas pectorales Dorncreilii aliaque ejusmodi antiphthifica; ea tamen omnia, inquam, eo nomine vix ac ne vix quidem cum equitatione æquanda. Hinc, licet exquisitum ægri obsequium observent, rarius tamen hæc tabes aut nunquam ex asse sanatur, frequentius tantum mitigatur. Ancipites etiam adhuc hæremus, an copiosæ sanguinis missiones, quas quidam Anglorum equitationi præferunt, huic sint æquiparandæ si non anteponendæ, qua de re THOM. DOVER, Anglus in *Tract.* quem *Legs d'un ancien Medecin à sa Patrie*, inscripsit, p. 40. conferendus. Hæc enim ad eorum pertinent classẽ, de quibus Scaliger facete dixit, similes esse eos malis mulieribus, quæ non nisi morte auferantur, quod ingenue fatentur præter ipsum HIPPOCRAT. *Lib. I. de morbis v. s. 2. t. 9.* GALENVS *Lib. I. de loc. affect. c. 8.* & *Lib. V. meth. med. c. 1.* & 8. *Forest. Lib. XV. observat. 45.* R. A FONSECA *Consult. med. T. I. 58. T. XI. Consul. 48.* SCHOLZIVS in *aphorif. med. Sect. VII. 982.* BRVNO SEIDELIVS *lib. de morbis incurabil. p. 20.* BALD. TIMAEVS A GVLDENKLEE *Epist. L. XI. epist. 2. & seqq.* practicus prudens, circumspectus ac experientissimus postquam solitorum ibi antiphthificorum in sufficientiam solide demonstrasset haud erubescit confiteri; in tota sua praxi, quam per annos XXXVII. exercuit, se neminem ex iis, qui ulcere pulmonum affecti fuerint, integræ sanitati restituere potuisse, etiamsi nihil intentatum reliquerit, neque ab aliis celeberrimis Medicis quenquam restitutum vidisse. Ego item ingenue confiteor, me ex plurimis phthificis ut & in sequentibus nominandis, hæcticis, atrophia laborantibus, vix unum & quidem maximo medicamentorum apparatu atque molimine servatum & ex asse restitutum nosse. Hanc difficultatem per medicamenta phthi-
sin sanandi agnoscentes quondam ejusmodi ægros ex Celsi & Galeni consilio ad montem tabianum & Ægyptum ablegabant. Etenim abstersionem, mundificationem, consolidationem, appositionem natura primario magis & immediate hic perficere debet, hoc vero modo sic opti-

me adjuncta citius efficaciusque perficiet, atque in pulmonibus sanguinis fero præsertim stagnatio efficaciter absolvitur ac ipsa sanies abstergitur & absque tussi, vel leviori illa expellitur; vivus vero magis & circulans citius & ad extrema partium, novo aëre omni momento pulmones ingrediente, tot corporis concussionibus factis, propellitur, teneriores fibræ harum partium, pulmonum, nimirum (qui ceu viscus amplum vasculosumque membranofum, vesiculosum stagnationibus sanguinis & feri obtonum & robur labefactatum valde obnoxii sunt, unde ad obstructiones, exulcerationes & corruptiones aptissimi) firmanur, roborantur vivificanturque, ut excretioni materiæ peccantis molestantisque sint pares, pariterque eo modo armantur, ut ulteriori humorum stagnationi resistent, sicque restitutio in integrum restituitur ac præservatio adornatur optime. Nec est, quod te suspensum dubiumque teneat, ulceribus nocere acris liberioris accessum, putredinemque promovere, quem scrupulum tibi ita eximendum esse censeo, commonefaciendo: aëris liberioris in pulmones ingressum admodum necessarium esse, adeoque prohiberi non posse esseque tunc aërem inspiratum, atque per os, asperam arteriam, nares transeuntem, calidum simulque repleti eum humido vapore ibi exhalante. Eam Angli præsertim ob id maximo in hoc morbo in pretio habent, inter quos gravem & cordatum SYDENHAMIVM, si solum dixerimus, confecta auctoritas erit procul dubio, qui equitationem *Oper. p. 524. & 781.* supra alia remedia in tali affectu adeo extollit, & merito quidem extollit, multiplicique experientia affirmat, ut minus dubitet affirmare, esse equitationem in phthisi (quæ flagellum Angliæ vocatur) remedium specificum sine pari, quo neque mercurius in lue venerea, neque cortex peruvianus in febribus intermittentibus, aut ipecacuanhæ radix in dysenteria, efficacius aut certius, eoque magis necessarium, quo laxius particulæ morbificæ, acres, in massa sanguinea cum reliquis cohæreant, & quo æqualius eadem per emunctoria quævis fcerni debeant, quæ hujus morbi est conditio, quæque exigit medela. Atque adeo *pag. 574. Tr. de podagra* ex equitatione emolumentum ingens & quasi stupendum & incredibile esse dicit, quod phthifici & morbis chronicis detenti percipiunt. Succedant præ aliis ex nostratibus, Germanis, huic merito illius, nec modicæ auctoritatis assensores, Illustres & Excellentissimi D. G. E. STAHL, FRID. HOFFMANNVS qui in *Med. Rat. Systemat. T. I. p. 401.* ita loquitur: *Equitationi postponenda omnino sunt aliorum remediorum vires, quæ in dispositione phthifica, hectica, scorbutica & cachectica alias utramque faciunt paginam facere putantur.* Ille in pro-

programme quodam inaugurali, novum specificum antiphthificum equitationem vocat, ibique multa lectu digna de ejus efficacia insigni affert, firmatque alio in loco *Dissert. nimirum de motus voluntarii usu med.* §. 32. exemplo Herois cujusdam gloriosi nominis, qui sub infirmissima phthifico-hectica constitutione, vehementia equitationis venationibus non solum longam vitam, sed & bonam valetudinem sibi comparavit. Stat quoque ejus apud me laus & commendatio, cum eximium usum in viro phthifico annis abhinc plus minus duobus comprobarim. Relatum habemus Lusitanos hac lue pulmonari, quæ apud eos endemia est, equitatione se immunes præstare. Hinc ob motum ejusmodi fere totulentem potissimum phthificis & hæmopticis, navigatio per mare maximo quondam erat ex usu, non minus ac leprosis, hydropicis, apoplecticis, stomachi infirmitatibus & inflationibus obnoxiiis vid. AVICENNA II. Septentrionales gentiles (ut videre est ex TH. BARTHOL. *de causa contem Danis mort. Lib. II. c. VIII.*) falso credebant ad Valhallam (s. Heroum Paradisum) non nisi equis perveniri posse. Nos adductorum intuitu, potiori jure ratum habemus, phthificos ad salutem vix, nisi equitando, posse redire.

§. XVI. Verum non phthisi solum, sed & cæteris pectoris & pulmonum morbis equitatio moderate instituta, egregiam fert opem, quoniam excrementa per pulmones emitti solita, per eam commodissime promoventur. Primum hic id genus morborum pulmonum ponam, quod vomica vocatur & a phthisi differt, quod in hac pulmones exulcerati sint, in illa apostema in eorum substantia resideat: & quemadmodum exulceratos pulmones, ut modo est adductum, restituit, ita & abscessum in iis latitantem excernit, imo empyema quoque ex cavitate pectoris exturbat. Sic & celeberr. HERM. BOERHAAVE vid. *Aph. de c. & c. morb. p. 204. & seq.* eam in peripneumonia vera pro apostemate rumpendo & rupto præcepit, quam rupturam alii, risu valido, clamore, tussi, vomitu, vaporibus acidis ore excipiendis, curru vectione concitatori & duriori itemque navigatione per mare, tentare solent: nam ejusmodi valido motu pulmones valide quoque agitantur, tenduntur atque concutiuntur, quos simul tunc diaphragma tot repetitis conquassationibus fortioribus instigatum commotumque fursum premit ac comprimit assidue. Pro hoc scopo certius obtinendo, quidam alimenta prius pingua & emollientia eaque copiosa assumenda suadent, ut nimirum plenus turgensque ventriculus, diaphragmate pressus pulmones comprimat, simulque copiosus chylus allatus gravet eosdem at-

que extendat. Porro magnum levamen affert præsertim ea quæ anhelitum concitat, ut nimirum tam excrementa expectorentur, quam re-
 stagnatio aëris vi, impediatur, in eo affectu quem sedentaria vita sæpe
 affert & in vomicam jam nominatam aut tabem desinit nimirum in asth-
 mate simplici imo & in convulsivo, cujus rei testem adduco BAGLI-
 VIUM in *Oper. medic. pract.* p. 38. Ex illo clarissimo Auctore confirma-
 tur, in ejusmodi morborum genere, quod ut HELMONTIVS in *Oper. de*
Asthm. & tussi p. 356. loquitur, remedia renovativa & ad generis ampli-
 tudinem assurgentia exposcit, equitationem optimam esse, quæ per arva
 recenter aratro culta, instituitur, quoniam & eques magis attollitur, si
 equus super sulcos progreditur, & effluvia illa temperata, salina, subti-
 lia ex glebis recens ruptis elata, ore naribusque hausta, refocillant, &
 pulmonum flamina relaxata roborant, visciditatesque, quæ obsident,
 quoque resolvunt atque expurgant. Notabile in vicinia nostra occur-
 rit exemplum de viro asthmatico, qui, quoties paroxysmus accessit,
 equum conscendit, atque ad incalescentiam usque equitavit, & tunc
 tussi & scæatu calculos quosdam pisi, magnitudinem æquantes, e pulmo-
 nibus ejecit, & ab urgente hoc malo ad longum tempus se liberavit.
 Quemadmodum in tussi pectorali, chronica pertinaci, sicca, maxime
 exercitia optima sunt, ita & equitatio omnibus aliis hoc in casu diutina
 & longior palmam præripit confer. iterum de hoc SYDENHAMIVS p.
 307. Casus occurrit hic commodè trahendus ac ad ulteriorem æstima-
 tionem & considerationem perducendus in VALENTINI *Chirug. med.*
Nosocom. academ. VI. p. 699. de cordis palpitatione & syncope ex aortæ
 obstructione, a quibus malis æger, equo vectus, fuit immunis, pedibus
 vero insistens in ea incidebat, quoniam sanguis non nisi sub insigni tali
 corporis motu e corde in aortam propelli potuit, adeoque inferre con-
 venit, ejusmodi corporis commotionem fortiolem polyposam in vasis
 sanguiferis concretionem optime avertere, quoniam celeriolem sangui-
 nis per vasa efficit cursum, unde fortior fit calor, quo magis illud quod
 est gelatinosum in sanguine in serosum magisque tenue liquamen dissol-
 vitur ut in febribus comperimus præsertim continuis vehementesque
 auctum illum calorem, spissos succos, & pinguedinem corporis consu-
 mere & obesos graciles reddere posse. Pleuritidem nullo remedio me-
 dicabilem, equitatione forti multumque repetita tolli asserit Celeberr.
 BOERHAAVIUS in *Aph. de cogn. & cur. morb.* p. 218. §. 898.

§. XVII. Juxta hæc morborum genera, nulli magis conveniens
 remedium, quam quotidiana æqualis, ad moderatos etiam quandoque
 sudores

fudores protracta, equitatio est, ubi præternaturalis corporis æstus laudabiles succos depascit, febribus lentis hæcticis, quæ ex intestinorum saburra acida, lenta, viscida ibi collecta meatus obstruente ex perversa forte febrium intermittentium tractatione, nimio intempestivoque figentium, præcipitantium & adstringentium abusu, aut frigido potu calenti corpori infuso aut sudoribus scorbuticis retro pulsus &c. exsurgunt, siue etiam eadem ejusmodi sint, quæ uti ex pulmonum, ita ex aliarum partium v. gr. hepatis, mesenterii &c. corruptionibus procedunt & lento gradu & calore vires vitamque consumunt, quæque alias medicamenta copiosa longaue serie longoque tempore continuata vix ferunt. Per hanc enim viscosus lentor siue effoetus chylus, qui vasa & habitum corporis jam infarcit, vel etiam putrida materia sanguine intime mixta influxum spirituum animalium solito majorem in cordis musculos, arterias irritando concitans, æquabili succussione efficacissime discontinuatur, abstergitur, excernitur atque natura, roboratur id est, certa ea sanguinis dispositio, vigor partium activarum ac consistentia nativa facta tectaque servatur, appetitus iterum restituitur, novus chylus laudabilis sanguinis ac humorum spirituscentia erigitur, & ejus circulatio libera atque æqualis redditur, viresque conservantur atque restituantur, sanguinis & humorum textura ac mixtio tuetur. Expedit innuere, in lentis morbis equitationem auctam & frequentem apprime utilem esse; in hæcticis vero stricte sic dictis, in quibus omnia symptomata jam sensibilia sunt & auctiora, moderationem magis convenire.

§. XVIII. Proximo dehinc jure statuendus affectus dolorque hypochondriacus, hominibus imprimis vitam sedentariam agentibus præ aliis infestus. Cum enim nihil adeo impense huic conferat, quam leniora & cordialia remedia juxtaque hæc, motus & potus, &c. quæque motum sanguinis hoc in morbo impeditum suscitare, viscidos humores hinc inde latentes discutere & transpirationem juvare possunt; Verum econtrario remedia omnia ex pharmacopolio petita, præsertim violentiora, ut cathartica diuretica &c. pejorem reddunt eum, spiritus & nervos potissimum occupantem: Nullum certe certius securiusque remedium, contra hoc malum excogitari potest, quam equitatio, & quidem succussoria magis & fortior, quoniam omnis æquabilis & oscillatorius motus, in intestina & viscera terminatur, quæ partim, partem constituunt affectam, partim suppeditant fomitem, ventriculum puto & intestina, diaphragma, oesophagum, mesenterium, pancreas, lienem, hepar, cum vasis sangviferis, & vena portæ præsertim quippe hac po-
ten-

tentissime infarctus & obstructiones intestinæ tolluntur, vitiosus ventriculi & intestinorum tonus emendatur, motusque eorum peristalticus instauratur, & humorum massæ crassities atque fixitas resolvitur ac subtilisatur, spasmodica affectio aufertur, secretiones laudabiliter iterum instituuntur, spirituum defectus restituitur. Multi hypochondriaci confirmati in primis ex vita sedentaria tales facti & de quibus vulgo dicitur: *Es müsse ihnen alles im Leibe zusammen gewachsen seyn*, effectum certissimum sentientes, singulis exercitiis equitando institutis mihi levamen perceptum his verbis significaverunt: *Sie fühlen daß alles im Leibe los werde, und daß es gleichsam durch den gantzen Leib gienge und sich bewege*. Hoc testatur & probat aliquoties jam laudatus SYDENHAMIVS, qui *Dissert. epist. de hyst. pass. p. m. 476.* malum hypochondriacum hac sola, sine aliis remediis curatum esse, asserit. BAGLIVIVS *de fibra motr. Lib. 1. p. m. 327.* idem affirmat; eum hypochondriacos pene desperatos equitatione super asinum in aere rusticano facta perfecte sanasse. Ex equitatione diuturna in viro hypochondriaco annotavi, humores nigricantes intermixto velut sanguine coagulato vomitu & secessu cum euphoria excretos esse. Quare equitatio præ aliis hominibus litteratis, studiis deditis & speculativam agentibus vitam, convenit, in quibus & simul optime sesso illa pessima, incurvato corpore, quam inter legendum scribendumque vix vitant, respirationem, motum diaphragmatis, & musculorum abdominis sufflaminans, sicque remissiores sanguinis per abdominis partes circuitum efficiens, avertitur & corrigitur, equites enim decet ut erectum corpus gerant. A malo hypochondriaco nomen fortitur suum melancholia hypochondriaca fortitur & suam medelam, illamque optimam, ab equitatione, ut in illa illam instituere jubet LEONH. FVCHSIVS *de curand. rat. p. 98.* FRAMBESARIUS *Canon. & Consult. med. lib. II. p. 67.* equitationem per loca amœna novarum rerum plena & virida similiter svadet, vt anxietatis & tristes curæ animique angores pellantur, ac ut liberior & tranquillior animi status acquiratur, nam hoc genus morborum pharmaceuticis alias remediis vix obtemperare solet. Nec aliud sensit & scripsit NIC. PISO *de M. C. C. c. p. 88.* Ejusdem pariter efficaciam leges in celeberr. F. HOFFMANNI *Med. Consult. P. IV. cas. VII. p. 55.* Affectus huic affinis hysterica passio est; quæ nempe spiritus & nervos occupat remediaque ista violentiora maxime purgantia fortiora respuit, quæ ventriculi tonum & robur sanguinisque crasin destruunt atque evertunt: affine ergo & erit remedium; hanc enim equitationem nempe, hic maxime & notanter curru unctioni antepo-

nit modo nominatus. NIC. PISO *de m. c. & c. L. III. p. 394.* a qua potius illam metuit & vomitum conf. PECHÉVS *Prompt. med. c. 25. p. 154.* qui & ideo ejusmodi mulieribus eam quidem quotidianam ante omnia præcipit. Exinde haud dubitanter infero, non minorem causam esse, quod mulieres Anglicanæ, quæ equitationi æque ac mares sunt adsuetae, non adeo hysteris ac hypochondriacis passionibus ac quidem nostrates, obnoxiae sint, atque quod nostrates rusticanæ ac pauperes, laboribus durioribus vitam protrahentes, isto morbo nunquam corripiantur.

§. XIX. In discrimen jam propemodum venirem, an non inter morbos hac ratione tanquam universali remedio curandos, ut universalibus generalioribusque speciebus ex atonia viscerum oriundis, ubi totus corporis habitus non laudabili & balsamico sanguine, sed corrupto, vappido & aquoso irrigatur, & fibræ exinde simul præter modum relaxantur, ac a robore & tono debito recedunt, atque speciatim nominando hydropi (medicorum scandalo æque ac phthisis cum podagra) anasarcae maxime, primus locus sit concedendus, præsertim, cum in genere dicendo, ejusmodi ægri ut fugiant quietem & vitam sedentariam, admodum necesse sit. Laudant hanc quam plurimi v. g. (ut plures non nominemus ALEX. TRALLIANVS *L. IX. c. 3.* FUCHSIUS *l. cit. p. 327.* BRVELE *Med. p. 152.* RAMAZINVS *de Morbis Artif. C. XXXVI.* Hoc in malo præstantior equitatio habetur, si in sole fit, capite tamen rite tecto, aut velato, & ad largum etiam sudoris profluvium protrahitur, & excretio urinæ uberior simul procuratur. Ut propriam experientiam insuper addam, sequentem historiam describam. Vir quidam anasarca quondam laborans cathartecorum frequentissimorum aliorum super alia cumulatorum exhibitione, subinde mulierum ac medicastrorum suasu, adeo confectus & debilitatus, ut omnium corroborantium & diureticorum apparatus nequicquam efficere potuerit, inito consilio, in loco & oppido vicino Gr. ad equitationem pervenit, qua, exhibitis simul debitis diureticis, perfecte convaluit. In hydrope, ascite quoque J. Anglicus suadet, ut illa detenti super equum suaviter incedentem modicum equitent, adeatur SCHOLZII A ROSENAV *Conf. med. p. 362.*

§. XX. Ad colicam biliosam pertinacem inveteratam sæpius recurrentem sanandam & persanandam fatetur experientissimus & felicissimus Anglorum quondam Machæon SYDENHAM *l. c. p. 264.* nihil adhuc præstantius unquam excogitari equitatione potuisse, longius protracta, & in alias regiones usque instituta, post evacuationes sed debitas sufficienter peractas, nam inquit: *Hujusmodi enim exercitiis materia morbum*

committens in corporis habitum deducitur, & sanguis perpetua agitatione comminutus de novo quasi depuratur, ipsaque demum intestina caloris nativi excitatione haud parum corroborantur ac refocillantur: Nec pudet fateri, me dicto exercitio in partes adscito morbum hunc, cui alio quovis modo devincendo par non fui, plus semel penitus expulisse. Pro scopo curatorio maxime laudatur in morbi (a qua causa etiam sit) declinatione. Notabile exemplum adducitur a Clariss. & accuratiss. J. N. PECHLINO in *observ. med. L. III. n. 35.* cujusdam colica ex obstructione laborantis, eadem methodo perfecte curati, quod etiam jam AETIVS testatur *Tetrabl. III. S. 7. c. 5.* & N. PISO de *c. & c. m. L. III. p. 242. §. 20.* Expertus testor, singultum pertinacem sola equitatione paulo fortiori sæpius feliciter, cito pariter ac jucunde fuisse sedatum.

§. XXI. Nec cum alio facile remedio unquam in comparatione efficaciae equitatio conferenda est, & quidem validissima ac succussans, (utpote quæ ad obstructionum claustra adeo firma referenda humoresque in viscerum tubulis hinc inde stagnantes impactosque discutiendos satis potens est) in obstructionibus, quibusvis iisque præsertim ac indurationibus scirrhescentiis viscerum, hepatis, lienis, mesenterii, pancreatis. Hoc enim itu redituque humorum moleculæ illorum, omnium optime sic dividuntur, ut per vasorum obstructorum ultimas angustias transeant, ad latera carnalium attritæ atque solutæ, ut sine impedimento possint transire, capacitate simul eorum aucta. Æque scorbutum, illam notissimam & frequentissimam, altius firmissime humoribus inhærentem corruptionem quam expresse Hippocrates sub magnis lienibus videtur, a vitio viscerum quoque & exinde proveniente excrementorum copia, ab emunctoriis depurationi sanguinis inservientibus, obstructis, ut cutis, alvi, hepatis, lienis, renum, oriundam, avertit & abigit optime equitatio frequens ad modicos sudores usque protracta; in bilioso tamen & calido, (scorbuto) moderatior & gradaria, in frigido sic dicto, ubi nimirum pulsus magis est tardus, & horrores fixique dolores, impotentia motus, langvorque & rigor junguntur, velocior tolutoria plus, minus concussoria & frequentior requiritur. Nam motu tali, imprimis motus sanguinis liberior redditur, benigna humoribus indoles inducitur, robur partibus solidis additur, necessariæ secretiones & excretiones promoventur, quibus mediis curatio absolvitur ejus. Belgæ ideo in ictero eam magno in pretio habent, habent & illam Itali, inter quos Baglivius eminet, qui in omnibus obstructionibus intestinis eam herculeum remedium nominat, quam rem RAMAZZINVS de *morb. artif. Cap. XXXV.*

con-

confirmat, quando de equite quodam testatur, quod ex sola equitatione post perpeſſam periculofam febrem ab inſequuto lienis morbo & imminente hydrope licet infirmus maxime, intra unius menſis ſpatium liberatus fuerit. Ut concuſſoria & fortior obſtructiones ejusmodi curat, coagulatum humorem jam reſolvendo, & vaſa a crudioribus & coagulationem inducentibus libera vacuaque præſtat, ita lenior eas præcavet. Hic motus enim remiſſior licet, & intendit & armat fibrarum motricium tonum earumque vim, ac ſic in glandulis viſcerum, imo in omnibus partibus corporis impedit, ne omne fluidum ſanguinis ibi hæreat, vel fluidior ſaltem ejus portio exprimatur, relicta craſſiori parte, ſed ut æqualiter reſſuant liquores, per convenientia vaſa, egregiam ſymbolam addit. Sic in hepate puram bilem, & in pancreate ſuccum ideo pancreaticum dictum, in aliis glandulis alios ſuccos rite promovet.

§. XXII. Mire & præcavet equitatio calculum, ad deſtruendos nimirum illos lapides non ad ædificandam ſed deſtruendam domum œconomiae animalis aptiſſimos, valida & ſuccuſſoria, tolutoria imprimis, tam veſicæ quam renum atque ureterum, quas partes præ aliis abdominis viſceribus equitatio afficit, quod eo probabile magiſe ſt, quo frequentius etiam manifeſtæ partium earundem læſiones a motu iſto conſequuntur. In quibus, ut & vero ſimillimum eſſe videtur, futura calculi rudimenta & nuclei generantur & in veſica ſucceſſive augmentum capiunt ac cortices ſuper inducuntur, dum ſegregationem & tranſitum lotii accelerat, & ſimul cum eo materiam calculorum ejicit, hinc ordinario urinæ magis craſſæ, turbidæ, rubræ redduntur, ſiquidem, quoniam ad ejusmodi concretiones, mora requiritur, frequentior urinæ redditio, ad hunc ſcopum utiliſſima eſt. Experimur enim ad hoc, in vita ſedentaria manifeſtum calculi incrementum quotidie ſe prodere: e contrario vero ſcimus, quod qui, vario motu corpus exagitant ut incaleſcat, ſæpius ex calculi decremento, manifeſtum levamen accipiant. Atque inſuper renibus & veſicæ robur addit, ad ejiciendum humorem calculoſum inibi hærentem; compertum enim habemus non modo ibi, ſed & in aliis locis, uti multifariæ obſervationes teſtantur, calculos potiſſimum inveniri, ubi illarum partium obſervatur debilitas. Eam ideo & duriores Ioh. ZECHIVS in *Conſult.* p. 542. D. Cæſ. de Molara Nobili Rom. diligentiffime commendat. Ejusque hic efficaciam ſummam non ſatis deprædicare poſſum, expertus. Cæterum & congeſtionem ſanguinis circa renes, ex qua illæ omnes nephriticæ paſſiones, obſtructiones, inflammationes, exulcerationes & concretiones dein proficiſcuntur, utpote quæ ſæpiſ-

fime causam, materialem remotiorem pariter ac occasionalem & dispositionem, renalem substantiam corrumpentem, sicque ad calculum disponentem, constituunt, felicissime dissipat, aufert ac præcavet. Frequentissime enim (ut explicatius paulo loquar) sanguis in tubulis renum, quavis ex causa etiam sit, stagnat ob copiam in progressu impeditus, unde illæ noxæ, hinc & ut plurimum nephritide, prius calculosi afficiuntur. Non solum vero præcavet, verum & curat, quando calculos jam factos, non adeo quidem grandes, ex renibus pariter & vesica urinaria præcipitat, deturbat atque excernit. Inprimis, si in ductibus uretherum aut collo vesicæ calculus restitet, quem olim cucurbitulis siccis extrinsecus promovebant referente PHILIP. SCHERBIO in *Thes. med.* XVI. §. 61. equitatio eum juxta scalarum ascensionem ac eam corporis compositionem qua æger unum genu alteri imponit talique modo sese constringit respirationemque retrahit, ut omnia abdominis viscera sursum trahantur, ut hoc pacto calculus e vesicæ collo retrahatur ægrotusque de dolore liberetur, omnium potentissime promovet. Quidam volunt, ut adducit I. IOEPSEIVS in *Manud. ad vit. longior.* p. 583. equum ephippio carentem equitent imamque ventris regionem equi dorso fortius appriment, ut eo certius calculus vel ad vesicæ capacitatem relabatur, vel foras prorumpat. Ast caveant sibi sedulo, ne calculus major justo subsit & angulosus, quod medici prudentis relictum maneat iudicio. Quod ipsi forte enasci poterit, ex accurata præteritorum & præsertim symptomatum, juvantium & nocentium &c. collatione. Ut equitatio ad præservandum curandumque calculum facit, ita haut obscurum calculi ea potest suppeditare signum, ex Cardani consilio, quod sequentibus in HIPPOCR. *Aphor.* p. 467. indicat, inquiens: *Cum volueris scire certius, an aliquis calculo vesicæ laboret, jube eum equitare, saltare exerceri que vehementius, exhibe lapidem comminuentia, inde subsidentia in urina inspice, in qua si tribus aut quatuor diebus pulvis appareat, lapis est durus, si lapidum frustra, & quasi arene, non autem arene tophus est, si nihil horum appareat, lapis procul dubio non est.* Atque hoc in morbo Anglis, Gallis æque ac Helvetis nihil est solennius aut utilius. Idem sentiunt ac scribunt AVICENNA L. III. F. 18. tr. II. I. PECHLINVS *obs.* L. CXI. similiter in ipso calculi dolore illam suadet THEODOSIVS in *Epist. med.* p. 369. His Auctorum testimoniis addo sequentem observatam historiam: Vir militaris robustus alias, adhuc vegeta ætate constitutus, calculo vesicæ acerbius quam alias excruciabatur, advocat medicum, qui advolans debita proponit applicatque remedia; sed majorem calculum animadver-

tens,

tens, parum grato prognostico hoc ipsi indicavit. Æger doloribus immanibus excruciatuſ sectionem optabat, quæ tamen ob chirurgi ſatis idonei ad hanc operationem, defectum non ſperanda erat, ſequentes binas noctes extus linimentis emollientibus, & intus anodynis adhibitis, quietior tranſegit, niſi quod dolores ſubinde graviores magis ſenſerit, tertia die ad vicinum pagum negociorum cauſa vocabatur, ſatis validum ſe credens ad hoc iter duorum milliarium, medico præſentibusque diſuadentibus, equum conſcendit, vix emenſo unius milliariſ equitans ſpatio, doloribus longe tamen minoribus iterum & inferiorem partem magis occupantibus, eſt affectus, ac calculum haud parvum, quamvis non ſine miſtione cruenta, excrevit. Ac ſi non forte obveniret tædium, adhuc huic jungerem aliam: Nimirum juveni ſtudiis alias dedito, ſubinde de calculo conquerenti, per loca montofa, anfractuofa equiti iter facienti, derepente dolores calculi exorti ſunt acerbiffimi cum urinæ ſtillicidio, adeo, ut coactus fuerit equi ſiſtere gradum, exacto ſic circiter quadrantis horæ ſpatio, equo, invito interim equite, progreſſo, veſicæque regione ephippio duriter alliſa, calculus ſat grandis cum urina ſanguinolenta, protruſus eſt. Quod de calculo dixi, etiam de ſuppreſſione urinæ omni aſſeveratione aſſirmo; hæc enim ſub equitatione feliciter ſolvitur, quia per eam perinæum efficacius afficitur. Idem etiam de ſtranguria & dyſuria tenendum eſt. Nec non ad præſervationem miſtus cruenti utiliter adhibetur, licet in paroxyſmo ejus incommoda ſit.

§. XXIII. Non minus auxilium aſſert ſtomacho, cum inteſtiniſ ac viſceribus reliquis; has enim partes præ omnibus aliis exercitiis firmat equitatio; hinc & in ejus debilitate & exinde pronata chyliſicatione læſa, ex qua adeo multa proficiſcuntur mala ſumme eſt proficua, atque omnium optime iis medetur ſuccuſſoria imprimis appetitui proſtrato, anorexiæ, reliquisque in genere ſtomachi vitiis, ex viſcida & craſſa colluvie, debilitæ ſecretionis partium earum laudabilium defectu, quæ digerendis & ſolvendis compositis aptæ ſunt, ſpirituum animalium influxu impedito atque ſegniori juſto oriundis. Cum ſcilicet reſpiratione exinde aucta atque muſculorum abdominalium motum & diaphragmatis ſimilem adaugeat reciprocum, qui ventriculum cum inteſtiniſ ſingulis exagitat ac premit, calorem ejus accendit, ut ſolutio ciborum juvetur, qualis ad omnes ſolutiones facilitandas confert multum ſimulque hæc (viſcera) ad ſe mutuo quaſi affricet, ſicque detergantur omnia ſanguiniſque ipſius inſlui calorem adaugeat ac humores tenues & fluidos reddat, liberioſi-

spirituum & sanguinis quoque in ventriculi, ut digestionis officinæ, tunicas, influxum concitet, motu tremulo optime glandulas ventriculi sollicitet, ut menstruum, ut ajunt, secernant stillentque, contenta dis-continuet, dividat, subigat, sicque digestio tota instituitur per eam melius atque omnium optime. Testes hujus rei si desideras, præter quotidianam experientiam tibi se sistunt. *PLINIVS Lib. XXVIII. c. IV. AETIVS ET ORIBASIVS, F. IOEL & THEODOSIVS in Epistolis m. p. 269.* Hic observatio illa memoratu digna videtur, quæ descripta a *GVIL. DERHAM.* atque *Philosoph. Transact. Angl.* inserta reperitur Anno *MDCCXVI* sub tit. *An. Acount of the Mischiefs ensuing the Swallowing of the stones of bullace and slaes.* Ibi enim refertur de servo quodam, qui in juventute subinde multa pruna sylvestria cum nucleis deglutivit, qui per decem annos, in ventriculo hæserunt, quo temporis spatio exacto, demum in affectum stomachi periculosissimum est dejectus, summum urisit fastidium, a cibo assumpto summa stomachi gravitas fuit & præcordiorum tensio molestissima, neque retinere potuit ullum cibum, in dies crevit malum perniciemque propinquam adesse, medici putaverant, adhibita sunt varia etiam vomitoria eaque fortiora ac iterata; sed sine sperato successu, tandem crebriorem ac fortiolem equitando suaserunt motionem, per quam *CXX.* nucleos deglutitos, vomitu una vice ejecit & successu dein temporis plures, ex quo bene se iterum habuit. Nec non in ventriculi & intestinorum inflatione magnopere prodest equitatio, maxime si corpus fasciis devincitur, flatus deorsum agentibus. Inprimis in iis, qui expressione sanguinis in vena portæ congesti proveniunt, per eam enim istæ partes, ad quas furculi venæ portæ excurrunt, afficiuntur varie, nam mox dilatantur, mox iterum constringuntur, ex quo atonia harum partium inducitur, ex qua deinceps flatus colliguntur facile. Aliqua & specialissima quædam hic debetur animadversio atque equitationis laudatio, affectus nimirum illius satis frequentis, licet a paucissimis observati, descripti ac nominati, cardialgico-splenetici alias barbære mirachialis dicti. Scite tamen a *Clariss. STAHLIO de Vena Porta Porta Malor. p. 42.* indicati. Hæc enim passio in sangvineis subjectis maxime, & plethoricis moribus, & tensionibus in ventriculi regione ac angustis, anxietatibus, duritie abdominis & inflatulentia, nausea quandoque, imo vomitibus subsequenter, & quæ tandem in tabido-hecticum statum, aut etiam intumescientiam œdematofam ac ascitem abeunt, nisi fiat medela, se exerit. Causam agnoscunt hæc pathemata congestionem sanguinis circa vasa splenico-stomachica, quam

quam ut & exorta exinde molestissima hæc symptomata, avertit atque propellit equitatio egregie. Dubius adhuc hæreo ex ratione in sequentibus alleganda, quod nempe equites frequenter styptici sint, cum mihi non satis felix de eo eventus constet, an nimirum equitatio bene conveniat in pertinacibus alvi obstructionibus quibusvis, & in iliaca passione, quam tamen in hisce multi practicorum, quemadmodum curru vectionem commendant. In specie præcipiunt eam a sumto in medelam horum affectuum mercurii vivi haustu, ut motu hoc vehementius celeriusque corpus moveatur. In iis vero alvi obstructionibus, quæ fiunt ex contractione spasmodica, a pressione sanguinis in vena portæ hærentis, inductis atque in iis, quæ ex vita sedentaria & meditationibus & lucubrationibus nimis proficiscuntur, non habeo jam ambiguum affirmare, eam quoque utilem esse. Hac de re quia ejus interest hoc monendum occurrit, equites qui interdum in hoc & illud latus inter equitandum inclinant, femoraque quandoque levant alternatimque sic insident, minus alui stypticitatem experiri, quemadmodum & fœminæ, quæ ad unum saltem latus, non divaricatis cruribus ephippio insident, de hac nullatenus conqueruntur, quod apud Anglos notissimum est. Interim hæc ipsa ratio monet movetque, ut credamus eam haud contemnendum in omnibus alvi fluxionibus morbificis diarrhœis aliisve levamen atque juvamen præstare, præsertim si C. Celsi consilium quod *Cap. XIX. Lib. IV. de ventris fluxu* ratum habemus dicentis: in hoc vehiculo sedisse vel magis etiam equo prodest, ex ea ratione, quod ea magis quam ulla alia res intestina confirmat.

§. XXIV. Nec dubium est, quin & reliquarum partium morbis egregiam conferat opem. Nimirum quod sc. COEL. AVRELIANVS gravissimus, scriptor *Lib. I. de morb. chron. Cap. I.* in cephalæa vectionem fertoriam, quam vocat, magnopere præcipit, in ejusmodi quoque malo, equitationem, quæ ex hoc genere est, jure meritoque admittere possumus. Eundem enim in modum, in dolore capitis ex frigore contracto, motu corporis, equo vecto, ut utatur æger perhibet atque hortatur L. FUCHSIVS jam citatus *Tract. v. 19.* In eodem ex frigida intemperie illam magni facit ALEX. TRALLIANVS *Lib. I. cap. X.* Novum aliquod hujus rei exemplum addam, quod anno MDCCXV. in novellis sive diariis nostrorum temporum gallicis Lugdunensibus Batav. legi: in his enim, ut memoratu dignum erat scriptum Londino de die 30. April. quod Comes de Sunderland dolore capitis gravissimo variisque aliis capitis affectibus, ut vertigine &c. laborasset, quos ex assidui-

tate

tate & studiis contraxisset sibi, ad quos amoliendos tandem omnibus irritis aliis remediis, frequentem equitationem, iter & commorationem in loco aliquo salubri X. vel XII. mill. Londino remoto suasissent medici, ex quo interjecto aliquot saltem dierum spatio, pristinae sanitati esset restitutus. In auditus gravitate, quemadmodum motiones plurimum conferunt (unde monente HIPPOCRATE *Epid. l. v. Text. VI.* in surditate ambulare erit utile & manesurgere, ne somnus multus afferat gravitatem capitis, &c.) ita præ aliis eandem suadet idem *Lib. III. cap. VI.* Præter ipsius Hippocratis nostri consilium THOMAS BARTHOL. in *Actis Hassn. Vol. v. Obs. CXXVI.* observationes aliquot adducit, ad hanc rem apprime facientes; nam refert auditus difficultatem & dentium dolorem subsultu fuisse curatum; nobis vero jam constat subsultum corporis optime, convenientissime & commodissime per equitationem maxime eam, quæ subsultoria dicitur, fieri, per quam equitationem materia peccans dentes vel aures occupans, æque expellitur. Et ratione & exemplis notum est atque manifestum, homines qui catarrhis atque ophthalmiis humidis obnoxii sunt, non melius se præservare posse, quam si sæpius & modice aëre tamen tranquillo equitent, quoniam recrementa serosa, humida, abundantia ac stagnantia a motus & transpirationis defectu exorta, quæ causam horum affectuum constituunt atque originem, discutuntur. Affectus soporosos, temulentias, stupores capitis hoc nostrum remedium potenter discutit ac corrigit, cujus rei exemplum modo novissime in Nobili quodam vidi, qui equitando mane, ab his incommodis se liberavit, & a periculosis casibus immunem se præstitit. Imo & ipsam apoplexiam & paralyfin simili modo adhibita equitatio, certius præcavet, & epilepsiam avertit. Ubicunque etiam alias & convulsivi spasmodici motus, uti in his subsunt (apoplexiæ enim validiori omni spasmodici quid subesse ex vomitu plerumque vel antecedente, vel subsequente & contorsione convulsiva artuum sub ipso mali impetu hariolari licet) aptissime conducit equitatio. Ejusmodi enim stagnatio humorum acrium circa membranas &c. tollitur optime, novaque indoles, novusque motus spiritibus inducitur atque a forti illa agitatione, externa contraria, motus spasmodicus internus aliter determinatur, sufflaminatur atque sedatur. Conf. GALEN. *L. V. Aph. Commi. 7.* Alex. Trallianus ex equitatione magnum auxilium promittit, si ea a leviori ad validiorem procedat. Ob hanc ipsam rationem, cordis palpitationem, quæ non nisi cordis vehemens spasmus est atque convulsio, compescit, ac sanguinem simul, polypum tandem inferentem, crassum,

crassum, discutit, dissipatque. In omnibus ulceribus inveteratis, callosis, saniosis, recrudescentibus & fistulis mirum præstat, diu protracta & inprimis iter faciendo aërem mutando, equitatio. Lucem dictis foenerabitur evoluisse T. DE MAYERNE *Consil. de phthisi, Act. Haffn. Vol. 3. obs. 43. 476.* PARAEVM *Lib. X. c. VIII.* RIDLIN. *Lin. med. an. 95. p. 256.* sanies enim & acrimonia parietes ulcerum exedens atque absumens, & nutrimentum partis corrumpens impediensque ne illud iis apponatur sic removetur, sanguis dein purus continuo ad partes eo modo appulsus, cum lymphâ, roscida, blanda, viscidiuscula, consolidationem felicius citiusque efficit; Equitatio certe hic plus valet, quam omnia balsamica & similia intus adhibita, utpote quæ lentius & imminutis eo perveniunt viribus. Hoc enim exulcerationibus solenne est, ut ad longum tempus producantur, consolidatio vero citius dein subsequatur. Præterea constat expertis, omnia, quæ urinæ excretionem promovent, accelerare ulcerum vulnerumque curationem; equitationem vero urinæ fluxionem augere, superius jam est probatum. Nec dubium est, quin & in scabie ferina & similibus affectionibus salinis acribus & cutis foedationibus pertinacibus egregie, vehementior paulo conferat. Ut in hæmorrhoidibus obstructis molestissimis Angli expertam equitationem habent, ita & foeminæ Anglicæ in menstruæ purgationis difficultate, optimo cum successu illam in usum ducunt quotidianum. Quin imo in fluxu sanguinis hæmorrhoidali cum febre suadet CORNARIUS COMMITI cuidam, vid. *Cons. med. 19. p. 14.* ut ad unam vel alteram horam equitet, quod ad ulteriorem observationem dirigatur, nihil ad minimum contradictorii subesse certissime persuasus sum, si utrumque malum ab obstructione suum ducat ortum, ut certe utplurimum ducit. Hic legatur observatio quam Præses a D. D. Pfistero Scaphusano quondam celeberrimo Medico recensitam habet de viro quodam hydrocele laborante, qui equitatione & compressione exinde facta curatus fuit, ex quo per aliquot temporis spacium immunis ab ea vixit; elapso vero anno recidivam passus arborem ascendens, qua adscensione iterum has partes laborantes compressit, hic tumor iterum est discussus, indicio forte quod serum extraversatum locoque peccans per processus peritonei in abdominis cavum fuerit protrusum. Quantum in chlorosi valeat succussoria, magis lubet sequenti affirmare observatione: scil. memini cujusdam virginis primariæ cachecticæ chlorosi, per multos annos laborantis, quæ in secessu illo Angliæ amœnissimo in pago Ritschmont non procul a Londino, ut loco commodo & salubri per æstatem commorabatur,

tur, & quotidie bis equo incitatisime currente vehebatur, ex quo ingentem copiam corruptorum humorum ejecit, sicque subinde sine aliis remediis vividum & aspectu gratum faciei colorem & bonum corporis habitum sibi conciliavit.

§. XXV. Quod primum ARISTOTELES meminit *Probl. XIII. Sect. IV.* equites esse libidinosos, id in sequentibus temporibus per frequentem observationem pro vero est acceptum, adeoque existimandum, conjugatis venerem languidam & quidem seminis virilis defectum hujusque genitalis humoris legitimam minus secretionem & excretionem, ob lentorem indeque pendentem sterilitatem passis, emolumenti haud vilis fructu exinde redire. Conf. MERCVRIALIS *de arte Gymnastica L. IV. c. VIII.* Etenim sub hac agitatione blanda imo quandoque succussante ac tremulo frictu, lumbi ac vicinæ partes genitales cum vasis suis omnibus adferentibus, præparantibus & deferentibus incalescunt eoque simul laxantur ac amplificantur atque laudabiliter irritantur, ut ad hæc vasa commoveatur magis, satis attritus arteriosus sanguis ac in testium complicata ex arteriis substantia, secernatur purum vegetumque atque acre genitale liquamen, suo tempore debite legitimeque excernendum. Etenim diutius equitanti intumescunt inguen & scrotum renesque incalescunt (qui potissimum vero sinister ad generationem plurimum conferunt conf. JOH. MATTHAEI *Cent. Difficult. med. Quæst. XC. p. 270 seq.*) uti eunti, pedes. Commendant in hunc usum CHRIST. A VEGA & WILH. INSVLANVS *lib. de ratione victus salubris Cap. 15.* SCHENCKIUS *Obs. Lib. IV. obs. 7.* impotentia virili cuidam laboranti, notanter suadet, ut juxta reliquam, quam addit victus rationem, ante coenam trium horarum iter equestre peragat, per eamque feliciter fuisse ab ea liberatum, scribit. Atque adeo FERDINANDVS *hist. 26.* post benignam gonorrhæam, ex equitatione, priapismum ingentem observavit. Ob hunc motum etiam idem Aristoteles textrices mulieres quæ nimirum texendo æque ac in equitatione fit, pedes, crura & infimam præsertim corporis regionem movent atque attollunt partesque contentas conquatiunt ac calefaciunt, motuque hoc alternativo terunt confricantque genitalia, ex quo fervere & pruriunt, humoribus spiritibusque advocatis, libidinosas esse pronunciavit. Ob similem rationem etiam saltatrices salacitati ut plurimum addictas esse ab aliis censetur. Memorabile hinc præter alia est, apud veteres Germanos equum loco dotis fuisse, atque tradidisse gentiles, venerem equestrem ipsum filium Aeneam vocasse, ac eam hujusmodi sub effigie coluisse. Huic asserto obloquitur quidem

HIP-

HIPPOCRATES. *l. de a. & locis*, & in *lib. de genitura*, comprobaturque Nomadum exemplo, quibus ob frequentem equitationem fortio- rem gestationemque continuam armorum, ex lassitudine fere perpetua, juxta regionem quam inhabitant frigidam & humidam infœcundam, & habi- tum corporis quoque humidum & mollem, vel equina libido extingue- retur, ideoque morbo, quem fœmineum vocat ea propter Herodo- tus, laborarent plurimi. At vero certe modo comparet, culpam non tam in equitationem quam in lassitudinem perpetuam, quæ venerem quoque dejicit, ac in regionem frigidam humidam & infœcundam mu- lierumque Scythicarum otium & perparcum menstruorum fluxum cum ipso Hippocrate rejiciendam esse; frigidus enim aër & humidus præter modum, partes genitales facile debilitat, & habitum quoque corporis humidum, mollem atque relaxatum efficit. Accedit quod simul com- memorat summus hic Autor, paucissimas feras, easque justo parviores istam regionem (de boreali hæc intelligo potius, quam JUSTINVS *Lib. II.* non de australi, quam MÜNSTERVS & BODINVS in *Meth. Hist.* de- scribunt conf. & JOH. MATTHÆI *supra citat. Difficult. med. Quæst. XCI. p. 274*) alere. Plurimum adhuc & maximum addit (Hippocrates) con- ferre momentum, concisionem vasorum pone utramque aurem & pro- fusionem sanguinis arteriosi magnam (vox enim *ἐλεβες* in veterum scri- ptis, ut liquet ex Hippocrate, Aristotele, Galeno, Celso aliisque non de venis tantum, sed & de arteriis quin etiam de nervis, vid. JOH. AN- TONID. VAN DER LINDEN *Medic. physiol. Cap. XVI. p. 819. seq.* accipi- tur) quam ordinario instituerunt (& forte læsionem nervorum) quo re- medio ipsis doloribus articulorum mederi voluerunt, occalescentiam- que vasorum exinde sequutam; nam ob spirituum inopiam deinceps ad torpidum usque præ imbecillitate somnum feruntur, ut scimus a ve- næ sectionis abusu enervari debilitarique homines. Non longius jam consensum, quem quoque adducunt nonnulli, aurium cum partibus genitalibus singularem, in probationem asseram sententiam- que meam superaddam, unde v. g. LAVRENTIUS *Lib. VIII. anat. quæst. 4.* de Jure consulto quodam memorat, qui præcepit ut latroni- bus aures præscindantur, ne latrunculos generent, quod forte vete- res adduxit ut scortatoribus adulterisque aures abscinderent, ut a lascivia & foedo facinore impedirentur. Nec inanis prorsus hæc con- jectura est, Andreæ Vesalio, si fidamus observanti, a sexta nervorum ce- rebri conjugatione nervos numerosos descendere in testes & vasa femi- nalia & sectionem venæ in malleolo infœcundos reddere, cui senten-

tiæ subscribunt VALESIVS L. H. & *Philos. c. & Lib. II. & controvers. 8. p. 72.* perhibens sola arteriarum pone aures sectione, homines ad generandum impotentes reddi, & RAD. A CASTRO vid. *quæ ex quib. Lib. IV. c. V. p. 262.* Hunc, harum partium, consensum cum aliis partibus quoque confirmant aliæ Auctorum observationes, v. gr. quando IACOB FONTANVS l. a. ex in dorsum casu & percussione super os sacrum, HILDANVS percussione capitis, *Eph. N. C. anno 2. obs. 104. p. 177.* & BAGLIVIVS, de fibra *motr. p. 347.* impotentiam virilem enatam fuisse, referunt. Ad hæc quoque facit, si diutius fonticuli plures gestentur, observantibus SENNERTO *Lib. III. Part. IX. Sect. 2. cap. I.* MERCATO *de morb. mulier. Cap. V.* IOH. VARANDAEOLIB. *de morbis mulier. cap. de sterilitate* ad prolis generationem ineptos reddi homines. Jungatur ea observatio, qua BALLON. *Epid. p. 261.* indicat: impotentiam ex vulnere in sura esse enatam. Huc etiam aliqua ex parte facere posset assertio, si vera esset, quam quidem ARISTOTELES & PLINIVS *Lib. VIII. cap. XLII.* afferunt: equorum libidinem juba tonsa exstingui. Insuper circa hanc ipsam rem notanter Cardanus *Commendat. ad Hippocrat. de a. a. & l.* advertit ex ipso Hippocrate equitationem, sine stapedibus, quæ apud Scythas tunc temporis nondum in usu erant, (hæc enim imprimis succussoria incommoda plura infert, illa quæ cum stapedibus instituitur) & coxarum dolores inducere & genitalia maxime lædere, & testiculos præsertim comprimere, contundere atque ad scirrhositatem eos disponere, ut scitissime jam ipse HIPPOCRATES retulit *Lib. III. de fracturis*, corpus maxime debile reddi, musculis & nervis femorum laborantibus. Hæc inquam si omnia contrahantur ac juste æstimentur, statim apparet, equitationem moderatam ac convenientem, hic non accusandam esse, sed nimiam & inconvenientem, has partes & imprimis musculos penis, qui erectioni inserviunt, contudentem, cuius rei non desunt Auctorum testimonia. In exemplum jam solum vocetur modo adductus IACOBVS FONTANVS *Cons. 2.* Ut viros equitatio hoc ipso respectu, ita & mulieres juvat, quo nomine Anglicanis ea probatur maxime; nimirum pari modo confert, ut ad muliebria ovaria sanguis per destinatas arterias hoc modo attritus debite sanguis transeat, & secretio exinde partium delineationi foetus in vesicula aptarum fiat commode, quo medio atque remedio ovuli sterilitas, vel monstrosa partium formatio aliaque vitia ejus præcaventur, impediuntur ac evertuntur. In præsens memorabile est, quod HIPPOCRATES in *lib. de a. a. & l.* de scytharum mulieribus dicit, eas nulla exercitatione corporis uti, atque ideo esse non admodum foecundas;

das; famulas vero propter exercitationem juxta gracilitatem carnis, concipere frequentius. Hic tandem quoque de hydrocelico, feliciter equitatione curato, exemplum proponam, in quo compressione facta exinde fero extravasato per peritonæi processus in abdominis cavum protruso, aliquoties tamen recidivam passo, equitatione iterum instituta, tumor discussus est.

§. XXVI. Perinde & in artuum morbis, membris paralyti affectis, maxime admodum aucta (corporis enim conquassatio ejusmodi mire hic valet) in rheumatismatibus tam potissimum quidem præservandis, quam etiam curandis, commendanda venit, etiam licet primum augeantur dolores. Sic in malo ischiadico, expertissimum illam esse remedium, observationes testantur. Hinc scite inde coxas firmari ac roborari PLINIVS *Lib. XXVIII. cap. IV.* & femora, JOEL perhibent: THEMISON tunc ante omnia equitare consuluit ejusmodi ægrotantibus, quo magis ob vehementiam motus vexationem faciat, ut memorat COELIVS AVREL. *Tard. pass. Lib. V. c. I.* Non aliter scripsit THEODOS. PRISCIANVS *Lib. II. cap. XXXIV.* ischiadicos & rheumatismis excruciatos, & scorbuticos, itineribus, laboribus coactis, juvandos esse iisdemque expedire vectationem equo. Angli (ut ipse apud illos observavi) ad brachia & manus sic laborantes & paralyticas firmandas & juvandas convenienter satis in anteriori sedis & ephippii parte pulvinar ponunt, cui innituntur, ac pedes stapedibus; & majorem exinde fructum percipiunt, cum motus succussorius has partes exactius afficiat. Nec ideo veritati jam fucum faciam, si dixerim, equitationem valere in arthritide & speciatim podagra, utpote in qua iterum medicamenta sæpius spem conceptam fallunt, & in qua facilis per ea ipsa ad interitum gradus est. Qua de re ita SYDENHAMIVS scribit: *Fidenter assero multa & longe observatione suffultus, maximam partem eorum qui podagra periisse putantur, non tam ipso morbo, quam sublesta atque indebita medicatione fuisse peremptos.* Quæ verba, loco ulterioris explicationis illius, quod indicare volui, sint. Præcavet certe & curat singula hæc morborum genera equitatio, dum potissimum salia morbosa humorum, ex imbecillitate viscerum & roboris virium defectu, per debita emunctoria non secreta, ut eliminentur, robur additur. Exindeve mox apparet indicium & judicium, quod constet podagram communiter invadere eos, qui pathemata circa abdomen, colicam, cardialgiam, obstructions viscerum & similes morbos experiuntur, illamque præcordiorum angustiam, asthma, gravedinem & similia comitari. Conf. GALENVS *Lib. VI. aph. c. XXVIII.* ubi affirmat:

exercitationem podagram fieri prohibere, & SYDENHAM. *Tract. de podagra* p. 591. & p. 596. Immo quotidie longeque in usum ducta & validior quoque pro subjecti natura & indole, tamen temperata non solum generationem tophorum impedit, sed & generatos jam, imo inveteratos & induratos solvit, ut idem testatur l. c. Hanc adeo extollit, Clarissimus ille Angelus (Sydenhamius) ut spondeat, quod si cui innotesceret medicina, quam & celare vellet, æque efficax in hoc morbo atque est equitatio constans & assidua, opes sibi exinde amplissimas facile posse cumulare. Equidem fateor supervacaneum hoc consilium hoc in passu maxime plurimis videri cum equitationem & pedum in stapedes repositionem ineptitudinem corporis ad motum, soccordiam cum doloribus podagricis vix convenire, appareat; Verum cogites vix molestum molestia abigi, nullam ullis vim inesse remediis, omisso motu, prætereaque hanc ob causam morbo cumulari morbo, perfer & obdura, dolor hic tibi proderit olim, multa siquidem & aspera sunt, quæ tamen sanitatis spe libenter admittimus, & licet primo aliqualem asserant molestiam, sensim tamen sensimque continuata non amplius ejusmodi causabitur, cum natura facile iis soleat afflescere atque aliis. Nostra hæc ætate adhuc notus est Vir Generosus & Perstrenuus, bene Severi Imperatoris sententiæ memor; caput imperet non pedes Dom. Ge. de R. qui dolores sentiens podagricos statim, quovis etiam sit tempore electo surgit equumque volucrum conscendit & equitando his doloribus pertinacibus alias se immunem præstat. Perutile etiam consilium fuit iterum iterumque hic commendandum quod Nobili cuidam podagræ subinde obnoxio, pro ea avertenda suppeditavi: suasi nimirum, ut quando urinæ fluxus imminutionem sentiret (quæ urinæ imminutio ut plurimum alias signum adventantis paroxysmi podagrici est) statim per aliquot horas equitaret usquedum hæc excretio iterum flueret, quo observato ab hoc malo per octo jam annos, liber mansit. Etenim existimo quietem, quando ad illam trahuntur podagrici, ideo illis maxime nocere, quia humoribus ob motus defectum magis subsistentibus imbecillitatem augentibus, impuritates magis magisque cumulantur, ex quibus cumulatis malum subinde crescit. Materia namque arthritica profundius hæret intra membranas aut ligamenta arctissimis fibris contexta, ut ideo majori & frequentiori motu opus habeant, si corrigi ad excretionem disponi & eliminari debeant. Amplius existimo ex diuturniore affectu arthritico atque podagrigo detenti, si quieti nimium indulgeant eos variis quoque morbis insequentibus aut concomitantibus reddi obnoxios,

noxios, siquidem ordinario videmus podagricos longiori decubitu fieri quoque calculosos. Non solum efficacius & certius, sed & tutius hoc remedium est, cum non solum artus, sed & viscera moveat, nam compertum mihi est, atque ab aliis annotatum, illas motiones quæ pedes saltem valentius movent v. gr. nimiam ambulationem, podagram in abdomen repellere, ibique viscerum inflammationes & sphacelum quandoque inducere, quæ vero simul eo modo avertuntur. Commode jam consilii Celsi recordor: Si cui, inquentis, dolere nervi solent, huic, quantum fieri potest, exercendum; simulatque illis Hippocratis dicti, exercitatio est artuum & carniū cibus i. e. refectio ac robur articularum & musculorum. Majorem hinc podagricorum numerum inter voluptuosos, delicatulos in otio viventes, & quilectica portatili vehuntur, reperimus. Equidem adversari sibi ipsi videtur, quando alio in loco scribit *Lib. IV. cap. XXVI.* cui genua dolent, equitare omnium inimicissimum est &c. *Cap. XXVII.* equitare podagricis alienum. Dicatque HIPPOCRATES ipse *l. de a. a. § l. Cap. XI.* femorum pedumve diuturnos labores oriri ab equitatione exemplo Scytharum paulo ante commemorato, qui vehementer ægrotabant, claudicabant & coxendices ipsis contrahebantur. Iterum iterumque largiamur hoc facile ipsi, cruribus divaricatis, & pendentibus pedibus per frequentem nimis & concussoriam duramque, maxime incommoda contrahi; inventis tamen hodie, atque ubique notis stapedibus, de quibus SEPTALIUS videndus, in *Comment. ad Hipp. de a. a. § l.* vel conductos stratores, quos vocabant alebant, qui equos conscendentes ministerio suo juvabant, quibus sistuntur pedes firmiter, sustentanturque cum toto corpore, factum est, quod antea metuebant, ut id nunc amplius non adeo metuamus. Scythi enim, si ad antecedentia paululum respicere velimus, adeoque & Hippocrati atque Romanis dein, tunc adhuc ignoti erant, loco enim horum, vel in viis eminentes lapides positi erant, quos ascendebant, quorum PLUTARCHUS in *Gracchis*, & Xenophon in *Hipparcho* mentionem facit, quorum aliqui, in via Appia præsertim alibique hodie adhuc videntur. Lassitudinem artuum, a lenta sanguinis circulatione, phlegmaticisque cumulatis humoribus, omnium optime equitatio aufert. His ita animadversis, notare non inutile est, Anglis, Helveticis, equitationem in pedum luxationibus esse probatam, quoniam motu illo partes luxatæ iterum commode reponuntur.

§. XXVII. Ferunt, ac ut rarum singulareque quoddam notant, Te-lephum & Peliam ab equa enutritos esse. Nobis dicendum est: ab equis.

equis, (si iis vehantur modica scilicet equitatione) macie confectos & graciles, ut & atrophiam vel ariduram partium & nutritione earum depravata ægre se habentes, & spina ventosa correptos, atque rhachitide (morbo illo in figura vitiata, rariori & Anglis quondam endemio,) sive etiam primaria ac nervosa appellata, id est, quæ ex vitio fit nervorum eorumque perverso & spirituum animalium statu præternaturali, sive secundaria magis ex hypochondriorum labe, laborantes, augmentum aut emolumentum atque medelam capere, dum ex equitatione non modo tonus & robur atque blanda strictura partium, debita iis maxime ad nutritionem necessaria accedit; sed & nutrimentum & roridus vapor, per illam ad partes madidas & turgidas magis transmittitur, assimilatur & corpus redditur compactius, aut confusa appositio corrigitur atque avertitur. Conf. B. MORTON *Phthysiol.* p. 6. ut & GLISSONIVS *de Rhachit.* CHARLETON *Ex. patbol.* X. MAYOW. DOLAEVS in *Encycl.* sanguinis enim circulus præcipua causa nutritionis & augmenti corporum est, quod maxime a repletionem tubulorum a succis dependet, quoniam per motum progressivum nutritius succus per arterias ad partes mox iis assimilandus adducitur. Ad hoc quoque scire licet, ad soliditatem partium conciliandam necessarium esse, augeatur vis motrix & elastica, quæ expandendo, succos in partium poros adigat, & quasi incuneet. Vim hanc elasticam atque expandentem, in nutritione vegetabilium manifesteprehendimus, quæ succrescentia, vicina contigua & circumposita corpora, eaque sat ponderosa, dura & compacta, solida, ut lapillos, frustula ligni & vitri, testæ &c. submovent atque diruunt. Exinde etiam per se intelligitur, assiduam equitationem impedire, ne carunculæ aliqua in parte, ejusque superficie aut cavitate interiori, in canaliculis &c. inordinate excrescant, & ne verucæ, polypi & in pedibus tophi, molæ in uteris muliebribus generentur. Quod scribenti mihi venit in mentem locus a Suetonio notatus: cum in Germanico Imp. R. formæ minus congrueret gracilitas crurum, eam paulatim repletam fuisse assidua post cibum equitatione; Crura enim in equitatione super stapedes præsertim hodie usitatos, multum intenta atque infixæ, multum exercentur atque dum eorum fibræ & muscoli intenti & pressi habentur, sanguis quem suggerunt arteriæ, inibi detinetur nec tam facile per venas refluit sicque partes hæ uberius aluntur ac mole augentur. Membra vero bene sæpiusque exercita omnia, ut ex supra jam adductis constat, crassa, ampla ac fortia magis redduntur ut v. gr. pistorum quia massam quotidie depsumunt manus amplas crassioresque habent; exercitium enim, ut ait Avicenna

cenna membrum magnificat. E contra etiam, ubi extenuatio proposita est, ut in obesitate nimia ac monstrosa, æque conducit. ubi nimirum eo devenit corpus, ut nec ingredi sine molestia, nec sedere propter ventris molem, nec respirare libere sic vitiatum homo possit, quod vitium (non pauca certe incommoda parit, quæ AVICENNA *Lib. IV. F. VII. Tr. IV. Cap. V.* recenset, ut coarctationem vasorum, interceptionem spirituum animalium difficultatem respirationis, syncopen, apoplexiam, paralyin, palpitationem cordis, diarrhoeas, febres &c.) curandum non levissimum unum ex officiis medici est, ut GALENVS ait *Opp. T. VI. Lib. XIV. text. 15.* Præter id genus monstrosa quandoque extenuanda etiam corpora sunt; quod Hippocrates præcipit, quando evexiam athletarum tanquam periculosam tollendam esse, existimat; si autem fortior extenuandi causa equitatio suscipitur imo fortissima diuturnior, sæpissime ac quotidie iterata omnino requiritur, & ad sudores usque largos protracta, ut superflui, alibiles succi & ipsa corporis pinguedo atterantur, & attenuentur mediante motu valido, & in auras insensibiliter resolvantur; Quo modo (ut fertur) Nicomachum Smyrnæum ea crassitie conspicuum vel potius horrendum, ut ne posteriora quidem tangere, neque se movere posset, Æsculapius curavit. Hæc ut illustrentur, sisto illud HIPPOCRATIS dictum *l. de sal. diat.* pingues, qui graciles fieri volunt, omnes labores jejuni facere debent, & cibos assumere anhelantes adhuc ex fatigatione, & rursus illud *Lib. VI. epid.* Extenuatio fieri debet motu nimio & exiguo cibo, refectio motu moderato & cibo multo, conservatio utriusque moderatur.

§. XXVIII. Quando exercent febres intermittentes diurnæ rebelles, equitando quoque exerceatur corpus, secundum CELSI illud præceptum quod suppeditat *Lib. III. cap. XV.* Quo die quis febrem expectat, antefurgere & exercere dareque operam oportet, ut in ipsam excitationem tempus febris incurrat: Sic enim sæpe illa discutitur. Eæ enim, (secundum meam quidem sententiam, ac ut verisimile est) oriuntur, primum ex pororum cutis obstructione, viscida crassaque materia, & inde facta constrictione & repulsione humorum a peripheria ad centrum, tonoque simul vitiatum, spasmusque dein vasorum sanguiferorum & nervorum circulationem humorum sic alterante, inducto: Quare in illorum resolutione, perspiratione materiæ peccantis viscidæ, falsæ, subactione spasmi, canaliculorum compositione & toni restitutione, curationis præcipuum quoque momentum ponitur, quod optime æqua equitatio præstat, non solum vero placida, mediocris, sed & si causæ contumacia

id exigit, valida, succussoria, & ea quæ cum contentione fit & in circum actione. Inter quas, quanto pertinacior quartana, tanto commendatior hujus usus est. Galli imprimis paroxysmo instante, pro hac illam instituunt, posteaquam vinum generosum (moschatum præ aliis suadent,) sat large in quantitate biberint, tamdiuque ea corpus commovent, usque dum largiter sudore perfundantur; siquidem ejusmodi curationis methodum felici successu aliquando me Parisiis commorantem, in juvene Germanico quartana pertinaci vexato, vidisse recordor. Recordor tamen etiam simul, ex immoderata & vini generosi simul potatione, Nobilem Juvenem Anglum, plethoricum, ibi tunc quoque degentem, ex febris simplici tertiana, in continuam, deliria & alia gravia symptomata incidisse. Refert ad institutum & ad autoritatem comparandam adducere observationem XXXV. Cl. Pechlini, qua cujusdam quartana inveterata laborantis, mentionem facit, qui medicamentis tandem pertæsus, paroxysmo appropinquante, equo aspero & parum domito vehebatur atque magno nisu obluclabatur ferociæ ejus, quo febrem hanc contumacem penitus fugavit. Ejusmodi remedii genus, laboribus & exercitiis fortioribus nimirum, similem incipientem præsertim morbum abigere, Asclepiades affirmavit. Meminit Celeberr. FRID. HOFFMANNVS in *Med. Rat. System. T. IV. Sect. I. Cap. VI.* viri cujusdam hypochondriaci & febris catarrhali ægerrime conflictati, qui equitatione, non omissis tamen medicamentis convenientibus pristinae valetudini ex toto redditus fuit. Quid? quod ipse (Ascl.) præcipue quoque ipsa (equitatione) usus est in febris ardente vehementi, adhuc tamen recenti, ut refert CELSVS *Lib. II. cap. XV.* quod ego equidem hodie non facile suaderem. Cæterum cum blando & uniformi motu ad suave somnum invitemur, equitatio lenis & gradaria somnum læsum aut amissum corrigere & restituere poterit, M. A. SINAPIVS in *Parad. med. P. II. p. 109.* refert: Tartaros de lue venerea suspectos, corpora sua longis equitationibus ad sudores largos usque exercere, juncta inedia & pulvere calami aromatici sæpius exhibito, iisque remediis hanc luem depellere. Quantum valere possit præservatione contra morbos contagiosos, hic saltem annotasse sufficiat, (licet alia facile causa etiam inveniri possit) quod Rhasis ABVBETER, Medicus Arabs citante MERCVRIALI *de arte gymnast. Lib. III. cap. XV. & Lib. VI. cap. ult.* nobis refert: contigisse in quadam peste, ut cum fere omnes perirent, soli equites venatores ob summam valetudinem assiduis exercitationibus partam, incolumes evaserint; Ad hoc referunt experti, equites milites peditibus, familiaribus

ribus alias morbis & epidemice grassantibus in castris febribus malignis, petechialibus, morbo hungarico, dysenteria &c. minus vexari.

§. XXIX. Sigillatim indicandum est, equitationem omnibus aliis remediis anteponendam esse, in illis morbis pertinacibus, qui ab animi pathematibus, ut diuturno angore animi atque mœrore & tristitia oriuntur, quæ plus adhuc afferunt mali, & in quibus juvamina, quæ a medicamentis petuntur, frustranea ut plurimum sunt quandoque vero noxia, de quo testis est Exper. BAGLIVIVS in *Dissert. de Tarant. Cap. VII. & Prax. med. Lib. I. cap. XIII. §. 4.* Angli quoque ejusmodi in casibus non satis hanc possunt laudare. Quippe hæc maxime in partes nervosas, & quæ sensibus & motibus sunt dicatæ agunt, repetitis spasms eas afficiunt, earum robur ac motum violant planeque immutant, singularemque in chylicationis officinam exercent tyrannidem: nam per illa mire tonus ventriculi & intestinorum labefactatur ac destruitur, eoque alimentorum digestio, secretio, excretio, turbatur, laudabiles succi omnes, maxime spiritus animales, consumuntur, iisque alienus perversus & turbulentus motus infertur, spiritus ascentia impeditur, & reliqua humorum massa singulari languore notatur, sicque universi corporis vires solvuntur, obstructions gignuntur, ideoque aut graves producuntur morbi, aut benigni alias eique leviores, graviores & insanabiles atque lethales redduntur. Hos alienos atque perversos motus, hic laudabilis per equitationem motus corrigit, aliam determinationem, ab extra sic advenientem inducit & inordinatam atque perversam componit, fluidi nervei influxum interceptum restituit, sanguinem, cum reliquis humoribus temperate movet. Certior exinde sperandus effectus, si equitando iter ad alium locum ejusmodi affectuum intemperantia læsi instituunt, ubi relicto, quod turbavit objecto, mutatione ac novitate loci simul recreantur, adversorum vero obliviscuntur. Talis instituti ratio his in casibus omni medicamentorum apparatui longe est anteferenda, cum perspectum sit, quod in his remedia ex pharmacopolio petita, licet etiam mihi nomines species lætificantes Galeni aliaque, parum aut nihil proficiant. Ut hos motus anomalos, sic inductos ejusmodi corporis motus corrigit præsentis, ita & contra futuros munire animum potest, quippe animi affectuum ea indoles est, ut levi ex causa facile suos motus irregulares repetant. Qui semel animi mœrore magno longoque est contristatus, aut metu ac horrore paulo sæpius perturbatus, aut iracundia accensus, præter voluntatem deinde levi occasione, frequenter sic afficitur. Ratio ex modo dictis jam patet, & antecedentia persuadent, ubi

est indicatum, equitationem hilaritatem quandam & fortitudinem animo addere. Exinde porro liquet quoque hoc remedii genus apprimè quadrare iis hominum, qui mira impressionis vi capti, morbos sibi varios ipsimet fingunt eoque certe accerunt quosque nec medentes illique perspicacissimi sæpe nec ipsimet signis satis perspicuis manifestare possunt.

§. XXX. Cum merito equitatio confortans maximum a Clarissimo Sydenhamio sæpius adeo laudato salutetur, nullum dubium superest, quin vires pristinas per eandem recuperare feliciter possint, a longis & pertinacibus morbis debilitati, convalescentes, præsertim, cum ita cum iis comparatum sit, quod si corpora sua non leniter subinde exerceant, ut parcius lentiusque, aut vix integras vires recuperent, aut hoc ipso morbos revocent: ut enim omnia recte in corpore humano peragantur, motus omnino necessarius est, & tunc egregius equitationis imprimis est usus, gradariæ lenis quidem placidæ sæpius, sed non diu una vice in usum ductæ. Nominandi hic sunt speciatim. phthisin, febres tertianas & quartanas pertinaces, gonorrhœam veram, largam hæmorrhagiam, dysenteriam perpeffi, universo corpore imbecillo exsanguique facto. Talis placida & modica equitatio, præsertim in adfuetis vires deperditas exhaustasque certe & mire resarciat, appetitum penitus destructum restituet, digestio ciborum & distributio alimenti debita succedet efficietque, ut citius pristinus redeat vigor, & recidivæ quas vocant, & morbi, qui alias non raro convalescentibus accidere solent, avertentur, haud alia ratione, quam quod lentores a morbo relictos dividat, digestionem revocet, calorem naturalem suscitet, sanguificationem & novi bonique sanguinis influxum, spirituascentiam adjuvet & tonum laxatum restituat.

§. XXXI. Neque penitus obliviscendus est alius equitationis usus, nempe, ut modicam corporis motionem nec inconvenienter amant, qui missiones sanguinis per phlebotomiam & scarificationem admiserunt, ita placida equitatio hic quoque præ aliis eligenda est. Hinc Angli atque Helvetici imprimis post venæ sectionem, quam vere & autumno præservationis gratia instituere solent, hoc exercitii genus convenientissimum censent, in aëre liberiori rusticano institutum, quare tunc eam vix unquam intermittunt. Nec nobis quisquam eam dissuadere facile poterit, nam liberior & exinde æquabilis per omnes partes sanguinis dispensatio optime fit, dispendium vero forsan ex detracto sanguine citius resarcitur, calor & spirituascentia resuscitatur, eoque modo

modo simul incommoda, quæ largiorem sanguinis missionem sequuntur, ut ventriculi debilitas, cruditates &c. avertuntur, adeo, ut novus sanguis, si per aliquod tempus quotidie continuatur, melius subigatur intimeque uniatur. Nec ante venæ sectionem inutilis erit, ut spissus sanguis subtilior & fluidior reddatur eoque melius circuletur atque ex vena promptius profiliat quemadmodum Celeberrimus F. HOFFMANNVS uti videre est in *Med. ejus Consult. P. VII. p. 268.* cuidam suasit magna humorum impuritate laboranti, ut ante venæ sectionem corpus per ambulationem & equitationem commoveat.

§. XXXII. Postremo loco pari modo non omittendum esse censeo, quod mulieribus gravidis, quum ordinario multis ærumnis graventur, ad partus nifus feliciter superandos, quotidiana modica, lenis tolerantis imprimis, gradaria equitatio aut circa ultimos menses, nec sine ratione obscura, utilitati ducenda sit. Frequenti igitur foeminis Anglicanis prægnantibus atque partui vicinis, hæc in usu est, qua facilem felicemque partum sibi conciliare credunt. Nec fallit opinio: Quanto enim prægnantium interest, ut per totum gestationis tempus vitales humores omnes in debita proportionem, temperie & motu conserventur, ut tam ipsarum quam foetus tenerissimi salutem consulant, ac quanto ipsæ ad varios hoc in statu affectus præternaturales per se jam sunt proclives, tanto inquam exactior ea ipsis sit vivendi ratio. Hæc, præter reliquum regimen, imprimis etiam modicam corporis complectitur motionem, quæ nullo non gestationis tempore apprime conducit; Eo magis ea necessaria est, quo magis hæc ad quietem sunt pronæ, quæ matrem & foetum torpidum reddit, eaque partum minus faciliat; Hoc tamen moderamen probe observent, ut primis gestationis mensibus, mediocris hæc motio in usum ducatur, cum ob debiliorem adhuc cum utero nexum, abortus periculum sit timendum, ac ultimis dein liberaliori indulgeant. Hæc modica corporis motio & secretiones & excretiones debitas, præsertim insensibiles transpirationes, quæ in gravidis, variis ex causis justo parciores esse solent, quas omnes intermissa debita corporis motio inhibet ac plane sufflaminat, utilissime exsuscitat ac promovet, sicque impedit, ne excrementa cumulentur, simulque quicquid torpet convenienter excitatur, omnia in debito circuitu debitoque ac amabili calore conservantur, atque foventur, singula digestionis & egestionis genera, maximopere juvantur; atque vitia illis admodum familiaria, ut obstructions, tumores œdematosi &c. præcaventur. Ultimis

præsertim mensibus palpitatorius ille motus sæpius iteratus, egregie ad faciliorem enixum omnia præparat, viamque commodam sternit.

§. XXXIII. Quod vero omnibus omnino remediis commune est, nisi modi, durationis circumstantiarum, individuorum, ætatis, temperamenti, habitus corporis, temporis, vitæ generis, consuetudinis, aëris victus, proportionis, ordinis & valetudinis præsentis, morborum &c. ne ullo modo excedant, habeatur ratio, aut frustraneus illorum est usus, aut damnum ingens subsequitur; etiam hoc de omnibus exercitationibus, adeoque & de equitatione necesse est, fateamur; secundum enim HIPPOCRATIS monitum *6. epid.* labor &c. omnia mediocria facienda. Meo igitur & hic non defuturus officio, circa equitationem, quæ salutarem in finem suscipitur, rite in usum trahendam, saltem generales quasdam adhuc regulas tradam: Nimirum debilibus teneris, scilicet cholericis, plethoricis, non assuetis, in quibus lenis placidaque brevis, iterata indiesque sensim sensimque aucta; robustioribus, carnosiss & quibus serum in sanguine abundat, vero, viribus valentibus, aut quibus periodici quidam morbi, certo tempore redeunt, validior, frequentior longiorque expetitur, placeat & confert, quod hunc in modum præclare dixit CELSVS *Lib. II. c. XV.* levia quidem generæ exercitationis firmissimis ac recte valentibus conveniunt, valentiora vero his, qui jam pluribus diebus febre liberati sunt, aut his, qui graviora morborum initia sic sentiunt, ut adhuc febre vacent. Ut & alias HIPPOCRATES innuit *l. de sal. diæt.* carnosos ambulare citius oportet, graciles vero tardius. Vertigini obnoxii non in orbem forte equitent, ne offusa oculis caligine, in terram delabantur. Juvenibus in quibus velocior adhuc est sanguinis circulatio, moderatior atque alimentorum quantitati, quam assument accomodata equitatio imprimis convenit. Ill. BACON DE VERVLAM. *Sermon. fidel. 18.* Pueris quibus jam agilissimum corpus est, a septimo anno, equitationem posse concedi, minorem tamen quam vires ferant, recte autumat. Concedit iis, & illam GALENVS *l. de tuenda sanitate cl. II. p. 130.* Senibus præsertim ejusmodi motionibus assuetis secundum HIPPOCRATIS *Aphorismum 49. & 50. Sect. II.* equitatio maxime utilis imo necessaria videtur, hinc sæpius adeo adductus Sydenhamius vitæ ἀκμὴν prætergressis, multo diutius in hac exercitatione persistendum, quam infra hanc ætatem positis, præcipit, sed iis non diuturniorem nimis & duram defatigantem, sed placidam lenemque potius suaderem. Consuetudo enim, ut in rebus non naturalibus maxime ita & hic consideranda: Videmus hoc in tabellariis, qui licet senes & invalidi

validi multa sæpe milliaria haud difficulter, pedites conficiunt. Diu enim multumque agitatae partes ad labores indurantur ac non tantum robur insigne sed & promptitudinem aliquam ad motum acquirunt, ut scite EMANVEL STVPANVS in *Comment. ad Apor. Hippocrät. physiol. p. 149.* explicat. Eleganter hoc ipsum CICERO expressit *de senectute p. m. 84.* sequentibus verbis: *Potest exercitatio & temperantia etiam in senectute conservare aliquid pristini roboris.* Ratio illius in patulo est, nimirum in his & fibrarum vigor & sanus humorum status deficit, quoniam is nimis spissus est atque pituitosus ad obstructions pronus & inde major fibrarum immobilitas & lentior sanguinis circulus est, & hinc dependentes necessariae secretiones & salutares excretiones lentius quoque procedunt, hinc excrementorum copia major evenit insuperque senilis calor, qui per se debilis existit, debiliior fit, nisi commoveatur atque a moderato exercitio excitetur simulque ciborum appetentia eorumque digestio & recrementorum egestio juvetur & promoveatur ejusque sic beneficio robur vitæ ac membrorum vires sustineantur secus alterutro deficiente perituræ. Atque cum in his abdomen maxime patiatur, quia sanguinis circulatio per venam portæ præsertim & adjacentium viscerum vasa difficilior lentiorque evadit, unde tonus debitus harum partium perditur, qui ad calculos, hydropes, scorbutum, apoplexiam, hæmorrhoides, stranguriam & similes affectus senibus familiares, expeditam parat viam. Nam hic, eum observamus naturæ ordinem, quod secundum ætates soleat per partes ordinario descendere, cujus fundamentum in fibrarum habitudine, tono, robore, tensione, ac elatere validiori aut invalidiori & fluidorum laxiori aut strictiori invicem cohærentia, maxime est fundatum. Sic primum infantilem ætatem, ob fibrarum mollitiem & pendentem hinc atoniam, juxta serum impurum, capitis defluxionibus, tinea & convulsionibus, epilepsia &c. affici comperimus. Mox juvenilem, in qua fibræ jam sunt tensiores & sensibiliores, sanguis magis abundat, hæmorrhagia narium, hæmoptyses, spasmi thoracis, tussès, pleuritides, phthisis invadunt. Virili ætate dein major fit fibrarum tensio, unde majores iis, pluresque dolores, inflammationes, arthritides & similes morbi sunt familiares. In senectute denique sanguis magis vappidus redditur & viscidus, transpiratio minuitur omnesque digestiones debilitantur omnesque functiones suam pristinam naturam atque constitutionem amittunt; speciatim infimus venter magis patitur, ac calculi, hæmorrhoides, stranguria, dysuria &c. contrahuntur, unde & senes toties urinam pituitosam reddunt. Idem quod

quod a me modo indicatum est, sentiit & scripsit Clariss. FRID. HOFFMANNVS *Med. Rat. Syst. T. II. p. 344. §. 23.* frequentem corporis motum maxime equitationem vires & valetudinem senum tueri. Hoc ipsum Cato jam indicavit his verbis: Resistendum senectuti est, ejusque vitia diligentia compensanda sunt, pugnandum, tanquam contra morbum, sic contra senectutem habenda ratio valetudinis, utendum exercitationibus modicis: tantum cibi & potionis adhibendum, ut reficiantur vires, non opprimantur. Videmus non raro agricolas & tabellarios, qui utut octogenarii, labores eosque sat duros strenue obeunt atque facili membrorum agilitate, cursu defunguntur, quique si vitam sedentariam agerent, male se protinus haberent brevique morerentur. Nec vero corpori solum subveniendum est, sed menti atque animo multo magis. Nam horum facultates quoque, nisi tanquam lumini oleum instilles, extinguuntur senectute. Quare juvenes sedulo moniti sint, si a puerili adolescentique ætate sanguineos tenuoris texturæ, longioris staturæ, sanguineo cholericos, aut sanguineo-melancholicos & phlegmaticos, præsertim se sentiunt, aut crebris catarrhis, narium hæmorrhagiis tentantur, aut eadem præpostere ac immediate cohibitæ fuerunt, aut si hereditaria hæc mala metuunt, nisi & citius, præprimis phthisin, hæcticam, nephriticos cruciatus, aut podagricos, incurrere atque iis tandem perire velint, ut habeant decentem & modicam corporis motionem, & præsertim equitationem sibi commendatissimam. Licet moderata equitatio omnibus temperamentis quadret: attamen, præ omnibus aliis maxime convenit etiam quandoque fortior, & auctior constitutionis humidæ & frigidæ hominibus, quos phlegmaticos vocares, quibus calor valde est remissus, & segnities membrorum notabilis, indicio, motum cordis hincque transpressionem sanguinis esse languidam & in fibris musculosis tenuem, remissam, ex quo etiam exercitiorum genere, paulo acrius suscepto mox rubescere incipiunt. Spectat huc locus ab HIPPOCRATE notatus *Epid. L. VI. Text. 2.* calidi, & qui paucio utuntur cibo, reficiuntur otio, & ipsis exercitationibus labascunt; frigidi & qui multo utuntur cibo, inarescunt otio, exercitationibus reficiuntur. Nec non sanguineis gradaria admodum utilis & necessaria est, his enim motus & abstinencia ordinario loco optimi medici & remedii sunt, sanitatem diu, incolumem ac salvam conservandi. Ubique vero & semper tolerantia & adhuc magis consuetudinis est habenda ratio, quæ plus facit ad tolerantiam, quam robur, & movendi facilitatem concedit, juxta HIPPOCRATIS monitum *Aph. 49. Sect. II.* qui

qui solitos labores perferre consuevere, etiamsi invalidi sunt, aut senes, eos facilius ferunt, quam qui non adsueta, quamvis robusti & juvenes. cui affinis est illud CELSI in *Lib. I. de Med. C. III.* *Omnem etiam laborem facilius vel puer vel senex, quam insuetus homo sustinet; atque ideo quoque nimis otiosa vita utilis est; quia potest incidere laboris necessitas.* Alibi præcipit idem Hippocr. utile esse sanis quandoque ad insueta transire; ac rursum Celsus confirmat, nullis certis legibus obstrictum esse, interdum quiescere, frequentius exerceri, pro sanitate esse.

§. XXXIV. Semper etiam, (quod de omnibus exercitiis est tenendum, ut nempe in initio & fine debeant esse lenta) si nimirum pro curando pertinaci inveteratoque morbo diuturnior sit suscipienda, prius aut leni fricatione aut ambulatione, corpus ad validiores motus suscipiendos præparent atque a levioribus per breve tempus equitationibus, & modicis itineribus, præsertim non adsueta & imbecilliores ad longiores & per itinerum dissita spatia procedant, cum ex effato HIPPOCR. *Sect. II. Aphor. 51.* multum & derepente evacuare aut replere, aut calefacere aut frigefacere, aut aliter quocunque intempestive corpus movere, periculosum sit atque constet omnem repentinam mutationem esse noxiam. Equites vel in ipsis suis equis hoc observare possunt, qui, si in itineris initio statim nimis incitantur, brevi fatigantur & in cursu deficiunt. Hic ordo, hæcque ratio naturæ semper magis consentanea est, & conveniens, quæ etiam molestiam, quæ quandoque non adsueta accidere solet, avertit. Sanguis enim crassior & copiosus vehementi frequentique agitatione impulsus, per minimos tubulos difficilius vibratur ac volvitur, & ubi dein restagnat, vel ad vicina vasa remeat, tensiones vasorum dolorificas & insignem corporis languorem parit. Totum etiam corpus, quod antea quiete placatum est, si repentino motu subito concutitur, gravissime inde læditur. Præsertim ideo hunc modum teneant hypochondriaci & melancholici, qui ordinario si fortius mox incipiant moveri, illico angustias & molestias magnas persentiscunt. Clarissimus Sydenhamius, postquam quotidie gradatim suscepta equitatio fuerit, tandem ad vigesimum, imo ad trigesimum lapidem usque (secundum computum Anglicum scil.) in morbis diuturnis & pertinacibus phthisi, hæctica, malo hypochondriaco &c. eam producere, & per menses aliquot in eadem perseverare suadet. Bis in die, mane scilicet & vespere corpus exercere conducit, tam ad sanitatem & vitam diu conservandam, quam labefactatam reficiendam. Conf. GAL. *lib. de parva pile lusu.* Secundum SANCTORII in *Med. stat. Sect. V. Aph. 23.*

Ggg

inqui-

inquietis: *Tunc exercitium est saluberrimum, quando post factam primam & secundam coctionem corpus reducitur bis in die ante cibum ad consuetum pondus & ipsius HIPPOCRATIS sententiam Epid. Sect. 4. tit. ultimo labores seu corporis exercitia, cibos præcedant, igitur & equitatio, hæc enim appetitum excitant.* A prandio aut post pastum, non nisi placidissima, lenissima, ac levissima instituenda, ne velocius cibi quam par est, ex ventriculo ad intestina rapiantur, & chymi & chyli expressio citius validiusque nimis urgeatur, sicque ciborum solutio debitaque distributio impediatur. Quod aliquando Fridericus III. Imperat. Rom. in duobus ad mortem damnatis & decollatis, deprehendere oculis, concessit. Vid. HOFFMANNVS *Lib. V. Institut. cap. XXXII.* Hinc quoque ex eo infestant capitis perturbatio, vertigo, oculorum obfuscatio, colici dolores, scabies, abscessus &c. Imprimis equitantes corpus cibo & potu non gravent nimio, cum ii non solum (imprimis hypochondriaci a paulo fortiori equitatione male se habeant, & si præ aliis assumtis, lac, pingua, acida, vinum &c. sumserint) ructus & stomachi ardores persentiscant, dum assumpta ad duodenum ipsumque ventriculum regurgitant, sed & atque maxime præ aliis alio exercitio exercitatis tunc non raro hoc incommodo vexentur, quod dolorem punctorium & lancinantem rarius in dextro, in sinistro frequentius latere, & respirationem sufflaminantem cum apparente interdum tumore sentiant, quod nihil aliud est, quam spasmi flatulenti species, a flatibus, colon potissimum ex dextro hypochondrio surgens, sub ventriculo ad sinistrum latus flexum, lieni connexum, & recurvatum, una cum monocolo distendentibus & inflantibus oriunda, ut & alias experitur sinistro hypochondrio plures flatus colligi. Vulgus lien accusat, & merito quidem, quandoque, cum juxta modo descriptam coli intestini inflationem spasmodicam, sæpius infartu forte sanguinis pressus, inæqualem motum patiatur ac relaxetur, quam relaxationem fibræ lienis longitudinales tunicarum exteriores æque ac intestinorum &c. ex facili admittunt, unde vaporum enascensium spatium conceditur, ac molesta distensio in actum deducitur. Persuadent hoc quoque foeminarum menstruatarum tunc inflationes dolorificæ per plures dies infestantes, nullisque clysteribus cedentes, concomitantes sequentesque fluxus hæmorrhoidales, in viris, cruenti vomitus & similia symptomata. Liquet vero ratio simul, cur equitibus familiaris hic dolor hypochondriacus sit, quod pedibus interdum stapedibus fortius innixis, abdominis muscoli stringantur attrahanturque. Attamen nec confert ejusmodi exercitia jejuno plane stomacho instituere, quem-

quemadmodum experimur, laborantes & corpus moventes ob vacuum ventricum, variis incommodis premi, ex capite laborare, nausea affici &c. Imprimis biliosi habent, quod eos molestat ac lædit, utpote qui inedia perferre sine subsequenti noxa vix possunt, de quo notum est HIPPOCRATIS effatum *lib. epid. text. 18.* Cibo & potu bilis fervor temperatur & eorum abstinencia exurit, acriorque fit. Repetit & confirmat idem *Lib. VI. text. 24.* Atque jejunos tunc molestat frigidus præsertim aër, cum ille potissimum halitibus niveis turgidus, imprimis si nix copiosius delapsa iter moratur vid. BARTHOL. *de nivis usu Cap. XXXIII. p. 187.* respiratione in ventriculum illapsus, plus faciat desiderari cibum, pungendo & convellendo ventriculi tunicas Conf. FROMMONDVS *l. v. meth. Cap. V.* Unde ex. gr. stomachicum optimum erit secundum RONDELETIVM *Method. cur. morb. p. m. 428.* caro suilla fumo indurata & lucanicæ Bononienses, quoniam coarctationem ventriculi impediunt (SIBALDVS *Prodr. Hist. Nat. Scotica P. II. S. 2. Cap. I.* resinam abietinam suadet. Ex hac dubio sine ratione, crusta panis adeo profuit Bruto illi apud PLVTARCHVM *Lib. VI. Sympos. 18.* Apolloniam per nives proficiscenti bulimia affecto. Insuper acceptum quoque referimus cum modo adducto PLVTARCHO *l. c. quæst. 8.* retentionem halituum spirituosiorum, ex obstructis undique corporis poris, conversionemque introrsum sanguinis & spirituum, facileque credimus exinde fieri ingentem fibrarum motionem, imo quoque dolorificam sensationem. Igitur parci-
 or, levior ac humectans non flatulentus ante hoc præsertim exerci-
 tium cibus sumatur; A quali pastu dein & equitatio placida lenis & le-
 vis confert, qua assumpta blando motu subiguntur, solvuntur chylusve
 novus perficitur meliusque ad sanguinem desertur, hinc PLINIVS me-
 morat *Lib. II. cap. LV.* Athletas maluisse semper cibos ambulatione
 quam somno perficere, ratos, somnum ad corpulentiam quam firmita-
 tem magis conferre. Insuper crebrescentibus his exercitiis plenior re-
 spondeat victus, parcioribus in pastu tale sit & exercitium. Quæ regu-
 la diætetica ubique hæc commoda habet, quod nutrimentum ad partes
 alendas magis transmittat ac per sudores excretionem facili-
 tet, unde per-
 fectior in partibus assimilatio, simulque corpus reddat solidius compa-
 ctiusque minusque deprædantibus spiritibus obnoxium: e contrario
 vero spiritus magis incendantur attenueturque nimis humidum corpo-
 ris, intimiora nimis concutiantur, quæ quidem magis quiete gaudent, ut
 scite explicat illustris BACO DE VERVLAMIO *in Histor. Naturali Cent. IV. p. 817.* Priusquam & sic exerceantur, alvum & vesicam exonerent,

quia omnis motus species, imprimis hæc nostra, ad corporis ambitum pellit ac intestina aliquantisper quasi exsiccat, Conf. GALENVS *Lib. III. aph. com. 20. & Lib. II. de sanit.* Si imprimis validior vehementiorque equitatio futura sit, latera fasciis aut cingulo cario confecto ligentur, quo mul dolor ille pungitivus præcavetur & avertitur, nisi contrario musculos retrahendo & spasmos mitigando. Sub motu hoc, animus, quantum fieri possit, liber maneat a curis, sollicitudinibus, anxietatibus & meditationibus profundis, sed objectis suavibus oblectentur sensus, ut corpori & animo, vitæ & sanitati eo magis is conducat. His hoc quoque addendum est, ut diuturnis & pertinacibus morbis detenti medicamentis illis dicatis prius assumtis equitationem desuper instituant sicque sanguinis circulum commode accelerando eorum quoque vires intendunt atque in actum deducant.

§. XXXV. Ut cæteræ exercitationes, cæterisque paribus, vere, autumno & hyeme fortiores & diuturniores conveniunt, quam æstate, ob poros ex aëre calidiore magis patulos, ac subsequentes copiosiores humorum excretiones, hincque vires debilitatas. Secundum enim SANCTORII calculum in *Med. Stat. sect. 2. §. 29. & 41.* æstate singulis diebus, libram unam æquans quantitas major per transpirationem insensibilem ex corpore humano excernitur, quam hyeme, ac ARCHIB. PITCKARNIVS *Dissert. de motu, quo cibi in ventriculo rediguntur ad formam sanguini reficiendo idoneam Th. 10.* optime argumentatur: hyeme plures fluidas partes sanguinem, spiritus animales in omnes corporis partes, ac imprimis in musculos influere: ita & de nostra dicenda est, unde præclare HIPPOCRATES dixit *lib. de salubri dieta §. 2.* qui exercitio utuntur hyeme, currere debent, æstate verum parum currere, aut minime, sed multum deambulare secundum ventum & frigus. Æstate, ea in umbra facilius, fortius & securius, imprimis si caput patitur, habetur; hyeme vero in sole validior, frequentior, longior, concitator conceditur. Veteres in gratiam exercitantium, ut nimirum quovis tempore exercitia instituere possent, Gymnasia, exedras, porticus, palestras, Xysta quæ HIER. MERCVRIALIS *de arte Gymn.* describit, construebant. Sub frigida forte aëris constitutione, corpus bene muniant probe vestiti equo iter facientes; aër enim undique ad corpus allapsus, multa tunc incommoda inferre solet. Etenim secundum Physicorum demonstrationes vide GRAVESANDE *Phys. Elem. Mathemat.* corpora per fluidum mota resistantiam pati atque corporis moti aucta velocitate, hanc resistantiam augeri, quoniam & cohæsiō particularum fluidi superari debet,

& partibus fluidi conciliatur motus. Proin, equites per aërem velociter vecti cum actioni æqualis sit reactio etiam magis aër premit eorum pulmones, atque, dum talis frigidus aër ingreditur fauces vasaque simul harum partium ab aëre resistente ac contraria actione & reactione commoto valide comprimuntur ac angustantur, constrictis vero his & humoribus condensatis exinde atque impactis, accedente adhuc ac collaborante aëris hujus valida ad centrum in has partes pressione, ex facili obstructions horum locorum ingeri possunt, quas simul humorum per vasa motus ex equitatione auctus, impetum in loca modo obstructa quoque auget. Inprimis exinde & facile inflammationes, abscessus intus, & morbi laterales, asthmata, anginae peripneumoniarum, pleuritides pernio- nes, phlyctenes, contracturae, sphacelus ipse, provenire possunt; trans- colatione nempe sanguinis hinc inde sufflaminata & congelato eo velut, in his aut illis partibus stagnante. Frigus certe, equites lædit licet etiam sint bene vestiti, facilius, pedestre iter facientibus, vel alio motu corpus moventibus, etiamsi tunc non adeo bene sint vestiti; frigidus enim aër per continuam respirationem in os internum atque fauces frequentissime irruit, quo vasa ibi ab aëre resistente & contraria directio- ne moto, valide comprimuntur ac angustantur, quibus sic constrictis simulque aëris in has partes valida pressione conspirante, obstructio fa- cile ingeritur, eoque magis, quo simul auctus humorum per vasa motus, inter equitandum, impetum in loca obstructa, auget. Quo- niam lenius moventur ac incalescunt; hinc equites aliquamdiu pe- dibus iter facere necessum habent, nisi succussorio vehantur equo. Ubi mihi in mentem venit obiter referendus casus, in *Eph. G. C. D. l. anno III. Observ. 41. a. B. GARMANNO* notatus de viro, qui sæ- viente hyemis frigore, inter equitandum paralyin penis incurrit, unde impotentia coeundi, nulla iterum arte curanda, successit. Oculis tunc imprimis maximum impendit detrimentum, tum quod repellens, nivis & specularis quasi scintillarisque glaciatae albedo (*Anaxagoras* tamen ni- vem atram esse, non erubuit, affirmare) radios luminatos ad teneriores oculorum fibras violenter nimis reflectendo easque movendo, oculo- rum tunicas notabiliter lædat, tum quod & frigoris morsus eis noceat. Ad hujus illustrationem adducit *OLAVS MAGNVS*, sæpius lupos in lo- cis niveis & frigidioribus reperiri oculis privatos vid. *Lib. I. cap. XXII.* Nec non idem confirmat observatio, quam habet *THEVENOT. Itin. Orient. Part. I. cap. V.* a terra & saxis candidis in *Maltha Insula* oculos continuo dolore affici, nisi nigro velamine vultum tegant, errantes.

Contra quod milites Persarum pannis nigris ante oculos gestis, felici cum successu usi sunt apud XENOPHON. *Lib. IV. Expedit. Cyri. Conf.* & GALENVS *Lib. X. de usu part.* Simillimi quid legitur in *Itinerar. Persico* I. B. TAVERNIR. *Lib. I. cap. II. p. II.* Incolas vero Regni Tibet, ocularibus non equidem vitreis, sicuti apud nos usu venit, sed ex retium quodam genere contextis uti, narrat NVREMBERGIUS *Histor. Natur. Cap. LXIX.* Evitetur item studio (aër) minus sanus, malignus, adversus, nebulosus, turbidus, pluviosus, humidus, pulverulentus. Evitetur & ventus vehementior & adversus imprimis frigidior maxime, sub vehementiori praesertim & incitata equitatione: vento nimirum flante magis percipitur frigus, quoniam vicinus nobis aër, ilico a corporis nostri calore calefcens omni momento diffatur simulque frigidior (aër) mox in ejus locum succedit: omne enim exercitium violentum, ubi fortius spirat ventus, malum habetur: confer. SANCTORII *Med. Stat. Sect. V. Aph. 25.* Ratio in promptu est, violentius frequentiusque aër in fauces irruens atque pulmonibus magno impetu haustus, intruditur, unde liber sanguinis motus impeditur, dum pulmonum bronchia opplentur & distenduntur: hinc sanguis & incalescit nimis rarefactus, hincque vasa praeter modum dilatantur & pleuritis, peripneumonia, angina inflammatoria aliaque ejusmodi mala inducuntur; majori adhuc cura radiique solares urentes atque molesti avertendi. Per locum, si modo occasio ita ferat, instituatur, & ad locum etiam quandoque peregrinando remotum, (ut motus motu continuetur, & locus cum loco mutetur) gratum atque amœnum, salubrem, apertum, laxum, ab orientalibus & septentrionalibus ventis perflatum, (ordinario magis salubribus,) atque quem stagna & paludes foetoresque non inquinant: Nam magna semper habenda ratio est conditionis loci, & major, in quo exercemur & cibum ac potum assumimus, quam ubi quiescimus ac somnum capimus; Sub exercitio enim incalescit rarefcitque corpus, pori fiunt patentiores, & inspiratio major & frequentior, adeoque citius tum magis aërem insalubrem, ejus impressiones in se recipit corpus, atque ab eo afficitur sensibilius ac gravius. Aëris rustici, quem veteres Philosophi & Medici jam adeo aestimarunt, & jure quidem aestimarunt: (urbano, ordinario, effœto, impuro, pro spiritibus recreandis, & sanguini in pulmonibus exaltando minus idoneo praefertur) hic quoque primaria stet laus, primariusque locus, ut relicta scilicet urbe suburbiisque atque illorum junctis sedibus & turbulentis soliis, relictoque aëre illo culinarum vaporibus, inter ædificiorum umbras inquinato, mephitis, fumis, foetoribus

bus cloacarum vitatis, eligantur discreta, diversaque loca quæ placent & iis rarioris liquidiorisque aëris laxitas inest atque ut ad geniales villas & recessus, ad nemorum sylvarum atque montium, camporum, pratorum, fontium, vallium, rivorum amœnitatem & salubritatem, (ut varietate gaudeant) ac ut ad rorem ibi matutinum, (suo saccharo dulcissimo & optimo, occulto vitæ cibo & naturæ nostræ gratissimo, mire homines recreantem, ut HELMONTIVS habet, vid. *Tract. imag. ferment. p. 33.*) atque ad florum, arborum virentium & fragrantium odorem, equitantes trahantur. Hinc PLVTARCHVS in *Problem.* Templum Æsculapii Romæ ideo extra Urbem ædificatum fuisse scribit, ut major ibi salubritas haberetur; Hincque apud Strabonem legimus, veteres, athletas Ravennam misisse, ut in salubriori aëre commodius exercerentur. ANT-YLLVS apud Oribasium *Collect. Med. Lib. VI. cap. XXI.* inter alia ambulationem vel equitationem magnificat in rore, & locis avium volatu frequentatis, quoniam avium frequentia, quandam aëris salubritatem inducit, & volatu illarum aër ventilatur. Mane circa montes, a meridie ad vesperam usque, circa fontes & flumina, aër salubrior erit; tum, quod ibi aër tunc temporis purior fiat & illustrior, hic a sole inclinante & occidente illustretur & sincerior videatur; tum quod mane non admodum æstuemus, propter præcedentem humido-frigidam noctem; a meridie vero & circa vesperam, per meridianum æstum molestum, suave refrigerium ad aquas inveniamus. Hujus rei rationem ACTIVS SANNAZARIVS sequenti eleganti epigrammate complexus est.

*Sol jubet exoriens faunos dryadasque puellas
Quærere, & herbofo ducere monte choros.
Declivis vitreas suadet descendere ad undas,
Doridaque & lusus o Galatea tuos.
Causa patet: quia sublimes cum tendit in arces,
Nos quoque per saltus & juga summa rapit.
Quum vero hesperios petit imæ Tethyas amnes
Exemplo ad fontes nos vocat ipse suo.
Hinc adeo natura hominum loca mane requirit
Ardua, ceruleis vespere gaudet aquis.*

Sub diluculo tamen & crepusculo aër non solet esse salubris; hinc CARDANVS *Lib. IV. de Sanit. Tuend. Cap. II.* merito damnat consilium
medi-

medicum Pio IV. Pontifici Roman. Septuagenario & infirmo datum, ut æstate sub diluculo equitaret. Legere hic convenit illud CELSI monitum. *Cavere meridianum solem matutinum & vespertinum frigus, tumque auras fluminum atque stagnorum, minimeque nubilo cælo, soli aperienti se committere, ne modo frigus, modo calor moveat præcipientis.* Non protrahatur tamen equitatio, ut in genere saltem dicendum est, ad multam lassitudinem, sed ad instantem saltem, ac finis sunt respirationis alteratio magna & facilis, (quæ si nondum erat aucta, signum erat GALENO exercitii imperfecti, vid. *de San. T.* passim. cum primis *Lib. XI. & c. XXIII. Conf. & AEGINETA Lib. I. cap. XVI. seqq. ORIBASIVS Cap. XXIII.*) debita corporis intumescencia, calor æqualis, & color faciei floridus, sudor modicus, (nisi morbus hac ratione curandus fortius quid suadeat,) aut saltem calidi vaporis proruptio, atque tamdiu continuetur, quamdiu motus alacriter, æquabiliter edatur, quamque sequatur appetitus bonus, somnus quietus &c.

§. XXXVI. Ex equitatione forte paulo nimis calefacti, sollicite sibi a subita refrigeratione auræ, & potus frigidioris admissione & ingurgitatione cavere debent, a quibus tam facile, tamque multi morbi v. gr. epilepsia, capitis dolores, vertigines, aurium susurrus, graves inflammationes, imprimis pleuritides, peripneumoniæ, rheumatismi, viscerum obstructions, hæctica, phthisis, asthma & febres præsertim ardentes, æque malignæ, imo ipsa mors non raro repentina, sæpius exoriuntur, quia ex transpiratione inhibita, partes excrementitiæ retinentur, alias sine intermissione excernendæ. Harum enim plurimæ subtiles sunt, volatiles, salino-sulphuræ, acres atque activæ, tales vero majorem inferunt noxam, spasmos excitant, & humores ad putredinem disponunt &c. Frigida vero potio corpori calefacto affatim ingesta, quia hæc facilius in poros venarum calore dilatatos sese insinuat, coagulum inducit humoribus, & liberum sanguinis circulum inhibet. Memorabile exemplum Londini annotatum habeo militis, qui a vehementi equitatione cerevisiam potavit, & statim exanimatus est. Sudor dein bene abstergendus, indusia mutanda, in aëre temperato corpus tenendum &c. lassitudo enim magis augetur, si sudor non probe fuerit abstersus. Veteres, ut ante, ita & post ejusmodi exercitia, lenes frictiones, consulto, vel simplices, vel cum oleo inunctiones, quandoque in sole & ad ignem, ut CELSVS præcipit vid. *Lib. I. cap. II.* vel balnea quoque instituebant, tum ad spiritus prohibendos, tum lassitudinem tollendam, tum excrementa penitus secludenda &c. quam medicinæ partem apothepiam

voca-

vocabant, ut videre licet ex GALENO *Lib. III. de Sanit. Tuend. Cap. II.* Non statim ab equitatione forte fortiori, sed prius sedata in corpore, perturbatione forte facta, per horam puto, cibi capeffendi sunt; Experimur enim, cibum & potum, ab omni commotione valida corporis & animi, nocentissimos esse. Facit huc Aphorismus SANCTORII in *Med. Stat. corpora, quæ a nimio exercitio illico cibantur, læduntur, quia ut defessa & cibo gravata, minus perspirant.* Ratio est, quia ciborum succus ante debitam solutionem, corporis poros intrat, atque simul digestionis viribus, motu exhaustis & imminuto ventriculi robore, notabile detrimentum accedit. Postea requiescere paululum convenit, quo simul sensus contractæ forte lassitudinis, juxta frictionem simul lenem institutam excutitur, optimeque molestiæ reliquæ sopiuntur, secundum Aph. HIPPOCRATIS *S. II.* In omni corporis motu, quando dolere cœperit, interquiescere statim lassitudinem curat. Defatigatio enim corporis provenit ubi nervi præter modum extenduntur unde patiuntur & dolent muscoli atque spiritus animales tenuissimi rapidissime dissipati per angustissimos nervorum poros penuria exinde laborantes, non debite progrediuntur, viis nimis extensis atque laxatis vel nimis contractis. Attamen non statim forte sedendo quiescant sed paulatim prius obambulent: Huc spectat CELSI effatum *de Med. Lib. I. cap. III.* *Levat lassitudinem etiam laboris mutatio; eumque quem novum genus cujusdam laboris pressit, id quod in consuetudine est, reficit.* Cæterum ab exercitio plenior paulo, sed laudabilis victus concedendus, ut succus nutritius, tenuis & utilis iterum restituatur; attamen victus quantitas semper respondeat exercitio, ita & præsertim is iterum succulentus atque humectans, auctoque ubique instituatur potu. Sisto hic merito CELSI monitum apprime utile, quod habet *Lib. I. cap. III. §. 28.* *Omni bus fatigatis aptum est cibum sumere, coque humido uti, maximeque ea, quæ urinam movent, & vinum aqua dilutum.*

§. XXXVII. En medicinam jucundam, veram, efficacissimam, enque medicinam, Magnis Principibus, Regibus, Nobilibus Generosis ac Equestri Ordinis Hominibus maxime convenientem, atque in paucis acceptissimam, quam omnibus aliis remediis pharmacopolium redolentibus, vel ex solo auditu aut aspectu sæpius nauseam moventibus, anteferant longe. Quare qui equitationem ex Medicina proscribere vellet, detrimento hoc haud exiguo illi foret, non minus ac olim Romano Ordini Equestri, maximo dedecori ducebatur, equum adimere. Attamen etiam cum ratione, delectu, omnia in ea dirigantur & cura; Si vero

Hhh

immo-

immoderate inconsiderateque peragatur (ut vitiosa & frequentiora nimis exercitia, quondam virtutibus expoliendis & excitandis instituta, athletarum mores corruperunt, & Græcis mollitiem & servitutem attulerunt vid. PLVTARCHVS *L. de t. valed.*) dicere necessum habemus, multa incommoda neque exigua hanc ipsam quoque afferre, ac maiora forte mala, quam quæ Lacedæmonii ex imprecatione credebant, quam pro sævissima habebant & *ἰνπότεροφῆ* ab illis vocabatur, ex eo, quod magno staret impendio, & homines suavi captu ad perniciem duceret. Vid. ALEX. AB ALEXANDRO *l. c. Lib. III. fol. 165.* verendumque ne equi sui quos ad oblectamenta & emolumenta sibi comparanda conscendunt exitio sint vel ad instar equi illius Sejani mirabilis, purpurei atque formosissimi pariter & validissimi quidem sed (ut recensetur) eo nomine famosi, quod ejus possessores miserandum in modum perierint, omnes, siquidem non modo Cnæus Sejus sed & post eum Cornelius Dolabella, Cajus Cassius & Marcus Antonius maximo suo detrimento experti sunt; vel Sibaritarum voluptuosorum exemplo, qui saltantibus equis sonum tubæ audientibus cladem acceperunt. Hoc si plane negare vellemus, eandem propemodum censuram incurrere possemus, ac quondam Caligula Imperat. R. qui Incitatum suum, aut Antonius Verus, qui Volucrem suam (equos) supra modum amabant, ornabant atque honorabant, statuisque marmoreis ac aureis atque epitaphiis sumtuosis, (quale equi Caroli Capelli, Legati, Florentiæ ALDROVANDVS vid. *de Quadrup. Cap. I. p. 121.* & CHYTRAEVS vid. *Delic. p. 143.* viderunt) in Vaticano, Colle, & prope Veneris fanum memoriam eorum conservabant. Utique aliquis error subest, equo non semper (ut in proverbio ajunt) ne credite Teucris atque quod de equis vulgo dicitur; quod non tam bonus sit, qui non cespitet, calceis ferreis etiam indutus ac labatur interdum, id etiam de equitatione dicere possumus. Equidem moderata, lenis, gradaria omnibus omnino quadrat, & lædit neminem, nec ullum virium decrementum ac lassitudinem equites exinde, siue etiam per totum diem equitent, sentiunt. Nec illi minus accurate æstimant, sed ex ingenio tantum comminiscuntur perhibentes: equitationem minus commodam esse, ob angulum sessionis, quem formarent equo vecti aut ob ejusmodi posituram corporis, gravem partium pressionem fluxui sanguinis contrariam timentes. Nimia saltem & immodica nimis dura gravis, quadrupedans & præter modum succussans, & equo refractario instituta, aut in ephippio contorsio atque confusio damnum facile potest contrahere: Quippe ea fibras musculorum, ipsiusque cordis & cerebri

cerebri cum nervis exinde oriundis, nimium intendit, pectus, pulmones, viscera & omnes partes interiores & exteriores acerbius affligit, conquassat, adeoque humores plus justo concitat, sicque horum omnium tonum destruit, rumpit, effusiones humorum procreat, animales spiritus nimis movet, deprædatorios illos reddit, humiditates laudabiles corporis, per nimios sudores exinde concitatos absument, variisque aliis modis lædit. Notabile in hanc rem est SANCTORII *Aph. 19. Med. Stat. Sect. V.* Exercitium omne animi & corporis violentum, senectutem accelerare & mortem: Adeoque non mirum, si exinde, præsertim non adfueti plethorici, scorbutici, calidioris temperamenti homines, lassitudinem, virium debilitatem, capitis dolores, palpitationes cordis, oculorum affectus, ophthalmiam, visus hebetudinem, Conf. ARISTOTEL. *Sect. V. Probl. 13.* rupturas vasorum, hæmorrhagias, hæmoptysin, Conf. RAMAZZINI *l. c.* renum tabem, alvi segnitiam, febres acutas inflammationes, præsertim renum ac ani testiculorum intumescencias, mictus cruentos eosque quandoque dolorificos admodum, quandoque indolentes plane, (si nimirum a dilatatis saltem non ruptis fistulis renalibus proficiuntur) hernias, hydroiden, attritiones cutis in regione perinæi dolorosas, hæmorrhoidum pathemata, ut & ani mariscas quod MARTIALIS *L. XIV. 84.* ita expressit:

*Stragula succincti venator sume veredi;
Nam solet a nudo surgere ficus equo.*

ulcera, fistulas varices in cruribus & malum ischiadicum, (quod ideo HIPPOCRATES *Lib. de A. A. & Loc.* Tartaris familiare dixit, quoniam frequentissime equitatione uterentur,) &c. sibi contrahant. SCHENCKIUS *Lib. IV. Observ. 5.* refert, quendam, equitatione vehementi alterutrum testiculorum in ephippio contorquendo adeo pressisse, ut inter abdominis musculos ad inguen retro cederet, qui nullo modo deinceps reduci iterum potuit. Similem casum, addit FABRICIUS HILDANUS *Cent. V. Obs. 55.* & WEDELIVS in *Ephemerid. Nat. Curios. A. II. Obs. CCXXXV.* IDO WOLFFIUS *Observ. Chirurg. Med. l. I. observ. 50. p. 167.* in Generoso quodam viro compressionem scroti & testiculi sinistri, cum dolore & intumescencia ingenti, ex fortiori equitatione observavit. Memini jam in Academia nostra Lipsiensi, quondam, juvenem Nobilem, Silesium, in hippodromo ex equitatione succussoria & in gyrum acta, valida, sputum sanguinis expertum esse, cum subsequente pulmonum ulcere. Pariter Capitaneum Saxonicum cognovi, qui longiori itinere

per Saxoniam, Silefiam, Poloniam in Moscoviam usque facto, cum verdariis cursim equis vectus, fistulam ani molestissimam ac incurabilem sibi induxit. Facile quoque largiamur HIPPOCRATI *L. de A. A. & L. c. XI.* & WIERO, vid. *Observ. Med. p. 84.* immoderatam, continuam, nimis violentam, parere hippurim; ideo ab ipso Hippocrate vocatum morbum, ex nimia scilicet & minus convenienti equitatione contractum, five femorum pedumve & artuum reliquorum ex defluxionibus atque tumoribus diuturnos labores. Quinimo observatur & id, veteranis equitibus tandem genua incurvata manere, & totum corpus rigidum, & articulorum siccitatem inductam, (ut futores genua habent inflexa, atque sartores cubitos incurvatos fabriferrarii pedes oedematosos, cursores crura in curva &c.) Tametsi & observare datum est, equites veteranos æque ac pugiles, nimis frequenter pedibus laborare præ saltatoribus. Non quoque plane habeo ambiguum, neque inficiari possum, quod supra jam quasi digito monstravi, equitationem nimiam, duram nimis & succussoriam, esse e causis remotioribus, virilem potentiam impediens, qua nimirum muscoli virilis membri comprimi, cogi, contundi, atque sic erectioni inepti reddi possunt, quale v. gr. exemplum IAC. FONTANVS *Cons. 2. de Nobili* quodam habet, in quo hi muscoli sic erant depravati, quales alias ex casu ab alto, aut percussione alia harum partium violentiori, aut modo ossis sacri ac dorsi gravi contusione accidere assolent, cujusque rei exemplum invenies apud HILDANVM *Cent. 6. Observat. 59.* notatum. COBERVS in *Observ. Med. Castr. D. II. p. 7.* observatum reliquit, equitantes continuo iliacis passionibus magis obnoxios esse quam pedites: An a violento & continuato motu, an a potu insalubri non adsueto, aut aliis causis hoc deducendum sit, longius non disquiram, contrarium ipse innuere quoque videtur. inferens, *l. c. Observ. 8.* in scholiis: Turcas, qui tamen æque fere semper equis vehuntur, nullis vero intestinorum torsionibus, vel etiam profluviiis obnoxios esse. Hoc saltem adhuc, cum compertum sit aperte lubensque concedam, veteranos equites, ut plurimum esse stypticos. Aliud & quod mores quidem spectat Plato Atheniensis respexit, quando equo vehi noluit, dicens, se vereri ne fastu atque superbia ex incessu superbo phaleris præsertim accenso colligenda & ferocitate equina caperetur nam quiddam equitare habet magnificum parumque Philosopho dignum LAERTIVS *Lib. III.*

§. XXXVIII. Diffiteri quoque nemo potest, equitationem omnibus morbis, ut ephippium omnibus equis (ut est in proverbio) vix quadrare:

drare: v. gr. vertiginosi, & quibus debile caput est, non ferunt equitationem paulo incitatiores, minime vero si equus in gyrum agitur, vel si succussor fuerit. Facile quoque majorem noxam suo jumento sibi arcessere per paulo violentam & duram equitationem possent graviter forte vulnerati, aneurisma passi ac herniosi, (nisi hi subligaculo bene sint muniti, & ephippio lato & molli instructi, stapedibus non longius productis). Ab equinis pariter (ut ajunt) pedibus tutius Casti Hippolyti, Thesei Atheniensis Regis nati memores (quem ferunt OVID. *Lib. XV. Metamorph.* ab equis esse dilaniatum ab Aesculapio medicinæ inventore vero resuscitatum & confarcitum) procul secedant gonorrhoea affecti, & qui inflammationibus viscerum & imprimis renum, intestinorum, erysipelate crura & pedes occupante tentantur. Sic & inutiliter equitationem adhibebis in ascite maxime inveterata, & ubi vasa lymphatica sunt lacerata, licet etiam in alia ejus specie, fructuosissimum hoc remedium genus sit deprehensum. Sed receptui cano atque ab equitatione jam calamum avoco, hisque cursum sisto. Deo vero Ter-Optimo Maximo sit honor & gloria semper.

IX.

DISSERTATIO
PHYSICO-MEDICA
DE
FRICTIONE,

PROOEMIUM.

Scitissimum stabilitumque ac rationi admodum consentaneum illud Physicorum axioma est, sine motu nihil fieri. Adeo certe amplissimus varius mirandus motus nobilissimæ illius corporum naturalium affectionis effectus ac usus atque universalissimus, ut mediante atque operante illo universa omnino omnium rerum, quæ in hoc universo reperiuntur, existentia atque earum alterationes, spectabilis pulchritudo

chritudo atque ornatus conservatio & destructio producantur, id est, omnes omnium corporum sive simplicium sive compositorum, viventium pariter ac non viventium, animalium, vegetabilium, mineralium actiones, operationes, passionis, mutationes, generationes, nutritiones, augmentationes, absumptiones, consumptiones, divisiones, compositiones, mixtiones, multiplicationes, translationes, dissolutiones, corruptiones &c. motu perficiuntur. Quo sublato & impedito infinitus torpor res occupat omnes & in horrendis æternis tenebris atque nihilo sepultæ manent. Quam ob rem, cum tanta sit vis motus, merito Philosophi sagaciores duo rerum principia statuerunt, motum scilicet & materiam. Motum igitur ejusque leges qui ignorat, universam rerum naturam ignorat. Et licet sensibilis non æque semper deprehendatur motus in rerum mutationibus atque compositionibus; revera tamen inest, uti ubique in Physica specialiori & experimentalis docetur, atque adferitur, nullum absolute corpus in rerum natura quiescere, sed in minimis moveri: ita omnia sunt, quæ aliquo modo sentimus in perpetuo motu, augmento & decremento. Hinc ob usum motus, adeo infinitum non dubitaverunt nonnulli eundem pro principio omnium corporum naturalium agnoscere. Ast facili negotio refellitur horum opinio, si quis solummodo perpendat, motum ipsum per se non dari sed demum in subiecto existere & per se nihil aliud esse, quam modum & accidens corporis, quod per se substantiam procreare & mutare, variare, determinare minime potens est. Si vero est merum accidens quod a corpore adesse vel abesse potest & modus sicut alii formarum constitutivi, ut quantitas, figura, quies & situs præsupponit per consequens motus aliud principium movens. Sicque motus est tantum medium, per quod corpora generantur. Quantum etiam stas atque intempestiva quies rebus naturalibus nociva, tantum motio illis proficua. Unde belle OVIDIUS ait:

Cernis, ut ignavum corrumpant otia corpus :

Ut vitium capiant, ni moveantur, aquæ,

Omnium itaque in nostra etiam medicina, nobilissima arte institutus plusque minusve interdum auctus humanum corpus exercens, inter sex res n. n. non infimum ille obtinet locum: quippe eximium & nunquam satis laudandum atque adeo necessarium usum non solummodo ad vitam inchoandam & continuandam, ac sanitatem conservandam, sed & amissam restituendam præstat; imo sine quo medicamenta fere omnia
nunquam

nunquam effectum optatum edunt. Imprimis excitatus paulo longius atque productus opem suam confert, quando situ & quiete peccantia promovenda atque eliminanda, torpida excitanda, influxus conciliandus, partesque ad illum admittendum, aptæ reddendæ sunt. Quæ eximia emolumenta optime & frictio, simplex licet, tamen nobilissimum motionis ac exercitationis genus, operatur, cujus ideo, uti in communi vita mechanicis artibus & physica, chymia &c. ita & medicina est amplissimus usus amplissimaque utilitas. Hinc & a veteribus semper magno in pretio habita, crebroque usu adhibita est. Ab Anglis præsertim, uti apud eos cognovi, hodie in usum fere quotidianum adhuc trahitur, quibus & maxime probatur. Idcirco non injucundum neque abs re fore duxi, materiam hanc utilissimam hac occasione pertractare, illamque paulo diligentius commendare. DEVS vero T. O. M. dirigat hoc meum institutum, ut in multorum cedat commodum.

§. I. **A**gemus de frictione, sub cujus nomine intelligitur actio sive motio alterna quasi pressione & relaxatione partium corporis facta, plus minusque fortior, quæ operatione manuum, digitis solummodo, vel linteaminibus calidis, vel panno similique paulo asperiori instrumento, adjectisque oleosis, aqueis, falsis, aliisque liquoribus & decoctis, vel sine illis, extrinsecus in cute sursum deorsumque trahendo & terendo perficitur, ad humores sanguinem spiritus animales excitandos, alliciendos, fluxiliores reddendos, ad fibrarum sensibilitatem conciliandam, poros aperiendos, laxandos, transpirationem insensibilem præsertim promovendam, ut noxii & superflui humores evacuentur, aliaque commodam ad sanitatem conservandam, quam amissam restituendam efficiantur.

§. II. In hac descriptione frictio primo dicitur motus plus minusve fortior, interdum enim superficialia saltem, quæ ad titillationem quandam accedit, sufficit, & successiva cutis pressio, ut plurimum autem modulatione, inductione unguium vel manuum sursum & deorsum in corporis peripheria ac rasione, tractione, linteis calidis interdum pannisque asperioribus ex pilis confectis, pectine, scopulis & excutiis fetaceis &c. peragitur. Interdum ad moderandam eam, vel ad majorem efficaciam obtinendam & penetrationem, pro vario scopo adhibentur salia, sal commune, saliva, fermentum pistorium, semina contusa, aut manducata v. gr. sinapi semen, amygdalæ amaræ &c. sacculi impleti herbis, floribus, feminibus &c. Vel oleis & aquis destillatis, decoctis, aceto, succis

fuccis herbarum expressis, ex urticis &c. alioque liquore appropriato, manus, chirothecæ, lintheamina imbuuntur, & per tractiones iteratas in cutis superficie fursum & deorsum trahuntur, in sanis pariter morbo-
 sisque subjectis, tam ad præservationem quam curationem. Diversis
 quidem & omnibus propemodum temporibus institui possunt, omnium
 tamen optime fortiores & multæ tempore matutino & jejuno stomacho
 adhibentur. Pro rei exigentia etiam sæpius & in dieter & quater repe-
 ti possunt. Atque consultius super fluiditatibus excretis v. gr. a sangui-
 nis venæ sectione aut scarificatione, in plethoricis in usum ducuntur.
 Sic SOLENANDER in *Consil. med. Sect. II. p. 161.* tutiores eas exoneratis
 prius alvo, vesicaque urinaria censet, quod de fortioribus sine dubio,
 nec sic ita male etiam intelligit, præsertim si frictiones supra caput faci-
 endæ. Hoc commodum jam olim Græci observabant, qui frictiones
 in Gymnasiis, non nisi in lotio coctionis signis apparentibus alvoque a
 foecibus liberata instituebant. RANZOVIVS de *conservanda valetud. p.*
40. quibusdam summopere sub noctem ad focum singulis diebus pera-
 ctam contulisse dicit. Anni tempora, vernale, autumnale ac præsertim
 hyemale, frictionibus instituendis magis convenientia sunt. Præ omnibus
 vero reliquis, vernali tempore diligentissime, libera perspiratio per cor-
 poris habitum procuranda. Conveniunt quoque frictiones omnis æta-
 tis, temperamenti, sexus & conditionis hominibus, si modum respici-
 as. v. gr. In infantibus, pueris, decrepitis molles sint, duriores, fortio-
 res, auctioresque in foeminis utpote humidioribus, viris, in quibus lan-
 guidior quoque transpiratio est, & quæ ab impedita ea celerius & acer-
 bius affliguntur, in iis, qui alias exercitationibus & motionibus corpo-
 ris destituuntur, qui vitam sedentariam studiis & profundis meditatio-
 nibus occupatam agunt, apprime utiles erunt. Senes speciatim non
 spernendum sanitatis præsidium exinde expectare possunt, quoniam in
 iis secretiones & excretiones omnes, præsertim transpiratio, languent.
 CATO hoc optime innuit sequentibus verbis: *Resistendum senectuti est,*
ejusque vitia diligentia compensanda sunt, pugnandum tanquam contra mor-
bum, sic contra senectutem habenda ratio valetudinis, utendum exercitationibus
modicis tantum cibi & potionis adhibendum, ut reficiantur vires, non oppriman-
tur. Gallicanæ olim mulieres referente MAGNINO *Lib. de Reg. Sanit.*
P. II. Cap. III. fol. 4. & 5. consueverunt, recens natos ante omnia supra
 nudas paleas ponere, iisdemque eos temperate, nec non farina ac cute
 porcina modice aspera fricare, quo malæ superfluidates ab eorum cor-
 poribus resolvi ajebant. Nec vero corpori solum subveniendum est,
 sed

sed menti atque animo multo magis; nam hæc quoque, nisi tanquam lumini oleum instilles, extinguatur senectute. Sicuti & imbecilles & valetudinarii & ex morbis convalescentes ideo iisdem opus habent. Neque ulli temperamento adversantur frictiones, si in iis iterum sit modus, atque hoc observatum, si nimirum mitiores sint & non adeo frequentes, sic & cholericis & sanguineis bene quadrabunt. Necessariæ autem magis sunt phlegmaticis, cutis obstructioni & serosorum humorum infarctui valde obnoxio ac melancholico visciditate humorum, stupore lentoreque spirituum animalium prædito. Qui & frequenter cibis & potibus utuntur minus transpirabilibus viscidis, acidis, duris, carnibus, leguminibus, lacticiis, multis fructibus, horæis, cerevisiis crassioribus, oleosis, dulcibus, frictiones frequentes adhibeant, quæ horum vitium corrigunt. Inter ipsas frictiones gelidus & extreme calidus aer vitetur. In loco tamen calido potius instituantur, utpote a cujus atmosphæra humores fluxiles magis evadunt & præparantur quasi. Secundum veterum sententiam, qui circa frictiones debite peragendas admodum solliciti erant, de quorum methodo pluribus ORIBASIVS agit *Collect. med. Lib. VI. p. 87.* Corporis extrema ut a centro caloris & motus longe remota, ut primum brachia & pedes, dein humeri pectus & dorsum, tertio coxendices & ubique secundum musculorum ductum fricentur atque inter fricandum anhelitus cohibeatur, ut etiam spiritalia tendantur. Illæ enim corporis partes, quæ debilius transpirant ut extremæ, & venter, facies, nucha fortius frequentiusque sunt fricandæ. Addimus pro rei exigentia, volas manuum, plantas pedum, carpos & temporum regionem. Cæterum sint in principio blandæ, dein magis violentæ. Motio hæc terendo sursum deorsumque & si ab extremis imprimis vasis basin versus fiant, qui & optimus modus, nervos, arterias, venas, vasa lymphatica, glandulas, partes musculosas commovendo ita quasi redituque humores, sanguinem & spiritus majori in copia majorique vi allicit, dum fibræ nerveæ per omnes partes excurrentes sollicitantur, eoque spiritus invitantur, ut tubulos atque fibras illarumque folliculos ovales ex quibus constant inflent atque abbrevient. Motis sic fibris tam nerveis, quam carneis, strictura illa non modo vasa ad constrictionem & per hanc ad sanguinis progressum motum expeditiorem animantur, sed & ipso hoc motu attritivo, particulae expanduntur æque crassiores, viscidæ attenuantur, quo pacto & motus intestinalis, qui ab illo aliquatenus pendet, augetur, fluiditas & spiritus ascensio promovetur, pori, viæque excretoriæ humiditate irrorantur, ampliores fiunt & spatiosæ,

per quas humores aliquo modo stagnantes, situque peccantes, noxii, & hinc inde hærentes, mucosi, gelatinosi præsertim & excrementa inter interstitia fibrarum & muscutorum suscitata & rarefacta in motum deducuntur, & vel ad vasa iterum reducuntur, vel per insensibilem transpirationem educuntur; laudabiles vero magis adducuntur. Et quia cum illis quoque pars alimentosa simul validius advehitur, & per relaxationem pororum via expeditior facta est, eo facilius assimilatur partibus, quæ subinde magis magisque dein impingitur illicque firmatur motu illo subsequente, quod claro & quotidie obvio exemplo videmus, in equis aliisque animalibus, quæ sæpius pectendo & strigilando pleniora, obfiora & nitidiora atque alacriora redduntur, imo delassata & debilitata reficiuntur. Equidem non omnes fidem HELMONTIO in eo adhibent *lib. de septupl. digest. aliment. human. p. 28.* asserenti, asinam lactantem instar equorum esse strigili mundandam, & ex lactis gustu dignosci posse, an asina pexa fuerit isto mane, an non. Hinc pars bene fricata florido rubore rubet, & ad tumorem perducitur, atque calorem plus minus acutum imo dolorem tandem sentit, a motu aucto sanguinis & reliquorum humorum tam intestino quam circulatorio, quo per partem rubram sic factam sanguis in plurima minora vasa in quibus naturaliter antea non hærebat, pellitur. Calorem enim nihil aliud esse quam celerimum motum particularum singularum in corporibus mixtis, salino-sulphurearum ex Physicis patet, & nihil in se frigidum vel calidum esse, sed per accidens per agitationem varie modificatum id demum fieri. Quibus itaque invicem motis organa tactus blande afficiuntur, & gratissimus sensus producitur, a quali motu omnia animalia, vegetabilia & mineralia suum calorem suamque vitam habent. Si diutius ac fortius frictio protrahitur, tandem vesiculis quasi cuticula attollitur. Singulare est, quod in BARTHOLINI *Actis Hassniensibus Vol. I. obs. 102.* legitur, in quodam, ex frictione vel leni, continuos semper ructus subsequentos esse.

§. III. Frictioni huic aliquo modo cum aliis intercedit cognatio ut cucurbitulis ficcis, rubificantibus, sinapismis, picationibus, dropacibus, urticationibus, vesicatoriis &c. quæ non nisi frictiones fortissimæ species sunt. Imo huc trahenda aquæ calidæ perfusio, quæ ab HIPPOCRATE *de intern. Affect.* & GALENO *Meth. Med. Lib. XIV. cap. XVI.* allegatur, quæ partem ad ruborem disponebant, ut eidem *εὐσαρκωσιν* conciliarent. Trahenda huc pariter vellicatio pilorum, cujus apud veteres quoque mentio facta, quæ fit, si quis illos apprehendat, & manu aliquoties

quoties eleuet, donec cutis attollatur. Huc accedit & palpitatio, qua manu fortiter totum corpus successive palpatur. Quondam cognovi foeminam, quæ hanc palpitationem magni faciebat, adeo, ut dicere sole-
ret: *Sie klopste alle ihre Krankheiten weg.* Simili fere ratione se res habet cum ligaturis dolorificis, quippe quæ humores quidem primum, dolore excitato irritant, sed ob firmam & diuturnam strictionem, in certa aliqua parte, retinent. Pectinatio porro quæ in capite fit, ut & tractatio scopulis fetaceis & quæ veteribus solennis erat, percussio partium gracilium non modo strigilibus, quas HIER. MERCVRIALIS describit *de Arte Gymn. Lib. I. cap. VIII.* sed & ferulis parvis levibusque & modice illitis, donec illa ruberent & attollerentur, quod *ἐπιμεσση* nominabant, vid. GALEN. *M. M. Cap. XVI.* Hæc & instrumentis & effectui majori vel minori & eductorum quantitate &c. a se invicem discernuntur. Commemorare quoque hic, sed minime suadere licet, Japonensium illam consuetudinem, quando Primates, si appetitu imminuto aut ex alio certo morbo laborant, a servis suis, iteratis vicibus, calcantur, atque illam in tota India orientali communem, qua prono corpore se in terram projiciunt heri, quos servi in tergo gubus manibusque fortissime fricant atque habetur, resolvi exinde sanguinem & a putredine præservari, vid. MANDELSLOH *Itiner. Orient. p. 89.*

§. IV. Hæc & aliæ frictionum differentię ab autoribus notantur, quarum præsentī negotio sequentes saltem adhuc nominemus. Nimirum aliæ siccæ sunt, quæ manibus solis vel instrumentis adhibitis, administrantur; aliæ humidæ, quæ oleo aliove liquore appropriato manibus aut linteaminibus madefactis fiunt, aliæ molles, quæ molli instrumento, molli panno serico, aut lineo inducuntur; quæ vero duriori & asperiori celebrantur, duræ audiunt, quæ fibris solidis tensionem magnam, magnumque humorem sanguinis & spirituum affluxum concitant. Inter illas sunt quoque mediæ multæ, paucæ & mediocres, a quibus quoque hinc fluunt, quarum quasdam GALENVS *Lib. II. de sanit. tuenda* nominat ac varias earum operationes innuit. *Frictionis varii effectus sunt, rara densat & mollia durat, dura mollit & tensa laxat.* Et *L. III. l. c. Frictio mollis, quæ tensa sunt, remittit, & quæ inter vehementius laborandum fatigata sunt, emollit.* Et HIPPOCR. *Lib. II. de Medici Offic. Frictio potest solvere, ligare, carne implere, minuere; dura ligare, mollis solvere, multa minuere, mediocris crassescere &c.* Notas addit *l. c. Rubor & tumor cum in carne apparuerint, sunt mediæ frictionis notæ, uti multæ detumescencia carnis. Frictio enim primum quidem attollit, postea tamen contrahit, ac contractam ex ipsa*

auctiorem molem deponit. Vid. & FOREST. *Observ. T. I. S. I. p. 7.* GALENVS *l. c.* quinque alias differentias adjecit & rectam, transversam, circularem obliquam, subrectam, subtransversam frictionem describit.

§. V. Ut vero frictionis ætiologiam, & quid inde in corpore humano eveniat quæque eam moderantur, distinctius cognoscamus, partium, in quas operatur, structuram & habitudinem naturalem inspicere conveniet. Tegmen illud commune totius corporis extimum, retis ad instar tendinosi illud investiens, cutem scilicet omnium immediate magis frictiones afficiunt. Exterior ejus lamella cuticula s. epidermis vocatur, translucida ac sensus experte & est quasi cutis veræ subjacentis operimentum quodque eam a tactu dolorifico paululum defendit. Si enim ab illa separatur, cutis cruenta deprehenditur. Licet cute tenuior sit, & in æthiopibus tenuissima eaque candidissima (adeoque ater color in cute crassa inveniendus per hanc transparet) nihilominus tamen iterum sicuti cutis pelliculis diversis, quæ & squamulæ communiter vocantur, distincta est, quæ ex observationibus Læwenhœckii pentagonam referunt figuram. Præter pelliculas istas diversas & suos quoque porulos, poris subjæctæ cutis accuratissime quoad situm respondentes possidet ad communem usum evaporationem scilicet vaporum, i. e. expirationi sensibili & insensibili transitum concedendum. Nec desunt illi vasa, quæ Schwammerdam detexit, qui ope siphonis in vasa sanguifera cuticulæ fœtus, liquorem aliquem coloratum injecit: Cutis veræ præterea vasa omnis generis, ad illam appellant. In convalescentibus ex morbis maxime diuturnis, ex febribus aliisque squamulæ hæ exteriores secedunt, ex quo deinceps facile iterum restaurantur, uti Felix Platerus, & de podagricis Salmuth testatur. Duplex illa visa est (quod rarum) a Fabr. ab Aquapendente. Si aqua fervens ei superfunditur, aut phoenigmi &c. applicantur, facile a cute vera separatur.

§. VI. Huic dein substrata est vera cutis, quæ pariter tunica est in duas lamellas juxta Lindanum & van Horne divisibilis, sextuplo fere cuticula crassior, quod tamen indifferenter de qualibet ejus parte intelligi nequit; siquidem in capite & collo crassissima est, tenuior in manus vola, tenuissima vero in labiis. In subjæctis junioribus fœminisque, ut & in calida regione versantibus tenuior & porosior est, quam in adultioribus & viris, & ubi frigidus ær corpora ambit. Cum reti admirabili comparatur ob mirificam ejus texturam ex variis & diversi generis fibris in se invicem contextis. Nam si cultro anatomico subjicitur cutis, primo in illa deprehendimus fibras tendinosas a tendinibus partium subjæctarum

jectarum oriundas secundum Stenonem, & nervosas, quæ filorum instar varie inter se artificiosissime contextorum, pannum veluti densum constituunt adeo intricatum, ut nulla arte explicari queant. Præter jam commemoratos intertextos nervos, alia vasa omnis generis continet, lymphatica scilicet, arteriosa quanquam exigua & capillaria, quæ sanguinem adducunt, & cum illo succum nutritium, pro cutis nutritione atque augmentatione, itidem venas, per quas secundum circulationis legem reliquus sanguis iterum reducitur. Vasa hæc potissimum a jugularibus, brachialibus, mammariis, intercostalibus, lumbaribus, epigastricis & cruralibus enata sunt. Vid. VERHEYEN *Anat. p. 47.* Spatiola intermedia sub poris replent copiosæ glandulæ exiguæ admodum a forma sic dictæ miliares, ex conglomeratarum familia, a STENONE primum descriptæ in sua *Adenographia*, & OLAO BORRICHIO, uti colligere est ex *epistolis ad Bartholinum datis*, quæ habentur in *Act. Hass. Vol. I. Cent. III. N. 65. & 97.* quæ ex sanguine per arteriolas adducto laticem particulis salino oleosis superfluis aliisque imprægnatum secernunt, perque sua peculiaria vasa excretoria excernunt, quæ hinc inde extraversus spectant, vid. STENO *Myol. Specim. Geomet. MALPIGHIUS Tr. de Externo Tactus Organo p. 32. & 39.* BARTHOLINUS *Cent. III. Epistol. 65.* PECHLINUS de Purgantibus, quæ vasa poris cutis apte respondent. Vid. *Bibl. Anat. P. I. p. 13.* Glandulæ hæc interiori tunicæ intertextæ sunt, vid. WILLIS. *Pharmac. Rat. Vol. II. S. 3. Cap. V. p. 461.* In sanis ob exilitatem vix conspiciuntur, in illis tamen, qui hydrope, anasarca laborant, sub axillis atque in inguine quandoque deprehenduntur. Lindanus ultimam s. carneam nuncupat.

§. VII. Vasa excretoria glandularum sub squamulis cuticulæ oblique patentia, excipiunt pori, tanquam ostiola vasorum excretoriorum, undique per totam cutis substantiam consiti, iique adeo minimi & copiosi, ut secundum computum Loewenhœckii in spatiolo quod arenæ granum contegit, 250 retiformes squamulas cuticulæ, squamula vero hæc 500 canaliculos excretorios cutis contegat. Hos aliqui Anatomicorum per microscopium conspectos duplicis generis esse affirmant, majores scilicet e quibus plerisque pili, (qui excretioni non parum conducunt, poros cutis apertos servando, sicuti circumcirca baculum terræ infixum siccior fit) emergunt, atque per intervalla ex utroque latere cujusque rugæ cutaneæ ordine parallelo disponuntur; & minores, qui præcedentibus numero longe superiores omnia spatia iisdem interjecta creberrimis punctis perforant; illi vero tertii nimirum generis non

nisi in aqua macerata digitis comprimantur. Horum singulorum alios esse destinatos emissioni humoris superflui, alios admissioni hujus vel illius rei, apparet secundum RYVSCHIVM in *Thesaur. Anat.* I. p. 29. Vid. VERHEYEN *Anat.* p. 49. Est tamen & texturæ pororum diversitas, quorum alii laxiores facilem humoribus vaporibusve transitum concedunt, alii strictiores, qui eundem refrenant. In introitu illorum singulorum pelliculæ quædam sive valvulæ sunt positæ interiora spectantes, observante accuratissimo MALPIGHIO in *Tr. de Tactus Organo*, quæ exitum quidem, sed ingressum fluidorum non admittunt. Et licet ab humidis laxari, quin & particulæ aliquæ humidæ penetrare possint, aërem tamen minime admittunt, quod experimento illo palam fit, quo aqua per poros vesicæ animalis cujusdam, salibus repletæ, penetrans salia in deliquium resolvit, aër tamen, etiamsi humidissimus fuerit, nullatenus penetrare potest. Per hæc cutis spiracula transpiratio humorum subtilium peragitur, cujus notabilis copia, quæ, quando rite procedit, omnes alias corporis excretiones superet longissime, necessitas & usus videntus est apud *Sanctorium* ex ejus per 30. annos comprobata experientia, in *Medic. stat.* Alimenta enim ut plurimum quotidie non tam propter necessitatem, quam hominum vagum appetitum assumuntur, a quo sæpius invitantur, ut nullam rationem nullumque delectum illorum habeant, tam quod quantitatem quam qualitatem concernit, non ut vitam sanitatemque conservent, sed ut palato blandiantur. Proinde non potest non evenire, quin vel superflua vel plane incongrua ad massam sanguineam perveniant, in ventriculo intestinisque prius elaborata & a fæcibus secreta. Quapropter opus est, ut quotidie iterum hæc superflua atque incongrua evacuentur, quod & per alias vias continuo fieri assollet; sique hæc spiracula non adessent, corpus sub æstu exorto ab elastica aëris fluidorumque, humorum, vi, crepatura periret. Sic corpus nostrum in continuo est fluxu atque affluxu. Materiam itaque transpirationis suggerit, ut ex Physiologia satis cognitum satisque perspectum est, sanguis per arterias ad omnes partes corporis apportari solitus, ubi per glandulas miliares subcutaneas serosa ejus portio eaque admodum subtilis velocioreque motu agitata, separatur, quando sanguis intestino & circulari motu per vasa cutanea propellitur, ubi necessario partes subtiliores exuberantes per tubulos ibidem patentes exhalant. Quo vero innuimus extra quoque ejusmodi glandulas, hoc naturæ opus perfici atque simul interstitia fibrarum carnearum & membranarum illi operi velificari, ut v. gr. clarissime patet, serum per pulmonum vesicularem substan-

substantiam fluores secerni, citra glandulas, sola pressiois ope. Copiosior vero separatio illarum particularum serosarum accidit a motu paulo fortiori tam intestino quam circulari instituto, ab aëre calido alioque calore intensiore ambiente, aut a motu & exercitio corporis, vel ob poros nimis laxos a denegato aliquantum spirituum animalium influxu &c. Etenim motum sanguinis & calorem inde inductum, tanquam causam efficientem transpirationis, aër inspiratus & partibus fluidis permixtus adjuvat, uti PECHLIN. *de Alim. & Aëris defectu* p. 114. annotavit, respirationem & transpirationem certam habere inter se proportionem, nempe animalia calidiora, ut respirationem habent vehementiorem sic & transpirationem copiosiore. Quemadmodum aër inspiratus interne operatur, ita non absolum esse videtur, quod & externe itidem opituletur: quippe corporibus suis fluidis secum raptis permixtus, in cutis peripheria proruit, & transpirandæ materiæ motum ad extra faciliat. Vid. B. ETTM. *T. I. p. 129.* Concurrunt imprimis fibræ nervæ cutis, quarum blanda strictura tam ex glandulis, quam vasis suis excretoriis, per poros materiam successe expellit, contentam. E contrario transpiratio imminuitur, si motus sanguinis non robustus satis, vel si velocior iusto est, quod non spatium temporis, ut a glandulis secerni possit, concedatur, sicuti id in febribus ardentibus quandoque accidit; si serum secernendum viscidius existit, vel si cum sanguine firmitus coheret; si glandularum vitium & pororum angustia & constipatio adest, siue illa a nativitate, siue a causa adventitia ut ab aëre frigidiori vel ab alia causa spasmodice contrahente provenit, exinde rigiditas fibrarum & constrictio pororum inducitur.

§. VIII. Dari vero continuam talem, durante vita per corporis habitum evacuationem, edocent alterationes vestimentorum quotidianæ, admotio manuum corporibus politis, animalia hyberno tempore fuman-
tia, & SANCTORII supra laudati *observationes instituta & descripta* & ante eum NICOL. CUSANI, Cardinalis in *Dialogo de Stat. Exper. Conf. & ejus vita descr.* in FREHER. *Theatr. Vir. Erud. Clar. P. 1. Sect. II. p. 19.* Cum particulis his aqueis interdum & plurimæ partes oleosæ & chylosæ laudabiles, excernuntur, præprimis in subjectis vulgo sic dictis calidioribus, i. e. in quibus motus impetuosiores & pori ad transmittendum congrui & aperti & spaciosiores sunt, ubi sine notabili incommodo, abeunt; cum magno vero detrimento præsertim, in hecticis excernuntur. Salinarum insuper particularum præsentiam sapor & pruritus evincit. Ad oculum vero demonstravit, dari salia in sudore, TACHENIUS in
Hippocr.

Hippocr. Chym. p. 77. experimento, quo ex sudore sal volatile destillavit. Imo interdum nudis oculis in subjectis præsertim scorbuticis & podagricis conspicienda occurrunt, quippe quorum cutis sæpius arenosa quasi deprehenditur, uti observationes Autorum passim testantur. Imo me ipsum ejusmodi subjectum in nosocomio Amstelodamensi ibi locorum versatum vidisse recordor, per cujus poros arenæ granorum rubræ instar sudore protrudebantur, ut radula abradi potuerint. In Helvetiæ pariter Metropoli virum quendam scorbuticum cognovi, qui intolerabili pene pruritu vexabatur, unde semper indusia ex linteo asperiori induebat, ut mediantibus illis se scalpere posset. Vid. & BARTHOL. *Cent. I. hist. 34.* Quia & omnis succus corporis humani spiritibus animalibus ex parte turgidus est, illos simul in auras abire multis modis evincitur. Vid. BAC. DE VERVLAM. *Op. in H. V. & M. p. 566. & seqq.* Primarius usus transpirationis est, ut expurgentur ex massâ sanguinea partes excrementitiæ, tenuiores, serosæ, oleosæ & salinæ aliæque; secus si retinentur, plurimi morbi exinde oriuntur, uti Autores & quotidiana experientia passim testantur. Secundarius vero transpirationis usus esse potest, ut massæ sanguineæ motus acceleretur, sanguis spissus attenuetur & resolvatur, ne fiat ejus stagnatio, sed promoveatur potius ejusdem ventilatio, uti docet B. ETTMÜLL. *T. II. p. 767.* Nec a rei veritate aliena Malpighii speculatio esse videtur, transpirationi adhuc alium usum adscribentis, ut humectentur nimirum papillæ nerveæ, ne ex assiduo illarum usu exarescant, neque illi harum partium conformatio & locatio repugnat.

§. IX. Tandem papillæ illæ nerveæ commemorandæ veniunt, quæ nihil aliud quam extremitates nervorum eo decurrentium sunt, quæ miris flexibus inter se laminam istam prius perreptant, dein extremis ramulis in ejusmodi apices vel turbines pyramidales, per utriusque laminæ poros eminentes, desinunt, & hæ sunt verum & adæquatum tactus organon: Hæ enim pro varia sua figura ac motu sensum imprimunt intus hærentibus spiritibus animalibus, hincque copiosiores in extremitatibus digitorum, quam in aliis partibus, interdum & sub alis, in hypochondriis & labiis, vid. B. LANGLI *Op. P. I. p. 168.* reperiuntur. Illarum inventor pariter MALPIGHIVS fuit, qui fusius istas describit in *Exercit. epistol.* In brutorum naribus multæ & conspectiores sunt. Papillæ hæ moventur a quibuscunque corporibus, quæ apta sunt & tali modo figurata, non adeo subtilia & sic etiam mota, ut papillulas istas attingere & motum illis imprimere, non vero eas pertransire possint. Sic æther &

& atomi, quamvis etiam corpuscula sint, tamen ob subtilitatem, qua gaudent, & tenuitatem particularum suarum papillas istas non movere possunt, sed superficietenus prætereunt, nullumque sensum atque perceptionem relinquunt. Pro diversitate illorum corporum, quæ ita comparata sunt, ut motum imprimere possint, secundum varias modificationes superficierum, varie quoque percelluntur & moventur papillæ, unde variæ nascuntur tactus species, prout objecta dura ac mollia, solida ac fluida, humida & sicca, aspera & lævia, calida & frigida, pinguis & viscida, friabilia &c. sunt; indeque evenit, quod alius tactus gratus, alius ingratus, qui dolor alias vocatur, sentiatur. Iste a concretis tenerioribus, mollioribus, lævioribus, blande attingentibus & moventibus; hic vero ab acutis, asperis, inæqualibus, radentibus, scindentibus & plus minus fortius irritantibus excitatur. Ille lævem & æqualem, perque illum delectationem, hic inæqualem, rodentem, lacerantem, tristem sensationem communicat. Usus hujus sensus toto corpore æqualiter fusi, ut omnes ictus, omnesque nimios & frigoris & caloris &c. appulsus sentire possimus, nobilissimus amplissimusque est, ut sine illo animal ne quidem animal foret, & si vera fateri fas est, unus solummodo sensus tactus sc. qui reliquos sub se, tanquam species comprehendit. Gustus & olfactus a motu extremitatibus nerveis in tunica organorum nervea impresso; auditus & visus simili ratione a motu in organis suis per sonum & objecta lucida excitato, ac mediantibus spiritibus animalibus actuato, percepto & dijudicato, dependet. An vero sedes sensuum internorum in certis cerebri locis, an in sensoriis externis locanda sit, jam in medio relinquo. Conf. MOLINETT. *Dissert. Anatom. & Pathol. Lib. IV. c. I.* GLISSON *Tr. de Ventric. & Intest. C. XII.* LE GRAND. *Instit. Philos. Nat. P. VI. art. 6.* SVICERVS *Phys. Arist. Cartes. Quæst. 369.* DIGBY *Instit. Peripat. L. II. Lect. 18. & de Nat. Corp. C. XXXII.* Alii, quod tantum adduxisse sufficiat, tam veteres quam recentiores de organo tactus constituendo maximas moverunt controversias, dum alii carnem, alii nervum, alii aliud quid, esse statuunt, vid. SENNERT. *Instit. Med. 120.* alii credebant membranas adæquatum organon tactus esse, receptis propaginibus fibrarum tenuissimarum instar araneæ cujusdam filorum, ex subjectis partibus. Vid. GALEN. *de Usu Part. C. XV.* Hinc manuum cutem præ aliis partibus omnium sensibilibus normam esse & tactus instrumentum prudentissimo animali proprium, quo velut communi instrumento ad res tangendas & apprehendendas omnium qualitatum tangibilium differentię rectius quam ulla alia parte di-

gnoscentur, annotavit. Equidem negandum non est, has omnes partes sensiles existere, si enim ab instrumento secante, urente, pungente, fricante &c. afficiuntur, illico a nobis id persentiscitur; sed distinctam nobis cognitionem minime exhibent, ex qua causa & sensus distincti illius tactus scilicet organa non habentur.

§. X. Insuper alios præter memoratam superfluum & illaudabilem exhalationem non minus utiles cutis obtinet usus, nimirum totum corpus amicare, illud ab injuriis externis munire, facere ad majorem pulchritudinem & gratiam omnium corporis humani partium, & in certis illius locis ad pilos faciendos, qui tam tutelam contra frigus, quam ornatum certis quibusdam partibus præstant. Præter cutem aliæ partes ei subjacentes frictione afficiuntur, nervi nimirum & illorum incolæ spiritus animales, vasa sanguifera venæ levi quidem, arteriæ validiori pressione & lymphatica, contentaque illorum sanguis & reliqui humores, glandulæ, partes musculosæ, & in illarum interstitiis residens sanguis & humores alii, membranæ. Actuata enim hæc omnia motu illo copiosorem spirituum & humorum affluxum concitant. Est adhuc ut referamus: halituosas in capite per futuras exire non vanam prorsus persuasionem esse; quidquid etiam alii objiciant. Juxta cutem integumentum quoque illudque tertium pinguedo constituit in tenuibus membranulis collecta: Hæc æque varios usus obtinet, ut nempe his oleosis globulis rursus solutis ac consumtis corpus in morbis & inedia nutriatur, ut corpus in statu naturali viciens unctuositate lubricetur, lævitate pulchrius & ad motum aptius reddatur contra frigus maxime aliasve injurias muniatur, nimia transpiratio insensibilis atque salia acrioresque particulæ, ne damnum parti vicinæ inferant, coercantur. Non vacat illa, quæ nondum satis prolixè descripta sunt in antecedentibus, nunc graphice delineare, cum chartarum harum angustia id vix permittat. Quare & longiori & repetitæ instrumentorum frictionis recensitioni, quam ordo nunc postulare, supersedere me posse arbitror, cum illa jamdum supra sufficienter, ut opinor, declarata fuerint. Sed ut in compendio illa tantum nominasse sufficiat, frictionem præstant omnia, quæ superficie sua varia plus minus aspera partibus applicantur, ibidemque hinc inde tractione ducuntur, unde partes moventur, vellicantur, & calor excitatur, &c.

§. XI. Subjectis frictionis physiologicæ jam adumbratis, operæ pretium esset, ut illa & pathologicè describerem. Cujus descriptionis multa exempla in pathologia occurrunt v. gr. corrosiones fiunt per frictionem quandam per partes acriores &c. Quia vero hic latissimus cam-

pus panditur, ut pagellæ hæc vix sufficiant, penitus hæc omittere cogor: imprimis dum in sequentibus, quando de fine frictionis sermo erit, præcipua huc spectantia simul monenda erunt. Itaque potius transgressum faciam ad frictionis finem usumque describendum, quem præsertim L. BELLINVS de Sangu. Miss. p. 137. VERVLAMIVS Oper. p. 538. & seq. p. 769. & 941. GALENVS de Sanit. Tuend. CORNEL. CELSVS de Med. passim HIPPOCR. de Medici Offic. describunt & commendant. Modum adhibendi optime ipse GALENVS præscribit Lib. II. de Tuend. Sanit. ut *primum manuum ductibus blandius, inde sensim paulo fortius fricemus, idque semper violentius, eatenus aucta frictione, ut premere leviter, at citra lesionem carnem videatur.* Multifaria sane commoda & facultates atque tantæ efficaciam & virtutis, ut diversos ac sæpe contrarios quoque (pro varia nimirum eas adhibendi ratione:) effectus perficere possimus, ab Auto-ribus frictioni adscribuntur, in sanitate integra conservanda, amissa aut lesa restituenda & integranda, vita prolonganda, quorum quædam testimonia in antecessum & in prægustum quasi transcribamus. Ita HIPPOCRATES Tr. de articul. S. VI. p. m. 823. *frictio potest justo laxiorem articulum vincire & justo duriores solvere,* & GALENVS Lib. V. de Tuend. Sanit. *Lassitudinis, inquit, affectum sanat, & imbecilem distributionis vim conciliat, robur vitale excitat & conservat, modice calefacit.* Lib. IV. l. c. *Concoquit crudum succum* Lib. II. l. c. *Dura ligat, mollis solvit, tenues meatus reludit & excrementa, quæ caro continet, fluxilia reddit & solidas emollit partes. Frictio ex oleo administrata humectat.* Frictionis omnis commune opus est *ca-
lascere.* Frictiones sunt inter corpus evacuantes annumerandæ. Corporis ha-
bitum laxum reddit, & cutem raram. ARISTOT. Sect. 38. Probl. 5. *Corpus, cui secundam conciliare volumus valetudinem, non densum sed rarum reddendum est.* Nam ut urbs locusque quicumque salubris est, qui placide perspirabilis; ita & corpus, quod placide perspirabile est, sanitati opportunius. Asclepiades in plurimorum morborum curatione frictiones, quarum etiam inventorem CELSVS Lib. II. de med. Cap. XIV. eum deprædicat, reliquis omnibus remediis & maxime medicamentis ore assumendis, haud immerito præfert. Siquidem etiam universæ Methodicæ Sectæ laudi ducitur, quod frictionibus plus adversus morbos quam medicamentis pugnarent. Erasistratus, reprobatis omnibus fere medicamentis, exercitationes per frictiones, balnea ac inedia potissimum injunxit. Ægyptii æque ac Græci teste PROSP. ALPINO Lib. IV. de med. Ægypt. eandem summis extollunt laudibus, & quivis in veterum scriptorum & medicorum lectione sæpius eas maxime commendatas videbit. Chineses

hodie adhuc frictiones optima remedia in morbis habent. W. PISO. *Hist. N. & M. Brasil. Lib. I.* scribit, quod Reguli ipsi medendi sibi facultatem arrogent, ad quos matres suos infantes ducunt, qui ab illis fricantur & tabaco consputantur. Ex ejusdem testimonio relatum habemus, quod empirici Brasilienses vagis frictionibus iisque imperite directis mira præstent & in præservanda sanitate & curandis morbis. WILSIVS *de anat. cerebri Cap. XX. p. 104.* de quodam Anglo scribit, quod magno cum successu omnis generis morbos sola frictione sanaverit, de quo & conf. PAULINI *im Philosoph. Feyerabend. p. m. 561. seqq.* BORELLVS *Hist. & observ. Centur. IIXC. p. 186.* de quodam scriba refert, eum innumeros quovis etiam morborum genere detentos sola frictione pristinae sanitati restituisse. Quinimo videmus ipsam naturam non raro ad frictiones stimulare, quando enim pruriginoso fervescenteque sensu molesto, diversæ partes afficiuntur, homines a frictione atque scalpura vix sibi temperare possunt. Idem in brutis quoque deprehendimus: Et enim volucres instante pluvia rostris pennas & cutem fricant & forte hac ipsa vellicatione cutis tonum a tempestate humida relaxatum aut relaxandum restitunt, noxamque exinde avertunt. Pariter canes tunc temporis ut & simiæ atque feles, fues, asini & id genus, partes posteriores & terga in terra fricant, aures vellicant &c. Taceo quod ad munditiem servandam egregie frictio conferat, cui veteres magis quam nunc hodie studuisse videtur, in cujus gratiam balnea & frictiones quotidiæ, atque haud una vice saltem adhibebant, quorum instrumenta strigils vocabantur, quæ etiam hinc inde adhuc inter curiosa asservantur. His mediis quæ munditiem conciliant hodie quidem frequens indusiorum mutatio successit, sed multi squalores cuti adhærentes per hoc vix possunt deleri. Quodsi autem omnes frictionum usus colligamus, videmus eos abstergendi, mundificandi, excitandi, alliciendi, discutiendi, aperiendi, revellendi, derivandi, roborandi, siccandi, insensibiliter plus minusve evacuandi, esse.

§. XII. In hac ipsa tractatione ordinem illum servemus, ut prius consideremus quantum frictio faciat ad indicationem prophylacticam & præservatoriam, sive ad illam medici functionem, qua status s. n. factus tectusque servatur diu, & morbi præcaventur. Tuetur autem medicus illa sanitatem, massæ sanguineæ aliorumque humorum vitiosas dispositiones ad morborum generationem producendam facientes, alterando nimirum corporis habitum, roborando omnes coctiones, quas vacuant instaurando, humores lentos incidendo, stagnantes & quiescentes movere.

movendo, crassos atque spissos, glutinosos attenuando, multos & superfluos evacuando, calidos refrigerando, frigidos calefaciendo, mordaces contemperando, fluxiliores inspissando; vel imperando rerum ad vitam necessariarum usum legitimum, aëris nempe, cibi & potus, morus & quietis, somni & vigiliarum, excretorum & retentorum atque animi pathematum; explorando climatis frigidioris aut calidioris constitutionem, conditionem ætatis in infantibus, pueris, juvenibus, consistentis ætatis hominibus & senibus, sexus in gravidis, puerperis, lactantibus, menstruatibus, aut similiter affectis, consuetudinis in rusticis, delicatioribus &c. ne varii gignantur morbi. Communis sane persuasio, communisque hodie error est, medicum solummodo accersiri læsa jam dum sanitate & periclitante vita, aut quando mors jam ante fores serpit. Maxima nam in prosperis rebus fragilitatis humanæ oblivio est. Quam male autem illi sibi consulant, loquitur quotidiana experientia: cum multi a morbis immunes esse possent, si medicum de conservanda sanitate sua in consilium vocarent. Facilius enim, uti commune fert proverbium, non admittitur, quam ejicitur hostis.

§. XIII. Sed ut ad scopum nostrum hæc applicemus, frictio præsertim versatur inter illa circa motum & retenta potissimum. Etenim frictio nihil aliud quam corporis exercitatio est, speciemque ejus tantum ejus motus constituit, unde & GALENVS *Lib. II. de Sanit. Tuend.* exercitia & frictiones conjunxit. J. ZECHIVS *Consult. p. 602.* loco exercitii in debilioribus frictiones diversarum partium valentiores singulis diebus mane & vesperi jejuno ventriculo institutas commendat. Ad sanitatem nimirum tuendam amissamque restituendam non minimum momentum exercitationes habent, quod non tantum autorum constanti assertione, sed & ipsa experientiæ fide exploratissimum ab omnibus semper habitum est. Unde Hippocrates universam tuendæ sanitatis rationem duobus his includere videtur: non satiari cibus, & impigrum esse ad labores, i. e. motiones corporis, ut aliorum v. g. Galeni, Aristotelis multorumque recentiorum testimonia velut supervacanea, taceam. Satis superque enim ex Physiologia cognitum, satisque perspectum est, vitam & sanitatem pendere maxime a partium fluidarum i. e. humorum omnis generis perenni atque æquali circulatione & motu progressivo per omnes etiam minimos corporis tubulos rite constitutos, satis pervios ac amplos justoque dilatatorio constrictorioque motu debitoque elatere præditos. Quod si recte hic motus secundum leges suas comparatus est, viscidiora, crassiora attenuantur & dividuntur, inutilia, su-

perflua hincque excernenda per debita sua emunctoria & transpirando potissimum per poros evacuantur, fluiditas, spiritualcentia & calor augentur, utilia vero & laudabilia retinentur atque in vitalitate sua conservantur, respiratio & pulsus fit citatior, appetitus excitatur chylosis adjuvatur, nutritio perficitur corporisque aliæ actiones integræ servantur. Itaque motus hic circularis est, qui totum corpus ejusque omnes partes ab omni putredine, morbo, ac morte ipsa tuetur. Immo exercitationibus animi quoque vires majores acquiruntur, excitantur & conservantur, cujus testimonia clarissima inter alios GALENVS *Lib. de Consuet. & Lib. I. de Sanit. Tuend.* atque PLIN. *Lib. I. Epist. 2.* scite perhibent. E contrario ex genuina pathologia elucescit, plurimos morbos a circulo sanguinis potissimum impedito & imminuto dependere. Ut paucis multa complectar, vita ipsa nihil aliud est, quam continuus quidam spirituum, hinc sanguinis & reliquorum humorum motus bene ordinatus, a quo sanitas etiam effective dependet. Motum vero hunc sanguinis tam intestinum quam progressivum frictio præ multis aliis corporis exercitiis optime ac commode adjuvat & calorem fovet & excitat. Affirmat hoc (ut alios jam taceam) JOH. FOLLINVS *in tuenda sanitat. Synops. p. 75. seq.* inquit: nullam suaviorem aut commodiorem ex omnibus cogitari posse exercitationem, quam quæ suscipitur per frictionem. Per illam enim actionem & tractionem exterius institutam musculi legitima illa motus instrumenta, nervi, arteriæ, venæ glandulæ atteruntur, moventur & excitantur, atque ad motum progressivum expeditiorem humores in iis hospitantes stimulantur, quo & intestinus eorum motus simul & ex necessitate augetur. Ab illa quippe vellicatione fibrarum carnearum nifus & tendentia naturalis aliquam conquassationem naturalem experitur, & hinc eadem ad contractiones iteratas disponuntur. Quamvis enim id fiat solummodo in cute & nervorum atque vasorum eo excurrentium extremitatibus, attamen non modo ob continuitatem per totum corpus fibrarum systole propagatur, sed & major sanguinis, reliquæ humorum massæ, spirituumque commotio continuatur & sic etiam partes corporis humani interiores consequenter, hoc medio afficiuntur: Nam si cutis sic premitur & tenditur ea fit rarior ac non modo motus humorum per vascula ejusdem excitatur sed etiam vasa, quæ & sanguinem, lympham & spiritus animales vehunt & partes aliæ quæ subjacent, necessario premuntur, per quam pressionem sursum & deorsum institutam hærens in iis humor exprimitur, dimovetur, sejungitur & majori velocitate ad vasa sua devolvitur versus partis pressæ confinium,

finium, pori omnes aperiuntur, sicque via facilis perspirationi redditur. Certe, hæ perfecte imitantur & suppleant, alterna pressione & relaxatione vasorum actionem in fluida. AVICENNA *fen. 3.* - - - aliique veterum dicere consueverunt, frictiones si decenter fiant, tantum commodi afferre, ut reliquis motionibus & exercitationibus corporis non opus sit. In cujus asserti ulteriorem probationem & illustrationem afferam, non solum Latinos sed & ante eos jam etiam Græcos olim universam propemodum medicinæ partem, quæ Hygiene dicitur, in frictionibus posuisse: Constituerunt enim gymnastas ac alyptas, qui hominum frictionibus, inunctionibus corpora curabant, atque omnia alia eorum corporis exercitia frictiones comitabantur. Transcribam quod legi apud SVETONVM *in vita Vespasiani Imp. cap. XX.* nimirum Vespasianum Imp. valetudine prospera usum esse, quamvis ad tuendam eam nihil amplius quam fauces cæteraque membra sibi met ad certum numerum in sphæristerio, qui locus rotundus balnei erat, in quo varia exercitationum genera, ut & frictiones instituebantur, defricaret, in ediamque unius diei per singulos menses interponeret; Ipsæ matres familias & obstetrices optime norunt, quam bene recens natorum sanitati & nutritioni consulatur frictionibus blandis modo institutis, & ad quas etiam institundas B. ET MÜLLERVS *in valetud. infantili p. 36.* hortatur. Quando & puerorum abdomen tumet, glutinosis humoribus infarctum frictiones pannis laneis, asperis factas, plurimum prodesse expertæ affirmant. Etenim ea remedia & vitam longam & sanitatem integram præstandam maximam laudem merentur, quæ humani corporis elateres & rotas motus animalis instrumenta mollia, laxa & flexibilia facile conservant. Hocce eximium commodum experiuntur quotidie illi, qui consuetis his pectinatione, indusiorum commutatione, manuum lotione, oris colutione, mane statim a somno occupati sunt.

§. XIV. Alterum inter sex res nonnaturales, circa quod frictio præsertim versatur, est, ut retenta p. n. excernantur. Præcipuum id esse videtur motus consequens præcipuamque fere dicerem medicinam. Excretio enim illa, quæ transpiratio insensibilis vulgo dicitur, motum presso quasi pede ut effectus sequitur: per motum quippe inducta humorum fluiditas atque subtilitas, particulis quibusdam ex mixti compage aquosis, spirituosis &c. continuo secedentibus superflui humidi satis interdum nocivi, discussionem promovet, illudque sub forma halitus vel vaporis ejicit, quibus egressis aëremque propellentibus necessario materia subtilis cogitur ex aëre discedere & loca exinanita particularum modo

do exclusarum iterum occupare. Transpiratio hæc insensibilis magis secundum naturam instituitur, quanto enim tenuior & sine sensibili magis madore, transpiratio, tanto salubrior est & est evacuationis genus, quo natura vix per momentum carere potest, cum humores vitiosi extra ambitum primarum viarum vagantes non per commodiorem viam foras eliminari possint. Est quoque ejusmodi quod magis perfectum est atque simul universale per universum corpus institutum (singulæ enim corporis partes succo nutritio perfunduntur, qui vero varie movetur, quo motu evaporatio semper contingit) atque quod supplere potest defectum aliarum egestionum corporis humani, melius quam ulla aliarum possit defectum hujus supplere. Nolim tamen ideo cum SYLVIO asserere, nullum sudorem esse naturalem, cum nonnisi contra leges naturales ab extreme commota massa sanguinea fieri soleat. Dicit enim *Lib. I. Prax. cap. LIIIX.* vomitum & sudorem non esse excretiones naturales, sed vel nonnaturales vel præternaturales, aut medicas, sive artificiales aut criticas. Nec SENNERTI distinctione opus habemus, quando *Instit. Lib. I. c. IX.* distinguit inter causam efficientem & inter materiam ipsam, sudoris, atque illius intuitu multos sudores naturales esse, hujus vero neutiquam, asserit. Verum enim vero cum causa efficiens sudoris duplex sit, alia proxima, spiritus sc. animales data occasione sanguinem commoventes. Dum enim fibræ corporis vellicantur, moventur, commotis istis motus sanguinis & spirituum acceleratur, calor infertur; turgescunt sic cunctis lymphæ quoque laudabilis æque ac excrementitia per poros cutis expellitur, imo pro diverso impulsu sanguinis ejusque violentia & celeritate majore vel minore, sudor contingit modo copiosior, modo parcior. Quo autem rectius excretio hæc succedat, requiritur non saltem iuxta constitutio ipsius motoris, sed & humorum ac glandularum secernentium, tubulorumque & pororum excernentium. Inde etiam accidit, ut quædam subiecta satis bene aut nimis, alia contra minus recte se his habentibus, difficulter admodum aut nunquam fere sudent. Causa remota vero & occasionalis est quadruplex, prima naturalis, videlicet corporis & consequenter humorum contentorum, aut etiam animi commotio, quarum ista procedit ab ambulando, equitando, currendo, saltando aut clamando; hæc potissimum in meditando, ira, terrore, consternatione, metu contingit. Altera est præternaturalis sive morbi varii, v. gr. febres, acrimonia morbofa in scorbuto &c. Tertia critica itidem in morbis beneficio naturæ crisin perficientis contingens. Quarta artificialis & medi-
ca

ca audit, quæ a medicamentis efficitur, quo & aër externus calidus ambiens referendus. Pro harum itaque circumstantiarum ratione varia sudor vel naturalis vel præternaturalis esse potest. Ita quoad materiam in sana corporis constitutione contingens semper naturalis, in morbosa præternaturalis & quidem per accidens talis sudor erit nuncupandus. His & sententiæ Plempii obviam eatur statuentis, respectu causæ efficientis sudorem vix naturalem, respectu vero materiæ & viarum semper naturalem esse. Sed optime respondet B. LANGIVS *T. I. p. 122.* frustra urgeri sanguinis insignem commotionem, cum sæpe acria paululum alimenta, vel solus calor externus quodammodo auctus satis in se habeant causæ ad excitandum sudorem. Hujus intuitu v. gr. dormientium sudor, qui non est hecticus, non præternaturalis esse potest. Pari ratione B. ORTLOBIVS *Dissert. Physiolog. p. 138.* ad hoc dubium respondit: Cum idem sit, quod excernitur per διαπνοήν, & movens tantum aliquanto impetuosius videatur, non omnis sudor potest præternaturalis dici. Interdum etiam sudor solummodo ab aëre frigidior & crassiore atmosphæra ambiente effluvia coërcente atque in guttas condensante producitur. An insuper omnis sudor ex sanguine, an etiam ab assumtis, ex primis viis, præcordiis vel interioribus visceribus immediate per certas vias prorumpat, multos non levis scrupulus premit. FERNEL. *Lib. de Febb. c. X.* id ipsum & DEVSINGIVS in *Exercit. de Depurat. Aliment. p. 187.* & in *append. ejus p. 343. it. in Dissert. de Lacte S. II. §. 63.* tractant & probare moliuntur, sudorem etiam immediate ad habitum ex primis viis provenire. Ast quia viæ istæ, pariter ac illæ, quæ in urinæ excretionem extraordinaria & immediata, illæque, per quas pus interdum in pleuritide per vesicam eliminatur, ab Autoribus allegantur, ab Anatomicis nondum detectæ sunt, in medio illud & aliis potius dijudicandum relinquo. Multi quidem ut hoc statuam, observationibus Autorum adducuntur, sudores assumptorum conditionem referentes recensentibus, uti SALMVTH observavit de sudore cerevisiam odore & colore referente *Cent. II. obs. 28. it. Eph. G. D. II. ann. 6.* de sudore melleo ex melle assumpto, *it. l. c. ann. 5. obs. 15.* & RHOD. *Cent. I. obs. 58.* De sudore vini rubri videatur BARTHOLINVS *Cent. IV. Hist. 63.* & SACHSIVS *Ampelograph. Curios. Lib. II. S. 6. membr. 7. Cap. VIII. art. 1. p. 395.* de foetido & viridi a porro assumpto, BORELL. *Cent. II. obs. 56.* de eroceo post exhibitum rhabarbarum, *Eph. Germ. D. I. ann. 7. obs. 78.* de violaceo a violis, *l. c. Dec. II. ann. 5. obs. 7. it. obs. 18.* de lacteo, *it. l. c. Dec. II. ann. 5. obs. 112.* de oleoso ex oleo largiter poto, alii de aliis testan-

tur. Sic & B. Ortlobius aquam cinnamomi post ejus uberiores potum iterum excretam vidit. Sed quid impedit, quo minus causas istas tum in primas vias non recte digerentes, tum in vasorum fecernentium nimiam amplitudinem conjiciamus?

§. XV. Cum itaque transpiratione, etiamsi invisibili insensibilique, de cujus admiranda ad sanitatem utilitate SANCTORIVS in *Medic. stat.* prolixè agit, cujus quantitas hyeme uno die naturali ad quinquaginta uncias & ultra adscendit, inutilia varia atque superflua ea copiosissime excernantur, haud obscure colligitur, quantum utilitatis etiam hac ratione & in conservanda sanitate & longævitate eaque procuranda & in præcavendis plurimis morbis hoc modo, transpiratione nimirum aucta, frictio præstet. Quorum explicationem & connexionem partim ex Pathologicis præsuppono, partim in sequentibus latius deducam. Scilicet frictio hoc modo eliminando præservat a plethora, fecunda illa morborum matre, quippe vidimus non raro exinde apoplexias, paralyses, febres, inflammationes, mensium defectus, hæmorrhagias, obstructions & stagnationes varias, vires oppressas, lassitudines &c. sequutas de quibus Autorum observationes passim testantur. Præservat a quavis cacochymia, quæ transpirationem impeditam ut umbra corpus sequitur cachexia, teste ARISTOT. *Sect. 38. Probl. 3.* Præservat ea porro ab omnibus illis morbis, qui originem suam a colluvie serosa retenta trahunt, vid. PISO *Tr. de Morb. a colluvie serosa oriundis*, a catarrhis puto, rheumatismis, aliisque qui ab his sæpius generantur, affectibus, ut sunt paralyxis, apoplexia, convulsio, tremor, pleuritis, angina, surditas, ophthalmia, cæcitas, tussis, asthma, phthisis, apepsia, vomitus, tumores varii variisque in locis, diarrhœa, dysenteria, arthritis, anasarca &c. Sic me Parisiis vidisse memini scæminam primariam, quæ vexabatur hydropis specie singulari & rarissima, diversis enim corporis in locis bullulæ sub cuticula latentes videbantur, quæ tamen frictione duntaxat linteis calidis quotidie bis instituta, ab illa se servabat liberam. Febres variæ indolis, & mali interdum moris vid. celebr. BOHNII *Circul. Anat. p. 239.* a transpiratione impedita oriri, toto die experimur, vid. ALEX. TRALLIAN. *Lib. XII. c. II.* SYLVIVS *Prax. Lib. I. c. XXVIII.* Hinc GALENVS more veterum balneum aquæ calidæ in plurimis febribus commendat. *Meth. Med. 10.* quæ & instituta sæpius frictione certis temporibus averti possunt. De anasarca PLATERVS testatur *Prax. T. III. C. III. p. 186.* Leucophlegmatiam a transpiratione impedita ortam præter observationes Plateri aliorumque vidi hic Lipsiæ, in ancilla tem-

pore

pore hyemali frigidior per aliquot dies linteamina lavante & siccante. Ex hoc fundamento frictio tandem præservat a cutis quibuscunque vitiis, scabie, pruritu, lepra, serpigine & lichene, phlyctænis, varis &c.

§. XVI. Ut a recte valentibus frictiones adhibitæ sanitatem & vitam factam tectamque servant bonumque atque concinnum corporis & membrorum ejus habitum procurant, omnesque sensus clarificant & ab imminentibus morbis præservant, ita & præsentis jam factosque depellunt & curant, ad quem scopum perlustratis his antecedentibus facilis via ac cognitio patet ad indicationes curatorias, quomodo nempe affectuum curationes, aut solæ aut junctis aliis externis pariter & internis remediis appropriatis, frictiones aut perficiant aut adjuvent. Eæ autem optimas curationis condiciones possident, quæ nimirum citam, tutam & jucundam afferunt medelam, quæ & aliorum medicamentorum & remedium vim & operationem augent, adjuvant & in certiore & præstantiore actum deducunt, imo ad quædam auxiliorum genera admodum necessariae sunt, adeo, ut sine his parum aut nihil efficerent. Unguenta & linimenta applicata hic præsertim nominanda sunt. Ad plurima hic iterum respicere præsens institutum postulat. Omnium vero ratio summas has duas iterum classes spectare videtur, 1) quatenus frictio motum & per consequens calorem & fluiditatem partibus conciliat, attenuat & discutit, easque solidas omnes musculos, nervos, tendines canaliculos sanguiferos, compactiores & firmiores, robustiores reddit, illarum poros aperit atque ita alterat, & derivat & 2) quatenus transpirationem & evaporationem humorum peccantium adjuvat vel efficit, adeoque evacuat & exsiccat. Qui diversi affectus diversum frictionis gradum modumque desiderant.

§. XVII. Igitur movendo undulationem & affluxum majorem spirituum humorumque in partes solidas præsertim debilitatas hætenus denegatum, aut torpidiorem suscitando & revocando, novamque iis determinationem imprimendo conferunt frictiones, quatenus fluida illa motu & calore sic inductis exagitata & elastica magis reddita majorem ambitum fortiuntur, ut in fibras influant illasque vegetent; illæ vero irritatæ ad systolen debitam exercendam præparantur simulque canales & pori fiunt ampliores; quibus his scopis una ut ajunt fidelia duos parietes jungere conveniet. Proin primo loco hic allegabo atoniam, quæ a deperdita fibrarum elastica vi, aut ex vitio nervorum & spirituum animalium inertia atque insufficiente influxu aut ex sanguinis tum qualitate tum quantitate

peccantis vitio provenit. Passim enim observatur, scorbutum, flatus, sanguinis ferique stagnationes, spasmos & motus convulsivos crebriores, apoplexiam & paralyfin, frigus & calorem excessivum, medicamenta quoque quædam ut emollientia hydrargyrum &c. præter modum adhibita, ut & compressiones, contusiones, fracturas, luxationes &c. modo plurium simul, modo hujus vel illius partis atoniam inferre. Quam laxam nimis frictiones juvant, duræ tamen & pene dolorificæ, (consentiente GALENO *Lib. II. de Tuend. Sanit.* Dura ligandi vim habent,) cum regimine calido, vid. & SOLENAND. *Consil. Med. Sect. II. p. 161. & Sect. IV. p. 423.* Celeberr. SCHELHAMMERVS *Libr. de natura p. 314.* commemorat, se juvenem ex laxitate tendinum ac ligamentorum omni plane motu privatum universalibus præmissis frictionibus quoque fortissimis institutis, restituisse, ut intra dies plus minus viginti robore suo pristino gaudens omnibus muniis præesse potuerit. Quia & leniter tunc glandulæ vellicantur, ut liquorem stillent, fibrasque humectent ac emolliant in rigida interdum pariter adhiberi possunt, sed molles tunc illæ potius sint & blandæ, cum aqueis, mucilaginosi & tepidis, quibus extenduntur, stamina, ut non adeo resistere possint. Vid. iterum GALENVS *l. c. Cap. III.* affirmans, *frictionem mollem remittere, & quæ inter vehementius laborandum fatigata sunt, emollire.* It. *Fricatio vespertina illis utilis est, quos vel lassitudo valida premit, vel siccitas male habet. Cap. II. l. c. quæ constricta sunt, molliter fricanda sunt.* CELSVS *Lib. IV. de med. Cap. III.* in cervicis rigore easdem laudat. *Ephem. G. N. C. Dec. III. Anno 4. observ. 120.* in omnium membrorum rigiditate aliis nihil proficientibus humidæ frictiones comprobant. Sic v. gr. inferius dicam, quod in vulgus quoque notum est, mulieres in mammarum duritie, eas mollioribus scopulis ex pilis caprinis confectis molliter fricare, qua frictione mammarum duritiem pededentim leniunt atque relaxant. Juxta hoc exemplum refero illud, quod monet I. GUILLEMEAV *de ocul. & dent. med. p. m. 214. Cap. II. Sect. VI.* ut in tabe pupillæ oculorum, ubi ea contrahitur, ut iterum dilatetur oculus, sæpius fortiter digitis fricetur. Atoniæ laxæ scilicet affinis est paralyfis & hemiplexia, cujus ratio formalis in impedito ad aliquod membrum spirituum influxu consistit, quem vellicatione sua frictiones cum nervinis iterum restituunt ac motum ac sensum revocant, atque infarctum simul in partes ita a relaxatione flaccidas facile incumbentem & insequentem præpediunt, stagnationesque & humorum spissescentiam discutiant. In specie in paralyfi linguæ eas cum fructu adhibuit PLATERVS *obs. Lib. I. p. 128.* Cum stupor gradu saltem

tem a paralyfi differat, & nihil aliud fit, quam difficultas sentiendi, ac propria quædam ad paralyfin dispositio, locum suum quoque hic invenit, quippe quem frictiones optime tollunt, Autore SOLENANDRO *Consil. Med. Sect. I. p. 31.* præstantissimas eas item judicat GORDONVS in *Praxi Part. II. Cap. XVII.* non modo simplices sed & medicatas, cum oleo lumbricorum, formicarum aliisque huic scopo convenientibus. Mirum earum effectum in hoc morbo, quem præstant, deprædicat pariter PLATERVS in *Praxi Cap. V.* ut & SENNERTVS, RIVERIVS & quam plurimi alii. Universale magis malum apoplexia existit a spirituum animalium influxu & undulatione tanquam a causa sua continente impedita, quam ut urticationibus secundum Celsum & Riverium ita & frictione juvari Autor est PLATERVS in *Obs. L. I. p. 14.* comprobante communi Practicorum consensu imprimis si fiant cum spirituosiss & nervinis antiparalyticis, ut spiritibus & salibus volatilibus formicarum, lumbricorum terrestrium, balsamis, apoplecticis, oleis lavendulæ, rutæ & similibus. GEORG. NYMMANNVS *Lib. de Apopl. p. 239.* palatum cum theriaca veteri fricare jubet ut & decocto florum cyani *p. 241.* IACCHINVS in *IX.* & HOLLERIVS *I. de morb. intem. VII. Rhasis 9.* eas ante venæ sectionem necessarias æstimant. Hac frictione externa simul illa interna, quæ per sanguinis motum in anfractibus atque complicationibus vasorum utriusque generis fit, & quæ motum velocitatemque fluidorum multum retardat, cohibetur atque avertitur. Cujus rei ratio atque causa ex mechanicorum scholis peti potest: Conf. Celeberr. WOLFF. in *Elem. mechan. Theorema 663.* & MARIOTTE *Traité des Mouvements des eaux p. 256.* Scribenti mihi hoc, obvenit memoria casus cujusdam, quem Londini quondam in habitationibus meæ vicinæ vidi; scilicet 4. personæ mater cum duobus filiis & una filia a vapore carbonum fossilium in camera accensorum suffocata & quasi mortuæ ab hero accedente inventæ sunt, quæ vero omnes in aërem liberum delatæ frictionibus solis cum pannis calidis restitutæ sunt. Similiter aphoniam quam sæpissime post se relinquit apoplexia eadem in palatu ac lingua factæ, auferunt vid. WEDELIVS *de Med. Cogn. Facult. Libr. II. §. 2. Cap. XII.* Ab apoplexia non multum differre videntur affectus soporosi & gradus illorum cataleptis, pariter a spirituum torpore & activitate, destructa vel influxu ad partes, ob nervos vel compressos vel obstructos circum suum principium impedito, pendentes. Quo in casu frictiones itidem fortiores, imo fortissimæ cum pannis calidis, decocto raphani majoris rad. pyreth. sem. sinapi & aceto fortissimo & sale maxime in plantis pedum, exci-

tant, spiritibusque novum impetum inducunt. Vid. FOREST. *Observ. T. I. S. 3. p. 580.* MANDELSLOH *Itiner. I. O. p. 122.* recenset Goæ metropoli I. O. uxores adulteras maritis daturam propinare, ut somnolenti fiant, adulterio vero commisso pedes illorum duriter ut expergiscantur fricare. Hinc sequitur quod & membra compactiora & firmiora reddant frictiones. Ad tonum nimis laxum antea commemoratum referendus quoque erat tremor, qui inter alias causas etiam fibrarum justo minorem firmitatem, ex qua spirituum quoque torpor & influxus imminutus non excludendus venit, agnoscit, ut hinc fibræ non sufficienter ab iisdem impellantur, quæ vitia frictiones corrigunt ex rationibus jam allegatis. Testimonium hujus rei si desideras, adeas C. CELSUM *de re med. Lib. III. cap. XXVII. p. 180. seq.* Ex eodem fonte, movendo nempe & excitando spiritus ac humores, in animi deliquio, lipothymia, syncope, ut & virium imbecillitate & oppressione earum conferunt ex GALENI præcepto *l. c.* Ubi reficere opus est, adhibeatur tum quantitate tum qualitate mediocris frictio. *It. Lib. V. l. c.* In imbecillitate virium crebra exiguaque utendum est. Et quid notius etiam apud nos est, quam quod syncoptici, labiorum cum sale vel spiritu quodam apoplectico, aceto rosaceo, frontis, faciei, pulsum aut pectoris regionis, aut forti plantæ pedis frictione, excitentur. Et quoniam vires malignitas opprimit, frictiones in morbis pestilentibus & malignis apprime conducunt, quatenus excitando motus naturales ad resistendum miasmati maligno illudque superandum operantur. Testatur de hoc VIGO *Chirurg. Lib. IX. cap. VI. p. 1230.* Immo moribundi per aliquot horas adhuc hoc pacto possunt servari. Notatu dignum est, quod refert Illustr. BACO DE VERVLAMIO *in Hist. V. & M.* Veteres ad præservationem vitæ in periculosis morbis solitos fuisse, lintea remove ægrosque nudos laneis stragulis lenem frictionem inferentibus undique obtegere & obvolvere. In BONETTI *Med. Septentr. P. II. p. 845.* legitur: Quosdam in confiniis mortis subitam opem tenui subucula contexta ex lana subtilissima sensisse, non ob aliam causam, quam quod lanei panni leniter confricent. In strangulatione, a quacunque causa illa etiam fiat, succurritur egregie. VERVLAMIVS recenset *H. V. & M.* de quodam, qui per dimidiam horam strangulatus manserat & pro mortuo jam habebatur, in vitam tamen iterum frictionibus & balneis calidis reductus est. In suffocatione a vaporibus, metallicis, carbonum, musti, cerevisiæ G. NYMMANNVS *de Apopl. p. 292.* palatum cum zedoaria, mithridatio, castoreo fricare suadet. Aqua submersi, & tanquam mortui jacentes,

centes, membrorum frictionibus, pannis calefactis, vitæ restituantur, de quibus exemplum de quodam Nobili recenset P. BORELLVS *Hist. m. & phys. Cent. II. obs. 2.* Huc etiam referri possunt eæ observationes ac effectus speciei frictionis adscribi, quos SACHSIVS in *Ampelographia Lib. II. c. III.* recenset atque iisdem testatur, aqua submersos antea pronos in terra extensos & plantis pedum baculo percussos revixisse. Ex quo præter alia quoque luculenter apparet ejusmodi percussiones & frictiones validas longissime operationes suas perficere non modo in ipsis partibus percussis & fricatis, sed etiam longe diffitis motu communicato; in his enim casibus, vasa & fibræ ipsius cordis ad motum systoles & diastoles vitalem producendum hoc modo excitantur. Fulmine tactis, vel attonitis, si scilicet influxus spirituum cessare deprehendatur, frigidiores enim semper illi observantur, cum fructu imprimis volis & carpis manuum, plantis pedum, dorso, temporibus & pulsibus admoventur. Exemplum frictionum in hoc casu feliciter adhibitarum suppeditat SCHENKIVS *obs. Lib. I. p. 83.* modoque laudatus NYMMANNVS *de Apopl. p. 288.* Eadem ratione calefaciunt humores & fibras movendo, coagulationesque tollendo, unde membra frigore tacta cum fructu leniter tamen fricanda, ne humores coagulati impetuosius atque ex admotu nimio fornacis forte calore resolvantur relictis fibris flaccidis & emortuis, sed ut pororum & tubulorum æqualitas fervetur, donec humores turbati & coagulati rursus in circulum redire queant. Immo si ex intensiori frigore totum corpus jam rigidum corque jam quiescere, videtur & mors præ foribus est, sola fortior cum panno laneo calido in dorso & thorace instituta frictio vitam reddere potest. Ad suscitandum languescentem appetitum, ut & digestionem ciborum promovendam supra laudatus ZECHIVS *Consult. p. 171.* frictiones non modo circa regionem ventriculi, sed & per totum corpus suadet, utpote quibus calor augetur, liberior spirituum in ventriculum influxus promovetur, hincque digestio melius peragitur. Atque CELSVS *Lib. IV. cap. V. VI. & XIII.* frictiones brachiorum & crurum ad emendandas stomachi & intestinorum affectiones quasvis ter vel quater de die celebrandas prolixè commendat. Similiter in stomachi debilitatibus, atque in ipsa bradypepsia regionis ventriculi, frictionem cum oleo menthæ Præses, irritis omnibus internis, optimam esse expertus. Ad venerem excitandam facilioremque conceptionem conciliandam mediocres utiles esse SOLENANDER memoriæ prodidit *Consil. Med. Sect. IV. p. 368.* Non tantum in viris, verum etiam in foeminis TH. BARTHOLINVS *de usu flagellor.*

gellor. in re med. & vener. p. 30. eas, hunc usum afferre affirmat. Regione enim lumborum fricta seminis materia ad vasa spermatica confluit. De viro quodam virgarum plagis in venerem stimulado historiam refert LUDOVICUS COELIVS RHODIGINUS Lect. antiq. Lib. II. cap. XV. fol. mihi 412. Atque cujusdam, qui non mentulam ad coitum erigere poterat, nisi ab Amasia verberaretur. TH. CAMPANELLA Medicinal. Lib. III. cap. IV. artic. 12. ex Joh. Pic. Mirand. meminit. Idem de urticationibus ex aliis notum est. Insuper frictiones capitis, præsertim mane in usum ductæ, omnes sensus excitant & clarificant & mentem reddunt erectiorem.

§. XVIII. Præter jam recensita emolumenta applicantur cum fructu in sanguinis motu retrogrado juvando & accelerando, qui successiva ac repetita hac cutis pressione jugiter peragitur, quo semel habitus humore præter modum turgescens quasi depletur, ex quo circulatio liberius peragitur, quare harum usus non contemnendus erit in obstructionibus sanguinis quibusvis hinc & inflammationibus quæ plurima cum illis communia habent, infra fusius nominandis, quoniam nimirum possumus per easdem premendo liquida ab apice versus basin efficere, ut arteriæ quasi venæ fiant, sicque duce re obstruens imineabile ex angustis arteriarum finibus, in amplos magis recessus, relaxata parte, mox pellitur iterum in priores angustias. Pari utilitate inducuntur musculis antagonistis patientibus in spasmis, ex gr. in spasmis cynicis &c. ut hac ratione vi externa ejusmodi adjuti, agentium & contractorum in latere convulso nisui & tractioni majori resistent. Rursus in imminente gangræna, atrophia, aridura & gracili corporis habitu frictionis modum HIPPOCRATES annotavit in *Lib. de Medici Offic. sequentibus. His, qui carnis augendæ causa fricantur, talis adhibenda frictio est, quæ finire tum debet, quando corpus & intumuit, & ad summum fere tumor ejus pervenit. Sin fricare diutius pergas, non modo carnem non augebis sed plane minues.* GALEN. de Tuend. Sanit. L. V. testatur, frictionem ex oleo (quod emplastici medicamenti vim habet) adhibitam, multos, qui alimenti distributionis penuria laborabant, sanasse. It. *Lib. VI. l. c.* Quoniam omnia assimilationis adjumenta ut, sanguinis & spirituum animalium accessum, alimenti ad exteriora adtractionem, validiorem pororum relaxationem, inutilium & excernendorum humorum in carne hærentium digestionem & dissipationem præstat, eapropter, qui graciles, obesi fieri volunt, ad ruborem usque fricari debent. Consentit quoque VERVLAMIVS in *Sylv. Sylvar. Centur. 9. p. 941. frictiones, inquit, magis replent & pinguescunt*

ciunt corpus quam exercitia, causa, quia frictio partibus internis indulget quietem, quas exercitatio nimis saepe agitat. Eadem est ratio, cur remiges plerumque pingues & carnosi sunt, quia iis membra exteriora magis in motu sunt, quam interna partes. Quem in finem si quis frictiones adhibere vellet, laudatus Autor l. c. p. 769. suadet, ut mane fiant cum oleo amygd. addito modico nigri salis aut croci. In hoc passu B. ETMÜLLERVS T. II. p. 474. sequenti modo frictiones præscribit: *Membra aridura affecta, si malum non a vulnere, sed a tendinibus compressis fricentur urticis recentibus, incipiendo a summo & imo repetendo, donec illa labore illo diu continuato incallescant, rubescant & vasa turgida appareant.* Atque simul exempla pedum aridura laborantium hac ratione curatorum se nosse testatur. Nec repugnat ratio: alimentum enim validius ad exteriora prolicitur; si quidem pororum relaxatio, quæ tum efficitur, faciliorem spiritibus & succis nutritiis viam præbet expeditam. In hanc rem notabile est flagellis & ferulis parvis, levibus & illitis ad bonam habitudinem macilentis conciliandam, veteres jam usos fuisse, ut Autor est GALENVS 24. *method. Cap. XVI.* quibus graciles partes ad modicam usque intumescentiam flagellabant. Is modus adhuc Russis arridet, qui post frigidum balneum virgis ita se castigant, ut sanguis largissime profluat. Vel mulierculis nostris in infantum macie frictiones cum aqua calida & farina aut furfuribus probatissimæ sunt. In narium interioribus per calami asperioris intrusionem factæ stimulatorii vice funguntur. LEV. LEMNIVS *Lib. IV. de occult. nat. mir. Cap. VIII.* scribit. Subinde caput defricare aspero undique velamine, barbam demulcere ac liquamine aliquo absterforio macerare oculis claritatem conciliat. Si infra jugulum & claviculam ipsaque mammarum peripheria & circa papillas scopulis mollioribus adhibentur frictiones, lactis in mammas influxum promonent, & denegatum restituant partim titillatorio nimirum effectu & modo, quo motus tonicus in mammis & affluxus copiosior humorum intra illas invitatur, partim relaxatorio (modo) quo ob maiorem amplificationem porosæ texturæ harum partium ingressus humorum copiosior provocatur, adeoque se & excretioni lactis promptiori & majori occasio præbetur. Præses multoties a frictionibus his partibus adhibitis præsentissimam opem vidit in constrictionibus illis dolorificis & punctoriis, quas lactantes foeminæ a terrore subitaneo persentiscunt una cum lactis suppressione mox insequente atque adeo illarum duritiem & rigiditatem minuunt. Si in debitis locis aliis fiant, viam sternunt irritando mensium & lochiorum fluxui suppresso. Imo a doctis hominibus

notatum est, foetus atque molæ & secundinarum exclusionem frictiones juvare, vid. J. A. FRIDERICI Jenensis *Dissert. de uteri mola*. Ab aliis quoque & observatum, easdem urinæ obstructionem, in perinæo & regione ossis sacri factas, solvere illiusque fluxum expeditum reddere. Notissimum est frictiones in collo, dorso, brachiis, cruribus, lenes cum panno rubro commode inservire variolarum morbillorumque ad habitum corporis secessionem. Eadem & conferunt in lassitudine sive ea ex labore sit, sive spontanea a languidiore nimirum fluidorum universalium circuitu, ut hærentes humores fibrarum musculosarum jugi constrictione ad venas dirigantur. Insuper & animi pathematibus, excitando, circulum humorum restituendo, medentur frictiones, metui, terrori imprimis & mœrori ac tristitiæ. In illis enim fluidorum motus ad interiora majori impetu rapitur: edocent hoc pallor, extremorum frigus, sudor frigidus, sensuum omnium externorum subitaneus defectus, pulsus aut nullus pene, aut debilis maxime existit, adeo ut tunc temporis e vena secta vix guttula sanguinis effluat, & apoplexia, catarrhus suffocativus, epilepsia, abortus, retrocessio exanthematum, quæ & alia symptomata non raro has animi passiones insequi soleant. In his pariter circulus sanguinis & humorum lentior fit, supprimitur, partium vires & robur perduntur, spirituscentia imminuitur, humores vappescunt, stagnant, hinc morbi varii chronici insurgunt, sopiti melancholiæ & deliriorum paroxysmi exsuscitantur, spiritus non in debita quantitate & qualitate generantur, secretiones & excretiones sistuntur. SCHENKIVS *obs. Lib. I. & Lib. II.* paralylin ex mœrore contractam, animi deliquium frequens ZACVTVS LV SIT. abortum BINNINGER *obs. II. Cent. 4.* apoplexiam alii observaverunt. In memoriæ diminutione, a quacunque causa etiam ea fit, capitis frictiones & nuchæ non de nihilo sunt, commendat eas & præsertim in vertigine. FORESTVS *observat. Lib. III. obs. 33.* Præterea frictiones matutinæ & vespertinæ ex morbis longis & contumacibus convalescentibus & debilibus adhuc & qui ob dejectum virium robur, se ipsos movere liberius non licet, admodum utiles sunt.

§. XIX. Uti frictiones spiritus segniōres excitant, illorumque influxum promovent: ita nec absolum esse videtur, easdem quoque motum eorum irregularem corrigere posse. Quemadmodum enim alias spiritus animales jugiter per nervos fluentes, a quocunque objecto movente pro diversa ejus conditione & modo afficiendi variis motibus & determinationibus agitantur, ita in irregulāri motu illorum tam per blandum

dum nervosarum fibrillarum motum spiritus demulcentem quam per irritationem vehementiorem ab extra factam eorum, fibrillarum motu irritatio instituitur, ut vehementius atque rapidius per cerebrum ferantur illudque ut in vigiliis tendant atque sic prior determinatio excutitur, & ataxia illorum corrigitur, qualem effectum a vesicatoriis v. gr. toto die cernimus. Quid igitur obstat, quo minus spiritus animales inordinate agitados in omnibus propemodum doloribus gravioribus, V. Celeb. MORRHOF. in *Dissert. de paradox. sensuum Cap. V. p. 327.* vid. SOLINGEN in *Chirurg. p. 435.* v. gr. in doloribus arthriticis & artuum vagis, vid. MÖLLENBROC de *varis Cap. IX. p. 136.* in dolore ischiadico cum allio, aqua falsa v. FOREST. de *arthrit. observ. 79.* cum allio ac lacte equino. *Eph. N. C. Dec. II. an. 6. obs. 16.* sedare sopireque frictiones queant. Simili modo, in spasms atque motibus convulsivis, passione hysterica obsores præsertim foeminas afficiente spiritus & nervos potissimum occupante (& in qua alia remedia ex pharmacopolio petita violentiora imprimis v. gr. cathartica sanguinis crasin & ventriculi tonum destruentia & diuretica, cum sanguinis missionibus nociva sunt) epilepsia, item & delirio, mania &c. aliam determinationem spiritibus animalibus, frictionibus paulo durioribus calidis & siccis inducere datum est. Spasmodum, præsertim eum, qui a flatibus oritur sola frictione mitescere autor est IOD. LOMMIVS in *Observ. med. Lib. II. p. 96.* Asclepiades iisdem tractabat phreneticos, non aliam ob causam, quam, ut spiritibus & sanguine aliter determinatis atque confopitis, æqualius per universum corpus motis ac distributis, quietiorem statum atque placidiorem somnum (agrypnia enim molestissimum phreneticorum symptoma est) conciliaret. ALPHONS. DE SANCTA CRUCE Medicus Hisp. idem retulit de melancholia *Aegr. VI. p. 32.* de foemella maniaca ad meliorem mentem per frictiones potissimum redacta. Si admittere illud fas sit, quod Cardanus urticationem ad melancholiam miris modis commendat: frictionem quoque nostram & quidem multam ac fortiozem locum hic invenire posse, quis dubitet.

§. XX. Ex his sponte fluit, quod aliquando, motu tali fortiori in parte quadam eademque interdum longe remota instituto, derivationem & revulsionem simulque æqualem sanguinis distributionem præstare possint frictiones, illam quidem vehementes hanc vehementiores. Quæ veterum diversio omnino suam veritatem suumve fundamentum obtinet. Sub quo titulo vero non intelligo retractionem vel attractionem materiæ peccantis parti incumbentis; sed quod per glandulas mo-

tas & vellicatas effluente uberius sero, a vasis exinanitis absorbeatur illud, quod stagnando partibus molestiam creat. Id quod edocet retrocessio v. gr. purpuræ albæ vel aliorum exanthematum, supervenientibus diarrhœis symptomaticis. Vel si alii humores ad partes impetuosius & confertim magis feruntur, unde dein non ita commode nec secundum proportionem affluxus sive quoad quantitatem, sive velocitatem refluent; in alia vero parte motu fortiori instituto, illa ex parte in aliam sollicitantur & avocantur. Suadet hoc CELSVS *Lib. II. cap. XIV.* his verbis: *Longe sæpius alibi perfricandum est, cum aliud dolet: maxime cum a summis aut a medii partibus corporis evocare materiam volumus; ideoque extremas partes perfricamus.* Hujus gratia institui possunt frictiones, si materia peccans a partibus interioribus ad externas & ignobiliore sit avocanda, si exanthemata cutis varia, aliæque excretiones naturæ, variolæ, morbilli, purpura, petechiæ, scabies, crusta puerorum lactea, materia podagrica, & alia ex ulceribus quæ manabant & aliis emunctoriis in scorbuticis & etiam aliis cacochymicis corporibus occlusis, imo bubones maligni & pestilentiales retrocedunt, ac ægrotos statim in deliria animi deliquium, convulsiones imo præsentaneum vitæ periculum sæpissime conjiciunt. Mediantibus enim his, ab interioribus & nobilioribus partibus retrocessa materia morbifica ad exteriores & ignobiliore iterum revocatur atque allicitur, quod etiam ordinario fere felicissime succedit, nimirum facile & feliciter ab iisdem pessimis symptomatibus liberantur ægroti. Quid & inflammationes retropulsæ efficiant, abunde experientia medica testatur atque cum eadem quoad principalem & formalem suam rationem incerta motus tonici directione consistant, ita ad evocandas has commotiones inflammatorias hoc nostrum auxilium apte & utiliter confert, ipsum in motum tonicum valide operans. Si & materia peccans quandoque fixam alicubi sedem locat e. gr. in hemi-crania &c. & si serum vel alius humor in aliqua parte stagnat, cujus exemplum rheumatismus sit, quando serum situ peccans profundius latitat, aut ad eam copiosius congeritur, frictiones apprime opitulantur, ut effluxu & evaporatione in alio loco per vellicationem istam procurata, a priori refluat, quemadmodum & sæpe experimur doloribus obortis in aliis partibus, remotis licet, priores auferri, aut aliis morbis supervenientibus alios eosque præsentis depelli ut v. gr. vomitum sublatum a diarrhœa, alvi fluxum a surditate, arthritidem a tumoribus ventris, hæmoptysin a colica, asthma a crurum tumore, podagram a dysenteria, calculum ab arthritide, dolorem in nucha, ophthalmiam & odontalgiam, delirium

rium in febribus &c. & vice versa, abigi quandoque videmus. In hæmorrhagiis sistendis, porro frictiones æque paulo fortiores ubi nimirum, sanguis præter modum ex naribus, pectore, utero, intestino recto, aut vulnere etiam aliquo parti externæ inflicto effluit & vitæ terminum minatur, necessarias esse in artubus institutas, hoc ipso respectu, videtur, quemadmodum alii eorum ligaturas dolorificas commendant. Laudat illas ALEX. BENEDICTVS in *Theatr. Tab. Exercit. 26.* refertque semper eas proficuas se deprehendisse omnibus fere incassum adhibitis, imprimis in narium hæmorrhagiis & vomitu cruento. Quamvis me non lateat, TIMAEVM *Cas. Med. Lib. I. cap. XXXIV.* & GVIL. FABRICIVM *Cent. II. obs. 15.* & WILLISIVM *de Operat. medic. p. 181. §. 5.* contrarium statuere, quod a frictionibus, si asperæ & duriores fuerint M. S. incalcescat, hincque subtilior fluidiorque reddita excretionem magis augeat. Ast prout alia quoque remedia v. gr. opiata, vomitoria &c. non ideo penitus damnamus, quod quandoque inepte adhibita noxam inferant; ita & frictiones hic omnino rejicere nefas est. Totum vero hoc negotium eo recidit, ut differentiarum supra adductarum habeatur ratio. Affirmat & hoc AVICENNA *Lib. III. Fen. 3. Tr. 3. Cap. VI.* & SENNERT. *Prax. L. I. D. 3. S. 4. Cap. VIII.* hæmorrhagias sisti a frictione, si illa fiat deorsum versus extremitates, tam in pedibus, quam in brachiis. His merito jungo B. LANGII experientiam, qui *Op. P. III. p. 239.* ait: *Quando in superiore corporis regione est hæmorrhagia, frictio in inferiori, & vice versa, instituatur.* Frictione enim simul laxatur habitus corporis porosus, unde major sanguinis copia ad hunc affluit quam antea: itaque decedit quodammodo impetus & decubitus ad partem affectam. Eadem est ratio, quare pediluvia, si e naribus fortius erumpit sanguis, conveniant; quando vero ex utero vel ani vasis nimium profluit, immisiones artuum in aquam vel vinum calidum præsentissimam opem ferant. Ob eandem rationem sæpius jam citatus SOLENANDER *Consil. Med. S. IV. p. 319.* in seroso & gravi uteri fluxu, qualis & fluor albus est, frequentes universi corporis frictiones asperiusculis linteis siccis, mane institutas suadet. Hæ, inquit, exercitium intermissum supplebunt, internas humorum fluxiones non nihil alio deducunt atque dissipabunt. Idem *l. c. p. 118.* in foetore narium frictiones pedum & crurum ex usu esse perhibet. Vulgus ea persuasio tenet, cujus etiam mentio sit in *Eph. G. N. C. D. II. an. 2. obs. 56. & an. 5. obs. 127.* & in BLANCKARTI *Collect. Med. phys. P. I. p. 577.* uvulæ prolapsum sive elevationem per fricationem brachii restitui. Similiter RONDELETIVS *Method. cur. morb. Lib. II.*

Cap. IV. sequentia indicat: *Nostri rustici, tonsillarum inflammationem curant, longa frictione facta in carpo, existimantes tumores quosdam factos & apertos, frictione illa dura in Carpo predictum affectum tolli, prodest autem revera ob diversionem.* In earundem pariter intumescencia, frictionem in brachio paulo supra pollicem, instituit ST. BLANCARTVS. Vid. *Collect. Phys. med.* Angli pro revellendo humore acri e pectore atque avertenda phthisi, frictiones extremorum manuum & pedum probatissimas habent. Hic commemorare liceat: eas per superiores corporis partes ductas in palpitatione cordis Avicennam & P. Aeginettam gravidis praesertim familiari, suadere. CELSVS *de med. Lib. IV. cap. IV.* in dyspnœa ut & in tussi & faucium exulceratione multam partium inferiorum frictionem vel in sole, vel ad ignem ad sudorem usque laudat. v. SOLINGEN *in Handgriffen der Wundarzney* p. 433. Frictiones humidæ ab inferioribus partibus ad superiores ductæ pro sanguine divertendo in venarum dilatationibus præternaturalibus, quas varices vocant, cum fructu adhibentur quod & JUNKERVS *in Consp. Chirurg. p. 123.* & M. ALBERTI *in Introd. in Univ. Med. p. 185.* testantur. In diarrhœa serosa, quæ ab affluente sero p. n. vellicatis nimium glandulis intestinorum provenit, in qua alias sudorifera serum ad habitum pellentia & evacuantia maximi momenti sunt, pariter & frictiones per totum corpus maxime vero ejusdem partes superiores, non contemnendæ erunt. Nec non in aliis alvi fluxionibus admitti possunt. In colica passione, articulorum tergi & scapularum frictiones suadet CAEL. AVRELIANVS *de m. & chron. Lib. IV. c. 3. p. 595.* Regni Bengalæ incolæ pro ea curanda, abdomen fortiter fricant premuntque usque dum flatus magno sibilo erumpant, ut refert GVILIEL. TEN. RHYNE *de Moxæ usu.* Rursum ad fluxorem alvi provocandum coxendicis & inferiorum partium frictiones commendant alii. Hoc in loco commemorandi etiam sunt dolores & inflammationes diversarum partium, a quibus sanguinis & humorum impetus per revulsionem arcendus. Sic in angina pro hoc quoque scopo frictiones universi corporis asperiores laudat JVBERTVS *de thor. affect. C. I. Conf.* & DIETERICHII *Jatreum Hippocrat. p. 669.* In doloribus pedum scorbuticis frictione cum raphano rusticano vel allio conciso & aceto macerato, eorum remissio, brevi procuratur. Cl. SCHELHAMMERVS *in Disp. de capitis dolore c. VI. §. 18.* scribit, se virgini cuidam capitis laboranti doloribus suasisse, ut singulis diebus cubitum itura comaretur, ac eo sanatam esse. Pariter dolor a calculo vesicæ colis glandem concutiens, nullo alio quam perpetuæ frictionis mitioris remedio lenitur. Præter has

quoque vigiliæ & agrypniæ, adducendæ, ubi spiritus iusto copiosiores influunt, & fibras cerebri medullares impetuosius vellicant, quacunque etiam ex causa id fiat, vid. TH. BONNETTVS *Sepult. L. I. S. 17. p. 155. id. L. I. S. I. p. 9. obs. 6. Miscell. N. C. D. I. an. 1. obs. 68.* MART. RVLAND. *Curat. Empir. Lib. I. curat. 38. p. 147. it. Curat. 70. p. 158. Curat. 77. p. 161.* JOH. LANGIVS *Epist. med. L. II. p. 768. seqq.* Scalpturam cutis in capite præsertim & mollem & blandam frictionem in plantis pedum cum sale, aceto & aqua rosarum merito laudamus, quæ ad placidum invitat somnum, dum blando illo & unico saltem objecto sensibili, spiritus animales circa commune sensorium undulantes, cui attentius inhærent, ab unius organi extremi vibratione, blande moventur, demulcentur, revocantur, alia determinatio illis inducitur, poris itidem laxatis reliquisque spiritibus torpescantibus & phantasia plura non percipiente, uti videmus ab aliis tactum & auditum suaviter afficientibus somnum induci, v. gr. leni cantu, musica, ventorum fusurro, pluviarum cadentium strepitu &c. Si symptoma aliquod grave in graviter vulneratis vulneratam partem occupat, ut major evocatio fiat, ac humorum affluxio inhibeatur, utiles erunt frictiones. Denique hic hoc quoque dicendum est, quod frictiones æque validæ, illud, quod impactum est, ab externis vasis ad basin retro pellant, qua retro actione utilitate sua in praxi medica non destituuntur frictiones. Rursum commemoratio hic locum invenit frictionum earumque laudatio, in obstructionibus variis & ubique hærentibus resolvendis, uti & præsertim in menstrui vel lochiorum sanguinis, per uterum determinatione facta, per pedum frictiones.

§. XXI. Ipso hoc motu attritivo, tam a fibris tensilibus firmatis contra impulsu humorum minus proportionatum, & partis expressionem quadam adjuta atque vasis ad systolen crebriorem stimulis concitataque spirituum agitatione, particulæ humorum crassiores & viscidiores partibusque inhærentes attenuantur, dividuntur, discutiuntur, resolvuntur & fluxiliores redduntur. Ea enim quæ moventur magis adhuc quæ conteruntur attenuari, apta sunt; immo humoribus intimius firmitusque impacta, motu & calore, frictione inductis, evidenter commoventur. Quamobrem in leucophlegmatia, stagnationibus feri, viscidioris, cachexia viscida, scorbuto frigido, ubi præsertim salia viscido irretita & non sufficienter diluta sunt; hinc & in obstructionibus hypochondriorum gravioribus frictiones J. ZECHIVS *Consult. Med. p. 218. probat.* JVRGEN ANDERSEN *in der Orientalischen Reise-Beschreibung ab Adamo Oleario edit. Lib. I. cap. XXV. p. 42. refert*
in

in India, scorbuto laborantes specie frictionum quadam curari, dorsum nimirum eorum pedibus conculcando sursum deorsumque terendo, ut sanguis tenax & viscidus discutiatur & ad motum aptus reddatur. In ipso malo hypochondriaco frictiones per totum corpus frequenter inductæ, non modo humores crassos dividunt, movent, obstructions tollunt, sed & nervos corroborant. Celeberr. WEDELIVS tam siccas per spinam dorsi, quam humidas cum spiritibus chymicis per abdomen & spinalem medullam, præsertim pro hoc scopo elegit, vid. Ejusd. *Diff. de malo hypoch.* Pari modo eadem mucum scilicet gelatinosum in musculorum immo ossium interstitiis attenuando, ac spiritus excitando etiam egtegie in rhachitide recenti conducunt. Hoc in loco commemorandum, quod etiam in vulgus notissimum & CHALMETIVS in *Ench. chirurg. Lib. I. c. XIII.* quoque commendat, adversus ganglion, si in principio præsertim fiat, certissimum remedium esse frictionem multam & quotidianam cum saliva ac ligaturam fortiolem percussione & quicquid dolorem excitat. Hos aliosque tumores frictiones discutiunt, præsertim si alia intervenientia media iisdem simul jungantur, sic in tumore capitis frictiones & pectinationes ejusdem matutino præsertim tempore institutas valde commendat ZECHIVS *Consult. p. 192. & p. 218.* Necessariæ magis sunt, in curatione contusi, pro resolutione, præcavenda, suppuratione gangrænaque avertenda. Verrucæ tolluntur florum calendulæ recentium affrictione ex testimoniis in *Eph. G. N. C. D. III. Ao. I. obs. 140.* & *Disp. Celebr. WEDELII de verrucis p. 23.* legendis. Collictrumas sanguine muris calido abactas fuisse referunt *Eph. G. N. C. modo cit. D. II. obs. 92.* Parotis glandula, indurata omnium optime solvitur atque emollitur fotu prius aliquoties de die ex aqua & aceto facto diutino pannis laneis, perfrictu. Tumores mammarum a lactis copia mulierculæ cum pelle mustelæ albæ fricant & discutiunt, quod experimentum etiam Celebr. WEDELIVS jam laudatus *de medic. facult. cognosc. ratum* habet *Lib. II. S. 2. c. IX.* Nec non tumorem abdominis a flatibus immo ejusmodi, quem tympanitem appellant, cum pannis calentibus auferunt frictiones, uti eas utilissimas tali in casu & quidem cum lixivio RIOLANVS in *method. med.* FERNELIVS *Lib. IV. S. 3. cap. VI.* cum succo alii & vino HAÆFERVS in *Hercule med. Lib. VI. de febr. C. I.* cum oleo laurino SENNERT. in *Pract. med. Lib. III. p. 768.* experti sunt, quibus addit propriam experientiam Præses in puella 10. annorum tympanite per 3. annos laborante, quæ oleo destillato menthæ, abdomine sæpius linteaminibus fricto, feliciter (junctis tamen & solventibus inter-

nis est restituta, flatibus exinde copiosis explosis. Hic quoque occurrit morbus ille Hungarorum endemius Czemer dictus, qui tumor subcutaneus dolorificus est, ad instar nodi alicujus mollioris, sub carpis præsertim manuum, & a latere supra arterias atque dorso cum inappetentia, nausea, dolore stomachi gravativo ac cephalalgia, quem ut JOH. PATERSON HAYN in *Eph. N. Curios. D. I. an. 2. obs. 38.* & M. A. SINAPIVS in *Paradox. med. P. II. p. 78. §. 6.* referunt, forti frictione cum allio, aceto, pipere & sale statim curant. Ipsi immo hac exagitatione motus naturæ secretorii juvantur, in quibus casibus haud dubium promittunt frictiones auxilium, quatenus heterogeneo subigendo occasio nascitur & stimulus. Inde est, quod a scabiæ retrocessa, oriundæ febres, illius restituta secretionem tollantur. Exinde variolæ & morbilli segnius & difficiliter prodeuntes juvantur. Simile pariter judicium ferendum est de petechiis aliisque cutis exanthematibus, purpura rubra & alba &c. in quo casu maxime illas proficuas non ita pridem in foemina quadam deprehendi. Verum non evocant solummodo, sed & extus servant, & retrocessionem impediunt. Exinde & in febribus pestilentialibus, quæ miasmata sua venenata interdum cum excretionem quadam in partibus externis separare solent, cum successu adhibentur. Immo, si in peste erupturi bubonis indicium ex ardore partis percipitur, vel vaga adhuc materia ad aliquam partem determinanda, minime negligendæ sunt. Commodum erit hic simul monere, si bubo, anthrax aut tumores infra lumbos protuberant, consultius esse, si frictiones infra has excretionem in tibiis & cruribus fiant, & si in capite & in collo apparent in brachiis & scapulis, ne interturbetur naturæ motus, de quo conf. PALMARIVS de *febr. pest. c. XXI.* Noluimus hic oblivisci, lenem palpebrarum frictionem cum succino præsertim ad discutientia ophthalmica pertinere.

§. XXII. Etenim quemadmodum sic alterant frictiones, ita & omnino tandem si & pro ipsa morborum curatione adhibentur evacuant & humores jam præparatos motosque extra corpus proscribunt calorem cuti imprimendo, qui humores & discutit & consumit, ac cutem rarefaciendo, sicque disponendo ut ad eam sanguis copiosius delatus heterogenitates sibi intertextas per poros patulos dimittat, nec non sanguinis motu retrogrado accelerando sicque habitum humore præter naturam repletum & turgescens deplet, ut etiam hoc ipso sensu eas a parte pressa removere & evacuare humores prementes dicere conveniat. His modis inquam eliminationem, insensibilem tamen, adjuvant, quæ tran-

spiratione universali ordinario fieri assolet. Ea propter in plurimis hæc intentio obtinenda. Præsertim autem in omnibus fere catarrhis, frigidis rheumatismis, hydrope anasarca, œdemate, eæque fortiores & cum sale, aqua salsa & sulphurea etiam cum oleo calefaciente ad transpirationem usque insensibilem auctam imo sensibilem procuratam celebrari possunt. Vid. C. CELSVS *de medic. Lib. IV. cap. IV. p. m. 191.* SCHOLZII A ROSENAV *Cons. Med. p. 362.* Asclepiades in hydrope præsertim anasarca frictionum usum valde commendabat. In catarrho & quocunque alio capitis affectu a stagnatione lymphæ orto, Præses sacculis calidis, quibus cephalica inclusa sunt ut mentha majorana ros marinus, flores pœoniæ liliorum convallium, radices ireos acori veri pulverisatæ, milium tostum, sulphur, sandaracha, caput sæpius fricandum suadere assolet, nec sine exoptato eventu. Etenim si & transpiratio fortior desideratur, sudorem non difficulter movent, Autore SYLVIO *Metb. Med. L. II. c. II.* imprimis si concurrat partium cum vini spiritu vel oleosis destillatis ac penetrantibus inunctio. Neque minus in quacunque cacochymia sic proficuae esse possunt, quatenus ex dictis rationibus heterogeneum non solum subigitur, resolvitur & extra corpus ejicitur. Speciatim dicendum est: frictiones scorbuticis etiam ad hunc usque effectum protractas admodum esse necessarias; si enim in his transpiratio insensibilis per cutem impeditur, mox varia mala oboriuntur, cardialgia, vertigines, lipothymia, dolores artuum gravissimi, inflammationes, gangræna, cephalalgia, paralyfes, vomitus, diarrhœæ. A maculis quoque scorbuticis cutem repurgant, cum semine sinapi aceto confuso, succo citri &c. vid. MICHAËLIS *in Praxi chir. p. 184.* ETMÜLLERVS *de malo hyp. & scorbut. p. 412. seq.* Porro in scabie aliisque cutis affectibus morbisque a scabie præsertim retrogressa oriundis, in arthritide, vid. SOLENAND. *Consil. Med. S. IV. p. 423.* podagra, rheumatismo, malo ischiadico, vid. J. DE VIGO *Chirurg. P. I. Lib. V. c. V. p. 821.* ere sunt. Hic in memoriam incidit Avicennam frictiones cum aceto & sale in crusta lactea puerorum laudasse. Apud vulgus probatissimum erysipelatis remedium est, hic non omittendum, licet ex parte phantasticum, quando cum albæ mustelæ pelle illud fricant, nam etiam talis mollis alius animalculi, nigri etiam tantum valeret. In ictero partibus intertextas particulas flavas biliosas resolvendo & evaporatione ejiciendo agunt. Quod in motum cieant humores simulque transpirationem per patulos poros promoveant. WEDELIVS *in Disput. de Verrucis Cap. VI. p. 23.* hæcce concrementa tuberculosa, frictiones lenes & lævigantibus

bus junctis, ne fibrillæ exasperentur & ad callescentiam disponantur præservare curareque afferit. Nec silentio prætereundæ sunt febres varii generis intermittentes præsertim non raro a transpiratione prohibita provenientes, quæ fricando iterum promovetur, dum juxta alias rationes in antecedentibus memoratas corpus rursus perspirabile redditur meatusque aperiuntur. vid. PLATERVS *l. c. Lib. II. p. 306.* qui cui-dam febre laboranti epidemica plantas pedum aceto & sale, crura vero panno aspero fricare imperabat, atque exinde non levem opem vidit. Conf. FOREST. *Obs. T. I. S. I. p. 7.* in ephemera easdem suadens. Supra memoratus scriba apud BORELLVM Vid. *Hist. & Observ. Cent. II. XC. p. 186.* febricitantes omnes, brachiorum forti fricatione feliciter curavit. Licet CELSVS *de med. Lib. IV. c. XIV.* non in ipso febrium paroxysmo & die tantum intermedio frictiones admittat, nos tamen etiam existimamus tunc quoque eas esse satis convenientes. In morbo hungarico qui febris maligna, continua est, eas admodum proficuas esse, ait FASCHIVS in *Disp. de Morbo Hung. Cap. VIII. p. 28.* Contra gravem auditum & surditatem pariter illas PLATERVS *Obs. Lib. I. p. 108.* laudat. Aurium tinnitum frictio cum furfuribus calefactis brevi etiam hac ratione aufert. Si hæmorrhagiæ criticæ alias consuetæ quales frequentiores narium sunt, emanferunt, & capitis gravitatem, dolorem, apoplexiam variaque alia pericula, aut provocant, aut certe minantur, frictiones narium asperæ & multæ tam externe quam interne institutæ, ad irritationem hæmorrhagarumque consuetarum provocationem sanguinisque evacuationem utilissimæ erunt, sicuti eundem in finem Ægyptii quondam narium scarificatione felici cum successu usi sunt. Hujus spicæ stramineæ fortis in nares intrusio iterata vicem gerit. Hæmorrhoides cœcæ panno aspero vel ex FR. VALLERIOLE præcepto foliis ficus vid. *Observat. med. Lib. II. p. 114.* fricantur, ex quo aperiuntur & sanguis ex iisdem exoneratur. In obesitate nimia quantitate multa, & qualitate mediocriis convenit frictio, ut obesitas, carnisque multitudo imminuatur, partibus oleosis abundantibus nutritiis resolutis atque ejectis. Non paucis solenne est capitis gravitatem & dolorem tensivum frictionibus capitis cum furfuribus calefactis curare. Ad capitis refectionem & a superfluis stagnantibus humoribus liberationem ferreo pectine super prunis calefacto, sæpe usus est ROLFINGIVS, vid. *O. & M. M. S. Lib. IV. S. X. P. III. c. II.* Immo quatenus sic evacuant, plethoram tollere & sanguinis missionis vicem quotidianam, frequentes atque validiores ferre possunt, idque eo magis cum in ea perspiratio semper lan-

guidior deprehenditur, ex quo deinceps impuritatibus retentis lymphæ acida & viscida, bilis acris & caustica evadit, circaque varias partes congestiones sanguinis fiunt. Qualem effectum alia quoque exercitia edunt. De nostro hoc exercitio SENNERT. *Instit. p. 1155.* ita loquitur: *Frictio sanguinem imminuit, quia calorem in corpore excitat, qui substantiam corporis nostri dissolvit & dissipat.* Mollis tamen illa hic sit, non dura, vid. H. AVGENIVS *de Miss. Sangu. Lib. II. p. 50.* Ego adjicerem, frequentem quoque in hoc casu exposci. Qua occasione vel in transitu quasi simul moneo, ut homines mollioris, spongiosi & rarioris corporis habitus, & quibus præsertim plethora cum cacochymia est conjuncta, nimiam vasorum repletionem & simul & semel per venæ sectiones suspectam habeant, quoniam transpiratio exinde æque ac in plethora læditur atque impuritas humorum increscit, quare iisdem auctor suæ forque essem, ut ad paucam saltem quantitatem sanguinem & ad paucas saltem uncias per venæ sectionem imminuant, & reliquum, qui in vasis adhuc superfluum est, per frictiones repetitas, præsertim & cibi abstinentiam & similia discutiant atque sic successive absumant. Medendi rationem Galli quidam totam luis venereæ in frictionibus & sudoribus ponunt. Mulierculæ nostræ ex utilitate, nutricum ubera ira aut terrore percitarum priusquam infantes ab hac alteratione admoveant, bene fricanda aut emulgenda præcipiunt. Aliqua ex parte huc spectat evocatio corporum solidorum, quorum exclusioni, ut vocant, spiritus admonentur officii sui, a frictionibus, quo & subsistentia humorum tollitur & putredo arcetur. Conf. WEDELIVS *Amœnit. M. M. p. 64.* Atque etiam expulsio veneni suscepti juvatur, quæ partim peragitur transpiratione per frictiones aucta, partim per easdem minuendo resistantiam in loco ubi minus id nocet, ut dein vel ipsius naturæ opera vel medicaminum pellatur & expellatur, ut olim id per suctus Marforum & Psyllorum fiebat.

§. XXIII. Restant quidam casus chirurgici, præter illos qui in antecedentibus v. gr. de gangliis ac tumoribus aliis, jamdum adducti sunt, qui a frictionibus auxilium quoque expectant v. gr. si in manu carpi & metacarpi & in pede, tarso & metatarso, ossicula introrsum vel extrorsum, frequentius tamen introrsum luxantur, frictione quoque juxta ipsum HIPPOCRATEM *Lib. de articul. §. 7.* restituantur, quæ tunc repositionis vicem explet. Hic adhuc ultimo loco commemorandum convenit, eandem cum convenientibus mediis, dentium gingivarumque vitiis mederi, qua de re jam Plinius egit. His denuo addamus quod

quod HIPPOCRATES *Lib. de visu* proponit aliquamque oculorum quasi scarificationem simul adducit: Lanam enim Milesiam adhibet palpebræ & tunicæ albugineæ fricandæ, donec sanguis profluat ac tamdiu continuat, usque dum non amplius sanguis sed sanies prodeat. Plura quidem de insigni frictionum usu possemus addere, sed hæc primaria sufficiant & modo, modum & finem in recensenda illarum utilitate faciamus.

§. XXIV. Tanti hi frictionis usus sunt iique admodum utiles ac maxime necessarii, subest etiam quidam adhuc, qui delectationem atque jucunditatem quandam simul asferre solet; Nimirum pruritu urgente præsertim frictio suavissima est, ut constat de Socrate jamjam ex succo cicutæ hausto morituro, qui cum a vinculis ferreis in quibus tunc detentus fuerat, solutus esset, scalpendi necessitate urgente in pedibus, ex gravitate compedum, jucundissimam sibi istam fricationem esse fassus est partis prurientis, ut habetur apud PLATONEM in *Phædone*.

§. XXV. Absolutis indicationibus, quibus frictiones satisfaciunt, scrutanda & illa sunt, quæ earum usum certo modo prohibent, aut saltem eum moderari jubent. Ut enim transpiratio, quam movent frictiones minor, sic etiam major & nimia corpori exitiosa est. Equidem lenes, molles & paucæ vix nocebunt, siquidem semper sine corporis perturbatione peraguntur, sed multæ saltem & duræ quandoque, non debito loco & tempore adhibitæ incommodæ esse possunt. Sic GALENVS *de Sanit. tuenda Lib. III. C. ult.* voluit, in frictionibus ventris omnino non contingendum esse abdomen, quum alioquin periculum sit, ne & cibum deterius concoquat & succus quispiam, ex eo semicrudus in corpus digeratur, caput turbetur & stomachus subvertatur. Sic eadem in principio morborum sic dictorum putridorum, item phrenitide &c. minus conveniunt, quod etiam a veteribus jam cautum esse legimus. Minus quoque quadrabunt pustulis in cute efflorescentibus. Pariter vitentur statim a venere, item omittantur ab iis qui longa inedia exhausti sunt. Quando enim plus perspiratur, quam victu reparari possit, necesse est, quantitate succorum diminuta minui circuitum sanguinis & vires brevi omnes consumi, quod innuit GALENVS *Lib. II. Aph. Comm. 16.* dicens: *Frictio cum inedia non fieri debet.* Et *Lib. V. de Sanit. tu. partibus infirmis* illas, quo tempore laborant, admoveri non convenit. It. *Lib. III. l. c.* frictiones duræ tum fugiendæ, dum simul & excrementa digeri, & quæ densa sunt molliri convenit. Ita & de aliis circumstantiis judicandum erit, v. gr. in spasmo non applicari debent parti ipsi laboranti &

jam debilitatæ, sed musculis antagonistis, ut contracti ad æquilibrium iterum sollicitentur. GVIL. FABR. HILD. in *Chirurg. sua* p. 544. equidem illas damnat in omnibus morbis acutis, v. gr. in pleuritide &c. quia sanguis nimio opere calefieret. Quod vero de frictione nimis forti duræ atque assidua intelligendum esse; mollem autem & levem, minime nocere posse, reor, ex rationibus supra allegatis. Recte igitur nimis quandoque dissuadentur, ne affluxum justo uberiores calorem nimium ac dolorem, tumorem inflammationemque ipsam ipsasque febres concitent, & frequentior partium exteriorum attritio eas per transpirationem nimiam reddat effoetas, quo corpora nimis exsiccantur & extenuantur teste GALENO *Lib. IV. Aph. Comm. 13.* qua ratione etiam in alvi suppressione, & iliaca passione, nimis & duræ facile, transpiratione aucta, nocere possunt. Rursum PANCIOLOVS notat in *Observ. med.* p. 192. noxam, quam Capucini, monachi, ex perpetua frictione per aspera vestimenta sibi contrahunt, quorum cutis universa exinde durissima redditur, adeo, ut callo quodam obvoluta sit, unde pori clausi fiunt, sudoris egressum prohibentes, quare materia, quæ per poros egredi debet, prohibita, ad nobiliores partes recedit & præcipue ad pectus, pulmones, ac phthisin, hydropem & pleuritides spurias & similia mala procreat: Nec statim validissimis utendum frictionibus ne stagnantia multa in distentis nimis vasis, nimia copia cor versus pressa, illud obruant & suffocent, vel teneriora vasa, acutiori motu, rumpantur. CELSVS *Lib. II. cap. XIV.* in acutis longam frictionem damnavit, scribens: *Longa vero frictione uti, neque in acutis morbis neque incrementibus convenit; præterquam cum phreneticis somnus ea quæritur.* Quando & in antecedentibus in doloribus & vulneratis suasimus frictiones, illud in partibus ab illis remotis, pro derivatione, revulsione, evacuatione, intelligendum est; hic vero eas in ipsis partibus affectis dolentibus, pruritu, vulneribus & ulceribus dissuademus; licet enim frequenter partes dolentes manibus scalpantur, unde dictum illud natum: ubi dolor ibi manus, ac permulcendo ac blande fricando levare dolor videatur, nonnunquam tamen irritata nimis ac exacerbata feri salia, cum sanguine venarum capillarium extimarum commiscantur, metusque inflammationis tandemque gangrænæ injicitur, major irritatio exinde, major humorum affluxus, majorque inflammatio ac deinceps gangræna concitantur. Vulnera item & ulcera non raro manuum frequenti contrectatione pejora redduntur. Atque si nudæ frictiones quandoque suspectæ esse possunt, eo magis quæ cum variis medicaminibus fiunt. Exempli loco saltem adducam casum, quem D.

COBERVS *in obs. castrens.* adducit de Nobili Polono, biliosæ tenioris & delicatioris constitutionis, qui frequenti morbo in Hungaria, correptus ex forti illa consueta ibi, cum allio, aceto, pipere, sale communi, sed in-tempestiva frictione, in lethalem febrem acutam ægre curandam incidit. Hinc ad præcavendam forte noxam, quam timent, VERVLAMIVS *H. V. & M. p. 548.* levem inunctionem cum oleo post frictionem institutam suadet.

D. S. L. & G.

X.

DISSERTATIO MEDICA

DE

MOTV VENTRICVLI

ET

INTESTINORVM PERISTALTICO

PRAELOQVIUM.

Generato animali, ut vivat, crescat, perficiatur, atque ad ultimum usque vitæ terminum conservetur integritas ejus, nutritio ulterius accedat (ita tamen, ut ejusdem corpus non perpetuo augeatur, sed ad auctioris tantum metam definitam) requiritur, quæ quotidie tametsi eam nemo fieri sed factam demum sentit, refarcit atque instaurat viresque sanitatem ipsamque vitam fartas tectasque præstat adeoque hæc ac illa æque necessaria est atque sine qua brevi tempore totius corporis corruptela ac ruina metuenda foret. Sicque vita & nutritio pari passu ambulant atque arctissimo velut vinculo sunt combinatæ. Quamdiu itaque vividum ducimus spiritum, tamdiu etiam nutrimur, & e converso, quamdiu nutrimur, tamdiu quoque vita fruimur, sive jam ea sit plena ac perfecta, sive aliqualis saltem & valde exigua, sive etiam mala. Nutrimentum certe est vitæ blandimentum, immo co-
lumna

lumina ejus ac fundamentum. Hæc per tot ambages facta ac circuitus non nisi generationis continuatio & renovatio (plastica enim facultas, quam vocant, nunquam perit) sive minutissimi corpusculi, quod jam in femine foeminino, i. e. ovulo, delitescit extensio est, adeo inter se conveniunt & sibi similes sunt, ut opus laborque sit easdem a se invicem discernere. Ambæ a fluido & molli incipiunt, & ad spissum, solidum durumque sensim sensimque itemque ex facili progrediuntur, atque sicuti vita in calore consistit, ita caloris derivatio, mediante sanguine quem incolit, perennatur. Ambas vitalis ac utilis quidam lymphaticus ingreditur succus. Dolendum modo quod pyrrhonia prorsus hæsitatio-
ne de modo formali hic loqui saltem liceat. Non una vero nutritio-
nis necessitas est, utpote quæ singulas corporis partes, ne unica quidem excepta, in justa quantitate & qualitate mutuaque agendi habitudine atque æquilibrio (perfectissimo sanitatis firmissimæ summo indicio) con-
servat: Sive hæc & principii vitalis conservationem & corporearum par-
ticularum temperatarum dulcium ac benignarum & facile exsolubilem
& tenuium, (quarum calculum curiose satis inivit SANCTORIVS *in med. stat.*) quæ quotidie tam modum destructivum quam nutritivum ita di-
sponentem, ut ambo se mutuo foveant ac juvent, secundum naturæ le-
gem, deprædatorio calore & motu attritivo inter se frequenter collisæ
(detrita etiam solida minima liquidis mixta intus forisque separantur,
dissolvuntur, immutantur, exhalant, perduntur & consumuntur, quo prio-
rem formam amittunt, atque paulatim ad machinæ animalis, quæ ad in-
star hydraulico-pneumaticæ se habet, destructionem paratur via) repa-
rationem sistit, solidarumque partium æqualem motum, (qui systole & dia-
stole peragitur) legitimam capacitatem & expansionem atque elongatio-
nem, flexibilitatem, apertionem permeabilem & firmitudinem, & ad soli-
tam, convenientem necessariamque magnitudinem & staturam (usque
atque singulis animalibus ejusdem terminum præfixum) omnium mem-
brorum accretionem (per pororum repletionem alimento nutriendo
consimili) atque factam exinde extensionem, involvit. Hinc belle MAR-
CVS CATO *apud Gellium* dixit: vitam humanam prope uti ferrum esse
quod (exercendo) conteritur. Etenim nec per horulam quidem sine
decessione & accessione, vita trahitur. Nam laudabilis mixtionis hu-
morum vitalium conservatio non solum in perpetua partium inutilium
separatione ponitur, quam plurimi saltem hodie spectant, sed nova im-
primis succorum dulcium ac bene inter se temperatorum, accessione
tanquam per chymiam naturalem (cui cum artificiali, quoad vasorum,
ignis,

ignis, foci, spiraculorum &c. rationem analogia quædam eaque haud obscura intercedit) mire præparatorum, opus est; quam vero jam non satis ex dignitate vulgo considerant. Ad hanc chylicatio debitum succum nutritium præbendo suam confert operam. Hæc in ore inchoatur assumptis congruis alimentis, per salivæ commixtionem, masticationem, dentium maxime ministerio præparationem, & in ventriculo variorum rursus mediorum & instrumentorum ope, jam maxima ex parte continuatur & peragitur. In intestinis, inprimis in duodeno pancreatici & biliosi succi maxime accessione ulterius perficitur (hinc ibi omnia sunt liquidiora) tandem in vasis lacteis siquidem & ibi per copiosam satis limpidam lympham, a glandulis advectam, diluitur magis simulque leniter premitur ac comprimitur, exaltatur, particulis vero salinis, sulphureis, aquosis, exacte inter se commixtis ac superfluis nutritionique parum aptis, separatione & ejectione foras, sicque concinna depuratione demum absolvitur penitus. Hæ partes, nutritionis origo, fons & radix existunt, unde convenienter satis ARISTOTELES 4. part. animal. 4. ventriculum, terræ proportionem respondere voluit. Quemadmodum enim terra plantis, sic ventriculus partibus animalibus alimentum subministrat, & HIPPOCRAT. belle dixit 4. de Morbis: *quoad homo vivit, ubi cibis & potus in ventriculum deciderunt corpus ex ventriculo haurit, hauriunt & fontes & expleti corpori transmittunt.* In his uti in aliis viget motus quidam, peristalticus dictus, plus plusque in chysificationis negotio valens, atque hinc obque plane singularia quædam phænomena atque attributa admirationem certe inducentia, consideratione paulo ampliori dignus. Quem laborem qualemcunque jam a nobis susceptum benevole accipiat L. B. Ne autem is sine auspiciis & favore Summi in cœlis Numinis, quod vitam & valetudinem mortalibus donat, moderatur atque tuetur, a nobis suscipiatur, devota mente precamur, ut declarantibus nobis, vires ex alto quam clementissime largiatur.

§. I. **N**Omen (ut apud PLATONEM in *Cratilo* legitur) rerum substantiam docendi, discernendique instrumentum est: quare vocem, quam Dissertationis præsentis frons gerit, prout fert pene solennis observatio, exponamus quoque, ut consent modo, ejus natales, qui græca origine oriuntur, & audiunt cognato vocabulo, motus circumpressorius, qui coarctandi circumcirca vim habet. Haud multum ab simili modo quoque peristole vocatur. Aliis motus vermicularis sub nomine venit, quia vermium ad instar sese contrahit. Ab aliis, motus

testudineus appellatur. Vide CHARLETON. *Exercit. physic. anatom. III.* Recentiorum nonnulli oscillatorium motum eum appellare malunt. Estque nempe motus, qui in oesophago jam incipit, ventriculo & intestinis maxime pressoria vi, lumbrici reptantis instar, a partibus superioribus ad inferiores, mediantibus fibris undatur, volvitur, & alimenta inprimis ore assumpta ibique præparata in ventriculum dimittit, eademque maxime ibi soluta, digesta, ex eo in intestina & chylum perfectum in vasa lactea agit, scybala vero ex corpore ejicit &c.

§. II. Scilicet officina chylicationis, mirandi atque imperscrutabilis fere naturæ operis (hincque a GALENO *IV. de us. part. Cap. I.* non humani sed merito divini salutati ipsiusque Paracelsi vel Hermetis dexteritatem inimitabilis) canalis alimentorum & excrementorum: oesophagus, ventriculus, & longum intestinorum volumen, ab orificio usque ad finem, per unum canalem & ductum continuatur, modo quod ventriculus sit pars intestinorum magis expansa atque amplissima, & intestina nil nisi ventriculus in arctum magis spatium contractus, ac in longos tubos extensus. Eadem enim singula constant substantia, eadem structura iisdemque poris, aliis foris intro spectantibus, calorem & spiritus immo interdum aquas in cavitationem abdominis elapsas intromittentibus & recipientibus; aliis intro foras spectantibus, halitus a ciborum digestionibus elevatos contra transmittentibus, nullos vero remittentibus, Conf. CHRIST. VATER *Disput. de Transpirat. insensib. C. H. Thes. XIII.* eademque natura, eodem motu ejusdemque indolis liquore, qui exstillat, solvente, eodemque tandem officio gaudent. Totidem nimirum componuntur tunicis, eademque fibrarum serie collocata. Adfunt enim singulis quinque tunicæ, quarum exterior tenuis est, & membranacea habetur, nervea potius dicenda, cum ex meris omnino fibris nerveis exilissimis, vario nexu inter se complicatis, constet. Huic cellulosa adhæret a Clariss. FRID. RVYSCHIO inventa, cujus cellulæ etiam in non æque obesis hominibus pinguedine refertæ sunt, ac in hydropicis asciticis præsertim situ peccans in se continent serum. Tertia musculosa seu carnea & fibrosa hanc excipit, quæ duplici saltem fibrarum ordine est conflata, quarum exteriores longitudinales, interiores æque longe illis plures, (ut scilicet motum peristalticum majori vi atque conatu præstent intestinorumque canalem stringant aptissime) transversæ & circulares a Vesalio, Fallopio, Aquapendente, B. Bohnio & Ortlobio, ab aliis circulares, a Stenone spirales, nominantur: tertia enim & intermedia fibrarum series obliquarum, quæ acceptum retineret, quam Fallo-

Fallopious Laurentius & Bartholinus agnoscunt, vix conspicitur. Perinde Willisius duplicem musculum compositum, duplexque stratum fibrarum obliquarum sese mutuo decussantium, finxit potius quam revera demonstravit, etiamsi pinxit atque delineavit. Seduxit forte hunc eminentem in medicina Virum brutorum anatomia, in quibus utpote prono corpore incedentibus & horizontaliter gula locata, capiteque in terram defixo deglutiunt, utique tales inveniuntur: in homine vero, cui soli os sublime datum est, cœlumque intueri, alius fibrarum ordo omnino habetur. Nec est, cur de ventriculo dubites: eum haud alia fibrarum serie esse instructum, quod fere apparet, sed revera tantum apparet, & cum rei veritate non convenit. Nam quoniam in ventriculo, sphaericam figuram referente, non in rectas lineas, ut in gula, excurrere possunt, sed hanc sequantur necesse est. Hinc dum ab uno ad alterum orificium feruntur, ascendere, descendere, incurvari eas diceres. Idem de circularibus putares, eas ob hanc pariter rationem, modo recta a summitate ad fundum, modo oblique magis flecti. Quarta nervosa vulgo appellatur, sed rectius rursus tendinosam eam esse dicitur, quia ex tendinibus carnearum fibrarum, musculosæ tunicæ, componitur. Præ reliquis hæc longior est, & varias plicas, rugas & inæqualitates præeminentes transversas potissimum, & sinus tam in ventriculo, quam in intestinis imprimis tenuibus, format. Intima & ultima tubulosa & glandulosa est, & in ventriculo & intestinis crustæ etiam villosæ, & ab Hornio velamenti bombycini, & spongiosi peristromatis a Pecqueto nomen eidem imponitur. Hæc propter porositatem & tubulosam conformationem, filtri loco se habet, quæ laudabile tantum fluidum transmittit, crassum vero ac iners prompte excludit.

§. III. Harum partium initium faucibus cohæret, sub pharyngis nomine veniens, aliquot musculorum paribus, ut stylopharyngæorum, cephalopharyngæorum & sphænoparyngæorum & ab utroque scuti-formis cartilaginis latere oriundo sphinctere in ejus summo, compositum. Ubi victu nos, compulsi famis stimulis, reficimus, hoc ore assumpta alimenta solidiora prius bene masticata subacta, permista attenuata atque comminuta & salivalis laudabilis humoris tanquam genuini menstrui permissione prius bene humida & præparata suscipit, per easque commissa sibi adactione, contractione & coarctatione ulterius per gulæ tractum, cum diaphragmate, trachea & dorso connexum excipientibus nimirum longitudinalibus, & constringentibus circularibus fibris illius promovet, quam actionem deglutionis vocant.

§. IV. Descenso lubrico œsophago, perforatoque diaphragmatis inferiore musculo, quo loco plexus nerveus est, a nervis sextæ conjugationis derivatus, inter hepar a dextris & lienem a sinistris quidem ejusque insigni portione tectus, paululum in sinistrum hypochondrium inclinatus canalis, in amplum spatium amplamque globositatem oblongatam atque tibiam utricularem fere referentem dilatatus & formatus ventriculus constituit: A tergo, pancreas constitutum, & fundo colon, intestinum substratum, omentumque (gemina superius divisa inferius conjuncta membrana quidem sed venulis arteriisque quamplurimis ad instar retis refertum, quibus pinguedo forinsecus adnascitur) annexum est, quod operimentum dicerēs; quoniam superior ala ventriculi fundum, inferior, hepar, lien, pancreas contegit (hinc ejus defectum ægre tulit apud Galenum gladiator illiusque vicem supplevit lana) dextorsum rursus incurvatur in fundum & flexus ac successive angustatus, atque hinc iterum ascendens in canalem mox arctiorem & longissimum, adeo ut sexies quandoque septies hominis mensuram superet ac totam ferme abdominis cavitatem repleat, transit, & in varios hinc sinus, gyros, circumvolutiones, anfractus & spiras disponitur & convolvitur, ne alimenta citius justo elabantur & ne vix absoluta chyli elaboratione, si statim elaberetur, aliud mox alimentum assumere cogamur &c. animalia hinc quo breviores & rectiores ductus habent a ventriculo ad anum, eo gulosiores sunt, exemplo anatum, lupi cervarii & corvi aquatilis, & hominis illius parisiensis, cujus mentionem facit DIONIS *Nouvelle Anatom. de l'Homme* p. 170. Orificia duo hic inprimis spectantur, in suprema ventriculi regione æqualiter propemodum posita: sinistrum nempe plexu a nervis sextæ conjugationis efformatus, qui sensibilitatem ejus augeat; in hoc namque natura sedem posuit appetitus animalis, & ab ejus læsione symptomata proficiscuntur, quæ vulgo cordi tribuuntur, instructum, quo ventriculus superne patet, gulæque subjacet conjunctus, per quod introitus panditur, & dextrum, quod & pylorus, quasi janitor vocatur, & exitum rursus concedit. Hoc sphinctere seu valvula orbiculari est donatum, majori plica a tendinea tunica formata, ut transitus non reditus remeanti chylo constet, estque plurimis fibris, iisdemque satis validis stipata, ut commode coarctari possit; attamen utrumque clausum in recte valentibus est.

§. V. In intestinorum orbibus quoad situm, amplitudinem & usum figuram crassitiemque variantibus non nihil per duplicem membranam mesen-

mesenterii connexis & veluti vinculo in medio collocato suspensis a vertebra, a lumbari prima & tertia & invicem se colligatis, ut ab omni contorsione semper maneant liberi & quidem eorum statim principio duodeno, facto deorsum parvo quodam flexu, recta spinam versus elato atque vertebris lumbaribus transversim incumbente, (quod ventriculus quasi succenturiatus est) ductus choledochus & pancreaticus inprimis nominandi & in reliquis multæ latebræ, multique recessus qui ipsis in- sunt, notandi. De his modo seorsim attendendæ sunt valvulæ, conni- ventes, a Kerckringio dictæ & eidem adscriptæ (quamvis ante eum Hier. Fabricio eas innotuisse constet) quarum potior & major colo, omnium intestinorum sensibilissimo, quoniam præ aliis ligamento nerveo tendi- noso quodam præditum est, adstructa est Bauhini vulgo nominata, ei- que Auctori, sed falso rursus adscribitur, (cum jam Varolius, Sal. Alber- tus & Piccolhomineus illam observaverint) & membranosi vel carnosi circuli speciem refert. Reliquæ minores, cellulas hujus intestini (coli) simul efformant, a dicto ligamento huic proprio contractas (hinc anno- tante Spigelio hoc rescisso disparent,) & ex fibris carneis, musculosis motricibus constant, atque impediunt partim ne chylus juxta lympham regurgitare & regredi possit, partim, ne celerius nimis effluat, atque ad- juvant potius, cogendo, ut tunicam villosam subintret facilius. Quæ valvulosa conformatio, quique spiralis hujus texturæ tractus atque actio in lepore inprimis, vulpe marino & struthiocamelo &c. investigantibus claret. Speciatim dicendum est: cellulas diverticula facibus concede- re, ut inibi hæreant, donec collectæ mole sua secessum urgeant ut etiam de reliquo plicas rugasque contentos, cibos fricare: Equidem de ha- rum usu ingeniosissimus WILLISIVS ita sentit, quod sint sepimenta saltem & sulci, quibus chyli portiones hic illic tenuiter dispersæ, melius ab invicem detineantur, ne simul in massam spissiore confluerent. Vid. ejus *Pharmac. Rat.* p. 14. 15. Ast dubium manet, quod plicarum pro- funditas intentioni isti & chyli copię minus respondeat, & plicarum partes, in superna ventriculi concameratione positæ chyli refluxum ejus- que aliquam rursus cum massa spissiore commixtionem penitus impedi- re valeant. In recto tandem intestino admodum carnoso atque præter arterias venas hæmorrhoidales tam internam a porta vena quam exter- nam a cava habente & a parte postica ossi sacro & coccygis, ab antero- ri vero vesicæ urinariæ & in foeminis utero per communes membranas firmissime cohærente, adducendi sunt muscoli rotundi constrictores, seu sphincteres inferius orificium constringentes, & levatores bini in-

testinum iterum a fæcum excretionem in suum locum retrahentes & prohibentes, ne fæces nobis invitis elabantur.

§. VI. In iisdem (quarum quidem numerus iniri non potest) sparsæ sunt disseminatæque vasorum lacteorum anfractuossæ radices, & capillares ramuli, & ex iis oblique oriuntur, quorum jam non paucæ e primo intestinorum tenuium, duodeno emittuntur; numerosissimæ vero ex altero jejunio progrediuntur: ileon jam pauciora, paucissima (vid. BARTHOLIN *Anatomia Lib. I. Cap. X.*) & sæpe nulla colon habet. Quamvis etiam Anatomicorum non desint, qui atque adeo in recto vidisse asserunt, (inde colligitur clysteres nutrientes interdum aliquid posse.) Hæc chylum per crustam villosam transcolatum, & ab aliis inertibus partibus separatum & secretum, ex intestinis ad mesenterii primum glandulas, primi generis dicti, vehunt, ulterius promovendum. Fæces vero alvinæ, secreto chylo, foras excernuntur. Reliqua vasa, quæ has partes perreptant, tam arteriosa quam venosa, lymphatica, glandulas, nervos a pari vago, plexu mesarico & intercostalibus ortos, quæque alias in considerationem veniunt, nominasse hic saltem sufficiat. Ob has causas modo recensitas, connexionem, continuitatem, viciniam, generis & officii societatem, & partium nervorum communionem &c. inter ventriculum & intestina ac non saltem adjacentia atque proximiora viscera hepares, renes sed & multas alias nobilissimas partes longissime remotas pectus & caput magnus datur consensus, ut iis male se habentibus una simul aliæ afficiantur, & vice versa. Unde v. g. patet, quod ex gravi capitis læsione, & nephritico dolore & paroxysmo a tussi vehementiori &c. calculorum motu, vomitus sæpe oriatur, & quod ventriculo male se habente, vertigo, sensuum stupor, oculorum tenebræ, dolor capitis, epilepsia &c. incurrant & quod in omni fere morbo appetitus & digestio lædatur &c.

§. VII. Quoniam ventriculus cum intestinis certo respectu nihil aliud est quam musculus cavus, qui nullum musculum antagonistam habet, cujus quidem vicem explet aer ibi contentus, qui una cum cibo potuque irrumpit, ita hic duplicem naturalem chylum & fæces a parte in partem promoventem notabiliorem potissimum deprehendimus motum, indefinenter operantem etiam dormientibus nobis. Externus nimirum & communis est alter, alter internus & proprius. Ille a motu imprimis pressuque ceu preli diaphragmatis in respirationis actu aliquot millenis vicibus singulis horis depressi, reciproco & continuo, quo ventriculus, cui adhæret, movetur, exagitur & conquassatur, quoque, dependet

pendet. Intestina in specie juxta eum, qui a ventriculo procedit, & adeo simul usque continuatur, motum suum externum tam a mesenterio, quam ab abdominis quinque musculorum in homine paribus contractis hoc motu in peritonæum terminato in expiratione, abdominisque fornicem contrahentibus potissimum mutantur, interea jejunum, intestinum motum præ reliquis habet fortiolem. Quorum actio maxime necessaria est, quoniam in animali vivo dissectis his, atque eorum actione sic impedita, chylus ex ductu thoracico vulneratione aperto, non effluit, nisi externa manuum contrectatione sollicitentur iidem.

§. VIII. Alter, qui præ altero in œconomia chylicationis rectorem & modoratorem se præstat, ex interno principio, & propria harum partium substantia musculosa membranosa nervosque maxime profectus hic motus peristalticus est: nostræ præsentis considerationis argumentum. Primam hujus mentionem GALENVUM injecisse apparet ex *Lib. VI. Epidem. Sed V. p. m. 27.* post hunc FALLOPIVS, demum eum (quantum ego quidem sciam) notabiliter satis *in observat. anatom.* reddidit explicatum. Alii quidem Asellio una cum vasorum lacteorum inventionem, acceptum referunt, sed utraque dubia adhuc ab aliis quoque redduntur. vid. TH. JANS. AB ALMELOWEN *invent. nov. antiqu.* Hujus organum æque sunt fibræ carneæ motrices, ad contractiones semper nitentes, ob præcipuam earum structuram, justo tono gaudentes, (i. e. quæ nimis rigidæ sunt & duræ, neque nimis laxæ & molles) tunica musculosæ, præcipue circulares, per totum ductum excurrentes, spirituum animalium influxu turgidæ, & animatæ, (per octavum nervorum par, geminis ramis, furculis insignibus, & plexibus, inprimis circa orificium ventriculi sinistrum conspicuis) & per intercostales sufficienter concitato, instigante simul tunica nervea substrata firmiterque connexa sensum ut illa motum concedente a ventriculi & intestinorum contentis vario modo affecta, & affluente per arterias sanguine calido atque spirituofo. Horum enim affluxus, ut agant fibræ motrices, perquam necessarius est, ut ab hoc convenienti in tota œconomia animali omne omnium partium robur omnis tonus & motus visque agens & constringens potissimum immediate & proxime procedit. Hæc corpora subtilissima & agilissima primum impetum faciunt, primumque afferunt motum a fibris motricibus peragendum. Constrictæ sic fibræ elasticæ alterum motum dilatatorium rursus exerunt, ad quem contenta mole sua extendente conferunt. Vbi enim is motus deficit, motus ventriculi & intestinorum peristalticus imminuitur, alvus constipatur, quod accidit

dit in ediam aut longum nimis jejunium passis, imo exinde ventriculum maxime quasi contractum & angustatum sentiunt, ad externum quoque contactum totum abdomen in se retractum & collapsum deprehenditur ac ipso visu conspicitur. Hoc argumento est alimenta in debita quantitate assumpta etiam hoc intuitu facere ad corporis humani integritatem, quia ventriculi & intestinorum peristalticus ad eam plurimum facit. Atque is exierit sese dilatationis & constrictionis successivo motu una scilicet parte constricta altera dilatatur & vermis aut lumbrici terrestres repentis, limacis aut hirudinis aliorumque reptilium animalculorum instar a superioribus ad inferiores partes deorsum sensim sensimque movetur. Quemadmodum enim ejusmodi reptilia animalia his sui corporis partibus corpori subiecto adhærent, aliis, dein se contrahunt antrosum versus, ut præterlabantur corpus cui innituntur, ita simili modo motus peristalticus procedit. Quo quidem motu haud difficulter colligitur, contractione fibrarum rectarum, intestina exterius contrahi, interius laxari eaque lacteorum vasorum oblique progredientium oscula intestinorum versus cavitatem perpendiculariter magis protendi atque fieri patentiora, fibrarum vero annularium constrictione intestina coarctari sicque hoc utroque motu conspirante tam alimentorum massam propelli, quam chylum secerni. Incipit jam, ubi incipit totus canal, in œsophago, quo vi tunicæ musculosæ & dilatatione & constrictione alternante, (illa ope fibrarum longitudinalium, hac annularium peracta mox coarctato, mox dilatato) accedente ejusdem in homine ne perpendiculari situ descensuque rore glandularum assidue in gulam stillante faciliore reddito assumpta per deglutitionem in ventriculum ubi majorem incitatum accipit, ut ulterius continuetur, & ex hoc per eum ad intestina protruduntur, in quibus etiam præ aliis, in ileo intestino manifesto magis indicio se prodit ac urget, & contenta ibi ulterius promovet, secernenda secernit, excernenda vero excernit &c.

§. IX. Nimirum (ut explicatius de eo, quod res ipsa postulat, agamus) indefinenter, successive & per lenes mollesque subsultus velut lente & pedetentim per partes & series articulosque quasi intestinorum repit atque progreditur seu reciprocus, interpolatus sive per momenta remittit & repetit (interjecta intercapedine remissione & pausa) secundum longitudinem & latitudinem contractorius atque undulatorius est, per undas quasi fluctuantes & flexuosos gyros æquabili semper ordine per universam canal, longitudinem se volvens atque provolvens, ac per anfractuosa intestinorum sinus descendit ascenditque. Quippe muscu-

musculorum, ventriculi & intestinorum, earumque quibus gaudent, quibusque componuntur tota, fibrarum contractiones ob intestinorum longitudinem & anfractuosum serpentinumque ductum cavernarum cellularumque hinc inde remoram, non tantæ sunt, ut contenta una continuata simul propulsione ab una extremitate ad alteram ejicere possint. Hac enim parte intestini contracta, colligentibus prius ingestum, fibris longitudinalibus, angustataque contractis maxime circularibus, & insecuta immediate eodem tempore longitudinalium proxime subjacentium prius ab ipsis dilatatarum corrugatione & abbreviatione intumescitioneque pars una intestini ad alteram, unum latus ejusdem ad alterum propius adducitur, & contentum, quod fibras modo pressit & dilatavit, a fibris rursus contractis in alteram vicinam inferiorem vacuum & magis ampliorem partem, dum a constrictione feriat, adhuc propellitur commode, quo propulso recepto, infarcitur & dilatatur magis, donec cessante hac dilatatione, iterum novo impetu per varia eademque instrumenta, fibras, valvulas &c. facto, a tergo semper insequente & premente, similiter constringitur, qui reciprocus dilatationis & constrictionis motus per vices iteratur, donec cuneo quasi cuneum trudente, unde accepit, aliis reddiderit illud. Atque ejusmodi interpolatus & lentus motus de rei necessitate utique est, alioquin chyli distributio haud rite institueretur; & chylus cum sæcibus mox proflueret. Parum absimilis hic motus peristalticus ventriculi & intestinorum est illi, qui fit in aliis quoque canalibus & partibus quæ ad propellenda, vel in se ad tempus quoddam determinatum retinenda liquida sunt destinata, Sphincteribus, in corde, arteriis nervis, undulatorio illo motu dicto, in fibris motricibus, quem tonum vocant, per quem robor, resistentia & nisus renisusque elasticus procedit, tubulis secretoriis, & excretoriis, venis, vasis biariis urinariis, utero, in scroto, in partu præsertim &c. qui pariter in his ad sanguinis & humorum præparationem, elaborationem, progressum & distributionem perpetuandam, & contentum provolvendum æque per dilatationes ac constrictiones invicem continuo se excipientes sic & per subsultus ac series quasi & successive movetur & movet &c. Siquidem omnes motus solidarum partium in universo humano corpore duabus his motus speciebus saltem systole & diastole reciproca peraguntur quæ & omnem fluidorum impulsus, progressionem, circuitum, secretiones & excretiones efficiunt. Præter hanc provolutionem, quam instituit motus peristalticus, a superioribus nempe ad inferiora J. C. PEYERVS *de glandulis intest.* Cap. IV. aliam & in in-

testinis quidem saltem tenuibus (in crassis enim contenta spissiora fluctuando non sunt) similem fibrarum contractionem, inverso modo a parte inferiori superiorem versus inchoatam, secundum naturam, adeoque variis motibus reciprocis, motum peristalticum ferri probat. Cum HELMONTIO Vid. *lib. de flatibus. pag. 217. v. 37.* in puero illo hernioso, illam Wepferus experientia in muliere quadam, & brutis diversi generis dissectis, stabilivit. Vidit enim, manuque exploravit hic præsertim experientissimus vir, manifeste tempore concoctionis ope fibrarum circularium modo superius, modo inferius intestinorum tenuium portiones sese constringere atque materiam intus fluctuantem deorsum sursumque conjicere. Ab his FRANC. GLISSONIVS non alienus est *de facult. mot. perist. p. 288.* unde hunc motum peristalticum fluctuantem vocat, a fluctante inæquali, quem sibi concipit quoque diversum, in quo (fluctuante) fibræ superiores & inferiores inter se certarent, antagonistarum ad instar, & materiam contentam modo huc, modo illuc propellerent, quem prodromum nausæ, eructationis, vomitus, præmaturi descensus chyli, torminum intestinorum, doloris colici, fluoris alvi, & similibus symptomatum habet, in dyspepsia & flatibus præcipue conspicuum. Etenim sub tali quadantenus fluctuatione, cui præcipue cœcum intestinum conformatione sua famulatur, qua volvitur ac revolvitur chylus, in ventriculo & intestinis, ultro citroque, per breve licet intestinorum dilatatorum spatium (ut mihi concipio alias ob contrarium motum peristalticum a superiori ad inferius in eodem canali non adeo hic esset expeditus) constanti serie, blanda contractione & propulsione agitatio, conquassatio, hinc indeque commistio, comminutio, solutio, discontinuatio, secretio utilis ab inutili melius & expeditius succedunt, nec mora contentorum quam ibi nectunt, otiose & inutiliter instituitur, quam etiam vix intestina vivo motu gaudentia paterentur. Alterum vero fluctuantem etiam non equidem negandum, sed ad statum potius præternaturalem referendum esse quilibet facile sentit. Intolerabilis autem plane in PROSP. MARTIANO est error qui in *comment. in Hip. f. 119.* a ventriculo nihil expelli statuit, ac omnem ventriculi motum promoventem & expellentem præternaturalem habet, a rei molestæ irritatione inductum.

§. X. Magnum & mirum est quam validus fortisque sit. Tanta certe potentia tantumque robur quo a provida natura instructus hic motus est, cuivis consideranti non potest esse non admirabilis. Haud vilis enim vis requiritur, quæ par sit, ventriculi fundum & latera sursum

sum ducendo, ejus cavitatem plurimum arctando, contenta subigendo, (quæ subactio talem propemodum eamque fortem actionem requirit, qualem in panis præparatione pistorum adhibent, qua in macra farinam inditam affusa aqua spatha lignea vel manibus deprimunt, tamdiu, donec homogenea massa exinde formetur,) atque per adeo longas & tortuosas Intestinorum ambages, per valvulas, per tot plicas, flexuras atque anfractus, per cæci intestini secessum & latibulum &c. propellendo, secer-
nenda excernendaque expediendo, quæ mole & qualitate non raro molesta premunt, atque nisi huic & nisi contrario ac reactione resistunt. Nam si ventriculi & intestinorum amplæ cavitates adeo notabiliter non constringerentur, ut pars una ventriculi & intestinorum ad alteram accederent, rugæ & plicæ inter se alliderentur, partes alimentorum & chyli vix possent ita atteri, dividi, & solvi: Ventriculus enim cibos omnino arctius complecti debet, quo melior fiat digestio & purior, alias angustos tunicarum poros non facile possent ingredi nutritiæ partes, neque excernendæ excerni. Hanc vim, hoc robur, hancque potentiam pro cujusvis judicio tradimus ulterius expendendam, quod post absolutam chylicationem ventriculi cavitatem sat amplam aliquot mensuras circiter capientem, adeo contrahat, ut vix pugnam capiat, & quod in curatione obstructionis alvi pertinacioris & passionis iliacæ, magna mercurii vivi, metallorum adeo gravissimi, quantitas, ad aliquot quandoque libras ore assumpta, conf. PANAROLVS *Pentecost. l. observat. ultim.* aut ex præscriptione aliorum (an æque bono consilio dubium) globulorum plumbeorum minorum aut majorum haud parvus etiam numerus (quo major is esset, eo tutiorem & celeriores promittit sanationem HELMONT. *Lib. de flatib. §. 31.*) per singulos eosque adeo prolixos intestinorum gyros & sinuatos anfractus sursum deorsumque etiamsi resistente vi morbi ad exclusionem ab hoc ipso urgeantur. Huc referenda est historia a WEPFERO recensita *in epist. ad Peyer.* de vulnerato quodam in regione gastrica, qui ultra passus distantiam liquorem chyloformem aliquamdiu post assumpta alimenta projecit. Attamen limitatur etiam aliqua ex parte hujus nostri motus robur pro sexus, ætatis, temperamenti, conditionis vitæque generis hominum, diætæ immo climatis diversitate, v. gr. mulieres parcius alvum deponunt, & senes minus alimenti & nutrimenti ferre possunt, quam juvenes, parcius appetunt, lentius digerunt, difficiliusque egerunt. Qui habitu corporis laxo & spongioso copiosis & exilibus venis conspicui sunt, iis debiliior quoque hic motus est, ob quam infirmitatem etiam nimia alimentorum copia no-

cumento est. Qui laboribus validioribus quotidianis exercentur, fortiore motu hoc gaudent, videbis inde agrestes, plebejos, bajulos multos cibos, eosque duriores difficilisque digestionis ingerere, athleticeque vivere. Conspicies idem in incolis Saxoniae inferioris, Pomeranis, Helveticis præ Misnicis Svevis &c. Hinc etiam inter alias causas per quas intestinorum vulnera lethalia censentur, hæc quoque ratio allegatur, quod ea motu peristaltico indefinentur agitentur, adeo, ut coalitio vix ac ne vix quidem præstari possit. Conf. Woyt. *de Vuln. lethal.* p. 363. Magnum mirumque magis adhuc est, quam validus sit, si præter naturam turbatur, irritatur & pervertitur, quantos enim tunc tumultus concitat, adeo ut omnium repagula, omnesque obices eosque etiam fortes, valvulas, pyloros, sphincteres effringat atque adeo ipsum ventriculum sursum in pectoris cavitationem abripiat v. STEPH. BLANCARTI *Anat. præct. rat. Obs.* LXX. p. 200. quæ violentia modo in vomitu, imprimis vero in passione iliaca conspicitur, in qua horrendum & miserandum in modum excrementa ex intestinis extremis, magna vi per os supremum unaque vice ejicit, adeo, ut observationes Auctorum: Galeni, Rhasis, Ambr. Parei, Primerosii, Peyerii, Thoneri, Diemerbroeckii, Blankarti, aliorumque prostant, suppositoria, glandes ano subditas & clysteres immisos, per os, totos fuisse ejectos. Ex his MATTH. DE GRADIBVS in *Com. super 9.* de puella passione iliaca affecta, stupenda quæque fidem superare videntur, recenset: quod nimirum suppositorium quatuor tandem filis fortioribus ad coxam alligatum & immisum ano, disruptis his multiplicatis filis a morbi violentia raptum atque excretum fuerit. Ejusmodi quoque ANT. GVAINERIVS memorat in *tractatu de flux. c. II.* Rursum flatus vermes, in colo retenti acresque humores, qui ad colon rectumque descendebant, violenter suppressi, sursum simili modo regurgitaverunt cum acerbissimo ventriculi morificatione.

§. XI. Ut placide omnia in naturæ quem instituit ordine modoque agendi peraguntur, quoniam ea non amat tumultum, ita & motus ventriculi & intestinorum peristalticus, utut validus fortisque est, admodum tamen subtili, moderato, molli, miti, placido atque leni modo non sentientibus nobis instituitur, eumque adeo subtilem esse, ut non verbis satis exprimi queat. F. GLISSON *l. a.* dicit. Atque vix utique forinsecus cadit sub sensus: visum & tactum, adeo ut hinc non desint, qui eum potius in dubium vocant, atque plures ea propter obscurum appellant, inter quos Pecquetus eminet, qui eum nulpjam deprehende-
re

re potuisse affirmat, atque ideo hepatis illius munus potius demandare voluit. Equidem in animalibus vivis minoribus nimirum dissectis, canibus &c. ut & motus alioquin aliorum muscutorum conspectus obscurus est, ægre inquam ab extra apparet. Vero simile enim etiam est, in ejusmodi animalibus ex metu mortis atque anxietate contristatione ac sub ipsa vulnere ex dolore subito, hunc motum conturbari, & impediri, quemadmodum manifeste in ruminantibus brutis contristatis motus ille ruminationis, subito sufflaminatur. At in grandioribus bobus nempe & equis in sensus manifeste statim eum incurrere certum est, siquidem Præses una cum D. N. ante aliquot annos in equo huic sectioni destinato oculis usurpavit, quanquam etiam alii in felibus, porcellis indicis & cuniculis satis eum perspicuum esse, perhibent, imo in vulneratis hominibus aliquando observaverunt, RIOLAN. in opusc. *Anatom. nov. c. Pecqueto p. 161.* V. G. H. WELSCH. *observ. decad. VII. centur. V. p. 416.* & HELMONT. *lib. de flatibus §. 38.* (qui in puero hernioso eum vidit. Apud Blanckartum observatio legitur de exomphali in infante, quo in tumore cutis adeo tenuis erat, ut motus intestinorum peristalticus conspiceretur. MOEBIUS in *fundam. med. phys. Cap. XI. p. 105.* de matrona nobili idem refert contumaci anorexia laborante per plures annos tandemque plane consumpta, in qua motus intestinorum continuus, oculis conspicuus erat. Insuper eum & vidisse HARVEVM *lib. de generat. animal.* & IOH. CONRAD. PEYERVM in diversis vivorum brutorum sectionibus *Exercit. anat. de gland. intest.* ut & DOLAEVM sæpiissime in vivis canibus dissectis, legitur *Encyclopæd. med. dogmat. Lib. II. cap. VI. p. 499.* IOH. FREIND. Anglus in *Emmenolog. p. 170.* scribit, se injecta tinctura chalybeata in jugularem venam canis eoque mortuo diu hunc motum adhuc durantem deprehendisse. CL. WEPFFERVS *lib. de cicuta aquatica* claris verbis sequentem in modum descripsit. Integrum excidi ventriculum movitque se motu vermiculari. Stomachus sive orificium sinistrum arctissime sese constrinxit, ut ne guttula quidem excideret. Quando vero ventriculus circa medium sese contraxerat, motus lente versus pylorum procedebat, illeque erigebatur & liquor subpallidus quandoque sensim, aliquando cum impetu protrudebatur. Constricto pyloro ventriculus rursus intumuit totus, moxque rursus circa medium se constrinxerat novusque liquor per pylorum ejiciebatur. Hæc constrictionis in medio & inflationis alternatio continuavit per octavam partem horæ, stomacho semper clauso permanente, postea ventriculus se movere desiit. Atque adeo in pediculi corpusculo

pellucido oculis armatis observari eum, juxta cordis quoque motum HARTSOEKER *in contin. conject. physic.* notat. In recens mortui animalis extemplo dissecto ventriculo, atque in frustis intestinorum dissectis interius ad temporis notabile quoddam spatium, multiformem & sat fortem ejusmodi constrictionis & dilatationis motum cumuli adinstar nitentium vermium implicatorum, varie intorquentium & motitantium me non semel vidisse memini. Sane lenitas ejus cuivis mirabilis videri potest consideranti, ope illius ossa etiam durissima, firmissima in canum, cortices gladium in anatum & adhuc mirabilior in struthionum ventriculis metalla deglutita, quod Langius se in Aula Ducis Ferrariæ vidisse refert, consumi & solvi in pollinem atque cremorem, tamen & citra tumultum, & licet menstruum maxime energeticum ad dissolutionem concurrat, motus tamen dubio sine maxima omnium solutionum causa & operator est. Ut autem lenis sit & placidus utique rursus necessarium est, nimirum ut alimentacoquenda, digerenda, solvenda, fermentanda, colliquescentia sensim, extrahenda & in perfectum chylum & in commodum alimentum convertenda, lento gradu conficiant iter, & debitam quasi nectant in canali moram, quæ ad illius perfectionem requiritur, & ubiubi laudabile alimentum insit adhuc, evolvatur, & ne citius justo præcipitique cursu præterlabantur & indebite ejiciantur eadem. Hinc experimur, in alvi fluxionibus, si excrementa spissiora fiunt: viam spemque adesse ad salutem recuperandam, quod redeuntis coctionis signum vocant: indicans, motum ventriculi & intestinorum hucusque acceleratum nimis, simul ad meliorem frugem redire, atque secundum naturam iterum institui, i. e. blande & lente ferri. Accedit &, quod sub leni, placidoque, reciproco, circumpressorio, dilatatorioque motu, debitæ, tenuiores subtilioresque saltem succi alimentaris partes, per tunicam villosam transcolentur, & per poros ejus ad vasa lactea adigantur, & ab inertibus secernantur felicius, si enim vehementior esset, crudæ crassæque inutiles nocivæque simul transjicerentur, & chylus impurus evaderet. Nam sub placido & leni motu omnes ubique secretiones & excretiones melius quam celerrimo & concitatori peraguntur, atque partes fluidæ a crassioribus longe facilius separantur. Id quod vel domestico experimento satis notum est atque perspectum: Si enim aliquis liquorem subtilibus & crassioribus corpusculis infectum, vel massam liquidiorum perfusam per linteum pannum, transcolare velit, & ministerio digitorum, paulo fortiori compressione, contentum exprimat, crassum, sæculentum & turbidum humorem, loco tenuioris &

& limpidioris liquoris accipiet. Hinc etiam patet, cur bene valentibus alvus lenta & fæces spissiores & paucæ sint.

§. XII. Insuper ad actionem facillimus est, & non modo facili de causa etiam remota, & eminus aliundeque ex facili illico movetur, stimulatur & excitatur, sed & ex una in aliam partem, ex ventriculo ad intestina, & ex hujus generis in alterius intestinorum, & celeri sæpius motu vagatur, in hac vel illa eorum parte stimulatus universum canalem continuum facile pertransit, adeo ut mirum sit, quod per reciprocas suas constrictiones & dilatationes, & per undas fluctuantes tam cito ferri possit. Hoc clarissime in purgantibus patet, quæ in una saltem intestinorum parte quandoque hærent & stimulant, cito tamen purgationem in universum instituunt. Imo observatum est, eosdem quibus viscera tenuiora sunt, si clysterem admittunt, vomitiones experiri. Res quædam præternaturales citam commotionem & conversionem perversionemque ejus ostendunt. v. gr. Intestinis affectis in colica, cholera, iliaca passione aliisque intestinorum torminibus vomitus spasmus fibrarum continuitate sursum abeunte, contingit. Fortius & celerius adhuc agunt acres biliosi humores in una modo parte confluentes, quod in diarrhœis & dysenteriis accidit. Fortissime se exerunt venena & summe corrosiva causticaque assumpta, quæ citissime & mox sæpius ab assumptione per superiora & inferiora simul irritationem & secessum moluntur. Quid? quod alvi dejectionem & vomitum saltem visa v. g. purgantia, vel solum cogitatio & reminiscentia de nauseosis purgantibus excitent. Pariter & notum satis est; animi affectus varios præ aliis, uti in tota œconomia animali, ita etiam in hunc motum peristalticum magnum habere imperium, magnamque potentiam, eamque per fluidum, spirituosum, subtilissimum illud, in hunc hasque partes magnopere exercere, adeoque & magnam vim possidere, hunc intendendi, immutandi & destruendi atque in quibusdam facile solvendi alvum aut vomitum excitandi. Huc pertinet, quod observationes ferunt Auctorum: a certo sono audito statim quosdam reddidisse alvum &c. A nonnullis rursus fuit observatum, vel ex leviori ventriculi compressione non saltem chylum, sed & semicruda ciborum frustra per intestina transfluxisse. Alias ordinario & secundum naturam intra diei & noctis ferme spatium a ventriculo incipiendo & ad inferius guttur usque progrediendo, (intra hoc enim temporis spatium digestio & distributio ciborum atque excrementorum ejectio absolvitur penitus) pensum suum absolvit; consuetudo tamen aliaque accidentia etiam hic notabile discrimen injiciunt; siquidem

siquidem plures dantur, qui alternis tantum diebus alvum deponunt, quibusdam adhuc hæc excretio lentior contingit; Rursus alios videbis qui singulis diebus bis hanc naturæ operationem experiuntur. Hoc quoque dicendum est, quod in nostra potestate aliqua ex parte ferme sit constitutus intestinorum hic motus, adeoque ad naturales motus, voluntarios & mixtos ex parte referendus animæque imperio subjiciendus, cui inservit primario ani sphincter, qui valde intestinum rectum constringit, & fæcum descensum moratur, ut eum ad certum quoddam tempus cohibere possimus. Addo, quod etiam intentio & cogitatio talia efficere possit: Cuique forte perspectum atque expertum erit, alvum citius solvi, si de alvi solutione serius cogitet seque in secessum conferat atque componat aut visis saltem aut cogitatis nauseosis adversisque alvi dejectiones ac vomitus concitari. Facile etiam adsuescit, vario modo, ut consuetudine legem quasi facta, in his mox retardetur, in aliis acceleretur & homines semel aut bis in die, aut alternis diebus, aut bis tantum in septimana sine notabili etiam non raro noxa, ut hic status in latitudine sanitatis contineatur &c. secedant. Imo quod curiosum est statis diebus, singulis annis, quandoque aliquoties certis vicibus alvus stimulatur, sic notus est vir quidam quinquagenario major, qui semper eo die, quo certas quasdam rationes, ex officio suo quo fungitur, reddere tenetur, quod ordinario quater singulis annis ipsi est injunctum, mane alvum laxam experitur, quod tamen alias rarius aut nunquam horis matutinis accidit. Ejusmodi etiam est quod natura, ut ajunt & habent, facile clysteribus adsuescat, ut nonnisi alvus sic admonita, officium suum sequatur. Itaque cum in omni re optimum sit, optimis adsuescere atque bona consuetudo firmitatem naturæ imitatur, motus peristalticus intestinorum ut quotidie alvum egerat utique commendandum est. Amplius possemus commemorare, motum hunc peristalticum non modo hoc intuitu haud esse difficilem, sed & si consuetudo accedat, quæ altera est natura, etiam ad alia atque adeo quæ ad statum magis alias præternaturalem spectant, posse reduci, ut visi sunt, qui pro lubitu quovis tempore sponte vomitum ediderunt: Sic SENNERTVS *Lib. III. med. pract. P. II. Sect. II. Cap. IX.* refert, se nosse quosdam in quibus fæces alvi per multos annos, imo per totam vitam ordinario, extraordinario modo excretæ per superius guttur, per umbilicum, per superiorem femoris regionem, rupto abscessu fuerunt. Quod etiam non adeo rarum helluonibus est, quibus ad nutum semper ventriculus contrahitur, & infarcta reddit: Bartholinus vidit Melitensem bibonem omnes liquores assumptos

assumptos pro nutu rejicientem. In quibusdam animalibus brutis, lupis &c. simile etiam habetur, quæ vim ventriculi expultricem per superiora, (ut agunt) animale & naturalem obtinuisse videntur. G. MOEBIUS in *Fundament. Physiolog.* refert: vidisse canem anglicam majorem, quæ singulis diebus aliquoties cibum, quem devorasset, suis catulis nutrimenti loco evomebat. Ut igitur in statu naturali facillimus est, ita in præternaturali talis quoque deprehenditur sola perversæ phantasiæ actio & conspectus ingratarum & adversarum rerum, vel saltem reminiscencia de nauseosis &c. illico totum hunc motum peristalticum afficit & commovet atque adeo evertit, ut non modo per inferiora, sed & per superiora validius feratur aut tam alvum dejiciat, quam vomitum excitet. Rursus si semel aut aliquoties modo præternaturaliter sic affectus est, ex facili etiam ejusmodi motus morborum hic repetuntur, sic cardialgia, colica, cholera, alvi obstructio, vomitus, iliaca passio, hypochondriaca epileptici & convulsivi alii ejusmodi affectus præ aliis alias partes vexantes & circuitum suum observantes facili de causa leviorique occasione redeunt, & in habitum quasi ac consuetudinem abeunt. Hi quo magis repetuntur, eo pejus redduntur & atonia & imbecillitas tandem harum partium ægre in integrum restituenda, inducitur. Non aliter enim evenire potest, quam ut fibris maxime sensilibus membranosis & nervosis, quæ harum partium contextum maxime constituunt per sæpius repetitas morbosas agitationes, allisiones, contorsiones, magna vis inferatur, & nobilissima illa fluida, sanguis, nimirum & spiritus animales tonum ac robur ipsum vitale efficientia avolent & dissipentur, unde a spasmis repetitis & vehementibus & magis adhuc ipsis convulsionibus notabilis virium prostratio & totius corporis languor relinquitur.

§. XIII. Subit inde animus, quod res obtulit, quoque ulterius explorandi, unde impulsus ad hunc validum fortemque motum instituentum & continuandum, perque tam longum intestinorum volumen quinquies, sexies, imo interdum pluries, justæ hominis staturæ longitudinem æquans, per tot circuitus, & anfractus etiam fursum ascendens, agensque proveniat, quodque gubernet hoc longum intestinorum iter. Ad hoc definiendum, lustrandum sisto; Notum ex staticis esse, vel minimam corporis vim accedentem aut decedentem motus facere vel sistere posse, sicuti videmus infantem etiam vel aliquot centenaria in machinis fursum tollere atque omnem in universa œconomia animali (ut & alibi) humorum progressum, & impulsum fieri per principium quoddam, magno movendi atque propellendi excernendique robore

Qqq

instru-

instructum, qualia v. g. sphincteres sunt. Tale igitur hic quoque desiderari neque id simplex, sed multiplex & varium pro rei exigentia, argumentatio valet. Quoniam motus semper a motore recedens sensim sensimque magis fatiscit, & canalis alimentorum tractus tantus & longus est. Atque in his partibus, docente anatomia, & superius in conspectum datis, jam adesse non unum ejusmodi movendi, principium, idque satis validum atque idoneum, ad hunc motum instituendum continuandumque, colligitur. Nam in initio canalisi, pharynge, sphincter statim locatus primum agit motorem, qui fortiori facta constrictione, ore assumpta per rectam brevemque viam, gulam protrudit, ubi ingesta per os sinistrum, in ventriculum & per tempus aliquod ibi retenta, novo impellente ulterius promovenda habent necesse, quo officio dexter ventriculi, pylorus, robore sat valido instructus, fungitur, qui contenta, ad intestinorum usque tenuium exitum perveniendi, impellit, ubi excepta circa coli intestini initium, valvulosa, & membranacea nerveo musculosa, ac fibrosa, & ligamentorum nerveo tendinosa, qua gaudet præ aliis, constructione atque constrictione valde robusta, juxta ipsius coli intestini magnam sensibilitatem, quam ob dictas dotes possidet, quibus alia intestina sunt destituta, atque valvulas cooperantes, quæ in hoc itinere offenduntur, ad finem recti intestini, usque sphincterem, pelluntur, calore iis partibus subjacentibus veluti totidem foculis eundem conservantibus & non nihil intendentibus, qui alioquin satis vegetus est ob sanguinem & spirituum animalium per vasa numerosa intra tunicas dispersa a corde præsertim sub assumpto cibo, affluentes, adjuvante.

§. XIV. Juvamini porro & stimulo commode huic motui peristaltico plurima sunt, quæ subveniunt, nempe & primo quidem nominanda est inspiratio & expiratio successiva, tota hypochondria movens & qui ab illa procedit, ventriculi & intestinorum motus, qui partim a diaphragmatis reciproco motu, deorsum descendente visceraque in abdomine contenta, leniter & continuo comprimente, & blande concitante, ut sensim dimittant, dependet, partim a mesenterii, quo sunt affixa & in cujus fimbria fibrarum circularium tendines radicanter, cujusque in plano fibræ motrices recta a centro ad peripheriam excurrunt, utpote quæ omnes contractiones communicant, ut & musculorum abdominis quinque paribus respirando actione oritur, qui diversis fibris obliquis descendentes, ascendentes, rectis, in pyramidem cuspidatis, transversis instructi sunt, & ad varios motus edendos eapropter idonei. Juxta horum motum quoque reliquorum adjacentium viscerum, hepatis
dum

(dum nimirum cum diaphragmatis parte posteriore in inspiratione descendit) ut & lienis, &c. famulatur. Multum adhuc hunc promovet ipsius aëris irruentis & cum alimentis subeuntis, elater, quo & ventriculus & intestina blande inflantur, cum flatulentia illius modicæ, & mitis, placidæ & amicæ turgescencia quæ, in intestinis, jejunio inprimis & ileo f. N. adest, iisque illorumque tunicis vigorem quendam roburque afflat, eaque vacua servat expansa, sine qua expansione flaccida conciderent latera, & motus & excretiones non forent expeditæ, conf. HELMONT. *lib. de flat.* Hinc patet, cur intestinorum angustia quandoque accusetur. Nec non opitulatur & liquor ipse gastricus, vi inprimis penetrandi, dividendi atque acie & elatere stimulanter, (utpote quæ attributa ad macerandum, dissolvendum ac eliquandum alimenta, necessaria sunt quibus exagitata ventriculi contenta fermentescunt quasi magis magisque intumescunt ac divelluntur, quo motu hoc eo melius in intestina possint protrudi) & succus pancreaticus mediocri in quantitate accedens extra præsertim ciborum resolutorum tempus, intestina emolliendo eaque lubrica reddendo ut & ex parte ebulliando cum bile permixtus, suis quidem particulis sub acidulis. Majus adhuc calcar quoddam bilis influens addit, quæ particulis suis sulphureis atque salinis activæ & penetrantis indolis ex volatili & fixo mixtis (quæ simul junctæ cum lymphaticis succi pancreatici & stomachicis aut cum chylo mixtæ promptissime actionem atque reactionem, quam fermentationem vocares instituire aptæ sunt) fibras movet motrices, easque ad motum peristalticum, instituendum, de novo invitat & sollicitat. Insuper & aliqua ex parte spirituascentia sua quam foenerat chylo, nec non absorptione acidi & visceri eo confert. Hinc, si hujus affluxus impeditur, quod in ictero accidit, alvus redditur constipata, confer. KERKRING. *spisileg. anatom. p. 82.* & si abundat & si corrupta & acrior, citata nimis est alvus. At huic confert non modo salinarum biliosarum particularum stimulus, sed & illarum juxta pancreatici quoque succi elasticitas, quæ sequenti experimento probatur: secto canis vivi abdomine, in duodeno fiant filo ligaturæ duæ, una infra pylorum, altera insertionem ductus cholodochi & pancreatici, confuto abdomine, & elapsis aliquot horis, denuo aperiatur ligata hæc duodeni pars, tumidam valde & ad rupturam, usque tantum non conspicies. Ubi aperies vulneratione tumorem, usque adeo inflatum, ut flatus & bullulæ spumantes cum sonitu quin strepitu exeant deprehendes & nares acri exhalatione stimulas senties, confer. MART. LISTER, *Dissert. de humor. p. 152.* Nec plane

Qqq 2

otiosæ

otiosæ hic sunt partes bilis unctuosæ, quæ insunt, sed potius lævigant latera intestinorum, ut facilius descendant per motum peristalticum mota contenta, & illorum fluiditas augeatur, ut pictores suos colores tenuiores reddunt & fluidiores additis bilis aliquot guttulis. Concurrunt porro valvulæ conniventes, & semilunares in tenuibus numerosissimæ, quarum per fibras suas itidem maxime transversales carnosæ tunicæ continuas, constrictio & dilatatio, ab una ad alteram, successive instituitur. Adjuvare etiam eum possunt simili modo & quidem magna ex parte esculenta & potulenta & in sufficiente quantitate assumpta, & deinceps fermentescibilia, cum ipsa dein solutione, quam vocant fermentationem, quæque revera non multum absimilis est, ab alimentorum in ventriculo celebrata. Etenim sine fermentatione quæ motus intestinalis est, intima corporum dissolutio fieri nequit, quæ mixti partes unitas intime solvit, ut argumento sunt præter hanc ipsam inflationem ructibus flatibusque testantibus, intima quæ hic celebratur corporum dissolutio, & acescentia relicta &c. Accedit simul turgescencia a mole exinde enata & earum expansio hujus alimentarii canal. Nec non post digestionem absolutam flatus, qui etiam naturaliter intestinis semper insunt, ut nimirum ea expandant atque in debita amplitudine & ne collabantur, conservent, his adjuvantibus annumerare convenit. Hinc iidem, quando se exerunt lætum quandoque reconvalescentiæ signum præbent. Quam in rem BAGLIVIVS *Lib. II. Prax. med. Cap. III.* sic commentatur: *Flatus pedendo emissi judicantur motus viles & nullius ad curationem momenti, & tamen si in dysenteria flatus, qui prius non aderant, per inferiora exire incipiunt, brevi sanitatem promittunt, ut nos aliquoties observavimus.* At e contrario ejusmodi flatulentia, borborygmi & murmura labefactatum hinc motum indicantia, in acuto & periculoso morbo, lethalem quoque internæ sphacelationis indicium afferunt. Non longius hic adducam, falsa, aromatica, &c. quæ cum cibis ingeruntur, ventriculum statim ad motum peristalticum instituendum, vellicatione, una cum menstrui ventriculi particulis energeticis, salinis, & calore influente, a motu sanguinis intra vasa ventriculi, & intestinorum, ut & partium circumjacentium, hepatis lienis &c. agitatione pressa, stimulare. Nec diffiteor opinioni PH. VERHEYEN subscribere statuentis in *Anat. H. Corp. p. 53.* esse præcipuum omenti usum intestinorum, motui peristaltico inservire atque adeo necessarium eum existimat: Loquitur enim hac de re sequentem in modum: Præcipuus usus omenti, meo quidem iudicio, est, inservire intestinorum motui: cum enim illa variis multisque mutationibus subja-

subjaceant, sintque nunc repleta & distenta, nunc rursus exinanita & coarctata semperque motu peristaltico agitata; Omentum sese illis omnibus accommodat: atque intestina detumescencia insequendo, ab intumescantibus vero recedendo, in causa est, cur illorum contenta facile obsequantur motui eorundem, absque eo quod humores flatulenti in locum decedentium resiliant. Cæterum facilitant quoque hunc motum notabiliter pinguedine obsidente donati atque irrigui intestinorum parietes, a continua glandularum intestinalium & tubulorum crustæ villosæ, quam continuo stillant, humiditate lubricati atque perfusi. His humectatio atque mollitio forte etiam ab omento ut altera utilitas ejus accedit, ita, censente A. M. BRASSAVOLO in *Commentar. ad aph. HIPPOCR. Lib. I. VI. aph. 58. p. 1026.* dum inquit: supra intestina omentum a natura positum est, ut illa humectet & magis lubrica faciat, ut fæces per intestina facilius discurrere possint, & ad anum transmitti, ut exeant. Huc forsan respexit & GLISSONIVS *l. c. p. 118.* quando pinguedinem omenti peculiari modo tunicis ventriculi & intestinorum exterius beneficam, ait, quod miti suo calore eas foveat & anodyna virtute demulceat, quodque easdem humectet, lubricet & emolliat. Idem enim fere hic omentum præstat ventriculo & intestinis, quod oleum aut unguentum coriis sive pellibus. Efficit quippe, ut quoque versum facile flectantur, & motum suum peristalticum absque mutuo attritu placide perficiant. Ob hanc ipsam causam existimo, omentum infra ventriculum & colon (quibus potissimum infervit) libere propendere, ut tenuibus quoque intestinis suam unctuositatem impertiat. Hoc etiam haud dubia asseveratione affirmo peritonæum quod glandulis sat copiosis refertum est liquorem quoque pinguidiusculum & viscidiusculum continuo stillare ac reddere linimenti itidem ad instar, externas intestinorum superficies illinientem illaque lubricantem sicque motum eorum peristalticum facilitantem, simulque impedire ne intestina inter se coalescant. Nec etiam de nihilo est, resistentes in rugis & plicis ventriculi & intestinorum reliquias alimentorum atque chyli ac a deglutitæ continuo salivæ parte adhærente magis magisque fermentatione quasi inducta & tandem halitibus subacidis gratisque emissis stimulare (unde SYLV. *Lib. I. Prax. m. Cap. II.* naturalis famis causam primariam exinde exoriri censet) atque ipsa contenta inprimis spissiora facta, fæces & mole gravitate quantitate & qualitate atque calore hunc exclusionis motum pondere suo tunicas & præsertim nerveam gravante ac proinde irritante, sicque ad contractionem ejusmodi instigante calidoque vapore blando blande afficiente,

sollicitare. Per se quoque jam constat: hunc motum ex diæta liquida per iuscula & potum ordinarium largiorem & sub motione corporis vigere magis, equitatione saltatione præsertim ut & vociferatione cachinno & assumtis laxantibus & purgantibus medicamentis ut & animi pathematibus modestioribus, lætitia, ira, (de qua stypticitem alvi, ac si pharmacum assumptum fuisset solutam refert VALLERIOLA *Lib. II. obs. 4.* & *Miscell. N. C. D. II. ann. V. p. 57.* HILDANVS *Cent. VII. obs. 18.*) qui effectus a commotione bilis potissimum deducendus; hinc & ira perciti sub scrobiculo cordis & in latere dextro molestum quendam constrictionis sensum & in ore amaritudinem ordinario persentiscunt. Constat itidem eundem esse in dormientibus & quiescentibus vitæ sedentariæ deditis, parciorem potum assumentibus, lentiores &c. Ex præternaturalium magis causarum ordine, quædam etiam sunt quæ si non admodum irregulares & violentæ, adjutorio & excitatorio interdum, salutari motui peristaltico, singultus & transpiratio insensibilis per cutem impedita (hac enim continua excretionem impedita alvi laxatio instituitur major) exemplo esse possunt, ut alia minoris forte momenti jam taceamus. Nam in œconomia animali non inconsumetum est, quod provida natura ex malis & fonticis causis, bonos sæpius & salutes effectus producat: sic spasmos pessimos illos corporis animalis afflictores non raro motus salutes febriles insequuntur, ex intensiori sanguinis per vasa circuitu a validiori & celeriori cordis ac arteriarum systole suscitati, qui a centro ad peripheriam tendunt atque causas morbificas earumque mox exinde proficiscentes malos affectus averunt, dum humorum copiam imminuunt, spissitudinem ejus attenuant, & stagnationes summe verendas auferunt. Sicuti etiam flatus qui secundum naturam adesse debent, ut modo dictum est, motum peristalticum adjuvant, ita etiam idem de flatibus qui excedunt & præter naturam intestina pervagantur, dicendum; incarcerati enim atque compressi vi sua elastica duas excrementorum columnas ab invicem remove conantes columnam inferiorem, utpote superiori magis mobilem deorsum pellunt sicque motum peristalticum excrementa ejicientem & exterminantem juvant, ut explicat DANIEL TAVVRY in *Anat. nova p. 44.*

§. XV. Proinde motus Ventriculi & Intestinorum peristalticus præstantissimas actiones & usus utilissimos habet, atque multa, varia, egregia, atque insignia corpori præstat emolumenta, alia aliis potiora. Primo non absolum est, eum primum, in chylicationis œconomia, motum, in ventriculo, & maxime orificio superiori, sensibili admodum, appe-

appetitum salivamque movere, ac excitare, fibras contrahendo motrices, nerveæ etiam tunicæ atque maxime ac simul eo, salinas partes vellicantes in actum ducendo, quo superiori orificio molestia infertur, & desiderium cibi spiritibus inprimitur animalibus &c. Hinc in esurientibus stomachus valde in asperitates contrahitur, contrahentibus se perpetuo fibris, usque dum materia quædam adveniat quæ illas dilater, quam constrictionem quadantenus infringendam, famemque fallendam Erasistratus notat: Scythas jejunare necesse habentes, ventrem latis fasciis constringere. Integro illo, appetitus integer est, labefactato hoc, labefactatur ille, ideo etiam sub aëris statu austrino, fibris motricibus ventriculi laxatis, sensatio hæc minuitur, atque omnia alia, quæ tonum ventriculi laxant appetitum quoque languidum reddunt, at augeatur frigidus eo, elastico, magisque fibras roborante &c. Assumpta deinceps ex œsophago ad ventriculum detrudit ibidemque premit, subigit, contundit quasi atque commiscet auxiliante simul muscutorum abdominis per inspirationem inducta agitatione, qua solida, dura, compactiora alimenta emolliuntur & discontinuantur eaque comminuta soluta atque subacta & ex hoc (Ventriculo) ad intestina, & per ea, promovet. Ad hoc etiam dum per plicas ea agitatur, & partem tunicæ intestinalis plicat & replicat, adeo ut reciprocam fluctuationem, per series intestinorum reciproce compressas & dilatatas, experiantur, ac deinceps elaborati jam una eademque pars chyli, modo sursum & ad omnia latera prematur atque conjiciatur & fricetur inter se invicem (favente simul transitus angustia) ulterius atterit ea, comminuit, dividit, discontinuat, (unde triturantem huncce motum ingeniosissimus Pitkarnius solvendis assumtis sufficientem agnoscit). Denuove simul impedit, ne chymus ventriculi parietibus agglutinari possit, atque solvenda, subigenda, attenuanda, digerenda atque emulgenda intimius solida & sicca cum liquidis & humidis, cum menstruo ventriculi, aliisque accessoriis miscenda, irroranda & diluenda, cogenda atque confundenda ac ut illud per contractiones suas reciprocas, ex glandulis quasi emulgeatur, auxiliatrices quasi manus porrigit. Inter accessoria ejusmodi primarium bilis est ex hepate oriunda, quæ tam in ipso chylicationis negotio ac tempore, quam extra illud indefinenter per compressionem contrahendique virtutem a stomacho, (quem ex adverso positum, cum colo intestino sub ipso jacente, viscus hoc hepar, in concava ejus parte ipsam vesiculam felleam condens, habet, procedentem) ad duodenum intestinum fertur, atque promovetur per hunc ventriculi & intestinorum peristalticum,

cum, juxta illum motum, qui a diaphragmate atque undique adstantium viscerum inducitur. Sicuti chylum e ventriculo expellit, cujus exitum simul hepatis motu non nihil juvari nullum dubium, ita & in duodeno subbactum jam & bene commixtum subtilem & elaboratum chylum deinceps rursus distribuit æqualiter, ut in parietibus totius canalıs cibarii viscidiusculus non agglutinetur, hinc indeque hæreat, atque ut is non uno in loco, cumulatim congeratur, in alio, haud in mediocri chylicatorio negotii incommodum deficiat, quo per totum chyli iter, is operatur haud secus atque ii, qui farcimina infarciunt, ubi contrectando sensim intestina infarcta, materiam inditam ita disperitiunt, ut nulli inæqualis hæreat infarctus. Atque eum non solum exprimit, sed & agit & quat, eoque ut facilius sub relaxatione a præcedenti contractione sic hiantia, at angusta admodum, alioquin osculis quidem suis intestinorum interiora versus vasa subeat, præparat, ut v. g. videmus: aquam saponatam, attritione manuum, per lintheaminum poros facilius transire, eoque opportune iis admovet eum, ut particulæ ejus poris excipientibus obviam fiant, atque filtrat, colat, exprimit, trajicit per tunicæ villosæ insensiles poros, & minutissimos tubulos cavos, vario modo sibi intertextos, (ut optime descripsit BRUNNERUS *de gland. intest.*) quæ in vasa lactea abeunt. Unde molliori & liquidiori & puriori materia secedente, solidiora in intestinis crassis redduntur, ut fæculentia sic paulo crassior & exsucca remaneat omnis. Sicque ut secretis subtilioris atque liquidioris solubilis materiæ a crassa atque utilis ab inutili, quod utrumque commixtum sub nomine chymi ex ventriculo venit, five chyli, (qui omnium humorum laudabilium, materia prima existit) a fæcibus, & processus ad vasa lactea per mesenterium disseminata, (quorum quidem oscula infinito numero in cavitatem intestinorum maxime tenuium hiant, ita ut per insensibiles tamen tunicarum interiorum poros chylum recipiant) & per ea ulterius fiat, opitulatur imo urget. qua protrusione simul & maxime valvulæ horum vasorum aperiuntur. Siquidem & certe pellit ipse motus, vibratione sua, peristalticus intestinorum semel inceptus semelque inceptum iter proseguendo, chylum, per vasa lactea ulterius, ab iis exceptum immo avide pulsione quadam absorbtum, (adjuvantibus tamen aliis, ut valvulosa ipsorum lacteorum conformatione & structura quarum accuratam satis descriptionem Ruyfchius tradidit & diaphragmatis abdominisque musculis) ad mesenterii glandulas per quas, is attenuatur magis, ubi nimirum motus, quem ab illo acceperunt, & hic novo impetu addito, rursus aliis simul, pulsu arte-

arteriarum mesaraicarum & arteriæ aortæ, vi contractili ipsorum lacte-
 orum vasorum, ut & pulmonum motu cooperantibus) ulterius per viam
 chyli consuetam (id est in commune receptaculum in quo cum lymphâ
 illud transeunte miscetur & hinc dilutum magis per ductum thoracicum
 tortuosum arctatumque illum tubulum perpendiculariter in homine vi-
 gilante adscendentem, in venam subclaviam, ad ipsam massam sanguineam
 usque tendentem,) adeo ut ab ore ad intimos usque recessus laudabiles
 & necessarios succos motum hunc ventriculi & intestinorum peristalti-
 cum promovere videatur. Difficultas quidem circa chyli vasa lactea
 ingressum quædam se objicit, quæque multorum ac egregiorum Viro-
 rum, ut Pecqueti & Loweri, mentem dubiam torset, quod nimirum
 sub hac motus peristaltici contractione, venarum lactearum orificia clau-
 dantur; adeoque via, venienti chylo, intercipiatur; sed expedita res
 est; a systole quidem chylum, ad partes urget, sub diastole vero il-
 lum in sua vasa & patula, adjuvantibus musculis abdominis, (ut bene,
 modo laudatus Pecquetus monet) jam intrare. Nec absolum est affir-
 mare, motum huncce, calorem, qui a minimarum particularum & sub-
 tilis materiæ motu atque agitatione dependet omnis, etiam ventriculi
 & intestinorum reliquarumque maxime vicinarum partium & viscerum,
 excitare, qui & solutioni, distributioni & ejectioni assumptorum inservit,
 adeoque chylicationem egregie adjuvat, alibique magna emolumenta
 confert. Hæc & illa sunt quando simul operatur, ut medicamenta assum-
 ta, vim suam medicatam, decenter & tempestive, omnibus partibus
 impertiantur &c. Atque tandem quoniam excretiones partium inutilium,
 superfluarum & noxiarum æque necessariæ sunt, ad nutritionem, sa-
 nitatem & vitam ac congruorum alimentorum ingestiones, statim quo-
 que apparet, quod, ad illorum exclusionem (alimentorum nimirum as-
 sumptorum quæ a solutione atque extractione illorum remanent conden-
 sandorum decoctorum instar, quæ cum expressione facta, colaturæ re-
 siduam, intra filtrum) materiam relinquunt massæ motus intestinorum pe-
 ristalticus æque necessarius sit, quæ ab ejus conditione dependet. Ex
 illis noxiis accidentibus, quæ aliunde afferuntur, per motum hunc quoque
 eliminandis commemorare speciatim habeo, quod terror, timor & ira non
 raro multas perturbationes, in corporis variis regionibus, vultus ruborem
 cum pallore alternantem, cordis palpitationem, ventris borborygmos
 &c. ingerant, qua de re vulgo dicitur: *es ist in Leib geschlagen*, quos
 motus acceptos, si motus hic intestinorum peristalticus ultra & deor-
 sum versus promoveat, non modo cessat paroxysmus, sed & multa ma-

la simul auferuntur; si intus manserint pericula, sæpe symptomata procreent: cujus rei notabile exemplum in juvene quodam fuit PECHLINVS 3. *obs.* 17. Quo robustior & vegetior hic est, eo citius fæcum exclusio, quod pro sanitate est, expeditur; ut in hoc observatur varia hominum constitutio & differentia: Quo lenis, languidus magis, & placidus est, ut in iis, quibus omnes reliqui motus sunt segniores, quos phlegmaticos, pituitosos vocant & melancholicos, ubi impeditus est, ut in hypochondriacis, & hystericis foeminis, eo lentius etiam & impeditius, hic quoque procedit: Quo fortiores & citatiores vero iidem, quos ii experiuntur, quos cholericos nominares, eo etiam liberius & expeditius agit. Secundum hæc, primaria fere, alia adhuc sunt haud minus tamen proficua, quæ ab illo procedunt. Hic adhuc v. g. recensenda est juxta bilis & succi pancreatici in intestinum duodenum effusio, quam ex his ductibus exprimit, & simul ipsum fellis folliculum, in consensum trahit. Sic etiam facit quoque ad flatulentiam naturalem: Nam quivis fere liquor, sive calidus, sive frigidus, in recipiente ad medietatem usque repleto, fortiter agitato bullas emittit, & remoto obturamento, aliquid flatus exspirat, vel ut is etiam in liberiori aëre, virgulis frequenter percussis, dat bullulas flatibus plenas. Ab undarum in fluminibus agitatione, levis semper ventus efficitur & præpetitæ, bullas spumamque colligunt. Pariter confert ad impetuosiorum & molestiam creantium flatuum, qui retinentur exclusionem, qui ad excernenda pertinent quoque; Quoniam etiam hi potissimum in colo resident, ligamento nerveo tendinoso ad expulsionem horum, hoc magis animatur, unde carminativa & nervina salia volatilia oleosa, & quæ tonum intestinorum restituunt, & motum peristalticum armant, ad flatus discutiendos multum contribuunt. Deinde experiuntur quoque medentes, in morbis variis, inter quos hydrops primo omnium nominandus est; naturam stimulatam stimulantemque hunc etiam motum, humores peccantes cum euphoria non modo ex arteriis & vasis satis notis, sed & ignotis adhuc, quæ in mortuis evanescunt, (siquidem & plures pori in viventibus vix conspiciuntur) educere & ad intestina promovere, & per alvum cum morbi solutione externere; cum intestina non modo ad exportandas alvi fæces, sed & totius corporis excernendis, superfluis & inutilibus diversisque generis ac indolis ferment escibilibus, corruptibilibus, acrioribus, causticis, salino sulphureis, acidis biliosis, viscidis mucidisque sint destinata, unde & sæpius vel insensibili forte transpiratione impedita, humores superflui & salino sulphureæ sordes in corporibus

maxime

maxime ejusmodi impuris, in massa sanguinea, in venis colliguntur atque turgescunt, & ad vasa mesaraica ac demum ad ipsa intestina atque ad illorum glandulas affatim transferuntur: Quando enim fluxus alvi critici, qui sæpe numero ex varietate cœli, ob transpirationem prohibitam, (quæ tempore vernali & autumnali præsertim accidit) superveniunt, morbos aut præcavescentes aut solventes, minime compescendi, qui per motum peristalticum instituuntur & promoventur. Sic infantes ab ipso interdum nativitatis exordio, maxime vero circa dentitionis dein tempora excernunt varia, quæ tamen aliunde derivari nequeunt in intestina, quam ex venis & arteriis, per ductum biliarium & venas mesaraicas, quarum orificia a gracilioribus (intestinis) excipiuntur. Sic etiam variolæ & morbilli nonnunquam intestina corripunt ac materiam nocentem ibi exterminare sic natura conatur. Pariter subinde experimur, consumptis pulmonibus si nulla per tussim amplius ejectio fiat, (malo quidem omnino) sequi profluvia alvi, morbosque mali moris per sudores non expugnatos in alvi fluxum desinere, quod itidem plerumque lethale est, ut plura modo taceam. Nec plane absolum esse, reor, si dixerim, placidum & æquabilem motum hunc peristalticum ventriculi ad placidum quoque reficientemque somnum (qui viscerum cibus est) facere & capiti & omnium sensum claritatem inferre, quoniam e contrario notum atque perspectum, turbatum ventriculi motum, placidum somnum impedire & inquietudines & jectigationes atque capiti & toti corpori gravitatem inferre. Etenim ciborum corruptela, quæ secundum SANCTORIVM *Sect. IV. aph. 40.* præ omnibus aliis somnum interturbat, tunicam ventriculi nerveam præsertim, cui magnus consensus magnaue communicatio cum universo nervorum systemate intercedit, laceffit, quæ exinde constringitur ultraque ipsa constringit, ex quo constructis excretoriorum meatibus transpiratio sufflaminatur, sicque totum corpus gravius languidiusque evadit.

§. XVI. His commemoratis, fit palam: in motu ventriculi, & intestinorum peristaltico ejusque justo tono ac robore, esse integritatis, sanitatis & vitæ protrahendæ, causas quærendas. In hoc verum robur ventriculi & intestinorum consistit, hoc sane recte se habente, tota œconomia animalis stat inconcussa. Qui hoc eximio naturæ instrumento sat valido præditus est, bene appetit, bene digerit beneque egerit, adeoque perfecte est sanus, atque robusto & athletico habitu conspicuus. Omne enim corporis humani robur in motu solidorum, i. e. in systole & diastole juxta circulum fluidorum, quæ secernunt atque excernunt, consistit, & quo vividiores isti sunt motus progressivi &

excretorii, eo valentior & robustior natura est, & hujus vires, ex aëre & alimentis probe digestis subactisque primam materiam primamque originem sumunt. Tantum quippe ex ejus integritate secundum justam proportionem & æquabilitatem commodum, ad universum corpus redundat, ut pro hujus conditione & statu, seu prospero, seu adverso omnium omnino partium & actionum integritas, & origo dependeat, quæ per eum, & per succum nutritium, quem concedit atque transmittit, nutriuntur, vivunt, constant florentque: Chylificationem enim, quam hic promovet, & moderatur, præcipue, (quanquam non deveniamus eo, ut cum Harvæo, Peyero, Pitkarnio, Leewenhœckio, qui prope in Erasistratis & Asclepiadis sententiam abierunt, totum chylificationis negotium absolvendum ipsi uni & soli adscribamus.) reliquæ actiones in corpore sequuntur omnes: Nam qualis est chylus, talis est sanguis, & qualis sanguis, & humores, tales spiritus, & quales hi, tales etiam sunt, nutritio, motus, sensus, vita & sanitas. Atque eo modo se habet chylificatio, ut si semel vitiata, hæc vitia non facile corrigantur, nam quicquid non corrigitur, in prima coctione, non facile corrigitur in secunda, & tertia. Eapropter etiam ventriculus & intestina, & in illis motus peristalticus præcipue in omni morbo semper sunt spectanda & consulenda. Hinc non inepte ventrem, facultatis naturalis fontem, constituit MESVES *Cap. III. Theor. II.* Hoc convenienter & HIPPOCRATES indicavit: quando ventriculum totius corporis regem appellavit, & quando *Sect. III. Lib. VI. Epidem.* dicit: ventris segnities omnium confusio, vasorumque impuritas. Atque adeo Helmontius hæc commoda, hancque necessitudinem velut quæ ventriculo cum reliquis corporis partibus intercedit, considerans, eo processit, ut sedem ipsæ animæ sensitivæ in ventriculo residere crediderit. Unde etiam canon medicorum nascitur: fundamentum vitæ in sanguine, sanitatis in stomacho consistit. Rursus hoc hic tritum in medicina valet: qui bene ingerit, bene digerit & bene egerit, sanus est. Atque experimur quotidie: læso hoc negotio, totius corporis robur dissolvi, atque motu peristaltico labefactato (quod vitium inter alios misere, paralytici quidam maxime luunt) appetitum perdi, digestionis vim, & facultatem fecerendi inutilia, eaque per alvum excernendi, minorem evadere, unde vel paucum vel nullum debitum nutrimentum transmittitur & multarum fordium non modo in prima regione, sed & in ipso sanguine & lymphæ accumulatio juxta ad spasmodica pathemata dispositionem, quæ multis morbis fontem præbent, exsurgit. Etenim exinde non modo chyli lauda-

laudabilis loco, viscosæ saltem acidæque cruditates, flatus, nauseam, ructus, alvi obstipationem producentes, ingeruntur, sed & ad massam sanguineam transeuntēs subtiles laudabiles spirituosas partes ibi deprimunt, vires nutrimentumque absumunt, humores crassos viscidosque efficiunt, obstructionibusque hinc inde occasionem præbent, atque ubi ad caput denuo perveniunt, per cerebrum circulatio difficulter lenteque instituitur, unde sensiles functiones in capite turbantur, ac dolores gravativi, vertigo, auditus difficultas, obfuscatio visus, memoriæ debilitas, melancholia, somnus inquietus aliique pessimi pedissequi insequuntur. Inter innumera propemodum quæ exinde proveniunt mala ac morbificas causas, primo loco esset nominanda bilis præternaturalis, stagnatio, ad quam non modo bilis segnities & defectus partium activarum salino-sulphurearum ejusdem, sed & maxime tonus motusque hic peristalticus imminutus, multum contribuit. Hinc bilis continuo affluens sicque ingenti copia cumulata congestaque præter modum duodenum intestinum distendit, ex cujus stagnatione intestinorum partis distentione, multa pathemata propulsantur: Nam quando intestinum sic distenditur præter modum non modo tunicæ admodum sensiles ægerrime afficiuntur sed & rami plexus mesenterici tenduntur, nec non vasis sanguineis compressis, sanguis circa venæ portæ truncum cum initio arteriæ meseraicæ, congeritur, simulque aliorum humorum corruptorum affluentium sive ex ventriculo sive ex massa humorum provenientium commixtione atque exinde nata actione & reactione juncta, multæ molestiæ & casus non possunt non oriri. Hæ malæ causæ, ubi occurrunt fixus in lumborum prima vertebra dolor urens prunæ ad instar, anxietas præcordiorum, cardialgia, appetitus prostratio, anxietates, inquietudines, flatus ructusque molestissimi, somni defectus, virium dejectio, alvi obstructio vigiliæ, febres varii generis continuæ, lentæ, ardentes, cholericæ, præsertim intermittentes, tertianæ & quandoque icterus, alia plura mala etiam in remotissimis corporis partibus perpetuo incidunt. Vix mihi tempero, quin exemplum quoddam, quod mihi occurrit subjiciam. Foemina tenera XXXVI. circiter annorum sanguineo-cholerica, laute vivens, sedentariam vitam agens, subinde mensium parciolem fluxum, quandoque eorum suppressionem experta atque de phlogosis, cardialgia & dolore fixo circa scrobiculum cordis urente & vellicante quandoque ad lipothymiam usque cum fiti, vix extinguibili appetitu prostrato, constrictionibus faucium, alvi pertinacissima obstructione conquesta, junctoque flavo foedoque faciei colore, ad excitandum ciborum appetitum, elixir quoddam stomacha-

le ex pharmacopolio petatum, frequenter ante prandium coenamque assumpsit, ex quo dicta pathemata semper sunt aucta; meliori vero consilio inito per laxantia ex rhabarbaro arcano duplicato, nitro, cremore tartari praescripta, subinde quidem sensibilibus sopita sunt, ast dicta mala recurrebant, vomitorio vero exhibito ex rad. Ipecacuanhae ℥j. cum stimulo ex tartaro emet. gr. j. penitus ablata sunt. Cujus distentionis notabilia testimonia atque exempla apud Autores occurrunt. Sic legitur apud DIEMERBROECKIVM in *anat. p. 53.* Toties repetitae anatomicae sectiones docent hoc intestinum nonnunquam amplitudine insigni praeditum reperiri, atque tunc majori a succis fermentantibus acrioribus vitiosis in illum delabentibus, hincque validis inductis effervescentiis a quibus non solum ipsum valde distenditur; verum etiam molesti rugitus, magni dolores, lancinationes, summæque anxietates in viventibus oriuntur. Ita *Miscell. Natur. Curios. Dec. II. ann. 2. p. 86.* referunt: in cachectico quodam vesicam bilariam hepatis annexam, bile plane vacuum; intestinum vero duodenum, humore bilioso repletum atque adeo dilatatum fuisse, ut quasi bursam referret, quæ humoris libram ad minimum continere potuisset, cum enim sectione præpropere aperiretur, plusquam dimidium humoris crassioris a flavo nigricantis effusum, & nihilominus in ipso superfuisse 12. amplius cochlearia. Quanta incommoda vel a sola alvi obstructione per paucos saltem dies mox nunc sequuntur? nam caput dolet præcordia premuntur, abdomen dolores tensivi, infestant flatibus, & ructus adscendunt, phlogoses angunt, totius corporis gravitas molestat, mens torpescit. Pulchra verba sunt quæ LEONH. FUCHSIVS in hanc rem affert in *Instit. med. Lib. II. Sect. V.* Sunt vero sequentia: *Venter si naturæ beneficio laxus fuerit, id in magnam felicitatis partem est numerandum; Quippe qui alvum a natura apertam habent haud facile morbis corripuntur, qui contra adstricta sunt alvo, ii perpetuo cum morbis conficiantur.* Nec inutilis CELSI observatio est *Lib. V. cap. XII.* uno die alvum fluere pro valetudine est atque etiam pluribus dum febris adsit & intra septimum diem conquiescat; purgatur enim corpus & quod intus hæsurum erat, utiliter effunditur. Etenim consensus, quem etiam aliæ partes cum aliis habent magnum, hic quoque maximus ventriculi & intestinorum cum aliis partibus nervosis, atque adeo cum universo corpore attendendus venit. Si porro attendamus quanta eaque pessima mala ex ventriculo & intestinis a venenis haustis, affectis toti corpori inducantur, res tota extra omnem dubitationem erit posita, quando exinde convulsiones, epilepsia, immanes cephalalgia, scotomia,

ver.

vertigines molestissimæ, cordis palpitationes, angustiae præcordiorum, anxietates, summa difficultas spirandi & deglutiendi, inquietudines, partium extremarum, manuum, pedum tremores, & infrigidationes, frigidique sudores, labiorum pallescentia, intumescencia & tremor, oculorum contorsiones & obfuscationes, nasi extenuatio & alia plura pessima symptomata, statim multo agmine se produnt & terrent. Vix habeo ambiguum affirmare, motum hinc ventriculi & intestinorum peristalticum sensim sensimque approximante illo vitæ termino a Deo summo rerum Arbitro, hominibus mortalibus præfixo quoad vigorem debitum imminutum, tandem deficere, illumque describere. Ex his rursus fit palam, medentibus quoque hujus motus considerationem tam ad sanum quam ad morbosum corporis statum cognoscendum, admodum utilem esse & necessariam, siquidem ex fecum alvinarum conditione, copia colore & modo excernendi vario, indicia ipsis nascuntur, quæ & ipsis & ægrotis apprime proficua esse possunt, quoniam non modo de ipso motu ventriculi & intestinorum peristaltico sed & de alimentorum digestionem & chyli elaboratione ac distributione, de humoris biliosi & pituitosi secretionem & excretionem imo de totius generis nervosi habitudine &c. hariolari possunt.

§. XVII. Si itaque ad tuendam valetudinem, & morbos avertendos, præcavendosque, motus ventriculi & intestinorum peristalticus, adeo salutaris, optandum cuivis est, ut bene semper se habeat atque æqualis & moderatus conservetur subindeque confortetur. Eapropter evitanda omnia, quæ eum depravare ullo modo possint, sed potius omnistudio servandus est salvus atque integer, magnum hoc salutis nostræ præsidium, & exitii quoque certissimus auctor. Depravatur autem atque turbatur, dejicitur & penitus deperditur, dum aut nimis stimulatur ac intenditur atque irregularis fit, adeo ut in uno intestinorum tractu tonus laxior & remissior, in altero vero rigidior & rigorosior sit, hincque flatus in aliqua regione illorum occlusi deprehendantur; aut penitus invertitur, aut nimis debilitatur, relaxatur, ac impeditur. Irritant nimis, & eum exagitant intendunt, convellunt atque invertunt hunc alterumque motum ac tonum cum membranosis & nervosis his partibus ventriculum nimirum & totum intestinorum volumen, nimis acria acida, erodentia, caustica, maligna, venenata, (quæ præ aliis ventriculum & intestina contorquent, mire inflant, inflammant & corrumpunt,) sive ex tumultuantibus, sanguine & humoribus acrioribus, biliosis, scorbuticis, concepta & eo ablegata recrementa, sive ab intus assumptis congesta ac
a prava

a prava digestionē & alvi suppressione subacta & ob diuturniorem in ipsis intestinis moram, (cui præsertim anfractus circumvolutiones, speciatim duodeni & coli intestinatorum flexuræ ansam dant nidumque ponunt) ac ob infelicem de novo cum aliis ibi confluentibus combinationem & con fermentationem, pejora adhuc facta. Concitato hinc in quodam intestinatorum tractu, spirituum animalium fluxu irregulari & violento nimis, & provocato sic fibrarum spasmo, (adeo ut irritata non possint bene deorsum versus moveri atque alias partes & materias movere) accedente insuper impedimento, motum ordinarium inhibente, & continuata modo irritatione, aliter vix fieri potest, quin contenta sursum deorsumque per totum intestinatorum tractum continuum, versus ferantur, unde anxietates, eructationes, rosiones, ardores, dolores, etiam in remotissimis corporis partibus capite &c. accidunt. Hic, ad antecedens quoddam respicere placet atque de acidis vinis seorsim notare ex quorum diutina ingurgitatione, in viro quodam alias egregio & erudito, continuas alvi dejectiones, debilitates cum torminibus & flatulentis perpetuis ægre corrigendis, ortas, novi. Ejusmodi esse possunt etiam remedia alioquin adhibita, at præpostere, vomitoria, purgantia drastica, heleborus albus, colocynthis, elaterium, esula, laureola, præsertim gummosa, resinosa ut gummi guttæ, scammonium gialappa quæ diutius ventriculi & intestinatorum plicis adhærent, ut & vitrum antimonii, mercurius vitæ, quæ partes elasticas, molles & membranaceas, nerveas, sensiles vicinas æque ac remotas, imò totum non raro nervorum genus continuo vellicant, erodunt, torminibus exinde obortis, hypercatharsi, animi deliquio, mentis turbatione, flatulentia molestissima, convulsionibus & epilepsia subinde concitatis, singultu, strangulationibus faucium, anxietatibus & inquietudinibus, pulsu ad tactum duro atque contracto, totius habitus corporis, constrictione, sudoribus frigidis, alvi obstructione per plures dies insequente, aliisque molestis symptomatibus testibus. De auro (sic dicto, nihil enim de auro participat) fulminante non satis circumspecte adhibito quoque habeo unum & alterum conquerendum: Ab illo enim intestina corrosa esse novi, nam ob ponderositatem suam in plicis ventriculi & intestinatorum fixam sedem figit, & a succis forte corrosivis accedentibus corrosivum quoque redditum inhærens lancinat atque corrodit. Dicam ad causam differentię purgantium atque eorum diversum effectum, quod in praxi quotidiana observare licet; nimirum ex purgantibus quædam unam præ alia intestinatorum regionem afficiunt ibique effectus satis sensibiles edunt, sicut de helebaro nigro constat,

constat, quod magis intestinum rectum afficiat ibique tenesmos aut va-
forum hæmorrhoidalium intumescientiam producat, reliquis autem in-
testinis nihil molesti sentientibus; colocynthis vero, licet de reliquo
validas admodum operationes efficiat, in intestinis tenuibus pauca aut
nulla, quando vero ad colon pervenit, tanto graviora tormina atque
dolores colicos excitat, a Jalappa rursus tenuia magis quam crassa inte-
stina sensus molestos patiuntur. Nec non alia alium in finem adhibi-
ta, minus tuta sunt, quæ corrosivitate prædita sunt ut venerea, vitrio-
lum album, quod præ aliis pro scopo vomitorio adhibito per plures
dies ventriculum infirmum, spasmis obnoxium, nauseam & eructatio-
nes post se relinquit. Adhæc quotidiana praxis docet, quod quo sæ-
pius in pertinaci alvo incauti purgent, eo magis eam reddant obstru-
ctam; sublato nimirum, præter alia, intestinorum muco, necessario perti-
naciosior sequitur alvi obstructio. Mercurius dulcis in pulvere præsertim
exhibitus ventriculo ac intestinis firmiter inhærens, tincturæ item &
cristalli veneris, & hujus naturæ tincturæ, lunares cœruleæ, saturnus,
saccharum saturni, & exinde parata tinctura antiphthisica Grammani in
hunc censum veniunt quæ diarrhæam ac vomitum quandoque conci-
tarunt, ut scriptum hinc inde videmus. Siquidem ejusmodi primum ni-
miam fibrarum crispaturam & spasmum prompte excitant, ex quo de-
nuo extensus nimis, & tonus relaxatus ad motum admodum imbecillis
& perditus, ordinario insequitur, raro & difficillime in integrum resti-
tuendus. Vix satis enim dici potest, quantum nocumentum huic affe-
rant, hæc imprudenter adhibita, a quibus sibi quisque caveat sedulo.
Ex his major adhuc noxa exsurgit (ut ad priora paululum respiciamus)
quando incauti etiam practici, qualia exempla hinc inde nota sunt, sub
paroxysmis febrium intermittentium, ubi totum genus nervosum præ-
sertim constringitur, sicque per consensum quoque intestinorum cana-
lis afficitur, purgantia propinant, motumque hinc peristalticum pessime
lædunt, unde etiam alvus per plures dies ordinario supprimitur. Ex
his perspicere licet, in purgantibus exhibendis medicorum gloriam, &
ægrotorum salutem consistere, quare caute admodum circa purgantia
procedere debet providus medicus, ne circumstantias necessarias ne-
gligendo, excessum committat. Temerarium itaque facinus est nun-
quam permittendum, ubi vulgus, pharmacopolæ, empirici inscii & au-
daces promiscuum eorum usum adhibent; Hinc laude sua non caret
lex, publice Venetiis lata, per quam non licuit cuiquam juniorum medi-
corum, purgantia scammoniata & similia præscribere, proposita publica

tabula, ut omnibus esset cognoscendi potestas, in qua nomina illorum medicorum erant consignata, quibus tantum liberum ejusmodi purgantia ordinandi. Singularis in hanc observatio est quam refert WALAEVS *de method. med. p. 124.* globulum ex helleboro confectum fonticulo ad mundificandum impositum & vomitus & sedes movisse. Ad hanc perniciem, affectus animi violenti, ut vehemens ira, quæ furor brevis est ac ordinario sævitiam suam in ventriculum & intestina exercet (unde exinde non raro inflammatio) occasionem præbent, qui itidem spasmodica contractione agunt. Hic etiam mentio quædam injiciatur: res admodum adversas & fastidium creantes, salivæ redundantiam, nauseam, oesophagi stricturem, alvi dejectionem, immo vomitum non raro ciere, quo seorsim advertere licet, salivam concepto fastidio non tam ex illis salivæ fontibus qui in ore continentur, sed ex ipsa gula ascendere & eructari. Ex rebus præternaturalibus hic accusandæ sunt, spasmodicæ & convulsivæ affectiones, quibus præ aliis corporis partibus ventriculus & intestina subjecta sunt per contextum quem jam vidimus maxime membranosum & nervosum adeoque valde sensibilem. Nec mirum tantam symptomatum multitudinem tantamque vehementiam exinde accedere, quoniam his partibus ingens consensus & conspiratio per communem nervum, maxime intercostalem, octavi paris ejusque ramos plerisque his partibus impertitos, intercedit. Hoc etiam notatu necessarium est, has partes maxime spasmis & convulsionibus depravatas novis subinde morboris ejusmodi motibus, ex levi occasione esse subjectas ac obnoxias, atoniæque exinde inductæ restitutionem in integrum admodum difficilem, quoniam pedetentim atque paulatim modo adeoque difficile & sero nimis laudatissimæ illæ sanguinis & fluidissimæ partes, tonum ac robur vitale efficientes, sub valida illa, sæpiusque ita repetita flaminum omnium carneorum nervosorumque attritione, concussionem dissipatæ, reparantur. In harum rerum numero numerantur colica passio, dolores ex calculo & ejus motu, siquidem vomitus, qui ordinario hunc sequitur, de ventriculo & intestinis in consensum tractis testatur item tenesmus, inflationes acres, moleste vexantes & sæpius singultus graves aliosve convulsivos motus ac dolores ægre ferendos concitantes, hypochondriaca affectio atque melancholica, febres quartanæ; Ejusmodi enim ægri ob copiosum imprimis acidum plus justo appetunt & ingerunt, nimis vero & parcius flatus & scybala alvina egerunt, ex quo haud obscure apparet, in hoc morborum genere motum ventriculi & intestinorum peristalticum esse destructum, esse ad

supe-

superiora potius in verso præternaturalique ordine conversum, hinc & inflatus & eructationes sursum feruntur. Notabile etiam est ante accessionem podagræ, febrium intermittentium tertianarum & quartanarum præsertim & lymphaticarum, coryzæ & id genus, stomachum primum affici ac agitari agitationemque hanc ad caput usque urgeri, appetitum ciborum augeri, auctique simulque motus ventriculi peristaltici indicium indicari, languido licet corpore, atque non sine subsequente incommodo ob serum acre per transpirationem impeditam retentum intusque conversum alvumque clausam, quippe & ordinario & spasmus quidam & contractio cutis ejusque pororum cum modo illo nominato symptomate tales morbos præcedunt. Porro hic nominandi vermes & lumbrici intestinales, alvi obstructio, fæces induratae (exinde enim facile iliaca passio accidere potest) ut & hernia, intestini recti prolapsus, humores biliosi, acidi, eructationibus ejusmodi testibus, & corrupti acres tam in ipso ventriculi & intestinorum canali producti & stabulantes, quam aliunde advecti, qui nonnunquam post febres hic deponuntur, qua de causa exortam iliacam passionem veram celeberrimus Sydenhamius nominat, item tumores, inflammationes, continui solutiones, vulnera maxime capitis & meningum cerebri puncturæ, exulcerationes sphacelus, ab adpectu rei ingratae aut tetro odore naribus hausto nausea, quam vomitus sive motus ventriculi peristaltici inversio insequitur, imo perversa saltim phantasie actio, quæ varie alienum & perversum quoque ventriculo & intestinis imprimit motum. Porro dicendum est hunc motum in fame augeri appetitu aucto & borborygmis testantibus contractisque & angustatis ventriculo & intestinis. Addo idem in convalescentibus accidere. Ex hac irritatione & constrictione sive spasmodica contractione varii casus, variaque pericula proveniunt, ventriculi & intestinorum maxime, ilei & coli corrugatio, angustia, ex qua eorum debilitas perpetua manet, vid. FOREST. *Lib. XVIII. observ. 25.* alvi obstructio, in qua potissimum non tam materia, quam motus peccat, pertinacissimum malum hypochondriacum & hystericum, flatus conclusi sursumque adacti ventriculum expandentes constrictionesque dolorificas per consequens in gula, collo, pectore, dorso atque scapulis (constrictis membranis dorsi vertebrae cingentibus, variisque ligamentis, quibus œsophagus cum his partibus connectitur) capite aliisque efficientes sicque angustias præcordiorum, cardialgiam, scotomiam, obstructions pluraque alia mala procreantes, nec non urinæ effluxus aut dolorificus aut admodum difficilis, aut penitus interceptus, bilis ad intestina de-

scensus impeditus, unde deinceps icterus, convulsiones, inflammationes, imo sphacelosa corruptiones atque diarrhoea dysenteria saepissime atque quandoque lienteria proveniunt. In quibus exagitur & acceleratur nimis, rapidior & impetuosior redditur, & hinc copiosas simul, frequentesque dejectiones facit, secundum equidem in his suum consuetum ordinem suamque consuetam viam i. e. a ventriculo ad intestina, & exinde, oeconomiam animalis chylicationis notabiliter laedit & periculose, imo periculosissime afficit. Major autem ataxia, majorque impetus est, majusque periculum, si contra consuetum ordinem, contraque ordinatam viam, tanquam equus effrenis fertur, quin invertitur & pervertitur cum violenta fibrarum constrictione antiperistalticus hinc inde appellatus, ut in vomitu, in quo impetuosus, violentus & vehemens admodum est, in cholericâ passione vehementius irritatus, atque iratus, ubi perplexa quasi seditione tumultuatur, atque indomita undique versum, sursum deorsumque mobili impetu ruit & furioso: atque omnis generis fluores corporis humani laudabiles & illaudabiles, & qui tam per ventriculum & intestina excerni solent, quam etiam qui ab aliis organis procedunt & per ductus bilarios, per vesicam urinariam, imo per sudores per glandulas cutis excretorias, fluunt eoque perversè advertuntur: Sub tali enim commotione etiam transpirationes sensibiles & insensibiles sistuntur & serum aliorum & ad intestinorum usque canallem avocatur. Pariter videmus, in vomitu concitatori, bilem motu etiam inverso ad ipsam massam sanguineam regurgitare & tum icterum tum humorum crasim temperatam atque laudabilem, corrumpere atque destruere. Rursus uti a spasmō in remotis partibus existente v. gr. in calculo vomitum inferente perversè adficitur, ita ex hac irritatione, harumque partiumque dolore & motu convulsivo ad longe remotas partes ad caput & pectus atque ad pedes tale vitium procedit, & ibi quandoque non modo cardialgias & summas praecordiorum anxietates, sed & dolores arthriticos, vertiginem, epilepsiam, hic convulsiones & tractiones inducit, ut plurimae subinde observationes nos commonefaciunt, mutuam esse conspirationem fibrarum & membranarum, qua motus vitiatos & praeternaturales invicem communicant, per miram illam totius nervorum & membranarum systematis connexionem, quod non aliter fieri assolet, ac in chordis tentis, ubi fibrilla una pulsa altera quoque movetur. Vehementissimus vero conspicitur in iliaca passione, praesertim ubi haec cum hernia incarcerata est stipata ubi, ad extremam perniciem res spectat, ut plurimum omnis & extremis intestinis ob-

structis

structis obscœna, contenta, per superius guttur, cum violentia ejiciuntur. Quoniam vero ejusmodi motuum licet symptomaticorum is est qui ab interioribus ad exteriora tendunt, utpote qui naturæ non adeo infensi sunt ac illi, qui contrario nisu male feruntur, quia illi materiam quoque peccantem & excernendam foras simul excernunt adeoque utiles haud raro dicuntur, modo apparet quod & de hoc, hac ratione in comparatione aliarum talium venit notandum. Siquidem & alibi videmus motum peristalticum reciproca sua contractione & dilatatione in variis canalibus excretoriis, in corpore humano inveniendis, justo nimis auctum concitatumque excretiones cum euphoria subsequente, per vias urinarias, per ductus biliarios, per vasa salivalia, imo per transpirationem quandoque promovere atque augere.

§. XVIII. Præpediunt e contrario eum, deprimunt, inhibent modo in universo intestinorum canali, modo in hoc, modo in illo intestino saltem debilitant & relaxant, conturbant, aut tandem penitus abolunt, relaxatis nimis fibris motricibus, omnia quæ dejiciunt vires, narcotica, opiata incaute & præter modum assumpta, quæ & a calore & humido dissoluta, vaporositatem, quam maxime possident sua, ipsarum, atque adeo membranarum & nervorum poros ingrediuntur, incolasque illorum, spiritus animales ligant, tonumque & motum exinde dependentem impediunt & sufflaminant, hincque sensationem & motionem ventriculi & intestinorum peristalticum quoque languidiorem reddunt, quemadmodum Willisius ab opiatorum nimirum nimio usu ventriculi abolitam digestionem omnimodam commemorat. E contrario rursus, eadem interdum nauseam imo vomitum concitant ut observationes quædam ferunt. Præpediunt item eum, diuretica nimia, quæ humidum necessarium per urinam evehunt, item crapulæ frequentes, nimix cibi potusque, vini imprimis adusti, ingestiones, & ingluvies ac celeriter affatim & magna cum aviditate alimentorum copia ingesta ac hausta, a quibus nimis distenduntur & laxantur intestina: Ob nimiam enim ingestorum, præsertim non bene masticatorum copiam vix quoque prompte contrahi possunt, atque systalticus motus sic impeditus, totusque motus ventriculi & intestinorum peristalticus, qui liber semper debet esse, quasi ligatur atque deprimatur, & chyli exitus difficilior fit, & labore plenus: Hinc in strenue & assidue potantibus atque gulonibus, non raro, ita extenditur ventriculus, ut contrahi & corrugari amplius non possit, sed extensus atque extenuatus, anorexias & debilitates parit perennes, quod vitium in mulieribus quibusdam quæ vitæ dulcedinem

quandam sibi comparare consueverunt, ex abusu infusi ac decocti theæ & caffèe notavit Præses. Hincque ii quibus nimia cruditas ventriculi robur peristalticum gravat de ponderis instar stomachum premente dolore & vigiliis involuntariis conqueruntur, & misero aspectu faciei confœdati apparent. Monendi hic atque hortandi sunt omnes quibus curæ est ipsorum sanitas, ne forte sub alvo adstricta, vel segnius procedente, nimia satietate ventriculum obruant, quoniam enim motus peristalticus impeditus non potest hanc massam promoveri, in intestinis subsistit, ab aliisque humoribus ex sanguine accedentibus corrumpitur. Præsertim dictum hoc fit nutricibus, ne, tenellis nimia lactis & pultis copia, ut ordinario fit, multas molestias contrahant, ac eos ventriculi inflationibus, ructibus, febribus, convulsionibus &c. obnoxios reddant. Ut nimia assumpta viscera ultra modum expandunt, ita pauciora nimis eadem veluti corrugando in culpa sunt, siquidem diuturniorem inediam, apepsiam intulisse, exempla plura loquuntur. Maxime præterea texturæ ventriculi & intestinorum in plethoricis & sensibilibus naturæ hominibus, & tenerioris constitutionis, fœminis, adversus est potus matutinus, nimis frigidus isque copiosus tam extra mensam quam in ea assumptus & quando glacie alteratum vinum potant ac ut pulchre Plinius loquitur montium pœnas in gulæ delicias vertunt, nervosis enim omnibus partibus omne frigus nocentissimum est; nam rigiditatem iisdem inducit, sanguinis & lymphæ per has partes liberum transitum impedit sicque cardialgiam inflammationem, colicam, dysenteriam, iliacam passionem efficit, qualia exempla ab AETIO vid. *Tetr. III. serm. Lib. XXVIII. BORRELO cent. III. obs. 2. RHODIO cent. II. obs. 71. miscell. N. curios. an. 7. obs. 73.* peti possunt. Abacidularum aliarumque aquarum mineralium foteriarum, frigidarum improvido haustu in fœminis nervosis ventriculi & intestinorum partibus læsis fibrisque illorum inconvenienter contractis atque præsertim motu peristaltico notabiliter debilitato multas variasque noxas hinc inde notavi. Gravis porro noxa proposita est, assumtis scilicet durioribus, durioribus tostis, humores inspissantibus infarctum canalium efficientibus & bilis efficaciam deterisivam infringentibus, acidis, crassis nimium, refrigerantibus alimentis in prima præsertim mensa ingestis, austeris nimis atque acerbis, glutinantibus, viscidis, mucidis ut sunt panis nimis durus, bis coctus, spiræ, ova dura, pultes ex milio coctæ, castaneæ, mala cotonea, mespila, ribes berberes, acetum, radix bistortæ, terra catechu, vina rubra adstringentia, pontac. vin de grave &c. ut & remediis & medicamentis improvide propinatis figentibus & strin-

stringentibus v. gr. ex alumine, marte, plumbo, vitriolo paratis, rad. tormentillæ, cortice peruviano, in febribus præter rationem usurpato, actionem fibrarum impredientibus, ut & pulveribus terreo & terreo salinis, in febribus biliosis ardentibus & hecticis nimis ingestis & non dissolutis diu inhærentibus; cum potu pariori inprimis fermentescente, acescente itemque fæcum descensum magnopere retardante. Nec dulcia nimia assumpta ut infantia in hac consideratione dimittenda sunt, quæ non modo humores viscidos & glutinosos reddunt sed & atoniam ventriculo & intestinis inferunt, hinc ex nimio eorum usu ventriculi gravitatem & alvum nimis relaxatam manifeste experiuntur ii qui talia nimia in quantitate & sæpius nimis assumerunt. Ex animi pathematibus, quæ tam fluidorum quam solidorum motus ita & ventriculi & intestinorum mire turbant, hanc labem minantur diturnus mœror, tristitia, ut & intensa desideria, cupiditates, clandestinum amoris desiderium inquietæ cogitationes omnesque vehementes mentis agitationes, anxietas & diuturnæ curæ, meditationes profundiores animum fatigantes, quare literati studiis severioribus dediti, de pravata ciborum digestionem & alvina egestionem impedita ordinario laborant, unde & literatos stypticos esse dicitur. Ex reliquis indifferentibus, quies & somnus immodicus, atque immodica corporis exercitia multifariæque corporis defatigationes aër humidus, austrinus, vigorem imminuens, adducendi veniunt, nec non frigidus quatenus is ut cuncta actu frigida, ut paulo ante, dictum est, fibras rigidas & stupidas reddunt, humores circulantes & transfluentes condensant & figunt imo quoque spirituum animalium accessionem morantur. Excessive vero calidus aër valde elasticus sic redditus etiam non modo papillarum nervearum in partibus tonum & hinc sensum sed ipsas etiam partium fibras earumque actiones perdit expandendo nimis distendendoque ideoque relaxando atque debilitando, ut experiuntur ii qui ad tonum parti reddendum calorem adhibent, ast sine suo frustrantur, imo malum pejus reddunt. Inter excreta & retentorum sanguis & quæ per eandem sæpe cum eo viam impuritates per menses, lochia & hæmorrhoides consuetas excernendas tum excrementa ex intestinis rejicienda si retinentur, chylicationis negotium adeoque & motum hunc peristalticum impediunt, quod vel indicat appetitus prostratus cum his causis ordinario fere conjunctus. His accensenda mala ea, quorundam hominum præsertim ex sexu sequiori consuetudo, qua ex quavis etiam ratione id fiat, alvum egestionem suas moventem nisu atque retentione retardant atque impediunt, sicque inversum hunc

mo-

motum efficiunt atque per consequens ventrem ad plenariam obstructionem disponunt. Idem quoque dicendum venit, de flatuum coacta retentione. Hinc notamus, quod FERNELIVS *VI. Path. X.* refert, eum sæpius observasse, in eorum qui flatus retinuerunt cadaveribus, quod intestinum nec tum adeo extensum fuerit, ut brachii amplitudinem æquaret: cujus retentionis noxam perpendens Claudius Cæsar R. ut SVETONIUS *in ejus vita* recenset, lege cavit, ne quispiam in consortiis & epulis flatus cohiberet. Idem CICERO *IX. Epist. ad Famil.* monet, crepitus ventris æque ac stomachi ructus sit emittendus. Nec prætermittendum illud Galenicum: abstinentia veneris facit stomachum robustissimum, sicut nimius illius usus imbecillimum. Ex rebus præternaturalibus sequentes nominentur, flatus, latera intestinorum præternaturam distendentem, affluxus spirituum animalium impeditus, paralysis ventriculi & intestinorum, spasmodicæ contractiones in ipsorum substantia enatæ, aut aliunde & ex longinquo quandoque v. g. ex podagrico recremento intus detento (appetitus enim tunc languet) asthmate spasmodico atque adeo ex atroci capitis & dentium dolore sub his enim solutio ciborum & digestio ventriculi turbatur & inappetentia ingruit) per consensum delatæ, ab hernia compressio, fæces induratæ, copiosius cumulatae, bilis inertia, aut ejus succi pancreatici accessus denegatus, pituita tenax intestinorum lateribus adhærens ac insensibilitatem magnam; imo maximam inducens, sphacelus post tumores, vulnerationes & exulcerationes parietum intestinalium ut & tumores mesenterii hepatis, lienis intestina contrahentes flatus cum excrementis remorantes, cardialgias enormes doloresque inferentes causamque tardioris alvi præbentes. Dicendum quoque est de doloribus qui universi corporis tortores existunt, etiam alicubi excruciantes quod & ventriculum & intestina per consensum molestissime afficiant, vim motricem & peristalticum motum labefactent & alimentorum digestionem in sua officina impedian & excrementorum egestionem retardent. Quo simul intelligitur, in omni graviore dolore cibi vinique abstinentiam utilissimam esse. Juxta hos referatur & intestinorum coalitio, adstrictio & coarctatio; Siquidem adeo interdum non solum orificia ventriculi & intestina possunt coarctari, ut nec vapor, nec flatus queant exire, quem affectum Petrus Salius Diversus solum Aetium descripsisse autumat. Similes fere casus FERNEL. *Lib. VIII. de part. morb. & sympt. C. IX.* MARCELLVS DONATIVS *Lib. III. P. II. sect. II.* F. GLISSON *de ventricul. & intestin. p. 469.* retulerunt. Ejusmodi quoque intestinorum marcescentiam Renal-

naldus Columbus celebris ille anatomicus in Ignatio Lojola vidit. Quod angustia præternaturalis intestinorum ingerit vitium illud etiam a nimia eorum magnitudine & extensione expectandum qua quandoque secundum totam substantiam illorum magnitudo augetur ut v. gr. in inflammatione vel a flatibus præter modum expandentibus ea: quemadmodum exemplum a FERNELIO datum est vid. ejusdem *Lib. VI. de part. morb. & sympt. C. X.* Sicuti cacochymia motui ventriculi & intestinorum impedimento est, ita & plethora, quæ ob lentiores circulationem, quæ eam sequitur sanguis spissior, viscidior & gravior fit, sicque in tubulis & canalibus ejus uti ubique, ita etiam in ventriculi & intestinorum vasis moratus, partim regurgitationem partim stagnationem inducit ibi eaque distendit ac premit, ex quo motus eorum peristalticus depravatur atque turbatur ac præpeditur, unde digestio læditur, multæque cruditates generantur. Ad hæc scire licet, ubi hic motus peristalticus in ventriculo & in primo maxime intestino duodeno nimirum præpeditus fuerit, in reliquis quoque mox deficere eum. Ad quam defectionem ibi etiam præsertim bilis aut inertia, aut obstructio suum quoque symbolum confert. Impeditur vero adhuc frequentius & fortius in colo intestino, quod ob conformationem valvulosam & copiosis validisque carneis circularibus motricibus fibris instructam atque ob varias flexuras fortissimam strictionem patitur. Amplius scire licet vitium ex tono robore & motu intestinorum læso enatum, ubi non debitis remediis & mature corrigitur, vix aut nunquam illud corrigi, ac licet motus impetuosus quandoque supprimantur, recidivæ tamen subinde accedunt, atque ejusmodi affectus spasmodici & flatulenti per totam sæpe vitam affligunt. Vitium & atoniam ventriculi & intestinorum inductam sequuntur plures morbi chronici & pertinaces: apepsia, bradypepsia, alvi obstructio, flatulentia molestissima & in flexuris intestinorum detentæ ac tantum non incarceratæ eorumque in se veluti arietantium volutio ac revolutio, quæ sonora illa, murmura edunt, tympanites ac malum hypochondriacum spasmis & flatulentis plenum, imo melancholia ipsa hypochondriaca, atque scorbutus, somnus inquietus, capitis & totius corporis gravitas & languor, perspiratio imminuta, diarrhœa hæmorrhoides & menses suppressi, vomitus cruentus & morbus niger Hippocratis ex congestionem sanguinis & apertis nimirum brevibus vasis. Singularem ejusmodi observationem COWPERVS, Anglus in *anat. corporis humani tab. 34.* habet, ad impedito hoc motu peristaltico intestina a pyloro ad anum usque infarcta fecibus, ac multis in

locis inflammata fuisse atque tenuia adeo invicem coalita ut cerebrum quasi pia matre tectum repræsentarint. Hic & cogitatio memoriam subit quod si in parte aliqua intestinorum p. n. affecta motus peristalticus, systalticus ut continuari ad exitum usque nequeat, tuncque pariter invertatur. Interdum & ita vitatur hic motus, ut intestina mox spasmus, mox atonia affici appareat, quod fit quando alvus per aliquod tempus est suppressa atque adstricta & mox iterum aliquandiu uberius fluit. His addimus observationem de mutato alio modo motu hoc peristaltico, quam affert BAGLIVIVS *de fibra motr. Lib. I. p. 313.* vidit nimirum in cadavere horrendis motibus convulsivis cujusdam demortui, intestina summo-pere laxa & flaccida atque nimium plicata in suis naturalibus gyris turbata.

§. XIX. Tuentur vero eum atque custodiunt juvant confortant & sollicitant atque æqualiter distribuunt, ne scilicet in una regione intestinorum fortior in altera debiliior sit, & labascentem erigunt augentque omnia ea, quæ justum robur & tonum fibræ motricibus addunt, stabiliant, conservant easque ad contractionem armant, quæ blando stimulo vellicant ac proritant, quæ justum spirituum animalium affluxum in eas procurant. Ejusmodi sunt & quidem ex rebus indifferentibus, aer ferenus, tenuis, siccus, frigidior potius quam calidior nimis, tepidus & humidus, quoniam hic destruit, ille erigit vim fibrarum carnearum comprimentem, ut illo tempore majus est omnium muscutorum robur, unde hyeme & frigido Jove melius chylicationem succedere dicitur, atque appetitum magis vigere & ingestiones alimentorum, digestiones, egestionem excernendorum fortius institui experimur. Inter cibos laudantur viliores potius quam delicatiores, & qui excrementa plura quam pauciora relinquunt, quales vegetabilia sunt, atque assati magis quam elixi, duriusculi magis quam emolliti nimis teneriores & visceridi, iique, qui sale communi & aromatibus bene sunt conditi carnes, aceto aut sale confectæ, fumo induratæ (utpote quæ & fermentum, quod vocant, quoddam acrius atque fortius, quod ejusmodi cibus, difficilioris etiam digestionis si porro assumantur resolvendis atque digerendis idoneum relinqui videtur) Hinc BARTHOLINVS scribit: *Cent. IV. Hist. XXXIX. p. 318. se vidisse ventriculos debiles, cibus facilioris coctionis lesos, sed duriores solitos, fumoque induratos sine noxa assumisse*, & SENNERTVS in *Paralip. ad instit. Lib. IV. P. I. C. I.) Cap. IX. p. 54: Nonnulli carnes bubulas fumo induratos, pisces exsiccatos optime coquunt & digerunt, qui si vitulinas vel agninas carnes vel ova sordida comedant, ea omnia potius corrumpunt &c. panis item grassior qui subtiles furfures commixtos habet abstergentes viamque ve-*
loci.

locitati egressus præbentes ut & juscula, quæ cum furfuribus aliquibus in locis parari solent. Tales jam HIPPOCRATES commendare videtur quando *Lib. II. sect. IV.* scribit, panem ex farina integra, non excussa alvum subducere; purum vero minus sed magis illam constipare. Porro ejusmodi fermentescibilia, mellita, saccharata moderato usu adhibita, quæ motus peristaltici exercitium augent. Illudque faciunt lenientia & laxantia, emollientia præsertim in prima mensa assumpta, ut pruna damascena cocta, passulæ minores, butyrum recens, juscula pingua. Conducunt ex potuum generibus frigida potius quam frequenter tepida, vinum & illud medicatum compositum cydoniatum absinthiacum, juniperinum &c. Commendantur motiones corporis convenienter institutæ, imprimis equitatio, tornatio, ambulatio, scalarum ascensio, in lecto circumvolutio, quod motionis genus in pertinacissima etiam alvi obstructione, magno remedio est. Huc trahere liceat, quod pro stabiliendo non modo, sed & restituendo motu hoc peristaltico, ambulationem nudis pedibus super stratum lapideum maxime commendat Brassavola. Proficua quoque sunt infusa & decocta ex herbis, floribus, lignis, radicibus, feminibusve roborantibus & aromaticis: hb. veronicæ, serpil. calaminth, salviæ, majoran. summit. millefolii fl. roris-mar. chamomillæ, rosarum rd. sassaparill. lign. sassafras, santal. rub. lign. aloes cort. chin. chacarill. rad. aronis pimpinel. sem. anisi. foenicul. infusa & decocta thee, coffee, chocolatæ, fumus tabaci jejuno præsertim ventriculo exceptus, & præ his thermæ & acidulæ atque aliæ minerales foteriæ aquæ, spirituofo & salino principio maxime nobilitatæ, quæ simul & quantitate & qualitate sua, hunc motum exercent, turbatumque restituunt. Remedia ea huc faciunt, quæ vires corpori addunt & confortant, aut languidiorem motum blande stimulant, restituunt ac conservant, fibrisque languentibus tonum & robur addunt, confortantia sic dicta & cordialia atque carminativa stomachica, nervina, roborantia, ut & aperientia, resolventia, incidentia, quæ pituitam & mucum, qui obstaculo est, attenuant ac removent, subadstringentia quæ in quovis fere, paucis exceptis, ventriculi & intestinorum affectuum eapropter conveniunt, docente etiam GALENO *de composit. pharmacop. sec. loc. Lib. VIII. cap.* terra sigillat. siles. lemnia, martialia, limatura martis &c. tinctura martis aperitiva, tinctura victrioli martis Zwelfferi. Ad priorem classem magis pertinent, quæ subtili oleoso, aromatico & salino volatili, resinoso, tenui & gummoso principio prædita sunt, & spirituosæ, balsamica, balsam. peruv. de Copaiva, de Tolu, de Meccha,

& ex illis paratæ tincturæ & essentiæ, imprimis balsam. vitæ Hoffmanni, myrrhata, terebinthinata, quibus abstergendi ventriculum & nervosis partibus robur addendi imprimis vis est atque castoreata, succinata, tartarea, crocata, ambrata, cinnabarina, nec non camphorata, essentiæ & spiritus vegetabilium, ut enulæ, menthæ, absinthii rosarum, fl. sambuci, lilior. convall. spiritus mastichin. salia volatilia oleosa, &c. e. g. sal volatile oleosum Sylvii. Hæc quandoque & imprimis inter pastum assumi possunt. Ad eosdem scopos valent confect. alkermes, completa & incompleta, spiritus sic dictus regius Michaëlis, ex spir. rosar. salis dulc. cum moscho, ambra & confect. alkermes, aqua carminativa Dornkrei-
lii, Wedelii, ex rad. pimpinell. gentian. rubr. ari, cort. canell. alb. saffrafras, citri aurant. Winterano africano chacaril. nuce moschata indica, pipere, zingibere, caryophyll. chamomill. roman. & vulgar. calam. aromat. galanga parata officinalia pharmaca. Salina fixa blanda cum terreo-salinis, nitrum antimoniatum, sal ammoniacum, sal Glauberi cum sale epsoniensi, arcan duplicatum tartarus vitriolatus, liquor terræ foliat. tartari, tinctura tartari simplex & composita, tinctura antimonii, essent. cort. aurantiorum centaur. min. elixir. propr. Paracelsi, pulv. cachect. quercetan. pulv. stomachal. Birckmanni & similia composita elixir vitrioli Mynsichti, spiritus nitri dulc. tinct. corallior. &c. his accensentur. E re porro sunt extracta herbar. scordii, carduibenedicti &c. sub forma pilularum alterantium adhibita, ut & pilulæ aloëticæ & laxantes, item ex manna & rhabarbaro, aloe similibusque lenioribus parata laxantia, pilulæ Beccherian. Stahlianæ polychrestæ Hoffmannianæ. Nec externa ex oleosis, balsamicis, aromaticis, spirituosis & similibus sub varia forma varioque modo applicata atque illinita abdomini nec non spinæ dorsi ex adverso oris stomachi ut & clysteribus injecta (quæ speciatim intestinis crassis prospiciunt) hic non de nihilo sunt immo odorata saltem ventriculum ejusque motum blande & utiliter afficiunt & recreant, ut e contrario patet ex foetidis quæ statim nauseam & vomendi conatum inducunt. Præservant magis hunc motum ventriculi & intestinorum peristalticum a noxis mox infestantibus cruditates collectas stabulantesque removendo & congrua laxantia sive intus assumpta sive exterius umbilico & plantis pedum applicata atque lenia emetica. Has vero sordes vel ante evacuantia vel post ea reliquias nimirum temperantia adhibita alterantia, absorbentia, præcipitantia digestiva &c. corrigunt & præparant. Nec non venæ sectio certo tempore & sub statu plethorico admissa, ne ab eo tunicæ ventriculi & intestinorum graventur, &
sic

hic motus hic peristalticus impediatur, adjumento esse potest. Hinc per experientiam quoque constat alvum clausam exinde fuisse solutam. Si forte ventriculi & intestinorum fibræ rigidæ vasaque coarctata subsunt a spasmodum rigore sic contaminatæ demulcentia, oleosa, pinguiâ etiam in majori quantitate assumpta, ut oleum amygdal. dulcium, olivarum, & id genus potius e re erunt. Atque sic exposuimus, quam brevissime potuimus, motum ventriculi & intestinorum peristalticum. Ipsam therapiam motus ventriculi & intestinorum peristaltici perversi, irritati & deficientis, alia occasione Deo volente, explicatius tractabimus.

XI.

DISSERTATIO MEDICA

DE

TVNICA INTESTINORVM VILLOSA, PLVRIMORVM MORBORVM FOCO, IL- LORVMQVE IMMEDIATO CVRATIO. NIS SVBJECTO.

PROOEMIUM.

HAbet PLVTARCHVS, *in Conviv. Sapient.* Ægyptios quondam demortuos homines eorum cadavera ad condituram eviscerantes dissecto ventre soli exposuisse, extis in profluentem aut in mare projectis, quibus a cadaveribus sejunctis atque longe remotis, ut valde impuris, pura ea jam atque exequiis idonea dignaque existimabant simulque precabantur, veniam dii darent si quid his partibus nimia scilicet ciborum intemperantia esset peccatum. Physiologis, Anatomicis & imprimis Medicis, qui aut valetudinis suæ rationem habent, aut quibus etiam curæ cordique esse debet ægrotantium salus, haud eadem mens atque intentio est, aut certe esse non debet, minime cum intestina tanquam abjecta, ut ajunt, abjectis relinquenda sint, sed curatius lustrationi utili pariter atque jucundæ hæ adeo nobiles adeo necessariæ sine quibus vita deficeret vel vitæ delictum adeoque mirandæ quod ge-

nerationem præsertim & structuram atque adeo præstantes quoad actiones & usus, nostri corporis partes veniant exponendæ, quoniam singulæ singulas easque curatas bene expositiones postulant, quæ tam statum naturalem quam etiam præternaturalem commonstrant, & partem mandantem, causas & generationem morborum explanant, a quibus ad salutem via gradusque est. Potius igitur imitentur veterum Romanorum Haruspicum genus, quod mactatorum animalium exta diligentissime inspexit, atque est scrutatum, ut futura tam bona quam mala, coeca licet superstitione motum, prænosceret. Quod divinationis genus extispicinam vocabant, de quo CICERO, a quo romana eloquentia extitit, est imprimis videndus *Lib. I. de divinat.* Etenim intestina maximæ ipsis erant considerationis, eam præsertim ob causam, quoniam credebant has corporis animalis partes a Diis aut Dæmonibus animari atque moveri, unde TIBULLVS ait:

*Tuque regis sortes, per te præsentit haruspex
Lubrica signavit cum Deus exta notis.*

& STATIVS *Thebaid. Lib. IV.*

*- - Et in nullis spirat.
Deus integer extis.*

Similiter LVCANVS hæc habet *Lib. I.*

*- - Cæsi que in viscera tauri
Inferni venere dii.*

Hinc & eadem (exta) in altam aram transportabant in infima relictis victimæ reliquis partibus, de quo conferendus SOLINVS *Cap. IX.* Atque adeo cibum sacrum eadem nominabant ipsis Diis dicatum. Permagnæ ideo laudi ducitur (ut ad institutum redeamus) omnibus illis Præcellentibus ingenio Viris, qui præclare de publico meriti sunt atque corporum dissectionibus accurate cum Herophilo vacaverunt & in homine, hominem quæsierunt & in his præsertim præclara mentis acie adjuti, egregiam, alacrem & curiosam operam collocarunt, atque investigationem, ipsam magis naturam, quam opinionem suam, ducem secuti, susceperunt, ac res has ipsas delitescentes intus atque abstrusas & multis alias dubitationibus impeditas magno artis salutaris incremento evolverunt. Inter quos Eustachius, Varolius, Sal. Albertus, Picolhomineus, Fallopius, Asellius, Bauhinus, Steno, Pequetus, Caspar & Thomas Bartholini, Spigelius, Malpighius, Hieronym. Fabricius, Willisus, Wepferus,

rus, Lowerus, Listerus, Scretæ, Harderus, v. Horne, Kerkringius, Franz. Glissonius, J. C. Peyerus, Nuckius, Joh. Muraltus, Brunnerus, Sponius, Brachmannus Nehem. Grew. Charleton. Guilielm. Cowper. Hartsoecker, ut & Læwenhooekius, Ruyschius præter alios eminent. Et haud scio, an aliæ corporis partes magis sint ita censitæ ac disquisitæ, ac quidem cum ventriculo intestina, quod etiam tanto magis necessarium est, quanto certius est, esse hæc sedula consideratione multis de causis dignissima. Nec tantum facile alibi apparatus instrumentorum ad arduum, quod præsertim præstant negotium, chylicationem, a qua vita sana & ægra, longa & brevis dependet, invenies, & forsitan plura adhuc admiranda & notabilia latent ibi, sequioris ætatis felicitati reservata. Nos jam extispicium quoddam medicum ibimus celebratum, oculis animoque tunicam intestinorum intimam, quam villosam vocant, subiecturi, ut mirabilis ejus, quam præ reliquis obtinet, structura æque ac sedes, quam adeo multis morbis concedit, atque simul etiam subiectum curationis immediatum pateat latius, eoque censemus id magis utiliter susceptum, quo majoris utilitatis materiæ peccantis sedis & foci in theoria pariter ac praxi medica; evolutio ac explanatio est, cum non modo facilius symptomata, sæpissime ad loca longe remota pertingunt, atque ibidem tyrannidem suam exercent, seu causæ effectus, exinde deducantur, sed & aperiatur locus, quem adgredi Medicus, fomitem ejicere causamque tollere debet. Quare mirandum est atque dolendum, ejusmodi utilissimam longe tractationem minori, quam par est, solertia a practicis in monumentis passim & literis fuisse susceptam, cum in illis magna subinde morbi modo, causæ ejus & symptomatum, modo subiecti causæ vel morbi mortisque inveniatur confusio. Quod scrutinium summi in coelis numinis auspiciis ingrediamur.

§. I. **C**Hylicationis officinam, alimentorum canalís & via, œsophagus, ventriculus & intestina, quæ in tenuia in medio abdominis & crassa in ambitu collocata commode dividuntur atque a se invicem distinguuntur (quæ distinctio usum haud mediocrem habet in praxi) constituunt; siquidem ea in ore inchoatur, in ventriculo continuatur, & in intestinis perficitur ac in vasis lacteis, perfecte demum absolvitur. Varia ibi instrumenta tam immediata quam mediata invenies. Præparata enim in ore masticatione alimenta, per deglutationem ad ventriculum mirificum illum assumptorum conditorem & instructorem, qui accipit ut tribuat, alitur ut alat, laborat ut reficiat, immittuntur, ubi multifario-

tifariorum miscela frigidorum cum calidis, humidorum siccis &c. atque actione & motu ejusdem, menstrui solventis acrisque atque a sale volatili sanguinis arteriosi potissimum participantis accessione, sanguinis affluentis calore tanquam ignis sine flamma aquæque sine frigore spirituumque animalium influxu macerata & actuata moram neſtencia in chylum tanquam pultriculam cremori ptisanæ similem vertuntur. Ex quo is egressus & ad intestina unam & continuam illam quidem fistulam sed variam accipientem nomina ratione diversæ quam obtinent, conformationis, usus, situs & molis delatus ibi & imprimis in duodeno, proximo a ventriculo intestino ac primo, illique valde consimili & ad multos usus destinato ulteriorem limam atque ut aquosa oleosis magis uniantur commistione ibi aliqua remora concessa ac maxime saponaceæ bilis viscidum acidumque corrigentis & succi pancreatici blandi diluentis ac temperantis & lymphæ quam glandulæ conferto agmine obsitæ ibi plorant copia, & ultimam in reliquis experitur.

§. II. Confecto sic chylo purissima pars lactiformis in intestinis, quæ cribrum esse dixeris, exprimitur atque transcolatur, ubi ea a vinculis aliisque particulis viscidis plenius extricatur evolvaturque atque sic fecedens separatur ab inertibus & quibus intestina sordent, fecibus foras excernendis, ut viam inveniatur, per vias intermedias vasa nempe lactea infinito numero hiantia & ductum thoracicum ad communem sanguinis oceanum perveniendi, ut sanguis atque humores indefinenter restituantur, & omnes partes nutriantur. Ad quod ulterius investigandum, ut nobis viam quoque muniamus, has partes planius paulo, quoad rationis interest instituti, exponamus. Nimirum totus iste alimentorum canalis eadem substantia, eademque structura componitur, eodemque motu gaudet. Totidem omnibus ejus partibus sunt, quibus componuntur, tunicæ, quarum carneæ eadem fibrarum serie sunt conflatae. Harum prima exterior & communis a peritonæo orta omnium tenuissima est atque membranacea, quam etiam alii non male nerveam nuncupant, & ex multis, exilissimis licet, fibrillis nerveis, vario modo & nexu inter se complicatis, constat. Huic intestinali tunicæ adhæret cellulosa a Clariss. FRIED. RVYSCHIO inventa atque ita nominata, illi, quæ sub cute sita est, ac membrana adiposa vocatur, admodum similis. Vid. *ejus thes. anat. VI. p. 9.* cujus cellulæ in obesis subjectis ac sanis pinguedine ordinario sunt refertæ; in macilentis & morbidis autem, nisi flatu inflentur, vix in conspectum veniunt; in hydropicis, asciticis, leucophlegmaticis sero refertas has cellulas observavit laudatissimus Autor.

Hanc

Hanc excipit musculosa five carnea, duplici fibrarum strato contexta, exteriores enim in longitudinem excurrentes, interiores in circulum quasi in transversum ductæ apparent, & arte evolvuntur, quarum fibrarum munus est, ut motum gulæ, ventriculi & intestinorum peragant. Tendinosa, a Fallopio sic nominata, alias nervea dicta, sequitur, (cum tendines musculosarum fibrarum in hanc faceffant,) imprimis appetitus exquisitum sensum suo loco juxta reliquas sensationum species præstans. Hæc longior prioribus est, atque per totum canalis ductum in varias plicas & rugas præeminentiasque transversas contentorum ciborum contiguam superficiem agitantes sensim fricantes & confricantes potissimum ducitur.

§. III. Intima jam in manifestum prodit conspectum Tunica Villosa, nostri præsentis instituti argumentum. Hæc variis nominibus Autoribus nota est: quippe modo a quibusdam velamen aut velamentum villosum, a Willisio crusta villosa nuncupatur, musci villosi a Bilsio, ab Hornio a modo substantiæ velamenti bombycini titulo insignitur, & spongiosum peristroma Pequeto, F. Ruyschio papillosa tunica audit. Quæ vocabula cum re ipsa ob singularem ejus texturam, mox explicandam, satis conveniunt. Ut varia ejus apud Autores appellatio est, ita de hac ejusque existentia & essentia non parum inter Anatomicos discrepantiæ, variis varia existimantibus: siquidem quidam, antiquorum placitis pertinaciter inhærentes, hanc tunicam Villosam ex numero tunicarum excludunt, vixque nomine tunicæ dignam censent, atque adeo crustam saltem excrementitiam, a recrementis coctionis genitam, esse perhibent. Alii vero circa hanc ipsam & imprimis circa villorum naturam ac munus, variant sententiis, & ut ego quidem reor, plurimi conjectura aberrant. Omnium optime & clarissime in jejuno intestino conspicitur, atque cæteris tunicis recensitis & proximæ, tanquam fundamento suo, est adstructa, & firmissime ipsi cohæret, ita ut facies posterior nervea, anterior villosa sit, minus tamen præfatis candida est, sed cinereum magis refert colorem. Adhuc quoque amplior est, & æque in rugas plicasque insignes contrahitur, ac convolvitur, quibus chyli partes apprehenduntur, atteruntur, attenuantur, atque ulterius promoventur, & illarum citatior justo exitus avertitur. Admirandam certe structuram obtinet, quippe tubulorum minimorum, & fibrillarum, nervulorum, papillarum, villorum, arteriarum, venarum, glandularum mirus contextus est atque congeries, quibus interpositi sunt copiosissimi varie figurati & colorati obliqui & exigui pori, adeo, ut cum filtro laneo, li-

neo aut chartaceo pharmacopœorum & cribro non incongrue comparari possit. Hinc & haud multum absimilis huic, textura cuticulæ est, quæ pariter ex meris filamentis nerveis a papillarum tenuissimis ramificationibus productis, varioque nexu complicatis constat, quæque innumera foraminula habet, in quæ sudoris vascula excretoria hiant, atque ex qua componitur ipsa cutis, cujus corpus reticulare seu mucosum innumeris etiam foraminulis præditum est, & ubi papillæ pyramidales nerveæ, per ordines parallelos ex hac erumpentes in cuticulam, in plures divisæ, fibras protenduntur, atque verum tactus organum constituunt, quibus interpositæ sunt glandulæ miliares cum roriferis ductulis suis excretoriis. Talis etiam propemodum est, quæ in labiis, buccis & lingua conspicitur, in qua gustus organum est constitutum, atque duplicis generis papillis cuspidatis atque rotundis e nervorum extremitatibus per linguam dispersis, attingentibusque reticulare corpus, multis foraminibus pertusum donata, exteriorique linguae membranæ conjunctum. Nec multum abhorret ab ea placentæ uterinæ tunica, ex qua per funiculum umbilicalem foetui succus nutritius susceptus, Clarissimo Ruyschio memorante, adducitur.

§. IV. Nimirum, ut explicatius de ea loquamur, non tantum fibris carneis vario modo contextis stratisque gaudet, sed & densissimis & innumerabilibus vasorum sanguineorum adducentium abducentiumque ramulis usque ac usque divisis, prædita est, unde ubi intestina inflammatione obsessa fuerint, tumida & rubicundissima (a sanguinis scilicet stagnatione) apparet. Ex his inter villos, insurgunt glandulæ, quas quidam quidem huic tunicæ, perperam tamen, denegant, quæ ut prominentes arteriosi apices succosi ac molles ex conglobatis conglomeratæ denso agmine, per jejunorum maxime intestinorum volumen consitæ sunt, ac imprimis circa valvulas intestinorum tenuium majores, lentium, & milii granorum ad instar; figuræ tamen diversæ conspectui sistuntur; siquidem quædam rotundæ, quædam oblongæ, olivæ & amygdalis similes, quædam angulosæ & magis irregulares, conspiciuntur. Nec omnes eundem referunt colorem, quædam enim albæ, quædam subrubræ, quædam subfuscae apparent. In quibusdam manifesti poruli rotundi excretorii, vel nudis oculis percipi possunt. Præter has hinc inde, tametsi rarior earum series est, ac præsertim in crassis intestinis sigillatim sparsimque sunt distributæ, majores illis adsunt, quas modo laudatus Ruyschius non solum solitarias, sed & spurias appellat, cum per se non subsistant, atque vasculis & involucri proprio sint destitutæ; quales

les præsertim etiam sunt fragiformes Listeri. Singulæ poris vasisque excretoriis æque præditæ sunt, & ubi plures congregatæ, interdum, (quod circa valvulas intestinorum præsertim accidit) vasa sua excretoria invicem jungunt, & simul dein in communem ductum committunt. Pariter percolatione concedunt serosum ac spirituosum sat largum ab arteriis & nervis suppeditatum liquorem, utilem, necessarium & aptum tam excipiendis, rigandis, solvendisque cibis ac chylo diluendo, liquefaciendo, discontinuando evolvendoque, ejus partibus inter se unien- dis, acriorum humorum activitati infringendæ, quam etiam scybalis tan- dem in crassis intestinis coagmentandis, atque ad debitam consisten- tiam conglomerandis, eorumque duritiei leniendæ, intestinorum parietibus obliniendis & lævigandis, alvoque lubricandæ, ut non inepte I. C. PEYERVS in *Parerg. anat. med.* autumat. Hæ limpidiorem ac tenuio- rem, illæ vero viscidiorum magis & crassiusculum succum observante Celeberr. BRUNNERO tract. de gland. intest. p. 107. referunt, prout in to- to corpore videmus, diversas glandulas diversum emittere liquorem. In aqua fervente adeo indurescit, ut friabilis quasi reddatur, & tunc glandulæ melius apparent. Atque si ad candelæ lumen objectam teneas, exsiccata riteque præparata flatuque distenta intestini portionem, distincte videas licet, conformationem pene omnem. Quod æque succedit per macerationem in convenienti liquore. Has Amsteloda- mensis quondam prælaudatus Ruyschius in cadavere hominis, obstru- ctione alvi demortui, dissecto, monstravit, tantæ magnitudinis, ut per extimam intestinorum tunicam transparerent, prout quidem ordinario eas majores ac tumidas turgidasque in omni propemodum intestinorum morbo diarrhoea dysenteria &c. pridem observarunt Anatomici. Wil- lisius crustam villosam in superficie exteriori convexa, qua tunicæ ner- veæ cohæret, glandulis & osculis vasorum copiosissimis, refertam vidit. Eas quoque describunt GLISSONIS tract. de ventric. & intestin. Cap. X. GVILIELM. COLE de secret. animal. Cap. V. IOH. CONRAD, PEYE- RVS Exercit. anat. medic. Conf. adhuc RVYSCHIVS Epist. II. Nec du- bium est, quin HIPPOCRATI jam notæ fuerint, quod apparet ex *Lib. de gland. §. 3.* ubi dicit: Glandulæ in intestinis majores sunt, quam alibi in corpore, & depasci humectationem nimiam ex intestinis exprimen- tes. Glandulosa hæc conformatio ad humores superfluos recipiendos composita & apta, parum exquisito prædita est sensu, unde humorum colluviem sine notabili molestia sustinere & sat diu tolerare potest. Po- ros hujus tunica minime directos sed obliquos eum in finem sine du-

bio fabricavit Summus & Sapientissimus Conditor noster ac Parens, Deus, ne facile a solidioribus particulis penetrarentur, sed ab illis tantum, quæ varie inflectentes tam impeditos meatus, intrare iisque sese insinuare possunt. Nervi intestinis ab intercostali ramo, ut ventriculo ab octavo pari, veniunt. Quorum singularis propagatio est: Etenim nervus intercostalis coalescit ex Vti & Vltiparis ramulis in unum truncum & carotidi internæ comes, in cervice thorace & abdomine varios tumores suscipit & utrinque annuli instar axillares arterias circum ligat nervulorumque spinalium accretione, locupletatur. Commercium etiam habet cum plexibus mesentericis & nervis ossis sacri. Ex octavo pari nervus recurrens prospicit arteriæ asperæ, pharyngi, cordi pericardio, pulmonibus ventriculo, pancreati, hepati, omento, renibus, vesicæ, utero, ovario, mesenterio, aliisque partibus.

§. V. Villi, a quibus nomen accepit hæc tunica, præsertim peculiarem considerationem merentur. Hi ut vel nudis etiam oculis conspici possunt, breves, quasi recta insurgentes ac eminentes sunt fibræ aut papulæ, dense inter se junctæ, ad instar panni serici, qui holosericus appellatur. Ubi longiores eriguntur, arcteque sic conjunguntur, glandulosos fere apices, si armatis quidem oculis inspiciantur, referunt. Sanguine turgidi sunt, adeo, ut, si vel leviter cultelli vel acus cuspide eos læseris, sanguinem sat largiter stillent, ut & Clariss. BRUNNERVS modo laudatus *l. alleg.* vascula exilissima, villos perreptantia, ad extremos apices vidit, ideoque villos glandulosos esse concedit, unde & sine dubio evenit, quod ex paulo fortiori pharmaco assumpto, in fine tandem purgationum, etiam sanguis simul excernatur; natura tamen atque officium illorum, ut in §. III. jam monitum est, non omnibus liquido constat. Equidem cum prælaudato Celeberrimo Brunnero, qui in eruendis his villis diligentissimum & exquisitum alias se præstitit censorem, quem facio jure meritoque maximi, de cujus doctrina, industria, fide ac judicio existimo optime, sic sentire mallet, & parum aberat, quin crederem ego, villos hos scilicet, esse vasa glandularum excretoria ac tubulos minutissimos variis modis sibi intertextos, cavos, microscopiorum beneficio videndos, tanquam congeriem atque contextum totidem chyli infundibulorum, per quæ reciperetur in vasa lactea, quæ & ideo chylo turgida in bene prius pasto animali deprehenderentur, atque ubi adessent villi, etiam adesse vasa lactea, & vice versa, ubi hæc non conspicerentur, ibi etiam non villos conspici, ut in ventriculo & intestinis crassis. At enim sic profiteri ac scribere vix possum, cum hæc adsequi mihi
nondum

nondum licuerit, etiamsi multum ea mihi faceffiverint negotii, follici-
tumque habuerint diu. Ut enim assequerer, in bovillorum suillorum-
que calentium adhuc intestinorum, atque canum vivorum dissectorum
portionibus investigationem haud simplicem institui, atque villos ca-
vos esse microscopio etiam optimo adhibito, nullo modo deprehende-
re potui, ac licet ex digitorum instrumentorumque compressione chy-
lum reddere videantur, dubium tamen adhuc manet, an non ex poris
potius tunicae intertextis, is provenerit. Nec non etiam manifestum
est, autopsia teste ac vindice, villos in reliquis alimentorum canalis par-
tibus quoque, ut ventriculo & crassis intestinis, imo in gula, inveniri,
licet nullae ibi adsint vasorum lacteorum radices. Ad hæc, non una dif-
ficultas, se objicit, atque probabiliora argumenta, aliter cum aliis sentien-
di necessitatem mihi imponunt, & mutare opinionem graves habeo au-
tores. Difficile enim conceptu est, quomodo hæ contrariæ functiones
recipiendi chylum, lymphamque emittendi simul stare, sine unius alte-
riusve confusione, in uno eodemque organo possint. Nec chyli rece-
ptio in exerta stamina, & quæ cedere ab invicem atque recedere pos-
sunt, adeo mihi est expedita ac quidem in demissos & imos patulos po-
ros. Quare, re bene cogitata, me non erraturum a scopo certius mihi
persuadeo, si profitear, villos nihil aliud esse, quam composita corpuscu-
la ex papillis nervosis sensum & motum præstantibus & vasculis minu-
tissimis sanguineis ad instar tomenti aut gossypii, atque simul glandulo-
sis apicibus, subtilissimum liquorem in statu hominis integro stillantibus,
in affecto autem & laborante v. gr. in hepatico fluxu, (in quo serum,
ad instar loturæ carniū coloratum, excernitur:) diarrhœa, ac dysen-
teria maxime, sanguinem simul quoque reddentibus. Siquidem etiam
papulas nervosas, quas similes esse illis, quæ in cutē, & lingua, in nari-
bus &c. adsunt & sensationum organa constituunt. Ex supra adductis
præsuppono, dolorem quoque molestissimum atque adeo immanem
in ejusmodi affectibus easdem efficere reor. Itaque non est,
cur dubitem; esse saltem poros in tunica villosa villisque ipsis
intertextos, chyli infundibula, atque verum organum, per quod
chylus transjicitur, & ad vasa lactea fertur, qui numerosissimi et-
iam in exsiccata & præparata intestinorum tenuium portione,
(quam thesauri anatomici, prius laudati Ruyschii famigeratissimi, osten-
dunt) conspiciuntur, adeo, ut interstitia acus cuspide vix tangere pos-
sis. Atque adeo, præmemoratus Autor observavit papillas has ex ner-
vulis prodire, & esse ipsis ramulis nervosis, e quibus prodeunt, longe

crassiores, æque ac arteriolæ viscerum, quæ ipsos ramulos e quibus exsurgunt, crassitie longe superant. Coeterum cum ex fibrillis quoque contexti sint carnosus villi, motu suo tonico eos gaudere apparet, certo usui in sequentibus nominando inservientes, ut Clarissimus BRUNNERVS in tract. *de intest. gland.* scite docuit. Ideoque, ut reliquæ corporis partes, spirituum animalium influxu, sanguinisque spirituosus & vividi affluxu, eos æque animari, vigere, atque per varium instinctum modo constringi, modo relaxari, argumentatio valet. Pro diversitate etiam subjectorum teneriores aut robustiores sunt, ac motum modo debiliorem modo fortiorem edunt; nam qui rarioris inprimis alias sunt texturæ, ventriculi & intestinorum villos habent teneriores & delicates, quod Clariss. longe WEDELIVS in *dissertatione de Gialappa* confirmat.

§. VI. Tota tunica maxime tenuium intestinorum semper copioso mucro crasso, glutinoso & pituitoso tenaciterque satis inhærente est obducta, qui inprimis a viscidis cibis, qui eum præter naturam augment, & excrementis chyli limosis majori ex parte, annuente Lindenio, ut & non nihil e saliva deglutita itemque secundum SYLVIVM vid. *meth. med. Lib. II. cap. V. p. 97.* ex liquore pancreatico humoreque affluente, & ex glandulis intestinorum stillante, & per moram forte ac inhæSIONem ulteriorem crassiori viscidiorique facta, subnascitur. Ne autem hic mucus in immensum augeatur, sed subinde iterum abstergatur, atque Villosa tunica sensibilis, ejusque pori cum tubulis etiam lacteis eorumque orificiis libera patentiaque reddantur, commode subveniunt, tum bilis particulis suis salinis & sulphureis, abstergendi vi præditis, tum lymphæ glandularum intestinalium & pancreaticus succus energeticus copiose ac perpetuo affluens, qui modo restagnatione sua, mucro occasionem rudimentum & incrementum præbuit, jam recens allatus tenuis & fluidus diluendo leniterque eum abstergendo, confert multum. Hinc etiam advertitur, quod ex usu salium volatilium oleosorum & carminativorum, sic dictorum, in specie vero thermarum, acidularum, aquarum salubrium, decoctorum & infusorum, herbarum, lignorum, corticum, radicum, florum & seminum, quæ pro diætâ in quantitate assumuntur, primis assumptionis diebus male se sentiant potantes, & de multis turbis, flatulentis, anxietatibus, ructibus, spasmodis, nausea conquerantur, imo non raro vomitibus afficiantur, indicio certo, primum resolvi mucum in halitus, & assumpta in quantitate non liberum invenire transitum ac gravare intestina; quæ symptomata vero, si ulterius bibantur,

tur, evanescunt, ac bene per urinam ac alvum iterum excernuntur. Hinc & primum aquosum, clarum, tenue serum, poris adhuc arctioribus obstructis atque obsessis existentibus, excernitur, successu vero temporis, crassior coloratiorque redditur. Exinde etiam elucescit, quam proficuae esse possint tam nominatae thermales aliaeque minerales aquae, quam illa infusa ac decocta calida herbarum theae, veronicae & similium, coffee, juscula medicata saepius ebibita & hausta, ut & tincturae & essentiae stomachicae & abstergentes, aromaticae & amarae, absinthii centaury minoris trifolii fibrini &c. ut & polychrestorum ideo titulum jure mereantur. Atque hinc simul, bilis rite constitutae & energeticae emolumentum, quod universo corpori praestat, colligitur. Attamen & hic mucus, si non nimis est copiosus, crassus, viscidus, lentus, & glutinosus, sed liquidus magis, suam quoque potest habere & habet sine dubio utilitatem, eamque non simplicem, quam curiose exposuit L O E V E N H O E C K *Anat. muci intest. ac usu*: nempe, ut impediat, ne crassiores aliaeque inertes atque nocivae partes transeant, sed ut chylus tantum subtilis quasi transeoletur, & ne flatus nimio nisu, ipsos tunicae villosae poros impetat ac stringat, ut acriorum humorum tutela quasi, a nervosa tunica adeo sensili papillisque nerveis prominentibus avertat injurias, defendatque, ne a facibus, successive magis induratis condensatisque, detrimenti aliquid tunicae patiantur, atque ut intestinorum parietes eorumque fibrae complanentur, obliniantur, lubricentur, ne tenaciores rigidioresque reddantur, ac sanguinis ad has partes affluxui debito aliquali sint impedimento, simulque fecum alvinarum lubricitate ejus promoveatur faciliteturque secessio & dolor ac molestia avertatur, atque pertinacissima alvi constipatio, faeces induratae, multa alia symptomata gravissima praecaveantur. Addo, quod in ventriculo, quando modice acescit, appetitum stimulet, atque ad fermentationem, quam vocant, & ciborum digestionem faciat. Hinc si in dysenteria aliisque diuturnis ventris fluxionibus, in hypercatarrhi vel phthisi & hectica corroditur & perit, ubi cum excrementis alvinis mucus cum ramentis membranaceis & glandulosis, sanguine intermixto, simul excernitur, ejus defectum multa eaque gravia symptomata, dolor intestinorum intolerabilis, citata alvi dejectio praeter naturam, aut aegre expugnabilis ejus obstructio, pro materiae indole tunicarumque constitutione, non raro subsequuntur.

§. VII. Ob hanc igitur conformationem musculosam, cellulosa, tubulosa & glandulosa, porosa spongiosaque texturam atque substantiam.

stantiam, motoris, secernentis ac spongiæ vice fungitur, simul atque cribrum aut colatorium sive filtrum & incerniculum quasi utique constituit tunica nostra, per quod chylus ad secessionem jam dispositus, propulsus & expressus & iterata forte etiam vice, sicuti per spongiam, (sub diastole nimirum intestinorum,) in suos dilatatos & patulos, oblique hiantes, insensibiles tamen poros, infunditur & recipitur, qui ab illo dilatantur, laxioresque redduntur, ut tunica intumescat atque turgescat tota. Quo ipso transcolatur, & vi quadam nisuque sub systole transjicitur a constrictione pororum atque contractione fibrarum, hisce intertextarum, quibus angustatis & a tergo pressis vicina spatia replet succus liquidus, discontinuatus, ventilatus, subactus bene, mediante maxime motu intestinorum, quem peristalticum appellare solemus, tunicam Villosam intestinorum immediate tangente, molliterque premente & porulos simul lacteorum vasorum, quæ omnia sub hac tunica egrediuntur, & per eam serpentino ductu repunt, successive constringente. Nec ipsa tunica Villosa ergo in hoc negotio mere passive se habet, sed agit revera motu constrictionis & dilatationis vigore & tono, quo gaudet per spirituum animalium & sanguinis calidi & spirituosissimi affluxum, animata, quibus motus speciebus & pori & vasorum lacteorum orificia & clauduntur & rursus aperiuntur. Qua expressione, & infusione secretionemque sic facta utilis ab inutili, relinquuntur crassiores (utpote quas ob pororum angustias, neque admittere venæ intra sese, neque deducere possunt,) inertes, atque obscenæ foras excernendæ partes. Cui actioni & musculorum abdominis quinque paria, ac diaphragmatis motus, nec non aëris flatuumque elater adauctus, opitulantur. Peragitur itaque hæc animalis functio fere simili modo, quo vegetabilia succum suum nutritium per radices earumque tubulos ac poros e terra hauriunt.

§. VIII. Exinde insignia munera insignesque usus tunicæ intestinorum Villosæ, quæ ideo nequaquam vilis habenda est, per se, jam satis apparent. Hoc organo rite constituto, chylus debitus & laudabilis omni tempore accedit, & sanguis, vitæ thesaurus & omnium partium corporis alimentum, augmentum ac conservatio, sanitas denique ipsa ac vita exinde sponte fluunt sua, atque etiam medicamenta, ad amissam valetudinem reparandam facientia, ad hoc convertuntur, & per hoc ad massam humorum apportantur, ut fons salutis & vitæ collocandus hic sit merito. Primario quippe in oesophago madore, quem ex glandulis reddit, deglutitionem adjuvat, ariditatem faucium, molestum sitis sensum

senfum corrigit atque demulcet, serumque spirituosum menstruum stomachicum, ab arteriis nervisque suppeditatum, ciborum digestionem inserviens, largo foenore, continuo foeneratur. Ita in intestinorum volumine perfecte elaborati chyli subactioris, qui in horum plexibus implicatur, receptioni, expressioni, secretioni, filtrationi aut colationi, ac in poros vasorum lacteorum impressioni & infusioni, ac lymphæ a sanguine secretioni & separationi, ut & bilis cysticæ crassæ, aliarumve nocivarum etiam partium inertium & fecum exclusioni inservit. Recte enim æstimantibus, constat, omne liquidum, quod ex intestinis ad sanguinem transit, per vasa lactea ad ductum thoracicum, minime autem per venas mesaraicas ferri. Ratio enim deest, quomodo chylus venarum orificia possit intrare, ut non sanguis simul per ea exeat, quod experimento apparet ad oculum: Ligatis scilicet venis mesaraicis, duodenum atque jejunum intestina non albescunt, vel sanguinem monstrant chylo refertum. Nec etiam sanguis in venis, quæ intestinis adsunt jejuno nimirum atque duodeno, alium refert colorem, disparem illi, qui in colo & recto invenitur. Coeterum prominentes villi, juxta liquorem quem stillant secundum §. V. sat fortes forte etiam, ut in oesophago, læsiones tunicæ nerveæ sensibilis inter deglutendum metuentes avertunt, atque ventriculum ab injuriis defendunt, ipsam tunicam villosam porosque illius ab alvinarum fecum aliorumque injuriis tuentur, & præcavent, ne illabantur fæces; chylum vero mox recipiendum arripiunt quasi, colligunt, detinentque, atque ad promovendum eum, & ad depellendas fæces auxiliatrices manus porrigunt, forte que alios adhuc usus, nobis nondum perspectos, præstant.

§. IX. Ut igitur his officiis adeo eximiis & maxime necessariis rite præesse & fungi debeat & possit, legitime se habeat, beneque constituta sit, necesse est: fecus lernam, fontem imo mare malorum constituit, quæ vitia etiam ejusmodi generis sunt, quæ dein non facile corriguntur, secundum illud tritum, quod & hic valet: Vitia primæ coctionis non corriguntur in secunda & tertia. Et licet omnes aliæ nobilissimæ corporis partes bene valeant, influente tamen vitioso chylo vitiatur tota humorum massa, atque hoc vitium undique sese diffundit. Nimirum oportet, tono justo gaudeat ea, i. e. fibræ quæque ad debitam suam functionem sint aptæ, ac rite se moveant, non nimis remissæ & debiles neque rigidæ & difficiles, ad motum edendum. Pori illius imprimis ad chyli & lymphæ expeditum transitum concedendum, esse debent apti, non nimis ampliati, neque nimis angustati, aut spasmo constricti,

aut ab humore acri vellicati atque convulsi, neque pituita aut humore crasso & viscido obsessi, & liquorum aditum impediētes, sed liberi atque patentes. Si enim tonus est debilis ac relaxatus & pori nimis sunt ampli, quod ex variis causis potest accidere, ut, a spirituum animalium influxu præpedito, nimia intestinorum humiditate, chyli copiosioris affluxu, a crapula, a flatuum impetu extendente: affluentia præter modum premunt, tendunt atque extendunt, quia vigor, qui debet resistere, deficit, & justo major humorum copia eaque crassior glutinosa & iners admittitur. Equidem, videtur, non facile glutinosum subtilissima vasorum lacteorum vasorum & venarum mesentericarum oscula, ingredi posse; ast tales particulæ quæ unitæ, lentum illud glutinosum constituebant, separatæ & dilutæ, tenuioribus liquidis possunt omnino per hæc oscula se recipere sicque sanguini misceri, deinde possunt in ventriculis cordis spatiosisque cavis venosis uniri iterum & lentorem præternaturalem producere, qui se primo fere semper in pulmonibus se exerit, quando nimirum recens chylus, statim per pulmonum angustias debet transire. Si vero tonus eorum nimis est constrictus, pori angustati, vel acido quodam constrictorio corrugati, & glutinose inhærente viscido obsessi atque obstructi, debitum liquidum aut penitus non, aut parcius ac in debita quantitate, non admittunt atque transmittunt, sed præter naturam retinetur solidior & alimentosa chyli pars, & saltem tenuis justo & aquosa trajicitur. Æque metuenda vitia sunt, ubi humore quodam acri, caustico, maligno, rodente, vellicante & convellente præter naturam irritatur ac pessime afficitur, & ad secretionem atque excretionem humorum intempestive sollicitatur tota tunica Villosa. Inde me non monente, diversæ malorum classes constitui possunt, in sequentibus mox fusius distinctiusque explanandæ.

§. X. Quemadmodum morbi eorumque causæ omnium facillime in cavitatibus, in tubulis ac vasis resident, ac aptum ibi hospitium inveniunt, quoniam collectioni stagnationique humorum sua natura favent apprime, ut in tubulis & vasis sanguiferis, sive adducentia, sive abducentia sint, & lymphaticis meatibus secretoriis & excretoriis, utero, vesica, muscutorum interstitiis, toto die videmus: ita intestina, (maximus & amplissimus in corpore canalis) corporis morbis & maxime chronicis præ reliquis valde sunt opportuna, quæ deinceps ad alias partes materiam morbificam transmittunt. His deficientibus in officio suo & incongrue se habentibus, male se habet non raro, totum propemodum corpus, confluunt succi vitiosi, motus irregulares exoriuntur, & nidi

ac officinæ struuntur morborum, ex assumptis incongruis sæpius, & sæpissime superfluis ibi congestis, a confluxu ac confusione variorum humorum viscidorum, mucidorum, terrestrium, acrium, falsorum, alcalinorum, acidorum, sulphureorum, fermentescibilium, corruptibilium facile, & ex diutina in illorum plicis, valvulis, anfractibus & flexuris inhæsiōe, eorumque successu temporis corruptione, ex aëris item insalubris accessione atque tardiore in his partibus sanguinis motu. Quippe ex Anatomia notum est, sanguinis circulum in vena portæ, ex qua intestinales venæ sanguinem transfundunt, esse lentiores, quia pulsu atque impulsu fortiori in comparatione aliorum vasorum sanguiferorum, est destituta. In intestinis vero inprimis tunica Villosa vitata, est accusanda: quoniam, ut modo dictum, hæc præcipuum instrumentum & cribrum est, & id quidem impeditum atque angustum, per quod humor alimentarius adeo necessarius omnisque lymphaticus ex his ad massam sanguineam fertur. Quod si igitur ea debita requisita in præcedentibus indicata non habeat, labeque quadam laboret, vel unica, dantur quoque in corpore plures, seu effectus & phænomena quamplurima, sive multorum gravissimorum, maxime chronicorum morborum, sedes paratur, in qua semina ponuntur morbifica, ex quibus dein, ut ex malis ovis, mali corvi, varia pericula varique casus certius tandem data occasione exoriuntur, & inde facile explicari queunt. Nam compertum est, non simul & semel fieri multorum morborum genesin, sed sensim paulatimque progenerari, & cum tempore ex fonte domicilioque insurgere atque capere incrementa. Quare ejusmodi scrutinium eo utilius, quo magis necessarium est, nosse non solum morbos, sed & eorum nidum, focum & fontem, in quibus eorum causæ, tanquam in officina, formantur, fabricantur, componuntur, retinentur atque figuntur, ut eorum origo adimatur penitus, curatioque ex fundamento adornetur. Per tunicam Villosam porosque ejus uti nutrimur & vivimus, ita & per eosdem ægrotamus & morimur. Non leve statim indicium proclivitatis ad multos motus præternaturales consideratio, connexionis firmissimæ cum vicina tunica nervosa atque amplitudinis, in multifariis rugas plicasque contractionis, indicat simulque sensibilitatem magnam & minerarum morbificarum collectionem inhæsiōemque prodit: Siquidem hic mineram febrium intermittentium latere arbitror; Ratus hinc forte GALENVS est quando præcipit *Lib. II. ad Glaucon. I.* in his præsertim quartanis utendum esse clysteribus deinde descendendum ad alia. Sed specialia accidentia specialior contemplatio dabit: Nam si pri-

mo tonus ac vigor debilis & nimis est relaxatus, fibræ una cum muscu-
losa tunica simili modo debilitata languent, & motus atque promotio
promovendorum impeditur, & juxta alia incommoda insequentia, spe-
ciatim alvus durior & stipatior redditur &c. Hinc experiuntur sæpius
medentes, martialia aliaque roborantia & subadstringentia alvum pro-
ritare, quod sæpissime in febribus intermittentibus accidit, ubi ex cor-
tice peruviano, vitriolicis, aluminosis, salinis, terrestribus, præcipitanti-
bus & similibus, atque aliis adstringentibus datis assumtisque alvus flui-
da fit, quæ antea pertinacissima erat, imo diarrhœæ non raro profluunt.
Poris autem amplioribus factis, (Laxari autem sic posse vasa, ut non tan-
tum admittant crassiores humores, sed & transmittant per ultimos suos
fines, quotidiana docent observata) ut ea simul per eos transeant, quæ
non debebant transire, sed aut aliorsum ferri, aut una cum excernendis
excerni, partes nimirum, chylo conjunctæ, crassiores, terrestres, glu-
tinosæ, viscidæ, tartareæ, biliosæ, fæculentæ, corruptæ, impuræ atque
etiam laudabiles alias, chylosæ, sed nimia quantitate exuberantes, quæ
in vasis lacteis statim, ad quæ abeunt, & per quæ debent ulterius ferri
obstructiones pariunt, eaque diutius iis inhærentes mole sua gravant,
præterque modum extendunt ac debilitant, sive tonum vasorum horum
destruunt pessime, maxime dum lymphæ per lymphatica ac vasa lactea ut
& sanguifera, per venas mesenterii motus ordinario magis est impedi-
tus, quia ibi deest sat forte impellens. Inde & tumores hydatides,
lymphæ extravasationes, abscessus, obstructiones, indurationes, scirrhi
ibi quam frequentissime inveniuntur, & occasio ad cachexiam, multi-
plicesque lentos & intricatos morbos subministratur uberrima. Eadem-
que ex longiori mora, quod humoribus stagnantibus ordinario accidit,
indies corrumpuntur. Atque adeo si tandem præter modum turgent,
vasa lactea rumpunt & ad mesenterii membranas & abdominis cavita-
tem deponuntur, ex quo ascites jam paritur: si vero per ea moventur ad cor
vasaque sanguifera ejusmodi partes incongruæ, tota humorum massa præ-
ter modum repletur & coinquinatur, ut ab indole genuina & debita defici-
at, aliena fiat & corrumpatur, cruda, crassa & pituosa reddatur, atque pletho-
ra & cachexia hanc insequens oriantur; adeo ut mirum sit, quantam ejus-
modi corruptam materiam errhina, apophlegmatismi & salivantia educant.
Ex quo vitio, massæ sanguineæ advecto, non possunt non, multa subinde pro-
pullulare mala, quia labes cum chylo immissa, humoribus commixta, eos quo-
que, contagio velut similem in modum inficit, & cum his in universum per
circulationem dimanat corpus. Qualis enim chylus, talis sanguis, & qualis san-

sanguis, tales humores & spiritus animales, qui ex eo fecernuntur, & quales hi, talis nutritio, talisque vita & sanitas est.

§. XI. Si itaque chylus & lympa & coinquinati humores impuri, crassi, terrestres, acidi, tartarei, pituitosi, lenti atque tenaces & constipantes ad sanguinem veniunt, subtiles spirituofasque ejus particulas supprimunt, vires nutrimentumque præcipiunt, totam massam sanguineam, crassam glutinosamque reddunt quæ per caput inprimis lentius difficiliusque circulatur sic præsertim facile caput dolet, quod præ aliis corporis partibus doloribus patet, & ad quod etiam ex inferioribus partibus facile aliquid adspirat, ut moleste, exinde afficiatur, quia hæ partes morbificæ, graves & crassæ incrassant massam sanguineam, & in capitis vasis congestæ, violenterque & vasa ipsa subtilia & membranas proxime confitas, sensiles maxime, distendunt, ex qua distensione caput proprio affectu labefactatur, ipsumque universum aut certe maxima ejus pars dolore quidem magis obtuso ac gravativo dolet. Hinc & ii homines, qui vasa habent plurima atque exilia, doloribus capitis præ aliis sunt opportuni. Si humor simulacris fuerit & falsus, salino sulphureus, scorbuticus, biliosus eo delatus, ut in intestinis, molestiæ imo cruciatus, colica, diarrhœæ, tenesmus &c. exinde oriuntur, ita ulteriori progressu hic etiam passionis summe dolorificæ acutæ, vellicantis & terebrantis vixque ferendæ, fit sensus. Ac quoniam is continuo excruciat, continuasque vigilias parit, via ad phrenitidem insaniamque lata panditur, quæ accedentibus æruginosis vomitibus & surditate inprimis certissime aut indicatur aut jungitur. Jam etiam inflammationes oculorum, & si magna simul nervorum distensio eas comitatur, cœcitas difficile aut nunquam solubilis, possunt evenire. Imo in eo non solum vertiginis & incubi, sed & spasmi rigorisve nervorum & attoniti morbi, paralyxis & epilepsiæ & lethargi, cari, comatis, catalepsis, apoplexiæ, sensuum abolitionum, memoriæ abolitæ, melancholiæ visus hebetudinis immo guttæ serenæ, surditatis somni turbati &c. periculum vertitur.

§. XII. Quod si ejusmodi materia incongrua & quæ sanguini ob materiæ irregularitatem non miscibilis est neque etiam excretoriis poris bene respondet, tamen per circulationem ad alias partes sic defertur & hæret ac quantitate qualitateque accrescente partium poros constringit in iis itidem varii generis morbi, pro materiæ indole varia ejus, consequuntur. Tum in isthmo faucium, collo atque thorace tumores glandularum, tonsillarum, strumæ, & scrofulæ, deglutionis molestia, catarrhi pulmonum infarctus, asthma & quandoque catarrhus suffocativus & in-

inflammationes, anginæ, pleuritides, corruptiones, tabes, phthisis, dura tubercula & vomicæ, peripneumonia, tussis, anhelatio, difficilis respiratio invadunt, & in cordis motus, sufflammationem, aut etiam ex irritatione præternaturali, vel ex polyposa jam concretione, lipothymiam syncopen & palpitationem cordis, anxietates præcordiorum rapiuntur; In reliquis visceribus & vasis, liene, hepate, obstructions, indurationes & scirrhi, icterus, hydropes, leucophlegmatix ac cachexix & scorbutus, abscessus & exulcerationes, facile oriuntur. Atque tandem etiam hæc vitia a mucositate ac visciditate, lentore ac acrimonia sic contracta in ventriculum & intestina ipsa iterum redeunt, & ibi singultum, cardialgiam, inflammationem ventriculi & intestinorum, tormina, nauseam, vomitum, choleram, fluxiones alias ventris, obstructions vasorum & glandularum pertinaces, tumores & indurationes, secretionumque impedimenta, corruptiones &c. efficiunt. Alibi eadem quoque hæmorrhoidum & mensium in foeminis depravatum negotium, fluorem album, gonorrhœam, malum corporis habitum, hydropes, tumores œdematofos, calculosas in cavitatibus concretiones speciatim in renibus, urinam reddendi difficultatem atque ejusmodi alia procreant. Hæc scribenti observatio (ut plures alias ex aliis, longius non adducam) obvenit quæ in I. IACOBI HARDERI *Apiario* legitur de virgine quadam quæ per plures annos calculos sæpe variæ figuræ & magnitudinis per urinam vomitum juxta & alvum excrevit. Ex hoc colligitur cur subadstringentia a Riverio ni fallor ac Scherbio & ab aliis tam multis herbæ omnes vulnerariæ in præservatione & curatione calculi laudentur & commendentur.

§. XIII. Similiter artus afficiuntur, in quibus vagus fixusque morbus articularis, rheumatismus, malum ischiadicum exsurgunt. Nec non cutis vitia foeda, pustulæ, scabies, impetigo, psora, vitiligo, albus, melas, ipsa lepra græcorum atque exanthemata ejusmodi alia exinde proficiscuntur, & morbus auriginosus habitum occupat, alienoque tingit colore. Imo cum materia nutritia incongrua viscida & acris per hanc viam partibus omnibus accedat, nutritio totius corporis depravatur. Atque ex acrimonia sui juris facta ac pro ejusdem benignitate ac malignitate majori aut minori, sensiles partes continentes plus minusve irritantur, ut contenta, fluida, humores nempe & spiritus præter naturam per eas ferantur, exagitentur, tumultuentur, turgescant, majori in copia inordinate affluant, impingantur, & tandem qua data porta effluant, totaque humorum crasis temperata, pervertatur. Insuper languores, fe-

bres

bres varii generis, intermittentes atque errantes, quæ frequentissimæ sunt, & generi hominum inimicissimæ, biliosæ, continuæ, duplicatæ & triplicatæ, imo malignæ, purpuræ, morbus hungaricus & febris castrensis, petechialis, itemque pestilentiales inde ortum trahunt, quæ ut plurimum errores, in cibo & potu commissos, & incongrua assumpta, in annonæ caritate, a pauperculis, insequuntur, quemadmodum jam olim apud Græcos notum proverbium est: *μετὰ λιμῆ ὁ λοιμὸς*, post famem pestis: in quibus, ut tam phænomena & accidentia præcedentia, & non raro morbum per totum ejus decursum comitantia, nausea v. gr. & maximæ præcordiorum anxietates & inquietudines, vomitus, alvi fluxus &c. quam sectiones demortuorum declarant: ventriculus & intestina tenuia ut plurimum afficiuntur. Sic in peste extinctis maculas & escharas nigras in his partibus undique obsitas HELMONTIVS vid. *Tumul. pest. p. 182.* & DIEMERBROECK *de peste*, AMBROS. PARAEVS *lib. de peste*, LAVR. GIESELERVS *obs. de peste XVIII.* I. FERNELIVS *lib. de febribus Cap. XVIII.* GALL. ETSCHENREVERTERS *in epist. ad Gesnerum*, TH. CORNELIVS CONSENTINVS aliique invenerunt. Hinc & vomitus mature injunctus hæc mala & præcavet & curat. Siquidem etiam in præterita modo Massiliensi peste, ut relationes a Clarissimo DN. D. KANOLD Uratislav. collectæ referunt *p. 12. & 17.* hoc observatum est. Etenim omnes fere mortui sunt, quos vomitus non purgavit. In horum numero numerantur omnes illi morbi, quos obstructions pororum, stagnationes & pruritones causantur, a quibus horum absolvitur generatio, atque latentes sæpe morbi atque obscuri ibi forte nidulantur. His admissis in promptu est error ac vitium, quod inducitur, si non bene repurgatis ventriculo & intestinis, sudorifera calida pellentia, volatilia exhibeantur, quibus efficitur, ut materia peccans ibi residens attenuetur, imo exaltetur, & per poros crustæ villosæ ad massam sanguineam usque, vi propellatur. Amplius dicendum est, per poros hos relaxatos nimis & per vasa lactea, flatus, ex intestinis massæ sanguineæ communicari, ubi æque ac in ventriculo & intestinis similiaque incommoda excitant, ut anxietates cordis & dispnoeas & ejusmodi alia mala. Notabilis in hanc rem est, tumor ille flatulentus circa spinam dorsi apud Borellum legendus. Non minus notatu digna observatio est, quam PECHLINIVS *obs. phys. med. Lib. VII.* narrat, qui in hominis a multis ventris doloribus pectorisque angustis tandem oppressi, aperto cadavere non modo omnia intestina cum ventriculo, sed & omnes venas inflatas, atque adeo cor ipsum, copioso flatu immensum in modum disten-

tum,

tum, omni vero sanguine vacuum reperiit. Nec improbabile est flatus interdum per rupta exesaque vasa lactea cum fero ad cavitatem abdominis transgredi, nam flatus non raro cum eo ibi intermixti observantur. Occurrunt præterea alia de aliis exempla ut sanguinis verminosi apud PLINIVM *hist. N. Lib. XXVI. cap. XIII.* PAVLINI *observ. med. phys. 15. Eph. germ. N. curios. D. I. ann. 1. observ. 50. ann. VII. obs. 56. P. a. a.* CASTRO *tr. de febribus malign. & punctic. p. 16.* KIRCH. *scrut. pest. S. II. Cap. IV.* BORELLVS *cent. II. observ. 72.* in scabie & variolis, vermes generatos observavit. RIOLANVS *Ench. anat. & pathol. lib. Cap. I. 17.* e vena secta majores vermes exiisse, scribit. Qualem observationem addit N. DE BLEGNY *Zodiac. med. gall. act. mense mayo observ. 7. & A. II. mense martio observ. 8.* Aliorum observationes de vermibus ex variis corporis humani partibus excretis loquuntur, ex capite, auribus, naribus, oculis, dorso, mammis, hepate, vesicula fellea, umbilico, utero, quorum nidum sanguinem fuisse probabile est. Conferantur hujus dogmatis pathologiæ nimirum animatæ Fautores & Auctores alii Langius & Hauptmannus, præsertim. Præter vermes alia quoque animalcula ex humano sanguine prodiisse, alii Auctores testatum eunt. BORELLVS *centur. III. obs. 4.* insectorum balenimorphorum mentionem facit N. DE BLEGNY *Zod. med. gall. mens. Junio anno 2. observat. 14.* refert, lacertam, minimi digiti longitudinis e vena egressam esse.

§. XIV. Ulterius ad alterum vitium progressio fiat, ubi tota tunica, a copiosa materia incongrua, corrupta, crassa, pituitosa, & muco lento atque tenaci, aut ab acido aut quodam austero atque acerbo constringente, (quod hypochondriacos consummatos frequentissime occupat, & ægerrime imprimis has spongiosas partes afficit) aut a calculosis concretionibus aut a cicatricibus inductis atque induratione & scirrho, (ut de singulis passim occurrunt observationes, præter) naturam est obsessa, incrustata, ejusque pori repleti, obstipati, angustati, coarctati, contracti corrugatique atque coaliti. Quo ipso vasa etiam lactea, quæ exinde egrediuntur, non raro simul eodem malo afficiuntur, adeo ut aut tenuis tantum & aquosa portio & paucum aut nihil prorsus admittatur, & lymphæ itus & reditus, atque chyli impediatur per poros distributio, quod vitium senibus & iis, qui digestionis debilitate, & frigido, ut ajunt, ventriculo laborant, admodum familiare est. Ex quo non modo humorum nimix congestiones ac stagnationes in intestinorum canali, in corruptiones mox abeuntes, sed & anorexia, artuum lassitudo totius corporis emaciatio, viriumque successiva & tandem totalis prostratio, animi deliquia,

deliquia, febres intermittentes, flatulentia molestissima hypochondriorum & anxietates immo tandem tympanitis (cum flatus per poros intestinorum non possint transire,) alvi retentio atque segnities cum ipso malo hypochondriaco, quod totum flatibus debetur, hydropes, coeliaca passio, & elaborati, chyli excretio seu lævitas intestinorum, atrophia, marasmus (quoniam in senibus minutissimi canales angustantur ac concidunt) febris lenta & hæctica lentæque mors propullulant atque sequuntur. His de causis observationes quasdam collegi in fœmina quadam Lipsiensi, quæ per quatuor annos anorexia laboravit, indiesque macie est confecta, & tandem fere consumpta, præterea semper de motibus in abdomine molestissimis oculisque patentibus est conquesta, ac si animalia viva per intestina errarent, quæ, cum per quatuor propemodum menses convenientibus remediis, interpolatis laxantibus, & alterantibus, esset curata, tandem ex laxantibus pilulis densissimam pituitosam, concretam materiam copiosam placentarum ad instar, cui multi vermes ac lumbrici inhæserunt, rejecit, ex quo indies continuatis tandem remediis melius se habuit, appetitu ordinario ac nutritione redeunte, quiescentibusque abdominis motibus. Nec a vero longe abesse censeo, si cachexiam illam virginum chlorosin dictam, mensibus obstructis junctam ac pedissequam inter pravæ digestionis vitia referam, quoniam ab erroribus diætæ, & imprimis assumtis viscidis, mucidis, acidis, constringentibus, ut acidorum abusu, placentis pinguibus & calidis &c. sæpius accidit, ubi ventriculi & intestinorum tunica villosa & glandulosa amurca & crassa pituita est obsessa. Atque adeo de ipso fluore albo mulierum idem dicendum. Simul hoc juvantia docent, quippe abstergentia & laxantia ex salinis neutrisque salibus, ut & thermæ & aquæ salubres salinæ, egregiam his opem fœnerantur & sine quibus reliqua omnia licet & optima balsamica mihi nomines, cassa deprehenduntur. De calculosa obstipatione pariter observationem notabilem cum versarer Parisiis quondam habui in vetula, macie lentoque morbo confecta atque demortua, in cujus cadavere crusta intestinorum villosa, a jeuno per totum intestinorum tractum ad rectum usque materia sabulosa ex luteo alba ac friabili erat obsessa, atque pori villique ea dilatata eademque iis impacta cernebantur. Ibi quoque in alio vetulæ demortuæ & macie confectæ cadavere raro spectaculo vidi, glandulas intestinorum imprimis tenuium in hac tunica insigniter tumefactas, adeo, ut villos porosque magna ex parte comprimerent, quo chyli aditus sufficiens prohibitus fuit. SYLVIVS vid. *ejus prax. med. Lib. I. cap. XVI.* sæpius observavit ex dysenteria

Y y

occlusos

occlusos poros ad vasa lactea tendentes. De intestinorum tunicarum coalitu post ulcera observationes ARGENTER. *Lib. II. cap. X. de caus. morb.* BENIVENIVS *de abd. morb. caus. Cap. XXX. & XXXVII.* & SCHENCKIVS *Lib. II. collegerunt.* Quæ coalitiones & indurationes, ut & maxime cicatrices, calli & scirrhi inducti nullum auxilium facile admittunt. Qua de re conqueritur modo nominatus SYLVIVS *l. c.* quod nulla nota essent medicamenta quæ cicatrices in tenuibus intestinis solvere, crustamque villosam novam, & talem quidem quæ transitum concedat chylo ad lacteas venas propellendo, reparare possint. Exinde apparet, quantum peccent improvidi & nimis confisi medici, quando v. g. in febribus intermittentibus promiscue & statim in principio, sine præmissis evacuantibus, & pituitosum gluten, quo obsessa est tunica intestinorum villosa, abstergentibus, incidentibus, & aperientibus, adstringentia, aluminosa, vitriolica, terrea, & famosum illud febrifugum corticem peruvianum magna in quantitate ingerunt, quibus obstructions pororum magis augent, & vel statim diarrhœas & anxietates efficiunt, torminumque mineram & causam febrium lentarum & atrophix subministrant. Similem labem inferunt ii, qui, post habitis his, in variis morbis imprudenter juxta adstringentia dicta, opiata, & refrigerantia nimia præscribunt.

§. XV. Sequantur tandem reliqua vitia, ubi tunicam nostram humor maxime corruptus, malignus, salinus & salino sulphureus, biliosus, acris, causticus, venenatus, acidus, excessivus aggreditur, qui inprimis teneras tunicarum fibras carneas æque ac nerveas & membranaceas ipsosque villos ægre afficit, & non modo eam obstipat, coarctat, sed & vellicat, corrugat, spasnum inducit, convellit, & non raro corrodit, & vellicatione sua perturbatis concitatisque immanem in modum spiritibus animalibus, simul alias partes in consensum trahit, quibus, per nervos præsertim, magnum intercedit commercium. Ea enim omnis motus indoles est, ut facillime & longe lateque in distans sese extendat. Nec alia pars corporis humani facile tam gravibus spasmodicis motibus & omnis generis doloribus fixis vagisque urentibus, perturbantibus, rodentibus, lancinantibus, pungentibus, distendentibus, expandentibus, gravativis, prementibus, pulsantibus, contorquentibus, contendentibus afficitur, quam intestina, ob membranaceum atque nervosum, quo hic gaudet canalis, contextum & multiplicem causarum concursum. Acriora assumpta caustica, venena, vomitoria, purgantia, drastica, vermes, cruditates nidorosa & acidæ summe corruptæ hic accusanda veniunt. His specia-

speciatim sine dubio adscribendum esse puto, quod in quibusdam acidorum vinorum nimiae ingurgitationi deditis observavi, eosdem dejectionibus alvi cum torminibus & flatulentis, abdominis, vix compefcendis, correptos fuisse, arrosis forte intestinorum tunicis. Proin non modo in intestinis cardialgiae, anxietates praecordiorum, colicae convulsivae, passiones coeliacae, imo & iliacae, vomitus, cholera, ipse morbus niger Hippocratis, dysenteria, inflammationes & sphacelosae corruptiones, & ejusmodi deleteria causa producuntur, sed & irritant dein irritata, (intestina) ac afficiunt longe remotas partes, vasa sanguifera spasmodice afficiendo, nervos vellicando, incolasque illorum spiritus animales in ataxiam concitando, quo ipso humores modo ad has modo ad illas partes pelluntur, eaque infarciuntur, v. g. caput, pectus, renes, vesica urinaria, hepar &c. atque ita saepissime epilepsia passiones hystericae, hypochondriacae, paralyfis, paresis, apoplexia, atque similes capitis affectus ex primis viis suboriuntur, spasmodice nimirum affectis fibrillis nerveis ac membranaceis aut ruptis tenerrimis cerebri vasculis. Hinc horripilationes, nausea & ad vomitum inclinatio, faciei intumescencia & rubor ac stupor apoplexiae imprimis junguntur. Quare apprime HENRICVS AB HEER *obs. XVIII.* scripsit: *Plurimi nostratum incurrunt apoplexiam in gluvie & commessionibus.* Hinc vomitoria, opportune exhibita, quae tunc ingentem humorum corruptorum, biliosorum, nigricantium saburram exonerant, felicissime apoplexiam paralyfin aliaque ejusmodi mala praecavent, avertunt, ac curant. Conf. HELMONT. *lib. de morb. sed.* WEDELIVS *pathol. dogmat. p. 135.* ANGELVS SALA, IOH. LANGIVS, ut plures alios taceam. In hanc rem & Rhasis notabilis observatio est, multos paralyticos per supervenientem diarrhoeam curatos fuisse. Catalepsis a vermibus intestina rodentibus saepius fit. Quid frequentius est, quam quod caput ex vitio primarum viarum male se habeat ac doleat, vigiliae &c. exerceant, & aurium tinnitus, scotomia frequentissime ab acido intestina vellicante visus laesiones, aphonia, constrictiones faucium, strangulationes, foeminis imprimis familiares, proveniant. Nec desunt de primarum viarum cum thorace consensione testimonia eaque quam plurima. Cui tussis stomachalis ferina sicca ignota esse potest? Sic WILLISIVS *de morb. convuls. Cap. XII. p. 140.* affirmat, in asthmate convulsivo periodico, tussique convulsiva pulmones sanos ac integros esse, mineram vero malorum in intestinis saepius reperiri. Atque TVLPIVS *Lib. IV. cap. XLVII.* testatur: Febrem syncopalem a bile corrupta exortam fuisse. Unde & in ejusmodi affectuum curatione vomitoria

ac laxantia, præcipitantia, nitrata, acrimoniam temperantia RIVERIUS *in obs. ac praxi*, BALLONIVS vid. *Lib. I. epid. p. 62.* ne plures nomine-
mus, expertissima remedia afferunt. De infimo ventre res pariter no-
tissima est, de quo hypochondriacum hystericumque malum ex men-
sium obstructione vasorumque mesenterii saltem adducere hic erit satis.

§. XVI. Similem in modum de reliquis sentiendum est, ac fere de
omnibus in universo corpore partibus totoque nervoso genere. Hinc
v. g. experimur frequentissime, violentas animi pariter ac corporis pas-
siones alvi fluxiones concitare. Doloribus vexatis intestinis, febres,
dolores variarum partium longe remotarum, inquietudines, cutis uni-
versæ pororum constipatio & corrugatio, horripilatio &c. prodeunt,
quæ tunc sympathice patiuntur, quoniam illis cum intestinis per nervos
maxime intercostales magna intercedit necessitudo ac mutua dependen-
tia, consensus atque commercium: & vice versa, illis læsis, læsio in hæc
quoque redundat. Sic, læso cerebro a vulnere ac plaga graviore & vel-
licato a calculi per uretheres transitu, biliosi vomitus accidunt & alvi
dejectiones, manifesto indicio, vasa choledocha & intestina spasmò af-
fici. Hinc in ejusmodi morbis spasmodicis urina aut parce fluit, sæ-
pius supprimitur, aut pallida, aquea tenuisque redditur: indicio rursus,
ob constrictas angustasque vias, aut insufficientem aut subtilem saltem
materiam transmitti. Speciatim adhuc indicare convenit, a vellicatio-
ne inductos spasmos, intestina constringentes, hæmorrhagiarum in va-
riis partibus constituere causas. Quippe vasis sanguiferis, ventriculum
& intestina perreptantibus, sic constrictis angustatisque, sanguis non po-
test libere circulari, sed ex his ad alias vicinarum partium venas pelli-
tur, quas præter modum extendit ac urget, ut ad proxima loca cum im-
petu ruat, usque dum pressis ruptisque vasis apertisque illorum osculis
alicubi effluat, adeo, ut nullus dubitem affirmare, nullam facile hæmor-
rhagiam sine internis vasorum obstructionibus esse. Quod autem ut
plurimum hæmorrhagiarum, quæ sine externa læsione contingunt, in in-
testinis & visceribus infimi ventris lateat causa, exinde fit palam, quia
omnem fere sive narium hæmorrhagiam, sive hæmoptysin aut sputum,
vomitumque cruentum, morbum nigrum Hippocratis, aut mensium hæ-
morrhoidumque fluxum, inflatio abdominis, spasmodici motus, dolores
pressorii, tormina ventris, extremorum infrigidatio ac horripilatio cum
pulsu arteriarum magno, ac vehementi partis, ex qua effluit sanguis, in-
tumescentia, rubore & dolore gravativo &c. præcedunt & comitantur.
Hinc etiam frequentissime hypochondriaci & hystericæ foeminæ, qui-
bus

bus ordinario spasmis ac obstructiones in intestinis ac visceribus sunt, hæmorrhagias experiuntur.

§. XVII. Sæpe etiam non solum ab assumtis causticis, atque venenis, sed & in morbis quibusdam, ut in dysenteria & phthisi, ceu observationes Autorum ferunt, ab acrimonia proclive abrasionis, exesione, denudationis & erosionis periculum est, quo contracto, tunicæ hujus defectum gravibus dirisque symptomatibus & exitio miseri luunt, & ut plurimum gangræna & sphacelo vitæ cruciatibusque finem imponunt. Sic totam interiorem intestinorum tunicam excretam esse TVLPivs *observ. Lib. III. cap. XVII.* refert. Æque villos totos cum glandulis abraesos per totum pene intestinorum tractum in cadavere hominis, dysenteria demortui, in Amstelodamensi nosocomio me vidisse quondam memini. Fuit quoque, cum ejusmodi vitium Tiguri, quæ primaria Helvetiæ urbs est, sub manu ductione Clariss. ac Experientiss. Dn. D. Joh. Muralti notavi, prout ex sequenti historia constat. Vir XXXVI. circiter annorum melancholico-cholericis temperamenti, strictioris macilenti corporis habitus, ad iram proclivis, & præter modum aliquando ab ea motus per trium septimanarum fere spatium ægrum se sensit, subinde tamen lectum deseruit, & de appetitu imminuto, nausea, colicis passionibus, modo dejectionibus alvinis serosis, modo alvi adstrictione, per aliquot dies perseverante, inflationibus ventris constrictoriis, anxietatibus, inquietudinibus, & doloribus colicis conquestus est. Pulsus erat durus, & urina pallida ac tenuis. Vinum, succum citri, cum saccharo, quo alias delectabatur, edulcoratum, cerevisiam, spirituosam, & pulveres terreos salinos laxantia, & frigidiusculum ferenum aërem plane non ferebat, ad auctis exinde dictis symptomatibus. Circa tertiæ septimanæ finem corporis extrema calido influo destituebantur, & exactis aliquot diebus, macie confectus, spasmis immanibus subortis, mortuus est. Facta aperitione, tunicæ duodeni atque jejuni intestinorum arrosæ, villosa præcipue perrosa & inflammata conspiciebantur. Memini etiam adhuc, me ex B. D. Ortlobio audivisse observationem de viro quodam primario, qui, præservationis (tempore pestis Lipsiensis) gratia, acidam, succum imprimis citri, quotidie majori in copia assumpsit, & a peste quidem immunis mansit, attamen colica convulsiva demortuus, cujus ventriculi & duodeni atque jejuni intestini tunicæ, imprimis villosa, tota fuit erosa, adeo, ut in ventriculo tria foramina conspicerentur, per quæ cibus & potus in cavum abdominis sunt prolapsi. Hinc etiam patet, ut experientia docet, cur dysenteriam graviolem ut plurimum colicam passio & maraf-

marasmus sequi soleat. *WILLISIVS in pharmac. vet. §. II. Cap. I.* Villosam crustam in gulosis & bibonibus esse ex parte detritam, testatur. Exinde colligitur, quanta totius animalis œconomiae perniciēs haud simplici modo ex vitiata hac tunica oriatur.

§. XVIII. Satis de his nobis verba fecisse videmur. Alterum, quod habemus institutum jamjam persequamur. Scilicet, quemadmodum tunica intestinorum Villosa multis morbis dat sedem, partem mandantem, occasionem ac causam; ita & in morborum, longe etiam distantium, curatione immediatum concedit subiectum. Quoniam omnia medicamenta in corpus assumpta, quæ facile possunt per subtilissimos poros tunicae Villosae, vasorum lacteorum, transire, ut tincturae, essentiae, spiritus, oleosa subtilia, salia liquefacta, per hanc chyli viam ad massam sanguineam transeunt. Quantumvis etiam enumeres plura eorum, quæ, in corpus assumpta, operationem instituunt, non saltem evacuantia, vomitoria, purgantia, laxantia, sed & alterantia, fixa adstringentia, tonica, terrea, terreo salina, & omnia quæ sub præcipitantium titulo veniunt, & quæ sub forma pulverum præsertim præscribuntur, qualia in schedulis medicorum utramque faciunt paginam, quæque certe universaliora sunt alterantia atque in pluribus affectibus egregium officium collocant, adeo, ut polychrestorum remediorum titulum jure mereantur, quorum plurimum paucissimæ tantum partes, aut etiam sæpe prorsus nullæ, ad sanguinem remotasque partes forte affectas, perveniunt, sed immediate & unice tantum primarioque in ventriculo & intestinis, & præcipue in tunica villosa & per eam, suam exerunt operationem. Nam rem recte æstimantibus constat, poros & tubulos tunicae Villosae atque vasorum lacteorum in naturali sua constitutione subtilem saltem succum chylosum admittere, heterogenea & crassiora ut pulveres, & potus etiam genera, crassiora vina, cerevisias, potulenta amaricantia crassiora coffee &c. & adstringentia terrea & terreo salina & sulphurea, quæ solvendo non sunt, bilemque crassiorem excludere, cum facibus foras excernenda, quorum quædam ideo etiam eas fusco colore, ut chalybeata, saturina & quædam ex auro, imbuunt. Sic validius stypticum assumptum pro nimia fibrarum relaxatione ferique vel sanguinis affluxu forte corrigenda & compescenda dum adhuc vel in stomacho hæret etiam in remotioribus locis constringentem exerit effectum. Sic cinnabaris tota cum sulphureis suis partibus, ut per experimenta facta constat, iterum, ut est assumpta & bene rubra, redditur. Inter omnia vero medicamenta quæ simul ac ad ventriculum perveniunt effectum etiam in diffitis partibus exe-

exerunt, opiata eminent, cujus vel unicum saltem granum assumptum protinus dolores sedat somnumque inducit, ut jam de aliis taceamus. Nec medicamenta etiam subtilissima & soluta salina & sulphurea volatilia, ut & aquosa, thermæ, acidulæ decocta & infusa calida & lignis, radicibus herbis &c. pro diætâ adhibita ad sanguinem integra veniunt, sed in ventriculo & intestinis maxima ex parte alterata, saturata, enervata, adeo, ut eo delata ibique commixta parum admodum activa sint, nec ad desideratum effectum edendum, aut aliis partibus implicita & mixta hæreant ac remaneant, aut per alvum exeant. Siquidem thermæ v. gr. aquæ Carolinæ in quibusdam subjectis & quidem in pluribus eorum si tepidæ, in omnibus fere si refrigeratæ ebibitæ fuerint, saltem per alvum operationem suam instituunt, & tota earum quantitas per alvum iterum educitur, nihilominus tamen suum officium in sanando, egregie præstant.

§. XIX. Operationem vero hæc medicamenta suam potius exerunt, atque adeo curationem potissimum perficiunt, (si ita in genere loqui liceat, cum, si exacte res consideretur, quorundam usus passivus magis quam activus sit:) dum non solum chylum virtutibus suis medicinalibus imprægnant, dosi etiam parva easque per totum dein corpus distribuunt, sed & hanc ipsam tunicam immediate afficiunt, quando ad eam appellant, ipsis villis adhærent moramque ibi nectunt, ac eam ejusque poros ad statum naturalem reducunt eosque abstergunt ac liberant, apertos feryant, obstructions tollunt, ac avertunt, mucum viscidum incidunt & resolvunt, aut acerbum, austerum, acidum, adstringens acre causticum, rodens & vellicans salinum aut salino-sulphureum, sive in primis viis genitum sive ex massa humorum apportatum, & biliosum, plus minusve volatile & summe mobile imbibunt, præcipitant, temperant, invertunt, diluunt, eluunt, figunt & cohibent, edulcorant, aut bilem inertem acuunt, spiritus animales ut uberius influant, invitant, aut vi sua tonica leniter adstringendo, tonum firman & restituant, præter naturam patulos & laxatos reducunt, fibras motrices ad contractiones animant ac sollicitant, stimulant, motum ulterius continuandum juvant, ipsos glandulosos apices, ut liquorem reddant, molliter afficiunt, atque ipsas præternaturales fibrarum membranosarum & nervearum vellicationes, & erosiones, crispationes, spasmos & convulsiones inductas demulcent, corrigunt, ulteriorem progressionem & affectiones inhibent, ut & ipsum affluentem chylum cum lymphâ depurant, attenuant, acidum deturbant, eique consistentiam legitimam conciliant, vi medicata inficiunt

con-

condiuntque, & illius distributionem, excernendorum vero ejectionem juvant, & viam simul in sequentibus medicamentis expeditam parant, quibus effectibus fonte ac scaturigine malorum obstructa, & rivuli exinde emanantes sua sponte exsiccantur. Dictis faciunt fidem phænomena, quæ in praxi medica tota die occurrunt. Uti enim totum corpus spirabile est, ita etiam totum sensile, hac parte læsa, alia, læditur & dolet & sentiente parte aliqua sentiunt facile omnes, quod HIPPOCRATES jam dudum hinc inde dixit ut *Lib. de Aliment.* *In humano corpore confluxus est unus, conspiratio una & omnia consentientia.* Per naturæ similitudinem partium solidarum originem, ob continuationem fibrarum ejusdem texturæ, toni, elateris aliarumque qualitatuum suo generi familiarium, per vicinitatem atque contiguitatem enim & propagationem, per transmissionem fluidi ut & usum atque communicationis officii speciatim membranarum & nervorum illorumque fibrarum elasticitatem præsertim totum eorum systema afficitur & partes, motus suos communicant, ejusmodi vero partibus admodum sensibilibus omnium vasorum & animalium instrumentorum compages componitur, ut motus fluidorum sanguinisque circuli in partibus, nervosarum ac membranosarum exquisitiori motu & sensu gaudentium, systematis nervorum & fluidorum progressus & circuli atque motuum vitalium & animalium harmonia & conspiratio exsurgat amica; nec ullus in humano corpore motus familiarior crebriorque quam ille, ex consensu, per motum variarum partium. Talem naturam, conditionem & effectum in aliis quoque instrumentis non animatis quidem passim exemplo & experimento chordæ aut funiculi videmus. Utile quoque & aptum erit in comprobationem & illustrationem quandam ad alias remediorum & medicamentorum, quæ aliis partibus applicantur, operationes, animum revocare, in cujus rei exemplum modo errhina jam & clysmata nominare libet. Etenim de illis constat, eorum usum, in quam multis interioribus affectibus admodum proficuum esse, licet etiam ex cerebro nihil per ea descendat, ut per hodiernorum Autorum, qui hanc rem probatam dederunt post Galenum præsertim Willisius, Vieusens, Diemerbroeck, Schneiderus, contra superiorum seculorum Medicorum sententiam vid. LAVRENTIUS *oper. L. XI. cap. XV. p. 583.* FERNELIUS *physiol. Lib. I. cap. IX. p. 21.* LIDDELIUS *art. med. Lib. V. cap. VII. p. 698.* Ad hoc aliudque expresse HELMONTIUS *in Operib. p. 535.* notat, ex digestionem & cura stomachi pendere curas & regimina digestionum per totum, non necessum esse pharmacum deferri ad locum affectuum, illudque solo adtactu Archei
stoma-

stomachalis posse longinquos sanare in corpore morbos, atque non opus esse quod ad sanandum agens, tangat remotum. Re enim exactius reputata, omni asseveratione affirmandum est, ex. gr. errhinorum jam in plerisque operationem nullam aliam esse, quam ut nervos vellicent, solidasque & fluidas partes in motum concitent, ut in apoplexia, caro omnibusque affectibus soporosis, similibusque, fieri assolet. Tametsi mihi nullus dubitationi locus superest, asserendi, quasdam etiam errhinorum partes arteriarum tunicas earumque poros penetrare sanguinique ipsi commisceri, ipsumque ad cerebrum usque deferri, ut sua efficacia ac vi, qua pollent, humores viscidos, lentos crassosque aut stagnantes atque hærentes dissolvere & subtilizare, motumque rursus fortiolem imprimere ulteriusque promovere queant. Sternutatoria, si sunt, totum corpus concutiunt. De his (clysteribus) pariter advertentibus compariet, illorum usum admodum eximium esse & in pluribus morbis efficacissimum, licet in intestinorum rectum injiciantur columque saltem perveniant, atque ultra ejus valvulam vix transeant. Plura succurrunt exempla atque testimonia, in frictionum, pediluviorum adhibitione ac fomentationibus, inunctionibus, item in sessionibus, in purgantium umbilico, vel plantis pedum applicatione. De tactu lobi auriculæ de quo TH. BARTHOLINVS *hist. anatom. cent. IV. 80.* experientia haud simplici edoctus, asserit eum reliquas partes in consensum trahere & summo æstu, si frigida aqua, lobo adspargatur, universum corpus in consensum trahi & refocillari &c. In emplastrorum facculorum impositorum aliisque variorum remediorum generibus applicatione idem videmus. Hinc si hypochondriacis, viscerum, lienis, hepatis obstructionibus & atonia laborantibus terreo-salina aut terrea saltem absorbentia, lap. cancrorum C. C. raspatum aut ustum &c. præscribuntur, alvum laxatam sentiunt, non aliter ac si laxantia assumisissent & exinde se habent quam optime. Majorem adhuc ejusmodi operationem atque effectum a limatura martis habebis, partim quia tonum restituit, fibras ad motum edendum invitat, acidum destruit, viscidum incidit, quæ eas obsessas tenere, partim, quia ab acido soluta tertium velut quoddam vitriolicum dulce, egregia abstergente aperienteque virtute, præditum, hypochondriacis in primis utile, concedit. Atque vix, duabus elapsis ab assumptione eorum horis, pulsus acceleratur, facies floridior & coloratior fit &c. quam accelerationem in specie a limatura hac, ad massam sanguineam atque ad cor delata, procedere absit, ut quis existimet, cum longe verosimillimum sit, ex primis viis hunc effectum & leniter stimulis

Zzz

fibris

fibris nerveis præsertim, auctoque exinde in reliquis omnibus vasis successivo sanguinis motu procedere. Hinc & qui spasms obnoxii sunt tenerrimæ constitutionis homines, fœminæ delicatæ & maxime hysteriæ, martialia ejusmodi, ægre ferunt, & protinus in illis spasmi aut augentur aut concitantur, evidenti sane argumento, in ventriculo, intestinis, canali illo nervoso & membranaceo, qui, ob varia affluentia, quæ recipit, spasmodum admodum fertilis est, per hunc stimulum eos exinde oriri. Ea rursus fixa ut ungula alcis medulla saxorum, bolus armenia, terra sigillata, unicornu fossile, lap. cancr. &c. ad drachm. semis assumpta, sudorem provocant sat citum & largum, non certe ad massam sanguineam delata, id præstant, sed, ut potius reor, dum agunt in partes obvias, & chylum cum lymphâ tenuiorem subtilioremque reddunt, qui ad sanguinem delatus, in eumque mutatus facilius transpirat &c. Eadem turgescens, ebullientem ferocientemque universam humorum massam sæpissime in primis viis præcipitando, materiam vellicantem corrigendo, placando sistendoque motus irregulares in membranis nervosis sedant ac corrigunt, adeo ut dubium sit, an etiam eo delata talem effectum producere valuissent. Lap. cancror. in pleuritide specificum non secus ac. antimon. diaph. martiale in variolis esse dicuntur, qui tamen pleuram non attingunt, notante SACHSIO *Grammarol. p. 662. § 719.* Contra eandem atque anginam mandibulæ lucii pisc. & dentes apri, unicornu marinum in erysipelatibus illorumque æstu apud practicos decantata remedia sunt; lapidem spongiæ colli strumas destruere medullam saxorum stranguriæ, os sepia gonorrhœæ mederi, expertis constat: ungula rangiferi raspata pro infallibili remedio contra animi deliquia venditur. Vid. TALANDERS *curieuse Reisen P. II. p. 14.* crystalum montanam præparatam & lac lunæ in mammis lac augere, & osteocollam in fractis ossibus occallescentiam promovere, lapides cancrorum in vulneribus pedum ruborem, ardorem & inflammationem sistere videmus, quæ vel ab unico cochleari vini acidi mire exasperantur. Quis vero facile crederet aut probaret, has materias in mammis ac pedibus fractis læsisque &c. ipso materiali sui contactu id efficere. Febris hectica, lenta, in quibus tunica ventriculi & intestinorum Villosa, glutine quodam crasso atque corrupto, acido, acri, nidoroso obsessa est atque obstructa, non raro in principio, unico vomitorio aut paucis laxantibus saltem, ex abstergentibus, salinis, terreo-salinis, arcano duplicato, tartaro vitriolato, sale tartari, sale ammoniaco, nitro, mercurio dulci & similibus quæ materiam hanc resolvunt, abstergunt atque auferunt,

runt, in fequentibus subadstringentibus & roborantibus, atque sic ulteriorem materiæ peccantis per crustam villosam accessionem impedi-entibus, feliciter curatur; si in massa humorum jam inordinatus & con-citatus nimis est motus, præcipitantibus, terreis & terreo-salinis, nitra-tis, antihectico Poterii, nitro depurato, lapidibus cancrorum &c. tandem etiam cedit. Febres intermittentes famoso illo febrifugo, cor-tice Peruviano, uno quasi ictu, aut etiam quandoque rad. gentiana, co-sto arabico, cortice ligni guajaci tamarisci &c. concidunt, aut paroxy-smi, qui insequi alias solent, emanent, atque sic in ventriculo saltem aut in intestino duodeno operationem fieri, in aliis autem locis extra hanc aut parum aut nihil prorsus assumpta hæc remedia, operari apparet. Re-liquæ etiam varii ordinis febres, quæ generi humano frequentissimæ sunt, ne dum omnes a quibusdam, ut & ab Anglis præsertim, epilepsia, hypochondriaca & hysterica pathemata, & a Gallis mensium suppres-siones & pallidi foeminarum colores, eodem cortice aut frequentius per pulveres aut potiunculas ex præcipitantibus vulgo curantur, atque simul symptomata comitantia, præcordiorum anxietates, inquietudines, irri-tationes, jectigationes, agrypnias, cutis constrictam & aridam sopiunt atque emendant & transpirationem atque sudorem restituunt. Chalybs, lapis hæmatites pulverisatus atque assumtus, tinctura sulphuris vitrioli & similia hæmorrhagias narium, hæmoptysin, mensium fluxum nimium ali-asque sanguinis fluxiones præternaturales inhibent, tinnitum aurium, tussim sic dictam periodicam stomachalem atque ferinam, soli pulveres terrei salini præcipitantes, vesperi sumti, penitus tollunt. Poterius cele-bratissimo auro suo diaphoretico fixo, aut magnesia saturnina, aut luna terrestri firma atque compacta, contumacissimas & inveteratas paralyses, melancholiam, vertiginem, palpitationem cordis, icterum contumacis-simum, impetiginem, causum, hydropes, pedum tumores, podagram & malum ischiadicum, eradicavit funditus. Vid. Excel. D. F. HOFF-MANNI *not. ad Poter. p. 11. 21. 35. 39. 79. 80. 87. 96.* Convulsiivi infantum motus familiarissimi ab acidis & biliosis corrosivis succis primarum via-rum pulvere marchionis & cinabari, aut specifico cephalico D. Micha-ëlis, felicissime illico auferuntur ut epilepsia a limatura auri, visco coryli-no atque quercino sedatur, qui pulveres quomodo per poros Villosæ tunicæ, obliquos circumvolutaque vasa lactea ad caput &c. feratur & in cerebro & in medulla spinali, horumque membranis lympham visci-dam, acrem subsistentem rapiant aut resolvant ac temperent, haud men-te satis concipere possum. Qui cruditates in primis viis alunt, vel buc-

cella panis mane sumta, vertiginem, capitis dolorem, oculorum obfuscationem avertunt. Sed ubi finis foret, ulterius si pergere vellemus, cum etiam hæc adiecisse sit satis. Hoc ipso pariter nodus is solvitur, qui adeo multorum hominum ingenium torfit, quomodo ejusmodi corrigentia in massa sanguinea sanationem perficere possent, cum eorum transitus ad eam usque dubius esset, & minori temporis spatio sæpius efficerent, quam quidem ad eam pervenire possent. Ex præfatis colligitur, quam bene suo officio & ægrotantium saluti prospiciant medici, si universalia sic dicta & ejusmodi alia præmittant atque adhibeant, quæ tunicam Villosam liberant, abstergunt, mucum tenacem incidunt, acidum & austerum temperant, corrigunt & evehunt, tonumque firmannt &c. Quod optime fit præsertim per salia deterfiva, temperantia, præcipitantia, invertentia, laxantia, roborantia. Quare laudis fructus pro eo ac par est Martiano, Ballonio ac Riverio inprimis tribuendus est, qui diligentissime monent atque hortantur, ut medici primarum viarum, provide, in omni morborum curatione, hoc modo habeant rationem.

§. XX. Ut per tunicam Villosam ejusque poros vitia ad massam sanguineam & reliquas partes transmittuntur; ita & hæc ab iis recipit ea, ut primæ ipsæ viæ varie afficiantur, quippe mutua harum partium conspiratio est. Atque sic natura per hanc, morborum præservationem & solutionem non raro molitur, quando v. gr. diarrhœas spontaneas bono & salutari successu exinde scaturire cernimus. Hoc maxime per glandulas fit quas habet intertextas & forte per ipsos villorum apiculos, quos glandulosos Clarissimus Brunnerus esse dixit, & antecedentia referunt. Nimirum subinde accidit, ut ex sanguinis oceano excrementitiæ partes salinæ, sulphuræ, acres &c. ad intestina deponantur, & ibi ex acriori vitio diarrhœæ, dysentericæ, cholæræ, ex acerrimo, inflammationes ac corruptiones & sphacelationes producantur. Ejusmodi frequentissime in plethoricis, cacochymicis, scorbuticis evenit, si forte auræ frigidiori se exponant, ex quo, transpiratione impedita, serum excrementitium simul atque laudabile, uti ad alias partes, asperam arteriam, glandulas colli &c. ita & in tunicas ipsarum primarum viarum secedit, siquidem & in hanc rem notabile est, sub catarrhorum accessionem, exacerbationemque tensam, duramque fieri alvum. Dictum modo a nobis RIVERIUS comprobatur *cent. I. obs. 66.* dum ait: Quoties alvus restitabat, catarrhus affligebat graviter, &, fluxu alvi redeunte, catarrhus cessavit. Imo in medica praxi exempla empyematum thoracis per intestina & alvum expurgatorum occurrunt,

runt, qualia & GALENVS (vid. *de loc. affect. Lib. IV. cap. 4.*) vidit. Massa enim sanguinea turgescente, sero sive sensim sive confestim accumulato, aut per febrilem motum ac fervorem liquato, stimuloque accedente, sive ab humoribus facto, sive in intestinis contracto, onus hoc natura, per arterias coeliacas maxime allatum, deponit. Sicque ab impedita forte præternaturaliter secessione, per poros cutis aliasque vias tenuissimæ indolis salino sulphuræ, excrementitiæ fordes, aut serum etiam nimis lentum, crassum & viscidum exinde & ejusmodi particulis commixtum, quod per alia spiracula non facile excerni potest, per hanc viam publicam secernuntur. Sanguis etiam, dum per venas mesaraicas, venam portæ, hepatis viscus difficilisque movetur, quod in vitæ sedentariæ deditis, hypochondriacis, cachecticis, senibus maxime accidit, mora atque stagnatione impurus evadit, & feculentias per glandulas in intestinorum canalem transmittit. Rursus autem ex retrocedentibus cutis exanthematibus, variolis, morbillis, purpura, scabie impetigine &c. ut reliquæ intestinorum tunicæ, ita præcipue Villosa ordino male afficiuntur, exitiumque patiuntur, siquidem, ut observationes testantur, hæ erosæ, inflammatae, exulceratae, sphacelatae sunt inventæ, quod B. D. Ortlobius & Christ. Ludov. Welschius confirmarunt, qui varios ex purpura, morbo Lipsiensibus familiarissimo, retrocessa demortuos, secaverunt, atque semper tunicas intestinorum, præcipue Villosam, inflammatas corruptasque invenerunt. Eadem labe ibique deprehensa est ab illis Clarissimis Medicis in iis, in quibus purpura non sufficienter ad habitum esteducta. Ex his modo hic superiusque allatis intelligi potest, intestina publicam solennemque diversarum ac copiosarum materiarum, quarum aliæ laudabiles ac necessariae, aliæ vero aliis sunt peiores, esse cisternam, esse regiam promovendarum viam nutritionis, sustentationis, correctionis, curationis, per naturam æque ac per artem æmulam, institutæ, esse sanitatis ac vitæ pariter ac morborum, causarumque morbificarum mortisque officinam.

§. XXI. Quodsi itaque res se ita habet, quod tam utilia tamque necessaria munia & perficiat tunica intestinorum villosa, & tantum sanitati & vitæ intersit eam rite constitutam esse, tantaque mala secus exinde proficiscantur, indicata in superioribus paragraphis maxime vitia, quibus vitiatur, sedulo sunt præcavenda atque evitanda; præsertim cum vitium primæ digestionis vix satis in alia corrigatur, adeo, ut & idem malum sæpe ad suum recurrat principium, nam & hæc ipsa vitioforum humorum circulatio & multiplicatio est, quæ difficilem maxime eorum

reddit curam. Hoc fine inprimis potimur, cum talis sit chylus, qualia sunt assumpta, si quis sibi caveat sedulo, præsertim, a cibis viscosis pinguibus, glutinosis v. gr. piscibus, in piscinis nutritis, tincis &c. durioribus, tenacibus, compactis, verbo difficilis digestionis & flatulentis, distendentibus. Qualia sunt: panis durus, mucidus, non bene fermentatus & coctus, placentæ calidæ & pingues, lac & lacticia nimia & ventriculo acidis cruditatibus repleto ingesta, inter quæ lac ovillum inprimis ob crassitiem accusatur. Accusatur hinc & lardum, inprimis vetus, caro vervecina tepida assumpta, superingestoque præsertim frigidæ aquæ aut cerevisiæ haustu. Abstinendum pariter est ab acidis excessivis, nimis constringentibus, acribus, acutis, scindentibus, lædentibus rigidis, austeris, acerbis, fructibus horæis immaturis, prunis, uvis, malis cydoniis, pyris, mēspilis, fructibus acaciæ & myrtillorum &c. Ex potulentis absint vinum, præter modum acidum atque austerum, cerevisia acida & corrupta, non bene lupulata & defœcata, & aqua, quæ dura, aspera, fœculenta dicitur, a qua intestinorum eorumque pororum & viscerum obstructions, lienis inprimis, & scrophulæ in glandulis colli procreantur. Absint etiam potus nimis frigidi inprimis, calenti ab exercitiis corporis aut ira commoto superfusi, qui stuporem & lentorem ventriculo & intestinis maxime inducunt. Hinc verissime CELSVS scribit *Lib. I. p. 28.* Illud nosse oportet, quod ex labore sudanti frigida potio sit perniciosissima, atque etiam cum sudor remisit, itinere fatigatis inutilis est. De iis, qui frigido potu perierunt, legas apud MARCELL. DONAT. *hist. mirab. Lib. IV. cap. VI.* Quod vitium in viro quodam vidi, qui cerevisiam frigidam, ab exercitiis corporis adhuc æstuans, affatim hausit, ex quo in hæticam cum vomitibus matutinis incidit, cujus tunica Villosa ventriculi & duodeni intestini crassa pituita copiosissima obfessa, atque penitus obstructa, post mortem est inventa. Ejusmodi exempla in praxi frequentissima obveniunt: ex frigido potu, liberalius in corpus calidum admissio, hæticam, atrophiam, singultum, phthisin, inflammationes ventriculi & intestinorum, cachexiam, gravissimos diuturnos affectus cum spasmodicis & flatulentis intestinorum passionibus pronasci. Deleterium ejusmodi effectum spiritus vini largior & continuata potatio post se relinquit, horum enim corporum, qui hunc in quotidianis deliciis habuerunt, sectiones demonstrant, ventriculum, intestina omniaque viscera rugosa contracta, indurata, arida esse, atque bile concreta obfessa. Copiosa nimis quoque potus ordinarii materia id efficitur, ut hujus transitu diuturno viæ lacteæ, labefactentur & laxatæ

tæ nimium atque ampliata, crassum cum tenui admittant, cor vasaque superfluis humoribus impleant. Exulent immodicus somnus, ac sôcordia, quibus totum torpescit corpus, humores incrassantur omnes & obstructions ingenerantur, vita etiam, qua contabescimus, sedentaria & intermissio commotionis agitationisque corporis, frequentiores lubricationes, meditationes profundæ, quas amant literarum indefessi cultores: Per hæc enim sæpe relictum a cibis & cruditatibus vel ex glandulis intestinorum collectum lentorem in pituitam vitream quasi tenacissimam coagulari, intestinorumque latera obduci, incrustari, chylove aditum præcludi, observationes ferunt, qualis e. g. de Justo Lipsio habetur in vita Joh. Heurnii, qui postquam ex motus corporis defectu valetudinarius pharmacum adhibuit, pituitosam quasi fasciam eiecit. Similis casus quoque a Fernelio recensetur de Legato quodam Cæsareo, cui, per sexennium valetudinario, ex injecto acriore clystere firmus, durusque pituitosus pannus, pedis humani longitudinem æquans, est detractus. Quia & multum a purgantibus violentioribus, drastice resina Jalappæ scammonii, helleboro albo & hujus farinæ aliis, ut & aliis corrodentibus patiuntur fibræ tunicarum carnosæ, nerveæ, glandulosæ ac ipsi intestinales villi, quoniam illa crebris spasms & repetitis succussionibus nimis & convulsionibus graviter invadunt, & irreparabile damnum, atoniam, pertinacissimam alvi obstructionem, tubercula, excrecentias, erosiones contritiones & denutationes, indurationes, inflammationes, exulcerationes, corruptiones, gangrænam, sphacelum cum ipsa morte, quæ tragœdiæ tandem finem imponit, inferunt: cautus cuivis & circumspectus esse debet eorum usus. Male itaque sibi consulunt, qui consilia a pharmacopœis, medicastis, circumforaneis petunt, quibus nihil antiquius est, quam primum statim purgantia, vehementer nimis operantia, devoranda præbere, quem infelicem eventum, ac si optime purgati essent, ut felicissimum deprædicant atque collaudant. Ex reliquis rebus indifferentibus nocet aër caliginosus & nebulosus, nimius, solis & aëris æstus, vehementiora corporis exercitia, imprimis calidissimo aëre instituta, & accedente potu calido spirituosofatim hausto &c. fornaces & balnea æstuantia nimis, quæ cruditates pituitosas, nidorosas &c. commovent, exagitant, exaltant, & ad vasa lactea, vi quadam propellunt. Rursus coagulantur contenta, si corpus ex calido aëre in frigidum corpus derepente transferatur. Ex animi affectibus maxime hic sunt accusandi ira atque terrores, qui spasms perniciosissimis ventriculi & intestinorum tunicas corripunt, atque invidia,
odium

odium, sollicitudo, meticulositas, moeror atque tristitia diuturna: Nihil enim magis austerum auget atque intendit, pituitam incrassat. Vid. SYLVIVS *method. med. Lib. II. p. 132. & 314.* inquinamenta a peripheria ad centrum revocat & poros intestinales obstruit & coarctat, quam hæcce, ut observationes loquuntur.

§. XXII. Ea autem potius sunt in frequentem usum ducenda, quæ obstructions præcavent & auferunt, & poros tunicæ Villosæ liberos servant, abstergunt, crassum terrestre attenuant, & mucum, quo obfessa est, viscidum incidunt, constringens, acidum, austerum & acre causticum, biliosum vellicans, rodens, convulsiones inducens corrigunt, diluunt, destruunt, invertunt, temperant, educunt, tonum & robur servant atque restitunt & alvinas excretiones debite adjuvant. Quibus scopis egregie inserviunt in genere magis infusa & decocta calida ex herbis præsertim traumaticis, rad. cort. lignis, feminibus & floribus, ut card. bened. veron. angelic. imperator, nasturt. hortens. & aquat. salv. meliss. roris marin. absinth. cent. min. menth. agrimon. cusc. chamædr. chærefol. fumar. lign. saffrafras, santal. juniper. quajac. buxi, cort. aurant. tamarisc. citri, rad. chin. saffaparill. polypod. bardan. caryophyllatæ, helen. galang. cichor. tamarisc. bacc. junip. sem. foenic. anisi, rasur. C. C. &c. in aqua & vino macerata & decocta, juscula calida, théæ, coffée & thermæ præ aliis & acidulæ. In specie magis acidum destruunt absorbentia, præcipitantia, terrea & terreo salina, alcalia, fixa & volatilia, mand. luc. pisc. ebur, dens hippopotami, dens apri, corallia creta, sanguis draconis, mater perl. conch. os sepia. lap. cancr. unicorn. verum, test. ovor. terra sigill. Siles. armenia bolus, oleum tart. per deliquium, sal. tart. liquor. C. C. spiritus salis armoniac. ut & martialia in primis martis limatura. Ad austeri & acerbi correctionem terrea, oleosa, salia volatilia, alcalia, ut & spir. nitr. dulcem SYLVIVS commendat. *prax. med. Lib. III. p. 501.* & ejus signa, tam in intestinis quam alibi v. g. pulmonibus hærentis suppeditat *Lib. I. cap. XX. p. 209.* Acre causticum magis enervant pingua & oleosa, oleum amygd. dulc. butyrum recens, emuls. sem. 4. frigid. maj. & min. frigida, opiata &c. mucilaginosæ, ex herb. & rad. malv. alth. sem. cydon. paratæ mucilagines, gelatina C. C. tragacanth. lac. & lacticia. Acrimoniam vero biliosam, magis infringunt crystall. montana calcinata, acida, nitrata vitriolica. Viscidum resolvunt, incidunt & attenuant, liquefaciunt, aquea, ut infusa & decocta modo nominata, aromatica, salia alcalia, & secundum Sylvium acida, acria, spirit. salis, nitri, vitrioli, sulphuris per camp. acetum destillatum, succus

cus citri, neutra fixa & volatilia, ut sal ammoniacum, sal tartari essentif. arc. dupl. sal culinare, oxymel squillit. & similia. Tonum laxatum firmant & restituunt subadstringentia ut cortex chacarill. chinæ, fraxini, sanguis drac. & similia, balsamica aromatica gummata, mastiche, succinum &c. flores hyperici ejusque essentia, terrea & terreo-salina. Quæ & fibras admotum edendum armant & sollicitant. His indicationibus & satis faciunt amara, aromatica, stomachica dicta, antiscorbutica ut essentia rad. gentianæ, absinthii, cardui bened. chamædr. cent. min. scordii, fumari trifolæ, fibrinii cort. aurant. cinnamomifata rad. ari calam. aromat. galangæ cardamomi &c. Resinosa & gummosa G. ammoniac. in aceto solutum essentia ejus, mel & mellita, atque composita magis, ut salia volatilia oleosa, sal volatile oleosum Sylvii, balsam. vitæ Hoffmanni spiritus & elixiria balsamica, elix. stomachic. D. Michaëlis elix. P. P. elix. rhabarb. Laxantia lenia ex phlegmagogis & cholagogis præsertim ex rhabarb. aloë rite præparata, & secundum mentem Becheri cum balsam. maritata. Ejusmodi etiam sunt pilulæ Hoffmannianæ, Stahlianæ, Hermannianæ, ex mercurio dulci & similibus paratæ. Item tartarea, tartar. tartarifat. vitriolatus, tinct. tart. cremor & crystalli tart. Spasmos tandem ipsos & convulsiones auferunt antispasmodica, anodyna, antepileptica, ut castoreata, succinata, cinnabarina, camphorata, crocata, pulv. marchion. specif. cephal. D. Michaëlis, pulv. lumbric. terrestrium, ungula alcis, dens. hippopotami, unicornu verum, tinct. benzoës spiritus sanguinis humani, pulv. secund. human. Extract. visci quercini & similia. Nec externa hic plane de nihilo sunt, olea & empl. ex oleis laurin. ol. cumin. mastich. castor. menth. philosoph. nux moschata, nard. ol. carminat. Minsichti, empl. de baccis lauri, carminativ. Sylvii & similia; Vel fodus ex mentha, thymo, majoran, origano serpillo pulegio absinth. calendula cum mastiche, nuce moschata, mac. caryophyll. Vinumque aqua vitæ, balsama, balsam. anglic. peruvianus, liquidus & similia ejusmodi interdum possunt exhiberi, præsertim quoniam subinde ex chyli confectioe recrementa maxime viscida remanent, & acidum succrescit: atque si suspicio hujus vel illius vitii adsit, convenientia indicata potius eligantur.

§. XXIII. Coeterum conveniat decens his omnibus semper victus vivendique ratio omnis, quam humanitas simul & continentia suadet, & quæ totam hominis naturam conservat, & labefactatam adjuvat. Ea autem præsertim ita sit composita, ut ventriculo & intestinis bene conferat, & non faciat molestiam & negotium; indicata emolumenta im-

pertiat, mala vero avertat: Nimirum cruditates pituitosæ, acidæ, au-
steræ, acres obstructions &c. præcaveantur & tollantur, spiritus ani-
males conserventur &c. Aër igitur, quoniam inspiratus & cum cibis
ac chylo mixtus maxime ad ventriculum intestinaque descendit, con-
ducit temperatus, serenus, elasticus, purus, siccus, tenuis, & calidus
magis quam frigidus, & suffumigiis ex succino, thure, myrrha, baccis
junip. spica, majoran, lign. aloës &c. correctus. A luxuria & immo-
dica assumendi libidine, blando illo malo, & quod accusare facilius est
quam vitare, sibi temperandum, ne cruditates colligantur, & eadem
ac exuberans chylus tunicarum ventriculi & intestinorum inprimis Vil-
losæ labem ingerant, tonum mole sua destruant, debilitent, ac fibras
ad actiones instituendas inertes reddant, obstructions in poris vasis-
que pariant &c. Qua de re verissimum Italorum proverbium est, quo
dicunt: Qui multum vult comedere parum comedat, & elegans satis
Fernelii dictum, non, quod sapit, nutrit hominem, sed gulam. Mul-
ti enim cibi multique potus multos morbos procreare solent, qui evitan-
tur, si modice cibi & pro necessitate, atque Socratica mediocritate ob-
servata, assumantur, eique, qui boni succi mediamque atque conveni-
entem formam inter solidum & humidum obtinentes, diluentes, inci-
dentes, attenuantes, roborantes, temperantes, modice calefacientes,
assati & duriusculi magis quam elixi & emolliti nimis, pulres ex frugibus
oryza panico, milio, pis, avena, frumento faracenico. Obsonia ex
brassica rubra, rapis, sisaris &c. juscula hordeaca, & avenacea & simi-
lia, aromatibus, cinnamomo, falvia, majorana, thymo, chærefolio, fa-
tureja, croco, nuce moschata, mac. pipere, galanga, zingibere, fœni-
culo, aniso, carvo, caryophyllis vel succo citri, & aurantiorum, adje-
cto, rapistro, nasturtio, cochlearia faleque bene condita, fercula, vel
etiam herbis radicibusque aperientibus & roborantibus medicata ut rad.
cichor. petroselin. cum herb. & chærefol. acetos. nasturt. capparibus,
cortic. aurant. citri, baccis lauri, juniperi cocta, nec ideo fale muria-
que maceratos cibos rejicere possumus. Panis bene coctus & secalinus
potius eligendus, inprimis confert ille, in quo subtilissimi furfures ad-
huc sunt relict, qui villos & poros egregie abstergunt, quod etiam
alii cibi faciunt, ut pisciculi, in aquis gregatim natantes, cum spinis &
cancris minuti cum chelis, crustis, cauda, pellibusque integri comesti
poma dulcia, borsdorffiana, pyra aliique maturi arborum fructus sive
cocti sive crudi cum putaminibus & pelliculis, umbilicis pomorum, tunicis
nucleorum pisarum siliquis, uvæ maturæ ribesia, berber, baccæ cynos-
bati

bati cum acinis, fungi & boleti edules & ejusmodi manducata, edulia, quæ per digestionem non subiguntur, sed integra iterum aut parum mutata exeunt, simulque acidum destruunt, corrigunt spiculaque ejus obtundunt & pituitam adhærentem, educunt, & de quibus vulgo dicitur: *Es raumet den mægen.* Hinc non adeo ineptiunt illi rusticorum atque plebejorum, qui cerasa cum nucleis deglutire solent, atque quidam quos ipse cognovi, qui cancos fluviatiles etiam mediocres coctos integros devorant, Succedere possunt lactuca, endivia &c. Conferunt & mel atque mellita præsertim melligo in cellulis cratibusque tenuibus adhuc contenta, raphanus major & minor & condimenta ciborum salita aromatizata, saccharata, quæ interdum lenem efficiunt fermentationem, pituitam potenter incidunt atque abstergunt. Potus genera eligenda sunt tenuia, quæ cito transeunt, variis etiam alterata, ut vinum absinth. cydon. helen. aromaticum Hippocraticum dictum cerevisia hordeacea potius quam triticea & bene defœcata, rite lupulata, rore marino & similibus, fermentata & medicata, cuique panis subinde tostus nuce moschata & cinnamomo conspersus, atque conditus est inditus, quod genus potus ad villos ventriculi & intestinorum laxatos roborandos inprimis commendatur. Inter ea & hydromel proficuum habetur &c. Nec non fumus tabaci suctione exceptus dissuadendus est. Verbo, omnia bene conferunt, quæ tunicas ventriculi & intestinorum molliter abstergunt, incidunt, aperiunt & roborant. Exinde etiam inducuntur ii qui a tunica Villosa aquæ frigidæ haustu post potum succolatæ gluten ejus abstergere satagunt. Debitæ corporis motiones præsertim ambulation, equitatio, curruvectio, tornatio, & quæ cibum antecedunt, utique suadendæ, illæ enim, quæ paulo fortiores a prandio instituuntur, poris tunicæ Villosæ molestiam creant, & crudum chylum in partes rapiunt, unde CELSVS bene monuit *Lib. I. Cap. XI.* dicens: *Si quis interdum sese implevit, post cibum neque frigori neque aestui sese neque labori debet committere.* Alvus rite respondeat semper, ne foetidæ subtiles atque succosæ excrementorum partes, si diutius hæreant in intestinis, per poros tunicæ Villosæ pertranseant, hinc ea alvo clausa retenta per paucos saltem dies arescunt & indurescunt, indicio, ipsas partes liquidas foetentes a calore naturali resolutas secessum fecisse: Si usquam enim certe hic locum habet, quod AVENZOAR Arabum experientissimus *proæm. in Lib. I. Theisir.* scriptum reliquit: In habendo ventrem mollem nutu Dei conservatur sanitas. Reliqua excernenda per vesicam, menses, hæmorrhoides, ne horum retentio multis noxis ansam præbeat, expedita

præstentur, secundum enim illam regulam, bene, qui ingerit digerit & egerit, sanus est; Nec non retinendorum negligenda est ratio; Animus in tranquillitate, gaudio, amore, lætitia & hilaritate, suavi musica amicorumque amico jucundoque consortio erectus ac recreatus semper est servandus, quæ ut universo corpori, ita & ventriculo & intestinis illorumque functionibus constantem afferunt integritatem.

* * * * *

XII.

DISSERTATIO MEDICA DE COLO, INTESTINO, MVLTORVM MORBORVM NIDO EOQVE PROXIMO PRAESERVATIONIS CVRATIONISQVE SVBJECTO.

PROOEMIUM.

Minus accurate isti sentiunt ac censent, qui morborum curam suscipiendo vel loco saltem affecto obiter perspecto (qui ut plurimum laborantis sensui cognitus est, ita ut inde haud difficulter peti possit) contenti, minimum laboris in investigando morborum fonte ac nido aut seminario atque matrici seminarii morbifici ponunt, sed compendia quædam medendi quærendo medicamenta statim præscribunt satisque habent ea ingessisse, vanaque prope ratione existimant ac si ipsa assumpta ad sedem morborum pervenirent: Siquidem cum quibusdam ex nostris hominibus (præcipue iis, qui anatomiae addiscendæ iisque quæ in ea adhuc latent, accurate explorandis, exiguam operam dederunt) ita est comparatum, ut falso sibi persuadeant, tantum circa sensibilia versari oportere medicum; occultorum autem nullam omnino indigere cognitionem, multo minus scrutari profunditatem atque non modo libenter ea artis præcepta quæ sedulitatem exigunt negligant, sed haud incolumi etiam conscientia, sine indefessa ac accurata mentis intentione morbos eorumque causas ac fontem (nedum ipsum locum affectum) æstiment, atque vix audita morbi historia, circumstantiis omnibus spretis

eis-

eisque in quibus vera vertitur indagatio atque cognitio, præ cæca & fastuosa imaginatione neglectis, modo ad formularum præscriptionem properant. . . Ast a janua aberrant. . . Fit adeo non raro, ex ignoratione, ut aliorum cognitione necessariorum sedis etiam morbi, ut parum de materiæ peccantis domicilio solliciti, vel symptomata maxime quæ velut hujus causæ effectus sunt, & quæ in longe diffita sæpe loca vim suam exerunt (sæpe enim morbus alibi hærens alibi sentitur magis, quam illic, ubi ejus quiescunt infixæ radices) rationem inde elicere ac derivare vix possint, multo minus diligenter attendant, quorsum hæc morborum sedes se transferat, aliam nempe partem occupatura; ac quales differentes motus, ex hac alteratione insequantur; quales aliæ earum dein se prodant sub quaque externa specie eadem secundum differentem conditionem corporis regionum, appareant. Sine tali certe cognitione omnis conatus medentium & labor quamvis sedulus, tamen est frustraneus vel fortuitus non autem artificialis parumque salutaris. Hoc namque deflexu inducuntur ut rebus desperatis salutem temere promittant, rursus in securis ad extremum, rem rediisse omnem, titubantes pronunciant, vel ut non rite intelligant, quem locum remediis magis adgredi, & ubi peccantem materiam causamque morbificam, quæ in abditis etiam corporis partibus hæret, invenire & depellere debent, cujus cognitio tamen, haud leve, in felicem sanitatis amissæ restitutionem momentum est. Quamobrem id scire medentibus non solum pulchrum & utile, sed & necessarium atque operæ omnino pretium est, ut medicus de genuina morbi sede præ aliis sit sollicitus; atque sciscitando, adspiciendo, tangendoque eam, explorare satagat, illudque eo magis, quo ea, ut sæpissime accidit, adeo abscondita est, ut magnum certe opus magnusque labor requiratur, si certi quidpiam in dignoscenda illa est eliciendum. Hoc ipsum ut ex multis verum monumentis colligere est, in veteribus desideratur, quod nempe, non rite locos adfectos, distinguerent. GALENVS jam, uti ex libro *de compos. medicam.* colligere est, aliquot locis reprehendit hos ipsos, quod sine distinctione, quædam medicamenta adversus morbos conscripserint adeoque Appollonium & Archigenem accusat, at contra Herophilum, Appollonii Magistrum laudat, qui præcepit, medicum omnino anniti debere, ut sciat non solum, quæ & qualis & quanta sit morbi causa, sed & ubi ea maxime dominetur, quo curationem cuique convenientem adhibeat. De hoc & conf. G. H. WELSCHII *Curat. Observ. med. D. VII. p. 416.* Sic bene notat Experientiss. GEORG. BAGLIVIVS in *Oper. p. 647.* ex infarctu me-

senterii febricitantes majora mala in capite experiri quam in mesenterio, morbi sede, adeoque medicis vitio vertit cephalica, emulsiones frigidasque potiones aut copiosas aquarum haustus propinantibus; utpote quibus remediis morbos ejusmodi magis augerent cum potius fotibus ventris, purgationibus vel iteratis clysteribus stomachicis & digerentibus curationem perficere deberent. In hunc censum v. gr. præ aliis interna ulcera veniunt, quorum certe sedes, ubi nempe ea sit difficile cognoscitur adeoque curatu quoque admodum difficilia sunt. Verum, is cui in morbum debita diligentia est, qui ejusmodi bene conscius est, cum ab uno illoque interdum exiguo seminario morbifero plures insurgant affectus, vel unico remedio plura membra a dolore liberabit vel præservabit. Ex humani corporis cavitatibus, quæ commodum morbis hospitium præbent, præ aliis intestina sunt, quæ adeo vastas intestinas morbiferas mineras alunt, eoque magis verendas, quoniam intestina sunt. Etenim nulla facile alia pars adeo sensibilis est, neque alia tanta tamque multa latibula continet, in quibus nociturus fomes hæret, nullibique tanta confusio & copia diversarum materialium, quam in intestinis reperitur. Atqui hinc sciri potest, magnum operæ pretium in æstimandis & perscrutandis his quidem corporis partibus fieri a Medicis posse. Nos in præsentiarum Colon intestinum de quo præ reliquis intestinis hæc censura agenda venit inspectione, pensitatione ac consideratione quadam, peculiari Divino favore atque auspicio aggrediamur.

§. I. **E**xplanationem ostensuri innotescendorum æstimandorumque morborum qui in Colo intestino stabulantur, recte a contemplatione physiologica & anatomica initium hujus Dissertationis capere videmur. In qua tractatione modo scire licet Colon intestinum, de quo jam agitur, inter intestina crassa secundum, esse omnium maxime crassum cavum atque carnosum, ut venter inferior appelletur & a Galeno *έντερον* simpliciter dictum, atque esse ipsi constructionem flexuram & convolutionem situmque singularem & multifariam: Siquidem ejus initium incipit mox a cæco intestino & octo aut novem palmarum longitudinem æquans, latum laxum amplumque, & multis cellulis & anfractibus convolutum, ex dextro hypochondrio circa orificium dextrum ventriculi circa os ilium ejusdem lateris assurgit, & in homine quidem parti superiori ejusdem suspenditur, ut ipsi inserviat vice mesenterii atque connexum vesiculæ bilis (cujus etiam quandoque tinctura inficitur) renique dextro (hinc difficile dolores nephritici a colicis discernuntur mo-
nen-

nente Galeno) sub ventriculo, quem simul attingit (hinc inappetentia cum nausea in alvi obstructione ob foetorem) ad sinistrum hypochondrium & latus flectitur, cujus etiam magnam partem occupat. Ab hoc, circa hepar ascendit ejusque cavitatem pervadit & per transversum sub notharum costarum cartilaginibus rursus infra stomachum transversim ad sinistrum hypochondriacum fertur, ad lienem, renem sinistrum atque cum iis præsertim cum hoc per membranas varias arcto jungitur nexu, ubi varie conflexum in notabilem angustiam definit, hincque ascendit ad finem ossis sacri in S. literæ Romanæ modum, atque ad umbilicum quasi adscendens circumducitur (quæ flexura necessaria ad fæcum retentionem videtur) ubique omento tegitur, quod hic cavitatem quandam producit dum adhæret non solum cæco sed & fundo ventriculi, lieni ac pancreati, postea ad pubem declinatur ac in rectum intestinum recto ductu per medium sacri ossis & coccygis in anum delatum definit reflexum. Ex hac vel solius situs & figuræ coli inspectione clarissime elucescit, quam utilis & necessaria hujus notatio medicinæ practica sit, quomodo v. gr. sint applicanda emplastra unguenta & id genus alia. His tamen non possum non errorem quendam, tam Anatomicorum, quam Practicorum ut & aliorum e plebe hominum notare, qui curvaturam Coli nimis angulosam fingunt & pingunt, & dolorem acutum colicum huic anfractui acuto & anguloso audacter adscribunt. Nam situs hujus intestini ab anteriore parte retrorsum se flectentis, spinam versus atque ad renem vix talem resistantiam ibi patitur, ut angulum adeo acutum formet. Quandoque quodam naturæ lusu præterque confectos ductus mire volvitur & plures anfractus & circumgyrationes memorabiles format, qualem situm & ductum admodum mirabilem sane in aperto quodam cadavere Amstelodami conspexi. Substantia ejus non absimilis a reliquis intestinis ipsoque ventriculo est, similibus enim cum iis, quibus tota componuntur, tunicis iisque robore majori præditis, gaudet, similibus fibrarum carnearum, musculosarum seriebus i. e. longitudinalium & transversalium est conflata. Etenim quinque diversæ tunicæ harum partium compagem describunt, quarum prima & exterior atque communis membranacea aliis, nobis potius nervea est, quoniam ex multis exilissimis fibris nerveis vario modo & nexu inter se complicatis contexta. Ob id, quod nempe tunica nervea juxta tendinem exquisitissimi quoque sensus præditum colon sit, præ reliquis intestinis, admodum, & præ reliquis quoque sensile est, tenuia vero tunica magis gaudent interiori villosa & glandulosa. Hanc secunda cellulosa

Ruyfchii excipit. Sequitur tertia musculosa fibrosaue duplici nimirum fibrarum serie longitudinalium exterius ab intra circularium conspicua. Quarta rursus pro nervea habita, ast nobis tendinea potius audit, nam tendines musculosarum fibrarum in hanc ipsam desinunt. Quinta tunica villosa, ob villos, quos monstrat memorabilis, horum agmen, claudit. Ex his, tendinea tunica longior est, hincque in varias plicas annulares per universa intestina aliis alias tamen pauciores dispares & minus eminentes ducitur, nam tales in jejunio, in ilio vero atque Colo nostro elevatur magis magisque regulares adiposæ & fimbriatæ, semilunares appellatæ, occurrunt; in recti intestini initio vero irregulares potius, Kerkringio conniventes dictæ, conspiciuntur, harum fimbriæ velut segmentatæ modificant & firmant cellulas membranaceas circulares. Præter ventriculū renem dextrum & sinistrum folliculū fellis lienem, etiam mesocolo, membranæ cuidam mesentericæ, pendulæ quasi ipsi propriæ, (a quo ipsum etiam nomen accepit) adhæret & quidem in regione lumbari dextra, principium hujus intestini coalescit, ubi membrana superior peritonæi transcendens, ipsum intestinum, superior lamella, ad ipsum mesenterium, propagatur. Hoc mesocolon ubi colon adscendit versus ventriculū & per abdominis medium, non solum cum hoc sed & ex parte cum duodeno atque cum pyloro, a latere postico ventriculi ut & cum pancreate connectitur atque adeo duas pene portiones laminæ suæ inferioris cum omento penes utraque loca, colo conjungit versus orificiū nimirum ventriculi inferius atque lienem. Ubi ad renem sinistrum mesocolon pervenit, a latere superiori, huic, per membranā a peritonæo oriundam, tum superiorem tum inferiorem atque mox in regione lumbari sinistra, versus pelvim ad rectū intestinum flectitur, eo quidem modo, ut, cum colon per membranā peritonæi superiorem circa musculū psoas ligetur, atque deinceps super colo in mesocolon terminetur. Præterea & sat notabiles plexus nervosi truncum arteriæ mesaraicæ superioris comitantes recipiunt & glandulas plurimas conspicuas continent loco tamen, situ, magnitudine ac numero a mesaraicis discrepantes. Cæterum coli principium satis capax est & membranīs robustis motricibus instructum, ut sursum excrementa propellere possit.

§. II. Peculiarem adhuc Colon, intestinum obtinet conformationem, & ut nos quidem reputamus, ab ipsa tunica tendinosa magis elevata, deducendam. Valvula pendula ex circulo rotundo, ea Coli magna est juxta minores modo adductas, ubique ac omnibus decantata ac nota, quæque ulteriori consideratione admodum digna. Hæc circa ingressum

gressum ilei intestini in ipsum colon conspicitur, ejusque interiora spectat ac concidens intestina tenuia occludit efficitque præcipue, ne flatus hic geniti adscendant, nihilque aliud est quam propendicula quædam longitudinalis, ex duabus membranis semicircularibus velut e regione positis composita clarissime conspicienda. Si intestinorum hæc pars a fordibus bene repurgetur & a partibus adhærentibus separetur, flatuque infletur atque exsiccetur, tumque provide incidatur, aut recens mox intestinum iterum circa ejus finem & ipsum Colon circa ejus principium ligetur, hocque per longitudinem secetur cœcum versus, sicque regressum ibi a crassis in tenuia prohibitum observabis. Equidem vulgo ea valvula Bauhini vocatur; ast hanc inventionis gloriam ipsi dubiam Varolium, Salomonem Albertum & Picolhomineum reddidisse videtur, quoniam hi, eam ante Bauhinum, jam observaverunt. Etenim hujus conformatio ita est comparata, ut duplicem quasi limbum semilunarem referat, quique ita se habeat alteri altero invicem imposito, ut more aliarum quoque valvularum proritatatum descensus provolvendis exagitatis massis quidem permittatur ascensusque vero intestina tenuia versus prohibeatur, quia uterque limbus sic sibi jungitur, ut intestinali tubum apprime occludat. Ab ipsa valvula procedunt duæ quædam fimbriæ rugosæ oblongæ valvulam sustinentes sat magnæ & conspicuæ quæ & ad ipsius valvulæ altitudinem propemodum quidem accedunt, sed sensim decrescunt; qua parte a valvula recedunt. Per hanc valvulam ileum intestinum latelariter Colo inferitur. Juxta hanc valvulosam conformationem seorsim notari meretur totius intestini Coli ejusque tunicarum robur ac vis, qua præ aliis intestinis est instructum, nec non ea, quam ratione situs sui, exerere potest: nam per eam motu suo adventitio magma ex extractione chylosa residuum, quod subinde ad motum fit tardius ulterius promovet tandem foras excernendum. His tandem addamus: Valvulæ coli naturam docere medicos, quod enemata in vulneribus intestinorum crassorum noceant, in tenuium vero profint.

§. III. In hoc intestino atque aliis glandulæ præsertim notantur, lympham utilem ac aptam lævigandis lubricandisque intestinis ne exarescant ac coalescant, perfundendisque ac humectandis contentis stillantes, a binis eminentibus in Medicina viris Pechlino atque Peyero inventæ, atque descriptæ, qui ultimus præsertim ulterius istarum enucleationem instituit. Hæ, carneæ tunicæ intertextæ sunt, & optime in intestinis flatu distentis ac exsiccatis conspici possunt. Ubi ejusmodi in-

speciëtionem instituimus, invenimus, esse easdem in tenuibus intestinis admodum exiguas, vixque milii granum æquantes (liquidem & miliares hinc inde vocantur:) sed plures in cumulum velut congestas, mox orbicularis, mox ovalis, mox angulosæ figuræ plexusque varios, formantes easque numerosiores circa exitum ilei, videmus; In crassis vero non in plexus conglomeratæ, sed longius ab invicem distantes singulæ ad lentis magnitudinem excrescentes æque sat copiosæ, adsunt; Nec non quædam in ipsa Coli valvula reperiuntur. Intus & pinguedine sat multa inæqualiter tamen distributa præ tenuibus intestinis Colon stipatum est. Insuper vasa omnis generis obtinet nostrum intestinum cum reliquis. Nimirum arteriæ nutritiam materiam afferentes, adsunt duæ, ex ramo cœliaco oriundæ, quarum superior maximæ intestinorum parti, inferior hujus intestini (Coli) ultimæ portioni, ubi scilicet in rectum desinit, ac ipso (recto) modo inservit. Ab arteria mesenterica præsertim inferiori, hæmorrhoidalis pronascitur. Venæ sanguinem ex mesenterio in venam portæ revehunt, quarum ramus inferior, in sinistro latere reperiendus, in recto intestino hæmorrhoidalis nuncupatur. Hæc vasa sanguifera quibus instructum est Colon, majora quam in reliquis intestinis deprehenduntur. Nervi motum & sensum præstantes ab extremo medullæ spinalis atque ab octavo seu vago nervorum pari derivantur. Nec non vasa lymphatica, ut & ipsa vasa lactea, quamvis pauca, ipsi desunt, quorum BARTHOLINVS V. *Anat. Lib. I. c. 10.* sat multa conspexit. Ligamenta dicta porro ipsi adsunt tria consimilibus semicirculis stabilita, & nihil aliud, quam fasciolæ fibrosæ carneæ sunt. Horum primum medii digiti latitudinem accedit, per ejus medium secundum longitudinem parti supernæ adhæret & a cœco ortum ad rectum usque protenditur. Reliqua bina adhuc fortiora sunt, quorum alterum fursum, alterum ad latus & deorsum ducitur, quibus superioribus & inferioribus partibus alligatur. Circa hæc ligamenta notabile est, quod sectis his cellulæ superius nominatæ, hujus intestini penitus evanescant, adeo, ut intestinum recto ductu continuatum, appareat. Usus horum ligamentorum omnino videtur in eo consistere, ut juxta alligationem quam præstat, suis contractionibus, alvi fæces ex Coli cellulis rectum intestinum versus propellendas adjuvent.

§. IV. Exinde haud difficile usum ac utilitatem propriam magis hujus intestini vel potius intestinorum portionis, cognoscere licet. Ubi modo præsuppono, intestina crassa singula, æque esse organa admodum utilia & necessaria, ac esse æque sensilia ac tenuina acerbissimis multis sym-

symptomatibus testibus; quin etiam insigni activitate pollent, licet vulgo pro receptaculis fæcum saltem habeantur; Ut & vulnera eorum absolute lethalia habentur. Conf. P. AMMANNVS in *Praxi vuln. lethal.* p. 54. & Beat. BOHNIVS de *Renunc. Vulner. lethal.* p. 351. quod nempe a contentis suis ac flatibus distendantur & motu peristaltico perpetuo exerçantur, adeoque difficulter consolidentur, ac facile inflammentur gangrænaque corrumpantur, fæces ac chylum in abdominis cavum profundant, neque remedia rite applicari nequeant. Etenim amplitudo latitudoque magna, mira circumvolutio atque perpendicularis adscensus & anfractuosa, sinuata, cellulosaque ac valvulosa conformatio ejus, tam defæcationi chymi, (quo enim majorem lineam per intestina alimenta assumpta assequuntur, eo copiam majorem chyli purificati ad humorum massam transmittunt) quam magmatis illius residui, quod deinceps sub nomine fecum venit, collectioni apprimè favet ut commoretur ibi paulum illud, atque si tenuium intestinorum vasa lactea aliquid laudabilis nutritii succi effugerit, in hujus lactea vasa recipiatur neque quidquam de hoc perdatur. Copiosæ etiam hæ cellulæ quæ sub ventriculo sinistro latere, numerosissimæ sunt, alium adhuc usum, juxta naturalem & physicum etiam moralem atque decorum spectantem, obtinent: Transitum enim fecum inutilium quæ inibi sunt formatae, remorantur. Quippe eum in finem a natura sine dubio fabricatae sunt, ne homini frequenter, citra voluntatem alvi exonerandæ necessitas incumberet. Ulterius variæ convolutionis intestinorum usus elucescit exinde, quod ea animalia, quæ rectos ductus a ventriculo ad anum ut ex gr. anates, habent, admodum gulosa sint, sine dubio, quia multæ alimentorum partes, sive digestæ sive non digestæ cito excluduntur, quarum jactura mox iterum per assumenda resarcienda est. Hoc etiam hic addi posset, juxta sanguinem & spiritus animales per canales suos numerosos intra tunicas dispersos post assumtum cibum potissimum affluentes, maxime etiam collectionem ibi & retentionem ad modicum tempus fæcum alvinarum visceribus abdominis & præsertim ventriculo quem alluit colon aliqua ex parte quoque conferre, quoniam calore suo præsertim ventriculum blande fovant, sicque quoddam beneficium contribuunt.

§. V. Sed e contrario eadem facilitate etiam ex situ, structura capitate, amplitudine irregulari figura, ac flexuris, circumgyrationibus, anfractibus sinuosis, curvaturis & circumvolutionibus cellulis, & coarctatione tandem perspicitur potest, quam aptum sit intestinum Colon collectioni stagnationique futuræque corruptioni diversorum humorum,

adeoque materialium atque causarum morbificarum, quorum malorum conditionem etiam signa propemodum semper quamplurimos morbos præcedunt, ut v. gr. dolores circa stomachi & renum regionem quam hoc alluit. De quo jure dici posset; semper reconditum ibi esse velut in annulo Hannibalis venenum. Eandemque proclivitatem ad varios morbos concitandos indicabit nervosi singularis complexus atque summæ sensilitatis ejus consideratio. Quare his ita breviter animadversis, quæ statum secundum naturam respiciunt, via jam patet, ut ea videamus, quæ præter naturam occasione intestini Coli & per illud humano corpori contingunt. Vel ex sola inspectione inquam Coli intestini, quoad structuram & conformationem ac suas flexuras & connexiones atque communionem cum aliis partibus mox hariolari licet, trahi hoc intestinum præsertim ab aliis in consensum, trahere illud alias partes atque admittere in sese causas & materias morbificas easque fovere diutiusque retinere atque eas difficillime ob cellulas, quibus est instructum reddere. Atque propemodum Colon intestinum (reliquis tamen non exclusis) totius corporis excrementis recipiendis destinatum esse videtur non solum serosis sed etiam iis salino sulphureis summeque activis, quæ alias per summam cutem evehuntur, ubi transpiratione sublata huc convertuntur. Siquidem a dejectionibus copiosis a quacunque causa etiam eadem accidant, non modo sudorem & urinam minui & quandoque supprimi, quin etiam fitire ægros, corpus colliquari comperimus, quod nemini anceps potest videri consideranti harum partium tunicas glandulis copiosissimis multifariisque obsitas esse; nec desunt numerosissimæ vasculorum sanguiferorum advehentium ramificationes. Nec sine ratione ideo opinamur, providam Naturam tam colo quam tenuibus intestinis sensibilitatem magnam ob hanc ipsam rem tribuisse, ut nempe affluens onerosum hic sensibilitatem majorem inducat, hocque priusquam ad MS. perducatur per alvum excernatur. Hinc etiam haud obscure latentes atque propinquos plurimos morbos clausa præter consuetudinem alius ac pressiones contractionesque hanc abdominis regionem occupantes, significant. Præter hæc & alia huc quandoque ducuntur atque interdum per metastasin deponuntur, sanguis, pus atque sanies ut de his & aliis variæ observationes testantur. Non vana certe ratione existimo, medicos practicos sedem morborum eorumque contumacissimorum sæpius alibi in liene, pancreate, hepate, renibus mesenterio, ventriculo utero aliisque quærere, quos tamen in Colo potius quærere deberent. Quid v. gr. frequentius est, quam quod

quod practici non satis providi colicum dolorem pro nephritico habent qui tamen gravitate motu, loco, a causis præcedentibus, ut & ab exeuntibus potissimum differt. Nimirum renum dolor non æque acerbus ac ille coli, sique dolor supra renum regionem excruciat non nephriticus sed colicus dolor habendus, is etiam longius se extendit, quoniam colon totum fere abdomen pervagatur; alter vero in regione renum fixus manet, nisi quod interdum, quando nempe calculus ad ureteres descendit, vesicam versus extendatur, in colica major exagitatio per abdomen sentitur, urina in dolore a calculo primum tenuis & aquosa dein arena aut calculi cum sanguine ut plurimum excernuntur; in colica vero crassa magis rubraque apparet &c. incautiores tamen (medici) illi censendi, qui aut inflationem a flatibus dolorificam Coli (in hypochondriacis admodum familiare malum,) tumorem & dolorem lienis aut ventriculi pronunciant &c. Simulque affirmo, ipsos sæpe medicos (taceo, obstetrices) intumescentiam præter naturalem Coli pro ingravidatione falso habere, quales observationes inquilinas addere possemus nisi eæ essent odiosæ. Immo hoc quoque observatur doloribus, præ aliis Coli dolores arthriticos nephriticosque ut plurimum conjungi adeo, ut non facile hic sine altero inveniantur, & hunc alterum excipere & sequi nec non unum in alterum terminari, adeo, rursus, ut alio præsentem, abeat alter. Etenim apud medicos in confesso est omnes hos affectus a motu irregulari spirituum animalium spasmodico in articulationibus alios in membranis suam originem ducere. Sic COVS *Lib. de humor. in fine* ita loquitur: *Cui intestinum colon in dextro primo dolebat, articulari morbo correptus quietior erat; postquam vero hic curatus fuit, intestinum magis dolebat.* Atque TRINCAVELLVS *Lib. XIX. cap. I.* commemorat, colicam in arthritidem cum euphoria ægri abiisse. Nec nobis ignotum est vice versa ex podagra colicam cum urinæ retentione fuisse subortam. Varia ejusmodi exempla passim literarum monumentis reperies consignata. Vid. v. gr. *Ephemerid. Germ. N. Curios. D. I. an. VI. obs. 208. D. II. an. VI. obs. 2. &c.* Ut nulla propemodum affectio est, quæ magis intestina affligit, quam dolor, ita patet primum hoc intestinum (Colon) præsertim reliquis intestinis multis iisque atrocissimis doloribus, ab humoribus acribus, falsis biliosis, lancinantibus nec non flatibus aliisque rebus præter naturalibus iisque toto genere discrepantibus, vermibus &c. inductis quoniam ob nervorum conjunctionem consensum atque conspirationem ac ligamenta tendinosa, obque tunicam interius nerveam admodum sensibile est. Inter quos casus, eosque primarios moxque se

offert cruciatus ille gravissimus, acutissimus, acerbissimus ac pertinacissimus & nomine & re satis notus atque qui ab intestino Colo, colica & a Celso, intestini majoris affectus, appellatur. Hujus colon, locus vel sedes primaria est, unde Colo infestari pro colica laborare apud SCRIBONIUM *L. n. 121.* legimus. Ubi sic afficitur, afficitur fere semper totum, interdum secundum CELSUM *Lib. IV. c. VII.* in ea maxime parte, qua cœcum est, seu circa principium, quod cum valvula Coli halitibus & flatibus colligendis apprime favet, vid. SIM. PAVLI *quadrip. botan. p. 84.* & exitum eorum intercludit. Hinc observante jam ROLFINCIO *Lib. III. epid. affect. part. C. XIII. p. 262.* ut plurimum dolor magis in dextro latere se exerit, gravior vero in sinistro affligit, ubi colon angustius efformatur qua ex parte inferne, is incipit & sursum ad sinistram adscendit totumque dein ventrem cinguli ad instar acerbe constringentis occupat. Cui ordinario nausea, vomitus & cibi fastidium magis urget, quæ indicia ordinaria & fere primaria sunt laborans Colon indicantia. Quandoque enim & reliqua intestina, imo ventriculus ejusque orificia utraque, imo cœsophagus ac diaphragma simul afficiuntur. Pro ratione causarum quæ variæ esse solent, colica quoque varia est, siquidem vel humoralem sanguineam a stasi nimirum sanguinis inter nervosas ac admodum sensiles Intestinorum tunicas, oriundam pituitosam, biliosam, (ex asse a paucis descriptam) flatulentam vel nephriticam, scorbuticam, arthriticam, hysterica, hæmorrhoidalem, convulsivam, eam nominant Pathologi. Quidam eorum pestilentem & epidemicam, qualem P. AEGINETTA *L. III. c. XXVIII. & cap. XLIII.* recenset, addunt. Alii alibi & certis quibusdam regionibus v. gr. in nostra Germania Austriæ atque Moraviæ præ aliis incolis & in Gallia Pictonibus admodum familiarem esse observant atque ideo endemiam eam appellant. Novæ ejusdem & a paucis receptæ & probatæ appellationes sunt quibus auream, plumbeam &c. Colicam indicant vid. C. FR. PAVLLINI *Observat. M. phys. Cent. I. obs. 28.* FEHR *C. III. epist. Barthol. 69.* BORELLVS *Cent. IV. obs. 25.* Convolutionem atque flexuram ipsius intestini Coli exacte non raro monstrat hoc malum, siquidem dolores per totum quidem abdomen, in profundo incidunt, sed ordinario magis a dextra regione incipiunt, & ad sinistram ileorum procurrunt, adeo ut miseri, qui sic torquentur, quasi cingulo quodam summe dolorifico intimiorem abdominis cavitatem constringi aut falce incurvata conscindi, sentiant. Ubi in sinistro latere ejusmodi pathemata magis observantur, caveas ne mox lieni cum vulgo adscribas, cum potius coli flexuris

ris sæpius debeantur. Dehinc circa renem utrumque ac dorsum ut & supra infraque umbilicum versatur vago omnino & instabili, modo dextram modo sinistram abdominis partem pervagante dolore, mugitus cum intumescencia abdominis & murmura quasi conclusa ventris modo adscendentia modo descendencia circumvolventiaque acerbè affligunt, ac si per inferius guttur exitum inveniunt, a summo ad imum ileum provolvuntur. His ordinario etiam juxta nauseam cibi fastidium & conatus vomendi, junguntur cardialgiæ anxietates constrictoriæ, thoracis, gulæque angustia. Alvus est ut plurimum adstricta, & ubi redditur, faeces induratae atque ægre egeruntur quandoque etiam ejus dejectiones liquidiores sequuntur. Urina difficile redditur, & sæpe penitus retinetur. Si excernitur primum tenuis & aquosa est, interposito tempore crassa, arenosa bullulisque internatantibus conspicitur. Quandoque ex vesicula fellea, per talem constrictionem convulsa, per vomitum copiosa & sincerabilis, ac modo flava, modo viridis ejicitur. Hæc quidem sæpissime experiuntur, sed quandoque etiam fixus dolor una in sede ibi inhærescit atque excruciat, perterebrante quasi doloris genere, quod sævissimum est, adeo, ut tum respirationem admodum difficilem & laboris plenam, sudores algidosque tum motus convulsivos spasmodicos singultus, vomitus, imo lipothymiam & epilepsiam, oculorum contorsiones & visus depravationem inferat. In specie adhuc indicandum est immanibus colicis doloribus ex facili & sæpius supervenire icterum ex eo, quoniam spasmodica hujus partis affectio ad duodenum intestinum & ductus bilarios eorumque orificia fibris motricibus instructa usque pertingens ea valide constringit bilis accessio denegetur sed ea per vasa lymphatica resorpta & ad massam sanguineam delata, icteritio colore totum corpus perfundit. Quod malum adhuc adeo est impeditum, ut id neque motus neque flatus illud leniant. Causæ tales morbificæ, si in Colo resident, resident autem eæ ut plurimum ibi (spuria enim sic dicta colica aliunde ex partibus quibusdam vicinis prodiens ut mesenterio, pancreate, omento, peritoneo rarior affectus est) sunt, pituita crassa, lenta ac maxime vitrea, assumpta fermentescibilia, flatus tunicas intestinales distendentes, cruditates biliosæ, atque nidorosæ, humoresque acres caustici, acidi, ipseque chylus ex ventriculo talis proveniens & balsamo bilioso minus correctus, tenuia intestina, quibus tunica interior magis villosa, glandulosa, citra magnum incommodum transiens; at tamen ad hoc (colon) provolutus contractiones, torsiones, extensiones dolorificas infert. Observatum constat convalescentes interdum post mor-

morbos diuturnos maxime febres dolore colico vexari, quoniam sanguinis & lymphæ crasis admodum vitata, nec minus menstruum ventriculi iners & languidum est, unde digestionis vitia exsurgunt & intestina foribus viscidis & acidis replentur. Porro huc faciunt frigus acre incaute admissum, transpiratio sensibilis & insensibilis impedita & retropulsa, vermes rodentes ac vellicantes, fumus metallorum, saturni &c. per os ab iis hominibus, qui metalla, lithargyrium, mercurium ejusmodique labores tractant, improvide exceptus, & quandoque calculosæ concretiones in cellulis Coli hærentes atque eas obsidentes, siquidem & acres humores & quicquid dolorem inferre potest, ob valvulas hic non possunt ultro citroque longius evagari. Facile etiam hoc morborum genus a gravioribus animi affectibus, ira crebriori, terrore, maxime ab iracundia cohibita, movetur. Frequentissime in subjectis sensu exquisitiori præditis visitur. Quandoque in adolescentibus a nimio & intempestivo veneris nec non a largo potuum spirituosorum usu, aut verius abusu, exortum hunc morbum esse, constat. Accidit quoque talis dolor non raro per consensum, quando nimirum ex epilepsia, passione hysterica, atque hypochondriaca etiam a motu calculi renum, nec non vesicæ, suppressione hæmorrhoidum, mensiumque, inflammatione hepatis atque mesenterii, post partum, item ab uteri doloribus, & ex lochiorum excretionem impedita, ut & vel ex sola pedum infrigidatione Colon cum reliquis intestinis, dolet miserrime. Ubi convulsiones tales invalescunt colica exsurgit convulsiva appellata quæ parum apud Autores occurrit, & ut plurimum in sequiori sexu ex utero provenit ut & in passionibus ob nervorum teneritudinem, quare tot passiones colicas facile epilepsia supervenit. Est vero convulsio, quæ ex contorsione ex Colo ad scrobiculum cordis immo ad fauces usque adscendit, respiratio summe est impedita, umbilicus retrahitur & in lateribus contractio affligit. Aliunde quoque exsurgit alia Colicæ species, quæ colica hæmorrhoidalis appellatur, quæ æque ab Authoribus quondam non nominata neque descripta est, nisi eam pro tali velles habere, quam Hippocrates ileum hæmatitem vocavit atque delineavit, quamvis quædam in hac recensione omiserit, quæ in hac observari, solent. Indicavit eam primum Celeberr. Stahlius dicitque eam esse ex congestionem sanguinis in vena portæ, esseque eam adultis XXX. & XL. annorum habitus mollioris sanguineo cholericis hominibus familiarem. Se manifestat alvo adstricta, quandoque solvitur diarrhœa sanguiolenta, cum continuo tenesmo & dolore quodam urgente ac si in intestino recto globulus urens hæreret. Omnium frequen-

frequentissime colica & iliaca passiones tam quoad causas quam quoad signa & curationem inter se communicant. Ex hoc morbi genere sæpe alii pessimi pedissequi proveniunt; Omnium vero frequentissime insequitur illa paralytis quæ paresis appellatur. Aliquando etiam in arthritidem, rheumatismum, epilepsiam, melancholiam, hydropem, tabem aliosque affectus perniciosos; nec non, neque haud raro, in herniam umbilicalem definit, quia flatuum multitudo, intus coacervata est. Ubi vero flatulentæ colicæ, supervenit febris, bonum signum habetur, quoniam curæ spontaneæ spes affulget. Qui colica pereunt, ordinario ex inflammatione & subsequente sphacelo intestinorum pereunt. Hoc Ad. Spigelius affirmat, asserens, se nullum unquam dissecuisse ex colica mortuum, sine intestinorum inflammatione.

§. VI. Idem stabilis & atrocissimus, acutissimus & contractorius urensque Coli dolor, plurima ventris loca gravissime affligit, ubi a sanguine seu copiosiori seu tenuiori justo ibidem affuso, vel ex graviore præcedente dolore aut alia læsione concitata, sive totum Colon, sive hæc vel illa saltem pars ejus, inflammatione uritur: Etenim si dolor hic, regionem supra umbilicum & sub ventriculo cum nausea & vomendi conatu occupat, indicium præbet, eum coli tractum, qui infra ventriculum a dextro ad sinistrum latus porrigitur sic, laborare; si vero in dextro hypochondrio sub costis spuris sensus talis molestissimus sentitur, principium ejus, ubi ileum incipit, pati, colligere est: Siquidem illud inflammationis causas communes, maxime autem & frequentissime ex dysenteria præcipue per adstringentia intempestive ea curata, non difficile gignit; quamvis raro, a medicis ipsis cognoscatur ac discernatur sæpiusque cum inflammatione renum & vesicæ confundatur. Vehemens accedit febris, urgens æstus, & ardor totius propemodum corporis, maxime internus, ad instar prunæ candentis extorreat, externa frigent, vigiliæ molestissimæ inquietant, succedunt sitis magna, nausea, singultus, biliosus præcipue vomitus frequens, nihil tamen dolores levans, per intervalla limpidi liquoris in os regurgitatio, animi deliquium. Intus juxta morbum ejusque regionem pulsatio & titillatio ignea quasi quædam ut plurimum præcedit & eam comitatur, excrementa exsiccata sunt & indurata ac ideo alvus ut plurimum manet clausa atque urina retenta. Lingua præ aliis sicca, uti certissimum inflammationum internarum, ita & inflammationis Coli signum est, adeo, ut crescentibus inflammationibus ejusmodi linguæ siccitas crescat. Arem inflammatione distinguitur, quod Coli inflammatio magis ventrem antrorsum versus, se

extendat majorque mutatio in alvi dejectionibus appareat, quam in renum inflammatione, quæ etiam dolorem ad spurias costas, dorsum & vesicam spargit. Hujus intestini inflammatio, discussione frequentius per suppurationem solvitur, materia per alvum rejecta, Ut plurimum malum in iliacam passionem facescit, aliquando etiam in gangrænam abit. Hujus rei testem eumque gravem præ aliis adduco TH. WILLISIVM qui *vid. Pharmac. rat. Sect. I. C. 2. p. 17.* inflammationem & sphacelum circa Coli initium sæpius vidit. Conf. & M. A. SEVERIN, *de abscess. Lib. IV. cap. 36. p. 276.*

§. VII. Cum non omnis intestinorum dolor colicus sit, qualis omnium frequentissime foeminas, tum a partu, tum menstruo impendente fluxu, torqueri solet cruciatus, siquidem & dolores partus immaturi iique nimii, passionibus colicæ sunt, licet uterum nunc in consensum trahant, nunc ex utero oriantur; ita & frequenter nimirum extra dolorem illum quem colicam ordinario vocant, aliis occupatur Colon. Omnium vero frequentissime a flatibus copiosis & non raro præter modum ideoque haud levius ferendis solum extenditur, (nam hæc aut illa tantum intestinorum pars sic afficitur) & molestissime atque acerbe instabili tamen modo affligitur. In Colo enim ut amplissimo intestino, particulæ aëreæ a feculentis plus liberatæ validius, illud expandere possunt. Quæ afflictio admodum pertinacissima deprehenditur, quoniam per cellulas ad latera prominentes, flatus decurrunt ibique incarcerati quasi, diu persistunt positoque a spasmo obice, ad superiora magis compelluntur, ægre exturbandi, ex quo sola distensione multa eaque gravia incommoda in toto corpore & disitis ejus partibus exsurgunt, adeo. ut non raro vitam in summo discrimine positam esse crederes & vulgus mox incantationibus diabolicis, easdem adscriberet. Magis adhuc hæc symptomata augentur, ex adjacentium partium & viscerum præsertim diaphragmatis pressione & distensione sursum, molestissima, unde cor atque pulmones maxime patiuntur. Hæc quotidiana observatio in eam multos perduxit erroneam opinionem, ut crederent, nullo alio fini a natura conditum esse Colon, quam ut excipiendis flatibus inserviat, cum potius reputandum sit, flatus ibidem molestos semper præter naturam sese habere. Admodum in hanc rem memorabilia sunt, quæ habet FERNELIVS *Lib. VI. pathol. c. X.* Colon a flatibus adeo distentum deprehensum fuisse, ut brachii crassitiem æquaverit. DODONAEVS similem observationem adducit *Obs. m. c. XXXVII.* FELIX PLATERVS in puero femoris crassitiem Colon æquans notavit *Lib. III. obs. p. 616.* Apud SCHENCKIVM legitur *p. 627.* eum in-

testi-

testinum Colon, adeo flatibus tumidum conspexisse, ut ocream magnam referret. WELSHIVS *Disp. de Malo hyponch.* observavit, illud totum a flatibus distentum, sub insertione vero, in rectum intestinum adeo contractum, ut coaluisse videretur. Hujus inflationis a stagnantibus ibi humoribus in flatus resolutis, species, morbi illi bini infantum admodum familiares sunt quorum alterum *das Hertzgespan*, alterum *das Anwachsen*, vulgo vocant, & in hoc hepara clien subjectum morbosum pronunciant; Hic alterum gravitate & pertinacia superat, præviis aut comitantibus ventris torminibus, abdomen & hypochondria dura atque tensa elevantur, jungitur cardialgiæ & febricula, pulsus est celer, oculi intumescunt, alvus aut adstricta est, aut si fluit, viridia, porracea & grumosa rejiciuntur. Huc quoque forte referendi Engastrimythi, quos HIPPOCRATES hypochondriacos esse censet, quoniam in sinistri hypochondrii cavitate flatus colliguntur. *Aphorism. 57. Sect. VII. Conf. & WIERSVS p. 440.* His vix adeo frequentes distensiones coli ejusque cellularum ab aliis rebus præternaturalibus, ut pituita crassa & multa collecta, fæcibus induratis & impeditis atque hærentibus &c. accidunt. Haud erraverit, qui forte credat, præter pituitam inhærentem adipem multum & inæqualiter distributum, quo præ intestinis tenuibus donatum est colon, meatia excrementa morari potius & retinere, quam eorum excretionem facilitare. Atque adeo observationes anatomicæ & practicæ confirmant, colon a flatibus ruptum fuisse. WEDELIVS vid. *Pathol. Dogmat. d. S. II. C. XII. p. 380.* Coli crepaturam in passione iliaca vidit qualis & in *Collect. Uratislav. 1725. August. p. 225.* legitur.

§. VIII. Conformatio ejus atque progressus porro (ut explicatius paulo de eo loquamur,) clare docent, vix aliud intestinum colligendis cruditatibus a mala digestionem ortis, aptius esse ac pituitam crassam & excrementitiam ibi diutius justo morari ac coacervari, quoniam fæces sursum præcipue elevari debent, adeo, ut mirum in modum illud extendant, tunicas totam compagem constituentes, relaxent tonumque perdant penitus, ex quo ægri tarda alvi dejectione, flatibus plurimis obmurmurantibus, ventriculi cruditatibus, in ventre frigoris quadam perceptione atque dolore cum virium animique languore, ægerrime molestantur. Apud SALMVTHVM ut ad prius respiciamus in *observat. Cent. 1. obs. 78.* legitur, quod in cadavere hominis cujusdam Colica demortui dissecto, totum Colon pituita obductum fuerit, relicto saltem foramine digiti minoris crassitie, pro fæcibus transmittendis. Referri huc meretur quod ANTON. VON DER LINDEN *select. Med. S. VI. S. 9.*

de vitrea pituita per exempla affirmat. *Simpliciter*, scribit ille, *nihil est in vivente frigidum excepta specie quadam pituita vitrea, cujus memini videri dejectum ab alvo frustum pugni instar. Quamdiu hærebat in sinistro, colo & cum inde propelleretur, ope purgantis, qua transibat, velut a glacie frigus sentiebatur. Vidi hoc Amstelodami in viro mercatore famoso, vidi & Franeckera in Imckia Horatii ab umbilico excretos aliquot centenos ex eadem pituita factos globulos, magnitudine lusiorum, & minores eosque pellucidos instar crystallini oculorum cocti & frigidos instar crystalli.* Simile de Justo Lipsio notum est, qui massam pituitosam, lentam ac viscidam paulatim in intestinis coacervatam formamque intestinorum exprimentem, post varia, symptomata maximo cum subsequente commodo & sanitatis restitutione per alvum ejecit. A qua adeo copiosissima pituita consequenter & interiori superficiem oblinente cellulasque atque anfractus adimplente lævigatur intestinum, ut chylus facile residuus & excrementa & quandoque assumpta, vix alterata, cito dilabantur. Observationes pariter non desunt, intestinum Colon quandoque & a fæcibus & a flatibus adeo extensum fuisse, ut ventriculum referret, qualem notabilem extensionem aliquando in Amstelodamensi nosocomio Celeb. Ravio secante atque monstrante, vidit Præses. Ejusmodi est, quæ legitur in WELSCHII *Disput. de mal. hypoch.* Quandoque fæces induratas & stratas instar lapidum in lapicidina aut in muro invenerunt, cum magna intumescencia partis, curiosi harum rerum scrutatores. Tales extensiones a recrementis factæ, non possunt non contumacissimas alvi suppressiones atque adeo iliacam tandem passionem, ima summis, summa infimis quasi commutantem (si nimirum in cellulis Coli merda indurata firmiter incompacta hæret easque implet obstructis interim ani musculis,) procreare. Apud Fernesium legitur observatio de quodam, ex intumescencia ventris, præter modum laborante: Adeo enim in illo infarctum fuit Colon pituita concreta, ut scirrhum & solidum quoddam corpus haberetur nihilque omnino fæcum pertransire potuerit. Hoc meretur adjici, observatio ROS. LENTILII in *Ephem. Nat. Cur. D. II. A. II. Observ. 152. p. 340.* & quem is adducit LAUR. HOFFMANNI *de vero usu & fero abusu medicam. chymic. p. 45.* qui deprehenderunt ex pinguiori lacte, in coli sinibus & cellulis concrevere globulos, intestinorum motus peristaltici ope compactos, admodum duros, pueros acerbè cruciantes, immo concitata nervorum distentione enecantes, quales etiam aliquando Præses hic Lipsiæ vidit in puero quodam, quotidie in magna copia non duros illos quidem, sed molles ad instar ceræ & flavos nucleorumque ceraforum magnitudinem æquan-

æquantes, excretos. Singularis Coli, a multa infarciēte & distenden-
tibus pituita, flatibus lienisque, in perfectum scirrhum tractu temporis
transitura intumescētia, occurrit in morbo quodam incolis accolisque
urbis Cassoviensis in superiori Hungaria familiari atque endēmio porcel-
lo ideo Cassoviensi appellato. Hujus enim intestini potissimum tumor
in magnam & inæqualem molem secundum dispositionem, situm, vici-
niam, connexionem ejusdem formatam, porcelli quandam figuram re-
fert aut referre creditur. Reliqui quoque morbi Hungaris familiares
atque frequentes, ut febris hungarica dicta & præsertim alter quem
ztemer vocant forte in colo etiam & maxime resident, quod fere indi-
cio est, quod si cibos avide nimis deglutiunt exindeque nauseam vom-
tum ac languorem molestissimum incurrunt, tuberculis circa carpos ma-
nuum apparentibus, extemplo, allio & aceto si non fricent, eadem ter-
tio vel quarto die febris & colica passione corripiantur. Hæ recensitæ
cruditates quidem ordinariæ & quotidianæ materiæ sunt, quæ hic co-
acervantur; Quandoque vero extraordinariæ magis & res toto genere
præter naturam, multum incommodi inferentes per alvum excernuntur,
quæ per plures annos ibi latuerunt, uti varia de variis exempla nota sunt.
Vix alibi, nisi in amplitudine sinuosa & cellulis Coli ejusmodi excreta ea
hæsisse admodum probabile est. Ex. gr. PLATERVS *Prax. T. II. C. XIII.*
exemplum habet de foemina quadam colica laborante cui per
injectum clysterem ossicula pedum gallinæ quæ per plures annos inhæ-
serant, educta sunt, & BORELLVS *Cent. III. obs. 25.* historiam recenset
de Nobili quodam, qui centum aureos nummos deglutitos, per clyste-
res quoque sæpius adhibitos, tandem reddidit. Similem (historiam)
Cent. III. epist. 69. habet. Ferramenta & cultri fragmenta deglutita
diutiusque retenta fuisse in *Miscell. N. Curios. Ao. MDCLXXII. obs. 179.* le-
gitur. Globulorum aureorum LOSSIVS *L. III. obs. nucleorum degluti-*
torum BRUNNINGERVS Cent. II. obs. 20. mentionem faciunt. Rursus
angustia ejus, in quam tandem definit Colon, ut dolorem graviolem effi-
cit, ita & magis adhuc copiosiore materiam morbificam, ut pituitam len-
tam crassam & concrecentem viscidam, calculosis concretionibus, ac
fordes infarctui obstructionibus, majoribus & difficilioribus curatu, an-
sam uberrimam præbentes, colligit. Hinc & facile magis & p. n. angu-
statur, adeo ut via & transitus impediatur & quandoque plane occluda-
tur. Hinc & in affectibus spasmodicis in quibus colon cum cellulis suis
constringitur, ut excrementa ovilli ad instar stercoreis, in globulos intorta
minores, excernantur. Non solum vero ubi in angustum secundum

naturam contrahitur spatium, sed & totum præ aliis intestinis sæpius & ex facili præter naturam arctissime & mirum in modum constringitur, de qua totius (Coli) constrictione præter modo adductam observationem aliæ multæ hinc inde prostant habeoque quasdam easque satis notabiles, jam vero longius non recensendas. Ob hancce angustiam haud difficile etiam in se coalescere potest, qualis coalitus incurabilis fere est. IOH. RHODIVS *Cent. II. obs. 77.* de Nobili Patavino notat, cui ex dysenteria non solum Colon, sed & alia intestina conglutinata fuerunt, obortis inde sævissimis Coli doloribus, causa non nisi post mortem patente. Similem historiam *obs. 82.* addit. Coalitus ejusmodi IOVBERTVS in *Vita Rondeletii* meminit. Ariditatem & concidentiam ejus refert MARCELLVS DONATVS *Med. Inst. L. IV. cap. X.* Ipsum valvulum Coli, Colo quasi agglutinatum sæpius se observasse scribit SPIGELIVS de *humana corporis Fabric. Lib. VIII. cap. IX.* Quantum vero diutius retenta alvus retentæque sæculentiæ in hoc intestino noceant, statim liquet æstimanti, quod hic liquidum foetidum adhuc separetur & ad ipsam usque massam humorum transeat, ex quo, ea non potest non, valde impura reddi: Nam præsuppono, ex superioribus adductis, dari adhuc in Colo intestino lactea vasa atque sub alvo plus justo retenta, excerni tandem exsuccas, aridas, fracidique foetoris expertes fæces.

§. IX. Amplius dicendum est, quando vel alvus supprimitur, & cruditates acidæ, biliosæ, pituitosæ, in hoc etiam intestino stabulantur, quoque per diuturniorem moram atque per novam aliarum subinde accessionem comixtionemque, easdem peiores fieri ac magis indies corrumpi, mineras febrium maxime, intermittentium variique generis, quotidianarum, tertianarum simplicium, & mixtarum, nec non duplicium, biliosarum, ardentium, lentarum atque adeo malignarum, morbillorum, purpurarum, petechiarum, constituere.

§. X. Similiter commodam occasionem concretionibus calculosis quæ in omnibus corporis cavitatibus iisque arctioribus accidunt, in suis præsertim cellulis, tanquam in lapacidinæ latebris præbet, quoniam enim ibi calculorum rudimenta & incrementa seu mucilaginosæ, lutosæ arenosæ, falsæ atque tartarea recrementa confluunt incuneantur & retinentur, facile concretiones ejusmodi contingunt. Calculi qui exinde hisque in locis proveniunt nunc parvi nunc magni observantur, qui tamen ut plurimum nec sensu quidem percipiuntur nec dolores sensibiles inferunt, nisi quando angulosi ac asperi per inferius guttur, ejiciantur. Si quidem & non desunt plures observationes Autorum, post GALENI tempora

tempora (qui *de loc. affect. Lib. VI. cap. II.* affirmat, calculos in intestinis repertos esse nec viderit nec audiverit,) qui referunt per alvum tam in hominibus quam brutis, calculos haud exiguae magnitudinis eosque copiosiores excretos fuisse Ex. gr. apud HORSTIVM legitur *Lib. IV. obs. p. 232.* ducentos & triginta tres calculos per alvum fuisse rejectos. Apud CAPIVACCIVM *Lib. III. cap. XIII.* MASSARIAM *de dol. calc.* MARCELLVM DONATVM, calculos ovi gallinacei magnitudine invenies FERNELIVS *pathol. Lib. VI. cap. IX.* multos calculos in colo vidit nucis juglandis aut castaneae magnitudinem excedentes. Musa refert mulierem ex ano quinque lapides reddidisse & Trincavellus historiam calculi majoris per alvum excreti, adducit. Jul. Cæsar Scaliger vidit per clyfma magnam vim lapidum eductam. Si plura hujus rei exempla desideres evolvas BENED. SYLVATICVM *cent. III. conf. 7. Barthol. cent. III. obs. anat. 76. Cent. IV. obs. II. 5 49.* IO. RHOD. *cent. II. obs. 74.* SAXONIAM *Lib. III. Parth. Cap. XXV.* HOLLERIVM *de morb. inter. in Schel. Cap. XLI.* PETR. SALIVM DIVERSVM *in annot. in Altimar.* IOH. IAC. HARDE RV M *in Apiario p. 309.* IOH. BAPT. CONTVLVS *in Tr. de Lapid. podagra & chiragra Cap. XV. p. 70.* in viro quodam, a pueritia, colicas passiones frequenter easque gravissimas experto, grandem admodum calculum per inferiora excretum vidit, plura hujus rei exempla D. SENNERTVS *Lib. III. P. II. Sect. I. Cap. V. adducit.* Ego in infante unius saltem anni adhuc lactato, numerosos calculos, pisi magnitudinem fere excedentes modo laxos molliusculos & pingues ceræ ad instar, modo compactiores & friabiles, colore luteos, per integri mensis spatium, subinde fuisse excretos, vidi.

§. XI. Vermium, qui vivos nos torquent, rodunt atque corrodunt nondum etiam natos teste Coo atque Ambros. Stegmanno, ac mortuos consumunt, ut omnes corporis humani cavitates, eas etiam exiguas, occupant, ita commodissimum & frequentissimum omnium receptaculum intestina habentur. Nam licet inquam vermes in omnibus intestinis præsertim majoribus reliquis, in quibus excrementa solidiora hærent, generentur tamen in Colo ejusque recessibus præsertim omnium commodissime, nidulantur, pererrant, atque nutrimentum accipiunt ut multiplici experientia perfectiones cadaverum apud Autores constet. Conf. ZACVT. *Lusit. Pr. adm. Lib. II. observ. 33.* REVERIVS *Prax. Lib. X. c. I.* HILDAN. *Cent. I. obs. 57.* AMATVVS LVSITANVS, *Cent. I. obs. 5. 33. atque 47.* Hæc G. BRAVI lectio & observatio est experientia comprobata vid. *Resolut. p. 376.* inquietis. Generantur lati vermes per omnia inte.

intestina, teretes in superioribus, ascarides in inferioribus i. e. Colo & recto intestinis. HOLLERIUS vide *de morbis intern. Cap. LIV.* observavit multitudinem vermium, tunicam sibi contexisse, toti intestino Colo extensam. Abhinc non modo punctione, morfu & vellicatione, maxima afficiuntur intestina, sed & longius latiusque eorum malitia percipitur. Etenim exinde diarrhoea, lienteria erosiones, nausæ, vomitus, ptyalismus, vellicatio & pruritus narium, singultus, tussis sicca, vertigines, convulsiones, epilepsiæ, paralyse, deliria, dolores capitis, syncope, palpitationes cordis, anxietates, pavores, murmura ventris, inquietudines, tremores, tabes, febres acutæ & chronicæ, aliaque innumera propullulant mala, vid. præ aliis CHRIST. LANGII *patholog. animata*. Nec facile ex cavitatibus coli intestini molestissimi ejus incolæ, lumbrici, exturbantur, quoniam & ad hos recessus, difficulter interdum perveniunt medicamenta. Numerosa ranarum progenies excreta apud J. J. JOEPSERIUM legenda, bufonum, lacertarum atque serpentum alibi invenienda ex. gr. in *Act. Hassn. Cent. IV. obs. 19. &c.* vix alibi quam in Coli cellulis habitaculum obtinuit.

§. XII. Nullumque hinc & intestinum aptius est colligendi & retinendi abscessus & ulcera, eaque cancrofa, atque copiosum pus fundentia, quando ex inflammatione tumor, in pus abit, quorum exempla haud pauca hinc inde apud observatores, & qui cadavera demortuorum hominum aperuerunt & secuerunt, prostant. Notabilem ejusmodi observationem in nosocomio quondam Tigurino, ex demonstratione Clariss. D. D. Muralti, Filii collegi in viro sexagenario majori, tabe, demortuo, cujus Colon mirum in modum tumidum apparebat, & intus quatuor abscessus distinctos monstrabat. Colon cancro occulto affectum ex obstructione pori bilarii, adducit SCVLTETVS in *Armament. Chirurg. P. II. p. 61. Observ. 48.* Nec non frequentius quam alibi varii alius generis tumores, strumæ, steatomata, verrucæ, scirrhi, inibi & tophi concreti succrescunt & vitæ periculum inferunt. Ex his malis non ex asse acrite curatis, cicatrice relicta, in se ipsum non raro coalescit atque concrescit, quales observationes BENIVENIUS *de abd. & V. VIDIVS Com. in lib. Hippocrat. cap. de vuln.* addiderunt. Præterea, hoc loco ruptionis vasorum sanguiferorum in Colo proponenda observatio, quam Argentorati quondam, monstrante Celeberr. Scheitio, notavit Præses. Nec silentio modo prætermittenda ea (observatio) qua notatur, colon cum reliquis intestinorum partibus p. n. coalescere, quod quandoque, ex colica fieri, assolet. Ejusmodi observationes legas licet, apud BARTHO-

LINVM *Hist. anat. Cent. III. hist. 6.* HOCHSTETER. *D. X. cas. 6.* RHODIVM *Cent. II. obs. 32.* PAW. *obs. 5. it. in Miscel. N. Curios. D. II. an. VI. obs. 15.* Perinde non raro scirrhusum redditur, ut HOLLERIVS *de morb. intern. Lib. I. cap. XLI.* & RHODIVS *Cent. II. obs. 76.* ut & de callo inge-
nito BENIVENIVS *de abd. Cap. XXXIV.* testantur.

§. XIII. Quandoque ipsa valvula intestino Colo adstans & a mucō atque pituita crassa ita obducitur, ut cœco ac colo, intestinis, quasi agglutinata haud quaquam possit aperiri, nec iis quæ inverso violentoque motu peristaltico sursum tendunt, remoram injicere, & laxatur atque adeo rumpitur, quod facile ab obstructionibus alvinis & incarceratis flatibus extendentibus prementibusque, quibus hoc intestinum ob flexuras adeo prolixas, & incurvationes apprime favet, accidere potest, atque oritur iliaca passio. Conf. AD. SPIGELIVS *de hum. corp. fabrica Lib. I. cap. VIII.* Quæ laxatio quidem curari potest, ast de ruptura ejus secus sentiendum, quæ vix curationem admittit, quamvis non lethalem modo eam pronunciare vellem.

§. XIV. Maximam insuper proclivitatem ad varios morbos concitandos, hic seorsim consideranda, magna sensilitas ejus indicat, per quam facile spasmodicæ constrictiones & affectus hypochondriaci varii, qui omnes spasmis debentur, hic præsertim exoriri solent, quæ derepente per universum intestinorum canalem, motum illius peristalticum, a quo totius corporis sanitas pendet, qui ibi secundum naturam viget, lædunt, impediunt & pervertunt; Ea enim hujus motus naturalis indoles est, ut, si in una parte intestinorum læditur, mox per totum illorum tractum lædatur. Hinc flatus & fæces constricto nimirum per spasmos libero-
que sic transitu denegato, non debite descendunt, sed potius regurgi-
tant atque ad superiora feruntur, unde duodeni intestini & ventriculi præsertim fit inflatio ejusque orificiorum speciatim distensio. Propter tensionem nervorum, multa eaque molestissima mala inferentem, hinc-
que præsertim cardialgiæ, angustiaque præcordiorum maximæ, phlogoses, pressio circa scrobiculum cordis, spirationis difficultas asthma, palpitatio cordis, capitis torpor, vertigo, vigiliæ involuntariæ, angores, alvi obstructio &c. comites junguntur: hic turbatus, turbationes aliis partibus, iisque remotissimis, etiam externis communicat, & periculosas sanguinis stagnationes, & perversas humorum ad alias translationes & spasticas commotiones infert. Si diutius hæc passio durat, tonus penitus harum partium dejicitur, vix aut nunquam ex asse sanandus & reparandus; hinc malum hypochondriacum, perpetuum malum remanet, in quo ma-

xime & præ aliis colon patitur. Speciatim adhuc dicendum est: Ejusmodi vitium, in inediam diu perpeffis, ab abusu narcoticorum, a crasso, viscido, lento humore, qualis est pituita vitrea, tunicis intestini adhærescente &c. sæpe notatur, quod si spasmi, inferiorem maxime coli partem constringunt, vel per consensum quoque e constrictis remotioribus partibus usque propagantur, facile alvi contumax adstrictio molestat. Etiam si sensibile admodum colon sit & ad motum facile; attamen his consideratis etiam sensus obtusus aut penitus amissus interdum occurrit, siquidem atonia penitus depravatur, imo paralyti pessime vitiatur, ex quo excrementorum dejectio, vix ac ne vix quidem procedit.

§. XV. In robustis maxime & validis Coli membranis nerveo musculosis, easque perreptantibus vasis satis capacibus ac amplis, facile jugis circulatio humorum per has partes turbari, & impediri, hæere atque stagnare, ob difficilem ad venam splenicam nimis remotam ascensum, sanguis potest, ex quo sanguinis lentiori motu & stasi, in imo præsertim ventre, multa eaque gravia pathemata, spasmi atque dolores exsurgunt; mensium ac hæmorrhoidum difficile negotium, vomitus cruentus, qui apertis ventriculi vasis brevibus ex coli nimirum nimia strictura sanguine cum impetu adacto rursus provenit, communissima mala sunt. Ad hoc vitium facit plethora: nam quando auctus præter modum sanguis, per imi ventris viscera, ac præsertim per vasa venosa hepatis non liberum circuitum invenit, simulque ex arteria mesaraica inferiori, novus ad intestinum colon atque rectum fertur, regreditur atque regurgitat per venam portæ, partesque alias, quibus cum hæc communicatio intercedit, molestat; Congeritur autem tunc maxime sanguis in vasis Coli, ex nervosis sensibilissimis crassis tunicis compositi, maximeque ab hac causa illud molestat.

§. XVI. Cum plures internas partes ac viscera alluat, atque cum iisdem connectatur, ob vicinitatem atque consensum præter modo adducta, non raro in malorum communionem atque societatem, ut alia etiam remota longe quandoque loca trahit, ita ab aliis trahitur Colon. Jam non plura verba amplius de consensu per nervos faciamus, quia alibi modo hoc passim factum est, sed hoc loco saltem præ aliis commemorabimus, quod facile ex vicinæ partis alicujus præter naturam tumentis, comprimatur. Singulare rarumque est, huc etiam hac occasione trahendum, quod monet Adrianus Spigelius, senibus quandoque costas spurias incurvescere, easque Colon intestinum pungere, adeo, ut inflammatio & mors insequatur. Porro hic hoc modo non indictum

relin-

relinquam, esse Colon flatu distentum & prætumidum, non raro causam calculorum nascendorum, & ex concretis iis doloris renalis & fuscitati & aucti, si nempe ren ab illo (Colo) communi membrana annexus premitur, sicque liber sanguinis ibi circuitus, cum debita secretione urinæ, nec non illius defluxione, in vasa urinaria ipsamque vesicam, inhibetur, ex quo calculus generatur atque dein a generatis male affectus, & grandioribus & asperioribus calculis est refertus, colon sic tumidum renem ejusdem lateris & sæpe majorem in molem extensum ejusque vascula sanguifera premit, ut difficilior fiat per vasa emulgentia sanguinis motus & quæ ab hoc dependet, urinæ excretio & atterit, calculosque ibi detentos commovet, sicque dolorem immanem infert. Hinc etiam est, quod, qui calculi renalis doloribus obnoxii sunt, eos illico acerbe persentiant, quando assumerint flatulenta. In superioribus annotatum est, renem sinistrum, præ altero atque Colon arctius inter se connecti, quod in hac regione, multas gyrationes obtinet. Hinc animadvertitur ab iis, qui rem accurate considerant, quod ren sinister, præ dextro frequentius calculos in se gignat & contineat, exulcerationibus exedatur & doloribus contorqueatur. Commonstravit hoc antea jam cum Dodonæo, CAROLVS PISO *Lib. de morb. ex serosa colluv. oriund. p. 249.* Rursus, in nephritide Colon in consensum tractum esse, in praxi experimur, quod sic irritatum flatus & tormina ordinario suboriantur, & suborta dolores quoque nephriticos augeant. Quia gyrationes Coli multæ per abdomen in cavitatem producuntur & extremitates imi ventris sic occupant, a ruptura in hernia, æque facile illud aut quædam ejusdem portio ac ileon intestinum, descendere elabique potest, ubi constrictiones molestissimas patitur: edocent hoc observationes CORN. STALPART. VANDER WIEL *Lib. IV.* & NYCKII *Cap. X. Adenograph.* per herniam apertam multa quoque excrementa excreta fuisse. Æque frequenter Colon ventriculum per eandem causam afficit, ut quandoque ventriculus colon. Hinc experiuntur lautius cœnati, mane in lecto diutius decumbentes, præsertim supinum corporis situm amantes, quod nausea & cardialgia, imo quandoque vertigine syncope, ac vomitu molestantur, surgentes vero illico ab illis molestiis liberentur, ex illo, quod talia excrementa in decubitu, in coli superiori parte retenta fuerint, ventriculum quoque ob viciniam & connexionem coli afficiant atque irritent, insurgentibus vero e lecto, mox descendant simulque has molestias auferant. Eodem modo pluries diaphragma gravatur ac premitur, quando flatibus & sanguine turget nimio colon, de quo observationem re-

tulit Præses, de viro 36. annorum summe plethorico ac cui difficile hæmorrhoidum negotium, magnas creavit molestias: is nimirum per duos annos subinde, quando præsertim motu se aut vino exagitabat, de pressione labore plena, in sinistro dorsi latere quintam inter sextamque costam cum phlogosis, anxietatibus circa præcordia, difficili respiratione ac anhelatione, dolore capitis gravativo, oculorum rubore & intumescencia, sensuum stupore, vertigine conquestus, ex medicamentis à medico suo, qui vitium in pulmonibus residere audacter semper affirmavit, nullo respectu de reliquis accidentibus habito, præscriptis resolventibus calidioribus ex spermate ceti, cinnabari, sale volatili CC. ess. succini fassafrata, liquore CC. succinato & similibus, nullum huc usque levamen sentiit. In consilium vocatus Præses circumstantiis omnibus rite pensitatis, Colon juxta renem sinistrum, sedem morbi esse indicavit, congestionesque sanguinis in his, hæmorrhoidesque non debite fluentes inculcavit & nihil prius habuit, quam venæ sectionem in pede ordinare, ex qua sola mox auxilium reportavit, quamvis post hanc pulveres præcipitantes & nitrati cum aliquot cinnabaris granis, nec non laxantes ex cremore tartari &c. non omissi fuerint.

§. XVII. Adhuc plures, præter nominatos profecto morbi iique gravissimi sunt, qui ex hac officina promanant. Mox se offerunt diarrhoeæ atque dysenteriae quæ exinde tanquam ex sua profluunt sede, quæque frequenter excrescentias verrucosas atque cristosas ibi relinquunt. Etenim hic non possum non falsam practicorum quorundam distinctionem notare, qua in dysenteria ex doloribus superiorem abdominis partem afficientibus, gracilia intestina laborare, & inferiorem excruciantibus, crassa exerceri temere affirmant, quoniam colon sæpe solum afflictum, quod assurgens descendensque per abdominis cavitatem, & circumvolutionibus suis, tenuia fere omnia intestina circumire solet, eos sæpissime fallit. Juxta hos dolores non omittendi videntur dolores arthritici & podagrici, qui hic ut plurimum fabricantur. Hinc iidem vel solo laxante, vel emetico felicissime aut præcaventur, aut sæpe numero curantur. Imo affectuum capitis quam plurimorum, vertiginis rotatoria, cephalalgia immanis, atque adeo ipsorum, in quibus mens errat, ut melancholia, mania, incunabula hic posita sunt: quo notamus in maniacorum cadaveribus etiam vasa mesaraica præsertim circa colon inflata, turgida sanguine crasso referta juxta lienem præter naturam infarctum, hepar induratum atque obstructum ordinario fere inveniri. Non a vero aberrare me confido, si dixerim, apoplexiam quandoque exinde proficisci

ficisci: Multo enim usu confirmatum est, levamen, alvum a natura auxiliatrice solutam, ac clysteres excitantes & repurgantes optimam opem in hoc morborum genere, afferre. Præterea nemo non scit, quantum laborem hæmorrhoidum & in foeminis mensium difficile negotium pariat, quod quidem facilitant pilulæ, ex aloeticis paratæ, quæ viscosis ac resinosis tenacibus suis particulis, Coli & recti intestinorum tunicis firmius inhærendo, non solum affluxum sanguinis, sed & ejus effluxum facilitant atque proritant. De his vel illis morbis, nemini longius scrupulum movebimus, an in cavitate an inter tunicas Coli lateant morbificæ causæ: Quibusdam enim haud credibile cum SENNERTO Vid. *Lib. III. P. II. S. II. cap. II.* est, v. gr. dolorem a quo perforari quasi intestina videntur, excitari tantum a vitrea pituita, in cavitate intestini adhærente, sed potius intra tunicas ejus continente asserunt, quæ etiam AVICENNÆ sententia fuit vid. *med. pract. tract. III. c. XII.* flatus in tunicis intestini vagari statuentis. Multo minus in vanum disputabimus, an Colon æque secundum dextram ac sinistram partem ægre afficiatur, quod multi cum GALENO vid. *Vide loc. affect. C. II.* citra rationem quidem negant.

§. XVIII. Hoc per assiduas observationes quoque constat, simulque per assertionem alibi nempe §. V. allatam, esse intestina, præsertim, colon, ad excipiendas superfluitates ex omnibus corporis regionibus, admodum proportionata atque dicata, per & in quibus natura & cum morbi inchoant erumpuntque, & cum salubritatis tempore ac statu eas transmittit ac relegat, arthritidem fixam podagram, erysipelas, scabiem, aliasque secretiones & excretiones retro pulsas, præsertim in Colon retrocedere, ibidemque varie suam tyrannidem exercere. Monstrant hoc haud indubie flatus atque dolores immanes colicæ descendentes in infimo ventre, ascendentesque mox a retrocessione materiæ peccantis excruciantes, quæ spastica pathemata atque dolores, deinceps ad alias etiam partes, ventriculum & diaphragma, pulmones, imo cerebrum usque ipsum &c. progrediuntur, & singultus, spasmos ventriculi, asthma, inflammationes, febres nec non raro deliria inferunt. Sectiones quoque cadaverum detegunt, ex hoc genere morborum demortuis, inflammationem, gangrænam & sphacelum primum in hoc intestino ut plurimum latuisse atque ibi incepisse. Perinde id se habet, quando violentum quoddam purgans, sæpe non tantum fæces alvi, vel contenta intestinorum omnia sed & eadem venarum mesaraicarum venarumque contingentium foras ciet.

§. XIX. Ex his modo de Colo ejusque præsertim structura, situ connexione, usu, & functione materialium inhæsiōe atque ad tam multos hinc morbos propensione &c. præfatis, proclive est intellectu, e re esse, collectas detentasque sordes certissime noxam inferentes, mature per diluentia eaque tepida magis, ut ptisana & id genus, laxantia & clysteres, in quibus pharmacia ejus & magnum emolumentum præcipue consistit, tempestive repurgare, quoniam Colon intestinum, præcipuam excernendorum materiam in sinibus suis continens, proxime cum recto eluitur, eaque per corrigentia, temperantia, absorbentia & præsertim salia deterfiva v. gr. arcan. duplic. terra foliat. tartari, tartaro tartarifato, tartaro vitriolato, sal. ephoniense, item per amara medicamenta, cum temperatis gummatibus & resinis mixta, rhabarbarina, succinata, myrrhata, aloëtica, & præparatas exinde essentias absinthii, cent. min. ess. gummi ammoniaci &c. invertere atque ad excretionem præparare, viamque sternere, per quam facilius excerni queant. Hunc ordinem servando, ut deterfiva præmittantur, clysteres sequantur, & purgantia demum per os assumenda addantur, siquidem clysteres minorem exagitationem in corpore edunt, intestina præparant atque disponunt, ut facilius purgantia effectum suum perficere possint. Quod præsertim, ubi flatus intestina percurrant atque molestant observandum; ubi enim hi valde peccant, purgationi obstaculo sunt. Hoc speciatim in colica flatulenta videmus, purgantia improvide adhibita, vix laxam reddere alvum, sed potius magnas distentiones, laniationes doloresque excitare, quare per enemata emollientia & resolventia flatus prius expellendi sunt alvusque solvenda, quam purgantia sic præpostere præscribenda. Æque imprudenter faciunt illi, qui, in alvi obstructione a fecibus induratis, purgantia sine præmissis ejusmodi clysteribus suadent, qui difficilia ad exitum excernenda, facilia reddunt. Hunc ordinem, hancque cautelam jam HIPPOCRATES præscripsit *aph. LXX. Sect. VII.* qui alvum humectandam, antequam pharmacum deorsum purgans exhibeatur, præcipit. C. CELSVS prudens non minus quam eruditus pariter *L. III. c. XXVIII.* in omnibus morbis perpetuum id observandum monet. Hoc scopo, certissima emolumenta laudabiliter, tam in præcavendis quam curandis multis morbis, sublati sic gravioribus ægrotandi causis, impredientibusque præscisis, collocare possunt medentes. Certo in hanc rem, argumento est, quod a pluribus morbis liberi maneant, in quibus alvus est laxa & dejectio facilis. Juxta positive laxantia ea assumpta, quæ moderatos flatus cum emolliatione alvi efficiunt, qua-

qualia mellita, panes dulces, (*Pfefferkuchen*) serum lactis caprini & similia admodum conducibilia esse reor, quoniam flatus per omnes intestinorum tractus oberrant motuque suo ex latebris intestinorum, materiam peccantem educunt aut ad minimum, educibilem reddunt. Quo & via nobis jam est expedita, alterum quod habemus institutum ulterius & explicatius paulo pertractandi. Etenim clysteres certe in quocunque propemodum morborum genere, si debitæ cautelæ, ratione materiæ, adhibendi modi, quantitatis, temporis & retinendi moræ &c. observantur, conducibilia remedia sunt, quæ alvo clausa atque fluente & tam in laxando & repurgando, quam humectando, abstergendo, discutendo, refrigerando, calefaciendo, stimulando, emolliendo, constipando, confortando, revellendo & derivando eximiam utilitatem ac effectus, eosque subito, exerunt. Sunt ergo tot enematum genera, quot corporis humani & speciatim intestinorum vitia. Præterea & hæc laudabilis eorum indoles est, quod sine aliorum humorum turbatione, sineque omni, quam vulgus timet, virium dejectione, operentur. Hoc quoque emolumentum ab iisdem procedit, quod reliquorum medicamentorum usum adjuvent promoveantque atque mala revera sanent non pallient. Ad hæc quadrant enemata omni tempore, & loco, omnis ætatis, sexus, corporis habitus temperamenti hominibus, debilibus pariter ac firmis, ut videre est apud JOH. WALAEVM *method. med. p. m. 52.* & MORELLVM *method. præscrib. form. remed. L. II. S. II. c. XIV. p. m. 245. seq.* AVICENNA *VIII. tr. V. n.* scriptum reliquit, solutionem ventris per clysteres, omni die, semel aut bis a phlebotomia excusare. Et si non ubique per se, certe tamen per accidens opitulantur. Quemadmodum enim hujus intestini singularis sensilitas, cum partibus aliis connexio & vicinitas, ejusque consensus per nervos maxime, multis morbis ansam dant atque occasionem; ita etiam hæ circumstantiæ multorum morborum proximam curationem perficiendam innuunt: Siquidem non modo clysteres, ubi vitium in solis intestinis crassis hæret, (quoniam ad jejunum intestinum valvula impediante, nullatenus pervenire possunt, nisi per vim adigas, qua fortassis etiam ad illud penetrarent) cum emolumento adhibentur, & necessarii sunt, ubi crebris evacuationibus opus est, ubi copiosa materia crassa pituitosa cellulis est impacta, quæ purgantibus vix cedit, & ubi occlusæ viæ, quæ purgantia per os assumpta non admittunt nec transmittunt, vel ubi fæces exsiccata nimis vel flatibus distenta, vel a vermibus arrosa intestina sunt &c. sed & in aliis bene multis admodum proficui deprehenduntur. Ad hoc &
viam

viam ex reliquis intestinis excrementis expeditam reddunt prætereaque efficiunt, ne medicamenta in intestinis hæreant operenturque per avulsionem ut BACO DE VERVLAMIO in *Hist. Nat. Cent. I. p. 771.* loquitur, Abo Ali Arabs, enemata, utilissimam omnium medicinam, & superfluas & noxias humiditates quasvis ex toto corpore educentem esse, dixit. HERODOTVS narrat *Lib. II. in Euterpe* Ægyptios fuisse maxime omnium hominum sanos, propterea, quod singulo mense per tres dies portionibus vomitoriis & clysteribus, uterentur. Notabile in hanc rem est Hippocratem, in curatione morborum passim vix aliud remedii genus, præter clysteres & glandes offerre. Nec minus GALENVS, uti colligere est *L. II. phar. loc. cap. X.* tam ex Archigenis, quam propria mente, summopere, pro vario scopo, clysteres laudat. Tantam esse quandoque eorum necessitatem, ut absque illis vivere quasi impossibile sit exemplis quibusdam probat MAR. GERBEZIVS in *intricat. extricat. med. p. 32.* Licet etiam autosophus Helmontius eos medicamen absurdissimum, vilissimum & turpissimum nominando, rejiciat, multique hodie medici non modo flocci faciant, sed & contemnant, imo damnent. Per experientiam certe haustum habemus, calore intestinorum adjutos & liquefactos suas etiam undique fundere vires. Atque sic vario modo disitis partibus, & in ipsis capitis affectibus fere omnibus, ut cephalalgia, hemi-crania phrenitide, paraphrenitide, imo in graviore contusione ejus, clysteres alterantes ex herbis, floribus & feminibus cephalicis & nervinis roborantibus, antispasmodicis parati, magnam utilitatem conciliare possunt. Præsertim, subtracta nimirum ex intestinis materia peccante, ferum per glandulas intestinorum, liberius profluere potest, & quod alibi hærebat, rodebat, aliaque ratione molestabat, divellitur & excernitur. Inhæret etiam quandoque impacta acris materia firmiter intestinis, præsertim colo, ejusque cellulis, tanquam spina pungens ac irritans, disitosque etiam dolores inferens, quæ vix alio medio quam per clyisma injectum, elui removerique potest. In apoplexia profecto eaque fortissima, ex clysteribus acrioribus injectis, certissima restitutionis fiducia reddit, atque adeo iidem valde acres, ipsam cataphoram, cum reliquis soporosis affectibus tollunt. Nam irritatione sensibili sic facta in intestinorum tunicis, per nervos, motu spirituum animalium suscitato & revocato, motus eorum ulterius continuatur, & ad cerebrum usque propagatur, ut ad pristinos motus pristinaque officia prompte redeant. In lippitudine & ophthalmia, clysmata utilissima & necessaria remedia esse, probat F. DECKERS *Exercit. med. pract. circa med. meth. p. 404.*

§. XX. Nec dubium per consequens est, quoniam ut in antecedentibus est indicatum, cum pectore ut & cum capite atque externis quoque corporis partibus, arcto gaudet Colon consensu, quin & in colli, gulæ & pectoris morbis adiutorio sint, ut in asthma, catarrho suffocativo, anxietatibus præcordialibus, palpitatione cordis, lipothymia, pleuritide, peripneumonia, angina, syncope, &c. ex aromaticis stimulantibus & temperantibus adornati clysteres. In quodam pectoris vulnere quondam enematum, ex resolventibus & carminativis paratorum, summam efficaciam, in sanguine extravasato & grumefacto resolvendo, & educendo, deprehendi. Hic & liceat, quandam historiam medicam, in gratiam argumenti notare, quæ mihi non ita pridem observanda contigit. Scilicet novellus quidam medicus practicus, foeminam quandam XXXII. circiter annorum, anxietatibus præcordiorum & respiratione laboriosa, mensium obstructione per aliquot saltem septimanas conquestam, pellentibus calidis emmenagogis curandam suscepit, ex quo indies pejus se habuit, respiratione difficili & anxietatibus auctis. In consilium vocatus, de emunctoriis præ omnibus corporis, primum sciscitatus sum, an aperta illa fuerint nec ne, foemina autem affirmavit, se jam per VI. dies alvum non deposuisse, qua de re vero, prior medicus parum sollicitus erat. Præscriptum ipsi statim est clyisma emolliens, ex quo scybala compacta & dura admodum reddita sunt, & ægra mox pristinae sanitati restituta. In faucium apostemate pariter, ex salivatione inducto clyisma laxans, quod nimirum saliva acris aliorum derivata, iterata vice injectum, admodum proficuum est deprehensum. Eorum (clysterum) insuper gravitas, intestina premens, etiam impedit, quo minus ita facile viscera cum diaphragmate sursum attollantur, hinc que respiratio impediatur & anxietates augeantur. In plurimis pectoris morbis, & quibus nempe respiratio laborat, hac cautela utendum, ut clysteres in pauca quantitate injiciantur, ne Colon nimis extendatur, & respiratio nimium impediatur.

§. XXI. Multo minus, hinc nemini scrupulus quidam remanebit clysmata ventriculo, & intestinis continuis atque contiguis tenuibus, maxime nervosis, ac cum reliquis corporis partibus exquisitum sensum alentibus, (quæ Colon ut amplissimum crassorum cingit, iisdemque undique circumvolvitur) nec non vicinis visceribus, in abdomine, illorumque vitiis subvenire. MOEBIUS *in fundam. Med. phys. cap. XI. p. 105.* memorat, matronam Nobilem anorexia contumaci per aliquot annos laborantem, tandemque pene consumtam, remediis repurgativis exhibitis,

Ee ee

muco-

mucosam substantiam copiosam, cum numerosa vermium prole, per aliquot dies excrevisse, atque ex eo integre convaluisset. In inflammatione ventriculi, clysmata emollientia, refrigerantia & lenientia quotidie injicere jubet RIVERIUS *Prax. med. Lib. IX.* Porro singultus, diarrhoeæ, dysenteriae, tenesmi, mensium obstructionis, dolorum a calculo renum (ob situm ac nexum) quam vesicæ, item dysuriæ, ischuriæ, stranguriæ, clysmata emollientia, anodyna & traumatica egregia & certissima remedia sunt; hac tamen cautela observata, ut diutius retineantur quo spasmos laxent & flatibus sic exitum parent, certiores ac faciliorem. Similiter passionibus hysterice egregie subveniunt, facilem partum procurant. In colicæ acerbissimo dolore, clyσμα ex oleo rutaceo præsentissimæ efficaciae est. Recte hinc ARETAEVS L. I. p. 180. præcipit: *Medellam inferioribus partibus adhibendum negligere non oportet, viris quidem in anum, oleum rutaceum, mulieribus in uterum infundendum est.* Sic SCHELHAMMERVS *de natura* p. 279. recenset, se, in hydropico dolorem circa umbilicum perpetuum ac sævum observasse, ut tandem eum pene conficeret, eumque nihil remediorum admisisse, sed cuncta eorum externa & interna respuisse, atque ab omnibus exacerbatum fuisse, ipsis etiam emplastris, epithematibus, purgantibus, acidis, salinis carminativis, solis autem clysteribus mitigatum malum. In renum & vesicæ affectibus, clysteres plurimum prodesse AVICENNA docuit, vid. *Fen. IV. l. c. XVII.* Affirmat idem FR. VALLERIOLA *observ. med. Lib. III.* & HELMONTIUS *Lib. de Lithiasi Cap. VII. p. 45.* Præterea si & alvus sic laxa, lubrica & temperata fuerit, vix generantur flatus, a fæcum subsistentium calidorum quantitate, subtracta. Sic & enematis, aqua benedicta Rulandi addita, ut fortius stimulent, quandoque vomitum excitavit, ac terebinthina admixta, urinam violaceo odore imprægnavit. Nec dubium est, quin ipsi sanguini ac lymphæ se insinuet tandem, eorum medicata virtus. Clysmata stupefacientia ex narcoticis parata, totum corpus stupefactum relinquunt. Experimentum in Actis Angl. legitur, quod hoc facit testatum, spiritum vini per clyσμα injectum longe magis, quam ore haustum, inebriare. De aliis corporis ægritudinibus unum saltem addamus malum Ishiadicum, de quo JOH. DE BEVERWICK *im Schatz der Ungesundheit*, meminit, quod clysteres ex centauro minori parati, humores nocentes evocando doloresque mitigando, egregii sint.

§. XXII. Pari utilitate hoc medicaminum genus, se commendat etiam, si vitia tota corrumpunt corpora, ex quorum ordine frequentissimæ febres sunt, eaque multis difficultatibus & dubiis intricata, ac generi homi-

hominum inimicissima & impetuosissima mala, quæque æque ac accidentia sua, maxime spasms debentur. Circa quæ notabile est, ubi inguina laborant, ac viscera, præsertim intestina gravis dolor fatigat, venter in tumorem attollitur, flatibusque distenditur, nec hi emittuntur, simulque nervorum distentio oritur, promptissimum delirium insequi, remque periculi plenam esse. Contra quas (febres) licet Martianus vehementer illud improbet, easdemque omnis generis, imprimis intermittentes tam laxantes & emollientes ordinarii magis quam specifici clysteres antifebriles ex cortice præsertim Peruviano, felici subsequente successu parantur. Nemo præterea non, etiam novit, quantam quotidie opem, laxantia deterfiva salina &c. leniter singula intestina repurgando, tam pro præservatorio quam curatorio scopo adhibita, collocent. Optime monet GALENVS *ad Glauc. Lib. II.* in febribus intermittentibus maxime in quartanis, præ omnibus aliis, & statim in initio utendum clysteribus esse, deinde ad alia descendendum. Iis solis multos tertianarios liberatos esse, legas licet in ARGENTERII *Op. P. II. p. 141.* Pariter in praxi medica notissimum est, enematis emollientibus, aperta, alvo servata, in febribus ardentibus, egregie naturam vi pressam ac circumventam, levare. In ipsis malignis ac pestilentialibus, atque adeo exanthematicis, non raro clysteres iique tamen mitiores tutissime & ex utilitate admittuntur & præscribuntur. Sed de multis jam pauca & pleraque quam paucissimis notasse, hac vice hocque in passu sufficiat. Quantum igitur utilitatis in medicina clysteres collocant, tantum laudis Gallis præsertim debetur, quibus clysterum usus frequentissimus est. Atque hæc adduxisse hac vice sufficiant. Ad alia enim quæque præsertim in medica praxi minus attenduntur, ulterius & longius evagari, non libet. Ejusmodi est, quod nonnulli hodie adhuc, veterum placita sectantes, sedulæ observationi & æstimationi curiosæ commendant, Colon intestinum in dextero latere, ad ventriculum & lienem usque adscendere, ut per compendium viæ, atrabilaris humor evacuetur, eoque deferatur noxium, tanquam excrementum, multos morbos eosque difficilimos procreans, atque natura duce ac stimulo per secessum foras ejiciatur.

§. XXIII. Ubi tandem aut summe fastidientibus omne alimentum est odiosum, aut ubi totum corpus tabe consumitur, aut regia alimenterum via, quod in angina præsertim quandoque accidere solet, in faucibus præclusa est, nullaque ratione corpus nutriri & refici potest, omnisque spes est absumta, per hoc intestinum Colon & vita, nutritio

& virium restauratio conservantur, restituantur & continuantur. Quoniam enim, uti ex jam adductis iterum præsuppono hoc intestinum vasa quoque lactea, ut in cuniculis plura ac ordinario, ita & in hominibus non raro sat numerosa continet, per clysteres ex jure & succo & jure gallinæ expresso, lacte ovis, ptisana, melle, vino &c. paratos, nutrientes sæpius & in majori quantitate injectos diutiusque retentos ut & reficientes ex spirituosius confortantibus adornatos, hominis conservatio institui potest. Ut enim ratio sic non deest, ita etiam usus assertum confirmat. Et si testes quosdam hujus rei desideres JOH. DE MVRALTO vid. *Clavis med.* p. 382. & TH. CRAANEN modo sisto, qui, uti videre est in *Tr. de homine* multos hoc modo servavit. Conf. & *Histor. Reg. Parisina* atque JOH. LANGIVS in *Epist. med. Lib. I. p. 406.* De horum efficacia dubitantibus, difficilius adhuc creditu erit, quod tamen multi cum Zacuto Lusitano asserunt, cataplasmata ac emplastra nutrientia nec non balnea ex lacte parata, in emaciatis, heceticis & imbecilibus non prorsus vana esse, quam nutriendi rationem etiam HIPPOCRATEM jam stabilitam ivisse, apparet ex libro *de Alimento*, quando emplastra eundem in finem, instante potissimum abortus periculo, umbilico imponi jussit ac scripsit: Forinsecus alimentum ab extima superficie ad intima pervenit. Pari passu incedunt enemata corroborantia, ex medicamentis parata: si enim olfactus vires reficit, quod tamen toto die videmus, certe etiam ejusmodi clysteres vaporibus suis elevatis, multo magis corroborare ac reficere possunt. Hic commode memini, mihi quondam in paralyti linguæ in juvene, XXI. annorum plethorico, terrore præter modum affecto, clysmatum ejusmodi corroborantium injectionem, multum profecisse. Ad extremum, circa clysterum usum & injiciendi modum monendum venit, quod alias vix attenditur, ut nimirum æger in latus dextrum decumbat, posituramque corporis incurvatam fervet & instrumentum a chirurgo vel ministro versus dorsum flectatur, ne scilicet injectus liquor e colo ad intestinum rectum statim refluat ac urgeat sui expulsionem atque ne Coli intestini pars, sub liene in latere sinistro comprimatur, & ut injectio ideo altius penetrare possit. Alia adhuc possemus emolumenta, quæ per hoc ipsum intestinum, toti corpori redeunt, si ulterius evagari vellemus: Inter cujus rei exempla unicum saltem exemplum hic adhuc legatur: quod nempe colon præ aliis intestinis ob continuitatem illam, quæ cum peritonæo, cum musculis abdominis ejus parti externæ intercedit, ut per varias observationes constat, in vulneratione facta, cum communi cicatrice, cum exterioribus abdominis integumentis inter-

terdum coalescat, qua de re videatur Woyt in dem Unter-Richt von denen tödlichen Wunden p. 364. ubi & multæ observationes huc facientes ex variis Autoribus collegit.

SOLI DEO GLORIA.

XIII.

DISSERTATIO MEDICA

DE

MORBIS FREQVENTIORIBVS
ET GRAVIORIBVS PRO DIVER-
SITATE SEXVS.

PROOEMIUM.

UT in tota rerum universitate, in producendis rebus plures semper causæ concurrunt, earundemque infinitus datur progressus, dum hæc vel illa causa hunc vel illum infert effectum, qui postea alterius iterum causam constituit; sic etiam in gignendis humani corporis morbis, eadem conditio, idem modus ac ordo observatur: hi enim non ex iis duntaxat rebus, quæ ad vitam sustentandam continuandamque quotidie, imo omni momento, necessariae sunt, producuntur, quales sunt aër, cibus & potus; sed & ad morborum genesin juxta dispositionem ad eos pariterque prognosin formandam ac indicationes curatorias & præservatorias formandas, multæ subinde aliæ simul conferunt causæ, quamvis remotiores illæ sint ac mediatae, quales sunt temperamentum, habitus corporis, nativa atque connata hereditaria constitutio, consuetudo, quæ altera est natura, atque quodvis clima, quævis ætas, uterque sexus determinatus ille corporis modus a diversa conformatione & usu partium genitalium proficiscens, suos habet peculiares morbos, ac multi eorum frequentiores pariter ac graviores & periculosiores huic aut illi accidunt, facilius aut difficiliter mutantur in hoc vel

illo, corriguntur, tolluntur. Qua de re, primum, magnus ille Medicinæ Parens Hippocrates optime meritus est, qui ut scitissime explicavit, quibus vitiis sexus hominum expositus est, ita & præclare & utilissime exinde indicavit, quæ in curatione respicienda veniunt. De quibus & nos, ea qua hucusque licuit solertia, observationes quasdam conscripsimus, & ut speramus, non prorsus, inutiles. Accipe itaque eas B. L. æquo animo, & tibi penitus persuadeas velimus, nos nunquam defuturos, si quando rei medicæ magis prodesse poterimus. Deus T. O. M. benedicat conatibus nostris ex alto!

§. I. **I**Nter causas morborum internas juxta temperiem, corporis habitum, ætatem, &c. quasdam observationes etiam desiderat humani generis sexus, ceu complexus variarum affectionum, quæ potissimum generationi competunt, qui ut diversus, diversos non modo patitur morbos, qui organa maxime diversa, quæ unum ab altero distinguunt, afficiunt, & proprii audiunt, sed & communes utrique non eodem modo in utroque se habent, quemadmodum & alia sanitas est masculi, alia foemellæ; sed varii in altero frequentiores & graviores, curatu difficiliore, periculosiores atque funesti magis, in altero iidem minus tales observantur, & hos primarios jam videamus strictim.

§. II. Quantam virilis sexus præ altero habeat præstantiam, non solum ex Scriptura Sacra & Jure Consultorum scholis, sed & ipsa medicina abunde patet: Hæc enim status corporum naturalis & morborum sedula scrutatrix præcipue morbos & symptomata suggerit gravissima, siquidem sexum cum sexu hoc modo conferendo, in antecessum quasi ac in genere scire licet, mulierum genus præ virorum, non modo brevioris vitæ, in locis præsertim frigidis, sed & morbis plus esse expositum, adeo, ut duplo majores, Helmontii effato patiatur illud; atque Riverius plures quam sexcentos præter illos, quos cum virorum habet communes numeret verumque maneat effatum: mulier omnem morbum bis patitur; præsertim autem pituitosis, ferosis, lentis, diuturnioribus, chronicis frigidioribus sic dictis, necnon, omnis generis spasmodicis affectibus masculorum vero, acutis, continuis & biliosis magis morbis vexari, vehementioraque multa symptomata persentiscere, brevius tamen eos finire patet. Quo simul tamen innuere convenit: foeminas plures ad annum pervenire senium quam viros atque easdem licet torporem & marcorem corporis rugositatem, dentium lapsum, incessus labefactionem viris citius incurrant, tamen quoad interiora diutius vividam energiam
vitalem

vitalem conservare & non adeo sæpe ac viri morbo quodam acuto de repente enecante, apoplexia & simili, si catarrhum suffocativum excipias, perire, quæ res locum autoribus fecit, ut plures eorundem integris quoque voluminibus traderent. Singulos horum dein recensituri & ordinem quidem observaturi sine ordine, recte ab iis modo incipere corporum vitiis posse videmur, quæ totis inhærent corporibus. Ex horum ordine generi hominum inimicissimum eique frequentissimum febris est, adeo ut perspectum sit, bruta vix aut rarissime ea affici, atque quorundam literis consignatum, neminem facile nisi violenta morte enecatum sine ea, e vivis decessisse.

§. III. Rem ergo hanc, ab origine aggrediamur & a potiori sexu potior quoque fiat tractatio. Hic (ut evictum est,) febribus propemodum omnibus præcipue continuis acutis inprimis acutissime lædentibus & magnis, petechialibus (de quibus testatur FRACASTORIVS *de morb. Contag. Lib. II. cap. VI. p. 159.*) ut & purpura, (si puerperas inprimis hic excipias,) atque variolis & morbillis frequentius & gravius detinetur & perit sæpius. Novissime Exc. D. FR. HOFFMANNVS Vir de universa re medica supra quam dici potest meritis, in *Diff. de Variolis Epid. p. 12.* meminit, eas (variolas epidemice grassatas) in sexum potioreni vehementiam exercuisse majorem. Jam pridem Rhasis scribit: variolis puerorum corpora magis esse obnoxia, & Avicenna variolas puerorum pestem nominat; attamen foeminis juvenibus quandoque possunt esse periculosiores, ubi fluxus mensium intercurrit. Hoc & observationes ferunt, plures nempe foemellas inveniri, quæ eas reiterata etiam vice, patiuntur. Inprimis febres ardentes rarius periculose cedunt foeminis ob copiosiores nimirum partes serosas, quibus earum massa humorum scatet, qui & salino-sulphureas, acres, feroces diluunt, mitigant, compescunt. Similem HIPPOCR. *V. Epid. n. 24.* morbum ex venenata serositate oriundum, memorat viris magis periculosum. Historiæ morbor. Uratislav. grass. a Clarissimis Medicis Uratislaviensibus collectæ de febribus petechialibus, quæ bonam Uratislaviam, Silesiæ caput, Anno MDCXCIX. infestabant, loquuntur, eas frequentius in mares sanguineos & sanguineo-phlegmaticos, sævitiam suam exercuisse iisque graves ac infestas præsertim fuisse, qui vino, spiritu vini, se obruerunt, ac corpus cacochymicum, prava victus ratione, contraxerunt. Novissimum exemplum nobis præbent febres, quæ modo apud nos epidemice grassantur ex acutarum familia, hæ nimirum plures mares, paucissimas foeminas aggrediuntur ac jugulant. Ejusmodi febres cum morbis pectoris

ris epidemicis, quæ nempe pauciores viris mulieres corripunt describit LANCISIVS *Hist. R. epidem. p. 197.* Catarrhales vero & purpuratæ ut plurimum sexum sequiorem infestant, ut observationes per multas annorum series persuadent, quando hæ vernali autumnalique tempore ingruere solent. De his audiamus HIPPOCRATEM, *Epid. II. Sect. III. p. m. 697.* ita loquentem: *Fiebant in febris æstivis circa septimam, octavam ac nonam diem aspretudines in cute miliacæ, culicum morsibus maxime similes non valde pruriginosæ: hæ perseverabant usque ad judicationem. Nulli equidem masculo tales erupisse vidi, mulier autem nulla mortua est, cui hæ fiebant & gravi auditu præditæ & soporosæ erant; prius autem non valde soporosæ erant hæ; quibus illæ affuturæ essent, non tamen in totum durabant. Qui locus simul indicat, purpuram priscis jam notam cognitamque fuisse.* Hungaricis vero foeminas magis expositas esse, perhibet H. CONRING. *in Disp. de Febre Hungar. §. 22.* Hæctica teste RIVERO *Prax. Med. Lib. XVII. cap. III.* in foeminis facilius curatur, licet etiam cura sit palliativa, qua per longum tempus, vitam protrahunt, eadem. Non intermittamus quoque hic intermittentes commemorare, atque simul annotare, omnes omnis generis fere inprimis vero tertianas parcere magis foemellis, quartanas tamen fere maribus. Febrem quotidianam familiarem foeminis magis esse quam masculis IOH. HIERONYM. PVLVERINVS *in med. pract. p. 81.* scribit. Non alibi saltem, sed & apud nos per multas hucusque annorum series Præsidi observare datum est, quando febres intermittentes vere & autumnæ epidemicæ extiterunt, paucas foeminas corripuisse, affectas tamen, tardius eas, reliquisse. Semitertiana viros frequentius premi quam mulieres ex ADRIANO SPIGELIO *Lib. II. cap. X. p. 57. de febre semitert.* accepimus; verum nos observavimus, quintanas, sextanas, septimanas atque adeo menstruas, mulieres præsertim scorbuticas quandoque passas fuisse.

§. IV. Si ad alia quoque ejusmodi progrediamur atque juste perpendamus, invenimus sexum sequiorem omne propemodum contagium, omnesque morbos contagiosos, putridos &c. ut & horum principem pestem, quod & de ultima Lipsiensi peste cives nostri referunt, frequentius aggredi, atque prostant observationes, pestem nonnunquam mulieres solas, imo quandoque nitidissimas & formosissimas earum invasisse, de qua re vid. ROLFINC. *O. & M. Med. Spec. Lib. II. Sect. III. Cap. XXXVI.* In nupera peste Massiliensi, in Gallia Anno 1720. miserandum in modum grassata, ut referebant *novellæ gallicæ conscriptæ Lugdunenses Batav.* plures etiam foeminas & infantes quam viros e medio tulisse, de

de quo & conferendus Clarissimus & diligentissimus Dn. D. I. KANOLD *epist. med. conscripta de peste Massiliensi*. Contrarium invenitur in *Chronico Anglico Stow Annal. p. 681.* quod nempe pestis Oxoniensis anno 1579. neque foeminas neque infantes necaverit. Nil attinet jam, ut ad examinandum illud momentum afferamus, quod habetur, foeminam maxime si infecta sit peste & sanos aspiciat, oculis eos facile quoque inficere posse, quod contagium ex oculis mulieris ejusmodi laborantis emanans tantam habere vim stolide ridiculeque satis adducit COLERVS in *Oecon. rur. & dom. P. II. Lib. III. cap. XVII.* adeo ut, si lunam adspiciat, & sani etiam postea eam, eosdem quoque peste corripere, conf. WOLFF. *Scrut. amul. Cap. II. Sect. I.* Circa febres hoc adhuc in genere observatur, & jam notatum legitur in HIPPOCR. *de Virg. m.* in mulieribus has cum majori anxietate, horrore, lumborum dolore junctas esse atque labore plenas.

§. V. De lue venerea & ejus contagio varia apud autores lectio prostat. Sequiorem sexum eam facilius afficere scribit LOMMIVS *p. 69.* ROS. LENTILIVS vero contrarium perhibet, vid. *Miscell. Med. pract. P. II. p. 570.* alii adhuc volunt, hoc contagium non adeo diu inhærere iis, quam si in masculum se recepisset corpus. Nobis, quoniam nondum liquido satis constat, cujusnam experientiae subscribendum sit, in medio adhuc relictum volumus potius, quam modo aliquid de hac re affirmare. Verum quod curam attinet, nobis quoque haud ignotum est, si abominabili illo malo, foeminarum corpora contaminata fuerint, celerius per ea ut laxa magis, tam per sudores quam per salivationem venereum illud venenum mitigari dispelli atque expelli. Scriptum reliquerunt SENNERTVS *3. Med. pract. V. 2. C. V.* & HARTM. *Prax. Chymiatr. p. 213.* mulieres scorbutum ad annos 15. vel 20. mares non ultra 7. 8. aut 10. ferre, quod tamen, si experientiam consulamus, vix firmum esse comperimus, arguit quidem hoc quoque V. A. MOLLENBROCCIVS *de varis Cap. VII. p. 86.* ubi simul consentit per experientiam convictus, mulieres scorbutum minus obnoxias esse. Ast si rem & causas ejus penitus intueamur, ut par est, rationes expendamus, & experientiam consulamus, affirmare auderemus, foeminas steriles maxime & quibus menses & lochia fluxerunt parcius, magis esse obnoxias scorbutum, maxime in dentibus se exerenti, atque opinaremur difficile in iis etiam esse eum superabilem. Phthiriasi foeminas potius confœdari pro comperto habetur. P. FORESTVS *Observ. de Tumor.* testatim reliquit: foeminas minus apprehendi lepra.

§. VI. Amplius observamus de aliis, masculos frequentius ad sudores p. n. & colliquativos graviores, per quos spirituum animalium copia dissipatur, disponi, sed foeminas lymphæ vitiis aliisque morboris feri excretionibus, catarrhis, rheumatismis, in variis corporis partibus, coryzæ &c. magis esse obnoxias. Perraro tamen malo ischiadico eas correptas videbis. Observamus item magis plethoram, cacochymiam & cachexiam tandem, in suis corporibus generare ac alere atque ad majores & frequentiores languores, si segnioris sunt naturæ, ad spasmos & nervorum distensiones, si activioris paulo sunt, magis esse pronas; a quibus tamen crebrius liberantur, teste ARETÆO *de morb. acut. sign. & caus. Lib. I. cap. VI.* atque ad majores & frequentiores animalium spirituum, motuum perturbationes & ataxias magis ferri. Atrophia plures mares laborant, pauciores foeminæ; illi & præ his pruritus & speciatim universali magis, particulari magis, hæ subjectæ sunt. Ast has sæpius æstuationes volaticæ, horrores & horripilationes, infrigidationes invadunt. De his eorumque invadendi modo loquitur Aphorismus HIPPOCRATIS 59. *Lib. V.* *Rigores incipiunt mulieribus maxime ex lumbis & per dorsum ad caput; viris autem parte postica potius quam antica corporis, ut cubitis & femoribus: argumento est cutis raritas, quam pili ostendunt.* Non possumus non demum adducere, foetores tam totius corporis, quam alarum & pedum, sexum sequiorem magis contaminare, adeo, ut etiam vulgare jactetur proverbium: anus hircissans, tam male ut Thais olet. An propter libidinem ejusmodi accidant, problematice proponit AMMANVS *in Medic. Crit. p. m. 600.*

§. VII. Liceat hoc huc quoque referre, quod notatum legimus in FIDELIS *Relat. Med. Lib. II. Sect. 2. cap. V. p. 224.* viros omnium frequentissime maleficiis & fascinationibus esse expositos, ut mulieres dæmonum obsessionibus oppressionebus, dolis atque fallaciis & spectris terreri frequentius, & exinde sentire plura mala, quæ exinde inferuntur, quæ modo morbis aliis ex aliis causis naturalibus oriundis sese immiscent sæpe numero, ut mensium obstructioni, melancholiæ &c. Sic enim de his loquitur HIPPOCR. *de Virgm. Virgines & steriles circa instans mensium tempus, imprimis demones sibi infestos esse existimant, adeo ut desipiant, & multæ exinde strangulentur, quia animi demissi sint & passillanimes.* Equidem apud R. A CASTRO quoque relatum est *Med. polit. Libr. IV. cap. I. p. 206.* fascinationis periculum pueris ac pulchrioribus foeminis maxime imminere. Confer, ROZACK *Tr. de sale p. 159.*

§. VIII.

§. VIII. Singularum modo partium corporis vitia proponenda, ut expendere liceat, quæ ex his quoque viris magis timenda sint, quæque magis foeminis. Dolores five a violenta distensione five rosione &c. membranarum derivandos, tenera maxime foeminarum corpora frequentius & sensibilius, virorum vehementius vere maxime autem in articulis percipiunt. Vix ulla vero humani corporis pars, æque doloribus patet ac caput, quod secundum HIPPOCRATEM ut habet in *Epist. ad Demetrium Reg.* radix est humanorum morborum & ex quo maximè morbi hominibus accidunt; facile enim hæc nobilissima pars propriæ constitutionis occasione causas doloris & aliorum incommodorum & ex se & ex aliis, præ aliis vero ex abdominis visceribus gignit & admittit in sese, & aliis quoque communicat, atque hic ipse est, cui foeminæ imprimis illæ, quibus non recte feruntur menstrua, magis maxime ille, qui e distensione procedit, obnoxia sunt pertinacissimeque ab illo affliguntur. Hoc præter quotidianam experientiam cum Coelio Aureliano gravissimo scriptore SENNERTVS affirmat *Prax. Lib. I. Part. I. cap. III. p. 747.* In specie dicendum est inter cephalalgia species sæpius graviusque foeminas præ viris eam, quæ hemicrania, atque eam quoque, quæ cephalalgia iliaco-hæmatitica hodie audit ex intestinis adscendens caputque occupat, atque ea quæ clavus capitis vocatur, exercere, atque hos affectus hysterice maxime esse familiares, hunc imprimis, unde & clavus hystericus audit vulgo. Idem de vertigine imò ipsa catalepsi cum ecstasy vid. COEL. AVREL. *de acut. morb. Lib. II. cap. X.* BORELL. *Cap. XI. hist. 54.* MARCVS MARCI in *Philosoph. restit. p. 397.* dicendum est. In viris si adest multa magnaque ut plurimum symptomata protrudere solet. Affectus item soporosi & imprimis lethargus foeminas premunt frequentius; nihilominus tamen inter hos mares truculentissimum atque acutissimum frequentius obtinent malum, quod apoplexia est, hæc enim rarissime mulieres corripit, si quando autem corripit, eas sæpius invenies, quibus a partu minus lochia fluxerunt. Verum vero & hoc habetur, foeminas si ea laborent, difficilius viris curari, testatur hoc iterum COEL. AVRELIANVS l. c. *Lib. III. cap. V. p. 200.* Ast paraplexia foeminas afficit frequentius. Idem *de acut. morb. Lib. II. cap. X. §. 66.* Catalepsin irruere magis foeminis scriptum reliquit.

§. IX. Proxima modo videatur observatio, per quam nobis prope modum constat, ut CELSO vide *Lib. III. cap. XXIII.* jam constitit, epilepsia & motibus convulsivis virilem magis esse obnoxium, nisi puerperas forte velis excipere, quibus lochia sunt suppressa, atque eas, quæ

diuturna mensium obstructione laborant, quibus ea frequenter quoque accidit, quod mirum videri ratione virorum possit, cum debile ordinario sit atque sensibile maxime systema nervosum foeminarum atque a levissimis causis facilius irritetur & a spasmodicis aliis frequenter eadem impetantur. Quando foemininum sic afficitur, gravior se semper morbus habetur fere. Neque inconueniens erit, hic simul monere, mulieres, quantum equidem nos scimus, frequentius partium paralyti & vel ex leviori causa, ex solo interdum terrore corripitur, Conf. HELMONT. *Tr. de Lithiasi. Cap. IX. p. 60. §. 63.* Communissima vero iis est ea, quae ex colica fit spasmodica & paresis vocatur. Sequatur has ea, (observatio) quae laesiones functionum animalium quasdam & mentis errores aliquos in memoriam revocat, ubi notare seorsim convenit, ut & annotarunt Aretæus atque Avicenna, maniam maxime & post hanc melancholiam vehementius frequentiusque viros & hanc quidem seniores, illam juniores affligere magis. Observaverunt hoc quoque COEL. AVRELIAN. *Lib. I. cap. V. p. 339.* GESNERVS in *Epist. Lib. III. cap. V. p. 125.* LOMM. in *Obs. Lib. II. p. 77.* Attamen & hic excipiendæ sunt gravidæ, quæ tempore gestationis facillime ea corripiuntur, post puerperium vero facile iterum sponte sua, ut observare sæpius nobis contigit, cedit malum. Cum HIPPOCRATI equidem contradicenti *de virg. morb.* & ingenii foeminarum imbecillitatem animique mollitiem accusanti in eo consentire cogimur, foeminis melancholiam quoad hoc esse deteriore, quod absurda magis proferant, pejusque se habeant atque deterius, usque adeo ut frequentius violentas manus sibi inferant, & quod difficillime exinde etiam eluctentur, quod & LOMMIVS *Med. Observat. Lib. II. p. 77.* indicavit. Similiter viros in genere insaniam crebrius infestare prodidit AETIVS *Tetr. 2. Serm. 3. Cap. CII.* atque ipsam maniam, quod probat ac ad suas causas deducit L. BELLIMI *de morb. capitis p. 504.* Amor insanus, sollicitudo ea melancholica mentisque anxietas, spei, timoris, tristitiæ & lætitiæ plena, a foedo amore, communis quidem utrique etiam sexui est; sed viris sæpius contingit, qui ab aspectu foeminarum pulchrarum alliciuntur. Pervigilio foemineus sexus minus est expositus (ob minorem forte abundantiam humorum salino-sulphureorum tenuiorum acriorum, ferociorum) minus & eum illud perturbat & lædit; e contrario vero ad somnum præternaturalem magis fertur. Post hanc vitiorum mentionem animadversionem addimus, picam & malaciam foemininum genus sæpissime, rarissime mirabiles eos affectus masculinum vexare atque illud ad varium spurium ac inordinatum appetitum ferri.

Ut

Ut alias vegeta memoria superant mares foeminae, ut foeminas iudicio mares, ita memoriae abolitioni haec magis subjacent & sunt magis obliuioſae, quod & cum Medicis MENOCHIVS cenſet *Lib. VI. praſumt. XLV. No. III.* Specialiſſime hic adhuc dici poteſt, de illis viris, qui ob nimium laborem & meditationem debilitant caput, ſi morbos incurrunt, huius debilitatibus inprimis eos affligi.

§. X. Foeminae quoque frequentius patiuntur odontalgiam, ſed non adeo atrocem, ut & effloſcentias ulceroſas, in externo oris ambitu & iſthmo interno. Oculorum affectus, ophtalmiae, rubores, lippitudines, exulcerationes, concretiones, ſuffuſiones ſolenniores foeminas magis occupant. Viris vero everſionem palpebrarum ex ophtalmia tumore juncto inſtare LOMM. *Obſ. med. p. 106.* dicit. His tamen cataractas frequentius obtingere plures aſſerunt. Foeminae porro praeter viris diſpoſitae ſunt ad amavroſin, maxime vero ſeniores, illarum genus quoque a coryza atque gravedine aequae ac aliis morboſis ſeri excretionibus frequentius moleſtatur. Tinnitui aurium foeminas praefertim gravidas frequentius eſſe ſubjectas, legitur ac obſervatur paſſim. Cum alias foeminae loquaces, garrulae, obſtreperae bilingues habeantur de quo jam Plautus & Pamphilus cecinerunt & univerſam armaturam in lingua eas habere atque ubi lingua res geratur, ne ſeptem quidem viros, pares eſſe uni foeminae, ut (hinc CICERO in *Epist.* loquitur; facilius indomitam feram alligabis quam linguam) dicatur, curioſa obſervatio eſt, eas rariffime eſſe mutas atque linguae vitiis & balbutiei &c. ſubjectas. In hanc rem quoque notabile eſt, quod illi qui, de Engaſtrimytho, de iſto nimirum loquendi modo per abdominis quaſi murmura, ab Euricle, Athenienſi, invento, (de quo Leo Allatius peculiarem tractatum conſcripſit, & Drufius, Dilherrus, Urſinus, Brodaeus, Voetius & Seldenus ſolliciti fuerunt) egerunt, annotaverint, eum in plurimis foeminis verum in paucis viris obſervatum fuiſſe. Quod externa capitis vitia attinet, refertur, plicae polonicae mulieres praecipue obnoxias eſſe ob ſedentariam vitam deficiam & menſium retentionem Huc & referatur illa lues nova, Tiberii Claudii Caſaris tempore demum exorta, cujus PLINIVS Sec. meminit *Lib. XXVI. Hiſt. Nat.* mentagra appellanda, quae, quae foedo cutis furfure, totum primum vultum deinde vero & collum, pectus manusque occupat at oculis tantum immunibus, advertitque id malum non foeminas & plebem humilem ac mediam, ſed Proceres tantum invaſſiſſe, atque contagioſum admodum fuiſſe, ut ſolo oſculo vel contactu afficeret. Et hic hoc quoque monendum ex ARISTOTELE *Lib. III. Hiſtor. anim. C.*

II. foeminas nunquam experiri calvitiam, quæ capitis lævitas est, quod in eunuchis Hippocrates observavit.

§. XI. Colli glandularum tumores catarrhales, uvulæ relaxationes & tonsillarum, foeminis, quantum nobis equidem hucusque videre licuit, propemodum, in comparatione virorum sunt rariores; sed non desunt alii, in collo morbi, foeminis hysterice maxime & quæ intemperanter vivunt, spiritum vini præter modum ingurgitant, nec iræ frenum injiciunt, familiares magis, suffocationes nempe & oppressoriæ strangulationes & constrictiones oesophagum & totum faucium isthmum occupantes atque cohibentes, nempe singularis illa maxime in collo spasmodica affectio, nervos a pari vago ad laryngem, pulmones, cor, oesophagum transeuntes affligens, animi deliquium, strangulationis metum, contractivum dolorem in sinistro colli sæpius latere, capitis quoque dolorem inferens. Differt hæc omnino a convulsivo asthma, catarrho suffocativo, & longius adhuc angina, licet ab incautis ea confundi ut plurimum soleat. Sæpius ex levi diætæ errore, hoc malum recurrit, sed periculo vacat, & ex cruditatibus acido-biliofis, acrioribus in primis viis hærentibus, effluvia penetrantia reddentibus, nervosque prædictos afficientibus, convellentibus, & in consensum trahentibus deducitur; illi vero affectus nominati periculo sunt pleni.

§. XII. Ad pectoris affectus fere omnes, mares magis inclinare multi sunt, qui autumant ac scribunt, sed si foeminas spectes ac censeas ex æquo, æque magnum numerum numerabis eorum, qui foeminarum corporibus in hærent frequentius. Nimirum ex altera parte per multa constat exempla, phthisin veram, pulmonalem, exulcerationem nempe pulmonum, viris & maxime juvenibus ut frequentissima admodum iis est, ita maxime funestam quoque esse, foeminæ enim & præsertim virgines adultæ rarius ea corripuntur, ac si ea corripuntur, longe mitior est, raroque per eam pereunt. Hoc adeo verum est, ut non dubitanter affirmem, ad magnum numerum, virorum, juvenum, hac labe laborantium, vix centesimam partem, altero sexu, simili tamen ætate constitutarum, occurrere. Id etiam nobiscum observavit Clariss. STAHLIUS *Pathol. dogmat. Parte III. membr. II. art. II.* Experientia dein quotidiana docet, incubo affligi sæpius viros, rarius foeminas. Ex altera parte scire licet, foeminas, syncopen præcordialem & lipothymiam magis, minus mares pati; ast debilibus puellis, non adeo periculosa sunt animi deliquia, a minimis sæpe causis, tam frequenter orta (quia nimirum illarum sanguis nimis dissolutus, vix vel saltem tardissime concrescit, quam-

quamvis etiam immotus hæreat). Fœminas quoque præ viris tusses simplices exercent in maribus ut plurimum mira (tussis) conditio est, quod interdum vel aliis se adsociet morbis latentibus iis quidem eosque velut umbra corpus sequatur, interdum vero morbi vestem induat; sæpissime vero ut effatum fert Helmontii, ad extinctionem hospitis vitalis tendat. Asthma gravare viros magis COEL. AVRELIAN. *Lib. III. Cap. I.* (cum quo nos potius facimus) fœminas, Mesues voluit. Palpitationes cordis in fœminis frequentiores & majores semper habita scil. circumstantiarum ratione, deprehenduntur. Empyema vel suppuratio pectoris fœmellas citius, prehendit graviusque afficit ac etiam tollit citius atque catarrhus suffocativus eas magis adurit. Vid. STHALII *Disput. de Senum affect. §. LX.* Hæ quoque cum vomica sæpe animam evomunt. GOD. MOEBIUS in *Fundam. Med. Physiol.* observavit, in mulieribus, copiosiore ordinario, in pericardio adesse aquam, easque idcirco esse proniores ad pectoris hydropem. In iisdem etiam sæpius, præsertim, quibus menses retinentur & lactinia & acida frequenti in usu sunt, in vasis polypi, producuntur. Sicuti vero mulieres respiratione minus molestantur, quod ob pectoris latitudinem, quæ ipsis est a natura concessa, fieri plures autumant, ita & hocce affectu (asthmate) facilius liberantur.

§. XIII. Hæc de Cardialgia speciatim animadversio sit: Circa eam sexui alicui assignandam Authores in diversas abeunt partes; ast si rem accuratius æstimare volumus, affirmandum nobis est, distinctionem formando, reperiri eam frequentius propemodum in potiori, vid. COELIVS AVRELIANVS *Cap. XXI. p. 146.* cardiogmum vero in sequiori, qui ut minus a majori differt. Nam nihil frequentius est, quam quod fœminæ, quæ ex utero male se habent, quibus menstrua non rite fluunt, aut quæ hystericae aut hypochondriacæ sunt &c. de hoc cordis dolore conquerantur. Similem querelam sæpissime audimus, si modo plura, quam par est, assumant; ventriculus enim fœminarum minoris capacitatis est, quoniam & parcius ordinario comedunt ac bibunt. Singultus fœminas frequentius exercet, sed levius, adeo, ut quam sæpissime plurimas ex levi causa & inter flendum & lachrymas, ad quas sequior sexus magis est pronus, singultientes audies; viros vero fere gravius detinet, in illis enim videtur, eum esse violentum, clangosum atque clamorosum ac periculosiorem magis.

§. XIV. Si ulterius progrediamur, & consideremus, ad tenta observatio evincit, gravissimis ventris affectibus mulieres frequentius corripi-
quam

quam viros, sique inter hos intueamur præ aliis vomitum cruentum, qui si per alvum simul excernitur nigricans, foetida materia morbus Hippocratis niger dici solet, edocemur eventu, cum qui sive ex ventriculo, sive pulmonibus sit, foeminis præsertim hystericeis in specie etiam gravidis, (quæ sanguinis excretiones consuetas & ordinarias habent, quæ si supprimantur vel turbentur natura facile per insuetas vias exitum sanguinis molitur) licet ejusmodi familiares ipsis sint, non adeo esse periculosum ut & brevior, licet iis sit magis præ viris familiaris. Ut singula molimina vicaria hæmorrhagica, utpote in iis spasmi illi ad vomitum hunc tendentes, sunt vegetiores; attamen & breviores: nam evenit alter speciatim potius ex copia & regurgitatione violentaque perruptione, ex vasis hypogastricis & brevibus ad regionem ventriculi teneriorem maxime; excertis enim mensibus & facile liberantur. Maribus vero, si adest (adest vero interdum in hypochondriacis lienosis & hæmorrhondariis) ordinario fere in tabem & funestum exitum transit: in his enim ut plurimum, si non semper, ex hæmorrhoidibus suppressis oritur, & in quibus jam vitium hypochondriorum vel viscerum labes, præsto est. Idem pene quoque sentiendum est, de vomitibus simplicibus & siccis sic dictis cum nausea, nec non rarioribus & peregrinis, quibus pili, acus, filamenta, ligna, lapides & similia rejiciuntur, quos & frequentius experiuntur & facilius iterum ferunt foeminæ. E contrario in foeminis cholera rarissime reperitur, de qua conf. *MUNDIVS op. Med. Phys. p. 55.* Ut anorexia mulieribus magis est communis, siquidem & inedia longius sine notabili noxa possunt perferre, ita bulimo mares magis sunt obnoxii, ut foeminæ caninæ fami, ut notatum a Doctis hinc inde videbis. Frequentant vero magis in foeminis dolores lumborum, & circa splenem sæpius colicæ in genitia tormenta & tormina ventris atque inflationes pertinaces abdominis, & hæc quidem speciatim puerperis, aut iis quæ circa abdomen aliquid incommodi passæ sunt, Conf. *Boccon. Annot. p. 495.* & *STAHLII Disp. de Flatulentia §. 33.* magnaue pathemata spasmodica. Iisdem obstructio alvi familiar est & pertinacior, adeo, ut inter quingentas foeminas vix unam reperias, quæ singulis diebus alvum deponat, plurimæ tertio vel quarto demum die, hoc naturæ opus persolvant; (quod otiosæ sedentariæque vitæ ac potui parciori adscribendum est) sed etiam eam facilius ferunt, viris. Huic quidem experientiæ contradicere videtur observatio doctiss. *BALLONII in Ephemerid.* asserentis, mulieres ut plurimum habere ventres difficiles, ex ea quidem ratione, quod venas obtineant angustiores ac chylus ea propter, venas lacteas abdominis

dominis non tam facile subeat & reliquæ, accedente vita desidi ob vasorum conniventiam, facile effluant. Illæ vero (fœminæ) alvi stricturas spasticas magis experiuntur, adeo, ut si forte iis applicandum sit clystma, instrumenti aditum sæpius vix admittant. Immo passio iliaca fœminis familiarior, sed non adeo periculosa, viris rarior ac exitialis fere semper est. Hydropes quos sitim sed famem membrorum Langius vocat, in fœmineo sexu pluries videbis omnis generis anasarcam, asciten, tympanitem &c. & eorum curationem difficiliorem experieris.

§. XV. Oppilationes porro hypochondriacæ viscerum illorum vasorum & tandem exinde enatæ scirrhescentiæ atque intumescentiæ hepatis, lienis, pancreatis, frequentius fœminas, quantum scio, occupant, quanquam etiam me haud lateat, viros, quibus hæmorrhoides minus recte processerunt, æque frequenter conflictari; obstructions autem mesenterii maribus potius insidiari, fœminas autem, si illis affligi contingerit, difficulter, aut raro aut nunquam sanari. MARTINI in eleganti suo libro *de morb. mesenterii obstructioribus* p. 186. affirmat causasque subjungit.

Quinimo veteres jam pridem observaverunt, malo nobis dicto hypochondriaco, raro mulieres laborasse (quamvis hodie contrarium fere ob majores forte diætæ errores &c. experiamur) sed ubi laborent, pejus se etiam habere atque difficulter vel raro aut nunquam curari. In omnes alvi fluxiones, diarrhœam & id genus ut pronior est sexus muliebris, ita & facilius fert easdem, atque adeo gravidæ, vix graviter ab iis læduntur, licet HIPPOCRATES contrarium innuat, mulieri si alvus profusior sit, abortus periculum imminere dicens *aph. 34. Sect. V. Is I. Epid. Sect. II.* testatur in Thaso dejectiones ejusmodi alvinas mulieribus natura humidioribus & viris talibus frequentiores fuisse. Non minus in ipsam dysenteriam majorem habet dispositionem idem, sed alteri certiorum iterum, perniciem eoque periculosiorem, quo magis blanditur, affert, ejus tamen curam mulieres suo tempore difficiliter accipere docuit AETIVS *Tetr. 3. Serm. I. C. 143.*

§. XVI. Torquent quoque mulieres frequentius vermes, atque lumbrici, qui, quamvis in variis corporis partibus quandoque generentur, in intestinis tamen frequentissime magnus est eorum proventus Tormenta (quæ secundum HIPPOCRAT. *Aph. VI. S. 6.* vix sanantur) etiam a renum calculo & nephritide maribus fere magis parcunt, vesicæ autem calculus, ut sæpius viris præ fœminis accidit, ita ob viarum, per quas excernitur, differentiam non adeo gravi ab illo tormento excruciantur eadem, neque adeo periculosus idcirco est iis. Scriptores quos-

dam si nominari velis, qui calculum vesicæ in foeminis inter rariora reponunt, & referunt, nominentur præ aliis VALASCVS DE TARANTA *Cap. de lap.* BENIVENIVS C. LXXX. ALEX. BENED. *Lib. XXIII. c. XXXVI.* JOANNES DE TORNAMIRA aliique plures: nam cervix vesicæ & urethra foeminis brevis est atque ampla & recta minusque anfractuosa faciliusque expansionis neque ita sensibilis, per quem ductum materia, quæ calculum gignit, pronius & citius faciliusque potest transire, priusquam concreascit in calculos, & transit is quoque felicius jam factus & interdum sat grandis vel sua sponte vel ex infessu & balneo emolliente. Ejusmodi exempla legas licet in WOLFFII *Observ. chirurgico-medici Lib. I. observ. 47. p. 155.* Similiter interdum, ut *Ephemerides N. C. Dec. III. A. 9. Obs. 242.* referunt, urethræ diutius ille inhæret, tandemque erumpit ex facili. In maribus vero ea oblonga magis est atque angusta, conf. HIPPOCR. *L. de aëre aqu. & loc. quod* AVICENNA 18. *Tr. 2. Cap. XXII.* Atque hodie alii plures confirmant, per dilatationem vesicæ, in mulieribus, educationem calculi promoveri facile. Si & tantæ molis calculus sit, qui excerni non possit, & chirurgi manum desideret, attamen catheter immitti, dilatatorium applicari, forcipeque facilius feliciusque is extrahi potest. Sique & per sectionem calculus educendus, eam faciliorem in mulieribus atque puellis quam in viris aut pueris esse BLASIVS in *Medic. Univ. p. 46.* asserit.

§. XVII. Hæc de intestinali hernia debetur animadversio, quod ea maribus magis familiaris, foeminis vero periculosior sit. Equidem multi negant prorsus, foeminas, enterocelen pati, quia iis deessent processus peritonæi; Verum quo minus in illorum sententiam descendamus præter autopsian Autorum quoque testimonia nobis persuadent, nosque hortantur. Sic NVCKIVS refert. *Uter. foemin. anat. nov. C. X.* processum peritonæi ligamentum uteri rotundum ingressum fuisse. Plura exempla videbis, (ne plures adducamus,) apud CORN. STALPART. VAN DER WIEL *Obs. rar. 57.* NIC. DE BLEGNY *Tr. de Hern.* B. PETERMANN in *Diff. de Enterocèle §. 13.* Exinde nobis indubium manet umbilicali & inguinali herniæ foeminas familiarius exponi, simulque asserimus, in foeminis intestinalem herniam quæ fit circa curvaturam, esse periculosiorem, quia per anulum dilatatum, tendinum, parva saltem portio intestini, facile incarceranda, excidit: quamvis etiam Laurentius affirmet, in foeminis ab umbilico ad pubem peritonæum validius conspici. Perfrequentes autem viris sunt hæmorrhoides, paucissimæ enim inveniuntur mulieres, quæ mensium fluxum & hæmorrhoidum simul,

nisi

nisi quæ sæpius cum difficultate pepererunt, vel loco eorum hunc patiuntur, si obstruantur p. n. aut per gestationis tempus, quorum tamen exempla collegerunt ARISTOT. *Lib. III. Hist. animal. C. IX. & Lib. IX. C. XI. Lib. de generat. animal. C. XIX.* GALENVS *V. Aphor. 33.* FERNEL. *Consil. 39.* SOLENANDER *Seçt. IV. Conf. 29.* HOLLER. *L. I. de morb. intern. Cap. LI.* GORDON. *Lil. med. P. V. Cap. XXI. Eph. N. C. Dec. I. An. 3. Obs. 22. Aral. ad An. 3. conf. & An. 4. p. 299. Dec. 2. An. 5. p. 52. &* alia ejusmodi apud alios passim reperiuntur & experientia propria observantur. Ubi cohibitio hujus fluxus, (hæmorrhoidalis) contingit, illa sexui sequiori præ virili adhuc tollerabilius existit, præsertim si modo per externa adminicula inducta est, & foeminæ adhuc ea gaudeant ætate, ut menses possint succedere, & quando hæmorrhoides magis ab occasionali causa v. gr. tempore graviditatis ab incumbente foetu, in utero, vasa sanguifera, in his locis comprimente & sanguinis fluxum liberum prohibente, proveniunt, quam si ab interno directo molimine excretorio concitatæ fuerunt, quoniam facilius per menstruum fluxum, pathemata ex suppressione oriunda, levamen quoddam inveniunt; Verum annosiores ac quibus jam cessarunt menses aut illorum cessationis tempus appropinquat, minus secure quoque hæmorrhoides cohibentur, sed gravia quoque pathemata æque ac in viris post se trahunt. Gonorrhœa ea scil. quæ utrique convenit sexui, foeminis accidit frequentius, ut testatur FERNEL. *Univerf. Med. Part. Pathol. p. m. 624.* ægriusque quam in viris curatur; attamen hoc nobis observare datum est, eas non diu ex illa laborare nec admodum periculose quamvis graviter sed uno mensium succedentium, largiori fluxu, ab illa liberantur. Sed hi (viri) in atrophiam, imbecillitatem virium & similia citius exinde incurrunt. Diabete cœterum sexus virilis afficitur frequentius ut alter stranguria atque urinæ incontinentia, conf. MERCVRIAL. *Med. pract. p. 383.* qui faciliorem partium relaxationem incusat.

§. XVIII. Multi referunt, foeminas magis venere delectari, atque eam voluptatem duplo magis in iisdem durare, adeo ut ex hac sententia multi quoque dubitent, an mulier sine delectatione possit concipere, conf. *Elys. Camp. Jucund. Quæst.* A REYES *Quæst. 42.* atque eas ad senium perductas, venerem amplecti magis, observarunt. Conf. AVICENN. *Lih. III. Fen. I. Tract. I. cap. II.* GALEN. *in Cap. VI. Lib. I. Caus. Sympt.* Hinc OVIDIVS *Metamorph. Lib. III.* fingit, Tiresiam Regem Thebarum prius affirmantem a Junone excoecatam, a Jove vero vaticinandi dono donatum fuisse. Si hoc verum, non mirum si ad libidinem & ad sala-

citatem magis & frequentius præ viris ferantur, licet sagaces magis in dissimulando sint ac renuendo quandoque, quod tamen valde desiderant; masculi vero, si cœca libido eos cepit, in longe inconvenientiores excessus proniores habentur, unde Lacedæmoniis per Legem, ut XENOPHON *de Rep.* scripsit, uxori uni duo viri erant concessi. Sicuti & rari sunt mares, qui æque sint validi ad venerem seniores uti juniores, sic raræ quoque fœminæ, quæ non æque imo plus lasciviant in anili ætate ac in juniore. Hanc effrenam mulierum lasciviam in Pasipha, Semiramide, Glauca, Messalina, Tribade aliisque salacissimis, præsertim increpant, Conf. LANGIVS *in Epist. p. 528.* Quod p. n. veneris desiderium, si non expleatur, ad insaniam, rabiem atque furorem, qui uterinus vocatur, eas frequentius quam viros ad satyriasin concitare solet. Hoc excretionum genus retentum in mulieribus frequentius & gravius malum patrat, varias impressiones injicit, tum in animo, tum in sensibus, tam in sanguine & corporis membris, tam internis quam externis, easque vel amœnas vel tristes, vel dolorificas, vel omnis doloris expertes: unde juvenes viduæ & maturæ virgines, salaces (imo etiam interdum fœminæ senes ipsis puellis salaciores,) hystericis passionibus maxime obnoxii sunt, semen retentum earum sic appellatum magis corrumpitur, adeo, ut veneni naturam æmuletur. His addimus: mares exercitio venereo magis debilitari (sicque hoc Martem a Venere vinci) quoniam copiosum semen, calidum atque spirituosum emittunt. Atque mulieres non similibus semper morbis iisque multifariis, ut epilepsia, apoplexia, memoriæ lapsu, syncope, ophthalmia, cœcitate, cordis palpitatione, artuum tremoribus, ventriculi debilitate, dysuria, mictu cruento aliisque pluribus, qui ex nimio illo propullulant, corripuntur: semen enim masculinum quod tunc excernitur plus plusque spirituosius est, præ liquore, quem illæ effundunt. Alias constat, mulieres ordinario citius sterilescere, & plurimum post XL. ætatis annum omnem generandi vim ac spem amittere.

§. XIX. Inter eos, qui artus afficiunt, morbos arthritidis mox nominanda erit, de qua jam omnibus constat, ut Hippocrati jam constitit, omnium rarissime ea fœminas laborare, quod & de eunuchis dixit; viris vero nihil ea est frequentius, nihil magis vehementius, nihil magis dolorosum, inprimis fixa podagra; ast in iis facilius sanatur quam in illis, ut notat STEPH. BLANCARTVS *de Arthritide Cap. III.* Hujus Sophorum maximus Seneca, ut & Galenus in virorum intemperantiam & ingluviem rejiciunt causam, beneficium autem hoc in fœminis beneficio

cio mensium potissimum acceptum ferendum est, secundum ipsum HIPPOCRATEM *aph. 29. Sect. VI.* inquentem: *Mulier podagra non laborat, nisi menses ipsi defecerint.* Attamen modo laudatus SENECA in Romanis mulieribus contrarium expertus, iisdem indignatus, quod luxu ac libidine immensa Hippocratem fecerint mendacem. Verba ejusdem *Epist. XCV.* ita sonant: *Non mutata fœminarum natura, sed vita est; nam cum virorum licentiam equaverint corporum quoque virilium vitia equaverunt, non minus pervigilant, non minus potant & oleo & mero viros provocant.* Pergitque: *Beneficium sexus sui vitiis perdiderunt, & quia fœminam exuerunt damnatae sunt morbis virilibus.* Vaga equidem scorbutica quandoque mulieres corripuntur, eæ inprimis, quæ intemperantiæ & præsertim vini & spiritus vini ingurgitationibus deditæ, utpote quæ hanc labem fœminis magis quam maribus accersunt aut quibus mensium fluxus cohibitus, cujus rei exemplum iterum ipse adducit HIPPOCR. *Lib. VI. Epidem.* de Phætusa Pythæ uxore. Sique etiam iis adsunt tales dolores, ad eam tamen, quæ in viris conspicitur, vehementiam, vix accedunt; curatio vero hujus affectus in iis longe difficilior suscipitur. Par judicium de chiragra ac gonagra ferendum est. Crurum ulcera antiqua fœminas magis molestant, quorumque consolidatio novæque carnis accretio atque in integrum restitutio in iis difficilior semper se habet, ut adducit rationemque addit R. G. CRAVSIUS in *Disp. de Ulcerib. Crur. antiq. p. II.* PLINIVS *Hist. Nat. Lib. XI. cap. XLIV.* de Romanis & ARISTOT. *Hist. animal. Lib. III. cap. XLIX.* scribunt, varices in variis corporis partibus etiam in vasis internis, ventre & scroto imo in venis pulmonum omnium frequentissime vero in cruribus (quoniam valvulæ in ramo crurali fortissimæ imo duplicatæ sanguini incurrenti valide resistent) illorum tempore viris quasi proprios fuisse, quod jam HIPPOCRATES *de Aëre, aquis & locis*, asseruit. Hodie vero apud nos fere contrarium observatur, testimonium si desideres petas illud e RODER. A CASTRO *de natur. mulier. Lib. II. cap. XII. p. 73.* Paronychia cœterum excruciat frequentius nobiliorem sexum. Mulieribus claudicationis incommodum impendere magis Hippocrates refert, rationemque addit de natura pueri. Ratio vero hæc non æque constat, cur in urbe quadam Rugna dicta SOMMERO prodente in *Itinerar. suo*, omnes fœminæ, ne una quidem excepta in dextero pede vitio contracto atque connato claudicent. Quam maxime mulieres gravidæ & succi plenæ, ea tentantur.

§. XX. Sed restant adhuc plures morbi, qui non certam aliquam partem sed variam occupant. Occupant autem primum in genere fre-

quentius tumores omnis generis iique cachectici ac hydropici atque cedematosi faciei, abdominis & pedum atque anasarcam, ascitem, tympanitem, mulierum genus. Sic & erysipelas foeminarum capita inprimis frequentius, & acerbius quam virorum premit, atque ex inflammationibus plura modo notanda veniunt. Per experientiam haustum habemus, sexum masculinum phrenitide ut & paraphrenitide frequentius affligi, mulieres raro, nisi excipias puerperas, quæ lochiorum retentione laborant, quod Forestus & Horstius observarunt pluries. In pleuritidem atque peripneumoniam, anginam veram sanguineam, frequenter viri, frequentissime adolescentes incidunt, adeo, ut vix vigesima pars & ne hæc quidem ex sexu foemineo ab illa appetatur; ad spuriam pleuritidem tamen foemellæ magis inclinant; Simili modo COEL. AVREL. *l. c. Lib. III. cap. I.* plures reperiri synanchicos quam synanchicas dixit. Nec huic HIPPOCRATIS observatio, quam adducit 6. *Epid. S. 7.* contraria est, qua refert de epidemica constitutione, anginas ac peripneumonias, quæ tunc in multos vulgatæ sunt, paucissimas foeminas affecisse. Quin imo plures testatum reliquerunt, eam foeminis post annum XXV. nasci nunquam. Quemadmodum ut modo indicatum, angina ita & pleuritis viros sæpius præ foeminis occupat, ita illis eadem tunc inprimis gravidis magis periculum afferunt, quod affirmat iterum sæpius laudatus COEL. AVRELIAN. *l. c. de morb. acut. Lib. II. cap. XIII.* Inflammatio vero ventriculi frequentior in foeminis est, licet non adeo funesta, in virorum comparatione, veniat. Ast viris vesicæ inflammatio familiaris magis habetur, difficilius quoque sanationis, præsertim si hæmorrhoidum obstructioni sint obnoxii. Dolores insuper generatim dicendo, viros semper acerbius torquent. Nec obliviscendum quod polypi non modo in naribus sed & in aliis partibus interioribus corde &c. magis in foeminis frequentent.

§. XXI. Strumæ foeminarum corpora frequentius occupant. Nam istis in regionibus, in quibus ex aquarum maxime vitio incolæ, glandularum colli tumoribus insignibus, strumis & scrofulis notantur, foeminis præsertim istæ sunt familiares, ut in Pyrenæis montibus atque Alpibus, in Helvetia eique adjacentibus regionibus, Rhetia, Valesia ac Sabaudia passim, in Stiria, Carinthia, Moravia, circa Saltzburgum & Oenopontem urbibus quibusdam Herciniæ, in Hungariæ urbibus montanis inprimis Cremnitzii in Transylvania in urbe Cronstad, in Italia Luccæ in agro Bergomeni vid. FABRIC. *Ab Aquapend. P. I. cap. XLII.* & oppido Fabriano HORATIVS AVGEN. *de febr. Lib. VI. cap. V.* in Hispan.

FERNEL. *de abdit. rer. caus. Lib. II. cap. II.* in Regno Bantam & Tipra
Tavern. *Part. II. Lib. III. cap. XV. & XVI.* in Moscoviæ quibusdam
provinciis, & in Silesia circa montes Sudetes in tractu Schmidebergenfi
& pago Steinseuffen. Præter copiosiores partes serofas quibus ut plu-
rimum abundant (foeminæ) ut & vitæ genus aquarum vitium, in puer-
perio nifus fortes ad has conferunt causam, ubi vasa & fibræ circa col-
lum & pectus extenduntur nimis; Nec non iisdem strumæ frequentius
disponuntur ad alas, pectus & inguen &c. In his etiam apostemata
frequentius generantur, quibus sæpe foedum in modum notantur.

§. XXII. Hic quoque commemorandum est, mulierum non solum
mammas & uterum, quæ sunt partes glandulosæ maxime & molliores,
sed & membra varia & artus cancrum frequentius quam virorum depa-
scere, imprimis earum, quibus mensium obstructio aut emansio per æta-
tem, quia tum temporis acriores sunt humores, & quibus affectus hypo-
chondriacus subest, aut quæ gravi & diuturno mœrore sunt confectæ.
Dicit equidem HELMONT. *Tr. de Ideis morbor.* nunquam nisi in ubere
& utero verum cancrum oriri, sed ratio æque ac experientia contrarium
evincit uberrime. Priusquam hinc abeamus addere nobis liceat, quod
ozæna in sequiori sexu conspiciatur sæpius.

§. XXIII. Ad Hæmorrhagias sequior pronior est, sed facilius præ
nobiliori fert eas, etiam largiores nec raro eadem criticæ sunt; Atque
prostant multa exempla earum, quibus menses, per alias vias, sine noxa
fluxerunt, ut apud Kerckringium per verticem & dextræ manus polli-
cem. Simile B. D. ORTLOBIVS (Respondentis charissimus Parens &
Præsidis quondam Præceptor honoratissimus, Vir seriori profecto libi-
tina dignus, dignusque qui nunquam satis iusta evehatur laude,) *in Diff.*
Physiol. XIX. §. 3. memorat de matre ac filia, quibus per pulmones sine
noxa insequente rejecti sunt menses. Hæmorrhagiæ tamen narium ra-
riores videntur apud foeminas. Sic & mictus cruentus potiori sexui
fere proprius est, rarissime eum in sequiori reperies; etiamsi hic alios
magis & quidem cum menstruo suo fluxu cohærentes affectus non raro
experiantur. Vulnera, si & infliguntur, majori periculo sub iis foeminæ
expositæ sunt quam mares, nisi hi veneri vinoque nimis deditæ fuerint;
Valet hoc de his, quod HIPPOCR. alias *de Vulner. cap. Sect. VI.* dixit, si
ex vulnere moriendum sit, juniorem seniore citius perire.

§. XXIV. Ex affectibus qui ossa, quæ majora longioraque & inter
ea costas molliores propemodum foeminæ habent, magis afficiunt, ra-
chitis

chitis mox adducenda est, rarior hic, Anglis vero endemius est, rarior quoque in maribus videtur. Sequitur huic finitimum ossium vitium quod spina ventosa dicitur, cum quo eodem modo sese res habet. Tradente enim ARISTOTELE *Lib. II. de part. animal. Cap. IX.* marium quam foeminarum ossa duriora sunt, tam ob nativam teneritudinem quam vitam sedentariam, unde etiam ut exempla ferunt, facilius, fracturam patiuntur. Singularem de hac observationem injicit W. HULD WALDSCHMID in *Dissert. habita de fracturis ossium sine violenta causa externa Thesi XIX. p. 14.* Aequè iisdem frequentius quam viris ossa excidunt.

§. XXV. Nec prætermittenda sunt vitia cutis, quæ in foeminis mollis ac lævis est; in viris sicca magis & dura atque hirsuta. Sic scabies ægerrime in viris, in foeminis facilius curatur; viros, lepræ magis esse obnoxios perhibet AETIVS *Tetr. 4. Serm. I. Cap. CXXI.* Magis & expositæ sunt exanthematibus cutis fere omnibus foeminæ, ut papulis, imo nulli viro ea fieri Hippocr. dixit &c. mares rarius, seniores rarissime; In foeminis tamen lichenes rarius conspiciuntur; verrucis vero frequentius virilis sexus notatur, nisi mulieres, quibus menses desierunt, velis excipere.

§. XXVI. Novissime notandum venit, quod sequiori sexui, si in morbum quendam fonticum incidat, varia subinde accidentia, per externas pariter ac internas occasiones, supervenientia, nocumentum, perniciem atque periculum concitando, aut morbum aggravando, aut alium aut indignatione saltem aut horrore nauseaque, excandescencia, facilius passim inferre. Sic ex. gr. a terrore a leviori sæpius causa lipothymia potest produci: Ita proclives ad passionem hysterica quam primum suaveolentia naribus obveniant, dulcia vel acida in os ingerantur longe periculosius decumbant, in multifariis morbis, præcipue malignis &c. Pariter compertum habemus huiusmodi subjecta repente obiisse aut ad minimum gravius fuisse affecta, retrocedentibus, exanthematibus, quando ad aliquot saltem momenta extra lectum sedere debuissent, ob vertiginem aut animi deliquia, tum supervenientia. Rursum dicendum est, eundem (sequiorem S.) ægritudinem contractam ut diutius fovet & facilius in eam labitur & citius magisque debilitatur, ita citius etiam ex illa convalescere, citiusque primas recipere vires, morbis tamen, qui convalescentibus accidunt, recidivis &c. præ altero esse obnoxium, sed non æque facile ex iis fato defungi ac potiore sexum, sed etiam periculosissimis morbis mortique proximo, feliciter sæpe evadere. Siquidem & ætatem ultimam frequentius attingit.

§. XXVII.

§. XXVII. Circa ea, quæ ad has vel alias differentias, ad hos vel alios morbos, in hoc vel illo sexu faciunt atque disponunt, & causas tam proximas, quam remotas, antecedentes & continentes, materiales & procatarticas inferunt, aut rursus hunc vel illum a morbis liberum servant, ut facilius ab illis liberetur, contribuunt, hæc primario, quæ hinc inde jam digito quasi sunt monstrata, explicatius demum sunt adducenda, quæ ad suos effectus facile possunt deduci, quorumque explicatio fluit: Nimirum, quemadmodum masculinum genus præ foeminino est præstantius tam corpore quam mente, ex præstantiori forte semine natum, cæteris tamen paribus, ita præter partium quarundam conformationem & habitudinem, in masculino sexu, naturæ robur majus, laudabilius temperamentum, vires præstantiores, quæ, quibuscunque præternaturalibus & violentis causis resistere valent, inprimis notantur. Calor iis magis intensus est, atque strictior ordinario, siccior, crassior tensiorque, solidior atque robustior, firmior, fortior solidarum partium habitus & tonus, per quem, fluida jugiter impelluntur atque circumaguntur, cujus fibræ majori facultate resistendi præditæ, ideoque fortius quidem movens, desiderant, sed semel motæ majorem motum ac impulsum, fluidis dant, eumque diutius conservant, & si doleat, dolet etiam is sexus ob hanc majorem tensionem maxime in articulis vehementius magisque inflamminatur, magisque acutos morbos, acutas febres experitur &c. Ob compactiorem constrictumque vero corporis habitum, præsertim cutis excretiones per sudorem parcius procedunt, adeoque non magna simul particularum laudabilium nutritiarum & spirituosarum copia, quæ corpori alacritatem foenerantur, dissipatur; nulla enim excretio, plures particulas laudabiles deprædatur, quam nimia per cutem transpiratio. Quadrat huc HIPPOCRATIS dictum *libr. de alimentis, Sect. VI. quibus corpus male transpirat, ii, priusquam agrotent robustiores, cum vero in morbum inciderint, difficilius restituntur.* Obque hanc firmiorem majoremque omnium partium, ligamentorum, nervorum & tendinum ut & ipsorum ossium, constitutionem, potior sexus, rarius etiam a morbificis causis læditur, læsus vero eo & gravius & difficilius afficitur. Ad hoc vasa huic sunt majora & pauciora, ut & omnes fere partes ampliores. In elegantiori sexu, tum ad tactum, tum ad visum, lenior & flaccidior, flexilior, laxior, spongiosior, obesior, pinguedine copiosiori vasa comprimens, ut arctiora inter vasa spatia fiant, mollior, humidior, segnior corporis habitus texturaque tenerior, sensibilior, flexilior & delicatior est & infirmior. Fibræ enim, quo molliores & laxiores sunt, eo majore quoque

numero, poris abundant, ita & humores quivis in easdem majori copia influere ibidemque congeri possint. Omnium enim stamina cerebri musculorum, glandularum, ventriculi, intestinorum, omniumque viscerum ligamentorum, nervorum exilia & debilia & languida languidusque hinc virium vigor, ut ideo durioribus omnis generis laboribus, longius ferendis, non tam par, is sexus sit. Quod vero Ligurum mulieres adeo robustæ sint, ut medios inter labores pariant, statimque ad eos redeant, id huic genti peculiare esse ARISTOTELES *Lib. de Miracul. auscult.* dixit: Hinc & magis sensibilis, ut vel levissimas irritationes mox persentiscat atque rerum sensibilibus magis peritus est, ut elegantiae in loquendo, diligentiae in vestitu, exquisito demum saporis odorisque sensu & molesto ceremoniarum usu præcellit hincque etiam spasmodicæ partium contractiones ipsi familiares sunt, sic & vasa copiosa & parva magis, facile dilatabilia hincque impeditior fluidorum progressio. Equidem hæc corporum mollities confert, ut foeminæ facile extendantur, nutriantur & crescant, tamen ad morbosas dispositiones multum ea corporis habitudo contribuit, levi ex causa ad ipsum actum morbosum abituras, quippe minus prompte ac expedite, vitales fluores per suas vias circulantur, hinc secretiones & excretiones plurimæ languent. Et inde fiunt frequentes humorum decubitus, stagnationes & viscerum corruptelæ: Nam humores ob motum lentiores quidem increscunt, sed minus rite depurantur. Perspirationes autem per cutem fere (ob laxam mollemque texturam) haud sunt parciores, ob quam perspirationem liberam & auctam a plurimis morbis, quæ ab ea impedita, ortum trahunt, ut febribus &c. tutæ manent foeminæ, atque ex iis felicius restituantur. Idem dicendum de salivæ & muci narium excretionem, de qua notat celeberrimus WEDELIVS *Physiol. med. Sect. III. Cap. XXIV. p. 175.* catarrhosis, & quibus nares crebrius fluunt, minus reddi apoplecticos, molliores enim & laxiores teneriores fibræ & pori promptius transmittunt humores secernendos, & vascula arteriosa teneriora, facilius a transeuntibus humoribus, ad alternam contractionem & dilatationem sollicitantur. Secretio etiam ita se habet, ut partium habitus & sanguinis velocitas & vasis secretorii orificium, ut demonstrat belle Bellinus; Plethoricæ vero, quia humores ob motum lentiores magis augentur, sed quia minus ob eandem rationem ita depurantur, (nimiam enim sanguinis abundantiam subito sequitur impuritas ejus) cacochymicæ, phlegmaticæ & cachecticæ foeminæ evadunt facile, & ad stagnationes, viscerum oppletiones, spasmos, & tandem corruptelas profundiores, magis sunt proclives

clives. Seorsim indicandum venit, mulieribus, densam magis epidermidem esse, unde alii rationem catameniorum reddere volunt. Præsertim totum genus nervosum in motus inordinatos, spasmos, convulsiones maxime pronum est (siquidem & membra earum non modo sed & vires animi debiliores sunt tolerandis & doloribus & remediis). Atque si morbi accendant, stases & vasorum infarctus difficilius tolluntur, ac eapropter citius in ejusmodi morbis, ejusmodi constitutionis homines succumbunt; compactiores vero & robustiores fibras latioraque vasa habentes, facilius ex illis evadunt, quia ob id facilius isti morborum status auferuntur. Quamvis hæc disputata rite se habeant, tamen hoc etiam verum esse videtur, quod dicitur: Vetulas, præsertim si multiparæ fuerint, esse texturæ firmioris, ad morbos sustinendos præ viris ad eandem ætatem proventis. Non instituti interest ulterius, partium quarundam diversas habitudines recensere, quæ in utroque sexu notantur, ex. gr. musculus Psoas minor Riolani in mulieribus rarius, quam in viris reperitur, glandulæ circa cartilagineam scutiformem in larynge in foeminis majores sunt, sed æque de hoc nulla ratio reddi potest. Pariter in iis cranii suturæ valde angustæ sunt & sæpe nullæ cernuntur. Quæ causa inter alias forte etiam est, quod hæ frequentius de assiduis capitis doloribus conquerantur, nullis remediis tollendis: Ad quod inferendum observationes faciunt, per quas constat, laxiores cranii suturas, minus capitis dolores parere. Ipsi humorum massæ atque adeo spiritibus animalibus in utroque sexu discrimen quoddam per consequens quoque; quoad indolem, crasim, consistentiam, cohæsionem, intercedit: scilicet virorum sanguis est magis digestus, spirituosus, minori licet quantitate etiam sit, sulphureis particulis magis præditus non exclusis tamen terrestrioribus & acrior est, qui in motus irregulares & præter naturales ebullitiones febriles, ex facili abripitur: Verum foeminarum humores sunt ut copiosiores (quanquam enim mulier multo minus comedat bibatque, plurimo tamen cruore scatet) ita & dilutiores ferosiores, blandiores temperatiores quidem, sed gelatinosis particulis magis orbatæ quæ differentia in brutorum carnibus coctis & visu & gustu deprehenditur. Laxe hinc minusque cum sanguine cohærent, viscidiores tamen & crassiores sunt qui partes sulphureas, salinas volatiles feroces mitigant magis, quique magis exinde premunt atque distendunt in ventriculo & primis intestinis, acidi & pituitosi succi stabulantur, spiritus ipsi animales debiliores, infirmi atque propemodum crassiores sunt ad turbulentas tamen commotiones proclivi &c. Qui summam

dicunt, foëminarum temperamentum humidum & frigidum appellant quod quidem nos de temperamento potius adscititio quam nativo intellectum esse volumus: videbis enim sæpe puellas longe vegetiores & activiores ipsis pueris; ob adscititium vero dein, inprimis vitam sedentariam & alia, frigidiores omnino sunt atque evadunt. Ob quos (humores) quidem non adeo pronæ sunt in morbos acutos, sed facilius in lentos & chronicos &c. incidunt. Virorum præterea humores consistentiam majorem obtinent, arctius sibi invicem cohærent atque calidiores sunt. Aristoteles eapropter mulieres a frigore minus offendi quam mares, ac frigiditatem illis magis esse proportionatam & minus contrariam, dixit. Hinc in HIPPOCR. *Oper.* passim legimus, quod viri calidi sint, mulierum vero genus omnino humidum & frigidum, illud ab aqua incrementum accepisse, unde rarum & laxum ad veluti fluidum; quamvis, non cum veteribus adeo rigoroſe, rem totam concipiamus, per experientiam convicti, non raro inveniri mares, foëminis frigidiores, molliores, teneriores, taceamus quod HIPPOCRATES ipse alio in loco nempe *Lib. I. de mulier. morb.* scribit: foëminam viro calidiorē esse, fervidiorēque habere sanguinem. Ex hac ipsa diversitate deducitur ut habet BACO DE VERVLAMIO in *Histor. Nat. Cent. VII. p. 893.* quod mares hyeme magis exardescant in amplexus venereos, æstate vero foëminas, quoniam nimirum spiritus animales in corporibus calidioribus & siccioribus virorum, æstatis calor exhalando dissipat, frigus vero magis condensat integrosque conservat, rursus in corporibus mulierum frigidis & humidis æstus fovet provocatque spiritus, hyems obtundit. Humorū variā hanc indolem innuit observatio LEV. LEMN. *Lib. II. de occult. Cap. XXII.* si verum est, quod de coralliis rubris habet, ea si a maribus gestantur, rubrum elegantiorēque colorem assumere; si vero mulierum collis adhærent, palleſcere.

§. XXVIII. Hinc humores in utroque sexu varie, in hoc velocius, in altero lentius moventur, siquidem pulsus in utroque est diversus; foëminarum enim pulsus a quo certa quædam roboris indicia sunt petenda; si eum cum virorum conferas exacteque observes, quod etiam annotavit GALENVS de *Caus. Puls. III. 2.* debilior & languidior est, quamvis celerior (a sanguine forte serosiori adeoque mobiliori). Mariū arteriæ ordinario pulſant vehementius, fortius & rarius atque æqualius, paulo tardius tamen. Ex quo inferendum, quod acutis morbis magis hi expositi sint. Respiratio quoque major est atque acutior & ubi hæc indicata præſto sunt, homines bene appetunt, digerunt ac egerunt neque

neque facile a causa quadam externa læduntur. Nec non aliæ partes illarumque functiones dispares sunt; Sic mares præter hoc, quod tardius ad maturitatem perveniant (non equidem secundum illam ridiculam ignominiosamque glossam in *Lib. II. C. de his qui ven. atat. imped.* quod mala herba citius, quam bona, crescat) ut nullum animal majori cerebro præditum est homine, ut Anatomici observaverunt ita & magnitudine cerebri præcellunt, ii quoque majori ventriculo gaudent vid. BARTHOLINI *anatom. Lib. I. p. 55.* MOEBIVS *Fundam. med. physiol. p. 152.* & LISTER. *de hum. p. 405.* Capaciores vero ventriculi nonnihil protuberantes ad chylicationem aptiores habentur, siquidem & illi, qui talem protuberantem ventriculum habent, voraciores sunt. Fœminæ quoque frequentiores alvi purgationes experiuntur. Has cœterum Natura, lato magis pectore dotavit. Variam dispositionem quæ exinde fluit aliæ quoque circumstantiæ innuunt; sic fœmellæ cutem obtinent pluribus lamellis (secundum quosdam Anatomicos) conflata atque novemplicem, non moraliter solum sed physice quoque, tenuiorem, leniorem, splendidiorē & porosiorē. Atque formosiores sunt, imberbes manent, clariorem tenuioremque edunt vocem, non calvescunt, capillis longissimis ornantur. Liquor serosus in pericardio, qui inibi duarum vel trium unciarum quantitate in statu naturali continetur, ordinarie vero copiosior invenitur in mulierculis, attestantibus Vesalio & Riolano. Puellæ facilius nutriuntur citius adolescunt crescuntque, celerius pubescunt citiusque iis vigor accedit simulque se ingenii vires ostendunt; siquidem & Jcti idem cum Medicis sentiunt, qui ideo citius eas a tutela liberant; citiusque ad conjugium admittunt; sed incrementa hæc iterum in fœminis desinunt, citius & eadem senescunt atque canæ fiunt; immo dum utero adhuc includuntur inter utrumque sexum discrimen jam hinc inde, a quibusdam notatur. Animi indoles, ingenii, judicii & memoriæ, intellectus & voluntatis vigor, vires, mores & inclinationes atque affectus & pathemata animi disparia sunt, quæ ut fert Galeni effatum, sequuntur temperamenta & corporis habitudinem, quoniam inter motus corporis & animæ, magnus datur consensus, atque hæc ad has notatas differentias hi motus in hoc, illi in altero sexu magis suum quoque conferunt & maximum quidem illudque urgentissimum symbolum. Notissimum est, ad quæ animi pathemata hic vel ille sexus magis inclinet. Nimirum fœmininum sexum ut imbecillem & tenerum sensibilioremque adeo acrius periculosiusque animi passionibus maxime infestare, horum omnium frenum minus injicere, minus

eas occultare, secundis rebus insolenter abuti; adversis vero propere debilitari & terrore, mœstitia, timiditate, anxietate, trepidatione, α) fluctuatione in agendis rebus, pudore, excandescencia subitanea, atque tacita iracundia, facile tamen sedanda zelotypia, diffidentia impatientia, fastidio, pusillanimitate, rebus in adversis animum dejiciendo imo desperatione citius faciliusque affici, altercationibus & rixis frequentioribus conturbari, per quæ pathemata morbos quanquam leviores, etsi hæc in hunc accidunt, majus periculum incurrit: Inter hos affectus nullus difficilior huic est, quam, quem amor occultus fovet aut ira; amorem, qui semper in eo fortior est, quidem profundius atque doctius occultare potest quam iram, sed ille eum gravius lædit quam hæc, quoniam minus commoditatis vel licentiæ ad satianda amoris desideria habet, ideo magis a libidine vel sale lasciviente affligitur & durius majorique cum periculo atque tabem & delirium aliæque mala incurrit quam virilis. Nullus vero in utroque morbus ita contagiosus quam amor; sive licitus sit, sive illicitus; sive manifestus, sive occultus, ut KOZACK loquitur *Tr. de Hemorrh.* p. 635. Nemo enim non scit, quantum hæc animi perturbationes simulatque phantasia perversa, ad morbos producendos faciant atque ipsis in morbis noceant, quoniam tum irregularis jam partium motus, tam solidarum quam fluidarum magis augetur pejorque redditur. Exemplo sit, quod commonefacit: In paritate causæ interimentis, facilius & citius interire timidos quam animosos, quoniam timor per se, efficacissima subinde causa mortis est, ut GALENVS docet *Lib. II. de sympt. caus. Cap. V. de locis affect. L. V. cap. I. L. XII. de method. med. Cap. V. & plurimis aliis in locis*: timor enim subito dejicit vires, & syncope accersitur &c. Experientia insuper docet, peste aliisque morbis præsertim contagiosis timidos facile corripì, immo alios quoque ut epilepsiam &c. a timore induci, vulneratisque magnum periculum inferri &c. Virilis sexus rarius quidem iis afficitur, sed ubi afficitur & occultat hæc animi pathemata, (occultat autem ea is magis) gravius etiam perturbatur: Ea enim est horum indoles pene omnium, quo magis occultantur aut dissimulantur, eo gravius alterant corpus atque afficiunt ac valetudinem lædunt, quod in viris etiam ordinario & magis videmus. Imprimis nocent ipsis luctus, mœror & tristitia sæpiusque videmus, eosdem ex

α) Cur mulieres ad has animi affectiones præ viris magis pronæ SYLVIVS *Prax. med. Append. Tr. VII. p. 767. §. 135.* hanc rationem reddit: quod ipsis sint subjectæ, quoniam omnis subjectio ejusmodi pareret, ut contra dominium gaudium & animum fortem; quam Aetiologiam vero mulieres hodie apud nos alibique rident.

ex cohibita iracundia in cardialgiam & dolorem intestinorum convulsivum incidere. Sequior sexus suspiria, querelas, lachrymarum eruptionem minus cohibere potest (easque ut & risum, quasi in potestate sua ut plurimum etiam habet) cujuscunque etiam illæ generis sint, five veri doloris five insidiarum, sed largius profundit; cum enim humidioris sit temperamenti, facilius & copiosius pressis & contractis vasis venosis glandularum lacrymalium, illæ profluunt. Harum profusio mire juvat eum, sicuti enim ignis scintillæ latentis affusis aquæ guttis extinguuntur, sic & mœrores & angores animam intimius excruciantes lachrymis demulcentur, atque suspiria laxant pectus, præcordiorum angustias & dolores deliniunt, querelæ in adversis levamen adferunt sic & ut Poëta loquitur flendo iras diffundunt. Rursus viri, ut ordinario assolent, decenti quadam ingenii ratione atque consilio, judicant de rebus ac deliberant, veritates investigant docentque exquisite magis, quoniam illorum mens a rebus externis & sensibilibus a cœptis non distrahitur, animi magnitudine mascule adversa contemnunt, perferunt, & excipiunt, pericula forti & generoso animo atque constanti obeunt & propulsant incommoda calamitatesque certius perferunt atque omnia superant feliciter mala quod animi robur ut recte monet *SENECA Lib. VI. cap. XXXII. Quest. Natur.* a bonis artibus & a contemplatione naturæ proficiscitur. Nam solidæ fibræ circulantibus fluidis ab imaginatione motis & turbatis magna vi resistunt & reagunt pari cum impetu & energia. Mulieres, si vehementi alicujus rei desiderio afficiuntur & voti minus compotes fieri possunt, dolore mœroreque magis turbantur, & querelas continuas gemitusque edunt: Hinc Seneca & Aristoteles dixerunt: omne imbecillum est querulum. Quæ inordinata animi pathemata varios eosque magnos appetitus, digestionis, excretionum, quietis læsiones, angustias præcordiorum, dolores capitis &c. sibi contrahunt. Attamen & hoc circa hanc rem observare datum est: quod mulierum genus animi quibusdam pathematibus præsertim iræ facilius adsuescat & iisdem sæpius recurrentibus, non adeo illius sanitatem offendant; verum virorum ac his gravioribus morborum difficilium aliquando solutionem experiatur, ob validiorem motus tonici energiam, qua illa exclusio unice absolvitur. De cœtero sunt & alia vitia moralia quæ sexui videantur adnata, ut in viro ferocitas, in muliere vanitas & vindictæ cupido &c. nec non theologica magis: Sic de mulieribus atheis nihil, de superstitiosis multa audimus. &c. Horum intuitu, qui nimirum tam de causis quam de morbis prolata sunt, comparatione instituta, foeminarum corpora puero-

puerorum & adolescentium, virorum, hominum imperfecta & consistente ætate constitutorum æquiparantur.

§. XXIX. Ad has & illas diversitates, contribuit haud parum vitæ conditio & consuetudo ac educatio varia. Multa certe sunt, quorum expeditio a foeminis suscipi, non ex earum naturæ defectu, sed ob nimis mollem earum educationem, non potest, quin iisdem multum sibi contrahant mali, quæ tamen masculis & faciliora expeditu & nulli prorsus damno futura sunt, eo quod ad talia eorum naturam magis quam foeminæ assuefacere non dubitarunt. Foeminæ nimirum, ob mollem delicatamque magis & sæpius velut otiosam, (otium autem vitia dat, ut in proverbio habetur) desidem, sedentariam, tranquillam, hypocaustis quasi conclusam, vitæ conditionem, & adversa forte, ut aëris aliarumque rerum injurias ægre ferre possunt, graviusque affliguntur, ac si afficiuntur difficiliusque eluctantur. Tametsi hæc vera sunt prostant tamen observationes, quod ejusmodi vitæ conditio foeminis saluti fuerit, quemadmodum apud HIPPOCRATEM 6. epid. 5. 7. sequentia legimus: *Mulieres non similiter a tussi afflictae sunt, verum paucae febricitarunt, & ex iis valde paucae ad peripneumoniam affectionem devenerunt, causabat autem hoc fieri, eo, quod non similiter velut viri in publicum prodeunt.* Quoad aërem vero & si aliquid de eo dicendum est, imprimis exsolvens aëris austrini constitutio & ad putredinem facile faciens & juxta hanc humida & frigida, foeminarum corporibus, est nociva. Aër, ventique calidiores & ficciores sic dicti melius conferunt iis. Rarum in hanc rem atque notabile est, (quod scilicet hæc constitutio aëris huic sexui, illa alteri magis conducat) quod MARCVS PAVLVVS Venetus Cap. XXXIII. de duabus insulis in sinu arabico meminit, quarum altera viris solis, altera foeminis tantum pestilens est. Idem fere fertur de Regione quadam inter Hunduras & Incutan, Hispanis Vera Paz dicta, quæ virili sexui magis quam foemineo favet, adeo, ut pro singulis viduis triginta viri, qui uxores morte amiserunt, inveniantur. Hoc loco & advertere simul licet, mulieres si recepta semel consuetudine priventur, multa ingentiaque damna præ viris exinde subire. Labores foeminarum etiam plurimi ita sunt comparati, ut otium magis quam exercitationem accedant adeoque etiam beneficiis illis privantur a corporis exercitiis alias expectandis: earum enim secundum SANCTORIUM in Med. Stat. S. V. 9. corpora non leviora fiunt & propter inhibitam perspirationem, quæ ubi in sanis deficit ab illis refarcitur, humores intra vasa redundant, &c. quod observatione SYDENHAMIVS declarat, quando de affectibus hysteri-

stericis differit in *Diff. Epist. ad Guil. Cole Oper. p. 388.* foëminarum, inquiens, paucissimæ ab omni horum affectuum specië prorsus liberæ sunt, si istas excipias, quæ laboribus adfuetæ duram vitam tolerant. Taceamus quod iis consueti ad morbos multos disponant & faciant, v. g. labor fuendi visus debilitatem inducit, quæ fila ducunt, iis caput agitur, salivalis optimus & servandus omni studio liquor perditur, fauces exsiccantur &c. lotrices patiuntur nauseam, vomitum, asthma, tussim, imo phthⁱ sin. Conf. hac de re *Disp. PRAESIDIS de aëre Lipsiensis §. 13.* Viri contra laboribus & varia vivendi ratione, itineribus, exercitationibus corporis variis & frequentioribus equitationibus &c. corpus firmant, ut injurias quasvis aëris, v. gr. & ejusmodi minusque alias consueta facilius perferre possint; Hinc HIPPOCRAT. *de morbis mulier. Lib. 1. Sect. V.* apprime dixit. *Multum viro confert, quod duriter se magis quam fœmina exerceat, vehemens enim exercitatio nonnihil humoris diducit expurgatque.* Arguto SANCTORIO enim notante *S. 5. 9.* exercitio corpora fiunt leviora, & spiritus tenuiores. Hæc revera ita se habent, ut plures foëminas delicatas alias in Anglia, imprimis illo amoenissimo secessu, qui Richmond vocatur prope Metropolim, notaverit Præses, cachecticas viscerum tantis obstructionibus vexatas, ut hypochondria essent dura & tumida, corporis habitu otio ac torpore corrupto & a medicamentis indies pejus se habentes, solo corporis exercitio, equitatione præsertim, commodæ valetudini restitutas. Hoc addimus, ut simul indicemus prolixè satis eleganterque causam & rationem explicasse SENECA *Lib. XV. Epist. 91.* cur mulieres fiant arthriticæ, quem egregium locum hic transcribere, pagellarum harum angustia vetat. Ast ut labores moderati corpus firmant, ita & immoderati, quibus potior sexus non raro exagitur debilitant; si enim sic corpus repente atque excessive commovetur, ex ea commotione nimia humores præter modum exagitantur, ac partibus solidis vis infertur, ac non modo extenduntur, relaxantur, ac debilitantur, quæ debilitas tandem, decubitus humorum admittit, sed & rumpuntur, ut alia mala exinde propullulantia taceamus; unde foëminas viris vivaciore esse dixit, quia nimirum minus moverentur *Illustr. BACO DE VERVLAAMIO Hist. Nat. Cent. IV. p. 818.* Apertus ampliusque campus hic panditur, per quem longius excurrere possem, si virorum labores, qui sanitati officiunt æstimare examinareque vellem; sed ne hujusmodi scriptionis modum non teneam, saltem nostros homines litteratos accedam, qui, laboriosi lucubrationibus sæpius vacantes dum lectioni & scriptioni præsertim operam dant interque eam pectus mensæ aut pluteo pressius in-

cumbunt abdomenque diutius incurvant, sicque visceribus ibidem compressis liberum motum sufflaminant ac stagnationibus fluidarum indurationibusque solidarum partium, occasionem suppeditant, indeque nyctalopsiam, aliaque oculorum vitia, hypochondriacum malum multasque alias ægritudines sibi contrahunt. De aliis videatur multus nec indiligens hujus rei censor RAMAZZINVS in *Tr. de Morb. Artif.* Insuper viri magis appetunt, plura ingerunt, ingesta felicius digerunt subiguntque & citius feliciusque egerunt; verum in mulieribus, alimenta assumpta plus in utile nutrimentum, in viris plus in excrementa rejicienda, mutantur.

§. XXX. Amplius quod huc facit, dicendum est, foeminas licet ebrias non æque plures videas adeoque vivaciores esse quidam reputant, attamen genio, blandimentis gulæ atque linguæ, quæ ut plurimum sunt nocumenta ventriculi rerum n. n. excessibus variis, cacochymiam tandemque cachexiam inducentibus liberius indulgere, appetere magis dulcia, saccharata, lacticinia, nec non acida ut & placentas, fructus, horæos &c. sæpius supra modum, quæ haud congrua diætâ, febres putridas, purpuras, exanthemata maligna, lumbricos &c. gignit; in potus vero quantitate debita esse parciores. HIPPOCRATES equidem mulieribus sicciorē diætā convenire scribit *Libr. de salubr. diæt.* quoniam eas humidioris & mollioris constitutionis esse statuit, sed hodie apud nos fere ubique in defectu peccatur: Omnis enim vita in humido consistit & siccando procedit. De viris hunc in modum notandum est, eos crapulæ, ebrietati & vinorum generosorum aut cerevisiarum inebriantium, ingurgitationibus copiosis, aromatum calidiorum nimio usui esse deditos, a quibus partes sulphuræ, oleosæ, volatiles, agiles, activæ, humorum massæ ingenerantur, quæ dein orgasmum præternaturalem excitant humoresque exagitant, ut majus spatium affectent ac canales in quibus feruntur expandant distendantque, siquidem vel pertinacissimæ congestiones humorum restagnationesque hinc inde fiunt aut mox rupturæ vasorum excitantur. Præter hæc mala ob vini potum copiosiorē, tartaream, ad calculos generandos, aptam materiam, colligunt. Variæ alias quoque consuetudines, hæ illi, aliæ alteri sexui propriæ magis simul sunt adducendæ, v. gr. Exc. WEDELIVS in *Dissert. de verrucis* eas frequentiores viris esse ideo autumat, quia hic sexus minus tenax sit decoris servandi minusque mollitiei studens. Coel. Aurelianus dixit, ideo foeminas cephalalgis vehementius teneri, quia capillos copiosiores in capite alerent. Sed jam plura non adducamus.

§. XXXI.

§. XXXI. Hæc adeo vera sunt, ut constet, fœminas non ad quævis negotia & labores fatis idoneas esse, ac viros fœminarum munia ægre obire ac difficillime infelicitèrque perficere, atque masculos quo propius ad fœmellarum constitutionem, genium & consuetudinem accedant, & quo magis otio & molli effœminatoque vitæ generi, delitiis, voluptatibus, indulgeant, eo citius faciliusque ejusmodi morbis eis familiaribus corripì, periculosiusque decumbere & vice versa, fœminas, quæ ad virorum naturam procliviores, & quæ viros imitantur laboresque & exercitationes fortiores exercent, immunes ab illis magis manere, ut exemplo possunt esse tenuioris fortunæ fœminæ ac rusticæ. Rursus quæ pravos virorum mores sequuntur cupedine, curiositate, temeritate ductæ, si se virorum intemperantiæ, ebrietati, vini & spiritus vini ingurgitationibus præter modum dant, familiares quoque iis simul experiuntur morbos ut podagram &c. de quibus SENECA *Epist. 95.* ita loquitur: *Fœmina cum virorum licentiam æquaverint, corporum quoque virilium vitia æquaverunt, & porro: fœminæ beneficium sui sexus vitiis perdiderunt, & quia fœminam exuerunt damnatæ sunt morbis virilibus.*

§. XXXII. Alia præterea ejusmodi quoque subsunt. Sic in amictus diversitate quædam, in quibusdam occurrunt. Quemadmodum vero sexus elegantior expoliri satagit, ac decentius ornari, quo venustatem formæque gratiam sibi conciliet: Ita non desunt exempla impeditæ depravatæque nutritionis in virginibus & mulierculis formæ nitorique præter modum studentibus, ad coactam gracilitatem sibi comparandam, quæ thoracibus illis, ex ossè ceti formatis, abdomen pectusque Phrygum more arctius stringunt comprimuntque, unde & circulatio sanguinis impeditur & respiratio fit difficilis, exindeque palpitationes cordis & dispnoæ eveniunt, alimentorum digestio sufflaminatur, impedito ventriculi & intestinorum motu &c. conf. TH. ERASTVS *Consil. med. a. L. SCHOLZIO. collect. No. 103. p. m. 278.* SIM. PAVLI *de febre maligna p. 104.* Atque credisne denudationem vel levissimis saltem ac subtilissimis transparentibusque obvelationibus protectionem illam capitis, aurium, colli pectorisque & infimi ventris cum pubibus fœminarum (quæ corporis partes æque nobilissimæ, tamen studiose defendendæ, contegendæ atque fovendæ sunt) tempore hyemali & sæviente gelu iis officere posse ac cephalalgiam, otalgiam, odontalgiam, catarrhos, vertiginem tumores glandularum colli, raucedinem, tussim, anginam aliasque faucium inflammationes, ventris tormina, diarrhœam, lienteriam, passionem hystericam suffocativam, apoplexiam sæpius indu-

ducere, aut ad ejusmodi noxas disponere? ut non mirum sit, si & ejusmodi morbis, qui rarius alias illis accidunt, frequentius se ipsas obnoxias reddant. Conf. FOREST. *Lib. XII. observ. 4.* Verum non modo hyeme sed & æstate (quo tempore cutis pori undique patuli sunt, quibus incaute constrictis, transpiratio maxime salutaris impeditur) plurimæ foeminae per intempestivam refrigerationem vario modo eoque præsertim præ aliis conspicuo, quando nimirum corpore nimium incalescente sudoreque perfuso flabellis, frequenter atque assidue subitoque frigidam auram sibi ad caput, collum pectusque, valida ventilatione, afflant. Contra quos (morbos) mares, vestitus conditione sui equidem muniunt; Sed est etiam in ea diversitate, quod ad morborum variorum occasionem in viris facere potest: focale, collum arctius constringens, caligæ abdomen & regionem renum dorsi prementes, cinguli, tibialia firmantes arctius contracti, in hunc censum venire possunt, ut de aliis circumstantiis ob chartarum angustiam jam taceamus, & in iis modo, quæ in aprico magis sunt posita, subsistamus. Quædam horum quidem in propatulo sunt, sed negandum non est, quosdam casus, in hac recensione occurrere, qui secundum has notatas causas vix explicari poterunt, sed quorum veræ causæ adhuc latent ex ulteriori observatione colligendæ v. gr. non statim evidens apparet causa, cur peripneumonia & angina vera sanguinea ut §. XX. est relatum, sexui potiori adeo frequenter accidat atque adeo funeste cedat, cum tamen spuria sequiori sæpius adsit. Hic non intactum prætermittendum est, seria etiam censura dignum, quando foeminae, quas CATVLLVS in *Epigram. ad Camer. p. 120.* lacteolas vocat puellas, ea dementia tactæ superbiaque ductæ ac si facies rubicunda rusticis decentior esset, ideoque ruborem istum, ex despectu odiosum habent, gratum pallorem atque urbanis nobilibusque dignum potius censent, adeoque pallorem per adversam valetudinem quærunt, atque creta, calce, gypso, arena, lapillis, cera hispanica, ex cannabe & lino filis deglutitis, aceto frequenter hausto & id genus aliis stomachum infirmant, vel crebrius incisa vena hæmorrhoidumque fluxu concitato, multum sanguinis sibi detrahunt, ut debiles fiant corpusque suum variis morbis iisdemque gravibus & diuturnis obnoxium faciunt, atque se ipsas præsertim, in mensium suppressionem, cachexiam & chlorosin præcipitant sicque per quod peccant: per idem puniuntur.

§. XXXIII. Maximum adhuc momentum superest, primoque loco collocandum: Scilicet, cum in foeminis humores increcant ac sanguinis plus colligatur, quam quidem ad vitam & nutritionem necessarium,

rium, almæ matris providentissimæ Naturæ optimo consilio est ordinatum, ut, quod superflui est (quo & simul multæ qualitate peccantes particulæ, salino-sulphuræ, acres pituitosæ secedunt:) singulis mensibus expurgetur, a quibus evacuationibus solennibus in fœminis (ut in quibusdam viris ab hæmorrhoidibus) omnibus dein quoque pendet sanitas, robore quasi quodam naturæ exinde concessio, omnisque maxime morbus; Etenim ubi rite fluunt, hæ fluxiones & superfluum noxiumque detrahendo & motus & molimina a superioribus & nobilioribus partibus ad inferiores revocando, illisque a pertinacia & constantia illorum, tutas præstando, a multis morbis liberant & præservant fœminas, qui alias viros frequentius vehementiusque premunt. Nam dum sanguis statim tempore excernitur superfluus, non molestare is potest, quo simul natura adsuescit molimina ejusmodi ad partes inferiores ablegare, ut superiores intactæ integræque ab incommodis ferventur. Nec mensium solum fluxus ordinatus fœminis auxilio est, sed & puerperium ipsum atque præsertim lochia bene succedentia iis feliciter sæpe cedunt, adeo ut multa a multis molestiis per solum puerperium liberatæ sint. Verum ubi inordinate (extraordinarii enim menses ut plurimum vel morbos vel mortem præfagiant vid. HAGENDORNI *Histor. Med. Phys. Cent. I. b. 86.*) & parcius justo fluant, aut supprimantur & plane deficient aut retineantur, aut desinant per ætatem &c. aut etiam lochia post puerperium non debite fluant, oriuntur frequentiora gravioraque incommoda &c. Nimia enim sanguinis abundantia mox-corruptelam contrahit, ex qua oriunda noxa excretionibus sanguinis diutius subsistentibus in toto corpore graves exsurgunt ægrotudines, atque lassitudines, languores, phlogoses, pallidi, luridi & fœdi cutis colores, efflorescentiæ, pustulæ, vehementes cerebri affectus, capitis dentiumque dolores, apoplexia, insania, passio hysterica, chlorosis, difficultas spirandi, faucium constrictiones, cardialgiæ, tussis, dispncea, palpitationes, polypi cordis, animi deliquia, inflationes gravativæ alvi, & ciborum fastidium, nausæ, ructus, vomitus, malacia, colicæ, alvi adstrictiones, fluor albus, hæmorrhagiæ, procidentia, inflammationes, apostemata, gangræna hydrops, molæ, scirrhi tabes, sanguinis per alia loca eruptio, varices rheumatismi, tumores œdematosi &c. prodeunt. Hinc recte notat Hippocrates, universos morbos, quibus mulieres laborant, ab aliquo mensium vitio derivari. Dehinc tametsi illa omnia recte processerint, novis tamen & insolitis gravidæ & parturientes malis implicantur atque adeo pariendo pereunt. De Hæmorrhoidibus par propemodum judicium valet, hæ

præsertim, si non rite se habeant, atque prodeant, exinde variæ alibi turbæ, congestiones, spasmi in specie ingentes manent viros. Uterus qui primo loco in hac consideratione nominandus ulterius ipse quoque ansam atque occasionem ad morbos concedit, ac si secundum HIPPOCRATEM consentientem *Lib. II. de Morb. Mulier.* uterum malorum quæ foeminis humani generis conservatricibus accidunt, voraginem dixeris, recte dixeris, hinc & illæ, quibus ademptus est uterus, (ut mulierum ejusmodi sectores Lydi memorantur, inferentibus ex IOH. BROD. *Miscell. Lib. V. cap. III.* CONR. RITTERSHVSIO *ad V. instit. de Publ. Judic.* item ex ALCIATO in *L. Spadon. 128. de Verb. signif. § 4. Antiq. Lect. 10.* HENR. KORNMANNO *de Jur. Virg. Cap. CXVI.*) saniores longe longævioresque observatæ sunt; etenim ob innumera vasa quibus stipatus est tantum ægritudinibus ansam præbet, quantum succorum æquilibrîi rationes, necessitates, occasiones multiplicat. Ne a scopo longius aberremus, hic quidem omittamus ea vitia, quæ abortum & id genus sequuntur illosque dolores, quos exinde mulieres sufferunt, ea hic saltem consideremus incommoda, quæ extra gestationis foetus & nutritionis in utero, partus, lactationis negotia accidunt, & quæ vel per connexionem & notabilem consensum ejus, utpote summe sensilis partis cum aliis partibus, ut vesica, intestino recto, proxime, & cum pluribus aliis remote per nervos, vasa reliqua, ligamenta, ut renibus, liene, hepate, ventriculo, intestinis, diaphragmate, atque corde & pulmonibus &c. per quem (consensum) facta irritatione alias in consensum trahit partes, atque ab aliis trahitur, ut experimur, in calculo renum & vesicæ, in vomitu graviore, colica, tenesmo &c. quicquid etiam in contrarium afferant alii, qui uterum ab omni culpa absolvunt. Conf. C. PISO *de prætervis. hæct. morb. observ. 74.* WILLIS. *de morbis convulsiv. Cap. X.* SYLVIVS *app. prax. med. Tr. VII. 133. seqq. Tr. X. 328. 785. seqq.* HIGHMOR. *de pass. hyster. Cap. III.* Juxta hæc excreta & retenta, etiam spermatici humoris vel immoderata excretio, vel justo diuturnior suppressio, quæ in hac classe quoque recenseri solent, utraque utrique sexui noxia est; sed sequiori periculosior quam potiori; quomodo vero utrique succurri consuli que possit, videant alii. Taceam modo, quod adeo multis ærumnis gravidæ graventur atque parturientes dein periculis ac ægritudinibus aggrediantur, adeo ut præstet ter in acie stare quam semel parturire, siquidem & partus difficilis semper aliquid mali parturit.

§. XXXIV. Has observationes solerti attentione, quantum huc usque nobis licuit, notatas pro ulteriore consideratione ac pensitatione

com-

commendamus, atque interim frequentia tantum adhuc addamus. In conservatione sanitatis atque præservatione & curatione morborum igitur ad hæc recensita maxime animus medentium advertendus erit. Nam non modo, ut HIPPOCRAT. *lib. de morb. mulier. Cap. XX. n. 73.* notanter dixit, sicut differt sanitatis regimen, ita & differt ad faciliorem & difficiliorem liberationem, vir a foemina, sed & differt vere ut differunt causæ occasionales, in utroque sexu, verus modus, & alia remedia & medicamenta masculis, alia foeminis magis conveniunt &c. Sic v. gr. GALLENVS monet *Lib. IV. de Compos. med. Cap. I.* in ulceribus mulierum ut & puerorum & eunuchorum ejusmodi usurpanda esse medicamina, quæ maxime exsiccant, citraque morsum, & si mordicent ut metallica, prius esse lavanda ob molliorem, teneriorem & humidiorum earum naturam ejusmodi pariter in mulierum corporibus plenis sanguine facile inflammationem accersere dixit AETIVS *Tetrabl. IV. Serm. II.* & RAMAZZINI *de chin. chin.* notat: in foeminis eam esse nocivam, quia vitam sedentariam ducunt & parciori potu utuntur; nam china chinæ concentrat humores. Pariter Clariss. G. E. Stahlius fatetur, quod mixturam simplicem, eadem libertate ac liberalitate; imo vix aliquando, in foeminis exhibeat quodque aliam essentiam alexipharmacam dilutiorem loco ejusdem substituat vid. STAHLII *Observ. med. pract. a Gætzio recens. Cl. I. de febr. p. 78.* BAGLIVIVS *Dissert. de Usu & abusu vesicant.* notat: ea delirantibus maribus admota, damnum potius quam utilitatem attulisse, pluresque ex iis mortuos esse, quam sanatos, contra mulieres delirantes adhibitis iis (vesicatoriis) in melius processisse, cum levamine symptomatum, morbi & sanitatis recuperatione. Causæ præsertim bene expendendæ, quænam illarum in hunc vel in istum sexum cadant, & differentiam frequentię aut infrequentię, morborum difficultatis & periculi majoris aut minoris, constituunt atque inducunt, ut hæc occasiones mature præcidantur, atque major cura, majorque circumspexio adhibenda in illum scilicet sexum, qui ad frequentiores, graviores, curatu difficiles & periculosiores morbos magis pronior est. Mulierum vero genus, imprimis earum, quæ steriles alias sunt, ut ex adductis patet, pluribus & difficilioribus morbis semper obnoxium est, qui symptomatum magnitudine, numero, frequentia, varietate, sævitate, resistentia, occulta malignitate, cognoscendi difficultate, sunt stipati, quique semper ampliore observandi discendique ansam (juxta infantum morbos) præbent. Præ omnibus autem aliis gravidarum & parturientium affectus curam anxiam, difficilem & dubiam reddunt, siquidem his major impen-

dit

dit incommodorum & malorum ilias ut enim unda undam sic in his, multoties, morbus morbum trudit atque mira subinde luditur scena quæ plura semper observandi discendi ansam præbet. Omnia inprimis eo sunt dirigenda, ne ullo modo foetus lædatur, circumspicte igitur ubique agendum maxime circa purgantia &c. In specie difficilis partus semper propemodum aliquid mali simul portendit. Verissimum hinc effatum non solum HELMONTII, sed & jam dudum HIPPOCRATIS est: *fœminam omnem morbum bis pati, quatenus nimirum est homo, & quatenus fœmina.* Atque memorabile etiam hinc illius HIPPOCRATIS nempe dictum est, quod habet *l. de nat. mul. Cap. I. v. 11.* *Ille qui feliciter mulierum morbos tractare vult, curam a Diis ordiatur necesse est.*

§. XXXV. Hæc in genere scilicet teneantur, ut teneritudini ac sensibilitati majori, imbecillitati, delicatæ indoli & muliebri mollitie consulari & delicate quoque & ipsa mollitie mollius cum illa agatur atque ut tonus partium solidarum in fœminis respiciatur & justo laxior iis ferre connatus confortetur per appropriata tonica. Quare his convenientissima erunt tam sanguinem & humores quam partes solidas confortantia, roborantia dicta, ut balsamica & oleo subtilissimo & gratissimo, item gummatibus resinaque suavi instructa, item salia volatilia, oleosa temperata, ut succinum, mastiche, opobals. resin. lign. aloës. santal. flav. saffras. caryophyl. cardamom. herb. lavend. majoranæ rosmarini. serpilli &c. bals. peruv. de Copayv. myrrh. camphora &c. item fixiora, terrea & terreo-salina, cort. Peruvianus chacarillæ contravervæ, ossa cornua & dentes animalium præparat. philos. ex mineralibus martialia modica, prægressa tamen plethoræ ventilatione terræ sigillatæ silesiacæ lemnæ &c. & ex his præparatæ tincturæ & essentia, essentia balsami peruviani, sal. volatile oleosum Sylvii, tinctura coralliorum, ess. succini. saffras. spiritus cornucervi succinatus spiritus Buffii & præ aliis balsamus vitæ Hoffmanni & similia. Cum a levissimis causis suffocationem uterinam incurrant, caute & circumspicte semper cum fœminis agatur, tam a medico quam adstantibus, famulantibus v. gr. vel a solo extinctæ recens candelæ nidore, gravissime offenduntur. Hocque addo, juniorum practicorum gratia, experientia doctus, quod in curatione hysteriarum ab purgantium & præsertim martialium exhibitione sæpius magnæ tum animi tum corporis perturbationes atque non modo primis diebus sed & per totum tempus, quo illis utuntur, molestant; quæ vero molestiæ non terreant atque statim ab usu horum abducant, eæque laudano opiato cum aqua aliqua antihysterica mixto, singulis noctibus ad tempus aliquod

aliquod propinato leniantur atque fistantur. Ubique exulent suaveolentia, quæ rarius foeminæ perferre possunt, sed uterinam suffocationem hæc concitant, imprimis ambrata, moschata, utpote quæ statim caput & uterum turbant, quæ tamen mares & reficere & nutrire & quidem instantanec, habetur; quas tricas vero extricatas, a me, jam non expectes. E contrario accepta iis propemodum sunt atque proficua castoreata. Camphorata, licet præstantissima antihysterica, tamen non paucæ reperiuntur præsertim plethoricæ & calidioris temperamenti, quibus ea admodum adversa, quoniam illico caput petunt cerebrumque ferunt imbecillius. Præter modo adducta suaveolentia, ob eandem rationem, medici quoque prudenter a dulcibus, saccharatis, mellitis & similibus fermentescibilibus ut & acidis (licet ea plurimæ appetant avidisque faucibus, magnis sæpe haustibus infundant) excessivis salibusque nimis abstineant, quæ non modo morbum pertinacissimum & deterri- mum reddunt, sed & novos subinde cruciatus afferunt. Celeberr. STAHLIUS v. ejusdem *Observ. med. præct. de feb.* notat: Mixturem simplicem ob victrioli nimiam aciditatem non æque probat, loco cujus potius utitur conchis præparatis succo citri saturatis. Quantum nimia acida ingesta gravidis & foetui noxia sint vel sola observatio doceta GARMANNO *Epist. LXXIII, p. 308.* conscripta de Nobili quadam foemina, quæ uterum gerens non nisi alimenta & potulenta acida expetiit avideque copiosa ingessit, quæ postea foetum absque epidermide exclusit. Sic & frigida in copia hausta, mulierum sexus, qui frigidior censetur quemque res quæcunque facilius afficiunt, ægre ferre potest, quare consultius agunt illi qui acidulas v. gr. foeminis paululum calefactas & tepidas usurpandas suadent. Sic & foeminis circumspecte admodum vomitoria danda, cum exinde facile vomitum cruentum præsertim plethoricæ & circa instans tempus menstrui fluxus itemque gravidæ atque hysterica incurrant symptomata. Præctici affirmant: pilulas purgantes foeminis magis convenire quia sunt humidiores & pituitosiores, ac fortiora paulo purgantia iis admodum nocere verum quæ menstrui laborant retentione vix quidem illis expurgantur. Ad purgationem item ineptas mulieres Aetius pronunciat, quibus menses valde effluunt. Sanguinis vero missiones, in pedibus ut plurimum semper celebrandæ, largioresque in iis esse possunt, utpote quæ tempore catameniorum intercalari secundum B. BOHNII effatum v. *de officio Med. dupl. p. 257.* semper plethoricæ dicendæ sed & hæ circumspecte sunt administrandæ, præsertim in tene-rioribus, sensibilibus & iis quæ exilia habent vasa, in quibus scarifica-
Kk kk
tiones,

tiones, venæ sectionis vicariæ, potius locum habent. BAGLIVIVS bene advertit *tit. Oper. Edit. Lugdun. p. 256.* vesicatoria magis obesse viris quam foeminis delirantibus, eo quod mulierum fibræ molliores sint & flexibiliores & crispationi minus idoneæ quam marium, quorum fibræ sunt duræ atque densiores. Singulare est nobisque non adeo certum, quod PARACELSVS *tr. de Pestil. p. 347.* asserit, bufones applicatos bubonibus magis sexui sequiori, auxilio esse. Cæterum idiosyncrasias plurimas apud foeminas observabis, quare Medicus inprimis, qui earum naturam nondum satis perspectam habet, semper curioso, suspensio animo suspensaque manu medicamenta iis præscribat. Præsertim uterus & mensium ac in quibusdam hæmorrhoidum conf. §. XVII. negotium bene observeatur, illudque circa instans tempus adjuvetur, pillulis balsamicis, Elix. PP. sine acido, crocatis &c. pediluvii, V. S. in pede, potu calido. Imperot diætam convenientem strictioremque (quoniam, ob dictas rationes etiam facilius ab ejus neglectu læduntur) potumque ordinarium sufficientem, aëre frigidiori, maxime humido, ac fumendis digestionibus difficilioribus speciatim acidis, fructibus horæis fermentescibilibus, flatulentis, (quoniam passiones chronicas, hystericas, sanguinem coagulando, spiritus supprimendo, circulumque ejus æquabilem impediendo, menses cohibendo, pariunt hinc Belgiis fluor albus frequentissimus est) ut & lacticiniis nimis, gravi animi commotione expertem. Atque attendatur, an obstruantur, an sufficientes illi sint nec ne, an morbos præcesserint, an mox sequantur, an per ætatem emanent, quoniam cum Hippocrate existimandum est, nullum facile in sexu muliebri affectum dari, qui non ab utero aut oriatur, aut propagetur, aut nutriatur &c. Atque hæ circumstantiæ non modo plurimæ morborum causæ existunt, sed & pro vario illarum statu, si aliis morbis junguntur ac superveniunt & graviores eosdem reddunt, & multorum remediorum applicationem impediunt. Igitur optimum medium ac remedium est, contra morbos sexui sequiori familiares iterum atque iterum commendandum, humorum nimiam abundantiam imminuere & exinde nascituram corruptionem avertere & cacochymiam corrigere, strictioris diætæ observantiam in rebus sex non naturalibus sedulo injungere, cui scopo præsertim inserviunt tempestivæ sanguinis missiones & evacuationes, iterata blanda laxantia, abstinencia somnus moderatus motus & exercitatio corporis, cœli mutatio per commodas peregrinationes institutas, liberior potus cerevisiæ tenuis & aquæ fontium salubrium tepidorum tamen potius quam frigidorum & etiam calidæ herbarum infusarum & incoctarum ut theæ,

theæ, caffèe, succolatæ. Nec nostris fœminis hodie ac olim vinum adeo severe interdicens, quemadmodum apud Valerium Maximum legitur, quod conjugem Metillus fuste delumbatam atque mulctatam quod vinum bibisset, interemerit, ac istud quidem abominabile facinus non accusatore tantum sed & repensore caruerit. Qui fœminas feliciter vult curare, reliquis intermisceat ejusmodi, quæ hysterica passionem juvant, ut castoreata &c.

§. XXXVI. Præterea aliæ quoque subsunt causæ adhuc adducendæ eæque morales, quæ tam diagnosin, prognosin quam ipsam sæpius curationem morborum in fœminis, præsertim virginibus iisdemque honestioris conditionis, difficilem & dubiam aut frustraneam aut impossibilem reddunt. Plurima enim minus in medico ob verecundiam licita sunt, v. gr. constat purpuram primum circa pectus erumpere, quæ tamen inspectio medico & minus convenit, & minus licet, æque ac contractio hypochondriorum in febribus acutis, an dura sint, an molliter distenta, quam tamen diligenter commendat HIPPOCRATES *epid. t. 2. ægr. 2.* Hæ ipsæ etiam frequentius, monente Hippocrate se ægrotare ignorant, donec tempore & necessitate edoctæ atque adductæ magno suo damno suos morbos denuo dignoscant atque ob pudorem (qui si ingenuus est & in viris laudatur; subrusticus vero culpatur) sæpius intempestivum multa tenacissime reticent, præsertim medicis junioribus & innuptis aut non sufficienter manifestant, cum tamen tale silentium ipsis, medicisque valde noxium sit hos morbos simul aut alios dissimulant, ut fluorem album & id genus alios famæ forte suæ nocituros aut ad interrogata minus recte respondent atque remedia congrua non prompte admittunt regimenque debitum rectumque adhibendi modum negligunt. Atque adeo nituntur in vetitum frequenter cupiuntque negata medicos chirurgosque reformidant respuuntque penitus de qua re varii varias collegerunt observationes, ut GUIL. BALLONIVS *Epid. & Ephem. Lib. II.* IOH. BAPT. SIDONIVS *Misel. med. cur. Tr. XXIII. p. m. 114.* N. TVLPIVS *Lib. III. obs. med. Cap. XV.* IOH. HENR. BRECHFELD *Act. Haffn. an. 1671. & 72. obs. 108.* MONTANVS *Lib. de affect. uter.* Hinc CELSVS dicit: *Pleraque mulieres propria sua culpa percunt, dum pudore per-fusa secretiores corporis affectiones revelare non audent, cum tamen necesse foret, ut liberius de his conquererentur.* Ast idem in masculis quibusdam occurrit, præsertim initiantibus podagricis, de quibus SENECA jam *Epist. 53.* sequentia enunciavit: *Pedes dolent, articuli punctiunculas sentiunt: adhuc dissimulant & aut talum extorsisse eos dicunt, aut in exercitatione aliqua laborasse,*

borasse, dubio & incipiente morbo queritur nomen. Si & victæ oculos manusque ipsas medici atque chirurgi admittere cogantur pudor ipse ipsum morbum sæpe exasperat atque impedit sanationem; ita verecundia quæ frenum forte erat naturale vitiorum moralium suppeditat ac adgravat physica atque corporis. Sic & dein verecundæ sibi partum reddunt difficilem ac post eum lochiorum fluxum suppressum. Commentationem hinc meretur atque imitationem in Gallia parturientium mos quæ suæ & infantis saluti atque vitæ melius prospiciunt conquiendo commodum ex utroque sexu ministerium: ille enim pudor est affectus animi, æque ac tristitia ac ira amorque insanus qui immodicus multas turbas in corpore humano efficit, nam corporis partes & imprimis faciem afficit ut rubore suffundatur & ut modo incalescat, modo paleascat ac pulsus inæqualitatem membrorum quandam vacillationem, linguæ hæsitantiam, oculorum in terram demissionem &c. inducit, quæ phænomena quæque indoles pudoris, quæ apud MACROBIUM *Saturnal. Lib. VII. cap. XI.* & SCIP. CLARAMONT. *de conject. moral. Lib. X. cap. XI.* fuse describuntur, ostendunt insigniter tunc sanguinem & spiritus alterari. Quæ alteratio adeo quandoque fit enormis, ut exinde syncope etiam convellantur ut modo adductus MONTANVS *l. c.* exemplum de nobili quadam virgine addidit. Non negandum etiam est, quod medici & chirurgi cum foeminis ægris aut justo verecundius aut timidius quandoque agant, hincque nec accurate satis has interrogent sive in harum pathematum pro rei exigentia inquirent, remediaque singula debita applicent. Taceamus plurimas earum lubricas inconstantes, variabiles & inobedientes esse, atque modo affirmare, modo negare, modo velle modo nolle atque quasdam interdum dolos malos callide struere, aut morbum quendam dissimulare aut simulare medicoque imponere. Hinc aperte & perlicenter fatetur KOZACK in *Tr. de Hemorrh. Lib. II. cap. IX. p. 600.* ob hanc ipsam rationem difficillimum esse, foeminarum morbis mederi: verba ejusdem sunt sequentia, quibus quidem venia sit: *Difficillime est foemininis mederi morbis, quia ex profundis admodum surgunt principiis, & quos foemine gestibus nequeunt fallere, fallunt verbis. Ad pervestiganda foeminarum secreta actu opus est, eoque admodum occulto; nam si animadvertierint aliquem vel in gestu vel in verbis, non saltem paribus, sed & occultioribus illudent insidiis astutorum. Ego revera magis gaudeo familiaritate virorum quam foeminarum, quia me vestigia terrent.* Ast & hic sexui fortasse aliqua debetur venia ob ipsam ejusdem debilitatem. Quare pauca interrogare, plurima, ex externis aliisque circumstantiis sæpe tamen fallentibus,

aut

aut hariolari aut ab adstantibus & ministrantibus sæpius imperfecta minusque certa ac firma, rescire prudens medicus potest, sicque eventum ambiguum expectet, necesse est. Ob alias quoque causas morales sexus foemineus in morbis pejus virili se habet, quoniam ordinario magis timidus est & animum illico despondet; qui animus enim sic turbatus, pessimam quoque corpori turbationem inducit; His accedit, quod propter obstetricum similiumque parastatarum ignorantiam, sæpe male cum mulieribus agatur remediaque inconsiderate applicentur, si forte profundior partium affectarum situs aliæque circumstantiæ talia requirunt; siquidem & consulunt plurimis ægritudinibus pressæ, potius foeminas easque vetulas, ac si talium affectuum melius conscia essent & eos prius expertas, præcipue, si occultare morbi forte turpitudinem fatagunt. Alter vero magis confusus beneque sperans omniaque cum majori patientia, tolerantia firmoque ac constanti animo ferens, sane felicem eventum facilemque sanationem promittit.

§. XXXVII. Virorum, ob varias causas hucusque indicatas igitur curatio securior suscipitur & liberius cum iis agere, interrogare, ultro contrectare explorareque Medico licet, & illi ad indicandum respondendum explorandaque necessaria paratos se magis exhibent, quod haud leve ad felicem cognitionem & curationem momentum est: secundum HIPPOCRATIS dictum: huc etiam referrendum in quovis morbo valere ratione, recteque se habere ad ea quæ offeruntur bonum: contrarium vero malum. *Aphorism. Sect. II. 32.* In specie adhuc hoc saltem denuo teneatur, nempe ut in foeminis juxta animi mollis in corpore molli, in bono moderamine conservationem commendandam, uterus & menses semper sunt considerandi, ita & alter oculus in viris tractandis ad hæmorrhoides, eorumque fluxum dirigatur, an molimina excitent, an subsint, an legitime fluant, an ægre moveantur, aut penitus obstruantur. Cum & secundum observationem Sanctorii provida Natura in quibusdam viris loco hæmorrhoidum certo statoque tempore evacuatione paulo copiosioris & turbulentæ urinæ prospexit, convenientissimum erit, hanc evacuationem attendere, atque in tempore interdum hoc naturæ opus, hæcque molimina per debita diuretica aut juvare, aut restituere, aut proritare aut augere. Est autem observatio ista sat notabilis ac curiosa, dignaque quæ ulterius consideretur, quæ habetur in *med. stat.* prælaudati Curiosissimi SANCTORII *Sect. I. aph. 65. & 66.* Quoniam & in viris ob constrictiorem corporis habitum ut supra est adductum excretiones per poros cutis præsertim parcius procedunt, de illis pro-

movendis ac facilitandis ubique cogitandum erit. Semp̄rque virorum viribus ut robustiorum non nimis fidendum, quia sæpe noxæ levitatem non statim manifestam, gravitas insequitur. Igitur ob causas & rationes adductas discrimen facientes hic etiam cautione opus est. Sed quo delabimur inviti quare vela (ut ajunt) jam contrahimus & ejusmodi tractationem alio tempore Deo dante persequemur.



XIV.

DISSERTATIO MEDICA
SISTENS
ÆGROTANTIVM CONCLAVE,

P R A E F A T I O.

STrenuus, prudens ac solers Belli Dux, ut urbem recuperandam feliciter vincat & capiat, hostesque e sede sua ejiciat, consiliis concordia stabilitis cum agminum Ducibus prudenter nixus, belli statum, militum armorum, annonæ omniumque aliarum circumstantiarum conditionis atque qualitatis bene noscens atque despiciens quid agendum sit quidque omittendum rite & prudenter conjectatur, disquirat, deliberat, nihilque differt & quod deliberatum est bene, statuit atque omnem debitum apparatus prius bellicum construit instruitque, & quam maxime cognitum meditatumque habet, quo potissimum armorum genere, cum hostibus oporteat congregari; ipsum dein Martis discrimen forti animo firmoque pectore cominus eminensque pugnaturus init, urbem, corona cingit, suis, quid opus sit factu, præcipit: copias turbasque in diversas partes agi jubet, quando ubique Peditum aut Equitum educere expediat, ex quo angulo accersendæ sint auxiliatrices copiæ, expendit, cuniculos agit, obliquos aggeres exstruit, mœnia gravibus arietibus quatit atque tormentis sternit atque subruit, resistentes ac propugnantes fortiter aggreditur, insequitur illos &c. Interea simul & omnia undique perspicit, omnibusque prospicit, castra sua vallis, aggeribus fossisque circumdat, propugnacula roborat, omnesque aditus provide

vide valida manu occupat firmatque, contemplatus ab omni parte loci naturam, excubias distribuit, sufficientique præsidio custodit, ne digittum quidem, ut ajunt, transversum ab armis discedit, omnia a dextra lævaque a fronte pariter atque a tergo tuta præstat, imo fines extremos tuetur, atque simul seditionum femina tollit, nunquam securum satis se æstimat ne insidiatores versuti, inermem opprimant atque inopinantem, (ut enim miles gregarius semper audax, ita Dux nunquam securus esse debet, memor Pelopidam & Marcellum nimia securitate, uno die omnem multorum lustrorum perdidisse gloriam) neque unquam cautius excubias agit, quam cum hybernat vel inducias interponit atque pacis speciem exhibet hostis. Nunquam non stat pro castris semperque excubat etiamsi tranquillus rerum status esse videatur, atque interim hostes imminentes utroque oculo observat, quorsum se vertant, an aggressiones tentent, an quieti subsistant, an retro cedant, imo cum fugam simulat hostis, ne ab externa vi & vel longissime etiam veniente hoste aut in opere impediatur arceaturque, ac ne tam virtute hostium quam vitio suo inopinans obruatur at vincatur neque obsessus omni auxilio omnique comineatu privetur atque intercludatur. Rursus interdum vel angustia & difficultate loci, vel rerum necessariarum inopia mutat castra, vel ubi vi agere non semper commodum optimumque videatur, versutia, calliditate, stratagematibus circumvenit hostem, molitur dolum & machinas, componit fallacias (quæ in bello vel juxta alios, in amore quoque) æque ac in Medicina conf. PLATO 3. *de republ.* HIPPOCRATES *epid.* 6. 4. 8. GALEN. *Comment.* 5. 84. *method.* habentur & probantur) secundum enim POLYBIUS *Lib. IX.* in bellicis rebus minoris sunt momenti, quæ manifeste ac cum violentia perficiuntur, quam quæ cum dolo ac opportune fiunt. Nihil insuper inexpertum, nihil metu vel negligentia omissum relinquit, bene gnarus oscitanter & languide in bello rem agere, periculum ac impensas & hostium potentiam augere, & timidis animum addere. Ast non minima etiam virtus in bello, hostem expectando fatigare & morando illudere, unde illud de Fabio Maximo notum: unus homo cunctando restituit rem. Adhuc æque magis bello quam medicinæ quadrat: bis peccare non licet. Adeo verum est, prudentem Medicum cum Imperatore bellico perito comparari posse, posse cum militia medicinam, ut existimem Medicum qui debet esse malorum depulsor fidusque sanitatis comes & qui artis ope feliciter cupit morari festinantia mortalium fata, rectissime agere, qui studet imitari talem solertem ac prospicientem belli Ducem, quique semper & ubique aliquid facit, salutis

lutis hominum causa. Etenim uti illum fortitudo, constantia, prudentia, vigilantia, astutia, concordia & reliquæ militares virtutes ornant atque condecorant, sic Medicum quoque iisdem præditum commendant atque evehunt. Ambo hostem aggrediantur, ambobus ut vires suas cum hostibus iisque sæpius occultis, violentis atque perniciosis metiantur necesse est. Amborum victoria pax salusque finis est. Quemadmodum in bello, ita quoque in arte nostra medica nihil fere tam leve est, quod non magnum interdum rei faciat momentum; Levia autem & minima non censenda, quæ ad hominis sanitatem quomodocunque conferunt. Externorum speciatim quoque ea est conditio, ut licet minima interdum illa visa sint, ita tamen afficere naturam possint, ut illius actiones salutares impedire & irreparabile detrimentum afferre, imo præsidia medica reliqua exhibita eaque optima, frustranea reddere vel evertere prorsus, valeant. Et hoc ipsum est quod HIPPOCRATES, qui ad minima sæpius descendit, aph. illo *primo* nimirum *Sect. I.* scite monuit. *Nec solum, inquit (medicum sc. præstare se ipsum oportet, oportuna facientem, sed & ægrum & assidentes & exteriora &c.* Rursus *Lib. VI. epid. t. 27.* *Non parum refert, quo in loco quis decumbat, ut melius aut deterius se habeat aut curetur &c.* item *l. c. text. 36.* *Boni medici est & cubiculi domus & lecti & externorum providentiam habere, atque omnia disponere, ut maxime ad ægroti gratiam & utilitatem referantur.* Et GALENVS maxime copiosa satis oratione commodavit idem *6. de morbis vulgaribus com. 2. p. 330.* Ideo providus medicus, quem ratio ducit agentem, cui cum irreconciliabilibus humani generis hostibus, morbis scil. fors subeunda est, horum omnium conscius, cum harum rerum alterius altera poscat opem atque quasi conjurent, intentus ad cuncta sit, omnia accurata mentis indagine constituat, ordinet; disponat, ut omnia omnibus pro artis ratione, respondeant, adversa avertat, nihil temere ac fortuito agat, semper loca summasque occasiones, quarum præcipue parva momenta ad res sæpe maximas causæ existunt, nanciscatur atque adsequatur non modo satis habeat præscripsisse & applicasse utilia, apta & præstantissima remedia, quibus velut armis idoneis debellare morbos conatur, quæ illorum causarumque exigit series, sed & simul reliquas circumstantias omnes rite attendat, prospiciat, regimen quoque circa externa circumspecte observet, omnia examinet provide, nihilque admittat facile, quod ægris ullo modo nocere aut illorum saltem convalescentiam remorari posset. memor, illum demum perfectum medicum dici, non qui omnino curat, sed qui nihil eorum quæ ad utilitatem ægrorum & curam pertinent,

omit-

omittit. Tanto magis enim in ægris & circa eos omnia exacte sunt observanda, quanto magis obnoxia læsis infirmitas est, ut re bene undique gesta, ut virum diligentem probum ac conscientiosum decet, parata ante salute, illaque firmata profligatis morbis, clarus ratione, consilio & industria constet, & digna reportet tropæa. Quivis jam hinc intelligit, quid me, de ægrotantium Conclavi scribere impulerit, utpote errores, qui circa hoc ipsum quotidie & ubique committuntur, aut non advertuntur, non leve subinde damnum, ægris adferre solent. Omnia enim hæc ad Diætam pertinent, ex cujus ordine in curandi ratione (etiam maximorum & pertinaciter resistentium malorum) præsidia, primo loco, primaque acie ordinario forent collocanda (contradicientibus licet PARACELSO vid. *com. aph. 5. sect. 1.* & HELMONTIO, & qui eos sequuntur) quibus scilicet sæpius solis, nulla vero sine illis absolvi potest curatio, & tutissime; cum in reliquis haud raro aliquod subsit periculum, quod veteres maxime agnovisse videntur, Asclepiade Duce, qui plures cura, circumspeditione, regimine bene ordinato, impediendo malum aërem &c. quam medicamentis sanaverunt. Quo etiam GALENVS respexit, *in comm. in Hipp. L. de V. R. in acut.* Quare ea tantum proferam, quæ a plurimis ignorantur, a multis negliguntur & ab omnibus tamen observari debent, præsuppositis artis nostræ salutaris fundamentis, quamvis etiam inopibus & omnium facultatum vacuis, frustra plurima quæ sequuntur, imperentur. Te vero B. L. humanissime rogatum cupio, ut laborem hunc nostrum æqui bonique consulas, veniamque concedas; si quando omissa adhuc, errata, aut inæqualitatem dictionis aut ordinem perturbatum interruptumque annotabis, quod non ampliori pomærio itidem finitum illum voluerimus, ac non continuus quidam, sed interruptus sæpius & festinatus fuerit labor. Deus cæterum T. O. T. Q. M. votis nostris adsit, precamur.

§. I. PRIMAS ut inter diætæ objecta sic etiam præsentis tractationis aër, nos undique ambiens, quemque continuo inspiramus, & quo nec in secunda nec adversa carere possumus valetudine, tenet, ac non modo primas tenet, sed & maximam complectitur partem, quæque enim hic considerantur fere non alterant, nisi alterato aëre. Namque licet etiam non adeo intime ingrediatur mixtionem corporum atque non concreascit cum corporibus mixtis, aut cum sanguine & humoribus animantium; maximas tamen mutationes in iisdem efficit, siquidem hic vel per modum suæ compagis, modo per affectiones suas, modo per varium motum & ce-

leritatem, a qua aër & æther omnem vim fortiuntur, ut varios morbos producit & exasperat, ita & illos lenit ac sanat, usque eo, ut efficacissima quoque cætera remedia non raro illum non superent. Hinc scite HIPPOCRATES *Lib. de flatibus* dixit: *Aër maximum est omnibus, quæ corpori accidunt & autor & dominus*: Hinc & veteribus circa aëris selectum maxima erat cura & prima in morbis curandis & pro varia eorum indole varium quoque in modum, ejus alteratio. Scilicet perspectum est insurgere morbos maxima ex parte eaque qui medicis maximam operam imponunt ex anni temporum, ventorum mutatione & alteratione, insolitis tempestatibus & a vaporibus ex terra adscendentibus, atque evenire, vere, illos morbos, qui ex multis humoribus & qui ex illorum motu novantur, autumno, qui ex corruptis fiunt frequentius, ita tamen, ut docente observatione, plures ægrotent æstate, plures vero moriantur autumno. Sanguinem enim tunc in autumno, a prægressæ æstatis calore, ad pauperiem redactum ac spiritus magis consumptos, in causa esse, non immerito judicat experientissimus SYDENHAM. *Method. Curand. Febr. S. 1.* & quod evacuationes tunc temporis ut plurimum damnosæ existant. Speciatim vere gravedines, anginae, febres tertianæ, æstate calida & sicca imprimis, continuæ magis & acutæ, diarrhoeæ, ophthalmiæ aurium dolores, autumno quartanæ, affectus hypochondriaci, mania, lienis tumores, hydropes, tabes: hyeme tusses, pleuritides, affectus soporosi &c. frequentius accidunt, mutantur, pejoresque redduntur, hinc variolæ, morbilli, febres lymphaticæ, nunc benignæ, nunc malignæ, apparent. Porro observatione constat, quod sicco cœlo subjecta serosa arthritica, pluvioso & nebuloso, phthisici, peripneumoniaci, hectici & difficili respiratione laborantes, minus habeant de quo conquerantur, (ob mitiorem nimirum sanguinis ad pulmones appulsum) quod humida in specie hyems, gravidis sit infausta, ac vere humido ac tepido hyemem frigidissimum subsequente febres morbique multi acuti eveniant: quod procellosis imminentibus tempestatibus hysteriarum paroxysmi exacerbentur: Ad hoc in vulgus quoque notum est, permultos videri homines, qui ex dolore capitis aëris mutationes præsagiunt: Qui herniis obnoxii sunt austrum mox perflaturum, prænunciant: Boreali vento spirante, qui auditus gravitate laborant, facilius audire incipiunt. Imo nonnulli morbi de nocte, alii de die magis sumunt incrementa; sic v. gr. Notum est, febrem continuam, quæ quidem calorem continuum habet, habere tamen interdiu majorem quam noctu; & mali hypochondriaci symptomata, mane acerbius semper affligere. Rursus perspectum est,

est, febres quæ aliquam visceris inflammationem comitantur, noctu magis augeri, minui interdiu, & omnes morbos a ferosa colluvie corrupta & acri, v. gr. cancer, ut & omnes fere dolores ingruente nocte pariter ingravescere, quod tum decidentibus iterum remoto sole effluviis humidis, tum aliis atmosphæram graviolem reddentibus & mole sua molestis & motui & ventilationi humorum contrariis, adscribo. Atque videbis multos morbos, maxime capitis, pectoris, pulmonum febres quartanas rheumaticos dolores &c. eosdemque diuturnos, rebelles, abstrusissimosque, quos longus medicamentorum usus etiam præstantissimorum, quos medicorum prudentissimorum non raro consultationes, consilia, labores, non curare poterunt, mutatione aëris demum sanari, mutatis vel anni mensibus, mutatisque iter faciendo locis. Notissimum est, ægri tudines ab humoribus frigidis, crudis, crassis, tenacibus hyemalibus mensibus, ut febres quædam intermittentes &c. vix ac ne vix quidem curari; curari vero eas vel sua sponte sæpissime æstivis appropinquantibus, quando nimirum sol suavissimo externo suo calore suaque vi omnia vivificante ac exhilarante iterum, macrocosmum microcosmumque fovet, excitat, atque foecundat. Videbis & ob id, quosdam morbos, in hac vel illa regione, difficillime aut nunquam curari, qui in alia facillime curantur: v. gr. lues venerea, catarrhi, tabes, hæctica: (ob aërem gravem, densum, nubilosum, humidum) difficillime aut nunquam in Anglia, facile autem in Gallia, Parisiis præsertim & Montepessulano sanantur. Sic vulnera capitis Florentiæ ut plurimum sunt lethalia (quod aëris subtilitati adscribunt.) PARAEVS notat *Lib. X. c. VIII.* Vulnera capitis difficiliter curari Bononiæ ac Lutetiæ, quam Avenione, vulnera pedum vero facilius Lutetiæ, quam Avenione, additque rationem, quam ibi videre licet: Neapolitani hypropicos ad agrum Puteolanum, Romani tabidos ad Tabianum montem (ob aërem siccum) mittebant. Conf. GALENVS *L. V. meth. C. XII.* EPIPH. FERDINANDVS *Consult. p. 33.* aliique. Eapropter olim, adeo frequenter ex Italia in Ægyptum & Hispaniam, itinera faciebant confer. CELLARI *Orig. & Antiquit. Med. cap. LII.* longe celeberr. FRIDR. HOFFMANN *in dissert. de Peregrinationibus sanitatis causa institutis.* WOLFF. *observ. chirurg. I.* MONTALDVS *de Morbis cognit. Tract. VII. c. XV. p. 736.* BALBINVS *Misc. R. B. Lib. I. c. V.* adducit Reges Bohemiæ ægrotantes, si ex Austria & Hungaria Bohemiam pervenissent, sanitati brevi restitutos fuisse. Eo nomine imprimis celebris est Insula S. Helenæ in mari Atlantico, de qua tradunt, ægros moribundos pene & conclamatos, in illam, ex India redeuntes ex-

positos, illico convalescere, incolasque nullum facile morbum præter annosam senectutem nosse atque alia in Regione Hybermensi, Thomas Carveo de Tipperara prodente V. ANDREAE GRYPHII *Diff. Funeb. p. 503.* in quam gravidæ ut propitiam Lucinam sibi concilient navi transvehuntur. Consilium antiquissimum fuit HIPPOCRATIS *Lib. IV. Epid. S. V. L. XIX.* in morbis longis solum vertere. ERATIANVS ait: *Migratio interdum Medicina, & in morbis mutatio loci sæpe salutifera.* Similiter AVICENNAS *Lib. I. Tit. 4. p. 72.* opinatur: Ex generibus medicamentorum esse, mutationem de terra ad terram, de aëre ad aërem. GALENVVS *L. de Vet. Cur.* corpore languentibus peregrinationem & equitationem commendat. Nec ineleganter SENECA loquitur *de Tranquill. an. cap. XV. p. 541.* *Aliquando vectatio iterque & mutata regio vigorem dabunt,* Testatur idem de se ipso CICERO *Lib. de claris Orat. cap. XVI. & L. VII. Epist. 26.* Ob eandem sine dubio rationem olim Reges Persarum & Parthorum pro quatuor anni partibus sedes suas mutasse, ex TREVNERO *ad Cluverum p. 172.* NEANDRO *in præfat. ad Erot. grac. Lingua p. 44.* ATHENAEO *L. XII. c. II.* CVRT. *L. V. c. VIII. §. 1.* patet. Hunc ad modum & hodie Augustissimi Imperatores Romani & Pontifices multi-que Reges & Principes non solum talem conclavium suis in Palatiis selectum instituunt, sed & varia hinc inde optimo & laudatissimo consilio, palatia erigere solent, ut diversum sic aërem certis anni temporibus, hic aut alibi salubriorem haurire, queant. In hanc sententiam eleganter CELSVS scribit *L. I. c. I.* *Pessimum Cælum est quod ægrum fecit, adeo & in id quoque genus, quod natura pejus est, in hoc statu salubris mutatio fit.* Dolendum hinc, quod hæc medicinæ pars præstantissima hodie fere negligatur, quare Chorographiam hanc medicam neglectam adhuc, inter desiderata medica cum Celeb. H. VELSCHIO merito repono. Vid. *Ejus Som. Vind.* Hippocrati ideo laudi ducitur, ut Wigandus & Soranus Ephesius habent, quod amore medicinæ ductus per diversas regiones profectus sit, experimentaque collegerit, ut rei medicæ effectus & successus per multa loca cognosceret, & his variis modis exerceretur. Huic causæ præterea maxima ex parte morbi endemii tribuendi sunt, ut vexatos fuisse Ægyptios olim imprimis & Arabes vermibus, Theophrastus, Græcos catarrhis Plato referunt. Sic observatur Insulas maris Ægei, incolentes Hungaros & Hetruscos epilepsia, Sabaudos tumoribus variis, Hispanos, Helvetios, Carinthiæ incolas, strumis, Lusitanos cæcitate, Londinenses tabe pulmonali, Neapolitanos roseolis, Venetos hæmorrhoidibus, Romanos febre semitertiana, observante jam GALENO *L. I.*
de

de morb. vulg. cap. II. Constantinopolitanos peste, Danos, Svecos, Pomeranos, Livonos &c. scorbuto, Laponos, Finnos, Armenios &c. ophthalmia, Misnicos & imprimis foeminas Lipsienses purpura passim & frequenter laborare.

§. II. Quod si itaque adeo multum nec in una saltem re valet aër, quod si etiam sanorum hominum corpora multa multo magis ægrotantium aëris statu alterantur, hic, labor, hoc opus sit ut medentes ea, quæ circa hunc obtingunt, bene observent & ad salutem hominum dirigant, ut sanitatem eorum integram servant, atque tam præcautionem quam curationem morborum præstent moderando, avertendo, contranitando, corrigendo juvent. Loquitur de hoc ipso ipse HIPPOCRAT. *Lib. VI. epid. Textu 9.* sequentem in modum. *Non certe exigua pars medici muneris est curare, ut ingressum & egressum habeat aër, quantum, quando & qua parte oportet in domum, quam inhabitet sanus, aut in qua decumbat ægrotus, idque juxta naturam morbi & qualitatem venti considerandum.* Etenim ipsius aëris conditiones habitationes sequuntur, quare & earundem ut pro sanitate conservanda, ita & pro restituenda ea & stabilienda ratio habeatur. Quinimo earundem observatio in diagnosi magnam, sæpe suam addere potest symbolam. Notanter GALENVS 5. *de tuend. sanit. 2. p. 179. & 180.* antecedentia bene considerare suadet, & inter alia, num domus, in qua versatus sit æger dormiens vigilansque calidior fuerit an frigidior, nec in prognosi, is qui ejusmodi in memorato habet rudis esse potest. In his (habitationibus) primario quatuor illæ summæ mundi plagæ spectantur, & ob aërem & ventos, quos (ut belle Seneca dixit, summus rerum artifex, ad custodiendam cœli terrarumque temperiem dedit) qui ex illis, per quæ media spirant, cœli adspectus, salubres vel insalubres dicuntur: nam alterant notabiliter, pro varia naturæ suæ, motus plus & minus vehementis ac elevatarum molecularum ratione alterati. Ordinario orientalis & septentrionalis (cæteris paribus, nam varia accidentia, montes, sylvæ, flumina, lacus &c. subinde illos variant, nec omnes ideo regiones æqualiter ab ipsis afficiuntur) vid. PLIN. *L. XI. c. XLVII.* CELS. *L. XI. c. I.* SCALIGER *exercit. p. 285.* solis calores violentos suaviter, temperantes omnium ad valetudinem maxime accommoda, ita tamen, ut ille huic vulgo præferatur. VITRUVIVS hinc & quondam celebris ille Architectus *Lib. I. c. I.* ita dirigendas domus præcipit ut aquilonem admittant, & Aristoteles, ubi de optima Republica in politicis agit, urbes, orientem versus sitas, auroram amicam omnia aurea tinctura pingentem, omnia exhilarantem ac reficientem, omnium pri-

mum adspicientes, saluberrimas pronunciat. Curatius observantibus
 constat, pauciores mitioresque illas regiones experiri ægritudines & ali-
 enas impressiones, nec adeo facile admittere nec diutius retinere fove-
 reque, conf. VERVLAM. *H. V. p. 451.* PLINIVS *l. c.* ARISTOT. *Lib.*
VII. polit. RHAZIS *L. V. de re Med. c. IV.* CELSVS *L. XI. c. I.* & HIP-
 POC. *Aph. Sect. III. 16.* & *L. de a. a. & l.* illas prædicat dicens: *Incolæ re-*
gionum, quos venti frigidi & sicci afflant, diuturnioris vitæ quam alii. Ori-
 entales vero & Septentrionales sunt ejusmodi. Illi enim per vastissima
 Asiæ spatia super Moraviæ, Hungariæ, Bohemiæ montium juga adeoque
 bene temperata, isti vero ex terris Borealibus per varios montes glacie nive-
 que rigentes, altius moti & depurati (quoniam vapores humidos sursum
 evehunt) ad nos transeunt. Ratio causaque peti potest, quod ejusmo-
 di venti & particulis suis elasticis magis serenis, limpidis ac subtilibus,
 nitrosis aërem repleant & corrigant, motu suo vivido, validiori & re-
 ctilineo magis corporum poros constringant, eorum penetralia subeant,
 densent, humidum superfluum absumant, adeoque putredini resistent,
 fibras motrices roborent, coloremque firment atque detineant, sicque
 circulationem sanguinis atque humorum promptiorem reddant, corpo-
 ribus firmitudinem vividumque colorem inducant, appetitum genera-
 tivamque virtutem augeant. Exinde colligitur, loca angulos hos spe-
 ctantia convenire morbis refrigerio opus habentibus, acutis, contagio-
 sis, malignis pro intemperie calida & humida corrigenda, urina pro-
 vocanda, fætu roborando &c. Refert tamen ad institutum nosse, aë-
 rem & magis adhuc ventos hos maxime septentrionales transpirationem
 aliqua ex parte impedire insensibilem, fibras inprimis nervosas, præter
 modum quandoque si invalescant nimis diutiusque durent, tendere, stu-
 pore inducere &c. Atque hi venti fortius lædunt si humidus austri-
 nus aër diu prius regnaverit, ibi enim redundantes in suis vasis humo-
 res in vasa majora & viscera vi pellunt, ac trudent, unde intumescen-
 tiæ fiunt, ibi & feri secessiones & plura mala, quæ has presso pede se-
 quuntur: Quare vitandi & avertendi sunt, imprimis senibus teneriori-
 bus, rarioribus sensibilibus constitutionis hominibus & poros augustio-
 res habentibus & maxime iis, quibus serosis humoribus corpus tumi-
 dum atque distentum est; hos enim maxime irritant frigiditate sua, &
 stimulant ut fundantur excernanturque humiditates, hinc catarrhi, co-
 ryzæ, lippitudines, tussis & similia mala insurgunt! Vitandi hi pariter
 sunt reconvalescentibus, in affectibus nervinis, dolorificis spasmodicis,
 inflammationibus & capitis dolore habituali, ophthalmiis, odontalgis,

affe-

affectibus faucium & pectoris imprimis tussi pleuritide ut & in arthritide & podagra, phthisi, in quibus nimirum fibræ jam præter modum rigidæ atque distentæ atque constrictæ sunt. Nocere quoque possunt vesicæ & renibus calculo ut & morbo hypochondriaco, obstructionibus viscerum, febribus intermittentibus laborantibus, imprimis quartana & recidivas suscitant; item iis qui ad paralyfin rheumatismos, apoplexiam dispositi sunt. Ea quæ dicta sunt jam alii gravissimi Autores notarunt. Sic CELSVS *Lib. XI. cap. I. §. 20.* scribit: *Aquilo tussim movet, fauces exasperat, ventrem adstringit, urinam supprimit, horrores excitat, item dolorem lateris & pectoris infert, sanum tamen corpus spissat & mobilius atque expeditius reddit.* Et RHASIS *Lib. V. de re med. Cap. IV.* prodidit: ab Aquilonaribus ventis illum custodiendum esse, qui in pectore asperitatem sentit, aut tussim patitur; vel cui pulmo aut pectus debile est; hic enim, si aërem attraxit frigidum, ad tussim vel ad sanguinem spuendum velociter perveniet. Præterea hoc quoque aliis constat, mulieres septentrionales menstruis difficilius purgari, difficile parere, paucò lacte referatas esse, phthisin & tetanum pati &c.

§. III. His salubritate modo inferiores habentur venti occidentales humidi, pluvias copiosas & nivem ex Oceano Atlantico nobis advehentes: In frigidioribus nostris locis enim in vapores resolutæ aquæ partes perventæ densatæ, pluvias concedunt. Conf. FIDELIS *de Relat. Med. Lib. I. p. 6.* Aspectus vero & ventus meridionalis, qui æstate calore violento molestat, conclavia quæ eum respiciunt in ignitas fornaces convertit & habitantes torret, radiis solis, per totum diei spatium irradiantibus, visum obcæcat, communi ore veluti insaluberrimus maxime Europæis atque Germanis potissimum censetur. Hinc & auster qui inde procedit, jam apud veteres male audiebat, de quo passim legendus HIPPOCR. *de a. & l. Cap. II. & Aph. Sect. III. Aph. v. 16. 17.* GALENVS *de Ther. ac Pis. Cap. II.* RHASIS *Lib. CXI. cap. XXV. de vent. & Aère* PLIN. *H. N. l. Cap. VIII. p. 201.* ARISTOTEL. *f. 26. probl. 46. p. 803.* CELSVS *L. XI. cap. I.* VERVL. *H. V. p. 451.* Et hæc eo nobis magis certa explorataque sunt, quod observamus & nos illum summe morbiferum, sicuti id non simplici vice superioribus annis notatum est; imprimis ubi verno tempore copiosior ille exstiterit, maxime in subjectis plethoricis, cacochymicis, pituitosis, mulieribus, infantibus, accessisse febres diuturnas malignas, putridas, petechiales, epidemicas, variolas, morbillos, dolores, lippitudines, aurium defluxiones glandularum, colli tumores, alvi fluxiones, apoplexias, lethargicos aliosque soporosos affectus, paralyfes, inflam-

inflammationes, dysurias, diarrhoeas & dysenterias, tristitiam, motus, impotentias, raucedines, lippitudines, respirationes difficiles, præcordiorum angustias, affectus pulmonum insignes, appetitus prostrationes & in infantibus præsertim copiosas per varias vias, feri evacuationes tineas atque achores in capite. Epileptici etiam tunc frequentius miseranda exhibent spectacula, recidivæ accedunt, catarrhi & rheumatismi molestant, corpora languescunt & torpescunt tota, quare non male ab Horatio ventus meridionalis plumbeus & ex hac ratione vocatur. Urinæ porro excretio languidior evadit, articulorum dolores moventur, vertigines suboriuntur, & morbi contagiosi, pestis &c. ac notabiliter augentur, de quo testis quoque est PLINIVS *Lib. VII. cap. L.* & PLUTARCHVS. VARRO *de R. R. 4.* notat Corcyram a peste liberatam esse obstructis ubique fenestris austrum & apertis aquilonem admittentibus. Tuncque gravidæ sæpius abortiunt, illæque oborto sanguinis profluvio periclitantur, quare juxta HIPPOCRAT. 3. *Aph. 12.* austrinum hunc aërem gravidæ merito metuant vitentque. CARDANVS *in præf. de sanit. tuend. Lib.* refert F. Molinum Patrit. Venet. CCCIII. an. ætat. suæ interrogatum, quomodo ad tantam ætatem pervenisset, respondisse, quod non fuerit spaciatus sub umbra turris S. Marci, quod eo loco auster a mari spiret. Notabile insuper est, ventis austrinis & occidentalibus lumbricos infestare facile, quare multi illos ad morbos epidemicos & recte quidem referunt. Comparet horum ratio omnium morborum, sub tali aëris constitutione calida. (aër enim, quo calidior, eo magis infensus est vitæ & sanitati, & utpl. humidis & crassis impuris variis heterogeneis particulis & halitibus calidis crassioribus humo secum advectis quoniam ex præcalidis Africæ terris & Lybiæ arenis exsurgunt, & ex mari mediterraneo vapores secum abripiunt,) debita aëris elasticitas debilitatur, spirituscentia sanguinis debita ejusque motus circulatorius impeditur, spiritus ipsi in motu tardiores fiunt & turbulenti, vires hinc corporis dejiciuntur turbanturque, sensus gravantur, excernenda cumulantur, massa sanguinis corrumpitur, liquatur atque turbatur, impuritas putredoque inducitur, fibræ motrices nervæ, tendinosæ, carnosæ laxantur ut flaccescant, & pori corporis omnes, & eorum tonus ac robur perditur, partes tenues salinæ & sulphureæ minus laudabiles quibus scatent in humores spiritusque intromittuntur, humores plus justo expanduntur, turgescunt, partesque continentes hinc extendunt, unde ibi stagnant & cerebro ideo maxime & magis hic aër hique venti obsunt quam violenti illi frigidi septentrionales. FROMMONDVS *in Meteorolog. de infulis*

fulis quæ Azores appellantur sequentia annotavit: *Austro spirante homines manifeste morosissimi incedunt, pueri tristes & lugubres desident domi, nec solemnes amplius lusus & coitus apparent in plateis, Borea autem reflante statim ad alacritatem redeunt & in publicum refunduntur.* Plura præter recensita secundum seriem mala invenies apud DEODATVM, *Lib. I. panth. Hyg. Cap. XV.* Apud chymicos in confesso est, spirante austro, fermentationes omnes vigescere, ex eo quod effluvia crassa, calida, ejusmodi subeant poros internasque particulas valide concutiant. Illustr. BACODE VERVL. *H. N. Cent. IV. p. 836.* observavit, spirante austro ligna intumescere. Præter hæc compertum est, referente VITRUV. *Lib. I. cap. IV.* Cellas, granaria, meridiem spectantia cito bonitatem suam mutare, & vina fructusque, qui ibi asservantur, non diu perdurare, autumno primum ea parte, quæ ad clima meridionale spectat, folia arboribus decidere, semina vermibus exedi, ædificia austro exposita, ruinam & detrimentum citius incurrere. Hunc in modum curiose satis notat Celeberr. F. HOFFMANNVS in *Observ. Bar. p. 41.* multus & ingeniosissimus rerum quoque naturalium Censor atque Scrutator. In altis turribus, horologiorum aureos numeros, occidenti & austro patentes post breve temporis spatium esse exesos. Non duntaxat autem insalubris est aer austrinus, sed & circa meridiem ex nonnullis locis noxius vapor solet exhalare. V. H. VOGLERI. *Diat & Comment. Cap. XXV. 176.* Verum iterum repetere necesse habemus; quemadmodum purus aer omnibus, omnis constitutionis, sexus, ætatis, hominibus, sanis pariter atque ægris bene convenit atque bene temperatus pro bene temperatis hominibus & pro sanitate conservanda, e re est, ita pro sanitate amissa restituenda, & intemperatis intemperatus, quoad siccitatem humiditatemque calorem & frigus fere requiri. Diversi enim pro diversis circumstantiis, ut jam ex adductis constat, diverso quoque gaudent aëre diversumque requirunt. Cum animalibus enim hac ratione æque comparatum est ac cum vegetabilibus, quæ pro solis, aëris, telluris, differentiis alia hic, alia alibi lætissime crescunt alia tristantur ac pereunt ex facili. Agnovit illud GALENVS *Lib. I. de San. tuend.* dicens: *Non omnibus temperatus aer ex usu est.* Similia colligenda sunt ex AETIO *Lib. III. cap. CLXIII.* ORIBASIO 9. *Collect. cap. XI.* ne plures jam adducam, conf. F. FIDELIS *Relat. Med. p. 62. & seqq.* Hinc dicendum adhuc est, loca ad occidentem meridiemque sita commoda esse calidæ & siccæ corporum intemperiei sic dictæ atque morbis frigidis. Conf. PALLADIUS *Lib. I. Tit. 7.* COLVMELL *Lib. I. cap. V. VIII.* ORIBASIVS 9. *Coll. Cap. XIX.* Et ventos austrinos

strinos imprimis favere calculosis, dolores enim mitigant. Ob eandem rationem (nam alias & hoc non negandum est, quod tunc temporis plures effluant fordes) iis qui ulcera manantia habent, nec non serofas acres, salinas excretiones, ut album fluorem, gonorrhœas &c. patiuntur, & ejusmodi doloribus excruciantur, atque iis, qui alvo laborant adstricto, magis convenire. Phthifici quoque hæmoptyci, hectici sub hoc humido coelo melius se habent. Hoc in loco simul est innuere: macilentis & emaciatis, ut & iis, qui non bene dormiunt loca aëre humido prædita magis esse præferenda. Igitur pro his eligantur conclavia has oras spectantia, & si necessitas ita ferat, fenestræ quoque versus meridiem vel occidentem positæ aperiuntur.

§. IV. Ex modo delibatis facile apparet, quale conclave & versus quos mundi angulos pro rei exigentia sit eligendum. Simul tamen præferant (si iis datum est, pro opibus nam struimus, quod ajunt mœnia) ejusmodi ob situm, prospectum qui ex illo conceditur, nitorem &c. præ aliis gratum (si enim delectantur, si ejusmodi saltem ad tempus contemplantur, quanto magis si in illis degunt quadam voluptate afficiuntur) atque partem ædificii posteriorem, aream aut hortum aut nemus frondosum, aut torrentem leni aquarum murmure decurrentem, spectantem semotam & liberam a strepitu hominum, fabrorum ferrariorum &c. item curruum, equorum, (quare multis in locis Parisiis aliisve Galliæ oris præsertim assolent, plateam circa illud ædificium, in quo æger detinetur, & cujus cubiculum plateam spectat straminibus & fimo obtegere) canum itemque latratu & ejulatu a clamoribus & pulsantium sonis vacuam &c. ne ægri tali molestia afficiantur turbenturque atque inquietum ac per intervalla somnum capere cogantur, quo necessariae secretiones, nutritio viriumque restauratio difficiliter absolvuntur, sed eligant locum ex omni parte tranquillum. Sic Avicenna notat, galli saltem cantum, naturæ motum pervertisse. Si hoc verum est, ægrotantes Sybaritarum gentis ad omnes mollities natæ, in morem, gallos gallinaceos omnes ex domo urbeque fugarent, ne somnum & requiem turbent atque impediant, vide *ATHENAEVM* ac *PANCIROLL. Lib. I. p. 304.* Quid? maximis doloribus excruciat non debent, nec possunt prope molas aquaticas &c. degere, quod in specie de paronychia laborantibus notat *CAMMERAR. M. N. & M. C. V. p. 45.* Exinde porro pro anni temporibus & diversa electio vel optio datur, sic hyeme ea potius eligantur conclavia, quæ radiis solis patent, qui frigus temperant, aërem reddunt subtilem & vapores dissipant &c.

§. V. Vitentur insuper in horum electione & loca uliginosa, palustria, quæ nec stagna respiciunt nec paludis halitu sunt infecta, nec ex profundo specu pestilentem auram spirant, qualis e. gr. circa Sardium, urbem in Lydia, Croesi olim Regiam & Hierapolin alibique Galeno memorante visitur; nec quæ canalibus & ductibus non repurgatis obversa sunt, illuvie & exundationibus pluviarum, & effluviis putridis foetibus exposita, quæ respiciunt cœmeteria, stabula fimeta & sterquilinia vel quæ iis sunt superstructa, olerum leguminumque putredine coinquinata, vias publicas, quarum cura neglecta vel quæ cloacarum foetoribus referta, vel in quibus, vel prope quæ habitant figuli, coriarii, saponarii, tinctorum, pelliones, aut in quibus forte linum & cannabis macerantur, quæ effluvia noxia habentur. Conf. BERNH. RAMAZZINVS *de Morb. Artif. Cap. XL.* Quin & latrinas gravioribus exhalationibus foedas, vitent, quarumvis atque spiritum facile cohibent respirationemque sufflaminant; hinc sæpius audimus, ægrotantes in his locis obscœnis de repente mortuos esse, quales casus etiam Tudecius & Guido de Fontenayo de Anastasio II. Pontifice R. habent. Celeb. LANCISIUS *Lib. II. epid. II. cap. V. p. 197. de noxiis palud. effl.* refert ipsi fuisse narratum Constantinopoli perniciosas febres frequentius in populum grassari quod linum & cannabis pene madida Cairo advecta publicis horreis inferantur. Ejusmodi enim aër depravatus sanorum corpora & multo magis ægrotorum alterat & lædit, ac eorum convalescentiam retardat, nam non solum is nocivis particulis inquinatus est, sed & crassus, qui inspirationi obest, & sanguinem, humores & spiritus labefactat ideo maxime in respirationis vitiis ut asthmate & in iis, in quibus dictæ reliquæ partes laborant, item ab iis qui capitis doloribus, febribus &c. vexari solent, fugiendus erit. Huc tandem referam, quod DOLAEVS *Encyc. M. P. I. p. 755.* monet, quod locus lue venerea laborantibus, in quo decumbere debeant, quantum possibile vitetur, ubi quidam lue hac mortuus sit, quod & de aliis morbis contagiosis dicendum esset. Nolo jam ad specialissima alia, ob chartarum angustiam descendere v. g. quando SOLENAND. *l. c. p. 241.* notat: in hydrope & palpitatione cordis vapores maxime nocivos esse, ex plumbo fuso, & quando e contra alii suadent, ut commorentur phthisici, ubi pix conficitur. Itali hydropicos convulsionibus, arthritide, scabie foeda, lepra, lue venerea aliisque gravioribus & desperatis morbis vexatos, in speluncam serpentum mittunt, ut ibi decumbant, de quo conf. KIRCHERVS *in M. S.* & ROMELIVS *in penult. Tomo E. N. C. D. III. an. 4. obs. 20.* Aër enim (ut ad prius hic redeam) & pro

diversitate effluviorum, quæ in eo volitant, copiosissima, magnam vim habent, texturam humorum immutandi. Hocque eo magis adhuc attendendum est, cum dentur nocentia, quæ odore vix deprehenduntur, ut noxia audit quorundam vegetabilium effluvia, ex iis emanantia umbra, qua de re conf. IOH. LANGIVS, in *Epist. med. Lib. II. p. 690.* ut & PLINIVS, GREVINVS *Lib. II. de venen.* MARCELLVS, DONATIVS, CARDANVS, LEMNIVS *de nat. mirac.* FERNELIVS *de abd. r. c. Cap. VIII.* A GULDENKLEE *Lib. VII. cap.* IOH. B. SIDONIVS in *Jatrofoph. Miscell. tr. XIX. p. 96.* a quibus exempla ut de taxo, juglande, papavere, fabis &c. petantur. Inter quæ notabile est, quod ALDROVANDVS in *Dendrol.* habet, ubi de rustico quodam narrat, qui postquam paralyfi laborare coepisset, quod nucis sub umbra, somno indulserat, pauco post tempore dum sub umbra quercus dormiverat, iterum sanatus fuerit. Etenim solis valida actio per diffusos halitus atmosphæram mire alterat, quos & ventorum agitatio in longinqua etiam loca devehit. Præterea & noxia illa sunt loca, quæ editis undique montibus in cavo loco tanquam conclusæ, nullam perflationem recipiunt. Galenus suffocantem illum aërem nominat & putridum similemque ei, qui domibus quibusdam est inclusus. Addamus & hoc: Conclave epilepticorum maxime non sit supra cellam aut fornicatam cameram ob exhalantes nempe vapores humidos & frigidos conclusos, vappidus maleque olentes. Cui jungam simile quoddam quod habet R. LENTILIVS in *Miscell. Med. Pract.* referens simulque salis communis activitatis sphæram comprobans: ibi enim *p. 380. P. II.* legitur: in cubiculo aream superstructo, ubi magna salis culinæ copia asservabatur, omnis generis vestes, situ quodam esse corruptas & vasa argentea in vasis bene munitis, arrosa.

§. VI. In deligendo ægrotantium Conclavi alia adhuc subit sollicitudo, præeunte HIPPOCR. passim in *Epid. & de Decent. Ornat.* an pars superior an inferior ædificii præferenda sit. Sciendum hic est, superiorem contignationem ordinario, maxime in locis aëre humido & squallido præditi salubriorem esse ob aërem puriorem & tenuem, quanto inferiores vero, tanto impuritate & densitate sunt deteriores; Inferior enim aër & terræ proximus vix verus aër habetur, quia ob effluvia crassa multa a nativa indole longe recedit, si præsertim non ita sunt comparata ædificia, ut aër inferiorem partem possit liberrime permeare, maxime in urbibus incolis plenis, ut Lipsia nostra est; & ubi solum non adeo salubre; Ad illas enim superiores ædium partes quoniam aëri & ventis magis sunt expositæ, exhalationes, quæ ex terra & humido sursum ferun-

feruntur graviores vix adscendunt, purgatæ magis vero digestæ & leviores altius moventur. Comprobant hoc plurima Italiæ loca, præsertim Grotta canina dicta illa notissima ad lacum avernum, ubi circa humum ad certam duntaxat mensuram, animantia nocivus halitus extinguit. In Insulis Indiæ quædam, ut Bantama, Peder Monzambique ibi ad terram habitare periculosissimum est, & humi dormire lethale, quare incolæ pensilia domicilia inhabitare coguntur. Avenzoar ideo altas in quovis morbo cameras commendat. Apta imprimis sunt loca alta morbis longis & contumacibus vexatis, pituita infectos pulmones habentibus, de thoracis aliis affectibus & capitis conquerentibus. Eædem item maxime utiles inhabitationes scorbuticis sunt. Antiquis Medicis ideo scorbutus incognitus fuit, quoniam in Græcia, Africa, Italia, Gallia ob tenue & ferenum Cœlum, quod magis dissipat, attenuat, ac allevat, adeoque & transpirationem promptiorem procurat, hic morbus non observatus fuit, medicorum Autorum nemo vero illorum olim scorbuti mentionem fecit, qui in regionibus septentrionalibus endemius est. Nominatim præterea mentionem facit THEODOSIUS in *Ep. Med.* p. 376. podagricorum & monet, ne illorum habitatio sit terræ vicina & SOLENNAND. *Conf. Med. S. 2. p. 200.* Loca terrestria & concamerata esse fugienda, calculo, gonorrhœa, imbecillitate ventriculi laborantibus, calida & humida corporis intemperie præditis, item in morbis ab extravasatione feri oriundis, hydrope omnibusque morbis sic dictis humidis ac subjectis cachecticis & febricitantibus &c. vid. GRADI *Præct.* p. 274. Siquidem expresse CRATO A HRAFTHEIM apud Scholtz. *Conf. Med.* p. 846. pro tumoribus œdematosis cubiculum in terra & concameratum nequaquam probat. Nam hypocausta concamerata, ex lateribus & lapidibus præsertim erutis merisque muris constructa, frigidiora & humidiora sunt omnemque humiditatem facilius recipiunt ac retinent, & necessariam transpirationem per poros cutis insensibilem, aliqua ex parte cohibent, (hinc ut omnibus notum est atque perspectum, convalescentes ex febribus maxime intermittentibus, si templa intempestive frequentant, recidivam patiuntur) iis ex ligneis parietibus exstructis imprimis in locis per se humidis, paludosis ad aquas desides sitis, concamerationes enim atomos ejusmodi cohibent, atque detinent ubertim quæ subinde pejus evadunt. Hinc Magni Duces Russici in ligneis tantum conclavibus per hyemem degunt, prandent, cœnant dormiuntque; Hypocausta vero ad terram, febricitantibus maxime ardenti febre, item syncope, hæmoptysi, capitis dolore vexatis accommodata esse scite pronunciat An-

tylus, item in calida & sicca intemperie imprimis, ubi vicinum sit flumen. Si & aeris maxima labes subfit, morbos contagiosos, malignos & imprimis pestem proferens, conclavia inferiora probe occlusa præfert QVERCETANVS vid. *pest. alexicac. p. 200.* quod vero paradoxum habetur, hac ratione caliditatis & frigiditatis etiam distinguenda sunt secundum anni tempora sc. in superiori contignatione, conclavia æstate sunt calidiora, hyeme frigidiora &c. Sic si & eo intuitu ædificium in loco montoso editiori situm esset, & hyemale tempus nimis frigidum, unde morbi, qui ex humorum densitate nascuntur, augerentur, ibi conclave in solo potius eligendum esset. Ex alia quoque ratione prudenter satis pro maniacis tale elegit COEL AVREL. *Lib. I. Cap. V.* ne furore correpti forte se præcipites dando necarent. Imo sub aëre calidissimo & ubi refrigerandum, humectandum, & spirituum & humorum resolutio, dissipatio inhibenda præcavendaque est, & ubi aeris labes subest, & tempore morborum grassantium, contagiosorum, epidemicorum, malignorum ex Arabum sententia, ex æquo præferenda loca subterranea, quæ & sanis ad sanitatem tuendam, vitamque prolongandam apprime conferunt, ut docent id in antris, speluncisque viventes, qui sani, robusti, proceri, longævi deprehenduntur, utpote aer inibi minus mutationibus obnoxius manet, a calore solis, non ita excitatus minus humores & spiritus consumere potest, hinc & spiritus minus consumunt. Conf. BACODEVERVL. *V. & M. p. 536.* Hoc nomine adhuc antrum, ætasque Epimenidis vel si mavis fabula nota est. Præterea & animalia in latibulis subterraneis delitescunt adipe copiosa obesa sunt. Quamobrem illa GALENVS *10. Meth. C. VIII.* pro cura hæcticæ & diabetes J. M. GRADI *p. 353.* elegit. Quoniam vero illa ut plurimum humida sunt & vaporibus repleta, ob exhalationum retentionem incommoda esse possunt, sicca querenda sunt & de perspiratione liberiorisque aëris externi admissione quandoque cogitandum erit atque ejusmodi incommodis cavendum. Nec incommodum esset, ut tutiora sint ea, si tabulis ligneis aut pannis investirentur parietes. Alias etiam ibi eadem semper manet aeris temperies, contra vulgi errorem subterranea loca æstate esse frigida, hyeme calida, quod certo thermometrorum genere adhibito edocetur atque legitur in PHIL. BVRGVND. *T. XI. Fr. II. Diff. 1.* Lutetiæ Paris. in regii observatorii fornice subterraneo ultra 80. pedes alto aliquot thermometra per annos aliquot collocata liquorem contentum eandem fere altitudinem quovis tempore quavique tempestate in iis occupasse. Nobis tantum sic videntur, atque ratio sine dubio est, quod sanguinis

guinis & spirituum activitas, temperies, in uno eodemque individuo separatis temporibus variare soleant. Pariter conducibilis esset, si conclave morbis contagiosis ut peste &c. plura contigua haberet ut frequens mutatio ac exspatiatio fieri possit. Aræteus phthificos, tabidos perpetuo appetitu prostrato & alvi fluxionibus pertinacibus & recurrentibus vexatos hydropicos, nervorum resolutione afflictos morbo venereo castigatos. conf. HEIRNIVS *Meth. ad prax. cap. XVII.* Alii hos, ut & eos, qui putredine aliqua sunt corrupti, ob sal acidulum, blandum, volatile ex mari continuo exspirans (unde vasa aurea & argentea Venetiis aeri exposita nigrorem contrahunt) ex terrenis locis in ipsum mare mittunt, quoniam aer marinus exsiccat ac roborat, unde & nautæ & piscatores, marini quorum corpora cornea Plinius vocat, ab arthritide sunt liberi, GALENVS vero ad Vesuvium, montem ut legitur v. *Meth. cap. 20.* tales ablegat. Pro iisdem montem Fesulanum Florentiæ vicinum & collem Massetanum, ad mare montemque qui Pisas inter & Lucam excurrit commendavit LEONH. JACHINVS *cap. XXXVIII.* ZACVTVS LVS. ad imitationem oppidum Lusitan. PALMELA dictum laudavit v. *Lib. VIII. Prax. hist. c. 10. observat. 2.* BAGLIVIVS *de Morb. success. p. 387.* memorat de ægro asthmatico ad phthisin vergente, qui quando ubi habitavit prope mare, bene se habuit, quando vero reliquit aërem marinum, & ad vicinos se transtulit campos, statim astmate aliisque symptomatibus misere correptus est. Carniolæ incolæ eos qui de doloribus in dorso conqueruntur in certam arrugiam, ut & eos quibus aures dolent in aliam, quæ ibi inveniuntur, mittunt ubi sanantur. v. VALVASSOR *Carn. P. I. Lib. IV. c. XV. p. 561.* Circa adducta audiendus adhuc est ORIBASIVS (9. *Collect. Cap. XI.*) *Sublimia (inquiens) loca, omnibus thoracis affectionibus sunt accommodata & capite laboranti, & omnibus sensuum instrumentis: at loca humilia ante dictis non sunt idonea his vero, qui per halitum digeruntur, qui in syncopas cadunt, & senibus apta sunt: loca vero maritima hydropicis & quibus quævis defluxio molesta est, accommodata sunt: itemque ubi detergendum aut calefaciendum, aut aperiendum est, conveniunt.* Eandem ob causam ut scilicet ob hydropem, quo erat detentus, Heraclitus se liberaret in caminum se collocabat, fumosque excipiebat, quamvis haud expectato successu, siquidem periit ibi aut suffocatus dilaceratus ac devoratus. Tempia atque sacella decubitus medici gratia jam apud nos, ut olim apud ethnicos superstitiosos, non frequentantur, qualem ritum de suis quoque temporibus Cicero & Plinius memorant, quo ægroti in deorum dearumque fanis maxime Aesculapii, Minervæ, Isidis, Serapidis immo-

immolatorum animalium pellibus involuti incubabant per somniaque potissimum remedia per oracula expectabant.

§. VII. Conclavia ipsa non sint depressa, vel angusta, humilia & parva plurima ex parte utroque modo morbos non modo adgravantia, sed & mali vim divulgantia; ibi enim aëris paupertas & impuritas est & is suffocans quasi & pulmones male afficiens nedum satis expandens vel frequenti saltem respiratu nimium extenuatus, atque effœtus factus, quam rem optime persequutus est & claris experimentis probavit, aerem nimirum elasticitate debita sua privari in pulmonibus STEPH. HALLS in the *Statical Essays* Tom. I. in the *Analysis in the Air*, Exper: 108. p. 238. seq. & T. II. p. 323, qui etiam affirmat aceto & salibus varii generis hanc elasticitatem aëri quadantenus reddi posse Vide l. c. Vol. I. Exper. 116. p. 264. & Fig. 39. Insuper & continentur, concentrantur, atque ad se invicem adiguntur reflectunturque miasinata magis magisque corrumpuntur ac putrescunt. Cerebro maxime adversantur, spiritus animales ipsos contaminant, varioque alio modo officiant, inficiuntque deinde maxime calido existente aëre. Etenim corruptio in locis angustis aere coarctato ordinario producitur, adeo, ut quantitas corruptionis a quantitate aeris compressi dependeat plurimum. Hyeme æque magna impendit exinde labes atque infectio, quoniam tunc temporis non aperiari fenestræ ad auram liberiores captandam possunt. Proinde sint semper fere spatiosa, alta & perspirabilia, imprimis in morbis contagiosis, maxime ubi plures simul inibi decumbunt. De quibus videantur illi, qui nosocomiorum prospiciendorum curam gerunt, ne majus vitium ægris, ministrantibus adstantibus & accedentibus, immo Publico tandem enascatur. Quare & rationes medicæ & politicæ sudent, ne & medici, adstantes ministrantesque ejusmodi loca frequentius accedant neque diutius ibi morentur. Optimum tunc præservativum est, quoniam aerem partim ore, partim naribus attrahimus (juxta frequentem repurgationem, aquæ atque aceti resperfusionem & similia remedia) nares mungere & salivam sæpius exspuere, neque sæpius & fortius spirare, sed potius frequenter aerem e naribus rejicere neque multum loquendum ibi est, quia inter loquendum insensibiliter salivam deglutimus. In specie dicendum est, obesse arctam nimis cameram in hypochondriaca affectione atque in affectibus capitis, de quibus vid. SOLENAND. *Conf. M.* p. 116. S. 2. in cephalalgia & maxime in cephalæa, qua affectus loco amplo locetur expresse præcipit COEL. AVREL. de *Morb. Chron. Lib. I. cap. I.* p. m. 271. in stupore & paralyti id. l. c. S. 2. p. 136. Necessaria vero maxi-

me sunt alta & spatiosa cubicula in vitiis respirationis, in asthma, catarrho suffocativo, angina, dyspnœa &c. In arthritide, hyeme præsertim, in hypocaustis degere depressis, malum pronunciat modo citatus SOLENAND. *l. c. p. 420.* Conclave quoque, in quo degunt vertigine vexati, sit spatiosum longitudine præsertim, ne æger deambulans sæpius vertere corpusque circumvolvere cogatur. Arctitudo cubiculi insuper parturientibus partus difficilis labores adauget anxiasque eas magis reddit. Sique operationes chirurgicæ ut trepanatio & similes administrandæ sunt, locus ut calidus ac lucidus ita & amplius requiritur. Ulterius indicat id, quod per varia exempla ivimus explicatum, CELSVS *L. III. c. VII.* dum certos quosdam ægros maximo conclavi cubare & ut exercitium, unctio & balneum apud priscos usitatissima ibidem instituantur præcipit. Nam ipsius loci, in quo nimirum plurimus aer inest, in quo versamur amplitudo spiritus animales atque humores, velut dilatare videtur, quandoque dissipare, si resolubiles sunt atque resolvere partesque relaxare, loci vero angustia ipsos coarctare, colligere, concentrare, (hinc & habetur illud: musea sint arcta). His prolatis addo acrem opacum, conclusum densum qualis v. gr. carceris est tumores ac hydropes gignere apertum vero tenuem ac liberum febres procreare. Quo indicio simul apparet, ubi cubiculum arctum sit præferendum quandoque & parvum, licet in genere modo superius affirmaverim hypocaustum spatiosum, altum & perspirabile esse eligendum. Ejusmodi enim ut ad sanitatem fervendam commodissimum inhabitantibus est, ita pro ægrotis etiam ordinario aptissimum. Exemplum hujus exceptionis potest esse magna virium a nimia resolutione spirituum debilitas. Sic NIC. PISO. *L. III. de M. C. & C. p. 225.* suadet in cardialgia ut conclave, in quo degit æger, sit depressius; item sentit & scripsit COELIVS AVREL. *de m. a. c. XXXVII.* de passione cardiaca. In ipsa salivationis cura ex SYLVII mente vid. *method. med. Lib. XI. p. 112.* locum angustum potius eligant, qui etiam pro calore debito fervendo, qui in hac necessarius, aptissimus est. Cum concamerata, fornicata, & rotunda conclavia salubriora alias æstimentur, quia potissimum hæc constructio ad auram lenem excitandam plurimum facit, repercutitur enim ibi aer ad omnes lineas, motus. Cumque & illa conclavia fenestris & januis plena ob aerem inæqualem exinde accedentem minus salubria æstimentur, hæc quoque conditio posset spectari. Fenestræ autem non caligent, ideo & sint satis magnæ & politæ, latæ, altæ atque purgatæ. Pro manicis fenestris humilibus illuminatum conclave COEL. AVRELIANVM

figillatim damnare legimus *de morb. chron. Lib. I. c. V.* ne forte per eas præcipientes se dare conarentur. Cumque parietes plus ad sanitatem facere lateritios a VERVLAMIO credatur vid. *H. N. p. 954.* & crassi optimi; luto coagmentati, tenues mali sint, horum quoque rationem quis habere posset, qui vellet, & posset. Simul tamen expressius paulo iterum indicandum est, concava conclavia quia lapidea, transpirationem insensibilem facile suppressere & in febribus præsertim intermittentibus plerumque recidivam afferre, quare prospiciendum & dicendum quoque hic est, parietes nudos & dealbatos cubiculi inde potius convenire, ibi, ubi refrigeratione sit opus, tecti vero vel tabulis ligneis, vel pannis varie contextis, de reliquo magis sunt apti. Hinc HIPPOCRATES *Lib. VI. epid.* monet: Nemo tentet sudorem movere cubanti in cubiculo nudis parietibus. In morbis vero contagiosis maxime peste, cubacula ægrotorum pannis, laneis, fericisque, non sunt obtegenda & exornanda, putrida enim foetida effluvia atque contagium facile recipiunt, retinent & propagant, ut multæ ferunt observationes hinc inde relatæ sicuti probatum ivit Diemerboeck, & per Panor mitannorum pestem est confirmatum, quæ ex lana eo delata, quam Turcis Christiani, ademerant, concitata fuit. Quare optimo consilio a Collegio Sanitatis Hamburgensium lege quondam cautum est, uti ex novellis accepimus, ne conclavia, ubi quis mortuus sit, pannis, nigris laneis, exornentur, utpote qui facile incalescere & contagio contaminari possent. De reliquo OLAVS MAGNVS in *septent. Gent. Hist. Lib. XVI. cap. LI.* scribit: scorbutum frigida humorum exhalatione foveri & inter tabulata eundem mitescere. Pavimentum in morbis calidis lapideum, alabastrinum &c. in frigidis ligneum, aut pannis contextum potius exposcitur. Qui alvi stypticitate laborant super pavimentum nudis pedibus lapideum ambulent. Nota est observ. ex BRASSAVOLA *C. 9. tr. de purgat.* pertinaci alvi obstructione laboranti Duci Ferrar. suasisse Savanarolam, ut nudis pedibus supra pavimentum alabastrinum, aqua frigida prius conspersum, obambulet, ac posteaquam quinquaginta saltem passus gressus esset Princeps, felici eventu alvum solutam fuisse. In ipsis hypocaustis quibusdam quoque reperimus quædam adhuc, quæ officiunt, inter quæ modo nomino ahe-na & ollas, fornacibus alicubi combinatas, in quibus aqua contenta fornacibus calefactis fervet & ebullit ex quo humidi vapores resoluti exsurgunt hypocaustumque replent, certissime nocituri &c. Par iudicium sit de mala ea quarundam femellarum consuetudine, hac occasione quoque taxanda, qua linteamina lota, per hypocaustum suspendunt ac siccant.

§. VIII. Internæ quædam adhuc aliæ conditiones conclavis spectandæ sunt. Priusquam electum conclave quisquam ægrotorum ingreditur, probe repurgetur, foetores expellantur, si forte situm contraxerit, corrigatur, pulvis abstergetur, impuritates sordesque omnes abluantur, fenestræ januæque apertæ per aliquod tempus ferventur imprimis si diu conclusum nec inhabitatum fuerit, aer enim diu ibi & arcte conclusus pessimus est, adeo ut illi qui cameras, specus, puteos imo arcas vetustas temere aperierunt, aura venenata protinus sint suffocati, de quibus exempla leguntur apud. ANT. CARTAGENVN *Lib. de febr. pestil. fol. 4.* VALLERIOLAM. *Lib. II. Loc. Com. cap. II.* JVL. CAPITOL. *in vero*, CARDANVM *l. c.* Hinc domus & cameræ, quæ conclusæ manent neque inhabitantur, citius ruinam patiuntur iis quas homines inhabitant & libero aëre pervagantur. Omni denique modo bene præparetur, exsiccetur & vaporetur, quod omnium commodissime fit, igne in medio cubiculi accenso: telæ aranearum, quæ uti ex observationibus constat. vid. FOREST. *obs. L. VI. XXI.* contagium etiam promptissime recipiunt, diuque foveant, removeantur. Vana enim tantum illorum persuasio est, qui multum proficere in peste eos credunt, qui araneas in suis ædibus atque conclavibus stabulisque ubique stabulare permittunt, ac si adtraherent atque absumerent venenum aëris omne. Quare matresfamilias optassent sibi, basilisci exuvias quas Pergameni olim in templo explicabant suo, ut fugarent araneas, vid. LOHENSTEIN *Armin. P. II.* vel ut sua conclavia istam haberent insitam virtutem ac templum illud in Carniola, de quo VALVASSOR refert in *Glor. Car. T. II. Lib. VIII. p. 775.* atque illud de quo Cardanus, loquitur, quod semper ab araneis illarumque telis maneant libera, quod & de curia Hagæ Comitum in Hollandia dicitur. Illi & cavent utilitati cubantium, qui muscas, malos, culices & ejusmodi insecta abigunt & fugant ex conclavi sedulo, cum molestant non modo sed & contagium similiter morborum contagiosorum pestis &c. & maxime dysentericiæ grassantis, facile possint deferre aliisque afferre, quia omnia fere excrementa degustare solent, ut per multorum observationes, notum est. Matresfamilias hic iterum iterumque sibi optent ex Insula americana S. Domingo dicta insectorum volantium genus, quod Cucujos vocant, & quod Nürenbergius, ex scarabæorum familia deducit, hæc enim volantia animalia & noctu nitentia captant muscas & culices omnes in domibus atque conclavibus, neque tamen infestant homines. Nec non ex cubiculis atque spondis exturbentur irrepentes pulices cimicesque olidi, asserum

rimas excavantes & internificantes foeturaque gregem supplentes, ut & mures, pavorem inducentes. Necessaria insuper ingerantur disponanturque, fenestris vela addantur, januae umbraculo muniantur ut solis radii ac aer irruens forte averti possint. Hic moneo quod N. PISO *de M. C. & C. L. I. p. 36.* monet, parietes hypocausti pro phreniticis ita praeparandos esse, ut leves sint, neque festucas, aut aliquid exerti habeant, ne ibi detenti delirio ducti, manibus illa arripere tentent. Hic memoria subit, quod in Austria, Silesia & Moravia, plebs pro ictericis cameram, parietes & lectum, axungiam ceti illinendo praepararent saepiusque id repetant, quod in curatiore icteri, pro euporisto habet, conf. BOCCONE *observ. curios. p. 461.*

§. IX. Cum autem non semper concessus sit aeris optimi & convenientis pro morborum conditione usus, quantum datum est corrigendus is & temperandus erit, trahendo semper in contrarium. Latus campus hic iterum panditur, occasio offert, praesens negotium suadet, aeris temperiem secundum singulorum morborum seriem eorumque causas describere, quoniam vero hoc longissimum foret, in generalioribus saltem consistamus terminis. Ubi in genere dicendum est, subcalidum aërem, in omni propemodum genere morborum ac statu requiri, ne transpiratio insensibilis adeo in omnibus necessaria ac utilis impediatur; verum siccus nimis calidusve aer, qui per particulas salinas sulphureas valde humores resolvit, bilem ejusque acrimoniam auget, exaltat M. S. nimiam ebullitionem exsuscitat, corpus exsiccat & humores dissipat, temperetur & conclave tunc subfrigidum sit, imprimis in morbis acutis, febribus ardentibus praesertim, quibus torrescentes ignem exspirant ut ARETAEVS loquitur *de Curat. acut. Lib. II. c. III. p. 100.* quo aer in spiritus exinde aestuans, accenditur. Porro in inflammationibus haemorrhagiis, haemoptysi, hectica, dolore capitis, & ubi propensio ad apoplexiam & respiratio laesa est, in phthiriasi secundum COEL. AVREL. *de morb. chron. C. II. p. 497.* pavimento ut & muri, frigida & aceto frequenter irrorentur, aquam fontanam e vase in vas frequenter transfundendo, lintea & pannos circa lectum frigida atque aceto madefacta explicando aut frondes, folia aut summitates & flores herbarum, fruticum, stirpium, arborum recentes, salicis, quercus, vitis lactucae, sambuci, rosarum cichorei, buglossi nymph. populi cum gramine recenter carpto &c. aut simplici modo aut frigidae aceto mixtae merse haec refrigerantia per cubiculum conspergendo, solarium radiorum aerisque aestuantis accessum in ipsum conclave, vel cubiculum ad lectum & imprimis ad caput

put ibi degentium & cubantium quomodocunque arcendo, aperiendo fenestras septentrionem respicientes, meridiem vero spectantes claudendo &c. Tuncque cubiculum confert, non tabulatum marmore aut coementis stratum, vel excitatur flatus flabellis, quo notandum venit Sanctorii singulare organum, cujus beneficio, æstivo calore æstuante conclave frigidissimum reddi potest. Inveniuntur & imprimis in Magnatum Palatiis hinc inde conclavia, in quæ ad hunc finem vivæ aquarum scaturigines derivantur, ut frigida ex fontibus saliendo effluat. Hæc aeris ficcioris temperatio facilior est, humidioris exsiccatione. Observatu sæpius necessarium pariter & utile est, hypocaustum refrigerandum ægrum tamen stragulis convenientibus bene contegendum esse, v. g. quando febrium vehementia miseros urget angitque, & quos forte habitus densitas premit, conf. F. VALESIVS *de Meth. med. p. 1141*. Præcipit GALENVS, *Com. 4. in 6. epid.* Calidi loco frigido dormiant ut frigidum aerem inspirent, sed se contegant stragulis calefacientibus ut calor ab interioribus ad cutim revellatur, vel potius ut calida effluvia circa corpus contineantur ac quasi repellantur. Calidus vero & humidus, (nam humidus sive simul sit calidus, sive frigidus rarissime & subjectis & morbis convenit habita scilicet temperiei ratione) valde est nocivus; aer enim humidus si calor ei se jungit putredinem concipit facile, quoniam dilatantur pori per quos dein patentes, ipsi patet aditus, & partes salinæ, spirituosæ aeræ corpus nostrum a præternaturali ac putredinali motione defendentes absumuntur, hebetesque fiunt, ac simul tonus fibrarum partium solidarum marcescit. Hinc caput & præsertim pulmones, imo ventriculus offenduntur, hincque & summa curationis febrium pestilentialium exsiccatio est. Quare vapores humidi, sive ii proveniant a lavationibus & elutionibus conclavium, sive a lintaminibus madidis circa fornacem expansis, ut multarum muliercularum fert consuetudo, sive etiam ex aliis quibusvis causis, in locis angustis & conclusis sunt maxime nocivi, catarrhos, apoplexias, affectus soporosos, lethargum, producunt. Notabile in hanc rem ego quoque notavi hic Lipsiæ exemplum in studioso quodam, qui ligna humida, per noctem, sub & circa fornacem in arcto museo calefacta ad exsiccanda reposit, ex quo mane lethargicus, in lecto est inventus. Ex fornacibus novis in cubiculo positis noxam ex vaporibus scilicet humidis vide apud W. FABRIC. HILD. *Observ. cent. IV. p. 386.* corrigit in conclavi aer commodissime igne, in camino accenso. Inservire quodammodo etiam potest infusum veronicæ, melissæ, cichorii sylvestris, similiumque

quæ caput & nervos roborant, aliaque remedia per conclave conspersa vel exposita quæ putredinem inhibent & avertunt, quæ sub ejusmodi constitutione aeris timetur, vitrioli nitri, aluminis solutio a qua & cum aceto decocta. Optimum esset si is locus cum alio mutari aut, frigidioribus & siccioribus auris, posset perflari.

§. X. Aër frigidus (particulis asperioribus constringentibus & ponderosioribus premendo & constipando, spiracula cutis, effluvia excernenda, impediens, acidum augens acriusque reddens, sanguinem inspissans, bilem infringens, corpus refrigerans) & humidus (obtundendo & infringendo humores activos lentos & inertes augens) emendatur calefacto conclavi, lignis accensis, in fornacibus aut in caminis, quod melius, nam ignis luculentus in eis accensus, crassum aërem magis dividit impurum (simulque aër ventilatur ac agitur) depurat, perque hunc liber patet exitus. Atque per pavementum herbas & flores calidos sic dictos odoriferos, ut lavendulæ, salviæ majoranæ herbam serpilli folia lauri &c. dispergendo, cubiculum moderate calidum per totam quoque noctem servandum est, præsertim in morbis sic dictis frigidis & a serosa colluvie oriundis tussi ferina, anasarca, torminibus ventris, variolis, morbillis, purpura, & ejusmodi qui motu humorum ad exteriora solvi debent, &c. Hicque præstat cubiculum undique asscribus tabulatum, quod ideo & in specie scorbuticis ut ejusmodi conclavia inhabitent, commendatur. Ex OLAO MAGNO in *Sept. gent. hist. Lib. XVI. cap. LI.* accepi, populos septentrionales Suecos maxime hypocaustis ligneis tabulis vestitis se contra scorbutum quod vernaculum iis malum est, muniri, quoniam frigida murorum exhalationes eum fovant. Circa hoc calefactionis moderamen, iterum iterumque monendum est, quod in excessu ubique ferme hodie apud nos etiam peccetur. Communem errorem & fonticum certe errat incautior plebs, quando more patrio, nimia sollicitudine, statim, si modo de levissimis molestiis conquerantur, non modo nulla habita ratione, lecto ægros affigendos urget, duplicatisque sæpe illisque sat ponderosis lectis, illos obtegit ac premit undique circumjectis, sed & hypocaustum magno ignis fornacis gradu clausisque fenestris, vel media etiam æstate ardenteque sirio calefacit. In quibus prope fornacem intolerabilibus angoribus vexantur atque conficiuntur, macerantur, torrentur ac assantur præfocanturque languidi velut lectis igneis a Decio olim, inter tormentorum genera excogitatis, vid. *PRUDENTIUS Hymno 4. v. 98.* Non habeo ambiguum & omni asseveratione & experientia non simplici convictus, affirmo, plures periisse, qui optime & certissime

tissime poterant fervari, in morbis acutis, febribus ardentibus, exanthematicis, variolis, morbillis, & in illis qui ex principio salino acri caustico, oriuntur, malignis item lymphaticis & in genere in omnibus febribus symptomaticis, a dolore, putrefactione, a lochiis & secundinis rentis, a foetu in utero mortuo oriundis morbis, in melancholia hypochondriaca, de qua vid. SOLENAND. *l. c. 1. p. 172.* Vertiginosis pariter obesse nimium hypocauti calorem vel solæ foeminæ hystericae norunt, & rationibus probat idem *l. c. p. 8.* Maxime porro per calefactum cubiculum iis alienum est, quibus caput ex contentione & animi fatigatione imbecillum est, nec non iis qui sanguinis profusioni obnoxii sunt. Taceo de aliis damnis, molestiis & symptomatibus somno impedito, apoplexia, paralyfi epilepsia & convulsionibus exinde pronatis vid. B. DE VIAS *in sylva* & SENNERT. *P. Lib. I. p. 11. pag. 31. p. 111. 391.* de deliriis, mania, imbecillitate corporis, lethargo, hæmorrhagiis, hæmoptysi, inflammationibus doloribus imprimis capitis, palpitatione cordis, anxietatibus circa præcordia, inquietudine, animi deliquio, visus imbecillitate & obscuritate &c. Nephriticis præ aliis noxam quoque affert si dorsum sæpius igni aut fornaci obvertatur nimis calidæ. Natura enim nimii caloris hæc est, quod partes heterogeneas cum corpore mixtas non tam separet, quam intimius sæpius eas combinet atque conjungat. Dicto fidem facit experimentum illud chymicum v. g. sal tartari sulphure mixtum si tractetur igne, sulphur non totum avolat in auras sed firmiter implicitum manet cum particulis tartari alkalinis, quod color rubicundus, sapor foetidus & tinctura sulphuris quam spiritus vini potest extrahere, luculenter evincunt. Rursus si igne fundas, sulphur vulgare, cum argento, stanno, plumbo, sulphur, vehementissimo etiam igne non poteris iterum separare, quin potius intimius remixtum maneat, & metalla ista friabilia reddat. Amplius dicendum est, calorem ambientem nimium motum sanguinis & humorum præter naturam maxime intestinum concitare atque in orgasmum agere, spiritus effrenos reddere atque exsolvere, acrimoniam salino sulphuream i. e. malignitatem, venenum procreare, intendere, augere, in actum deducere, quo enim atritio salium fortior, eo & majorem subtilitatem, penetrantiam & acredinem acquirunt. Tempore æstivo in febrili intensa sanguinis commotione in febribus præsertim tertianis, ardentibus heclicis, excrementa acria salina & sulphurea præter modum abundant & in corpore generantur multiplicanturque. Experientia testis ac vindex est, purpurarum, variolarum, morbillorumque pustulas ac maculas promptius sumere incrementum,

tum, quo magis calefiant ægri. Ad hæc simul meminisse e re erit, sanguinem & lympham æque nimio calore ac quiete & frigore cogi ac contrahi, quod variis observationibus compertum est. Conf. H. BOERHAAFE in *Chem. Tr. I. p. m. 274.* IOH. ARBVSTHNOTS Anglus in *Tr. qui inscribitur: Essay Concerning the Effects of Air on human. Bodies Cap. VI. p. 159. & Cap. IX. §. 32.* Regimen igitur moderate calidum sit nec ægris grave & æqualem semper servet calorem, qui omnium accuratissime beneficio thermometrorum haberi potest. Æger quoque ad ignem, ne nimis appropinquet, aut diu sedeat, juxta ipsum, maxime sumpto cibo & vultu opposito, imprimis si luculentus in camino est accensus, multo minus frequenter eum adspiciat, hebetat enim visum, & causatur vertiginem, quod præ aliis, qui ex oculis illorumque hebetudine &c. laborant, teneant sedulo: oculis enim hæc tria maxime officiunt, ignis, sol atque ventus. Refertur Reges Persarum ad Regnum & Regimen perventos, fratres suos omnes, ut ad illud inhabiles fiant, visu privare, ferro candente, ante oculos diu posito. Quare dorso ad ignem converso cubent aut sedeant ejusmodi ægri; vel convenit potius aliquid, umbraculum quoddam igni & oculis interponere. Quin imo hoc in genere tenendum est, longe consultius illos agere, qui in hypocaustis ex fornacibus calefactis non cubant & dormiunt, sed cubiculum per apertam januam, per quam ad proximum hypocaustum calefactum itur, temperant, nam secundum ipsius HIPPOCRATIS sententiam 4. *Sect. Lib. VI. Epid. t. 1.* somnus in cubiculo non calefacto, modo corpus bene sit tectum, potius laudatur pro sanis pariter atque ægrotis. Idem innuisse videtur A. C. CELSVS *Lib. I. cap. IX.* sequentibus quidem verbis: *Erectior mens est & melius concoquitur, ubi frigus quidem est, &c.* Certe longe salubrius si pulmones & sanguis etiam tempore hyberno, refrigerantur, si in loco paulo frigidiori dormitur. Denique non plane supervacaneum erit monere, ne conclave sit noviter calefactum, quoniam tussim, phthisin inde ortas esse, medicæ observationes loquuntur, ac ut fumus fornacis atque carbonum avertantur qui, suffocationem parere possunt, juxta HILDANVM *Cap. IV. obs. II. fol. 22.* & AMAT. LV SIT. *Cent. 7. curat. 33.* Si de frigido & sicco aëre in conclavi temperando, hic quoque quoddam legere velis, consilium FORESTI vid. *obs. Lib. IV. obs. 6. p. 117.* legas, qui in cura febrium hæcticarum jubet, ut calidæ aquæ parietibus adspergantur.

§. XI. Pro alterando ac corrigendo medicabilemque reddendo aëre (cujus alteratio arte instituta plurimum certe potest, tum ad vitam pro-

protrahendam, tum ad morborum causas evincendas) porro fiunt odoramenta, irrorando cubiculum suaveolentis, aquis destillatis, linthea intincta (quæ apud Italos hodie adhuc præsertim frequentissimi usus sunt,) circumtegendo & expandendo, fornacem calefactam conspergendo, illinendo pariter unguentis suaveolentibus. Apud nos hodie usitatiorres sunt suffitus, vapores fumique excitati, ex succino, benzoe, thure baccis juniperi foliis lavendulæ & similibus, qui & alias ex variis in variis quoque morbis commendantur, ab ipso Hippocrate, jam dudum commendati: Odorum enim sicuti in morbis procreandis, adversorum abusus, ita gratorum usus in medicina non paucus est, ubi præcipue excitandum, refocillandum, incidendum, aperiendum, resolvendum, expellendum, sistendum, roborandum quin & humectandum & exsicccandum ut enim morbos imo ipsam mortem subito possunt excitare ita & subito opitulari & vitam uno sæpe momento reducere: Adeoque Medicis fumos vendere licet. Hi enim non tantum ad superficiem corporis transeunt verum & intimius per nares, aures, fauces, uterum, anum omnesque corporis poros ad humores atque ipsos spiritus animales conf. N. PISO *Lib. I. de M. C. C. p. 41.* & HELMONTIVS *Tr. Im. ferm. imp. m. sem. §. 16.* recipiuntur. Cui ignotum esse potest in lipothymiis languentes evanescentesque spiritus animales fragrantium odore revocari instaurarique: Sed horum usus ab usu hodie fere recessit. De iis HIPPOCRATIS hæc censura est: odores implent, oblectant, placant 6. *epid. aph. 14. Sect. 8.* hocque monitum, oportere medicum odorum speciem scire, commutare & qualibus uti opus sit in quacunque occasione judicare. Memorandum inter exempla hujus rei, quod multi morbi a multis medicis suffumigiis solis curentur, ut sunt catarrhi quidam, quos frigidos vocares & falso, acido, acres, tumores, fluxus varii generis, dolores, epilepsia, capitis gravedo & dolores, aliique capitis affectus frigidi dicti & soporosi, angina pituitosa, infarctus quandoque pulmonum, asthma & orthopnoea, empyemata. Sic & LANGIVS in *Miscell. curios.* suffituum evaporationes, tam inspirando naribus, quam hianti ore excipiendo eas, summe proficuas in tabidis expertus est atque phthificos desperatos suffitum ignis, ex auripigmento exempli gr. rite præparato &c. solis curatos affert HEVRNIVS *method. ad prax. cap. de suffitu.* Non adducam jam pluribus, quod ad hoc trahi potest, furnariæ exemplum apud Matth. de Gradibus qui per hunc inspiratum siccum furni aërem XXVIII. per annos phthificam quandam supervixisse testatur. His inter alia utile præsertim est, si in camino cespites bituminosi sulphurei

(Torff) comburuntur. His Batavi acceptum referunt, quod a phthisi fere sint immunes. Alii de aliis idem referunt, ut de suffocatione hypochondriaca D. SENNERT. *Lib. V. instit. P. 3. S. 3. Cap. XXXI.* WEKER. *Lib. I. antid. general. Cap. LIII.* menstruis mulierum & lochiis suppressis & nimis fluentibus. HIPPOCR. *Sect. V. aph. 28.* M. 'A. SINAPIVS in *Paradox. med. p. 80.* videatur de curatione strumosorum per fumum exceptum. Præter Autorum variorum testimonia experientia quotidiana de multis adhuc aliis idem testatur, ut de prolapsu ani & uteri hæmorrhoidibus, tenesmo, lue venerea, ulceribus aurium, narium, oris, uteri &c. Sic IOH. LERIVS in *hist. navigat. in Brasil. Cap. II. p. 201.* admirandas peti in variis morbis virtutes odoretenus applicati, miris laudibus extollit. Notatu in hanc rem dignissima sunt, si vera sunt, quæque de Abderita Philosopho Democrito ex Diogene Laërtio tradunt eum, annum nonum supra centesimum agentem vitam qua triduo ex solo panis calidi, vel secundum Joh. Alexandr. & Oribasium mellis odore conservasse: & quod PLINIVS *Lib. VII. Hist. N.* refert: Astomorum gentem ex solo vivere odore. Similem historiam PH. MELANCHTON, recitavit, mœchum fame enecandum, per multorum dierum spatium in carcere, nidore carnis assatæ, quæ quotidie, ad pœnam augendam, offerebatur, vivum fuisse servatum. Equidem reor, aëris influxum & qualitates ejusdem, ad spirituum animalium generationem, conferre plurimum adeoque etiam odores fortes atque fragrantés spiritus vigorem spirituum animalium totiusque corporis vario modo variasque per vias augere ac instaurare, licet de nutritiva eorum vi, quam historiæ, modo recensitæ indicare videntur, quædam eaque haud exigua difficultas mihi se objiciat. Non vacat autem jam difficilem eam censuram adducere, an ejusmodi odoramentorum effluvia volatilia & subtiliora per nares & fauces una cum aëris quadam portione, pro spirituum animalium elaboratione immediate, cerebrum ingrediantur atque materialiter, ad spiritus formandos, concurrant, aut an vellicando saltem & stimulando agant, quam priorem sententiam cum ipso Hippocrate Galenus, Vesalius, Laurentius, Columbus, Varolius, Bauhinus, Fracassatus ex anatomica scientia probant, posteriorem vero H. N. Hyghmorus variis argumentis asserit, conf. cui volupe est VERVLAMII *Histor. natur.* Si hic curiose quæras, cur gratus odor magis recret quam amœnus color, illius vero idea non ita diu persistat ac hujus, hoc tibi responsi loco habeas quod hoc dubio sine sit, a corporum striatorum & thalamorum nervorum opticorum, diversa consistentia. Varias pro variis suffimentorum formulas

mulas reperies sufficientes apud DEKER. *in exercit. med. pract. Cap. II.* Pro iis qui catarrhis laborant, cubitum ituris, culcitra odoratis & fragrantibus aromatibus, sedulo apud nos etiam mulierculæ solent suffire. Hæ ante somnum lectulorum ejusmodi suffumigationes, veteribus præcipue solemnes erant, non vane credentibus, per eas, commodam requiem comparari, diurnas curas ac molestias eas impediētes relaxari, phantasiā placari, insomnia molestā impediri &c. Huc spectat quando in variis morbis, variis conspergere ac consternere cubiculum practici suadent, v. gr. pro hæmorrhagiæ obnoxiiis, phreniticis, maniacis vid. P. SORBAIT *M. p. 34.* item in cardialgia &c. aceto, aqua rosacea, & foliis vitis nymphææ, myrti, quercus rosarum foliis salicis præsertim & vitis quæ per conclave conspersæ salacitatem extinguere, creditur, quare & arbores castæ hæ dicuntur, unde & ejus folia quondam a foeminis in urbe Atheniensi ad custodiendam castitatem cubiculis insternebantur in Thesmophoriis, quæ Cereri sacra erant, ut perhibet quidem DIOSCORIDES *Lib. I. cap. XXXV. p. 70.* sed an eventus etiam opinioni semper respondeat, nemini se prædem præstitit, nec quoque potuit. Ego equidem nemini facile suafor essem, ut hanc sponfionem iniret. PISO L. C. C. in lethargo per conclave, thym. pulegium in stupore THEODOS. *in Ep. Med. p. 331.* majoranam siccam & cort. citri spargere, in melancholia hypochondriaca I. MANARDVS *Ep. 4 Lib. X.* per cubiculum res odoratas sterni & suspendi suadent. Practici alii aerem suaviter olentem in palpitatione cordis, commendant. Parantur & alias commode candelæ medicinales & fumales ex resina balsamo sulphuris, variis additis carbonibus salicis, glutine ichtyocollæ mucilag. tragacanti quæ lenem, sed continuum emittunt fumum & odorem longe lateque spargunt atque pervadunt aërem, emendant & corrigunt. Huc pertinet CAR. DREBELII singulare inventum, quo aerem effœtum animare & sale quodam volatili oleoso imprægnare satagit; quod ulterius explicat PECHLINVS *in meditat. de aëris & alimenti defectu & vita sub undis Cap. IX.* Monendum tamen est, ut eligantur odoramaenta cuilibet grata, individuorum cum hic mira observetur discrepantia miraque idiosyncrasia cum quibusdam nauseam quædam excitent, aliis alia suffocationis & animi deliquii aliorumque incommodorum periculum inferant: Sic de noxio rosarum odore qui hysteriis alias mulieribus ordinario est invisus SENNERTVS *T. I. Lib. V. Sect. 6. cap. III.* O. TACHENIVS *in Hippocr. chym.* legendi sunt Levin. Lemnius De Arabibus dicit eos ob nimiam rosarum fragrantiam, qua Arabia redolet adeo affici ut male olentia pro optimis

balsamis quærant sibi. SCALIGER *exercit. 153. Sect. 10.* Cardinalis rosarum odore demortui, meminit, qualia exempla plures hinc inde notarunt Conf. & PIERIVS *Hierogryph. Lib. VIII. in scarabæo &c.* Nec subticendum, fumum densiorem nimis ex optimis, licet spiritibus animalibus obesse. Quare consultum est si ita res ferat ut fumum, in conclavi excitatum prius sinant diffundi antequam in illud se recipiant. Illum BONETTUS *Merc. Comp. p. 75.* recte in omnibus morbis a fumosis vaporibus excitatis v. gr. ab opiatīs incaute assumtis, carbonibus foetentibus, cerevisia & vino despumantibus metallorum vaporibus croci similiumque vaporosorumque effluviis &c. item & præcipue quidem in morbis pectoris & vitiis respirationis variolis morbillisque catarrhis calidis sic dictis oculorum morbis, pleuritide peripneumonia, hæmorrhagiis, internis, alvi fluxionibus biliosis, arthritide &c. damnat, quoniam, ejusmodi irritatione sua simul irritat. Nec commoda talia sunt gravidis, senibus macilentis morbis debilitatis & extenuatis in suppressione mensium a calida sic dicta causa, ubi frigida potius profunt. In genere corporibus biliosis, calidis, ejusmodi suffumigia, odoratu potius nocent. Addo illa minus quoque locum in hysteriis, & quibus caput infirmum est & debile, quibusve dolet quosque apoplexia præstolatur & affectus soporosi invenire. Odor præsertim hoc nomine caryophyllorum & florum narcissi, vid. LANGII *Epist. Lib. XI. p. 690.* & levcoji lut: vid. GREG. NYMANN *lib. de Apoplex. fol. 304.* suspectus habetur. Ejusmodi enim vaporosa vaporositate sua elastica, distendunt nimis tenuissima cerebri vascula. De aliis alii referunt v. gr. EHRENF. HAGENDORN *Cent. III. hist. 84.* juxta alios observatores lethalem effectum, ex seminis hyoscyami suffitu pro dentium doloribus sistendis, notavit. Hysteriis præsertim potius graveolentia & minus grata conferunt pennæ, cornua &c. accensa, ideo, quoniam irritant & excitant fortiter & respirationem augent, quo verosimile est morbi causam excuti. Pariter non instituenda sunt temere, aëre sicciore & calidiori, calida nimirum ejusmodi suffumigia. Tunc secundum quorundam consilium frigida sic dicta potius igni injiciantur vid. TH. BARTHOL. *Cist. Med. p. 221.* ut malorum & pyrorum mali & cotonei putamina, rosæ, violæ fantalinum lignum & similia. Rursus apud multos recepta opinio invaluit: vid. VERVL. *H. N. Cent. X. p. 650.* Morborum contagiosorum, tempore odores ex floribus nimium suaveolentibus v. gr. liliorum alborum in conclavibus servatis, sæpius nocentissimos esse. Annecto paucis adhuc ejusmodi odores suaveolentos, tamen intensos epilepsiam provocare vid. THEODOSIUS *l. c. p. 369.* &

maniacis obesse cum annotatum sit, illos aromatum exhalationibus effe-
ratiores reddi. Copiosam aromatum bene olentium exhalationem tres
nautas obruisse ac suffocasse MERCVLINVS memorat. Confer. RIDLINI
Lin. Med. p. 23. An. 2. Taceo de particularibus magis v. g. quando fu-
mum ligni sambuci herniosis valde obesse perhibent vid. JOH. ANGLICI
Pr. L. XI. p. 936. &c. Circa horum suffituum administrationem ad-
huc etiam hoc notetur, primum eos equidem ordinario fere gravius ferri
homines, mox autem facilius, quare ne nimium curent aut metuant pri-
ma forte pulmonum deterfione facta.

§. XII. In specie indicandum est, tempestatibus caliginosis, nebu-
losis, humidis, pluviosis, aëre foetoribus forte inquinato & maxime sub
infecta, pestifera & contagiosa constitutione, aërem ut plurimum corri-
gendum esse frequentioribus & quotidianis suffumigiis, cum thure, ma-
stiche ladano styrace, benzoe, succino fl. salviæ, lavendulæ, menthæ,
hb. angelicæ absinthii, sulphure, nitro, pulvere pyrio, baccis junip. &
similibus vel etiam acetum simplex aut rutaceum &c. spiritus acidi sul-
phuris, vitrioli &c. lateribus ignitis superfundantur. His institutis si
commoditas sic ferat, fenestræ rursus aperiri possunt, ut discutiantur, ob
quam rationem & de die commodius fiunt. Pavimenta aliquoties &
quotidie conspergantur acetis prophylacticis, infusisque rad. angel. im-
perat. allio, hb. scordii rutæ major. orig. lavend. cubeb. & similibus. Hunc
in usum egregia æolipila est, quæ in conclavi posita liquoribus fragranti-
bus & alexipharmicis ad dimidiam circiter partem repleta ignique pro
vento artificiali efficiendo admota. Juxta hæc fiat luculenta ignis flamma
ex lignis resinosis v. gr. juniperi, pini abietis fagi quercus, fraxini aliisque,
adeoque tunc caminus merito fornaci præfertur. Quæ omnium poten-
tissimo remedio Hippocrates Athenas peste liberavit quem alii bono ef-
fectu subsequuto alibi sunt sequuti ut etiam plura exempla referunt
ORIBASIVS *sympos. Lib. VI. cap. XXIV.* AETIVS *Lib. V. de remed. c.*
XCIV. PLINIVS *Lib. XXXVI. nat. hist. cap. ult.* PLVTARCHVS SVIDAS
&c. Cavendum tamen ne viridia ligna, quæ concremata copiosum ma-
dorem exsudent & magis adhuc putrida ligna, in ignem conjiciantur, quod
pestimum merito habetur. vid. BONETI *Polyalth. P. I. p. 440.* Mulie-
rem ex igne succenso, ex putridis lignis in balneo animi deliquio corre-
ptam esse recenset GALENVS *2. apb. com. 41.* Hanc noxam sic forte in-
ductam corrigent baccæ lauri folia rorismarini, flores lavendulæ succi-
num similiaque igni succenso injecta vel odoramenta, ex ligno aloes, la-
dano, styrace, sandaracha, benzoe, caryophyllis, nuce moschata &c.

Atque ejusmodi eligantur, quæ non fumum, sed copiosam flammam reddunt. Egregia certe ignis virtus, in multis, ut ipse resplendet. Nec est obscura ratio: ignis enim motu rapidissimo subtilissimæ materiæ, stimulo quodam potentissimo, in corpore humano, motum vividum instituit, quo humores solvuntur, dimoventur, attenuantur corpora, obvia mutantur &c. quod ex multis chymicis operationibus edocetur, quæ varia varie concreta mutant alterantque. Hocque suo celerrimo motu simul aërem ventilat ac purgat, omnes vapores noxios exturbando, & partes balsamicas oleosas, salinas volatiles, spirituosas, acidas &c. lignis concrematis ei ingerit. Verbo ignis corrigit aëris quietem, gravitatem & intemperiem. Notior res est, quam quæ peculiarem commemorationem commereatur, lue pestilentiali grassante, tormenta bellica, pulvere pyrio oppleta, sæpius explodere, quo remedio solo, Tornacenses Lev. Lemnio memorante civitatem suam a peste immunem præstiterunt, atque ignes luculentos instruere, non solum in conclavibus, ædificiis, sed & hinc inde in plateis e re esse; Namque hoc in genere verissimum est, si vitio aëris morbi grassantur, id non nisi vento aut igne posse corrigi. Autor est MARS. FICINVS *epid. antid. cap. XXIV.* accensis facibus carbonibusque bene succensis & manibus assidue gestatis ab illis, qui peste correptos invisunt, eosdem tutos reddi: Cæterum, & in aliis luculentus ignis in cubiculo laudatur. Svadet NIC. PISO *L. I. de M. C. & C. p. 77.* in convulsione ex repletionem quam vocat, in conclavi continuum fervare ignem; imo ignem ab utraque lecti parte succendere. Egregiam hanc ignis virtutem præter hæc & offendimus in ustionibus veterum ut admirabilis HIPPOCR. *L. de int. affect.* PLIN. AEGINETTA *Al. Trall. L. VIII.* ALPINVS *de Med. Egypt.* alique habent. Multus in primis in hoc argumento est. M. A. SEVERINVS *in Pyrotech. Chirurg.* In cauteriis actualibus nostro adhuc seculo usu perspectis quibus & moxam Chinenfium similem fungis olim Græcorum, vid. Cornarius, adeo decantatam accenseo, cujus eximium usum igni plurima ex parte si non soli adscribendum esse tantum non reputo. Ob argumenti similitudinem addo, quod VALVASSOR *in Descr. Carn. p. 156.* semetipsum vidisse tradit: nempe in monasterio quodam Carniolæ globulo crySTALLINO servato collectis radiis solaribus maniaci in fronte aduruntur, unde mox profundo somno immerguntur, a quo dein expergefacti, pristinae sanitati restituuntur, E converso fere Itali farragine ignita utuntur, ad depellendum soporem, de quo conf. R. LENTILIVS *in miscell. P. III. p. 220.* Dies vix sufficeret, admirandis ignis virtutibus fere infinitis recensenden-

censendis; hoc tantum primario jam indicabo igni accenso, & liberiori virtutem esse, agere in venena illaque edomare, elicere, eliminare ex corpore per combustionem juxta atque eminus, Conf. Illustr. BOYLE *Exper. Phys.* Sic vulnera ex venenatis animalibus illata, si candenti ferro urantur, veneni expertia fiunt, & quælibet venena cum uruntur & in cinerem rediguntur, venena esse desinunt.

§. XIII. Eundem in finem Quercetanus, Follinus, Ranchinus &c. pro contagio sc. avertendo suadent in conclavi, calci vivæ frigidam affundere, imo alii ad avertendas aëris injurias & contagium parietes, muros, de novo, calce tectoria obducunt & omnia undique spiracula januarum, fenestrarum &c. vel eadem vel bitumine, cera &c. obturant. Prospiciant simul tamen debite, ne ex altera parte forte noxam contrahant, cum non minus notum sit, calcem maxime & gypsum hac ratione, exhalationibus causticis, per inspirationem haustis, non pulmonibus solum, sed & sanguini & lymphæ imo spiritibus animalibus adversis illos que turbantibus, condensantibus viasque per quas fluunt stringentibus, haud simplicem saltem tabem sed & phthisin consumentem affricare. SORBAIT hinc opinatur vid. *Med. Pract. T. I. cap. XLIII. p. 323.* ob hanc calcis copiam aëre sicco atque ventoso phthisin in Austria esse frequentiore. Experimur item hæc effluvia fortem sternutationem, vertiginem; oculorum ruborem, passionem hysterica paralyfin earum, apoplexiam, capitis dolorem, febres acutas, lentas, hæcticas, phrenesin, peripnevmoniam, præcordiorum angustias infarctusve pectoris, præfocationes faucium, sitim, languorem virium, scorbutum, catarrhos, rheumatismos, imo sæpius mortem repentinam inferre ut præter obvias observationes exinde periisse Jovianum Imp. R. vid. A MARCELL. L. XXVI. Valer. Max. & Baco. de Verulam. Sylv. Sylo. Q. L. Catullum vid. V. PATERCVLVVS L. I. c. LVIII. Hermocratem ex HIPPOCR. 3. *epid. agr. 2.* Scipionem Aemilianum ex EVTROPIO ALBERT. *March. Brand.* Casimiri Filium &c. ex historiis accepimus. Simili modo effluvia fugienda ex vernice aut pigmentis variis recenter obducta. Hoc eo magis sedulo prospiciendum est, cum nec minus notum sit, conclavia pigmentis æque oleaginosi foetentibus de novo, ac calce obducta, per plures menses, imo annos hunc retinere ac spargere foetorem si forte diu clausa maneant & aër humidus subsit &c. conf. de hoc RAMAZZINI *de morb. artif. Cap. XXIV.* hinc saluti quondam lex ea Romanorum fuit multis, ut ex PLINIO constet L. XXXVI. H. N. cap. XXIII. qua cautum erat, ne intra tres annos noviter exstructa ædificia inhabitarent.

§. XIV.

§. XIV. Ut fumi candelarum sebacearum maxime fumosi atque foetentes mirum in modum aërem in conclavibus conclusis alterant & fanitati nocent præcipue si nullum caminum vel supra fenestras spiracula habent: ita illi ex iis non bene extinctis, magis adhuc nocēbunt. Etenim ut exempla declarant recenter extinctæ, lipothymiam, syncopem, asphyxiam, suffocationem ac passionem hystericam, nauseam, vomendi conatus imo mortem repentinam ipsam causari possunt, effluviis suis foetidis, quæ naturam veneni obtinent salino sulphureis & oleaginosi quæ præ reliquis suffocandi vim habent, & quæ tangendo narium nervos, spasmos producant. P. AMMANNVS in *medic. Critica* p. 367. recenset, foeminam Lipsiensem, in confectione cerearum, in conclavi undique clauso occupatam, propter fuliginum attractionem, in catarrhum suffocativum, incidisse. Imprimis gravidis adversissima hæc sunt, dantur enim mulieres adeo teneræ constitutionis, ut vel candelæ non bene extinctæ nidore, abortum patiantur, viditque earum multas Libautius; nec aliis ejusmodi exempla ignota sunt. ARISTOTELES jam annotavit *Lib. VIII. histor. animal. c. XXIV.* inter cæteros foetores gravidis præcipue obesse extinctæ lucernæ fumum. PLINIVS *N. H. Lib. VII. c. VII.* idem refert & ei occasionem fragilitatis humanæ reminiscentiam sistit sic loquitur vel de ea potius conqueritur: *Miseret profecto atque pudet astimantem, quam frivola sit animalium, superbissimi origo, quum plerumque causa abortus fiat odore lucernarum extincto.* Hi pessimi fumi eo magis ægrotantibus perniciosi, atque maxime apoplexia, paralyti, veterino tremore & similibus morbis correptis, & capite infirmo, respiratione difficili præditis, epilepticis, hystericis, catarrho suffocativo asthmatis & aliis pulmônibus & cerebri morbis obnoxiiis. Singulariter præter recensita oculis etiam adversantur & visus hebetudinem inferunt, Hinc etiam eo minus accendendæ candelæ, forte ex molliori impura pinguedine paratæ vel sevo, ex animalibus minus sanis, vel ex iis, qui morbo interierunt, hæc enim graveolentiam, & nidorem spirant hominibus nocivam, de qua re conf. SOLENANDER *Consil. p. 462. & p. 492.* Candelæ quoque graviorem & acriorem spirant odorem, ex sevo bovillo & suillo quam ex vervecino. Lampades pariter ex oleo imprimis nucum & rancido paratæ pessimæ sunt, quarum fumus æque cephalalgias, vertigines, stupores, affectus soporosos, & similia mala modo nominata infert, quod exemplo RAMAZZINVS in *Tract. de Morb. Artif. Cap. XV.* declarat. Quare (ut obiter, quod mihi in mentem venit scribenti, adscribere liceat) proprietatem commodam obtinere templum illud in Carniola

VALVASSOR in *Gl. Carn. T. XI. p. 757.* dicit (si res ita se habet,) quod nullam candelam ex sevo & oleo, sed ex cera tantum accensam patiatur. Omnis enim ex pinguedine aliqua graveolentia pessima est. Id discriminis etiam in ellychniorum materia ponunt, & ex gossypii filis ducta & juncorum medullam pro lampade construenda potius, quam ex cannabis vel lini filis, & pura, elota, candida potius quam crassa, impura, sordida volunt. Confer. SOLENAND. *l. c. S. V. p. 462.* Omnium optimo vero instituto omnis candelarum & lampadum fumus per tubam foras educendus erit. Alii quoque fumi æque nocivi ac illi modo nominati sedulo avertantur in cubiculis ægrotantium ad quos varia subinde adstantium & ministrantium quædam negotia occasionem suppeditant. v. gr. ex accensione candelæ sulphuræ in cubiculo maxime oritur fumus qui acidus, narcoticus & suffocans est, ex quo inibi cubantibus læsio haud exigua contrahi potest. Multo magis adhuc nocebit fumus crassus & foetidus carbonum maxime lignorum ardentium, quæ non raro pro variis scopis in conclavia ægrotantium ingeruntur, qui fumus maxime si pinguis quædam materia, ut sæpissime fit, quando super illos escæ præparantur & calefiunt, incidit, vi sua suffocativa ac narcotica pulmones proxime ac dein ipsum cerebrum illicque vasa lædit præternaturali distensione, aëris purioris & tenuioris accessum impediendo, elaterem & systolen arteriarum subtilissimarum in meningibus cerebri infringendo tollendoque sicque sanguinis stagnationem & congestionem, tandemque corruptionem efficiendo. Monstrant has noxas symptomata ex observationibus ejusmodi collecta, vertigo, cephalalgia, aphonia, movendi impotentia, animi deliquium, mentis alienatio atque sensuum motuumque omnium oppressio & torpor; profundus sopor. Tristis hujus eventus exempla collegerunt AMATVS LVSITANVS *Cent. VIII. curat. 33.* FORESTVS *Obs. IV. Lib. IX.* MARCEL. DONATVS *Hist. memorab. p. 107.* SOLENANDER in *Consil. Sect. V. p. 461.* WELSCHIVS in *Sylloge curat. & observ. 54. p. 173.* LOSSIVS in *Observat. Lib. I. obs. 26.* RAMAZZIN *de morb. artif. suppl.* LANCISIVS *de subitis mort. Lib. I. cap. IV. obs. II. p. 136.* L'Histoire de l'Acad. des Scienc. *Ann. 1710. p. 727.* ubi simul legitur in cadaveribus hominum hoc fumo lethifero enecatorum cerebrum notabiliter affectum inventum atque meningum vasa nimium sanguine distenta infarcta ac inflammata visa fuisse. Præfocati sic servantur si modo extemplo ex hypocausto fumido & concluso in aerem liberum transferantur, & artus præsertim plantæ pedum fortiter pannis asperis fricentur aut etiam vena in brachio secetur.

§. XV. Juxta hæc, jubente Hippocrate ut circa ægros omnia munda esse debeant, iterum iterumque priusquam æger ingrediatur, repurgetur, scopis evertatur, frigidaque conspergatur aqua, (ex qua alteratione etiam non parum ægroti reflecti deprehenduntur) conclave, fenestræ ad perspiratum aperiuntur, rite tergeatur illudque purum & mundum semper fervetur sordes foetoresque imprimis, cum cubicula ægrotantium ordinario certo modo, foetorem spargant, diligenter sæpiusque & quotidie ejiciantur, abstergantur, abluantur longeque ab ædibus projiciantur, quisquiliæ, vel, quod tutius adhuc, concrementur ibi; præprimis in morbis contagiosis, omnium maxime vero in dysenteriis aliisque similibus excretionibus notatis quæ non nihil de spiritu vitali participant, quo mediante, mutua conservatur sympathia. Foetore enim & effluviis copiosioribus suis nocivis morbidis, quæ perniciosissime per totum conclave se diffundunt, hæc pessimæ sordes & corpora vicina afficiunt contagio. Mundities vero & non parum spiritus recreat & infectioni resistit atque ad sanitatem tuendam instaurandamque plurimum valet. Præterea in variolis & morbillis, nil magis nocet, quam foetor ejusmodi. Nam foetor haud raro tantus est in ægrorum hypocauftis, ut vix libere spiritum ducant, hinc senties ibi varios vapores adversos, non solum illos, qui ex ipsis ægrotis exhalant, sed & qui aliunde subinde accedunt. Præsertim tum & sæpius videbis magna oborta nausea, detentos in lectis diu impuris, scrofarum instar involutabulis cœni, hinc inde moventes sese, olfacies, quos ulcera putrida spirant, quos fæces excretæ excitant, offendes illos, quos cura neglecta, exsiccatio linteorum sudore perfusorum, coctio, præparatio remediorum alimentorumque & similium causantur, quæ plurima non modo appetitum perdunt, (cum inter convivalia oblectamenta mundities princeps sit) sed & miasmati morbofo transvehendo causam, occasionem ac vehiculum præbent. Scorsim hic mentionem faciam observationis, quam D. FASCHIVS Jenensis affert, vid. ejus *Disput. de morbo hungarico* p. 17. quod nempe cibus in conclavi febre maligna laborantis & demortui præparatus & assumptus miasmate morbofo imprægnatus, quendam, eodem morbo mox affecerit. Intempestiva tamen quandoque conclavium repurgatio & ablutio nocumento esse potest. Notabilem de hac re observationem TVLPIVS adducit *L. IV. c. LII.* quod scilicet in variolis ex conclavium pavementis, aqua gelida improvide a mulierculis deterfis, insignes convulsiones, terribiles morbi commitialis insultus cum magno extremorum frigore aliaque gravissima symptomata, excitata fuerint. In similibus igitur similis quoque cautela est observanda. Insu-

per

per pulvis studiose vitetur, qui non parum quoque nocet, imprimis vero in oculorum & respirationis vitiis. Foetores vero expellantur aduersi atque nocivi ejusmodi, accensione subinde ligni juniperini, fagini &c. suffimigiis variis jam præparatis, gratum odorem spirantibus & spiritus instaurantibus, quæ sub forma trochiscorum, massarum, candelarumque &c. venduntur. Prostant quoque varii liquores & balsami in ejusmodi usum compositi. Omnes vapores graveolentes narcotiei studiose vitentur, quales etiam ex fornace non raro alibive proveniunt. Insuper hoc speciatim adhuc animadverti potest: in conclavi ægrotantium, escæ præcipue ex carnibus nidorem spirantibus, non facile aut rarius præparentur neque prandium & cœna ab aliis ibi habeantur, ne ægri ex odore ciborum & ferculorum, tædium nauseamque adipiscantur & appetitum jam languidum perdant penitus, quod ordinario accidit iis, qui dapes tractant, unde coqui, structores, & qui distribuunt cibos, minori semper appetitu feruntur: Quanquam & hoc non negandum sit, ægris, quibus appetitus languet, quandoque dum prandentes & avide cibos ingerentes adspiciant, salivam appetitumque moveri & excitari. Non modo ipsum conclave mundum semper servandum, sed munda etiam sint omnia, quæ vident, quæque tangunt quibusque utuntur ægrotantes; nimirum munda & candida sint vasa, quæ ipsis offeruntur, omnia mantilia, mappæ &c. Ceterum omnis tumultus & strepitus ædium hypocaustorumque, januarum pulsationes, soni acuti &c. sedulo avertantur, qui præsertim in magnis doloribus, præ omnibus vero aliis, capitis, speciatim in aurium passionibus ac ubi tympani membrana in aure spasmodice ac nimis tenditur, quod & in affectibus hypochondriacis, flatulentis, in febribus, inflammationibus quibusdam &c. familiare est, ac plane intolerabile malum, denique in omnibus morbis acutis, (palam certe est, quantum exacerbentur omnia dum non quiescant ægri & ubi somnus exoptatur) vitandi sunt, præsertim tempore nocturno, quo omnes soni ex longinquo etiam magis percipiuntur, auditu, paucioribus ejusmodi occupato. Phrenitici omnium citius & facilius a levissimo etiam strepitu irritantur, unde & hoc inter signa hujus affectus censetur; silentium vero omnium cura procurandum. Quantum fragores strepitusque obsint, qui capitis vulnera passi sunt, docet P A R A E V S Lib. IX. cap. XIV. p. 283. Quanquam hæc verissima sint, concedendum tamen interdum & hic, ut in cibo & potu consuetudini est, quando gaudent quidam magis uno certo loco quam alio, ut mihi Tiguri Helv. commoranti, opificem febre continua laborantem videre contigit, qui

in sua opificina & inter laborum strepitus melius se habebat, meliusque quiescebat, nam separato in conclavi manere nullatenus potuit, ab illoque abhorrebat, atque eo delatus delirio atque summa inquietudine tentabatur, ut & alios videbis multos, qui in mola bene dormiunt, qui a pulsu campanarum &c. vix excitantur. Consuetudinis hæc ratio in aliis quoque hucusque recensitis ac in sequentibus recensendis potest haberi. Exemplo sint adhuc binæ, quæ mihi jam suppetunt historiæ, altera a R. SOLENANDRO in *Cons. med. sect. V. Ob. 16. C. XV.* allata, quam lubet integram transcribere. Accidit ut rusticus quidam febricitans acutissime, perductus ad hospitale, nullis remediis a D. Gisberto curari potuerit. Tandem ex morituro quæsit, ecquid peteret, quæ fuisset victus ratio antea? dicebat: se plane ab isto cibo & potu & syrups & id genus similibus & lecto, qui nimis esset mollis, abhorre, quod non dormisset intra 19. annos in lecto, atque usus fuisset cepis, caseo bubulo, & similibus duræ coctionis, sub divoque in stramine vestitus dormivisset. Tandem Gisbertus una nocte permisit, ut in stramine dormiret, deinde ut afferantur cepa, sal, cum aqua frigida, consentiit. & Gisbertus, arbitrans, illum tandem eo citius moriturum, cum ille postridie igni, præter omnium opinionem adstaret. Videndum igitur medico diligenter, ut consuetudinis habeat rationem, in omni morbo. Alteram CASPAR HOFFMANNVS recenset *Lib. V. I. M. Cap. XLVI. §. 2.* de equifone febricitante, qui ex suo stabulo in conclave mundum delatus, ægerime se habuit; in stabulum vero iterum missus brevi, convaluit. Sic visi alibi sunt piscatores, qui nonnisi in cymba ad mare, opiliones, qui in ovili, in tenui lecto aut stramine saltem, convalescere potuerunt. Consuetudinis certe tanta est vis, ut noxia quæque etiam convertat in bonum, quoniam facile init naturæ similitudinem adeoque recte cum Aristotele naturam adventitiam ea cognominanda atque quæ ad labores ferendos plus habet momenti, quam vel ætas vel corporis vires naturales ita secundum Celsum omnem laborem etiam duriorum facilius puer vel senex quam insuetus homo sustinet, permutatio enim contra naturam ut regionis & loci laboriosa ita & maxime diætæ sæpe periculosa. Sic consuetudo ex pharmaco potest facere cibum & per eam helleborum ac opium suas amittit vires, ut Thrasias & pastores plerique in Græcia helleborum citra noxam devorarunt atque Eudemus ad consuetudinem venenorum eo est perductus, ut cum helleborum assumeret neque vomitu neque deiectione tentaretur. Huic igitur indulgendum præcipit C O V S noster 1. *Aphor. 16. & 17. & 49. 50.* ubi ita scribit: *Quæ longo tempore assueta sunt*

et si detersora infuetis minus molesta esse solent, quare ad insolita quoque facienda mutatio. De consuetudine, quantum nempe in actiones naturales, vitales & animales vulgo dictas partesque humani corporis possit docte RENATVS MOREAV CASP. A REIES *Elys. Camp. jūc. Quæst. XCIII. p. 1188.* docent, quantum vero in omnibus sex rebus non naturalibus, tradit C. HOFFMANNVS tam in aliis fusius quam succincte in *Method. Medic. Lib. I. cap. III.* quid Medico agendum *p. 14.* unde non in concinne OVIDIVS:

Quod male fers, assuesse, feres bene, multa vetustas

Lenit.

§. XVI. Ob aëris debitam temperiem & æqualem tranquillumque statum conservandum & malas ejus qualitates avertendas arcendasque in peste præcipue & morbis aliis contagiosis grassantibus & aëre labe quadam infecto, conclave bene clausum atque munitum ventoque undique impervium fervetur, non modo fenestras, sed & minimas rimas bene occludendo, occlusasque servando, præsertim tempore nocturno, aëre insalubri, nebuloso, frigidiori vel adverso vento, maxime in morbis frigidis & humidis, hydrope, catarrhis, tumoribus œdematosis, capitis læsionibus, vulneribus, contusionibus, doloribus, ophthalmiis, deliriis, phrenitide, variolis, morbillis, purpura, febribus lymphaticis malignis, & in genere omnibus iis, in quibus transpirationes & evacuationes sensibiles & insensibiles, per sudores & diaphoresin copiosæ & continuæ sunt instituendæ, in quibus aëris afflatus mirum nocet. Atque adeo Galenus ægrotos non modo in liberum aërem, verum etiam ad januas & fenestras, quoniam ventus maxime omnia spiracula eaque exigua potest transire, sæpe numero deducere vetat. Imo hoc habetur, ventum per rimam aut angustiore locum spirantem violente actum (ibi enim nunquam non aliqua sentitur aura) deterius afficere. Hinc Cartaginenses, ut contra ventorum, imbrium & maris halituum injuriam, magis se munirent, ædificiorum parietes, pice obducebant. In hypocaustis vero ejusmodi, locisque conclusis, quando præcipue hyemali tempore, intus accenditur ignis, aër exterior majori per rimas irruit nisu, ac impetu ventumque plus minus in conclavi producit. Nam ignis ibi accensus celerrimo & vehementissimo intestino suo motu ætheris, aërem anteriorem in conclavi propellit, expandit, rarefacit, ut levius spatium minusve resistens efficiatur, in quod a tergo aër intrans, compressior graviorque, motum ejusmodi concitat. Non simplici vice observatum est, aërem frigidior per angustas rimas violente actum, proxime adstantes vel nudatum corpus improvide huic exponentes pleuri-

tidem intulisse. Amplius dicendum est, fenestras januasque firmissime claufas obicibusque obditis servandas esse, ubi somnambuli & imprimis maniacy & melancholici detinentur, ne accepto damno, demum, januam claudant. Medium hoc imprimis atque remedium somnambulisy est, quando surgentes cubiculo egredi nequeunt, sed repertis ubique omnibus obstrictis forte evigilantes & consternati, lectum repetunt, ibique permanent, quo pacto simul spiritus animales aliter determinantur, pristina repetentes vestigia, illorum simul mutantur cogitationes. Attamen hoc non semper & ubique strictissimæ observantiæ summique rigoris, sed potius interdum spiracula in parte præsertim hypocaufti superiori sunt concedenda, ut perspiratio fiat, quod in multis necessarium est, v. gr. scite GESNERVS suadet in *Epist. p. 30.* ut locus, in quo æger peste laborans decumbit, foramen habeat apertum superius, quod alternis vicibus aperiri possit & claudi, ut halitus noxii exeant, præsertim si sudat validius & copiosius. Idem de variolis & morbillis aliisque id genus est affirmandum. Immo non raro, atque sæpissime suadendum venit, fenestræ hæ vel illæ & januæ aperiantur, si nimirum aër salubris sit, ut purior liberiorque aër & ex optimis cœli plagis ingrediatur atque sic aër ventiletur, & aër aëre expurgetur, unde Rhases in quovis fere morbo bene & sæpius perflatas cameras, voluit. COR. CELSVS de *med. Lib. IV. cap. VII.* sic loquitur: *Neque alienum est dum premit morbus, (pulmonum) clausis fenestris ægrum continere; ubi paulum levatus est, ter aut quater in die fenestris aliquantum apertis purum aërem recipere.* Hoc fiat præsertim a sole jam aliquot horis orto, quo aer purgatus & salubrior est, sed videndum etiam ut temperatus aer admittatur, neque frigidior justo aut calidior, aut humidior &c. Si vero id fieri non potest, quid agendum sit vid. GALEN. *Lib. IX. Methodo Medendi Cap. XIV.* & AVICENN. 2. 1. *Doct. 2. sum. l. c. 678.* Aer enim paucus & diutius conclusus maxime calidus, (qualis semper ille in ægrotantium conclavibus est) nisi bene moveatur, celeriter vitium contrahit, eoque magis cum fuligines ex ægro & adstantibus &c. exhalantes, crassiozem & impuriorem reddant. Hunc enim sic describit SOLENANDER *sec. 1. consil. med. 10.* *Nec illè aër laudandus est, qui hypocauftis est Germanicis, maxime iis quæ a plurimis frequentantur, vel in quibus computationes celebrantur conclusus, nec perflatus, continetur. Is enim præterquam, quod caput egregie onerat, etiam dissolvit humores, & colliquat in capite & pulmonibus idemque nativo spiritui est valde nocivus.* Hinc qui diutius in conclavi concluso ejusmodi miasmatibus morbidis refocto permanent, scorbutum contrahunt, profluvium capillorum, vultum

pallidum & squalidum &c. Hinc etiam sæpius videmus, quod in magnis concionibus, in locis, ædibus, conclavibus minus laxis multi hominum imbecilliores ex coetu ubi deficiunt, exire liberiolemque aerem spatiumque laxius quærere cogantur, ubi etiam mox refocillationem inveniunt. Hinc & aer in convallibus depressus, ut insalubris culpatur. In hunc finem etiam ideo venti medicati pilarum æoliarum beneficio, institui possunt & solent, in magnum ægrotantium emolumentum, ad excitandos, confortandos ac refocillandos eosdem, de quibus adeatur Celeberr. D. D. VALENTINI in *Armam. Nat. system. p. m. 121.* Perflatus vero aer & liberior, emendat, instaurat humores, movet & promovet spiritus & animum recreat, &c. Exempla periculosa sic aeris liberioris subtractionis in illustr. D. G. Montecuculi Coniuge vide in *Eph. G. N. C. D. 11. ann. 2. p. 426.* & in binis pueris in LOSSII *Observat. Medic. Lib. I. obs. 26.* Si vero aer, aere non possit purgari inclusus conclavi, per ignem luculentum camino accensum vel etiam per suffumigia aut per machinam quandam, in hunc usum adornandam, quæ aerem, ex conclavi emit- tat recentemque in illud immittat commodissime, corrigatur. Primarii morbi, qui hoc ipsum expetunt, sunt cardialgia, animi deliquium & li- pothymia, adeo ut aeris liberioris afflatus ab illa protinus liberet, atque asthma præsertim, catarrhus suffocativus & vitia respirationis alia, poly- pus cordis, pica, scorbutus inveteratus, morbi acuti, maligni, putridi quidam, vid. VALESIVS *Metb. med. p. 1141.* nephritis, vid. NIC. PISO *Lib. III. p. 148.* febris ardens *p. 441.* atrophia seu phthisis nervosa a. p. n. statu spirituum & a tono nervorum perverso proveniens, & phthisis ipsa pulmonalis & ulcera inveterata, hæctica, FRAMBESARIUS *Can. & Conf. M. LIV. p. 249.* RIVERIUS *Pr. Lib. XVII. cap. III. p. 303.* calculus SOLENAND. *Conf. Med. S. 2. p. 200.* gonorrhœa, affectus capitis cum cruen- ta spuitione N. PISO de *MCC. p. 179.* ventriculi imbecillitates, vid. *id. l. c. p. 420.* arthritis *l. c. S. 4. p. 420.* affectus hypochondriaci, melancholici *id. l. c. S. 11. p. 124.* stupor & paralyfis *l. c. p. 136.* & fere quivis longi morbi. Superaddo his denique variolarum morbillorumque principium, sub quo melius cum ægrotis agitur, si liberior, temperatior tamen aer, con- cedatur iis. Agnoscunt hoc omnes prudentes medici, ut agnoverunt jam pridem ex Scriptoribus ingenuus atque cordatus FORESTVS 6. *obs. 44.* post hunc I. D. HORSTIUS *obs. anat. 9.* & novissime SYDENHAM *observ. circa morb. acut. & de variolis confluentibus.* Hac de re insuper HIP- POCR. *lib. epid. VI. text. 9.* sic loquitur: Cui attemperatio moliri oportet, aperiri cubiculum, ut pateat vento introitus & exitus. Et eodem loco textu

21. De consuetudine monet, idem, inquiens: *Si quis sub dio consueverit decumbere, lædetur in valde concluso loco.* Parturientibus ROD. A CASTRO *de Morb. Mulier. Lib. XI. p. 525.* aere imprimis calido existente suadet, ut aer sæpe diffletur & fenestræ aperiantur, exemplisque variis probat, hocque instituto in maximo partus labore feliciter peperisse, ait, quemadmodum & (ut incidenter hoc saltem moneam) Hippocr. opinatur recens natis valde obesse, si in concluso aere diu maneant, sed expedire, ut mox liberiori aeri adsuescant. Convalescentibus deinde acceptum est salubreque ex concluso in liberiores paulo aërem venire, citius illi enim vires pristinas colligunt; cavendum tamen ne subito hæc mutatio fiat, præsertim si aer frigidior aut alio modo inconueniens fuerit, cum per calorem hypocausti assuetum magis frigoris impatientes sint, illudque per rarefactum corporis habitum facilius profundiusque penetret, rarefactos humores inspisset, motumque turbet, diaphoresin impediatur vel recidivam pariat &c. atque caloribus assiduis relaxatum continuisque sudoribus resolutum & debilitatum; talis enim morbis magis patet, quam is quem moderatum frigus spissavit. Incommoda quoque, quæ forte quandoque ex hac mutatione, quam multi ut periculosissimam superstitiose nimis metuunt, ab ægris pro re nata averti & præcaveri possunt, & aura forte frigidior se ingerens corrigi &c. corpus sufficienter vel stragulis vel vestibus cooperiendo muniendoque focum accendendo &c. Sub constitutione præsertim aëris epidemica, pestilentiali &c. aperiantur fenestræ, aquilonem & boream admittentes, claudantur vero quæ meridiem spectant. Atque quondam soliti fuerunt suavi & amœna mollique aura reficere ægrotos ac in locis calidis noctu lectos sub dio ad auram captandam constituebant v. DIETERICVS in *Antiq. bibl. p. 280.* Hic simul de expositione ad solem & seorsim quidem quædam dici possunt: Subit enim recordatio veteribus multis in morbis chronicis, contumacibus, frigidis sic dictis præcipue cachexia œdematosis, tumoribus duris, epilepsia &c. insolationem, quam Græci ἡλῆσιν appellant, maximo in usu fuisse, qua ægrotos solis fervori torrido exposuerunt. Cujus rei exempla præ aliis exponunt, inter quos (ne jam alios nominem) gravissimus Scriptor COEL. AVRELIANVS, qui eam *de morb. chronic. Lib. I. cap. V. p. m. 334.* de mania, *Lib. III. cap. V. p. 458.* de ictero *Cap. VIII. p. 466. & p. 473.* de hydrope *Lib. V. cap. IV.* de ischiadico malo *Cap. XI. p. 597.* de carne superflua adducit atque ad curandos eos affectus commendat. Subit tamen & iterum cogitatio, ardorem solis multis haud leve nocumentum afferre, quod supra jam paucis est indi

indicatum; plures enim invenies, qui solis radios nequaquam possunt perferre, ex quorum numero Augustus fuit Imp. Rom. de quo SVETONIVS refert, eum solem ne quidem hyemali tempore splendentem sine noxa potuisse ferre, quare necesse fuisse, ut semper pileo caput tectum servasset. A capite igitur imprimis sedulo arceant ardentes solis radios a plethoricis, maxime in hæmorrhagias & capitis debilitates & affectus, apoplexiam &c. pronis, ut & a maniâcis: Hinc mihi non displicet FR. VALESII *Lib. de S. philos. fol. m. 334.* commendatio, (ut obiter saltem hac occasione hoc commemorem) ad morbos biblicos referenda, qua opinatur maritum Juthitæ (de quo legitur *Jud. 8. cap.*) apoplexia mortuum fuisse, quam ex solis ardore tempore messis rure contraxisset sibi. Adhibeatur ea (in solatio) porro etiam præcipue, in senectutis (quæ ipsa est morbus) infirmitatibus, unde HORATIVS *Lib. I. cap. XX. v. 24.* senile corpus solibus aptum dixit. In hunc finem helio caminos exstruebant in summis ædibus, atque ita adhuc comparabant tectis parietibusque, ut percussis solis radiis, ardorem possent quoque augere. Fiebat quoque ea vel cum unctione, vel sine ea. Hujus remedii generis non amplius apud nos usitati commoda & incommoda MERCVRIALIS *Lib. VI. cap. I.* recenset. Quid? quod ideo domicilia & hypocausta ipsa interdum mutanda sint, imprimis in morbis acutis, atque thoracis, modo id fiat caute ac cum spe, ad quod FIDELIS *l. c. p. 86.* sedulo hortatur, cum scilicet unius cubiculi aer, ex assidua habitatione ægri, plurimum vitiatus emendari facile non possit. Affirmat hoc FR. VALESIVS *Meth. Med. p. 1141.* illud non esse difficile, faciendumque esse sæpe, etiamsi quis acute febricitet, si aliud conclave commodius sit. Specialissimum adhuc occurrit, quod mihi huc trahere liceat, nempe fulmine tactos, non in eodem conclavi relinquendos esse, cum dubium non sit, quin vapores ejusmodi noxii sulphurei plures, narcotici & suffocantes, adhuc aerem contaminaverint & tacta fulmine loca sulphur redoleant, ob hunc ipsum odorem adversum canes & aves abstineri videntur, a cadaveribus animalium fulmine tactorum V. PLUTARCHVS *simp. Lib. IV. q. 2.* VOSSIUS *de origine & prop. idol. Lib. V. cap. VI.* Immo optimum consilium esset, si ex ipsa domo educerentur aut exportarentur.

§. XVII. Aëris affectiones sunt lumen & tenebræ & causæ salubres & insalubres, ita tamen ut aer lucidus in genere præferatur tenebroso atque caliginoso, quare eorum temperatio secundum morbos quoque potius dirigatur ad quam directionem ipse HIPPOCRATES *de Medico*

Lib. Sect. 1. hortatur. Quemadmodum enim luminis & umbræ hic & illic pictoribus necessaria consideratio, ita & medicis est, adeo, ut lumen sine umbra non satis perspectum, aut ad minimum non adeo perfectum sit. Nimirum subobscurum & minus lucidum obstructis luminibus, five a solis radiis five candelis illa sint, cubiculum convenit in morbis acutis, in iis enim sæpius advertes lucem averfantes & sponte lacryman-tes ægros, (malo sane signo) ut in cholera vid. FONTANON *Pract. Med.* p. 256. N. PISO *l. c.* p. 262. hæmoptysi, ut notat. ANT. AB ALTOMARI *Art. Med.* p. 342. & quævis hæmorrhagia, inflammationibus, doloribus, cephalalgia, præcipue, si a causa calida sic dicta ortum ducat suum ac maxime in cephalæa, in syncope item hydrophobia, mania, phrenitide, in hac enim ægri ordinario lucem metuunt, efferatiores redduntur, novas imaginationes ex multis & variis objectis oculis oblatis fingunt ac imprimunt. Quandoquidem observare datum est, phreneticos & maniacos tenebris lædi, magis hinc eorum decubitus, in loco obscuro Asclepiades improbat, quia (inquiens,) in luce mentis five intelligentiæ visa debilia atque parva efficiuntur; in obscuro autem e contrario vehementiora atque majora fiunt & operantur, mentis atque intelligentiæ visa silentibus sensibus. COR. CELSVS vero *Lib. III. cap. XIX. de med.* locum obscurum pro iis potius elegit, quoniam is ad requiem somnumque inducendum magis esset idoneus. Itaque nos opinamur eos in mediocri & æquali luce semper esse servandos. COEL. AVRELIANVS *Lib. 1. Morb. Chronic. Cap. V.* pro maniacis hoc suppeditat consilium, eorum oculi ut adumbrentur, quo cæterum corpus luce tangatur. Ad hæc N. PISO *l. c. Lib. I. p. 36.* addit phreneticos & similes, si vires valeant, lucidum aerem magis, sin minus, tenebricosum juvare. Perinde id se habet, cum hypochondriacis, melancholicis, qui lucem fugiunt, tenebras vero mire amant, quale mirum exemplum in viro quodam militari, tympanitico, notavit ROS. LENTILIUS *Miscell. med. pract. P. II. p. 361. Lib. V.* & quo magis afficiuntur, eo gravius tenebris contristantur immodicis scilicet, modicis vero melius se habent & manent, imo hi (ut expertis constat) per nimium solis splendorem & æstum fieri & facile possunt maniaci. Experientia docet vertiginosos, aere lucido extra paroxysmum, in illo vero, in tenebricoso melius se habere. Porro in lippitudine, dilatatione & diminutione pupillæ & similibus oculorum affectibus atque in omni dolore inflammatorio lux est fugienda ut & omnes colores, qui ex intensa reflexione lucis oriuntur fibrillas nimium distendente, ut color flammeus, flavus, rubicundus, quoniam semper dolor

dolor exinde exasperatur quod sequentibus expressit L V C R E T I V S *Lib. IV.* versibus non inveniatis:

- - - *splendor quicumque est acer, adurit*
Sæpe oculos ideo quod semina possidet ignis
Multa dolorem oculis quæ gignunt insinuando.

Hinc & in nyctalopia (si ad præcedens quoddam paulisper respicere velimus) noctu melius vident, quam interdiu, quia a luce pupilla magis contrahitur, adeo, ut pauciores radii ad retinam possint transmitti. In hanc rem notabilis casus est & insolitus oculorum affectus, qui legi potest in W. H. WALDSCHMIDII *Diff. Epist. de rebus medicis & philosoph.* p. 21. & sequens est: *Puerulus unius præter propter anni, quoties deferretur in conclave, radiis solaribus aut candelæ illuminatum, toties insigniter intumescunt oculi, colore rubicundo suffunduntur, lachrymæ fluminis instar fluunt, salivaque prout in canibus rabidis fieri solet, in magna quantitate ex ore destillat. Eo tempore nihil videt, sed maximo clamore adstantes ad commiserationem invitat. Quamprimum vero iterum in conclave radiis destitutum deferretur, oculi tinctura croci & benzoës soventur, tumor & rubor secedunt, patiensque pancreaticæ vivit, bene ingerit, bene digerit, & bene egerit, optimeque nutritur.* In affectibus & doloribus capitis, apoplexia, imprimis si caput nudum ferventibus solis radiis exponatur, ut & cardialgia atque passione cardiaca a C O E L I O A V R E L. *de morb. acutis Cap. XXXVII.* adducta. in qua præcipue illud lumen, quod a solis radiis procedit, præcavendum esse monet. Aneurismate item Conf. R O D. A C A S T R O *de Morb. mul. p. 332.* & in omnibus morbis qui refrigerio alias opus habent, quos nulla putredo comitatur, vid. F I D E L I S *Lib. I. p. 65.* ubi exagitatio & resolutio spirituum & humorum tenuium nimis, in quibus cruditates subsunt primarum viarum, item in delirio febribus ardentibus vid. H I P P O C R A T. *rat. vict. in acutis p. 387. vid. id. 4. acut. 48.* erraticis & quando alias ægroti ad quietem & somnum se componere debeant, id observandum est. Pro cura hecticæ loca lucida esse vitanda colligere est ex G A L E N O *X. Meth. Cap. VIII.* Scio quosdam phthisicos pessime se habentes, quando in solis radiis errant, optime vero, quando in umbra se continent. Capite graviter vulnerati vix ferunt lumen vel candelæ splendorem, (quod semper funestum habetur indicium,) & ab eo notabiliter læduntur. Hoc equidem verissimum est, neque tamen & hi in cubiculo nimis caliginoso semper sunt detinendi, si respiciamus & æque ratum habeamus illud quod B O N E T T V S *Mercurio compital. p. 96. §. 27.* in medium affert

ad inferiora, quæ sequentur referendum, qui inter alia rejicit, quod adeo multi, capitis vulneribus Florentiæ moriantur, quodque lumen penitus arceant debilitata sic ægrorum natura. Ut hydrophobia affecti omnimodo quieti sunt fervandi; ita & ab iis solis candelarumque splendor studio arcendus est. Pari modo se res, cum puerperis habet, quæ semper ut graviter vulnerati tractandæ sunt, quibus primis præcipue puerperii diebus, aer lucidus nimis, valde nocet. Infelicem ex hoc eventum si legere velis, adeas GERBEZIVM *Intricat. extricat. med. P. II. cap. XX. p. 199.* Mulieres etiam optimo consilio serio præcipiunt, ne infantes recens nati, in locum lucidum, collocentur, cunæque integumentis obtendantur, ne oculorum acies statim debilitetur ac lufci fiant, aut candela ad caput ponatur, ne strabismus acquirant. Quod etiam de adultis dicendum est, qui diu in tenebricoso loco fuerunt, vel a somno longiori evigilant, quorum visus a repentina luce illabente læditur, facto radiorum impetu, exinde, quod per diuturnas tenebras pupilla præter modum sit dilatata ultraque tonum distracta, ex quo iridis fibrillæ contrahi difficillime atque retinæ filamenta, ex diutina motuum & radiorum agitatione, suppressione invalida reddita, non æque facile hunc recipere ac propagare possunt. Exemplum notatur a GALENO *Lib. X. de usu Part.* eoque simul declaratur, quomodo omne excellens visibile sensum lædat de Dionysio Tyranno Sic. variis tormentorum generibus miseros subditos torfit, super carcerem quinquam construxit domum longe splendidissimam, atque illos, qui quam diutissime carcere fuissent conclusi, ad eam ducebat, ut occœcarentur. Hoc etiam SENECA de Hercule ex spelunca revertente dixit:

- - - *Torpet acies luminum,
Hebetesque risus insuetum ferunt.*

Quare lucis claritatem illustriorem & subitam præcavere debent, qui discusso somno evigilant, quod nocentissimum in epilepsia habet C. AVRELIANVS *de Morb. Chron. Lib. I. cap. IV.* Rursum annotatum est, infantes, si diu in obscuro loco detinentur, evadere sedatiores tristioresque dein per totam eorum vitam. Hæc non addidissẽm, nisi interesset exempli. Ex physicis in hanc rem notum est, aerem luminosum calidiorem esse, caliginoso & lumen a lucis continuatione oriundum consistere in motu intestino velocissimo impetuose per lineam rectam, impulso ætheris, utpote materiæ maxime mobilis & tenuis, unde & in instanti & facile generatur & perniciosissime diffunditur per undas sphæricas quod experimento Romeri evincitur, vid. HYGENII *Traité de la lumiere,*

ere, & ad immensam propagatur distantiam, brevi vero iterum evanescit, adeo, ut ex ejus observ. l. c. sonum, lumen pluribus quam 600000. & fortassis pluribus adhuc vicibus celeritate superet. Hoc argumento simul innotescit, nobilissimas res creatas hoc attributo quoque præditas esse, ut undique se longissime extendant aut extendere possint illic in aurora & alibi in auro cernimus. Quod si itaque res ita se habet, quod aër luminosus, tenuior, rarefactus magis sit, adeoque & calidus & corporum densitatem dissolvat, non potest non, quin etiam non duntaxat aërem expurget, perspicuum & serenum reddat, expandat, sed & spiritus, (qui maxime delectantur luce) & humores, excitet & quasi illustret, exagitet, ebullitionem sanguinis producat, extra vertat & alacres reddat, corpora perspirabilia præstet ac calefaciat atque animum quoque pari modo perspicuitate sua perspicuum & exhilaratum reddat. Sole exoriente atque cœlo sereno ac claro omnia animantia alacria & vigore quasi novo excitata surgunt, gaudent, lætantur & ad omnes motus edendos & functiones plurimum valent omniaque quæ undique conspiciuntur amœna apparent. Hoc FERNELIVS indicat *Meth. m. L. XI. p. 70.* & HIPPOC. jamdudum. (a quo in hoc nec Asclepiades alienus est.) *epid. Text. 32.* dicens, ut *lumine, calore, motu & vigilia evocantur ab internis excrementa: ita tenebris, frigore, quiete & somno accurrunt ad viscera gravantque partes.* Et *textu 75.* ut *luce & calore succi evocantur & dissipantur, ita tenebris reconduntur & densescunt.* Palam est non solum lucem splendidiorum, sed & alia sensibilia excellentiora spiritus torpidiores suscitare. In hanc rem notabile est, quod nemini ignotum esse potest, sæpius a magno splendore solis maxime, vellicari nares, sternutationem moveri, quod mirum sane dignumque quod ulterius exactius alibi consideretur. Atque adeo existimat Illustr. BACO DE VERVLAM. ex illa causa splendore lapides pretiosos pellucidos in spiritus animales operari eosque roborare & refocillare. Aër tenebricosus vero, quatenus crassior & frigidior, motus illorum refrenat, sedat, coercet, concentrat & colligit, refrigerat, cor mœstitia perstringit, mentem quasi obumbrat, corporisque universi vigorem disjicit, torporemque injicit. Unde & apud Autores v. gr. COEL. AVREL. sæpius adeo laudatum, legimus, eos quando loca lucida in morbis commendant simul & semper mediocriter calida laudare & quando obscura præcipiunt mediocriter frigida simul ea esse, velle: Hinc loca sacra, templa subobscura (ne mens longe evagetur) & sacro horrore afficiatur esse, voluit, veneranda antiquitas. Ob hanc ipsam causam & volunt esse tenebricosi multi eruditorum musea. Eu-

ripides, GALENO referente, *Lib. XV. cap. XX.* quoties suas meditationes institueret, in obscurum & horridum adspectu antrum, se recepit. De Maino Mediolanensi sui temporis JCTO celeberrimo, idem refert ex PANCIOLO *Libro II de claris Leg. interpret.* BOYLE *Dict. hist. critic. T. XI. fol. 504.* cum sole etiam meridiano oclusis fenestris accensa lampade & capite linteo obvelato lucubrasse, ne coeli claritate mens evagaretur. Atque adeo Democritum Philos. ne videndo a cogitationibus abstraheretur suis, & ut meditationes animi, in contemplandis naturæ rationibus vegetiores & exactiores redderentur, luminibus oculorum splendore aerei clypei, sese, privasse fertur V. A. GELLIVS *Lib. X. c. XVII.* Simul perspicere jam licet, in quibus cubiculum lucidum, splendidum a sole vel candelis cum speculis orbibusque politis, illuminatum, conveniat. Exempla hujus sint affectus soporosi, carus, lethargus &c. animi deliquium, & ubi scil. spiritus oppressi magis sunt, vid. DOLAEVS *Encycl. Med. C. I. p. 405.* suffusiones, oculorum pupillæ contractio, cum enim luce clara, pupilla magis sit contracta, in loco tenebricoso, ea melius se dilatat, ut spatium concedatur, per quod radii ad retinam possunt transmitti ac deinceps refringi. In malo hypochondriaco, & apoplexia affectis, luminosum conclave quoque conducit. Ast si in his vita exploranda sit, conclave tenebricosum plane reddatur, omnibus fenestris clausis & deinceps candela accendatur & naribus admoveatur. Sunt quoque ulterius nominandi alii affectus, ut incubus, memoria abolita, paralytis, mensium obstructio, catarrhi, febres, quibus Asclepiades ægros juxta vigiliam & sitim hinc quoque convellendos esse præcipit. Conf. ORIBASIVS *Collect. L. IX. p. 358.* tumores item atque obstructiones splenis &c. de quibus vid. BRVELE *Med. p. 128.* calculus id *l. c. p. 157.* cutis defœdatio, scabies, elephantiasis &c. conf. FONTAN. *Med. Pr. L. I. p. 7.* purpura variolæ morbilli atque ejusmodi cutis exanthemata ut facilius ad habitum referantur, epilepsia SOLENAND. *l. c. p. 208.* COEL. AVREL. *de Morb. Chron. Lib. I. cap. IV.* scorbutus ALBERTI *de Scorb. p. 261.* angina, fluxus ventris vid. GRADI *Prax. p. 311.* FRANBESARIVS *Can. & Conf. M. L. XI. p. 81.* illiaca quoque passio secundum COEL. AVREL. *de ac. morb. Lib. III. cap. XVII.* atque omnes qui majorem & continuatam magis liberiolem ventilationem, perspirationem, apertionem, discussionem & digestionem requirunt. H. MERCVRIALI *de Arte Gym. L. VI. c. I. p. 343.* prodente, veteres, debiles, senes ægrotantes & ex morbis convelescentes soli inurenti exponebant, quam consuetudinem Solicationem vocabant. Conf. PLINIVS JVN. *L. VI. Epist. 16.* SE-

NECA *de bev. vitæ* C. XIII. C. CELSVS *de Med.* L. I. c. 3. COEL. AVRELIAN. *de M. a. & chron. Lib. III. c. V. cap. VI. & L. I. c. IV. p. 312.* ubi de epilepsia agit, præcipit, ut sole corpus torreatur, sed prætectō capite, alibique ad hanc apricationem celebrandam non satis habuerunt, in hortis, pratis campisque sole excoqui, sed etiam ex luxuriante ingenio, meniana de industria, tectis ædium adstruebant, in quibus sole uri possent, quæ hinc solaria appellabant v. SVETONIVS *in V. Claudii* C. X. & MACROBIVS *Saturni* L. II. c. IV. Ipsam exstruendi solaria, rationem delineavit GALENVS *de Art. P. III. segm.* Ast hæ diætæ solares indicandæ saltem non commendandæ: Tales enim hodie, nostrates, æque ac carceres solares, quales etiam in similem fere modum constructi, apud Romanos tunc temporis noti erant, horrescerent. Ejusmodi prope modum fuit, in quem deinceps bonus Barthol. Platina, vitis conscriptis Pontificum clarus, jussu Pauli II. P. R. est injectus, a Sixto vero IV. Successore, libertati restitutus Bibliothecarii que munere ornatus fuit. Antea recte quidem dictum est, in affectibus soporosis requiri splendendum conclave, sed in contrariam partem adhuc etiam scire licet: in vigiliis læsis, ut sopore æger quiescat, e re esse, si ante ejus oculos res aliqua sublucens ponatur, ut eam semper intueatur ex quo stabili fixoque adpectu continuoque oculorum exercitio delassatus connivebit, quod genus remedii HIPPOCR. 6. *epid. Sect. 4. text. 17.* proposuit, inquiens somnus stabilis rectorum nictatio, conf. & GALENVS *comment. in dictum locum*, quod ad ulteriorem experientiam perducendum est.

§. XVIII. Luna fœmineum ac molle nocturnumque sidus, ubique male satis audit, & ejus lumen noxium, quoniam ob varios morbos cerebro præsertim inferendos, exasperandosque suspectum habetur. Atque nos ita quidem sentimus: Luna non agit ita in corpora, ut hoc aut illud effectum consequatur, nisi quia jam corpus sic affectum est, ut luna hoc vel illud efficiat. Palam est, crescente luna, nostri corporis fibras laxari, vasa distendi, tumescuntiam fluidorum augeri, transpirationem humorum impediri, defluxiones varias tumoresque varios oriri & incrementum capere, ea vero decrescēte, stringi fibras, eaque symptomata minui, atque in mulieribus cæterum sanis circa novilunium vel plenilunium se menses exerere. Circa plenilunium major semper in cerebro humorum sanguinis &c. turgescētia, congestio, decubitusque observatur, unde sine dubio voluit antiquitas, ut circa lunam plenam instituerentur purgationes; verum decrescēte luna melius procederent excretiones, nisi quod languor major hic virium concurrat. Notam.

stambulis hoc præsertim, pituitosis, impuberibus & foeminis cephalalgia laborantibus N. PISO. *L. I. de M. C. & C. p. 27.* vertiginosis catarrhis ac defluxionibus acribus feri & sanguinis ophthalmiis &c. & morbis ex illis oriundis capitis cerebri & nervorum nervosarumque partium affectibus epilepsiæ (lunaticæ affectionis ideo dictæ) detentis, ut & convulsionibus, passionibus hysteris, tremoribus membrorum apoplexiæ (de qua præ aliis vid. ALEX. BENED. *Lib. I. cap. XXXIII. de curand. morbis.* & MACROB. *Saturn. Lib. VII. cap. 16.*) lethargo, paralyti, hæmorrhagiis, sanguinis sputo, vid. GRADI *Prax. p. 177.* asthmæ hydropi, calculis, colicis passionibus, fluori albo, gonorrhœis renum doloribus obnoxiiis, conf. SOLENANDER. *Conf. med. p. 116. S. 4. p. 136.* aut illis affectis infensum. In febribus, item varii generis, maxime malignis, putridis, contagiosis, ipsa peste (quoniam causam putredinis lunæ lumen auget) vitandum. In vulneribus, ulceribus spina ventosa &c. quoque lunæ decrementum & incrementum periti chirurgi, notarunt. Conf. SALMVTH. *Cent. 1. obs. 72.* Quod haud ignorasse Pythagoram innotescit, qui aliquando interrogatus, quomodo tam diu vixisset? respondisse fertur: Satur nunquam a mensa discessi, luna me nunquam vidit &c. Monet GALENVS 3. *de diebus decret. C. II.* sub ejus lumine dormire malum esse, pallorem & capitis gravitatem statim subsequi, & ob hanc causam PLVTARCHVS *Decad. 3. probl. Sympos. 10.* ait. Lunæ radios si dormientes feriunt, stupidos & sensibus obtorpentes eos reddere. Convulsiones ex decubitu sub dio sic contractas vidisse refert JACHINVS in *L. IX. Rhaf. C. XIII.* Illustrat hoc HORATIVS *Sat. 4. L. XI.* quando vina nocturno cœlo exposita, nervis nocere dixit. Attonitos quandoque & aphonos reddere radios lunares testatur ZACVTVS LV SIT. *L. I. Prax. mirand. obs. 37.* plura vid. in *L. XI. de princip. hist. p. 37.* ALEXANDER BENEDICTVS *Lib. I. cap. XXXIII. de curat. morbor.* vidit dum in Creta esset quosdam, qui noctu lunæ radiis expositi, mane sideratos fuisse. Exemplum amaurosi ex aspectu lunæ plenæ correpti vid. apud HEER *obs. 47.* Alia inter alios plures recenset notabilia KERKRING *spicileg. anatom. obs. 92. p. 174. seq.* Hinc & recordatio subit S. Davidem Regem & Prophetam *Psal. CXXI.* piis inter alias benedictiones etiam optat, ne luna eos lædat. Circa hanc materiam præter alios quod ANT. MUSA in *Lib. ad Mæcen.* affert, equidem jam non meum faciam, quando linteamina illius lumine infecta magnopere nocere dicuntur, & quando chirurgi monent, ne panni & linteamenta, quæ a vulneribus extrahuntur, radiis lunaribus exponantur, ut inter alios advertunt ANDR. BAL-

CASAR *L. I. de vuln. c. XXIV.* JOAN FRAGOSO *in gloss. quest. 100. A. REIES Elyf. Camp. i. Q. LIII. p. 669.* Notabile est, Verulamium, quoties luna eclipsin passa est, deliquio animi correptum fuisse. Conf. LEV. LEMN. *de osc. N. M. p. 331. 333.* Alioquin carnes ad lunæ radios expostas, teneriores coctuque faciliores evadere, perhibent. Efficaciam hanc lunæ, quæ tam in animalia quam plantas, nec non Oceanum, lacus majores, paludes, fluvios, alterando, turbando, mutando, adeoque non penitus negandam, operatur, juxta effluvia & radios, & qui ad nostram atmosphæram mittuntur a solis effluviis plane diversos & humidos potissimum pressioni adscribo, quæ aërem etiam compressiorem reddit, unde dein respiratio difficilior redditur & transpiratio impeditur, feri copia in corpore augetur &c. Quæ huic similitudini vulgo obijciuntur, servatum disputatorio conflictui est. Quod si res ita se habeat, cubicula a lunæ lumine bene sunt defendenda, obturando & armando fenestras, aut velis, aut (quod melius) valvis. E contrario hoc sydus partui salutare illumque accelerare, rimas corporis distendendo meatibusque viam dando (quod munus lunæ veteres assignabant, hinc Lucina) habebatur.

§. XIX. Ornatum an spectem? an etiam jam mihi negotii sit (ut cum Sapiente Seneca loquar) cum parietibus pretiosis, cum orbibus illis magnis atque fulgentibus, cum murrhinis & deliacis crystallinisque, (quibus pretium fecit ipsa fragilitas,) vasis cum pelvibus ac aquiminalibus argenteis, cum cubilibus istis in ambitionem compositis, per multum pretium multumque opus civitati notis, cum auleis istis Attalicis ex arcula modo prolatis, mensulis varietate macularum conspicuis & reliquo lautitiarum apparatu splendidissime exposito, quem ut aliquid novi luxuria commenta est, ne atria displiceant oculis venientis amicæ: JUVENAL. *Sat. XIV. 65.* Potius equidem reputo merito dicendum esse de cubiculo ægrotantium (Agragitis enim interdum ac Circensibus ut aiunt, alias pompa placet) licet & omni apparatu splendido, omni ornatu sumtuosissimo instructum illud sit, impensæ & pompæ saltim & fastus & vanitatis causa per omnes angulos distributo, qui accedentium oculos voluptate morantur, & accendunt invidiam, quod alias de carcere alii proferunt, quod nullus nimirum detur elegans & qui placere queat, carcer, licet haberet aureos clathros atque quod semper sit mala mansio, licet pretiositate aut arci Regis, in Insula Zipanon dicta, de qua MAIOLVS *Colloq. XXIII.* videndus; aut Regum Persarum cubiculo, cervical regium vocato v. HIER. DREXELIVS *T. II. p. m. 316. ex Athen.*

Lib. XII. Dypnosoph. vel Neronis J. R. vel Divi Marci Venetiis aureæ domui æquiparandus esset, cui loco arenæ, margaritæ erant. Si & lectus vel illum aureum Carbilii Pollionis Equit. Rom. vid. *PLIN. Hist. Nat. Lib. XXXVI. cap. XIV.* vel Julii C. de quo *SÆTONIVS*, vel Heliogabali profligatissimi luxurii mancipii vid. *LAMPRIDIVS in ejus vita*, superaret, si & fulcra adamantina haberet, quorum meminit *N. GERBELIVS in Fab. de aranea & podagra*, quam exhibet nobis *CAMERARIVS in narrat. Aesop. p. 215.* Ambo tamen (inquam) manent vera vivorum sepulchra, dum ægri, ægre & in divitiis & paupertate se habent, quocunque illos transtuleris, morbum suum secum transferunt atque ægrotantes conclavi ejusmodi ceu carceri tanquam Latumiis Syracusanis (de quibus *PERIZONIVS in Anatom. Aeliani Cap. XII. XLIV.* agit & *ANT. BOMBARDINI Paduanus*, peculiarem tractatum conscripsit) mancipati sunt in quo sua libertate privati, in solitudine, multum boni amittunt plurimum vero mali adsciscunt illique ad minimum adsuescunt. Quin imo, jure dicendum est, quod inconvenienter illi satis agant, qui ejusmodi conclavia nimio interdum apparatu ad luxum saltem composito, exornant, peristromatibus campanicis & picturis sæpe lascivis (ut nihilominus tamen apud multos usu venit:) lenonibus lenisque magis quam ægrotantibus & moribundis dignis &c. instruunt. Est utique & his multum inane. Dantur atque adeo casus, in quibus ejusmodi indifferentia etiam & innocentissima quoque ægris splendore & varietate obsunt. Inter cujus rei exempla febribus acutis ardentibus laborantes, maniacos, phreneticos, delirantes, insanientes, melancholicos hystericas, saltem si nominare vellem, clara res esset sine dubio. Advocandus commode in partes nostras *ROLFINCIVS* est, qui in *conf. med. L. XI. conf. 4. p. 82.* in ejusmodi casibus omni studio præcipit, ut cubilia a picturis sint libera, quippe quæ visa mentem & phantasiam corruptam jam conturbatamque amplius magisque conturbant, *conf. & N. PISO L. I. p. 36.* atque oblata rerum species aliæ, quoque iis, quam quidem re ipsa sunt, apparent, vel quæ levem quandam similitudinem saltem referunt, vera æstimant, & peregrina simulacra accipiunt. Speciatim dici insuper & potest ex conclavibus, in quibus salaces satyriasi, gonorrhœa, furore uterino vexati continentur, removendas esse omnes picturas, imagines, spectacula, quæ rei veneræ usum, vel cogitationem saltem ejusdem in memoriam, ullo modo revocare vel excitare possunt quod & Lucretii consilium est: fugitare decet simulacra & pabula amoris. Nam externorum lasciviam sequitur augmentum internarum concupiscentiarum. Tale quoque

que consilium fuit a DIEMERBROECKIO datum vide ejus *Anat. Lib. I. p. 29. pro pica laborantibus*. Certe eos qui pompæ saltem causa ægrotantium cubiculum pretioso suppellectili exornant æque stolidæ vanitatis arguere par est, ac veteres Romanos, qui moribundis etiam ornamenta quævis afferebant atque adeo eosdem pulchro ornatu, armillis aureis ac argenteis, gemmis interdistingtis, induebant atque ornabant. vid. ERNST. *Delic. Histor. Coll. XL. p. 770*. Attamen iterum reperies casus, in quibus picturæ & statuæ atque sculpturæ ornatus atque iis ridens apparatus splendidus aliaque splendentia & quæ vario colore oculos in se convertant, e re esse censentur: Lethargi, cari, apoplexiæ & stuporis hic mentio est facienda. CARDANI hæc subtilitas est, quando *Lib. de subtil. de hom. nat. p. 651*. ad excitandam venerem depictas virgines formosas circumponendas, frigidis sic dictis, suadet. Suadent rursus alii tabulas in quibus congressus veneri artificiose repræsentantur, ante oculos ponendas, ut eas semper adspiciant, quoniam ejusmodi delectationem (quæ aphrodisiacis quoque accensetur) augerent, & mobilitatem spermatis excitarent, hoc enim, ut aliis quoque externis fœcundum & animatum redditur, per fortem libidinis phantasiam ut & de generatione docuit Harvæus. Quam rem adeo PETRVS ARGELATENSIS *Lib. V. tr. 18. Cap. VIII*. necessariam ad confortationem coitus habet. Conf. & VIDVS VIDIVS *oper. T. II. p. 652*. Objecta enim movent sensus adeoque & voluntates & voluptates carnis, & appetitum stimulant, & sensibile ex insensibili sæpius producit, uti inaccensum potest fieri accensum. In hujus probationem quod nimirum & figuræ mentem movere possint, aliud quoddam exemplum legas licet de Zeuxi, qui ob depictam a se vetulæ cujusdam deformitatem, dum attente eam intuitus esset in tam effusum prorupuit risum, ut inter ridendum animam efflaverit, & aliud ejusmodi TIMAEVS A GVLDENKLE *Lib. II. cas. 16*. commemorat, & ut demonstret per ejusmodi picturas affectus corrigi posse: Nimirum Serenissimæ cuidam Principi ira sæpius tactæ ut ab ea eam detraheret, curavit, ut Megæra illa infernalis furia depicta, ante oculos poneretur, cujus atrocis furie adspectu illa etiam mota est Princeps, ut iram detestata in mansuetudinem componeret animum. Huc pertinet, quod ex Sorano & Augustino refert VOSSIVS *Theol. Gentil. Lib. III. cap. XII*. Dionysium Tyrannum cum propterea, quod deformior esset prolem nollet sibi similem gignere, in cubiculo suspendisse picturam formosam, ut eam potius quam mariti vultum uxor in animo haberet. Præterea aliis quoque, qui plus nitori quam sanitati student, lædi pos-

sunt: exemplum inter alia modo sit arthritis ex mensa marmorea contracta apud BARTHOLINVM in *Actis Hassniensibus Philos. & Med. Vol. III. & IV. p. 169. legenda.* Neque vana prorsus ratione quis existimet, interdum esse conclave & lectum sericis ornamentis & gratis ægrotantibus picturis, statuis & figuris ornandum, ut visus & sensus delectationem percipiant & demulceantur atque mens exhilaretur exciteturque, sensibilia enim jucunda sunt & spiritus animales & sanguinem afficiunt. Atque ex assiduo figurarum earum adspectu, quæ oculos in semetipsas convertunt, provocatur somnus, sicut provocatur, quando historiæ narrantur, musicæ & susurra lenia audiuntur, quod a summo Præceptore HIPPOCR. propositum auxilium est *6. epidem. Sect. IV. text. 17.* Figuræ & picturæ conviviorum, nuptiarum &c. movent appetitum, ut iram præliorum &c. Hunc in modum C. CELSVS *de med. Lib. III. cap. XXIV. p. m. 176.* & NIC. PISO *Lib. III. p. 321.* adducunt, in ictero v. g. lecto, conclavique cultiori eo respectu opus esse additque ille, ob ejusmodi animum exhilarantia, morbum dictum fuisse regium & RORDER A CASTRO *Med. Polit. p. 158.* vult, mensa floribus aliisque ornamentis vasorumque nidore eluceat, quoniam appetitum revocaret restauraretque. Stricte hoc plurimi Anglorum præsertim observant in atrophia maxime, sive nervosa, sive phthisi, quibus uti & convenit victus deliciis plenus & varius, ita & cubiculi apparatus nitens & gratus. Pariter J. MANARDVS *Epist. 4. L. X.* cubiculum melancholicorum floribus exornat. In visus debilitatione ex spirituum inopia specula plura circumposita visum reficiunt, quoniam reflectuntur radii ac spiritus robur concipiunt ac se conferunt copiosius. Fertur, Aristotelem Alexandro M. suasisse, ut ad visum recreandum & conservandum sæpius adspiciat specula, ut etiam secundum scholam Salernitanam, fons, speculum, gramen, dant oculis levamen. In hujus gratiam etiam expedit ut per conclave picturæ atque panni virides & cœrulei expandantur.

§. XX. Præcipuum in ægrotantium conclavi utensile lectus est, nihilque ægris lecto lectius, hoc unicum ægrotorum refugium, hæc infirmorum percommoda & peroptata mansio, nil eoque magis iis necessarium est, quum remedii etiam non raro impleat vicem, adeo ut solo maturo tranquillo & convenienti decubitu bene collocati æqualiterque strangulis contexti, juxta somnum, qui nutrit, simul protractum, a morbis liberentur & reficiantur. Et sane impuritatum, cruditatum, quæ fomites sunt morborum, digestio, consumptio, secretio, resectio virium & instauratio, vix alia ratione felicius, facilius, meliusque procuratur placida

placida quiete & decubitu teporeque fovente suo, qui calorem internum corporum blande fovet & excitat, qui ut omnes uno ore affirmant coctionem perficit omnem atque sudorem spontaneum deducit, quem & ambientia juvant: Lecti enim æqualiter convenienterque corpora contegentes, caloremque naturalem foveant, conservant augentque, atque jugem & faciliorem sanguinis circulationem juvat in illis decubitus decenter compositus. Hinc CELSVS *Lib. V. cap. XXVI.* ait: optimum etiam medicamentum quies est corporis pariter atque mentis quietem efficiens. Atque, quod quibusdam paradoxum esse videatur in senibus vel summe debilibus motus debiti defectum ut sobrietas ita & protractior in lecto decubitus supplet & alimenti coctionem, cruditatum vero consumptionem juvat. Id innuit iterum CELSVS, scribens: *qui bene concoxit, tuto mane surgat, qui minime, in lecto diutius quiescere debet.* Exinde intelligitur, quibus in morbis præcipue longior in lecto decubitus proficiat & loco remedii sit: v. gr. in omnibus diarrhœis, lienteriiis, dysenteriiis & reliquis ventris profluviis, secundum AETIVM *Tetr. III. S. 27.* & CELSVM *de med. Lib. I. cap. VI.* nec non in maximis doloribus ut & inflammationibus ac ubi tumores & vulnera maxime in pedibus aliisque partibus ad motum ciendum & progressum promovendum factis, infestant ut & in calida & sicca, vulgo vocata intemperie, biliosa & similibus. Idem suadendum extenuatis macris atque e maciatis ac imbecillis (propterea, quod quietis beneficio spiritus refocillantur & corroborantur corpusque grata humiditate perfunditur) in morborum item declinatione nonnunquam febrium, ut materia eo citius digeratur superstes. CAROLVS PISO, vir eximius, qui medendi rationem potissimum a veterum observationibus traxit, monet *Lib. I. de Morb. Intern. C. VI. p. 35.* ut ii qui cephalalgia ex bilis abundantia laborant, quiete utantur maxima somnoque largiori, ut adsit animi tranquillitas & hilaritas, fuga iræ, curarum, mœroris, studiorum, amorum. Observavit EXPER. SYDENHAM quod cum in febre continua ab ipso observata, ægri diutius quam par erat a lecto abfuissent, eos in dolores vagos, rheumatismum, iterum incidisse, curam horum autem attulisse, si iterum lecto addicti fuissent, & *p. 588.* podagræ obnoxiiis suadet laudatissimus auctor hyeme præsertim, ut diu in lecto, licet non dormiant, commorentur. Sigillatim recenset, de juvene febre pestilentiali laborante, in quo cum medicamenta nihil perficerent & tandem omnia iterum rejicerentur, sepositis omnibus iis, decubitu solo in lecto & tranquillo situ, spontaneo sudore oborto, symptomata omnia remissiora facta,

facta, medicamenta deinceps exhibita, retenta & morbum superatum fuisse. His jungo prostratione virium notabili animi deliquio stipatos morbos, febres malignas &c. quibus detenti extra lectum vix se continere, ne dicam, caput erigere valent, & quibus exantlatis etiam aliquandiu adhuc eum non relinquunt. In angina itidem quies primis imprimis diebus imperanda, adeo ut ne linguam quidem vel loquendo vel masticando commoveat æger? Decubitus per longum temporis spatium protractus æque necessarius est, in fracturis ossium, qui tunc fere ad sanationem, agglutinationem perfectam majus adfert momentum, ac ipsa emplastra, & quibus ulcera in cruribus sunt, hos neque ambulare, neque stare, neque sedere oportet, atque aliæ circumstantiæ idem exposcunt. Sic v. gr. modo laudatus Sydenham adducit, quod in venæ sectione melius cum ægro agatur, cum cubanti 3x. fuerint detractæ, quam si VI. vel VII. tantum amiserit, postquam surrexit. Qui & facile animo hac chirurgica operatione linquntur, illa decumbentibus præstat. Circa alia medicationum genera alia atque alia observanda occurrunt v. gr. de Borboniensibus in Gallia & Bathoniensibus in Anglia aquis mineralibus MAYERNIO vid. *op. med. p. m. 344.* & GVIDOTTO vid. *tr. de therm. Britan. p. 251.* & Præsidi de thermis Carolinis constat, has minerales aquas pro cura potas, in quamplurimis subjectis longe citius & facilius per alvum etiam atque vesicam a decumbentibus in lecto quam deambulantibus reddi. Quanto magis vero necessarium, quantoque expeditius hoc ægris solatium, tanto magis misera atque calamitosa funestaque illorum conditio est qui cum LOBO ex *Cap. VII. v. 13.* queribundi suspirant: *Eheu non consolatur me lectus meus: Ab quando sustentabit me in querela mea cubile meum.* Atque quorum aut inquietudo (qui & permutationem lectulorum acrius adurgent, cum iis ordinario res est conclamata) aut afflictio ac certa morborum genera vix ac ne vix quidem permittunt exoptata hac requie frui. Orthopnoea præprimis est hoc nomine memorabilis ut & asthma fere omne in iis præsertim frequens, qui obnoxii & obsessi sunt angina, peripneumonia, strumis colligrandioribus, polypis cordis, pulmonum infarctu, hydrope pectoris, abdominis, lienis, & mediastini inflammatione, tumore scirrho, &c. Si enim decumbunt in lecto, & corpus stragulis coopertum quiescit, ex illis calefit, ex qua incalescentia sanguis concitatori motu agitur, unde turget atque sic uberiores & frequentiores aëris inspirationem, ut promoveatur respiratio, requirit, quam per asperam arteriam & bronchia coarctata exinde possit suppleri, ex quo harum partium omnium labor

labor efficitur, quo plus enim sanguinis quoque frequentius systole dia-
stoleque trajicit per pulmones, eo copiosius & frequentius aër accedere
recedereque debet. Ob ipsum decubitum horizontalem & multo ma-
gis supinum forte dein & magis & urgentius premitur diaphragma re-
primitque superiora versus, pulmones, qui in arctius coguntur spatium,
quo rite sese expandere nequeant; vel serum extravasatum peccansve
loco, aut pus intus collectum, pulmones undique inundat, faciliusque
afficit obruitque. Rursus humores stagnantes, sanguis, lymphâ, serum
facilius descendendo refluunt, minoremque experiuntur resistantiam,
quam si in æquilibrio adhuc subsistunt humores, aut si ascendunt. Quem-
admodum experimur digito forte inflammato, panaritio &c. dolorem
augeri, digito versus solum declinato & pendulo, minui vero digito ele-
vato arrectoque, aut tumores augeri, si humores libere remeare neque-
unt: v. g. pedum œdematosi enormiter sæpe augentur, quando stant,
sedent (maxime cum curru vehuntur) & ambulant; lecto vero jugiter
æquali positura decumbentibus sensim dissipantur minuunturque. Ubi
mihi in mentem venit, mirus quidam casus a LENTILIO in *Miscell. P. II.*
p. 529. recensitus, de quodam summis doloribus & convulsionibus affli-
cto, ubi quieverit, ubi vero concitato cursu incesse-rit, melius se habuit.
Præter hæc haud raro etiam non tam remedium laborum & ægritudi-
num lectus est, & in eo longior decubitus, quam causa, de quo plura
adhuc exempla exhibere possemus, nisi sequentia varia ejusmodi in me-
moriâ revocarent, & hoc saltem foret exemplo, quod longior decu-
bitus dolorem, intertriginem &c. contrahat, circa quæ tamen magna
morborum & hominum occurrit differentia, ubi recordor illius miræ
cutis teneritudinis apud Gassendum adeo, ut quacunque corporis parte
vel tantillo vestium contactu rubedo, pruritus & tumor exorirentur.
Ejusmodi si accedunt atque longius tandem tædium contrahitur mol-
lissimi etiam lecti sic decumbentibus duriores videntur ac recte valenti-
bus saxa, ut proverbio dicitur.

§. XXI. Etenim hoc etiam verissimum est, in multis morbis atque
in levioribus præcipue malis conferre, ægros non statim lecto commit-
tere, nec semper & diu nimis illo affixos tenere, sed & prima invasione,
ut & in ipso morbi statu, extra illum in sella fervare, aut si quandoque
& quotidie & aliquoties per aliquot horas (morbo vehementiori, inten-
siori febre, vomitu enormi, vertigine, animi deliquio, artuum dolore &
similibus non contra indicantibus) a lecto ut abstineant, surgant, subin-
de obambulent & sedeant, ut morbus cum minori molestia ac breviori
inter-

interdum spatio transigatur, ut ægri minori ægritudinis tædio, tempus peragant, ac symptomata multa & incommoda ut alvi constipatio, urinæ obstructio, respiratio parva & densa præcaveantur &c. Certe experientur ægrotantes, quod leviora incommoda facilius excutiantur, si resistent tantisper illorum insultui, nec lecto se mox abscondant ad primas illorum perceptiones atque expectent, donec majori vi morbi, eo adigantur. Sique forte major debilitas obstet, saltem vestibus induti lecto incumbant. Notanda in hæc sunt HIPPOCRATIS verba, qui & alibi quorundam ægrotantium hoc intuitu pigritiam & pusillanimitatem castigavit, quando dixit *epid. Lib. VI. p. 347. Morbi quidam sunt difficilis judicationis, quorum solutionem si expectes antequam ægroti e lecto surgant, illi certe languescent & facultates obliviscuntur suorum munerum & interibunt.* Item, convenit sæpe cogere ægrotantes ut lecto surgant, etiam nondum integre curati, atque torpentes ad ea quæ agunt serio excitare, nam paulatim sic pigrities deponitur, & facultates velut reviviscunt, atque ita superantur morbi, qui alioqui a jacentibus & otiosis nunquam superarentur. Vid. & SYDENHAM. *l. c. p. 186.* observavit etiam hic laudatissimus Auctor inter alia ex longiori in lecto mora (si scil. in principio & incremento morbi, uti modo dictum, in lecto mansissent,) rheumatismum phrenitidem & icterum subsequutum esse *p. 283.* Non ex ingenio tantum comminiscuntur, qui existimant, apoplecticos in paroxysmi vigore non statim in lectos conjiciendos esse, & stragulis cooperiendos, cum satius sit illos (si non adeo tenerioris & imbecillis sint constitutionis) extra lectum in sella saltem per aliquot 5. 6. 8. horas, usque V. Sectio instituta aliisque remediis adhibitis, circuitus humorum liberius meet, detinere. Experientia enim testis est, atque inter alios Auctores FAVENTINVS *Tr. p. 665.* apoplecticis, si statim lecto committuntur, majorem ad somnolentiam propensionem adesse. Sanguis enim ob ambientem lecti calidi calorem magis exæstuans ac exagitatus obstructiones vasorum capitis & cerebri minimorum, adauget. Experientiss. iterum SYDENHAM *l. c.* atque adeo errorem hunc optime agnoscit advertitque, quod lecto præpropere nimis, imprimis juniores & sanguinei magis affigantur variolis, morbillis & ejusmodi exanthematibus laborantes, vel in quibus illorum suspicio est, 4to enim demum die lecto ægros hos adjudicat, modo in cubiculi ambitu se contineant, & demere jussit stragulorum onus, ne forte immoderato & præmaturo lecti calore cito nimis propellantur, ejusmodi exanthemata, cum certum sit, eo magis universalem fore materiæ separationem, quo tardius prorumpant, nec
adeo

adeo facile retrocedere: Sanguis enim in motum violentiorem concitatur, quam qui materiæ variolosæ separationi rite peragendæ par est Idem *Sect. III. Cap. II.* mirum casum affert de juvene (variolofo) qui pro mortuo habitus, nudus libero aëri expositus erat, quo vero incolumis evasit. In febribus porro intermittentibus, ægris, ægre ipse concedit decubitum, & ob illum corticis peruviani usum suspectum atque frustraneum habet, imo adeo ab eo, mortem metuit. Simile iudicium esto de omnibus morbis acutis & cum excretionibus cutaneis aliis stipatis febribus ardentibus, symptomaticis & secundariis, hæctica item & tabe, inflammationibus imprimis internis, angina & pleuritide, phrenitide præsertim. Expertum enim habemus in his, ut & rheumatismis V. *Sect.* atque medicamenta appropriata, refrigerantia &c. parum procedere, nisi ægri per aliquot horas, singulis diebus, a lecto abstineant. His facit fidem præter alios BONETTUS, qui *Merc. Compit. p. 224.* ardentibus febribus quibusdam, quæ cum summo capitis dolore, ardore, sonitu aurium, caligine oculorum, deliriis, stuporibus infestant, & ab eo, capitalibus vocatis observatum fuisse scribit, optime ægros se habuisse, si quotidie lecto, saltem ad horas aliquot, abstinuissent, vel si vestes saltem (si ob debilitatem non licuisset) induissent & supra lectum cubassent, capite paulo elatiori, rationemque apponit, quam ibi vide. Non modo hoc in ejusmodi sudoribus febrilibus sed & in omnibus morbis sudoribus nimis stipatis, tenendum, quoniam assiduo in lecto decubitu, sudoris causa, vasorum extremis præsertim laxatis atque debilitatis eos augeri videtur. Lectorum & stragulorum moles & accumulatio præterea in his modo adductis morbis ut & maxime in cardialgia, syncope & respirationis vitiis laborantibus valde etiam obest, illa aggravantur magis & respiratio & anxietas statim fit difficilior graviorque &c. Hic non possum non aliquorum & pene multorum errorem seorsim taxare, qui caput & faciem cervicalibus & stragulis pulvinaribusque obvolvunt, operiunt, ac tantum non obtegunt, ex quo dolores aliique capitis affectus cum aurium susurris, pilorum defluvio & catarrhis, gingivarum inflammatione, halitus foetore &c. contrahuntur. Inspiratus etiam insuper proxime aër ab ipsius ægri exhalationibus inquinatur, ex quo morbus augeatur ex facili.

§. XXII. Commoditatis est, si sponda ex ligno leviori fabrefacta, ut facili negotio transferatur, sit & humilis, ut eo commodius æger se in lectum recipere & simul iterum descendere possit. Talis præcipue necessaria erit in ejusmodi morbis, in quibus frequenter ægroti lectum

ascendere descendereque v. gr. ventris fluxionibus, diarrhoea, dysenteria &c. habent necesse. Sit quoque ampla & lata, ut si forte lectus per diuturnum decubitus comprimatur eoque magna decumbenti molestia dolorque creetur, ad diversas partes, membra ardore forte & dolore excruciat, & dimovere interdum, eoque melius se in requiem & somnum componere possint ægri, ac in febribus ardentibus forte & similibus torrescentes per flabellum quasi aërem gratum frigidiusculum sibi concitare atque sic blando interdum refrigerio molestum calorem, temperare. Conf. R. A CASTRO *de Morb. Mul. Lib. VI. p. 132.* Attamen COELIVS AVRELIANVS *de Morb. acut. Cap. XXXVII.* lecti latitudinem & spatium tantum probat, quantum ægro sufficiat, ne alterna & frequenti versatione per eum frigus corpus occupet & relinquens spatium nativo calore occupatum, quo evaporatio insensibilis præcipue inhibetur, quod in ejusmodi morbis, in quibus ea maxime necessaria est, observare licet. Alias ut ex illo loco simul apparet, si parare lectum spatiosum ita velint, ut hæc versatio corporis impediri possit, consultum, pro rei exigentia spatiosissimum & amplissimum lectum construere, ut mutatio quandoque fieri possit & in altera parte interea lectus duplicata quasi serie instructus de novo sterni, & ut sic non necessum sit, ægrum in alium transferre, quoniam hæc translatio ægris sæpissime incommodum, debilitationem, imo animi defectum affert, ut sic mutatio, lecti mutatione fieri queat. Idem COEL. AVREL. sæpius laudatus *Lib. XI. de morb. chronicis Cap. XIII.* in hæmorrhagia & *Lib. I. cap. IX. de acut. phreniticis & pro maniacis Lib. I. de morb. chron. Cap. V.* lectum bene stabilem & immobilem ac non sine causa requirit. Præsertim vero contactus lectus sit altus, ne, propter humilem tectum ex aëre concluso & vaporibus ex ipso decumbenti exhalantibus, diu inibi retentis molestia & noxa augeatur. Quare incommodi sunt lecti veteres germanici dicti depressi, commodissimi autem hodierni gallici nominati, qui alti & conclavis tectum propemodum attingentes. Stragula sint levia & mollia æqualiter & leniter strata, imprimis in morbis qui doloribus magnis excruciant. Sic in ischiadico & psoadico malo, COEL. AVREL. mollioribus stragulis jaceant ægroti, vult *Lib. V. de Morb. Chron. Cap. I.* ut ægri eo commodius tranquilliusque in illis conquiescant, & patientes minus sint patientes. Hoc animadvertens Galenus, lectos molles febricitantium nominatim esse voluit tanquam difficilis tolerantia inquietationis correctorium. Mollissima quoque sint in venere languida utroque in sexu, enterocoele, pervigilio &c. HIPPOCR. *Rat. vict. in Ac. Sect. 4. p. 387.*

& morbis renum, nervis vulneratis, in continuis, putridis RIV. *Prax. L. XVII. p. 308.* & similibus. Sæpius etiam animadvertes, licet lectus satis sit levis, quod tamen in acutis sc. (funesto indicio) in doloribus, inflammationibus, de ejus gravitate conquerantur, ne dicam, quibus lintea ferre grave sit. Sed etiam lecti duri interdum magis e re sunt, de quo GALENVS *de salubri diata Cl. II. p. 81.* Itaque lectos molles in hydrope & imprimis anasarca plane damnant. N. PISO *l. c. Lib. III. p. 334.* L. FVCHSIVS *de cur. rat. 327.* & SCHOLZ A ROSENAV *conf. M. p. 362.* Phthisici non in lectis mollibus & pulvillis, sed duriusculis jaceant. Eundem in modum, de omnibus item in genere malignis febribus HIPPOC. *Epid. text. 68.* idem sentit, ubi dicit; neque ægrotantem multis tegumentis opprimi ne febris augeatur. Eadem mens, eadem sententia RIVERO *Prax. Lib. XVII. cap. I. p. 308.* fuit. Alii ut mollem corpus implere, ita durum lectum illud extenuare, contundere atque appositionem alimenti impedire ut C. CELSVS *de Med. Lib. I. cap. III.* voluit, alii eundem alii rursus carnem & ossa firmare, habent & scribunt, quare & Poloni præsertim ejusmodi probant, a Germanis ideo, dicitur, maxime in Polonia quoad lectos & jejunia magnam patientiam esse. Et GALENVS *L. de art. Cl. VII. p. 519.* adducit sibi constare quosdam frumenti acervis obvolutos & absconditos, a somno surrexisse firmos ac resiccatos. Alii lectum parant huic fini ex arenis, de quo conf. G. FRANCVS & REISELIVS *in E. G. N. C. &c.* Adeo multum refert hoc considerasse, ut Hippocrates sedulo moneat, non esse negligendam contemplationem cubilium, ut sciat Medicus durone an molli uti æger strato consueſcat, & quo in loco habitare & jacere debeat, quod sane ad morbum plerumque multum valet. In hæmorrhagiis, COEL. AVREL. *l. c. Cap. XIII. p. m. 401.* stramenta minime cedentia, esse vult. Convenientissimi de cœtero censendi sunt illi lecti, qui velamentis obtenti sunt: ea enim dirigunt aerem nimirum, quoad suas qualitates, quare & lectus, conopei etiam ratione, sit amplus, ne conclusus aër ibi contineatur. Ad abigendas muscas &c. commodissima forent veterum Ægyptiis primum, dein Romanis quoque familiaria conopea, ut Herodotus & Plinius habent, cum de nostris conclavibus idem dicere non possimus, quod de Herculis æde SOLINVS *in Memorabil. Mundi P. I. p. 4.* dixit, quam nec musca, nec canis ingrediebatur. Speciatim bene monet N. PISO *l. c. pag. 36.* ut lecti delirantium, phreneticorum &c. stragulæ æquales sint & glabræ, neque circa illas aliquid protendat, ne floccos colligant, illis utpote communissimum, quo semper delirium effera-

tius manet. Porro lectus non contiguus sit muro forte humido & frigido, sed remotus ab illo, quia in febribus intermittentibus & in morbis, in quibus frigus nocet, id multum officit, inprimis cum dorsum & pedes denudent decumbentes, ponaturque, ne versus ægrorum faciem lumen & fornacis calor sit, quæ ambo incommodum adferunt, atque non solum incommodum, verum etiam noxam & morbum, ut v. gr. notum est: aspectum saltem ignis longiorem ophthalmiam causari, & quod pejus est, caput fornaci calenti obversum apoplexia non raro tentari. Sint lecti quoque foribus & fenestris per quarum rimas angustas ventus vehementius spirat, adeo ut nunquam non, circa eos aliqua eaque fortior sentiatur aura, averſi, ne aëris forte frigidioris & luminis accessu, & ex hominum ingressu turbentur & lædantur, decumbentes &c. Providæ tenellorum infantum nutrices, ita incunabula ponunt, ut fenestra sit retro caput longe & nullo modo ex latere, ne infanti strabismus inducatur. Ad magiam naturalem hoc forte pertinet, in gratiam illorum, qui talia credunt addendum, & quod Experientiss. HELF. IVNCKEN in *Med. suo præſenti ſecul. accommod. p. 778.* ut expertum allegat, penes quem etiam fides sit: Si nimirum parturientis lectus eo in loco locaretur, ubi ante multos etiam annos cadaver hominis demortui repositum fuisset, vel in quo loco homo quidam animam exspirasset, non parere posset parturiens, donec alio transferretur; atque adducit morem nonnullis in terris satis usitatum, quo parturientes locant illuc, ubi mensa ordinario posita est, cum ibi raro demortui reponerentur.

§. XXIII. Ut vero diversis infirmis melius consulatur, vario modo lectos construunt. Sic & varii proſtant hinc inde lecti difficile parturientibus, lassis & imbecilibus maxime accommodati. Lecti pensiles priscis jam noti atque usitati, in quibus tanquam in cunis demulcentur, apud quosdam Primates adhuc inveniuntur, ut Parisiis annotavi, quod & ibi pro apoplecticis & similibus lecti pensiles, mobiles & versatiles habeantur, ut ægri vehementius possint commoveri & excitari, quod institutum etiam laudat DOLAEVS *Encycl. med. P. I. pag. 169.* Nec deesse crederem eos, qui Indorum in Promontorio Jamaico, de quo vid. *Act. Phil. Oldenb. Anno 1668. M. Jun.* in morem lectos pendulos optarent ut sub blanda volutione incunabulorum ad instar, dulcius somnum caperent. Asclepiadem Prusiensem (qui varia blandimenta excogitavit atque maxime τὸ jucundum spectavit) illos invenisse creditur, vid. *PLIN. Lib. XXVI. v. 3.* Adhibebantur vero non solum ad delicias ac voluptates vel ad somnum conciliandum, sed & ad infirmos exercendos & multos

tos morbos abigendos, dolores leniendos, ad appetitum excitandum, ut ex Antyllo, Aetio Cœlio, Avicenna, Galeno, Herodoto, imprimis colligere est. Sic verbi gr. GALENVS *meth. 10.* voluit, ut hectici in lecto ejusmodi portarentur. OCTAV. HORATIANVS *Lib. II. rer. med.* pro phreneticis, quos contumaces vigiliæ perturbant, commendat, ut lectus suspendatur & ad vicem gestationis agitetur, affirmatque frequenter ex hac motione, veluti & oculis & mentibus occupatis, somnos dulcissimos procurasse iis. Illud gestationis genus in variis morbis instituit Baglivius. Amant multi lectos ferreos, ne molestis insectis infestentur, quamobrem Oggium R. Basanit: talem habuisse Cl. Clericus putat. vid. H VET. *Demonstr. Evang. propos. 4.* Tales Venetiis maxime etiam habentur ut plurimum ad impedienda insecta, quæ ibi ob atmosphæræ humiditates, uberrime generantur. Ob hanc etiam rationem Incolæ Brasiliæ, retia perdicibus tendunt, ut in his lectis pensilibus securi dormiant &volvendo quiescant, liberi a vermibus & halitibus malignis ex terrâ adscendentibus ut P. DUVAL. *Geogr. gen. P. I. p. 143.* refert. His non sine ratione Asclepiades morbos curabat, ægrotantes nimirum in his movendo & exercendo, ut morbos extenuaret (ut effert) horumque usum in curandis morbis multi inter Dalmatas adhuc retinent.

§. XXIV. In lectorum electione, haud inutilia sequentia sunt & observatu sæpe necessaria, ne quies fiat molestia. Lecti ordinario nostris his præsertim oris ex plumis anserinis construuntur, & lintheaminibus, qui tamen imprimis levioribus illis plumis suffarcti multum calefaciunt & siccant corpora tamque variorum morborum causæ existunt, teste HERM. CONRINGIO in *Dissert. de Germ. hab. antiqui & novi causis p. 81. seq.* Hoc quoque indicat ROD. FONSECA de *tuenda valet. Cap. XVIII. p. 100.* scribens: Ne dormiamus culcitris plumeis ut in Germania fit, nam is decubitus calculos renum gignit, calorem externum conciliat & ad tabem præparat. Hincque aliis certis quibusdam morbis ut inflammationibus, palpitatione cordis, respiratione difficili, vertigine, scotomia, aurium tinnitu, capitis dolore, variolis, morbillis, purpura, arthritide vaga, præsertim rheumatismo, catarrho suffocativo, asthmate convulsivo, erysipelate, lue venerea, scorbuto calido inveterato, dolore capitis atque crurum, præsertim scorbutico, pollutione nocturna, gonorrhœa, nimia salacitate, nymphomania nephritide (renes enim nimio calore plumarum incalescunt, exsiccantur & ad calculum generandum opportuni fiunt) urinæ incontinentia laborantibus (de quibus exempla hinc inde nota sunt) & similibus in genere in omnibus morbis a serosa collu-

vie oriundis, haud satis utiles sunt. De odontalgia ab humoribus, falsis in vulgus quoque notum hoc est. Item in hæmorrhagia, aneurismate, nimio mensium fluxu, fluore albo mulierum, vid. DO LAEVS *l. c. P. I. p. 756.* atque hæctica RIVER. *Prax. L. XVII. c. III. p. 302. &c.* infensi esse videntur. Intolerabilius ægri ejusmodi ferunt lectos, ab illa imprimis volucris arcticæ lanugine, Edderduhn, quæ præ omnibus aliis calefacit, quæ tegit corpora, eaque exagitat. Huic fere accedunt antiquissimorum expellibus stragula, quibus usu fuerunt Atalanta, Jasonis filia v. AELIANVS *H. V. Lib. XIII. cap. I.* Daphne Penei filia v. OVIDIVS *Metam. Lib. I. v. 475. seq.* De Saturni temporibus JUVENALIS ita canit *Satyr. VI. 5. seq.*

*Silvestrem montana torum quum sterneret uxor.
Frondebis & culmo vicinarumque ferarum
Pellibus.*

VALER. MAX. *Lib. IV. cap. III. n. II.* Catonis continentiam laudando ita scribit. *Age, si quis jam pellibus hædinis pro stragulis utatur - - nonne miserabilis existimetur? Atqui ista patientissime Cato toleravit, quia illum grata frugalitatis consuetudo cum summa dulcedine continebat.* Non modo mihi notus, sed & affinitate conjunctus est, qui quando pulvillum plumis anserinis farctum, pectoris regione, ad excludendum frigus gerit, anhelatione vexatur; demto vero illo pulvinari, extemplo liberius spiritum ducit. Hujus ætiologiam si quæris, forte hæc sufficiet, quod ejusmodi utpote molliores, leviores, calore suo magis intenso densoque, sanguinem in concitatiorem justo, motum agant, ex quo vasa sanguifera in pulmonibus magis implentur & distenduntur ductusque tracheales sic magis adhuc comprimunt arctioresque reddunt, quo aëris sufficientis accessus & negotium, systoles præcipue impeditur. Atque per motum hunc magis concitatum partes acres salinæ, tenues acriores adhuc & tenuiores redduntur, ut minima spatia partium solidarum & ductus eo facilius possint subire, ut fibras nerveas vellicent magis & corrugent, materiamque peccantem, aërem intestina magis motione commoveant, alligant, ad orgasmum disponant, &c. Addo & hoc, plumas, pulverem plumaceum semper reddere, in vitiis respirationis nocivum easque ex corporum sudore ejusque humiditate facile situm foetoremque contrahere, quod vitium dein, quasdam morborum causas constituere potest. Hæctis præterea & tabidis cavendum est, in sudoribus nimis, ne in lectis justo calidioribus & plenis nimium plumis, dormiant. Siquidem

&

& lecti molliores & qui facile cedunt ut concavi evadant, in ejusmodi morbis ob hanc etiam rationem, non æque conducunt, cum nimis vaporatione sua resolvant, perhibente COELIO AVRELIANO *de Morb. acut. L. II. c. XXXVII.* atque ideo hos ibi in passione cardiaca atque in aliis alibi non admittit. Commodiores igitur erunt lecti apud Gallos præsertim & Anglos usitatissimi, ex culcitris laneis, gossipio &c. confecti cum nobis desint vimina illa Sinensium mirabilia ab illis, Tengs, dicta, e quibus subtilissimas & mollissimas storeas parant, in quibus nudi decumbunt, maximaque laude extollunt pro sanis pariter & ægris commodissimas habitas. Horum ea quoque est commoditas, quod corpus undique jugiter & æqualiter obtegant, alii vero hiatus quosdam relinquunt. In dormientibus enim stragulis detectis magis impeditur perspiratio, quam in vigilantibus vestibus denudatis, cum ob quietem dormientium feriantibus plurimis musculis (nam cor & diaphragma saltem, & qui huic auscultant muscoli in iis aguntur & agunt) tum quia calor externarum partium refugit, adducta ex Sanctorii observatione, maxime dum ventres dormiendo calidiores sunt, quam vigilando, extremus corporis habitus frigidior ex HIPPOCR. *Epid. L. VI. text. ii.* effatu. Hinc & notabilem persentiscimus pulsum diurnorum nocturnorumque differentiam. Hinc & experimur, non evaporari noxia effluvia per cutis poros refrigeratis externis, etiamsi interna calidissima sint imo urantur; Frustra tunc etiam fortissima sudorifera propinabis, imo lædes potius, dum sanguinem magis turgescentem & symptomata singula exasperata efficies. Refert ILLUST. BACO DE VERVLAM. Hibernos ægrotare incipientes nihil prius facere, quam ut lintea e stratis tollant, & laneis pannis se convolvant. *Hist. V. & M. p. 538.* ROD. A CASTRO *de morb. mul. Lib. II. p. 332.* commendat lectum laneum & stragula tenuiora. RIVERIUS *P. M. L. XVII. p. 308.* dicit: in febribus putridis continuis plumea strata auferenda, & lanea substituenda esse. Quinimo in sudore colliquativo, febribus, hæcticis præsertim familiari suadentur lecti ex corio vento repleto vel decubitus (imprimis tenuioris fortunæ hominibus) super faccum saltem lineum, in quo farina frumenti antehac asservata, aut super linteamina multo amylo rigefacta ad mentem HOFFMANNI in *Clave*. Similem in modum Celeberrimi longe Medici bini WALDSCHMIDIVS atque DOLÆVS variolis atque morbillis laborantibus lectos plumarios dissuadent; suadent vero ex corio tegumenta confecta. Paralytici a quibusdam in vinaceis aliisque similibus ex arboribus resinosis reconduntur. In Gallia in mictu sanguinis & fluore uterino aliisque morbis plumbi laminam

minam lectis insternunt, ut æger super illam cubet. Alii pellem cati sylvestris in rheumatismo & paralyfi, vid. *ANGLICI Praxin. L. I. p. 98.* vulpinam in articulorum doloribus conf. *R. SOLENAND. l. c. p. 414.* subdunt. Pellem vero caprinam, epilepticis adversam esse, quidam notaverunt, ob odorem forte graveolentem, cerebro infestum. At illud non ita facile cuivis creditu est, quod tamen non a paucis iisque, qui ultra vulgus alias sapiunt, affirmatur, pellem cervinam cæstro venereo percito cervo, detractam & super lectum explicatam connubio conjunctos venerem stimulando mire juvare, Vid. *MATTH. UNZERI Tract. med. chym. p. 929.* Alii solent lecto folia & flores, semina aliaque pro morborum differentia insternere, v. g. lectis hydropicorum herbas, flores, semina contusa, calida, exsiccantia, vel sal tostum, alumen tostum vel eosdem totos pellibus sole ustitis & calefactis obvolvunt, gonorrhœa, pollutione nocturna, satyriasi, salacitate affectis vero refrigerantia, addunt. Bengaleses morbo quodam apud eos familiari affecti, profusissimis sudoribus diffuentes, ad eos compescendos, lectis lini semina inspergunt, quo sudore madescencia ea utpote mucilaginosâ cuti adhærentia, illius poros obstipant sicque sudorem cohibent v. *Lettres curieuses des Missions étrangères T. XIV. p. 414.* In hanc rem legitur apud Dioscoridem, Galenum & Plinium Matronas, quæ in Cereris sacrificiis seu Thermopoliis vel Thesmophoriis Athenis castitatem servabant, super folia agni casti herbæ, cubasse, Alii adhuc culcitras herbaceas varias pro affectibus variis parant v. gr. compositio ejusmodi in fluxu mensium nimio, inveniens in *Ephem. G. N. C. D. 1. Ao. 6to & 7mo. in app. p. 144.* in convulsionibus, vid. *ANGLICI Praxi l. c. p. 59. & c.* In hocque imitantur Romanos, qui sæpius cubilia ex herbis & foliis straverant, quod & de Atticis incolis constat, ut legere est apud *DIOSCORIDEM Lib. I. c. XXVI. V. FEITH Antiquar. HOMER Lib. III. cap. VIII.* Sic pulvillos rosis illos implevisse, notat *TREBELLIVS in Gallieno Cap. XVI.* voluptatem magis quam necessitatem sectantes, vid. & *SPARTIANVS in Aelio V. c. 5.* Ad hoc illustrandum Milo Crotonia in *Dial. mort. FONTANEL. II. p. 10.* tantam reprehendit mollitiem, Sybarithæ conquerentis, se per totam noctem non dormisse, quia unicum rosæ folium incondite esset complicatum. Hæc *MAXVELLI* conjectura est quam affert *Lib. II. cap. XVI.* longævitatem roburque primos Parentes sibi comparasse, qui super herbas salubres somnum captabant, unde super rorem marinum, salviâ, betonicâ, balsamitâ & similia frequenter somno indulgere saluberrimum esse colligit. Nec diffitemur ita censere, hæc suavissima ac gratissima effluvia

corpus

corpus & sub dio vertens & in lecto recubans refocillare ac confortare, quod de re, pluribus egit MARS. FICINVS *Lib. II. cap. XII.* P. SORBAIT *Tr. VII. p. 533.* commemorat de lecto plumoso levissimo raro, vi mirabili ad sudorem eliciendum prædito. Scrupulum, qui vulgo circa lectorum materiam restat, de aliarum volucrum gallinarum, columbarum, alaudarum &c. aut etiam moribundarum plumarum noxa, aliorum iudiciis defero, ego parum iis tribuo quamvis sciam, quosdam cum D. CHARL ESTIENNE anatum plumas hoc quidem nomine, anserum præferre.

§. XXV. Aegri proin lecto cubantes, ut commode & cum levamine somnum capere possint, corpore in longum & horizontaliter magis distento ac strato: (sub hoc enim corporis positu fluida commodius celeriusque & juxta inclinationem innatæ suæ gravitatis percurrunt, quam in elevato aut obliquo) cæterum eam jacendi figuram generatim dicendo servant, quam HIPPOCRATES *1. Pragn. XIII.* sequentibus describit: *Cubantem offendi ægrum a medico oportet, in latus dextrum aut sinistrum, ac manus, cervicem & crura paululum reducta habentem, & omne corpus molliter positum; ita enim plerique bene valentium cubant, at ita cubare, ut sani solent optimum est.* Non male tecti jaceant, nam corpore quieto & probe conlecto fovetur & excitatur blande calor internus, qui omnium testimonio coctionem omnem perficit; transpiratio vero, quam ubique servare necesse est impeditur, qua regula vero neglecta, accessuque frigoris præsertim, mala semper redduntur graviora: qui enim dormiunt monente HIPPOCRATE *Epid. Lib. VI. text. II.* noctu pluribus tegumentis ob aërem frigidiorum & humidiorum indigent quam interdiu. Nam rerum externarum (ad naturam nostram non pertinentium) vires, corporis nostri viribus, fortiores sunt easque suppressere, conantur. Post mediam noctem præsertim & circa solis ortum, ut nimirum absoluta digestionem, sudores adjuventur melius, hoc observent. Atque non intempestive se denudent, qua denudatione, æstate etiam, ex transpiratione impedita, colicam & diarrhœam incurrunt plurimi, secundum enim SANCTORII computum, quem habet *in med. stat. Sect. IV. obs. 13.* iis, qui dormiunt pedibus aut coxis detectis, noctis spatio libra integra perspirabilium exhalare prohibentur. Quamvis etiam decumbentes calorem ægrius perferentes sæpe regerant, quod in calefacto satis hypocausto detineantur. Siquidem multi tali mollitie notantur, ut neque calorem ferant stragulorum neque tegumentorum contactum. Ast meminisse oportet, non parum discriminis inter calorem hypocausti cale-

facti & teporem lecti atque aëris lecto inclusi, aëris in cubiculo liberi ambientisque elateris, aliamve ad internum tum elateris ratione admodum intensum auctumque, proportionem, intercedere, adeoque subitam hanc quoque mutationem (quæ ægrotis maiorem certe quam recte valentibus obest) damna afferre posse, & si non majora incommoda, debilitatem tamen quandam virium, angustias præcordiorum, flatus, eructationes & similia symptomata exinde sentient. Nec frequenter ex lecto surgant, præsertim sudantes, nec se in lecto erigant, insurgant atque volvant sese, & ad hanc & illam partem vertant atque revertant, quæ crebra corporis jactatio non modo lectum incommodum tandem reddit sed & ob musculorum omnium totius corporis laborem debilitat notabiliter, residuos spiritus absumendo, quorum implacide dormientibus plerumque inopia adest; secus vero se res habet in iis, quos spirituosus forte potus fomno tradidit, & magis agitat, quam velox cursus, quoniam in cursu musculi saltem inferiorum partium laborant, ac digestionem & perspirationes necessarias imminuit. Conf. & SANCTORII *Med. stat. aph. 4. Sect. V.* Neque brachia super caput protendant, non echinorum ad instar se contrahant &c. Quæ corporis jectigationes singulæ æque transpirationem impediunt variaque symptomata augent ut calorem febrilem &c. atque naturæ utilissimos conatus impediunt omnes, cujus motus in statu naturali præcipuus est ab intra ad extra. Hoc tantum habeto tibi obvium. Qui a crapula hesternæ mane evigilant, quamdiu in lecto adhuc morantur, nihil molestiæ propemodum atque anxietates cardialgicas ac vomitus biliosos a reliquiis vini in ventriculo adhuc contenti & ibi penitus nondum digesti, sentiunt; imo si permanent in lecto & quieto decubitu, corpore probe tecto ac præcipue abdomine sudoremque expectant, quod reliquum est vinosæ cruditis feliciter digerunt atque incommoda hæc certius præcavent. Potius sub optima corporis totius compositione qua multi artuum musculi tenduntur respiratioque ac transpiratio per universum corpus liberæ manent, quietique se teneant, quod plurimorum morborum exigit indoles, quo eo facilius citiusque morbus superatur viresque conservantur. Citius enim in hoc tranquillo situ ad quietem redeunt ferocientes in plexibus nervorum spiritus neque novus subinde ipsis stimulus novaque turba additur; citiusque constrictæ convulsæque ob atrocem irritationem fibræ ad blandiorem laxioremque redeunt tensionem ac naturalem recuperant tonum. Ad hanc (commodam corporis compositionem) requiritur, ut membra quidem non directe extendantur, sed aliquo modo ad

ad corpus attrahantur, quod GALENVS L. C. II. C. 4. de motu musculari monet, quietem nimirum musculorum in mediocri contractione consistere, quæ & media & magis secundum naturam figura habetur. Hocque inprimis commendandum venit in inflammationibus, læsionibus, doloribus magnis, arthritide, malo ischiadico (quamvis etiam sint quædam doloris species, ubi impossibilis videatur quies) excretionibus cutaneis stipatis morbis, variolis, in febribus, colica, hysterica passione, nephritide, ardentibus, malignis, animi recurrente deliquio: Sanguis enim atque humores volutatione ea atque gyratione inquieta magis accenduntur & exagitantur, acris irritansque causa, orgasmum impetumque in affectam facit partem, malignitas præsertim retrovertitur, unde mox in ejusmodi ægris, angustia præcordiorum & synoptica defectio- nes affligunt. Quam nocumento sit hoc impatientia genus vel exinde apparet, quod vomitorii assumti, operationem diversa commutataque sæpe corporis positura, mox sedendo, mox stando mox in lecto volvendo &c. impedire possimus: Verum e contrario immanibus excruciatu doloribus in se ipsis experientur, quod, si vincere tantisper impatientiam queant, etiam tum citius eorundem lenimentum sentiant. In vomitu adeo, ne caput quidem attollant, protinus enim ad levissimam motionem capitis subsequi solet vomitus; In ulceribus imprimis malignis, fracturis, vulneribus & similibus idem observandum est. Attamen etiam hæc regula non est sine exceptione, nam alvi obstructione pertinaci, irritis omnibus aliis clysteribus quoque & cæteris laborantes optime sibi consulunt, si ipsos in lecto hinc inde se volvunt & agitant; facto enim illo corporis motu, fæces alvinæ, facile excernuntur. Hæc in lecto volutatio maxime præcipitur a Practicis, ipsa iliaca passione excruciatu, post globulorum plumbeorum & mercurii currentis exhibitionem. Hæc conveniunt iis, quæ supra memorata sunt. Antecedentia etiam non ita intelligi velim, ac si ægri semper in uno loco defixi manere debeant; Ut exemplo hoc illustrem, sistam monitum experient. SYDENHAMII p. 186. quo in variolis & morbis exanthematibus aliis stipatis exigit, ne ægri eodem loco semper jaceant, sed & erecti sedeant & ne scilicet sudores nimii erumpant, qui haud absque ingenti periculo promoventur quoniam horum (sudorum) febrilium juxta alias causas etiam vasorum extremorum, tonus laxatus atque debilitatus refertur, quam (causam) assiduus in lecto decubitus, quo totum corpus calido humidoque vapore alluitur, certa auget. Monet & hoc jam AEGINETTA Lib. II. Cap. XLVI. his verbis: *Cum vero sudores largius eruperint, tunc*

abstergendo ac levando integumenta recreare oportet: etenim lassant supra modum, ut in syncopen frequenter deduxerint. Tenue ergo sit velamen & aër frigidiusculus adjungatur & eventilatio. Ejusmodi notabilem observationem Cl. WEDELIVS in Amæn. Mat. Med. p. 353. ex Anon. Aut. chronic. Thuring. MSS. citat, de morbo quodam singulari epidemico Ao. 1529. grassato, eum imprimis statim, somno profundo oppressisse ægros, contra quem agitatione & commotione ægrotorum in lecto omnium optime pugnatum esset, morbumque expugnatum sine illo vero remedio mortuos fuisse. Aliquando etiam in ipso motu, jactatione atque adeo cursitatione nephriticos, quæri doloris acerbissimi remedium atque nonnunquam forsitan reperiri videmus quos nunc motum magis, nunc quietem, pro statuum casuumque diversitate juvare ipsiusque causæ, ratio, docet. Ad causam assertorum adhuc memorandum, quod cuivis notum est ac fere quotidianum: inter decumbendum sive supinus jaceat sive pronus, sive in alterutrum latus inclinatus undique lassitudinis sensum obrepere, ut subinde aliter decumbendi modum capeffere oporteat, nimirum, quod nimium imponitur oneris unius generis musculis, corpus in illo statu tenentibus, alterius vero minus, ut ita non justa & æqualis utrorumque exercitatio sit. Cum in lectis pro morborum diversitate diversi corporis situs instituendi sint, quos vero omnes indicare non est hujus loci; illos proin tantum adducam, qui peculiarem lecti constructionem & compositionem præter consuetam exposcunt, supinum nempe & perpendicularem. Ideo lectus in parte superiori duplicata pulvinariorum serie, inferiori vero subditis culcitris sternatur: plus minusque quidem prout necessitas exigit v. gr. puerperis ita lectus sternatur, ut tam caput quam atque præsertim pedes elato situ collocentur, ut lochia nimirum eo facilius effluere possint, alioquin situs elato magis capite, naturalis atque proficius est atque in plurimis morbis ut ophthalmia, orthnopnoea, aliisque respirationis vitiis, necessarius. De reliquo notum est: si defatigati nimis cruribus paulo elatis requiescunt, quod lassitudo citius depellatur. Scilicet, supinus in dorsum oculis fursum versis decubitus (qui soli homini cum testudine marina proprius esse dicitur) alias minus conveniens minusque naturalis habetur adeoque ab HIPPOCRATE damnatus 1. Progn. XIV. Consentientibus dein GALENO ac AVICENNA: Ille enim v. Loc. affect. C. Lib. II. IV. & de instr. odor. in fine scribit: A decubito supino nullum auxilium sperari, quo facilius ad infernas partes feratur alimentum; iste sequens scriptum reliquit III. I. Doct. II. C. IX. Supine dormire malum, quoniam ad multas præparat ægritudinis scilicet apoplexiam, paraly-

paralyfin incubum: quoniam superfluitates ad posteriora declinare, facit, quare retinentur, nec per suos recedunt canales, qui in partibus sunt anterioribus sicut nares & palatum. Confer. SENNERTVS *Lib. IV. Instit. P. II. 4.* quoniam & pulmones comprimuntur & viscera infimi ventris renibus magis incumbunt, sicque feri segregatio difficilis redditur, motus diaphragmatis impeditur, truncus aortæ arteriæ descendens a visceribus abdominis premitur, sanguis promptius ad caput ejusque vasa fertur, difficilius remeat, medulla oblongata gravatur, spirituum undulatio impeditur, turbatur, multa infert detrimenta & insomnia turbulenta, torporem, aurium tinnitum &c. & ansam præbet repletionibus capitis, apoplexiæ, paralyfi, epilepsiæ, rheumatismis, catarrhis suffocativis, phrenisi paralyfi, incubo, malo hypochondriaco, melancholiæ, vid. SOLENANDER *Lib. I. p. 272.* febribus, apostematibus, BIKER *in Herm. redivivo schol. ad Cap. XVIII. sect. I.* HIPPOCR. *Lib. II. de motu muscul. XI. Cap. IV.* CRATO *Cons. Med. 218.* PLATERVS *Lib. II. de les. funct. p. 239.* nocturnis pollutionibus, nephritidi, hæmorrhagiis &c. convulsionibus, WILLISVS & *Eph. G. N. C. D. II. an. IX. obs. 227.* Practicus quidam Helvetius, Præsidi quondam retulit, se observasse, quod singultus semper invaderet si ægri pedum erysipelate affecti, supini jacerent. Hæc mihi etiam in mentem revocant, quod de Viro quodam Lipsiensi relatum habeo, qui posteaquam dentem sibi extrahere curaverat, ex hæmorrhagia subsecuta, sub supino paululum decubitu, fere suffocatus esset. Dantur tamen, inquit, casus, in quibus supinus decubitus commendandus venit, inter quos notantur intestini recti prolapsus, herniæ, uteri descensus: Retrocedit enim sub tali decubitu portio prolapsa seu intestini seu omenti, adeoque nullus dubito, quin continuato ejusmodi decubitu (per plures septimanas imo menses puto) sanentur herniæ, retrogressis, prolapsis restitutisve sic fibris relaxatis, ac illarum justo tono ac robore. Nec desunt illius Auctorum testimonia, si quæras illa, adeas G. FABRICIVM *in Cent. V. obs. Chirurg. 54.* E. G. N. C. D. II. *Ao. X. obs. 190.* Calculus item vesicæ & urinæ suppressionem causans, situ ejusmodi declivi, cruribus aliquo modo elevatis, dimovetur, dolores leniuntur & quietus tunc magis ille tenetur. Testatur hoc GALENVS *Lib. V. cap. IV. de loc. affect.* statque in eo tale consilium Riverio aliisque hic non longius recensendis. Supinus præterea decubitus ad venerum impetum excitat, adeoque frigidis sic dictis commendandus: magis enim affluunt spiritus & humores ad enervia membra. In mensibus immodicis ægræ jaceant supinæ in lecto cruribus elevatis & thorace magis de-

presso. Pleuritici quoque dolores sedantur, si caput deorsum, pedes sursum collocantur. Ad nostram sententiam ulterius confirmandam non desunt nobis Auctorum suffragia. Supinum decubitus utilem esse in morbis oculorum, PLINIVS *Lib. XXVIII. cap. IV.* HEVRNIVS *de morbis oculorum p. 25.* & visus debilitate R. SOLENANDER *conf. Med. sect. II. p. 126.* perhibent. Stomacho laborantes decubitus, ubi crura sursum attrahuntur, genuaque ad os quasi admoventur, mire juvare reputat BACODEVERVL. *Sylv. Sylv. Cent. VII. p. 904.* Similiter COEL. AVREL. *Lib. IV de Morb. chron. Cap. III.* ventriculosi aut cœliaci maxime si solutio urgentior sit, supinam jacendi posituram suadet, capite paulo elevatius locato. Vigiliis involuntariis vexati sub supino decubitu melius longiusque dormiunt. Lowerus de infrigidatis observavit, eos neque incallescere neque dormire, nisi lecto ad pedes altius strato. Illustr. TSCHIRNHAVSEN *in Med. corporis* memorat de se ipso, si supinus cubaverit, largiorem sudorem provocatum fuisse. FERNEL. *Meth. med. Lib. II. p. 76.* hanc addit cautelam, a venæ sectione, æger supinus decumbat, ut in quiete partes exhaustæ repleantur, refarcianturque spiritus & LEONH. BOTALLVS, ne animi deliquio capiatur. Cæterum supinum collocant ægrum lithotomiam, herniarumque repositionem, catheteris applicationem meditantes; Cui cataracta acu remota fuerit, in lecto per plures dies capite paulo reclinato cubet. Conf. G. BARTISCH *in ophthalmogr. P. V. Cap. III.* ut forte heterogeneous ex oculo per foramen acu factum felicius excernatur, & ut impediatur, ne suffusio, quæ e sede sua jam remota est, & infra pupillæ aperturam depressa, iterum assurgat supra humorem crystallinum. De gravidarum dormientium situ cautius dirigendo quædam quoque moneamus. Ab uteri male ultimis mensibus gestationis increcente fortius resistente vesica urinaria quaquaversum, valde premitur, in qua repleta atque distenta quædam tunica rumpi aut dysuria vel stranguria admodum verenda, oboriri potest. Ab uteri pressione per situm incommodum variæ foetus ægritudines ortum ducunt. Gestationis tempore abdominis vasa fere omnia ut & præsertim uterina copioso sanguine turgescunt, quæ itidem fortius pressa inordinatum efficiunt sanguinis circulum. Membranae foetum ambientes, quæ licet liquore plenæ magnæ expansionis capaces sint; tamen ab validiore pressione aliquando ex corporis situ posituque ruptionis malorumque symptomatum gravidæ foetusque imminentium periculum propositum est. Vel mulierculæ diligenter imperant, optimo quidem consilio, parturientibus, ut facilius labores nisusque obeant sustineantque, ut lectus

ad supinum decubitus paulisper disponatur & magis adhuc in partu difficili, situ foetus p. n. ut eo melius foetus ad interiora se sponte sua recipere, vel obstetrix commodius ad meliorem egressum debita enchiresi viam sternere possit. In parturientibus dein lochiorum fluxus capitis ac pedum elevato, posteriorum autem paululum decliviori situ optime promovetur simulque dolores arthritici, varices aliaque ejusmodi incommoda commode præcaventur, alioquin ex his retentis ordinario ingruentia, quoniam hoc liquidum excernendum ad pedum vasa ruit & ibidem perniciosissime retinetur. Memoratu digna Loweri observatio est, a decubitu supino in occipite foveas & sinus profundiores & magis excavatos fieri.

§. XXVI. Explicatius dicendum est de decubitu erecto & perpendiculari, illum præcipue in difficili respiratione exposci, in olfactus pariter læsione N. PISO *l. c. p. 143.* epilepsia, apoplexia, aliisque affectibus soporosis, catarrho suffocativo, hydrope pectoris, hydrocephalo conf. LOWERVS *de corde Cap. II.* empyemate, in hæmorrhagiis & similibus. Infantes recens nati motibus convulsivis obnoxii, semper erecta, imo prona facie in cunis collocandi sunt, cum alias sub ordinario magis decubitu nunquam diu & placide dormiant, quod clare explicat R. LOWERVS *l. c.* Adeo hoc verum est, ut observaueris, quod si infantes in nutricum complexu tenentur, ubi caput magis erigitur, placide mox obdormiant, immunesque magis a convulsionibus servantur. Omni studio vero is vitandus venit in viscerum corruptione, in acutis & præprimis virium debilitate, animi deliquio, syncope, febribus exanthematicis malignis, cum morbi vehementiam sensibiliter augeat, brevique finem vitæ accersat; nullusque dubitationi locus est, si quod res est, inspiciamus: in malignis scilicet deficere spiritus animales, deficere vires & circulationem sanguinis, systolemque cordis esse imbecillem, quæ non sufficiunt sanguini sursum & caput usque movendo (quæ promotio fluidorum ordinario semper est difficilior, quam si in plano magis fiat). Quandocunque ita cerebrum sufficienti sanguinis affluxu destituitur spirituum animalium, exinde generatio parcius justo difficilisque adhuc magis instituitur, a quorum destituto influxu debito sufficientique cor segnius movetur, sicque vires magis magisque deficiunt, animi deliquia invadunt frequentiora, secretio heterogenei & propulsio e centro peripheriam versus & ejectio per suos excretorios poros impeditur, imminuitur, extremitates membrorum, perfrigeratione afficiuntur, novæ alterationes inducuntur, & tandem certissime mors insequitur. Erectum magis quo.

quoque tenere corpus pessimum est in pulmonibus inflammatis, docente HIPPOCRATE in *prænot.* & multiplici experientia comprobante Experient. BAGLIVIO vid. *Pr. M. Lib. I. p. 78.* Ita etiam CELSVS *Lib. II. de Medicina Cap. IV.* ubi de malis ægrotantium signis, agit, inquit: *Gravis morbi periculum est, ubi supinus ager jacet porrectis manibus & cruribus; ubi residere vult in ipso acuti morbi impetu præcipue pulmonibus laborantibus.* Speciatim hic indicandum est, doloribus crurum scorbuticis misere affectos circa furas & tibias imprimis cruciantibus, pedes, in lecto elati & erecti collocandi, ut lymphæ salia fortius resorbeat. Decubitus cæterum partium superiorum erectior, inferiorum depressior commoda stragulorum dispositione sicuti recte valentibus ita & ægrotantibus, ut plurimum convenientior est. De decubitu prono & super ventrem, qui secundum AVICENNAM calorem naturalem auget. atque PLINIVM tussientibus utilis est v. *Lib. XXVIII. Cap. IV.* item inflexo, cruribus sursum attractis positura corporis, quæ stomacho laborantes mire juvat aliisque multa dicenda adhuc forent, quia vero vix peculiarem lecti adorationem requirunt, missa hic illa faciamus.

§. XXVII. Ac ne id quidem mihi reticendum est, lectorum & stragulorum (ut & indusiorum) sordidorum cum mundis frequentem nimis mutationem nocere, in morborum paroxysmis, morbis contagiosis, peste &c. & in omnibus, ubi per diaphoresin & excretiones cutaneas morbi solvi debent, quales sunt variolæ & morbilli, purpura, petechiæ aut criseos tempore, aut effervescentiis illis nondum sufficienter evanescentibus &c. quare mox non solum imbecilliores illos experieris, sed & capitis dolores, anxietates, vomitus, apoplexias, convulsiones & symptomata omnia aucta sæpe sæpius cum extremo vitæ periculo conjuncta, adeo ut cum illis stolam feralem induant. Idque non semper a frigore solum procedit, quod tunc admittitur, aut inducitur forte, sed & a saponis foetore diu certe inhærente, (qui vero in ejusmodi & aliis multis morbis valde noxius est) quare rectius agent, qui semisordida iterum, sed ficcata illa de novo adhibebunt, vel quibus alii sani per aliquot dies jam usi, aut ad minimum manibus prius bene fricata & attrita fuerint. Contra in multis v. g. ciborum fastidio, cardialgia, siti immodica, hectica RIVERVS *Prax. m. Lib. XVII. cap. III. p. 302.* linthea quoque prius aqua rosarum ut irrorentur jubet *p. 303.* frequentem ejusmodi mutationem lintheaminum, lodicum & stragulorum &c. ex usu esse refrigerando statuunt, conf. F. PLATERVS *Pr. Tr. I. 601.* N. PISO *l. c. Lib. III. p. 235.* & *p. 447.* notat, in febre ardente culcitram stragula & lintheamina frequen-

quenter esse sternenda. In dysenteria stragula lecti sæpius esse mutanda, ait SENNERT. *Pr. Lib. III. P. II. S. II. cap. VII.* In scorbuto idem suadere videtur B. RONSÆVVS *de Scorb. p. 139.* Alias in genere fatendum est, lecti lintheamina melius pura conferre, & impura vero aëri liberi & vento exponenda atque singula calore foci & fornacis & frictione, attritione corrigenda & præparanda: Sordities enim poros cutis infarcit & obstruit, unde quoniam impuritates per vasa cutanea crebrius cum sanguine communicari solent, morborum exasperatio, inquietudo atque causa & occasio scabiei, phlictenum aliorumque vitiorum cutis ut & cimum, pediculorum, pulicum generationis &c. propullulant. Præsertim in morbis contagiosis id diligenter observandum est, ne a collectione sordium iidem foveantur, augeanturque, ne forte pori cutis, ab ejusmodi sordibus coacervatis, obstruantur, quod in morbis pectoris maxime pessimum est, vel ne miasmata morbifica exhalantia respiratione hausta, ægro obsint & adstantibus, labe quasi duplicata ac subinde novata. Præter has noxas molestiæ haud parvæ accedunt, quæ a madidis & foetentibus sudoribus lintheaminibus & rigentibus, sanguine vel sanie patiuntur ægroti, quæ tantæ omnino sunt, ut requiem & somnum impediant &c. conf. HOLLERIVS 2. *cap. de febr. ard.* RONDELETVS *de febr. Synoch.* LEV. LEMNIVS 4. *de O. N. M. 8.* RONSÆVVS *Epist. 39.* A REIES *Juc. Quæst. Camp. qu. 82.* VALLESIVS 1. *de morb. acut. 48.* qui ultimus medicos hac in parte nimis rigorosos objurgat & merito quidem objurgat *Comm. I. ad text. 8. Lib. I. de morb. acutis* inquiens: *Peccant vulgares medici nec luteam tunicam mutare, nec syndonem, nec manus faciemque lavare, neque quidquam aliud, quod ad munditiem spectat, suis ægrotis permittentes &c.* Hanc censuram ideo (nec jam alios magis forte notos nominem) merito meretur LAZ. MESSIONERIVS, qui in *novo suo de febr. dogmate* ab hac munditie abhorret, & par est, ut alii ab istis sordibus ab illo laudatis quoque abhorreant. Agnovit hoc ipsum ipse jam Hippocrates, quando omnia circa ægros munda esse vult atque nitor, decus & sanitas suadet. Quamobrem veteres, qui linteis rarius utebantur frequentem adhibebant, tum balneorum, tum frictionum usum. Sed sub horum mutatione iterum atque iterum sedulo est monendum, ne tempore criseos fiat & ubi efflorescentiæ cutaneæ imminet, aut nondum sufficienter eruperunt &c. & ut quam diligentissime caveant sibi, ne præter modum præterque necessitatem denudetur corpus, ac ne frigus exterum ullo modo accedat

§. XXVIII. Non tam prolixius explico, quam modo innuo, in variolis & morbillis similibusque exanthematibus, in conclavi aut puniceos rubros pannos expandi ægrotisque obverti, vel lectum contegi, ut illos adspiciant, credantque ex illorum aspectu variolas &c. in efflorescentiam promoveri. Probant & id hodie multi medici cum Amato Lusit. & Vallesio imprimis, ac si color iste spiritus excitaret & ad extra evocaret &c. & sic imaginationi sanguinem moventi adscribunt, quod alii ob arsenicum, cujus ope hi panni tinguntur, prodesse opinantur, vel ob grana kermes, cum confectio alkermes, infantum thoraci inuncta, copiose eliceat exanthemata, de quo videndus Simon Pauli. Ejusmodi etiam est & ex doctrina satis nota desumptum, quando luteos pannos ictericis protendunt &c. Interim non de nihilo est, imaginationem & spiritus animales in sanguine, cui subtilissima facile mobilia & maxime sensibilia & calidæ & perniciosissimæ naturæ corpuscula sunt, & quæ alia in orgasmum & impetum vertunt celerrime, sanguinem & humores ab aspectu rerum externarum, crebriori moveri, eosque ad exteriora & summam cutem ferri. Quemadmodum alias & stupor dentium, alio viso acetum aut liquorem alium acidum hauriente, aut rem quampiam acrem comedente, inducitur; Licet in omnibus subjectis non idem inveniatur effectus, in his enim majorem, in aliis minorem senties, prout nimirum motus a phantasia vel imaginatione introductus intensior & fixior est. Idem variat quoque prout temperamenta sunt diversa, ex quibus præ reliquis melancholicum, ut notissimum est, crebriora & fortiora sibi format phantasmata, quæ pro veris visionibus habet. Certe colores multum possunt in nos, in animos & corpora nostra impressionibus suis, quod præter quotidianam experientiam docet exemplum Evæ, quam sola species formosa fructus, seduxit & Jacobi qui variegatis virgis infœcundavit oves, variegatis oviculis. Atque de colore interim rubro, utpote qui in luminis radiis in circulum quasi reflexis & refractis & vehementiori circa centrum rotatione consistit, affirmare nobis quoque necesse est, illum quia proxime (juxta colorem album disgregantem visum spiritusque ad exteriora evocantem sicque humorem quoque efflorescentiam promoventem ergo illi adscribi possit idem) ad naturam splendentis lucis accedit & valde adspectum movere vehementerque in oculos impingere, & a centro ad peripheriam deducere & spiritus animales ac humores dilatare & commovere, atque per consequens animum quoque exercere agitareque. Sic tauri atque bubuli, elephanti, galli Indici rubro colore irritantur & excandescunt, leones vero

vero terrentur & ophthalmia detentis vel saltem in eam inclinantibus rubore res tinctas insipientibus oculi aut inflammantur, aut inflammati magis læduntur. Confirmat hoc ipsum, quod observationes testantur, a solo ignis adspectu longiori ophthalmiam produci, quoniam radii tales lucidi, qui recipiuntur, præ cæteris fortius reflectuntur, qui nimium spirituum animalium motum intra oculos concitant, & visum exinde turbant ac lædunt. Viridis vero nigrum & album æqualiter temperans, cæruleus & niger non nimis spiritus dissipant, nec nimis afficiunt. De quibus CARDANVS ita sentit *de rer. variet. Lib. III.* dicens: *Ceruleus color visum magis quam animam; viridis animum magis quam visum recreat;* Cum radii luminosi ibi partim avertantur & reflectantur, introrsum magis aut minus partim suffocentur ut majores fiant tenebræ, ac mediocriter ac leniter movet organon visus, ac ideo confortat eum, quæ causa sine dubio est, cur campos, gramina, herbas, arbores virere voluerit rerum Creator benignissimus, ut oculos & animum delectent atque conservent. Hinc in melancholia hypochondriaca suadet I. MANARDVS *Ep. 4. L. X.* ut in cubiculo æger spectet virides & florentes herbas & flores. Eo magis vero adhuc necessarium est, quando ophthalmia, lippitudine &c. obsessis per conclave & ante oculos pannos virides, nigros, cæruleos obtendunt. In hanc sententiam scribit B. PORTA *in Phytogn. Lib. III. cap. VI. p. 151.* omnia rubra vel solo intuitu usurpata, valere ad sanguinis depurationem & correctionem, ut alio colore tincta ad alios humores scilicet corrigendos. E contrario in hæmorrhagiis narium, uteri hæmoptysi, mensium nimio fluxu &c. vid. I. ANGLICI *Pr. Lib. I. p. 585.* prohibeatur rerum rubentium, atque præcipue ipsius sanguinis excreti aspectus studio vitetur, ne sanguis magis commoveatur. Observatione constat in paroxysmo cephalææ jacentes alba & splendida lintea vix ferre. Scio & alios, qui in venere languida utroque in sexu excitanda conclave & lectum panno tincto cocco contegunt, nec ab illa sententia alienus N. PISO, *vid. Lib. III. de M. C. & C. p. 378.* videtur.

§. XXIX. Angli inter utensilia in ægrotantium conclavibus nunquam horologium vel clepsydrum obliviscuntur, habentque, nec sine ulla ratione, quod tempus tædiosum magis & longius ægrotis videretur absque horologio, quam consuetudinem forte ex Illustr. suo conterraneo Bac. de Verul. hauserint. Nam mihi hæc scribenti venit in mentem, me legisse in *lib. de Augm. scient. p. 167.* tædium, vexationem morbi & dolorem facere, ut tempus longius videatur, quam revera est, ac computationem temporis errorem illum corrigere & brevius facere,

quam opinio illa falsa conceperat. Horologia quoque leni æqualique suo allisu aures demulcente gratumque somnum provocante alium adhuc usum in sequentibus adhuc explicandum conciliant. Cæterum omnis suppellectilium apparatus ita adornetur, ut ægro perquam utilis & gratissimus sit. Expresse GALENVS præcipit *6. de morb. vulg. comm. 4. cl. 3. p. 353.* Medicum oportere percontari, quibusnam ægri delectentur, ut illa in cubicula inferantur. Longissime igitur absint omnia, quæ molestiam & commotionem ullatenus creare possint; & quæ spectantur, nunciantur aut aguntur, quæ adversos affectus movent, iram, tristitiam, mœrorem, metum &c. inferunt, omni studio avertenda. Contra offerantur auditui, quæ grata, visui, quæ delectant, tactui, quæ demulcent &c. secundum salutare HIPPOCRATIS præceptum, *vid. 4. in 6. epid.* hic iterum iterumque repetendum, quo præcipit ut infirmis omni modo consulatur, ut cibus potusque mundum in modum præparentur, ut omnia, quæ vident & tangunt, sint commoda & mollia &c. Hic & hoc addere non abs re est, aliquos ægros ad risum gaudii sobolem, animi corporisque lætum affectum, imo quandoque cachinnum concitandos esse, ut observationes leguntur, alios a morbis apostemate v. gr. rupto exinde liberatos fuisse, quorum exempla aliquot apud PECHLINVM *obs. p. 467.* leguntur. E contrario in aliis & hic omni cura est præcavendus v. gr. risum in vulneribus partium nervosarum maxime multum periculi & damni asferre posse, testantur binæ istæ historiæ a GVL. FABRICIO notatæ *Cent. I. observ. 23.* Quibus hoc tantum vel superpondii loco adhuc addere liceat, quod laudentur scamna & sellæ ex ligno quercino, quibus calefactis & illitis variis ut sevo hircino &c. ægri vulgo non modo, sed & practicis medicis nonnullis insidere jubentur, fluxionibus alvi, dysenteria, prolapsu intestini recti &c. laborantes. Pariter hic commemorare libet, quod pro alui obstructionibus & iliaca aliave laborantibus sellæ humiles vix commodæ sint, quia ex sessu humili stimulus ad alvum liberandum magis impeditur, quare altiores sellæ, potius tunc ingerantur, ut sub hac corporis positura ægri tales confidentes deorsum tendente, motus ventriculi & intestinorum peristalticus, superflua & onerosa, e corpore ejiciens, adjuvetur deorsumque quasi invitetur. Pocula & scutellas, discos ex ligno tamarisci & fraxini, hederæ e quibus bibant, super quibus comedent, splenetici, anginosi &c. alii eligunt, *vid. ANGELICI Pr. Lib. I. 426.* ANTON. LE GRAND *Compend. rer. juc. p. 224.* Possem complura de poculis, discis aliisque vasis ex variis terris, metallis, lapidibus, lignis &c. pro morbis variis fabre.

brefactis, item de vestimentis &c. ad supellectilem ægrorum pertinentibus adferre, sed vereor nimiam tractationis prolixitatem, hæc alii temporis servans.

§. XXX. Alunt quidam ægrotantium in conclavi & in lectum secum adsciscunt varia animalia, quorum contubernio morbos fugari credunt, multique autumant, ejusmodi animalia infectam labem facile in se recipere, unde ægris levamen aliquod emergere possit. v. g. apud arthritide, podagra, colica, paralyfi, erysipelate affectos porcellos indicos, vel catellos melitenses sæpius videbis, atque leges apud Authores, in canes contubernales, morbos varios fuisse translatos hominesque eo modo curatos. Conf. GALENVS VII. *Method.* Sic RIVERIUS in variolis, ovem aut vervecem in hypocaustis detinere suadet L. VII. *de var. & morb.* & FORESTVS *Obs. L. IX. obs. 19.* adducit, columbas imprimis sylvestres paralyticos & scorbuticos consummatos cum illis versantes circumque volitantes juvare, vid. LANGIVS L. II. *Ep. 14.* Quare illos, ad ipsa columbaria ablegat. Alii galbulos, ictericis sanitatem afferre sibi aliisque persuadent, vid. PLVTARCHVS *Lib. I. Sympos. c. VII. Lib. V.* qui aliam volucrem quem Gesnerus Charadrium vocat, aquilæ non absimilem, simul nominat, HELIODOR. *Lib. III. Hist. Aethiop.* & PLIN. L. XXX. *H. N. C. 2.* SEBAST. MONTVVS *Lib. I. Dial. Med.* MERCVRIAL. L. IV. *de cogn. & cur. affectibus C. XXIII.* ALDROVANDVS *Ornith. T. 1. LXII. c. XIX.* BENED. VICT. FAVENT. *Pr. med. c. XL.* MAIOL. *diebus canicul. col. 6.* ALB. MAGNVS *animal. L. XXIII.* M. A. ZIMARA *Art-Magico-Medica.* Similiter Silesii avem cruciferam pro infantibus epilepticis & avem illam rubro pectore & fusco cineritio tergo conspicuam (Loh. Fincke, Gimpel,) pro arthriticis & pro erysipelate amoliendo, ut & turturum par V. R. LENTILII *Miscell. Med. Pract. P. II. p. 310.* in cubiculo alunt, de qua B. MAIOR *in carm.* Simile de Chinenfibus NEVHOF. *Itin. leg. p. 153.* recenset, eos imprimis, qui circa Suncham habitant grues & cervos (quos longævus æstimant) in ædificiis continere, eosque frequenter adspicere, ut effluviis, quæ spirant, per inspirationem fruantur, ac sanitatem ac longævitatē adipiscantur, exinde. M. A. SINAPIVS *in Paradox. med. P. II. p. 109.* refert, Tartaros de lue venerea suspectos, dormire cum catellis, quos sæpe mutant, & in stabulo inter equos alunt, quorum vaporibus ab ea liberarentur. Ejusmodi quoque est, quod ex libro quodam Gallico, ut legi, transcribere licet: Nimirum *Lettres historiques & galantes de MAD. NOYER Tom. IV. p. 32.* referunt sequens: *Contre le rhume ecclesiastique on pretend que l'usage des serpents vives*

dans les appartements, fait quasi l'effect du mercure qui, est bien commune a Paris principalement les Gens de l'Eglise en sont fort sujets. Alias experimentum in vulgus notum est, si equi obstructione urinæ laborant in stabulum caprarum & ovium ducunt eos, & statim obstructio urinæ solvitur iis. Hoc etiam in hominibus procedere nullum est dubium, quare experimentum esset faciendum. An ejusmodi plus habeant nominis quam operis, aut an in imaginatione potius affectus positus sit, infida suspicio non audet singula determinare aut admittere. Interim sit mihi illud censendi jus, sit mihi affirmatio, esse multa rerum effluvia, per quæ multi effectus fiant, quorum naturam adhuc cum ignoremus, verissima interdum quædam negamus, plerorumque enim effluviorum efficacia prius innotescit, quam illorum existentia, quod variæ antipathiæ & idio-syncrasia demonstrant, v. gr. eorum qui præsentibus felibus non iis equidem visis, in animi deliquium incidunt. Verum, sit, bruta æque ac homines a labe quadam atque contagio infici, ægrotare & mori, sicuti DOM. PANAROLVS *Pentec. II. Observ. 49.* refert, quod phthistici sputum virulentum muscas enecaverit; attamen ægri exinde non a labe illa, quæ infecit, nullatenus liberantur. Quid notius porro est, quam quod tempore pestis hircum non solum in ædificiis, sed & in conclavibus contineant; Aves præterea in cameris circumvolitantes, aërem volatu atque agitatione alarum, ventilare ac purgare, habent ut Antyllus, apud ORIBASIVM *Coll. Lib. VI. c. XXI.* loca avium volatu frequentata, sanitati bene conferre affirmat; Ita & non desunt ægroti, qui oscinibus in aveariis delectantur, ac non modo delectantur, verum & juvantur. Loquuntur id de auditus gravitate & susurru aurium conque-
rentes avium Canariensium imprimis concentu & coturnicibus cantilantibus in illorum hypocauftis, nimirum auditum acuari, & ab auditu tinnitus &c. auferri. Pariter in cruditatibus variis ventriculi, appetitu imminuto, virium debilitate, perfrigeratione, nutritione imminuta, paralyfi &c. catulos (animalia scilicet inter calidissima) aut cuniculos abdomini imponunt, ut nativo suo calore digestionem cruditatum adjuvent &c. SYDENHAM *de meth. cur. febr.* catuli applicationem ad ægri ventrem pro corroboratione ventriculi & restauratione motus ejus naturalis in iliaca passione commendat. TH. BARTHOLINVS *Cent. VI. Observ. f. 285.* recenset de quodam, qui colica affectus, catulum ventri imposuit exindeque melius se habuit, catulum vero vomitu fuisse vexatum. JOH. CRATO *in Consil. Lib. III. f. 113.* vult, ut in eodem affectu (colica) anas in ventre deplumata abdomini applicetur: Nec non in chira-

gra, podagra & omni arthritide, nihil præsentius ad consopiosos cruciatus esse LEV. LEMNIVS asserit. Calor enim ad digestionis negotium maxime necessarius est, hoc solutio juvatur egregie omnis, hic mixti poros potenter penetrat, & vi sua expansiva partium compagem dissolvit intime. Eundem in finem, & ut refocillentur debiles, quidam adhuc puerulum carnosum vel adolescentem sive puellam (quam I. Damascenus paralyticis maxime commendabilem esse ait) admovent. De Friderico I. Imp. R. cognomine Barbarossa legitur, eum ætate extrema & elanguidum consilio medici puerulos continuo stomacho sibi applicari curasse. Talem accubitum S. Davidem R. probasse apparet J. R. 1. cum senio confectus & infirmus, & cum vix calefieri potuerit, virgines pulchritudine conspicuas, qualis puella Sunamiti, Abissas fuit, sibi adduci curaverit, ut illæ illum corporis contactu blando, in lecto aucta forte virtute fomenti ex corpore vivo inunctione myrrhæ & similibus more virginum Persiæ, foverent, atque caste in illarum applexibus dormirent. Crediderim enim facile juxta jucunditatem ac voluptatem ab amabili objecto conceptam quæ cor dilatat, ac per hanc dilatationem spirituum uberior copia per universa membra distribuit amplius magis magisque multo, ejusmodi calorem naturalem blandum, humidum (qualis proprietas naturalium omnium acceptissima pariter ac utilissima est) spirituosum, elasticum, vaporosum, æqualem, perennem naturalique ideo magis familiarem, esse, utiliore eo calore, qui a fomentis artificialibus paratur, vel qui a linteaminibus calefactis procedit, & esse levamen & caloris extincti suscitabulum, atque effluvia volatilia sana ex virginibus pulchris & junioribus (utpote quæ optime temperatæ atque saniores, cum contra vetularum noxia ex habitu corporis, ventriculo & pulmonibus ore exeuntia habeantur, ut est apud APVLEIVM L. I. & A. GELLIVM Noct. Att. L. II. c. XXIII.) per poros alterius ejusque debilioris & tenerioris in constitutionis somno maxime, quo tempore corpora laxa admodum ac patula promptius imbibunt se insinuantia & per circulationem allata non modo ad exteriora membra, sed & ad interiores pertinentia partes, corpus elanguidum & frigidum admodum refocillare posse. conf. SYDENHAM Op. p. 79. ARISTOTELES jam in *Epist. de Conserv. Sanit.* inter præcepta quæ inibi recenset, optimum esse scribit, amplecti quæ placet speciosam puellam. Calor enim animalium internus longe a calore externo ignis differt: etenim est ille nil nisi influxus humidæ, spirituosæ, vaporosæ & elasticæ, motæ substantiæ; quoniam per calorem semper exhalant partes tenuissimæ, sulphuræ, æthereæ. Calor

lor ejusmodi commodissime aperit poros, atque ita fovet facitque ut diffletur materia peccans & digeratur & elasticitate sua multa alia com-
moda præstat, quæ ab altero non æque facile sunt expectanda. Edo-
cent hoc varia experimenta per machinam illam papinianam instituta.
Testatur hoc digestionis & chyli elaborationis animalium in ventriculo
& intestinis opus, quo sane mirandum est, illud in paucarum horarum
spatio penitus posse absolvi & digeri tantam pabuli, carniū, osium
&c. quantitatem, quæ ab animalibus imprimis rapacibus & gulonibus,
ut lupis, canibusque &c. quotidie ingeruntur & devorantur, quod non
tantum a menstrui solventis activitate, sed & atque potissimum calido,
spirituoso isto influenti, est adscribendum. Hinc & nemo hucusque si-
mile menstruum gastricum chymica arte producere potuit, quod eun-
dem præstaret, in omnibus effectum ac solutionem, digestionem, chy-
li productionem, ac quidem nostrum naturale, animale, quoniam non
humidum hoc, calidum, vaporosum, elasticum & spirituosum, æthe-
reum influens, addere potuerunt, licet equidem quidam de eo gloriati
sint, sed in vanum gloriati sunt, atque in vanum de eo solliciti fuerunt,
elaborationem quoque perfectam hujus pene ex adducta modo ratione
despero. Quis igitur elumbibus senibus & vetulis vitio vertere posset,
si senectutis suæ levamen & vigoris & vitæ refocillationem juvenculas
aut juvenes justo sibi matrimonio jungant, quorum calore foveantur,
sanitate conserventur, animi jucunditate ex illarum forma pulchra & ala-
critate amœna & accubitu ejusmodi recreentur & oblectentur, motu
sanguinis humorum atque spirituum promoto exinde &c. Hunc mo-
rem apud Persas frequentissimi fuisse usus fertur atque perhibetur, illos
naturali ejusmodi fomento non contentos fuisse, sed puellas myrrha &
similibus balsamicis & odoriferis inunxisse ad augendam scil. fomenti
vim. Huc ob aliquam similitudinem trahere liceat quod in ZINCK-
GRAEFF. *Apophtegmat. German. Part. I. p. 35.* de Rudolpho I. Imperatore
R. legitur, eum hæctica obnoxium sæpius speciosas filiasque Procerum
amplexibus fovisse, ut halitum ex illarum ore hauriret infirmumque
corpus atque elanguidum recrearet, suavibus puellarum spiritibus. Alia
atque alia adhuc succurrunt hujus rei exempla. Sic in *consil.* SCHOL-
ZII DE ROSENAV legitur *p. 924.* in dolore & inflammatione ventriculi, ut
ægri curent catellum juniorem aut puerum, qui non facile sudet, apud
stomachum continere. Atque JOEL. *Lib. IV. Prax. Sect. 2. p. 99.* opti-
mum stomachicum contra refrigerationem habet manum calidam aut
conjugis ventrem molliorem ventriculo applicatum (sed quod solatium
viduis

viduis & virginibus relictum manet). Pariter RIVERIVS *Pr. med.* p. 290. in articulorum doloribus catellum jubet admoveere, quoniam dolores valde demulceret. PETR. BORELLVS *Observ. Cent. III. f. 219.* de podagra idem affirmat. Exinde & ab quibusdam eo nomine canis podagræ magnes vocatur. Observationes ejusmodi leguntur apud LEV. LEMNIVM *Lib. II. O. N. M. C. XIII.* BORELL. *observ. Cent. III. 28.* PET. BAYER *in suo Venimec. Lib. III. c. IX. p. 380.* MAYER *de Arthrit. C. IX. p. 161.* TH. BARTHOL. *C. XII. hist. 66. Ephem. G. N. C. an. 4. obs. 51.* Hic caninus accubitus porro in aliis morbis probatus est, ut in epilepsia, quod vidit CARDANVS, vid. *de var. rer. Lib. VII. c. XXXIII. p. m. 261.* & GRVBE *V. de morbor. transplantatione, Conf. & Ephem. G. N. C. an. VII. obs. 11.* in ventriculi summa debilitate, vid. VERVLAM. *hist. V. & N. p. 413.* ROLFIN. *in epit. affect. Lib. III. c. II. p. m. 191.* AVICEN. *Lib. III. fer. 13.* J. CAES. BARICELL. *in hort. genial. p. m. 33.* SCHROEDER *Pharm. med. chym. Lib. V. Cl. I.* Capivacc: apud CRATON. *Consil. Lib. VI. consil. 66.* in colica ac in dentium dolore, vid. BARTHOL. *hist. anat. 53. Cap. VI.* In parotidibus RIVERIVS rursus *de feb. pestilent. p. m. 144.* canem admoveri jussit. Alii hoc quoque ut morbum ignotum sedemque mali in parte quadam interiori cognoscant & convenientia remedia admoveri possint, jubent, ut catelli juniores per unam & alteram septimanam in lecto ægrotantis cum illo cubent, escam capiant, & salivam lambant, dein strangulant eos, cadaveraque aperiunt, ut inveniant partem simili vitio affectam: An hoc calculo respondeat, ego equidem jam non determinaverim. Ob argumenti similitudinem adhuc addo, quod causa non incommode conjici possit, quando quæritur, cur ludi magistri ut plurimum sint longævi, quod assidue & frequenter cum pueris versentur: Conf. *Monathliche Unterredungen Ao. XCI.* siquidem jam Socrates docuit, frequentem adolescentum consuetudinem retardare senectutem. Eoque simul solvi posset quæstio, an sanitas etiam sit communicabilis; Plurimum sane interest cum quibus vixeris, ut sumuntur a conversantibus mores atque animus & mala & bona sua proximis tradit, ita sanitas sanitatem, ut morbus quidam morbum proximis tradit, & inter salubria degenti custodia valetudinis facilis est, ut sæpe initium morbis fuit, sana ægris miscere. Jam dudum est observatum, senes qui juvenum frequenti consuetudine oblectati fuerunt valde fuisse per causas physicas æque ac morales longævus, quod nempe alacritas juvenum alacritatem senum provocet & eorum torporem & tristitiam avertat & corrigat, ut v. gr. de Pythagora, Isocrate, Gorgia, Orbilio aliisque pluribus Philo-

sophis, Rhetoribus, Sophistis, Grammaticis antiquis, qui in Scholis suis discipulos juvenculos, bonas artes docuerunt, perhibetur, eosdem ob hanc causam centesimum usque annum & ultra vitam produxisse. Legimus L. Clodium Hermippum, centesimum & decimum quintum annum vivendo attigisse, ob puellarum anhelitum, quod in epitaphio indicatum est. Vivendum esse senibus & debilibus cum sanis & junioribus, habet MARS. FICINVS *Lib. II. C. XII.* & illustr. BACO DE VERVLAM. *Cent. X. Hist. nat. §. 942.* scribit: *observatum, senes, qui juvenum congressui frequenter se miscuerunt, conversatione non interrupta longævos evasisse, cum spiritus eorum ex tali consortio fuerint recreati.* Hanc in rem pulchre CICERO loquitur *de Senect.* *Adolescentibus bona indole præditis sapientes senes delectantur, leniorque sit eorum senectus, qui a juventute coluntur & diliguntur.* Apud alium, Anglum, rem hanc ita declaratam reperio: *Si veteri cerevisiæ recentem, aut vino veteri mustum admiscueris, effervescentiam in utroque liquore concitabis.* Nimirum novus advena veterem hospitem expergefacerit. Idem hinc usu venit, quod in senum juvenumque promiscuo conventu sæpe contingere videmus: horum enim ardor & alacritas, ipsos ad hilaritatem (nonnunquam etiam ad saltus & tripudia) provocant, alioquin forte tristes torpidosque futuros. Contrario rursus pueri cum senibus in contubernio versantes & illorum lecto dormientes, halitu suo, maciem sibi accersunt: Nam Philosophi unanimi consensu profitentur, si nimirum in natura reperiatur unum contrarium, debet & dari aliud reliquum. Sagacissimus RAMAZZINI in *Tr. de morb. artif. cap. XIII.* exemplum puellæ nobilis adduci, ex contubernio & consuetudine aviæ, tabidæ redditæ, quæ nullis remediis saluti restitui potuit, nisi ab avia remotione & puellarum consortio restituto. Senes & vetulas, halitum spirare insuavem, foetidum, acidum ob cruditates, quibus abundant, & partium vitalium impuritatem & corruptionem pravamque totius corporis dispositionem, ex instituto docet FR. RANCHINVS *de morb. senum Sec. I. c. VIII.* Ex adverso etiam (ut ad prius redeam) sub morbis epidemicis, contagiosis peste &c. animalia domestica ut canes & feles cum columbis, non solum ex hypocaufto, sed ex domo ableganda, cum facile contagium per ista propagari possit, etsi illud animalibus non fuerit noxium, ut variorum ferunt observationes, V. BONETTUS *Polyalth. P. I. p. 440.* & FOREST. *Obs. p. 174.* Hoc ipsum interpretes ex HOMERO colligere volunt, ubi legitur: *strage canum primo &c.* & ex OVID. *Lib. VIII. Metam.* ex illo: *Vim primi sensere canes, &c.* Cum & feles alias asthmaticos lædere credantur, vid. S. SANCTORII *Metb.*

Metb. vitand. err. in med. p. 421. illas ex istorum hypocauftis fugent. Has etiam anhelitū nocere, animales spiritus inficere, humidum ut vocant radicale absumere & tabem & marasimum inducere, docet AVENZOAR in *proem. Lib. I.* vid. & MATTHIOLVS in *6. Dioscorid. cap. XXXVI.* qui aliquando magno numero & contubernio felium, quandam familiam aërem inficiente, periisse refert. Conf. & PARAEVS *Lib. XX. cap. XXXIV.* quanquam experientia non ubique his respondeat. Huc etiam referendæ sunt observationes, quod feles & canes, domos pestem &c. quandoque importent.

§. XXXI. Supra indicatum est apud ægrorum conclavia, halcyonia ad placidum somnum procurandum & conservandum, in quo motus voluntarii libere non exercentur & sensus neque ab imaginationibus neque ab alia re moleste irritantur, esse procuranda (cum alioquin in ægrotis aurium sensus acutior videatur) at quandoque pro ipsa requie comparanda ac somno invitando unisona lenia murmura atque susurri excitandi qui spiritus animales alioqui in membra externa ruentes blande & pedetentim ad cerebrum iterum convertunt, lenem prius attentionem in iis excitant atque motu discursivo actuosos dein sedant, atque quasi impediunt ne hinc inde distrahantur, ut citius & pacatius ad salientium aquarum murmura, venti ramorumque arborum susurros, pluviae aut imbris impluentis sub tecto casum, aquæ ex vase in vas transfusionem horologiorum molles & æquales allisus, intentam contemplationem rerum longe distantium, mollem cantum atque lectionem itemque ad blandam frictionem inductam, silentium diutius protractum, atque in tenebris longiorem moram, somnum capimus; ægre enim ferimus tintum, facile vero murmur lenemque strepitum, quoniam ille acutus sonus est, iste obtusus. Ad hujus rei imitationem a quibusdam fontes artificiales, continuo ex alto delapsu, aquam in subjectam pelvim destillantes, Silanos dictos, vid. C. CELSVS *Lib. III. cap. XIX.* & LVCRETIVS *Lib. VI. de rerum nat.* in conclavibus fabricandos proponunt, qui Romanis erant usitatissimi, tam ad aërem æstivum refrigerandum, quam ad aures placandas somnumque provocandum. Hinc apud SENECA *de provid. e. g.* legimus qui *Epist. C.* aquarum cubiculum interfluentium mentionem facit ac Mæcenatem, aquarum fragoribus, mentem anxiam avocasse refert. Conf. & *lib. de tranquill. animi,* & *Lib. III. nat. q. c. XVII.* Veteribus etiam frequenti usu moreque positum erat, ut ad lenem fluentis rivi foliorumque arborum strepitum in nemoribus caperent so-

mnum, quod ex HORATIO rerum humanarum observatore curioso habetur *lib. Ep. Od. 2.*

*Labuntur altis interim rupis aquae,
Quaruntur in sylvis aves
Fontesque Lymphis obstrepunt manantibus
Somnos quod invitet leves.*

Immo & ob contrariam quidem rationem & strepitus, tumultus, clangores & fragores, vociferationes in illis instituendæ erunt ut pro in aqua submersis, gravi uteri suffocatione correptis, ex vaporibus suffocatis, affectibus soporosis, lethargo, apoplexia, catalepsi aliisque affectis. Plurimis non erit inauditum, etiam moribundos vociferationibus & ejulatu adstantium iterum ad se rediisse. In hunc modum adducit insolitum alias remedii genus VILLANOVANVS, vid. *in Brev. L. IV. c. II.* pro discutiendo veterno: Jubet enim ut sus pedibus posticis ad lectum prope caput ægroti suspendatur & ad vociferationem postea irritetur. Quo loco referam (nec plane deest ratio) lethargicos omnium optime excitari eo, cui se alias addixerant, vel quæ amaverant v. g. clangore tubarum milites, venatores canum latratu, effusione e faccis nummorum in mensam avaros. Conf. HOLLERIUS *L. I. Prax. C. IX. in Schol.* (quale exemplum etiam novi:) poculorum forti allisione vinosos &c. ex hoc præternaturali sopore felicius expergisci. Animi deliquio correptorum aures clamoribus & præcipue proprii nominis aut alterius rei amata grata & adfuetæ acclamatione impleri communissimum est: Idque ideo, quia spiritus animales eo jam adfueti sunt & ad eam maxime partem fluunt uberius, & pori etiam ampliores, cum per hoc organon aurem sæpius fluxerint; atque fibræ ita sunt dispositæ, ut facile talem impressionem sæpius factam recipiant ulteriusque deferant. In hanc rem porro notabiles sunt binæ historiæ adductæ altera in *Eph. G. N. C. D. II. Ao. 7. obs. 17.* de matrona quadam, quæ nunquam feliciter peperit, nisi sono campanæ excitata. Altera in *Zod. Gall. P. IV. p. 34.* de syncope imminente per strepitum tympanorum prohibita. Addo tertiam ex *Eph. G. D. 3. an. 7. observ. 180.* de Matrona quadam & ejus duabus filiabus, quæ omnes urinam nunquam reddere poterant, nisi audito aquæ ex guturnio in plevim stillicidio. Conveniens hic invitat de musica omnibus grata atque accepta (rarissima enim sunt quæ in contrarium afferuntur exempla, ab IMPERIALI in *Museo p. m. 199.* de Lipsio ab OLEARIO in *Diss. de Vanino* de aliis JOH. GABR. DRECHSLER in *Præfat.*

Præfat. ad Diss. de Cithara Davidica) argumentum, cujus in Medicina utique quoque stat laus & commendatio, qua pro variorum morborum curatione & præservatione, ut spirituum maxime & humorum motus (sicque ob arctissimam unionem & animi) blanda vi demulcente excitentur vel ad corporis, circumferentiam vel in cor versus interiora moveantur, inordinati atque molesti avertantur, componantur rediganturque, vel languentes exsurguntur, aut & timor & terror avertantur, gaudium vero, spes & lætitia procurentur &c. Hac adhuc hodie apud nos quoque quandoque utuntur, ut olim frequentissime lætis & tristis occasionibus utebantur, ut in delirantibus, phreniticis, maniacis, melancholicis: Hinc illud factum est, jam tritum sermone proverbium: Musica mentis medicina mœstis. Notissimum est, ex tot Scriptorum testimoniis, tarantulæ morsui (qui rarissimus affectus & incolis Apuliæ alias quasi proprius, etiam in Germania visus est, ut testatur clariss. WEDELIVS in *Exercit. Sem. & Pathol. Cap. VIII.*) musicam, motionem corporis & exercitationem & saltationem, quæ exinde inducitur venenosum coagulum spirituum & humorum dissolvendo, mederi. Hoc curationis genus MERSENNVS comprobat, qui, Enthusiastas, Quackeros dictos, utpote melancholicos, musica restitui, evincit. Cantu porro vel sono, stridoreque blando alio statim infantes vagientes atque doloribus forte ventris aut aliis affecti, sopiti dormitant. Videbis simile in adultis ejusmodi & ex musica, quæ somni parens merito habetur: animæ enim quies & remissio est ex objecti jucundi fruitione. Pithagoræi hinc lectum ingredientibus lyra caneant, ut citius dormirent & somnia essent placidiora, ut refert CICERO in *V. Tusculan. Q.* & QVINCTILIANVS *Lib. IX. cap. IV.* Videbis imo hinc quosdam, qui musica harmonia suavi capti, in ecstasin conjiciuntur. Apud veteres Ebræos, Græcos (ut paulo explicatius loquar) musicam, vid. ALEX. AB ALEX. *gen. dier. L. XVI. cap. V.* magno in pretio, etiam pro variis morbis curandis fuisse constat, qui & variis idem usi sunt modulis ad alios atque alios affectus excitandos. Etenim si tardior ac mollis ea est spirituum motus, vagos, intempestivos & irregulares ferocientes commode colligit, sedat atque componit ex quo conjectura haud difficilis formanda, per ejusmodi dolores placari: Si fortior est atque intensior & saltuosa, quasi erigit & excitat languidos & in motus fortiores abripit. Hanc in humores hujus potentiam, vulgari & noto omnibus experimento cognosces, si nimirum, per vitri vino pleni marginem, plectrum aut saltem digitum fricando duces, ubi crispatum & quasi ebulliens vinum jucundo spectaculo

lo conspicies. Legimus Terpandrum multos ægrotantes sic sanasse. Podagræ curatæ per musicam testimonium adducit ALDROVANDVS L. X. *de infect. fol.* 621. N. PECHLINIVS p. 472. *observat.* De arthritide vaga curata, testatur Epiph. FERDINANDVS *Hist. Med.* 8. adeatur & IOH. HEVRNIVS 3. *Method. ad Pr.* 28. De obstructione urinæ solvenda Eph. N. C. D. I. *an.* 1. *obs.* 134. De obstructione alvi soluta D. II. *an.* 8. *observ.* 17. Eph. N. C. Sic Jonii & Lesbii per Arionem ab epilepsia, Bœotii per Ismeniam Thebanum, a malo ischiadico liberati sunt: quod & Aulus Gellius affirmat, & Galenus loca dolentia decantare dixit. Theophrastus per illam ictum aspidum & viperarum, Asclepiades dementiam & surditatem, Ulysses vulnerum cruentationem, Thales Cratenf. pestem aliosque morbos sanaverunt. Cantu vulnus sanatum esse, legi potest in HOMER. *Odyss.* 19. p. 455. & mensium fluxum repressum, vid. SERENII SAMONICI *Hist. Æthiop. Lib. IX. cap. XXXIII.* Hydropem sanatum ex Dio Cassio, sagittam pertinaciter infixam extractam apud BENIV. *de Abdit. Rer. Caus. cap. XXVI.* (confer. PLIN. *H. N. Lib. XXVIII. cap. XI. XII.*) reperies; Sed an veræ hæ omnes historiæ sint, videas ipse. Hanc pro soni suavitate varia, spiritus & humores imo partes solidas, dein quoque adeo motus animi varie concitare, apparet; neque ratio deest asserto, neque vires rationi: musica enim aërem acute etiam ferit atque undulationem & vibrationem, ut alii clangores in aëre instituit, quæ consequenter & motum vividum varias oscillationes & harmonicam quasi agitationem, corporis partibus, sanguini & spiritibus speciatim, producit ac imprimit, varieque pro vario sono, undulatione, vibrationibus iteratis eousque continuata & communicata illas afficit, nunc ad motum vehementer concitando nunc ad quietem componendo variasque in mente rerum ideas excitando atque ad hilaritatem & lachrymas sæpe deducendo, uti compertum habemus, mota & pulsa una chorda in uno musico instrumento æqualiter tensa, in altero altera quoque movetur ac contremiscit. Eoque magis, dum aures & spiritus in nervis acusticis cerebro valde propinquas, per quas facile & cerebri fibrillas nerveas acute ferit, atque hoc medio animam arcte conjunctam commovet ac pro varietate sua varios effectus atque affectus excitat, adeoque immediate magis operatur, cum medicamenta mediate & refractis modo viribus agant: Scilicet (ut paulo explicatius de ea agamus) idea materialis sive concentus aut motus configurativus, in sensorio communi, quem musicæ suave melos inducit, mentem delinit corpus erigit evidenter, vimque naturæ medicatricem, quæ in tonico partium robo-

re potissimum consistit, intendit, atque sic præsentem inordinatum motum, a morbo ejusque causis obortum, obliterat quasi & alterat atque componit, quo ipso quando in anima immaterialis idea grata, respondet, hæc melica modulamine exhilarata, ad naturalem quoque harmoniam, quasi revocatur, vigorem resumit, intentione vivida, ideam gratam prosequitur & ita per conspirationem, ideam materialem, in cerebro, continuat ac sustinet, unde omnes motus in corpore ordine secundum naturam insurgunt causasque morbificas ipsumque morbum superant atque expellunt. Plurimi dein certe interest, quo motu quid fiat, e. gr. memorat Exper. BAGLIVIVS *Diff. de Tarant. saltatione exorta*, sudore tarantatos sanari facile, vix ac ne vix quidem sudoriferis simplicibus provocato. Quis est, qui nesciat? inconcinnam musicæ harmoniam triturationem ferri &c. ingratam sensationem, horripilationem, stuporem dentium (nervulis scilicet eorum contortis) imo in quibusdam totius corporis interdum concussionem &c. inferre, ut & ejusmodi effectus in BARTHOLINI *Epist. Cent. IV. p. 523.* legitur de famulo quodam, qui quando cultros acuit, ex ingrato in aëre stridore, cruentatas gingivas expertus est, atque alius singularis & jocosus ex SCALIGERO est notus de Vascone Equite, qui audito testudinis sono, urinam statim reddere est coactus. Alia de aliis exempla ejusmodi habentur, sic H. AB HEER. *obs. 29. p. 253.* de puella quadam nobili refert, quæ quoties campanæ sonitum audierat, statim animi deliquio correpta est. LIBAVIVS *Part. II. singul. p. 136.* mentionem cujusdam adducit, qui anseres clamantes, ut ille apud KEC-KERMANNVM *Lib. I. syst. phys. Cap. VIII.* qui porcorum grunnitum non ferre potuerunt. IOH. SCHMID *Eph. G. N. C. D. l. an. 9 & 10. p. 122.* studiosum adducit, qui scopis pavementum verri non poterat perferre, quia suffocationis periculum exinde illi statim imminebat. Legimus, quod Æsculapius multas scribi cantilenas, mimosque ridicularum rerum fieri & melodias quasdam præceperit iis, quibus ob vehementiores motus corporis temperamentum justo calidius efficeretur. Porro idem in Carolo IX. Gall. R. apparet, uti Historici Gallici referunt, qui a nulla magis re, quam musica dolorum solamen accepit. Similiter de Melampo fertur, illum virgines cantilenis furore percitas sanitati restituisse, vid. OVID. *Metam. Lib. XV. Fab. V. no. 53.* ac PAVSANIAS in *Alt. Phitarch.* & MART. CAPELLA *Lib. IX. conf.* & HOM. *Iliad. Lib. I. p. 471.* A. GELLIVS *N. A. L. IV. cap. XII.* COELIVS AVRELIANVS *Lib. V. Chron. Cap. I.* PLINIVS *H. N. Lib. XXV. cap. II.* PINDAR. *ad 31. f.* alii-que. Xenocrates lymphatos modulis carminum a dementia liberavit.

Hinc

Hinc & David Saulum R. rabie versum cithara sopiebat. *1. Reg. Cap. XVI.* Accepimus MART. CAPELLA authore plerasque Græcorum civitates instituisse, ut perturbationes animorum & morbi corporum ad lyræ modulos curarentur. Lacedæmonii, Arcadii, Cretenses dorico tono ut bene composito composuerunt animos & corpora exercuerunt. Imo Republicæ totæ, per musicam regantur institutum est, ut ideo Plato dixit statui moribusque Reipublicæ musicæque arctum intercedere nexum. Plura legere quis potest apud ARISTOTELEM *Lib. VIII. polit. cap. V. VI.* Nam Musica, ut ait Anaxillas Comicus, mores docet, iratos discrepantesque opiniones lenit, ut Achilles & Clinias irati, cithara mansuefacti sunt. Ad posteros item in hanc rem memorabile est, Empedoclem cithara quendam ab homicidio traxisse, Asclepiadem seditiones inter civis exortas, musica sedasse, Damonem immorigeros juvenes ad meliorem frugem bene composito tono reduxisse, Agamemnoneim profecturum Trojam de uxoris Clytemnestræ pudicitia dubitantem citharoedum reliquisse, qui sono illam citharæ ad pudicitiam incitaret, & Ægyptum non nisi occiso citharoedo ea potiri potuisse. Timotheum Musicum, dum Palladis encomium fidibus decantaret, Alexandrum relicta cœna ad arma induenda & arripienda adegisse, mutatis tandem modulis armis exutum rursus discumbere fecisse. Æque Lacedæmonii frequentius civibus contra hostes animum addiderunt, ut etiam notissimum est classicum tubarum tympanorumque clangorem pugnantium in acie animos accendere & alacritatem & promptitudinem excitare fortitudinem etiam timidis addere, fortibus autem illam augere, & mortis metum depellere, ut belle dixit VIRGILIUS *Lib. VI. Æneid. v. 165.* *Aère ciere viros, martemque accendere cantu.* Aliis in locis aliisque occasionibus musica, homines ad varios corporis motus artuumque gesticulationes, saltationes, &c. concitat. Hoc ipsum sine dubio Poetæ indicare voluerunt: (Tantum enim abest, ut illos meris fabulis lusisse credendum sit, ut potius ficta sub imagine, ut plurimum verum comprehendere certis monumentis atque indiciis probari possit,) perhibentes Orpheum bruta, Amphyon saxa & pisces musica allexisse. Quod & alias animalia a musicæ sono afficiantur, plurimi testantur, plurimæque obvia exempla monstrant: equi, tauri, canes, ursi &c. lituorum tibiæque modulationibus & concentibus exagitantur. Apes emittentes examen tiinnitu vasis ænei delectantur & revocantur. Strabo iratos elephantes sono musico placari adducit, cygnos & delphinos cithara & cantu delectari, Epiphanius scribit. Alofam piscem Ælianus & trichidim musica allici & capi

Athe-

Athenæus, Isidorus atque Rondeletius, oculatus testis, alii de piscibus aliis variis & cancris perhibent. In VALVASORIS *Topogr. Carn. T. III. Lib. XI.* legitur, in certo quodam rivulo cancos & alio lacu hirudines certo quodam sono allici. Conf. & *l. c. p. 61. & p. 63.* Ejusmodi de cane quodam notabile exemplum adducit WEINRICH *de monstris C. III. p. m. 95.* Plura vid. in *Diff. MORHOFF. de scypho vitreo p. c. h. V. fract.* super experimentum N. Petters. Subit adhuc recordatio, quod de Pythagoricis legitur, eos cubitum ituros cantilenis quietum somnum sibi comparasse atque mane surgentes, iis somnum & stuporem diverso modo diversaque modulatione iterum excussisse. Hispanis referente R. A CASTRO *Med. Polit. p. 276.* in more positum est, quam primum quis gravius decumbat, musicos accersere, ut ægri animum demulceant & exhilarent &c. Mihi apud nos nota fuit foemina primaria, quæ ad cubiculum ægrotans & de vita timens, musicos varii generis advocavit. Musicæ vim cæteris in morbis admirandam digna lectu oratione explicat CASSIODORUS *Lib. I. Var. cap. IV.* Conf. & KIRCHERUS in *Musurgia* & HAFENREFFER *de cutis affectibus.* Notabile adhuc in hanc rem est, quod OLAVS MAGNVS *H. Lib. XVI. cap. XLIX.* refert, apud Septentrionales, illos medicos plurimi æstimari, qui ad curationem morborum oscines & coaxantes ranas, afferunt. Non ideo statim quid Σεῖον (de quo in multis, in poësi, physica, mathesi, medicina & pene omnibus rebus, Plato, Seneca, Cicero, Aristides aliique ex ethnicis, imo multi Christianorum adhuc multa loquuntur ex falsis fortè de Deo & animæ origine &c. opinionibus seducti) in musica continetur, de quo Jamblichus commentatus est: Nam omnia quæ in hanc causam adducuntur, ad consuetudinem, attentionem, temperamentum, spirituum conditionem &c. deducenda sunt commode. Quanta sit adhibenda fides illis, qui de carminum vi & morborum haud mediocris auctoritatis viri credunt, viderint alii curiosiores, secundum illud Theophrasti: quod in verbis, herbis & lapidibus magna sit virtus.

§. XXXII. In conspectum censumque jam veniant conclave nostrum intrantes, qui sub adstantium & ministrantium aut etiam invisentium &c. nomine communiter veniunt secundum illud HIPPOCRATIS artis medicæ legislatoris, monitum *1. Aph. S. I. Oportet autem medicum se ipsum exhibere quæ oportet facientem sed etiam agrum & praesentes & externa.* Quemadmodum omnino affirmandum est, animo & corpore laborantibus necessarios esse aliquos, qui non solum auxiliatrices manus porrigant, sed & tædiosi ejusmodi otii diverticula afferant atque consolationibus,

nibus, lepidis sermonibus, adfectu amico atque grato miseros erigant reficiantque (quod amicum consortium Sueci pro optimo præcipue podagræ remedio habent, & exemplo Principis Svantonis comprobant, conf. & OLAVS MAGNVS *H. Lib. XVI. cap. XLIX.*) atque christiana charitas id exigit, ita non possum non nimiam illam imprimis apud nos ægrum salutandi ac visitandi consuetudinem, atque assiduitatem, salutato odiosam non modo sed & nocivam, atro calculo notare, quando turmatim vel amicitiae, officii, vel consuetudinis specie, vel placendi, vel hypocriseos, vel spectandi saltem causa sæpius & nescio ob quas alias rationes, foemellæ maxime eæque non raro ineptæ ac imprudentes atque loquaces advolant ac non vocatæ se ægris obtrudunt per horasque non paucas ibi subsistunt. Ægrumque tunc corona spectata circumdatum & multiplicata cinctum serie ac quasi phalange obvallatum spectabis. Blaterantium & quibus otium ferendis rumoribus natum est, ut belle CVRTIVS expressit *Lib. VIII. cap. IX.* ibi, murmurantium, divagantium & non raro ludentium &c. universum conclave reboat strepitu, ut intuentibus circa grabatos circumsedentium cohortes, jam non ægrum ac moribundum, sed ludos scenicos spectantis concionis ac non ægrorum cubiculi, sed fori aleatorii præbeant speciem. Tantum certe abest ab officio hoc, ut officio nihil magis possit esse contrarium, immodico ita officio nocere, aut ad minimum molestare. Nemini enim officium suum debet esse damnosum. Multæ profecto eæque graviores rationes physicæ æque ac morales atque adeo theologicæ subsunt, quæ malum hunc morem abrogandum & ægrum ab ejusmodi turba separandum, suadent: Æger tunc non secum esse potest, aut tempus ex arbitrio disponere sed cogitur aliorum jure vivere, quæ necessaria essent & morbo & naturæ, remedia præscripta debito modo & tempore adhibere, necessarium naturæ debitum solvere, &c. negligere, vana aliena ingrata, tædiosa, odiosa, molesta, nocua & perniciofa vel invitus & coactus audire, videre & loqui, quo vires suas perdit (æger), inquietior redditur, morbus resuscitatur exasperaturque (imprimis cum in quamplurimis morbis ut imprimis v. gr. in angina, sputo cruento &c. loquela plane esset interdicens & sæpius vel respiratio paulo fortior noceat) in requie necessaria impeditur, animo perturbatur, agitur vel indignatur aut suspicax, meticulosus imo quandoque desperabundus variisque aliis modis inquietus redditur, a piis meditationibus distrahitur, avocatur, & quæ sunt ejusmodi alia. Taceo non solum conclave hominum frequentia calefieri halitibus, sed & mutari & inquinari aërem eumque cras-

sum

sum reddi, a tam variis ex hac turba hominum adstantium adfidentium-
que & incommodis sæpe effluviis exhalantibus, qua de re videatur
SANCTORIVS *de vitand. error. in med. Lib. XIII. cap. IV. p. 517.* cum
pauci-dentur sani, pauciores bona & sana effluvia reddentes de se, pau-
cissimi qui cum Alexandro M. balsamum spirant, plures hypochondria-
ci, scorbutici, cachectici, phthísici &c. & qui hircum olent tamque ma-
le, ut Thais, Ozoli vid. PAVSANIAS *in Descript. Græciæ Lib. X. cap.*
XXXVIII. p. 895. vel Lemniæ mulieres vid. ANTIGONVS *in mirabil. enar-*
rat. congerie No. 130. p. 142. quos vel foetor oris ac alarum pedumque abo-
minabilis intollerabilisque distinguit, quem THEOPHRASTVS *de odori-*
bus, in opusculis a Daniele Furlano editis p. 195. acerrimum & virosissimum
esse existimat, quales homines alias convictui & societati humanæ vix
idonei existunt. Ea enim conditionis humanæ indignitas est: arbores,
plantæ & herbæ producunt frondes, fructus & flores suaves & gratos,
homo lēdes & pediculos. Illæ de se fundunt oleum, vinum & balsa-
mum, iste fluidum sputum, sudorem, urinam & stercus. Illæ de se spi-
rant suavitatem odoris, hic de se reddit abominationem foetoris. Inve-
hitur jam in hanc malam consuetudinem malas nunc leges obtrudentem
GALEN. *Lib. X. meth. cap. VIII.* & nonnisi gratissimos ægris ex visitanti-
bus aditum concessit, alios vero aut nunquam illorum cubiculum ingre-
di, aut non diu ante oculos illorum versari permisit, vid. *Comment. 4. in*
lib. HIPPOCR. 6. de morb. vulg. atque HIPPOCR. notanter Lib. VI. epid.
text. 29. sic loquitur: *Illud sit tibi semper curæ, ne tempore æstivo plurimi lecto*
ægroti assideant, ne illorum frequentia aërem, qui inspiratur calefaciat & ægro-
tus multa cogatur loqui, itaque ob id sitis augeatur & febris. Ob aliam ra-
tionem impediendum in multis morbis est, ne advenientes ad lectum
ægroti adproquinquent, v. gr. si quis febre maligna aut alio morbo de-
cumbit, cui frigidus aër nocumento est, & ne quis ex frigido aëre ni-
mis propinque ad lectum accedat, ne malignitas augeatur, quoniam li-
bera transpiratio statim inhibetur, quod certissimæ observationis est.
Ideo quoque hominum frequentiam prohibent speciatim ROD. A CAS-
TRO *de morb. mal. p. 332. Lib. XI.* N. PISO *L. de M. C. & C. p. 447.* in fe-
bre ardente *p. 452.* & præ aliis in hectica GALENVS *l. c. in tertiana L.*
FVCHSIUS *de cur. rat. p. 464.* & RIV. *Pr. M. Lib. XVII. p. 308.* in lue hun-
garica, M. RVLAND. *de lue hung. Cap. VI.* in febribus putridis, continuis,
omnibus fere affectibus capitis laborantibus, cephalæa imprimis, qui præ
aliis ab incessu saltem per conclave ambulantium aut saltem confabulan-
tium sermone dolores, auctos statim sentiunt. FRAMBESARIUS *Can.*

& *consil. M. Lib. XI. p. 144.* SOLENANDER *S. II. p. 116.* porro in arthritide idem *l. c. p. 420.* in stupore & paralyfi *p. 136.* in respiratione difficili, imminuta, asthma, peripneumonia. ROD. A CASTRO *de M. M. II. L. p. 332.* in pulsatione arteriarum dorsi, ut vocat, melancholicis consue-
 ta, in cardiaca passione hominum ingressum non admittere pariter
 COEL. AVREL. *d. m. a. c. 37.* videntur. Vertiginosi quoque ægre fe-
 runt turbam hominum hinc inde ambulantium & moventium. Phre-
 nitici, maniaci, melancholici, delirantes, rarissime ingredienti, nisi ami-
 cissimos (nec hos semper) tolerare possunt, quin ex illorum intuitu sal-
 tem & magis adhuc locutionibus non raro maximo furore contra illos
 concitantur aut graviori delirio & contristatione afficiuntur. COEL.
 AVREL. *de morb. acut. Lib. I. cap. IX.* ad eos per intervalla saltem admit-
 tantur, quos metu aut verecundia coluerunt, notanter monet, cum fre-
 quentia pariat contemptum. Imprimis grassantibus morbis contagiosis,
 observatio hæc utilissima est, ne hominum frequentia ex his affectis in
 alios proferant vitium ac ne admittantur forte contagione jam affecti,
 atque adeo vitandi sunt illi, qui bene valentes cum illis quomodocun-
 que versati sunt. Specialissime indicandum est, in conclavia mulierum
 furore uterino percitarum mares minime esse admittendos, ut & vice
 versa juvenum gonorrhœa &c. affectorum mulieres, ut ad alia non ex-
 curram minus confirmata, v. gr. quando autore Lanfranco menstruat
 foeminas ad vulneratos non admittendas neque adspicere, eos nec le-
 ctum & linteamina illarum manibus tractari permittunt. Quis enim
 nescit, hæc ex inani illa persuasione oriri, qua falso creditur, sanguinem
 foeminarum menstruum, deleteriis qualitatibus esse infectum; PARA-
 CELSVS *de pestil. tr. l. c. II. p. m. 351.* sibi aliisque persuasit, infecta venena-
 ta exinde nasci, araneas, muscas, crabrones, blattas, termites, acaros, pu-
 lices, erucas imo basiliscos. Atque adeo ARNOLDVS DE VILLA NOVA
in brev. pract. T. I. L. III. in sexum foemineum injurius est, ut scribere non
 erubescat, menstruat, solo halitu atque attactu imo adspectu, arborum fo-
 lia & gramina perdere, aëremque inficere, adeo ut homines & bruta exinde
 tanquam pestilentia tacta intereant, ac hocce venenum usque ad sidera pe-
 netret. Aequè talia timent alii ab illis, quæ veneris congressum paulo ante
 exercuerunt ob hircosam sc. fumigationem adhuc durantem, de quo vid.
 I. CAMERAR. *D. 5. Probl. 2.* Addo tandem ex PLINIO *L. XXVIII. cap. III.*
 quod vulnera adgraventur illorum introitu, qui serpentis canisve mor-
 su læsi fuerint. Hispani hac in re maxime sunt cauti persuasione maxime hac
 (ast vana forte) ducti, dari interdum homines, oculos malignos habentes
 &

& fascinoſes, ut in Triballis & Illyriis & in aliis quibusdam Regioni-
bus PLINIO memorante. Conf. & P. DELLA VALLE *Itiner. P. III. p. 218.*
Comit. DAVNOY. *hiſp. It. p. 216.* Quidam ut & Scythicæ ſceminæ
Bythiæ dictæ Apollonide & Philarcho referentibus, & in Ponto Thi-
biorum genus, inveniuntur. Quales homines, quando alios ſanos
adſpiciant (ſive homines ſive bruta, nec non alias res) cauſari poſſent
aut morbum, tabeſcentiam, imo etiam mortem ipſam, aut ſi ægros
aſpiciant, nunquam illos ad ſanitatē reduci poſſe, ut ex adductis exem-
plis declarant COVARUVIAS & imprimis J. A. DE COLMENAR. *Delic. de l'Eſpa-
gne & du Portugal. Tr. V. p. 889.* quare & lege cautum eſt apud illos, ut
illi, qui ejusmodi oculum, ut ajunt, malignum habent, illum emplaſtro
tegant, quam legem negligentes deferuntur ad judicium, quod vocant
inquiſitionis. De ejusmodi hominibus & loquitur CICERO & PLV-
TARCHVS *Lib. V. Sympos. cap. VII.* PLAVTVS in *Autil.* quando dicit:
Exeundum herule tibi ſoras conſpectatrix cum oculis emiſſitiis. Ad hanc
rem etiam reſpicit verſus ille VIRGILII MARONIS *Eclog. III.*

Nefcio quis teneros oculus mihi facinat agnos.

De hac re præterea multa collegit NVRENBURGIVS. Item A. GELLIVS
9. noct. att. C. IV. P. I. VII. c. II. Affirmat pro certo hoc quoque M. A.
SINAPIVS in *Parodox. med. P. II. p. 80.* & aſſerit ſe in Lithuania viſiſſe
homines, ſolo adſpectu effluviis aliquibus ſubtilibus, ex oculis emananti-
bus lædentes non modo alios homines, ſed & integros animalium gre-
ges, anſerum, gallinarum &c. interficientes ac ſi fulguris ictu tacti eſſent.
De hoc fascinationis genere propriam experientiam allegat J. H. JVN-
CKEN in *Med. præſ. ſeculo accom. p. 831.* & ſeq. præſervationem ſimul &
remedia aſſert. De iſta oculorum quorundam malignitate, & an ejus-
modi in quibusdam ſubjectis impuris, ſcorbuticis & acrioribus humori-
bus præditis præſertim ira concitatis verendum ſit, atque an viſus in æ-
rem agat ſecundum ARISTOTELEM, uti habet *lib. de inſomniis cap. II.*
hic equidem probationem jam ulterius non adjiciam, dum hic maxime
ſcrupulus reſtat ac dubitatio: an ſpiritus animales ad oculos affluentes
aliis ſint pejores ad alias partes fluentes, & an tales exhalationes per tu-
nicam non modo conjunctivam ſed & per ſcleroticam eamque craſſam,
denſam duramque tanta vi penetrare poſſent. Verum hoc affirmare ne-
ceſſe habemus, omnes inflammatione & lippitudine fortiori oculorum
detentos, ſi alios adſpiciant, quibus imbecilles oculi ſunt, ut SENECA
loquitur *c. II. de clement.* contagio, effluviis ex ægri oculis exeuntibus quæ

Cartesio annotante copiosiora quidem sunt, quam in ulla alia parte, in corpus & oculos alterius (non excludo deterrima effluvia ex ore &c. terrorem, metum & conturbationem spirituum animalium & humorum, sed multum eos conferre assevero) per poros immissione afficere secundum illud Poetæ:

*Dum spectant oculi laesos leduntur & ipsi,
Multaque corporibus transitione nocent.*

Quare ophthalmiam & lippitudinem morbis contagiosis annumerare non dubitant GALENVS *l. de diff. febr. C. II.* PLVTARCHVS *5. Symp. 7.* atque hanc sententiam observationibus firmaverunt. BENED. FAVENT. *Prax. T. I. S. 2. c. II.* MERCVRIALIS *prax. Lib. I. c. XXXVIII.* &c. Conf. & RABBI MOYSES *24. aphorism.* SENECA *Lib. II. de benef. DIEMERBROCK observat. & curat. obs. 55.* Nullum enim reperitur in humani corporis fabrica sensus organon, quod tanta spirituum copia sca-teat & fulgorem de se emittat, ut oculus. Siquidem quinque nervis insignibus ex *Εγκεφάλω* proxime egredientibus nimirum opticum, oculorum motorium, oculorum patheticum, paria, ramus gustatorii paris primus innominati seu timidi primaque propago oculis prospiciunt. Si igitur ponamus, quod ejusmodi homines visu nocere possent, non visui qua tali, sed effluviis & particulis acrioribus, tenuibus adscribendus effectus. Nec abs re est malevolorum hominum & invidorum, qui ut plurimum pravos humores possident, consuetudinem & physice medicæque ideo esse suspectam adeoque fugiendam, unde & ejusmodi homines foedum præferunt faciei colorem, cachecticum & macrem corporis habitum, qui & in proverbium abiit. *Er siehet aus wie der Neid.* SCHAPERVS *Med. curios. specim.* observavit phthisicum, qui ob superficiem erosam asperæ arteriæ ideoque adeo sensibilem, ut a levissimo aëre offenderetur, & dolorem non levem sentiret, ideo nec aërem in hypocausto perferre poterat, si vel lento, sed proximo ab adstantium transitu aër moveretur, hinc stropholi admotione id avertibat. Ex alia adhuc causa B. BOHNIVS *v. Tr. de Off. Med. cap. IV.* Magnatum ægrotantium conditionem deteriorem habet quam plebejorum, quia multitudini adstantium diversa ut plurimum sentientium contradicere Medicus non facile audet. Aliæ adhuc occasiones subinde eveniunt, ob quas visitantium accessus plane prohibeatur necesse est. v. gr. quando gravior quædam chirurgica operatio: ut herniarum vel calculi sectio & similes administrandæ sunt, tunc Medicus exire jubet singulos, non

necessarios atque adeo cognatos, ægrique amicissimos, qui sermonibus, lamentationibus ac lacrymis aut vultu saltem, miseri animum facile turbare aut flectere possent. Quomodo vero se ab illis ex visitatione nimia incommodis expediant, videant, quorum interest & non nisi infirmis gratos & amantissimos admittant. Aequale propemodum ægris nostris incommodum affert, quando domestici singulis quandoque fere momentis ad ægrotum accedunt, & de hujus vel illius salutatione & sciscitatione ægrum certiore faciunt (more apud nos admodum communi) tunc cogitur æger responsionem ferre singulis omnino vicibus, morbi que cursum & indolem, accidentia, successum, secundum omnes partes & circumstantias enarrare, quomodo dormiverit quid biberit, ederit, quid sudaverit, quod exspuerit, & quid amplius egerit &c. Hæc hominum frequentia hicque accurrentium discurrentiumque strepitus atque tumultus certis in casibus, ut in lethargo & caro, & ubi ab ægro somnus sit avertendus, ubique ille sit excitandus, tolerabilior est, imo necessarius, ubi ideo convocandi sunt amici, qui semper discurrendo ægrum excitant a somno &c. In illis, qui sub adstantium & ministrantium nomine veniunt & in conclave infirmorum admittuntur, requiruntur, ut corporis valor, ita & fidelitas, docilitas, sedulitas, sollicitudo, taciturnitas, scientia, peritia, prudentia, autoritas, alacritas, patientia & obsequentia, ut se ad ægrorum ingenium accommodent blandissime semper & amabili industria tractent, pro ægrotantium beneplacito & arbitrio loquantur & agant, & omnia summo studio occultent, atque avertant quod ægris molestiam, inœrorem, metum, acerbiteriam, indignationem, excandescentiam, desperationem ullo modo afferre possit, ut omnia ex præscripto, ex ratione, mensura, modo, tempore, ordine &c. peragant: Frustra enim auxilia præscribit medicus, præparat pharmacopæus, operatur chirurgus, si adstans illa rite porrigere negligat ægro & consilia salubria respuat. Eligendi quoque ad hoc officium, qui ægris grati sunt, familiares, & in quos plenam fiduciam posuerunt, non iracundi, non molesti, non desides &c. Ad qualia ministeria, ægros scilicet cibandos, contrectandos &c. fœminæ viris aptiores censentur, ut & in proverbio etiam dicitur, ægrum gemere & graviter affligi, ubi mulier non adsit. Adhæc & alias necessitates sequior sexus nobis in adiutorium datus est ut HELMONTIVS loquitur *v. Oper. p. 345.* Cum omnino, ut modo dictum, plurimum referat, quales adstantes & ministrantes sint apud ægros, optandum omnino esset, ut tales ubique essent, quales ab HIPPOCRATE *lib. de dec. ornatu* describuntur; sed utique

que hodie dolendum est, quod hæc negotia mulierculis ut plurimum ineptis committantur, quæ non agunt, quæ essent agenda, & quæ sui muneris essent, sed aliena & quibus ægrotis male consulitur, tractant.

§. XXXIII. Plura sunt medicorum quoque officia personalia magis atque in ægrotantium conclavibus ab iis observanda. Ejusmodi sunt (ut ex multis quædam saltem dicam) ut consultationes suas non in conclavi & audientibus ægrotis, sed in alio separato vel angulo atque semotis arbitris & auditoribus instituunt, quoniam rationes eæque graviores & multæ subsunt, tam ex parte medicorum ipsorum, quam ægrorum & adstantium: Liberius sc. librantur singula a singulis atque proferuntur sententiæ, liberiusque errores prius comissi forte corriguntur &c. Quo & cavetur ne æger & adstantes controversias de morbi statu, gradu, phænomenis, circumstantiis ac indicationibus & contraindicationibus, indicatis & id genus audiant, totam artem & medicos suspectos habeant, cum controversia in qualicunque exercitatione, justam ignorantiae vel ad minimum incertitudinis suspicionem arguat, sicut concordia justam magnamque cognitionis spem demonstrat. Hocque simul præcavetur, ne forte notam periculosi futuri eventus ex ipsis deprehendat æger, aut infelicem mentionem audiat, moriaturque desperatus, qui forte adhuc posset salvari &c. Unde etiam factum est, quod scio, in quibusdam urbibus lege publica cautum esse, ne consultationes medicæ publice habeantur, ad quod ipsum L. SEPTALIUS *in animadv. L. I. T. XII.* sedulo adhortatur medicos. Imprimis cum ejusmodi non raro falsa licet inculpando intorquendoque indecenter mordicus defendant, dicta & facta alterius traducant acerbius quam Serapion Hippocratem tanquam novi Aesculapii canino (ut ajunt) dente rodant atque sarcasmis acutissimis aggrediantur, æmulatione, ambitione vel sola invidia (quæ atque odium præjudicia reddunt majora, ac adeo occoecant ut etiam vix, invicem se intelligant) ducti (unde & medicorum invidia ac discordia in proverbium cessit, jurene, an injuria judicet æquus Judex) &c. Quod tamen vitium, ratio non permittit, civilitas abhorret, christiani mores prohibent; ast non mirum cuiquam videatur: Ut enim multorum litteratorum ita & medicorum eruditio est in verbis, sententias aliorum ex perpetuo contradicendi studio intelligere nolunt. Hic dictum illud AGRIPPAE succurrit, qui quod medicina Marti sit adscripta, medicos ob id discordantissimos invidentissimosque asserit. Imo dantur casus, ubi medicus si ægrum non accedat, melius est: inveniuntur enim ejusmodi ingenii homines, qui ex timidis sunt, licet leviter de-

cum-

cumbant, qui cum vident medicos, ægerrimos se esse credunt. Pariter ejusmodi est, ut medicus ægrum accedens, secundum ipsius Hippocratis suasum prope ægrum, eo in loco, qui pro ratione morbi commodissimus est, accedat, ita tamen, ne æger quid suspicionis gignat atque non a capite seu tergo ægroti, sed adversus eundem atque ex adverso vultus ejus & aliquamdiu sedeat & assideat ipsi, cum ex illius vultu, habitu, decubitu, similibusque in oculos incurrentibus, multum notitiæ hauriri & obtutu & mora aliquali deprehendi possit, quod fugitivis quæstionibus ediscere non semper datum est atque ut commode de cura instituenda cogitare possit: secundum enim ARISTOTELEM *VII. Phys. II.* anima sedendo sapientior fit & prudentior ac intellectio assimilatur quieti & statui magis quam motui; unde olim quoque sedere tenebantur consultantes & judicantes. Periti medici quoque est, ut Celsus egregie monet, non protinus statim, quando ad ægroti lectum accedat, ex templo manus & pulsum tangere, sed exacto demum pauxillo temporis spatio, & posteaquam hilari vultu, comitate & sermone leni sollicitudinem ægroti levaverit, cum Medici accessus ac conspectus facile etiam quandoque alterationem ac turbationem in pulsu causari possit. Porro caveant sibi, quando commorantur apud ægrotos, ad illorum grabatos, ne proverbio isto alias satis noto fidem faciant, quo dicitur, medicum, quem medicinam alias mutam ex VIRGILIO *Aeneid. 12.* vocabant, garrulum, esse ægroto alium morbum, de quo exhiberi possent exempla, nisi essent odiosa. Ejusmodi medicos garrulos & in sermone prodigos præposterisque sermonibus circumforaneis & præstigiatoribus magis dignis abundantes quibus sibi modo satisfaciunt, notanter reprehendit atque castigat, ACCURSIVS *Cod. de Med. L. sequentibus.* *Loquacissimi sunt & ita doctissimi vulgi sententia habentur; re vero & opere sunt ineptissimi & artem inter omnes summe honorandam & a summo Deo hominibus concessam dedecorant.* Noster ipse HIPPOCRATES *de dec. ornatu* breviloquentiæ Medicum meminisse jussit. Caveant quoque medici, ne alienum afferant odorem, moschi, ambræ (vel quod hodie frequentius) tabaci, spiritus vini: ille foeminis hystericis nocivus, hic ægris tantum non omnibus invisus, infensus est atque molestus. Sed ne aquilas volare aut delphinos natare, me velle docere videar, & iliadem post Homerum scribere, ea consulto missa facio & remitto B. L. ad Clariss. D. BOHNIVM (prætereo alios) *in Offic. Med. dupl.* Interim audiamus adhuc GALENVM loquentem *de morb. vulg. C. IV. cl. 3. p. 355.* *Et figuram corporis totius introeundo atque sedendo Medicus observet, neque humilem præ*
Zz zz
se

se ferat, ut contemptum mereatur, neque fastu quodam aut superbia turgentem; quidam enim extenti ac patentes introeunt, ac sedent nonnulli adstricti & compressi, alii vero proni atque abjecti &c. Abiectos itaque, & qui contemptum mereantur, eos diceret Galenus, nonnullos qui ut panem saltem lucrentur turpeque lucellum comparent sibi & benevolentiam indigno aucupio a vulgo captent ægrotantium & muliercularum & servitutis nomen (quod tamen professore & cultore artis hujus liberalis & nobilissimæ plane indignum, indecens ac ignobile est) ac boni medici mereantur, atque ut a plebejis prædicentur, intempestive humiles se præbent eousque degenerant, ut etiam munere famulatio fungantur & servilem operam præstent, citra necessitatem, non sine tamen notabili illorum artis dedecore v. gr. apud ægrotum per totam noctem vigilant, vomituriensibus & venæ sectionem admittentibus vas teneant, ad fedile ægros ducant atque alia ejusmodi servitia lecticariorum, fervorum, coquorum, unguentariorum, muliercularum famulantium præstent. In hanc rem quoque sic locutus est ille nempe GALENVS in VI. epid. com. 5. text. 13. *Quam proportionem Architectus habet erga adificatores, murarios, lignariosque fabros & alios, quibus imperat, artifices, eandem & Medicus erga suos ministros (ut enim imperare convenit Imperantibus, neutiquam ministerio uti, ita Architecti est non ligna ascia asciare, non configere trabes, clavis trabalibus, non muros struere, non crustare calce trullæ ope, non vestire tectorio. Et rursus, Medici ad ægrotantes introitus quoscunque, ipsis gratos faciant. Si quidem nonnulli ægrotantes a sæpius visentibus affici se molestia opinantur, alii contra crebrose invisi valde latantur. Quidam autem Medici sunt, qui eo usque insaniunt, ut etiam in dormientium conclave strepentes pedibus, aut vociferantes introitum faciant, ob quæ expergesacti ægroti & illis irascuntur, & valde se lesos esse conqueruntur. Hæc igitur omnia providere solertem medicum decet, ut neque omni tempore accedat, neque cum multo strepitu & elata voce, aut incessu aut aspectu, aut aliquo prorsus hujusmodi indecoro. Sermones inter præcipua sunt & isti cum ægrotantibus a medicis recte aut non recte habiti: Quidam enim sermones summe fatui sunt &c.* Possent quædam etiam monita adjici ad ægrotos de officiis eorum erga medicos accedentes, hic observandis; sed ne diutius quam attinet inhæreamus, illa saltem indicanda potius quam longius recensenda ea esse, censemus.

§. XXXIV. Sed ad finem properat hæc dissertatio, quare de aliis vel forte minus hic necessariis, vel minus exploratis aliis, cuique libuerit cogitare & opinari permittimus, cum & de plurimorum certitudine nunquam fuerim sollicitus v. g. quando pro iis, qui de visu imminuto

con-

conqueruntur, herbam & flores calcatrippæ, tempore balsamico circa festum nimirum Sti Johannis collectos, in hypocauſto ſertis formatis affigunt, ut inſpiciant ea atque oculi exinde confortentur, aut quando in morbo pediculari virgam coryli cum pinguedine urſi vel erinacei inungunt, & in angulum cubiculi ponunt, de quo vid. I. ANGLICI *prax.* p. 871. L. I. *Vel*, quod multi affirmant, R. A CASTRO *de M. M. L. II.* p. 325. & CRATO *L. V. f.* 267. GREMS *arb. ruin.* p. 236. & ægerrime poſſum adduci ut temere credam, pyra licet hæc copioſa & vehementia ſatis effluvia de ſe ſpargant, ut & illud de quo tamen teſtatur Sim. Pauli, egregius ſane vir fideque dignus vid. QVADRIP. *Botan.* p. m. 82. de malis, (unde & pyra & mala, jumenta ægre portare poſſe PLINIVS dixit *Lib. XXIII. c. VII.*) ea & cydonia mala ſi eſſent in cubiculo poſita parturientium, muliebria non dilatari & partum retardari & impediri, & quæ ſunt alia.

§. XXXV. Romani olim inter alia ſuperſtitioſa in lectis auguria ceperunt, ut ex PLAVTO colligere eſt in *Tur. Act. I. S. I.* & fulcra lectorum in Mercurii imaginem efficta habuerunt, quæ & ideo Hermines vocarunt, ad conciliandum ſomnum, cum Mercurium ſomni præſidem putarent, unde & in conviviis ultimum poculum Mercurii poculum nominabant, vid. STVCK. *Ant. Cont.* p. 628. NICOL. *de Stat. Mercur.* p. 27. ALMELOV. *amæn. Theolog. Philolog.* p. 208. Priuſquam enim ad lectum ſe reciperent, Mercurio libabant, vid. PETRVS MOL. *noc.* p. 115. SAVBERT. *de ſacriſ. c. III.* p. 48. Dolendum quod & inter Chriſtianos adhuc ejusmodi illis plane indigna, ſuperſtitioſa non modo magica, ut plurimumque ridicula ſed & damnata plane inveniantur, quæ ab ignara plebe maxime & vêtulis circa conclavia ægrorum & grabatos & in illis affigenda, imponenda ſubſternendaque imaginibus & characteribus ſignanda ſigillis, ſuffitibus & odoribus fumiganda, tam ut morbi curentur, quam ne dæmon, ne ſtrix ne nyx noceant, innumero numero ab hac gente ingenti, ut plurimum quædam non tam malo propoſito, quam ignorantie obducta caligine, facile tamen vincibilis, circumferuntur. Hæc & ſimilia in hunc uſque diem adhuc nobis a priſcis illis temporibus relicta ſunt in quibus quidam Medici & Phyſici recta ratione & fidis experimentis medicamentorum vires explorare neglexerunt & magicas artes, eas nimirum, quæ circa viles nugæ, præſtigia, incantationes erant occupatæ, medicinæ junxerunt, ex quo infelici connubio ſuperſtitio difficillime ad hunc uſque diem tollenda, & quæ hominum animos firmiſſime tenet, irrepiſit, & multa remedia ſuperſtitioſa, inepta

& ridicula histrionum, rudibus, levibus & credulis obtulit. Nec intacti ejusmodi superstitione fuerunt, qui ultra plebeja ingenia sapiunt vel potius sapere volunt, qui tales curas probant & approbant, quorum agmen ducunt Alexander Aphrodisæus, Galenus, Theophrastus, Fludius Fernelius, Gassarellus, Joh. Lud. de la Cerda, Joh. Branus, Camisius Lusitanus, Galeattus Martius, Henr. Cornel. Agrippa. Tales enim curæ, ut ego quidem opinor, sæpius impietatem, sæpissime superstitionem involvunt, cum nondum videre liceat, qua ratione, variis ineptiis, imaginibus, characteribus, ceremoniis, verbis, (quæcunque sunt quantitates per se inefficaces) & morbis eorumque causis intercedere proportionem, attactus & operationes possint ubicunque enim non datur contactus corporum sive immediatus sive mediatum mediantibus scilicet effluviis ibi etiam nulla operatio naturalis. Interim certum est, multos per superstitionem esse curatos. Effectus, quos ut certissimos allegant, fortuiti tantum sunt & non iis, sed phantasie & affectibus ægrotantium, nec non tempori, loco aliisque circumstantiis accidentalibus aliisque forte abominandis prorsusque damnandis causis adscribendi potius sunt; Ast absit ut illa illorumque exempla amplius subjiciamus, ne somnia Orestis narremus, eoque magis cum optandum foret, ut plane deleri posset memoria, vel usus saltem omnium illicitorum ejusmodi. Nam prohibuit Deus hujusmodi magicas superstitiones, characteres & consultationes *Levit. cap. XIX. XIX. & XX. & Deuteron. cap. XIX.* Legitur ejusmodi exemplum Dei Justissimi gravis iræ in Ochosiam quod adiisset beelzebubum, idolum accaronense & ex eo quæsisisset, num ex morbo suo convalescere posset, & quod ideo mortuus sit. *Lib. Regum IV. Cap. I.* Pia in hanc rem D. AUGUSTINI meditatio est in *Psf. XXXIV.* inquiens; *Multi in morbis constituti quærent auxilium a demonibus, per arreptitios demones consulunt, sortilegos quærent &c. Quid hoc aliud quam invisibiles hostes nostros adire, qui animam nostram expugnant, & nobis persuadent, non esse nobis in Deo salutem?* Accusandi tamen ii similem in modum penitus non sunt, qui ejusmodi, quæ vero res sunt indifferentes, quædam interdum admittunt, non ut aliquid operentur per se, sed ut iisdem ægros bono dolo fallant, ut avidius recipiatur medicina & animus patientis erigatur, excitetur, firmetur, ut confidat, speret, gaudeat liberalius, quod maximum in medicina est momentum, quoniam maxima est phantasie & animæ potentia in spiritus & corpora, ut perite explicat ROGER. BACO de *secre. oper. a & nat.* Ad pessimos circa hanc materiam mores & consuetudines pertinet, quando difficulter morientibus aut
morti

morti vicinis, subito & violenter pulvinar subtrahunt, ut citius moriantur, faciliorque mors, quam *εὐθανασία* vocant (qui scopus alias æque ac ille mortem imminuentem retardandi legitimo usu in medicina alicujus momenti est) procuretur, iis reclinato capite respiratione impedita & inducta: Sic enim ulteriori in cerebro sanguinis stasi impeditoque refluxu ad cor, motus ejus languidus jam, tollitur penitus: quæ sane actio physica (moribundus enim suffocatus angitur magis atque eo difficiliori morte moritur) æque ac moraliter mala ab homicidioque non multum abhorrens merito censetur, quæ de re pluribus egit VALENTINI in *Novel. medico legal. p. 1195. seq.* Conveniens hinc apud SENECA in *Excerpt. Controv. Lib. III. Controv. 9.* lectio est: *Etiam ubi remedium est mori scelus est occidere.* Huic nec multum absimilis est hic pessimus mos, de quo WILH. PISO *Hist. N. & med. Brasil. Lib. I.* de Brasiliensibus scribit: *Ægrotos remediis frustra adhibitis nihil ultra tentant, nec tamen relinquunt, sed unanimi consensu tanquam de ejus salute desperantes clavis ligneis ferociter interimunt, gratificantes tamen illis & illi sibi, quod mascole interire ipsis contingat, omnibusque miseriis eripiantur. Hoc enim letabundi in ipso mortis articulo quasi de euthanasia gloriantur.*

§. XXXVI. Tandem ex hac mala mansione egressis, qui ægrotabant vel qui reconvalescent & sani, sanis, aut mortuis exportatis, conclavia lecti, vestes imprimis pelliceæ, culcitæ, linteamenta, stramina reliquaque supellex, rite iterum purgentur, lavando aqua vel aceto, fumigando v. gr. vitriolo, sulphure, myrrha & similibus aceto solutis & candenti lateri conspersis, calce viva, frigida extincta &c. in ipsis conclavibus ignes accendendo luculentos, quo efficacissimo auxilio morbi semina penitus extinguuntur. Et magis eo corriges, si ea concrementur, atque adeo in nonnullis Italiæ locis integras domos cum tota suppellectili Magistratus jussu, combustas fuisse accepimus. Quare pessima consuetudine, sordes ablutæ, detrita vestimenta & similia, quibus usi sunt morbis maxime contagiosis laborantes, in publicas vias projiciuntur. Imprimis in hunc usum alias laudantur v. gr. juniperi lignum & baccæ, herba rorismarini, ligna abietum & similia resinosa & balsamica, cornua igni injecta &c. Aperiantur omnes fenestræ, januæ apertæque per aliquod tempus servantur, ut effluvia hucusque ex corporibus ægrotantium egressa & forte hinc inde hærentia vel circumvolitantia foras pellantur: & ut minus sentiantur cadaveraque eo citius infrigescant; non vero ut archeus sic dictus iterum eo citius faciliusque ad auram tanquam ad matrem suam perveniat (unde spectra deinceps deducuntur vel ut ignarum

vulgus somniat, anima, per aërem, viam suam facilius inveniat ad Cœlum.) Imo e re erit, si conclavis parietes pro re nata abraderentur, novaque calce inducerentur, ne aliis dein noxam quoque inferant. Quod in peste, dysenteria, lue venerea, scabie, phthisi & morbis reliquis contagiosis, (de hac, phthisi nempe speciatim conf. MASSARIAS *Prax. L. II. cap. VII.* ARISTOT. *problem. X. sect. 7.*) hoc sedulo observandum est, unde etiam L. RIVER. *Prax. med. Lib. VII. cap. VII.* monet, quod cubicula consanguineorum phthificorum etiam ingredi, non tutum sit, firmatque exemplis in *obs. cent. I. obs. 35. & 99. cent. 4. obs. 92.* Sic SCHENCKIVS in *observ. Lib. II. obs. 132.* refert de Medico sputum phthifici olfaciente & facto exinde phthifico. Tanto hoc magis necessarium, quanto certius est, contagium ad trabes, parietes, mensas, tabulata, sediles, lintheamina, vestes, imo esculenta & potulenta atque adeo ad utensilia ex metallis confecta ut & monetas vid. RANCHIN. *de purgat. rer. infer. S. IV.* P. ZACHIAS *Tit. III. Quest. IV. §. 29.* SEBITZ *Diff. de Morb. contag. §. 75.* sicque per universum cubiculum transire inibique diu non ad menses tantum multos, sed etiam annos, hærere atque delitescere ut Fracastorius, Forestus, Alexander Benedictus, Trincavellus aliique testantur hocque jam olim de Judæorum lepra notum fuit, eam in muris, parietibusque diu hæsisse. Conf. & FR. VALLESIVS *de Phil. sacr. Cap. XIX.* TH. BARTHOL. *de Morb. bibl. No. VIII.* Quare & in hanc rem maxime memorabile est, Deum hanc aëris, hominum, conclavium, ædificiorum, vestium, lectorum a lepra, fluxionibus feminis, aliisque repurgationem ab omni contagio, putredine, puerperio, cadaverum imunditie & contactu serio præcepisse ut *Levit. XI. v. 24. XIII. v. 34. 45. 52. 54. seq. 57. seq. Cap. XIV. v. 2. 9. 45. seq. Cap. XXI. v. 1. 11. Cap. XXII. v. 4. seq.* legere licet. Ultimo loco adhuc monendum duco, quod aliqui ægrotantium v. gr. affectibus soporosis, apoplexia, lipothymia, epilepsia, catarrho suffocativo, hysterica passione affecti, per plures etiam quandoque dies tanquam mortui jaceant atque pro iis habeantur, ut multæ observationes apud Autores hinc inde prostant, ut nempe ejusmodi per aliquot temporis spatium in lecto cubiculoque calido relinquuntur non vero maturius justo, in frigidam cameram exportentur, nedum sepeliantur, sed ad quartum usque diem in temperato loco retineantur.



XV.

DISSERTATIO

PHYSICO-MEDICA

DE

MORBORVM PER MANVVM ATTRE-
CTATVM CVRATIONE.

PROOEMIUM.

QUoniam rerum naturalium causas, cognitione nostra vix, ac ne vix quidem assequi possumus, nisi observationes, & experimenta prius monstraverint viam, ac quasi prætulerint facem, intelligentes Medici, sibi, suæque arti, ægrotisque suis optime consulunt, qui artem suam salutarem, medicinam, per alias latissime fusam scientias, ratione pariter, ac experientia, veris suis veluti principiis suffulciunt. Etenim evenit sæpissime, quod cum effectibus suis plerumque causas metiri, & æstimare velint, ut in illis reddendis, si præsertim rationibus genuinis nec satis instructi sint, gravissime errent, propterea quod isti ex alio plane fonte, non raro atque ipsis visum est, promanare soleant; quemadmodum e contrario ratio sine experientia fallit non satis cautos, quia & facile possunt dari causæ, quæ rebus penitus expensis longissime ab effectibus abesse solent; quare qui ambo conjungunt, felicius procedunt, atque ideo præcipue illi laudandi, qui vires remediorum non tam specificis, & imaginariis interdum facultatibus quam mechanicis, & ex sua natura petitis, suarum particularum affectionibus metiuntur, & pro ratione, proque varietate causarum morborum effectricium, aliarumque circumstantiarum, in hunc censum venientium, varias quoque curandi rationes, & modum instituunt, atque secundum recta artis præcepta medicinam exercent; isti vero vituperandi sunt, qui vel hoc, alteroque fulcro, vel utrisque simul posthabitis, aut vanas fallaciæque plenas, aut superstitiosas morborum curationes susceperunt, eoque pessimo medio, malam suspicionem arti adeo salutari, atque nobilissimæ contraxerunt, in quem censum præcipue veniunt ii, qui etiam periculosissimorum, & contumacissimorum morborum sanationem absque ullis in auxilium

xilium vocatis remediis tentant, & de perfectis iis maxime gloriantur, sed vel verbis, obscuro murmure prolatis, vel characteribus, hinc inde aut adscriptis aut appensis, aut amuletis applicatis, aut incantamentis, signisque variis, manibus pedibusque efformatis, & in transplantationibus, aliisque similibus magicis, magnam vim, ac efficaciam ponunt. Nemo autem curationem morborum per manuum attrectatum aut vanam, ac inutilem, aut superstitiosam esse credat, aut dissertationem præsentem plus nominis, quam operis habere credat, cum ejusdem efficaciam ratione, & experientia esse fundatam in sequentibus paragraphis libera manu, hanc chartam pulsando, ibimus stabilitum. Quam brevem parcaque manu ac nuda absque elegantiarum annulis tactam illam quidem tractationem ideo non inanem, prorsus, & supervacaneam cognoscendis commodis, iisque tuto, ac jucunde conferendis operam quandam impendere arbitramur. Quamvis non manu (ut ajunt) fictam eam B. L. reperiet; nam breviter, & plane magis, ad hanc rem propositam, quam prolixè, ac ornate scribere volumus, cui pollice, favoris quondam sacrario habito ut faveat tam rogamus quam pollicemur nobis.

§. I. **M**ANUS, pars ea admodum nobilis ac admiranda formosa, atque amica, extremorum humani corporis una ex carpo, & metacarpo & digitis composita atque divisa diversisque articulationibus ad omnem motus diversitatem aptissimis elegantique ordine locatis conflata unguibusque munita atque ad firmiorem apprehensionem majoremque tutelam datis atque ne laboribus lædantur, organon hominis utilissimum, laboriosissimum, expeditissimum atque agilissimum comparandis omnibus laboribus, actionibus, & muniis, quæ humana industria excogitavit, & injunxit, instituendis, ac obeundis aptissimum ac necessarium est & cujus ope singulis momentis indigemus quodque ad singulas motionis species, singulaque tempora ac loca admodum se accommodare & fingere novit. Taceamus quod ipsis etiam animi pathematibus & quibusvis fere illius conceptibus cerebri ministerio excitatis, obsequantur ut ferme omnibus, quæ agimus variis gesticulationum modis continuo agitentur, qua de re WILLISIVS in *Anat. Cerebri Cap. XXIII.* sic loquitur: *Nihil fere cogitamus, quin una manus, huc illuc jactentur, dumque lingua hesitat, aut vox faucibus hæret, dextra quasi gestu suo celerius animi sensa depromere satagemus exeritur.* In ejusmodi exercitatione atque per manus loquela, apud Romanos quondam Pantomimi erant (de quibus FERRARIUS, CALLIMACHVS aliique mira recensent) & apud Turcas hodie muti,

muti, quos vocant exercitatissimi atque celebratissimi sunt. Unde & ARISTOT. *vid. Lib. IV. de P. A. n. cap. X.* & GALEN. *de Usu Part. Lib. I. cap. X. XV. seq. it. Lib. II.* instrumentum instrumentorum dicta fuit, qui simul fuse explicavit, cur mobiles manus nostræ, cur binæ æquales, cur carne & cute tectæ, multifidæ, tot inprimis digitis iisque inæqualibus instructæ sint, cur pollex eo quo conspicitur loco, cæteris appositus, digiti in summitatibus molles, tribus ita figuratis, ossibus unguibusque rotundis armati esse debeant, Anaxagoras Philosophus quod manus *ἡ σοφίας αἰτία* causa sapientiæ sit, asseruit. Profecto si propius rem aliqua saltim æstimatione perpendamus sapientissimi Auctoris nostri ac Parentis Dei, perfectissimas manus, rerum omnium effectrices, mirari ac venerari statim iubemur easque compendium operum ejus habere, nulli dubitamus. Hæc forte perpendens CHRIST. DONATVS ex conformatione nempe hujus membri corporis humani, potissimum Dei existentiam demonstrare annisus est hocque eodem jure propemodum ac IOH. CHRIST. STURMIVS ex oculi, IOH. ANDR. SCHMIDIVS ex auris, GEORG. ALB. HAMBERGERVS ex cordis structura ut & GVIL. FEVERLEIN ex hominum loquela, peculiaribus dissertationibus in lucem emis-
sis evincere contra, atheos, voluerunt. An eorum argumenta pro convincendis plane ejusmodi nefariis hominibus sufficere possint, equidem determinare in me non recipiam, quoniam hoc non hujus loci neque mei officii est. Etenim homo qui creatura omnium nobilissima ac perfectissima alias habetur, certe brutis ipsis in multis a natura inferior, nihil sciens aliud, natura sponte quam flere, vix mammam nutricis apprehendere & fugere potens, natus nudus, mutus, rudis, imbecillis atque rerum suarum suapte natura ignarus atque ad artificia humana ineptus atque inermis, inops, alienæque opis egens variaque infirmitate pressus, etiam in provectiore ætate ad ratiocinia formanda minus aptus nec quicquam sine doctrina sibi succurrere potest, facultate tantummodo concessa, per quam non modo ea omnia sibi acquirere poterat, ad quæ natura ea ducebat, sed etiam limites ipsi a natura constitutos eo felicius transgredi liceret, cum cætera animalia, bruta, mox ab ortu velleribus atque pilis, villis, pennis, squamis, corticibus, testis loricataque cute tanquam vestitu donata naturam tanquam magistram ac ducem sequuntur, quæ affectus phantasiæ ac motus corporis sui, ad vitæ modum directos ingerit instinctumque suum sentiunt vel suo robore vel calliditate ac velocitate sibi quasi prospiciunt, necessitates quærunt suas, & domicilia atque contra metum ac vim suis se armis tueri & defendere no-
Aaa aa runt,

runt, unguibus & morſu leones & urſi, cornibus tauri, ungulis equi, cutis ſtimulis echinus, apri dentibus ac apes & veſpæ aculeis, aves roſtro, cancri chelis utuntur atque depellunt periculum. Alia quibus arma natura negavit, aſtutia & volubilitate pedum ſibi conſulunt. Et ſiquid etiam eſt quod natura dat, non dilucidum non expreſſum ſatis eſt, ſummatim atque obſcure quædam novit natura, reliquias habet, integrum amiſit atque adeo (quod adhuc magis mirandum) bruta ſine medico, ſola natura monſtrante remedia morborum eligunt juvantiaque appetunt atque quæ ſalutaria ipsis ſunt norunt, nocentia vero reſpuunt: Lupi ex nimia voracitate ægrotantes, tenellis tritici, locuſtis & gramine ſe purgant; Cervi percuſſi a phalangio, (quod eſt aranei genus) caneros edendo ſibi medentur; Ciconia origano, muſtela ruta ſe munit, dimicatura contra mures, anguis fœniculi ſucco, urſi laborantes formicas lambunt, palumbes, graculi, merulæ, perdices, lauri foliis, alvi faſtidium purgant, piſces quoque ſi ægrotant apio viridi recreantur, PLINIO prodente *Lib. VIII. cap. XXVII. Lib. XX. cap. II. & AGRIPPA Lib. I. cap. XV. Occult. Philoſ.* Cervi & renovant ſenectutem ſuam comeſtione ſerpentum. Quam miſeriam humanam HIPPOCRATES in *Epist. ad Damag.* ſequentibus verbis haud inepte deploravit: *Homo dum educatur inutilis eſt & alienum auxilium implorat dum creſcit inſipiens protervus, pedagogo indigens dum in vigore eſt, audax dum decreſcit, miſerabilis ubi labores ſuos imprudenter recolit ac jactat.* Quam miſera itaque hominis conditio eſſet, cum omnibus indigeat, niſi ſapientiſſima Divina Mens in fragilitatis, & inopiæ ſubſidium, rectam rationem per quam omnis cognitionis fontem ad quam per naturam adſpirare licet, in ipſius habet poteſtate manusque rerum omnium officioliſſimas operatrices tutatricesque dediſſet, quibus illa quidem omnia utilia, & neceſſaria eligat, diſcernat, diſponat, dirigat, his præparet, efficiat, ac contra irruentes injurias defendat. Hoc enim utiliſſimo inſtrumento, præ omnibus aliis animalibus homo præditus eſt, tanquam quadam prærogativa inſigni & ſi quædam eorum ut e. gr. ſimiliæ eo ſunt quaque ex parte inſtructa; tamen non æque ac ille illud in quosvis uſus dirigere norunt. Unde cautum olim apud Indos teſte STRABONE *Lib. XV. Geogr.* erat, ut morte pœnas lueret, qui artifiſci manum ademiſſet. Noſtrum nam forum ſpectantibus nobis, non omnes illas manuales operationes, quæ in medicina, & chirurgia ad vitæ, ſalutisque uſum comparatæ occurrunt, commemorare, & concelebrare certum ac conſtitutum eſt, ſed illas tantum manuum applicationes explicandas, apud animum decrevimus, quæ per impoſitionem,

& contrectationem factam perficiuntur. Loquuntur de ea Theologi, loquuntur quoque Jure Consulti, nec Philosophi de ea silent, sed singuli de manuum impositione, ejusque significatione atque effectibus varia tradunt. Jure idcirco meritoque Medici quoque habent, per quæ manuum impositionem, ejusque commoda, & efficaciam extollant. Deastris gentiles olim manum quoque consecrabant, imo singulis digitorum singulares deos, deasque præesse, superstitione credebant. Apud Ægyptios Vossio teste *de Physiol. Christ. & Theol. Gentil.* pollex pollentiæ encomio ornatus Veneri, index Marti, medius Saturno, annularis Soli, auricularis Mercurio erant sacri; Omnes Minervæ, alii gentilium consecratos esse volebant, quia vel manu hastam vibrans, penetrabile monstrat acumen, vel quod iisdem omne genus laboris, & industriæ exerceatur. Potiori jure totam manum cum digitis sibi Æsculapius vindicat. Certe in medicina, arte nostra maxime salutari, manus, instrumentum perquam salutare habentur, per quod vel sola manuum impositione, aut attrectatu, aut percussione quadam, qua fibrillæ papillares nervæ in cutem terminatæ, & spiritus in iisdem animales commoventur, secundam tuemur valetudinem, vel adversam depulsis morborum seminibus, atque principiis corrigimus, & reparamus, conversumque succorum vitalium in orbem itum, reditumque, motis averfis, ac eliminatis, qui illum conturbabant causis, instauramus, prout inter veteres pariter, ac recentiores abunde constat.

§. II. Scilicet ut manum huic tractationi admoveamus, modo indigitandum est, quod pars hæc corporis vitalis, vitalitate quadam & singulari exquisitoque tactu gaudens, effectibusque singulis, quæ ab ea sine intermissione procedunt, calore, transpiratione & blando motu singulari multifarias operationes, atque effectus, eosque quidem faciles, utilissimos, & maxime salutare etiam quæ ad artem nostram salutarem, medicinam spectant, perficere possit, atque remedia egregia, eaque potentissima, ac domestica, ac cuivis propria, atque connata, facileque ideo parabilia facillimaque encheiresi applicanda, pauperibus æque ac locupletibus communia, & libera omni tempore, omni loco, omni ferme occasione, omnibus, omnis ætatis, sexus, temperamenti omnisque conditionis hominibus, cita, tuta, ac jucunda, pro lubituque accommodanda, simulque moderanda, afferre.

§. III. Operantur nimirum (ut explicatius paulo hac de re loquamur) sic nudæ manus impositæ, blandeque plus minusque prementes,

& contrectantes sive propriæ sive alterius, suaque beneficia & auxilia conferunt, vel impositione, ac attactu saltem, vel attrectatione, palpatione, digitorum modulatione, ac titillatione, aut pressione, atque compressione paulo fortiori, aut percussione quadam, quæ fibrillæ papillares nervæ, in cutem terminatæ, & spiritus in iisdem animales commoventur atque fomentatione, sive amico naturalique calore, & copiosissimis effluviis temperatis, & salubribus naturæ humanæ admodum congruis, familiaribus, atque assuetis, optimis, tenuibus, humidis (volæ manus magis sudant) & calidis facile se in poros alterius insinuantibus, humidis, æreis, & spirituosis elasticis, quæ dein in alterius corpore, non modo ad exteriora membra, sed & ad interiores partes per circulationem allata, & pertingentia, similem, blandum, temperatumque motum suscitare possunt. Simulque ex eo ulterior, certiorque argumentatio valet; hunc naturalem calorem, hæc vitalia effluvia extus intusque poros partium expandere, hærentes, ac lentos humores expansiva sua virtute dividere, crassiores, subtilizare, dura, rigida & resistentia, flexilia reddere, influxum humorum, & spirituum animalium invitare, transpirationem insensibilem augere, effrenatos motus componere &c. Hæ naturales manuum per impositionem factæ salutares operationes certæ, constitutæque modo nobis sint, quæque suasemet veritate tuentur, & per afferenda hanc in rem exempla clare patebunt. Hinc illa ut minus certa, & evidentia digitoque potius monstrando, ab instituto abeunt, quæ de manuum impositionis supernaturalibus effectibus, aut peculiari per eam sanandi divino miraculosoque dono circumferuntur; quare cum nemine hominum, manus de his conferere volumus sed ea aliorum iudicio potius & explicationi deferimus, ut v. g. de dono, cælitusque in sanctitatis præmium concesso quorundam Angliæ, Galliæ, & Hispaniæ Regum, vid. FORCATVL. *de Gall. Imp. & philos. Polydor. Virgilius. VALDESI de Dign. Regum Hisp. ex Beutero* juxta expellendi dæmones virtutem sanandi per miraculum strumas atque Herculeum morbum, ut Regibus quondam Hungariæ eodem modo curandi regium morbum, CAMERARIO *V. Cent. 3. Medit. historic. Cap. XLII. PICCARTO Dec. I. Observ. histor. polit. Cap. VII. & HAPPELIO memorantibus Relat. Curios. P. I. p. 19.* habetur. Alii referunt Cheruscorum Duces balbutiem, hoc medio ac remedio corexisse atque Flaminiam, Romanam gentem, cœcitatem curasse. MICH. MEDINA *Lib. de Recta in Deum Fide*, citante FIENO, memorat se Salmanticæ puerum quendam novisse, qui sanandi donum se habere, credebatur, quique multos homines solo attactu gravissimis morbis liberabat. De

VALENTINI GREATRAKII Nobilis Hiberni variorum morborum februm omnis generis, cœcitatibus, surditatibus, epilepsiæ, paralyfis, hydro-pum, podagræ & similibus omnem medelam derelectantium curationibus prodigiosis per manuum attactum liber. *Æo. MDCLXVI.* anglico idiomate conscriptus, cujus titulo addita est viri hujus imago, hocque elogio ornata: *Valentin Greatrakes Esq. of Afane in y. contry of Waterford the Kingdom of Irland famous for curing several diseases and distempers by the stroak of his hand only.* Doloribus pertinacibus frictions iteratas adhibebat, easque ad corporis extrema ducebat. Mira sane ac stupenda, quæque propemodum fidem excedunt, de isto viro cœteroquin ingenuo, pio, ab omni fūco aut fallacia alieno quique dotes illas pro dono Dei habebat singularique temperamento adscribebat, medicata manu instructo narrantur; sed hæc saltem innuentes lubenter acquiescimus, neque ulterius explicamus, authoritatisque Collegii Medici Londinensis, Illustris & omnis memoriæ Clarissimo Boyleo, Viro alias in eruendis rebus naturalibus sicut diligenti, ita acriter, interpretem se præbenti non litem facere audemus, sed in medio rem omnino relinquimus. Similia exempla OTTO TACHENIVS in *Dissert. Epist. Æo. MDCLXXVI.* de monacho quodam Franciscano Bagnone, & ANT. BENIVENIVS de *Abdit. Rer. Caus. Cap. XLV.* de Dominico Piscienfi itidem monacho recensent. Recensent autem itidem bini laudati Autores multa prodigiosa, quæ hi duo monachi per manuum impositionem seu attactum in pertinacissimis, atque desperatis morbis perferunt. De alio quodam viro Ripis in Cimbria hoc dono prædito commemorat mira PECHLINVS in *Observat. Physico-Med. Lib. III. Obs. XXXII. p. 490. seq.* Quorumque Clarissimorum Virorum fidem æque suspectam reddere nolumus, aut existimare eosdem confusis digitis non manu (ut locutio proverbialis habetur) rem porrigisse. Interim si nobis liberum sit, hac de re aliquid adferere, aut affirmandi quid necessitatem nobis occasio imponeret, cum experientia fida nobis nondum probaverit, & impressionis, & superstitionis, aut imaginationis, & persuasionis magnæ, sive insignis excitatæ fiduciæ illius, ac spei, quam de remedio aliquo, ac amico atque accepto accepit patiens, ad promovendam & penitus alterandam auxilii efficaciam vi, (quæ sane in multis maxima est) aut ægrotantium, vel sollicitudine, vel spe agitatorum, credulitati (atque quorum spiritus animales languidi sunt, animusque demissus, in quos efficacius vis illa insolens dominatur) potius quam calidis effluviis balsamicis, medicatis & salutaribus ex manibus Regum exhalantibus, aut

alii

aliis modis adscribere mallems, cui etiam alioquin amuletorum, & plurimorum similium efficaciam Medici rationales, quos morbos cum recta ratione curare decet, adscribunt, atque considerantes quantum valeat phantasia ac imaginatio, imaginationis quoque hinc remedia laudant, atque commendant. Sicuti enim fortis imaginatio ægri ex unionis animæ cum corpore, lege ac vi, humorum motum vitiosum alioquin sine medicamentis quandoque corrigit atque emendat, in illis præsertim, in quibus promptus spirituum animalium, ad animæ imperium influxus ipsorumque medicamentorum consuetos effectus immutat atque naturales excretiones moderatur; ita & simili forte modo per fortio rem humorum motum mediante illo contactu strumas tollere potest, æque ac perspectum est, in gravidis, foetus quandoque partes solidas mire sic immutari ipsique nævos imprimi. De singulari seorsim beneficio Galliæ Regum α) strumas sanare PETRVS DE CRÉSCENTIIS Medicus Gal- lus scribit: multoties reges vidisse pro more tangere strumosos, sed qui inde sanatus fuerit vidisse neminem. Quæ qualia sint intelligentibus satis constat, credulitatem, fiduciam atque vividam imaginationem, rebus nihili & ridiculis, pulveribus v. gr. inertibus, nudis schedulis, devora- tis appensisque absurdissimis efficaciam largiri. Conf. LANGIVS de An. Commot. Vi. Med. §. LII. seq. Certius autem erraverit, qui forte vanæ vulgi persuasioni crederet, hanc virtutem sanandi septimo filio matris, quæ filiam antea non peperit ingenitam esse si præsertim sua saliva stru- mas una humectet. Alii peculiari solum doti vel mysterio numeri se- ptenarii adscribunt, ut cum AGRIPPA Lib. II. Cap. III. *Occultæ Philos.* MIZALDVS in *Memorab. Cent. III. No. VI.* perhibet licetque WILLI- SIVS in *Anat. Cerebri Cap. XX.* tales effectus miraculosos, incassum adhi- bitis antea aliis remediis, se ipsum spectasse confiteatur. Antiqua etiam & vulgaris est traditio, quod si bufo, talpa, aut etiam rana tamdiu in manu teneatur, donec moriatur, illam manum, ea efficacia imbui, tactu has aliasque excrescentias abigendi. In hanc causam, huncque effe- ctum refertur, quod de Comitibus Habsburgicis ac Archiducibus sin- gulis Austriæ vid. FELIC. FABRI *Hist. Suec. Lib. I. c. XV.* CRVS. de *Ju- dici.* & LIMNAEVVS habetur, quod si balbutientibus, vel impeditioris linguæ hominibus, osculum figerent, expeditam loquelam impertire pos- sent. His simile est quod SVETONIVS de Vespasiano sequentibus scri- bit: *E plebe quidam luminibus orbatus, item alius debili crure, sedentem pro*
tri-

α) Qui in hac solennitate, strumosos tangentes, hoc eloquio atque voto utuntur:
Rex te tangit, Deus te sanet.

tribunali pariter adierunt, orantes opem valetudinis, demonstratum a Serapide per quietem, restitutum oculos, si inspuiſſet: confirmaturum crus, si dignaretur calce contingere. Cum vix fides eſſet, vim ullo modo ſucceſſuram, ideoque ne experiri quidem auderet: extremo hortantibus amicis, palam pro concione utrumque tentavit, nec eventus deſuit. Per easdem curationes celebrem etiam fuiſſe Illuſtrem Bullionorum in Gallia familiam, ex SCAEVOLAE SAMMERTHANAE *Elog. Lib. V. p. 142. ſeq.* comparet, quæ, (uti perhibetur) quaſi occulta quadam vi, non modo varios corporis morbos ſanavit, ſed & adeo luxata atque fracta, nervosque & artus contuſos, vel quovis modo e fede ſua emotos, repoſuit, atque reſtituit. Quale donum præcipue de Henrico III. Magni, cognomine inſignito multis literarum monumentis, nominatus modo ſcriptor deprædicat. Ejusmodi, eſt, quod oſculis lepra ſanata ſit. De ſimilibus STRABO de Parianis maribus prodit, eos ſerpentum morſibus remedio eſſe, ſi eos continuo attigerint. PLINIVS ſcripſit *Lib. XXVIII. c. III.* quod quorundam hominum tota corpora proſint, ut & de quibusdam familiis quæ erant terrori ſerpentibus & tactu levabant percussoſ, de Pſyllis, Marſis ac Ophiogenibus (ſi credere fas eſt) tradidit. De his & STRABO *Lib. XIII. T. III. p. 880.* ita ſcribit: *Mares eorum (Ophiogenum) medicari ajunt iis, qui a vipera morſi ſunt continenter tangendo, tanquam incantatores ſolent, ac primum in ſe transferre livorem deinde inflammationem etiam dolorem ſedare.* Hiſce ſimile quid, de Pirrho Epirotarum Rege, Achillis filio trahendum, qui (ut traditiones ferunt) pollicis dextri pedis (qui mortuo eo comburi non potuit) tactu melancholiam & febres fugavit. Huc quoque forte pertinere videtur, Poëtarum fabula de Circe, Solis filia, & ob magicam artem, famoſiſſima fœmina, quæ nocere hominibus, & prodeſſe tangendo potuit ut & CARRICHTER ac CONDRONCHIVS malevolorum hominum genus adducunt, quod manuum tactu nocet. Apud Circasſios aniculas, varios corporis morbos, ſolo tactu, ſanare refert TAVERNIER *Itiner. T. I. Lib. III. cap. XII.* Idem de Braſilianis PISO *Hift. Nat. & Med. Lib. II. cap. V.* atque de veteribus Ægyptiis ALPINVS de *Med. Ægypt. Lib. III. cap. XVIII. ſeq.* ſcripſerunt. Ejusmodi admiranda certe in hominibus quandoque viſa ſunt ut & de Samſone legitur in ſacris literis, quod in capillitio mirabilem contineret virtutem, qua adverſis quibuslibet reſiſtere audebat. Alia tam vetera quam recentiora exempla, quæ afferuntur, jam taceamus, & potius modo, vere divinas manus Salvatoris noſtri Domini Jeſu Chriſti & dona divina diſcipulorum ſuorum, Apoſtolorum, qui ſub novi teſtamenti tempore, uti in Sacra Scriptura

Marc.

Marc. l. v. 41. c. V, 23. VI, 5. 32. seq. VIII, 23. & 25. XVI, 18. Luc. IV, 40. XIII, 13. XIV, 4. XXII, 51. Matth. VIII, 3. 15. IX, 29. legimus per manuum impositionem, contactum, aut apprehensionem morbos sanaverunt, pie veneramur & reverenter commemoramus atque deprædicamus; nec aliorum Sanctorum ejusmodi curationes quas per fidem forte miraculosam coelitus concessam perfecerunt ut Antonii, Hilarionis, Apollonii Macarii, Protogenis, Augustini vid. *POSSIDIVS in vita August. Cap. XXIX.* dubias reddamus.

§. IV. Quibus indicatis ex Physiologia modo præsupponimus (longiori enim tractatione ex Anatomicorum theatro Physiologorumque cathedra petita brevitatis studio supersedeamus) quæ ad propositum nostrum magis faciunt, volas manuum præcipue præditas esse cute ordinario tenui, plana, rara, molli ac sensili, porisque patulis, atque apertis, carne calida & humida eaque sat copiosa in monticulos aut pulvillos sparsim evecta, vasisque omnis generis copiosis; nervorum speciatim extremitatibus, nullibi juxta digitorum apices, tam coacervatis; Unde præ multis aliis humani corporis partibus facilius, frequentius, & copiosius sudant ac admodum vegeto atque exquisito sensu gaudent. Tactu, res apicibus, in medio indice tanquam judice & regula internoscendorum quæ in tactum cadunt, collocata (hincque & excellentiore sensu præ reliquis digitis præditus ob arctiorem scilicet quatuor nervorum, quia plexu cervicis eo deducuntur) facile exploramus atque pulsus cordis, atque arteriarum motumque sanguinis, & humorum tam progressivum quam maxime vero intestinum in his percipere, & cognoscere possumus. Apud Medicos in confesso est, febres continuas, ardentes, lentasque hecticas, in quibus motus sanguinis progressivus circularis magis imminutus, & intestinus motus, cujus præsertim effectus calor animalis est, præternaturaliter auctus, secus ac in aliis febribus observatur, ob remissiora symptomata, in principio præcipue difficiles admodum cognitu esse, hincque ægros pariter, ac ipsos Medicos fallere: Etenim in his pulsus naturali aliquantum celerior & mediocris, in volis tantum manuum præcipue observabilis, atque primum non adeo acris, paulo post mordacitas, & ariditas quædam percipitur a tangentibus ibi, & arteriæ calidiores partibus vicinis deprehenduntur.

§. V. His brevissime præmissis atque præsuppositis fiet, ut porrigendo manum hæud inani conjectura affirmemus juxta compressionem plus minusue vehementem quam manus simul inferunt, calorem hinc naturalem tenuem, blandum, æqualem, perennem, humidum, vapo-
rosum,

rosum, spirituosum, æthereum, elasticum, salinum, sulphureum, adeoque activum, & per poros exteriores ad interiores quoque partes pertingentem, naturalique ideo magis familiarem esse, eoque calore utiliorrem, qui a fomentis artificialibus paratur, vel qui a lintheaminibus & pannis calefactis, & mediante igne ad fornacem comparatur, adeoque huncce calorem mediantibus impositis manibus efficacissime, ac utilissime fovere partes, vel proprii, vel alterius corporis, perfrigeratione ac ab acri gelu tactas, in quibus, ut nemo jam ambiguum habet, juvandis, fovendis, blanda & temperatissima saltem fomentatione opus est, ut pororum & tubulorum in membris frigore tactis servetur æqualitas, donec humores intus impediti & coagulati rursus in circulum naturalem redire queant: nam si calidiora nimis mox applicantur, coagulati humores impetuosius resolvuntur, relictis fibris flaccidis ac pene emortuis, interiora versus nimis violento modo moventur, ex quo corrumpi, gangrænaque, imo cito sphacelo affici possunt. Videtur nobis propter aliquam similitudinem juxta ac probationem & illustrationem subjici posse canis lambitum, qui quam utilis sit, non quispiam facile ignoraverit, præsertim in pedum infirmitate atque debilitate, ex ingenti forte dolore, quod & luculento exemplo declarant *Acta Anglorum Philosophica*.

§. VI. Etenim quoniam, ut ante interque manus sunt, (ut ajunt) universa naturæ opera, calore, utpote actione valida ætheris in intestino & vorticoso motu, in partibus sulphureis consistente administrantur; unde & laudatissimum naturæ organon, jam dudum is vocatus est, ita & in corpore nostro vitali insignem caloris usum quotidie deprehendimus: calor fane vitæ & sanitati amicus est, amicissimus vero consimilis vitalis. Hoc mediante pori mixtorum penetrantur, ac commodissime expanduntur, ut per solidarum, nutrimentum apponatur, atque liquores illi roscidi vitales blando fotu humido & calido, vaporoso, spiritoso, elastico, æthereo, atque perenni influente suo, non tantum dissolvuntur, crassiores subtiliores redduntur, inutiles secernuntur & excernuntur, & a congelatione, ad quam alias valde proclives sunt, tutissime vindicantur, sed etiam undæ illorum excitantur, & perpetuo æquali jugique itu & reditu, in debito ordine conservantur, atque adeo duræ, & resistentes solidæ partes flexiles exinde evadunt, quemadmodum digestionem, fermentationem, omnemque solutionem, admoto calore egregie juvari, & animalia, insecta &c. quæ licet per aliquot menses frigore adstrictæ & tanquam mortuæ jacuerint, accedente quocunque tepore, reviviscere cernimus, unde & nullum animal sine calore est, quamvis non

semper sensibili. Quid itaque convenientius & optatius debilibus elanguidis, elumbibusque, ex longis & pertinacibus morbis convalescentibus, frigidis, & senibus, esse potest, quam si manus amicæ suis corporibus iterum iterumque applicentur, & exinde levamen, juvamen, vigorem ac refocillationem, atque caloris imminuti & pene extincti suscitabulum adipiscantur.

§. VII. Quin imo per impositionem & contactum manuum assiduum atque frequentem, eumque, quo subinde tota attingunt & contrectantur corpora, recte valentium & juvenum præcipue (homines enim in pueritia & juventute adhuc constituti, saniores omnino habentur) sanitas aliis quoque communicari potest. Si enim morbi per contactum atque effluvia morbifera intemperata, corrupta, atque maligna certissime propagantur; evidens jam apparet ratio, quod & sanitas per blanda, temperata atque sana effluvia, per calorem animale continuo exhalantia, perque salubrem contactum, proximis efficacius & certius eadem imprimentem & invehentem, ingeri instaurarique queat: Contrarium enim contraria ratio est; Valet & hic præcipue illud adagium: Ex sanitate sanitas: Atque adeo sola conversatio, solusque convictus tam morbos communicat, quam salubritatem conciliat, cujus utriusque rei documenta & exempla a SOCRATE, (qui frequentem adolescentium consuetudinem retardare senectutem, qui per se morbus est, perhibet;) PYTHAGORA, ISOCRATE, GORGIA, ORBILIO, aliisque pluribus Philosophis atque Sophistis, item APVLEIO *Lib. I.* AVL. GELLIO *Noct. Att. Lib. II. c. XXIII.* nec non post eos J. W. ZINCKGRAFIO *Apophthegm. p. 35.* J. V. BEVERWICK *Schatz der Gesundheit p. 754.* a MARS. FICINO *vid. Lib. II. c. XII* BACONE DE VERVLAM. *v. Cent. X. Hist. Nat. §. 942. p. 955. & Histor. Vitæ & M. p. 554.* RAMAZZINO *v. Tr. de Morb. Artif. cap. XIII.* FRANC. RANCHINO *de Morb. Senum S. I. c. VIII.* ipsoque denique GALENO *Method. VII.* aliisque longius jam non adducendis, petantur.

§. VIII. Physica docet inesse etiam moderato calori magnam vim mixti poros intime penetrandi, & expansiva sua virtute partium compagem dissolvendi, quod in chymica arte clarissime videmus, fermentationem nimirum, omnemque solutionem, calore egregie juvari, quod vel in vulgus in fermentatione musti aut farinæ, pro panificio, aut frumentorum ad præparationem spiritus vini, notum est, quod nempe hæ digestionis species leni etiam calore intendantur. Docet quoque & ulterius confirmat, Physiologia medica, influum calorem animale humidum,

dum, spirituosum, æthereum, elasticum, salino-sulphureum, concretorum poros subeuntem, eosque aperientem, in negotio adeo abstruso digestionis & chylicationis in ventriculo & intestinis, omnium aliorum instrumentorum solventium, efficacissimum esse, quo omnino admirari subit, non solum carni, sed & in lupis canibusque, ossium devoratorum magnam quantitatem, intra paucarum horarum spatium penitus solvi, digerique. Demonstrat idem ad oculum Physica experimentalis, quando per machinam Papinianam dictam multifaria concreta, atque adeo durissima ossa emolliuntur, solvuntur & mediante potissimum calore juxta inclusum liquidum, in liquamen chylosum vertuntur. Physiologia pariter docet ventriculo vicina, & adjacentia etiam viscera vitali suo calore, quo gaudent, ut hepar, lien, aliæque partes calidæ, omentum, portio coli intestini, varie flexi & convoluti, quæ ventriculum quoque attingit, calorem vividum subministrare, digestionemque alimentorum adjuvare. Haud dubitanter exinde inferre licet, assiduam manuum impositionem, præcipue bene carnosarum in regione ventriculi, motui ventriculi & intestinorum toti œconomix animali adeo proficuo, commodum juvamen, ad ferre ac in chylicatione læsa, anorexia, dyspepsia, bradypepsia cruditatibusque ventriculi variis collectis, validum & gratum stomachicum externum, emplastris de crusta panis &c. & scutis stomachalibus alias, usitatis, longeque anteferendum, atque haud contemnendum remedium esse, & optimam correctionem. Similiter ab ea in aliis ventriculi & intestinorum morbis & doloribus, ut nausea, ructibus molestis, cardialgia, colica, aliisque doloribus molestissimis ventriculi & intestinorum, in flatibus, ipsaque tympanite aptissimum remedium expectandum. J. N. PECHLINVS *Observat. Phys. Med. Lib. III. Obs. XXX. p. 475.* testatur, & refert se nosse aliquem, qui tumore ventriculi flatulento summe dolorifico vexatus, felicem semper manus impositionem expertus est, & aliis ideo magno quoque emolumento commendare solitus est, atque ab hujus quidem manu, dum ventriculo admovebatur, emanans in superficie cutis serum, qua manus sphaera sese explicavit, doloris causam fugamque opportune significavit. Vel in vulgus notum est, quando ii qui ex cursu velociori, aut flatulentis assumtis alimentis, lacticiiniis, nimis in sinistro latere dolorem pungitivum sentiunt, quem ordinarie lieni, quamvis non adeo apposite, adscribunt, manum super hanc regionem explicant, molliterque premunt, & aliquandiu ibi continent, quod protinus levamen sibi acquirant. Nec non in vomitu, hypercatharsi, singulisque ventris fluxionibus,

bus, diarrhæa, dysenteria, ipsa cholera & iliaca passione adiutorio hoc modo manus esse possunt. Item egregium æque iuvamen promittere licet in affectu illo satis frequenti, a paucissimis tamen descriptio, cardialgico splenetico, barbæ mirachiali, aut mirachia dicto, plethoricis & sanguineis præsertim familiari, moribus & tensionibus in ventriculi regione, & anxietatibus angustis, duritie item & abdominis & inflatulentia, nausea quandoque, imo vomitibus subsequenter se exerente, tandemque in tabidum hecticum statum desinente, a congestione sanguinis circa vasa splenico stomachica, & humoribus acutis & pungitivis secessis oriundo, quatenus nempe per hoc remedii genus partes foveantur, pori aperiuntur, fibræ laxantur, transpiratio insensibilis procuratur, dolores mitigantur, influxus spirituum animalium, & sanguinis promovetur, stasesque auferuntur. Conf. JOEL *Prax. Lib. IV. Sect. II. p. 99.* Simile propemodum remedium est, quod commendatum apud SCHOLZIVM A ROSENAV legitur in *Consil. Med. p. 924.* Hinc & multi pro chylicatione iuvanda optimo etiam consilio catulos abdomini imponere assolent.

§. IX. Ab impositione tali manuum in hanc ventris regionem alia quoque viscera & partes internæ variis morbis non modo inflatione, sed & obstructione ad scirrhescentiam tandem prona, inflammatione, singultu &c. laborantia, ut hepar, ac lien præcipue, & post hæc diaphragma quoque & mesenterium pancreasque sibi medelam, & adiutorium æque promittere possunt. Huc forte trahenda ea sanatio est quam Pyrrhus Achillis filius, Epirotarum Rex, de quo PLVTARCHVS in *hujus vita*, & PLINIVS *Lib. VII. c. II. & XXVIII. c. IV.* videndi: ut ferunt, digitorum dextri pedis vel saltem halli tactu lienosis præstitit. vid. PACICHELLIVS in *Hieroliturg. c. VIII.* Quoniam & hæc abdominis viscera cum suis contentis, adjacentibusque vasis sanguiferis, vena portæ præsertim mali hypochondriaci, partim partem constituunt affectam, partim suppeditant fomitem, manuum applicatio, & pressio hoc præcavere, & curare egregie poterit. Notus Vir quidam literatus est, hoc malo atque adeo melancholica hypochondriaca detentus, qui quoties paroxysmo ejusmodi corripitur, eum valida hac manuum pressione avertere atque auferre assolet. Affinis huic affectui hysterica passio est, affine quoque ipsi hoc remedium erit utroque pollice, quod dicitur, commendandum. Imo in ipso scorbuto, universali illo malo, quod secundum nostram quidem opinionem a vitio quoque horum viscerum, & exinde proveniente excrementorum copia ab emunctoriis depurati-

oni sanguinis inservientibus obstructis derivandum est, contrectatio talis per manus totius abdominis & laterum diuturna, facile validumque remedium non sine causa habenda est.

§. X. Ut chylicationem sic faciliat hoc remedii genus, ita & quæ hanc sequitur functionem animale, nutritionem nimirum, quæ cum vita pari passu ambulat, adjuvat, quod lymphaticum succum utilem ac aptum, qui generato animali vitam, perfectionem, conservationem atque integritatem præstat, accersit & actuat, partesque nutriendas disponit, ut eædem in iusta quantitate, qualitate, atque mutua agendi habitudine serventur. Quid itaque membris nutritione imminuta, & forte etiam depravata laborantibus, paralyti, hemiplegia affectis, atque hinc marcescentibus, tabeque consumptis, rachitide vitiatis, utilius afferri potest, quam si nativo ejusmodi calore foveantur? cum nostro coincidit illud a Damasceno paralyticis propositum, ut nempe puerum carnosum aut puellam sibi habeant accubantem.

§. XI. Doloribus singulæ corporis humani partes subjectæ sunt, singulæ quoque manibus sic applicatis subjici, & solatium mulcedinem, atque levamen exinde accipere possunt. Ad hanc rem notatu dignum est, dolores partes excruciantes manus ipsas monstrare, forteque ad hoc remedii genus applicandum admonere, unde adagium illud natum: Ubi dolor, ibi manus: Fit enim a naturali hominum consuetudine, ut ei corporis parti, quæ dolet, frequenter manus admoveant: Equidem ad hoc dictum etiam refert animum advertere, quod sæpe noxia & periculosa sit frequens illa dolentium partium per manus, præsertim digitos, contrectatio, frictio, & irritatio, quoniam humorum affluxus ad has partes, intumescencia, major pruritus, imo inflammatio ex facili, ordinario exinde concitantur. Præcipue vulnera & ulcera, partesque spongiosæ & glandulosæ, & admodum sensiles, dolentes vix, ac ne vix quidem ejusmodi frequentem contrectationem ferunt, quibus ideo cum cura ab ea abstinendum est; unde etiam quædam ulcerum species, noli me tangere, audit, potiusque valent ea dicteria: manum de tabula, atque: sustine & abstine: At alia utique res est, atque exceptionem patitur, explicationemque requirit crebrius digitis contrectare, & sic irritare partes dolentes, alia rursus blanda manuum impositione, easdem fovere atque mulcere; tantum enim abest, ut malum ejusmodi fomentum augeat, ut potius leniat, atque corrigat. Ad dolores certe leniendos æqualis per manus pressio contrario nisu, & calidum humidum vaporosum, quod continuo ex manibus præcipue earum volis per tran-

spirationem insensibilem effluit, admodum proficuum est, quoniam nimiam fibrarum hanc præternaturalem expansionem ac rigiditatem exinde inductam, in pristinum & meliorem statum modumque reducit; demulcet, atque compescit simulque moderatum spirituum animalium influxum, in nervos ac membranas, procurat. Certius securiusque ideo hoc remedii genus applicandum etiam paulo fortius premendo nimirum, illis partibus dolentibus erit, quæ ossa subiecta habent, quæque profundius latent, cuius rei plurima exempla esse possunt, cephalalgia, earumque variæ species, a quavis etiam causa exortæ sint, hemicrania &c. In harum censu non omittimus inter omisso affectus ab ARNOLDO BOOTIO relatum v. *Observ. de Affect. Omis. Cap. IV.* futurarum capitis discessionem Hibernis admodum familiarem, quæ immanem dolorem affert, adversus quam nullum præsentius auxilium, quam a manu comprimente excogitari potest, ut etiam sua experientia comprobat aliquoties jam laudatus IOH. NIC. PECHLINVS in *Observ. Phys. Med. Lib. III. obs. XXX. p. 475.* Inter hæc porro memorandæ, odontalgia (de cuius curatione de se ipso Cardanus singularia recenset) otalgia, ophthalmia, ut & dolores pleuritici, sive illi a vero, sive spurio morbo laterali procedant. Memorandum inter exempla huius rei, quod apud Sinapium legitur: Hæc de motu, inquit, meditati occurrit mihi memoria Abbatis certi, quo cum mihi ante paucos annos non parva intercessit familiaritas & consuetudo: Prædictus nempe Abbas sæpius conquerebatur se puncturis laterum inprimis sinistri divexari, quas ipse non alio remedio se discutere, mihi narrabat, quam iterata, pugnoque inflicta forti percussione, tandemque longa frictione loci dolentis. Suadebam autem eidem Abbati, qui sæpius etiam podagricis fatigabatur doloribus, ut fastibus adventantem exciperet podagram, sed ipse negabat consequentiam circa remedii paritatem. Addenda & sequens observatio a GEORGIO BAGLIVIO, maximæ inter medicos existimationis viro, in eleganti *de fibra matrice tract. Spec. Lib. I. p. 283.* relata; de vetula dira asthma cum tussi continua laborante, quæ quoties manibus fortiter verticem capitis comprimebat, toties cessabant statim, pro tempore, quo durabat compressio & asthma & tussis catarrhosa; statim vero ac manus auferebat iidem morbi denuo redibant & si pluries in die eadem succedebant autumatque hac pressione roborari pericranium & successive duram matrem ejusque originem, quo addito robore & tono duræ matris melius dirigerentur liquidorum motus in partibus inferioribus sicque hæc mala cessarent, simulque cerata roborantia capiti applicanda in variis ejusmodi

modi morbis commendat. Doloribus item, quos flatus per intestina oberrantes creant, nec non de nephriticis idem sentiendum. Similiter in iis, a calculo vesicæ gravissimis procedentibus tormentis, diuque trahentibus, & quibusdam intervallis sæpius recurrentibus in colis blanda contrectatione, remedium miseri patientes quærunt, & sæpissime inveniunt; is præcipue, qui colis glandem contorquet dolor, speciatim vix ab alio remedio, quam assiduo manuum tactu, pressione, & extensione, molli-demulcetur. Atque in aliis, aliarumque partium, artuum, articulorumque doloribus & arthriticis vagis fixisque, catarrhalibus, rheumaticis & ischiaticis hoc commendandum auxilium venit; Hæc enim medica manuum continua impositio æque feliciter fotu suo naturali, & consimili humorem dolores inferentem discussoria vi digerere, atque absorbere potest, ac catelli membris sic affectis appositi, quam appositionem tamen horum animalium multis nominibus laudant experti. *Acta Philos. Angl. A. MDCLXVI. Mense Majo No. VI.* mentionem faciunt fabri cujusdam ferrarii, qui non solum medica quasi sua manu vomitum demulsa ventriculi regione, ventremque laxam concitavit, sed & arthritidem sustulit, doloresque aliorum membrorum compescuit.

§. XII. Si itaque dolores sedat manuum impositio, pressio & per eam facta fomentatio, haud obscure quoque hinc inferendum est, quod spasmis manuum præcipue, & pedum doloris quandam speciem inferentibus, medeatur eadem. De his enim constat, quod alia fomenta egregia contra hæc atque similia mala remedio sint v. g. practici tanquam infallibile remedium proponunt, atque præcipiunt, ut partes spasmō affectæ pannis calefactis & foveantur, & leniter fricentur, aut ut in animalis cujusdam modo mactati, ac adhuc calidi ventrem trudentur, & tamdiu ibi detineantur, donec calor natus mactatæ bestię, penitus evanescat, siquidem sunt, qui perhibent, fuisse Principes qui triginta & quadraginta mulorum impendio, sic mortis discrimen depulerint. V. BARTH. MARANTA in *Metb. cogn. simpl. Lib. III. cap. XI.* & COLLENTIVS *Hist. Neapol. Lib. V.* de Ladislao Rege sic curato. Vel modo detracta & calente adhuc pelle agnina, vervecina, leporina &c. involvantur, vel columbæ, aut gallinæ femi. mortuæ transcissæ imponantur. Hic commemorare licet, quod ALEX. TRALLIANVS *Lib. VI. cap. XIII.* & BARICELLVS *Hort. Genial. p. 137.* testantur, singultum contrectatione, tensione & compressione digitorum sedari.

§. XIII. Certum namque est, quod & humores lenti pertinaces alicubi in corpore hærentes, situque peccantes, molestiamque creantes
in

in hydrope, anasarca, œdemate potenter fatis discutiantur, dividantur, atque promoveantur, si nempe pressione præcipue fortiori, auctaque, atque assidua manus, & digiti iteratis tactibus, atque tactibus sic operentur. Etenim hoc medio, ac remedio isti sursum, deorsumque, atque de loco ad locum, & a nobilioribus membris ad ignobiliora tandem ipsa corporis extrema cum exoptato effectu derivantur. Certe, sæpe pro desperatis habiti morbi sanati fuerunt sola leni compressione vasorum, quæ impedit, ne vasa nimis debilia distendantur nimium, a fluidis contentis. Quoniam vasorum capacitas non a solo liquido distendente sed ab excessu hujus super vasorum resistantiam, pendet: Sed quo magis fibræ extenduntur eo etiam magis debilitantur, hinc patet, quod omne illud, quod distractionem fibrarum impedit, causam debilitantem tollat. Nota nobis foemina in vicino quodam oppido est, quæ omni asseveratione affirmat, quod catarrhos, pandiculationes molestas, quibus persæpe in scapulis maxime se exerentibus vexari solet, sola, & successiva manuum impositione, & pressione a scapulis ad brachia, & si per dorsi tractum descendant per humeros crura, surasque feliciter deturbare, evocareque posset. Imo si iidem ipsique impacti humores ac tumores alibi exinde jam facti, ut sunt tubercula, strumæ colli, mammarum &c. talpa sive tumor ille, qui sub puerorum capitis cute tanquam sub telluris cortice serpere solet, ut & ex motu, contritu, aut contactu rei fervidæ, in cute excitatæ vesiculæ, illique minores tumores, quos papularum titulo comprehendit GALENVS *Lib. III. de Symp. Caus. Cap. II.* impositæ, foventes prementesque manus impense conferunt. Pariter in paronychia, parotide, levamen haud vile hoc remedium afferre potest. Imo si humores alicubi impacti ad scirrhescentiam tendunt, iterato manuum tactu, & pressione, medelam acquirunt. Sique tales tumores obstinati sunt, & maturationem detrectant, quam tamen intendunt medentes, diutius admotæ manus puris generationem apprime faciilitant & provocant, posthabitis omnibus emplastris digestivis. Legatur hic in testimonium haud rejiciendum, ea dolentium tumorum cura, cujus mentionem facit BARTHOLINVS in *Act. Hassn. Vol. V. Observ. 126.* quod nimirum virum quendam viderit, qui quoscunque exteriores corporis dolentes tumores pugnīs vehementioribus partibus dolentibus, & tumentibus adactis domare, & abigere scivit, ut quasi fustibus tractati molles fiant magis, quam ullis emplastris. Modus evellendi verrucas, artificibus quibusdam familiaris est, quo manuum tractatione eas tam diu emolliunt & terunt usque dum penitus evellantur. Similiter tu-
morem

morem aneurismaticum loco ligaturarum nuda saltem manus atque digitorum applicatione & pressione abigere conati sunt alii atque horum ope non solum talis tumoris augmentum inhibiturum *TVLPIVS Lib. IV. Observ. XVII.* penitus autem sublatum fuisse *DOLAEVS V. Encycl. Chir. Rat. Lib. V. cap. XII.* asserunt. Forte etiam ulcera sanorum hominum manus imposita mitibus, temperatis, balsamicis suis præcipue effluviis sanare, ac pressione inhærens depascensque pus exprimere valebunt; Inde etiam hariolari licet, palpitationem cordis a stimulatione & irritatione ortam ad quas præternaturales commotiones, tumores circa mediastinum, & pericardium aut serum congelatum circa cor in hypochondriacis, melancholicis præsertim inveniendum, occasionem, & causam præbere solent, manuum supra pectus, & scrobiculum cordis assiduam impositionem sedare posse, quoniam in hunc finem sacculi, & cataplasmata a practicis nec sine ullo prorsus quandoque effectu admoventur solent.

§. XIV. Facilius, certiusque hinc ecchymomata, sive sugillationes & vibices ex contusione, compressione, vulneratione factæ, si manus imponantur, diutiusque ibi servantur, corriguntur: nam sanguis circa cutem in tenuibus venis contusis effusus facile sic discutitur. Hanc manuum impositionem, & detentionem ordinario Præses commendare solet iis, qui venæ sectionem admiserunt, & ex vulnere inflicto tali ecchymomate notati, & dolore, & spasmo quodam vexati sunt, brevi enim temporis spatio & spasmus minuitur, & dolor sedatur, livorque abigitur.

§. XV. Longius hanc rem perpendentes si procedere velimus, & ulterius quædam commemorare, quæ subinde ad manus veniunt, opinio haud falleret, multo plures morbi per manuum impositionem posse curari; In præsens modo pro cuiusvis placito expendendum proponamus, quanta & qualia subinde mala, a transpiratione insensibili per poros cutis, eveniant, inter quæ primaria & frequentissima, generisque hominum inimicissima, febres omnis generis sunt; Aptissimum vero remedium est, hanc necessariam, & maxime proficuum excretionem, revocare, augere, & promoveri manuum impositio, & undique applicatio, atque per eam restitutam ac intensam adeo, multa adeoque perniciosissima mala aut præcavere, & avertere, aut facta jam ac inducta depellere, atque curare. Non plane adhuc hic silendus est manuum & digitorum, quem simul res & occasio offert, usus, quem præstent, in vasis majoribus sanguiferis utut arteriæ illa sint, corporis fauciatis; quid enim

notius est, vel solius interdum digiti admotione, & compressione vulnus occludi, & constrictione sic actuali ostiola transmittentium vasorum sanguiferorum obturari parietesque vasorum adduci, atque hæmorrhagia sisti, ex tempore quasi & efficacissime posse; Commemorandus simul is usus est, qui in reducendis herniis habetur. Ad hæc ad manus quoque venit, quod vulgo quoque non ignotum est, uvulæ prolapsum, quem vocant i. e. ejusdem intumescentiam, & relaxationem per manum in collo contrectatione, & sursum ductione in pristinum, sanumque statum restitui. Hoc quoque qui nesciant opinamur paucissimos esse, iis, quibus ob avidissime deglutitum cibum, aut potum affatim haustum, ac de quibus vulgo dicitur: *Es ware ihnen etwas in die unrechte Kehle gekommen*, & occlusam inde gulam, suffocatio imminet, dorsi percussione iteratam per manus prodesse. Perinde periculosius tussientibus, atque phthisicis, infarctu pulmonum laborantibus, iisque, qui hinc pituitam tenacem e pectore difficulter excernunt, hanc dorsi percussione apprime conducere, ulterior argumentatio valet. Sic C. CELSVS *de Med. Lib. III. cap. XXII.* præcipit ut in phthisi thorax leniter manu pertractetur. Quam proficuæ puerperis ad felicem partum obtinendum tales manuum contrectationes esse solent, legendum sistamus, quod TH. BARTHOLINVS scripsit *Cent. VI. Histor. Anatom. 83.* Novi in Gallia puerperas, quæ feliciter etiam, vivos foetus enituntur compressione externa, manuum propriarum, qua blande ad exitum propellunt embrionem, & ita sine aliarum mulierum auxilio, brevi ipsæ negotium susceptum conficiunt. Hæc apud CODRONCHIVM *Lib. III. de morb. venef. Cap. V.* lectio est, impotentiam virilem, in juvene quodam, manus veneficæ interioribus femorum attactu, esse solutam. Plura forte possemus circa hanc ipsam rem in medium afferre, si diutius huic contemplationi inhærere volupe esset, sed ulterius hunc penum instruendi animum curatius advertentibus relinquamus, ac sedulo commendamus, satisque habeamus esse hic aliqua, esse saltem primaria hujus rei momenta & documenta: Quare & non seorsim tangamus percussione ope manuum, impetum quo dislocationem maxillæ inferioris restituere, frontis contusione, alarum & colaphorum inflictione, dentium dolorem, febres aliosque morbos abigere, foetum mortuum ex utero expellere atque alibi humores exagitare &c. satagunt, qua de re PAVLLINI in *Flagello salutis Sect. IV. Cap. VI. & Cap. I.* TH. BARTHOLINVS *Cent. VI. Histor. 83.* G. FRANCKENAV in *Diff. de Alap. & Colaph. Ephem. G. N. C. D. III. A. II. obs. 202.* HAPPELIVS in *Relat. Curios. P. I. p. 20.* legendi sunt.

§. XVI. Hucusque emolumenta quædam attulimus, quæ manus vivi, valentisque hominis conciliare poterunt; nunc novissimum id modo superesse videtur, ut summam manum huic tractationi addituri, brevi manu tradamus, quæ de mortui manus aut digitorum saltem attactus conferat. Nimirum non modo pervulgata opinio est, sed & experientia haud simplici vice comprobavit, omnis generis in summa cute excrescentias sarcomata, hordeola, nævos maternos, verrucas, scrophulas, clavos digitorum, manuum & pedum, atque adeo strumas solo attactu aut confrictu mortui manus, auferri. Siquidem ex. gr. in *Actis Philos. A. MDCLXVI. Mense Majo* legitur strumas maximas periculosas, per duos tresve annos molestissimas, manus tandem hominis mortui applicatione fuisse curatos alia exempla BLANCKART. in *Collect. phys. med. P. I. p. 556.* Idem de brachio Ludovici IX. Galliarum Regis, qui in Cataloniæ quodam oppido, Poblete dicto, monstratur FORCATVL. de *Gall. Imper. & philosoph. refert*; ut & hæmorrhoidum ac de herniis, schirrhis & similibus WEDELIVS in *Physiolog. Med. p. 189. seq.* refert, se nosse quendam, ab excrescentia palpebrarum ingentis magnitudinis phthificæ defunctæ manus applicatione & affricu solo fuisse curatum. Ut plura jam alia testimonia taceamus. Præsertim persuasione quadam ducti, manum morbo aliquo chronico & emaciantem maxime omnium phthisi demortui, pro hoc scopo eligunt. Qualis equidem effectus si respondet successus, non tam tactui, aut effluviis, quæ intestino & circulari fluidorum corporis humani cessantibus motibus & corpore emortuo & frigido paucissima vixque sufficientia esse possunt, aut frigori, quod infert mortua manus & per hoc illatam spasmodicam contractionem, alias glaciei frustum præferendum esset, aut magnetismo aliquo aut sali mumiali resolutione sanguinis & coacta Archei expulsionem, in extremis partibus effuso, quam fiduciæ, phantasie aut imaginationis potius viribus, quæ sane permagnæ sunt & magis adhuc excrescentiæ, quam exinde concipiunt contacti, me quidem iudice tribuendus esset. Quo magis enim teneriores, delicatuli, creduli, ad imaginandum faciles, timidi, aut quo magis horrent manum mortuam attacti, eo promptior est speratus effectus, nec nos ratio fugit, animam quæ sensu aut dissensu, motum spirituum animalium & humorum moderatur & determinat, eorum affluxum ad partem obsessam atque affectam inhibere, ut eadem alimento necessario destituatur, viis & vasculis, quibus alimentum defertur, tono fortiori acquisito, valida constrictione compressis, hincque exarescant ac sensim separentur imminuantur & decidant, Neque hinc in ista averfatione anima-

lium spirituum retractio, quod vulgo perhibent, hic in causa est, sed potius molesta sensatio atque hinc oriunda indignatio: illas enim non tam retrahi quam validiori motu influere spasmodi affectus, vomitus & similia accidentia testantur. Atque opinamur illud qui nesciat facile neminem esse, ac in semetipso quemvis id exploratum habere, oblatis aliquin alimentis valde gratis & suavioribus urgente sic fame a præsentia & conspectu illorum salivam moveri, adeo ut copiosior in buccam confluat, quin & interdum ex ore longius & velut cum impetu quodam profiliat; e contrario vero quando cibi ingrati aut minus saporis aut sola satietate tædiosi diu etiam in ore & quam maxime masticando convolvuntur, deficere tamen salivæ confluxum, ut vel propterea deglutiri facile non possint, sed & vel in faucibus hæreant. Tales effectus & alibi videmus, quando e. g. ferrum ignitum, ex improvviso præcipue affertur graviores etiam hæmorrhagiæ, ex terrore, aut exhorrescentia exinde concepta, extemplo compescuntur, atque sistuntur, etiamsi ferrum corpus non attingat, quatenus effrenes humorum motus ad partem affectam prohibentur. Longe plures in aliis effectus toto die experimur, qui de animæ in corpus imperio, deque vitiosorum motuum sine medicamentis correctione, de naturalium corporis excretionum determinatione, & moderatione, de medicamentorum, effectuumque immutatione, de navorum foetui impressione &c. clare testantur. Quidam hoc quoque edocent salacitatem nimiam, & vix compescibilem satyriasin, immo etiam priapismum per huncce contactum compesci. Nota nobis observatio est de viro quodam, qui cum sarcocoele affectum se videret, contactu manus mortuæ illam tollere curavit, quod quidem ita successit, ut herniosus tumor evanesceret; sed ei frigiditas, & sterilitas quorundam antea liberorum patri, successit. Sed manum de tabula.





XVI.
DISSERTATIO MEDICA
DE
LIGATURIS DOLORIFICIS.

PROOEMIUM.

Vix ferendæ, sed iusta indignatione castigandæ, optimo jure meritoque istæ in medicos & chirurgos criminationes, quibus non modo ignara atque inepta ples ad judicandum tamen præceps, sed & alii iniqui atque malevoli nostrorum quidam hominum censores frivole atque inepte satis in bonos invehuntur, (siquidem si ullus artifex judicio hominum expositus est, certe medici & chirurgi sunt) quod salutarem artem, medicinam, non modo incertam illiberalem illam, resarcitoriam &c. sed & harum artium salutarium cultores, audaces, temerarios, elatos atque Thraſones, appellitent. Sannæ vero eæ omnium sunt gravissimæ quibus eos impetunt contemptumque adducere tentant, scelesti cavillatores, quod propter chirurgicos saltem quosdam cruciatus (operationes enim chirurgicæ, si non omnes at certe pleræque non peraguntur sine comite dolore) ipso morbo graviores viſos quique præ iis omnis carnificum supellex sæpe doloris faciat minus, quos infelicibus patientibus magno instrumentorum apparatu comparato, quorumque necdum satietas, vinciendo, ligando, stringendo, rodendo, pungendo, terebrandō, ferrando, consuendo, secando, amputando, inflictis vulneribus vulnera nova addendo (a quo ipse jam Hippocrates non abhorruit) eaque dilatando ac ampliando atque urendo quandoque inferre habent necesse, asperas facetias evomant; Siquidem non modo remedia hæc inventa carnificum esse, latronibus magis quam ægrotantibus applicanda, magna audacia asserunt, sed & medicis laudentibus atque injungentibus ac chirurgis operantibus curiosaque licentia grassantibus quasi nihil aliud quam vulnera aut verbera peterent atque ex suppliciis ancipitem lucrarentur salutem barbaricaque misericordia uterentur ac lanionum ideo tortorum atque adeo carnificum

cum titulum, ignominiae maculam crudelitatisque notam pessime imponunt atque inurunt, ideoque vatiniano prorsus odio eosdem prosequuntur. Haud enim scio, an quid indignius de nostris hominibus qui omnibus divitibus non modo, sed & egenis & elogio etiam Senecae sceleratis citra moralein quae ob stare posset rationem, ex æquo sua dispensant bona & operas promptas atque paratas (non loquor de tonsoribus, balneatoribus, circumforaneis, seplasiariis & hujus facis aliis pluribus, qui artem nonnisi in tormentum generis humani exercere videntur) effutiri potuerit; inter quos praecipue medium digitum (ut ajunt) monstremus, Henr. Cornel. Agrippae, homini supra modum maledico ac nimia culpandaque licentia famoso, quam sibi audacter sumsit, in omnes prope modum, artes & scientias aut disciplinas laudabiles colentes atque exercentes, qui sarcastice medicinam homicidiorum artem nuncupat. Ideo etiam non admodum collaudandus severus ille censor Marcus Cato, qui hanc quoque ob rationem lege caveret, ne Medicus Graecus aut Arabs Aegyptiusque Romam (cujus incolae molli elatiorique animo contacti corruptique erant, qui nihil quicquam barbaris acceptum ferre voluerant) intraret, quoniam a saevitia & crudelitate, quam vocabat, medentium abhorreret, qui morbos urendo ac secando ad sanitatem perducere conabantur, atque vulnerarios ideo atque adeo carnifices vocavit nec graviora esse carnificum tormenta, quam interdum cruciamenta eorum dixit, filiumque ut ab universis sibi caveret, monuit. Hinc & PRUDENTIVS scribit:

*Horretis omnes hasce carnificum manus,
Num mitiores sunt manus medentium,
Laniena quando saevit Hippocratica?
Vivum secatur viscus, & recens cruor
Scalpella tingit, dum putredo abraditur.*

Ad quod occasionem dedisse Archagatum videtur, qui primus fuit Romae medicus circa annum DXXXV. post urbem R. conditam, qui simul fuit chirurgus; sed quia in ægrotos crudelem se gessit vocatus est carnifex ut POLYDORVS VIRGILIUS *de Invent. rer. Lib. II. cap. XX. p. 63.* habet. Nec tolerandum PRIMEROSII, qui *de error. vulg.* scripsit *Lib. I. cap. XVII.* effatum, quo artem medicam esse quidem eam, omnium praestantissimam non tamen liberalem dixit, quo etiam non abludit CARDANVS *de Libris propr. p. 77.* servilem eam esse affirmans, laboribus plenam

nam ingenuoque homine indignam. Scribenti hoc mihi in mentem incidit querela (alioquin sat judicioſa) quam de chirurgis Indi duxerunt & his verbis conceptam legi *dans les Memoires DE MONS. LE COMTE p. 306.* *On vous traite en Europe avec le fer, icy on nous martirifire avec le feu; la mode aparement n'en changera pas parceque les mediciens ne ſentent pas le mal, qu'ils nous font, & qui ne ſont pas moins bien payés, pour nous tourmenter, que pour nous querir.* At hortatur nos ac monet medicinæ Parens HIPPOCRATES noſter, *vid. Sect. 1. Aphor. extremis morbis extrema remedia tanquam optima admove.* Certe ſic dementia eſt, putare damna, quæ ſunt remedia. Nam quamvis ad tria illa attendere jubeatur medicus miſeriæ humanæ contemplator, quæ Aſclepiades, Pruſienſis medicorum eloquentiſſimus docente GALENO *Meth. Lib. XIV. cap. XV.* commendavit, nempe ut cito tuto & jucunde (i. e. ſine dolore, ſine moleſtia inſigni, omnia vitando quæcunque vel animum perturbent, vel ſenſus ejus offendant, potius exhilarent atque delectent) curet: etiam quivis bonus & prudens principia morbi nullo impetu, vel ſola abſtinentia corrigat, ſubducatur ex quotidiana conſuetudine quædam, magis noxia etiam comminiſcatur inſtrumenta ad vulnerandum requiſita, quæ minus ſunt formidabilia &c. eſt tamen inquam interdum, ubi neceſſitas, legis expers, ab hac regula deſlectere jubet, & ut de vita & ſanitate proximi laborantis conſulat, atque magnis morbis magnis remediis obviam iturus nihilque intentatum relicturus, utilitatem potius quam delicias ſpectando, ægrum tractet aliquando durius, atque adeo ab ipſa remediorum crudelitate in morbis crudelibus quandoque ſolamen ſperet, vel ad gaudia ſalutis excruciet. (ut Caſſiodorus loquitur.) Secundum enim illud dictum: crudelem medicum horridiore medela ejulatus ac vociferationes etiam ægri planiſſime ſuſque deque habentem intemperans æger facit. Et quid aliud ſibi volunt veſicatoria, frictiones fortiores atque ſimilia, quam ut oborto novo dolore illoque acuto priſtinus dolor ſpaſmodicus nervos infeſtans a natura non amplius advertatur. Et quid de aliis dicamus: ut de dentium evulſione quam violentam inter tormentorum genera relata fuiſſe, teſtantur B. Blaſius & S. Apollonia poſſent &c. Inter illa quoque dolorifica & ægris ſæpe moleſta atque felici effectu atque eventu comprobata atque a veteribus multis, inter quos Eraſiſtratus eſt anteſignanus paſſim collaudata atque commendata remedia ſunt quoque ligaturæ dolorificæ, non veſana certe remedia, & de quibus dici illud poteſt: perfer & obtura, dolor hic tibi proderit olim. quæ pro exercitio diſputatorio nobis argumentum ſelegimus, quod ut æquis

æquis A. L. oculis intuearis, enixe contendimus. His vero conatibus Deus T.O. M. exoptatum eventum largiatur, & faxit, ut cedant in nominis suigloriam, Nobilissimæ Artis Medicæ incrementum plurimorumque ægrotantium desideratam salutem.

§. I. **E**quidem ligaturarum usus hisce temporibus multum evanuit, & quod ab illis multi expectant non faciunt. Nostri vero census ligaturæ sunt, quæ variis corporis humani partibus, artubus, brachiis, cruribus, pedibus, manibus, digitis fortius stringendo applicantur, ut etiam dolores afferant, ac ut per illam ipsam fortiolem strictionem & dolorem, quem efficiunt, varia commoda atque salutares effectus simul concilient. Hæ sive latæ sive minustales & contortæ rotundæque magis sint ex linteamine, panno, corio, filis sericis, laneis, cannabinis, inter se contortis conficiuntur, quæ dein sub nomine fasciarum, ligamentorum, funiculorum, cingulorum veniunt, & ita partibus corporis exterioribus, artubus, brachiis, manibus, digitis, femoribus atque coxis & pedibus applicantur, ut forti manu arcte constringantur, atque undique membrum cingant, ac sensibilissime afficiant, ut ultra injectam ligaturam nullibi arteriarum pulsus percipiatur, moxque elapso paucò quodam temporis spatio relaxentur, sæpiusque sic per vices repetentur, ut partes non modo intumescant paululum, sed etiam rubeant notabilius & dolore quodam afficiantur.

§. II. Applicantur hæ ligaturæ & partibus in unitate solutis & integris, prout necessitas exigit, quando nimirum quod præter naturam neque decenti naturalique modo & loco se habet movendum & removendum venit, unde varii formantur scopi, varii spectantur effectus atque præcipue, ut attrahant, sedent, excitent, stimulent, derivent, divertant, revellant, (venia igitur sit horum nominum, nam non prorsus inania illa sunt) atque cohibeant, intercipient. Licet enim eadem, eo quo veteribus placuit modo, stante humorum circulatione Guil. Harvæi diligentia patefacta, non fiant, juvant tamen ea dum partem affectam ab irruentis impetu concitatori ejusque quadantenus collectione vindicant, & ab opprimentis, turgentis ac furibundi gravamine liberant, nec non lympham commovent, poros cutis referant, calefaciunt, dissipant, discutiunt humores atque excernunt & auferunt, cutem rarefaciunt, poros & glandulas subcutaneas aperiunt, torpidum sanguinem fluxiliorem reddunt, atque majorem affluxum excitant. Ad tales effectus certius producendos hoc remediorum genus per ipsum rem

rum usum commendatum validum est, quam quod maxime & omnibus requisitis gaudens, quæ in hoc genere desiderari possunt, atque simul euporiston & domesticum, facile & sine sumptibus & impensis parabile exiguoque apparatu comparandum, sineque magna arte ac opere perficiendum. Non modo hinc utilissimum, sed & sæpius maxime necessarium est, quodque celeriter juvat, sique ad repellendos morbos omnes insufficiens solum sit, suum tamen ubique addit symbolum haud contemnendum, aliisque internis assumtis auxiliatrices quasi manus porrigit.

§. III. Hi singuli effectus ex strictione, attritu & pressione subsequente, ex dolore & ardore clare fluunt, quando enim per ligaturas fortiter applicatas ut alibi per unctiones ferro candenti, frictiones, cucurbitulas simplices & scarificatas, dropaces, sinapismos, urticationes vesicantia & similia stimulum quendam notabilem inferentia partium subjectarum tota compages & in ea cutis muscoli omnesque contenti canales, vasa sanguifera, nervi omniaque reliqua organa secretoria & excretoria, glandulæ earumque ductus excretorii valide sic premuntur, omnes canales angustantur, qua angustatione materia inibi contenta & forte morbifica efficaciter exprimitur, simulque in vicinis undique partibus sanguis atque humores ad canales subinde angustiores adacti, atque vi quadam compulsi, expressione ibi adhuc majori facta horum motus a liquidis in solida & a solidis in liquida mutua actione & reactione, magis acceleratur, compages illorum dividitur, discontinuatur, subtilior & fluidior redditur, atque sic etiam quod hæret liquidi aut crassioris lentis, inertis aut difficilius movetur in canaliculis quibusvis subtilissimis, poris, vasculis, fibris, glandulis, dimovetur, abripitur, derivatur, secedit & foras excernitur.

Ea enim quæ moventur magis adhuc quæ sic conteruntur, attenuantur. Hæc ut expeditius instituantur, adjuvat tonus atque elater partium maxime solidarum, qui hoc modo strictior, auctior & validior redditur, allectis spiritibus animalibus sensum motumque præstantibus, qui eas animant ac excitant, quæ operatio in aliqua parte facta, longe lateque deinceps extenditur: Ea enim partium totius humani corporis atque præcipue motus fluidorum sanguinisque circuli, ut & ipsarum solidarum quas fibræ carneæ, membranæ nervosæ componunt in partibus consensio est, ut si una earum afficitur, tenditur, stimulatur, vellicatur, aut motus acceleratur, in aliis quoque subinde partibus motus quoque auctior contingat, & in universa sanguinis & humorum massâ, motus & circuitus quoque intensior fiat, ut vel a manuum saltem fortiori frictione id eve-

nire comperimus, & sic quivis in seipso sentiet, pedibus, quæ extremæ corporis partes sunt, calidis servatis totum corpus incallescere. Ex hac sane consensione, multi & varii peregrini & mirandi sæpe effectus proficiuntur. Hæc & alia efficacius adhuc dolor exinde excitatus efficit. Hinc orgasmum notabilem mox patitur universa sanguinis massa, cor vehementius atque frequentius ad sui contractionem adigitur, & si augmentur & ingravescunt præter modum, multis pessimis symptomatibus, magnis fluxionibus & uberiorum humorum, ad imbecilles partes affluxu, inflammatione, gangræna ipsoque sphacelo corripitur atque corrumpitur corpus atque adeo furore, insania & deliriis ipsa mens, illis vigentibus, perturbatis spiritibus animalibus occupatur. Continuatis insuper longius his tormentis per influxus nimios spiritus tandem exhauriuntur & pereunt, unde sensus obtunditur sæpissime & partibus inducitur torpor. Hinc veteres ut Avicenna aliique vim attractivam iisdem adscripserunt; Recentiores vero Medici hanc rem affirmantes causam ejusdem scite per modum, modo digito quasi indicatum, afferunt atque explicant perspicue, rosionem nimirum vellicationem & irritationem & tristem illum dolorificum sensum, partem aliquam acerbe afficientem, ad eam humores copiosius movere & pellere spiritus animales, quæ ab illorum occursu dilatata & tensa copiosius subinde sanguinem admittit in se, sic admixtus vero uberior & subinde irruens tandem fibrarum tonus laxatur nimis ac debilis redditur, ut adhuc plus, quam antea, jam recipiat, & continuante dolore non omne remittatur, ex quo impedito refluxu tumor subnascitur, stagnans sic sanguis atque incuneatus quasi & congrumatus parti dolenti diutius affluentis affluxu motuque impresso actuatur, & ad fermentationem quasi quandam adducitur, a quo intestino motu fibrosæ partes, sensim distenduntur, & ab acrimonia conjuncta eroduntur, unde dolor magis magisque augetur. Hi universales corporis vitalis animalisque tortores frequentius sane atque communius acerbisque aliis malis, singulis animalis partibus violentiam inferunt, præcipue magis sensibilibus membranis & nervis proxime motricibus fibris, muscularibus nec minus tendinibus & ligamentis, & dein etiam vasis humores continentibus, per quas sensiles partes moleste affectas accidit, ut non raro dolentibus quibusdam partibus condoleant aliæ non solum vicinæ & proxime adjacentes, sed & interdum longius remotæ.

§. IV. Ubi dolores affligunt vehementiores, immanes & continui a natura illi alienissimi tristes & graves sensus omnibusque sensibus exter-

ternis communes, affectus atque morbos comitantes & subsequentes potissimum omnes, quique adeo molesti sunt, ut miseri præter hos omnia mortem etiam non raro perpeti malint, nihilque ideo magis ac hujus levamen ac sublationem exposcunt, ac rogant, horumque remediis nihil gratius habent, atque qui spasmodicis suis contractionibus causas morbificas aliaque symptomata detinent, incuneant & adgravant, sublationemque eorum impediunt; maxime si eas quæ amplissimo in corpore humano munere perfunguntur nobiliores nimirum & interiores partes & ad vitalitatem maxime necessarias, cerebrum, nervos, cor, diaphragma afficiunt, ac torquent, res est periculi plena: Siquidem ad vires prosternendas mortemque inferendam validissimi illi sunt, concurrentibus præsertim gravioribus symptomatibus aliis, vigiliis nempe, extremorum infrigidationibus, animi deliquiis, deliriis &c. Ibi non modo admodum utiles, sed & maxime necessariæ ligaturæ dolorificæ censentur, atque ubi abstrusissimæ intus causæ morbificæ hærent apprime conducunt: Sic v. gr. in illo difficillimo cognitu casu quem G. H. VELSCHIVS August *Episegm. L. IV.* proposuit de foemina quadam primaria intolerabili ventris cruciatu per intervalla exacerbari solito, diu afflictæ, cujus nec causam satis assequi poterant, exercitatisimi Medici, in consilium vocati & medicamenta sive interna sive externa doloris vehementiam nedum mitigabant, atque conjecturando tandem ille eam in bilem conjecit, tumore vias obstruente aut comprimente diutius in vesicula retentam ipsaque mora acriorem & malignam redditam, ingentes illos cruciatus genuisse, si quando copiosior per intervalla in intestina effunderetur, allevamento ligaturæ dolorificæ, externis partibus applicatæ forte fuissent. Rursum ubi iidem ignobiliores partes & exteriores & a principibus partibus longius remotas, ut artus, brachia, crura, pedes & tibiae infestant salutare interdum esse possunt, quoniam hoc medio, atque remedio, licet satis ingrato, noxii humores procul etiam depelluntur atque exonerantur. Porro exinde haud incongrue concluditur, ubi materia peccans acris mordensque dolores inferens, intimius se insinuavit & profundius hæret, ideoque admodum pertinaces sunt, atque ad quos medicamenta validissima etiam sæpe tam alte vix penetrare & vel leniendo vel discutiendo auxilium ferre nequeunt, quales præcipue cephalalgia, ophthalmia, odontalgia, otalgia, cardialgia dolores ostocopi dicti, ischiadici, podagri, alii ex aliis fluxionibus & congestionibus oriundi, fixi vagique atque acuti & gravativi, & quorum longinquitas abscessus intus procreat, per subortos exterius dolores quandoque adjutorio itidem esse valent, quatenus ad extra evocatur,

tur, atque exturbatur, quod intus hærebat, rodebat atque vario modo molestabat, ut perspectum est, frictiones fortiores, rubefacientia & cæsiones extremorum, artuum, cum urticis, ambustiones per Sinensium moxam (cui artemisiæ nostratis lanuginem, parem effectum edere *in Ephem. N. Curios. Dec. II. An. IV. Obs. I. p. 1.* notatum legitur) aliasque res combustibiles ut & sinapismos, phœnigmos, vesicatoria, in ejusmodi casibus, admodum utilia esse partibus etiam non dolentibus applicata; Verbo non modo in immanibus doloribus sed & in quibusvis symptomatibus urgentibus compescendis, primum propemodum locum sibi vendicant, vincula ejusmodi dolorosa, quoniam revulsionem quasi efficiunt.

§. V. Perpendentibus quanta & qualia mala hæc sint, (dolores) quæque alia longe plura eaque gravissima post se trahunt, quæ in hunc censum veniunt, quamque impense enixeque hi miseri patientes, a medentibus soleant illorum allevamentum atque remedium, omnibus etiam posthabitis aliis symptomatibus iisque periculosioribus, efflagitare, ligaturarum dolorificarum usus egregius in his atque aliis morbis amplioribus alioquin verbis edisserendis & recensendis paucis hic saltem collatis, extemplo constabit & experti credent prospere solvi dolorem, dolore, tristi hac sensatione (ut alias quandoque etiam lætabili ut gaudio & risu, uti per multa constat exempla,) propemodum omnem eumque habitualementem & pertinacem sive etiam ille sit ardens, pulsans, lancinans, tensivus, gravativus, mixtusque, sive etiam illum per essentiam sive per consensum nomines diversorumque horum diversam causam alleges, juxta HIPPOCRATIS *Aphorismum 46. Sect. II.* Duobus doloribus nec eadem parte obortis simul vehementior minorem obscurat aufertque. Spiritibus enim animalibus & sanguine dum in alia parte irritatio accedit retractis veluti & aliorum derivato, animi sensu plusque commoto, doloris remissio contingit, uti aliquem speratum effectum acceptum referunt, habita causæ ratione applicatis vesicatoriis, fonticulis, setaceis, frictionibus asperioribus & fortioribus, flagellationibus, urticationibus, rubefacientibus, pectinationibus, cucurbitulis, de quibus ut rei nostræ inter sit, modo audiantur HIPPOCRATES *in Epid.* dicens: *Qui cucurbitulam affixit, cum in coxa dolorum haberet, huic in crus deorsum venit & melius habuit;* & VALLESIVS hæc commendans sequentibus verbis: *Nulum in magno dolore remedium magis præsentaneum & ut a parte affecta in aliam ignobiliorem materia abscedat, sæpe causa est, ut hic evenit.* VITVS RIDLINVS *in Lin. Med. III. M. Dec. A. MDCXCV.* refert; quendam empiricum se dolorem dentium cuidam certo amico sublaturum promississe, modo

modo in alio loco, dolorem quendam ferre velit, cui conditioni cum annuisset dentibus laborans medicamentum istum ano allium indidisse, unde tantus in illis partibus dolor subortus, ut de dentibus amplius ne verbo quidem æger, de dolore hoc vero multis ejulatibus conquestus fuerit. Verum etiam inficiari minime possumus, quod minor dolor interdum majorem abigat: quoniam in nervi ejusdem partis dolentis, diversa propagine, novus excitatur, licet exilis dolor, ut novimus ab errhinis paulo fortioribus, extemplo sedatam fuisse odontalgiam. Perpendentibus amplius harum efficacia clarius constabit, stimulantia qualia maxime dolorificæ ligaturæ sunt, in distans quoque operari licet nihil eorum substantiæ intra humores communicetur, sive remotissimarum etiam partium materiam peccantem tam solidis quam liquidis partibus valide agitatis, iis quidem sic affectis in his fortiter nitentibus & his ipsis compressis, vim rursus majorem solidis inferentibus, ad stimulo- rum emissaria derivari, quæ res per multifaria experimenta atque exempla ulterius adhuc & explicatius præter ea quæ §. III. adducta sunt, posset comprobari, si diutius huic inhærere volupe esset. Moneamus hic ad causam utilitatis, quod monet GALENVS II. de Nat. hum. ejusmodi quæ dolores inferunt, remedia applicanda esse, in iis locis, quæ longissime distant ab iis, qui dolore premuntur, quia dolores attrahunt velut humores ad locum læsum. In talibus affectibus, doloribus gravioribus sti- patis & in periculum vitæ conjicientibus, ligaturarum dolorificarum, usus eo magis commendandus venit, in quibus interdum narcoticis uten- dum temere non est, neque venæ sectionem, alioquin liberio- rem sanguinis circulationem apprime promoventem & acres pertinaces dolores sopientem atque topicorum applicationem, dissuadentibus contraindicationibus & obstaculis quibusdam interpositis satis tutam esse censetur. Quod de doloribus dictum est, id etiam de inflammationibus, quas i- dem ordinario comitantur, varias corporis internas maxime ac eas qui- dem nobiles partes occupantibus, ubi nimirum aucto attritu partium sanguinis in suo per arteriarum minima vascula, in venas focias, transitus est impeditus atque affluentis continuo reliqui sanguinis appulsu & agi- tatione commoti, dicendum & affirmandum æque convenit: Dissipant enim sic ligaturæ hæ & sanguinis motum localem potenter promovendo partem affectam liberant. Conf. LOSSIVS in Disp. de Inflam. §. 102.

§. VI. Hoc in numero habenda pariter alia vitia longe plura ipso- rum spirituum animalium atque nervorum, quales sunt stupor, convul- sio, singultus, paraly- sis, paræsis passio hysterica, & epilepsia, nervorum

rigor, spasmus five nervorum distensio five ea levis sit a flatibus potissimum oriunda, spasmus flatulentus ideo dicta, perbrevis licet, sæpius tamen recurrens, five etiam gravior, diuturnior & pertinacior, quæ membrum sic contrahit, ut reduci ad pristinum statum vix possit, nervis musculisque versus suam originem præter voluntatem convulsis idque cum vehementissimo dolore, qui vires subinde patientis atterit atque consumit. Hæc ubi etiam partes remotas miserrimum in modum vexant atque contorquent pessimeque sic vitiant ligaturæ dolorificæ artubus femoribus & pedibus ac ubi primum sentitur malum injectæ ulteriores convulsiones supprimunt, componunt atque avertunt apprime motum irregularem nimirum spirituum animalium intercipiendo: Nam per irritationem ab extra factam, vehementiorem, prior determinatio excutitur & ataxia spirituum corrigitur, qualem effectum etiam videmus a vesicatoriis, delirantibus v. gr. applicatis. Apud Lindenium occurrit juvenis quidam, ex carie, in pollice, epilepticus, qui sola ligatura pedis arctissima paroxysmum impediēbat, quodocunque volebat & in tempore adhibebat. Similes propemodum casus proponunt de curatis nimirum convulsionibus & epilepsia a manibus & tibiis exortis GALENVS *Lib. III. Loc. affect. Cap. VII.* & HAGENDORN. *Histor. Med. & phys. p. 13.* Porro in illis gravissimis malis, quibus correpti homines aspectu quamvis sani atque valentes inflicta veluti plaga percussi repente concidunt & sine sensu, sine motu ac mente veluti cum stertore spiritum trahunt, nimirum in affectibus soporosis, lethargo, caro, comate nec non catalepsi, atque ipso attonito morbo & nervorum resolutione ut & vertigine rotatoria atque iis, in quibus mens patitur & errat, in deliriis eadem cum fructu applicantur, iisque ægri commodissime excitantur, quovis modo juvantur & ad meliorem statum reducuntur, per dolorem nimirum sic excitatum, in quem finem etiam puncturæ infliguntur. Talem enim tristem sensum non modo sed & omnia alia quæ animum contristant in sensu extincto revocando, plurimum prodesse, AVICENNA scripsit *Lib. III. Tr. Fen. IV. Cap. I.* Nec non quoniam movent & excitant spiritus atque humores non modo in suffocatione uterina, sed & in lipothymia & syncope opem admodum opportunam conferre valent. In paralyfi & ubi sensus deficit, membris sic vitatis, ut rursus vigorentur ipsis potius inducantur, alternis & sæpius repetitis vicibus tamdiu repetantur, usque dum calor, motus & sensus redeant, immo dolor quidam sentiatur tonusque debitus restituatur. His addendum delirium triste, seu melancholia atque inferendum, ligaturas dolorificas, inter-

interceptionem & revulsionem humorum efficientes, auxilio haud contemnendo esse. Ob eandem rationem, in phrenitide paraphrenitide & mania, nonnihil juvamenti promittunt. Hinc etiam fluit, quod strangu-
latis, quacunque etiam causa tales facti fuerint, efficaciter subvenire in
pedibus praesertim applicatae poterint. A fumo v. gr. carbonum, ce-
spitum pituminosorum in cubiculo ante clauso, pene suffocatis, qualia
exempla legas licet apud LANGIVM in *Epist.* PLATERVM *Lib. I. Observ.*
f. 16. IACCHIVM in *Lib. IX. RHAS. Com. 41.* AMAT. *LVSIT. Cap. VII.*
Cur. 33. PANAROL. *Obs. Med. Pent. I. Obs. 19.* SCHENCK. *Obs. Lib. II. Obs.*
19. aliosque. A vapore musti & cerevisiae recentis in cellis. Vid. W.
HAEFERVM *H. M. Lib. I. de Capit. Affect. I. A. SCHMITZ Med. Prax. p.*
204. BORELL. *Cap. II. obs. 4.* ZACVTVM *LVSIT. de Princip. Med. Hist.*
Lib. I. obs. 10. f. 10. a fumo ex domorum incendiis vid. BORELLVS *l. c.*
ZWINGER. *Theatr. V. H. p. 510.* a fumo fornacis vid. HILDAN. *Cap. IV.*
Obs. II. In metalli fodinis vid. MATTHES. *SAREPT. Cap. XII.* LIBA-
VIVS *Vol. I. rer. singul. Tr. I. de Nat. Metal. G. AGRICOLA de Rer. Me-*
tal. Lib. VI. p. m. 172. HORSTIVS *P. II. Obs. 28.* MARCELLVS DONA-
TVS *Lib. II. H. M. Cap. VI. SOLENAND. Consil. Med. VI. Sect. V. CAME-*
RAR. Op. Subcis. Cap. I. c. XXVII. a flore calcis vid. TVLPIVS *Obs. Lib.*
III. cap. XLI. a pulvere a vento impetuosius impulso vid. PLATERVS
Obs. Lib. I. p. 185. & 172. De vaporibus, ex cloacis subterraneis, diutius
occlusis, cryptis, sentinis & puteis exhalantibus vid. PANAROL. *Pent. I.*
Obs. 19. SENNERT. *Prax. Lib. II. P. III. Cap. III.* HOCHSTETER. *Dec.*
III. Obs. 8. A rebus putrescentibus vid. ORIBASIVS *Lib. V. cap. II. P.*
ZACHIAS *Lib. V. tit. 2. qu. II. & Tem. III. Caus. 19. & 44.* Si enim con-
cussionibus & frictionibus uti assolent reficere hos in aërem liberum &
puriorum & temperatiorem deportatos, possunt, multo citius & effica-
cius ligaturis dolorificis id praestabunt. Pariter laqueo suffocatis & ad-
huc calentibus & aqua submersis & tanquam mortui jacentibus applica-
tis ligaturis fortioribus subindeque repetitis potenter succurrere opem
laturi poterunt. Confirmat hoc SACHSII experientia quam in *Ampe-*
logr. Lib. II. cap. III. allegat hos pronos in terra extensos & plantis pe-
dum baculo fortiter percussos revivixisse. Idem de fulmine tactis vel
attonitis, si scilicet spirituum influxus notabiliter cessans deprehendatur,
dicendum & laudandum venit. Per se intelligitur, quod in his laesarum
partium habenda sit ratio, nempe v. gr. non conveniunt in iis applica-
tae, quae fervore & impetu fulminis ambutae & laesae sunt. In longe
pluribus morbis iis denique praecipue, in quibus spiritus animales labo-
rant

rant aut afficiuntur, in morbis venenatis malignis, morbo hungarico, variolis, petechiis & similibus & in quibus alias vesicatoria, frictiones, fonticuli commendantur, ligaturæ dolorificæ locum quoque inveniunt, eum præsertim in finem, ut aura & materia maligna & venenosa potenter revellatur,

§. VII. Magis adhuc propemodum necessariæ sunt, ubi in mora periculum maximum positum est, in sanguinis præternaturali effluxu, quem hæmorrhagiam vocant, eoque enormi, partibus fauciatæ applicatæ ligaturæ dolorificæ, aliterque, dirigunt, aut intercipiunt atque averunt simulque vulneris parietes ad se invicem adducunt vasaque majora etiam si illa arteriæ sint quæ, sanguinem transmittunt, coarctant Conf. IOB A MEKERN *p. 163. seq.* TH BARTHOL. In aneurismate adhuc recenti potius & ubi applicari commode possunt, (nam in collo v. gr. ut per se patet locum non invenire) per actam & dolorificam ligaturam, quam expulsivam vocat MARQUE *Chirurg. Traité des bandages C. XVI.* & descriptam atque delineatam dedit, miraculi instar patentem hiantemque arteriam apprime constrictam atque periculum vitæ exemptum expertus est & AVREL. SEVERINVS qui itidem in arteria præfecta omne verendum, vinculis in promptu sustulit, vid. *Chirurg. Effic. Part. II. Angiol.* iisque pariter felici cum successu Morellum usum fuisse, *Zodius Gallic. Med. An. I. Observ. III. mens. Jan.* testatur. Ipso nimirum tumori applicantur & quibus versus truncum ita ascenditur, ut paulatim laxiores fiant ligaturæ, ut scilicet arteriæ pars superior comprimatur, ne ulterius dilatari rumpique queat, sanguinisque impetus a corde propulsus compescatur. Exinde haud obscure aut non dubitanter inferendum, eas etiam in varicibus, quos aliqui aneurisma venarum vocant, apprime quadrare. Quemadmodum enim in levioribus casibus & ad paucum tantum temporis spatium solius digiti admotione vel argenteæ mone-tæ impositione vulnera, occludi & hæmorrhagiæ inhiberi, a chirurgis solent, ita in gravioribus ligaturæ fortius & ad doloris etiam usque perceptionem constrictæ commodiusque diutius paulo sic relictæ omnium necessariæ erunt, ne cum sanguine, pretiosissimo vitæ thesauro, simul ipsa vita pereat. Pariter si citra læsionem externe factam, cruor charus noster vitalis magno impetu ex quacunque corporis parte effertur periculumque subest ne hominem exinanitione exanimet, itidem immoderatus hic sanguinis effluxus & intempestivus, tempestivis certius omnium his remediis externis ligatis fortiter, brachiis, cruribus, atque coxis pedibusque reprimatur. His si non sisti potest certe magna san-

sanguinis intemperies junctis simul internis medicamentis huic appropriatis corrigenda. Sic in vulgus notissimum est, narium hæmorrhagias, forti narium compressione, ex tempore sisti. Aliquoties easdem enormes, aliis remediis non sufficientibus, ligaturis per ligamenta, ex panni extremitatibus abscissa, mediantibus quibus, tibialia alias commoda stricture firmari solent, intercilia arctius ligata & adstricta ex tempore & feliciter compescuit Præses. Imo expetientia docet, si digitus saltem manus, filamento arctius ligetur, aut saltem vehementius incurvetur minimus (digitus) hæmorrhagiam sisti. De quali etiam effectû RONDELETIVS *Method. Curand. morb. Cap. LXIII. p. 281.* CRATO in *Epistol. & Consil. Lib. V. Consil. 7.* H. G. FABRIC. HILD. *Obs. Cent. II. Obs. 15.* testantur. Jam HIPPOCRATES *Lib. II. Sect. V. de Morb. Mul.* hoc remedii genus atque post eum GALENVS vid. *Lib. ad Glauc. Cap. XIV.* ut & AETIVS *de Re. Med. Lib. XIV. cap. XXV.* & AVICENNA vid. *Cap. de Ligaturis*, nec non PAVLVS AEGINETA *Lib. III. cap. LXIII.* ZACVTVS LVSITANVS *Prax. Hist. Lib. III. cap. II.* FONSECA *Tom. I. Consult. 55.* proposuerunt & laudibus multis extulerunt. Chrysippus Cnidius memorante GALENO *de Venæ Sect.* homini cuidam sanguinem spuenti tales applicavit, quod consultius duxit, quam si sanguis, e vena missus fuisset: Statim quoque apparet ratio, nam sanguinis motum versus pulmones certissime prohibent. Siquidem effectus ratio horum auxiliorum ac rerum in his casibus consistit propemodum omnis, quod ex toto corpore venientem per venas sanguinem per venam cavam ad cor ejusque ventriculum dextrum, per aliquod temporis momentum, detineat atque impediat, ne tam cito ad suum hoc punctum revertere possit, per quam remoram mora conceditur, ne sanguis rursus, per arterias, concitato motu, ad partes perveniat. Notanda hic præsertim ac memoratu digna observatio est, quæ apud WILLISIVM in *Pharmac. Rat. Part. I. Sect. III. cap. II.* invenitur de hæmorrhagia, minime sanguinis copię aut æstui præternaturali & furibundo, sed spasmodicæ cuidam ac intervallatæ arteriarum contractioni adscripta, quam venæ sectiones repetitæ ac multa assumpta medicamenta aliaque in usum ducta remedia, deteriore reddiderunt, adeo ut res desperata videretur, in meliorem vero statum & saluberrimum ligaturæ tales, tandem applicatæ, adhibitis simul interne paucis dosibus pulveris cujusdam absorbentis ac antispasmodici, per Dei gratiam, perduxerunt. Ea, præ aliis in his læsionibus simul habenda ratio est, ut sensim sanguinis effrenus effluxus per ligaturas injectas cohibeatur, ne subsequens inflammatio major reddatur purisque copiosior generatio alia-

que difficilia symptomata magnum negotium deinceps pariant; neque nimis cito ligatura solvatur, ne exortum malum recrudescat. In effreno pariter mensium & lochiorum fluxu, id multipli experientia, hodie est stabilitum, comprobatum atque commendatum, ut nimirum laquei supra genua, femora & cubitos injiciantur fortiusque & sæpius iisdem constringantur. His itaque positis atque evictis, non est, cur de harum utilitate dubitemus aut obloquentes Asclepiadem citante Scribonio Largo, vid. AVGENII FERRERII *Castigationes* Cap. XXVII. & ALEX. BENETTVM in *Theatr. Tabid. Exercit.* 26. audiamus. Rursum, quod forte miraberis, in contrariis his morbis non raro similem effectum edunt, ligaturæ dolorificæ, ut in obstructionibus mensium & lochiorum suppressione, cruribus & furis utpote inferioribus partibus injectæ, quorum naturalem effluxum, ut frictiones, scarificationes, balnea, ita & ligaturæ ejusmodi juvant, cutem enim rarefaciunt, poros & glandulas subcutaneas aperiunt, torpidum sanguinem fluxiliorem reddunt atque majorem effluxum excitant, sicque menses commode invitant atque restituant.

§. VIII. Proficua præterea admodum sunt ligaturæ dolorificæ in tumoribus præcipue pedum œdematosis, utpote mollibus, laxioribus justo & indolentibus aut avertendis aut curandis, quoniam stagnans situmque peccans serum vapescent atque spissescens varioque sic modo in corruptelam abiens, namque & hic vitium capiunt, ni moveantur aquæ vitales microcosmicæ, circulum debitum vitalem moratur aut penitus sistit, & elater & tonus partium fibrarum nimirum motricium musculosarum & cutaneorum staminum labefactatur debilitatur & destruitur, laxatur nimis & extenditur, atque ipsi animales spiritus circulandis concitandis & promovendis fluidis humoribus dicati non amplius præstant illud, quod debent præstare & secundum veterum locutionem expultrix facultas læditur, unde singulæ partes & fluidæ & solidæ vitali motu privantur & sic cachecticus & hydropicus status inducitur, atque quasi enervatio (ut ita loquamur) quædam accidit, adeo, ut, etsi postea ab imbibito humore liberentur ad naturalem statum difficile & sero tamen aut nunquam, non raro redeant. Necessarium hoc remediorum genus eo magis adhuc est, quia hæ extremæ & infimæ corporis humani partes omnium remotissimæ sunt a fonte centroque, corde, humorum vitalium, caloris & vitæ, ut motus major & efficacior ibi procuretur, unde etiam provida Parens Natura in moræ jugis & interruptæ circulationis compensationem, ne stagnatio tam facile fieret, pedibus motum crebri-

briorem ambulando, ut brachiis & manibus laborando, optimo consilio injunxit atque præcepit: impulsu certe & exercitatione majori & validiore maxime opus habent, ut sursum versusque suum centrum, per eas sanguis moveatur, motu hoc ipsis naturæ legibus repugnante, quippe omne grave sponte sua tendit suoque motu deorsum unde ex subsistenteque aut lentius moto sanguine, serum ordinarie, e vasis, per poros exit atque a grumo secedit, quod, ex sua natura, lentior atque minus ad movendum aptus & frigidus sic dictus humor est, sique falsus asper & acris simul aut deinceps talis stagnatione evadit, intimius findendo poros fixiorem sibi parat sedem & quantitate & qualitate, in commune vitium sic laborantibus, atque si intemperatum adhuc magis redditum est, facile rumpit vasa. Hinc & toto die videmus, quod homines sedentariam aut mollem vitam agentes & præcipue foeminæ atque ætate consistente vel appetente senili, constituti, temperamentique humidi & frigidi aut habitu corporis succulento præditi, obesi, plethorici, potui largiori aquæ, vini, cerevisiæ, spiritus vini indulgentes, lectica portatili aut curru utentes, neque ambulando, pedes exercentes, ex pedibus & eorum tumoribus œdematosis, arthritide, podagra, inflammationibus & tandem exulcerationibus, aliisque corruptionibus ad gangrænam facile abeuntibus, nisi provideque præcaveantur, quæ mala præcipue Lipsiæ familiaria sunt, laborant; secus ejusmodi vitia iis, qui sæpius obambulant cursuque quotidiano frequenter pedes exercent accidunt, ligaturæ vero dolorificæ, ut externa remedia, impellunt, movent & promovent sursum, ab inferioribus ad superiora versus, adacta, utpote qui feri ad superiora refluxus admodum difficilis est, ut internis dein purgantibus & diureticis maxime per excretoria sua organa, ex corpore commodè proscribi possint, simulque elaterem fibrarum juvant & restitunt, & fibris notabiliter sic constrictis spiritus animales fibras nerveas animant, ut promptius expediantur subsistentes particulæ lentiores. Redditur sic tonus deficiens & vis constrictiva cessans hætenus distensionem & laxitatem velificans, quo & occasio nascitur & stimulus tumorem imminuendo & stasim, non modo ulcera imminuentia sed & ipsam gangrænam, quæ pressa quasi pede, ex facili succedit, avertendi; Qua de re prognosticon HIPPOCRATIS VI. Aph. VIII. verissimum manet, quod aqua inter cutem laborantibus, exorta in corpore ulcera, non facile sanentur; Nec dubium est, quin & particulæ viscidæ & crassæ situque jam corruptæ, valide resolvantur & dividantur atque ad amotionem præparentur. Attamen id scire licet, convenire has ligaturas applicatas in hydrope atque

tumoribus pedum œdematosis, in principio magis ac malo nondum adeo confirmato inveteratoque ac materia adhuc molli mobilique existente nondum viscida adeo gelatinosaque facta aut etiam acri atque corrupta. Hæc si minus juvent nihil proficient aut valebunt alia remedia applicari solita, etiam optima: Quoniam circa nocturnum tempus hi tumores serosi augmentum capere ordinario assolent, & tunc fibrarum motricium vis, elater ac tonus remissior, languidior & laxior factus est, consultius ducendum venit, ut circa hoc tempus hæ ligaturæ expulsivæ, in usum trahantur, nam motus hac specie repetita, sæpius partium fibræ roborantur simul atque firmantur. Nemini ideo scrupulus moveatur, ac si per ligaturas hoc modo huncque in finem applicatas, perperam repulsio humorum serosorum & excrementorum in corpus & in abdomen fieret, atque satius consultiusque esse, eundem in pedibus relinquere: certe namque comparet asserti nostri veritas, experientia juxta ac ratione fundata: Præter illam enim quam firmam esse omnino quivis peritus annuet dogmaticus, & intelligentem Medicum non fugiunt hæ rationes quædam, fieri nimirum criticum in morem œdematosos pedum tumores, sive tendere deorsum & quodvis fluidum in corpore subsistens & vitalem motum exuens, perdere suum usum, sanitati & vitæ nocumentum & periculum inferre adeoque esse omni debito modo ejusdem motum & expulsionem procurandam, auferendo quietem, corrigendo stasim impediendamque ulteriorem corruptionem, aliudque esse repellere indecenter, aliud conformiter & naturæ legibus adæquate, partique affectæ materiæ contentæ fluidæ, quietæ convenienter atque deinceps per interna his juncta & subsequencia medicamenta utilia & apta, provocare foras excretionem. Providi enim Medici circa hanc etiam rem HIPPOCRATIS monitum curæ cordique habeant inquietis *Lib. de Medico Cap. III. t. 9.* Quæ vero offeruntur, omnia considerare oportet, ut conferant, maxime si ægrotae parti adhibebuntur, talia autem sunt ligamenta & medicamenta. Utrorumque enim usus opportunus, itemque negligentia magnam differentiam habet; Hac de re, experientia propria haud simplici vice convicti, ligaturas debite sic adhibitas aliis remediis externis, alias satis validis adeoque non contemnendis, surfuribus & arena, calidis balneis laconicis, æstuariis & sudatoriis vaporosis, fotibus, suffitibus longe anteferendas esse. Si fidos adhuc hujus rei testes, Autores desideres, modo exhibeamus, inter multos quosdam, qui sunt, ex veteribus quidem Græcis atque Latinis GALENVS *Lib. II. de Art. cur. ad Glauc. Cap. II.* qui sequentem in modum scribit: *Si vero in aliquo*

aliquo ex membris externis tale fuerit œdema, incipiendo ligaturam in imis partibus finire oportet, in altioribus ejectionem & compressionem & universam distributionem faciendo velut in fracturis. Curationis enim intentio aut indicatio in ejusmodi affectibus mixta est, una quidem, ut earum substantiæ aliquid dissolvatur, alia vero ut aliquid congregetur ac restringatur. Sequentia addit: Ego in diuturno œdemate, ubi prius partem olco illinissem, deinde spongiam ex lixivio apposuissem, atque vehementius strixissem, affectum perfecte curatum vidi, ad discutendum & incidendum: id quod in omnibus fere diuturnis affectibus probatum haberi non ignoramus. Succedant alii; ut AETIVS qui Tetrabibl. III. Serm. II. Cap. XXXI. p. m. 589. de hydropis cura latius tractans, sequentia quoque profert: Amplius autem ventrem tum intestinalia ligamenti adstringant, itidemque omnem cutis coërceant tumorem: Juxta hunc præsertim CELSI egregia & nitida scripta evolvenda, in quibus Lib. III. cap. XXI. de Re Med. p. m. 165. legitur: *si id morbi genus est, quo in partem multa aqua contrahitur, oportet malagma habere impositum, quod digerat, idque ipsum superimposito triplici panno, fascia, non nimium tamen vehementer adstringere, quod a Tharria profectum servatum esse a pluribus video.* Ex recentioribus, qui hujus rei testimonia afferunt, notissimi sunt, & primo quidem loco nominandus omni fide dignus PETR. FORESTVS, qui Observ. XXXVI. Lib. XIX. p. m. 255. de monacho quodam Franciscano refert, quod, cum crus ejus sinistrum œdematosum neque fomentis neque linimentis, in totum detumesceret, sola deligatione fortiori per ligaturas præter omnium expectationem, ex asse, curatus fuerit. FELIX dein PLATERVS adducendus, vid. ejusd. Tom. III. Prax. p. 273. ubi & primo quidem loco ita scribit: *Fasciis vincire & stringere locum ubi œdema enascitur, admodum ipsius incrementum prohibet, & secundo p. 304. ubi in intumescencia pedum diffusa, alia ab ea, quam tumorem œdematosum vocavit, molliori a seroso, crudoque succo prognata, nominatim in hydrope curanda occupatur.* Topica quod attinet, addit, ejusmodi humiditates, unde pedes intumescunt, etiam ab initio, repellendæ erunt &c. Inprimis autem, pergit, fasciæ hic aliquid singulare efficient, intumescenciamque hanc continebunt, tandemque ne amplius redeat, prohibebunt, si in dies fascia longa, palmum lata, ab imo pedis incipiendo, & ad genua usque procedendo, pedes stricte, mane, dum nondum adeo, atque interdiu fieri solet, intumuerunt, obvolvuntur, sicque donec iterum decumbant, vel etiam dies noctesque retineantur, quod & ocrea molli, arcte per suturas in longum pedi adstricta, aliisve artubus præstari possit. Atque SENNERTVS, qui Prax. Lib. III. p. 6. f. 2. Cap. III. p. 743. cruribus tumidis

& inflatis hydropicis, commendat, ut spongia appropriato decocto vel lixivio, vel aqua maceretur, iterumque exsiccet, & fortiter cum fasciis circa crura ligetur, donec paululum detumeant.

§. IX. Sine dubio etiam in aliis tumoribus hydropicis & œdematosis atque partibus anasarca tumefactis & abdomini, scroto cum euphoria sineque periculi metu injici possent ligaturæ easque longe præferendas esse existimandum scarificationibus, quas tamen efficaces & tutas pronunciant HIPPOCRATES *L. de Intern. Affect. Cap. XXIV. T. 25.* & NICOL. MASSA *Ep. XXI. p. 112. b.* In gangliis item, nec non scrophulis & strumis nascentibus abigendis, haud supervacaneus ligaturarum dolorificarum erit usus, quoniam sola & sæpius repetita compressione & attactu fortiori per manus aut digitos facto, aut mediante frusto imposito plumbi, aut paulo fortiori frictione & simplici salivæ ilinitione, hi præternaturales tumores, subinde auferuntur. Haud dubitanter hic inferimus, quod & in catarrhis gravioribus & pertinacioribus in rheumatismis, locum quoque inveniant, quoniam potenter revellunt aliorumque dirigunt, aut intercipiunt atque avertunt. Per popularem observationem constat, ad diversionem materiæ catarrhosæ potissimum fluentis, in duobus manus digitis, admodum fortes ligaturas, facere. Plinius scribit catarrhos omnes per fortissimam ope ligamentorum constrictionem pollicis pedis a capite posse averti. Hinc & influore albo mulierum, in superioribus partibus institutæ, revellere queunt: Conducibilia hæc auxilia admodum sunt, quando materia peccans, arthritica, scabiosa, purpuracea ex exterioribus corporis partibus, ad interiora convertitur atque visceribus labem certissime nocituram & pessima & periculosa symptomata imprimat ac infert. Datur enim conversio multiplex, in natura humana atque per varia media, a partibus internis, ad externa, ac vice versa, ab externis ad interna, uti sæpissime, malo quidem sæpissime omine, post hæmorrhagias, diarrhœas aut purgantia assumpta in corporis habitu, efflorescentiæ cutaneæ, evanesunt &c.

§. X. Aequè merum serum laudabile, interdum a venæ sectione, quando sunt vasa lymphatica læsa, per longum temporis intervallum e vulnere aut alio modo ruptis horum vasorum subtilibus membranulis, manat, aut dilatatis illis, præter modum hæret atque lymphæ circulus varie turbatur, quibus in casibus indicationi satisfaciunt, juxta exstillantis feri, per siccantia adjecta remedia, exsiccationem, ligaturæ etiam fortius contractæ, licet sine dolore haud applicari possint.

§. XI.

§. XI. Sequitur jam ut harum usum, pro atrophía vel aridura partium laborantibus ac marcescentibus atque paralyticis membris, pro eo ac par est, laudemus & commendemus. Per eas nimirum, præsertim si a superioribus partibus, ad inferiores versus adiguntur, humor nutritius propter calorem, qui exinde augetur, partes nutriendas dilatantem porosque aperientem atque humores & ipsos animales spiritus, ad accessum invitantem propterque dolorem, cujus vi natura parti laboranti & pressæ quandoque succurrere studet sanguinemque & cum eo particulas alibiles & nutritias eo i. e. ad exteriora prolicit & mittit veluti auxiliares copias, & quasi attrahit. Tonus enim, robur, debita partium strictione, vis motrix & elastica atque expandens expandendosque succos in partium poros adigens & quasi incuneans, requisita ad nutritionem & ad soliditatem partium conciliandam, necessaria sunt. Testimonium hujus rei si requiras, tibi inter multa JOH. JESSENI vel unicum sufficere poterit, qui in *Instit. Chir. p. 45.* scribit: quod dextro crure ex atrophía laborante, in sinistro, a manu ad axillam progressu facto, ligaturas fortiores compressorias, induxerit, atque in integrum has partes corruptas restituerit. In hanc rem notabile est, flagellis & ferulis ad bonam habitudinem, macilentis inducendam, veteres usos fuisse, quibus graciles partes ad modicam usque intumescuntiam & incalescentiam flagellabant, referente GALENO *Meth. XXIV. Cap. XVI.*

§. XII. Ut nutritionem imminutam sic & quæ exinde procedunt mala juvant ac emendant, ita etiam depravatæ & in forma vitiatæ & auctæ præter naturam prospiciunt, corrigunt & extirpant ligaturæ dolorificæ; scilicet loquimur hic de rhachitide, excrescentiis variis in variis partibus, fronte, naso, manibus, pedibusque &c. fixis & pendulis acrochordonibus, verrucis, myrmeciis, clavis imo quandoque mariscis & ficubus, ateromatibus, steatomatibus, strumis, scrofulis, polypis narium (si nempe in exterioribus radices fixas egerint) cornubus, quorum unum dimidii pedis longitudine pollicisque crassitie extirpatum esse, CABROLIVS refert. *Obs. Anat. XI.* quorum radices infixæ firmiter, funiculis ex serico filo aut cannabino vel pilis equinis, pro ratione extirpandorum confectis fortissime stringuntur constrictæque sic diu relinquuntur, usque dum denegata & inhibita nutritione marcescant & decidant.

§. XIII. Sed plures alii morbi occurrunt, in quibus ligaturæ dolorificæ optime utiliter se gerunt, ex quibus jam indicabimus dyspnœam, asthma illudque præsertim convulsivum atque in ipso paroxysmo con-

constitutum, incubum, catarrhum suffocativum, ventris fluxiones, ut vomitus eosque cruentos, atque choleram, dysenteriam (in qua ad partes superiores injectas validas ligaturas commendat HERMANN CONRINGIVS in *Disp. de dysenteria* §. 48.) diarrhœam, colicam passionem, ventriculi inflammationem, qui pessimi affectus hi, artubus brachiis supra genu & femoribus circa inguen pedibusque ligaturis dolorificis applicatis, quidem mitigari possunt, revulsionis scopo indicato ac observato: In his morborum generibus hæc auxilia apud ABVBETER, RHAZES ad *Manfor. de Re Medic. Lib. IX. cap. LXII.* & ORIBASIVM de *Morb. Cur. Lib. III. cap. XI.* WILLISIVM in *Pharm. Rat. Cap. III. p. 41.* commendata leges. Eundem in finem furiosorum pedes fortissime ligantur. Ebriis qui his propemodum similes sunt (unde Seneca convenienter ebrietatem furorem voluntarium nominat) & revellendi & excitandi causa cum fructu applicantur. In ipso malo hypochondriaco & melancholia inde dicta, eas MATH. MARTINI de *morb. mesent. abstr.* suadet p. 282. Febres intermittentes curari, oborto per ligaturam, gravi dolore, in minimo dextræ manus digito, legitur apud ROS. LENTILIVM in *Miscel. Med. Pract. P. I. p. 240. seq.* Pro cataracta oculorum avertenda, hoc remedium practitorum plures commendant. Ut non leviter in fœminis gravidis, abortus terrere solet: ita ligaturæ fortiores partium superiorum ob interceptionem fluxionis, ad uterum, non parum, in eo quoque prodesse possunt.

§. XIV. Quando in his paragraphis ligaturas quidem dolorificas nuncupavimus & commendavimus, animus atque intentio nostra non alia esse potuit, quam ut & in his rebus ut ubique atque in omnibus aliis sit modus habendus, ne ex salutari alias remedio carnificina fiat, Siculis tormentis accensenda. Quare etiam chirurgi, talia applicantes caveant, nec crudeles se gerant, HENR. AB HEERS vid. *EjUSD. Observ. Med. 13.* aliquando id vidit, ac exinde tanto terrore horroreque tactus fuit, ut per totam suam vitam ligaturarum harum usum, abominationi habuerit: nimirum offendebat aliquando adolescentem quendam, ex philtro, ut credebatur, incoercibili sanguinis per narès, aures, os, genitalia & alvum effusione, correptum, a chirurgis causam hæmorrhagiæ non magis quam modum ligaturas applicandi, intelligentibus, in brachiis, cruribus, digitis manuum & pedum validissime ligaturis constrictum adeoque equuleo quasi contortum, ut ejulatus miserandum in modum ederet, lachrymasque confestim effunderet, summeque precibus contenderet, ut ipsi sine tortura mori, permitterent. Neque diutius sic con-

strictæ

strictæ in partibus relinquantur, sed iterum subinde relaxentur & per vices repetantur, ne vasis & nervis præter modum coarctatis circulatione humorum libera prohibita, multæ molestiæ, imo pessima symptomata inferantur, inquietudo, virium debilitas atque adeo animi deliquium, vigiliæ involuntariæ, inflammatio, exulceratio, febris, partis marcescentia, vasorum scissio, gangræna ipseque sphacelus. Hujus rei exempla si petis, legas ea licet apud HAGENDORN. *Hist. Med. & phys. Cent. III. Histor. XXXVI. p. 329.* Addo, quod sanguinem ligaturis sic sistendo facile coagulari contingeret, & sic illis solutis non sine periculo ad cor redire.

§. XV. Alia quoque adhuc monenda essent v. gr. quod utilius & efficacius ligaturæ dolorificæ afferantur, post totius corporis evacuationem aliaque debito modo præparationem atque universalium sic dictorum, ut & alterantium cuivis morbo convenientium medicamentorum exhibitionem atque ut ea pro re nata ulterius continuentur, & quod generalia quædam adhuc circa exhibendi modum observanda sint. Sic videndum quorsum concitator humorum impetus feratur; si enim sursum magis vergant, inferiora, si deorsum ruant vehementius, superiora, fortius & sæpius constringantur; Quod si æquo, corporis humani hostes, morbi ingruant marte, ambobus quoque æqualiter prospicere conveniet. Convenientius tamen est vitiosorum humorum colluviem versus inferiora & ignobiliores magis, quam superiores & nobiliores partes, revulsionis hoc stimulo incitare. Sensim quoque hac constrictione procedatur, ut si modo morbi inducias patiantur, ut primum quidem minimum postea magis ligaturæ constringantur. Sed hæc hac vice satis esse possunt.

S. D. G.



Fff ff

XVII.



XVII.

DISSERTATIO

MEDICO-CHIRURGICA

DE

VINCVLIS CHIRURGICIS.

PROOEMIUM.

DVrum horridumque illud dictum cuivis forte posset videri, quod apud SIRACID. cap. XXXVIII. vers. 15. legitur, *quicumque coram Eo peccat, qui creavit ipsum, incidet in manus medentis*. Peccatum certe per mortem nunciosque ejus morbos punitur, qui homines undique variis modis molestant, contristant, conturbant, angunt, affligunt atque contorquent, quorumque sæpe ea conditio ac indoles est, ut eorum remedia plurima, non modo molesta, acerba & nauseosa, sed etiam abominanda horrendaque sint, quod inprimis iis miseris accidit, qui ejusmodi morbis conflictantur, de quibus dicitur, quod eos non medicamenta sanent, ac quibus ipsa natura opem suam ferre vix possit, a solo medico jubente ac moderante & chirurgo operante, ea propter auxilium expectant. Quique voluntatem habent se adjuvandi & patiendi, omne tormentum alioquin miserrimum est, eum animum moriendi projecit, non habere, vivendi, ut SENECA loquitur *Epist. LXXVIII*. Quod in luxationibus, fracturis & coalescentiis potissimum patet, atque quibus pro extremis malis sanandis, extrema adhibere remedia jubemur, quosque, tanquam contumacissimos corporis hostes, chirurgi armata manu, ferro igneque atque vinculis, laqueis, ligaturis, compedibus &c. auxilii tamen & salutis causa, adgrediuntur, atque adeo in carceres medicos mittunt, five æstuariis & sudatoriis vaporosis includunt, ut intuentes harum rerum ignari, dubitarent, num perpetratorum facinorum poenas, an decumbentium solamina dicerent. In medicina enim πολυ-
μηχανία necessaria est, ut ubicunque nocivi aliquid oritur, illic parata præsidia sint, ut ad intentionem suadentis & injungentis aut operantis respondeant. Neque ubique commendata jucunditate certe res absol-
vitur

vitur omnis, sed duro nodo, durus quærendus est cuneus; neque cito ope, æque succurri potest laborantibus, sed modo tuto id fiat, gratiofus alias medicus faciem suam quandoque mutare, pro rei exigentia cogitur, atque talia afferre auxilia, quæ minus sunt ad palatum ægrorum. Salus omni quærenda tali malo. Sic enim cum nihil omiserit, quod ad verum curandi institutum pertinet, si successum cura non habeat optatum, facile excusabitur. Quadrat huc quod apud CVRTIVM. *Lib. IV. cap. III. Al. M. Hist.* legitur, *Efficacior omni arte imminens necessitas, non usitata modo præsidia, sed quædam etiam interdum nova admovet.* Cujusmodi quædam auxiliorum genera, illorumque verum usum dextramque applicationem atque convenientem modum ejus, observandaque circa eadem, hac brevi levique quidem dissertatione, demonstrare placet.

§. I. **A**ntiqua, utilia ac efficacia atque facile parabilia fereque domestica quæque velut Naturæ manu ductione applicationem sui invitant auxiliorum genera remedia chirurgica juxta terebrationes, punctiones, unctiones &c. quoque vincula sunt, ea scilicet instrumenta satis modo nota, quibus varie adornatis atque constructis, aut totum corpus, aut hæc vel illa membra, aut artus atque articuli, ut & venæ, arteriæ, immo etiam nervi (de quibus speciatim SCRIBONIUS No. 255. legendus) nec non quæ iisdem præter naturam adveniunt, vario modo pro vario scopo, vinciuntur, cinguntur & constringuntur. Sub hoc nomine vero fasciæ, lora & cingula, ligamenta, laquei & ferulæ præfertim, & quæ ex his componuntur, instrumenta & machinæ veniunt. Non solum utilia admodum atque efficacia, sed etiam sæpe maxime necessaria hæc auxiliorum genera sunt, atque sine quibus, vix tuto ac certius medelam ægris afferre possumus idque exsequi exterius, quod interius faciunt medicamenta. Conveniunt etiam, si requisita debita respicias, omnibus atque omnis ætatis, sexusque hominibus, singulisque propemodum corporis humani membris, & si rationem illorum rite habeas, cum sperato fructu ubique applicantur: neque minus eorum usus, hac conditione observata, tutissimus est. Omni æque tempore denique & loco commode adhiberi possunt. Ad hæc juvant celeriter, auxiliumque præsentaneum afferunt, cum in certis quibusdam casibus, e. gr. in hæmorrhagiis enormibus, in sequentibus ulterius videndis, ubi periculum in mora verendum est, alia remedia, quæ alias quoque adhiberi in eundem finem solent, lentius operentur, quique

Fff ff 2

tamen

tamen lenta remedia fegnesque medicos & cunctatores, non expetunt.

§. II. Vfus finesque, in quos afferuntur & applicantur, in statu pariter secundo ac aduerso varii sunt, atque partim ipsæ medentur per se applicatæ, partim medentibus, aliisque remediis allatis inserviunt ejusmodi deligationes, siquidem ut corpus ejusque membra, aut sana, in debita ac iusta conformatione iustoque tono conseruentur aliove modo sejuncta suaque fede mota, restituantur aut læsa, affecta, aut fracta, luxata involvantur, ligentur, colligantur, contineantur, vulnerum labia adducuntur & conjunguntur, contracta diducantur, perversa & distorta dirigantur, ut ea, quæ præter naturam excrescunt aut coalescunt per ea auferantur & a se invicem segregentur & quæ pertracta sunt extendantur & in situm naturalem restituantur ac reposita in quiete retineantur, utilissime adhibentur. Præter hos scopos alii, horum instrumentorum generum, notantur, ut nimirum involvant, contegant, foveant atque calefaciant ac aërem frigidum arceant eoque motum fluidorum ac spirituum animalium impellentium naturalem, promoveant, defendant, constringant, attrahant, inhibeant, revellant, impedian, intercipient, derivent, expellant, firment tonum atque juvent elaterem partium atque fibrarum, divertant, sanguinis impetum remorentur, atque humores influentes repellantur, aut qui influxerunt, exprimantur simulque prohibeant, ne vasa nimias humiditates excernant ac ne humidi ut flatulenti tumores, in corpus adigantur &c. Nec non alii ipsis abscribendi veniunt effectus, siquidem & ex parte, lertas hærentesque alicubi partes peccantes ac subsistentes distribuunt, dividunt atque incidunt, per motum & constrictionem sic factam & sæpius repetitam: ea enim quæ moventur, magis adhuc quæ conteruntur attenuari apta sunt, in superque ex parte evacuant, etiamsi per insensibilem transpirationem. Pari-ter, non deneganda iis, ferocientium spirituum animalium ataxiam componendi virtus, in quorum quidem curatione aliqua eaque primaria propemodum intentio est, relaxare nervos & fibras, verum etiam contractio spirituum, ut minus præliantur, optimo remedio est. Hoc igitur ulteriori æstimatione, si perpendimus, nobis haud obscure constabit, per hæc media atque remedia, temperatam iustam atque ordinatam actionem quoque animalium spirituum servari ac promoveri, quoniam quicquid eorum contentionem immoderatam aut nimiam sedat, actionem secundum naturam eamque magis duraturam quoque eorum adjuvat. De singulis jam plura quædam & potiora quidem in medium explicatius proferantur.

§. III.

§. III. Fasciæ, quæ lintea longa lataque sunt, primo statim adhibentur nobis omnibus recens natis, quibus totum corpus ac artus nostri concinne involvuntur, ut forma connata eorum nitide & inconcussa nobis servetur, ut si forsan in membris vitium quoddam appareat vel figuræ vel situs, vel quantitatis, corrigatur seu, ut quod disparatum aut extendendum dividatur & extendatur, quod comprimendum comprimatur, aut quod distortum & male figuratum reducatur & emendetur. Adultis arctius oppressæ fulciendo blandeque comprimendo vasa sicque nimiam eorum dilatationem impediendo justum solidorum, robur conciliant atque conservant. Alii deinceps scopo artificibus inserviunt, ex linteamentis albi coloris, ut quod ex vulneribus effluit, facilius discerni possit, vetustioribus ac usu jam attritis & mollioribus, utpote ad hunc usum magis accomodatis, sat validis tamen adhuc, ne extensa dilacerentur, ut plurimum longis atque plus minusve latis, secundum filorum rectitudinem scissis, atque sine futuris & fimbriis ac limbis nodisque ne per harum inæqualitatem parti affectæ atque dolenti, molestiam quandam & pressionem applicatæ inferant, paratæ; siquidem chirurgi in statu præternaturali seu morbofo, partibus nimirum læsis, aut fractis, prolapsis, luxatisque aut discessis, ut v. gr. in futurarum capitis discessione, ab AR. BOOTIO inter affectus omissos, *vid. Observat. c. IV.* relata, atque a JAC. FONTANO, *vid. Pract. Lib. I. cap. III.* ac SENNERTO, *vid. Prax. Lib. I. cap. XXI.* observata, his præsertim opitulantur, ut nempe easdem involvant tegant ac contineant vulnerum labia & ossa discessa ad se invicem adducantur, defendantur, foveantur, aut reliquus apparatus aut materia chirurgica, emplastra, plumaceoli, quæque varia occasione superimponi solent, turundæ, splenia &c. debito in loco, cui sunt applicatæ contineantur atque firmentur. Necessaria hæc auxiliorum genera, maxime in vulneribus, fracturis atque luxationibus procidentis præ aliis sunt, atque quibus mediantibus solis a repositione ac coaptatione in integrum restitutionis sanationis & conservationis omne punctum ponitur. Inter omnes enim genuinos Medicos convenit, hæc beneficia sanationis & consolidationis naturæ circulanti soli accepta ferenda esse, & reliqua remedia vix aliud efficere, quam quod obstacula consolidationem impediencia removeant. Inter quæ aër liberior admissus primum propemodum locum obtinet, qui non modo omnia vulnera præsertim nervorum & tendinum, ac ossa denudata, ut notissimum est, depravat ac corrumpit, sed & horrida & periculosa sæpe symptomata infert; inter quæ modo nomina-

bo atrocem convulsionem, quam exinde aliquando notavit PRAESES. Imo consultius agunt ii, qui plurimis in casibus, praesertim primis diebus a remediis externis aliis, emplastris & unguentis vulgaribus, in hunc usum adhiberi solitis, potius abstinent, maxime oleis infusis, pinguibus, axungiiis, emplasticis, adstringentibus, acido austeris, quæ ægrotis ejusmodi ut plurimum fraudi sunt, sæpiusque periculi, imo non raro mortis causa evadunt, quæ modo poros cutis ocludunt, atque obturant, sicque multa insequentia mala inferunt: siquidem ubique tenendum id est, quod, quo transpirationis summe ubique necessaria pariter ac utilissima, in omni læsa vel affecta parte, maxime in aliqua a corde tanquam fonte caloris, remota, aut minori sanguinis quantitate perfusa, nec non in omnibus inflammationibus & erysipelatibus, de quibus funesta quædam exempla occurrunt, libera, eo felicius curatio succedat, atque quo magis hæc impedita, eo magis quoque sanatio impediatur. Igitur ut plurimum in his casibus, loco optimi & non raro sufficientis remedii est, membris fractis vulneratisque v. gr. ubi nimirum non adeo insignia vulnera, vel ea secundum longitudinem membri, vel secundum fibrarum protensarum dictum inflicta, & ubi nulla alia symptomata præsto sunt, si fasciæ spiritu saltem vini camphorato, aut cum aqua calcis vivæ aut scordii decocto herbarumque, quæ vulnerariæ vocantur, parato, observato moderato calore, imbuantur, læsæque parti bene applicentur, iisque, ut decet, deligatio fiat. Tractu demum temporis sequentibusque deligationibus sæpius emplastra tutius adducuntur. Sic sola concinna fasciæ ex linteo confecta ac circumvoluta cum emplastro deinceps carminante Sylvii sæpissime hernias puerorum curatas vidit M V Y S. *vid. Prax. Chir. Rat. Dec. IV. obs. III. p. 14.* Laneas fascias partibus inflammatis propria esse dixit IESSENIUS A IESSEN *in Institut. Chirurg. f. 42. Sect. II. Cap. I.* quibus nulla opus est adstrictione. Si fortiores desiderantur ex cannabi & membrana seu corio conficiuntur, quæ fractis nasi cartilaginibus speciatim sunt accommodatæ neque Hippocrati jam ignotæ. Adeo insuper necessarius apparatus fasciarum ligaturarumque est, ut vix læsionem in corpore atque operationem chirurgicam mihi nomines, in quibus non afferendus erit. Harum vero differentia ex variarum partium, variarumque earum læsionum conditionibus desumuntur, adornantur, varioque modo convolvuntur, atque exinde appellationes suas mutuuntur, ut compressoræ, circulares, asciales seu repentæ, continentes, expellentes, dividentes, reflexæ, fenestratæ, stellatæ, unientes, atque incarnativæ seu

seu agglutivæ item capitales, cataphractæ, mammillares, scapulares, fundæ, genuales &c. audiant. Quibus vero per series recensendis supersedere facile possumus, præsertim cum neglectis adeo multis superfluis, atque vanis ac irritis, paucioribus undequaue tamen aptis, idoneis & fidis, contenti possent esse chirurgi, nisi præter necessitatem has quoque multiplicarent. Exemplo modo sint ad vasorum vulneratorum ac discissorum ligaturæ, quæ post GALENUM atque CELSUM, a PARÆO, FALLOPIO, FABRITIO HILDANO & hodiernis, quibusdam prolixè sunt descriptæ, quarum plurimæ difficiles valde reddunt operationes, adeoque a GOVRMELINO jam dum *Chirurg. Lib. II. p. 125.* a FIENO *Tr. II. cap. VIII.* & ex parte ab HILDANO *de Gangry & Sphacel. Cap. XIX.* dejiciuntur, quasi promptius describantur forsân quam perficiantur. Quotuplices quæso sunt capitis fasciationes ad pompam futilem tantum multo opere adformatæ? Atque hodie adhuc indies nimia curiositate aut scrupulositate ducti, novas, pro capite, pro digito medio, pro auriculari, pro pollice, pro manu, pro pede, colligandis, pro herniis &c. excogitant, vix chirurgum, vix circumforaneum hodie invenies, qui non peculiarem, atque a se inventam ac novam fasciam venditet; ita & hoc hominum genus, magnò & specioso conatu, magna at inutilia dispendia fecit. De fasciis prolixè satis agit GALENVS *Lib. de Fasciis* qui hac de re cognoscendus est, qui & sex potissimum earum quatenus ad chirurgiam pertinent constituit, a materia scilicet, figura, longitudine, latitudine, structura & his, quibus constat, partibus. Scilicet quod figuram in specie attinet, quædam longæ & æqualiter latæ sunt, quædam conglomeratæ, cujusmodi sunt eæ, quibus fracta membra deligari solent; aliæ scissæ, uno quidem linteo constantes sed eo, vel extremis partibus scisso, quibus mammis vinciendis adhibent, vel mediis, in hernia usitatis: Aliæ assutæ, quæ ex multis quasi habenis consutis efformantur, in varia capita desinentes, quales capitis vulneribus applicant, &c. Ex his pluribus quidem superadditis fulcra ad continendum adhibenda, parantur.

§. IV. Affinia ejusmodi instrumentorum generi, fasciis minus his lata, ex panno laneo, lineo aut gossypio, segmentis membranæ confecta ligamenta sunt, lippis (ut ajunt) atque tonsoribus nota, affinis propemodum & consimilis harum quoque non modo commendatio, sed & censura, siquidem multa otiosa inutilia superstitiosa atque ridicula figmenta occurrunt, quæ ab ignaris & simplicis ingenii ejusmodi ordinis hominibus pertinacissime circa earum conficiendi modum, figuras, colores

res &c. observantur: Tanta circa non entia intelligentia est! Quis quæso chirurgorum facile hodie adhuc ligaturam, pro venæ sectione instituenda, aut filum pro setaceo excitando, non nisi alio, quam rubro colore tinctum adhiberet. Quam multi non religioni sibi ducunt hæmorrhagias, tincta alio colore, quam rubro, ligatura compescere? Vix majorem attentionem alia merentur, quæ circa ejusmodi proferuntur, v. gr. quando ligaturam rubram sericam, quæ per bufonem vivum prius ducta est, pro hæmorrhagia sistenda, aliis præferunt, otiosa illa persuasione ducti, ac si archeus in furore constitutus, sanguinem præter naturam & cum impetu ejiciens, qui omne commercium cum horrida hac bestiola reformidat, ab hoc conatu irregulari desisteret, inque se ipsum quasi contraheretur, reminiscencia & horrore ab hoc animali ejusque effluviis facto. Quidam aliam rationem, ast æque ficulneam quærunt, in spirituum animalium refrigeratione hincque adstrictione, quoniam bufo umbra & frigore delectatur, unde etiam in hunc ipsum finem lapidem, ex bufonum capite exemptum, commendant, eumque pro abortu præcavendo collo, appendunt. Ejusmodi farinæ quoque est, quando naturalis magiæ Scriptores, magnis laudibus, cingulum ex exuviis anguim confectum, nudumque corpus mediante eo vinciendum ad conservandam sanitatem, vitamque prolongandam extollunt, ex illo, quod angues renovare juventutem suam, depositis exuviis, credunt. Similiter dubitare licet, an firmiori fundamento nitatur ea persuasio, qua a superstitionis obstetricibus perhibetur, parturientem mulierem, non nisi ligatura aut cingulo ex corio humano confecto, juvari, reddique utero compresso partum facilem atque felicem. Quibus enim vires imaginationis perspectæ sunt, facile pervident, effectum hunc multum accedente imaginatione promoveri, dum constriction, in illa animi aversione a corio humano efficacior redditur. Hanc etiam (ligaturam) præ aliis valere in scrophularum extinctione contendunt. Admodum infida hæc sunt, cum existimare liceat, per paucis hæcce adeo abominabilia esse, ut notabiles exinde ejusmodi effectus possent sperari, ut taceamus, horrorem & abominationem & inde natam alterationem, in corpore, sanguinis & spirituum animalium affectionem, per quam expectatus effectus quandoque producit, noxam quoque quandam eamque non levem, non raro contrahere posse, quanquam passim alibi videmus vim imaginationis & exhorrescentiæ potenter satis quandoque se exerere, quamquam etiam objecta sensus admodum offendentia, animales spiritus retrocedere quasi cogunt, ut in fugam versi extremas præsertim corporis

poris partes intactas, ad tempus relinquant, quando v. gr. ex conspectu alterius sanguine manante, aut extravasato, tortura, strangulatione, quidam animi deliquium patiuntur, aut acida edentem aut potantem videntes, dentium mox stupiditatem experiuntur, quando alios in diuturnos gyros actos, aut rotarum agitationem diu adspiciunt, vertigine corripuntur. Sic multi visis tantum pilulis aut vomitoriis aut aliis objectis ingratis, aut saltem reminiscencia ejusmodi facta, non modo caput collumque inhorrescere sentiunt, sed & alvum dejiciunt, aut ructant ac vomunt. Tali fundamento, id est, lubrico vel nullo fundatur ea persuasio, quam PLINII forte autoritas induxit, qua creditur, destillationes, quas vulgo vocant a capite per ligaturas dolorificas omnium optime, per lorum, ex pelle canina dissectum & artubus obvolutum, arceri. Ejusmodi fere etiam est, quando chirurgi ferulis & asseribus e ligno betulæ & quercus singularem virtutem, sanguinis effluxum enormem sistentem, audacter nimis tribuunt. Hæc & alia passim obvia vulgo quidem admissa sunt, sed a prudentioribus derisa est ejusmodi hominum vanitas, quare ab his & similibus aliis nugis animum calamumque retrahamus, & verum potius usum ligaturarum quoque memoremus.

§. V. Ligaturarum in statu hominum sano aliquis etiam ac in morbo præ aliis ejusmodi instrumentorum generibus frequentior ampliorque ac pro vario adstrictionis gradu diversus usus est, atque pro leviori partium vasorum &c. quibus naturaliter talis vis inest, qua nituntur proprium angustare canalem, nimis laxatorum & distentorum firmitate, pro majori constrictione, vellicatione imprimis excitatione, spiraculorum cutis refectione ac humorum in extremitate corporis diffusorum dissipatione, evaporatione ac discussione, item inhibitione, sedatione, revulsione, derivatione & repulsione aut circa membrum affectum vel partem vicinam aut etiam appositam, pro re nata ex necessitate adhibentur. Ea non raro earum necessitas adeo urgens est, ut horum ipsorum instrumentorum applicationem injungat, ubi nimirum certis in casibus contra indicantia alia dissuadent, v. gr. Sistamus ex enormi hæmorrhagia adeo debilitatum, ut revulsione causa venam secare, majoremque per eam sanguinis copiam effundere suspectum ac temerarium admodum sit, aut per refrigerantia incrassantia &c. humoribus remoram injicere periculosum, cum facile exinde nutans ac pene extincta vitæ flammula penitus perire possit. Tunc autem longe securius ligaturæ injiciuntur per manum chirurgi dirigendæ ac moderandæ, nunc intendendæ, nunc remittendæ. Ejusmodi casum WILLISIVS in *Pharm. Rat.*

Part. I. Sect. III. cap. II. indicavit, de hæmorrhagia, cujus causam non copiam sanguinis aut æstum præternaturalem & furibundum, sed spasmodicam quandam & intervallatam arteriarum contractionem habuit atque accusavit. Hanc hæmorrhagiam repetita sanguinis missione ac multa propinata interna medicamenta aliaque in usum ducta, deterio-rem ac maxime verendam reddiderunt, ægrumque in summum vitæ periculum conjecerunt; quem vero tandem vincula chirurgica tempesti-ve adhibita feliciter ex eo eripuerunt, atque junctis tantum interne pau- cis dosibus pulveris cujusdam absorbentis ac antispasmodici, sineque ul- la recidiva insequente, pristinæ sanitati perexoptatæ, benedicente Deo restituerunt. Eæ vel mites sunt, quæ in venas saltem agunt maxime, quoniam minus firmas tunicas habent & pleræque magis versus in su- perficiem corporis locatæ sunt vel fortiores venas pariter atque arte- rias angustantes atque adeo dolorificæ, quæ undique arctius fortiusque membrum constringunt, ut ultra ligaturam nullibi arteriarum pulsus percipiatur; tunc vero in sano membro probanda prius deligatio quam in ægro periculum faciendum Conf. HOLLERIUS *de Mat. chirurg. Lib. III. cap. I.* In genere hoc tenendum: ut non adeo validis in gracilibus corporibus, in obesis arctioribus quidem utantur.

§. VI. Mitiores omnium ac laxiores ligaturæ saltem per fascias pro- fomentatione & inhibitione ac defensione, tegendo partes circumvol- vuntur. Pedes tunc præ aliis his tegantur e re est, siquidem aliis hæ extremæ partes, natura frigidiores habentur, & aëri frigidiori magis ex- positæ sunt ac solo, fundo aut saxi, tegulis, cæmento ac terræ frigidæ semper proximæ eamque contingentes, adeoque fomento magis egent, atque calore debito vitali, quem commode eadem conservant, atque conciliant, obtegendo & defendendo eas; atque dum arcent frigus, quod poros cutis constipat atque corrugat, & ad centrum ad periphe- riam spiritus ac humores avertit, sicque repellit, suspendit atque impe- dit, motum fluidorum ac spirituum impellentem naturalem, exsuscitant ac promovent, sicque per consequens transpirationem insensibilem uti- lissimam procurant, quo lentus stagnansque humor simul movetur atque depellitur. Rursum tumentes partes præsertim pedes œdematosi & ul- cera antiqua atque aliæ ejusmodi labes, in quibus balsamus naturalis hu- morum laudabilium deficit, & vegeto elatere solidæ partes a distensio- ne per stagnans situque peccans serum, destituuntur hydropicorum, cachecticorum atque scorbuticorum, apprime & ex necessitate fasciis probe teguntur & obvolvuntur, utilissimeque foventur ac defenduntur

ab aëre ambiente, qui vulnera ulceraque corrumpit, putredinemque facile inducit &c. Mediocres (ligaturæ) undique quidem & membrum cingunt & comprimunt, ita tamen, ut ultra ligaturam pulsare arteriam sinant; neque adeo notabilem ruborem & tumorem multo minus ullum doloris sensum efficiunt. Hæ ibi & alibi præsertim pro scopo præservatorio aut in casibus levioribus & quietis gratia ut &, ut vena secanda pateat &c. ab ipsis chirurgis applicari solent. Fortiores paulo, plus minusque dolorificæ, in grandioribus vero locum inveniunt, imo requiruntur & reliquos supra modo indicatos effectus, ut revulsiones &c. producant.

§. VII. Applicantur autem ligaturæ primum eæque quidem fortes, tanquam admodum necessaria remedia, brachiis, digitis, pedibus, ut modo indicatum, in hæmorrhagiis sive integris partibus, atque in iis præcipue quarum causa non in copia sanguinis aut fervore sed spasmodica quadam & intervallata arteriarum contractione hæreat, quod a WILLISIO observatum legimus in *Pharm. Rat. P. II. Sect. III. cap. II.* sive in unitate solutis, ut hæmorrhagiis narium enormibus, hæmoptysi vulneribus majoribus & periculosioribus, vasis majoribus præsertim arteriis confectis, ut nimirum omnem fluentium impetum cohibeant atque refrenent, ut vulnerum labia vaforumque patentia orificia comprimant obicemque ponant, sanguinis enormem effluxum avertant, ut derivent atque ad alias partes revellant. Sic vel in vulgus notum remedium est, illudque familiare ipsi, in fluxu præternaturali & magno narium, digiti minimi in dextra manu si ex dextro nare quidem fluat sanguis, vel in sinistra, si ex sinistro, serico rubro arctior sc. ligatura, RONDELET. *v. method. med. morb. Cap. LXIII. p. 281.* & GVIL. FABRICIVS HILDANVS *vid. Observat. Cent. II. obs. XV.* in hoc casu ipsos testiculos vincire jubent CHRYSIPPVS CNIDIVS ut ex *Erasistrato memorat* GALENVS *de V. S.* homini cuidam sanguinem spuenti membra vinculis circumdedit, quod ille consultius duxit, quam si sanguis e vena missus fuisset. Si ex faucibus interioribusque partibus sanguis processit & metus major est & cura major adhibenda A. COR. CELSVS *Lib. IV. de Med. Cap. IV. p. m. 204.* Consilium quoque affert suum quando ita loquitur: Licet Asclepiades ligaturas adeo non prodesse ut etiam inimicas esse proposuerit, tamen id sæpe commode respondere experimenta testantur. Neque tamen pluribus locis deligari necesse est; sed sat est infra inguina & super talos, summosque humeros, etiam brachia: Hæmoptycos juvare cingulum pectus constringens sua experientia confirmat DIMERBROECK *Observ.*

§ *Curat. med. p. 70. obs. 56.* Ea autem in illis simul habenda ratio est, ut sensim eadem præsertim inhiuantur, ne inflammatio copiosior, puris generatio aliaque mala, magnum negotium pariant. Neque nimis cito ligatura est solvenda ne exortum malum recrudescat. Fortius etiam stringantur necesse est, in nimio atque rebelli mensium lochiorumque fluxu supra genua & cubitos. Pro quo scopo præsertim admodum eas laudavere HIPPOCR. *Lib. II. Sect. V. de morb. mulier.* GALENVS *Lib. ad Glauconem Cap. XIV.* AETIVS *de remed. Lib. XIV. cap. XXIV.* PAVLVS AEGINETTA *Lib. III. cap. LXIII.* AVICENNA *cap. de Ligat.* ZACVTVS *Lusit. Prax. Hist. Lib. III. cap. II.* FONSECA *Tom. I. Consult. LV.* Quorum autoritas longe anteferenda aliis secus opinantibus, vid. AVGENII FERRERII *Castigat. Cap. XXVII.* ALEX. BENNETI *Theat. Tabid. Exercit. XXVI.* Similiter tales in congestionibus humorum, eorumque moliminibus, nec non ipsis rheumatismis, malo ischiadico ut & hypercatharsi, aliisque alvi fluxionibus præternaturalibus & pro avertendis iis ac interceptiendis aliterque dirigendis, in partibus extremis aut oppositis, injectis reliquis remediis, ut frictionibus cucurbitulis siccis, balneis atque lotionibus & ejusmodi, quæ impetum humorum intro confluentium ad alias partes divertunt, atque revellunt. Si non præferendæ certe tamen æquiparendæ sunt. Sic Practici in inflammationibus atque in specie quidem, angina ac pleuritide primis in principio vincula dolorifica artubus injicere, frequenter imperant insensibilemque revulsionem certe expectant. Conf. & LEONH. BOTALLVS *de Curat. per sangu. miss. p. 287.*

§. VIII. Dein adhibentur, ut plurimum tamen mediocres, pro deligandis membris vario modo læsis prolapsis & situ peccantibus, partibus ambustis, vulneratis, exulceratis & apostematibus foedis, fractis atque luxatis, ac distortis ossibus, observato rite deligandi modo, ut nimirum si v. gr. inflammatio quædam supervenerit, luxationem jam repositam, deligatio laxior sit, simul ac vero remiserit ea, alia eaque fortior institui potest, atque firmior adhuc, cessante penitus inflammatione, cum emplastro aut inunctione facta, sequatur. Deligationis, ad quam una aut plures fasciæ adhibentur, initium fiat in latere, per quod os procidit, ibidemque etiam fascia firmius constringatur inter adscensum descendumque fasciarum. Coëterum scilicet in tali negotio, fasciationis nimirum ita procedendum venit, ut in luxatione v. gr. altera fascia eaque breviori quidem vel sicca, vel liquoribus adstringentibus & roborantibus, spirituosus balsamicis v. gr. vino austero, tepido, phlegmate vitrio-

vitrioli, decocto salviæ roris marini aliarumque herbarum, radicum, & seminum aromaticorum, oleo myrti rosarum florum sambuci, spiritu vini simplici & camphorato madefacta, aut iterum contorta & expressa; circa ipsam luxationem ter convoluta, ad sanam membri partem quinques vel sexies circuitus asciales fiant, & dein altera fascia unius capitis & priori duplo longa luxationi, sed in contrariam plagam bis vel ter circumducatur; ex quo quater vel quinques versus inferiora flectatur, mox iterum per totam ligaturam & sursum ad finem usque prioris redeat; tertia modo addatur, duorum capitum tertia sui parte, circa luxationem stringatur, breviorique capite adscendat, altero vero descendat, quod item per totum membrum superius prodeat, ibique bene firmetur. Atque de reliquo membris, convenientibus oleis & balsamis unguentis inunctis, emplastrisque impositis ita deligatio fiat, ne membrum affectum ac læsum totum undique tegatur, sed spatium latitudinis pollicis, in membri latere intercedat, nec inæqualitas premat ac dolores afferat, ut locus transpirationi ac tumori liber quidam concedatur ac ut emplastrum facilius detrahi possit &c. Commodæ & congruæ deligationis tibi signum primum erit, si patiens bene eam ferre possit, si levis & mollior saltem tumor sequenti die, in membri læsi extremitatibus, conspiciatur. Supponimus quoque ut membrum luxatum, aut ossa distorta legitime extendantur, neve in extensionibus fractorum ossium, ægri præter necessitatem torqueantur, & recte in sedem pristinam reponantur. Addimus quoque, ut aliis accidentibus bene simul prospiciatur, ut tumori, inflammationi forte supervenienti &c. In aliis læsionibus atque rupturis aliarum solidarum partium, ut in prolapsu uteri & herniis fasciæ, ligamenta & cingula primum adducuntur, & ita accommodantur, ut totam partem v. gr. scrotum amplectantur atque sustineant.

§. IX. Alia occasione ac ratione hisque finibus firmandi promovendi revellendi atque derivandi educendique maxime, commode potimur, si serum in partibus aliis stagnat, aut ad eas copiosius congeritur, seu potius in iisdem continetur in corruptelam pronum, ut partes comprimantur, moveantur, & educatur illud, derivetur & revellatur aut repellatur, aut etiam ulterior influxus atque congestio feri avertatur & prohibeatur, ut reliquum partibus incumbens ejus, vel a venis ac lymphaticis vasis resorbeatur vel per emunctoria solennia eliminetur, per glandulas præcipue motas & vellicatas, quod comprimendo partes potissimum fortius quidem applicatæ fasciæ & ligamenta efficiunt, ut in scroto, uteri exterioribus ac ipso abdomine aliisque partibus tumefactis &

anasarca ut & ascite laborantibus atque flaccidis pendulisque manentibus partibus. Certe, ex debilitate viscerum natus hydrops omnium optime fasciis laxata stringentibus juxta victum siccum, roborantia medicamina interna, corporis excercitiis curatur utpote quæ causam primam respiciunt, cum ea purgantibus saltem tentata infida sit, quoniam post paucos dies tumor iterum redit. Pedibus hinc œdematosis, quo frequentius hi tumores occurrunt, eo utilius etiam his hoc remedii genus applicatur. Applicatur autem idem utilissime, circa nocturnum præsertim tempus, quo augmentum perpetuo ejusmodi tumores ferosi capiunt, quare tunc, ut roborentur firmenturque sic partium fibræ, apprime convenit. In hydrocephalo recens nati infantis, has ligaturas expulsi-vas ideo dictas præeunte RIVERIO *Observ. 6.* magni usus quondam fuisse sineque ullis aliis remediis optatum effectum præstitisse memini. Conveniunt in hoc morborum genere (hydrope) magis in principio mali atque mobili & nondum confirmato aut inveterato. Nec est cur adeo timeas cum vulgo, magnopere, repulsionem nocituram feri, loco peccantis, ex pedibus tanquam partibus externis atque extremis, ad internas, & nobiliores æque ac per interna remedia, purgantia, diuretica, sudorifera educendum, cum potius reputandum sit, serum stagnans quod vitalem exuit motum, adeoque & suum perdidit usum, noxam proxime & certissime inferens, omni modo, movendum esse & evacuandum: si enim repulsio decenter modo fiat, & conformiter atque secundum leges naturæ, non subita mutatione ac habita ratione affectæ partis, materiæ contentæ, fluidæ & stagnantis, internorumque quoque medicamentorum præmittendorum ac jungendorum, universalium, evacuantium, alterantiumque non potest esse nociva, secundum salutare monitum HIPPOCRATIS quod habet *Lib. de Medico Cap. III.* in genere de his tractantis: *Quæ vero afferuntur omnia considerare oportet ut conferant, maxime si ægræ parti adhibebuntur: Talia autem sunt ligamenta & medicamenta: Utrorumque enim usus opportunus itemque negligentia magnam differentiam habet.* Præter sæpius probatam experientiam, si testimonia hujus rei desideres, sunt tibi primum GALENI *Lib. II. de art. cur. ad Glauc. cap. II.* qui sequentem ibi in modum scribit: *Si vero in aliquo ex membris extremis tale fuerit œdema, incipiendo ligaturam in imis partibus finire oportet, in altioribus ejectionem & compressionem & universam distributionem faciendo velut in fracturis.* Curationis enim intentio aut indicatio in ejusmodi affectibus mixta est, una quidem, ut earum substantiæ aliquid dissolvatur, alia vero ut aliquid congregetur ac restringatur. Se-
quentia

quentia addit: Ego in diuturno œdemate, ubi prius partem oleo illinifsem, deinde spongiam ex lixivio apposuifsem, atque vehementius strixifsem, affectum perfecte curatum vidi, ad discutiendum & incidendum: id quod in omnibus fere diuturnis affectibus probatum haberi, non ignoramus. Succedant alii ex Græcis Latinisque quidem; Ex illis AETIVS sufficere potest, qui *Tetrabibl. III. serm. II. c. XXXI. p. m. 589.* de hydropis cura latius tractans, sequentia quoque profert: Amplius autem tum ventrem tum intestina ligamentis adstringant, itidemque omnem cutis coercent tumorem: Fiant autem ligationes ab extremis partibus incipiendo, & ad supernas procedendo. Ex his præsertim CELSI egregia & nitida scripta evolvenda, in quibus *Lib. III. cap. XXI. de Med. p. m. 165.* legitur, Si id morbi genus est, quo in partem multa aqua contrahitur, oportet malagma habere impositum quod digerat, idque ipsum superimposito triplici panno, fascia, non nimium tamen vehementer adstringere, quod a Tharria profectum servatum esse a pluribus video. Nec desunt ex recentioribus, qui hujus rei testimonia afferunt, ex quibus notissimi sunt, & primo quidem loco nominandus omni fide dignus PET. FORESTVS, qui *Observat. XXXVI. Lib. XIX. p. m. 255.* de monacho quodam Franciscano refert, quod cum crus ejus sinistrum œdematosum neque fomentis neque linimentis in totum detumesceret, sola deligatione fortiori per ligaturas præter omnium expectationem ex asse curatus fuerit. Succedat F. PLATERVS, qui *Prax. Tom. III. p. 273.* scribit: Fasciis vincire & stringere locum, ubi œdema enascitur, admodum ipsius incrementum prohibet, atque Idem *p. 304. l. c.* repetit, dicens: Vbi in intumescencia pedum diffusa, alia ab ea, quam tumorem œdematosum vocavit, molliori a seroso crudoque succo prognata, nominatim in hydrope curanda, occupatur. Topica quod attinet, inquit porro, ejusmodi humiditates, unde pedes intumescunt, etiam ab initio repellendæ erunt &c. Inprimis autem, pergit, Fasciæ hic aliquid singulare efficiant, intumescenciamque hanc continebunt, tandemque ne amplius redeat, prohibebunt, si indies fascia longa palmam lata ab imo pedis incipiendo, & ad genua usque procedendo, pedes stricte mane, dum nondum adeo, atque interdum fieri solet, intumuerunt, obvolvuntur, sicque donec iterum decumbant, vel etiam dies noctesque retineantur, quod & ocrea molli, arcte per futuras in longum pedi adstricta aliisque artibus præstari possit. Atque in *Observ. Lib. III. p. 654.* exemplum curati sic œdematosi cruris indicat. Referatur etiam DAN. SENNERTI testimonium, qui *Prax. Lib. III. P. VI. Sect. II. Cap. III. p. 743.* cruribus hydropicorum tumidis & inflatis commendat, ut spongia convenienti decocto vel lixivio, vel aqua imbuatur, iterum-

que

que exsiccetur & fortiter cum fasciis circa crura ligetur, donec detumeant. Hæ quidem causæ sunt, cur in ejusmodi malis, hanc fasciarum applicationem aliis topicis, quæ alias adhiberi solent, ut furfuribus & arena fotibus & balneis laconicis & carceribus medicis, calidis & vaporosis &c. æquiparemus si non longe anteferamus. Similiter si a venæ sectione lymphaticum vas tactum læsumque sit, ut laudabilis ille roscidus humor effluat, quique effluxus, per longum sæpe temporis intervallum, continuo durat, ligaturæ maxime necessariæ sunt, adeoque nunquam omittendæ, qualem læsionem & lymphæ effusionem, per plures septimanas durantem observasse & juxta ficcantia adpersa remedia ligaturis adhibitis, sanatam effluxumque lymphæ inhibitum vidisse, nobis contigit. Quando dilatatis vasis, serum alicubi, ut in cruribus præcipue stagnat, vel minus motum hæret, accedente inprimis scorbutica labe, toties erosa cute, subnascuntur ulcera illaque mali moris atque rebellia, vincula ejusmodi circumducta partes constringentia impediendo, ne in vasis dilatatis hæreant liquida situ peccantia, apprime proficua sunt. PLATERVS alium fasciandi modum, in erysipellate œdematosorum crurum, cum ulcere proponit. *Observ. Lib. II. p. 501.* qui sequens est; curandum, ut fascia oblonga ex panno linteo, palmam lato, paretur, insuendo petias pedis distantis spatio, sic plicando, ut sine rugis se cruri accommodet, eaque a pede incipiendo, sursumque per crus ad genu usque involvendo crura, matutino tempore obvolvatur æger totoque die relinquatur, sic enim, ne inter deambulandum, crura intumescant, cavebitur. Quam fasciam, si in lixivio interdum coquatur, beneque expressa applicetur, validius tunc sic operaturam affirmat. Coëterum secundum Hippocratem de Fracturis, aptandarum fasciarum, duæ sunt indicationes a parte affecta, altera ab ipsa affectione desumptæ: Nimirum quoad primum crus ex. gr. exporrectum deligandum, brachium vero inflexum & pectori adactum, ne musculorum figura turbetur. Quoad alterum in ulcere cavo, sinuoso multam saniem eructante, deligationis & constrictionis a sinus fundo ducendum initium & in ejus orificio desinendum, ut contenta sanies & ulceris labia nimium disjuncta adigantur.

§. X. Dum vellicant fortiores, ita ut pars rubedine quadam inducatur & pruritu quodam afficiatur, sæpius relaxatæ & repetitæ ligaturæ, nullum dybium est, quin & ad nutritionem partium facere possint, quia plus spirituum animalium & sanguinis ad partes quasi retrahunt atque nutritias laudabiles, aptas & necessarias huicque functioni destinatas partes, in exteriora validius alliciunt, inutilem vero & excrementitium humo-

humorem in musculis & carne hærentem simul digerunt, dissipant, partesque nutrimentum accepturas, attritu frictuque suo, quem efficiunt apprime disponunt, & præparant, simulque debitum tonum & robur sive legitimam partium nutriendarum strictionem, motricem & elasticam illam vim, utpote requisita admodum necessaria, ad hanc utilissimam pariter ac præcipuam animalem functionem, efficiunt, sicque omnia fere assimilationis adjumenta, frictionum atque flagellis & ferulis percussionum, quas veteres ad bonam corporis habitudinem conciliandam frequentissime adhibuerunt, teste GALENO *Method. XXIV. cap. XVI.* ad instar, quæ alias ad hunc scopum convenientissime faciunt, præstant. Nec deest experientia, siquidem, ut expertis notum est, partibus emaciatis, ut paralyticis, si tales afferuntur, quod eas repleant atque impingueant. Testimonium hujus rei præbet JOH. JESSENIUS in *Instit. Chir. p. 45.* qui, dextro crure ex atrophía tabido, sinistrum crus ad inguen usque ductis, a pede circumvolutionibus constrictoriis, dextro item brachio sic vitiato, sinistrum a manu, ad axillam progressu facto, utilissime affecit atque sic restituit. Rursum nutritionem partis alicujus nimium & præter naturam auctam fortius adhuc restrictæ diuque restrictæ ligaturæ compescunt atque avertunt. Huc referam quod testatur F. PLATERVS in *Observ. Med. Lib. III. p. 651.* fasciationes quoque compressorias in crure uno triplo majori altero restituendo juxta alia multum profecisse. Chirurghi ideo his sæpius opus habent, ubi præcipue callus ex fracturis sanatis præter modum excrevit, quam præternaturalem excrementiam ligaturæ paulo arctius restrictæ, addito emplastro emolliente ac discutiente aut lamina plumbea super ligata reprimunt & impediunt commode.

§. XI. In spasmodicis præcipue artuum, brachiorum, pedum, manuum, digitorum, spiritus animales a conflictu revocant & in quietem componunt atque priorem & determinationem excutiunt, per irritationem nimirum ad extra factam vehementiorem simulque impediunt, ne spasmi adscendant ad superiores partes speciatim in cerebrum, ligaturæ fortiores, qualem effectum videmus etiam in aliis, ut vesicatoriis, in deliriis. Quam intentionem feliciter obtinendam experimentum apud BAC. DE VERVLAM *Hist. Natural. Cent. X. §. 968. p. m. 960.* laudatum habetur, per vincula ex dentibus equinis & cochleis marinis efformatum, institutum, quibus tamen haud multum præ aliis vinculis tribuendum esse potius censemus. Practici pro hoc scopo exuvias anguis, anguillæ aut etiam ex humano corio desumptum, lorum eligunt. Imo ipsæ con-

vulsiones alibi in corpore obortæ, ligaturis fortioribus, in extremis corporis etiam applicatis componuntur, ut vel in vulgus notum est, atque perspectum, per ligaturas lato & commodo vinculo fortes easque repetitas hypochondriorum, artuum atque pedum & circa genua suffocatione hysterica detentas foeminas, excitari: Multum præsertim, ad sublevandum dirum hunc affectum, confert imi ventris compressio, cingulo ex corio moscovitico confectio in puerperis maxime hoc malo correptis, juxta enim compressionem hujus corii odor fragrans tum hystericis quam hypochondriacis admodum est amicus. Conf. & JOH. BAPT. MONTANVS *de Affect. Mulier. Conf. IV.* A. CORN. CÆLSVS *Lib. IV. Cap. II. p. m. 188.* in curationibus morborum qui nascuntur a capite etiam modum id devinciendi meminit. In ipsa epilepsia & maxime imminente paroxysmo eadem non sine causa suadentur. Huc refertur observatio, quam memorat JOH. CONR. DIETERICHVS in *Jatro Hippocrat. p. 851.* quod regnante Carolo IV. Imp. R. in superiori Germania, maniaca passio saltatoria, quam choream Sti Viti appellant, multos homines epidemice velut invaserit, ut saltarent nimirum tam viri quam foeminæ, ita ut caderent in terram spumarentque inde surgentes, quasi mentis impotes, tam diu gyros agerent donec deficerent vires, & quod unica medicina fuerit si fortissime ligaturis funium ope manus pedesque constringerentur. Pariter in melancholia hypochondriaca, diversis in partibus applicatæ revulsione causa, haud inutiles esse possunt. ORIBASIVS, AETIVS, AVICENNA ligaturis iisque arctioribus utebantur, ad somnum conciliandum, eam præsertim ob causam, quod his solutis caput ipsum repleatur. Conf. SAXONIA *Prælect. Pract. P. I. cap. XXVI.* Necessariæ æque ac utiles sunt in motu voluntario abolito, vitiis sensuum externorum, in stupore, apoplexia, paralyti, atque omnibus morbis soporosis dictis, quoniam sat valide excitant, fortissime constrictæ, sæpiusque repetitæ. Hinc etiam in syncope opem admodum opportunam conferre valent, Exinde porro fluit, quod suffocatis, aqua submersis, attonitis & tanquam mortui jacentibus in pedibus & brachiis, fortissimis quidem his applicatis efficaciter succurrere possint. A PLINIO haustum habemus, catarrhos omnes a capite arce-re constrictiones pollicis pedis.

§. XII. Inter hæc mala quoque frequentissimi acerbi & pertinaces, sive a violenta distensione sive rosione membranarum dolores oriundi, capitis & abdominis sunt, atque inter hos quidem dolor colicus, frequentissime etiam, vel a vulgo ad eos sedandos & caput & ventres fasciis la-

tis & cum euphoria vinciuntur. Quanto autem ea colicæ species, quæ convulsiva vocatur, immanior, tanto necessaria ac utilis earum applicatio est. Dubito vero, an non sit commentum, quod multi tamen multa asseveratione affirmant, intestina exsiccata, aut lorum ex pelle lupi scissum, abdomini applicatum leniterque saltem constrictum optime curare colicum dolorem, quod affirmare propemodum BACO DE VERVLAM. videtur; vid. *Hist. Natural. Cent. X. p. m. 961.* exinde quod lupo animal sit maxime vorax, quodque valide devorata digerat, atque quod fieri possit, ut partes ejus ab eo desumptæ corroborarent animales spiritus; quæ vero allata ratio nobis & forte paucissimis vix sufficere potest. Aequè in aliis abdominis doloribus, qui a diarrhœis, dysenteriis & passionibus iliatis & hypochondriacis ipsisque melancholicis atque cardialgicis, nec non vomitibus symptomaticis, hypercatharsi, item qui a flatibus intestina vehementer inflantibus, ut tumeant, (flatus enim potenter ventri circumjectæ ligaturæ educunt) & umbilici regionem potissimum occupantibus proficiuntur, hoc remedii genus sedulo commendare licet. Etenim juxta ipsum caput nulla corporis regio spasmodorum atque dolorum proventu fertilior est, quam abdomen ejusque inibi contenta viscera, illic enim, ut in intestinis maxime tenuibus ac in mesenterio fomes atque materia nidulatur, spasmodicarum contractionum uberrima, ita his deligatio & adstrictio per fascias & pro auferendis aut curandis & pro avertendis & præcavendis iis atque aliis pessimis accidentibus, admodum opportuna est. Hoc Belgæ præ aliis sibi quam commendatissimum habent, quare familiare illis cingulum latum est, quo abdomen ejusque viscera convenienter continent, quam continentiam ad digestionem alimentorum, egestionem excrementorum, flatuum ejectionem juvandas, ruptiones, hernias &c. præcavendas, nec sine causa atque ratione facere sibi persuadent, unde etiam illud cingulum *die Holländische Gesundheit* vocant. Ad hæc mala avertenda tali cingulo, equites, pugiles, saltatores, cantatores, tubicines, bajuli, rustici mercenarii &c. maxime opus habent. Alii etiam varium in usum, eadem adhibent. Siquidem v. gr. ne assumptum catharticum vomitu rejiciant tam abdomen quam corporis extrema ligant atque constringant. Scythicæ bellicosissimæ illi genti, fami minuendæ inserviebant AVLO GELLIO in *Noct. Attic. Lib. XVI. c. XVI.* memorante. In singultu pariter atque aliis ejusmodi abdominis vitiis non contemnendum illud quidem est, si nimirum fortius venter constringitur, quod remedii genus, in hisce casibus, veteres quoque insigniter collaudaverunt. Sic in inflammatione ventriculi ut & renum &c. ligatu-

ræ partium extremarum revulsione quidem causa, apprime utiles esse possunt. Sicque HOLLERIVS *Lib. I. de Morb. intern. Comment. in Cap. XVII.* & SOLENANDER *Sect. II. Consil. Med. Conf. VII.* optimum, in cruditate, ventriculum arctius ligare censent, quo flatus impediuntur & digestio rectius celebretur. Omnes pariter ventris fluxiones, in brachiis supra genua & pedibus ligaturis fortioribus applicatis revulsione, quam præstant, commode mitigantur. Pro eodem scopo phreniticis pedes fortissime ligantur. Providæ foeminæ in infantibus pro urina facilius reddenda, regionem vesicæ fasciis, leviter comprimere sciunt, adultis, quos obstructio talis infestat, similem in modum hanc compressionem quoque tentare suadendum venit. Porro, ut ad prius paulisper redeamus, ophthalmiam, odontalgiam, otalgiam, brachiis fortiter constrictis sæpiusque iteratæ ad instar frictionum majorum, rubefacientium & vesicatoriorum feliciter auferunt. GALENVS *V. Method. med. ad Glaucon, Lib. I. cap. XVI.* pro revulsione juxta alia huc facientia remedia, ut clysmata acria, infernarum partium frictiones capitis dolorem, ligaturis etiam fortioribus, curandum proponit. In dolore podagrico hoc utile consilium in *Consil. Medicinal. suis Sect. V. p. 436.* modo laudatus REINERVUS SOLENANDER addidit, ut toto decursu morbi (podagræ) temporis, pedum juncturæ, intercepta quasi humorum in eas defluxus, via muniantur, ne ab agitato levibus medicamentis humore, nec vehementer tracto, aliquis in imbecilles artus irrepit. Hoc aliqua ex parte optime fieri autumat, si crura, supra genua, ligamento lato ac longo obvolvuntur, præcipitque simul, ut prius imbuatur posca, quæ ex aquæ in excisæ quercus trunco stagnantibus partibus V. & VI. & una aceti acris, composita sit. Obfirmabit (pergit) magis vias fasciationis istius usus, si in prædicta ista aqua prius quercinus muscus, cortex item quercus interior, galla, macer Græcorum aut similia quædam incocta fuerint, vel poscæ istius loco pars fasciæ defensivo dicto emplastro, ex bolo armeniae, sanguine draconis, thure pauco, albuminibus ovorum & aceto composito, cui parum unguenti Comitissæ dicti aut tantillum adstringentis alicujus olei, quale omphacinum rosaceum est, addi potest, ne sine unguedine illico ficeatum & duriusculum factum, dolores inducat, quo non modo fluxus non tam intercipi quam dolore allici humor possit. Hic in mentem incidit observatio HIER. CAPIVACC. ad ulteriorem experientiam perducenda, ligaturam infra genu applicatam podagram excitare, qua propter L. SCHVLT. a ROSENAV in *Consil. Med.* podagra obnoxiiis suadet, ne caligas infra genu ligent. Vbi etiam alibi in corpore humano dolores

res excruciant, fasciæ & ligaturæ fortiter & frequenter applicatæ appri-
me valent, immo præ aliis remediis in iis vehementioribus & continuis
doloribus, qui interiores & nobiliores aut ad vitalitatem maxime necessa-
rias partes afficiunt atque multa & pessima urgentia symptoma-
ta, vigilias diuturnas, animi deliquium, delirium &c. inferunt in ex-
terioribus valida manu constrictæ, admodum necessariæ sunt. Quoni-
am enim doloris essentia secundum CRAANII sententiam *vid. Tr. de*
Hom. C. 116. p. 636. in eo versatur, quod objecti partes in tenera & exi-
gua admodum sensilia corporis humani filamenta nervea tanta vehemen-
tia agant, ut illa præter modum tendantur, ut adeo ruptionis quando-
que incurrant periculum, proclive erit intelligere, quod hæc instru-
menta convenienter & ipsis partibus dolentibus atque longius ab iis re-
motis applicata, vinciendo & plus minusve constringendo fibrarum sen-
siliū, nimiam extensionem reprimendo, nervos comprimendo & spiri-
tuum animalium irritatorum ferociam demulcendo & componendo &
aliorum revocando ob consensum qui singulis intercedit, dolores le-
niant ac sopiant potenter. Etenim si interiores extremitates nervorum
non commoventur, objectum licet præsens nullam efficit sensationem,
unde fit, ut firma ligatura facta in medio brachii manuque puncta nul-
lus sentiatur dolor, quia commotio nervorum punctorum coercetur per
ligaturam, ut non possit pertingere ad extremitates nervorum, quæ in ce-
rebro sunt. Eundem in finem & vesicatoria, parti non dolenti appli-
cantur: quatenus non tam materiam peccantem quam spirituum anima-
lium impetum, a parte dolente avertunt. Atque adeo acria alia varii
generis anodynis accensentur, ut spiritus salis in gangræna, radix pyre-
thri, caryophylli oleaeorum destillata, in dentium dolore, quæ pari-
ter, dum fibras ab extra irritant, ac convellunt simulque eas firmant,
ut harum renitentia, objecti dolorifici ac spirituum super & impetum.
Facit huc HIPPOCRATIS *Aphorismus 46. Sect. II.* Duobus doloribus
nec eadem parte obortis simul vehementior minorem oscurat. Chi-
rurgi hinc operantes quoque, ante v. gr. membrorum sphacelo corru-
ptorum amputationem, in præparatione attendunt, ut compressione ner-
vorum ac vasorum magnorum arteriosorum sanæ partis per ligaturas
fat fortes, quas tornando adigunt, stuporem quendam ipsi parti
inducant

§. XIII. In pluribus aliis affectibus aliisque partibus alioque fini
æque fasciarum & per eas ligaturarum applicatio necessaria est: modo
adhuc nominetur rhachitis, in qua ut spinæ dorsi aliisque ossibus sic af-
fectis

fectis in artubus &c. adeo laxis, ligaturis artificiosis, mediantibus fasciis latioribus interpositis, simul, prout visum fuerit, ferulis commodis, auxilium quoque feratur, non tantum pro calore & fotu partium majori, verum etiam ut membrorum inprimis dislocatio & distorsio inhibeatur, eaque quantum fieri potest, in naturali semper situ & rectitudine conserventur, eaque promoveatur magis. Hujus fasciationis modus & instrumentorum delineatio videatur apud GLISSON. *Tract. de Rhachit. p. m. 364.* aliosque chirurgicos Scriptores. Sequatur hic aneurisma, cui tumori & non in recenti & leviori modo malo, sed & graviori atque in illo, in quo clausa arteria est, ligaturam applicare convenit mediantibus fasciis & spleniis. Fascia, qua hæc ligatura adornari solet expulsiua vocatur, ac apud MARQUE *Chirurgie Traité des band. chap. XVI.* descripta atque delineata reperitur. Hac felici cum successu MORELLVM usum fuisse, legere licet in *Zodiaco Gallico - Med. Anno I. obs. III. M. Jan.* De eodem Autore habetur, quod solis fasciis & spleniis aneurismata recentia curaverit. Pariter NIC. TVLPIVS *Obs. Med. Lib. IV. cap. XVI.* refert, quod aneurisma sola pressione sanatum fuerit, nempe imposito emplastro adstringente & super imposita lamina plumbea, atque arctiore vinculo, unde expulso e tumore sanguine, & constricto convenienter vulneris hiatu, felix arteriæ coalitus secutus est. Convenientem his ligandi modum eum esse censemus, ut ligatura versus truncum ita adscendatur, ut paulatim laxior fiat, quo arteriæ pars superior comprimitur, ne ulterius dilatari ac rumpi queat, sanguinisque impetus, qui a corde processit, reprimitur. Per se autem jam intelligitur, quod nobis hic non fermo sit, de ejusmodi partibus sic affectis, in quibus commode applicari ligaturæ tales fortiores vix queunt, v. gr. in collo, thorace atque abdomine &c. quoniam, ut statim ratio patet, aëris transitus intercipitur & circulatio sanguinis multum turbatur aliæque molestiæ inferuntur. Circa hunc ligandi modum hic quoque hoc præsertim monendum habemus, quod e re quoque sit, ut huic duriora, laminam, plumbeam, aut nummum quendam æneum aut argenteum subjiciant ac his arment, vel ut LE CLERC vid. *Chirurg. Complete p. 188.* potius autumat, frustulum chartæ masticatæ substituatur. CLAUDINVS brachiale ferreum ad movere præ aliis suadet, cujus descriptionem apud eundem l. c. invenies. In aneurismate pariter venarum, qua notione quidam varices designant, æque magnum imo majorem effectum edere, fasciationes & ligaturæ, possunt. Haud multum absimilem affectum, simili modo, curatum descripsit F. PLATERVS in *Observ. Lib. II. p. 542.* Illud qui nesciat opina-

opinamur facile esse neminem, ganglion ligatura forti subdita moneta aut plumbi frusto diutiusque paulo relicta, abigi. Amplissimus fane harum usus est, facile ulterius videndus, si prolixiores esse vellemus. Plurimæ atque adeo propemodum omnes operationes chirurgicæ fasciatio- nes & ligaturas easque paulo arctiores requirunt, quibus quidem per se- ries recensendis supersedeamus: Inter eas saltem adhuc nominentur usitatissimæ & fere quotidianæ venæ sectiones atque in abscessibus & fistulis, dissecta parte, pro puris remotione atque excretionem per ligatu- ram successiva a fonte ad aperturam pressio, juxtaque amputationes membrorum sphacelatorum: Nimirum hæc vinculorum constrictio a chirurgis peragitur antequam ejusmodi operationes instituunt, hanc qui- dem, ubi angustæ præsertim sunt venæ & in altum demersæ, multaque carne & adipe obductæ, & tensa ac squalida est cutis; Illam, postquam enim chirurgus cutem musculos & carnem fortiter, sanas partes versus retraxerit, vinculo valido, quod stupefactivum vocant, duplicato, etiam circumvolutione & firmitudine comparata, ne relaxatio hujus facile fie- ri possit, cutem constringit, ut juxta enormium hæmorrhagiarum, quæ presso pede discissionem vasorum majorum insequi solent, aversionem, præclusis sic atque compressis vasorum ostiis in extirpatione, quam in- tendit, atrox præsertim sensu, spiritibus animalibus aliquo modo inter- ceptis, obscurato, præcaveatur dolor. Atque quamvis primum ejus- modi constrictio cum vinculo facto non sine gravi dolore peragatur, attamen omnes cruciatus postmodum ita leniuntur atque sedantur, ut vix ullus doloris sensus percipiatur. *Conf. Ephemerid. Nat. Curios. D. II. An. VIII. obs. 211.* Hæc ligatura ordinario in parte sana atque supra par- tem abscindendam duos circiter digitos transversos sic injicitur, ne ea carne secta decidat, atque ut etiam sursum sic abducti cum cute muscu- li firmiter contineantur, qui mox ab operatione peracta vinculisque so- lutis deorsum iterum devoluti abscissorum ossium extrema contegunt. Extraordinarie magis chirurgorum quidam secundum GVID. de CAV- LIA CO vid. *Tr. VI. doctr. I. cap. VIII.* partem emortuam adeoque abscin- dendam hac mediante coarctant, ita ut in spatio intermedio sectio post- modum fiat. Quando asciticis per paraceutesin aquosam colluviem educunt, nisi statim his vinculis circumductis pendulum abdomen, rite stringant, mox sæpe syncope eaque non raro lethalis supervenit, vel po- stea ea iterum, in laxas pendulasque partes ruit atque cito dirus hy- drops renascitur. Ut gravidæ (ut ad alia iterum transeamus) fasciis aut ligamentis sat latis abdomen vincire solent, tam ad uteri gravitatem sub-
levan-

levandam, ad ingressum matris liberiolem servandum & ad foetum detinendum, quam praecocem & nimiam foetus depulsionem & prolapsum uteri praecavendum, ad rupturam abdominis avertendam; ita & iisdem utuntur, ut partus constringendo fibras carneas musculorum sicque robore addito, qua constrictione operatio haec dependet, facilitetur parturientis nifus simul adjuto, in quo facilitando foetum deorsum leniter & sensim pellere omnino convenit. Ast prospiciant bene haec bonae foeminae, ne ligaturam strictiorem abdomini inducant, quod expertus de aliqua monet PRAESES, quoniam foetui admodum nocere possunt: nam hac intemperanter adhibita vasa sanguifera in foetu adeo coarctantur, ut partim debitum nutrimentum illi subtrahatur, partim spatium illi ad ulteriorem accretionem denegetur, ex quo facile deinceps abortus contingit. Testimonium & assensum quoque huic rei GALENVS, vid. *Com. ad .65.* HIPPOCR. *Aph. XXIV.* & *Lib. III. de Natura facult. Cap. XII.* perhibent. Atque adeo in difficili partu, quando debitos puerperio labores crudelis Lucina negaret, jamque vel per aliquot dies irritis conatibus matrem foetumque defatigasset, ut tenui filo amborum salus vitaeque penderet, hoc auxilii genus utiliter producit. A partu deinceps excusso nimirum foetu, liberatis abdominis vasis & visceribus tanta pressione utiliter admodum circumductis fasciis, pendulae & flaccidae fulciuntur partes, saepe enim tanto cum impetu versus haec loca derivatur omnis sanguis ut deficiat debita pressio & in cerebri & cerebelli vasis & lethali syncope puerpera, perit. Rursum totus venter & intestina, magno foetus onere subito levata, fulcimento egent, ne nimia expansione flatus, intestinorum molestiam creent. Neque minus congruum est, ut post legitimam foetus & secundinarum exclusionem, pro variis beneficiis aliis conciliandis, fasciis aut ligaturis abdomen ad bonam tolerantiam circumdetur; etenim circumvoluta sat firmiter fasciis ipsarum alvo, dolores qui post partum ordinario insequi solent, praecaventur juxta atque imminuuntur, sanguis huc usque retentus & excernendus expellitur, flatus hypochondriorum rejiciuntur ne in inanitum uterum irruant, prohibentur, uteri praefocatio impeditur, nec non venter antea dilatatus ac tumidus deprimitur & in pristinum statum paulatim contrahitur.

§. XIV. Ut varietas fasciarum & ligaturarum pro affectuum affectarumque partium varietate, earum texturae & consistentiae ac situs figuraeque atque subjectorum, aetatis & secundum corporis habitum adendenda, ita circa utendi applicandique modum quaedam, quae omissa forte

forte fuerint, adhuc notanda veniunt hortante HIPPOCR. qui *Lib. de Medico Sect. I.* ita loquitur: *Quæ vero admoventur, omnia quidem ut conferant, attendendum, potissimumque si ad laborantem partum diutius adherescere debeant cujusmodi sunt vincula, medicamenta & ad ulcus adhibita lintea & cataplasmata, quæ diutissime in affectis partibus commorantur.* Ipsæ fasciæ atque ligamenta sint munda, ne ulcera reddant deteriora, sordida, putrida vel excrescentiæ fungosæ procreentur, quam munditiem ipse jam HIPPOCR. admodum commendatam reddidit, ac ut aspectu sint jucunda; quemadmodum elegantiam in omnibus artis operibus attendendam sedulo ita & hic præcepit, sintque levia, mollia, sat longa ac lata pro partis affectæ latitudine, longitudine, crassitie. Vulgo quinque digitorum transversalium latas fascias, pro femore, quatuor pro crure, trium pro brachio, & unius pro digito, deligandis habent, quo simul hoc observetur, ut fascia aliquid de sana parte utrinque contegat, alias & labia vulneris diduceret, & dolorem inferret &c. Sintque etiam sat crassæ & firma, ne sub operationibus forte rumpantur, nodus in illis mollis sit non magnus, ne molestia ægris creetur &c. Sit quoque ea ratione temperata deligatio, ut neque dolorem præter intentionem creet, neque universum sanguinem a sano membro reprimat, sed strictura ejusmodi fasciarum ad bonam laborantis tolerantiam fiat. Quare HIPPOCRATES *de Morb. Mulier. l. v. 32.* Ligaturis revulsionis gratia inductis lanam succidam, artificio utili jubet substerni, ut vinculum nimirum arcte quidem adstringat, verum dolor ex constrictione caveatur, iis præcipue quibus ad sanguinis fluxum, utuntur compescendum, vinculum sine dolore aptari debet. Conf. MARTIANVS *Nat. p. 278.* Applicantur frequentius ac ordinario ligaturæ siccæ, quandoque etiam pro casuum & circumstantiarum conditione, congrue madidæ aut etiam, quod sæpius laudatur, vaporibus inficiuntur, aut decoctis aut calidis aut frigidis convenientibus & liquoribus imbuuntur, manibusque rursus exprimuntur, sicque denuo applicantur. Quandoque una fascia deligationi sufficit, quandoque plures ut afferantur, expedit. Ordinario quidem & speciatim, si pro anasarca laborantibus corporis partibus, adhibentur, ab inferioribus ad superiora adiguntur, ut feri ad superiora refluxus juvetur, atque pro hoc aliisque scopis constringantur, iterumque relaxentur, sæpeque hæ motus species per vices repetantur. Contrario modo in ariduris partium procedere suadet HOLLERIUS *Lib. III. de Mater. Chir. Cap. I.* ut femur v. gr. marcescens ab inguine ad genu constringatur ligatura, ut major sanguinis quantitas adduci & pars nutriri possit.

Jungantur quoque si e re esse videatur, interna, & præmittantur universalialia dicta quæ primas regiones ab impuritatibus liberant; reliquamque sanguinis dyscrasiam repurgant, ut laxantia, clysmata suppositoria, diuretica, atque ea quæ ordinarias excretiones omnes, in congruo successu conservant, alterantia, acrimoniam humorum corrigentia & acidum invertentia & præcipitantia, temperantia, diaphoretica temperata roborantia, nervina & analeptica resolventia, incidentia, antiscorbutica dicta, motum sanguinis & humorum justo auctum, refrenantia, atque utrumque sanguinis motum conservantia, noxia consolidationi spicula salina pungentia, educentia, consolidationem & calli generationem juvantia, ut decocta lignorum, corticum atque radicum, herbarum, seminum, satis jam nota atque descripta, nitrosa, cinnabarina, &c. habita nimirum læsionum & temperamentorum, subjectorum ratione. Externa quoque alia non negligantur, ut v. gr. in viciniam affecti loci balnea particularia fomenta cataplasmata, linimenta, atque vinosa, camphorata, crocata & similia afferenda atque applicanda. Nec non alia chirurgica auxilia, ut venæ sectio, ut nimirum molesta & suspecta sanguinis quantitas tempestive ventiletur scarificatio & cucurbitularum sine ea applicatio, efficaces frictiones, pro re nata omittantur, neque diætæ debitum regimen ubique negligatur, ut, affecta pars moderata eaque repetita commotione exerceatur & aëris liberioris, frigidioris, confœdatis, impuri atque acris, accessio præcipue in vulneribus, quæ hinc in diversis regionibus, diverso modo curantur, arceatur, & victus & vivendi modus conducat &c.

§. XV. In deligationibus fractorum luxatorumque membrorum præsertim incauti chirurgi interdum peccare solent, quod fortius nimis ligaturas intendunt atque constringunt, diutiusque partes sic constrictas relinquunt, ex quo sanguifera vasa & nervos præter modum coarctant, nihil sanguinis in partem affectam vel influere, neque illum, qui jam in parte illa influxit, effluere sinunt, aut liberam per partem circulationem prohibent insuperque debitam discussionem, roborationem, absterfionem mundificationem & consolidationem impediunt & confundunt atque sic non modo molestiæ inquietudines virium debilitas, imo animi deliquium, quod WILLISIVS vidit v. *Pharmac. Rat. Part. II. Sect. III. cap. II. p. 213.* dolores vix ferendi, calores, vigiliæ involuntariæ, motus imbecillitates, humorum affluxus & stagnatio, atque intumescencia, relaxatio, exulceratio, partis atrophia, sed etiam quandoque vasorum scissio, inflammatio (licet etiam filum, quo vasa læsa atque hiantia quandoque

doque loco ligaturæ circumjiciuntur sit cera obductum) corruptio & gangræna, ipse sphacelus, vel ad minimum horum periculum inducuntur, spiritibus animalibus aliorum coactis. Talis observatio in *Epher. G. N. Cur. A. II. p. 347.* apud BLANCARTVM (ut multo plures non nominemus) in *Collect. Med. phys. P. I. obs. XLI. p. 519.* occurrit. PH. HOECHST. *Observ. Med. Dec. V. p. 623.* vinculum arctius constrictum febrî continuæ tandemque mortî in plethorico quodam ansam dedisse scribit. Moderatæ auxilium, immoderatæ necem afferre possunt. Hanc arctiorem constrictionem veteres jam, ut HIPPOCRAT. *Lib. de Fract.* GALENVS *Meth. Med. Lib. VI. P.* AEGINETA *Lib. VI.* alique eorum plures detestati sunt. Hoc confirmat alibi GALENVS, qui Alexandriæ cum esset, narrat, non longe ab urbe rusticum quendam in manus digitorum uno ictum, ejus radicem ad palmam validissimo vinculo deligatam, totumque digitum (sine dubio inflammatum) post abscindendum; amico, medico præbuisse: Illum autem nihil tale tentasse, sed rusticum fasciis relaxatis sanum evasisse. Quando igitur de dolore quodam insigni, non tam in loco fracturæ, quam juxta illum, aut ardore sub fasciis sensibili & molesto, aut saltem pruritu notabili, patiens conqueritur, atque in membro læso aliæ notabiliores mutationes atque præternaturalis tumor maxime lividus præter modum durus & calidus, sique præsertim vesiculæ in illo apparent, ex templo deligatio solvatur, quoniam hæc indicia fortiorem nimis & arctiorem deligationem fuisse manifeste se produnt. Pars deinde affecta fovenda cum decocto rosarum modice calente & si simul adest dolor is mitigandus oleis convenientibus ut oleo rosarum mastichino chamom: & similibus monente L. MERCATO *Instit. de art. Ing. Cap. XV.* Cæterum ordinario magis in constringendo sensim progrediantur, ut primo quidem minimum postea magis constringant chirurgi, verum etiam postea laxior fiat deligatio, ut sanguinis & laudabilis materiæ, ex qua callus fieri solet, liberior concedatur ad partem affectam, affluxus. HIPPOCRAT. *Lib. II. de Morb. Mul.* ligaturis revulsione gratia inductis, lanam succidam substerni commode, jubet, ut hoc vinculum arcte quidem adstringat, verum dolor nimius ex constrictione caveatur. Idem laudatissimus AVTOR inter alia optime præcipit *Lib. de Fract. Sect. VI. ut circa manus & pedis juncturam deligationes laxiores sint, & ut indies in fracturis aut lisionibus paulo firmitus constringantur vincula, ac ad eas expresso fiat; sic enim sanies ad extremam utramque membri affecti partem exprimitur.* Item in ulceribus, apostematibus & fistulis observare e re erit, ut fasciæ versus orificium paululum la-

xiores circumducantur, versus fundum autem strictiores quodammodo sint, ut pus e cavitate sua melius exprimatur. Neque tamen deligationes laxiores justo sint, negligenter applicatae, praecipue partibus mollioribus, ne copiosius humores irruant & in laesa parte cui sufficiens deficit tonus, molesta & suspecta intumescencia oriatur quod exinde apparet, si nullus plane incommodus sensus observatur; in quo timidi nimis chirurgi iterum peccant, qua de re aliud atque aliud exemplum notum habemus, quo effectus speratus vix succedit, imposita abscedere facile possunt, imo non raro ut in luxationibus atque fracturis ossa semel coapta in suo loco non retinent, & coalescentiam impediunt, quandoque autem majorem humorum affluxum atque effluxum, ut in vulnerationibus praecipue magnopere verendum concitant, aut praebent occasionem. Medium igitur ii, qui & hic tenent, tutius procedent, atque bene observata insuper cujusvis partis textura & consistentia atque habito respectu ad partes valde sensiles, nervosas, tendinosas & copiosis vasculis refertas, curationem ex voto obtinebunt, simulque artificiosa & bene instituta deligatio artificem commendabit.

§. XVI. At vero aliud quoque in aliis casibus observandum; si quidem scire licet, deligationes per fascias & ligaturas fortes in vulnorum fracturarum & luxationum tractatione, incautos chirurgos non modo praeter necessitatem sed & cum magno saepe incommodo, imo summo periculo, repetere, quoniam non modo curationem, hac nimia assiduitate, impediunt, vulnorum labia ex parte coalita iterum deducunt atque disjungunt, ossa fracta aut luxata effringunt ac dimovent, sed & gravia symptomata, ut acerbiores dolores, haemorrhagias imo quandoque convulsiones, concitant. Quid noxius esse potest quam aneurisma apertum saepius manibus sic contrectare? quid insulsius hernias repositas ac deligatas saepius justo solvere? Juxta haec perspectum est, frequentem aeris externi admissionem notabiliter, fauciatu nocere. Quare consultius est, ut res ipsa & necessitas postulant, ut per plures dies, duos, tres, quandoque quatuor, imo non raro VI. VII. VIII. ejusmodi laesiones & praesertim inter eas quoque luxationes & fracturae relinquantur, & neque inspiciantur, neque deligentur, aliaque ratione tractentur, nisi singularis quaedam circumstantia & symptoma quoddam urgens aliud suadeat, si v. gr. pruritus partis intolerabilis vexat, aut si praesertim inflammatio & exulceratio magna eam occupat; attamen in vulneribus & ulceribus ut plurimum expedit, ut singulis diebus deligationes renoventur. PETR. BEYRVS *Lib. XXII. cap. IX.* vult ut ligaturae fracturarum
omni

omni tertia die solvantur & aqua tepida fomententur donec locus rubeat & tumescat. In singulis, morbi tempora hic quoque discrimen quoddam injiciunt, sic convalescente ægro, per longum temporis spatium deligatio indissoluta finenda est. Vix tamen cum iisdem negligentius & parum caute procedentibus nos facimus, qui deligationem per XV. & XX. dies non revident. Hyemali (ut ad propositum redeamus) præsertim tempore hoc, quod jam indicavimus, bene observandum est, quia frigidius aër partibus sic læsis admodum inimicus est. Aestuante vero æstate exceptionem quandam hæc regula patitur, cum calidus nimirum aër, qualis ardente præsertim Sirio existit, ulcera & vulnera putrida reddat & vermium generationem acceleret. Aequè in viris præcipue robustis diutius, in foeminis præsertim sensibilibus naturæ citius solvi possunt ligata. Totum pariter describere tempus, per quod fasciatio- nes continuare congruum & necessarium erit, vix licet, quoniam id pro partium læsarum varia magnitudine aut pravitate, nec non, pro subjectorum illorumque ætate, humorumque indole, regionum & climatum, pro anni temporum diversitate, majori item ac minori ligamentorum v. gr. tensione, luxatione veteri & recenti variant, secundum quæ accidentia enim articulorum quasi robur, modo celerius, modo tardius, in integrum restituitur. Attamen intra XXX. XL. L. dies ut plurimum fractæ partis v. gr. sanatio perficitur, ex quo deligatio demenda venit omnis, explorato a chirurgo dextre callo genito eoque integro, patienteque de euphoria & motu membri libero & non impedito sibi constante. HIPPOCRATES ossa cubiti XXX. diebus coalescere scripsit. Insuper etiam consideret, ne laborantibus præter necessitatem molestus videatur, an in levioribus casibus, sola manus repositio, luxatæ partis perficere possit, an instrumentis in gravioribus læsionibus utendum sit. Coëterum quanta in fasciis & ligamentis parandis, in vuln-erum deligationibus aliisque læsionibus juvandis & restituendis, diligen- tia & circumspèctio adhibenda, & quanti hæc facienda sint, multis monumentis, duo isti magni Medicinæ statores HIPPOCRATES at- que GALENVS tradiderunt. vid. *Libr. de Offic. Med. 5 lb. 5 Libr. de Fasciis.*

§. XVII. Lora & cingula coriacea præsertim adhibentur, ut con- stringatur & coarctetur abdomen & ejus viscera. Hæc pariter ac fa- sciæ parturientibus sæpius applicantur, ut partus faciliteretur, neque sine ratione: nam pressio constrictioque sic abdomine uterus per consequens premitur, & hoc compresso, fœtus jam exitum quærens urgetur, ut fa-

cilius citiusque ex hoc ergastulo facilitetur exitus. Circa horum vero electionem nullum discrimen cum vulgo, etiamsi TH. BARTHOLINO *Cap III. Hist. 87. & in Anatom. reform. Lib. I. cap. II. p. 15.* atque VNZERO *Lib. de Nephrit. p. 141.* narrantibus superstitiose, inter lora ex corio humano (quædam etiam vetulæ hic sexus disparitatis rationem diligentissime habent) aut ex corio cervi in ipso coitu transfossi, quod tamen ut singulare aliquid commendat JOEL *in Prax. Lib. VIII. cap. V.* interque ea ex vitulino confecta faciendum. Sic & JOH. LIBAVLTIVS ex PETRI HISPANI *Synops. Remed. paratu faciliū Cap. XXI. p. 100.* contra epilepsiam cingulum de corio lupi gestatum, valere, refert. In amputatione membrorum sphacelatorum administratione & ad felicem successum obtinendum & quidem in præparatione ejusdem pro tractu valido & æquabili partis abscindendæ cum ligaturis lora quoque necessaria sunt. De loro urinario ad materiam chirurgicam quoque pertinente palmi longitudine e corio rubro turcico tenuissime secto atque humectato deinde circumvoluto tabellulaque imposita rotundo facto, quod P. CASTELLVS adhibuit, videantur cui volupe est, *Notæ RHODII ad Scrib. Num. CLXXX. p. 267.* Aliud quidem lorum apud veteres occurrit, quodque ipsis frequentissimi usus fuit, vomitorium dictum, ad pharmaceutica remedia pertinens, de quo idem l. c. videndus; fuit autem corrigia a coriariis nautea herba, sub qua bryoniam albam plurimi intelligunt, tractata, quæ in os demissa tetro sapore, vomitum ciebat. Sed hoc lorum non est hujus loci, neque alicui hodie arrideret, licet etiam illud multis nominibus collaudet ROLFING *in Consil. Med. p. 276.*

§. XIIII. Laquei, funes five funiculi, & fila eaque multiplicata complicataque atque habenæ chirurgorum ex lino, lana, stupa, canna-be, serico contortæ & modo crassiores & robustiores, modo tenuiores habentur, ac subinde trochlea quâdam ad connivendum & ad adstringendum instructi, prout intentio chirurgi, eosdem requirit. In veteri ævo, laquei usitatissimi erant, magnaque eorum copia erat parata, & quibus varia imposita erant nomina. Sic apud veteres Scriptores laquei textorii, nautici, pastorales, hereulei, lupi, sandalini, epanyloti, hyperbati, simplices, duplices inveniuntur, hodie vero paucioribus possunt esse contenti. Horum usus & injiciendi ratio varia quoque est, siquidem hæc illaqueatio, deligationis vicem, non raro explet. Præsertim autem in gravioribus operationibus v. gr. in herniarum sectione, ad peritonæi constrictionem, in arteriotomia & varicum sectione, ad arterias arcte vinciendas, in cataractæ depositione, in amputatione mem-

membrorum sphacelatorum, fistulæ spiritalis incisione, strumarum exstirpatione, trepanatione, mammarum cancrofarum ablatione, aut calculi ex vesica urinaria sectione, iis opus habent chirurgi, ut tam partes amputandas, quam patientium corpus, in scamno, aut mensa, aut lectulo & situ debito convenienter collocatum atque affixum firmatumque durante operatione, melius & certius, contineri possit, ne chirurgus in ipsa operatione turbetur & impediatur, atque a recto tramite inter faciendum facile declinet. Dein adferuntur habenæ & laquei linteis aut fasciis circumpositis ad fracta atque luxata quædam membra, robustiora imprimis, quandoque extendenda, quæ extensio retrorsum in diversa distrahitur, (ubi nimirum & præsertim musculi ossi luxato implantati hoc versus suum principium retrahunt,) semper nimirum rectam lineam atque musculorum tractum observando. Observetur etiam & consideretur patientis ætas & subjectorum plus minusve robustorum constitutio, luxatio aut etiam fractura recens vel inveterata, ossium & musculorum qualitas & adhuc magis quantitas, ratione cujus extensio major aut minor esse debet, ossium majorum aut minorum, utpote majore aut minore musculorum robore, pollentium, ratione. Insuper luxatæ partes extendantur antequam inflammatio, febris &c. accidant, remollitæ prius humidis & modice calidis, adipe humano anserino oleo chamomel. simil. aut fotæ decocto sem. lini, radicis althææ. fol. malvæ &c. Extendatur quoque membrum aliquanto longius, ne omnia in reducendo se invicem tangant, atque repositionem impedian. Indicium sufficientis extensionis factæ habetur, si luxatum os suo acetabulo e diametro opponatur, ac si membrum sic extensum aliquantum longius fano videatur, atque si inter extrema, quædam fovea, in luxationis loco, nulla amplius inæqualitas, appareat. Quandoque etiam ad luxata quædam reponenda & suo loco continenda adhibentur. In fracturis eo usque etiam extensio peragatur, donec fossula quædam inter ossium fractorum extremitates appareat, ac eas aliquantisper ab invicem distare videatur: talis enim extensio efficiet atque avertet, ne postea in earum coaptatione forte se tangant, & quædam ab iisdem eminentiæ atterentur. Locum quoque inveniunt applicati, in artuum amputatione, ne sanguis copiosius in operatione perdatur, nec non ad fasciationes & ferulas in fracturis &c. retinendas adhibentur. Porro laqueis & funiculis ex serico & cannabino filo vel pilis equinis, pro ratione exstirpandorum confectis, firmiter constringuntur, unguentis & fomentis emollientibus simul adhibitis, constrictæque sic relinquuntur, tumores nonnulli præter-

ternaturales, excrescentiæ pendulæ, nec non dolentes, ut & firmiter affixæ, & strumæ quæ radicem habent tenuiorem verrucæ extantes polypi e cavitatibus prominentes, cornua, quorum unum dimidii pedis longitudine pollicisque crassitie extirpasse CABROLIVS refert *Observ. Anat. II.* qua constrictione singulis diebus sensimque arctius ligando atque radices magis constringendo (quidam funiculos, arsenico adhuc inficiunt) nimirum his tuberculis nutrimentum aufertur atque inducitur tabes, ut marcescant ac tandem decidant. Hæ ligaturæ sectioni strumarum & scrophularum &c. præferendæ sunt, quia magis tutæ. Præter propriam cuius experientiam glandulæ lachrymalis acrochordon intra triduum sic curatum a WEDELIO vid. *Disp. de Verrucis* p. 24. & a FABRICIO HILD. vid. *Cent. VI. Obs.* 79. aliudque hoc genus apud CHALMETVM vid. *Ench. Chir. cap. XIII.* p. 70. & *Ephem. I. N. Curios. D. I. An. II.* p. 381 eodem modo sublatum leges. Referatur hic similis propemodum has excrescentias evellendi modus a GALENO *Lib. XIV. M. M. cap. XVII. t. 13. 14. 15.* indicatus, qui fit per pennam galli veteris, vel aquilæ potius, cujus circulo circumposito, undiqueque ex cute, stricto invertendo & deorsum impellendo &c. ut pluribus ibi legi potest. Pari modo, tumores cystici & tunicati, quales sunt: ateroma, meliceris, steatoma, post concisionem tunicæ, funiculo constringuntur & denuo extrahuntur. Non solum vetulæ, sed experientissimi medici, strumas, filo sanguine muris bene imbuto, duplici vel triplici, circuitu collo alligato, ut cutem undique strictè tangat, curatas unice asserunt, qualis assertio etiam legitur in *Actis Phys. Med. Acad. Nat. Curios. Vol. II.* p. 450. seq. *Observ. XXIX.* sequentibus conceptis verbis: *Serio asseveravit vir gravis, strumas quas-cunque a partu difficili etiam ortas, solis tantum hæreditariis exceptis, certissime tolli posse, si filum triplicatum collo recens mortui maris, in mare, fœminæ in fœmina, circumligetur & per nycthemerum illinc relinquatur; dein autem strumosi collo circumdetur & per horas XXIV. ibi gestatum eadem qua applicatum hora desumatur, denuoque mortui collo applicetur & cum illo sepeliatur.* Rursum laquei loco ligamentorum ex panno confectorum injiciuntur, & ligaturæ iisdem formantur, in artuum extremis, revulsionis causa, ut nimirum sanguis, ex naribus, utero, hæmorrhoidalibus vasis &c. copiosius effluens versus extrema repellatur. Singularem modum funiculorum applicandi, Nobili cuidam, suadet P. FORESTVS in *Obs. & Cur. Med. Lib. XVI. Obs. XVII.* p. 584. pro pollutione, nocturna pertinaci curanda, ut refertur apud LEONELLVM, scilicet: Cubitum ituro præcepit funiculum sive chordulam ad collum ligaret, sinatque eam ad col-
lum

lum virgæ descendere, cumque ea virgam quoque non multum stringendo ligaret, ut quando in somno membrum erigeretur, propter ligaturam funiculo factam, dolorem virgæ incurreret & sic excitaretur, ut semen in somno non rejiceret testaturque, quod hoc medio feliciter curatus fuerit. Qui plura de laqueis his legere vult, adeat ORIBASIVM hac de re agentem.

§. XIX. Illi quoque funiculi huc trahantur, qui pro excitando setaceo, a chirurgis afferuntur. Quondam hujus operationis instrumentum, a fetis equinis, unde etiam nomen derivatur, inter se certa crassitie, artificiose complicatis, petebant. Deinde laneum aut lineum filum cera traductum substituebant; quoniam vero observabant in postero ævo, hunc majorem dolorem sæpiusque inflammationem concitare, fericum saltem filum admittebant, qui mollius cutem cum subjacentibus partibus tangit ac afficit: Confectum sic setaceum per cutem partis eamque crassam & duplicatam, & quæ a subjectis partibus carnosis elevari, attractione moderata potest, priusque oleo quodam, ut eo melius transeat, minoremque dolorem excitet, suppuratioque subsequutura juvetur, acu ancipiti per manum chirurgi trajicitur & collo aut alio loco circumplicatur, & quotidie & etiam bis dimovetur, & levi attritu trahitur, ut nempe per hoc ulcusculum artificiosum materia morbifica inprimis ferosa, sive in capite, oculis, naribus, aliisque vicinis locis collecta, situque peccans, atque molestiam his partibus nobilioribus creans, sive a toto corpore per fluxionem, quod ajunt, promota evacuetur. Hodie ut plurimum atque consultius per transversum quandoque secundum longitudinem observato nimirum fibrarum ductu, ut cum recta ibi ferantur, evacuatio hinc promptior succedat, setaceum infligunt. Alii per modum obliquum, secundum GLANDORPIVM vid. Ejus *Gazophyl. Polyp. Cap. XX. p. 13.* procedunt. Partes corporis viventis animalis cutaneæ, quæ huic operationi subjici solent, variæ sunt; Frequentissime autem apud nos setacea excitantur in occipite & nucha, pro pertinaci atque rebeli capitis dolore, hemicrania, apoplexia & epilepsia, mania avertenda & curanda, hydrocephalo, catarrhis gravioribus, vertigine &c. curandis, furditate emendanda &c. Omnium frequentius affectibus oculorum contumacioribus & gravioribus suadentur, in ophthalmia, lippitudine, visus imbecillitate, ipsa suffusione & cataracta, guttaque serena, imo strabismo ex nimia & præternaturali humiditate lentoreque ac copia humorum, de quo ZACVTVS LVs. *Prax. Admir. Lib. I. Obs. 61. p. 15.* exemplum habet. In ulcere narium maligno

juvenis quidam Lipsiensis PRAESIDIS suafu, ex fetaceo nuchæ applicato, auxilium haud comtemnendum reportavit. In furore uterino atque cutaneis affectibus vitilagine, impetigine & psora tineaque, egregio auxilio, fetacea fuisse, aliunde idem perspexit. At apud Autores aliis quoque locis atque pro aliis affectibus curandis, inflicta fetacea, nec sine subsequente effectu invenies: ita in affectibus gravioribus capitis, in commissura coronali, cauteria & fetacea potius, plurimi suadent. Auriculæ lobum cum euphoria sic fuisse transfixum, legitur apud SCVLTTETVM in *Arm. Chir. Tab. XXXIV. p. 41.* & ap. GVID. de CAVLIACO *Tr. VII. Doct. I. cap. III. fol. 119.* sub mento, pro curanda gutta rosacea aliisque faciei vitiis, idem invenies. Cognovit PRAESES in Helvetia eximium Medicinæ Practicum, pariter ac artis chirurgicæ peritissimum, qui pro pectoris vitiis, præsertim astmate, orthopnoea, tussi, inveterata imo ipsa phthisi, ut & ventriculi hepatisque morbis, in regione harum partium, pectoris, nimirum, hepatis & ventriculi fetacea applicabat, omni-que laude commendabat. Pariter LVD. MERCATVS *Lib. I. de Morb. intern. Cap. XVII. & Lib. II. de Morb. Mul. Cap. IV.* in melancholia hypochondriaca, in lienis hepatisque regione, fetaceum applicatum laudat, quem in hac operatione imitatur MATTH. MARTINI *Tr. de Affect. Hypoch.* Sub alis & inguine incisum pro peste & venerea lue curanda commendat SEVERINVS *Pyrotechn. Chir. Lib. II. P. I. c. 46.* A. SPIGELIVS, ut testatur GLANDORPIVS l. c. scetaceum pro sanando malo ischiatico pertinacissimo, usu comprobavit. Pro hydrope ac aquosa hernia curanda, scrotum hoc juveninum genere & operatione exulceravit modo adductus, GVIDO de CAVLIACO l. c. Vel alii umbilicum quoque sic transjiciunt. Ex observationibus & exemplis affectuum modo indicatis haud obscure statim colligitur, fetacea derivandi avertendi & revellendi, attrahendi alliciendique intercipiendi & sensim evacuandi indicationes explere, majoremque & præsentiores præ fonticulis, cauteriis, vesicatoriis opem præstare.

§. XX. Aliqualem etiam locum in hoc censu hinc inveniunt ferulæ, ad deligationis partes pertinentes, quæ ex corticibus arborum & asferulis tenuioribus lævigatis aut membrana, sive corio indurato aut charta multiplicata, densa ac crassa & conglutinata, vel etiam, ex ferri albi plumbique lamellis parantur, & totum, ambiendo ac complectendo, ut plurimum membrum, compedum aut manicarum pedicarumque ad instar sive una sive plures applicantur, fasciisque & laqueis firman-
 bra, brachia, &c. imprimis fracta atque luxata suis apicibus juncta, aut
 exten-

extensa, reposita & deligata, bene composita & quieta, ac inconcussa mancant, aut in decenti figura conserventur, atque articulationes stabilientur firmenturve: Fasciæ enim ac ligaturæ ad ossa fracta præsertim, ut & luxata in loco debito retinenda non sufficiunt atque nimis sunt debiles. Parantur etiam longitudine, latitudine diversæ, diversaque figura, recta aut curva, pro locorum quibus applicari debent, conditione. Ne vero ob duritiem & inflexibilitatem suam læso membro molestiam pariant, splenia sunt substernenda, simulque observando, ut hæc unus circiter digiti transversî spacio, ab invicem sint remota, & secundum membri longitudinem imponantur, quæ deinceps tenui & molli quadam fascia mediante, retinentur, illæ autem vel solæ vel emplastro quodam glutinatorio intus obducta, his apte congruant & aliquot vinculis bene alligantur. Illæ non pondere molestæ sint, earumque talis compressio fasciis rite impediatur, sint quoque læves æquales & planæ & crassissimæ qua parte fracturam tegunt, non ad ossa in articulis naturaliter prominentia, imponantur &c. Cautionis quoque ulterioris causa addamus, quod JOB. a MECKERN *Obser. Chir. Cap. LXVIII. p. 467.* exemplo quodam declarat, a ferulis nimium brevibus os fractum, nullo plane interveniente callo, coalescere iterum potuisse. Addimus quod HIPPOC. vid. *Lib. de Fract.* GALENVS vid. *M. Med. Lib. VI. P. AEGINETA Lib. VI. cap. C.* alique veterum monuerunt, ne fractis membris ferulæ ante septimum aut undecimum diem applicentur, quoniam eo tempore humorum affluxus, dolor, inflammatio atque ejusmodi symptomata alia sunt vehementiora, namque magnis tumoribus, ulceribus, inflammationibus & doloribus ferulas & omnes adstrictiones non adhibendas esse, provide hortatur HOLLERIVS *de Mat. Chir. Lib. III. cap. I.* Ast si modo debita requisita adsint, nihil obstat, quo minus interpositis nimirum spleniis, applicentur. Circumspectionem cœterum & observanda circa easdem primum & magna cum cura, indicavit HIPPOCRAT. *Lib. de Offic. Med. text. 9.* Hic occasio se offert indicandi, a practicis admodum laudari, in spasmis artuum, brachiorum, pedum, manuum, cortices dulc-amari, membris affectis circum vinctos. Aliqua forte etiam mentio facienda esset, si ulterius evagari volupe esset, ocrearum fibulatarum, quæ pedibus rhachitide laborantium adaptantur, quales a PARÆO, SCVLTETO, VERDVCCIO aliisque describuntur.

§. XXI. Denique his instrumentis iisque compositis etiam accenseri possunt ab artificibus constructa bracheria & subligacula pro her-

niis, ubi nimirum intestina & epiploon ad inguen aut scrotum prolabantur, & prolapsu uteri, ut & ani, juvandis, firmandis & detinendis prolapsis & descensu partibus. Harum variae habentur figurae & conficiuntur, aut ex ferro & chalybe aut etiam ex cingulis loriceis cum semiglobulis ligneis. Horum figurae & icones possant variae apud SCVL-TETVM in *Arm. Chir.* videri, ut & apud NICOL de QVIN de *Hern.* RORNHVYSEN, apud FABR. HILD. item, PARAEVM aliosque Auctores. Commoda satis & usitata sunt illa subligacula, quae apud DOLAEVM in *Encyclop. Chir. Lib. VI. cap. II.* inveniuntur. Similia confecit quondam mechanicus ille Lugdunensis notissimus & probatissimus JOH. MVSCHENBROECK, a quo etiam & curiosum illud ad incontinentiam urinæ alias immedicabilem, feliciter adhibendum bracherium, & quod NVCKIVS in *Exper. Chir.* describit, confectum haberi potuit. Hujus quoque genus quoddam a cive quodam Francofurtensi paratum habetur, & a celeberrimo VALENTINI collaudatum. vid. *Ej. Diff. de Nova her. cura*, & in *Chirurg. D. JVNCKENII p. 188.* delineatum &c. Supponimus iterum, ut ante horum cingulorum applicationem, locis affectis, traumatica & convenientia cerata, emplastra, unguenta, balsama, olea & similia v. gr. ceratum ex pice navali cum emplastro diasulph. Rulandi, aut simile ex gummatibus, emplastrum de pelle arietis, unguentum Comitissæ, balsamus sulphuris, terebint. & hypericat. oleum ovorum lavend. mirabile a ZWELFERO adeo laudatum in *Pharmac. Reg. p. 216.* ad promovendam consolidationem adhibeantur; nec interna negligantur, ut decocta vulneraria, atque ea remedia, quae specifica dicuntur, ut herniaria, perfoliata, gallæ folliculique foliorum ulmi, ut & confectæ essentiae, tincturæ & extracta, spiritus falis. &c.

§. XXII. Ob aliqualem similitudinem huc etiam referamus alia ejusmodi instrumenta composita, quæque non adeo æque omnibus nota sunt, attamen in aliqualem usum subinde a nostris quoque chirurgis ducta: Talia sunt torcular, ad constringenda vasa sanguinea, in amputandis membris proficuum, cujus mentionem facit AMVYS *Prax. Chir. Rat. D. V. p. 62.* quamque descripsit atque delineavit NVCKIVS in *Exp. & Operat. Chir. p. 99. & Fig. IX.* Nimirum per hujus applicationem id efficitur, ut non tantum ipsa dissectorum vasorum ostia dolorosa, sed & truncos remotiores sub cute carneque latitantes, constringant. Quamquam fatendum est, vix hoc remedium totam, quam intendunt chirurgi,

gi, absolvi curam; attamen interea ad supprimendum sanguinis laudabilis præternaturalem effluxum sufficere potest, usque dum artifex alia, quæ sibi elegit, remedia afferre & ex voto applicare possit. Secundo hic loco nominandum aliud instrumentum, torques dictum, quod item NVCKIVS *l. c. p. 86. Fig. VI.* exhibet, atque depingit, ad collum incurvatum iuvandum, quando e. gr. muscoli caput flectentes speciatim mastoïdes musculus relaxatus aut convulsione aut paralyfi vitiat, ab antagonista retrahitur, atque extenditur & contractione sua caput versus alterum latus sic contorquetur & contrahitur ut collum incurvatum experiatur patiens, quod atque caput pristino iterum statui, per hoc instrumentum restituendum, satagunt, artifices. Ex hoc enim instrumento non neglectis linimentis illitis convenientibus emollientibus & fibras nimium tenfas relaxantibus v. gr. oleo violarum, lumbricorum vulpin. axungia humana, unguent. alth. ol. chamomillæ anethi. ol. amygdal. dulc. singulis diebus ter quaterque ad quadrantis circiter horæ spatium patiens suspenditur, quo iuvaminis genere tamdiu continuatur, donec capite colloque erecto, incedere iterum patiens possit. Mediantibus fasciis latis similem quoque artificialem corporis suspensionem parant, pro rhachitide affectis, quod instrumentum pendulum ita formant, ut pectus sub axillis complectatur, caputque sub mento, alia fascia circumdetur, manusque binis ansis excipiat, quo ita corpus sustentatur, usque dum in decentem restituatur formam, cujusque optatum effectum vidit IOH. DOLAEVS vid. *Lib. VI. de Morb. Infant. Cap. XIII. de Rhachit. Angl. p. 446.* Postremo tandem addamus historiam, quam ex FABRITIO IOH. de BEVERWYK *im Schatz der Ungesundheit p. 516.* recenset de adolescente quodam, qui ex nimis frequenti sternutatione cæcus factus, ex usu purgantium vero & applicatione cucurbitularum atque præcipue cinguli ferrei, quo collum constringebatur, sanitati restitutus fuit.





XVIII.

DISSERTATIO MEDICA

DE

SOLVENDO BONO CORPORIS HABITU

SECUNDUM

HIPPOCRATEM APHOR. III. LIB. I.

ET

A. C. CELSUM MED. LIB. II. CAP. II.

B. C. D.

P R O O E M I U M.

ITa res humanæ sunt comparatæ, levibus deciduis foliis similes, parum constantes, specie tamen sua fucum sæpe faciunt & incautos frustrantur ac decipiunt, vanisque imaginibus deludunt. Sors incerta atque volubilis vagatur ac errat, variat mutatque vices, nil præterquam incertum fluxumque elargitur & possidentibus interdum bona sua eripit, prorsusque omnia commoda aufert, partitos æqualiter ordines quosvis perturbat, summum quandoque in imum vertit, atque quando felicitatis obvenit magnitudo ac cumulus, de stabilitate mox est verendum atque sine fato nulla fors est. Imponit certe nobis nimia felicitas, qua tandem corrumpimur & blandiente nimis fortuna occæcamur ac impedimur, ne ea media arripiamus, per quæ his commodis quæ fortuna largitur bene uti possimus; rursus se a nobis avertit, quando negligimus oblata ejusdem dona rite collocare, tandemque attollimur in fastigia, donec per abrupta tracti præcipitamur: quare felici nihil magis arduum, quam finem felicitati & terminum ponere, imo adversis rebus corrigi, quam regulam Scythæ quondam Alexandro Magno proposuerunt, dicentes: Fortunam reverenter habe. Plerumque florētissima, augustissima Regna tunc cecidere quando in summum fastigium felicitatis evecta sunt atque Respublicæ, cum per longum temporis spatium quietæ sunt, vix multum diuque optata pace frui possunt, quin

quin negligentur dissolvanturque leges, langueat justitia, civium excrescant dissoluti mores, libido Imperantium dominetur tandemque nascantur seditiones, tumultus ipsaque aperta bella, quæ totas, cladibus, ruinis, incendiis conturbant, corrumpunt, evertunt atque consumunt. Pelagus, nunquam non movetur, nunquam est tranquillum, si etiam cum vel ipsa malacia pernicioſa est, vel tempeſtas horrenda iſtat, quam prænuntiat ipsa tranquillitas. Quanto major homo & altiori in loco positus, tanto difficilius illam in præcipiti ſtantem glorioſam fortunam cuſtodire valet. Quæ emicant ante tempus omniumque ſuperant ſpem & vota, elegantiffima & excelsa ingenia, haud ſolent eſſe diuturna, indicio, citius in illis lympham & totam maſſam ſanguineam purificari & partes ſpirituofas, in varios labores impendi ac diſſipari, ut poſtea reliquæ partes fluidæ craſſiores & ad motum minus diſpoſitæ evadant ac quaſi in vappam degenerent. Deflorefcunt priuſquam ad maturitatem perveniant, tanto citius, quanto acriora atque nobiliora fuerint. Ad hoc, ſi etiam, in ea perſiſtant, ſummus ARISTOTELES ſcripſit: *Nullum magnum ingenium ſine mixtura dementiæ fuit.* Univerſa natura ſibi relicta ubique eſſati illius Philoſophi, ne quid nimis, perpetim obſervantiſſima, tam in macroſoſmo, quam microſoſmo, amat medium, modumque tenere, ac certos fines reſpicere, nullumque facile extremorum, ſive in exceſſu ſive in defectu, admittit, quod etiam ubique, qui tenent atque obſervant ſedulo, beati multis modis ac rationibus jure meritoque cenſentur. Hoc certe ad omnia & omnes pertinet, ut non recondita quadam ratione cernitur. Sic fortitudini non permittitur, nimis audere, ne a nimio auſu, in temeritatem, degeneret. Ipſæ *Sacræ Litteræ* hortantur ac præcipiunt, *Eccleſ. VI. Noli eſſe juſtus multum; neque plus ſapias quam neceſſe eſt.* Ergone multa juſtitia eximiaque ſapientia prohibetur? nimietas & exceſſus vetatur. Quare & perbene quondam HIPPOCRATES, optimus rerum in tota Medicina gerendarum Magiſter, perſpicuens in ſumma bona corporis valetudine, a rebus maxime proſperis ac jucundis metuendam adverſam eſſe, *Seçt. II. Aph. 51.* dixit: *omne nimium naturæ eſt inimicum,* cujus rationem addidit aliam GALENVS in *Comment. ad h. l.* quoniam deſtruit ſymmetriam, (in qua tamen conſervanda totius medicinæ ratio ac cardo ponitur) atque moderationem diſſolvitque animalis concinnam compagem. Apprime & eleganter in hanc rem noſtrumque propoſitum graviffimus ſapientum M. AN. SENECA *Epift. XXXVI.* ſcribit: *Res eſt inquieta felicitas, ipſa ſe exagitat, movet cerebrum non uno genere, alias in aliud irritat: hos in patientiam, alios in luxuriam,*
hos

hos inflat, illos mollit, & totos resolvit. Iccirco alibi conquestus his verbis: *Nihil felicitati meae deest, nisi moderatio ejus.* Nec aliud nec minori elegantia innuit VELLEIVS PATERCVLVVS *Hist. Lib. I. cap. XVII. sequentibus: Natura quod summo studio petatum est adscendit in summum, difficilisque in perfecto mora est, naturaliter quod procedere non potest, recedit.* Non inelegans dictum illud PLINII *Hist. Nat.* hic quoque invenit locum: *Perniciosissimum in omni quidem vita, quod nimium, praecipue tamen corpori, minuique quod gravat quolibet modo utilius.* Omnibus in rebus grave molestum est, quod immodicum est. *Quid luce jucundius? Quid radio solis acceptius, attamen ubi supra modum sese oculis obtulerit gravis molestaque occurrit.* Labet enim in praesenti, penes humanum corpus occurrens quoddam nimium ceu naturae inimicum adeoque ubi evexia, ad summum bonitatis apicem, devenerit perpetuanda, illi, minus conveniens, percensere, simulque ad monitum Prudentum, esse tempore pacis, de bello cogitandum, praecavere ne graviore lapsu, in praecipuum periculum & interitum ruat servanda studiose sanitas integra totusque homo, diu salvus ac sospes permaneat modumque exponere atque media ac remedia indicare quibus hoc fine potiri commode possimus. Quem conatum Deus T. O. M. in sui Sanctissimi Nominis Gloriam & proximi commodum benignissime velit dirigere, est, quod humillime precamur.

§. I. **V**ARIA sunt Medicorum officia, variaque ideo illis sunt capienda consilia, variaeque intentiones ac scopi formandi, & in ipsum actum deducendi, qui artis salutaris ope feliciter remorari cupiunt ingruentia mortalium fata; siquidem non solum morbos jam factos variis remediis adhibitis curent ac abigant, sed & provideant ante ac prospiciant, ut praecaveant eos atque avertant, ac homines sanos sospitesque conservent. Tum providi Medici, quos ratio ducit agentes, omnia accurata mentis indagine ordinant, disponunt, prospiciunt, avertunt, moderantur, naturam morborum medicatricem sedulo scrutantur ubique manus commodant illi atque servant servanda, quae utilia sunt, quae vero nocent adeoque abigenda, tollunt atque interdum necesse habent, salutis hominum causa, exuberantem ac ad apparentiam perfectissimum, felicissimum eorum statum alterare, quam alterationem instituendam non levissimum unum ex officiis Medici sanitatis humanae curatoris GALENVS dixit in *Operibus Tit. VI. Lib. IV. Text. 15.* HIPPOCRATES jam idem indicavit, quando *Lib. I. de flatibus Cap. VI.* praefatus est: *Medicina est additio eorum quae deficiunt, & ablatio eorum quae excedunt, qui istud optime*

optime facit, is optimus Medicus existimandus est, quique plurimum est ab eo præstando, is plurimum in arte medica deficere censetur. Imo cum multi morborum salutare, atque morborum quoque remedia sint, quandoque ipsos morbos, febres, variolas, scabiem, podagram, diarrhoeas, imo dysenterias, febres &c. eundem in finem inducere, congruum esse, non pauci censent, modo de felici & exoptato successu (nec sine fontica causa) conquerentes, quare inter desiderata practica hanc rem reponunt, licet SENECA vere dixerit: abominandum remedii genus esse, sanitatem debere morbo. Idem (HIPPOCRATES) præcipit *Lib. II. Epid.* quando prudentis medici esse asserit, aliquando febres accendere, paralytin aliosque frigidos dictos affectus, & convulsiones &c. sanantes. *II Aph. 26. & IV. Aph. 57. Conf. & GALENVS in Comment. Aphor.* qui & alibi tabem artificialem inducere præcipit cui A. C. CELSVS adstipulatus, quando sic ratiocinatur: *Circumspecti est hominis & novare interdum & augere morbum & febres accendere, quia curationem ubi id, quod est non recipit, potest recipere id quod futurum est.* Quos duces secuti inprimis sunt CARDANVS, I. D. MAIOR *de Febre Artificiali* JOH. H. SLEVOGT *in Prolus. Inaug. de Natura morbor. per morb. curatrice*, MOEBIVS *in Disputat. de Natura & usu Clyster. Salubr.* quoque FR. BACO BARO DE VERVLAM. *Hist. Vitæ & Mort. p. 522.* Hoc quoque remediorum genus cum nostro præsentis argumento apte quadrat: Certe plenum corporis habitum cum viscerum mole, febres, inflammationes &c. admodum extenuare atque minuere assolent. Olim quidem Medici sedulo ac commode prospiciebant, ne homines in morbos laberentur & diaeteticam hinc eundem maxime in finem tractabant; hodie vero communia ac quotidiana fere eorum officia, in-curatione morborum saltem consistunt, prophylactice propemodum negligitur, de moderando exuberante corporum habitu paucissimi cogitant, cum tamen omnino de eo cogitare cogitataque apto consentaneoque modo perficere deberent; satis autem intelligentes sciunt, multifaria mala sæpe ex optimo ad apparentiam hominum corporis statu pronasci, quare secundum salutifera veterum monita ad eum solvendum extenuandumque mature præsidia instruunt planeque adornant.

§. II. Equidem non nemini paradoxum importunumque aut ænigmati simile dictum fortassis nos proponere videatur, de nihilo notabiliter & raro conquerentes ac qua faciem humorum laudabilium intus latentium sanguinisque vitæ thesauri copiosi & quoad consistentiam boni, naturæ robur præstantis copiam, monstrantem, qua totum corpus singulaque

membra illaque componentes partes validas, carnem, tendines ossa, torosum & habitus corpus sustentantia, vasa, tam arteriosa quam venosa, ipsosque nervos optime constitutos habentes, imo armosos, robustos; eos qui bene appetunt, bene ingerunt bene digerunt & bene egerunt, bene quoque nutriuntur atque augentur, nativa pinguedine & pulpositate emicante; statum humidi & calidi, alibili, edocente, eos qui animo contento atque tranquillo, ac hilari, jucundisque moribus (qui secundum Galenum temperamenta sequuntur) gaudere videntur, atque adeo eos qui minuta etiam ac recondita sanitatis indicia monstrant, ut dentes plures eosdemque firmos, ungues digitorum lineasque volarum rubidas, hypochondriorum conditiones illas tres ut sunt, secundum GALENUM *de Hemor. C. X.* indolentia, mollities, æqualitas &c. verbo eos, sanitatem omnibus numeris absolutam (ut quidem videtur) sistentes, inquam, ægrescere, aut lubrico, ancipiti, ac fallaci adeoque verendo gradu atque fastigio esse collocatos sicque ex bonis tanquam causis malos effectus produci. Ast extra dubitationis aleam positum esse omnino ducendum est: bonum ejusmodi corporis habitum, illum non perfecte quidem sanum atque valentem quali, secundum HERODOTUM Aegyptios præditos fuerunt, quos sanissimos esse scripsit, veluti ad Polycleti regulam atque statuam efformatum, vix reperibilem cum nulla perfecta detur sanitas atque nunquam nos aliter quam morbose sani simus (siquidem inter innumeros homines vix duo reperiuntur, qui eandem plane corporis constitutionem habent; sed alii aliis actiones suas perfectius edunt) sed diversa speciatim plenitudine superfluum atque pene prægravatum aliquid monstri alere, seu in infantibus seu in adultis occurrat atque valde lubricum, instabilem, suspectum esse mali morbidique speciem præcipuique periculi plenam induere: est enim improporcionatus, humoribus, vasis spiritibus adeoque illud idem, quod est vitæ fundamentum mox ejus destructivum evadit. Ratio enim sanitatis in proportionem consistit, sicuti omne nimium in vitio ponitur: omnia vero mediocria utilia sunt & in suo modo perfecta. Miratur hoc SENECA quando in *Hercule furente* ita scribit: *Improvisa est adeo vis lethi ut magnam admirationem pariat, quomodo esse possit quod corpus aliquod recte se habens ad omnes vitæ functiones brevissimo tempore funditus corruat.* Latet certe anguis in herba, neque iidem ita statim sani sospitesque & optimæ valetudinis sunt, qui tales videntur. Præsto sunt sæpissime semina ac principia morborum facile dein a causa procatactica excitanda; adsunt adurbationem mixtionis in sanguine dispositiones, non nisi excitamentum leve

ex-

expectantes. Et pomum suave rubet quod intra vermem alit, & corpus animale sæpe præ se fert in facie florem constantem, nihilominus putrilago consumtis pulmonibus, vel alia labes, obsessis visceribus, aut scorbutus, latitant. De duobus intestinis potissimum nobiscum natis vitæ nostræ hostibus, calore nativo ut veteres loquuntur, & sanguine res agitur, cujus principia mixtionem constituentia, nullo firmo nexu gaudent, sed facile a se invicem decedunt atque in quo morborum semina latent, a quo indeque periclitatur homo intus & extra, adeo ut mirum videatur, quod hæc massa, ex adeo variis multis partibus conflata & in qua tam multi & diversi motus peraguntur, per paucos saltem dies superstes esse possit, idque eo magis, quod mille accidentia dentur, eaque interdum levissima, quæ hanc artificiosissimam compagem destruere atque omnes motus de repente, inhibere valeant. Hincque pro vero accipimus, in studio sanitatis hoc quidem intuitu, etiam modum esse habendum: etenim & facile morbifica causa supervenit quæ sanitatem extremam extreme lædit. Monet hoc optime acutissimus AVR. COR. CELSVS Lib. II. cap. II. hortatur ac suadet sequentibus verbis: *Ante adversam valetudinem quædam notæ oriuntur, quarum omnium commune est, aliter se corpus habere atque consuevit, neque in pejus tantum sed etiam in melius. Ergo si plenior aliquis & coloratior factus est, sua bona magis suspecta habere debet, quæ quia neque in eodem habitu subsistere, neque ultra progredi possunt, fere retro quasi ruina quadam revolvuntur.* Quod haud dubie ab ipso HIPPOCRATE hausit, qui Aphorismo III. Lib. I. hoc literis mandatum reliquit; *Habitus exercitatorum & bene habita Athletarum valetudo seu evexia ad summum distensionis usque progressa, ubi ad bonitatis & plenitudinis extremum pervenerit periculosa & lubrica, quia natura atque etiam optimum non potest in eodem statu permanere neque otiosa quiescere & proficere: Quandoquidem vero non quiescit neque jam potest in melius progredi reliquum est ut in deterius labatur, his igitur de causis plenioris illius corporis habitum haud cunctanter laxare atque solvere expedit, quo corpus alterius nutritionis ceu convenientis, moderatæ adeoque melioris initium sumat.* In alio quoque loco, in Epist. hæc leguntur: *Quemadmodum optimus corporis habitus affectionum periculum denunciat, sic magnus rerum successus lubricus est.* Nec aliter sentiunt ac scribunt AVICENNA Fen. VII. Tract. IV. Cap. V. & GALENVS Lib. III. de Differ. Morbor. Cap. IX. & Lib. de bono habit. FERNELIVS Lib. I. de Morb. Causis p. 139. PLINIVS Lib. XXI. cap. I. sic scribit: *Quæ spectatissime florent celerrime marcescunt.* quibus TSCHIRNHAVSENIVM accensemus in Med. Corp. Hac de re quoque scripsit graphice

REIESIVS *Camp. Elys. Quæst. juc. qu. 78. No. 6. 9. & Quæst. 88. No. 1. 2.* Nimirum secundum veterum sententiam, natus calor in pleno tali homine quasi suffocatur, pulsu ac impulsu solidarum partium decresciente, quemadmodum flamma lucernæ a multo oleo opprimitur & extinguatur, atque non secus ac ædificia interdum mole propria ruinam proxime minantur, quando in summum fastigium evecta, molem suam splendentem atque superbam diutius sustinere, non possunt. Sic per longam in mari malaciam annona corrumpitur corporaque navigantium languore dejiciuntur atque amplissima Regna vastaque corpora non diu pacata consistere possunt, nam quando ab externis injuriis libera sunt, bellum intestinum in ipsis concitant eoque majori atque graviore lapsu corrunt: Apprime in hanc rem TACITVS *Hist. 2.* scripsit: Nec unquam satis fida potentia, ubi nimia est, atque *An. I. de Tiberio I. R.* refert, quod sapius hanc dictionem pronunciaverit: Cuncta mortalium incerta, quantoque plus adeptus; tanto se magis in lubrico constitutum experietur. Belle hinc SENECA dixit *Cap. XIV. de vita beata: mole, quod laborat sua esse non potest bonum, & alibi, quicquid ad summum pervenit, ad exitum properat.* Ignis quo clarior fulsit eo citius extinguatur, & iterum ita fato placuit nullius rei eodem semper loco stare fortunam, vel ut QVINCTILIANVS expressit:

*In se magna ruunt latis tunc numina rebus
Crescendi posuere modum.*

Similem in modum æque egregie loquitur PLUTARCHVS *V. Compos. p. 682.* multi certe sibi bono habito esse corpore videntur seque ipsos melius quam expectavissent advectos vident ac calamitatem suam pro bona valetudine ducunt ignorantes ejusmodi constitutionem apparentem esse dolosam. De cujus specie dici queat illud SOPHOCLES: *Pulchritudo speciosa sed improba & vitis quasi purulenta.* Hanc ipsam rem accurate quoque tetigit LIVIVS, dicens: *Prævalida quidem corpora ab externis causis tuta videri: suis tamen ipsi viribus onerari.* Huc quoque trahendum, quod habet Q. CURTIUS *R. Hist. Alex. M. Lib. VIII.* Inter tot obsequia fortunæ non satis cauta mortalitas est, rursus *Lib. X. cap. I.* Res secundæ valent commutare naturam & raro quisquam erga bona sua satis cautus est. De talibus robustis & sanis valet quoque illud JOB *Cap. XXI. v. 23.* Hic moritur in robore perfectionis suæ. Videmus passim juniores homines præmature ad nimium corporis robur & augmentum pervenientes, facile & cito etiam vita privari. Quid? quod Natura in singulis suis Regnis id monere superfluumque

umque demere videatur. Sic v. gr. annuatim videmus: vites rorem superfluum stillare, ut ad alia non longius excurramus.

§ III. Etenim plethora eaque moderata seu sanguinis boni abundantia sed absque omni violentiori motu in venis contenta, equidem ex se nunquam est morbus, ideo Helmontius credidit eam male inter morbos recenseri; sed plethoricus homo dicitur, non qui jam ægrotat, sed qui in tali statu plenitudinis est constitutus, ut si ulterius augeatur & plus justo exagitetur humorum copia, a superveniente quadam causa ex rerum non naturalium maxime vitio, eaque interdum exiguo ut calore aëris, pathematibus animi validioribus &c. plus rarefiant atque in organum deducantur humores, functiones lædantur; adeoque talis plethoricus homo potest quidem esse sanus, sed in magno sanitatis & vitæ discrimine atque periculo positus atque summa hæc sanitas in periculossimos morbos potest mutari. Ubi enim superfluitas ibi damnum, ubi vero congrua, humorum, ibi morbus locum, non invenit; cum ratio sanitatis in proportionem consistat. Nam, ut explicatius hac de re loquamur, tunc modo manet perfectissimum æquilibrium, sanitatis firmissime stabilimentum, quando quotidie tantum restituitur corpori quantum erat deperditum, ut Sanctorius demonstravit quod tunc perfectissime valeret homo quando quotidie post integras singulas digestionem & excretionem ad solitum pondus rediret; Verum, homines iuxta & necessaria sæpe sæpius declinant & in superflua vitata, periculosa & noxia cæco impetu ruunt. Exinde magna succorum ex bono chylo copia etiam temperatissimorum atque optimorum (sive magis vel minus prave dispositi illi sint, sive tenues simulac crassi, qui maxime plethoram efficiunt, mitiores etiam sive acriores) vasa sensim sensimque laxa facile cedentia dilatantur atque nimis complentur, infarciuntur. Quibus, pressione illorum in minima vascula ac fibras atque musculorum interstitia appensosque propaginibus arteriarum extremis sacculos membranaceos in cuneatis, urgentibus a tergo venientibus undis, a præcedentibus tamen retropulsis quasi & retardatis, simulque denuo rarefactis (quæ rarefactio in actum deducit plethoram velut causam prædisponentem) ambitus corporis paulatim intumescit præter modum atque extenditur, ut nullum amplius augmentum admittat, qua extensione per consequens pori premuntur atque coarctantur sicque transpiratio excernendorum sufflaminatur. Dein, quo crassiores sunt homines & quo magis nutriuntur & augentur, eo videtur sanguinis actio & reactio remissior eoque chyli in sanguinem transmutatio tardior indeque alimenti chylosi major

abun-

abundantia: hinc phlegmatici & sanguinei crassiores & corpulentiores fere existunt; illi tamen magis, quam hi. Qui sanguinis pleonasmus qui summæ sanitatis effectus est, humanam naturam, (quæ ex solidorum constitutione & influentibus operationum animalium integritatem præstantibus, æstimatur quæque eam describunt) reddit oppressam, (sive alterutro eorum sive ambobus deficientibus, aut conturbatis minusque recte constitutis,) dum fibras motrices cordis & vasorum sanguiferorum muscutorumque undique omnes, admodum vi quaqua versum nitentis in latera sanguinis, distendit: Sanguis enim, qui in contractione fibrarum carnearum tanquam causa, sine qua non, peragi potest, considerandus, eas quidem blande tangere tendereque atque sollicitare; sed non præter modum distendere debet. His dein distentis, aliæ vicinæ partes etiam nervi, arterias ubique comitantes &c. premuntur; siquidem ipsi quoque spiritus animales eo conflui a majori sanguinis ejusmodi resistentia, nimium dilatari possunt tandemque opprimi qua dilatatione solida æque comprimuntur, liquidaque alia expanduntur atque exagitantur. Sicque ille, illorum elaterem, vigorem atque robur, tonum ac systolen sua resistentia, qua debitum æquilibrium & symmetriam, concinnam illam harmoniam & quidem temperiei, organisationis & unitatis (contra morbus est ametria) in rebus naturalibus ubique observandum, quod totam sanitatem & vitam conservat, tollit, debilitat, impedit atque dejicit, quo enim major potentia virium est in impellente, & minor in resistente, eo celerior fit motus; ubi vero major mobilis resistentia est, eo plus virium moventi detrahitur & tardior fit impulsus. Itaque sicut major molis quantitas majorem gignit resistentiam, ita major sanguinis quantitas activitati cordis atque arteriarum elateri plus quam minor resistit. Quoniam sic vires hoc onere obruuntur omnis plethora sive is corporis status, in quo multum laudabilis chyli & sanguinis conficitur, simulque horum attenuatio, consumptio & perspiratio impediuntur, (ad vasa hoc intuitu simul etiam est ad vires); nimirum ut ex dictis patet, non possunt nimis distendi vasa, quin & nimia sit sanguinis quantitas, nunquam vires obruit quin nimia sit, tumque etiam nimis vasa distendit & plethora est ad vasa. Est denique certus quidam plenitudinis gradus, ultra quem illæsa qualitate sanguinis augeri nequeat quantitas. Hi omnes motores minus deinceps idonei sunt debite se contrahendi, expedite prompteque liquores vitales per universos corporis canales movendi propellendique, adeoque nimium distentæ venæ ægre sese contrahere possunt, & sanguinem ulterius urgere, unde sanguis tan-

dem

dem stagnat atque in concretionem abit, eoque magis; a stagnante autem sic sanguine, æque distensio & fibrarum nervearum pressio unde vehementes spasmi, per quos pariter vasa comprimuntur, ut libero sanguinis circuitu præpedito, illo impetuose ad alias partes urgeatur, unde vasorum nimiae distensiones & apertiones fiunt. Porro horum vero impedito motu (nam is tantummodo sanguis, qui circulatur vitæ & sanitatis fons est) inutilium forasque ejiciendarum partium secretio & excretio tardior redditur, quæ retentæ sub mora magis magisque corrumpuntur. Hincque decrescente sanguinis atque humorum impulsu, conveniens & apta tenuitas ac fluiditas lentore mox hinc accedente quoque decrescit, quo crassiores spissioresque humores facti hincque facile concrecentes (eaque magis quo fortior & robustior homo est) per minora vascula ægerrime hinc transeuntes, viscerum meatus, qui ubique patentes sint necesse est, obstruuntur comprimunturque, unde clausis emunctoriorum tubulis impurum, in sanguine æque detinetur. Atque minore solidorum impulsu sanguis ut in tenuissimas partes non discerpitur, ita & in excrementitias pituitosas, serosas nempe & salino-sulphureas minus ac par est, per calorem resolvitur sed potius ingens sanguinis & humorum in vasculoso systemate magis magisque accumulatio fit, quo qualitas quoque vitiata atque cacochymia quævis pressio insequitur pede: sanguinem enim nunquam sola qualitate, sine omni abundantiae concursu, peccare videtur, siquidem obesi tales obstasin & torporem humorum sub specie crassitudinis sæpissime condunt cachexiam, hydropem, malum hypochondriacum, adeoque suspecta debent habere sua bona. Qua de re sic HIPPOCRATES loquitur: *Sanguis cum abundat valetudinem vitiat, quia bilis acida & amara & pituita imo sanies nascitur.* Adjiciamus hanc censuram huc facientem a GREGOR. HORSTIO Cent. Problem. medic. Dec. IX. Quæst. V p. 277. prolatam: *Quo formosior est corporis constitutio, eo citius excrementitia superfluiditates colliguntur, propterea quod (teste MERCATO Lib. II. de Morb. Mul. Cap. VI.) in temperatioribus partibus laudabilius requiratur alimentum, unde per accidens cruditatum copia colligitur, relictis videlicet sanguinis portionibus impuris, quas deformiores in alimentum quoque commutare queunt.* Per hunc statum sanguinis & feri magis oleosum hancque succorum abundantiam, lentorem ac corruptionem denique inductam, stimulo suo stricturas noxias varias inferentes hancque fibrarum vasorumque omnium extensionem resistentia gravatorum vi contrahendi prærepta ac renitente sanguine per plenum & fartum humoribus imperviumque corpus ægrius adhuc propulso,

fo, adeoque naturæ oneri certo tandem nocituro, collato, tenerorum carotidum præsertim & vasorum pulmonalium meatus obstruuntur, ipsaque aggestione & tardiori hinc promotione tenduntur, vellicantur, tandemque rumpuntur, etiamsi circulatorius motus in aliis vasis non augeatur, vel posito hoc, inflammationes aliaque mala acuta insurgunt. Quapropter Natura divina illa morborum medicatrix, providissimo consilio sanguinem quantitate peccantem cum saluberrimo successu atque eventu, per varias vias, sæpissime excludit eoque talia verenda utilissime avertit. Sique hi præcipites casus non contingant, tamen observatione constat, quod plethorici raro senium attingant, sed in consistenti ætate adhuc constituti, (si debita remedia non, præsertim venæ sectiones mature adhibeant,) aut hydrope aut hectica præcipue pereunt. Quibus consideratis fit palam nimiam succorum abundantiam quoniam nimirum iidem non possunt commode in circulo suo moveri atque a natura regi & subigi præ omnibus aliis (si venena & animi pathemata exceperis) perniciem interitumque corpori minari adeoque hoc intuitu hic status non potest esse optimus, qui est periculosus. Quid? quod ipsorum spirituum quoque animalium maxime activorum, qui motum sensumque atque actiones tantum non omnes sanas ac integras edunt præstantque (& maxime ideo necessarii, utiles ac laudabiles sunt, adeo ut dubitandum esset, an illi augeri præter naturam possent, quoniam eo aptiores nos ad actiones nostras obeundas redderent) copiam minus compositam unionem non adeo intimam durationi corporum, obesse videatur; quoniam tunc fit illorum inæqualis, inordinatus & subsultorius & per consequens dissolvens atque destruens motus, atterunt ii & inter se ipsos atteruntur, quod manifeste v. gr. in gonorrhœa, a semine copioso atque spirituofo nimis, & convulsionibus, ubi insigni impetu influunt spiritus partesque admodum corrumpunt ac lædunt, videmus; inæqualitas enim est dissolutionis mater; Hinc spirituum refrenationem atque compositionem ne deprædatorii, ut Autores hanc rem, exprimunt, evadant, facere ad longævitatē, ignis exemplo declarat, & edocet Illustris Baro BACODE VERVLAM. in *Hist. Vitæ & Mortis* p. 566. Hanc quoque rationem alii allegant quod hypochondriaci & melancholici, quia nimirum spiritus animales in iis magis quasi sunt ligati, vitam suam molestam ac miseram, longe diuque protrahant. Amplius dicendum est, quod varia accidentia per externas pariter ac internas occasiones nocumentum & perniciem facilius possint addere v. gr. graves animi affectus tantum non propemodum omnes præsertim ira, metus, anxietates, sollicitudines

citudines & terror atque adeo effusum gaudium ac repentino cum ri-
 fu longius durante corpora quæ plurimum sanguinis alunt sicuti facile
 ac extemplo adoriri; ita & facile conturbare imo subito corruere solent,
 quoniam is accumulatur & vi quadam & impetu ad quædam corporis
 loca propulsus, vasorum membranarumque rupturas, easque utpluri-
 mum funestas, aut ad minimum stases profundas ex facili producit.
 Quantum commodum itaque iis exinde redit, qui occasiones & objecta
 vitant quæ suscitant ac movent hos intus nidificantes affectus, in effusio-
 nem pronos. Sic transpirationis cohibitiones repentinæ atque refrige-
 rationes etiam acre mordaxque frigus pariter ac calor exagitans pletho-
 ricis inimicissimus est. Sed & alia adhuc referantur, de quibus ulterior
 cogitatio subit: Hic plethoricus status multo plures certe quam alius,
 ægritudinum ac mortis casus habet, atque morbis variis concipiendis, non
 modo pronior est, sed & eos periculosiores atque graviores, impetuo-
 siores laboriosioresque, acutas præcipue febres, ut & hæcticas inflamma-
 tiones, variolas nec non commotiones convulsivas torminosas, singul-
 tuosas, deliras, hæmorrhagias & similes reddit, difficilioremque efficit cu-
 rationem, sic impedimento injecto evacuationeque salutari forte aliqua
 frustrata. Tuncque turbantur omnium citissime & gravissime in motu,
 gradu, vigore, constantia, promptitudine agendi atque fatiscunt celeri-
 ter & enormiter vires. Hoc confirmat AEGINETTA Lib. I. de Remed.
 Cap. XXXII. his verbis: *Pessimum est in morbis ventrem repletis, at ventris re-*
pletio quandoque sursum evacuat id quod redundat quandoque deorsum. Sique
 præpostere forte medicamenta adhibita fuerint, ut calidiora exagitantia,
 repellentia, constringentia, figentia, opiata, stupefacientia &c. noxam in-
 ductam augent. In ipsis morbis hi patientes impatientes maxime sunt
 increduli, immorigeri, contumaces, nullum regimen servantes, in mo-
 mento convalescere volunt, singula medicamenta præscripta, quia non
 sunt ad eorum palatum respuunt monitaque salutaria susque deque ha-
 bent, medicis æque ac adstantibus imponunt &c. Sic facilius tales ho-
 mines in morbos incidunt, gravius ægrotant, ægrius tristiusque curan-
 tur. Accedit, quod homines morbis non adsueri firmi vigentesque
 quales hi ipsi sunt, citius e vivis turbato quasi mortalitatis ordine, eripian-
 tur. Quandoque semel in fonticum maxime acutum quendam morbum
 (ut febres ardentes &c.) incidunt vel diu cum eodem conflictantur ne-
 que ita prompte restituuntur, cura æquivoca, incerta, inconstante alie-
 naque parumque notabili successu conspicua obtingente, ac ii qui mor-
 bis subinde sunt adsuefacti adeo ut sæpe mirum videatur, quod homines,

Mmm mm

qui

qui ab ineunte fere ætate teneriores ac sensibiliores (cum sensibilitas gravitatem vitiorum sive ab intra sive ab extra corpori insultantium augeat) imbecilles atque morbidifuerunt & de vita sua diu protrahenda maxime dubitabant, licet ad plenam sanitatem non redeant, tamen ad magnam senectutem perveniant præ illis, qui firmo corpore integraque semper valetudine gaudent ad spem diu vivendi atque vegeti, vel Nestoris ætatem superandi se excitant atque adeo vehementissimos sæpe morbos qui eos adgrediuntur, facilius ferant itemque facile feliciterque superent citiusque convalescant, ut fortunatis alioquin adversa omnium sensibilissima sunt vixque ferenda: Consuetudo enim adscititia natura atque pessimus etiam tyrannus, ut alibi, etiam ægrotandi attendenda venit, utpote quæ non tantum in pejus sed in melius mutatio, non prorsus periculo vacat, quoniam natura nondum ejusmodi, exercitamenta habuit, talem extraordinarium effectum producendi ac quidem hæ circumstantiæ requirunt. Consueta enim omnia magis sunt similia adeoque facilius feruntur & aguntur quam inconsuetæ. Quo magis vero insueta quælibet, eo læsiones ab eorum usu præsentiores. Sic toleratio dolorum ex calculo, podagra &c. per assuetudinem eos reddit leviores, plerique morbi chronici, tusses, phthises quædam paralyseos species, lunatici, in principio maxime periculosi existunt, tractu denovo temporis facilius superantur. Sic I. O. H. DE BEVERWICK advertit in *der Steinprufung* p. 83. quod ii qui sæpe calculos excernunt demum sine ullo aut exiguo dolore afficiantur. Sicuti & tribulationes non adfuetis animum adeo conturbant ut difficillime iterum componi placarique queat. Est hæc occulta adhuc atque in usum nondum translata quædam curandi ratio, ex assuetudine nimirum rei per se noxiæ petita, ut patet maxime in iis quibus venena familiaria reddita sunt, ut Mithridati R. & Turcis opium, ac puellæ illi apud GALENUM *Lib. III. de nat. simpl.* napellus, ut & ex parte in curatione morborum quorundam per adversa admodum remedia nauseosa alias male olentia difficillime ferenda, ut passionis hysteriæ, epilepsiæ, pestis, hæmorrhagiæ &c. per asam foetidam, fumum sulphuris, pennarum accensarum, stercore animalium & similia foetida applicata. Hoc inde seorsim inferendum etiam quod quando morbi epidemici & contagiosi, ipsa pestis &c. regnant quibus hoc corporis habitu gaudentes valde obnoxii sunt (ex eo potissimum quoniam talis sanguis in corruptionem putredinemque pronus est & insensibilis transpiratio aliæque utiles & necessariæ secretiones & excretiones læsæ ac impeditæ,) graviolem atque periculosiorem noxam eorum

rum succis concepta miasmata inferant. Verum enim vero & hoc animadvertendum est, quod tales levatis aut superatis potioribus periculis atque dein convalescentes facile iterum & vires corporis æque ac animum recipiant. Id silentio denuo dimittendum non est, quod, uti & in aliis secundis rebus, homines effrenati sibi præsidentes esse solent, parum prospicientes, rerum humanarum imbecillitatem varietatemque fortunæ; ita & quidam bonitate naturæ ac valetudine sua optima, nimis fulti atque confisi ita vivant, immemores humanæ sortis, ac stolide incerta pro certis habentes, falsa pro veris, quasi nunquam morituri sint, aut ad minimum, hodiernum hominum vitæ longæ terminum, qui est secundum Helmontium centum & viginti annorum, feliciter pervenire possint: exemplis longævorum, Pollionis, Romuli, Argauthonii, Masinissæ, Gorgiæ Siculi, Perpennæ, Marci Corvini, Metelli, Johannis de Temporibus &c. nimis freti, sicque nec morbos nec mortem nec Deum ipsum quicquam in ipsos posse, arbitrentur. Quo vitio atque negligentia bona sua inæstimabilia non æstimant parumque caute agunt, variosque errores committunt, memores forte, quod gravissimi etiam errores alicubi impune sæpe ferantur, quibus periculum incurrunt speque sua atque fiducia frustrata uno atque inexpectato casu sæpe viam præcludentibus fati. Tam male humani generis thesauros condunt stolidi quos utilem in modum studiose collocare debent. De his valet hoc: quod mors oriatur ex abstinentia animæ a curis corporis sui, & quod ipsi in suum exitium insurgant suoque fiant vitio miseres, ac si non satis eos natura miseros fecisset; siquidem & plurimi hominum, corpore suo, abutentes sua culpa se perdunt. In hæc prolata ulterius apte quadrat SENECAE eloquium: *Non accepimus brevem vitam, sed facimus, nec inopes ejus, sed prodigi sumus.* Hi sane denuo vere, intelligunt sua bona, quando ea amiserunt. Horum quidam hæ fiducia, quam de se ipsis conceperunt, nimis elati, totam artem salutarem medicam laude dignissimam ea propter exhibitant vilipenduntque sibi certissime persuadent, quod ob hoc naturæ beneficium, medicina quadam neutiquam indigeant; sique medicum admittere cogantur, eorum tamen legibus se superiores credunt, horum proin præceptis se subtrahunt & naturæ vim inferunt. Quinimo quidam eorum animo tam elato se ostendant, ut cum ægrotent graviter, tamen pudeat medicum accersere, quod ignavum ac forti viro pudendum existiment ægrotare: agunt ergo ut volunt; patiuntur ut nolunt & moriuntur ut debent, ut cum B. Bohnio loquar. Ast himetipsi tandem certissimo suo damno hunc supinum errorem ac-

cusare habent necesse atque carendo discunt quam cara sint bona. Alii e contrario longævitatis cupidissimi & tria hæc in omni morbo gravia, metum mortis, ipsa morte graviolem, dolorem corporis & intermissionem voluptatum perhorrescentes, nimis meticulosi atque solliciti, quales ut plurimum phlegmatici sunt & melancholici, qui, quæ metuenda minime sunt, faciunt esse horrida, ad conservandam felicem suam conditionem infinita medicamentorum cupiditate trahuntur atque præter ordinarias curas sic dictas vernaies, autumnales per aliquot menses usque sæpe protractas, singulis hebdomadibus, pillulas polychrestas, purgantes, singulis diebus singulisque eorum partibus, mane in jentaculo, circa meridiem in prandio, circa vesperam, somni tempore singulisque interdum horis pharmaca confortantia, panaceas, elixiria vitæ, cordialia, visceralia, ex auro etiam argento atque lapidibus pretiosis petita devorant, præsertim si ægrotare sibi saltem imaginantur, aut etiam alias de hoc vel illo morbo conquerentes aut vident aut modo audiunt. Quæ vero evexiam adeo non stabiliunt, ut quoque deiciant. In hanc rem alibi dictum est:

Ense cadunt multi, plures medicamine stulti;
vel dum vitant stulti vitia, in contraria currunt. Hi certe rationem, causas modumque generationis sanitatis, quidque vita sit atque unde & quomodo vivamus & quomodo ea conservanda, ignorant, perpetuum faciunt negotium naturæ, eam instaurando labefaciunt, atque nimia hac corporis sui cura, naturæ ordinem temere turbant, eoque morbos invitos blandis irritamentis ultro invitant: Etenim sanitatis perpetuatio a rebus non naturalibus medicis dictis, aëre cibo & potu, somno & vigiliis, motu & quiete, pathematibus animi, vestitu &c. potissimum tanquam causis dependet. Verum ut in secunda valetudine morbos futuros avertere tentant, adversæ præsidia consumunt, & dum valetudinem variis auxiliis sustentare volunt, sibi morbos excitant, eoque violento modo violentam velut mortem sibi inferunt. De his dici potest, quod ad mortem perveniant, quia crediderunt, quod ad eam jam pervenissent: Hinc tot v. gr. ex assumtis diureticis fortioribus, orti calculi tot ex assumtis crebrius sudoriferis hæcticæ, tot ex calidis stomachicis, scirrhi, hydropes &c. Sciant hi, quod in regimine sanitatis non competat aliquid medicinale non nisi forsan ad præservandum vix vero ad conservandum: nam sicuti de proprietate cibi est conservare ita de medicinæ est alterare. Hac alteratione etiam sæpe alia ex parte lædere possunt: nam præter hoc quod pharmaca quæ internecioni aliqua ex parte resistere queant,

ant, vel paucissima sint & adhuc quoque incerta eaque propemodum omnia nostro corpori quodammodo adversantur, quoniam iis utimur ut plurimum ut corpus a statu præternaturali ad naturalem reducamus: siquidem & nulla eorum adeo apte ac proportionate præparare artifices possunt, quæ ad nobilissimum, ut ajunt, vitæ balsamum atque sanguinem præcipue humoresque singulos coæquant: Quando itaque ea si aut præpostere, non justo tempore aut diutius aut sæpius exhibentur ex salutaribus causis tandem morbificæ fieri solent & suas alienas nimirum a corporis natura qualitates imprimunt, ita ut profecissent quandoque, si nunquam exhibita fuissent. Ita sane cum medicaminibus sicuti rebus non naturalibus, ut & aliis fere omnibus comparatum est, ut commodum pariter ac noxam afferant; non tam per se, quam vitio potius utentium, qui res quasque optimas sæpius in perniciem convertunt. Ad hoc nemo exacte noscere potest, quoniam in statu corpus tum se habeat, quando medicamina veniunt propinanda atque quando operari incipiunt: Is enim cujuslibet individui etiam sani, omni fere tempore insigniter mutatur, tum ratione particularum, quæ vi sanguinis iterum iterumque commoti, in transpiratione exhalant, quam earum, quæ ex alimentis atque aëre diversis in locum illarum iterum succedunt, quin & solidarum partium dispositio subinde atque sæpius talem immutationem experiuntur. Quam plena sint erroris & incertitudinis, ea medicamina, quæ tales, de sua sanitate conservanda, nimis solliciti, affatim ingerunt, curatius æstimantibus, constat: Libemus inter ea saltem stomachica, dicta, quæ antè omnia iidem promiscue in quotidianum usum trahunt, persuasi, ac si omnes morbi, ex ventriculo proficiscerentur: Verum enim vero, digestio nunc a ventriculi & intestinorum motu, nunc a viis per quas menstruum ventriculi adfertur, nunc a mucilagine ventriculi, vel saliva, nunc a sola ciborum qualitate &c. potissimum pendet. Quantum idcirco, & quomodo menstruum digestivum in statu secundum naturam consistat, aut ab eo recedat, num per alias peregrinas particulas admixtas, an per propriarum differentiam; quo medio causæ, vias illas vel angustantes vel dilatantes, aliave ratione eas turbantes ac pervertentes; atque specialis depravatio salivæ se habeant, quomodo & in qua recrementa, alimenta menstruo inadæquata degenerent; adeoque quomodo appropriata remedia exploranda sint digestionem juvantia aut restituentia; ea omnia aliave, inquam bene cognita esse hac in re omnino necesse est. Quo indicio modo se prodit, quid a vulgaribus sic dictis stomachicis sibi promittere possint. Si & ejus-

modi homines in fonticum morbum incidant, remedia concinne licet adhibita, nihil efficiunt, quia natura iisdem est adsueta, quare ferme perpetuo remediis opus habere, imo in dies ea augere videntur, qui perpetuo & indefinenter iis utuntur, quæ etiam tunc non raro obfunt. Certe hi licentiose nimis medicinæ imperant, medicina vero non amplius morbo. Idem dicendum, de diætâ, quam ad numerum compositum, strictiorem (ut summum jus facile in summam injuriam transit) scrupulosius aut potius superstitiose observant, contra CELSI monitum *Lib. I. c. I. Sanus homo & qui bene valet & suæ spontis est, nullis obligare se legibus debet*, quoniam accurate & rigorose motus determinantes, tantum abest ut ideo sani sint magis, ut magis sæpe numero valetudinarii qui & ab erroribus aliis facile læduntur. Minus enim cavemus et in maxime cavemus. De his certe valet illud vulgare proverbium: misere illos vivere, qui medice vivunt. Si denuo hi, qui adeo solliciti sunt & scrupulosi, paulo graviores morborum insultus patiantur, adeo evadunt meticulosi, ut postea etiam ad novas ægritudines eo promptiores reddantur. Metus & dubitatio Naturæ legibus inevitabilibus contraria majus propemodum malum & periculosius sæpe, quam ipse morbus. Felices iccirco terque quaterque felices, quibus in corpore etiam infirmo & morbido animus placatus & integer inest, præ aliis, quibus in corpore vegeto & sano animus infirmus maleque moratus. Ex his jam aliisque in sequentibus forte superaddendis, perspicitur varia accidentia communibus quasi adiutoriis, in corruptionem interneccionemque ejusmodi habitus conspirare. Adeoque cum vino esse comparandum sanguinem, propemodum existimandum est: quo id dulcius, mitius, oleo & spiritu plenius & ad ebullitionem atque ad effervescentiam pronius, palatoque gratius atque acceptius, eo difficilius conservandum, atque minus durabile corruptionique pejori atque majori, acescentiæ esse subjectum. Quare in transcurso quasi monendo, WILLISIVS non vana quidem prorsus ratione autumat, in tuenda & recuperanda hominum sanitate & Medici & Oenopolæ parile propemodum esse officium: sanguinem reliquosque humores perinde ac vina in æquali temperie æqualique fermentationis motu servare, sic nimiam e vasis aliquam partem deplere atque fervorem attemperantibus demulcere, acidum invertere, v. *Tract. de Ferment.* Unde & apte ANTIPHANES protulit:

Est nostra vino vita quam simillima:

Acescit, & cum reliqua prava portio.

Conf. & JOH. SOPHR. KOZACK *Tr. de Hemorrh. Lib. II. cap. I. p. 365.* Etenim ambo pari modo moventur: recens vinum prius limpidum, mox crassescit, & quæ prius in eo continebantur, occulta, ex se separat, vel per orificium vasis superius expulsa, vel ad fundum præcipitata factoque sic secessu, in partes plane differentes tenuibusque effluviis sine foetore ingrato exhalantibus atque liquoris sub finem residui diaphaneitate & tenuitate procuratis. Ex his prolatis simul jam innotescit, habitus diversos corporis magnas habere opportunitates vel difficultates curandi.

§. IV. Juxta vasorum ab exuperante sanguine & humoribus plentudinem carnea enormis compages, caliditatem & humiditatem sanguinisque multitudinem ac membrorum interiorum & exteriorum ostendens bonitatem, utpote quæ in subjectis ejusmodi multum bonumque sanguinem, (tam quoad consistentiam quam motum) alentibus ac turgidulis panis facile concipitur atque luxuriat, & propter compactam nimis ac solidam musculorum substantiam, multo insuper sanguine infartam motui se exerendo, impedimentum injicit. Quippe fibris carneis corrugare se nitentibus vix ullum in laterales partes concedendi spatium datur, unde spiritus animales ægre influunt, atque functiones quas præstare debent, summa cum difficultate perficiunt omnes, inter quas motus & respiratio præ aliis se manifestat gravata atque impedita. In quibus caro musculorum externorum ita luxuriat, ita & ordinario ea, vasorum interiorum nimium fere simul augetur, unde crassities tunicarum, ex qua, cavitatis vasorum imminutio & pororum compressio: hinc in multitudine succorum præsens quoddam periculum; quin etiam viscera in quanto excedunt, ut lien & hepar, quales observationes plurimi Autorum addiderunt. Tametsi hæc crassitudo ex carnis abundantia, si moderata saltem adest, membrorum interiorum & exteriorum bonitatem similiter & restaurationem eorundem indicans, ut & ea ex ossium magnitudine non adeo culpanda, quatenus cum robore virium adhuc conjuncta est. Præcipue autem, quæ ipsa morbus est, nimia, quæ membranosis potissimum adnascitur partibus pinguedo, seu oleosus semisaponarius succus lente stillans, (cujus & hinc ut & carnis generatio ultimus nutritionis actus est) ex abundantia succi nutritii & chylosi generata, sanguine temperato blandius & parcius chylum transmutante
col-

collecta, in membrana tanquam frigidior partium textura, adiposa, cellulosa ac non solum sub cute (adiposo) hoc panniculo ejusque sacculis (quos jam ante Malpighium Molinettus novit) omnem corporis artuum, que occupante ambitum atque non modo in abdomine & maxime hypogastrio, tanquam sede quasi primæva pinguedinis, nec non in singulis externis corporis partibus, sed & internis nec cerebro quidem excepto, fibrosis carneis fasciculis undique intertexta nocumento est, ut & in mesenterio, præcipue in thoracis cavitate, ubi pulmonibus expandendis obstaculo est; Hinc obesorum communissima illaque maxime verenda, asthma & incubus, symptomata sunt. Hinc est, quod in Medicina Forensi obesi, achordæ & equulei tormento absolvantur. De visceribus pinguedine nimia obsessis variæ prostant Autorum observationes. KERCKRINGIUS in *Spicil. anat.* p. 134. Cor, ob immodicam circa illud collectam, in motu suo impeditum fuisse, de pulmonibus idem SCHOLZIUS & BARTHOLINUS in *M. N. C. D. I. A. Observ.* 101. testantur. Pericardium adipe ita obsessum fuisse constrictioneque sua debitam cordi expansionem denegasse, ut repentina mors subsequuta fuerit, apud Bonettum legitur. Sic in colo, intestino, adeps multus & inæqualiter distributus meatia excrementa moratur; præ omnibus vero internis partibus omentum pinguedinis mole gravatur. Hæc alias pinguedo si moderato modo se habet ad speciem integritatemque corporis facit, inania replendo interstitia, mollitie & oleaginitate sua, lubricando movenda, etiam cor atque ad motum promte reddendo, cavereque, ne eadem obrigescant, spicula acrium salium refrenando ac involvendo: Hinc sine dubio ob pinguedinis defectum, senes tales defluxionibus, catarrhis, rheumatismis adeo obnoxii sunt, atque ut plerumque incurabiles illi. Eadem porro apta & utilis est ad separandum singulare quoddam oleum, illudque sensim in sanguinem inferendum, ut consistentiam & necessariam dulcedinem sanguis adsequatur; Nec non corpori ulterius inservit primordia bilem constituentia, largiendo, injurias externas arcendo, promptuarium Naturæ, (qualia plura ut medullam in ossibus &c. & alibi in corpore humano sapientissimus rerum Conditor, Deus, constituit) in casu necessitatis ut tempore famis atque in morbis quibusdam, (ut nimirum tunc proprio alimento, alieno denegato, nutriantur atque sustententur) (siquidem & hoc de muribus alpinis constat, qui ideo omento triplici & quandoque quadruplici donati sunt, ut observavit PERRAULT *Essays phys.* T. III. cap. VI.) præbendo, quatenus nimirum hujus sacculi, in quibus colligitur forte constringuntur, reddant asser-

vatum,

vatum, atque vicinis venis tradant. Singularis hic nobis occurrit observatio, quæ in *vita Jac. Usserii Hiberniæ Primatis* a RICL. PARRO Anglo, descripta legitur: Nimirum in hoc demortuo, crassa quædam membrana adipe oblecta, pro continuato omento habita, visa est, quæ super totum stomachum se extendebat, superius peritonæo annexa, paulo infra diaphragma, quam quidem membranam, haud parum ad facilissimam, qua gavissus est ventriculi digestionem, contulisse, creditum est. Siquidem & id quoque de se perhibuisse, dicitur, se nunquam, ne in magna quidem commotione, ullam palpitationem cordis persentiscere potuisse. Ast immoderata coacervataque nimis non modo æque ac nimia carnositas, ornatum corporis, sed etiam usum (qui ambo sunt naturæ & medicinæ scopi) nostræque limites sanitatis vitiat atque molestiam detrimentumque affert, superfluiditatibus indigestis ac putredine humidiori collectis, atque in morbos proclives homines reddit, si nimirum iis oleosæ hæ particulæ tenacius canalibus inhærent, ac omnia spatia plena sunt, atque musculorum stamina nimium emolliuntur, ut difficile ab incumbente pinguedine se constringere queant. Glandulæ multis in locis ab ea adeo sunt circumvallatæ, ut fluidi vario itui ac redditui, non parum obstare posse videatur. Omnia vasa, sanguinem spiritusque animales vehementia ita sunt compressa angustiora atque exilia facta, ut nervi, hos spiritus per se in his subjectis obesis pauciores, debiliores atque torpidiores (quoniam sua natura salini sunt, salia vero in sanguine nimis chyloso deficiunt adeoque non sufficienter generari possunt) ad motum sensumque præstandum non satis libere adducant atque arteriæ in fibras venarumque radices atque extremitates, sanguinem difficile refundant. Ipse sanguis isque hic parcior ordinario, multis pinguedinis particulis, quæ quidem connubium cum serosis non ineunt, quin etiam respuunt, saturatus lentescens ejusdem circulationem facile atque repente intercipit. Insuper & ipsius sanguinis impetum debitum, moderatum refrenat, dum partes ejus ramosæ & inviscantes sanguinis activas & subtiles particulas coercant, etiam salia humorum hebetat & secesum eorum inhibet. BARTHOLINVS in *Anat. refor. p. 25.* testatur, pinguedinis frustula in cordis vasis hæsisse; Accedente vero porro, ex cibis, novo succo nutritio eoque uberiore cordis ventriculi ita opplentur, ut in actione sua quæ constrictio est, impediatur, humores figantur ac coagulentur, unde polypis concipiendis repentinis lipothyiniis ac animi deliquio, suffocationibus ac vasorum ruptionibus, (ubi minor illorum resistentia, major vero sanguinis impetus occurrit) atque catarrhis,

Nnn nn

quos

quos vocant suffocativos, apoplexiæ repentinæ ischuriæ exitiali nec non febribus, &c. patulam aperiunt viam. De his speciatim notamus, quod infantes maxime obefiores sæpissime febribus catarrhalibus, (quarum causa pinguedo) tententur. Quare non adsequor, cur pinguedinem infantibus ADR. SPIGELIUS deneget. Quemadmodum enim lampadis ardentis flamma nimia pinguis alimenti abundantia superfusa, obruta extinguitur, & ab externa quasi violentia suffocatur, ita & se res cum corporis nimia pinguedine habet. Rursum aliud malum indicium indicandum venit: Si & in ipsa massa sanguinea pauca vel nullæ pinguedinis moleculæ innatent, sed aliorum ablegatæ sint, tales oleosæ atque sulphureæ, ramosæ, eadem justo dilutior fluidiorve, nec non acrior, fallibus, per easdem non coercitis redditur atque inanis, omni gelatina exuta, calore naturali velut extincto, ex qua fluiditate nimia sanguinis peccante multifarii deinceps exoriri possunt casus variaque pericula, ut scorbutus, calidus vulgo dictus, febres catarrhales, hæmorrhagiæ, apoplexia, inflammationes, ophthalmiæ, pleuritides, cephalagiæ, faucium & tonsillarum intumescentiæ, arthritis. Atque quoniam animales spiritus non ita facile musculorum fibras sic inflare possunt, ac ob ingentem simul thoracis molem ac pondus, prægrandia viscera & intestina atque abdomen, pinguedine gravatum tumidumque, costarum elevatio non minus quam diaphragmatis motus impeditur, anhelosi ac suspiriosi, ad motum inepti torpentes veternosque redduntur. Hinc GALENUS refert quod athletæ neque ad bellum neque ad agriculturam idonei fuerint. Præter hæc mala obeforum maximopere verenda alia quoque notanda veniunt. Sic notissimum est, tales, motionibus corporis atque laboribus, vociferatione, fortiori cantu, syncrasioque risu, sternutatione vehementi &c. parturientes item, laborioso & forti nixu ex facili hernias sibi contrahere, pinguedine nimirum intra fibras disseminata atque sic musculis quasi oblitteratis atque intestinis per illas pinguedinis portiones hincque fibris laxioribus factis, penetrantibus. Hinc inter tubicines, cantores, bajulos plures herniosos reperies. Nec vanus hic certe metus, sed experientia eaque uberior docet, quod tales homines aut siderati aut suffocati, syncoptici aut effuso sanguine consœditi, non raro data levi quandoque occasione ac causa, motu v. g. paulo fortiori corporis animique commotione, ira, terrore imo gaudio, aëris frigidioris, borealis validiori afflatu, egestionibus per alvum atque urinam sufflaminatis, fortiori in reddenda alvo & in parturientibus foetum edendo, nisu, & similibus aliis subito pereant ocys, quam quod se ægrota-

re

re sentiant. Ejusmodi exemplum inter alia de Attila Hunnorum Rege, crudelissimo atque in viventium cædes prono, pessimo illo Dei flagello, eadem athletica evexia ad summum distento prodidit JORNANDES *de reb. Get.* eum inter nuptiale epulum, subito animam cum sanguine ejectasse. Similiter DOLAEVS *Encycl. Med. Lib. I. cap. X.* aliud affert de cive quodam, ob nimiam obesitatem, liberum sanguinis itum reditumque impediens paralyti affecto, ac apoplexia extincto. De aliis ob hanc ipsam causam suffocatis quidem GALENVS *de Diff. morb. Lib. III. cap. IX.* SCHENCKIVS *Lib. II. Observ. CCXIX.* HILDANVS. *Cent. VI. Obs. 97. p. 630.* TIMAEVS *Cas. II. Lib. VI.* SCHVLZIVS *in M. N. C. D. I. An. II. Observ. 87.* DOM. TERILLVS *de Caus. mort. repent. Sect. VI. C. III.* MARC. DONATVS *Hist. med. mir. Lib. V. cap. II. P. ZACHIAS Quæst. med. leg. T. I. Lib. V. Tit. 2. Quæst. 12.* VIDVS VIDIVS *Lib. IX.* BONE-TVS *Med. Sept. T. I. Lib. II. Sect. 23. Cas. 7.* TRINQVAVELLVS *Consil. M. Lib. III. Cons. 101.* MALPIGHIVS *Op. T. II. A. N. C. Dec. I. an. 2. obs. 97.* anatome pueri nimia pinguedine extincti KERCKRING *Obs. Anat. Obs. LXVI. p. 134.* aliique testantur. Hæc etiam debetur animadversio: Quando in obesitate per calorem aëris intensum, vel validissimos motus atque corporis exercitia, vel febres acutas continuas atque arduas, colliquata pinguedo massæ sanguineæ reaffunditur. Vid. *Miscel. Nat. Curios. A. VIII. obs. III.* sicque illud oleosum minima vascula lentore suo obstruit ac impedit, aliorum liquidorum per eadem transitum, sæpe lethalis peripnevmonia subitaque mors accersitur. Celeb. Ruyschius vidit solutam & effusam omnino ad aliquot libras, in cavitatem abdominis pinguedinem, quemadmodum & equi valde obesi subita & validiori agitatione sæpe extinguuntur. Si quidam eorum ab ejusmodi præcipiti interitu liberi manent ac vitam aliquando diutius protrahunt, infelicem tamen eam ducunt atque senectutem vegetam raro attingunt, quare GALENVS *in Hort. ad bonas artes Cap. IV.* id genus hominum miserimum vocavit & Crates, Thebanus, lepide, in illud illudit. Quin in valedudinariis frequenter observamus, eos subinde novis accessibus symptomatum ac molestiis tentari, quando sibi videntur se quam optime habere viribusque valere atque extenuati corporis augmentum ab aliquo tempore perceperunt, quo rerum statu tritum illud Medicorum axioma allegare convenit: Corpora cacochymica quæ sunt, tum in morbis in actum deductis, tum in fieri talibus, impura, quo magis nutriveris eo magis læseris; nutritur enim potius materia impura, nec subigi rite, secerni & excerni, ob vascula nimis turgida, tonumque & languidum & in-

sufficientem, potest atque quoniam inquinatus atque conspurcatus chylus faceffit magis in causam morbiferam quam corporis alimoniam. PHILIP. HECQUINET, in quibusdam subitanea morte concidentibus detexit fati præcipitis causam: in altero enim pinguedo nimia pulmones compresserat & polypo cordis ventriculi sinistro transitum sanguinis retardante: in altero labore fodiendi fatigato, vena cava prope cor disrupta sanguine inundavit viscera. Conf. *Observ. 101. Dec. 1. Ao. M. N. C.* Alii interiores quoque recessus præ aliis omentum pinguedine obfessos pressosque invenerunt. Vid. GVIL. FABRICIVS HILD. *Obs. Chirurg. Cent. 17. observ. 97.* BAGLIV. *Oper. p. m. 393.* scribit, quod in iis, qui calculis interierunt, omentum pinguedine abundans invenerit, causamque adjecit. Unde obesitas multorum morborum Lerna & Ilias semper habita est. Ad rem HIPPOCRATES scripsit *II. Aph. 44.* qui natura admodum crassi sunt citius intereunt quam graciles, & præpinguia corpora celerius senescunt. Cæterum quoniam succorum redundantia in pinguedinem abit aliæ functiones animales sufflaminantur, ut v. gr. de obesis & athleticis mulieribus constat, quod in iis mensium fluxus, quamvis citra sanitatis notabilem noxam quandoque deficiat &c. Huc forte respiciunt Indorum Proceres, de augmento sui corporis veriti, qui, singulis annis quandoque singulis mensibus (intra hoc temporis spatium enim secundum SANCTORII computum in *Med. Stat. Sect. 1. Aph. 65. seq.* unius duarumve librarum pondere corpora graviora fiunt) corpora sua bilance exacte librare assolent, atque decrementum aut incrementum illorum, cum cura notant atque æstimant. Quam ponderationem hodie imitantur Angli quidam, qui obesorum corpora singulis mensibus ponderare solent, ad determinandam quantitatem alimenti diminuendi, ut & hydropicos, quavis septimana, ut intelligant, an morbum superaverint vel an ab eo superentur & quantum emolumentum in ipsos redundet, diminuendo quantitatem potus consueti v. THEOPHIL. LOBBII *Tr. de Curat. Calculi & podagræ pag. 205. seq. & pag. 320.* Huc apprime spectat illud JUVENALIS *Sat. XI. Noscenda est mensura sui, spectandaque rebus in summis minimisque.*

§. V. Si presse mala atque pericula, quæ ex hoc corporis habitu plethorico ventricoso atque obeso verenda sunt, exacta pensitatione ulterius & specialius paulo præterea quæ incidenter attigimus, metimur, & effata ac observationes tam a veteribus quam neotericis Scriptoribus collectas conferamus multis indiciis nos commonefaciunt, quod ea partim a putredine, suffocatione (ob multitudinem humorum) vel

vel venarum ruptionem (ob fervorem forte inductam) partim a spasmō (& inæquali hinc sanguinis & humorum circulatione,) partim ab atonia & sanguinis stagnatione proficiantur, quæ tamen pro diversitate ætatis, sexus, loci, consuetudinis, vitæ generis &c. variant. Nimirum sanguini præceps impendit putredo, tanto major quanto floridior & optima crassi ille præditus est, inflammationibus, suppurationibus, gangræna & sphacelo, quibus expositus est, testibus, ut & pus ex parte chylosa & oleosa gignitur, quæque sanguinis excedens copia, ut plurimum cum cacochymia denuo est conjuncta. Hæc dein nimium vasa eaque præsertim magna infarciens ac premens atque sic spatium quod ad fluidorum motum jugiter instituendum, mixturamque debite perficiendam requiritur, auferens, præsertim in temperamentis sanguineo-cholericis, & in agilioribus hominibus ac juvenibus ob partium debilitatem sic redditam, nimias membrorum tensiones fortioresque inducit strictiones, quæ magnas multasque in œconomia animali inferunt turbas atque sanguinem & humores cum impetu quasi ad alias partes propellunt, quæque deinceps per multiplices constrictiones p. n. fibris extensis, atoniam in iis relinquunt: sicque hæc vitia, spasmus nempe & atonia rursus mutuam velut ferram trahunt. Ubi hic imprimis subsistens premensque sanguinis quantitas in ejusmodi partibus & vasis, hæret atque visceribus, quæ per se impulsu non satis forti instructa sunt, aut debilioribus staminibus conflata, & in quibus motus sanguinis difficilius instituitur, adeoque ad suscipiendas stases quæ pessimæ omnium periculosissimæque conditiones sunt atque decubitus prona, qualia sunt pulmones, vena præsertim portæ ut & hepar, lien, pancreas, omentum, mesenterium & uterus. Sic v. g. quando per venam maxime portæ sanguis non rite circulatur pro varia ratione subjectorum & temperamentorum, ætatis, sexus &c. data occasione, in variis corporis locis schemata variorum moliminum, hæmorrhagiarum, congestiorum, translatatoriorum, restagnatoriorum, dolorificorum, inflammatoriorum, febrilium spasticorum insurgere ex facili possunt; Nam spasmō, plethoricis adeo familiari atque assiduo comite (dorsi & lumborum doloribus ante menstruum fluxum restantibus) ibi inducto, sanguis exinde ad partes superiores rapitur & stases ibi efficit in multa mala abeuntes. Sicque in capite in quo omnia plena sunt naturaliter & durum calvariæ os cedere nequit, per cerebri pressiones & imprimis corporis callosi striarum, liberum influxum spirituum animalium præpedientes collabantibus meatibus atque ductibus nervorum, hæmorrhagias narium, cephalalgias gravissimas, eas-

que admodum frequentes, vertigines, melancholias, insomnia turbulenta, phantasiæ turbationes, memoriæ & sensuum hebetudines, affectus soporosos, apoplexiam, paralyfin, maniam, phrenitidem, epilepsiam, aphoniam, ophthalmias, lippitudines, odontalgias, morbos auriculares, parotidem, gravem aurium tinnitum, cum ipsa audiendi difficultate, erysipelata, tumores & in infantibus dentitionem difficilem atque turbationem majorem ac summe periculofam, præterea, in pectore, constrictiones, anxietates, respirationem difficilem, tremulas humorum agitationes synopen, tussés, asthmata humida & convulsiva dicta, pleuritides, peripneumonias, anginas, oppressiones pectoris, phthises, hæmoptyses, suffocationes, quas vocant: *in seinem eigenen Blute ersticken*, (quoniam causa in ipsis pulmonibus latet, dum aut sanguis in iis stagnat, aut lymphæ nimis viscida, sive dum coagulatur in mucum,) porro tabes hæcticas, vomicas, apostemata atque abscessus & exulcerationes, animi deliquia, palpitantes cordis, polypos, diaphragmatis constrictiones cum morte subitanea, hic pleonasmus infert. Aliorsum cum impetu sic delatus in abdomine & quidem in regione ventriculi, & in ejus cavo flatulentias, cardialgias, colicas, easque nephriticas & hæmorrhoidales, alvi adstrictiones pariter ac diarrhœas, viscerum præsertim hepatis, lienis, mesenterii distensiones quandoque ingentes (V. STAHL. *Disp. de Hypoch. & Hyst. malo p. 20*) ac obstructiones, indurationes, tumores, scirrhescentias, ulcera, icterum, in vesicula fellea calculos, in vesica urinaria, (quando nimirum fibræ ejusdem præ plenitudine nimis distenduntur & in contractione impediuntur,) urinæ suppressionem (quam hinc RIVERIUS V. *Obs. I. Cent. I.* venæ sectione larga curavit,) item alibi hydropes, atrophias, cruentas per inferiora pariter & superiora ejectiones, morbum sic dictum nigrum Hippocratis &c. nephritides, hypochondriacam affectionem & hystericam, arthritides, rheumatismos, inflammationes, febres varii generis, acutas, ardentes, atque synochas in quibus & ardor intensissimus est diutissimeque durat, nec non putridas, semitertianas pestilentiales, suppurationes gangrænam, sphacelum internum & in foeminis fluorem album & hujus generis plures ægritudines inducit. In utero si subsistit nec expurgatur copiosus sanguis in specie vasorum quæ membranas investiunt etiam intestinorum ventriculi, spinalis medullæ imo cerebri distensiones & fibrarum nervearum pressiones, unde alia gravissima mala insequuntur, nec non polyposas in vasis majoribus concretiones & exinde frequentes abortus & post eos non solum, sed & fat felicem alioquin partum, alia incommoda, inappetentiam, vomitum &c. quæ puerperas

peras æque ac gravidas invadunt, accersit. Juxta hæc alia quoque vitia referenda eaque aliorum deducenda, ut pollutiones nocturnæ & gonorrhœæ, quas benignas vocant, salacitas, & nisi desiderium hoc expleatur, furores ad pessima facinora instigantes, ex alimoniam nimirum & seminis spirituosam abundantiam, enormes sanguinis profusiones & exulcerationes, & in pedibus tumores œdematosi & in his reliquis artubus spasmodici affectus, & varicosi atque in toto habitu corporis scabies humida apostemata proveniunt, ne alia jam plura nominemus. Tacitque prætereamus alia leviora incommoda, coryzas, narium fauciumque mucosam sorditiem, sensum gravitatis & stuporis, in toto corpore molestum, plumbeum velut torporem, membrorum, crurum, insolitam imbecillitatem & lassitudinem excrementis &c. Hæc & alia leviora ad majora eaque fontica sæpe vel ex levissimis externis quoque causis occasiones præbere possunt, ut v. gr. ad inflammationes & hæmorrhagias enormes, contusione, a festuca infixâ ex tussi saltem, sternutatione, arietatione a gelu graviore improvide admissa, atque in vulnere promptiores suppurationes &c. Insuper tales homines ob molem corporis prægrandem ad procreationem sobolis minus apti sunt, quod PLUTARCHVS jam observavit II. *Quæstion. Con.* Quoniam in viris præsertim materia illa, quæ præter modum in corporis nutritionem atque in carnes ac adipem impenditur, in seminis jacturam redit; & ejusdem stimulus salinus titillans obtenditur & obviscatur. Multo minus idcirco privilegio quodam, quando quæstio de præmaturo partu nascitur, præ aliis ejusmodi homines gaudent, nec valet ratio: Sponsus & sponsa fuerunt optimæ complexionis, robusti, plethorici, ergo intra 173. vel 185. dierum spatium perfectum & numeris omnibus absolutum fœtum progenerare potuerunt, quam quæstionem affert simulque decidendi rationem his verbis concipit: *Hic & illic dantur etiam robusti, quadrati rustici, vel rusticis similes (grobe grote Schlingels, proavis atavisque nostratibus Grote dicke Bengel) illorum tamen partus intra hoc temporis spatium non possunt perfici, sed debent expectare nonnum mensem.* In fœminis vero pinguedinis præsertim partes exuperantes ovaria obsident & seminis masculini accessum difficilem reddunt. Quod jam maximus Græcorum doctor, HIPPOCRATES indicavit multis in locis v. g. quando *Sect. V. Aph. 46.* scripsit: *Fœmina valde pingues non concipiunt;* Rursum *Lib. de Steril. de natur. muliebr. de superfet. Lib. de aëre aq. & loc.* hanc rem exemplo mulierum Scythicarum declarat causasque exponit. Quin etiam coitus periculosus est, licet crebrum quoque veneris exercitium obesitatem minuat, ut & AVICENNA &

ARISTOTELES *Lib. IV. Part. anim. Cap. V.* de eo loquuntur. Contrariis hinc juxta se positis, clare elucescit, quomodo ad hæc se habeat habitus corporis gracilis, qui humores magis mobiles, vias magis patulas fibrasque magis flexiles arguit, atque plus fervoris & calidi sanguinis, siquidem & omnes humores agiliores, ad sudationes magis dispositi sunt atque ventilatio faciliior, hincque is ad illos morbos superandos, qui subitæ materiæ & compulsionem & dissipationem vinci debent, pronior est atque adeo facile obrui & suffocari se non patitur.

§. VI. Has quidem causas & rationes sat graves esse arbitramur, ob quas bonus corporis habitus, præservationis gratia ne scilicet in deterius ruat sine mora solvatur atque extenuetur, quædam ejusque portio dematur, quo corpus, ut HIPPOCRATES loquitur, alterius nutritionis ceu convenientis, moderatæ ac melioris rursus initium sumat. Et quoniam omnis immoderatio naturæ sensum incurrit, adeoque a violentibus & prudentibus facile caveri potest. Ejusmodi enim sunt quibus hoc salutare monitum datum est, qui potissimum temperamento, ut dicunt, sanguineo phlegmatico calido & humido atque plethorico, obeso plenoque rubicundo, tumido, quandoque livore quodam notato, specioso & splendente quasi habitu, gaudent aut molli & spongioso aut duro magis strictoque, itemque venis amplis, turgidisque aut exilibus atque depressis conspicuo, quibus tempora attolluntur, eaque quandoque dolent, oculorum splendidioribus humoribus affluunt atque eorum præsertim venæ in tota fere eorum tunica adnata tument, rubent, sæpius lacrymis suffunduntur, toris luxuriant. Quanto itaque amplior sanguinis moles in canalibus continetur, etiam amplius spatium occupat & arteriarum tunicas magis extrorsum trudit, hinc pulsus eorum est præcipue magnus & plenus, quasi undosus validus ac creber, quique etiam in temporibus se manifestat, sæpius, quando ex uberiori sanguine multi quoque animales spiritus elaborantur, quibus cor instructum atque armatum majori vi sanguinem trudit, dumque amplior sanguinis moles in vasis continetur amplius etiam spatium occupans ea magis explicat atque expandit, sic & tum copiosius in ventriculos cordis influens sanguis, ita ut cor stimulo quodam ad actionem suam citius instigetur, tum uberius quoque in fibras ejus derivantur spiritus, ita ut cor motum suum exercere frequentius possit; Undosus vero instar fluctus movetur & virtutem gravatam significat, quæ non potest æqualiter omnes arterias per partes movere atque expandere, is si parvus & tardus fit, vermiculans appellatur. Ast in valde summeque plethoricis, ubi præcipue humores sunt spissio-

spiffiores, ac in obefis pauciori fanguine ac laxa flaccidaque corporis compage præditis, præfertim ſexus ſequioris hominibus exilem, languentem, rarum atque inæqualem, potius eum deprehendunt tangentes, ob lentorem inductum parcioſioremque hinc ſpirituum ſecretionem eorundemque inæqualem, ad cor derivationem &c. Manus cum digitis præfertim vix inter ſe complicare poſſunt. Vaſtam, quadratam, inconditam, rudemque plurimi eorum (valde obefi & craſſi) circumgerunt corporis molem, quare difficiles facere grefſus coguntur; ſi vero accelerare eos geſtiunt aut loca acclivia & ſcalas aſcendere, ſuffocationis quaſi periculum timent, diutiusque in membris laſſitudinem contuſoriam velut perferunt. Nitentem porro habent cutim, caput atque faciem magnam, latam, plenæ lunæ ſimilem, cum labiis admodum rubicundis, protuberantibus, sæpe fiſſis, quando præfertim aër paulo frigidior aſſat, cum naribus expaſis atque obefis intus coarctatis, ut difficilius per eas reſpirent, buccis item efflatis, mento deducto, guttureque turgente ac propendente burſæ appenſæ ad inſtar, (quo nihil Hiſpanis deformius eſt. Vid. D' AVNOY *Itin. Hiſp.* adeo ut velamine reducere illud atque velare ſtudeant). Quosdam ideo naſones, labiones, buccones, capitones, atque bucephalos & quotquot alia monſtroſorum & deformium nomina ſunt, forte dixeris. Collum porro elatum, cervicem brevem, duram craſſamque, pectus ampliſſimum, & foeminæ ventroſas mammas, tergum opimum & protentum, ad natium uſque ampliſſima & luxuriantia tubera, abdomen aqua aut vento quaſi turgidum & prominens præ ſe ferunt: Verbo ineptam Bacchi aut dividis epulonis in *Evang. LVCAE XVI.* effigiem monſtrant, exindeque ſuperbientium in modum inanem captant gloriam, in ſinu quaſi gaudentes, quod bene nutriantur atque in dies majus augmentum vaſti ſui corporis, capiant & quod vel centum libras plus quam alii pendant. Præterea deſaſſatione ſere perpetua, licet quieſcant, moleſtantur, motu enim tonico etiam laſſantur membra, quæ ſuſtinere debent pondus, quod quo majus eſt eo quoque moleſtius. Sunt porro obliſioſi, ſomnolenti, & in ipſo ſomno non inſomniis ſecundum GALENUM *I de Humor. Com. I.* & alibi, de hæmorrhagiis, caſu ab alto, rubris objectis apparentibus & ſimilibus, carentes, oſcitabundi, pandiculationibus, porrectionibus frequentibus manus pedesque exercent. Spina dorſi frequenter dolet, quoniam medulla, quæ ſenſu acuto prædita eſt, ita preſſione ea quæ ab arteriis diſtensis oritur, facile afficitur, phlogofiſibus exardeſcunt, tum volaticis magiſtrum ſtataris, naufea, vomitibus ſubinde tentantur, aliisque dejectionibus iisque interdum ſanguineo

neo colore respersis (cibi enim supra modum devorati robustam naturam ad has purgationes sollicitant HIPPOCRATE advertente *Libr. de purg.*) rhonchos crepant perpetuos, ructus vel inviti nidorosos, sonoraque murmura ventris frequenter emittunt. Si se nimio cibo & potu repleverint graves ac pigros & movendum laborandumque plane ineptos, protinus se sentiunt. Ad commotiones massæ sanguineæ orgasticas proclives, sudore acri, vel ex levi corporis incalescentia, exagitante & resolvente, colliquante atque attenuante, ultraque reducete, sive per motum paulo fortiolem inductum, sive tempestatem æstuantem, calidam humidam, sive per somnum, in lecto molli atque plumoso, pene diffluunt; qui sudores nocturni, spontanei juxta Hippocrat. plenitudinem victus indicant. Attamen aliqui præsertim foemina minus perspirant, ob molliorem texturam, hincque imbecilles vires, pulsusque languidos, cum tamen in iis æque ac in viris observetur sudor, isque sat largus cujus causa ac ratio decidendi est apud SANCTORIUM multum in hoc argumento diligentemque observatorem atque censorem, qui *Sect. I. XII. XIII. XXIII. CX. Sect. V. III.* perhibet, perspirationem atque sudorem ita parum inter se convenire, & inter se fere commune habere, atque quo hic amplius provocatur, eo magis illam minui, sique præcesserit sudor paulo uberior, perspirationem ad aliquod temporis spatium languescere. Quid? quod GALENVS *Caus. puls. III. IV.* in iis quibus vita athletica contigerit, quales & rusticæ mulieres sunt, laboribus se exercentes, sique ad robur masculinum accedunt, pulsum validiorem deprehenderit, siquidem & in his parcius menstrua fluunt cum tamen in plethoricis alias & lacte scaturiente, menses fluant, ut & cantatricibus, saltatricibus, SENNERTO *T. III.* FORESTO *Lib. XXVIII. Obs. I.* referentibus. Ob id, non uti Alexander Magnus R. M. balsamum spirant, sed alarum foetor abominabilis pendorque eos confœdat, hircumque olent, atque mephiti distinguuntur ut Thais. Sybariticas vel Syracusanas mensas luxuria plenas quas Plato damnavit, amant, atque delicias Luculli sibi exoptant. Non stomachi sui norunt mensuram plerique eorum plus sæpe ingerunt sibi quam capiunt, non esuriendo cibum sed saturati esuriem quærunt, & ut IVVENALIS exprimit:

Et quibus in solo vivendi causa palato est:

Imo gloria est capere multum, quasi non alio fine quam ad perdenda vina cerevisiasque sint geniti, & tanquam hæc effundi non possint nisi per humanum corpus. Sic aviditas nescit modum & varietas excedit mensuram

furam atque cogunt vitiis servire naturam, famemque ac sitim, quæ naturalibus remediis, facile sedari possunt, variis iisque superfluis, irritant. In jentaculum, prandium, merendam atque coenam pocæniū addendo atque ἐπιδορπίσματα Græcorum, Lydiorum, Jonum, Siculorum, Syriorum, Sybaritarum, Persarum &c. (qui erant luxui, deliciis & gulæ dediti) in regulam & libellam, commessationes, dies dividunt. Tam brevis est gulæ voluptas, ut spatium sit vix trium aut quatuor horarum, contemnitur mediocritas & superfluidas affectatur, in diversitate saporum, varietateque ciborum, hincque esurire & sitire iis quasi sunt gaudia. Gulosi tanquam alteri Philoxeni (gulosi) sunt, a patinis, in quibus semper animus, rapiunt, buccas & mandibulas continue prurientes, assidue exercent, Boëoticum & Thessalicum in modum, quo exercitio usque ad sudoris eruptionem se fatigant, (sudor enim omnino a repletionem cibi & potus excitatur, unde HIPPOCRATES corpora sudore diffluentia purgatione egere scribit) torpescunt atque obdormiscunt, (alioquin laboribus lubentius frigent, secundum illud exinde natum proverbium: *Er ist, daß er schwitzt, und arbeitet, daß er friert,*), siccantque desuper calices naribus quatuor atque plurima hilaritatis pocula reposcunt, eaque temulentiae & ebrietatis addunt, sicque a mensa tam opipare saturati quam Angli, ut in proverbio habetur, resurgunt. Dicerēs, iis inesse, omasum & ob omasum, camelorum ad instar. Ob hanc corporis mollem duplo, triplo, quadruplo auctiorem atque in excessu majorem ægerime se movere possunt, ideoque ut proverbium fert: pinguis venter non gignit sensum tenuem; aut: homo pinguis, rudioris Minervæ & oleosæ naris, ad res gerendas inepti fiunt, unaque cum corpore animus ejusque inclinationes sensus, omnisque propemodum vitæ ratio hebescent ac torpent, atque plerumque contingit, ut excedenti corporis molli, parvus animus insit, hincque negotii operosi aversatio, ad res subitas trepida cunctatio, in periculis anxietas & consilii inopia tandemque desperatio &c. Imo cum iis inclinata res est atque a recta via errant, moresque corrumpuntur; siquidem non pauci eorum hac athletica corporis constitutione noti, athletarum quendam improbum ac perditum genii modum quoque æmulantur, quem GALENVS paulo post referendum, indicavit. Quippe dum ventris obsequio vivunt cuticulamque molliter curant atque robustum corpus sibi acquirunt, parum animo atque ingenio valent, nullamque ei medicinam adhibent; sed incultum atque siccordia torpescere sinunt; cum præsertim tam multæ variæque sint artes, quibus summa claritudo paratur. Hac de re dictum est SE-

NECAE *Epist.* 8. *Imbecilli sunt animo, quorum lacertos humerosque miramur;* ac VALERII MAXIMI *Lib.* IX. *cap.* XVIII. *Nimio robore membrorum vigor mentis hebescit, quasi abnuente natura utriusque boni largitionem, ne supra mortalem sit felicitatem, eundem & valentissimum esse.* Hinc CATO videns quendam vehementer obesum, mirabatur cui usui tale corpus esse posset Reipublicæ, cujus inter guttur & inguen omnia venter occuparet. ERASM. *Lib.* V. *Apoph.* Hi enim horum hominum propemodum mores sunt, hæcque studia & desideria: in diem vivere, commodis hujus vitæ inhærere & in eorum volutabris ætatem exigere, delectari multis inanibus rebus: consortiis inutilibus & confabulationibus inanibus & infacetis, atque studio jocandi, quod risum captat, se immiscere, lusus abusum habentes consectari commestationes omnis generis delicias & cupedias effusasque libidines voluptatum, (quæ rationi sunt inimicæ) blanditias, quæque perstringunt oculos, nec habent cum virtute commercium, omniaque ad eas referre, atque iners otium desidiamque quærere, sibi que optare placidam per membra quietem, atque in medios dormire dies, languide in operibus perficiendis versari, in horas mutari, ab animi levitate, importunitate atque inhumanitate ingrataque rusticitate non abhorrens atque sordidum propemodum aut secundum veterum phrasin barbaricum vitæ genus, ducere. Sicque ita vivunt, ac si fruges tantum consumere, nati essent, solis ipsis, non aliis prodesse volunt, sicque mundus ipsis, & ipsi mundo inutiles sunt, ad naturalia & ad humana & ad divina inidonei. Alia non attingamus atque præstat jam tacere; difficile enim & hic est, Satyram non scribere. Hi mores hæque inclinationes longe differunt ab illorum, qui mediocri & laudabili, bono corporis habitu temperatoque temperamento gaudent, quique corpori suo tantum tribuunt, quantum ad sapientiæ studium inservit, ut GALENVS fuse docuit, quod animi mores sequantur temperamentum corporis, qui proinde bonum corporis habitum bonos quoque mores sequi contendit *Lib.* I. *de San. tu.*

§. VII. Talis habitus alias quadratus ac athleticus vocatur, quem adumbrat RAYM. IOH. FORTIS *T.* II. *Cent.* I. *Consult.* 44. Athletæ enim atque gladiatores quos ab exercitatione Gymnasticos appellant magnitudinem virium & molem simul corporis non ex pinguedine eam quidem inertem compositam, sed torosis potius musculis insidentem spectabant, non nutriebantur, sed verius saginabantur, ut in palæstra virium suarum magnam speciem magnumque vigorem ac robur & fortitudinem præberent atque portento similes actiones auderent non modo luctando

luctando sed & urfos & leones aggrediendo ac conficiendo. Per vehementia & frequentia gymnastica seu assiduam! luctæ exercitationem ac multam longamque cibationem & potationem atque coactam voracitatem, in artis quasi formam redactam, simulque per lutamenta aut ex pulvere terreo salino puteolano Bajano aut Nili arena, quam ad hunc usum Romam, convehendam curabant, ut *PLINIVS Lib. XXXV. c. I.* & *SVENTONIVS in Nerone* scribunt, atque per inunctiones, aliptarum ministerio ac balneorum tepidorum & frigidorum subitam commutationem (ut sanguis & spiritus a balneo tepido ad cutim & artus evocati, a frigido vero inibi sisterentur & occlusis poris validior esset, fibrarum & muscutorum virtus) habitum corporis nimium crassum, quadratum, carnosum, plethoricum cum venis amplis & repletis ad summum firmitudinis & bonitatis virium gradum atque augmentum perducebant, adeo, ut majorem plenitudinem is vix assequi posset, de quibus *ORIBASIVS* sic loquitur *h. l. f. 42.* *Athletis exercitis crescit fervor & quicquid comedunt in ipso labore concidit consumiturque unde ipsi plurimum cibi appetunt.* Inter cibos ficus, bubulam ac suillam carnem (carni humanæ, inter quadrupedum convenientiorem) bene nutrientem, firmasque densas crassasque musculares fibras ingerentem (quare præ aliis hæc apud Græcos *V. Hippocrates L. de victu in acut.* pariter atque Latinos in pretio fuit,) frequentius ingessisse eos memorat *GALENVS L. III. c. 246.* notanter tamen simul advertit *Lib. V.* illos non solitos fuisse carnes comedere, nisi in cœna. Hinc, ut compertum fuit, eos gymnastica sua obeuntes, ob hanc plethoram, quandoquæ subito oborta morte, sunt extincti. Id testatur *GALENVS*, simulque detestatur, præter alios veteres jam nominatos, dicens, *in Exhort. Med. Athletarum vita & ars sagina est, nec vivere posse diu, nec sanos esse animasque eorum in nimio sanguine & adipe quasi luto involutas nil tenue, nil cœleste, sed semper de carnibus & ructu & ventris ingluvie cogitare.* Ideo & eosdem deridet *Philopoemones* apud *PLUTARCHVM*, ac ait *CLEMENS ALEXANDRINVS II. Pedag. I.* eos mentem infodere & mancipia maxillarum & ventrum appellavit *Euripides COELIO* memorante *Lib. VII. cap. XI. ant. lect.* *Aripatcanes, Persar. R.* dixit: mille quidem in Græcia pestes esse, sed athletarum pessimam & perniciosissimam. Hunc athleticum habitum ad summum perduxerunt *Theagenus Thasius & Milo Cratoniades* cum *Titurmo*, cum quo dimicavit, qui in Olympico certamine vivum taurum sine fatigatione per stadii spatium humeris portavit totumque uno die comedit. *Junius Valens* carpenta com-

prehensa una manu retinuit obnixius contranitentibus jumentis. Megarensis Herodorus, quem de stupendo robore & admirabili voracitate STEPHANVS in *Comment. Geograph.* prædicat, de Lepræo Eleo PAVSANIAS in *Eleg. Lib. I.* idem meminit. Hunc (athleticum habitum) non esse secundum naturam, sed neutrum potius HIPPOCRATES censet, ut videre est ex GORRAEI *Defin. Med. p. 7.* Obvenit hic occasio curiose quærendi, an illud, quod de athletis Romanorum dicitur, id etiam dici possit de gigantibus & filiis Enackim, qui olim propter vastam proceram corporis staturam simulque eximium robur & sanitatem quagavisi sunt, æque celebratissimi erant, ut de iis in Sacris Bibliis & alibi de incolis Chili, Americæ provinciæ, & rursus de Pallante, qui Aeneam contra Turnum, Rutilorum R. adjuvit, de Ajace, de Oreste, Agamemnonis filio, item de Monycho, uno e Centauris &c. in *historiis*, legimus.

§. VIII. Differt hic (athleticus) a bono corporis habitu simpliciter sic dicto atque comparate sumto eorum, qui plethorico, laxo, spongioso itemque subpingui corporis habitu, cute magis rara, facie viva colorata atque florida & alba, pulchra, eleganti atque formosa hincque amabili (nostrates exprimunt: *Er siehet aus, wie der volle Mond, wie Milch und Blut, blühet wie eine volle Rose*) vegeto atque alacri, hilari atque jucundo animo, conspicui sunt & temperamento sanguineo-phlegmatico sic dicto præditi, qui fibras nerveas satis & moderatius intensas & ad motuum impressiones recipiendas ac propagandas satis habiles, pronas promptasque, ut moderato impulsu omnia blande ac placide succedant. Hi item venas obtinent aut copiosas, ac angustas, aut copiosas & amplas, quales etiam homines plures in sexu sequiori reperiuntur & hi gaudent plethora naturali nec damnanda, quæ speciatim etiam in hoc deprehenditur, Rursus ex parte differt, quamvis proxime ad eum accedat ab eo, qui densam cutem insignem corporis & membrorum soliditatem harumque partium vim motricem atque elasticam, ac robur, (quod a musculorum duritie & magnitudine, fibris carneis, nervis ac tendinibus validis compositorum, & a copioso bono sanguinis & liquidi nervorum influxu dependet,) monstrat quem veteres habitum adstrictum vocant atque exercitiis corporis & laboribus durioribus quibusvis aëris & tempestatum injuriis, frigori calori que ventis quibusvis, fami sitique & vigiliis periculisve variis ferendis, a primis incunabulis adæuetus, quibus velut induratus atque labori callum quasi labore, obducto, magnam sibi soliditatem atque densitatem corporisque omniumque membrorum atque

atque nervorum & tendinum ac firmitudinem, causis intrinsecis & extrinsecis morbiferis ipsisque animi pathematibus eorumque noxis resistentem roburque conciliat, magis resistens & reagens, ubi & omnia commode sunt proportionata, ut in nationibus incultis, feris, plebejis, rusticis atque in agricolis, militibus, nautis itineribusque frequentibus &c. deditis ut & in stupidis, tenerioris sensus & motus expertibus cernitur & nobis de Davide R. Samfone, Samgaro, *in Sacris Bibliis*, item de pugilibus, Heroibus, de Hannibale, de Romulo, Remo, Thefeo, Asdrubale, de antiquis Teutonibus sub Ariovisto &c. ab Historicis refertur. Talem, non quadratum quidem, sed in mediocritate velut consistentem quivis sibi comparare deberet, quoniam non solummodo ad sanitatem & longævitatē confert, sed & in bonum publicum: Respublica enim præ aliis vegetis & robustis, induratis hominibus atque civibus habet opus. Ast & hic bonus corporis habitus suos, ut dicitur, patitur manes, qui in teneriorem & imbecillem non adeo facile cadunt. Nam licet non facile a causis externis hi robusti patiantur, tamen a qualibet causa interna haud difficile æque læduntur atque febribus & morbis chronicis, apostematibus & similibus patent, ut passim GALENVS testatur. Sic debilibus puellis non adeo periculosa sunt animi deliquia a minimis sæpe causis tam frequenter incurrentia, quoniam illarum sanguis nimis dissolutus vix, vel saltem difficile concrescit, quamvis etiam hæreat, impeditur. Pariter morbi inflammatorii felicius curantur in laxis, tenerioribus, sensibilibus, quam in robustis validoque labore duratis subjectis atque densis & solidioribus, ex eo forte, quod non adsit nimium robur vasorum, per quod densantur nimis valide fluida. Confirmat hoc HIPPOCRATES *Seçt. II. Coac. 45.* inquiens: *Exercitata ac densa corpora citius a pleuritidis & pulmonariis morbis intereunt, quam otiosa;* ne alia plura ejusmodi afferamus. Attamen (ut antecedens paulo respiciamus) non semper ii plethorici censendi, quibus facies rubet & corporis habitus turgēt, sed macilenti quoque sæpenu-mero vasa tamen numerosa ac ampla, sanguine non in carnes absumto, sed intra vasa coacervato, multo, distenta habent, atque nacti sunt qualitatem sanguinis circulo, frequentiori alterandi & emendandi promptiorem occasionem, hoc nomine innotescunt; sicuti e contrario non pro plethoricis semper habendi, qui pleniori, firmiori, compactiorique membrorum compage atque isto athletico corporis habitu, sed magis naturali præditi sunt, ut rursus rustici, aratores, hortulani, fodientes terram, ut plurimum bajuli laniones, pistores, fabri ferrarii & ligna-

rii & quoad diversitatem climatis Septentrioni subjectarum Regionum inferioris Saxoniae incolae, Helvetici, Sueci, Norvegi &c. Quare non ex vastitate & pinguedine ac corpulentia corporis, quam extensione a luxuriante sanguine potius & amplitudine venarum plethoram metiamur. Singuli hi habitus & in infantibus cernuntur, quemadmodum Herculem in cunabulis jacentem cum colubro manibus arrepto valide luctantem fingunt ac pingunt; nos vero certius hinc, inde experimur, infantes a prima ætate succi plenos & obesiores convulsionibus obnoxios esse brevique mori. Differt tandem ille etiam ab immensa illa corpulentia, nunc quoad pinguedinem, nunc quoad carnem abundantem, nunc quoad utramque, qua corpus, a legitima nimirum nutrimenti convenientis, sed uberioris appositione, non modo admodum deforme redditur, sed & mirum in modum tanquam sarcina vix perferenda, oneratur impedimenta quoque omnibus actionibus injicit, ut GALENVS *Lib. XIV. Meth. med. p. 15.* Nicomachum Smyrnæum ab Aesculapio curatum eo corpulentiae devenisse scribit, ut neque posteriora tangere neque se movere potuerit, operationesque omnes sensibilibus habuerit impeditas. De Dionysio Clearchi filio, Tyranno Syracusano, legitur, eum ad tantam pinguedinem devenisse, ut vix oculorum usura superfuerit, hincque in summo vitæ periculo constitutum fuisse, ad quod præcavendum medici multis longis acutisque acubus continuo compunxerunt, ut sensus in carne exinde rediret. Sic & BARTHOLINVS *Cent. III. Hist. 88.* de puella undecim annorum refert, quæ pondere corporis sui ducentas libras æquabat. Albertus Episcopus Wormatiensis adeo fuit ventro crassus, ut adspicientibus horrorem incuteret, tandem adipis mole suffocatus. Plura nimiae crassitiei & pinguedinis corporis exempla legere licet apud BENED. SYLVATICVM *Cent. IV. Conf. LXX. fol. 563.* ROD. A CASTRO *de Morb. Mulier. p. 234.* TVLPIVM *Observ. Lib. III. cap. LV.* ZWINGERVM *Theatr. Vitæ Hum. p. 278. & 263.* SMETIVM *in Miscel. p. 579.* PANAROLVM *Pent. IV. Obs. 32.* BORELLVM *Cent. II. Obs. II.* SENNERTVM *in Praxi P. I. Cap. IV. p. 21.* SCHENCKIVM *Lib. II. Observ. 218.* aliosque. TIMAEVM *Lib. VI. Cas. 1. 2. 3.* MARC. DONATVM *Lib. V. c. II. Hist. med.* Cæterum Auctores distinctionem formant inter corpulentiam adiposam vel saginosam, ut in phlegmaticis carnosam ut in sanguineis, & denique mixtam. Conf. FORESTVS *Lib. XXXI. Obs. X.* Tamen & hoc dicendum, quod hic habitus a causis extrinsecis, sicuti est calor & frigus &c. non ita ex facili lædatur. Multum denique differt ab illo specioso ad speciem saltem corporis habitu, morbofo magis atque

atque cachectico; nam licet hoc præditi habiliores videantur lacertisque torosis, minus tamen fidendum est: sanguis enim serosus nutrit quidem & carni musculosæ apponitur; tamen caro minus firma est compacta, sed flaccida potius & ipsi spiritus animales fatui.

§. IX. Inducunt talem corporis habitum natura & aliquando hereditaria velut a firmis parentibus genitis acquisitione (quæ in recens natis etiam visa est. *V. Misc. N. C. D. II. An. VI. Obs. 190.*) Ad eum quidem certo modo eoque non satis perspecto adhuc atque explorato dispositis haud difficulter atque ad hanc generationem superflui sanguinis juxta atque pinguedinis ac carnis faciunt, contenta vivendi ratio & incurius tranquillus placidusque animus atque frequentibus gaudiis quæ placant exhilaratus ejusque profunda securitas, quibus & philautiam omnium cogitationum affectus inducentium, causam & principium accenseamus, ex qua hæ tres malæ concupiscentiæ, crapula, avaritia & inanis gloria oriuntur, (si quidem animadvertimus ex certis affectionibus animi, ex causis externis ac moralibus, certos humores in corpore humano, augeri, alterari atque moveri, ut ira bilem, moerore pituitam &c.) motiones corporis moderatiores & tempestivæ, ætas puerilis adolescentiæ & juventutis, atque adulta dum speciei propagandæ nondum vacat homo, sexus sequior. Porro disponit ad eum aëris clementia qualis est in vere atque autumno sanguinem augens, ut secundum GALENUM *Com. I.* æstas bilem, & hyems pituitam & regione temperata, isque (aër) etiam crassior humidus, tepidus nullisque particulis salinis & acribus imbutus, hinc Germani corpulentiores Gallis & Italis, taleque regimen tam quoad hunc, quam reliqua, amictum, lectum, balnea, fortiora & frequentia corporis exercitia & labores &c. largus lautusque victus, Cerere Bacchoque affluens, sive cibi nutritivo succo abundantes, molles carnes lactaria, (quibus & persæpe infantes tenelli non tam lactantur quam verius lactantur) farinacea, pulposa ac succulenta, pingua atque oleosa, dulcia eaque blanda, heterogeneitatis expertia, temperata, roscida (utpote quæ Hippocrate, Celso, Galeno, docentibus præ aliis multum nutriunt) potus alimentosi non saltem siti restinguendæ sed & alendi corpori idonei crassi, fortes, spirituosus, vinna, quæ sunt potus & cibus, quæque sic nutriunt & saturant, sulphure suo, quo pollent alibili, qui enim copiosius vinum potant paucum cibum ut plurimum assumunt, immo quæ & vel odore nutriunt ut HORAT. AVGENIVS asserit ac comprobat, (hinc oenopolæ pingues, succulenti & ventricosi) ut & cerevisiæ aliique liquores inebriantes, minusque diure-

tici, vita sedentaria ac umbratilis, quies seu motuum necessariorum consuetorumque intermissio ac segne otium, (quod dat vitia,) somnusque, qui a cibo etiam oritur profundus ac uberior, qui æque ac cibus nutrit confortatque functiones naturales, immo quo solo diu protracto animantia parcissimo etiam aut prorsus nullo, victu sustentantur, ut de ursis PLINIO, de gliribus ARISTOTELE referentibus, de muribus Alpinis & melibus item, habetur; Præclare hac de re HIPPOCRATES scripsit *Lib. I. de Diata §. 1.* *Homo edens sanus esse non potest, nisi etiam laboret, contrarias enim inter se vires habent: Cibi & labores enim ea, quæ insunt consumere solent, cibi autem & potus ea, quæ evacuata sunt, explent.* Præterea & plethora onerantur etiam graciliores, qui assuetas sanguinis evacuationes per venæ sectionem omiserunt vel intermiserunt. Excretionem autem naturales recte procedentes in tantum corpulentiam juvare videntur, in quantum eliminatis iisdem, quæ retenta alias molestiam corpori non unis modis crearent, nihil amplius nutritionem remoratur siquæ eadem speciatim per lotium & sudores & genituram sunt pauciores. Talemque etiam corporis habitum sibi comparant, qui sive simplici, tenuiori & parciori alimento usi sunt, sive ex morbis longis & emaciantibus, ut phthisi, hæctica, febribus contumacioribus, intermittentibus, quartana, lymphaticis ardentibus & similibus, lue venerea, scorbuto, gonorrhoea, hæmorrhagiis atque aliis id genus, quibus sunt conflictati, eluctati, resurgentes & convalescentes, inedia perpeffi, atque exinde extenuati, ubi alimentis necessariis abutuntur atque indigentes ad lautum & largum victum citius justo redeunt, præter modum se alunt ac saturant onerantque atque hac quoque ratione genio perlicenter indulgent, de quibus exemplum quoddam additur in *Actis Philosoph. Anglic.* ab HENRICO OLDENBURGIO collectis p. 97. 48. de viro quodam Ao. CIII. ætatis suæ subitanea morte extincto, qui pauper rure Londinum receptus opiparis cibus ac generosis vinis enutritus, functionibus sui corporis supra modum onustis, pulmonibusque suffarctis tandem suffocatione mortuus est. Aliud ex alia causa modo nominata subjungamus: SENNERTVS *Præx. L. V. c. IV.* dicit, se Nobilem novisse, qui ex febre maligna ita obesus evaserit, ut vix loco se movere potuerit, mole corporis quadringentarum librarum pondus excedente. Sæpenumero quoque multos sic increfcere videbis, qui ex parum congruo aëre, ad meliorem redeunt, quique venere forte frustrata matrimonium contraxerunt alioque modo vitæ genus mutaverunt, item, qui post exosum aliquod studium ad quod invita Minerva tracti fuerunt & functio-

functiones quas coacti obierunt & exercuerunt, ad alias sibi convenientiores sunt dimissi, ut & eos qui in gravescente ætate subito a labore abstinere. Inter fœminas vero non paucas offendes, quæ aut infœcundæ sunt, atque quæ nunquam gravidæ fuerunt, aut quibus menstruæ purgationes supprimuntur, aut per ætatem cessant, aut quæ parere desierunt ut & eæ, quæ crebros partus expertæ sunt, per quos vasa ampliantur &c. præsertim si genio quovis modo indulgeant. In utroque sexu huc quoque confert consuetudo mittendi sanguinem naturalis ac artificialis: exploratum enim est venæ sectionem sæpius repetitam ad plethoram disponere, tam cito regenerato sanguine; sed forte minus firmo & simul laxiore reddito corpore, huic facilius implendo, secundum enim observationem DODARTII in *Histor. Acad. scient. Ao. 1707. p. 234.* sedecim uncia sanguinis per venæ sectionemeductæ intra quinque dierum spatium restituuntur in homine non debilitato. Veteres frictionibus assiduis ut & aquæ calidæ perfusione, quæ ab HIPPOCRATE de *Inter. affect.* & GALENO *Meth. Med. Lib. XIV. cap. XVI.* allegatur partes ad ruborem disponendo ΕυσΑΓΓΩΣΙΝ eamque laudabilem sibi conciliarunt. Posthæc hoc denique memoremus, quod habet Celeberr. BOERHAAVIUS in *Instit. Med. p. 161.* illos fieri plethoricos & obesos, quibus artus fuerunt abscissi.

§. X. Quoniam vero hæc onerosa repletio superflua inutilis ac ideo mala dicta, quæ nimirum ad sanitatem fartam tectamque conservandam vitamque prorogandam magis noxia est, non statim manifeste lædit, sed per plures sæpe annos, quanquam non sine incommodo perfertur, sed tum demum quando vires sensibilibiter premit & tardius progreditur actionesque corporis remoratur atque pervertit, consentaneum erit hujus rei explanationem præmittere simulque indicare, quando maxime hæc proposita solutio sine mora sit instituenda: siquidem & medici prudentis officium est, futuros præscire morbos non solum prædicere. Quemadmodum & multi hominum, tam illi, qui multorum insultus aliquando sustinuerunt, quam ii, qui ab iisdem per totum vitæ tempus immunes exstiterunt, affirmant, quod sæpius morbi ingruentis signa in se perceperint, qui vero per accuratam diætam, aut exercitium corporis conveniens, aut quandam evacuationem, aut naturæ robur, in prima herba interdum fuerit exstinctus. Sint igitur hic præ aliis juxta ipsam plethoram quæ sola per se sufficiens indicans esse posset, sequentia indicia: Quando non modo molestiæ, quæ gravant notabiliter augentur, sed & alia maxime urgentia indies ingruunt atque præcipue color in facie

& toto habitu mutatur, motus & robur partium solidarum languescit viresque sensibilibiter deficient, lipothymia incidunt, quando plus huic constitutioni indies accedit, atque totius corporis habitus turgescencia sanguinis, insolitus fervor, universi corporis praesertim brachiorum & pedum stupor formicationis sensus immo linguae & palpebrarum spontaneus insignis languor, lassitudo & gravitas, non obstante, quod vel jejuni, vel modico tantum pastu saturati fuerint, (unde Hippocrates morbos praenunciat,) se produnt, indicio, quod in corpore tunc plus nutrimenti, quam opus sit, accessisse videatur. Motus enim solidorum motum fluidorum & spirituum supponit, atque ut a motu extraneo corporis vel membrorum fortiori lassitudo, ita & a causa interna idem fit; lassitudo vero spiritus vel imminutos, hinc morbos sequitur; vel gravatos vitio fluidorum innuit, hinc eos praecedit. Quando porro tinnitus aurium, dentium stridores, maxillarum contractiones linguae plus debito rubrae quaedam difficultas molestant, si nares alias concinne humescentes siccantur, & dolores capitis urgent, facies nimium colorata, rosea atque infusca turget, oculi qui, ut valent ita & corpus fere, immobiles tument, rubent, molesteque premuntur, ardorisve sensu afficiuntur, & fulgores quasi fluctuantes, subitoque evanescentes, ante eos observantur, labia item magis crassa fiunt, ac rubedine saturata, cum ardoris quadam perceptione, ac scissuris inficiuntur quando manus, quandoque totum corpus tremunt, manuum digiti intumescunt, ut minus inter easdem interstitium exoriatur, difficileque quasi a se invicem diducuntur ac complicantur. Talia signa praevalentis jam exsurgentisque nimirum in sanguine orgasmi quoque esse possunt vasa sanguifera distenta atque inflata praecipue in collo, anhelitusque difficilis ac laboriosus, qui maxime vel levi cursu, vel scalarum locorumque acclivium adscensu, sensim difficilior redditur, quo simul valde tali corporis aliove motu & exercitio praeter modum incalescunt (calor enim major multum auget dispositionem ad putredinem) delassantur, in somnum frequens propensio rerum oblivio atque per quae olim revelata sunt remedia, insomnia, (quorum observatio, non contemnendam in medicina utilitatem addit, tam praeservationi, quam curationi inserviens, ut pluribus exponit JOEFSERIVS *In Isag. ad Vitam long. p. III.*) turbulenta, terrifica atque anxia, frequens in lecto corporis volutatio, cum requie inquieta & vigiliis involuntariis oculisque conniventibus, fames aucta, sitis frequens molesta, saliva spumescens atque crassescens, rursum nausea atque ciborum appetitus diminutus, rursumque extraordinarius

narius hujus, vel illius cibi aut potus desiderium atque ante prandii cœ-
 næque tempus consuetum, falso a plurimis pro signo optimæ valetudinis
 habitum, siquidem in perfecte sanis eadem hora excitatur, nec non sic-
 citates faucium, sudores nocturni. Porro pulsus magnus quidem quo-
 dammodo tamen depressus, pedum intumescencia, pruritus, quo loco
 vena est aliquando secta, pustulæ sanguineæ toto corpore efflorescentes
 animus aut inquietus, aut contristatus prostratus ac præter modum lan-
 guescens ac desidiosum plane otium quærens, talia sunt. Ubi speciatim di-
 cendo præsertim imminuuntur aut supprimuntur aut neglectæ fuerunt ne-
 cessariæ aut consuetæ evacuationes, per sudores, alvum præcipue, lotium,
 narium hæmorrhagiam, hæmorrhoides, menses &c. aut intermissæ venæ
 sectiones, diuturnus exercitiorum corporis neglectus &c. atque exinde de-
 cubitus fiunt tum sanguinis tum fluidorum quorumcunque, a tota sangui-
 nis massa secedentium, in principi quadam parte, maxime in cerebro, præ-
 cordiis, quo rerum statu proxime venturæ subitanæ mortis periculum
 est colligendum, adeoque protinus congrua & apta auxilia ferantur.
 Hic mihi succurrit singularis plane atque rara observatio cujus mentio-
 nem facit I. N. PECHLINVS *Obs. 50. Lib. II. de Sacerdote* quodam, qui
 halitum semper foetidum; quoties vero gravior quidam morbus insta-
 ret, gratum & odorem moschi referentem, spiravit. Suadent & hoc
 alia externa subinde occurrentia, ut, post constitutionem aëris austrinam
 humidam & calidam humores fundentem & colliquantem atque largos
 imbres, vasa prementes eorumque tonum relaxantes, aquilonares, sæ-
 vientes venti, repente irruentes, fibrasque omnes valide constringentes
 atque subitæ & frequentes aliæ aëris mutationes. Ut alia tam causas
 quam potius signa repentinæ mortis futuræ longius, non recenseamus,
 ut quando v. g. ex cauterio solita evacuatio sponte cessat, ulcera invete-
 rata præter expectationem consolidantur, &c. Nec non alia accidentia
 hic ostendenda, tanquam causæ remotiores veniunt, ut si ab exercitiis
 fortioribus, aëris calore aucto, radiis solaribus, quibus nimium expositi
 fuerint, vino vel aliis quibusvis calefacientibus assumtis aliisque errori-
 bus, in diætâ commissis, ira aliisque animi pathematibus enormibus gra-
 viter agitati, sentiant in omnibus corporis musculis mollem, plenum ac
 distendentem quasi tumorem &c. Licet inquam & sine his indiciiis
 præservationis gratia, ne scilicet res in deterius ruat, solutione, pericu-
 lum anticipare conveniat: attamen tunc maxime iis apparentibus hoc
 necessarium est, sicuti HIPPOCRATES athletis nondum doloris sensum
 expertis, sed bene valentibus, eorum habitum solvere jubet, secun-

dum illud: facilius est, non admittere pernicioſa, quam admiſſa moderari.

§. XI. Quoad prognofin hic pauca monenda reſtant, hoc unicum ſaltem adiiciamus, quod, quibus extrema plethora, optimoque hoc nomine notato corporis habitu, animus notanter deficit, eos periculoſiſſimi maneat morbi, ocytus ingruentes, & quod, quo obefius eſt ſubjectum, eo periculoſior ſit ſtatus, quoniam in eo, minus venæ extendi accedere poſſunt. Quoad modum eventus autem hic quidem etiam notandum: Nimirum multi morbi a Natura, cujus varia eaque miranda ſæpe molimina non edocta ea quidem, ſapiente tamen viſa, omnia omnibus juvante, ut HIPPOCRATES *Lib. de alimento* loquitur, atque motus ſuos occultis quidem non raro, certis tamen legibus ut plurimum exſequente, ſponte ſolvuntur; æque ac præcaventur atque frequentius quam vulgo innotefcit, per excretiones potiſſimum, quæ meliores atque utiliores ut plurimum iis, quæ ab arte fiunt, videntur. Etenim juſto optimoque tempore & loco inſtituuntur, quæ artifex ſæpius nescit eaque magis notabilem ac ſubitaneum præſtant effectum, ut largi ſudores in febris intermittentibus, calorem illum præternaturalem ſolventes, febres item ipſæ, hæmorrhagiæ, fluxus hæmorrhoidalis & uterinus &c. documento ſunt. Similem in modum quandoque hic exuperans corporis habitus vel ſponte ſolvitur; hujus vero ſolutio quandoque ſummo cum levamine contingit; per excernicula tam ſanguis, (pauca illa quidem) quam ſeri (quarum plura dantur) vel frequentius narium larga hæmorrhagia, vel rarius hæmoptyiſi. Equidem his obſervatis effatum HIPPOCRATIS contradicere videtur *Aphor. 25. Sect. IV.* Sanguinem ſuperne efferri qualiscunque is ſit, malum eſt. Idem contingit per hæmorrhoidum, vel etiam in foeminis menſtruorum fluxum ſpontaneum eumque ſolito uberioſorem, interdum & per inſolitos ſudores, diureſin, diarrhœam imo dyſenteriam, itemque vomitus hypochondriacos enormes humores varios, pituitoſos, ſeroſos, nidoſos atque adeo chyliformes imo adipoſos excernentes. De quibus obſervationes binæ, in viris quibusdam Lipſienſibus occurrunt nimirum alter qui per XVII. circiter dies vomitibus vix coërcendis euſarcos quondam admodum extenuatus eſt alter per aliquot annos ex vita ſedentaria admodum obefus factus, intra ſpatium vero duorum annorum ſubinde per aliquot dies diarrhœa ſpontanea ſimulque eructatione atque excretionem liquati adipis ad dimidiam libram circiter cum euphoria tentatus eſt. Rarius id accidit per mictionem cruentam, quod *Hiſt. Morbor. Uratiſlav. Tom. I. p. 283. ſeq.* indicant, ſimul-

simulque CASP. HOFFMANNI verba in *Institut. Lib. III. cap. XCVII.* huc facientia allegant: *Mictum sanguinis accidere iis, quibus copia peccat sanguinis, iisque singulis mensibus hanc exire ut videantur fœminarum Naturam induisse.* Hæc simul clare indicant ac docent, quod Natura, quæ ordinario superflui quid ægre perfert, si non medica arte id auferatur, sua sponte ab illo se liberare satagat. Rarissime vero sit evacuatione gelatinosi lactei nutriticii humoris per umbilicum quam observavit SENNERTVS *Lib. V. Prax. P. I. Cap. IV. p. 22.*

§. XII. Hæc commemorata firmis studiose iterum iterumque servanda sunt cavendumque, ne in secunda valetudine adversæ præsidia consumantur. Nam cum rebus nostris nunquam bene agitur, nisi ut male confestim sit nunquam quiete fruimur; nisi aut ea quæ noceant aut quam tumultus incommodaque excipiant, eaque ut plurimum majora. His itaque prælibatis de temperatione atque moderatione, imminutioneque, dejectione, extenuatione, debilitatione, ejusmodi corporis constitutionis atque tam sanguinis quam obesitatis carnosæque corpulentiae luxuriantis, & quæ non modo formæ corporis decus confcedant, sed & quæ præcipuum, naturæ hinc oneri & detrimento sunt, cogitandum, hosque scopos hasque intentiones exsequantur. Applicari hic & in exemplum aliquod poni potest illud S. AVGVSTINI *Tr. XIII. de Ver. Dom. Magnæ virtutis est, cum felicitate luctari; magnæ felicitatis est, a felicitate non vinci. Scimus enim, cuique bono malum; sed & cuique malo bonum ex adverso oppositum esse.* Quare si præsertim signa paulo antea indicata se produnt præservationis causa siquidem optabilius est, non experiri malum, quam ab eo liberari, ne in sanitatis ac vitæ periculum res cedat, atque ut alia pericula simul quoque avertantur atque tollantur, hæ indicationes formentur hæcque indicata adornentur, ut alterationem atque medelam, hancque in contrarium mutationem consequamur, per ejusmodi, quæ evacuationes & dissolutiones maxime respiciunt. Tempore vernali & autumnali præcipue hæc alteratio necessaria est, quia corpora & humores illos increscunt ob motus defectum, somni &c. augmentum. Hoc vero corpora graviora fiunt ob transpirationem potissimum minutam secundum utilissimum SANCTORII prognosticon. Ea media atque remedia, quæ nimiam plenitudinem humorum, carnosamque nimiam compagem atque obesitatem simul auferunt ex triplici illo fonte æque ac alibi hauriri solent: Diæteticus hic fere prius tenet, ob varias rationes passim in sequentibus commemorandas, atque in eo potissimum illæ inter sex res non naturales dictæ & indifferentes quæ cibum &

& potum, motum pariter & quietem juxta atque excernenda complectuntur. Temperantia hic quæ voluptatibus imperat, quæ ex gustu percipiuntur, & superflua odit & abigit, necessariis tantum obsequitur, quantum recta ratio permittit præsertim laudanda atque suadenda, cujus regula infallibilis est, solam necessitatem in his, quæ ad corpus spectant pro mensura habere. Pythagoræ primum diætam, qua in prandio buccellam saltem panis cum melle apponebat, ARISTOXENO perhibente, Timoniasque cœnas jusserim, quas terrestres & sine sanguine HORATIVUS vocat passerinaque convivia. Scilicet victus idcirco valde tenuis simplex attenuans, bene salitus aliisque acrioribus condimentis stimulantibus confectus, durior & parcior (parum enim petit natura, opinio nimium, ventriculusque ipse paucis contentus est) injungendus: Equidem non eundem proponamus, quem quidam (V. TH. BARTHOL. *Orat. XI.*) suavitati Regi suo ac equo, sed talem potius qualem propemodum Hispani splendide esurientes, hodie adhuc indicant, quando dicunt: malum aurantium, raphanum & dentiscalpium equestri ordine digna atque sufficientia fercula esse, ut fertur, injungendus (sed Tantali poenas nostris qui genium non libenter defraudent, quorumque venter auribus caret, proponimus). Cujus ratio eo dirigatur secundum proprium & debitum hominis officium ut tantum corpus conservetur imo ejus sarcina dematur, non vero ulterius saginetur, secundum illud QUINTILIANI: *pravior omni fame sagina, crapula multi, fame nemo ordinario perit, secundum illud Poëtæ:*

Corporis ignari, mortem inter prandia sumunt.

& PLAUTI salutare monitum: *comedere oportet ut vivas, non vivere ut edas*, quò sane jam multum proficimus & quo Plato & Socrates, tenui victu, quem tenuerunt, vitam longius protraxerunt. Etenim hac in re etiam sicuti aliis, eo hodie perventum est, ut nemo propemodum, cum statu quem natura, quæ tamen omni arte potior, docet, quomodo nutriamur atque vivamus, dictitat, ac suadet, contentus sit: plurimi voluntatem corruptam sequuntur, intellectum quoque dein corrumpentem atque sibi perverse imaginantur, ac si homines in naturali statu a Deo conditi miseri essent: Quo igitur artificiosis ab hominibus inventis magis blanditiis irretiuntur, eo feliciores se aestimant sicque a commodo ac ordinato, in perversum plane ruunt. Sed adducendus est animus ad alia studia, quocirca ita fiat, ut ratio præsit, appetitus obtemperet; nam qui appetitus (ut cum CICERONE loquamur de *Offic. Lib. 1.* longius evagantur

tur & tanquam exultantes, sive cupiendo, sive fugiendo, non satis a ratione retinentur, hi sine dubio finem & modum transeunt. Omni modo itaque evitent, omnem Attalicum esculentorum & potulentorum apparatus atque ea, quæ alias in delitiis & æstimo sunt atque ad pampagiam invitant, lautam scilicet & opiparam mensam variisque eduliis Apicium Luculleum, luxuriosissimum illum in modum comparatis, adornatam, saporum diversorum delectamenta, ex quibus homo plus de cibis recipit, quam quidem debet, quæ certo modo magis conveniunt ægris, quam sanis, atque carnibus copiosioribus, (quæ comestæ, carnem quoque generant, ut germanicum fert proverbium,) juniorum præsertim animalium, caprarum, vitulorum, porcellorum, cuniculorum, agnorum, pullorum gallinaceorum, columbarum, avium minorum ut alaudarum &c. & majorum caponum, phasianorum. Fercula speciatim non appetant, quæ constant ex ostreis, pultibus ex ovis, oriza, amygdalis dulcibus, passulis, pineis, pistaceis, mire pinguefacientibus, secundum BETTVM *de Ortu & natura sanguinis Cap. II. Sect. IV.* hordeo, tritico, saccharo multo confectis, emulsionibus seminum oleosorum, temperaturum gelatinosis, butyro, melle dulcifluisque aliis variis, Verbo, mensam non accedant illis omnibus quæ nutrire dicuntur, jusculis consistentibus & restaurantibus dictis ex carnibus & medullis animalium &c. paratis, (qualia e capone veteri apud veteres celebratissima fuerunt,) an ad nutriendum semper, an alterandum & medicandum, dubium, lacte & lacticiiniis, gelatinis variis aliisque ejusmodi mollibus cibis facile subigendis ac multum oleo suo potissimum nutrientibus & uberiores sanguinem generantibus, plenam. Pariter ab abaco se avertant instructo, variis temetis iisque crassioribus vinis & cerevisiis, tam hordeaceis, quam triticeis (quæ PLINIO jam male & postea HENRICO APRINCENSI α) audiebant omnes) crassis multum alibilibus (ut sunt Wratislaviensis, Schepusium, Brunsvicensis, Gardelebiensis, Hamburgensis &c.) aliisque ejusmodi liquorum vinosorum (a vi atque violentia quasi ita dictorum unde & Liberum Patrem cornutum pinxerunt ejusque currui pantheras, tigrides junxerunt vid. IOH. NICOLAI *de Ritu Bachanal. Cap. II. §. I. & Cap. VIII. §. 2.*) spirituosorum inebrantium atque potionum generibus (Videmus enim, bibulos citius plusque pinguescere, quam multum com-

Qqq qq

me-

α) Vixit sub HENRICO III. ANGLIAE REGE, versiculis cerevisiam improbat in HENELTI *Silesiograph. Renov. interpr. M. I. FIBIGERO, P. I. Cap. VI. p. 737. legendis.*

medentes). Hunc genialiter vivendi epulandique morem inquam cum tenuiter cibandi atque viliori modo, commutare fas est, eo nimirum, qui famelicis sufficit. Quare pane eoque, qui furfures habet admixtos, utpote qui abstergunt, sicque intestinis irritatis velocem dejectionem efficiunt, quo tamen & LANZONIUS *in Miscel. N. C. D. III. A. I. obs. 27.* his interdicit; secundum Hippocratem, quod omnis repletio mala, panis autem pessima) sale saltem culinari consperso, oleribus, leguminibus obsoniisque tenuibus brassica, lactuca, milio, rapis, beta, atriplice, oxylapatho fructibus arborum exsiccatis, carnibus pecorum & piscium, sale fumoque exsiccatis, item cucumeribus, lactuca cucurbitis, pisces, viciis, lentibus, ciceribusque, fungis, myrtillis & ejusmodi aliis paucum alimentum, multas vero fæces concedentibus, cibationem instituant. Similiter modicis potulentis, (subtractio enim humidi celeriter minuit pinguedinem) itidem & tenuibus alvum lubricam reddentibus, aqua simplici qua non salubriorem animantibus dedit liquorem, ut cum Plinio loquamur, quamque vitam producere, ac propterea Syrios CCC. annos vixisse LUCIANUS refert *in Macrob.* quamque & panem natura tantum desiderat; ad hæc enim nemo pauper est, aut cerevisia secundaria eaque bene lupulata, vino pauxillo illoque non temeto quidem sedant atque Falerno, apud veteres celebratissimo, eoque vetusto ac in speciem redacto mellis asperi (de quo PLINIUS *Lib. XIV. S. 8.* AND. BACCIVS *L. de Conviv. Antiquor.* & TIBULLVS *L. I. Eleg. II.*

*Fumosos veteris præferre Falernos
Consulis & Chio solvere vincla cado,*

loquuntur) sed sic dicto cibario & oligophoro seu meraco, aut succo citri a Dolæo maxime laudato, berberum, phlegmate vitrioli, tinctura florum bellidis &c. confusa, sero lactis caprini &c. sitim restinguant. Ad hos potus tenues calidos, eos quidem infusa & decocta quoque herbarum & radicum, fabarum, ut theæ, coffee veronicæ &c. referuntur simulque hic commendantur, præsertim si cum multo saccharo edulcorantur, id enim species est acescentis alimenti simulque aperitivum, attenuans atque dissolvens, quod nimia dissolutione partium oleosarum sanguinis (si in excessu adhibeatur) producere possit maciem. Tales potus antiqui vel simplices, vel cum aromatibus, ut myrrha, croco similibusque odoratis coctos, uti *Epigrammate 113. MARTIALIS* expressit:

Si calidum potas, ardenti myrrha Falerno,

Convenit & melior fit sapor inde mero.

valetudinis tuendæ causa, copiosos admodum adhibuerunt, ex utili dein novas delicias perperam confinxit luxuria, nec hodie apud nos in his modus habetur. Prandium de cœtero non modo subtrahendum, sed & cœna aut minor solito assumenda aut plane omittenda. Certe ut satietas suo modo utilis est: ita ex aurea mediocritate magnum commodum ad universum corpus & nobilissima ejusdem viscera redundat, atque abstinencia inedia famesque, valida adversus vitia stomachi ex repletionem & in robustis præsidia, merito æstimantur, quæque ut summas in secunda valetudine, ita & in adversa partes sibi vindicant. Conf. DOM. PANAROLVS *Pentecost. IV. Observ. 18.* Hinc veteres, Aegyptios imitati, sub morborum initia, inedia fuerunt usi, diatricon dicta. Legimus, Pomponium Atticum, Ciceroni amicissimum, hoc remedii genere præter spem ex gravissimo morbo convaluisse. Facit huc apprimè HIPPOCRATIS effatum laude dignum, quod *Lib. IV. de morbis §. 10.* proponit: *Si homo parum edit & parum bibit in nullum morbum incidit; ac CELSI Lib. I. cap. III.* Sive plus est, quam quod concoqui possit periclitari, ne corrumpatur, non oportet: Sive jam corruptum est, nihil commodius est, quam id qua via primum expelli potest, ejicere, rursusque *Lib. II. cap. XVI.* Neque ulla res magis adjuvat laborantem quam tempestitiva abstinencia, quam etiam semper morborum initia desiderant. Non indicatus abeat GALENVS *Comment. Sent. II. Aphor. 17.* docens: *Nulla in ejus locum, quod fuit vacuitum accedente alimento, fit, ut inedia vacuet.* Præter hos Autores, medicos, ipse SIRAC. utilissimas huc facientes diæteticas protulit regulas, *Cap. XIX. XXXI. &c.* Valet hic quoque illud Petrarchæ monitum: Si vis valens esse diuque vivere, aut pauper sis, aut pauperum in modum vivas, itaque victus cultusque corporis ad valetudinem referantur & ad vires, non ad voluptatem. Imitentur nostri in frugalitate & in victu moderatione, juxta sacros Patriarchas, Hannibalem, Severum Imp. Antonium, Pompejum, Alexandrum Maced. R. Augustum Cæsar. Curium Rom. Imp. Catonem Censor. Epaminondam, Periclem, Agesilaum, Lacedæmonios, Gymnosophistas, Pythagoram, Zenonem, Socratem, Senecam multosque alios veteres Philosophos &c. Ast quotus quisque hæc capit atque hæc exempla imitatur? Atque ipsa natura morborum curatrix hanc abstinenciam indicat, ac proinde simul hac ipsa optime prospicit, quando appetitum imminuit aut saltem certa cibi & potus genera assumendi deside-

rium inducit a ut fastidio prohibet, nauseam, atque adeo evacuationes, vomitum, diarrhoeam, sudores &c. excitat v. g. toto die apud nos audimus, homines, ubi simul ac, ægre aliqua saltem ex parte se habent, decoctum caffèe, vinum, fumationes tabaci &c. quæ tamen alias valde appetebant, atque in deliciis habebant, respuere & ex eo futuram quandam ægritudinem, tanquam ex specula, certo prospectare atque prædicere. Ex his intelligimus quam, utile sit, vivere parce, continenter, severe, sobrie. Idcirco & veteres in morborum curationibus, abstinencia a cibo & potu, ut plurimum usi fuere. Præter hanc victus rationem seigne otium atque uberius quoque somnus (quo longior enim ille, eo auctior appetitus atque digestio, hinc somnus optimus coquus) de die, & post prandium præsertim, & in lecto molli (quin & durus magis confert, quem etiam facile perferunt, ex quo illud factum est jam tritum proverbium: *Wer Fleisch am Leibe hat, liegt niemahls hart*) & nimium calefaciente, ac oneroso protrahitur, evitetur secundum PLINII effatum *Lib. II. cap. LIII.* Somno concoquere corpulentiam quam firmitati utilius, pervigilio, quidem præcipue vincuntur cibi; sed multis vigiliis, assiduisque lucubrationibus & studiis, profundisque meditationibus, occupationibus, conjunctis curis, (quas Ovidius artuum depopulatores dicit,) variisque molestiis duroque quodammodo vivendi genere perferendis asvescant atque corpus laboribus & exercitiis vehementibus magno partium attritu, agentibus, sub die ac sole præsertim institutis equitatione subsultante atque succussante, pugillatu, luctatu, pilæ lusu in sphæristerio, cursu, ludo, illo quo globi ad conos jactantur ad incalescentiam ac sudoris ejusque copiosi excretionibus usque protrahitis commoveatur. Annotavit hoc SANCTORIUS in suis observationibus scribens: *Sect. V. IX. Exercitio corpora leviora fiunt, omnes quippe partes, præcipue muscoli & ligamenta motu ab excrementis purgantur, perspirabile ad exhalationem præparatur & spiritus tenuiores fiunt: ita quicquid sit humoris superflui, id fortius foras exprimitur atque firmetur.* Per jugem enim moderatum tamen & debitum corporis motum, fibras musculares supra vasa & glandulas valide nitentes agitantur, quo celerius sanguis per vasa trajicitur, unde humores urgentur, comminuuntur, volatilifantur aptique ad diaphoresin & diuresin redduntur simulque calor suscitatur augeturque, qui succos gelatinosos, pingues etiam in intimis corporis recessibus, ut ossibus dissolvit, magis attenuat, dissipat, atque consumit, quemadmodum id v. gr. luculenter in febribus ardentibus experimur, eas celeriter & vehementer, per auctiorem earum calorem, succos & pinguedinem

dinem corporis consumere & obesos, graciles extenuatosque reddere; nec aliis quam quæ huc usque per seriem recensuimus GALENVS usus est *Lib. VI. §. 2. de sanitate tuenda*, quibus quendam ejusmodi quadratum atque gravatum brevi levavit. Circa necessariam corporis motionem & cibationem HIPPOCRATES, *Lib. VI. de salubri dieta*, monet, ut pingues, qui graciles fieri volunt, omnes labores jejuni faciant & cibos assumere, anhelantes adhuc ex fatigatione. Ut balneum statim post cibum, completa prima digestionem & inchoata secunda, multum juvat, ad pinguedinem, ita etiam in jejuno administratum corpore atque famelico eandem minuit. Huc quoque pertinent indumenta linea & lanea asperiora, grossiora & duriora atque pellicea vulpina, (quæ MAGNIVS in *Regim. Sanit. P. III. fol. 76. eligit*) eorumque frequens mutatio quæ membrorum superfluiditates quoque ex parte desiccant. Hæc singula recensita ut HELMONTIVS his paucis verbis complexus est: *Claude os & aperi oculos*: ita & nos in summam contrahimus hoc memorato notissimo dictorio ab EPICTETO prolato: Abstine & sustine; sicque corpus labori; animum vero studiis aptent. Attamen & hoc monitum adjiciatur ut hæc mutatio paulatim fiat, quoniam subita mutatio genii quidem fraudatio, non tantum in pejus, sed etiam in melius vix periculo vacat. Atque ut caveant ne colliquatione, totius etiam tabem corporis universalem inducant. Ast iterum iterumque querelæ illius pervulgatæ memores, gulam neque hodie neque olim medicorum legibus morem gessisse atque ventrem, præcepta, non audivisse, veremur, ne hæc omnia in vanum dicantur: cum ad vitæ laboriosiore & temperatiorem rationem redire nostri (cum primatibus opulentis iisque delicatis & molli-bus res enim agitur, quare scripsit GALENVS, divites quam pauperes difficilius curari) vix unquam sustineant. Fatemur quidem in usu ciborum difficillimum esse, extra metas necessitatis, non abripi atque has præscriptas diæteticas leges duriores esse a PYTHAGORA scholæ suæ alumni imperatas. Certe quinquennali illo silentio, cum victu tenui sanguineis, garrulitate omneque voluptatum genere captis, non poterat injungi unquam durius. Sed recogitent etiam quam parvo dimitti venter possit, atque quam modica stipe contentus sit, bono & firmo iccirco animo hoc difficile opus, hunc durum laborem aggrediantur, ægre quidem perficitur, sed perficitur tandem, si quædam sibi paulatim subtrahant seseque vincere in parvis constituent, ad difficiliora con-nitentes, memores, quod difficile jam commodum atque jucundum hæc mutatio hæcque adusuetudo reddat. Aër quem (ut recte HIPPO-

CRATES ait *a. a. & loc.* ferme semper regionis naturam, formas moresque sequi comperies) bene temperatus, omnium suarum qualitatum respectu, atque qui alioquin salubris vocatur, non æque conducit, secundum PLATONIS placitum, de quo ferunt, ex Basilio eum obesitatis nimie pertæsum, Lyceum in, insalubri horridoque loco exstruxisse, quo corpus magis castigaret suum, quo; modo notamus, aërem humidiores & tepidum nebulis frequentem crassum & in loco uliginoso & pingui existentem, facere ad corporum obesitatem: Hinc CICERO *Lib. de Fato* refert, tenue Athenis cœlum acutiores Atticos fecisse, crassum autem pingues Thebanos & valentes. Hic gravis crassusque aër non modo ad obesitatem ingerendam facit, sed & ejusmodi homines, crassis viscidisque humoribus repleti, melius se habent in eo quam in tenui; forte, quod ille majori elatere sit præditus & ob majus sui pondus, magis in pulmonibus humores premat, sicque facilem expeditamque circulationem ipsorum reddat, unde major respirandi facilitas, atque per consequens obeforum salubrior vita. Sicque porro novimus, soli arenosi calidioris & siccioris atque Regionum calidiorum incolas quoad corporis habitum magis extenuatos pinguedinisque expertes conspici atque frigidiorum. Conf. BROECKHVYSEN *Oecon. anim. p. 447.* siquidem & frigus hæc corpora facile perferunt. Calor vero valide exagitans, non solum sanguinem resolvit & ejicit, sed & ipsam pinguedinem, spissam illam massam ita attenuat, ut a venarum poris atque osculis resorberi sanguineæque massæ reduci & per arterias cum lotio expelli, queat. Conf. §. IV. Nec prorsus absonum esse putamus, varietatem aëris crebramque mutationem ejus, qua mox in calidum, mox in frigidum conversio fit, huc quoque aliqua ex parte, facere. Pariter pinguis terra & aquosa homines carnosos atque crassos alit & alta regio, ventosa, duros, robustos, proceros. Talis regio nostris secessui aptissima forte esset, qualis est illa, ad extremos Indiæ fines, circa fontes Gangis, fluvii, sita, a Plinio depicta aut efficta, de cujus incolis ille refert, eos absque ullo cibo potuque, halitu tantum & odore, e pomis floribusque captato, sustentari, quo sane hanc corpulentiam nimiam sibi non contraherent, sed imminuerent. Adhuc hypocausta & cubicula nimium calefacta, dissuademus, ut & decubitus in lecto perpendicularem atque supinum, hincque sæpius accidit, ut plethorici opimi, aut apoplexia, aut catarrho suffocativo interdormiendum tacti, mane in lecto mortui, inveniantur. Circa excreta nimia, calorem depauperantia atque retenta omnia, massam sanguineam turbantia, paucis adhuc monendum, præter ea quæ in hoc genere dicuntur,

tur, excretiones cutaneas, hæmorrhoides, & in foeminis menstruos sanguinis fluxus, juvandos & promovendos: commune esse juvamentum patulam alvum habere & fluidam, ad quam usum pilularum Ruffi, multi Practicorum, præ aliis commendant. Occasione animi pathematum, quæ in hoc rerum ordine recensentur, saltem innuimus, non optamus, nec adhortamur quod vel in vulgus notum est, iis, quæ conturbant, ut timore curis, sollicitudinibus, tristitia, mœrore, animi angoribus atque anxiiis desideriis ad quæ ambitio, vindicta & avaritia spectant, diu protractis inter spem & metum diutina fluctuatione, ira frequenti, (quæ & quibusdam aliis loco medicinæ est) zelotypia, invidia (quæ proverbio locum fecit, quo dicitur: *Er siehet aus wie der Neid*,) spe frustrata atque desperatione meliora, cupiditate inhiante, atque amore intenso flagrante (qui animi arbitrio quidem sumitur, non deponitur, ut cum SENECA dicamus;) extenuari, dissolvi atque adeo medullam in ossibus liquari (ut vulgo dicitur) sicque sensim corpus amitti: (unde illam dictionem Mnemonëuticam audimus: qui pallet, aut ægrotat, aut studet, aut amat,) Confirmant hoc uno ore P. AEGINETTA Lib. I. cap. XVII. AETIVS Lib. IV. c. LII. & RHASES Lib. IV. c. IX. ad Almanf. Modo monemus ut præ aliis & prudenter avertant, sibi que caveant ab iis, quæ improvisam validamque, in cerebro excitant commotionem, lætitiâ subitam validamque incandescentiâ, eamque majorem ac frequentiore, brevem furorem dictam, terrorem ac timorem atque odio habeant amando, neque se perdant amando omnesque occasiones, quæ ad ea ducere possent, omni studio devitent: nam per hæc diameter vasorum pessime alteratur, motus sanguinis atque humorum nec non undarum animalis fluidi spirituosî, per nervos propulsi, præsertim in præcordia, perturbatur: unde motus cordis & totius sanguinis subvertitur. Hinc legimus, nonnullos ex subito gaudio extinctos fuisse. Simulque patientiam præcipue commendatissimam sibi habeant atque reliquis etiam voluptatibus imperent, alias odio habeant, & abigant, alias dispensent & ad sanum modum redigant, memores, illum optimum esse modum cupitorum, non quantum velint, sed quantum debeant: Nec enim corpori soli subveniendum est, sed etiam animo multo magis. His singulis frena injicienda quædam, suggerit Philosophia, plura Medicina, sed potissima Theologia.

§. XIII. Quæ vero per abstinentiam, ab alimentis, aut etiam medicamentis (siquidem nonnulli sunt, qui ea plane respuunt, aut quorum ventriculus abhorret) præcaveri, mitigari & tolli nequeunt
mala,

mala, illis utiliter succurritur per auxilia chirurgica convenientissima, quæque naturæ vias, quibus morbos levat, imitantur, efficacissima quoque sunt, & in instanti juvant adeoque maxime necessaria, si periculum est in mora, e. g. si subita suffocatio timenda, eaque æque propemodum sat tuta, si circumspicte administrantur, nec non reliqua remedia diætetica nimirum & pharmaceutica excludunt, sed conjungi potius cum illis congrue debent, quare hic secundo loco collocanda veniunt, ut phlebotomia, crassum sanguinem, vasa majora etiam distendentem, omnium optime minuens, pinguedinis & carnositatis nimix scaturiginem. Eaque vero sit sat larga & aliquoties subinde repetita, qualem plethorica carnosaque & venis latis prædita subjecta facile ferre possunt, quaque optime citoque ab onere, quod molestabat, allevantur atque de vexatione ac irritatione liberantur, vasis depletis spatiumque sic ad expansionem & constrictionem sibi debitam, nactis. Verum nimis parca plus nocet, quam prodest, quare respondeat proportioni sanguinis abundantis; Via quidem naturæ ad exitum & exonerationem monstratur, sed eadem nimis cito præclusa, motus naturæ exacerbantur, ut tanto pertinacius intentioni excretoriæ inhæreant, variosque spasmos, congestiones impetuosas, pertinaces, nec prius desinentes suscipiant, quam venæ sectio sit repetita, detracta sic rite sanguinis quadam copia, reliquus majori intra vasa, spatio concesso, statim liberius movetur, a motu liberiori & agitatione majore calor etiam magis suscitatur, sanguinis in activitate sua exaltatur, spiritus fiunt subtiliores, omnia corporis humani munia felicius procedunt. Hoc evacuationis genus, athletis etiam primum fuit. Certe mirum est quanta interdum sanguinis copia ex corporibus bene habitis, per vulnera inflicta, sine noxa effluat, quale v. g. notabile exemplum Historici narrant de Illustrissimo Aurantiæ Principe Guilielmo Nassoviæ, cui ab homicida, globulo ex sclopeto ejecto, vena jugularis magna transjecta erat, qui licet per plures dies, maximam sanguinis copiam effuderit, salvis tamen viribus evasit. Largiores venæsectiones commendant veteres, qui ad animi usque deliquium frequenter eas permittebant, & in synochis speciatim sex libras sanguinis emiserunt. Ast non eo usque hæ evacuationes æque ac illæ, per pharmaca factæ, perducendæ sunt, ne præcípites subito omnes vires agantur, difficile iterum restituendæ, quæ & juxta diætam vinosam, vitæ genus otiosum, mensuram mittendi sanguinem determinant. Hoc optime monet HIPPOCRATES eodem aphorismo supra adducto, nempe *Seç. I. Aph. III.* Nam, non eo deveniendum ut vasa extreme concidant, periculosissimum enim est,

est, sed qualis fuerit ejus, qui sustinere debet, natura, eo usque progrediendum. Quare existimamus, apud nos semper tutiori via, solvi plethoram, seu minuere copiam & impetum sanguinis, ut naturalis vasorum contractio, ejus efficaciam prævaleat adeoque contentus sanguis reprimatur, per moderatas ac repetitas venæsectiones quam una largissima. Valde obesi venæsectiones has tametsi præ pinguedine administrari possent, ægre ferunt, quoniam sine dubio laxior ejusmodi habitus fibras lentius, respectu evacuationis contrahit, vel spiritus animales plures, ad hunc tonum efficiendum, quam qui ad hanc contractionem sufficiunt, impenduntur, ex quo parciior ac inæqualis spirituum distributio & ad partes amandatio fit. Unde his evacuationibus sanguinis, vasa per se exilia, magis coarctantibus, ut plurimum animo linquuntur. Hinc HIER. MERCVRIALIS *de Decorat. p. 29.* eas periculosas pronunciat. Accedit & hoc quod illi qui habent exiles venas, etiam habeant exile & arctum cor. Addimus, quod, adtentione medicorum opus habet experientia id comprobante, obesos atque plethoricos nonnullos, quanto frequentius venæsectiones adhibent, tanto magis hanc plenitudinem in diebus augeri. Vicariæ cucurbitulæ scarificatæ sunt, in brachiis pedibusque præcipue applicatæ, acutissimos etiam morbos præcavescentes ac curantes, ut testatur PROSP. ALPINVS *in Med. Aegypt.* quæ & in his exilia vasa ac porosiores partes, obtinentibus, magis proficiuæ, ut & cauteria & fonticuli, quos WALDSCHMIDIVS *in Not. ad Timæum* suadet, qui quidem sensim atque paulatim, chylum propter, pororum perversionem, corruptum, evacuant, quemadmodum & videmus alios ab ulceribus præternaturalibus, emaciari. Nec inutilis nec inepta hæmorrhoidum, in dispositis & in scæminis mensium provocatio, erit, dum supra indicavimus eas critice naturam moliri. Dionysius Tyr. lateribus hirudinibus applicatis, superfluum humorem sibi ademit, AELIANO *Lib. VIII. var. Hist.* referente. Hæ sanguinis missiones juxta primas vias repurgantia, etiam illum optime omnium ex parte explent scopum, quem HIPPOCRATES allegato *Aphorismo III. Lib. I. in fine* his verbis indicavit: *Quo corpus alterius nutritionis ceu convenientis, moderatæ adeoque melioris initium sumat, quod vel hoc indicio se prodit; quod omnes humores acriores fiant, si nihil novi chyli, sanguini misceatur.* His jungendæ frictiones, pannis asperis fortiores, frequentius matutinis vespertinisque horis inducendæ, quæ ab ipsis carnibus primum tumefactis dein exinde gracilibus redditis, potenter ichores viscidiusculos emulgent. His enim depleto diminutoque alimento atque per eas sanguine, hu-

morum transitus adhuc magis intenditur, superflui adhuc in vasis hærentes liquores foras excernuntur, atque, si quid reliquum extremis vasis hæret impactum, hoc pacto dissolvitur atque in gyrum actum, majori denique parte transpirat.

§. XIV. De Pharmaceutico fonte huc usque reservato hac quidem censura apud HIPPOCRATEM legitur *Aph. Lib. II, Sect. II. §. 73. Qui bene habito sunt corpore, ad medicationes, propinatis medicamentis ut putamus, moleste se habent.* Certe remedia non mala illa quidem, sed certa ac valida, ast non semper secundum opinionem medici operantia, nec non æque tuta & ancipitia atque majori circumspectione ac quidem priora in hoc etiam corporis statu exhibenda: Hac de re, in genere GALENVS variis in locis, ut *Lib. de Opt. Sect. ad Trasylbul. II. Method. Cap. XIII. Aphor. Com. III. Com. III. 15. L. III. simpl. C. XXIV. &c.* medicamenta nimirum non solum purgantia sed & lenientia, præparantia & alterantia omnia, nocumentum nobis certum afferre; juvamentum vero incertum & dubium, egit. Medici enim & hoc curæ cordique habeant: *Vide ne obsis, etiam si non prosis*, ne objiciatur iisdem, quod in Ducibus quoque bellicis ab aliis culpatur, non putaram. Atque adeo si priores scopi (primus præfertim, secundum illud: Diæta potior omni Hippocrate) rite admittuntur eosque exsequuntur fere hoc sæpius supersedere possent. Nimirum v. gr. medicamenta calidiora nimium exagitantia atque velocitatem sanguinis & rarefactionem inducentia, plethoræ distendentis symptomata faciunt, acida, quæ hic commendanda veniunt chylicationem admodum lædere possunt, quorum etiam abusum, cachexia, hydrops &c. immo mors haud raro insequuntur, uti videre est ex *Miscel. N. C. D. II. A. IX. Obs. 219.* aut saltem periculosa symptomata excipiunt, prout B. C. I. LANGIVS testatur *Oper. P. II. Prax. Cap. XII.* Sicque salivantia in valde obesis, suffocationis periculum facile possunt afferre &c. Attamen causa non videtur esse hic omittendorum aut plane cum Asclepiade, Pythagoricis ac Indorum Sapientibus (qui ex medicamentis unctiones saltem admittebant, v. JAMBlichivs *in vita Pythag.* STRABO *Geograph. Lib. XV.*) ac cum PARACELSO atque HELMONTIO rejiciendorum certorum horum atque validorum præsidiorum. Quin, potius necessaria videntur iis qui strictam diætam, temperantiam & frugalitatem, taceamus abstinentiam & inediam fastidiunt atque neglectui & despectui habent, chirurgicasque operationes tanquam cruento modo sævientes, horrent. Inter evacuantia, quibus ad naturæ proportionatas leges adornatis, ordinario morbi alioquin a repletionem omnes oriundi, egent,

& universalia præmittenda subjungendaque, vomitoria ordinario agmen ducunt, quæ & hic admodum necessaria sunt, quoniam per horum hominum, (Sardanapali Regis Assyriorum ultimi in modum omni cupediarum, libidinis mollitieque genere effœminatissimi) quotidianam, sæpiusque repetitam ingluviem, eamque sæpius non tribus aut quatuor horis absolutam, sed ad crepusculum vel diluculum usque protractam illuvies cruditatum quoque ventriculum, (quem ideo voraginem Bacchique amphoram, non male quidem, dixeris,) gravans, accumulatur; eaque autem sint non tam leniora ex aqua tepida emollientibus & laxantibus vegetabilibus forte incoctis, olivarum oleo, butyro aut pinguedine mixtis, ut & radice illa hodie familiari ipecacuanhæ, sine addito stimulo, nauseam & multos saltem ructus molestissimos creante, parumque sæpe evacuante adeoque frustratos conatus, quos Medicina detestatur, relinquunt; sed ex tartaro potius emetico, mercurio vitæ, syrupo emetico Angeli Salæ, sulphure aurato antimonii & croco metallorum infusione adornata, præferantur. Hoc evacuationis genus nimium repletis & qui parum concoxerunt, suadet CELSVS *Lib. I. cap. III.* hancque adjicit rationem: *Sive plus est, quam quod concoqui possit, periclitari, ne corrumpatur, non oportet: Sive jam corruptum est, nihil commodius est, quam id qua via, primum expelli potest, ejicere.* Circa hæc, hæ cautelæ observandæ ne in principio medelæ instituendæ, statim exhibeantur, sed dempta prius aliqua ex parte sanguinis pinguedinisque plenitudine, per alia modo indicata remedia, non omissis aliis observandis, ne sanguinis ad superiora versus præsertim, raptus, invitetur, neve exinde labore pleni nifus, conquassationes, contorsionesque, constrictiones, imo animi deliquia, ruptiones, hæmorrhagiæ, hæmoptysis, apoplexia, inflammationes, herniæ aliaque mala inducantur, videlicet abdomen & caput lintheaminibus tanquam vinculis injectis, paulo fortius constringendo, collare vero plane laxando, duos pannulos in rotunditatem circumvolutos super oculos ponendo, cum alio panno lato ligatos, naribus subinde vinosa & spiritiosa, ut spiritum rosis marini, quem aquam Reginæ Hungariæ vulgo vocant, calidam crustam panis tostam, vino imbutam, cinnamomoque caryophyllis aliisque aromatibus conspersam, admovendo, linguæ vel salis culinaris saltem quandam portionem, ingerendo &c. Tuncque sæpius reiteratis vicibus locum commodum invenire possunt. Hoc salutare monitum magna ex parte, æque de catharticis iisque fortioribus valet, quæ licet non pari impetu ac violentia ac vomitoria agant, tamen, ut in pinguibus (qui æque ac prægraciles ad purgationem inepti

Rrr rr 2

sunt

sunt Aetio Autore) ita & atque praesertim plethoricis stimulo suo ac vellicatione, morsuque valido affluxum nimium sanguinis ad partes principes inferiores, intestina cum ipso ventriculo aliasque, saepius, & ex hoc, stases pariter, inflammationes, gangraenas & sphacelum concitare solent. Quare, quando res agitur, an purgantia medicamenta, phlebotomias, an haec illa sequantur. Si caetera sunt paria, si praeservationis causa instituenda, & ne circumstantiae quaedam, urgens quoddam symptoma, hoc vel illud auxilium, praeter altero suadent imo praecipiunt, Medicorum plurimi censent, viarum apertionem, atque corporum meatibilitatem saepe quam maxime ante purgationem necessariam esse, ad quam etiam (venae sectionem) pertinere perhibent, quoniam vasa nimis sanguine distenta, hanc aliasque evacuationes impediunt, atque praeposterum esse affirmant, sanguinem mox, per phlebotomiam educendum, purgante prius depurare. Experientia insuper convincit, adeo feliciter hoc consilium cessisse, ut vacuatus simul & expurgatus sine pharmaco homo sit. Nam quando per venae sectionem vasa sunt depleta, purgans ampliora vasa nactum, felicius & commodius heterogeneas partes, a sanguine segregare potest. Galeno omne in eo stetit consilium, unum atque idem sentit VALESIVS in *Meth. Med. Lib. X. cap. II.* Audiamus hac de re modo LVD. DVRETVM, Medicum inclytum, qui ita in *Enarrat. in Hippocrat. Coac. Praenot.* commentatus est: *Vbicunque purgationis & phlebotomiae necessarius incidit usus, a phlebotomia auspicandum.* Quoniam vero illud ICtorum axioma laudatissimum: Suum cuique tribuendum, etiam apud Medicos in multis, (praesertim atque speciatim dicendo de medicamentis, cuivis morbo atque laboranti parti, debitis, non quoad quantitatem solummodo & qualitatem, operationem citiorem aut tardio rem exerentibus atque materiam motumque spectantibus; sed & forma qua concinnari solent, apte adhibendis) quamplurimum valet; (sed hic iudicio opus est atque labore) ita & in his delectus quidam habendus: scilicet, salia colliquantia, neutra & acidula, ut cremor tartari, liquor terrae foliae tartari, tartarus vitriolatus, salia thermarum & acidularum aliorumque fontium medicatorum, stimulo majori ut scammonio sulphurato acuata, decoctum tamarindorum, aquarum foteriarum, Sedlizensium & Seidschitzensium, quae salsae & amaricantes dicuntur, potus, necnon alia, massa pilularum de ammoniaco Quercetani, cum mercurio dulci, auro fulminante &c. hic e re sunt. Alii aloetica & rhabarbarina & helleborata, pilulas tartareas aliaque hujus generis, quae plenitudinem lymphatico pinguem, viscerum, vasorum & carnium tollunt, praeferrerent. Ad-

dimus

dimus, purgantia, in forma pulveris aut pillularum magis & præ aliis convenire, feliciusque operari, in obesibus, succulentis, torosis & carnosissimis subjectis, utpote magis humidioribus. His accensentur enemata sæpius repetita, quæ ex speciebus emollientibus, repurgantibus & carminativis componere assolent, ut herbis malvæ parietariæ, absinthii, rutæ, scordii, floribus chamomillæ, radicibus liquiritiæ, althææ, liliorum alborum, fibris hellebori nigri, feminibus lini, fœnugræci, &c. incoctis additis & solutis electuario lenitivo & hieræ cum agarico, nitro antimoniato, melle rutaceo, mercuriali, pulpa colocynthidis, aut croco metallorum, in petia ligatis, syrupo emetico Angeli Salæ, oleis lini, liliorum alborum &c. Hæc olim Romanorum athletis, qui, ut, copiosis alimentis se quotidie satiabant, ita & familiarissima erant, quibus vomitionibus ex hyssopo in aqua contrita, aceto, sale melleque admixtis pennis ac loris vomitoriis, quæ in ventriculum intrudebant, vel digitalibus aliisque commentis (quod turpiter ingesserant, turpius egerunt, ut de his apud HIERONYMUM *adversus Jovianum* Col. 69. T. II. legitur) & clysmatibus tantum non quotidianis utebantur ante & post coenam, ut CELSUS refert *Lib. I. cap. III.* Conf. Celeberr. SCHULTZ in *Diff. de Athlet. Veter. eorumque diætâ & habitu* §. 61. seq. Sic & apud SÆTONIUM legimus in *Vitell. cap. XIII.* item in *Nerone Cap. XX.* Neronem Vitellium & Caligulam, Imperatores R. luxuriæ & commensationibus deditos, ut eisdem sufficiebant, vomitandi consuetudine, frequentissime usos fuisse. Hæc (clysmata juxta laxantia) protinus necessaria erunt, ubi alvus per aliquot dies obstructa fuerit. Hæc singula evacuationis genera jam HIPPOCRATES præcepit *Lib. I. Aphor. XXII.* his verbis: *Qui a satietate veniunt morbi, vacuatione curantur.* Sequuntur diuretica, crassa corpora, valde emaciantia, quale exemplum vide in HELMONTII *Tr. Latex humor neglecta* §. 44. & in SCHENCK. *Lib. III. Obs. II.* ubi de diabete &c. utpote quæ juxta hæc, blandam, gelatinosam, nutritiam, chylosam, mucosam viscidiusculamque humorum partem dissolvunt atque per urinam evacuant, ut potissimum tartarea, ut tinctura tartari acris, & composita, tartarus tartarifatus, vitriolatus, terra foliata ejusque liquor, oleum per deliquium. FORESTUS *Lib. III. Observ. 10.* tartarum crudum cinnamomo ac zingiberi utiliter admiscuit. Laudem & hic merentur pilulæ Mynsichti de Sandaracha dictæ, semen urticæ & fraxini cum vino haustum, a FERDINANDO *Observ. Cent. I. p. 274.* maxime celebratum, item terebinthinata, oxymel squilliticum, arcanum duplicatum, nitrum antimoniatum, nitrum crudum, (quod GALENUS *Simpl. Med. L. IX.* præ aliis salibus potentius reputat,) ut & salia quædam

herbarum fixa, ononidis, genistæ, & quod BAPT. CODRONCHIUS valde extollit, absinthii, spiritusque quidam mineralium secundum B. ERMULLERVM vitrioli, nitri, salis, sulphuris, ut & ex Regno animali petita illa sale acri gaudentia, lumbricos terrestres millepedes, cantharides &c. aliaque ejusmodi. Atque postea quoque sudorifera, sed non sola nec semper (nam si viscidus humor motrices gravet fibras non sufficit sudor) atque non ea valida quidem & moderatione etiam debita exhibita, quæ partibus nimirum non adeo activis & volatilibus sanguinem segnius jam tardiusque, ob pressa a pinguedinis copia, ejus vascula, meatus circumferentem, multo exagitantibus humidumque necessarium abundantes pinguedinis moleculas diluens, ac temperans uberius justo elicientibus sicque visciditatem simul augentibus constant; sed media & fixiora, ut decocta lignorum ligni sancti præsertim & sassafra, V. TIMÆVS *Lib. VI. cap. VII.* & radicum, seminum, herbarum, florum, antimonium diaphoreticum simplex & martiale bezoardicum minerale, lapides cancrorum aliaque terreo salina & acida, amaricantia, alkalia, nec non tinctura antimonii, essentia succini &c. Sale viperarum & theriaca obesitatem feliciter se curasse gloriatur GALENVS *L. de san. tuenda VI. cap. VIII.* Simplici pulvere viperino cum successu exoptato usus est VELSCHIVS *Hecat. II. Obs. 61.* Spiritui Cornu Cervi super olibanum, myrrham & mastichen destillato singulares vires tribuit DOLÆVS in *Encycl. chir.* Talia etiam externa in laconicis, balneis adhiberi solent. Si hæc non proficiant salivantia ex mercurio dulci excitata, quæ maxime extenuant & pinguedinem absumunt, de quibus notabilem observationem apud BARTHOLINVM *Vol. I. Act. Hassn. Obs. 74. p. 164.* legere potes, injungenda erunt.

§. XV. Ex alterantibus illis quidem præmissis evacuantibus, tam chirurgicis quam pharmaceuticis, huc quadrant mediocriter siccantia, salina, alkalifata, neutra, nitrata attenuantia, aperientia, ut & muria, aqua marina quas HIPPOCRATES *de salub. dieta tex. VI.* præcipit, acida, martialia, ut limatura, crocus & cum aromatibus in pulvere stomachali Birk. tincturæ & resolventia, (nam gelatinosum per deliquium transit in serosum,) qualia etiam sunt aromatica, acuta aliaque acria, ut & amara, quæ attenuant nullumque nutrimentum suppeditant, ut falsamenta, item myrrha nasturtium, carduus benedictus, centaurium minus, absinthium, cochlearia, petroselinum, apium, asparagus, semina erucæ, sinapi, raphanus, cepæ, allium & vario modo adhibita ejusmodi alia, quo pilulæ de Sandaracha, Mynsichti, & spec. diacurc: dialaccæ, quas IOH. LANGIVS

in Epist. Med. Lib. I. p. 360. multis nominibus commendat, similiaque spectant. PLATERVS *Tr. III. Prax. p. 51.* piperis frequentem usum maciem inducere docet. Huc etiam iterum referuntur decocta, ut herbarum, lignorum, radicum, feminum præsertim, atriplicis, scordii, veronicæ, fumaricæ, millefolii, acetosæ, lign. quajac. sassafras, aloes, Juniperi; rad. chinæ, tormentillæ, pimpinellæ, semen nigellæ &c. julorum coryli &c. Inter notissima & usitatissima sunt essentia quædam & elixiria ut elixir. propr. c. acido, Paracelsi &c. PLINIVS inter Latinos doctissimus Historiæ naturalis conditor *Lib. XIV. cap. XXX.* fraxini folia vino contrita, adeo extollit, ut etiam maciem, horum continuatum usum inferre asserat. Avicenna juxta trypheram minorem, theriacam proponit. Inter euporista ista vel simplex acetum frequenter haustum, habetur. V. CATTIERVM *Observ. XIII. Ephem. N. C. D. III. A. I. Observ. 27.* acetum squilliticum FONSECA *Consult. XXXII.* præfert. Alii lubentius fumo foliorum tabaci, potum cerevisiæ simul evitando, aut masticando ea, ex commendatione BORELLI *in Cent. II. Observ. II.* id efficere satagunt. Aliis potius ex commendatione SENNERTI *Prax. L. V. P. I. cap. XIV.* arrident aquæ fontium quorundam naturales, acidulæ, falsæ, sulphureæ aluminosæ, thermæ, inter quas præ aliis & notioribus Carolinæ & Hirschbergenses, Emsenses, Aquisgranenses, pro interno pariter atque externo usu eoque tam alteratorio, quam evacuatorio commendandæ, quæ humorum plethoram per halitum digerunt & evocant. TIMAEVS A GULDENKLEE *in Cas. & Observ. pract. Lib. VI. Cas. III.* scribit, quendam, postquam variis corpulentiam nimiam corrigere tentasset, tandem aquas fontis, prope arcem Gulzoviensem scaturientis, cum exoptato successu hausisse. Pluribus vero gratissimum forte esset, pharmacum quod *Collectanea Uratislav. proponunt A. 1718. mens. hyem. p. 697.* quod est vinum canariense singulis diebus ad 3vj. assumendum, nisi simul abstinencia esset injuncta. Verum plane exulent medicamenta appetitum imminuentia.

§. XVI. Hæc præfata generatim, tum sanguinis præcipue ubertatetur intertextæ pinguedinis atque polysarcicæ imminuendam spectabari, sed etiam proferuntur adhuc alia, quæ speciatim facile liquabilem pinguedinem luxuriantem seorsim atque in se spectatam cujus materia nutritia partes sanguinis oleosæ magis, (ob ostiolorum sanguinem e facculis adiposis absorbentium forte amplitudinem secundum Sanctorinum collectæ) dejiciunt ut duriora, rigida, quæ ad occursum aliarum partium non flectuntur, tartarea, salina singulaeque maxime fixa, quæ nexum

par-

partium oleosarum potenter disjungunt, acida, salsa, alkalia, quorum & aquam calcis referunt. Practici, nitrosa, sulphureaque victus & pharmaca calefacientia pariter ac refrigerantia, præter jam indicatas aquas thermales & purgationes ex aloe, rhabarbaro, nitro, castoreoque adjecto. GALENVS XIV. *Metb. Cap. XV.* præter sal ex viperis combustis, aquam salitam, alii aquam Tetucii, proponunt. Ab exper. quodam Practico sequens pulvis singulis diebus per duos menses drachmæ semis quantitate sumendus commendatur. \mathcal{R} . $\textcircled{\text{D}}$ ss. $\textcircled{\text{O}}$ ss. myrrhæ, thuris, cort. lign. Indic. rad. Sassaaparill. a a $\textcircled{\text{S}}$ j. PANAROLVS *Pent. IV. Observ. XVIII.* sitim optimum & infallibile remedium dicit. CARDANVS *de Subtil. Lib. de plantis* memorat, Sanctium R. Hisp. crassitie monstrosam semine herbæ quam linguæ avis nominat, ad tempus curatum fuisse. Alii nucleos cerasorum saccharo confectos ac tartarum vini albi, loco salis communis cibis aspergendum proponunt. Externa quoque suadentur, præcipue balnea tam naturalia quam artificialia ex cineribus, alumine &c. parata eaque tam calida quam frigida, quæ apud veteres creberrimo in usu erant, quæque in eum hodie Angli præsertim revocant. De cætero si curiose quæras an pinguedo exuperans (de qua variæ jam allatæ observationes, præcipue ea a FABRIC. HILD. memorata, *Cent. VI. Obs. 97.* ubi refert, se in foemina abdomine inciso adipem duas spithamas excedentem invenisse) chirurgi ope, sectione excidi possit, ut apud Scriptores legas licet; PLINIVS primus est, qui *Lib. II. cap. XXXVII.* hujus operationis mentionem facit, sequentibus: *L. Apronii Consularis viri filio, detractos adipem levatumque corpus immobili onere &c.* Dein ELIAS REISNERVS *Geneal. Basil. p. 275.* de Dedone V. Comite Rochl. Crasso cognominato scripsit, quod adipis excisionem passus sit. Haud obscuro autem indicio fabula se prodit in illa historia, quam Aelianus profert de Dionysio Eracleote, obeso, cui dormienti chirurgus cutim acubus cum successu pertuderit, adeo ut omnis inde exsudaverit pinguedo. Quam vero quæstionem alia trahit, oriturque dubitatio post dubitationem: an nimirum fidem mereatur semper assertum rem multis difficultatibus prementibus atque an non temeraria esset operatio periculique plena atque cum morte ut plurimum conjuncta quod ex relationibus ejusmodi haud obscure colligitur. Nihilominus tamen non habeo, ambiguum neque inficiari volo pinguedinem nimirum sine magno talium hominum incommodo refecari posse. Quoad corpulentiam carnosam laxamque omnem difficilem ac propemodum vanam esse curam plurimi cum P. ZACHIA VI. *Q. M. L. Lib. III. T. I. Q. 6.* & RODER. A CASTRO V. *Lib. III. p. 230.* existi-

existimant, quod stamina semel annexa dissolui peculiarisque nutrimenti & solidorum constitutio immutari ægre possint, aut quod natura semel ad ejusmodi excessum prona, vix superetur. Attamen quia hujus causa juxta peculiarem illam partium solidarum ad p. n. hoc incrementum, dispositionem atque justo majorem fibrarum dilatandi nutritiasque partes admittendi aptitudinem sanguinis lymphæque laudabilis copia est, singula quæ tam illam, quam pinguedinem exsiccant, refrenant, dissolvunt ac ejiciunt, cum qua communis fere evacuandi alterandique ratio intercedit, commendata, atque medicamenta ex nuce cupressæ Myns. balnea ex adstringentibus & sulphure parata aliquid præstare posse ipsorumque stamina carnosorum laxitatem reducere autumamus. GALENI, MERCVRIALIS, SENNERTI V. *Prax. L. V. P. I. cap. IV.* SYLVII *Pr. L. I. cap. XXXVIII.* DOLAEI l. c. TIMAEI *Lib. VI. Cas. 1.* aliorumque ductum secuti. Quibus commendatis adhuc innuimus denique e re esse, ut roborantia atque subadstringentia ejusmodi tonica dicta, soluto sic hoc corporis statu ad ulteriorem superfluum, accretionem præcavendam, juxta ea huc usque recensita bene observanda atque subinde exhibenda proponantur: Qualia sunt castoreata, succinata, balsamica, ut balsamus peruvianus, sal volatile oleosum Sylvii ambrata, cydoniata, camphorata, mastichina, castoreata, succinata, tincturæ quædam & essentia, borraginis, buglossæ, millefolii, melissæ, cortex item peruvianus, quercus, terra sigillata, menta, bistorta, tormentilla, symphytum, flores balaustrorum, sanguis draconis, terra catechu, sponsia itidem salicis cum vino rubro sumenda, crusta panis tosta cum aromatibus cinamomo, nuce moschata, vinoque rubro imbuta &c. Inter externa adhuc balnea & pediluvia commode locum inveniunt.





XIX.

DISSERTATIO MEDICA

DE

STATV CONVALESCENTIAE

P R O O E M I U M.

Varie considerant Medici corpus humanum, sanum nempe, ægrum & neutrum; hinc HEROPHILVS Chalcéd. haud ignobilis subtilisque admodum ingenii in prisco ævo, Medicus & Anatomicus medicinam esse, scientiam dixit salubrium, insalubrium atque neutrorum: A quo non alienus est GALENVS, quando *Art. Med. cap. VII.* signorum neutrorum meminit, atque *Lib. V. simpl. cap. VI.* mutationem sanguinis in pus, speciem mediam inter naturales & præternaturales appellat. Coincidit fere ARGENTERIVS, qui sex esse Medici officia docuit, nimirum conservare, mutare, præcavere, curare, mitigare & reficere. Non desunt equidem eorum qui hanc ipsam rem in quæstionem vocant & dubitationem & statum neutrum cum Aristotele (quemadmodum Solon & Cato in Politicis etiam statuebant) plane rejiciunt, eumque sub sanitatis latitudine vel statu præter naturam & sic sub latitudine quoque morbi comprehendunt, i. e. vel ad physiologiam vel ad pathologiam referunt. Quorundam infida suspicio non audet aut affirmare aut negare penitus, ut sese autem extricarent facilius, dari eum dixerunt, si sensus arbitri ponantur; non dari, si rationi judicium permittatur. Iis jam prolixam litem non movebimus, inprimis cum jam hoc ipsum ab Celeberrimo etiamnum post fata WEDELIO in *Exerc. Medico-Physiol. Cent. II. Dec. IV. Exerc. V.* evictum atque probatum est, isque adeo firmum ac evidens hoc esse asserit, ut insulsam censuram negantem dicat. Largiamur alias id potius ut & largiuntur Politici sentiuntque potius, melius esse ex partibus stare quam medium eligere & ut de Thebæis legitur in bello cum Xerxe, neutralitatem, ut efferunt, neque amicos comparare nec inimicos tollere. Integrum itaque nobis quoque sit affirmare, esse non alienum, si ex propinquo & medice rem confide-

siderare velimus, atque bene distinguere, quod omnes omnium scientiarum Doctores bene docere volentes, omnino decet, si statum neutrum, seu medium dicamus, atque statuamus. Ipsum HIPPOCRATEM, Dictatorem nostrum eum admittere variis in locis apparet, v. g. quando, (ne alios nominem) *Aph. V. Sect. 11.* dicit, lassitudines (quas ad statum neutrum haud obscure refert) spontaneæ prænuntiant morbos, & quando pruritus, lepram, scabiem, lichenes, vitilignes, alopeciam, non morbos vocat, sed medium quasi format ac turpitudines esse saltem asserit. Clarius rem exponere videtur, quando corpulentiam & firmum corporis habitum, athleticum vocatum, non esse secundum naturam sed neutram potius vid. GORRHAEVS *Defin. med. p. 7.* Præter hæc varia quoque in Medicina occurrunt, quæ tam latitudinem sanitatis quæ magna est æque ac ægritudinem respiciunt quam media seu neutra, sub commoda hac denominatione veniunt, e. g. res non naturales, senectus, graviditas mulierum, constitutio hypochondriaca, scorbutica, phthisica, calculosa, podagrica, aliaque valetudinaria siquidem & somnambulos in statu medio inter somnum & vigilias esse plurimi statuunt, calidior aut frigidior, humidior aut siccior temperies &c. Nec omnes qui oculos sanos habent, ut ait GALENVS, æque acute vident, sed alii aliis perspicaciores sunt: ita etiam sese res habet in auditu, progressu, cursu aliisque actionibus, quarum magna & inter sanos differentia est. Sic plica polonica vel russica vid. GEHEMA *de Pl. Pol.* (si scilicet, non paralyfi, arthritide, contracturis, colica, cœcitate &c. est stipata) æque ac illa pudendorum inter morbos refertur, eam vero habentes vix ægritant. Sic scrupulus movetur, an mors subitanea, morbus sit, & an ideo sit curabilis &c. Similia habentur in therapia & chymia, ut salia neutra &c. Aliis quoque qui aliud forum sequuntur idem usu venit: Loquuntur Theologi de statu neutro seu inter-pium & impium, vid. *Apocal. III, v. 15.* Loquuntur de eo Politici. Quidam Philosophorum quos somnus occupat, nec inter vivos nec inter mortuos, censent. Non ulterius, dicamus, de aliis rebus moralibus, æque ac physicis v. gr. quando par impar, crepusculum, inter diem & noctem occurrit, quod OVIDIVS ita definit:

Quod tu nec tenebras nec posses dicere lucem.

nec ad grammaticam ac forum latinum pertinentibus. Status neuter autem triplex est, status sufficientiæ quando nimirum homo ab evexia declinat absque tamen manifesta actionum læsione, sufficiens tamen est virtus adhuc pro actionibus naturalibus exercendis, adeoque is nec

sanus nec ægrotus est; decidentia quando sensim desciscunt ad morbum pravamque sanitatem atque ipsi morbi ingruunt, adeoque futuri illi medici providentia præcavendi & convalescentia in qua analepsi nimirum, vires reficienda atque fovenda de illis alia, de hoc hac vice erimus solliciti. Quam tractationem qualem qualem eo utiliore censemus, quo magis observamus practicum vulgus in hoc statu ab officio suo deficere; plurimi enim eorum satis habent curasse morbum, paucissimi autem post eum neque de morbiferarum reliquiarum extirpatione, neque de robore deperdito naturæ & ventriculi apte restituendo vix cogitant, nedum operi huic adeo salutari & necessario auxiliatricem manum admovent, quo neglecto officio id efficiunt, ut non modo aut recidivis pejoribus, sed & novis subinde longe periculosioribus morbis plerumque succedentibus ansum suppeditent, aut ut languentes lenta morte conficiantur, occasionem suggerant. Prudentis, cauti ac seduli medici quævis curæ suæ concreditorum, commoda consilio procurare, præterita respicere, præsentia ordinare ac regere, futurasque tempestive prospicere nihil omittere, nec minima negligere ut majora serventur. Deus vero T. O. M. nostrum conatum ex alto secundet faciatque clementer, ut cuncta cedant prospere in summi sui Nominis gloriam proximique commodum atque emolumentum.

§. I. **Q**uid per convalescentia statum significetur, ex ipso termino satis apparet: Eum nimirum humani corporis statum, qui via ad salutem est, intellectum esse volumus, quo a præcedenti morbo quocunque modo quidem liberatus homo revalescit, & defectus aliquis pristinae sanitatis atque vigoris a vehementia & diuturnitate illius (morbi) adhuc adest, adeoque nec ægrotus amplius causa morbi devicta, nec perfecte iterum sanus est atque ad vitam necessariis muniis rite exercendis, non satis aptus. Is propemodum in eo statu versatur ac illi, qui in pace, belli incommoda sentiunt. Ex quo enim morbo prius defunctus & qui omnia tempora illorum quæ principium, augmentum, status & declinationem describunt superavit, nondum tamen ad perfectam sanitatem immediate pervenit, sed ordinario ipsi vires plus vel minus invalidæ sunt omnesque propemodum animales functiones languida membraque ad suas consuetas operationes exercendas, nondum satis reducta ac prout longior inprimis ac gravior vehementior pejorque morbus fuerit, consopitis omnibus symptomatibus modo citius modo tardius & sensim sensimque somnum præsertim ac appetitum resurgentem

sen-

sentire ac resumere incipit vires, usque dum vigorem naturalem atque ad pristinum statum redire pristinaque munia hucusque intermissa atque consueta obire possit ac convalescentia sit perfecta & absoluta, sanitasque pristina in integrum restituta. Quo simul falsa convalescentia in qua nimirum morbus adhuc durat, sed multum est imminutus, a vera discernitur. Si quis morbus hoc nomine suspectus, certe e. g. dysenteria est, quæ non profligata putanda, si forsan cessaverint tormina, dejectiones ac æger melius se habere videatur. Nimirum ut explicatius paulo loquamur, in hoc statu constitutos, quamvis de reliquo sat bene se habeant, tamen per notabile adhuc temporis spatium deprehendimus graciliores, emaciatos & attenuatos, adeo ut perditio sæpe in obesibus dimidio pondere corporis collapsa sint omnia, cute laxa squalida rugosaque flaccidis musculis carneque tanquam monticulis notata, fronte caperata, oculis concavatis & concisis quasi ac tremantibus membris, decolores, luridos aut pallidos, exsanguis, contractis quasi collapsisque venis, sicciores & frigidiores imprimis, quoad partes extremas, imbecilles & languidos, commovendis valide membris haud pares, adeo ut sæpius lecto affixi manere teneantur, vixque lecto sese volvere, surgere aut incedere valeant aut audeant. Adeo tam parva cohæsiō solidarum partium est, ut vix agant in contenta fluida; dum quieti recumbunt, sat validi ab adstantibus conspiciuntur, loquuntur cum iis, illico rursus obmutescunt, nec ad interrogata nisi cum tædio respondent. Quando vero resurgunt ex lecto, curvi, tremuli genibusque vacillantibus incedunt. Tanta quandoque virium prostratio adest, ut post petechias, purpuram albam profusionem sanguinis largiorem per fluxum illius ex naribus utero, intestino recto &c. animi deliquium quandoque incurrant. Palpebras nec attollere nec movere eos posse diceres. In quibusdam præsertim a phthisi corpus adeo extenuatum & collapsum reperitur, ut macie pene confectum sola cute viduata carnibus tegente ossa deforme ac cadaveri imo sceletō, quam vivo corpori similis sit, quemadmodum PLAVTVS C. I. II. XXVI conqueritur: *ossa atque pellis sum miser a macritudine.* Febre etiam acuta, continua laborans intra duarum septimanarum spatium dimidium sui ponderis perdere potest, contractis sic vasis prout minuitur liquidi copia. Interdum saltem de lassitudine totius corporis & contusionis quodam molesto in artubus sensu conqueruntur, præsertim a perpeffis epilepticis paroxysmīs atque febribus catarrhalibus, quod jamdum HIPPOCRATES Lib. Epid. L. VI Text. XCVI, indicavit, quando inquit: Lassitudines febribus ex catar-

rhis sunt familiarissimæ, quod per nervos aliqua pituitæ defluxio fiat. Alios rursus conquerentes audies: *Sie fühlen erst recht die Kranckheit*: Immo nonnulli affectibus dolorificis, arthritide, podagra, inflammatione quadam, erysipelate & similibus profligatis, re vera, per notabile interdum temporis spatium dolores adhuc sentire sibi imaginantur, quamdiu scilicet motus dolorosus semel impressus per nervos eodem modo continuatur. Immo hoc singulare quoque, quod ii quibus membrum aliquod corporis, pes aut crus, brachium, amputatione sublatum est, de dolore membri illius deficientis adhuc mutilati, mentis licet belle compotes conquerantur, qui & somnum impedit & major fere est molestiorque sæpe ipso ex vulnere amputationis nimirum, dolore. Hujus ratio in eo consistere videtur, quod equidem is dolor superstes non in superstitie equidem parte discissa sit, sed referendus vel ad statum nervorum, ab impressione pristina relictum, vel ad eorundem motum eundemque per omnes nervos sic læsos unum eundemque, sive ad vexationem eam ægerrime ferendam, qua nervi in tali vulneratione magna, discissi afficiuntur, sive a consensu membranarum atque nervorum; siquidem a sola saltem imaginationis vi, quæ mira quidem sæpe numero assolet objicere, nollem hocce phænomenon deducere; si vero aliam quamcunque causam spetiosiore reddere velles, ambas manus libenter porrigam: Verum non modo dolorem sentiunt, sed & in sequentibus vitæ annis, hæmorrhagiæ, dysentericiæ & nimix pinguedini molestæ, nisi victum minuant, obnoxii evadunt, quoniam sanguis, qui in nutritionem rescissi membri impendi debebat, redundat ad reliqua. Hanc rem declarat observatio apud MALEBRANCH. inveniendâ *de inquir. verit. Lib. II. cap. VII. p. 94.* de ancilla quadam, quæ quum candelam admoveret, dum ægro quodam venæ pedis inciderentur, simul ac scalpellum a chirurgo vidit infixum, tantus pavor invasit artus ejusdem ut per quatri-duum in eodem pedis loco quem viderat incidi, senserit dolorem, adeo acerbum, ut coacta fuerit decumbere, cujus rationem haud ineptam addit laudatus Autor, quod, spiritus in illas corporis partes vehementer se diffundant, quo illæ intensiores factæ, vehementiorem in mente excitent sensationem. Porro, plurimis tumida membra, præsertim pedes, quandoque totus corporis habitus, apparent. Nonnulli præsertim ardentem hecticam, febrem atque luem veneream perpessi, defluvium capillorum experiuntur. Totus corporis habitus levi madore humectatur, indicio lætoque augurio transpirationem per cutis poros, esse satis expeditum. In naribus titillationem quandam persentiscunt immo sternu-

sternutationibus exercentur, vel saltem conatus ad eas eique frequentes adsunt; lingua muco ut plurimum obducta est. Aliis salivæ magna copia succrescit, quandoque tanta, ut dentes solito minus stabiles iisdem videantur quæque acrimonia, palato, non parum doloris inferat. Tinnunt aures atque auditus hebescit, somnolentia præsto est, aut sollicito utuntur somno, vertigine rotatur caput, oculi concavi quasi apparent, palpebræ vero supremæ tument, speciatim post convulsivos morbos ac soporosos, apoplexiam itemque vertiginem &c. quod licet ab HIPPOCRATE jam sit observatum vid. *in Epid. L. VI. Text. XXXI.* hodie vix attenditur. Cor porro frequenter palpitat, sæpius appetitus penitus est dejectus vix major vero ejus destructio observatur, quam post variolos. Quibusdam bene licet comedant, nihil tamen corpus proficit quod HIPPOCRATES jam dudum *31. Sect. II. Aph.* malum pronuntiavit. Sensus fere omnes hebetiores ex spirituum animalium inopia esse solent, obscure tactu res explorant digitis, flaccida carne conspicuis, tanquam monticulis notata &c. Ulterius non attingamus alia accidentia, ut claudicationem a fractura colli femoris & similia. Quoniam forte vitiosi humores appetitum destruentes, partim a calore febrili consumti sunt, partim a medicaminibus aut ipsa natura evacuati, atque quoniam febris præsupponitur sublata, ideoque corpus & refrigeratum & iterum humescens. Ut plurimum esuriunt magis, sitiunt minus, nisi a diarrhœis, dysenteriis, cholera, febribus biliosis atque ardentibus tamen ventriculus & digestio ejus debilis. Somnus sæpe deficit aut inquietus non reficiens, spiritus ascentia sanguinis & humorum impedita, quas tamen animales functiones redire sentiunt, ructus insurgunt eique ut & sudores acidum spirant, flatus ex ano prodeunt frequentes qui si sonori sunt, Hippocrates bonum omen exinde cepit, argumento, una, cum redeunte interna transpiratione, nativum intestinalium fibrarum tonum, motum peristalticum restitui, ita ut expressi vapores, vi quadam elidantur. Nausea & fastidium & singultus sæpius molestiam injiciunt vago appetitu feruntur & varietate alimentorum delectantur, immo quædam illorum quandoque insolita avidius atque, ut plurimum acida magis appetunt assumtisque iis refocillatos se, quasi sentiunt. Nonnulli quando alimenta solida liberalius assumunt, ea vomitu mox rejiciunt, facile inebriantur, quia debilia capita causæ huic non resistere possunt. Quibusdam præcipue iis, qui a morbis acutissimis resurgunt, ut & qui peste evadunt omnia quæ assumunt falsissima apparent. Quidam gustum insuavem & oris amarorem, quidam salis armoniaci saporem, æque molestum

estum observant. Ab animi pathematibus facile & sæpius tentantur & afficiuntur, levique de causa terrore percutiuntur, & vel mentione injecta ingrati cujusdam, protinus exhorrent, ira non raro toti excandescunt, vel a levissima naucique causa ac ut dicitur a musca, in propinquo confidente pariete, irritari eos, præsertim qui phthisi affecti fuerunt rursus alios solvi confestim in gaudia, risus, lacrymas videbis; sæpius anxietate & tædio molestantur. Secretiones & excretiones fiunt lentiores, sudoribus rursus perluitur corpus nimis illisque imprimis nocturnis, maxime a febribus diuturnis iique interdum frigidi esse solent, alvus ut plurimum segnior est, non raro fæces mucidæ excernuntur quandoque etiam intestinorum iævitas notatur, præsertim mensium foeminarum fluxus ægre & tarde admodum revertitur. Pulsus & urina sæpius sat laudabiles se habent, nisi quod ille debilis adhuc persentiscatur ac hæc sæpius pallida, tenuis atque aquosa ac copiosa atque in aliis quandoque cum ardoris dolorisve molesto sensu redditur v. GALEN. L. XIV. *de usu part.* AVICENNA XVIII. 3. *Tract. 2. Cap. III.* DVRET. in *Comment. Cap. L. Lib. I. de Morb. int.* ZACVT. LVS. Lib. II. *Prax. Med. admir. Obs.* 78. Sensus omnes hebetiores esse solent, atque obscure res explorant. Quidam ab oblivione omnium fere rerum eaque per totum vitæ sæpe spatium durante capiuntur, qualia notabilia exempla hinc inde leguntur hic vel duæ saltem observationes ex *Collect. Nat. & Med. Uratisl. Ao. 1723. mense Aug. p. 217.* adduxisse sufficiat. Inter alia phænomena, quæ in iis observamus, hoc notabile est, quod convalescentes ex morbis acutis maxime, ut febribus, utpote quoad alias functiones omnes languentes, ordinario sicuti quandoque & vehementibus & periculosis affectibus correpti v. KOZACK. *Tr. de sale p. 383.* veneris stimulum, ex sexu præsertim masculino majorem quam antea sentiant atque ad illam non raro etiam inviti cogantur, posteaquam per quoddam temporis spatium jam, sensibillorem scroti corrugationem experti fuerint, immo ipsum semen quandoque effundant, adeo ut per multas observationes constet, quod senes convalescentes salaces iterum reddituri sint, immo impotentia virili alias laborantes, satis potentes se præstiterint. Vid. LOTICHIVM in *Lib. IV. fol. 424.* LEV. LEMNIVM *occult. N. M. p. 379.* Hoc & de se ipso testatur AVERRHUES, qui cum in juventute semper calidis uteretur cibis, sterilis fuit redditus, cum autem in morbum incideret, aliquantum mutato habitu seu temperamento foecundus factus est. Singulare quid est, quod SALMVTH observavit; nimirum quidam a morbo diuturno neque excrementa alvi, neque lotium seorsim red-

reddere poterat, sed semper simul deicere cogeatur. Rarius quidem accidit ut rejuvenescere quasi incipiant, quod in singularem naturæ curiositatem, senibus dentes renascantur, quod capilli cani capitis immo & barbæ fulvi coloris succrescant, quod florido faciei colore ad instar juvenum conspiciantur atque ut serpentes positis exuviis in novam juventutem redire dicantur, novum quasi corpus induere videantur, unde convalescere est juvenescere, quidam dixerunt &c. qualia exempla Auctores haud pauca collegerunt: ut PLEMPIVS in *Fundam. Med.* JOH. PETR. LOTICHIVS *Lib. IV. Cap. I. Obs. II.* CASP. SCHOTTVS *Lib. III. Phys. curios. Cap. XVI.* TH. BARTHOL. *Cent. V. Hist. XXVIII.* SACHSIVS in *Gammamol. Cap. VIII. p. 854.* Quidam eorum etiam observarunt, quod tota corporis compages imminuta collapsaque prætenuis ac pusilla atque monogramma quasi deprehensa fuerit. Ejusmodi historiam D. JACOBÆVS in *Act. Hassn. Ab. 71. & 72. obs. 115.* tradit nimirum chirurgus quidam, per errorem aquam fortem bibebat, unde tota membra ita contracta corrugataque fuerunt, ut, qui antea justam viri staturam habuit, deinceps vix pigmæi vel septennis pueri obtinuerit. In *Reg. Scient. Acad. Histor.* Auctore I. B. DV HAMEL notatur quod mulier XXII. annorum convalescens, ex diuturna ægritudine cœperit paulatim decrescere ad unius saltem pedis altitudinem, & quod post obitum, ossa exceptis dentibus, mollia, ad instar ceræ deprehensa fuerint & flexibilia, omnis cavitatis & medullæ expertia. Simile habet FERNELIVS de *Abd. rer. caus. Lib. II. c. IX. p. 121.* convalescenti ex morbo gravi, ossa brachiorum crurum & femorum tam mollia & flexibilia evasisse ut ceræ instar flecterentur, quæ balneo aluminoso restituta sunt. Aliud quoque exemplum ex RVELLIO adducitur. Porro quandoque cuticula secedit & nova succrescit. Accidit & non raro, ut illi qui per totum vitæ tempus valetudinarii fuerunt, post perpeffos morbos integra demum dein sanitate per plures annorum series fruantur longævique evadant, quoniam notum est atque perspectum, sæpe morbos morborum esse remedia, causa sub decursu eorum ex motibus inductis totiesque repetitis, excussa, aut obstructionibus referatis &c. quod maxime in febribus intermittentibus & acutis, variolis, scabie, diarrhœis &c. experimur; siquidem attenta observatio docet, pueros qui ante variolas, variis, oculorum & aurium defluxionibus, scabie, diarrhœis, tinea capitis, rhachitide, tabe, doloribus artuum, imbecillitate pedum & adultiores virgines quæ mensium retentione, laborarunt, post illas perpeffas, inte-

gra sanitate corporisque robore donari. Accidit & hoc frequentius adhuc, ut pueri ac adolescentes per morbos diuturnos & emaciantes, inprimis febres, phthisin, luem veneream & similes, soleant dein notabiliter increfcere & in consistenti ætatē quoque constituti uberius nutriri atque reddi obesos; senio vero pene confectos refici instaurarique ut juvenes viridesque quasi videantur, compluribusque vitam prolongari. SENNERTVS *Praxi Lib. V. P. I. c. XIV. p. 23.* refert: nobilem, post febrem malignam, adeo obesum redditum fuisse ut vix loco se movere potuerit. Accepimus convalescentes ut & senes & valetudinarios præterire pestem. De reliquo sanguis non raro melior & magis correctus, sed paucior, parciolem salis volatilis partem paucumque ut plurimum serum, in se continens; atque autumamus, in sanguine a morbis debilitatorum si is destillandus esset, minus salis volatilis inveniri ac in ipsis febricitantium invenit Borrichius, vid. *Acta Hassn. Obs. 67.* Hoc jamdum affirmavit GALENVS vid. *de Arte M. Cap. ult.* & monstravit P. M. DE CALDARIA *T. II. Oper. p. 35.* Ejusdem quoque prompta præ aliis refocillatio est. Non raro salsæ & fixiores ac terreæ & sulphuræ, biliosæ, pituitosæ, vappidæ, aquosæ, inertes, lentæ partes remanent redundantque, atque ipsa non raro materia pristina peccans, quæ morbum produxit, delirescit. Namque tales nocivæ partes & adeo firmiter sæpe impactæ sunt partibus, ut etiam repetitis evacuantibus vix educantur, vel sub ipsis morborum paroxysmis acerbioribus de novo elaborantur, absumentis subtilioribus, atque per longum durationis tempus relinquuntur; vel medicamentis copiosioribus & imprudenter adhibitis producuntur.

§. II. Quemadmodum a morbis corpus ejusque omnes partes vultus maxime atque temperamentum immo ipsa forma alterantur, ita alteratur quoque animus & ingenium atque mores qui corporis temperamentum tum in statu s. n. tum p. nat. sequuntur, mutantur varie, ut cum corpore novo, novam quoque animam inductam esse dixeris, adeoque & moraliter vitia convalescentes incurrunt melioraque interdum sequuntur, quoniam vigor mentis a vigore spirituum animalium procedit, qui & iusta temperie & conformatione indigent, animi affectus mutant humores quemadmodum humores mutant vicissim affectus, ut pro ratione ætatum & consuetudinis animi vel levitas vel firmitas elicitur: siquidem scimus arthriticos, melancholicos & epilepticos præsertim esse sapientes & ingeniosos atque de ipsis adhuc ægris mira legimus, ut eos rudes ignarosque variis linguis loquutos fuisse, quale notabile exemplum

plum apud BORELLVM in *Hist. & Observ. rar. med. Cent. II. Obs. 54.* occurrit, ut plura jam taceamus; ita & toto die videmus, convalescentes animum aut præstantiorem, quod rarius (uti & alias afflictionem intellectum tribuere dicitur) aut debiliorem improbumque turpique forma turpidiorem quod frequenter accidit (siquidem alias & fragilitas humana plus in malum quam in bonum statum inclinat) prodere, ut quantum mutatos ab illis, quantum a pristina eos recessisse indole, conspici sæpe mirum videatur, qua de re quoque apud nos non unum habetur proverbium vel, ut alibi legitur:

Surgens agrotus reprobus fit undique totus.

Vel ut conceptis pluribus ulterius verbis JOH. BVCHLER, *Sent. rhyth.* expressit:

Dum sumus afflicti, ne spes super ulla salutis

Vota Deo vita de meliore damus:

At si contingat morbo relevemur ut ipso

Regula vivendi, qua fuit ante, manet.

In ægritudinibus certe omnes vitam meliorem promittere solent, paucissimi servant promissa, atque adeo, in pejora ruunt, animo elati, ac quasi non essent mortales, ut alii homines, ab infortunis superatis vix probiores reddi assolent quos enim ejusmodi, non emolliunt, indurant. Utinam convalescentium omnes, bene memores sint illius, quod recitat PLVTARCHVS in *Apoph. Reg. de Antigono Mac. R.* Nimirum a gravi morbo posteaquam convaluerat, dixit: Nihil pejus est, siquidem hic morbus submonuit nos, ne animo efferamur, quam simus mortales, ac deplorantibus amicis, ceu magnum malum, quod tam graviter ægrotasset, regeffit: ex morbo plus accessisse boni quam mali, corpus extenuerat, sed animum reddidit modestiorem, corporis robori non nihil detraxerat, sed animo detraxit insolentiam, morbum longe periculosissimum, proinde non pessime se res habet, quam levior morbus arcet pellitque majorem. Quidam enim eorum fiunt moratiores, tranquilliores, sedatiores, placidiores, leniores, remissiores, consideratiores, cautiores, animosi, alacres, hilares, ingeniosi, excitatiores, cujus rei exemplum singulare apud PECHLINVM modo laudatum in *Obs. p. 399. & seqq.* reperitur. Jamdudum ARISTOT. *Problem. II. Sect. XXX.* observavit, Marcum Syracusanum præstantiorem Poëtam, ex morbo quodam exstitisse. HUARTVS refert, quendam, ex febre continua, ingeniosum admodum fuisse factum. Nobis notus est bonarum literarum studiosus quidam, stupidus alias, qui postquam febre ardente laboravit, ingeniosus sat factus est;

quod sæpissime propemodum de febribus & morbis acutis quibusdam constat: sub iis enim humores visceri & crassi per motum p. natur. inductum dividuntur, resolvuntur, subtilifantur, atque exaltantur, mobiliiores & puriores redduntur. Confer. D. SENNERTVS in *Institut.* p. 498. P. FORESTVS *Observ.* XX. L. X. p. 341. S. R. A CASTRO. *Quæ ex quibus* L. II. p. 97 &c. Rursus evadunt etiam immorigeri magis, morosi, tristes, desides, deliri, stupidi, iracundi, adeo, ut vel umbræ suæ irascantur, quod ut plurimum fit, ut vergunt semper homines in deterius: Quare, inter rarissima contingentia referendum illud, quod apud P L V T A R C H V M legitur *Lib. de sera Num. vind.* hominem quendam ethnicum ex casu ab alto extinctum fuisse visum, subito vero corroboratum ad se rediisse & incredibilem deinceps vitæ mutationem instituisse. Quæ vitia facile in naturam tandem transeunt. Morbi ut modo est adductum quitalen mutationem inducunt atque relinquunt, sunt ex iis, qui pertinaciores, graviores, diuturniores existunt & qui genus nervosum male afficiunt, humorum motum præter modum turbant, eumque præternaturalem iis inducunt, partes laudabiles, subtiliores, spirituosas, valde dissipant ac lympham cerebri aquosam ac quasi vappidam impuram atque ad stagnationem inclinantem, reddunt, cujus pars residua bona (spirituosa) non minus ac illa, quæ post morbum denuo secernitur, antea consuetum motuum typum, non repetere potest, viresque corporis animique imminuunt atque retundunt. Si qui alii morbi corpus, faciem, mores & animum mutant, certe febres intermittentes, diu affligentes sæpeque recurrentes, chronicæ, lentæ, hecticæ, acutæ, pestis, morbus hungaricus, epilepsia, podagra & maxime varioli atque morbilli, præcipue, si massa sanguinea non sufficienter depuretur, atque si quospiam maturioribus annis invadunt, id faciunt. Willisius vidit paralyin stupiditatem comitari aut præcedere. Eadem de vermibus P E C H L I N I observatio est. v. *Lib. II. obs.* 42. opinaturque hanc mutationem accidere, quoniam ab ea, irritatione, vellicatione atque compunctione quas inferunt sensilibus membranis, animus quoque irritatur & violenti perversique motus, lymphæ partibusque fluidis omnibus novique miri subinde impetus ac vibrationes, præcipue spiritibus immittuntur, quæ si longius extendantur in habitum vertuntur, vix ac ne vix quidem, expugnandæ. Puellam P R A E S E S XV. annorum novit, quæ a primo ætatis anno vermibus vexata est & adhuc sæpius vexatur ex quo valde stupida segnis & somnolenta facta est. Vel mulieres non inanem de vermibus conjecturam capiunt, si infantes ex improvviso mores monstrent

muta-

mutatos. Notissimum est, homines epilepsia graviore afflicto, stupidos tandem reddi. Idem de infantibus, qui difficili dentitione graviter laborarunt, annotatum est. Huc & referendum, quod HEERIVS *in Obs.* 23. refert, juvenem stupenda memoria & excellenti ingenio præditum, a philtro propinato morbum passum gravem, stupidissimum & rerum omnium rudem, redditum fuisse. Memorabile quoque est illud THYCYDIDIS, quod adducit, eos qui pestem Atheniensium evaserunt, adeo omnium fuisse oblitos, ut non solum familiarissimos sed & se ipsos non cognoverint. Legimus, post morbum graviolem Messalam Corvinum Oratorem Rom. proprii nominis oblivionem cepisse. Tales binas observationes *Collect. Uratislav. Ao. 1723. Mense Augusto pag. 217.* memorant Confer. & HOECHSTETTERVS *Obs. D. IV. p. 432.* Sic a lapsu, casu, ictu vulnere, stupidos reddi notissimum est. Quemadmodum porro efficacia animæ ac phantasie, in corporibus sensibilibus, imbecillioribus ita & in convalescentibus sese potentius exerit, adeo, ut v. gr. quosdam morbos, ut epilepsiam variolos ipsam pestem, ex solo aspectu sibi contrahant, ac ex sola impressione ac imaginatione nonnulli, purgentur, vomant, sudant, salivant &c.

§. III. Inde vel leviter advertentibus ulterius animum constat, quæ sint causæ quique effectus: Sub morborum enim decursu, varia quidem ratione, nimia humorum secessione, parciori & conturbato somno ciborum appetentia destructa, vi ventriculi vacillante &c. ac per motus tales, vires perduntur atque vel spasms & convulsionibus, partes solidæ maxime vi sua elastica privantur, & vis ipsa motrix quasi consumitur: Sic a paroxysmo & impetu epileptico & febrili ingens totius corporis languor atque debilitas & ad motus obeundos magna impotentia remanet. Nam præter modum extensæ ac relaxatæ fibræ motrices, deinceps non solum officio suo fungi, i. e. fluida impellere, nequeunt, sed & vitia occasione data, in se facile recipiunt. Facta sic circulatione sanguinis impeditiore vigoreque deperdito, humores noxii, ad illam partem congeruntur, decumbunt & stagnant, hinc morbi chronici, diuturni & maxime lenti nascuntur. Indicavit hæc HIPPOCRATES *in Aphor. XXXII. Sect. IV.* Quibus a morbo restitutis quidpiam est infirmum ibi abscessus fiunt. Quo nobiliores & ad vitam magis necessariae partes & viscera sunt, quæ morbus diu infestavit, eo graviora mala quæ subsequi solent, metuenda. Rarius, tonus rigidior redditur. Vel succi utiles & necessarij ad vitalitatem quive partibus solidis omne robur motusque potentiam largiuntur, subtiles, lymphaticæ, spiritibus animalibus turgidæ, gelatinosæ,

sæ, chylosæ ac alimentosæ, ipse sanguis vitæ thesaurus in quo plurimum caloris & spiritus, in quibus naturæ integritas viriumque robur potissimum consistit, ut in alvi fluxionibus, item in extravasatione seri, in cavitate thoracis & abdominis, sudoribus copiosis, salivatione uberiori, diuturna lactatione, gonorrhœa, fluore albo, inedia & maxime hæmorrhagiis, amittuntur, & per poros & vias undique obvias excernuntur & depelluntur, quibus exinanitis vasa quæ eos vehebant, concidunt unde & cruditas ac intercepta distributio alimenti, atque universum sanguificationis opus cessat, adeo ut alimenta etiam liberalius assumpta sanguinem in vasis, vix augeant. Neque desunt observationes, quæ testantur ex incisis venis loco sanguinis humorem albicantem, lacti similem effluxisse. Præter alia incommoda & sanguinis imminuta quantitas, perspirationem, reddit languidiorem, quoniam ad emunctoriorum tubulos & poros non satis pertingere, neque eos apertos servare potest, hinc concidunt & exitus ex cute intercluditur, hincque dein excrementa retenta, sensim pejora redduntur & corrumpuntur. Exploduntur quasi spirituosæ, ut in immanibus doloribus & diuturnis febribus & caloribus. Ex defectu dein pariter virium & spirituum, circulus sanguinis quoque tardior fit, qui vix sufficit, ut ex partibus præsertim inferioribus, pedibus ad cor tanquam longe ab iis remotum & per adscensum perpendicularem possit redire, ex quo cachexia & hydrops, tumores pedum œdematosi, item varices aliique plures pertinacissimi morbi, presso pede, sequuntur. Hic spirituum animalium defectus, certe principalis causa est quare remaneant sordes excrementitiæ actuosæ, in sanguine, ipseque ad corruptionem disponatur, circulo dein sanguinis languido facto ac tardo, via sternitur expedita, ad motum intestinum subeundum peregrinum, sicuti enim motus localis corporis, putredini resistit, ita quies & motus ejus impeditus, ad illam disponit. Præter has partes laudabiles hoc in statu deficientes, etiam bilis nominanda est, de cujus defectu FERNELIVS in *Pathol.* MOEBIVS in *Fund. physiol. & Miscell. N. Curios. D. II. Obs. 224.* testantur. Vel per motum sanguinis intestinum præter naturam auctum laudabiles partes vitiantur & excrementitiæ salino sulphuræ redduntur, adeo ut ut licet alimentis etiam insipidis ac fædæ expertibus vescantur, nihilominus tamen & sudor & urina & fæces alvinæ copiosis particulis salino - sulphureis abundant aut humores impuri, vappidi, atque crudi, lentiores, pituitosi, crassi, terrei, acidi, inertes, relinquuntur, qui naturæ oneri sunt & vitalem motum atque calorem magis supprimunt. Quo scire licet, turbationem sanguinis cir-

culo

culo suo subsequi etiam eam in crasi, tam sanguinis quam lymphæ, impuritate aucta sive ratione particularum viscidarum, crassarum, sive ratione salinarum & sulphurearum magis subtilium &c. Hinc languores, tumores, catarrhi, phthisis, cachexiæ, atrophici, hydropes, affectio hypochondriaca, colici dolores, febres continuæ, lentæ, paralyfes, sopores alique gravissimi & diuturni morbi oriuntur, qui, dum sanguinem in mixtura sua penitus destruunt, mortem ipsam inferre solent. Hinc & partes solidæ sic debilitatæ & marcidæ collabuntur, corrugantur, resiccantur, decidunt, pili capitis, immo quandoque barbæ, superciliarum ac palpebrarum vid. *AELIANVS Lib. XV. Hist. Animal. AETIVS Tetrabibl. IV. Serm. I. C. XXVIII.* quam pilorum & crinium, defluxionem, tabem & putrescentiam ac interitum observaverunt scriptores ex venenorum potu, ex morfu serpentis, salamandræ, vid. *DIOSCORIDES Lib. II. cap. LIV.* & magnus Naturæ Interpres, *PLINIVS Lib. X. Nat. Hist.* alii Observatores a lepra, lue venerea, hectica, & tabe, febribus ardentibus, cephalæa, provenire viderunt. Hic speciatim notatu dignum est, ea capitis parte quæ doluit, potissimum crines decidere, exarescente, cute ac denegato ad radices illorum nutrimento. Idem videmus frequentius in iis, qui sub morbi cursu, faciem, stragulis nimis cooperiunt. Quandoque dentes non modo mobiles fiunt, quin & excidunt, ex alimenti nempe defectu, alveolis amplioribus factis. Sudor largior fluit per cutem, roboreque suo destituto admodum debilitans. Esuriunt magis, imprimis a febribus, quoniam partim vitiosi humores appetitum demolientes vel per morbosos motus, a calore forte febrili sunt consumti vel per medicamina spontaneamque naturæ opem sunt evacuati, partim natura illud quod perditum est restituere satagit; non proinde vero sitiunt, quia præsupponitur febrem esse sublatam, ideoque corpus & refrigeratur & iterum humescit. Pulsus adhuc debilis deprehenditur, de debili cordis motu minusque hinc libera, sed impedita magis, circulatione totius sanguineæ massæ, testis. Cor palpitat, ob debile nervosum genus. Ob debilitatem ventriculi inductam, vel parcior ciborum, maxime solidiorum assumpta quantitas, quæ fibras ejusdem aggravat & ultra sphæram elasticitatis distendit, per vomitum eadem iterum expelluntur. Appetunt acidula plerumque, quod arida hiulcaque & mucosa obsita lingua afflictæque ejus papillæ, nihil de aliis mitibus cibis quæ minus titillant ac afficiunt, percipiant indeque aliquam capiant delectationem. Ubi urinæ tenues aquosæ & copiosæ profluunt, indicium est, defectus caloris & spirituscentiæ, in fluidis partibus ex quo, multæ colliguntur aqueæ cruditates quæ minus

minus commode per cutem diffilari possunt, sed subsistunt intus ac tandem per vesicam secedunt. Hinc conspiciuntur tales urinæ potissimum a morbis diuturnioribus, præsertim a dysenteria, a febribus acutis, exanthematicis, variolis &c. morbo hungarico. Ubi fæces mucidæ, pituitosæ redduntur, pariter certum indicium præbent, imbecillis ventriculi & intestinorum digestionis ac alimentorum crudorum ingestionis. Flatus & murmura abdominis, per ventriculi & intestinorum cavum, atonia deperditum, oberrant. Fœminis a sanguinis paucitate menses emanent, & sæpe ad duos tresve annos absque tamen insigni damno, non revertuntur. Viscera interiora quoque languent, immo ossa quandoque mollia flexibilia & exsiccata deprehenduntur, secretiones & excretiones atque omnes actiones in corpore humano impediuntur, lentiores difficiliioresque fiunt, atque nulla propemodum pars suo officio perfecte fungitur. Hinc & plethora morbifera, tam ad vasa, fibris elasticæ naturæ, nimia extensione, debilioribus redditis, tam ad vires, ubi, ex imbecillitate virium, tardior fit humorum circulus. Quod vero ad venerem agantur, mihi quidem ratio videtur, quod seminalis liquor, non equidem auctus nimium, quadam acri caliditate exacuatur, prurigine, ad emissionem stimuletur, sed quod ex perpeffis illis morbis, in quibus nutritio, in toto corpore fuit, læsa, augeatur vitiosis humoribus, per eosdem consumtis. Quo graviores & diuturniores morbi fuerunt, eo gravio-rem offensam quoque deinceps experiuntur affecti, eoque pejus se habent, difficilius tardiusque rursus convalescunt, immo facilius vehementius & periculosius quam antea, ab iisdem atque aliis morbis, vel quoad speciem similibus, vel diversis, aut eundem locum aut alium occupantibus atque subinde pejoris notæ, aliis paulo post, aliis post longum tempus insequentibus, afficiuntur, tandemque ex iisdem moriuntur, nisi provida & tempestitiva medela afferatur. Neque morbis saltem pereunt, sed & sine his insequentibus, in ipso convalescentiæ statu, quod præsertim in affectibus thoracis, ut phthisi atque iis qui internis inflammationibus & puris collectionibus radican- tur, profligatis, sæpius accidit, e vita decedunt, atque ex imbecillitate sensim ad mortem properant, nec diris aut vehementibus anxietatibus & cruciatibus, stridore, stertore, convulsione, membrorum inconsueto motu, clamoribus, strangulatione &c. exagitantur, sed placide moriuntur, ut in somnum potius labi, quam mori videantur. Quare monet GALENVS *Lib. III. ad Glauc. cap. II.* ne mirentur ac dicant incauti practici, morbum quidem curatum esse, hominem autem interiisse licet alibi *Lib. nempe I. de compos. medic.* neminem unquam

unquam vi morbi in declinatione periisse, affirmaverit. Etenim persuasum omnino habemus, in declinatione morbi universali, neminem mori, saltem ex eo morbo cujus est illa declinatio, devicta enim aut expulsa tum est morbi causa; posset tamen quis in illo adhuc mori, ex alio morbo conjuncto vel superveniente, vel defectu requisitorum ad vitam, ut in senibus. Memoratu adhuc dignum videtur illud HIPPOCRATIS de cancro occulto dictum, quod curati ex eo citius intereant, quod ulterioribus observationibus confirmat P. M. ROSSIVS *Consult. & Observ. select. Chir. p. 145.* His consideratis constat, apud Medicos id non æque valere quod apud Jureconsultos valet. *Lib. XVI. quod sanatum ff. Aedit. Edict.* nimirum quod homo post morbum sanatum habendus sit tanquam si nunquam ægrotasset, & quid de proverbio isto habendum: *man soll sich nur vor der ersten Kranckheit büten*, quia nimirum morbi vix ita transeunt, quin læsionem & mutationem quandam corporis partibus inferant, quæ postea occasionem ad varias lases suppeditare possit. Quoniam & inclinationes, mores, virtutes & vitia a corporis habitu, sanguinis temperie & motu, magna ex parte dependent, facile patet, quia humores alterantur, pro varia ratione cerebrumque & nervi afficiuntur, sub morbis animum quoque varie affici & alterari ut laudatissime GALLENVS explicuit, quod nempe temperiem corporis sequantur animi mores. Ex quo simul haud difficulter colligitur, medicinam ex accidenti etiam ipsum animum ejusque vitia sanare. Unde egregia sunt, quæ habet DEMOCRITVS in *Epist. ad Hippocr.* *Morbi hebetant animum, & augetur intelligentia præsentis sanitatis, & ubi corporis habitus ægrotat, neque mens ipsa alacritatem habet ad virtutis meditationem, morbus enim præsens vehementer animum obscurat intelligentiam, ad effectus per consensum ducens:* Plura circa hanc rem egregia vid apud HIPPOCRAT. *Lib. I. de vict. rat.*

§. IV. Tum morbi prægressi eorumque causæ magis aut minus atroces, tum ægrotantium constitutio nativa, vivendi ratio atque temperamentorum diversitas, robustior seu fortior corporis habitus, constans alias sanitas, aut subinde, morbis quassata atque ipsa ægrotandi consuetudo, corporis habitus laxior, mollior aut strictior, consuetudo, diæta bene observata & temperantia, atque frugalitas, aut inordinatus vivendi a recte valentibus modus, nec non ætas & sexus, medicamina atque methodus medendi adhibita, regimen servatum ut & anni tempora &c. faciunt in primis ad certioram vel minus talem, atque perfectam vel imperfectam difficiliorem aut faciliorem, tardioram aut citiorem restitutionem ac ad constantioram vel vacillantem futuram integram sanitatem.

Uuu uu

Nimi-

Nimirum morbis benignis, levioribus, brevioribus, præ malignis, pertinacibus, longioribus & gravioribus facilius insequitur convalescentia. Lentius fere omnium vires recipiunt phthifici, aut alio interno extenuati viscerum ulcere, inflammationes, purpuram albam, petechias atque febres malignas, epidemicas ac anomalas passi. Sic etiam infantes, pueri, adolescentes, consistentis adhuc ætatis homines, facilius citiusque restituantur senibus. De tenellulis vero infantibus observationibus suadentibus hoc addendum venit, quod illorum status sæpe numero in constans adeo sit, ut mox inopinato novas quasdam colligant vires adeoque convalescentiam in proclivi esse bene speremus; mox vero in subitaneum iterum periculum incidant ut de nulla amplius convalescentia ne cogitandum quidem sit, donec successive & præter omnem spem in meliorem statum convertantur. Illi qui ante morbos, cum quibus conflixerunt, temperanter vixerunt, variis injuriis æris frigori ferendo ac duriori vitæ generi & potulentis frigidis potius quam calidis hodie nimium usitatis, adsuæfacti sunt, animoque incurio, constanti fiducia ac spe certa obfirmato atque audaci præditi sunt, qui corpus laboribus atque exercitiis exercuerunt, sicuti minus in morbos prolabuntur, ita a morbis convalescentes facilius & citius recolligunt vires, illis, qui, deliciis mollique otio, intemperantiæ, luxuriæ, animi affectibus contrariis & immoderationibus præsertim mœrori & tristitiæ dediti & afflicti fuerunt. Rursus multa exempla ex lætitia subito reconvalescentium hinc inde notata, invenimus apud Historicos pariter ac Medicos quorum quædam collegit P E C H L I N V S *Lib. III. Observ. XXVII.* nec non ex musica talia defunt. Pauperes (cujus causam exponit SYDENHAMIVS *in Opus. p. 188.*) item divitibus, rustici, bajuli, milites, aulicis & literatis, fatui sapientibus, meliorem hoc intuitu adipiscuntur sortem. Quod sexum attinet, constat quidem, nobiliorem ex his, sequiorem ex aliis morbis, ex pluribus tamen hunc maxime febribus, ob ferosiorem ut plurimum massæ sanguineæ, constitutionem rarioremque partium solidarum imprimis cutis texturam facilius & promptius eluctari. De corporis vero habitu generatim hoc notatur, quod ii, qui graciliori molliori atque rariori facile transpirabili præditi sunt, ut facilius læduntur, ita quoque promptius convalescant, quam ii qui obesiori aut densiori atque strictiori adeoque minus perspirabili gaudent. Propter facilem enim transpirationem, plus excrementorum aufertur & ideo citius ametria finitur. In densis vero corporibus ob partium constipationem, non solum difficulter excrementa dissipantur, sed etiam facillime cumulantur, unde postea, febres, obstructions,

etiones, inflammationes & plura ejusmodi mala, oriri solent. Ideo dicebat HIPPOCRATES *Lib. de Aliment. textu V.* *Raritas corporis ad transpirationem qua plus aufertur salubrior, densitas ejus ad transpirationem, qua minus aufertur insalubrior.* Et porro qui probe perspirant, imbecillores & saniores & facile convalescunt, qui male perspirant, antequam agrotent, robustiores, agrotantes autem difficulter convalescunt. Quo & blandior, benignior, humidior, sanguinis temperies est, eo felicior hominum conditio. De rufis habetur, eos in morbis præsertim acutis frequentius de vita periclitari, atque difficiliorem experiri convalescentiam, de quo confer. BALLONIUS *in Phar. Med. p. 8.* Quemadmodum de anni temporibus scimus, ea diversa diversos & frequentiores gravioresque parere morbos & eos vel contumaciores reddere, vel solvere, quæ HIPPOCRATES primum breviter quidem sed concinne satis exhibuit *III. Aphor. L. III. IV. VIII. IX. XX. XXI. XXII. XXIII.* quod & experientia docet: Vernali tempore evenire & peiores reddi maxime epilepsiam, profusiones sanguinis, gravedines, anginas, febres tertianas, impetigines & omnia fere nervorum ac articulorum vitia, lippitudines, deliria &c. æstivo, morbos acutos & febres ardentes, diarrhoeas, dysenterias, ophthalmias, aurium dolores &c. autumnò quartanas, hydropes, hypochondriacos affectus &c. hyeme affectus soporosos, tussis, pleuritides, variolos, morbillos, febres lymphaticas &c. ita his pro eorum diversitate diversimode afficiuntur convalescentes; sic tempore autumnali hyemalique ægerrime tardiusque convalescunt, adeo, ut observatione constet multiplici, mori plures autumnò: Cujus causam non immerito cum SYDENHAMIO vid. *Method. Cur. Feb. S. I.* in sanguinem tunc a progressæ ætatis calore, per morbi cursum, in hoc tempus incidentis, ad pauperiem summam redactam, quasi, ac in spiritus animales maxime ob id consumptos rejicimus. Observatur & sæpius, ægros, quamvis restitutos sequenti tamen æquinoctio mori; vernale autem tempus est convalescentibus omnium faustissimum, quo per salubres plantarum exhalationes refocillantur languidi viresque mentis redeunt, ubi torpidus, sanguis per partes tenuiores ad massam humorum penetrantes, blande exagitur. Generatim insuper dicendo aëre existente nubilo, turbido, pluvioso & regnantibus diu ventis meridionalibus & occidentalibus, humidis, convalescentiam ægre procedere, longe felicius vero sub aëre sereno, puro, frigidiusculo. Hoc persistente homines ad actiones redduntur alacres, lætantur imò frontem exporrigunt hypochondriaci, atque monstrant serenam, mœrore affecti contristatique hilarescunt, nec jocosa adversantur atque ipsa animan-

tia, bruta, novo quasi vigore excitantur, gaudent & ad omnes labores sustinendos plurimum valent. Celeberrimus FRID. HOFFMANNVS ut legere licet in *Med. Rat. Syst. T. II. p. 435. §. III. in Schol.* observavit, a declinatione morborum, recuperationem placidi somni, appetentiæ & vigoris animi & corporis, sub argenti vivi humiliori statu in barometro difficillimam fuisse; cum primum vero loca altiora petiit mercurius, mox languorem decessisse & vires increfcere coepisse. Juxta hæc pharmaca quædam præpostere & copiose nimis, in acutis præsertim & intermittentibus atque vomitibus, diarrhœis & dysenteriis adhibita, convalescentibus obesse possunt, v. g. terrea, incrassantia, præcipitantia, figentia, constringentia, acida, austera, aluminosa, vitriolica, martialia, refrigerantia, opiata, ut & in aliis morbis v. g. pectoris, tussi, catarrhis &c. dulcia, saccharata, syrupi, electuaria & ejusmodi, quæ humores conglutinant, & digestionem ventriculi ejusque tonum adeo lædunt, ut cachexia, hectica, hydrops, asthma, cardialgia, spasmi hypochondriaci, tabes &c. exinde sequantur. His casibus atque periculis plura alia medicamina sunt opportuna, ut, evacuantia, purgantia, drastica, vomitoria, sudorifera salivantia, diuretica &c. non debito modo & tempore adhibita, quæ ægros debilitant, & succos ad vitalitatem necessarios, profundunt, partes corrugant solidas & lædunt, earumque tonum perdunt, ac simul morbis chronicis expeditam viam parant. Aequè talia metuenda sunt si per methodum medendi perversam, alia ratione natura in secretionibus & excretionibus occupata, impedita fuerit: Siquidem & id attenta observatio docuit, pharmacomania laborantes, quales maxime hypochondriaci sunt, ob copiam & diversitatem remedium nimiam haud facile convalescere, ut e contrario febricitantes, qui nausea medicamentorum tenentur, citius eluctari. Ad hoc scire licet, certos quosdam morbos, ut hectica, melancholia hypochondriaca, cachexia maxime, multa medicamenta haud ferre, satiusque esse in illorum curatione interdum, per aliquod tempus, ab omnibus remediis pharmaceuticis, abstinere, quam illorum usum longius continuare. Horum (medicaminum) auxilium quod præstiterunt, unice in convalescentibus incurrunt in sensus, errores vero circa illorum exhibitionem, non satis cautam commissi, una cum mortuis, humo teguntur. Neque auxilia chirurgica imprudenter adhibita hoc periculo expertia sunt; scilicet si ægris per venæ sectionem copiosior nimis sanguis subinde profusus fuerit, qui ut plurimum crisi destituuntur atque non modo lentius & difficilius convalescunt, verum etiam nonnullis morbis ut febribus intermittentibus præ-

præsertim & hydrope deinceps tentantur, sique in parca nimis quantitate eductus fuerit, non raro morbo licet superato, novos & pertinaces tumultus, in massa sanguinea concitat, ac si non in formales morbos erumpant, diu tamen male se habent, qui ægrotabant, ut melius fuisset, si plane ab hoc auxilio abstinuissent. Par periculum scarificationi incongrue adhibitæ propositum est, ut colligere licet ex D. SENNERT. *in Parall. p. 22.* Non raro ægrotantium culpa etiam hoc nomine accusanda, si nempe exactum regimen non adhibuerint, si v. g. iusto calidius illud fornacis calore lectorumque coacervatione admiserint &c. atque debitam diætam reliquumque ordinem a Medico præscriptum non servaverint, siquidem hodie plerique ægrorum in Medicos imperium affectant, nec ab iis se regi patiuntur, sed voluntati suæ, appetitui & gulæ indulgent.

§. V. Indicant convalescentiam sive salutem, cujus spes & ratio omnis, in naturæ robore posita esse videtur, præ aliis in singulis prope modum morbis superatis vel superandis observanda signa. Talia sunt medicamentorum adhibitorum ex voto operatio, successus atque juvenimen, morbi levamen ac imminutio, spirituum animalium corroboratio atque vigoris quædam sensibilis recuperatio, pruritus quidam tam in partibus externis quam internis, præsertim genitalibus, utpote maxime sensibilibus, scroti corrugatio, in quibusdam maxime acutis morbis, malignis dolosisque febribus, punctulari &c. crassi & copiosi interdum humoris excretio, per aures, surditas atque obauditio v. HIPPOCRAT. *L. II. Epid. S. III. t. 20.* sternutatio (hinc ut accepimus in plurimis Italiæ Xenodochiis quando e. gr. incipiunt sternutare, eosdem medici dimittere solent) scintillarum ignis, quando oculi fricantur perceptio vid. FRANC. MERCURI AB HELMONT. *Observ. circa hominem ejusque morbos p. 9. §. 9.* appetitus, vires brevi reparans, modice restitutus, præsertim si acidula papillas linguæ blande irritantia aliquamque delectationem ingerentia & carnes iterum appetuntur, ut enim depravatus imminutus aut dejectus morbum, sic restitutus sanitatem, indicat ventriculinam actio systematica est, i. e. a solidis æque ac fluidis corporis nostri partibus bene multis dependet; ideoque in plurimis morbis corruptus. Etenim & salivam movet, simulque alterum indicium convalescentiæ primum lætum atque gratum monstrat motum ventriculi peristalticum invalescentem, qui tum maxime in orificio ventriculi superiori admodum sensibili, potissimum juxta menstruum ventriculi vegetum suis partibus spirituosus & salinis vellicantibus operatur; quamvis

redeunti appetitui non semper fidendum, sed potius simul videndum, an digestio sine difficultate, flatibus, borborygmis, capitis perturbatione fiat, an alvus recte respondeat, an interior cum siti non percipiatur sensus, an non spiritus male oleat. Si porro ructus ut plurimum acidi, nidorosos sequentes oriuntur & flatus iique sonori observante Hippocrate prodeunt præsertim in alvi fluxionibus, coctionis redituræ prodromi, non quod acidum sec. nat. in ventriculo hæreat, sed quod acidæ cruditates, a morbo in ventriculo relictæ sint, atque ventriculi & intestinorum tonus eorumque motus peristalticus restituatur, ita ut vaporans materia elidatur vi & cum strepitu erumpat, sicque digestio antea destructa quantantenus instauretur, licet debilis adhuc, interim tamen melior ea est quam nulla, ut innuit EBENSINA *Lib. I. F. XVI. Tr. I. Cap. II.* inquires: *Significat vivicationem caliditatis facientis evaporare vaporem quendam licet non sit completa.* Singularis plane ejusmodi prodromus fuit, quem adducit PECHLINVS *Obs. L. II.* oris nempe foetor. Rursum si excreta alvi & vesicæ non multum a naturali statu quoad consistentiam & tincturam recedunt & ordinate dejiciuntur si signa critica alia se produnt, si salivæ fluxus uberius se manifestat, si ulcuscula labia & efflorescentiæ pedes, occupant, si mictio cum ardoris sensu contingit, acrium humorum exonerationem significans, sique lotium mox in varias partes secedit atque maxime turbida apparet in quibusvis præcipue febribus, aliisque morbis, ut calculo, arthritide, cachexia & similibus, quod quidem in sanis cæteroquin chylicationem turbatam esse indicat. Si biliosus copiosus sat alvi fluxus erumpit &c. si diaphoresin calidam sudoresque sufficientes eosque non interruptos & acidum spirantes, rigor quidam præcedit & comitatur, utpote qui ab irritatione humorum acrium ad circumferentiam ductorum procedit. Quando hypochondria ad contactum non doleant, & mollia æqualiaque deprehendantur. Quandoque lassitudo cum signis coctionis ut ajunt præcipue in declinatione morborum evenit. Porro si impatientes magis fiunt atque alia ratione morum mutationem, animi constantiam beneque sperantem ostendunt; e contrario quando sedationis solito & negligentioris atque obliviosi animi deprehenduntur, exitium hariolari licet. Nec non primarium locum inter ea laudabilia signa placidus æqualis & reficiens somnus decubitu in utrumque latus, cruribus ac pedibus modice reflexis, obtinet, & quod primo in loco adducendum fuisset, si sensationes integræ & pulsus melior æqualis vegetior ac major est. Inter rariora nobis sunt delirium & sopor, quæ L. MERCATVS *L. VII. de febr.*

febr. malign. C. II. maxima habet. Hæc pauca signa generalia & ex multis quædam adduxisse sufficiat, longissimum enim hic esset, si per morborum series indicia ejusmodi recensere vellemus. Desumuntur vero plurima vel ab excrementis, vel a functionibus vel a corporis affectibus. Nec casus varios chirurgicos ideo attingamus atque ejusmodi momenta atque indicia afferamus; ex. gr. externa vi læsi ac vulnerati quando vulnera fanescere incipiunt, titillationem atque pruritum quendam in his partibus percipiunt, indicio, sive quod humores forte peccantes, circa has partes hærentes spissiores, huc usque facti, tenuiores iterum redditi, labia vulnerum tum intumescencia, acredine sua proritent; sive, quod partes carnosæ ad statum præternaturalem redactæ earumque tonus deperditus; postquam vero, vel nova caro succrescit atque pristinus sanus status restituitur, spiritus animales ordinario modo atque uberius influant ibidemque talem titillationem pruriginosam efficiant, siquidem & hæc nova caro non solum subtilior, verum etiam non adeo sensibilis videtur. Ejusmodi quoque est quando in convalescentibus ulceribus pus incipit laudabile gigni atque primum crassiusculum illud magis advertitur, donec perfecte coctum substantia & qualitate conspiciatur optimum &c.

§. VI. Jam scopus nobis sit, ut ostendamus, quæ in statu convalescentiæ factu sint necessaria, quæque huic conveniunt. Omnia vero quæ hic fieri possunt potissimum in eo consistunt, ut pristinus sanitatis gradus recuperetur, & ut præcaveatur, ne rursus in morbos incidant convalescentes quod partim præservatorio & quidem maxima ex parte, partim curatorio, obsolvitur scopo. Adeoque læsio quædam forte inducta sanetur relictæ vitæ & peccantes humores corrigantur, temperentur, & excernantur, atque præcaveatur, ne nova colluvies ingeratur, vires cito restituantur, tonus partium deperditus roboretur, ne admittant iterum affluxuras particulas materiæ peccantis, appetitus & ventriculi digestio alimentorum & distributio instaurentur, secretiones & excretiones juventur, somnus blandus procuretur, nutritio renovetur, novus & laudabilis sanguis conficiatur, ejusque blanda & nutritiva dulcedo & volatilitas motusque reparentur, humorumque aliorum necessariorum & utilium ad vitam & sanitatem generatio resarciatur, inprimis spirituum animalium in cerebro productio & per nervos influxus promoveatur tueaturque. Quæ profecto ut omnia rite peragantur, magnum opus, ac indefessos labores haud mediocremque prudentiam requirant.

§. VII. Ante omnia hoc præprimis monendum duximus: Reva-
lescentes huic statui in principio non nimium fidant, triumphum ut
ajunt, ante victoriam canant seu securitate & temerario animo, dubia pro
certis habeant tutosque se omni ex parte in portu quasi navigantes cen-
seant atque meminerint pejora semper insequi & parvas occasiones ma-
gnarum rerum causas existere: Quemadmodum enim candela extincta
& fumans adhuc facile iterum flammam concipit, ita & convalescenti-
bus sæpe imminent multa incommoda multique inexpectati eventus
atque morbus fugatus promte & minima sæpe data occasione revertere
aut alius huic succedere potest, qui tunc majorem noxam inferre atque
frequenter occidere solet: Quare non genio varia concupiscendo statim
indulgeant & Bacchanalia iterum visant & illecebris cupiditatum, in quas
convalescentes certi proni sunt, frenum sedulo injiciant victoque sic
morbo seipsos vincant, ne se ipsos lædant & per convalescentiam pe-
reant fortemque quorundam Triumphatorum subeant, qui a victoria,
per animi elationem fructus victoriæ perdunt omnes, sicuti enim vi-
ctoria ita & convalescentia certe amat curam. Hujus supinæ negligen-
tiæ noxæque exinde inductæ exemplum Præsidi occurrit in Juvene bo-
narum literarum studioso, qui a gravi perpeffo morbo convalescens
conterraneorum suorum aliquos, animi exhilarandi causa, secum cœna-
tuos invitavit, quo grato consortio, inopinato plus quam par erat, tam
esculentorum quam potulentorum assumsit; ast, nocentissimum ipso fuit
quod delectavit, nam altero mane præcox apoplexia sensum motumque
ademit quæ mox in sinistri lateris paralyfin terminata est, a qua tamen
aptis remediis adhibitis tandem iterum convaluit. Quare æque Medi-
corum præceptis obtemperent iisdemque promissa rite præstent, quæ
tamen salutaris monitio a paucissimis, hodie apud nos curæ cordique
habetur, secundum illud dictum ANDR. GART. *Proverb. dict.*

Maximus in morbis medico promittitur orbis:

Mox fugit e mente, benè medicus morbo fugiente.

ac præter alia cum cura maxime quæ diætam spectant observanda præ-
fertim a medicamentorum proficuum huc usque propinatorum usu
non statim penitus desistant, sed ea per aliquod interdum temporis
spatium adhuc continuent, speciatim quoad salivationem, mercurio
dulci nimirum semel adhuc in septimana exhibito &c. eorum dosi pro
ratione virium aliarumque circumstantiarum ordinanda, vitatis specia-
tim calidis validisque resolventibus, massam sanguineam salium nimia
asperitate, periculose afficientibus maxime post morbos chronicos, per-

tina-

tinaciores & longiores, ut eo magis confirmetur coepta iterum salus & morbi semina, sæpe diu latentia exstirpentur penitus. Sic Celeb. HERM. BOERHAAVE in *Aph. de C. & Cur. morb. p. m. 377. §. 1477.* præcipit ut pro curanda ex assè lue venerea, posteaquam æger per XXXVI. dies salivatione mercuriali usus fuerit, levem subinde dosin mercurialem, per alios XXXVI. dies assumat, ut levissimæ sputationis maneat vestigium. Abhorrent equidem convalescentes medicationes ejusmodi, satietate & fastidio medicamentorum pertesi, siquidem ut in proverbio habetur: ægrotanti omnia amara & forte per aliquod temporis spatium iisdem abalienati atque superfluas eas respuunt, quæ tamen ut a convalescentibus male spernuntur, ita a medicis sive parum prospicientibus sive adulantibus, pessime negliguntur. Igitur non statim, vix interjecto uno alterove die in publicum prodeant insuperque tum, corpora, tum animos sensim sensimque negotiis applicent atque vitæ genus & consuetudines non subito mutant, nihilque inordinate agant, secundum CELSI monitum *Lib. IV. C. ult.* Periculose is etiam, qui ex toto convalescit, vitæ genus subito mutabit & inordinate aget: Sed paulatim debebit haud missis legibus eo transire, ut arbitrio suo vivat. Hac enim cautela neglecta spiritus vix eluctantes collectique denuo gravius affliguntur, dissipantur, ac vires proin, si intensius ad labores adigantur novum patientur dispendium. Diu hac ratione præteriti morbi meminisse multum juvabit.

§. VIII. Quoniam non solum addendo & roborando, sed etiam expellendo & evacuando naturæ succurrendum est, simulque & naturæ triumphantis aut triumphatæ argumenta firma & constantia tenenda, insuperque morbi speciem, partem affectam, humorum motum & quietem, facultatum robur aliaque similia perpendenda, atque quæ in morbis non relinquenda, relinquuntur, varia mala post se trahere atque recidivas maxime facere consueverunt. Itaque si materia peccans aliqua relicta est & gliscit in convalescentibus aut in illorum visceribus aut massa sanguinea &c. sive ea sit, quæ morbum produxit, sive ea quæ durante eo congenita aut finito ob languidam digestionem sive quæ per concitiores motus morbosos, quales in omni febre præsto sunt, elaborata atque collecta, quæ novam materiam novumque morborum fomitem ex mora deteriore evadentem, producere & in priorem locum affectum aut alium eoque aut alio ordine, ruere, & massam sanguineam & spiritus animales varie afficere & colliquefacere &c. potest. Si alimenta nimia in quantitate, quam quæ ventriculus debilis digerere possit, assumpta ac in

ejus cavitare hærent, aliquot diebus a finito morbo interjectis ac priusquam nimirum renutritio, refectio atque confortatio plenior adornetur sique ea forte non sufficienter, motu naturæ spontaneo, vel medicamentorum ope, jam evacuata fuerit; ne major debilitas aut etiam morbi chronici inducantur partim remedia huc usque usurpata ad destruendam illam adhuc continentur, partim ipsa materia morbifica, quoniam natura debilitata, a præcedente morbo subigere & ejicere non satis potens est, corrigatur atque expellatur, ne hostis latens & domesticus simul nutriatur & confortetur. Hinc etiam contingit, ut omnes fere convalescentes, propter pravorum humorum reliquias, male se habentes, circa convalescentiæ initium, largiorem cibum capientes, non proficiant, sed imbecilles maneant progressu temporis cibum vix appetant, ob pravorum humorum reliquias, quæ assumpta corrumpunt, unde pravi humorum subinde cumulantur, ut digestio ventriculi & præsertim appetitus ipse assumendi cibos pereat. Verum qui a cibo abhorrent, postea bene appetunt bene comedunt, bene digerunt beneque reficiuntur, quoniam parum appetentes, non plus quam vires conficere queant, assumant, ideoque minus gravati vires quotidie auctæ, morbi reliquias prorsus dissipant, iisque dissipatis, probe iterum appetant & comedant, integreque reficiuntur. Hinc etiam ratio reddenda, cur HIPPOCRATES II. Aph. 32. in convalescentibus anteponat cibi fastidium appetentiæ, quod equidem paradoxum forte quibusdam videtur. Frequenter etiam contingit, ut in convalescentibus, bene passis sudor multus nocturno tempore erumpat, de quo. Idem docet IV. Aphor. 41. quod sudor multus ex somno factus, qui ventriculo oneri est absque causa manifesta, corpus uberiori alimento quam par est, uti significatur. Hujus ordinaria & communia signa sunt, si post convalescentiam appetitus non redeat si dolor ventriculi gravativus molestat aut cibi assumpti nihil proficiant & reficiant, si siccitas oris, agrypnia, nausea & languor sitis molestant, si hypochondria tendantur, si facies livida & tumida maneat. Hinc AETIVS imprimis laudandus, qui post perpeffos morbos convalescentes melanagogis purgare solitus est: Nec ipsi HIPPOCRATI alia æstimatio & intentio fuit, quando scribit Sect. II. Aphor. XII. *quæ in morbis post crisin relinquuntur, recidivas faciunt* & Aphor. XXXII. Sect. IV. *Quibus a morbo restitutis quippiam est infirmum ibi abscessus fiunt*, explicationem optime HEVRNIUS in Com. habet *quando post morbum infirmitatis aliquid superest, quæ ex lassitudine & imperfecta crisi indicatur, ita ut supersint materiæ febrilis reliquiae, aut si liberalius se potu & cibo ingurgitent,*
quam

quam immutata ventriculi actio temperamentum & habitus perferre possunt, tunc in discrimen venit homo, quia partes, internæ & externæ labefactatæ sunt hinc, si non accurata dieta accesserit, hepatis & lienis scirrhi, vel cephalæ, vel foras in artus, si ibi imbecillitas, abscessus effunduntur. Quare, ne quid coarvetur, dentur pilulæ aleophanginæ mastichinæ, vel Rusti, vel tale quid: Ille rursus L. VIII. si quis a morbo cibum capiens non confirmatur, pleniore id arguit corpus nutritu uti. Quod si nec capienti idem contingat, vacuatione tum opus esse certe habendum. Coincidit sequens tritum illud ex Aph. X. Corpora impura quo plus alimenti assumant, eo pluribus damnis anguntur. MATH. MARTINI de Morb. mesent. p. 110. præcipit, ut variis morbis, ut tensionibus, fibriculis convalescentibus familiaribus occurratur, leni pharmaco alvus sollicitatur. Porro ex recentioribus hac de re scribentibus. H. ab HEER Obs. M. R. p. 82. JOH. FREINDIUM Anglum nominasse sufficiat in Com. in Hippocrat. de morb. popular. L. I. & III. qui hanc rem & aliorum assensu FREVVINI, LEVETTI, CADEI, MEADI, GIBBONSII, confirmat. Si & a nimia forte & præcoci ciborum abundantia, morbi iterum caput erigant, lenibus evacuantibus curatio instituenda, in hoc errant practicum multi, quod in hoc rerum statu alvum stimulantia exhibere metuant, ne vires exhauriantur. Hanc repurgationem maxime post morbos longos, rebelles atque contumaces, febres omnis generis atque inprimis post variolos atque morbillos, necessariam ac utilem censemus, quoniam ea neglecta multis aliis morbis, præcipue lentis, hecticis ac putridis febribus; pulmonum aliorumque viscerum exulcerationibus atque abscessibus, catarrhis suffocativis, affectibus oculorum, contracturis &c. ansam dant uberrimam. Hic notanda & ad ulteriorem usum revocanda doctrina & solertia eminentis SYDENHAMII observatio est, qua indicat, post febres autumnales, quo tempore humores viscidiores sunt, quam post vernaes, purgationem magis necessariam esse. Leniter & per epicrasin magis quam simul & semel, si tempus ferat, fert autem id ut plurimum, evacuanda materia peccans atque videndum, quid res poscat, & quid factu sit necessarium. Vires ut ubique ac semper ita hic maxime sunt attendendæ, quia gravis in paucitate jactura est, videndumque an ferant hanc evacuationem convalescentes, & qualem ferant atque ne morbi prægressi iterum per eam purgationem repetant, quod in febribus tertianis atque quartanis præsertim accidit maxime præpostera medicatione suppressis ac si in die quondam paroxysmi solenni purgatio instituitur. Huic purgationi inserviant habito delectu quo balsamica, acori ac corruptioni

resistentia eligantur atque habita ratione humorum educendorum, folia fennæ, tamarindi, manna, passulæ MP. de ammoniaco de succino, pilulæ mastichinæ tartareæ alephangin. Avicennæ, Ruffi, Becherianæ, Stahlianæ, Hoffmannianæ, quæ leniter evacuant pariter atque confortant, vel ejusmodi polychrestæ componendæ, ex extractis temperantibus & laxantibus, roborantibus, balsamicis, gummatibus, resinosis, ut ex extractis absinth. cardui benedicti fumaris gentianæ centaurii minoris fibris helleb. nigri rad. cichorii gumm. ammoniac. flor. benz. opobals. mastiche gummi hederæ, ordinentur. Pulveres, ex rhabarbaro cremore tartari arcano duplicato terra foliata tartari crySTALLIS tart. tartaro vitriolato ut & liqu. terræ foliat. tartari, violarum, rosarum, de cichorio cum rhabarb. syrupi, infusa laxantia & vinata talia medicata; nec non clysteres ex emollientibus abstergentibus & laxantibus compositi admodum e re erunt. Quoniam vero a purgantibus in infirmis ejusmodi, præcipue hyemali tempore ut notanter GALENVS monet *V. de tu. sanit. 9.* sequentibus diebus alvus adstringitur, hoc incommodum provide avertatur per mollia, oleosa, butyro recenti, decocto malvæ mercurialis h. & similia consuetam alvi dejectionem juvantia. Si forte vitiosi humores, biliosi, pancreatici, in ventriculo subsistunt, aut ad eum confluent, si & a nimia aut præcoci ciborum ingurgitatione, quod frequenter accidere solet, aut morbi iterum caput erigere incipiunt; aut cardialgia, tumores crurum œdematosi, sudores nimii aliaque mala insequuntur, sique febres intermittentes male curatæ fuerunt aut constringentibus præpostere tractatæ, mitis ac lenis, ex radice Ipecacuannhæ, fuscæ & nodosæ, unico saltem grano tartari emetici acuato, aut additis aliquot. gr. arcani duplicati aut Sirupo & Salæ emetico. Vomitus procurandus erit. Alia evacuantia paulo fortiora forsitan præsertim mercurialia, salia vitriolica, utpote quæ & infirmis, succis impuris abundantibus, senibus, infantibus, gravi animi motu & immodicis excretionibus debilitatis, nunquam conducunt, non sunt adhibenda, quia per quævis ejusmodi subinde contextus ventriculi & intestinorum præter modum læditur & corrumpitur atque spiritus & humores alii laudabiles simul proscribuntur. Si ullo in morbo, certe in variolis & morbillis, in quibus universa lymphæ inquinata est corrupta, corrosiva atque vappida, morborum reliquæ expellendæ. Juxta hæc morborum genus febres intermittentes & puerperium ponamus; quando enim, consideramus, quanta colluvies impurorum humorum per gravidationis tempus atque in ipso puerperio gignatur & colligatur, certe confirmamur,

mur, repurgationem hic esse admodum necessariam ac utilem, qua multa mala speciatiim, purpuræ concinne, præcaventur. Ab hac evacuatione provide ventriculum roborantia mox subjungantur. Dehinc ubi copiosum serum est imminuendum, diaphoretica & sudorifera laudanda veniunt, quibus transpirabilia corpora semper ferventur ut sensim sensimque corpus ejusque humores repurgentur atque sordibus, quæ forte restant, liberentur, feri vitiosi a sanguine separationem facilitando; illud fluxile reddendo, motumque blandum, novum sanguini inducendo &c. quos non solum scybala alvi in intestinis; sed & vitiosi humores in ventriculo & primis viis generati vel etiam aliunde isthinc transmissi indicant. Quo medio a plurimis, quæ alias subsequi solent malis erunt tutiores, inprimis variolos & febres intermittentes passi, quoniam febrium medela sine sufficiente transpiratione etiam sensibili & sudatione vix tuta esse solet, sed recidivis obnoxia. Convenient vero mitiora ex cornu cervi lap. cancr. matre perlarum antimonio diaphoretico bezoardico minerali, salibus quibusdam absinthii, cardui benedicti ut & volatilibus, mixtura simplici & similibus atque euporistis illis, rob. sambuci juniperi &c. cum infusis theiformibus, sanguinem mundificantibus decoctisque radicum scorzonerae, sassaparillae, cichorei, liquiritiae seminis foeniculi &c. Cum vero hæcce interna, externa quoque impellentia fere exposcant, ambiens calor auctior simul procuretur corpusque bene tegatur, ut pori magis aperiantur & humores fluxiliores reddantur. Et quoniam sæpius convalescentibus per longum interdum temporis spatium sudores spontanei eveniunt, ad euphoriam, hi sedulo permittantur. Nec omittenda hic diuretica blanda, temperata, aquosa, mucilaginosæ, salina, terreo salina quæ præ aliis evacuantibus hoc habent peculiare atque laudabile, quod agant sine notabili virium dejectione, sanguinemque purificent eximie, ab acris humoribus: Talia sint tartarea inprimis & nitrata, ut tartarus vitriolatus arcanum duplicatum nitrum antimoniatum tinctura antimonii acr. tr. sulphuris spiritus salis & vitrioli dulces, terebinthina, radix ari, pimpinellæ albæ vincetox. baccæ juniperi alkekengi, millepedes, lumbrici terrestres cum aquis destillatis florum genistæ. Sequens decoctum diureticum nobis frequentis usus est: Rec. Rad. V. aperient. q. s. infunde per hor. XII. in f. q. acet. exprim. & express. bulliant in jure vitulin. vel gallinac. adde rad. gram. pentaphyll. liquirit. fol. capill. veneris, agrimon. rubiæ, sem. coriandr. anis. milii solis aa. q. s. f. f. a. decoct. dos. ad ℥v. vj. &c. Poterit vigorari troch. de eupatorio ad ℥j. vel ℥vi. decocto add. spiritus vitriol, gtt. IV. V.

Inter cibos in hunc scopum assumantur, petroselinum ejusque radix apium, asparagus pastinaca, lupulus, limonia, aurantia. Hic monere placet, ut in commovendis mensibus, qui in convalescentibus foeminis non raro deficiunt, emmenagaga vulgaria, acria, sulphurea & fortiter stimulantia circumspicte praescribantur, quoniam ea ubi sanguinis & succorum benignorum est defectus merito suspecta censentur, quare is potius reparandus venit.

§. IX. Inertes atque effoetas, crassas, lentas, viscidas atque tenaces, panderosiores, partes, quæ remanserunt, (remanent autem ut plurimum non sufficienter motu naturæ spontaneo vel medicamentorum ope evacuatæ) aut per calorem forte nimium particulas subtiles aquosas mucum diluentes & dissolventes dissipantem introductas & quæ morbus lentos vel produxerunt vel producere possunt ut scrophulas, hydropes, tumores, asthma variasque viscerum obstructions, resolvunt, attenuant commode, easque ad educationem præparant, quæ digestiva vocantur, ut elix. P. P. & cum & sine acido, arcan. tart. tartar. vitriolat. terr. foliat. tartar. ejusque liquor, tartarus tartarificatus, sal polychrestum solutio oculor. cancrorum rad. ari, tinct. tartari spiritus tartari volatilis, sal ammoniacum acidula, ad quæ revalescentes præ aliis feruntur ut supra est indicatum, quæ non modo viscidum incidunt, sed & ventriculum ejusque lympham excitant, atque movent appetitum, sanguinem temperant ac blande refrigerant Biliosos vero forte relictos corrigunt humores jam laudata acidula, vitriolata, nitrosa, spirit. nitr. dulc. &c. Ex præcipitantibus præfertur crySTALLUS montana sæpius calcinata elix. P. P. cum acido: Nam biliosæ partes sub morborum quorundam ut febrium ardentium, biliosarum, tertianarum, hecticarum decursu atque earum paroxysmis elaborantur, mediante motu intestino intensiori justo concitato maxime humorum partibus inter se, iisque attenuatis multoque divisis; hinc ingens quantitas in dies fere excrementa acria, foetentia, salino-sulphurea, per sputum, sudorem, vomitum, urinam & alvum excernuntur, quæ de novo semper ex motu intestino adaucto generantur; & si v. g. in febribus tertianis longiore ardore stipatis, medicamentis appropriatis paroxysmi febriles sistuntur, per aliquot dies cessant quoque excretiones illæ copiosæ, salino-sulphuræ, & si recidiva accedit, iterum tales excernuntur. Observavit hoc exacte LINDANVS, *Select. Med. p. 71.* dicens: *Mirabile est, quod copiosissima bilis nonnunquam evacuetur, nec tamen post obitum vesicula fellea vacua inveniatur: Quare nullum est dubium, sanguinem ab æstu inflammatorio exuri in bilem.* Acidorum acri-

acrimoniam temperant & obtundunt, invertunt & diluunt alkalia, oleum tartar. per-deliqu. &c. decocta lignor. mucilaginosæ ex herbis & radicibus & feminibus malvæ althææ feminibus cydoniorum parata, oleosa, oleum amygdalarum dulcium emulsiones feminum frigidorum ex liquiritia & polypodio parata medicamenta, atque absorbentia, terrea, salina, cornu cervi ustum atque raspatum unicornu fossile lapides cancerum mandibulæ lucii piscis & similia. Ad intemperiem, ut vocant, sanguinis falsam, seu serum sanguinis præternaturaliter falsum, ad statum naturalem reducendum insipida aquosa, diluentia, magis, alimenta temperata tamen & modice nutrientia eligenda. Hæc humorum pravorum relictorum alteratio sæpe æque utilis & necessaria est quam purgatio. Idcirco dolebat HIPPOCRATES II. Aph. 31. inquiens: *Si a morbo quis convalescens cibum bene appetens in sufficiente quantitate sumat, neque tamen roborari neque vires refici observet, signum malum est; nam recidivæ prænuntium, & occultæ pravitatis humorum, indicium esse consuevit.* Etenim quando convalescens bene appetit non tamen reficitur, signum est stomachum quidem recte se habere, & pravyos humores in vasis hinc inde latere, alimenta, liquores, succum nutritium corrumpentes ex quo corpus magis gracilescit, vires labascunt membrorum omnium actiones segniores fiunt, inde ad tabem, cachexiam & alia mala ducuntur, tuncque juxta modo indicatam alterationem, optimam convenit victus rationem attemperantem instituere, secretiones & excretiones promovere atque ea propter aptis corporis exercitiis, somno, quiete, inventionibus &c. uti.

§. X. Quoniam & partes solidæ sub morborum vehementium & chronicorum præsertim decursu ob partium nervoso musculosarum præsertim spasmus maxime sunt debilitatæ atque de tono eorum dein dejectæ tonica ac roborantia omnino præ aliis requiruntur, quæ ubique post morbos celeberrimi Practici S. PAVLI, CRATO, IAC. FABRICIVS, B. RIVINVS commendant ac instar arcanum deprædicant, quæ & simul impediunt ne nova colluvies vitiosorum humorum generetur, ut optime GALENVS Com. 4. aphor. 45. & AETIVS XII. Cap. VII. demonstrant. Atque quoniam virium postea languor qui maxime a spirituum animalium penuria, lentore motuque intercepto pendet primarium vitium est ex quo alimentorum digestio, motus & circulatio sanguinis & humorum & cum eo excretiones debitæ segniores, unde non debito modo aut tempore repurgatio instituitur verbo omnes in corpore functiones impeditiores fiunt, & exinde obstructions & infarctus in emunctoriis corporis exsultant, atque deinceps impuritas humorum, tantorum malorum
fons

fons atque origo increbrescit hinc & convalescentes multis morbis red-
 duntur obnoxii; viribus verò restitutis reliqua feliciter succedunt: nam
 virium, vitalitatem immediate præstantium, maxima dignitas est, cum vi-
 vere ipsum, nobis, ex harum custodia contingat, acut GALENVS. in ali-
 quo loco loquitur, *has servare & augere, est vitam servare & augere*; igitur
 primaria quoque jam intentio sit, ut vires non modo servantur paucae
 & debiles superstites, sed & pristinae restituantur, atque ad integrum
 modum redigantur, unde hæc indicatio vitalis & Sylvio conservatoria
 audit, atque ea medicinæ pars, analeptica vocatur, atque potissimum ad
 convalescentes spectat, vid. GALENVS *de Constit. Art. Med. Cap. XX.* quæ
 anatrepticam sub se comprehendit. Juxta enim HIPPOCRATEM *de*
Flat. t. 3. Medicina est appositio eorum quæ deficiunt, & ablatio eo-
 rum quæ abundant: Si enim hæ (vires) ubique & in toto curationis
 cursu sunt attendendæ, secundum notissimum illud axioma: *quod secun-*
dam naturam est, illud conservandum, utpote, quæ multa permittunt, mul-
 ta vero prohibent, certe in hoc statu etiam sunt considerandæ, custo-
 diendæ atque augendæ: Siquidem & hoc ratum habemus, liberalitatem
 in reficiendo & parcitatem in laxando, medicum a calumniis liberum
 reddere. Vires vero dependent tam a spirituum animalium ac sangui-
 nis seu motus vitalis vigore ac crasi integro, quam solidarum partium
 textura, seu tono non deperdito, non laxiori neque rigidiori justo, sed
 adæquato, atque concipimus, eas vitales ac animales non tantum toti
 corpori communes, sed & huic vel illi parti proprias atque particulares
 v. gr. renibus ventriculo, intestinis. Ad hunc scopum exequendum
 bene multa remedia pharmaceutica commendare medici solent, sub titu-
 lo balsamicorum, cephalicorum, cordialium, nervinorum, roborantium,
 analepticorum, quæ nimirum tam partium solidarum, principum, relaxa-
 tum tonum emendant, i. e. fibrarum languidos motus resuscitant, & fir-
 mant atque confortant, quam spirituum & sanguinis systasin tuentur,
 ut neque ad coagulationem, fusionem, resolutionem ac ichorescentiam
 declinent atque spiritualcentiam fluidarum adjuvant motum massæ san-
 guineæ promovendo, quæ jugiter mota, spiritus propellit ac efficit ut
 descendant in nervos simulque attemperant, diluunt, humectant digestio-
 nem, distributionem & appositionem alimonie, bonam & laudabilem
 instaurant, & balsamum, ut ajunt, sanguini a nimia ebullitione vappido
 reddito a morbis & febribus præsertim exanthematicis, variolis, mor-
 billis, purpura & similibus, restitunt. Cui finis blande adstringentia, bal-
 samica, aromatica, spirituosæ, salia volatilia oleosa præsertim inserviunt,
 quæ

quæ analogiam quandam atque convenientiam cum spiritibus nostris animalibus. quoad subtilitatem forte & puritatem, activitatem vimque impellendi, fluiditatem ut aëre & igne, habere dicuntur, æquant vel antecellunt quæque facile cum iis uniri queunt. In horum confortantium & analepticorum medicamentorum, in quibus vis ejusmodi aqueo sulphurea præcipua est, numero admodum prolixo, sequentia modo sufficiant: ambra & ejus essentia, essentiæ & aquæ spirituosæ, ut chærefolii melissæ citratæ pimpinellæ, ocymi, salviæ, borraginis, buglossæ, tinctura coralliorum c. spiritu cordis cervi balsami peruviani, elix. & balsam. vitæ Hoffmann. spiritus rosarum liliorum convall. jasmini, tuberof. aqua magnanimitatis. Herculis Saxon. essentia cascarilla, millefolæ, imperatoriæ oleum de cedro, rosarum aqua cinamomi cydoniata ejusque quinta essentia, cum oleo & pulvere, de quibus Veteres dicebant: miror quod moriatur homo, qui utitur cinamomo, referente MATTHIOLO in *Herbar.* Ejusmodi est, pulvis solaris Cellensis, in quo, præcipuum oleum cinamomi in elæosaccharum redactum, item aqua namp hæ, atque, in quibus summa latitant naturæ arcana, macra & salia volatilia oleosa Sylvii præsertim, item castoreata, succinata, confectio alkermes completa & incompleta, medicamenta, ex radicibus calami aromatici, enulæ, corticibus citri, roremarino, croco, aniso, vario modo parata & adhibita, emulsiones amygdalarum dulcium, seminum aquilegiæ, citri, cardui benedicti &c. cum aquis borraginis, buglossæ, melissæ paratæ. Anglis præsertim huic scopo & pro humorum colliquatione avertenda cortex Peruvianus frequenti usu, inservit. Ex exoticis & pretiosioribus, Sinensium radix Ninsi sive Gensing, ex Corea Provincia, ad nos delata, remedium ad vitam & sanitatem prolongandam & diu conservandam sine pari habitum, mirifice confortat convalescentes; solvitur ea in aqua calida, quantitate ℥j. ad ℥ij. & instar theæ jejuno quidem stomacho bibitur & per aliquot ab assumptione horas ab omni cibo potuque abstinetur. Sed nota, ut nunquam fortiter hoc in statu, in quo nimirum vires deficient commovendum & ita etiam parce acria volatilia, calida atque valentia nimis ac generosiora medicamenta propinentur; caute certe cum iis mercandum, imprimis in siccioribus subjectis & ubi humores nimium sunt resoluti, quia alias p. nat. & auctum nimis motum humorum, & vigilias involuntarias in hoc statu maxime nocivas inducunt, partes subtiliores nimis spirituosas dissipant videndumque, ne hostis latens & domesticus iisdem confortetur, siquidem nunquam sola facile confortantia neglecta causa, sunt præscribenda &c. Viperina, nempe ex carne (viperarum)

rarum) cum corde, hepate felleque desumpta, in pulvere, decocto & vino usurpata, cum præstantissimis instaurantibus & spirituascentiam sive blandam sanguinis & humorum resolutionem inducentibus, ob sal volatile oleosum subtile subtilique mucilagine maritatum, conferenda censemus. Illorum sal volatile in omni debilitate virium extollit BECHER. in *Phys. subter.* p. 79. inquiens: *Vos Protomedici, pro Patronis vestris diviti- bus, in longa vita, vobis in amplo salario diu conservandis, alio nullo utamini re- staurativo, quam sale volatili viperarum in ambra spiritu soluto.* Angli, Gal- li & Belgæ convalescentibus, robur partibus solidis, bonam sanguinis crasin, eidemque energiam futuramque colliquationem impredientem, corticem peruvianum egregie conciliare, autumant. His adhuc bonam martis essentiam addamus. Nos quandoque affolemus, oleum expressum recens amygdalarum dulcium atque anisum calido vino incoctum cum radice tormentillæ, cum conserva roris marini, item semen erucæ cum vino quandoque & castoreum, pro attritis viribus & blanda nutritio- ne, ut euporiston commendare. Alia quæ vires præ aliis refocillare di- cuntur, pretiosiora medicamenta, ut multa ex auro petita & ex præpa- ratis & resolutis margaritis, lapid. bezoar, smaragdo, hyacintho aliisque gemmis confecta, non semper præstant id, quod debent præstare, i. e. vires reficere, certum autem, quod fœnore marsupium exhauriant. His jungenda stomachica proprie sic dicta, quæ nimirum stomachi vim acu- unt ac intestina corroborant, & balsamica &c. amara, ex absynth. cen- taur. min. &c. in essentiis, extractis, decoctis, & inprimis myrrhata, quæ balsamum sanguini optime restitunt, cydoniata, mastichina, ex mentha, radice ari, zingib. zedoar. galanga aliisque aromaticis parata, & ex his composita, ut pulvis stomachic. Birckmanni. Nec ex hac classe acida, ad quæ revalescentes per ipsum Naturæ ductum feruntur, eximenda, quæ viscidum a morbo relictum incidere ventriculumque ejusque lym- pham excitare, sanguinem temperare ac blande refrigerare possunt. &c. Verum hic non possumus non quorundam incautorum practico- rum errorem notare, qui nimis cito etiam nauseabundis infelicem ven- triculum sæpe irritata fame fatigant atque appetentiam, usu elixiriorum stomachicorum aromaticorum, acriorum præsertim eorum, quæ spiritus mineralis acidus ingreditur, vel olei illius stomachici, apud Lipsienses admodum noti, (*das Freß-Oehl*) excitare contendunt & saturatis esuriem querunt, quo efficiunt, vim appetitui faciendo, ut convalescentes plus ingerant, quam quod digerere & egerere ob debilitatas has functiones valeant unde tardius & difficilius recuperantur amissæ vires, cruditates cumu-

cumulantur, multæ molestiæ creantur, recidivæ sæpius accersuntur atque lenti morbi deinceps inducuntur. Hi, in hanc rem, notabili effato, HIPPOCRATIS, audientes deberent esse: *II. Aphor. 32. Convalescentes ut plurimum circa principia appetentes ac bene comedentes; nihil vero proficientes, tandem inappetentes fiunt; qui vero circa initia convalescentiæ cibum non appetunt sed in progressu solummodo appetunt, hi melius liberantur: idque accidit, ob pravorum forte humorum reliquias, quæ ea, quæ assumuntur, corrumpunt, unde tanta deinceps eorum copia generatur functionesque ventriculi minuuntur.* Sequantur & sanguinem purificantia, præsertim a variolis, purpura & similibus morbis, ex decoctis præsertim & antimonialibus, ut tinctura antimonii acris &c. Acrimoniam temperantia & absorbentia sæpius necessaria quoque sunt, ut scite explicat SOLENANDER in *Consil. p. 247.* Quoad restitutionem humorum amissorum, ut spirituum, sanguinis, lymphæ etiam practici post choleram, amara, oleosa, sulphurea aliaque, quæ bilem (a cuius defectu aut inertia virium etiam vitalium aliquando dispendium est) gignere possunt, per aliquod tempus usurpanda proponunt &c. De reliquo abstinendum, ab omnibus stupefacientibus, sedativis, anodynis, opiatibus & quæcunque, moderatos motus, compescere solent. Quamvis & hæc in certis quibusdam casibus locum invenire possint, nimirum ubi activæ magis subsistunt partes atque orgasmus spirituum adhuc subest, v. g. a tussi ferina, diarrhœa magno dolore similive in casu tuncque & aut venæ sectio aut scarificatio inveniunt locum, quæ sanguinis ventilatio, huic quoque fini inservit, ne tales affectus obolescant & insolescant nisi forte tumores cedematosi obsistant. Absint quoque intemperata falsa, acria, acida, coagulum fluidis inferentia, & quæ acrimoniam augent atque exaltant, ut & quæ humores increassant nec non largior sanguinis, in quo vis & robur solidorum vitale positum est, detractio.

§. XI. Internis jungenda quoque externa, quæ tam ventriculi digestionem, quam virium restaurationem adjuvant, præsertim si ventriculus valde debilis est, & post assumptos cibos dolores in ventriculi regione percipiuntur. Illa regioni ventriculi, sub forma linimentorum, unguentorum, epithematum, fomentationum, & emplastrorum, scutorum stomachalium, sacculorum, maxime ante cibum applicantur, ut oleum destil. menthæ, serpilli, macis, aliisque expressis, ut nucis moschatæ ex speciebus cordialibus temperantibus, floribus, rosarum, borraginis, buglossi, corticibus citri, rasura ligni, Rhodii, aloës, herbis melissæ, &c. cum camphora, balsamo vitæ, peruviano nigro, emplastrum de crusta panis, de mastiche, de tacamahaca & similia ut R. Empl. de crusta panis ʒjss. ma-

stich. benz. aa. ℥ij. oleum destil. menthæ caryoph. aa. gt. xxx. M. F. E. Quidam in hunc usum impositionem manus calidæ suadent, ut FRANC. IOEL *Lib. IV. Pract. Sect. II. p. 310.* pro præstantissimo remedio stomachico habet, calorem insitum pueri carnosî, vel conjugis incumbentis. Eundem in modum alii catellos juniores ventriculo admoveere jubent. Immo hæc externa, aliis quoque variis subinde partibus externis, illinitione præsertim ut, vinum rorismarini, quod vel solum ut præstantissimum sufficere posset admoveantur. Atque, quoniam quo citius ad vitalia datur accessus, eo facilius fit refectio & supplementum deficientis, odorifera immediatum & citissimum habent cum spiritibus animalibus contactum; Hinc HIPPOCRATES *Lib. πειρ, τρε Φης* scribit: *qui velocissimam nutritionem requirunt, per odores sunt reficiendi.* Ejusmodi sunt, odores & vapores excitati suaveolenti, non nimis tamen crassi & perturbantes, per quos facilius corpus reficitur, secundum GALENUM, qui mediantibus processibus maxime mammillaribus, & pari nervorum, olfactorio, ab antica parte corporum striatorum exoriente & per ossis cribrosi foramina fibrillas suas, ad nares spargente, spiritibus animalibus communicant suam virtutem, animi deliquium quoque fugantem. Convenientia ejusmodi auxilia erunt, odor vini generosioris atque suaveolentis (quo solo vitam prorogari nonnulli memoriæ prodiderunt) cum illius in ore aliquandiu retentione, panis calentis vel assati, vino odoro vel aqua rosarum macerati, item mellis, de quibus fertur Democritum Philos. jamiam moriturum, per dies quatuor spiritum sustentasse. Simile FR. BAC DE VERVLAMIO de Nobili quodam in *Hist. Nat. Cent. X. p. 954.* commemorat, qui per quatuor & quinque dies jejunaret nec cibo nec potu gustato, sed herbarum esculentarum acrisque odoris uti solebat odore. In hunc finem varia quoque balsama, ambræ poma, sacculi noduli confortantes, item epithemata, unguenta &c. regioni cordis & carpi applicanda, prostant, vel præparari possunt. Angli ex commendatione BAC. DE VERVLAMIO vid. *Hist. Nat. Cent. X. p. 953.* glebæ terræ recenter erutæ & vino malvatico imbutæ odore, se recreare solent. Huc spectant pulveres naribus hauriendi, ex cephalicis, nervinis, fragrantibus compositi, ut pulvis sternutatorius cum castoreo admodum usualis, & similes plures, ut & ii qui capiti insperguntur, ex succino, benzoe, mastiche, floribus chamomillæ romanæ, caryophyllis aromaticis. Facies & manus cum vino & aquis destillatis odoriferis quoque lavari possunt. Lixivium pro lotionem capitis confortativa descriptum reperies apud B. ETTMULLER, in *T. I. Oper. p. 1317.* Si forte febricitantes
exci-

excipias, lotiones & ipsa balnea tepida, quæ Prisci secundum HIPPOCRATIS monitum *Lib. de Diata* in adeo frequentem, ut & fractas a laboribus vires repararent, usum duxerunt, & quæ ALEX. TRALLIANVS in hoc statu maxime laudat *Lib. XII. c. IV.* quoniam partes emolliunt & rarefaciunt, ac humores excrementitios in corporis ambitu hærentes discutunt, siccitatem emendant atque apprime removent oppillationes meatus claudentes, porosque aperiunt, per quos avolent fuligines atque sordes &c. Idcirco ea vel ex aqua dulci saltem, vel herbis, foliis & floribus, ex aromaticis & nervinis, ut serpillio, melissa, majorana, rore marino &c. & emollientibus mixtis, incoctis alterata, vel etiam ex thermis naturalibus parata, commendanda quoque veniunt: Siquidem Hirschbergenfes & juxta has Teplicenses quoque & Emsenses præ aliis laudandæ, quoniam totum corpus quod prius erat squalidum, molle ac humidum, reddunt simulque relaxatas inprimis partes restituunt, quare præsertim optimo adhibentur consilio etiam in ipsis pedibus tumefactis, a morbo relictis & similibus. Sed caveant, ne in balneo nimium fudent, ad quam sudationem proni sunt convalescentes, propter raritatem carnis suæ debilis, neque diutius continuant istud, ne quod liquatum est, discutiant viresque dissolvant atque alia incommoda ac pericula invehant. Angli, hodie, veterum sequentes vestigia, frigida potius suadent, quod tamen consilium paucis nostratium arridet. Multi laudant balnea lactis, affirmantque, particulas nutritias, per corporis poros, posse hauriri, quod assertum inprimis probant ex illo, quod in aqua sedentes non sitiant. Juxta balnea universalia, particularia non prætermittenda, ut pediluvia, quæ divertunt pariter & evacuant, simulque somnum blandum inducunt, &c. Laudandæ quoque simul inunctiones humectantes & modice calefacientes, quæ molliendo meatus parant viam ac aditum alimonix, ut facilius partes renutrirî possint. Suffimigia vero calida & crassa, quæ tamen nonnulli practicatorum præscribunt, pro morbis extenuatis, nollemus probare, quia metus subest, ne caput gravent simulque nimis exsiccent.

§. XII. Verum, cum vera ac constans virium restauratio medicamentis, quorum virtutes nullæ sunt alimentariæ quæque aliquo saltem modo alterant atque motum in fluidis & solidis concitant vix procuretur, revalescentes atque extenuati exsiccatique a morbis, ex cella penaria atque culina id est, ex alimentis esculentis & potulentis bonis gelatinosis & spirituosissimis assumtis in succum & sanguinem conversis quæ humiditatem debitam, robur & vires corporis animalis atque materiam spiri-

tuum animalium potissimum largiuntur rectius atque firmitus & non raro citius (nam in momento quasi interdum quando comedunt ac bibunt satiantur spiritus) quam ex pharmaco pæorum pyxidibus, lecythis phialisque reficiuntur & nutriuntur: quibus remediis optimis in novum quasi corpus redeunt, veteri per morbos amisso atque deposito ut serpentes detractis exuviis novam juventutem consequi vulgo dicuntur. Videmus enim in plurimis morbis febribus præsertim & convulsionibus magnam quidem vim & potentiam motricem cordi, arteriis & membranis nervolis inesse & tamen vires admodum languidas permanere. Ideo præ reliquis post debitam repurgationem talis penus bene adornetur. Auxilia vero ejusmodi omnia in mediocritate posita sint, quoniam usus in mediocritate, abusus in excessu, aut defectu rerum quæ administrantur consistunt atque cum iis non per saltum, quem natura ubique non amat, sed per gradus agatur eaque ubivis fervetur inter eam, quæ sanorum propria est & ægrotantium, ratio. Materia hæc refectionis quæ tam membra quam humores & spiritus animales respicit etiam media sit inter liquidum & solidum & quæ celerius excernitur, magis tamen adhuc liquida nutrientia in genere præferenda, ab initio refectionis & nutritionis; quoniam humorum laudabilium magnus adest defectus & calor debilis, qui non sufficit ad solida alimenta digerenda: Sequantur dein solida magis & sicciora, utpote quæ minus variis corruptionibus sunt subjecta, firmiorem dant alimoniam, robustiorem habitum vitamque longiorem præbent: Etenim citius liquidis naturæ nostræ magis congruis ac familiaribus (humido enim vivimus atque nutrimur) quam solidis, citius potu quam cibo digestio, chylicatio & transmutatio, distributio assimilatio atque appositio, nutritio ac restauratio ut & secretio & excretio fiunt & humorum & spirituum mutatio & alteratio, & quoniam laudabilium humorum post acutos æque ac chronicos, magnus adest defectus & digestio debilis, corporaque convalescentium exsiccata fere sunt. Hoc HIPPOCRAT. *L. de Alim.* insinuat. *Quicunque celeri appositione indigent, iis humidum ad reficiendas vires optimum est, facilius enim transmutatur quam siccum.* Atque illius victus ratio exacta habeatur diutius, quia tempus humectandi longius habetur, quam exsiccandi, maxime ab iis, qui a gravioribus & longioribus morbis sunt eluctati. Igitur sit & hic conveniens modus, ne meris scilicet jusculis liquidis infirmi reficiantur, quod optime CICERO intellexit, quando *XVI. Epist.* 6. scribit: Medicum male agere debili ventriculo liquida tantum afferre ac suadet ut panis cum jusculo assumatur. Quoniam ii frigidiores quoque

que sunt, calefaciens potius victus injungendus. Generalis & hæc regula teneatur in renutritione, in HIPPOCRATIS *Aphor. VII. L. I.* præscripta: Quæ longo tempore extenuata sunt corpora, lente reficere oportet, quæ vero brevi, celeriter, ne subito fiat in alterum mutatio, quæ ubique sæpe minus tuta & periculosissima est, quoniam harmoniam & symmetriam omnium actionum vitalium & animalium perturbat, interrumpit, modo fortiores aut debiliores & irregulares efficit & *de nat. hum. Lib. Si quis subito victus rationem immutet, ne quid in corpore ex mutatione immoretur, periculum est.* Pro comperto enim habemus, fame consumptis diu & emaciat, alimentum copiosum & impedimento (hinc singultu ac vomitu vexantur) & exitio esse, prout HIPPOCRATES *Aphor. XIV. L. I.* de senibus quibus convalescentes æquiparantur scribit: *iis calidi inest parum & propterea paucis fomentis egent; siquidem multis extinguuntur.* Nam spiritus animales per jejunium nimis impetuoosi facti, impetuosius alimenta aggreduuntur, chylum nondum perfectum per totum corpus nimis festinanter dissipant, qui acidus dein & immaturus obstructions, scirrhus, atrophias, hydropem inducit. Vires quidem debiliores plus alimenti postulant, idem tamen prohibent digestionem in hoc statu imminutæ ac depravatæ; siquidem & ventriculus & intestina præter modum adeo ita sunt corrugata ut a solidis cibis etiam pane assumtis, ad crepaturam usque corrupta fuerint uti v. gr. de Rupella expugnata referunt historica monumenta v. LVDOLPH. *Historische Schaubühne P. I. p. 453.* Quare iuscula tantum perferre potuerunt miseri. Si enim a recte valentibus, ut optime CICERO præcipit, tantum cibi & potus assumendum, ut vires reficiantur & non opprimantur, certe a debilibus hoc magis est servandum. Post acutos morbos & si tumidi & inflati revalescentes sunt cibis paulo solidior non adeo est suspectus, si modo laudabilis est & tener, simplex & succi plenus, eupeptus. Juvabit multum & hic, si crebrius (non autem singulis pene momentis, ut non raro fit, cum ad digestionem absolvendam sufficiens requiratur tempus) sed parum cibi istiusque bene adhuc calidi, quo interno, ad concoquendum requisito calori succurritur, pro una vice offeratur, quare GALENVS *L. VII.* ter in die ad vires recuperandas extenuatos cibare consuevit. In hanc rem notabilis SANCTORII observatio est *L. II. Aph. 37.* qua indicat: Magis hominem gravari, ab octo libris ciborum semel in die ingestorum, quam a decem tribus vicibus, una die assumtis. Nam quo diutius partes nutritioni inservientes a suo officio vacaverunt, eo difficilius ad suum institutum redeunt. Ob longum vero morbum, ventriculus digerens assum-

ta & ejus robur peristalticum & omnes partes nutritioni inservientes præ aliis languescunt, circulatio humorum debilis, quæ alimoniam humorum subigere debet, adeoque solutio, distributio, assimilatio, spiritaliscentia, secretio & excretio non rite perfecteque institui possunt atque absolvi, sed dum cibus male digestus & crudus, lentore suo mucido, plicis & tunicis duodeni maxime intestini, firmitus adhærent cruditates potius multæ hinc proveniunt in universum corpus, distribuuntur atque caput præcipue multis humoribus repletur atque deinceps, de novo quasi viscera, quæ sanguinis depurationi inserviunt, angustissimosque glandularum tubulos obstruunt atque infarciunt, hinc dolores capitis iique gravativi sensuum obnubilatio, cardialgia, flatus, ructus, nausea, vomitus, alvus obstructa, spirandi difficultas, febres lentæ, stomachalis, icterus somniis impeditus diri cruciatus intestinorum, lienteria recidivæ aliaque corporis animique mala accersuntur. Secundum HIPPOCRATIS *Aphor. XLV. L. IV. Sect. VII.* tumores & dolores articulorum exinde subnascuntur. Si ab ullo morbo nocet cibi repentina repletio, certe nocet post febres continuas, graves hæmorrhagias & apoplexiam, cujus nobis exemplum occurrit in juvene ab ea convalescente sed largiori coena assumpta, extincto. Si forte lipothymia interdum intercurrent non diu maneant jejuni; Cæterum quæ ratio inter pleniorē & parciorē victum sit tenenda, monstrant aliæ quoque circumstantiæ, e. g. Si quis a morbo cibum capiens non confirmatur, indicat pleniorē adhibendum esse. Quo simul monendum, quod alii cibi minori copia & ocyus naturæ expleant defectus; alii sæpius exhiberi debeant, quia ocyus dissipatur eorum substantia, quamvis facile expleant. Nec non aliæ cautelæ attendendæ veniunt, pro diversitate personarum, ætatis sexustemperamenti, vitæ generis, consuetudinis, graviditatis climatis: Quoniam, quo debilius est naturæ robur, eo minus cibo eget, eoque facilius ab ingestis læditur etiam alioqui sanus, quare ita proportio semper debet esse, inter victum præsertim qualitate eminente simul præditum & vires, quandoquidem eadem si debiles sunt, victus quoque tenuis suadendus, fortes autem & robustæ si sunt victus magis plenus & crassus locum habet. Hanc in rem, egregia verba sunt, quæ habet CELSVS *Lib. II. cap. 18.* *Imbecilli homines rebus infirmissimis opus habent, mediocriter firmos media materia optime sustinet & robustis apta validissima est.* Plenior autem victus dicitur qui uberior, generosior ac boni & multi succi simul tamen evpeptus; sicut tenuior, parcior & qui parum succi alibilis continet, etsi facilioris digestionis. Addendum, quod plenior hyeme, par-

parcior æstate conveniat. Ratum insuper quoque habeamus CELSI monitum *L. III. cap. VI.* Si vires non satis sufficiunt & fastidio urgentur, apponendi sunt varii cibi, ut paululum ex singulis degustando varietate illorum allekti famem vitent melioremque chylum proximum elementum sanguinis, qui ex multifariis particulis constat, ratione figuræ ac molis diversis atque feri nutritii nanciscantur. Iuvabit etiam si eos coram præparatos aliquantisper intueantur, aliosque avide comedentes aliquamdiu spectent, quo saliva movetur atque appetitus mire invitatur. In hac varietate vero ciborum quam diligentissime sibi caveant, a plane contrariis, tam quoad substantiam, quam qualitatem, ne scilicet uno eodemque tempore præter modum & leviores, molles & compatiiores, duros, acidos, dulces, austeros, falsos, flatulentos, adstringentes, laxantes &c. ingerant: Talium enim miscela efficitur, ut inæqualis eorum digestio & inter eam varii peregrini motus indeque chymus, chylus & sanguis vitiosus insequantur. Quoniam & observatur, eos qui morbo diuturno & inedia laborarunt, atque præsertim quartanarios, verminosos, melancholicos, hypochondriacos, & quandoque epilepticos, nimia cibos ingerendi cupiditate atque festinata deglutione ferri: famelici enim lente manducare nequeunt, quo & cibos non decenti masticatione dividunt & subigunt atque saliva, quæ menstrui vicem gerit probe miscent, quod tamen digestionis, distributioni & transpirationi nocentissimum est, æque cardialgiam & angustias præcordiorum, flatus, colicam & conatum vomendi infert, placidum somnum impedit, capitis dolores aliaque mala accersit. Ea propter hortandi atque monendi sunt, ut ab hac effreni aviditate sibi temperent & cibos bene masticient: nam nimia copia repente ingesti cibi potusque ventriculum distendit, ejusque liberam actionem & motum systalticum impedit, unde diutius in ventriculo hærens, lædit & vellicat, quæ vellicatio paulo fortior totum nervosum contextum in consensum trahit. Præter incommoda quæ exinde sequuntur adhuc unicum saltem commemorare lubet, quoniam alias perraro est annotatum, febriculam nimirum, quam digestionis vocant, quæ ephemeræ quædam species est, siquidem a cibo avidissime sumto, mox ventriculi inflatio dolorifica, cum summa anxietate & spirandi angustia, capitis dolore, inquietudine, languore extremorum partium in frigidatione se exserit. Pulsus est durior & frequentior, alvus constipata & paroxysmus intra aliquot ut plurimum horas supervenientibus ructibus vel vomitu aut sudore solvitur. In hac administranda diæta, priscis sapientibus medicis vel in ipsis morbis vel post illos admo-

dum circumspecti & seduli erant, quorum vestigiis & nos quoque omni studio insistamus, par est, bene memores nihil magis reconvalescentes post morbos præsertim acutos ad chronicos disponere quam vitiosa diæta, speciatim si excessu ea peccet.

§. XIII. Ad laudabilium humorum proventum procurandum atque ad materiam residuam, minus aptam, per eum coërcendam, partium debilitatarum actionumque ipsarum restaurationem, atque ad celeriores & faciliorem nutritionem & refectionem, quæ maxime a tenui materia oscula ingressa vasorum, quæ in venas lymphaticas vel sanguiferas se evacuant, fit, conferunt optime alimenta eaque succi plena, qui (succus) maxime alit nam crassiores assumptorum partes, rejiciuntur quæ sanguini homogenea sunt, quæ nec obstruunt aut impediunt nec concitatus per venas & alia vasa deferuntur quæ celeriter in sanguinem transeunt ejusque copiam augent & quæ sunt simul medicamentosa, per quæ refectio & curatio omnium facillima, jucundissima & tutissima est, ut juscula ex vino & cerevisia probe confecta atque maxime carniū, ossium non nimis durorum contusorum medullarum, in clauso vase decoctione cum aqua & vino parata, instaurativa & facile meabilia, (quoniam vires & robur corporis nostri a partibus subtilioribus alimentorum potissimum proficiscuntur;) vitularum, bubularum, gallinarum, pullo-
rum, jus pinguis galli veteris a longo tempore a Medicis usurpatum atque laudatum ob vim quandam nitrosam & abstergendi, quæ animali illi calore cum ætate increscente competit cum cristis & testiculis gallo-
rum gallinaceorum castratorum, quæ a multis extolluntur. De illo audiamus modo adhuc Dioscoridem *Lib. II. Cap. XLIII.* inquiringem: *Jus e veteri gallo album dejicit crudos humores crassosque, atram bilem & strig-
menta elicit, prodest longis febribus, suspiriis articularibus morbis & infla-
tionibus stomachi atque GALENUM XI. Simpl. Jus gallinarum habet vim
album retinendi ut gallorum veterum subducendi.* Pluribus hoc idem declarat MESUES *Cap. XXIII. de Simp. purg.* Medicata magis fiunt ut eorum digestionem atque solutionem felicius promoveantur, avidius assumantur & crudum proventus avertatur ex optimis aromaticis herbis, floribus, seminibus, corticibus, radicibus variis appropriatis, ut nuce moschata, foliis lauri, majoranæ, melissæ, salviæ, menthæ, rorismarini, pulegii, serpilli, thymi, origani, spicæ, floribus borraginis lavendulæ baccis, juniperi, turionibus lupuli, seminibus sceniculi, anisi, sinapi, corticibus, citri, aurantium cinamomi, radicibus, acori, calami, aromatici, enulæ, incœctis, additisque pane nigro Westphalico, ovis, cornu cervi,

cervi, & eboris ac teneriorum, carniū gelatinis, utpote, quæ verum chyli augmentum præbent variisque succis, ut citri aurantium ceraforum ribium & similibus instillatis, cum quibus integra etiam diæta v. g. per II. III. & IV. hebdomades, pro re nata, institui potest. Præterea in reliquo cibandi ordine, in genere omnino cibi sapidissimi, utpote qui citius restaurant atque facilis digestionis, & multi, gelatinosi, boni succi, qui nimirum in olea, salia, serum nutritium, spiritus adeoque in succum & sanguinem ipsamque corporis substantiam facile mutari possunt, in debita quantitate, tempore & modo sumantur. Ejusmodi porro sunt carnes leviores animalium juniorum & assatorum potius quam coctorum, quia illæ magis ventriculum firmant, plus meliusque nutriunt, succus enim uberius effluit, si cultro perforentur: habent enim crustam sibi extrinsecam humiditatem earum intus conservantem, nam maxima nutritia pars, in jus abit atque sale inveteratæ meliores quam recentes. Caro columbarum, quæ cibus sapientum dicitur, ut & turturum, quam juxta passerum convalescentibus & senibus valde commendant: RHASIS *Lib. III. cap. II. & III. Aphor. IV. seqq.* caponum, avium sylvestrium & campestrium & montanarum parvarum, ut alaudarum, fringillarum, acanthidum, nec non majorum, ut perdicum, quam Cardanus multis nominibus commendat, attagenum, rusticularum, phasianorum, agnorum, caprarum juniorum atque hædorum castratorum & quam GALENVS *IV. de rat. vict. in ac. Com. 102.* optimum sanguinem generare perhibet, porcellorum, cuniculorum, lepuseulorum, capreolorum & Polonis & Silesiis in deliciis habitæ branchæ ursinæ bene coctæ beneque conditæ. Quidam pro debilibus ejusmodi sciuri carnem præparatam laudant. Pisces, sine quibus, nulla apud Priscos cœna erat licet imbecillius frigidius & humidius illis nutrimentum præbeant atque de iis dicatur, quod corpus putridis humoribus impleant hincque febres, tabes, podagræ, epilepsiæ, lepræ & id genus alii morbi procederent; conceduntur tamen assati frixi que potius coctis imprimis vero saxatiles atque squamigeri (squamæ enim eæque duriusculæ & spinæ in piscibus significant substantiæ puritatem secundum GALENUM *Lib. de Facult. alim.*) quique velociter natant, ut truttæ, apuæ, percæ, funduli, lucii minores, mustelæ, mulli, thymalli, gobii, cancri fluviales minores, cum quibusdam amphibiis, ranis, testudinibus, cauda castoris; nec interdicendæ, sunt ostreæ. Circa quæ notatur, quod chylus ex alimento animali confectus sit magis roborans sanguinis & solidorum corporis humani, quam qui ex alimento constat vegetabili, quoniam

illud facilius & citius assimilatur & transmutatur in naturam sanguinis & firmitus supplementum solidis affert abrasis. Panis quem Homerus medullam hominum Sacrae autem litterae robur cordis appellant, omnium esculentorum quasi basis, quique ventriculo gratus, omni ætati omni-que temporis conveniens est, alimenti plurimi, ejusque saluberrimi & firmissimi maximeque durabilis ferax, escas gratas & utiles reddat, secalinus potius quam similagineus apponatur; siquidem ille fovet partes magis ventriculo amicas, acidulas, sulphureas, hic vero ob lentorem magis obstruit. Huc quadrat locus apud SIMON. PAVLI in *Quadripart. Botanico* p. 283. In quotidiana victus ratione, qui similagineo pane vescuntur, nec corpus laboribus validoque opere aliquo exercent, parum sibi consulunt. Is sit ex farina pura & novella pinsus & bene fermentatus beneque subactus, attenuatus, atque mollis ac mitis, levis, rarus atque porosus nec non modice salitus, non durus, siccior, viscidus & gravis. Admodum quoque conducibilis habetur cui anisi foeniculique semen est admixtum, quod panis efficaciam auget, stomachum confortat aliaque commoda affert, eligaturque potius mica ejusdem quam retorrída crusta, quoniam illa præ hac, melius atque efficacius & citius nutrit. Nec prohibendus grossior ille Westphalicis (bon pour Nickel dictus) ac singulis pene Saxoniae inferioris incolis accolisque usitatissimus, quoniam valide nutrit simulque subtilibus furfuribus inibi relictis viscidum abstergit blandaque vellicatione ventriculi tunicas glandulas intertextas stimulat, ut menstruum quod vocant ventriculi, uberius concedant. Ex hoc illoque dein variæ panatellæ, variis liquoribus ac aromatibus & similibus, confortantes, parentur. Loco vero manducandi panis quintam essentiam ejusdem quærere, quam Gallorum quidam quondam effinxerunt, ut nutriendis pauca guttulæ sufficerent atque eo simul operosæ tædiosæque forte masticationi superfedere possent, non est sane probandum, plurimis certe rationibus falsi vanique arguitur, nec arguitur tantum verum etiam convincitur; qui enim bello hoc invento commoditatis causa uterentur, ad incitas reducebantur, adeo, ut nullo fere remedio, in integrum restitui iterum potuerint. Butyrum optima pinguiorque pars lactis idque recens VERVLAMIO *Hist. nat. C. I. Tb. LIV.* adeo commendatum ac multorum morborum remedium & bene nutritivum habitum. Non possumus non hic quoque suadere, ova sorbilia recentia & quæ tremula vocantur præcipue eorum vitelli commune illud ægrotantium alimentum. Convalescentibus quoque ex usu esse possunt, pultes cum pulmentariis forte veterum Romano-

rum iisque usitatissimis cibis vid. PLIN. L. XVIII. §. 19. conferendæ, illorum PERSIVS Sat. III. v. 102.

Uncta cadunt laxis tunc pulmentaria labris

& JUVENALIS S. VII. 185.

Veniet qui fercula docte

Componet, veniet, qui pulmentaria condet.

meminerunt. Hæc apud nos præsertim ex avena, hordeo & e tritico, oryza bene emollita, frumento saracenico, graminis manna, amygdalis dulcibus pineis, pistaceis quæ Avicenna maxime laudat: parata, convenientissima sunt. Gelatinæ quoque, bellaria aptissima sunt artificiose vario modo paratæ hincque alimentosæ & cardiacæ vocatæ. Hæ enim cum gusto & jucunditate assumuntur faciliorisque sunt digestionis FR. RANCHIN. iudicio Tr. de morb. sen. Sect. III. insuperque validum alimentum præstant emaciatumque corporis habitum recreant atque conservant. Conceduntur lac cum lacticiiniis, primus noster cibus, quia similiter bene nutrit, facilisque digestionis est, idcirco emaciatissimis corporibus, tabidis bonum ac laudabile alimentum idque copiosum & satis constans præbet cujus solius usu ad multos annos, multos debilioris naturæ vitam protraxisse, varii annotarunt fide dignissimi Doctores. De hoc ita sagacissimus SYDENHAM scribit, *diff. epist. ad Guil. Cole*, cum lac frigidum tantum crudumque alimentum præbeat, spiritus nihilominus ejus usu corroborantur invigorenturque. Nec tamen hoc, a ratione abhorre illis videbitur, qui secum reputaverint, lac, cum simplex omnino nutrimentum suppeditet, naturæ minus in coquendo negotium facessere, secus ac solent cibi & liquores magis compositi quodque perfectissimam illam coctionem æqualis sanguinis spirituumque crasis, necessario sequatur. Lac humanum, equinum & asinium primum inprimis commendandum, quod est tenue, & facile subit partes, simulque abstergit, dein succedat caprillum tandemque vaccinum sacchari paulillo addito utpote magis nutriens. Attamen quibusdam convalescentibus, quibus forte stomachus admodum debilis est, quique sordes biliosas & viscidas adhuc continet, cui cum capite ob membranas nerveas ingens consensus, quibusve per nimias sanguinis egestionem roburque ventriculi fractum est lac non admodum conveniens esse Apb. HIPPOCRATIS 64. Sect. V. innuit, qui ita se habet: *Lac dare caput dolentibus malum, malum etiam febriçantibus & quibus præcordia elevata, permurmurant; ex siticulosus malum, quibus biliosæ dejectiones in febribus acutis sunt, & quibus sanguinis multa egestio facta est.* Nec serum lactis cuique parum mellis

sirupi violarum vel fumarizæ additum nedum lac ebutyratum, præci-
 pue cum pane & semine anisi coctum, (quod Belgæ & Frisii instar medi-
 camenti habent) prohibemus. Caseum vires reficere, HIPPOCRATES di-
 xit. Vid. *Lib. de Affect. §. 49.* Mellis quod cœlestis manna, dulcis, side-
 rum saliva, ferculum hygezæ sacrum appellatur & cibus medicinalis no-
 bilissimus, & humanæ rationi inimitabilis atque qualis vix reperitur aut
 habetur alibi, simplicis & compositi, ut mellis rosati, mellitorumque, pa-
 nis melliti & similium usum æque conducibilem censemus, quoniam ea
 nutritiva & temperata, roscida, roborativa blandiente balsamica delica-
 tissimaque atque efficaci dulcedine pollent, quæ motus vitales suscitât
 auget atque conservat vires & spiritus animales instaurat, illorumque
 copiam adauget & simul pituitam atque crassas lentasque nocentes hu-
 mores attenuat ac resolvit juxta ac detergit atque viscerum obstructio-
 nes referat. Ex fructibus horariis bene maturis, appetentibus conce-
 di possunt, pomâ fragrantia, borsdorffiana, francica pyra moschatellina
 mespila cerasa, pruna hungarica, avellanæ eæque lambertianæ, castaneæ
 bene coctæ, præsertim vino generoso madefactæ ac saccharo & cina-
 momo conditæ, apricotia, baccæ rubi idæi, caricæ, passulæ, pineæ pista-
 ciæ amygdalæ dulces. Ex oleribus licet parcius nutriant, tamen quæ
 succum continent leviozem & facile transeuntem & qui non oneri est
 naturæ, ut lactuca, portulaca endivia, beta, acetosella, lupuli germina,
 brassica rubra bene cocta, spinachia, chærefolium, asparagus, ut & cinâ-
 ræ inprimis laudanda. Jungantur radices cichorii, pastinacæ, petroseli-
 ni. L. FUCHSIVS, Medicus clarissimus *Lib. II. de comp. med.* silarum
 conditum convalescentibus admodum conducibile esse, affirmat. Inter
 ciborum condimenta porro quæ appetitum languentem excitant & ven-
 triculum tenaci pituita obsessum liberant eumque corroborant, præfe-
 rantur mala aurantia, citrina, granata, olivæ, cochlearia, nasturtium pa-
 lustre ac hortense, & quædam acetaria, cappares &c. & quæ
 Veteribus in frequenti usu erant salsamenta atque bellaria. Illis adscri-
 bendi harengi muriatici recentes cum sardellis, caviare moscoviticum &c.
 his confectiones saccharatæ & fructus saccharo conditi, cerasa, cydo-
 nia, corna, sorba, apricotia, berberes &c. Speciatim infirmi stomacho
 ne præsertim flatibus vexentur ab assumtis cibis ejusmodi, quæ os ven-
 triculi supernum stringant ac roborent, ut grana aliquot mastigis, semen
 coriandri, fœniculi, sacharum rosaceum, deglutiant. Insuper in omni-
 bus alimentis delectus servetur, ut recentia sint non inveterata, cum re-
 centia alimenta majores, quam alia inveterata, habeant vires, eo quod
 vitæ

vitaē sint propinquiora, antiqua e contra & marcida magis quam recentia alium moventia, putredini propinquiora, ut HIPPOCRATES loqui amat *L. II. de dieta*. Sint & bene cocta beneque præparata, saporibus & odoribus gratis imbuta, quæ membra principalia pro odoris & saporis natura mire recreant & enutriunt, atque lauta & quæ gustui placent appetituique arrident, oblectatio enim optimum condimentum, ut nausea pessimum nocumentum, utpote quæ felicius assumuntur, facilius retinentur, melius digeruntur & distribuuntur citius, restaurare solent, quod secundum AVICENNAM sapit, nutrit, magisque juvat. Earum certe partium, quæ ad assumptionem cibi & potus chylicationemque inchoandam & continuandam sunt destinatæ, evidens conspicitur consensus, adeo & quod palato ingratum sæpe ventriculo nauseam & vomitum concitet. Propter eundem consensum ait BAVHINVS, caput per palatum evacuare non possumus, quin simul ventriculum quoque evacuemus. Interdum & rara quædam & insolita ac improvisa offerantur, atque fingendo subinde, ac si dono data peregreque transmissa fuissent, quæ nimirum grata novitate maxime placent atque sunt accepta, exhilarant avidæque appetuntur: Novimus enim & ægrotantes adhuc & convalescentes prægnantium in morem plerumque consueta alimenta alias averfari optareque sibi valde extraordinaria, quædam, quanquam ipsi non raro sciunt, qualia feligant. Talia certe saporum delectamenta plus conveniunt ægris & convalescentibus, quam recte valentibus. Si & quædam appetant atque magno desiderio ad ea ferantur quæ minus utilia videntur, tamen ad excitandam cibi cupiditatem, danda parca tamen manu potius ea esse, quam neganda, censemus. Sanguis enim ex ejusmodi constat particulis, in quarum motum & mixtionem alimenta conspirant, ipsumque ventriculi menstruum magis aptum est, cibos tales digerere quia tunc plerumque magis activum est. Quamvis fatendum omnino sit, observari talia circa hanc rem exempla, quorum rationem reddere admodum difficile sit. Insuper etiam hic magna imaginationis vis, quam in hominum sanitatem exercet, elucescit. Ad hoc observamus quod natura ipsa a nemine edocta, sui melius est conscia, in necessariis, quam ars, atque id quod est utile maximopere appetit, saltem ne lasciviat illa, providendum; adeoque tutissimum & utilissimum est, ut convalescentes toti sibi ipsi relinquuntur comedantque quæ appetunt, modo non morbum quo affecti fuerunt directe exacerbare, orgasmum augere & symptomata intendere queant. Vult HIPPOCRATES *II. Aphor. 38.* ut paulo deteriora nimirum concedantur, unde etiam

Idem

dem *VI. Epid. § Lib. de Affect.* cibos potus & obsonia quæcunque ægri concupiscunt, si modo damnum non afferant, exhibere jubet. Quando vero convalescentes omnia alimenta assumere respuunt, tunc optima ea etiam coacte, ut non raro cum medicamentis fieri assolet, licet & eadem abhorrescentibus ructus, inflationes nauseam & ad vomitum conatus &c. concitent, exhibenda sunt, ne subtracto probo alimento vires penitus concidant atque ut ventriculus ejus fibræ ac spiritus reficiantur subinde excitenturque ac habeant, quo blande calefiant ac demulceantur; tunc convenientissima sunt juscula, quibus & medicamenta appropriata possent interponi. Legitimo vero appetitu accedente & invitante ciborum assumptio non differatur, ne saliva, quæ tunc movetur, utpote falsa, ad vacuum ventriculum confluet molestiasque creet notante enim HIPPOCRATE ea est ventriculi natura, ut plenus omnibus det, & ab omnibus vacuus accipiat, atque menstruum ventriculi vel nimis augeatur acoremque præternaturalem induat, vel ab excrementis aquosis diluatur, ut appetentia deinde pereat, quod & recte valentibus accidit, *wenn sie, ut dicunt, den Hunger übergangen haben*: Quondam, per chirurgiam infusoriam dictam, ægris convalescentibusque ciborum per os assumptionem omnem averfantibus, in venam quampiam ampliolem, medianam, liquorem quendam nutritium infundebant. Coeterum laudantur pro convalescentibus Homerica convivio, germanæ voluptatis sensu fructuque prædita, in quibus & bibitur & sermonis delectatio musicesque deliciae adhibentur.

§. XIV. Abstineant vero cum cura, ab omnibus cibis, qui facile ventriculum onerant atque fibris facessunt negotium ac qui alium constipant quique temperiem menstrui salivalis non destruunt, crassioribus, durioribus, exsiccatis, austeris glutinosis, pinguibus, viscidioribus, flatulentis, paucum & lentum chylum & cruditates varias gignentibus, & qui facile corrumpuntur ac putrescunt: ut sunt butyro frixa ova, dura, lentes, caro suilla, (a cujus speciatim esu, transpirationem semper segniores & gravitatem corporis SANCTORIVS in *Medicina sua statica* perquam curiose observavit) ut & non satis tenera bovilla, & fumo indurata, aprorum, capita & pedes animalium, porro avium majorum ut & aquaticarum, ut anserum, anatum, fulicarum, gaviarum atque coturnicum quam Jul. Alexandr. cum Arabibus medicis præ aliis convalescentibus dissuadet, anguillarum, tinearum, ut & omnium majorum & lacustrium & marinarum speciatim piscium, panis cibarius grossior, legumina, fructus & olera facile putrescentia & plura corruptibilia, ut pepones, ex quorum esu spe-

speciatim P. MATTHIEV *Lib. Hist.* scribit, quod Henr. IV. Rex Galliae ex gravi morbo convalescens, vitae periculum sibi contraxerit, ut & cucumeres &c. farinacea, placentae praesertim adhuc calentes & parum fermentatae adeoque glutinosae & quae multum incocti habent butyri aut alius pinguedinis, & id genus plura. Haec enim ob debiliorem ventriculum non bene solvuntur & digeruntur, neque bene nutriunt neque a massa sanguinea subiguntur nec facilius excernuntur, quae enim secundum HIPPOCRATIS effatum *Aph. II, 18.* affatim & celeriter nutriunt, celeris etiam existunt excretionis. Hinc qui hunc errorem commiserunt mox ventriculi gravitatem, sudores copiosos persentiunt, tumoresque denuo crurum oedematosos atque anasarcam sibi contrahunt. Etenim ejusmodi ad digestionem inepta ingesta moles, instar spongiae in ventriculo intumescit, adeo ut distendendo, obstruendo condensandoque, humorum secretioni, obicem ponat & promoveat violentam feri ad partes fibrosas expressionem. Hic commode in mentem venit, quod apud CICERONEM *L. VI. Epist. ad Famil. XX.* legimus, eum Asclapionis medici curationem, non probantem, dixisse: Jus dandum Tironi non fuisse cum κακοσوماχος esset, autumamusque non sine ratione Ciceronem hoc dixisse; etenim jura etsi eupepta videantur, tamen si ptisanæ crassiores incoctae sunt nec satis emollitæ, ventriculum languidum offendunt difficiliorisque sunt distributionis. Quo recordamur nos haud simplici vice vidisse, ab emulsionibus amygdalatis copiosis iisque spissioris consistentiæ, quibus convalescentes consulere sibi voluerunt, inflationes, ructus, appetitus subsequenter imminutionem, nauseam, cardialgiam, alvi obstructionem, accersitas fuisse. Ex febribus praesertim intermittentibus atque malignis, petechialibus &c. convalescentes abstineant ab omnibus carnibus & jusculis, earum, nimium nutrientibus & facile putrescentibus ut & lacticiis &c. quae quo meliora aliis, his certe sunt pejora, quia ex horum usu facile recidiva sequitur.

§. XV. Potus alimenti vehiculum, digestionis distributionisque & irrigationis materia sequitur, quo Athenæus antiquissimus & celeberrimus Scriptor, jam solo potu, quosdam vixisse & bene nutritos fuisse, asserit atque quo secundum HIPPOCRATIS *Aph. II. aph. II.* facilius est impleri quam cibo; licet is alias, illum varietate utilitate necessitate & frequentia longe superet. Ideo & ejus praesertim habenda est ratio, nam in tantum saltem nutrit cibus, in quantum est dilutus, qui fluidas in primis corporis nostri partes, varie immutat & exaltat atque in motu suo legitimo conservat. Is sit sat copiosus atque ad irrigandas exsiccatas par-

tes, sufficiens & levior, moderatus tamen, & per vices crebrius iteratus ita ut invitetur atque incitetur magis quam simul & semel expleatur hic assumendi appetitus, sitque ille tempestivus, non nocturnus, si fortior, parcior non inebrians. Cerevisia, quæ non saltem siti restringendæ sed & alendo corpori præ aliis idonea, non talis equidem sit qualis veterum erat, quam Zythum Curmi vel Phucas vocabant, ex sola aqua & hordeo crudo non addito lupulo cocta, sed bonæ notæ, ex malto rite præparato cocta & lupulo mediocriter condita, beneque defæcata, non recens nec ob vetustatem acida, atque corrupta, non flatulenta. Præ omnibus aliis notioribus, convalescentibus a Medicis passim commendatur Goslariensis cerevisia, quia ob spirituositatem gratam mire eos reficit atque nutrit, huic Brunsvigensis, Momma, Cereris quasi Syrupus, Ducksteinensis, Gardelebiensis, Soltwedelensis, Bernavenensis, Repinensis, Hamburgensis, Lubecensis, Embecensis, Mindensis, Rostochiensis præ aliis Mindensis, Dantiscana (*Doppelbier*), Wratislaviensis, eaque primaria quam Schepusium atque Silesiorum nectar vocant, Bregensis Arcis dicta, Oppavienensis, Schwidnicensis, Goldbergensis, Boleslaviensis, Crosnensis, Mauckschitzenensis in Ducatu Silesiæ Teschinensi, ut & Zacensis, Strenensis, Adersbachensis, in Bohemia, jungantur merito. Post has Wurzenenses, Martisburgenses & Eilenburgenses nostræ nominandæ, secundus post has, locus concedatur Torgensi, quæ sapore aromatico & refocillante roboranteque virtute se commendat & sanguinem laudabilem generare dicitur, quamque ideo eximie quondam laudavit PLACOTOMVS *de natura cerev.* Sequi has possunt Numburgensis, Dresdensis, Freibergensis & Chemnicensis. Nec obliviscendæ aliæ, Wettinensis Keuterling vocata, Lebiunensis, Servestana eaque roremarino alterata, Erfortensis. Neque plane interdicenda Lipsiensis inprimis ea quæ *Doppel-Rastrum* vulgo vocatur, meliori cognomine & æstimatione digna; ast aliena ut plurimum suis meliora esse putant, mirorque & alibi aliunde afferre potum cum domi, optimum ipsi parent. Quoniam non adeo mala ac quidem vulgo habetur: siquidem ob quandam dulcedinem, palato, non omnino ingrata, sat bene nutrit, alvum laxat, cito per urinarias vias fertur neque caput gravat, neque languorem membris relinquit, neque adeo multas flatulentias in hypochondriis parit si modo prius est, in lagenis uvis majoribus passis similibusque additis, rite defæcata, ut alimentaria etiam medicamentosa evadat: Multi laudabiliter assolent, nec possumus damnare, cerevisiam, melissâ, absynthio, roremarino, salvia, scolo pendrio, helenii, cichorei, scabiosæque radicibus, baccis juniperi, caryo-

phyl-

phyllis, calamo aromatico feminibus foeniculi, coriandri, similibusque aromatibus vel ebulliendo vel infundendo, non gulæ solummodo sed & valetudinis causa, condire. Nec non ex cerevisia varia genera jusculorum eduliorum, condimentorum ut & medicamentorum conficiuntur. Sæpius speciatim post variolos, morbillos aliaque ejusmodi exanthemata, ut & arthritidem vagam capitisque morbos, ad perfectam sanguinis depurationem, præstat, a cerevisiis primum per aliquod tempus abstinere, maxime ab iis, quæ caput turbant & calorem præternaturalem concitant & loco illarum decoctum temperans ex radicibus scorzonæræ, cichorii, sassaparillæ & semine foeniculi, hordeo mundato cum aqua cinnamomo, succo citri, saccharo & vino permixtum, ut & serum lactis, lacebutyratum &c. bibere. Vitentur vero potuum genera, crassa, fœculenta, vaporosa, fermentescibilia, acerba, austera, corrupta, quæ facile in ventre acescunt, quæ caput tentant & gravant, spirituumque animalium motum turbant, & urinæ intercipiunt fluxum, aluum constipant & inflant &c.

§. XVI. In confortantium liquidorum classe vinum, sanguis terræ, liquor ille gratissimus naturæ nostræ admodum familiaris & utilis atque ipsa Deorum potione, gratior, Nectare, eminet, itaque hoc convalescentibus iterum atque iterum tam per se, quam cum pane sumtum commendandum, idque maxime quod ætate medium est, odoreque fragrans &c. Hoc enim principiis suis salinis & sulphureis, subtilibus & teneris optime temperatis ac inter se intime unitis cumque aqueis largiter sat dilutis, irrigat, recreat naturalem calorem refocillat atque fovet, appetitum excitat, digestionem meliores reddit nutritionique perbene inservit atque humorum per totum corpus distributioni (liquidem certe in alimentum genuinum, ocyssime vertitur) bonum & purissimum sanguinem gignit ac auget, crassos & viscidos humores attenuat, spiritus animales excuscat secretionem & excretionem promovet, somnum blandum procurat mire reficientem (unde & somni magnes vocatur) cutis fœdum calorem emendat jucunditatem ac alacritatem animo infert cor, ut ajunt, exhilarat roburque addit. Hinc ob has nobilissimas ac utilissimas virtutes, quibus & corpus & mentem excitat atque maximo iisdem præsidio est, a PLATONE laudatur, qui illud ipsum, ad exploranda adolescentum ingenia exhibuit & illos potissimum, qui in conviviis ingenium ostendebant, observavit. Verbo vinum omnem quasi paginam absoluit, atque si verum fateri volumus, reliqua confortantia sive in forma liquida sive solida præscribenda, quæ in antecedentibus proposuimus, propemodum

antecellit, quin & solus vini odor vires admodum recreat. Recte hinc AVENZOAR dixit: vino neque cibum neque medicinam unquam privari debere. Immo confidimus, nos veritati minime fucum facturos, si affirmemus, vinum etiam omnibus aliis restaurantibus dictis, per multas series recensendis, iisque procul quæsitis magnoque conatu atque ex rarissimis carissimisque ingredientibus, ex auro, margaritis, lapidibus bezoardico, hyacintho &c. elaboratis, quæ a probatissimis Auctoribus, & ut ex adeo multis paucos saltem nominemus, ab EMAN. KOENIGIO in *Ludovico Enucleato* p. 98. & seqq. IOS. QVERCETANO in *Diat. Polyhist.* p. 535. & seqq. MYNSICHTO in *Armam. Chym.* p. 38. 39. 71. 108. 110. 128. 141. 158. 161. 171. 177. 181. 187. 208. 212. 219. 252. 304. 310. 337. 365. 399. laudata sunt, certe esse æquiparandum, si non longe anteferendum: Quare ne nobis ulterius extollas, illa universalia, arcana, panaceas, phalantias, quintessentias, elixiria vitæ, cordialia, astralia, quidem Philosophorum aliaque ejusmodi gloriosa atque thraonica hyperbolicaque nomina. In hanc rem adhuc notandum venit, quod observamus, convalescentibus appetitum tardius redire, usque dum, ad intermissum vini usum redeant. Atque videtur, naturam ipsam, quæ conservationi ac instaurationi cupientissima est, vinum desiderare impensius, cum convalescentes ut plurimum illud appetant, magno desiderio, adeo ut constet, sanos qui vinum vix æstimarunt, aut ferre potuerunt, ex morbo vero dein eluctatos, ad hoc assumendum incredibili affectos esse appetitu, siquidem observationes quasdam notas habet PRAESES, qui præ aliis cognovit, virum quendam, qui per totam vitam a vino abstinuit, ex febre vero quartana reconvallescens mire id appetebat, mireque deinceps amabat semper A. C. CELSUS vs haud inepte præcipit *de Re Med. Lib. IV. cap. XXV.* ut, ubi triduo quatrIduoque vinum biberint convalescentes, uno aut etiam altero die aquam interponant. Ejusmodi vero eligendum, quod se, colore, odore, sapore commendat, ætatis mediæ, fragrans, generosum, temperatum purum, tenue, diureticum ut Rhenanum, præsertim antiquum, cujus sulphur præ aliis vinorum generibus subtile & tenerum est, Mosellanicum, Neckarinum, Hungaricum, Gallicum, Rubrum, Burgundicum. Eremiticum (Vin d' Hermitage) Malvasium, Canariense Petri Simonis, Vinum Græcum, eaque selectiora præferantur. Falernum veteres & præsertim PLINIVS Secundus admodum extulerunt. HIPPOCRATES *Lib. de Vitæ acutor.* pro senibus & convalescentibus usum vini dulcis apprime laudat. Vulgare vinum hispanicum ubi ventriculus imbecillis est, non æque conducit, ut notat FRID. HOFFMANNVS in *Instit. med.* speciatim dicendo

dicendo, illud porrigatur, cui convalescens, dum optime sanus erat, quoque adfuetus erat. Pro re nata hæc etiam commode, cum aqua possunt misceri (quod primum fecisse ad Liæi succi edomandas vires Staphylum Sileni filium PLINIVS *Lib. VIII. S. 57.* asserit) & loco potus ordinarii uti. Hinc & solent componi vina medicata ex floribus, herbis, feminibus fragrantibus, aromaticis, quemadmodum hoc nomine jam dum nota sunt, quæ vulgo Clareta & Hippocratica & faccata Plinii (per aromata colata) vocantur, inter illa familiaria magis sunt, absynthites & enulatum salviatum, rosmarinatum, euphrasiatum, cytonides, cerasites vinum, præ aliis maxime arridet vinum baccarum rubi idæi, utpote admodum saporis gratum atque acceptum simulque confortativum. Minus vero convalescentibus vina nimis dulcia, qualia sunt vulgaria hispanica & italica, nimis austera, nimisque generosiora inebriantia, (inprimis cum convalescentes facile inebrientur, quia debilia eorum capita causæ huic non resistere possunt) ut & acria, recentia, crassa, quæ urinam remorantur & obstructions pariunt, multo tartaro crasso & viscido atque fæcibus referta ac sulphurata propinanda. Hæc etiam cautela observanda, ut ad humidæ substantiæ defectum supplendum primum tenue non nimis exsiccans, quod *ὀλιγοφορόν* appellant, assumatur. Nec possumus hic dissuadere spiritum vini & aquas sic dictas vitæ, quæ modice sumta, ob vim medicamentosam, aquæ vitæ omnino meruit, sed nimia copia hausta aquæ mortis reportavit, ut aqua vitæ Matthioli, Chemnicensis, aqua Cinnamomi buglossata, carfunculi, cordialis Saxon. &c. in parca quantitate inter alimenta & cum frusto panis, consperio cinamomo & saccharo imbuto sumtas, nam ejusmodi ob sal volatile oleosum & balsamicum, paucopne phlegmate dilutum, æque calorem & tonum ventriculi omniumque viscerum apprime confortant, digestiones eorum promovent, cruditates exinde relictas corrigunt, flatus obortos abigunt, ad somnum disponunt &c. Juxta Vinum, mulsum vinosum atque aromatifatum ut Hungaricum, Lithuanicum, Ratisponense, Egranum, quale etiam est hydromel Gabelkoveri compositum ex melle, aqua fontana, liquiritia, ficubus, feminibus fœniculi, radice pimpinelli, floribus malvæ, salviæ, violarum, cinnamomo coquendo paratum, ut & succus pomorum & pyrorum fragrantium ac lora qualia potus genera Gallis Anglisque usitata & in quibusdam Germaniæ locis conficiuntur, item vinum illud tenue, quod limoniada vocatur, convenientia quoque convalescentibus potus genera sunt. Potus cæterum tepidi calidique magis & sæpius quam frigidi profunt, quos tam antiqui eosdemque largiores prandiis coenisque intule-

runt vinumque aqua calida temperarunt, a FREINSHEMIO C. III. quam recentiores a FRANC. BAC. VERVLAM. in H. V. & M. V. VI. H. VII. §. 4. & HENR. MEIBOMIO in *Differt. de calida potu*, laudati commendarunt. Hi sanitatis primum causa exhibuerunt, inde in deliciis esse coeperunt, atque adeo in luxuriam verti; unde Claudius Tiberius Nero J. R. Caldus dictus est, & SENECA ita loquitur: *varias artes luxuria commenta est, ne quis intepescat. ne quid palato jam calloso parum ferveat calidam culina sequitur.* Tametsi & plurimi eorum quoque liquidos refrigerantes cibos potusque potius appetunt, sicuti & HIPPOCRATES vid. *Epid. Lib. XVI. Text. 18.* expressit his paucis verbis: *imbecilles diætæ frigida, valentes vero calida &c.* Inter hos, potus theæ, caffèæ, succolatæ inprimis, cujus vis nutritiva & confortativa ubique notissima est: Vel talia potus componantur genera, vel ex aqua aut vino, ex herbis, floribus, seminibus, corticibus, radicibus, lignis, aromatibus, stomachicis, cephalicis dictis ex veronica, melissa, salvia, betonica, scordio &c. ligno sassafras, aloes, juniperi &c. radicibus polypodii, tormentillæ, peucedani, seminibus foeniculi, anisi, vulgaris & stellati, erucæ bacc. juniperi, croco, cinamomo &c. Nec improbamus acidulas, Egranas, Pyramontenses, Wildungenenses, Spadanas, Schwalbacenses, Dinssteinenses aliosque fontes foterios, eosque vino mixtos. Omnia tamen fiant moderate, ne juxta alia incommoda, somnus & requies debita, his calidis potionibus impediatur, quæ tamen omni modo est procuranda atque promovenda, quare mane potus ejusmodi potius instituantur, quam circa vesperam, circa hoc vero tempus cerevisia magis conducit hausta. Huc etiam referamus graveolentem tabaci fumum, quem in adluctis laude sua nequicquam defraudamus, quoniam crassos humores resolvit, relictos & pituitosos catarrhofos consumit, somnum invitat, sanguinis turgescientiam promovet, spirituum animalium generationem augeat &c. Nec forte terreat JOH. FREINSHEMII scriptum, quod habet *Cap. II.* quo nimirum indicat, tabaci usum nec voluptatem nec commodum asferre, ita tamen suo tempore adeo invaluisse, ut nulla publica aut privata verecundia quæcunque ad unius cujusque lubitum isto foetore afficiantur. Sed vide ne quid nimis, ne tabacum fiat tabificum. Hic quoque monendum duximus, convalescentibus e re esse, si os crebrius vel vino vel destillata aqua quadam odorata ut rosarum, liliorum convallium & similibus fragrantibus item decocto salviæ. hyssopi, florum rosarum rubrarum, cum vino rubro, spiritu vini gallico, parata, eluant ac gargarizent, spiritumque simul sæpius pauloque fortius hauriant unde

unde vigor notabiliter accedit. Signum erit à tali alimentorum assumptione corpus roborari, si motus in membris instauratur, si pulsus vegetior fit & universi corporis calor increescere incipit: nam simul ac ventriculus tale suscepit alimentum, illico vires & omnes animales spiritus refocillantur ac vigorantur. In prostratione summa virium ex longiori sanguinis profusione, quoniam restaurantia & nutrientia, difficile lenteque in chylum ac nutrimentum spiritibus deficientibus converti possunt, quondam vix aliud remedium habebatur, quam sanguinis transfusio tanquam extremum, in hoc extremo defectu, quo celerissime succos vitales infundere satagerunt, cujus insignem usum LOWE-
RVS *de Corde* p. 363. *Transact. Anglic. Collect.* aliique collaudant.

§. XVII. In reliquis rebus à Medicis non naturalibus dictis debitum regimen quoque diligentissime servetur idque eo exactius quo difficilior convalescentia est. Quarum agmen aër ducit, qui secundum HIPPOCRATEM *de morbo sacro* sensum & motum membris præstat. Eligendus vero pro convalescentibus est, paulo calidior tepidus & sic-
cior, ac nostræ naturæ convenientior aut etiam quandoque humidus quandoque & frigidiusculus, lucidus, qui speciatim vividos animales spiritus progignit ac fovet (hinc homines sub tali aëre hilares ac alacres fiunt) atque purus, minus foetidus, aut si non adsit talis, procurandus. In morbidis exhalationibus, foetor proinde emittendus; in genere vero aëris inclementiæ fugiendæ & crepuscula tum matutina tum vespertina atque vitandus est pluviosus, turbidus, crassus, pulverulentus, fumosus, calidus & æstuosus nimis, & ventus meridionalis, cum solaribus radiis nimium ardentibus frigidus & ventus septentrionalis; ille enim calidus scilicet meatus nimis dilatat, resolvit colliquatque & dissipat humores atque spiritus unde ingens virium lapsus insequitur; hic potissimum si derepente ac incalescente corpore accedat lædit constringendo nimis partes solidas præsertim glandulas coagulandoque humores & motum eorum retardando atque transpirationem per cutis poros, qua nihil conducibilius, reprimendo eoque magis revalescentium corpora ægre afficit, quia per calorem hypocausti consuetum, frigoris impatientes illi sunt, illudque per rarefactum hucusque corporis habitum, facilius profundiusque penetrat, rarefactos humores inspissat, motumque turbat, fluxiones concitat, & recidivam parit. Humidus vero aër tonum partium solidarum jam debilitatum adhuc magis relaxat atque debilitat. Omnes de reliquo ejusdem repentinae mutationes studiose vitentur, quæ certe magnam potentiam par-
tes .

tes semel læsas afficiendi possident, quod ii testantur, quibus quædam partes vulneratione, ulceratione aut punctura læsæ fuerunt, ita enim fiunt imbecilles, ut levem etiam in aëre mutationem subito persentiscant. Frigidus calore camini, calidus consperzione per conclave aquæ frigidæ & foliis recentibus salicis, quercus, nymphææ, gramine, solaresque radios arcendo alteratur. Purgatur vero & emendatur simul suffimigiis debite adhibitis; adhibentur vero debite, si adhibentur per intervalla non adeo fumida, aut crassum nimis fumum edentia, neque homines se in conclave recipiant, priusquam fumus dissipatus sit. Crassus aër corrigitur per herbarum florumque atque aromatum fragrantia effluvia ut materia generationis spirituum animalium evadat. Talis aëris correctio autumnino & hyeme præsertim quærenda atque magis adhuc in constitutione forte aëris epidemica, prava, quoniam hæc anni tempora convalescentibus maxime sunt funesta atque imbecillia ejusmodi corpora promptissime contagio afficiunt. Aërem in humilibus locis purum tamen ejusmodi debilibus & animo linquentibus commodum pronunciat *AETIVS Tetrabibl. Textu I. Serm. 3.* Conclave (quod aëris conditiones sequitur) quod alterat aëre alterato, in quo degunt convalescentes, sit non terræ vicinum, sat serenum & lucidum aut illuminatum, lucis enim splendore animales spiritus mire delectantur atque animus exhilaratur, ut obscuro contristatur. Sit & sat spatiosum ac altum beneque repurgatum. Dein non morentur semper in umbra & intra conclavis parietes, sed sensim liberi aëri eique convenienti & salubri iterum adsuescant, diutius hucusque inclusi: perquam acceptum certe salubreque convalescentibus est, quando ex concluso tali aëre in liberiores aëres veniunt, atque citius pristinas vires colligunt. Huc trahi atque suppeditari apte posset monitum illud, quod *MARS. FICINVS Lib. II. cap. XII.* senibus dedit, inquiens: *hyeme velut oves aprica petant, æstate velut aves amœna viridaria rivosque revisant, frequenter inter videntes versentur plantas, & suaviter redolentes: hæc namque viventes spirantesque conspirant ad spiritum hominis augendum.* Sed paulatim & nonnisi priusquam cibos bene appetant beneque dormiant hæc mutatio fiat necesse est, quoniam multi præsertim teneriores & sensibiliores maxime, qui cephalicis morbis inprimis hemicrania ut & tussi ferina & similibus laborarunt, liberiores auram vix perferre possunt, unde scotomia præsertim afficiuntur: quia spiritus animales adhuc debiliores sunt, aërem gravem maxime & elasticum tolerandi haud pares sunt. Immo radiis solaribus ad tolerantiam & recto bene capite corpus exponant, qui corporis universi vigorem excitant

tant & perspirabilia reddunt eaque foveant, spiritus collustrant & mentem serenant & exhilarant, prouti videmus, ex oriente sole, omnia animantia alacria surgere, lætari & ad omnes motus edendos & omnes functiones perficiendas plurimum valere: Hinc Veteres Romani insolatum senibus, in quibus calor nativus jam, aliqua ex parte remiserat, artusque tremuli, (qui convalescentibus æquiparantur) assidue commendabant, ut solis calore refoverentur atque adeo inter quotidiana valetudinis præsidia, quibus ad siccandum corpus ejusque habitum firmandum uti consueverunt. Vario modo eum, ut ex Antylo colligitur, adhibebant, unctione, arena maxime marina, arundine vid. SVETONIUS in *V. Aug. Cap. VIII.* frictione, atque nudi aut pellibus induti stragulis substratis, ambulando, sedendo, stando, cubando, variisque temporibus variisque locis, sub dio, apertis in agris, vel peristyliis vid. VITRUVIUS *L. VII. c. IX.* ædium tectibus in hunc usum adstructis, eo utebantur. Elegans hac de re locus est CICERONIS *de Senect. C. XVI.* *Agro bene culto nil potest esse nec usu uberius nec specie ornatus, ad quem fruendum non modo non retardat, verum etiam invitat atque allecat senectus: Ubi enim potest illa ætas aut melius aut æque calefcere, vel apricatione vel igne.* Similiter HORATIVUS *Lib. I. Ep. XX. v. 23.* de seipso scribit:

Me primis urbi belli placuisse domique

Corporis exigui, præcanum solibus aptum.

CONF. MERCVRIALIS *de Arte Gym. Lib. VI. c. I. p. 343.* PLINIUS *Lib. III. Ep. I.* de Spurinna sic scribit: *Illi in more positum fuit, ubi hora balnei nunciata est, in sole ambulabat nudus & Ep. V.* de avunculo suo scripto mandat: *Post cibum sæpe æstate, si quid otii, jacebat in sole liber legebatur.* Sic & de Gymnosophistis, Philosophis Indorum celeberrimis PLINIUS *H. N. L. VII. c. II.* retulit, eos, toto die contuentes solem immobilibus oculis, ferventibus arenis, perstitisse & C. CELSVS *L. I. c. II. p. 23.* *Melior ambulatio si caput patitur, in sole quam in umbra.* Addimus his, ex necessitate magis esse, superatis morbis contagiosis, tam cubicula & hospitia, quam lectos mutare. A febribus intermittentibus maxime liberati per aliquot septimanas ad templa, cellas, atque alia loca subterranea & fornicata, item aquas, fluvios, stagna accessio vitetur, ob humidum enim & frigidum aërem recidivæ prompte inducuntur. Robustiores facti, coelum mutare brevi longoque subinde itinere facto iis conducit plurimum, ut tanquam ex carcere liberati liberiores gaudeant alibi, quod HIPPOCRATES in longis morbis maxime thoracis optimum esse statuit. Igitur peregrinationes, quæ etiam animum, ingenti voluptate demulcent;

Bbb bbb

illius-

illiusque vires adaugent atque ad operationes suas perficiendas satis idoneum reddunt. Mensibus quidem anni salubribus, Majo, Augusto, Septembri, Februario, lentas commodasque instituant in loca, quæ salubri aëre & aqua fruuntur, nullis vaporibus noxiis & sanitati adversis ex stagnis, paludibus & fluviis tarde fluentibus evolutis confœdato, sed liberum, expansum, clarum, purum, tranquillum ac præcipue magnarum & populosarum civitatum fumis ædificiorumque umbra relictis, rusticarum utpote subtiliorem magisque perflatum optimisque ejusmodi qualitatibus præditum atque editiora loca ventis orientalibus ut saluberimis perflata, sibi eligant, mutatoque sic loco, qui huc usque tædio plenus fuit, ac mutato aëre forsân corrupto, per effluvia morbida, per tempus aliquod, ibi subsistant atque amicorum ibi visitatione & blandis occupationibus se delectant, usque dum restitutos in integrum ac satis iterum valentes corpore animaque (locorum enim indoles multum ad felicitatem animi atque ingenii contribuit) se sentiant. Valet hoc monitum maxime de illius coeli mutatione, quod ægrum fecit, ex consilio HIPPOCRATIS VI. *Epid.* Hac de re SENECA *de tranq. animi* C. XV. p. 541. eleganter scribit: *aliquando vectatio iterque & mutata regio vigorem dabunt.* hinc & GALENVS *Lib. de uteri cura*, corpore languentibus peregrinationem & equitationem commendat.

§. XVIII. Motus & vigiliæ, quies & somnus, rite & delectationis causa se excipiant, ut par est, licet in extenuatis a morbis corporis motus ut plurimum sit difficilior, molestior ac impeditior atque quies magis ab iis expetatur, siquidem non paucos eorum jam invenit Hippocrates, qui e cubili exsurgere timent, eaque oblectantur maxime segnitie laborantes moremque malum obstinate gerentes; monendi tamen sunt atque hortandi sedulo, immo excitandi extrudendique, ne corpus torpore rigescat & ut citius & facilius calor excitetur naturalis languescens & spiritus torpentes suscitentur crudorum atque liquorum coagulatorum, qui postmodum immoti nec perspirati corrumpuntur atque acescunt ac longas ægritudines vel fovent vel pariunt, collectio & detentio impediatur atque alimonie assumptio, digestio, distributio, nec non ejectio omnesque functiones instituantur, totusque corporis habitus reparetur, membraque firmentur excrementaque dissipentur. Motum hinc lenem citraque tamen lassitudinem præferant segni otio, eumque deambulatione eaque recta potius quam flexuosa (quoniam hæc sensibus adversa est caputque turbat animumque confundit) per loca plana, curru aut equo, moderata & placida vectatione, quæ præ aliis stomachum, se-

secundum ORIBASIVM vid. *Lib. VI. Coll. Med. C. XXIV.* & sanguinem, secundum SYDENHAMIVM vid. *eius Opusc. p. 521.* firmat, (unde & hic laudatissimus auctor hanc maximum confortans habet) aut cymba vel navis aut alia quavis agitatione, debito quidem tempore debitoque modo habitaque ratione, vitæ generis, consuetudinis aliarumque circumstantiarum instituant. Vtus & experientia moderamen monstrabunt, immo ipsæ vires monebunt, quantum in hisce instituendis valeant & quantum ferre recusent. Certe experientia comprobat ac ratio confirmat, languentes, vires pristinas citius recipere, si placido motu eoque gradatim suscepto quemque membra sustinere valent sine læsione & fatigatione corpus exercent; hic enim omnino requiritur, ut omnia in corpore humano rite peragantur; si vero hunc intermittunt, ipsum morbum revocare possunt: otiosa quies enim & immoderatio ad integrandam sanitatem moram injicit, quoniam præsertim humores mire incrassat. Si vires ad hoc corporis exercitium non sufficiunt, hancque facultatem denegant, certo modo nihilominus tamen se, vel quasi quiescendo exercere possint, sicuti oculi salubriter exercentur, si circumrotentur spectentque in aere libero, prata, sylvas, montes, flumina, obversantes homines variaque animalia oberrantia quidque hinc inde rerum geratur &c. de nocte stellas contemplantur, de die gemmas (quæ secundum BAC. VERVLAM suo splendore in spiritus operantur, roborant atque refocillant) picturas, statuas & similia quæ delectant; nec non lectitare etiam mediocriter, sic juvat, ut & cantare, quo pulmo ac pectus movetur & animus afflictus notabiliter demulcetur. Cæterum in rheda aut lectica gestatio proderit, aut ejus vicem supplet præsertim iis, qui lecto allegati adhuc jacere coguntur cum pannis, per totum corpus artus maxime fricatio frequens plus minusve aspera & comprimens matutina præsertim, posteaquam alvum & vesicam exoneraverint, utpote quæ & commodissime præ aliis calorem excitat atque alimentum dividit, adtrahit & distribuit, spirituscentiam promovet, partes solidas actuat torpidas, atoniam emendat. Qui secundum veterum institutum post frictionem oleo amygdarum dulcium corpus illinire vellet, non male ageret. Particularis frictionis species pectinatio est, hic admodum quoque commoda, quare assiduo capiti ea inducatur, qua per apertos poros partibus inutilibus exitus pateat & lymphæ in capitis superficie atque glandulis miliaribus torpescens, suscitetur. Antiquis pro reficiendis a morbo confectis usitatum erat illud remedii genus, quod picationem vocabant, qua picem, cum certa olei parte miscebant & in

formam malagmatis aut emplastri redigebant sicque calidum applicabant partibus prius bene fricatis aut deraſis calentibusque, hinc avellebant reiteratis ſæpius vicibus; mediantibus enim ejusmodi motibus alimentum citius convenientiusque dividitur, diſtribuitur, ſpirituascentia promovetur, ſpiritus excitantur, ut partes ſolidas actuent illæque torpidæ atomi laborantes reſtituuntur, ut fluidas reciproce impellant ſimulque membra firmentur, humorum reliquiæ eliminantur, calor excitatur & totius corporis habitus reſtituitur. Quando vires ferunt, paulatim ad conſueta munia laboresque redeundum, ita tamen, ne fatigentur ullo modo, quia vires iterum debiles adhuc dejicerentur penitus, non facile dein iterum reſarciendæ. Si enim corpore inedia confecto, non laborandum eſt juxta HIPPOCRATIS monitum *Aphor. II. 16.* etiam in hoc ſtatu labores conſueti inprimis fortiores, per aliquot ſeptimanas ſubinde omittant, atque omnes negotioſæ & ſeriæ actiones evitentur. Conſiderationem aliquam hic etiam meretur *Aphor. HIPPOCRATIS XLIX. L. II. S. VII.* Qui ſolitos labores ferre aſſueverunt, etiamſi invalidi ſunt aut ſenes, eos facilius ferunt, quam qui non aſſueti, quamvis robuſti & juvenes. Siquidem & hic & de aliis generatim monendi occaſio fert, conſueta deteriora in tali ſtatu magis prodeſſe melioribus non conſuetis. Quies vero longior propemodum magis confert iis, qui ex diarrhœis, lienteriiis, dysenteriiis ac cæteris ventris fluxionibus, convaleſcunt, quia ex motu & deambulatione iterum facile hæ concitantur, ſecundum CELSI monitum *L. II. de Re Med. C. VI.* quem frequenter citata alvus exercet, ſemper debet poſt cibum quieſcere, neque intendere animum neque ambulatione utcunque levi dimoveri.

§. XIX. Leniores hi corporis motus ad alternam requiem ſomnumque (ad quem ordinario quidem ſanis proniores ſunt) profundiorē, placidiorem longioremque invitant, qui maxime eſt optandus atque procurandus. Hic verum eſt afflictorum & laborantium ſolacium, hic ſolus languidos placat, demulcet & fovet, corroborat atque reſicit, cunctas actiones inſtaurat, varia incommoda impedit, calorem naturalem & naturale humidum adauget atque cito, largiterque nutrit, ſpirituum infirmitatibus medetur, nulloque fere alio remedio illorum reſtauratio & inſtauratio ſucceſſiva, nec non a multis morbis, in ſequentibus, præſervatio melius, quam mediante ſomno fieri poteſt. Hic panacea optima & ad reparandas ac recuperandas vires feſſæque membra levanda maxime neceſſaria, quo nihil utilius nihilque ſuavius hominibus accidere poteſt. Sine hoc

nullæ

nullæ sufficiunt epulæ, nulla ciborum & potuum assumptio nullaque validiorum etiam medicamentorum pharmaceuticorum propinatio: Nam ut liquida solidis apponantur, quiete opus est, qua optime earum partium connexio instituitur, motu vero auctiori & fortiori, vigilia, febrili sanguinis commotione impeditur & imminuitur. Virtutes etiam spirituum per quietem ab externis laboribus, intus revocantur & evadunt fortiores unitæ, quam per membra extrinseca dispersæ, ut hinc occultum vitæ pabulum somnus merito dici possit. Hujus encomium scite OVIDIVS II. *Metam.* expressit:

Somno quies rerum, placidissime somno Deorum

Pax animi quem cura fugit, qui corpora duris

Fessa ministeriis mulces præparasque labori.

Non solum his nocturnus somnus consuetus isque longior interdum sufficit, sed sæpius quandoque est capiendus & de die post prandium inprimis quærendus, spiritibus animalibus vegetioribus existentibus, intro magis quam extra, ita ut membra potius in quietem, quam ad motum sint procliviora: nam sopor amicus & valde blandus irruit in homines post cibum captum. Licet pomeridianus alioquin noceat, tamen adsuētis ita & convalescentibus concedendus: Et si sponte sua non succedit manuum lotionibus, pediluvii tepidis, inunctionibus in plantis pedum, ex medulla & pinguedinibus animalium, balneo aquæ dulcis, epithematibus & frontalibus capiti applicandis hypnoticis, ex anetho, floribus nymphæ, sambuci, foliis salicis, lactucæ, semine papaveris cum camphora, croco ut & lithargyrio cum aceto & similibus coctis, s. aquis appropriatis ut anethi maceratis, capiti supposito sacculo crocato, emulsionibus seminum quatuor majorum & minorum frigidorum, ac amygdalarum dulcium nec non crocatis maxime quæ inter hypnotica existunt optima hicque satis tuta assumendis, aliisque procurandus. Invitant quoque ad somnum & delinunt sonus aquæ cadentis, symphoniarum cantus levis & ex longinquo lene sonantium & quæ sunt ejusmodi alia. Verum opiata & magis adhuc narcotica aut stupefacientia, præpostere sæpe ad somnum conciliandum, convalescentibus præsertim ex capitis morbis ab incautis practicis solent præscribi, quia enim sulphure suo tetro & vaporoso in nobilissimas corporis nostri partes, quæ sensus & motus exerunt, agunt, sedant motus humoresque incrassant, somnumque turbulentum efficiunt, acerrimo & omnes vires frangente labore plenum, hic maxime nocentissima sunt. Veruntamen Endimionis somnus calamitosus habendus. Decubitum, licet etiam non dormiant, diu servant in lecto, in-

primis matutino tempore; sub hoc enim blando lecti tepore corpus fovet & placide quiescunt, præsertim diaphoresis, quam natura eliminandis morborum reliquiis occupata, nonnunquam molitur, laudatissime continuatur, quare tunc non volutando eoque se denudando refrigerium quærant, ex qua intolerantia, vires protinus labefactatas sentient; non nimis vero elato capite recubent, eo enim pacto vires commodè restaurantur, quoniam circulatio sanguinis, quæ etiam succum nutritium ad partes vehit, in se jam difficilis, apprime ad caput sic juvatur ac ascensio perpendicularis facilior redditur, ut sufficiens accedat, ad spirituum animalium generationem uberiores, materia. Cæterum reponenda sunt membra ea figura, qua maxime soluti sunt musculi motionis instrumenta, brachia forment obtusos angulos, crura paulo minus porrecta ferventur reliquaque (membra) prout sese quiescentes senserint, maxime levare. Cubiculum, ubi dormiunt, aëre puriori gaudeat, nullisque effluviis humidis, malignis & foetentibus refertum atque obscurum esse debet, radiis solaribus nimis & lunæ splendore privatum, nec non frigidiusculum potius quam nimis calidum: concalescente enim hinc sanguine totum incenditur corpus & humor crudus ad cutim, quæ sub somno non parum remittit, propellitur sudorque præternaturalis elicitur, & si fieri potest, in loco edito, antrorsum ac versus orientalem plagam spectans illud eligatur, ut ventorum exinde spirantium roscidarum a rore nocturno per solem excitatorum & idcirco subtilium & levissimorum spiritibus animalibus affinium atque simillimorum, afflatus concedatur. Vigiliæ vero involuntariæ, ad quas tamen plurimi convalescentium proni sunt, quia inprimis materia dulcis, roscida, quæ juxta nutritionem etiam placidum somnum conciliat, est consumpta, siccitatem & debilitatem corpori majorem inducentes, maxime post capitis morbos nocentissimæ sunt quæ nervos magis debilitant, deliria & motus, convulsivos inducunt. In veneris exercitio, licet convalescentes primum, ut in antecedentibus indicatum est, ad hoc invitentur stimulenturque libidinosi sibi temperent, cum id imbecilles, evacuationibus nimis & variis emuncti atque adhuc viribus depauperati vix ferant, sed penitus conteruntur, simulque eo periculo se committunt, non modo recrudescentis morbi, verum etiam subitæ mortis, quod Avicennæ contigisse ex Sorcano refert NICOLAUS MASSA; nam si hocce post missionem sanguinis aut purgationem peractam, non solum maxime damnosum sed & lethiferum notavit ROD. A CASTRO in *Lib. III. de morb. mulierum Cap. V.* quanto magis in iis, quibus vires adeo sunt exhaustæ, periculosum habent.

bendum? Hæc intempeſtiva feminis & ſpirituum animalium excretionẽ univerſum corpus extenuat, diſſipando ſpiritus animales, lympham ſuccumque nerveum cruditates generando ac humores colliquando, partes benigno rore privando, tandemque calefacit ſanguinem & ſpiritus agitando. Talia pericula præcipue iis, quibus animi diuturniores affectus & vigiliæ intercucurrerunt, hæmorrhagiis gravioribus exhaustis, item poſt cachexiam, lentam febrem, deliria, ſpasmus atque nervorum vulnera ſanata, notante HILDANO, *Cent. I. Obſerv. XXII.* imminent.

§. XX. Secernenda & excernenda omnia præter ea, quæ per cutis poros aluum, urinam atque ſudorem fiunt, etiam reliqua, quæ per menſes, hæmorrhoides, bilem ſalivam, per fauces & aures, oculos & nares inſtitui ſolent, mature & convenienter ſecernantur, excernantur & abſtergantur, & in libero & expedito ſucceſſu conſerventur, atque cum circumſpectione & cura ordinentur. Præſertim res notiſſima eſt, quod ſane plures, qui morbo ſuperato ex ſola ſuppreſſa per ſubcutaneos tubulos ſordium exhalatione, in peſſimas ægritudines iterum incidant. Seorſim monendum, quod utplurimum convaleſcentibus ob humorum parcitatem alius juſto adſtrictior ſit, quare ea, lubricantibus, emollientibus & abſtergentibus, ut præter juſcula liquida, melle, ficibus, prunis, uvis paſſis, terebinthina, manna, cremore tartari & ſimilibus, ut & emollientibus & lenitivis clyſmatibus & ſuppoſitoriis ſolvatur. Hic tamen notandum venit, aluum demum ſponte ſua fluidiorem reddi, quando diætã ſolidiorem matériam fæcum præbentem, ſubeunt. Quibus ſecretionibus & excretionibus, dum aliena & inutilia eliminantur cauſarum antecedentium materialium, excretio promovetur ſimulque locus paratur ac ſternitur via, debitæ cralis reparationi atque nutritioni. Hiſque multa alia certius ſubſecutura præcaveantur amolianturque mala. Ad hæc felicius perficienda viæ per quas fieri debent, rite præparentur, ne commoveantur, irritentur magis aut potius confundantur, quam ſine ſucceſſu & exitu promoveantur. Præter hæc retinenda, ut retineantur, proſpiciendum. Singulare hic occurrit, quod aliquem locum invenire poſſet, ad ulteriorem obſervationem perducendum, quod peculiari exercitatione perquiſivit IOH. BAPT. SITONVS in *Miſcell. Med. Tr. XIII.* capillorum inciſionem barbæque raſionem, in convaleſcentibus nondum ſatis confirmatis, recidivam accerſere, & quod BARTHOLINVS in *Epist. Cent. III. p. 275. & ſeqq.* occasione caſus cujuſdam a G. SEGERO narrati. PAVLINI in *Obſ. p. 73.* A. REIES *Elyſ. Camp. jucund. quæſt. 82. v. 6.* obſervatio-

vationibus annotatis confirmarunt, causamque attulerunt, ac si capillum concisio, ac barbæ tonsura, in tenerioribus subjectis, id est, quorum cutis fibrillis sensibilibus est conflata, cito nimis instituatur, a novacula, irritatione, eadem irritatæ, imprimis accedente aëris externi liberioris ob remotos pilos sese contrahant sicque per cavernas pilorum exituri humores illorum fluxionem procreare & morborum reliquias in corpore forte latentes suscitare noxamque aliquam inferre posset. Ab animi pathematibus enormibus atque damnandis cum spasmodicis agentibus, quæ conturbant animum & ventriculum maxime lædunt & commovent humores & exsiccant, ut invidia, odio, mala cupiditate ad vindictam inhiante, tristitia, terrore, timore, ira, amore infano præsertim ut & vehementioribus & inordinatis desideriis, aversatione, tædio, eo diligentius sibi caveant quo magis ad plurima ejusmodi convalescentes præ aliis feruntur; magis vero ab iis læduntur. Siquidem & experimur exinde ægrius convalescentiam procedere ac morbos malignos accersiri, quoniam in talibus infirmis adhuc corporibus humores facile corrumpuntur, solidæ vero partes sphacelationem subire. Speciatim ex longiori tristitia non modo appetitus penitus perit, digestio minuitur sudor frigidus præsertim inferioribus partibus se exerit, sed & capiti & nervorum generi maxime infirmitas accedit, hincque facilis est ad apoplexiam hemiplexiam, paralyin, memoriæ abolitionem, guttam serenam ac melancholiam, transitus. Siquidem & in iis vis phantasie, atque efficacia animæ, se magis in ejusmodi sensibilibus & imbecillioribus, quales a præcedente morbo enervati sunt, sese potentius exserit. Cæterum præteritis malis obliti, adhuc patientiæ dediti, certissima spe (dulcissimo affectu & ipsa sæpe possessione amabiliore) in Deum confixa de cito evadendi ab omni residuo morbi atque mox recuperandis viribus pristinaque sanitate atque bona constantique salute fruuntur: magna enim spes sanitatis est, sanari velle, ut belle SENECA dixit.

§. XXI. De reliquo ita agendum cum iis, ut omnia, quæ animi perturbationem afferre possunt, omni studio vitentur, ex adverso vero omnia adferantur, quæ grata sunt, ac ad gaudium & læticiam corpus & animum mire recreantem, gestibus jucundis, facie serena & nitida, oculis splendentibus, ore ridente, corde & arteriis celerius pulsantibus, testibus, facere possunt, quæque in oblectationem venire solent, verbo: ut lauta edant lautaque bibant, ita & læta agant lætaque videant. Ad insolita quoque quandoque facienda mutatio, ut novitate honestorum oblectamentorum allekti, corpus & animum recreent, alant pascantque
foli-

solitudines fugitent atque diverticula hujus otii quærant, ac jucunda cum amicis & sodalibus atque cœqualibus juvenibus præsertim & recte valentibus, consuetudo & conversationes atque colloquia faceta (evitando tamen nimiam loquacitatem, quæ præsertim, iis, qui hæmorrhagiis, sanguinis sputo morbisque pectoris & similibus laboraverunt, nocet,) animique aliæ quovis modo relaxationes frequenter instituunt, vitamque a curis, metu, dubitationibus, vacuum ducant, & seriis & gravibus negotiis, studiis atque profundis meditationibus & lucubrationibus non incumbant ut apposite hortatur. CASP. BARLAEVS P. I. *Epist.* 40. p. 160. ad Hugenum scribens: *Nec literas nec versus rescribe, ne in novum discrimen valetudinem dubiam adhuc adducas; facile enim dum neuter adhuc status est, ex attentione, meditatione incallescet spiritus.* Potius amœnis atque lætis meditationibus & contemplationibus, tranquillitati, rememorationi rerum amabilium, bene actæ vitæ recordationi, ex qua sane, facillime lætitiā & voluptatem magnam eamque sinceram capimus, quæ tam solida delectatione reficit novasque quæ subjicit spiritus, ut & musicæ, tam vocali quam instrumentali, vacent, quæ blandum sanguinis & spirituum animalium motum restaurant atque conservant. Immo ad jocosa ac ludicra humilesque lusus, quandoque iis descendere licet, quemadmodum Socratem jam senem cum Lampocle, puero super arundinem equitasse legimus. Quo consilio Aesculapium mimos & moriones Regum & Principum aulis primum induxisse putatur. In hanc rem notabile est, quod SANCTORIUS Medicus Staticus incomparabilis, semper post hilaritatem majorem perspirationem & decrementum corporis, ratione ponderis, observaverit. Idem præstantissimus Auctor. *Sect. II. Aphor.* 49. nihil magis reddit liberam perspirationem, quam animi consolatio, ait.

§. XXII. Ultimo tandem loco adhuc indicandum & paucis quidem duximus, pro quibusdam convalescentibus, non saltem sufficere, eo animum curamque intendere, ut pristinus sanitatis gradus recuperetur sed & præcaveatur, ne rursus recidivæ aut aliæ ægritudines insequantur, per auxilia pharmaceutica & diætetica sed & chirurgica hucusque reservata ne certi quidam morbi superati, redeant. Inter illa, venæ sectionem, inprimis si aliæ circumstantiæ, eam permittunt & vires sunt pares, illamque decentem nunc revulsionis, nunc derivationis atque adeo imminutionis causa, convenire immo præcipi autumamus. Præcipue e re erit post ejusmodi affectus perpeffos, qui a sanguinis & feri stagnationibus, ex suppressione mensium, hæmorrhoidum atque neglecta forte venæ sectione solenni ac consueta, orti sunt, uti in melancholia hinc

profecta, de qua SCHENCKIUS videndus. Aequè utilis erit ab hæmorrhagia & sudoribus nocturnis, a turgescencia sanguinis iterato recurrentibus, nec non, a catarrhis quotannis redeuntibus, præservandis. Et si forte virium debilitas timeatur, scarificatio hujus vicem supplere commode posset, (si modo sanguis redundans sat tenuis) utpote quæ, experientia id edocente, etiam largior, pariori venæ sectione minus debilitare assolet, immo potius quandoque juvamen præstat, ut pro intercutē fero & sanguine, in affectibus cutaneis præservandis &c. Nec est, cur in vulgi sententiam descendamus, per scarificationem saltem illum sanguinem inter cutem & carnem hærentem, ut efferunt, aut subtilem magis, per venæ sectionem vero crassiorem simul educi. Nec non cucurbitulæ sine scarificatione applicatæ aliquod emolumentum conciliare possunt, quoniam ab interioribus ad exteriora humorum relicta inquinamenta provocant eaque insensibiliter aliqua ex parte evacuant, simulque discutiunt, revellunt atque humorum in alias partes affluxum suspendunt ac cohibent, interdum motum sanguini conciliant; interdum etiam sanguinem profluentem, rursus sistunt, objectis partibus admotæ. Affectus qui has vel illas sanguinis atque humorum, alterationes, avocationes & subtractiones exposcunt, amplius & speciatim recensendi, sunt præ aliis graviores quidam capitis morbi, ut affectus soporosi, cephalæa, phrenitis, apoplexia, insania, ut & paralyxis, nec non alii aliarum partium morbi, ut abscessus pulmonum, colica, hæmorrhoidalis, renum calculus & nephritis, arthritis, cum ipsa podagra atque generatim quævis recidivæ. T. H. SYDENHAMVS ut videre est in *Opusc. p. 109.* ex variolis, convalescentibus pustulisque deciduis, ubi per dies aliquot, carnes, degustaverint, circa diem nempe primum & vicesimum, sanguinem e brachio extrahendum, censet, si morbus fuerit vehementior; cum inflammatio, quam sanguini impresserunt variolæ, sive adultus fuerit æger, sive infans, non minus venæ sectionem indicet, quam colluvies, quæ eidem accrevit, catharsin. Pro curatæ cholæræ recidiva avertenda venæ sectionem eamque iteratam commendatam legere est apud BONETTVM in *Merc. Comp. Lib. III. p. 12.* Huc referre liceat, quod post abscissos manu chirurgi artus sphacelatos plethora in sequentibus vitæ annis gignatur, & copiosæ sanguinis serique effusiones sequantur, sanguine, qui in nutritionem, rescissi membri, impendi debebat, copiosiore adeoque improporcionado, ad alia membra ruente, quæ venæ sectione adhibita, apprime possunt averti. Practici scarificatione etiam iterata purpuræ rubræ recidivam avertere conantur. Ex GALENO *ad Thrasib.* colligitur, pro iis, qui difficul-

ficulter, ad naturalem habitudinem rediguntur, eandem conducibilem esse. Conf. quæ supra *in fine* §. X. sunt adducta. Præter hæc legantur quæ habet WILLISIVS in *Pharm. Rat.* p. 103. de excitanda fontanella, iis qui redituram pulmonum vomitam, verentur. Denique hirudines etiam interdum pro hæmorrhoidibus iterum movendis simulque incommodorum variorum ut cephalalgiae & similium reditum impediendis, admoveantur. Usque adeo hæc omnia salutaria diligenter, quantum fieri potest, observanda, adversa vero atque nocentia, studiosissime fugienda sunt, quæ intemperiem, quæ ægrum afflixit, ullo modo revocare queant, quoniam obnoxia valde offensis infirmitas est. Si, hæc convalescentes semper observent, longe maximum præsidium valetudinis recuperandæ teneant; secus ex levi errore vel recidiva vel aliis morbis plurimis fiunt obnoxii, & mors potest accelerari, quia vires paucæ sunt & non satis firmatæ, quæ facilius perduntur ac dissolvuntur. Atque quoniam in superioribus pagellis quoque annotatum est, a quibusdam morbis animum quoque alterationem notabilem pati, operam quoque indefessam collocent, malæ naturæ inductæ reluctentur, juxta corporis animi quoque jacturam expient atque ad bonam frugem se recipiant, Optimi nostri Salvatoris præcepti illius memores: valde & ne pecces ulterius, ne tibi quidquam pejus accidat, simulque quam jucunda atque accepta sanitas, quam vero molestus verendusque sit morbus experti, eximium hoc convalescentiæ coelitus largitum beneficium, bene ac salutariter custodire impendereque addiscant.





XX.

DISSERTATIO
MEDICA - PATHOLOGICA
DE
MORBIS CONVALESCENTIVM.

PROLVSIO.

REs humanas omnes totamque hominum societatem pelagum esse, vere dicitur, quod nunquam non movetur, nunquam est placidum & tranquillum atque adeo malacia ibi perniciofa est: Hinc illincque quærelæ. Adeo nihil est tutum, nusquam certa atque integra fides, non hospes, ut Poëta exprimit, est ab hospite tutus. Foris timores angunt, domi vexant & premunt angustiae. Raro melius quid succedit, calamitas alia aliam excipit, plena sunt dolis, fraude, insidiis & periculis omnia, & fugato hoste uno, facile sequitur alter. Atque, ut hostis fugam sæpe simulat & abitum, ut tanto validiori manu & expeditius agrediatur & subvertat alterum, aut inducias concedit, ut majores sibi colligat vires, alteri vero nocentissimam securitatem addat, & quamvis pax esse interdum videatur, tamen fiducia pacis sæpe nulla est: Idem in morbis est lusus. Morbus ubique furit, statim ab origine pendet nobiscumque nascitur quidam, atque qui tot tantisque incommodis ac difficultatibus, corpus humanum diverso modo labefactant, ut pervidere vix queat, quæ cura, quæ sollicitudo & diligentia sufficere possit, ad eorum aggressus valide diuque sustinendos eosque penitus profligandos, atque quis artis apparatus expedire intricatas vitii & corruptas partes integritati, restituere satis valeat. Etenim dato uno eoque simplicissimo sæpe facile sequuntur brevi spatio plures, aut levi mora ille recrudescit, & qui miserorum ejusmodi superant, ut ajunt, Charybdim, in Scyllam incidunt atque ad vertigines varias, stipites, cippos, scopulos syrtesque offendunt. Ut est sua cujusvis morbi indoles, ut etiam sunt suæ cujusvis certæ origines & certæ progressiones, sic & certi comites cer-

certique pedissequi. Hæc omnia fluunt ab eadem artificiosissima corporis nostri constructione, cujus partes, quamdiu se recte habent, actiones congruas & structuræ illi convenientes; secus vero certo modo læsæ, certas actiones quoque læsas edunt. Est equidem finis universæ salutaris artis medicinæ absolute & per se, ipsa hominum sanitas vel conservanda, vel restituenda, licet per accidens ex subjecti scilicet variarum circumstantiarum culpa, suo fine non semper potiatur, etiam satis intelligens ac rationalis medicus. Quapropter in morbis curandis bene provideat, atque in quolibet eorum plurimas quæ se offerunt indicationes curatorias, præservatorias ac vitales hauriat, atque ita curet, seque ab empiricis etiam hac maxime ratione distinguat & ne officio suo postea obsit, convalescentibus, aut supina negligentia, aut imprudentia, (quæ bina vitia plus obsunt etsi multum prodest scientia) ac ne pulso quidem morbo, subsistat parum cautus; sed tum demum valetudinem & salutem revocatam firmatamque putet, si pristinæ revocentur vires, lætitia, alacritas, commune functionum exercitium integrum & constans. Hæc consideratio tanto magis necessaria est, quanto magis infirmi adhuc sunt offensis obnoxii. Hæc omnia si medicus secundum artem debite agat, probi, prudentis, periti, circumspecti providique medici omnino officium explevit, etiamsi non omnia semper ex voto respondeant. Quemadmodum enim orator, non semper persuadet, tamen ubique, si quod artis suæ est, fecerit, oratoris munus fecit. *Hoc enim, ut CICERO habet plerumque facimus, ut consilia eventis ponderemus & cui bene processerit multum illum providisse, cui secus, nihil fecisse dicamus,* & SIDONIUS APPOLLINARIS IV. ep. VI. *Absurdum est, si cæptis audacibus adversetur eventus, insurgere in querimonias & consultarum dispositionum culpabiles exitus ad infamanda casuum incerta confugere.* Etenim medicos sæpius criminatur & incusat ignara plebs, (& jure quandoque inculat) tanquam autores morbi relictæ, aut subsequenter verum etiam sæpissime injuriosa in innocentes illos invehitur, atque bacchatur. Consultius itaque ab his ducitur, si ex specula quasi prospectantes futuras tempestates adversus hæc tela scite se muniant, prænuntient, tempestive provideant, utiliaque remedia afferant, ita munere suo debite functi sunt, si omnia secundum leges & modos artis fecerint (cum medicina ars indefinita sit) atque curationem perficiant morborum, & curatione quoque facta scite utantur, ut solertes Imperatores bellicque Duces, reputant, ut est apud POLYBIVM Lib. X. c. XXXIII. Præstare: Victoria bene uti, quam vincere, adeo ut quibus munere suo apud ægros, usi fuerunt, apud convalescentes sit honor.

ne occinatur propemodum iis; quod post pugnam Cannensem, Hannibali, ut apud LIVIVM legitur: vincere scis, sed victoria uti nescis, atque de iis indicatur, quod de Hegesandrida Lacedemonio dicebatur olim; Fructum victoriæ perdidit cunctando. Ad debitam huius æstimationem placet, in præsentî de convalescentium morbis disserere, atque utiles & necessarias quasdam observationes afferre. Quem laborem quodque studium hanc in rem collocatum Deus T. O. M. ex alto secundet, efficiatque, ut in Sanctissimi Sui Nominis gloriam, proximique vergat commodum atque salutem.

§. I. **A** pud Ictos equidem valet, quod homo post morbum sanatum habendus sit, ac si nunquam ægrotasset L. XVI. *Quod sanat.* ff. *Aedil. Ed.* verum apud Medicos non item: Licet ægrorum quidam convalescant, & evadant ex morbis, vitia tamen insequuntur plurima, quæ læta sæpissime sanitatis initia infelici exitu evertunt, corrumpunt ac destruunt. Hincque tot Medicorum etiam optimorum frustrata interceptaque consilia, spesque optima ipsorum ægrorum plane dejecta atque conclamata. Etenim sæpissime modo ocysus, modo serius, vel ex levissimis interdum occasionibus, in non simplicem offensam, sed absolutum morbosum statum, atque adeo lethiferum sæpe exitum incurrun, quare optime monet GALENVS L. III. *ad Glauc. c. II.* Ne dicatur, morbum quidem curatum esse, hominem autem interiisse, quam in rem etiam HIPPOCRATIS verba notentur *Lib. de intern. affect. text. I.* *Qui curatus & sanus factus est, nisi sui curam habeat, plerisque revertens morbus causa interitus factus est.* Cum quibus coincidunt sententiæ, quæ 2. *Epid.* 3. 4. *Epid. text.* 18. 6. *Epid.* 2. 12. & 2. *aph.* 12. ubi sequentia leguntur: *Quæ intus in morbis relinquuntur in morbis post judicationem recidivas facere consueverunt.* Similem in modum loquitur BALLONIVS 2. *Epid.* p. 205. *Non oportet nos securos esse de morbis, præsertim si pars aliqua primaria laborat, donec nostros agros convaluisse viderimus, nam timendæ sunt morborum successiones.* Verum interim hoc manet: aliquem neque in morbi declinatione, neque sanato illo, sed subsequente mori, nam vix fieri potest, ut subactis causis morbificis, & natura superante, mors contingere possit. Morbi vero convalescentium, affectus illi præternaturales nobis audiunt, quibus ex morbis evadentes, vel iisdem revertentibus, vel similibus interdum vel specie & causa longe a priori differentibus, a variis causis oriundis affliguntur, quibus convalescentes diu quandoque colluctantur, & tandem sive evadunt ex iis, sive morte intereunt. Non loquimur autem

autem hic de omnibus morbis consequentibus, neque de metaschematismis morborum & metastasibus, quando morbus, superveniente alio, solvitur, qui labor ad multa volumina excresceret; sed de illis tantum qui per accidens magis, a prava dispositione corpori inducta, malo ægri regimine, aut medentium vitio præsertim contingunt.

§. II. Scilicet morbi, qui convalescentes invadunt, si calculum ineamus, nobis observare datur, quosdam illorum priorum plane indolem induere, ut nihil ab illis mutatos, & illos ipsos jure dixeris, alios alterius & diversi penitus generis esse; aliquos eandem sedem retinere, aliquos vero eandem mutare, aliquos rursus ratione prognoseos æquales, alios mitiores, alios vero deteriores & periculosiores ac difficiliiores, curatu aut faciliores deprehendi. Ex utrisque quoque morborum generibus & acutorum & chronicorum nimirum convalescentibus obveniunt morbi varii; Solenne vero propemodum est, ut sicut chronicos & longos, tales, ita acutos hi saltem quoque excipiant. Afficiuntur & partes fluidæ & solidæ, quatenus harum ut plurimum tonus, vigor ac robur relaxatur ut continuo tensus arcus debilitatur, unde nova facile stasis vel humorum corruptio emergit, rarius rigidus redditur; illæ quatenus vitiantur, corrumpuntur ac imminuuntur &c. Etenim palam est ex morbis gravibus diuturnis, valde corpus lædi, atque motus solidorum & fluidorum, maxime vero vires perdi. Ex virium deinceps languore, motus & circulatio sanguinis secretiones & excretiones debitæ segniores & impeditiores fiunt, exinde obstructiones & infarctus in hypochondriis & omnibus emunctoriis corporis exsultant, ex quibus, impuritas fit sanguinis & maxime feri. Si vero humores dyscrasia laborant, si emunctoria sunt obstructa, & multæ cruditates generantur, digestio depravatur. Ex chylo deinde pravo depravatur massa sanguinea & genus nervosum debile redditur, si ventriculus inprimis cujus actio systematica est ac liquor ejus gastricus, qui a primo statim morbi principio minus vigent, atque deinceps pari debilitate totum morbi cursum, si non majori percurrunt, debilitati atque enervati sunt, adeoque minus apti ad subigenda ac digerenda assumpta quo cruditates remanent ac cumulantur, atque intestina sordibus acidis & viscidis replentur. Si & reliquæ quoque partes quoad tonum perditæ sunt, enervatæ ac debilitatæ, dispositio morbifera fovetur, & subinde majorem efficaciam suscipit, vel alia admittit, si læsio quædam partibus quibusdam, visceribus profundius functiones lædens, a primo morbo impressa ac relicta est, ut erosione, doloribus immanibus &c.

§. III. Harum causarum, in genere si petimus scrutinium, aut ex medentium aut ægrotantium culpa sicque vi quasi coactæ aut, ex ipsis morbis eorumque indole, aut aliis supervenientibus modis atque occasionibus, eas exoriri comperimus. In his igitur res, tam naturales, quam non naturales ac præternaturales maxime veniunt considerandæ, ex quibus aut male se habentibus, aut male administratis ac observatis multa mala, ex equo tanquam Trojano, emanare possunt. Etenim omnis æque ætatis, omnisque sexus homines, his ipsis vitiis capiuntur, attamen pueri, adolescentes & juvenes ut rarius morbis laborant, ita citius faciliusque ex iis reluctantur, immunesque a morbis insequentibus magis manent, iis qui, quadragesimum annum jam superarunt, atque qui ad senectutem appropinquant, in quibus partium tonus & elastica vis jamdum ex parte est depravata. De sequiori sexu palam est, ut ægritudinem contractam diutius fovet & sæpius faciliusque in eam labitur, & citius magisque debilitatur, ita citius feliciusque ex illa eundem convalescere, citiusque pristinas recipere vires, morbis tamen, quæ convalescentibus accidunt, recidivis &c. præ altero magis esse obnoxium, sed non æque facile ex iis fato defungi, ac potiore sexum, sed etiam ex periculosissimis interdum morbis feliciter evadere. Teneriores & debiliores natura, præ robustis & delicato vivendi generi adsueta, præ variis iisque fortioribus laboribus & exercitiis, itineribus, variisque inclementiis aëris, frigoris, caloris &c. indurati quasi, atque firmati plus habent, quod metuant. Quamvis & hoc verum sit, homines sensibiliores & imbecillos frequentius vero morbis laborare facilius; vero convalescere diutiusque subinde vivere, illis qui natura robusti atque valentes sunt, rariusque morbis afficiuntur; adeoque iis sunt minus adsueta: nam consuetudo, in certis quibusdam, ægrotandi, in habitum degenerare quandoque videtur, atque motus morborum, in subjectis, sensibiliore solidarum partium textura præditis & ad motus quidem febriles & spasticos suscipiendos aptis, sæpius repetuntur; qui vero plerumque salutarem effectum exserunt, in resolvendis, discutiendis & auferendis pernicialibus illis sanguinis & humorum stagnationibus, quum alias morbis & morbi ansam suppeditarent. Verum quo minus adsueta homines sunt morbis eo gravius metuendum est periculum, ubi acutis febribus aliisque ejusmodi invaduntur. Temperamenti quoque, dispositionis hereditariæ, a parentibus, consuetudinis & corporis habitus, in hac quoque æstimatione habetur respectus, ita & animi perturbationum; qui enim durantibus morbis cura, metu, mœrore ac angore sunt afflicti majus peri-

periculum incurrunt, iis, qui patientia, fiducia ac spe, animum corroboraverunt atque excitaverunt. A terrore epileptica puella, recidivam passa est apud PLATER. invenienda. *Lib. I. Obs. &c.* Qui morbi in hyemem, ver aut primam æstatem incidunt, non adeo frequenter faciunt recidivas, aut alios quoque morbos, illis, qui autumnis: tunc enim a prægressæ æstatis calore sanguis ad pauperiem quasi reductus atque animales spiritus magis exhausti sunt, hincque natura debilis, quæ vix causas morbificas ex assè discutere potest; siquidem & evacuationes tunc temporis ut plurimum damnosæ observantur. Insuperque & morbi incurrunt, qui ex corruptis fiunt humoribus atque plures moriuntur; Vere vero, quando nimirum sol suavissimo suo calore ac vi, omnia vivificat, fovet, excitat atque foecundat, hincque calor natus potens satis est noxios etiam humores efficaciter dissolvendi.

§. IV. Haud leve periculum iis convalescentibus propositum est, qui saluberrima medicorum præcepta, de medicamentis rite adhibendis atque regimine debite observando &c. neglectui habent & qui exactam diætam non servaverunt, (siquidem hodie plerique ægrorum in medicos, imperium affectant, nec ab iis se regi atque moneri patiuntur, sed magis obtemperant cupiditatibus) v. gr. si in febribus pro extinguenda molesta siti & calore frigidum potum assatim hauriunt, aut si circa finem morbi & post illum appetitui, quo ordinario nimis præcipue juvenes feruntur, ad uberiora justo tamen esculenta quam potulenta assumenda, impense indulgent atque voraces sunt: Ast & hic hoc etiam dicere de ipsis medentibus habeo, quod in quovis interdum morbo languescentes ægrotantium vires, cibis restaurandas firmandasque arbitrentur adeoque non modo iis nimium nonnunquam voracibus uberiores justo victum indulgeant; verum etiam respuentes eum atque nauseabundos appetitui vim faciendo, multis modis, mediis ac medicaminibus, invitent, sollicitent imo cogant. Quo, officio certe ægrorum, curæ suæ, concreditorum, admodum officiunt ac obstant commodis. Nimia enim copia & assatim ingesti cibi ventriculum languidiorem atque in functione sua debilitatum aut vitiosis humoribus refertum, non modo moleste gravant digestionemque impediunt atque sufflamant, sed & eum corrumpendo, novas cruditates ingerunt. Si & chylicatione satis commode forte peracta laudabilis sanguini chylus infundatur, is ipse tamen ab eodem haud raro depravatur ac vitiosam indolem adeptus, novæ materiæ morbificæ materiam suggerit; Etiam si integer persistat, copiosior tamen subactionem, distributionem ac sanguificationem utilem & aptam secretionemque debitas deinde impedit salutes

massæ sanguineæ motus obtundit & sufflaminat, inque ipsa sæpius morbi ddeclinatione, reliquiarum morbosarum expulsionem prohibet commo- amque ad nova excitanda mala, recidivis &c. occasionem suppeditat. Aequæ graves noxæ manent illos convalescentes qui, forte liberiori aëri & frigidiori, humidiori præsertim intermittentes febres variolas, aliaque ex- anthemata cutis ut & dysenteriam, febrem acutam, morbum hungaricum, fluorem album similesque morbos perpeffi, sub vernum & autumnale tem- pus corpus exponant, ex quo, transpiratio & excretio impeditur & ad inte- riora recedunt retenta. Certe frigoris & humiditatis, in suscitandis antiquis periculis hic præprimis observamus efficaciam, quatenus humorum liberio- rem motum impediendo, robur partium minuunt, ansamque suppeditant, ut vitia pleno agmine irruant. Hyemali speciatim tempore abscessus in manibus, pedibus aliisque in locis frequentius apparent, quia scilicet ob cutis poros magis clausos materia per eos discutienda retinetur, intus. Porro si statim debiles adhuc labores consuetos vehementes, & multas motiones corporis ad sudorem usque & lassitudinem sensibilem obeunt, si bibant spirituosæ, si irascantur & nimium corpus moveant. Particu- lare quoddam etiam hoc habetur, quod ex observatione ingeniosissimi SYDENHAMI haustum habemus, vid. *Oper. p. m. 283.* quod in febre continua a se observata, si ægri declinante præsertim morbo diutius, quam par erat, pro una vice a lecto absuissent, in dolores vagos tandem rheumatismum & icterum eos incidisse; curati vero hi affectus fuerant assiduo iterum in lecto decubitu. Econtrario, qui otio & ignavia de- lectantur, nunquam plenarie convalescunt, sed varios morbos exinde incurrunt. Ex parte etiam denuo assistentium, committi possunt errores, convalescentibus morbos inferentes si v. gr. intempestive alimenta por- rigunt, animique passionibus iisdem movent, unde HIPPOCR. *S. I. Aph. I.* dixit, quod oporteat non tantum medicum se præstare oppor- tuna facientem; sed ægrum etiam & assistentes.

§. V. Perinde id se habet cum pharmacis, quæ sex rebus non naturalibus etiam adduntur, juxta operationes chirurgicas & venena vid. *VESTI Instit. p. 80.* quæ si ab incautis aut imperitis vel medicastris peccantia quantitate qualitate & tempore inordinato, sique non debito modo, debitoque loco neque convenienti forma, dosi, subjecto, morbo, præpostere propinantur imprimis ubi obstructions internæ mesenterii &c. subsunt, convalescenti- bus tristem memoriam relinquunt, quoniam præsentibus morbos magis corrumpunt & ad futuros disponunt. Taceamus quod singula fere medicamina si vera fateri volumus, licet etiam juvent attamen etiam aliqua

aliqua ex parte noceant, internas partium constitutiones lædendo; si-
quidem nullus fere spiritus chymicus, nulla salia ac sulphura, quæ omni-
um activissima sunt, quæque motibus alias qui vitæ negotium absolvunt
tuendis instaurandisque perquam idonea, aut pulveres atque nulla pa-
nacea, nullum elixirium vitæ, cordiale, aliaque gloriosis nominibus
superbientia, ea proportionem præparari possunt ut per omnia & in
omnibus, in principia vitalia & totam humorum massam æque perfecte
quadrent, sive ut alii loquuntur archeum custodem & conservatorem
vigoris nostri, in regularitate sua balsamica, salina, conservent. Cogi-
tes modo, quanta mala verenda sint, ubi in morbis chronicis, per tot
menses, tanta medicaminum farrago, ingesta sit. Hoc supponit GALE-
NVS IV. *Aphor.* 67. ubi bona remedia illa tantum dicit, quæ plus utilita-
tis quam damni afferunt & *Lib. de Opt. Secta* confirmat, nullum auxilium
posse impune administrari. Idem videtur affirmare II. *Metb.* II. ubi
exemplum de oxymelite addit, quod licet mala faciat, tamen bona esse
majora. Concinnum certe CELSI monitum est L. III. *Cap. II.* *Multum*
interest ab initio quis recte curatus sit, an perperam, quia curatio minus his
prodest, in quibus assidue frustra fuit. Figentia primo sint, quorum per-
versus usus, multa mala eaque majora quam a nobis exprimatur
infert: Notius est quam quod notissimum, acida, aceta simplicia & pro-
phylactica, composita, succus, spiritus, nitri, citri, vitrioli in febribus
ardentibus, acutis & præter modum exhibita, massam sanguineam & ex
illa secretos succos; bilem inprimis &c. nimis figere, obtundere, de-
struere, & secretionem omnium humorum laudabilium imo excernen-
dorum a retinendis impedire atque sufflaminare. Pari ratione nocent
præcipitantia, absorbentia, terrea terreo salina, antacida, testacea, ustula-
ta &c. sub forma pulverum inprimis, in morbis acutis & intermittenti-
bus febribus, copiosius devorata, aut præmature nimis in primo statim
morbi principio neglectisque debitis evacuantibus, aut per morbi cur-
sum demum interpositis iis. Certe in praxi error hic communis quotidie
erratur, quod alterantibus per temporis quoddam spatium continuatis
evacuantia non interponantur. Sic e. g. EHR. HAGENDORN *Histor.*
med. phys. cent. I. Obs. VI. p. 162. recenset, de foemina quadam, cui ex
febre ardente laboranti a medico quamplures pulveres interpositis jule-
pis acidis, erant præscripti, quibus frequenter nimis exhibitis æstus
quidem febrilis cessavit, sed in tantam incidit cardialgiam, ut ob con-
tinuos dolores cor comprimentes & præfocantes, per mensis spatium
nil, nisi jusculis, cerevisia calida, & medicamentis liquidis uti cogere-

tur. Hoc intuitu, vix tolerabilis, ac nunquam excusandus certe error in superioribus temporibus, qui cum magisteriis (mortuis & inertibus calcibus & terris) vix tanto nomine dignis, largiter propinatis, fuit commissus. In hunc censum, merito veniant practici illi, apud vulgum, cautissimorum medicorum noti, qui præter modum confidentes & tantis cervicibus, nihil præter illa audent, quibus vero ægros suos tandem in sepulcrum præcipitant, reliqua etiam media naturæ tanquam calida nimis suspecta habent, quibus statim animam, velut volatilisari credunt. Hæc nostrorum quorundam subtilitas est, sed profecto nimis crassa. Illis enim diu in stomacho inhærentibus statim figitur materia peccans, vix deinceps extricabilis, concentrata quasi detinetur magis magisque tractu temporis corrumpenda, moxque data levi occasione ad pristinum genium redeunda, liquor gastricus suffocatur atque extinguitur penitus, & sic multa mala infertuntur. Insuper & digestio prima, mire impeditur, ex qua spirituum inopia, & ex illa languor diuturnus, anorexia, cardialgiæ, obstructions alvi, pedum tumores aliaque primarum viarum, mala oriuntur. Pariter observavimus, ob abusum salium fixorum v.g. in intermittentibus, ægros licetii convalescant, tamen debiles manere diutius, atque appetitu prostrato, & interdum pedum tumore œdematoso, affici.

§. VI. Prorsus nihil abest quin, & martialia, herculea alias, certe remedia, in quamplurimis morbis iisque maxime diuturnis & pertinacibus sint nocentissima. Quando, quod turpe quidem dictu, sed verissimum est, multi vulgarium practicorum sæpius copiosiusque aut sola ea, aut terreis conjunctis, tantoque deteriora reddita, sine adjectis salibus, sine debitis diluentibus, sine interjectis evacuantibus sineque aliis debitis cautelis aliis non longius quidem hic recensendis rite observatis humoribus non bene præparatis fluxilesque redditis &c. magnis cumulis ingurgitanda porrigunt, stomachumque incrustant, & quasi ferruminant simulque materiam peccantem magis incuneant atque compingunt. Etenim, quamvis martialia eum in finem propinari solent ut obstructions tollantur, nihilominus attamen comperimus, eorum agendi modum maxima ex parte in adstrictione consistere. Etiam si quædam leviores particulæ, in Marte latent, quæ sudoriferam, deobstruentem virtutem exerere valeant, tamen per vulgares præparationes vix a reliquis separantur, sed constringentes plures remanent, quæ aperientes supprimunt. Suspecta hæc in specie sunt lienosis atque iis qui cum malo hypochondriaco conflictantur, in quibus spasmi quidam subiunt atque partes internæ contractæ & hepaticis, ubi

ubi metus scirrhescentiæ subest, dum subtile speciatim acidum quidem absorbent, crassius vero ad majorem indurationem disponunt, ut recte animadvertit TACHENIVS *Clav. C. VIII. p. 181. 192.* Quid exinde sequatur, quivis satis intelligens facile hariolari potest. Certe crudelior subinde morbus vel recidiva, vel morbi novi eique subinde peiores, propululant. Inprimis cachecticis & hypochondriacis improvide ejusmodi exhibita tumores gignunt œdematosos.

§. VII. Intolerabilior adhuc error est, in adstringentibus ut saturinis &c. quando febres, narium hæmorrhagias, hæmoptyses, hæmorrhoidum fluxus, choleras, diarrhœas, dysenterias præpostere statim & ubique adstringentibus brevi inhibent, eoque ipso honori sibi & gloriæ ducunt, morbum incantatione quasi curasse; sed sciant illi thrasones cito quidem sed & tuto curationem esse instituendam, & utili alias adagio, Festina lente, etiam in medicina, locum esse concedendum. Quam sint vero nocentes, qui hoc monitum negligunt vel ex hoc nemo non potest cognoscere, quod proveniant exinde insania, apoplexia, pleuritis, viscerum sphacelationes, immanes dolores, renum, sanguinis vomitus, hydrops, epilepsia, ophthalmia ipsaque cœcitas multaque alia mala. Sic BLANCART. in *Collect. Phys. med. Cap. IV. p. 566. obs. XXV.* refert ex diarrhœa præpostere adstringentibus tractata quendam in delirium & cœcitatem, per vices recurrentem, incidisse. Ex omnibus omnium fere nulla magis nocentia sunt quam narcotica, opiata nimia, & sedativa spirituum motum compescentia, quando scilicet vomitus, aut diarrhœa, dysenteria, colica, & similes morbi illa quidem, indicant. His enim in spasmis, doloribus, convulsionibus aliis, arthritide, nephritide &c. non modo mala pejora ac contumaciora redduntur, sed & inflammationes ac quæ omnium periculosissima mala sunt, stases, maxime ventriculi cum singultu & maximis anxietatibus efficiunt. Ejusmodi tristes eventus in variis generis febribus consequuntur, quando natura in despumatione impeditur, & materia peccans magis figitur majores nœxas inferendas aptissima. In specie hic indicare volumus, dysenteriam quandoque, oboriri post phthisin, multis opiatis tractatam, ut etiam post alios morbos, in subjectis præcipue rarioris texturæ, de quo conf. WEDELIVS *Pathol. p. 649.* In genere dicendum est. Opiata, capitis, cerebri, & nervorum infirmitates, dolores gravativos, apoplexiam, & affectus soporosos relinquere, ob principium sulphureo volatile naturæ inimicum. Eadem pariter in hæmorrhagiis præpostere adhibita non modo debilitant magis, ut ægerrime in integrum restituantur, sed & peiores morbos

bos accersunt, recidivasque gravissimas, paresin, sudorem colliquantem, varios nervorum affectus, ac sphacelum; Ubi vero sudorifera, calida incaute adhibentur, quæ exagitatione putredinem humorum aucta, in intima corporis penetralia insinuant, maxime si alvus non debite fluat, res pessime præsertim in cachecticis, variolis, morbillis, purpura aliisque cutis exantematibus, cedit, præsertim si ante expurgationem primarum viarum exhibentur, affectus soporosos, cœcitatem, paxalyses, capitis gravativos dolores, cum aurium tinnitu & vertigine, producunt.

§. VIII. Eadem tragoedia vero frequentius luditur, quando hodierni practici, minime mali illi quidem, sed non satis cauti quascunque febres intermittentes (atque adeo etiam quidam acutas) quæ certe medentis exactum iudicium & prudentiam requirunt, famoso illo antifebrili, cortice Peruviano, alumine, aliisque partes fibrosas & nerveas constringentibus, tanquam Achilleis hastis profligare satagunt; Quisquis enim illorum hoc utitur cortice, ut sine cortice, quod dicitur vix dum posse natare videatur reputans, ac si nullam certiore nullamque præsentiore nullamque magis innoxiam harum aliorumque malorum panacæam, miseris mortalibus, a Deo Immortali, concessam esse; ast infelici sæpius exitu, certe hæc pervulgata medendi ratio instituitur methodo legitima non observata, imo plane contempta, ac si ea non opus haberent quæ tamen ut necessaria admodum omnisque medicationis norma regulaque laudanda. Præpostero sane abusu, hic priusquam materia impura peccans non penitus correctâ fluida, & mobilis facta, satis fuerit secreta & per vomitoria, (si modo fieri potest) evacuata, nec vasorum obstructions reserata, atque corpus a spasmodum vehementia, quæ omnes excretiones intercipit liberum redditum in subjectis præsertim tenerioribus plethoricis, laxiorisque corporis habitus vitam sedentariam agentibus, foeminei sexus, neque observatis conditionibus climatis, atque loci, ætatis, vitæ generis constitutionis hominum & aliis circumstantiis præcedentibus, concomitantibus exhibetur. Palam enim est, harum febrium impetu parum feliciter consopito, compresso atque fracto planeque retuso, non modo hæcticas pessimas casque frequentes, hydropes vix sanabiles, catharros suffocativos, pthisin, pleuritidem icterum nigrum, tumores crurum, scirrhum hepatis, lienis perpetuam appetitus dejectionem cum virium prostratione & artuum lassitudine totiusque corporis gravitate variarum partium doloribus præcordiorum anxietate, alvi adstrictione, contumacissima muci glutinosi in os scaturigine &c. exinde pronasci. Hostis in sinu imo ipso in sanguine nitulatur, qui quam

vis

vis non confestim pristinas aperte turbas certe concitare potest. Etenim, tantum abest ut cortex iste viscida incidat, ac attenuet, heterogenea proscribat & depellat, sanguinisque pristinam fluiditatem restituat, ut potius una cum reliquis humoribus eundem crassiores, atque densiores reddat, quo materia morbifica supprimitur, in pessimum statum abitura. Pessimum eorum in hoc curationis genere vitium est, quod viscera secretoria ita destruantur, ut ægri qui tum medico suo applaudebant & sibi gratulabantur, ita se levatos rati, ac si per miraculum sanati essent, aut si Deus aliquis ipsis medicinam fecisset, jam atque per totam sæpissime vitam exclament: Eheu Acesias nobis medicatus est.

§. IX. Sed & idem vitium in alia quamplurima adhuc medicamenta cadit: Videmus multos practicos, in eo etiam peccare, quod in morbis præsertim catarrhalibus & pectoris affectibus, tussi, asthmate, phthisi &c. atque ubi regressa præsertim vitiosa materia ad pulmones, dulcia & saccharata, loch, electuaria syrupos aliaque eclegmata eaque vix quicquam aliud præter nomen ab ingredientibus suis mutuata, pondere haud exiguo atque abominabili, præscribant, sicque pituitam generant, atque humores conglutinant, acrimonia molestant, ventriculum & digestionem adeo lædunt & laxant, ut obstructions atque exinde cachexia, hydrops, hæctica, asthma, inde sequantur. Præsertim scorbutici, hypochondriaci, & hystericae atque infantes, ab ejusmodi maxime læduntur. Hoc vitio Timæo, famigeratissimo atque optimo alias practico vertitur, quod in suis institutis curis, saccharatis, præsertim in illis oris, in quibus scorbutus admodum familiaris, abusus fuerit. Sequantur modo refrigerantia nimia & copiosiora, etiam nitrata &c. quæ quidem morbos quosdam, ut febres continuas curant, sed ventriculum admodum destrunt, lentas & hæcticas ægritudines efficiunt. Rursum si illi morbi fortioribus, ut tincturis bezoardicis, spiritibus, balsamo sulphureis aliisque pluribus ejusmodi tractantur, eveniunt facile pleuritides, aliæque inflammationes, affectus soporosi imprimis in senibus; In impuris vero subjectis & ad putredinem dispositis, simplices synochos febrium sequitur lubentissime putrida &c. Addimus saltem his, magnas aquarum salubrium, thermarum, acidularum, nec non horridas infusorum ac decoctorum lignorum, radicum herbarum potiones, ventriculum gravantes & extendentes, ad quas inviti urgentur ægri, præsertim in copiosis primarum viarum cruditatibus, & tono ventriculi & intestinorum laxato, a quibus oritur & fovetur morbus, ut v. g. in viscerum obstructionibus & febribus intermittentibus, de quo etiam conqueritur BAGLIVIVS *de morb. solid.*

solid. Per ejusmodi enim ad longos & incurabiles, non raro morbos disponuntur miseri patientes. Aequè mercurialia scorbuticis & impuris corporibus data, cum salivatione intempestiva & dentium vacillatione paralyfes dein, convulsiones & contracturas inferre apta sunt. Salina medicamenta cardialgias & omnes fere morbos ex salibus ortos exasperant. De aliis amplius dicendum est ut de evacuantibus quoque nimis, vomitoriis, purgantibus drasticis sudoriferis, diureticis: ea nimirum debilitare ægros & profusis succis ad vitalitatem utilibus ac necessariis & variis turbulentis agitationibus concitatis, (si non debito tempore & modo exhibita fuerint) ad alios morbos chronicos inducendos viam tritam sternere. Ordinario fortior purgantium usus, qui intestinorum tonum destruit, ad colicam flatulentam disponit. Sic MOEBIUS *Fund. Phys. p. 368.* & KYPERVS *Instit. Lib. II. cap. XVI.* ex nimis purgantibus bilis irreparabilem defectum, & ipsam mortem annotarunt. In hypercatharsi, alvi fluxionibus, & cholera potissimum, id frequenter evenit. Coeterum hoc est tenendum, quod, in declinatione morborum, vix aut nunquam purgatio commodum inveniat locum, ea enim, humores jam segregatos de novo confundit, & recidivam parit. Conf. de hoc WALAEVS *Meth. med. p. 37.* Equidem expedit, ut multorum morborum curationi purgatione finis imponatur, sed elapsis aliquot diebus puto VI. VIII. fugato penitus morbo atque non in die forte præteriti paroxysmi. Nullum quoque est dubium, purgantia temere præscripta, criticam & salutarem transpirationem per corporis habitum inhibere, naturam turbare ejusque motus atque efficere, ut vel tardius convalescant vel ægre nihilominus tamen, aliqua licet remissione dein se habeant. Conf. BALLONII *Pharm. Med. Lib. III. p. 73.* Nec non sæpius in quantitate peccatur, quando non modo in morbis longis & in valetudinariis subjectis, sed & in acutis præsertim, febribus contagiosis, variolis & morbillis &c. medicamenta magna in copia devoranda præbentur, præsertim in ejusmodi morbis in quibus a medicamentis ad quoddam tempus abstinere satius ducitur, quoniam medicatione assidua, acerbiores majori ex parte redduntur, quo nomine præ aliis affectio hypochondriaca, & melancholica, cancer occultus, memorabiles sunt. Huc forte spectat quod PLATO in *Tim.* dixit: *Certi morbi, certos suos sortiti sunt terminos.* Certe ex plurimus aliis morbis multi æque cito convalescunt eorum, qui medicamenta fastidiunt, ac illi qui ad omnia, a Medicis præscripta sunt facillimi. In forma tandem medicamentorum peccatur, quando meris pulveribus res conficitur omnis, ex quorum nimio usu

car-

cardialgia diu non raro remanere assolet. Insuper ii quoque medici delinquent in morborum curatione, qui nullum respectum ad temperamentorum diversitatem habent, quo sæpius efficiunt, ut tarde ad pristinam sanitatem redeant. Rei intererit quædam commemorare: v. g. sanguineos medicamentis generosis, vomitoriis purgantibus, salivantibus sudoriferis calidis & volatilibus citius lædi quam curari, quoniam talia non sine gravibus motuum vitalium commotionibus agunt, quibus vero non adsueta gravissime conturbantur & putredo speciatim humorum aucta in intima corporis penetralia insinuatur, maxime si alvus non debite fluat, res pessime præsertim in variolis, morbillis, purpura aliisque cutis exanthematibus, cedit. Non vacat, ulterius & ad specialiora procedere, omnes enim & singulos errores circa quæcunque medicamenta atque remedia, deplorandosque exinde infelices effectus perstringere, & circumstantias omnes adducere, quas cautelæ medicæ requirunt, Augiæ stabuli, in me susciperem repurgationem, atque res esset inexhausti pene longissimique laboris, limitesque dissertationis excederet, sed maioribus lucubrationibus, hæc relinquenda sunt, integris voluminibus explicanda: Quare, de multis modo pauca notare volumus & pleraque quam paucissimis, unicum hoc saltem addituri cum ubique ac toto die in illo delinquatur, scilicet observavimus illos etiam in illis præsertim morbis, ubi sanguis rarefactus, mobiles & exæstuantur humores subsunt, ubi transpiratio & sudatio fortior intervenit, certo peccare, qui more hodierno, sorbitionibus infusa & decocta theæ ac coffée aliaque id genus nimium ingurgitant, quo non modo tunc morbum augent, sed & difficilius convalescunt, diuque languidi permanent, si non graviora symptomata exinde consequantur, præcipue paralyses, ac fluxiones catarrhales. Nullum enim dubium est, quin sanguinis consistentia illiusque sulphur vitale (sanitas vero & vita in sanguinis robore consistit, ut scite edocet præprimis SYDENHAM) per ejusmodi diutinos & imensos calidos potus debilitetur, & sanguinis & humorum massa multis heterogeneis salino alkalinis, ex parte empyreumaticis inficiatur particulis, ac calor ipse motum intestinum accelerando, in succis vitalibus alienas partes gignat, atque præterea quæ insunt subtiliores reddat simul deteriores. Et ne de ejusmodi potuum calidorum noxa dubitationi ulterius locus sit, sistamus quod D. PISANELLYS *de Esc. & Pot. Fac.* de Sicilianis refert, illos, cum nimium assueti essent calidæ, obnoxios magis epidemicis & malignis morbis fuisse, adeo ut in unica urbe, Messinætum quotannis, ultra mille homines plus, quam postquam mutata hac con-

fuetudine, occubuerint. Nolumus longius recensere mala quæ improvidus thermarum, acidularum aliorumque fontium salutarium, quos vocant, usus sicque potius abusus, sæpe numero ingerit atque relinquit, saltem addituri, quod, in balneis aquarum calidarum utplurimum, ob sudores nimios profusos, sitis, macies viscerumque maxime ventriculi debilitas, insequantur.

§. X. Nec remedia ex fonte chirurgico hoc periculo expertia sunt. Si modo consideramus venæ sectionem intempestive aut largius celebratam, hydropem, haud raro subsequi, res est sine dubio clara. D. SENNERTVS in *Paral. p. 22.* refert, medicum Italum quendam, pleuritidem per iteratas venæ sectiones quidem curasse, sed eundem in hydropem immedicabilem incidisse ac ex eo interjecto quodam tempore mortuum esse. Simile exemplum ZACVT. LVS. *Lib. III. obs. Prax. adm.* commemorat. Quo simul scire licet, quod venæ sectione abutentes febres invadant; crebra enim sanguinis missione, sulphur massæ sanguis eæ copiosius congeritur, quia sal educitur, etenim sanguis, quo magis inveterascit, eo redditur falsior sale nimirum, præ cæteris partibus minus evaporante; hoc vero scatentes, minus in febres sunt proclives. Conf. WILLIS. *de Feb. Cap. IX. p. 108.* Præterea satis notum est atque manifestum, eos, qui frequentioribus justo venæ sectionibus debilitantur, viribus, morbo, & venæ sectione exhaustis, non modo convalescere lentius, sed & præsertim, ubi auram protinus frigidiorum admittunt, febres catarrhales, cum diuturna tussi ac intermittentes incurrere. Verum & parca nimis, producit non raro, morbo licet superato, ob quam indicabatur, novos & pertinaces tumultus, aut ad minimum, si non in formales morbos hi incitus erumpant, diu tamen male se habent, ut melius fuisset, si plane ab illa abstinuissent. Si ullo in morbo, certe in pleuritide, hac circumspectione opus est, nam si parcus nimis in sanguine detrahendo Medicus est, præter alia incommoda empyema præsertim, in spongioso corporis habitu, facillime subsequitur, qualia notanda exempla VERZASCHA *Obs. VIII.* & HEVRNIVS in *Comm. Aphoris. VIII. Lib. V.* habent; Sin liberalis nimis atque effusus sit, idem evenit, cum aliquoties repetitæ venæ sectiones expectorationem impediunt, ut optime BALLONIVS *Lib. II. Epid. p. 226.* advertit. Apud RIVER. *Cent. I. obs. 79.* observatio occurrit de juvene quodam, in quo decies plebotomia celebrata, pleuritis in empyema, degeneravit. Hoc quoque per sedulam observationem constat: ubi in excessu venæ sectione durantibus morbis peccatum est, crisi forte impedita recidivarum metum subesse. Quapropter

propter, in definienda quantitate extrahendi, per venæ sectionem sanguinis exacta, habenda ætatis, sexus, corporis habitus, pulsus, vitæ generis, consuetudinis, morbique ipsius, maxime vero omnium, virium, ratio. Longe alii errores non raro a chirurgis committuntur, qui vitia ingerunt v. g. haud simplice vice est observatum, quod vastorum vulnerum rhombo aliquantulum obturatorum hæmorrhagiæ recrudescant, atque annotarunt nonnulli, per hæmorrhagiarum ejusmodi recidivas, circa juncturas imprimis fungos molestissimos produci. Ejusmodi quoque id est: si chirurgus carcinoma quoddam si altiores jam egerit radices & ubi ad glandulas jam subaxillares serpat, aut ad musculum usque pectoris penetraverit, in subjecto præsertim cacochymico: Tunc enim recisum fere semper repullulat atque æger certe de vita periclitatur. Nolumus longius ad topicorum perversum usum excurrere, cum v. g. quotidie fere videamus, dolores arthriticos tumores erysipelaceos, cutis exulcerationes, scabiem pinguibus vel adstringentibus, tophos repressos, contracturas, convulsiones, febres acutas, inflammationes internas, spasmos atque in ætate senili præsertim affectus soporosos, ulcera profunda, viscerum corruptiones, sphacelationes, producere. Rursum in ophthalmia si frigida instillantur, læsio visus, lippitudo insanabilis imo plenaria cæcitas insequuntur.

§. XI. Ad res pr. nat. primario pertinent morborum prægressorum reliquiæ, futurorum materiæ eliminandæ, quæ naturæ ministri medici aut chirurgi culpa, ob insufficientem vel indebitam evacuationem ac remotionem retentæ & delitescentes subinde, massam sanguineam & spiritus animales varie afficiunt & conturbant, atque succendunt, aut morbifica materia in alium locum movetur, aliisque quasi intruditur partibus. Ejusmodi conversiones in febribus maxime continuis admodum sunt familiares, unde paralyxis, hydrops, abscessus subinde nascuntur. Audiamus hac de re HIPPOCRATEM *Aphor. 32. S. IV.* hunc in modum scribentem: *Quibus a morbo restitutis quippiam est infirmum, ibi abscessus fiunt.* Quem aphorismum HEVRNIVS optime sic explicat: *Quando post morbum infirmitatis aliquid superest, quæ ex lassitudine & imperfecta crisi judicatur, ita, ut supersint materiæ febrilis reliquiæ, aut si liberalius se potu & cibo ingurgitent, quam immutata ventriculi actio, temperamentum & habitus perferre possunt; tunc in discrimen venit homo, quia partes internæ & externæ labefactæ sunt, hinc si non accurata dieta accesserit, hepatis & lienis scirrhi, vel cephalæ vel foras in artus, si ibi imbecillitas, abscessus effunduntur.* Quare ne quid coarctetur, dentur pilule aleophanginæ, mastichinæ, vel

Rufi, vel tale quid. Spectat huc quoque *Aphor. XII. Sect. II. Morborum reliquiae, quae a crisi supersunt, reciduos morbos parere consueverunt.* Fit hoc maxime, quando ob fractam naturæ virtutem, sicut rursus bene id explicat HEURNIVS, materia morbifica non tota fuerit exclusa neque in declinatione alius purgante sollicitata. Notæ vero inquit reliquiarum morbi sunt oris siccitas, inappetentia, agrypnia, languor. Quare recte concludit idem auctor: plerumque jubemus, ne fiant recidivæ, ut quinto vel sexto die, cum jam convalescunt assumant tres vel quatuor pilulas de hiera cum agarico, vel mastichinas, vel syrupum laxativum, aut pillulas Rufi, vel aliquid rhabarbari aut passularum purgantium. Insuper in praxi sæpius experimur subinde, quod in febribus præsertim continuis, quidam humores, in parte aliqua colligantur, quæ congestio equidem nullos absolutos abscessus atque ulcera forment, nihilominus tamen faciles ad puris generationem se præbeant. Ubi ejusmodi casus recens adhuc ac cum impetu quodam protinus se prodit erysipelatis speciem induit ac inflammatio cum tumore se exferente, hoc rerum statu in latum & profundum ut plurimum serpit, quem phlegmonem dixeris. Interdum vix ulla alteratio tunc in parte affecta notatur, quod malum veteres apostasin, hodierni vero medici vulgo rheuma appellant. Singularem hujus rei speciem monstrant variolæ, quæ sæpissime ejusmodi apostases post se relinquunt, mox hanc mox aliam corporis partem occupantes aliæ exulcerationi similes quidem, nihilominus tamen talis nocua materia semper genium atque characterem pristinæ ejus & specialissimæ malignitatis retinet, atque ubi verus abscessus exinde insurgit, at tamen is vix pro simplici, sed malignæ energia constipata habendus. Hic non omittendum esse censemus, quod maxime in morbis acutis calore præternaturali magno stipatis, alteratio non solum quidam insignis & partibus fluidis & solidis inducatur, & humori cuidam aut parti certæ primario & profundius imprimatur, ex quo functiones læduntur, & dyscrasia ingens humorum, sive a coagulatione, sive a resolutione, prout namque indoles morborum fuerit, hoc proficiscatur atque erosio, distensio, exarescentia, exsiccatio, rigiditas solidarum exoriuntur. Hæ malæ causæ tanquam semina futurorum morborum adeo profunde quandoque quasi incoquantur, & intimiori unione (non simplici commistione) uniuntur, ut vix per vitam deleri possit, ut de lue venerea constat, quæ per plura lustra quandoque sopita manet, sine ullo incommodo manifesto ægri, tandem derepente iterum tyrannidem suam exercet, aut potius justas & promeritas pœnas easque

easque graviores infligit. BAGLIVIVS item venenum tarantulæ semel corpori illatum fere indelebile esse, *in Diff. de Tarant. C. VII.* opinatur; sic & observatum est, venenum a canis rabidi morfu illatum ad VII annos *Observ. GORDONII*, imo ad XXX usque annos remanere, stasisque temporibus quandoque redire, ut testatur *HILDANVS C. I. Observ.* In aliis quoque morbis non novum est, interdum materiam morbificam in partibus sine ullo indicio diutissime latere posse, nec observari, nisi ubi ex latibulis suis excutitur. Insuper in hac consideratione maxime morborum fiendi modus atque eorum quasi genealogia expendenda: Nam ex ægritudines, quibus nexus quidam intercedit sive in quibus Natura similes motus modosque instruit similemque finem intendit eæ etiam eo facilius alterationes suscipiunt, ut nempe aliæ in alias quasi transeant, ut in diversis maxime sanguinis fluxionibus videre est. Quoad læsiones externas unicum saltem exemplum producere placet, quod notatum est *in Ephemerid. Germ. Nat. Curios. Ao. VI. & VII. Obs. 77.* epilepsiam recurrentem, a sinistri pedis pollicis læsione, ortam esse &c.

§. XII. Universales vero & proximiores magis sunt causæ, quæ a solidis æque ac fluidis præcipue spiritibus animalibus, (quorum & deficiens expansio plus periculi auget quam nimia) tanquam necessariis corporis partibus deperditis, vitiatis ac læsis procedunt; nam vix ullus morbus est, sive ex acutorum sive ex tardis & diuturnis affectibus, qui non singula hæc vitia post se relinquit. Ex his modo notamus tum corruptionem atque depravationem, tum & maxime & sæpissime quidem consumptionem & defectum humorum laudabilium, ut sanguinis, lymphæ, seminis, salivæ, bilis, succi nutritii, spirituum animalium, circulum sanguinis atque humorum segnius lentiusque institui, discrasiam acido viscidam humoribus induci, obstructions minimorum vasculorum generari. Turbationem enim sanguineæ massæ in circulo subsequitur etiam ea in crasi, quæ consistit in illius impuritate aucta sive ratione particularum viscidarum, crassarum, sive salinarum & sulphurearum &c. Ut omnium humorum fundamentum est sanguis vitæ thesaurus, ita si hic sive in hæmorrhagiis nimis in puerperis, in abortu, in mensibus, præter modum fluentibus, in hæmorrhoidibus, sive a venæ sectione immodica, exhaustus fuerit, inprimis, pessimi pedissequi presso pede irruunt. Hoc perduto tanquam materia ac vehiculo spirituum animalium, a quibus vires motrices potissimum dependent, hi ipsi vacillant vasaque concidunt, unde motus vitam conservans & sanguinem ab impuritatibus depurans, lentior & impeditior fit, qui circu-

laris motus sic tardior redditus præparatur quasi ad motum subeundum intestinum peregrinum, sicuti enim motus localis corporis putredini resistit ita quies & motus ejus impeditus ad illam disponit excernenda eaque actiuosa remanent foras ejicienda ac cumulantur non modo in ventriculo & intestinis, digestionem imminuta sed & in venis, urinis copiosis plus minus turbidis & albis, testibus, ex quo mox glandularum atque emunctoriorum obstructions, viscerum infarctus, ut & totius corporis morbosus habitus, cachexia, leucophlegmatia, maxime lassitudines, hydropes, febres intermittentes, malum hypochondriacum in serosis & pituitosis subjectis, in cholericis vero & activioribus teneriorisque texturæ febres lentæ atrophix & phthisis insequuntur. Præsertim, ex hujus defectu convulsiones ortæ, multorum morborum gravissimorum imo lethalium causæ existunt. Sic etiam reliquorum humorum nimia evacuatione progignuntur æque gravissima mala, ut ex nimio sudore nimiaque alvi excretionem, salivationem enormi cholera, fluore albo, copiosiori, gonorrhœa insolentiori, ex quibus deficientibus partibus nimirum balsamicis mitibus, subtilioribus fluidioribus ad spiritus essentiam, chyli & sanguinis necessariis & aptis, loco sanguinis serum crude minusque spirituosum venas implet, hinc origo languoris lenti caloris, tumorum, catarrhorum, cachexiæ, atrophix, hydropis, paralyxis, soporis. Atque adeo ex nervorum quoque commercio atque consensu causæ quædam notantur, ut raucedinis post colicam, anxietatum, dolorum inquietudinum, maximarumque molestiarum in omnibus prope modum corporis regionibus. Tonus partium solidarum destructus, deperditus, labefactatus laxior justo redditus aut quandoque rigidus atque fibræ illarum remissæ, extensæ aut siccæ irritatæ constrictæ, crispatæ, convulsæ; quæ fluidorum itum reditumque impediunt adeoque & motus solidarum ac fluidorum in morbis valde immutatis lædunt & turbant functiones corporis humani variis modis, ut labem exinde inductam relinquunt. Juxta has malas causas, pressius materia peccans relicta in corpore adhuc aut non satis evacuata & correctæ vel sub morbis eorumque paroxysmis de novo semper aucta, exaltata imo producta explicanda venit: ea enim facile data deinceps vel levi interdum occasione iterum caput quasi erigit, atque vel priori forma & specie prioresque partes afficit, vel aliter alteratur & sub alia specie aliasve partes aggreditur ac vitiat.

§. XIII. Ordinaria fere vitia sunt eaque plurima leviora oculi concavi, siccitas oris, illaque saliva glutinosa, amaritudine vel alio ingra-

to sapore infecta, vacillatio genuum, debilitas virium, macilentus corporis habitus ac minus coloratus, lassitudo omnium artuum, molesta ac si conquassati essent atque contusi ita, ut quandoque neque quiescere nec moveri possint, quæ non raro ex ipsius HIPPOCR. observatione vid. *Epid. Lib. V. text. 41.* parit anxietatem, anxietas vero perplexitatem cum dolore. Nulli vero morbo pene familiarior est lassitudo, quam febribus maxime malignis atque catarrhalibus. Observavit, hoc jamdudum modo laudatus HIPPOCRATES *Libr. Epid. Lib. VI. text. 96.* quando inquit: *Lassitudines febribus ex catarrhis sunt familiarissimæ, quod per nervos aliqua pituitæ defluxio fiat.* Generali magis quoque notione audit cachexia a variis jam recensitis & in variis inducta. Dehinc pedum tumores ab humore aquoso subsistente (vitium enim & hæ aquæ vitales microcosmicæ in moveantur, vitium capiunt) nominandi qui præcipue in subjectis plethoricis, laxiore habitu corporis præditis, maxime foeminis vitam otiosam & sedentariam agentibus, post singulos propemodum longos ac graves morbos se monstrant, inprimis vero a febribus generi hominum frequentissimis & inimicissimis, calidum vitale balsamicum sanguinem & spiritus animales fluidorum motores depauperantibus, omnis generis, præsertim intermittentibus maxime quartana variolis præsertim confluentibus, morbillis, hæmorrhagiis narium, vomitibus & mictibus cruentis, hæmorrhoidum ac mensium fluxionibus immoderatis (uti & suppressis) alvi profluxu diarrhœa, dysenteria, malo ischiadico &c. Refert LISTERVS hos, in Anglia ordinarios morborum pedisequos esse.

§. XIV. Inter illos morbos, qui convalescentes ex morbis infestant generaliori magis titulo perspectæ sunt, tædiosissimæ horrendæ & valde nocivæ, recidivæ; siquidem tam medico quam ægroto, exacti jam morbi, is fallax recursus illudit, atque hic portum se invenisse putans, hoc horridum æquor, rursus trajicere, jactari fluctibus atque agitari procellis scopulis allidi fyrtesque incidere, ipsumque naufragium pati cogitur; ille vero æque maximo tædio afficitur, sisyphium laborem in se suscepturus. Aequè in morbis acutis ac chronicis, endemiis & sporadicis occurrunt, & interdum mitiores, interdum æquales ut plurimum vero graviores sunt ipso morbo præcedaneo atque temporis intervallo nunc breviori certoque interdum anni tempore nunc longiori recurrunt. Recidivarum aliæ ad solutionem tendunt, dum nimirum sensim paulatimque ad salutem simpliciter terminantur, siquidem & recidivæ quandoque criticæ observantur. Aliæ ad perniciem feruntur, dum signa scilicet recidivas

cidivas antecedentia, non modo sunt mala sed & concomitantia majorem malignitatem mortemque ipsam inducunt. Accidunt ex facili, ubi morbus sine ratione, aut bonis signis discesserit atque ubi præsertim imperfecte judicentur, priores morbi, aut non vera fuerit, aut imperfecta morbi per causæ proximæ debitam ablationem, solutio, sive si citra evacuationes manifestas & pro multitudine excrementorum congruas morbi solvuntur, sed materiæ peccantes tanquam mineræ scintillæ & reliquæ, vel quantitate vel qualitate peccantes, non satis expullæ aut alteratæ fuerint, atque fermentum quod vocant morbosum non penitus destructum repullulaverit, quæ rudimenta & rediturorum morborum incrementa, mox a levi occasione, juxta debiles naturæ vires imprimis a sex rerum non naturalium & externarum usu incongruo, in actum iterum deducuntur; Si nimirum superatis morbis maxime chronicis atque diuturnioribus, aëri liberiori & frigidiori corpus exponant, nimis cito ante primarum viarum repurgationem, genio indulgent intemperate, si appetitum urgentem copiosioribus cibis explent atque carnibus præcipue, ovis, jusculis pinguioribus & restaurativis quæ vocant & similibus bene nutrientibus vescuntur, aut liberalius vinum aliaque potulenta fortiora & inebriantia ingurgitant, si invenere & animi fortioribus affectibus minus sibi temperant aut alias exactas leges ac regulas, diæteticas inconsiderate negligunt, sique aliæ externæ æque ac internæ causæ subsunt &c. Proin offendimus illas in chronicis pariter atque acutis morbis, præprimis in febribus omnis generis, acutis ardentibus, inflammatoriis præcipue lentis, hæcticis; catarrhalibus malignis ipsaque peste, intermittentibus maxime quartanis, de quibus CELSUS *de Med. Cap. XVI.* jam monuit dum scribit: *Si quieverint diu, meminisse ejus die convenit, eaque vitare frigus, calorem, cruditatem, lassitudinem; facile enim revertuntur, nisi a sano quoque aliquamdiu timentur.* De aliis sic HIPPOCRATES loquitur *Coac. prænat. tex. 8.* *Febres si alio die quam judicatorio desierint, recidivam metuere oportet* & alibi ut *tex. 144. & 146.* similia docet. Febris epidemica in Leidensis Urbis incolas sæviens, recidivam habuit frequentem asserente FR. SYLVIO *Pr. med. Lib. IV. tr. 10.* De variis aliis porto notant. RHASES *Lib. de Mirabil. cur.* J. P. LOTICHIVS *Lib. I. c. V. Obs. II. 14. Cap. VI. obs. 2. C. VII. obs. 14. C. VIII. obs. 2. L. IV. c. I. obs. 9.* FR. DECKERVS *Med. Pract. c. m. m. Cap. V. & VI.* SIM. SCHULTZIUS *in Eph. G. N. C. Ao. VI. & VII. obs. 161.* aliique. Obloquitur quidem BOGDANVS non mediocris quidem sed haud scio an gravissimus censor *de Recid. c. V. §. 6. 7.* ac negat in chronicis & quæ lente solvuntur recidivas

haud

haud accidere, quod non solum crudi humores, qui morborum ejusmodi causæ sint, subigantur, sed etiam adeo benigne evadant, ut imposterum naturam non laceffant, verum etiam ut nutrimentum in corporis substantiam concedant. Sed experientia contrarium uberrime comprobatur, siquidem palam est, melancholiam hypochondriacam pertinacem, insaniam, capitis dolores, vertiginem, epilepsiam phthisin, asthma, hydropem, colicam habitualement, vid. JO. PET. LOTICHIVS *Lib. IV. cap. VI. Obs. 4. & 5.* icterum, vid. HIPPOCRAT. *Coac. T. 121. & Aph. S. IV. Aph. 62.* lienis tumores, vomitus varios vid. HIPPOCRAT. *Coac. Pran. T. 122.* GREG. HORSTIVS *Lib. IV. Obs. 5.* F. OS. GREMSIVS *Arb. Nit. & Ruin. hom. Lib. II. cap. I.* dysenteriam vid. DECKER M. M. *Cap. VI.* procidentiam uteri, arthritidem, podagram, nephritidem, purpuram, scorbutum, defluxiones rheumaticas, malum ischiadicum, luem veneream sæpius redire. Frequentissime fere omnium repetunt lateris dolor, apoplexia, paralyxis, hæmorrhagiæ & maxime hæmophthisis, quæ tunc impetuosior & copiosior esse solet. Nec est cur de reliquis morbis dubites, quod in endemiis, si vel a nativitate radices egerint, vel causa morbifica, continuo iterum inficiat, & in epidemiis superstite causa movente universali, æger, ex charybdi velut ereptus, ast debilitatus in scyllam iterum facile incidat; & quod si vel causa certa forte quadam peculiaris pertinax firmissime & alte reposita, vel ex contagio, sive alia quavis ab extra adveniente, sive in corpore pronata, miasmata plenaria removeri non possint, aut aliquid heterogenei intus absumpti remaneat, Interest exempli adducere observationem vel unicam saltem ex *Eph. G. N. C. D. I. an. 4. & 5. Obs. 127.* de lipothymia quotannis statotempore, ex accepto veneno recurrente. Cataractæ etiam recidiva sæpius contingit duplici quidem potissimum de causa, atque aut chirurgi operantis aut ægri culpa vel quod post detractionem pelliculæ interdum brevi nova generetur, vel quod ipsa deposita, vel post aliquot saltem dierum inter capedinem præsertim ubi adhuc & levior & imperfecta, aut non rite depressa fuerit, vel etiam levi quadam data occasione v. g. capitis motu intempestivo, & erectione, denuo elevetur. Abortum huc trahere licet, qui multoties interdum redire solet, quatenus ille imprimis respectum habet, ad primum non rite tractatum, utpote, qui si hic non adfuisset, alter non insequutus fuisset. Hernia per sectionem curata rarissime sine recidiva observatur, ob annulares processus, in musculis pr. nat. ampliatos, quos ita affectos, illorumque læsionem hiatus penetrant, ex facili intestina membraneumque canalem iterum vel laxant

vel rumpunt. Præter hæc hic quoque memorandum, quod sæpe abscessus & ulcera vel in eodem mox corporis loco, vel alibi sponte sua, renascantur ex pravis nimirum iisdemque copiosioribus humoribus, quibus quidem sufficienter exhaustis non erant reditura. Sic & ambustorum ulcera, post sanationem interdum rursus recrudescunt. Nec sicco plane pede prætereamus, quod nonnulli perhibent: Morbos ex fascino sic dicto, uti satis sunt diuturni molesti atque feri, ita & ordinario recidivam facere, uti id, (ut plura non adducam) ex Chodronchii filia patet, sæpius recidivam passa. Verendam recidivam esse ex sequentibus præcipue cognoscere licet: 1) ex parte quæ laboravit, si eadem imbecillis magis est, seu quando ejusdem elater, fibræ nerveæ, circulus sanguinis imminuitur & pori dilatantur ac infirmantur magis vel ex sua quidem natura, vel afflictione curationeque debiliori reddita, si quidem pars semel affecta atque laborans sicque debilis facta, receptionem facile admittens & ad se invitans ut plurimum retinet imbecillitatem, seu robur inæquale & quasi vicinarum partium evadit sentina, ut v. gr. pulmones, qui posteaquam sanguinem semel ejecerunt, facile ad istam ejectionem trahuntur, 2) ex morbo: Est enim ea quorundam conditio ut ex levissima occasione quamvis recte curati fuerint, tamen redeant, quoniam altiores radices egerunt & magna quædam vestigia reliquerunt, ut quartana, morbi maligni, & ex contumaci materia atque non facile mobili nati. Sic & periclitantur hydropici, qui licet recte curati, tamen maciem viriumque languorem cum siti atque hypochondriorum tumore, (quæ pessima sane signa sunt) superstites habent. 3) Ex tempore, quo laboraverit, nam propter tempestates quasdam etiam hi morbi, qui aliis temporibus vix revertuntur ceteris paribus etiam se recte habentibus, nihilominus tamen redeunt; 4) ex curatione qua tractata fuit, si talis est quæ morbum non extirpavit penitus. 5) Aequè ex ratione qua se habent convalescentes, si a levissimis causis læduntur, nec a salubribus juvantur. Hariolari porro eas licet recidivas, si homo imbecillus manet aut lassitudo ultro oboritur, si appetitus, præcipue si illi vires non respondent, quæ sive causæ externæ sive internæ debentur, corruptus immodicus (quoniam sæpe magis ab acido largiori quam defectu prævio & robore naturæ fit) si quidem magis congruum est, in morbis appetitum deficere quam excedere, aut prostratus, plane, nausea frequens, ventris cum ructibus vel acidis illis vel & maxime nidorosis inflatio & livor faciei, speciatim superiorum palpebrarum intumescencia perdurarunt, si spiritus male olet, si vehemens sitis orisque siccitas præsto est, si præcordia tument, si acrior

cum

cum siti percipitur æstus, si vigiliæ involuntariæ & somnus turbulentus conturbant si deficit urinæ sedimentum, si symptomata forte occurrentia non levantur, secundum MARTIANI testimonium quod sequentibus in *Comment.* perhibet: *Si sudor non tollit febrem, sed hæc remanet tunc symptomaticus est & morbi recidiva vel ejus longitudo expectanda.* Ad ulteriorem explicationem commemorare expedit, non solum pluviosum & frigidum præsertim atque autumnum, cœli tempestates inconstantes & inæquales atque juxta has certa loca, certas sed & hominum ætates & sexus constitutionesque & temperamenta, recidivis opportunissima esse. Sic v. gr. debiles, teneri, sensibiliores, ac incauti, ut & melancholici recidivas facile incurrunt. Conf. PETR. FORESTVS *Lib. VII. obs. 41. insch.* Cœterum & variæ aliæ externæ injuriæ simul concurrunt. Si quæris an recidiva peior sit morbo, hoc tibi responsum habeas, quod utique ut plurimum res ita sese habeat. Hoc cum veteribus, ut HIPPOCRATE *V. Lib. de intern. affect.* GALENO *L. III. de Cris. C. II. & L. I. de dieb. decret. C. I.* AVICENNA *ten. II. L. IV. tr. I. C. XCV.* plures nostrum pro vero accipiunt, neque nos ambiguum habemus. At enim vero, non diffitemur, ita censere, e re esse ut limitatio, (quanquam statutum alias firmumque sit, repetentes & recidivantes morbos, esse deteriores) quædam habeatur, ratione nimirum eventuum variorum & morborum & ægrorum diversitatum, occurrentium. Nam juxta illud, quod SYDENHAM omnem morbum, laudabilem naturæ conatum dixerit, & plurima ex parte recte dixerit, salutares quidem recidivas quandoque videbis, quando scilicet natura morbosas reliquias evacuat, v. g. arthritidem sanguinem depurantem recidivantem, si repuleris, periculum & mortem accerses, quare quandoque necesse habemus per remedia recidivam v. g. scabiem, podagram &c. retrocessam revocare procurareque; videbis insuper & pertinaciores & atrociores atque funestas recidivas ex apoplexia, lue venerea ex interna inprimis causa, febribus intermittentibus maxime quartana, hectica, hydrope, peste. Atque ut nullius fere affectus facilior recidiva quam pleuritidis ita & nulla periculosior est. Denique hoc scire licet, quo morbi citius revertuntur & quo vires simul infirmiores sunt, eo pejus esse. Casus quoque mere chirurgici quidam præter illos, quos jam adduximus occurrunt, qui recidivam patiuntur, ut luxationes præsertim. Inter has modo eam commemoremus, quæ os femoris sæpe divexat: Equidem vix fieri potest ut hoc os, ex acetabulo ossium innominatorum externa quidem vi dimoveatur, propter vastos musculos ac crassiora atque firmiora liga-

menta; articulum contegentia atque communientia; sed hanc luxationem accidere posse, ex affluxu humorum nimio, cui femur præcipue patet, potius reputandum est. Finitimi recidivis varii casus sunt, hi plus, illi minus ab hisce differentes, quod HIPPOCRATES indicasse videtur, quando *Lib. 1. Epid.* dicit, quod morborum alii fuerint recidivantes; alii redeuntes sive ingravescentes &c. Tales & alii plurimi apud veteres juxta HIPPOCRATEM, AVICENNAM, GALENUM &c. atque TADDAEVM Florent. *Comm. in Aph. XII. Sect. II. Hippocr.* PETR. APONENSEM, *Diff. 180.* JACOB FORLIVIENSEM *Quæst. 23. in 2. Aph.* aliosque occurrunt. Ejusmodi sunt epigenesis, metaptosis, metastasis, diadochis, transfusio, apostasis, palindromia. Rursus differentias inter recidivas & primum morbi insultum & morborum aliorum exacerbationes formant, Has nominasse saltem nobis sufficiat, singulas enim longius explicare non vacat. Conf. MATTH TILINGIVS *Tr. de Recid. Cap. VII. usque ad Cap. XVI.*

§. XV. Singularum modo partium corporis vitia proponenda & a capite quidem incipiendo, notamus, scotomiam molestant oculorum sphaericam figuram amissam ut quasi collapsi ii appareant; aurium tinnitum, auditus gravitatem, surditatem omnimodam, capitis algorem, memoriæ abolitionem, imo totalem perditionem familiarem esse iis, qui ex morbis variis diuturnis febribus præsertim tertianis atque quartanis nec non acutis, hungarica maxime atque ex affectibus soporosis resurgunt. Thucydides refert de febre quadam pestilentiali, quod omnes qui ea laboraverant, obliviosi facti fuerint. Mentis emotionem ab apoplexia relictam tradit G. MOEBIVS *Instit. med. Lib. III. P. III. c. III.* Dein vigilias involuntarias nec non somnum aut diuturniorem, aut turbulentum, irrequietum, terroribus & insomniis molestum nominemus, quo simul monemus, aliquando post violentos morbos, somnum modum excedere, sed eum conducere, quatenus defatigationi corporum conformis est. Porro monendum censemus omnes species affectuum sopororum post cephalalgiam diuturnam in specie apoplexiam post tormina ventris (quæ semper aliquid monstri alunt) ac lethargum ex phrenitide, & hydrope, post abscessus male judicatos, qui crementa morbida, in sanguine relinquunt, quæ deinceps in cerebro deponuntur, atque discussa apoplexia hujus vel illius partis, paralytin cum labiorum tortura, linguæ balbutie, imo memoriæ debilitate ac animi stupore sequi. Observavimus, variolis jam exsiccatis, juvenes quosdam, subito apoplexia esse extinctos. Catalepsin post ægritudines tempore resumptionis in-

ordinate atque impatienter agentibus facile obvenire scribit, COELIVS AVRELIANVS *de Morb. Acut. Lib. II. cap. X. §. 66.* Ex melancholia in maniam & vice versa, facilis admodum fit transitus, cujus ratio ex eo deducenda, quod in utroque affectu meningum cerebri vasa, viscido sanguine infarcta sint, cujus in melancholia tardior & difficilior, celerrimus vero in mania est progressus propter auctam meningum stricturam, quæ fortius sanguinem trajicit. Quoniam vero intensus ejusmodi spasmus languorem parti affectæ & flaccidæ redditæ imprimit, post maniam debilitas ejus subsequitur fere perpetua & difficilis tardusque per has partes progressus fit. Dolores atrociores & diuturni universum nervorum genus, adeo debilitant, atque tonum partium quæ sensui & motui dicatæ sunt perdunt, & epilepsiæ & paralyfi aliisque nervorum affectibus occasionem dant. Documento esse potest passim obvi-
 us gravis ille intestinorum dolor, colica convulsiva, cui frequenter paresis succedit. Inter quamplurimas hac de re observationes ea notabilis est, quæ apud AEGINETAM legitur *Lib. III. p. 251.* Referunt, plica Polonica abscissa atque curata frequentius demum paralyfin, cæcitatem, ossium malam conformationem obvenire, ob humorum excrementitorum, in massa sanguinea coacervationem & crassitiem ac acrimoniam eorum inductam. Nimia narium hæmorrhagia, ad capitis dolores, tumores, vertiginem, aurium tinnitum, ophthalmiam & apoplexiam disponit. Sic notum pariter est, e longo intervallo prægressos quosdam morbos, imprimis in ætate senescente, varios insequi. Apoplexias paralyfes & ejus species vertigines scotomias, suffusiones catarrhales, visus debilitates auditus gravitates oculorum conformationem depravatam, nunc adducamus; expertum enim est post morbos diuturniores evenire quandoque in quibusdam subjectis ut oculi sphæricam figuram amittant & quasi collapsi appareant. Referunt *Ephem. N. curios. D. III. An. II. obs. 260.* in febre continua quadam convalescente, subsecutam fuisse pupillarum oculorum amborum enormem intumescenciam & dilatationem, aspectu horribilem, cum pruritu molestissimo & destillatione serosi humoris magna. Alia quoque oculorum ac visus vitia, ut situm perversum ac distorsiones, strabismus, guttam serenam totalemque cœcitatem, indicanda. Talia ab epilepsia graviori non raro inducuntur. Post morbos acutos inflammatorios capitis remanet subinde amaurosis (ut & surditas) tota vita incurabilis forte quod obstructis inflammatione majoribus canalibus minores inde derivati, compressi & collapsi concreverint. Refert TVLPIVS *in Observ. Lib. IV. p. 361.* ex variolis & peste convalescentibus ac jam

recreandi causa in publicum egressis ex inopinato sive ulcus in adnata oculi tunica, sive caliginem in pupilla, aut aliud glaucoma prorsus immedicabile accidisse. Nec desunt depravationes gustus atque sapes molesti. Aurium intensum dolorem, cum febre acuta & coëteris aliquanto gravioribus signis, jam ad suppurationem cum delirio minus vehementi redactum, multis ætate profectoribus incurrere, docet HIPPOCRATES *Coac. prænot. tex. 189. & tex. 256.* vocis defectiones cum virium exsolutione a febre acuta notat. Observatum est, hemicraniam post puerperium sæpissime coëcitatem & quandoque phrenitidem relinquere. Catarrhi multorum morborum præsertim luis venereæ curatæ sunt soboles. Polypus narium ex ulcere narium curato, in pituitosis atque sero glutinoso mucido abundantibus, non raro inducitur. His adhuc addimus, pilorum & capillorum defluvium quod patiuntur, illi qui ex morbis vehementibus acutis chronicis, hæcticis, tabidis, aut ab aliis atrophiiis, febribus ardentibus, cephalæa, lepra, lue venerea, dysenteria, similibusque in quibus serum corrosivum peccat, convalescunt, idem accidit iis, qui inediam diuturnam passi sunt, & qui a venenorum potu corrupti ac a coitu immodico languent. Hoc forte adscribendum diversæ tunc cutis conditioni & statui: Durantibus scilicet morbis ex arescente cute, adeo nullum ad radices pilorum nutrimentum admittitur; cessantibus vero morbis, fibrosæ pilorum radices iterum emollitæ, uberius nutrimentum capiunt, quo pili prius exsiccati, foras protruduntur. Observatur &, quanquam rarius casus barbæ. Conf. LOTTICHIVS *Obs. Lib. IV. cap. II. obs. 2.* ex venenorum potu. Ex morfu serpentis capillos tabe quadam putrescere, & interire tum superciliorum & palpebrarum pilos defluere testatur AELIANVS *Lib. XV. Hist. Anim.* AETIVS *Tetrabib. 4.* SENNERT. *l. c. XXVIII.* de salmandra DIOSCORIDES *Lib. II. cap. LIV.* & PLINIVS *Lib. X. Nat. Hist. Cap. LIV.* & PLIN. *Lib. XXIX. cap. IV.* tradiderunt. Videbis & defluvium hoc a longiori in lecto decubitu apud eos frequentius, qui sub morbi cursu faciem stragulis nimis & frequentius iusto, cooperiunt. Notatu dignum est, ex capitis dolore, in ea parte quæ doluit crines decidere.

§. XVI. Ad morbos pectoris & thoracis pertinet primario cordis palpitatio ex debilitato nervoso genere oriunda. Dehinc hydrops pectoris, qui sæpe post asthma convulsivum suboritur, sive ruptis, sive etiam contortis in thorace vasis lymphaticis hincque libero sanguinis per pulmones itinere intercepto, ex quo feri per meatus patulos in pericardium ac incavitatem thoracis expressio urgetur, sequatur. Similiter

fyn

syncope quam cardiacam vocant huc venit referenda, quæ si frequenter incurrit præcipue in vehementer debilitatis, mortem repentinam solet inferre. Dein occurrunt asthma, quando præsertim ægri affectibus catarrhalibus & pectoris laborantes electuariis dulcibus, copiosis tractantur, vel expectoratio præmature adstringentibus inhibetur, atque adeo convulsivum, hypochondriaca passio & scabies, sanatione inepta retro-pulsa, parit. Infarctus pulmonum unde catarrhus suffocativus profectus quandoque visus est, si convalescentes a variolis & morbillis speciatim nimis cito frigori se exposuerunt, perspiratione nimirum negata aut crudo victu ventriculum oneraverunt. Item a morbillis præ ipsis variolis ut & tusses diuturnæ, peripneumonix sæpius præsto sunt. Idem rursus improvide tractati & quando excretiones alvinæ, vel etiam transpirationis insensibilis post morbum non debita arte procurantur, sæpissime asthma ac pulmonum infarctum a viscido acri humore relinquunt. Phthisis, ulcus & vomica pulmonum ac tabes, post hæmoptysin, ac hæmorrhoides adstringentibus intempestive & suppressas frequenter insequuntur; tunc enim præcipue in hæmoptysi sanguis tenuis ac floridus crassescit, putredinem concipit, vel serosus humor secedit tuberculaque ingenerat. Eadem accidit post pleuritidem vel peripneumoniam male curatam tussim diuturnam, & stillicidium frequens pituitæ in pulmones largas profluxiones sanguinis, item ex apostematibus internis, diarrhœa, dysenteria, diabete, hydrope, sudoribus immodicis, scorbuto, hypochondriaca affectione, calculo renum ac vesicæ, febre quartana, & ex doloribus immanibus, lue venerea, gonorrhœa virulenta, fistulis antiquis, fluore albo, chlorosi, suppressione mensium, arthritide, rheumatismo, febribus, ictero. De pleuritide singulares observationes prostant, eos nimirum plethoricos, qui contusiones graviores passi & quibus membra fracta fuerunt, post restitutionem pleuriticos fieri. Eandem solutam in abscessum vel empyema transire jam dudum HIPPOCR. passim scripsit ut in *Aph. VIII, Sect. V.* sequentem in modum: *Quicumque pleuritidi expectorabilem materiam intra quatuordecim dies non excludunt, iis in empyema degenerat, & Aph. XV. Quicumque a pleuritide empyici redduntur, ii liberantur, quando finem expectorandi intra quadraginta demum dies faciunt, intra quod tempus rupta est pleuritidis vomica liberantur, sin minus, in phthisin degenerant.* Neque etiam rarum est, post variolas & morbillos præsertim perperam tractatos, gigni in thorace inflammationem, quia hi morbi nunquam non pulmonibus infesti esse ac in iisdem labem & imbecillitatem relinquere solent. Ex lethargo convalescentibus quandoque in pectore suppura-

tio,

tio nascitur. Ab excretionibus variis ad cutem & artus laudabili quodam naturæ conatu, ut in scabie, podagra, retropulsa frequentissime catarrhus suffocativus præsto est. Addimus, fœminas, quæ ex uteri passionibus ægrotabant, sæpius in morbos varios thoracis incidere.

§. XVII. Circa morbos viscerum abdominis sequentes recenseantur observationes. Nimirum solet quam maxime a morbis graviter affligentibus, ventriculo præsertim & intestinis debilitas accedere, unde chylicatio læditur, appetitus enim minuitur, digestio perit, cruditas fit cumulus, egestionis alvinæ non recte procedunt, & sic æstus præternaturalis corpus ejusque vires lente consumens exsurgit, phlogoses & anxietates irruunt & omnia in perniciem labuntur. Hinc etiam mirum videtur quod appetitus sæpe adeo prostratus sit, ut licet per totum morbi cursum parum assumerint, tamen nullum prorsus famis stimulum sentiant funesto quidem indicio, quod etiam in annonæ caritate laborantibus habetur, si postmodum, cibos ad satietatem ingerant ut plurimum moriuntur, & cibus ore manibusque detentis exanimis prosteruntur: Nec mirandi causa est, sanguinis enim partes tantum crassiores relictæ, vappidæque redditæ sunt atque tota massa sanguinea particulis balsamicis exhausta, spiritusque animales depauperati, qui non sufficiunt ad functiones ejusmodi instituendas. Econtrario quandoque fames canina & bulimus se prodit, qui inconsueta appetit atque facile in affectionem cœliacam aut in dysenteriam aut hydropem terminatur. Raro tertiana atque maxime quartana, febres, quiescere solent, sine vitio aliquo visceribus, præsertim hepati, pancreati & lieni imprimis obstructione vel dolore vel durtie & subsequente hydrope illato. Vix ullus morborum frequentior est quam spastico flatulentus ille multis & variis pathematibus stipatus affectus hypochondriacus & in fœminis speciatim hystericus. Nam si elongatus ille alimentorum canalis nerveo membranaceus adeoque maxime sensibilis, a morbo præcedente læsus atque tonus & motus quem peristalticum nominant destructus, aut crusta villosa, per quam chylus transcolatur omnis, aut glandulæ solventem lympham præbentes obstructæ, aut bilis, quæ chylum corrigit, depravata, non potest non digestio & alvinarum sæcum exclusio decens impediri, multique humores crudi viscosi ac corrosivi, nervosas illas partes vexantes colligi, ex quo dein per consensum generis nervosi quoque debilitati anxietates, inquietudines maximæque molestiæ atque dolores in variis corporis partibus in capite, thorace, hypochondriis atque abdomine insequuntur. Is non frequentius ingeritur quam ex febribus ardentibus

dentibus atque intermittentibus, præcipue tertiana, quæ fomitem suum in ductibus bilariis, pancreatis ventriculi atque intestinorum valvulis ac flexuris imprimis habent, per constringentia medicamenta præpostere suppressis, præsertim si diætæ vitia simul committantur, si præsertim post morbos emaciantes, plus justo ingerant, ut inde nutritio etiam plenior justo reddatur, aut animi passionibus frenum non injiciatur. Flatus pertinaces molesti & dolorifici, & turgidus corporis habitus, ab atonia præcipue intestinorum pendens eorumque peristaltico motu, cujus vigore flatus & alia in intestinis contenta inferiora versus pelluntur, cum anxietatibus præcordiorum, & non raro sudoribus frigidis, in calescentia facile stipati, post febres intermittentes æque china chinæ & similibus præpostere tractatas incurrunt. Hi quoque vexant eos, qui a morbis immodice se satiant, ex quo multæ cruditates gignuntur, & quibus atonia ventriculi & intestinorum a morbis relicta est, ac motus peristalticus imminutus: tunc enim flatus non promoventur, sed detinentur intus, partes distendunt & dolorem insignem efficiunt. His consimiles ructus junguntur, qui sicuti in declinatione plurimorum morborum fere ordinario se produnt bono quidem signo, redeuntis scilicet coctionis quam vocant, in stomachum, indicio. Ita & illis abactis adhuc persentiuntur, maxime post fluxiones alvi diuturnas, ut choleram, dysenteriam, lienteriam. Singulare ejusmodi exemplum BORELLVS recenset *C. I. Obs. 62. No. 65.* de cive quodam, e Monte Pessulano, oriundo, qui ex morbo ei relicto ventriculo debili ructu diuturno per vitam molestatus est, ut frequenter inter duo etiam vocabula, ructum ediderit. Non solum autem molestus verum etiam quandoque nocivus est talis ructus si diuque durat, præsertim, uti ex observationibus constat obnoxios colicæ, hydropi sicco & humido cachexiæ vomitui & diarrhœæ reddit. Conf. SENNERTVS *Lib. III. P. I. S. II. cap. XII. Prax.* Consimilis affectus mentio facienda, qui tympanitis vocatur, quæ longis pariter febribus succedit. Ob hanc post morbos diuturnos maxime febres inductam intestinorum atoniam (quæ originem suam maxime a defectu laudabilis fluidi nervei & sanguinei ducit) ut & ob sanguinis & lymphæ crasin admodum vitiatam, nec minus menstruum ventriculi languidum ac iners vitiisque hinc digestionis pronatis intestinisque viscidis & acidis sordibus impletis, colica frequenter admodum torquet. Præter hæc, nihil singulare est, singultum, post morbos imprimis ventriculi & intestinorum invadere; singulare vero videtur, quod ex multiplici obser-

vatione Helvetici cujusdam Practici Famigeratissimi quondam audivi cum, nempe singultum semper fere ægros pariter & convalescentes moleſtare ſi pedum eryſipelate detenti, ſupini jacuiſſent. Dyſenteria reluctati, per multum temporis ſpatium moleſtantur tenesmo. Poſt ſcabiem, podagram ſimilesque excretiones maxime in acutis morbis, parum prudenter præcipue ſanatas atque retrôpuſſas ventriculi & viſcerum inflammationes, frequenter ſe manifeſtant. A diarrhœa & dyſenteria neglecta vel intempeſtively adſtringentibus repreſſa, immedicabilis ſæpe inteſtinorum læſio ac eroſio, atque malum ſic dictum hypochondriacum relinquitur. A lienteria lævitas accidit inteſtinorum, quando ſcilicet rugæ illorum delentur, atque lymphæ inteſtinalis nimis glutinoſa reddita, rugoſitatem obliniſcit. Ex obſtructione alvi pertinaci atque iliaca paſſione convaleſcentes, diarrhœam poſtea experiri haud ſimplici vice obſervatum eſt, quoniam copioſa exhibita laxantia demum ſuum edunt effectum. Rurſum alvi ſegnities poſt varios diuturnos morbos, febres intermittentes, alvi fluxiones, ſi forte china chinæ & meris terreis & adſtringentibus medela quæſita eſt, oritur. Eam & Berevoviciuſ obſervavit, quando juſculis ſaltem aliisque tenuibus cibis veſcantur convaleſcentes, ſimul vero diætam ſolidiorem ſubeant, mox quoque alvum fluidiorem reddi, quod præbeatur ſic fæcum materia, quæ ex victu tenui non poterat remanere. Per ſanguinem in morbis longioribus ut phthiſi &c. plus juſto conſumptum, ut & ex enormibus hæmorrhagiis multæ chronicæ paſſiones ſpeciatiim hydrops inferuntur, cum obſtructionibus viſcerum & ſtagnationibus, hinc præter illud, quod vaſa concident, inde ac ſpaſmi ipſaque mors inſequuntur; nam vires ſimul cum ſanguine pereunt, qui ſanguis materia pabulum & vehiculum ſpirituum eſt, a quibus vires totius corporis motrices unice dependent; Hinc juxta æquilibrium admodum neceſſarium, in motum illum contractorium, in nervoſis & membranofiſ partibus vigentem ac reſiſtentiam ſanguinis qui in vaſis vehitur ſublatus, motu debito humorum ceſſante, qui ſyſtole & diaſtole perficitur, qui vitam conſervare debet, ſanguinem circulando & heterogeneas partes, per debita emunctoria evehendo, cruditates copioſæ eliminandæ, in vaſis accumulantiur, adeo, ut ſuccos forte advenientes non poſſint bene ſubigi atque aſſimilari. Et quoniam ſic ſerum crudum minusque ſpirituoſum venas replet, languores, lenti calores, tumores, catarrhi, cachexia, atrophia, hydrops, paralyſis, ſopores oriuntur, qui peſſimi pediſſequi pariter ex aliorum humorum laudabilium ut jux-

juxta lympham, feminis, salivæ perditione, ex fluore albo, item atque ex nimia salivatione sequuntur. Hydrops etiam & præsertim ascites ex asthmate spasmodico diutius affligente, quod validiori diaphragmatis spasma potissimum oritur, ex nulla alia ratione, quam quod vehementi constrictione portionis diaphragmatis nervosæ, cui hepar & vena cava adhæret, sanguinis recursus ad cor, valde retardetur, & sanguis præcluso transitu ad inferiora tendat ibique & maxime in portæ vena stagnet. Eadem mala ex febribus ardentibus & intermittentibus longioribus figentibus nimis tractatis, si tonus partium solidarum debilis & laxior justo, male adhibitis eum magis laxantibus oleis, diluentibus, humectantibus, demulcentibus &c. debilitatus fuerit, ita BAGLIVIVS *de M. solid. p. m.* 418. hydropem vidit in viro nobili ventriculi languore febri-
cula & ictero flavo laborante, a copioso oleo amygdalarum dulcium potato. Sequitur ordinario nimirum sanguinis fluxum sive menstruum sive hæmorrhoidalium sive etiam ex naribus & aliunde e vulneribus &c. Conf. HIPPOCRAT. *Epid. 6. T. 9.* Et sæpissime post exactas variolas corruptæ lymphæ particulæ ad partes corporis extremas copiosæ amandantur, & spirituum influxus a tono partium affectarum diu nimisque distento, non possunt excerni. Ascitici ut plurimum fiunt tandem ii, qui ex vomitu & dejectione cruenta nigra, per alvum reconvalescant, hypochondriaci præsertim & scorbutici, & qui scirrhos gerunt in hypochondriis. Chlorosis quoque subnascitur, a diuturnis morbis a sanguine compactiori ac vappido. Ex mictu cruento, inflammatione renum & eorum ulceribus convalescentes fiunt calculosi, quoniam renum substantia est corrupta. Renum dolores relinquunt frequenter infantum epilepsiæ. Ut nullum dubium est, quin variolæ & internas humani corporis partes occupent easque vitient, ita & annotatum est, præter alia mala sterilitatem speciatim mulierum, a cicatricibus relictis inductam fuisse. Phimosi a cicatricula a morbillis in præputio relictæ, interdum accidunt. Fluor albus mulierum, in quibusdam post morbos longos infestat. Paucis addendum quod vel ex muliercularum observationibus annotatur, abortum non modo laxitatem uteri sed & multa alia mala post se relinquere eumque monstri aliquid ut plurimum monstrare. Quidam etiam senes post morbos calidos concitati sunt ad salacitatem & pollutionem nocturnam. Arthritides & rheumatismi quoque frequenter observantur. Quod ad ossium medullæque (quæ secundum BOERHAV. *in Aph. de Cogn. & Cur. morb. p. 73.* se habet in ossibus, ut ce-
Ggg ggg 2 rebrum

rebrum in cranio) morbos pertinet, scire licet, speciatim præter alia mala atque læsiones, ut ulcera, fistulas, cariem, luxationes, nonnunquam, præsertim a scorbuto, accidere, ossium strepitum, quem me aliquando observasse memini, in ægro quodam cholera laborante, qui per tres menses fere de nullo alio conquerebatur incommodo, nisi quod quandoque sentieri ac audiveri, ac si ossa pedis non secus ac in sceletis se invicem alliderentur. Apud alios quoque legitur non modo ossa pedum & brachiorum, sed & vertebrarum dorsi, strepitum edere Conf. WILLISIVS *Oper. p. 621.* Oritur hic & sine dubio ab ossium ariditate, & medullæ & humoris roscidi in poris imprimis eorum capitulis contentæ absumptione. Frequentius variolas & arthritidem, luem veneream, spina ventosa & ossium caries sequuntur.

§. XVIII. Morbi qui tota occupant corpora primario sunt febres hecticæ & lentæ, quæ oriuntur maxime post continuas summe ardentes tertianas, duplices, si eæ perversa methodo, per adstringentia & nimis calida tractatæ fuerint. Nascuntur quoque eæ, a suppressis sudoribus a variolis atque morbillis, item a summa virium debilitate, ob præcedentes præsertim enormes hæmorrhagias, ut & diarrhœas & dysenterias, fluorem album imprudenter & intempestive per adstringentia repressas. Semitertiana quoque interdum morbos diuturnos excipit. Notabile quoque est, curata podagra, sæpius quartanam invadere, & vice versa hac curata podagram; ambæ enim suscitantur, a sale caustico vellicante & stimulante ad spasmos, non in sola acido-viscida materia radicata, ut communis fert opinio, nam hypochondriaci senes, mensibus obstructi-
onibus laborantes foeminae, & quicunque delectantur acidis viscidisque cibis, rarius quartana laborant. Exinde & solvitur sæpius scabie vel abscessu; Hæ cruditates potius sunt salis tenuis caustici illius, nidus & subiectum, hinc & ea medicamenta, quæ acidum viscidum corrigunt, vix feliciter curant quartanam, sed ea in auxilia quoque sunt vocanda, quæ transpirationem materiæ acris, tenuis, per poros cutis simul adjuvant. Hanc in hypochondriacis melancholia hypochondriaca, hydrops, icterus; in macilentis hectica, in senibus marasmus & affectus soporosi, in cachecticis tumores oedematosi, sequuntur. Prostant exempla, convalescentibus ex variolis exquisitis, spurias mox accessisse, ut & illas quidem febribus lentis & diarrhœæ quoque successisse, quod mirum videri posset, cum hi morbi tamen, partes fluentes, massam sanguineam

guineam corrigere debuissent. Ex sedula observatione & hoc haustum habemus, illos sudores præternaturales nocturnos contingere, si forte febres non rite per debitos sudores finitæ fuerint, atque illorum paroxysmi, negligentia ut plurimum ipsorum ægrorum frigus incaute admittentium, aut ante debitum tempus mature nimis, ante finitum sic paroxysmum, aut sudorem lectum relinquunt. Largiores sudores nocturni, si modo lecti calore, incalescant convalescentes admodum debilitantes, ex viribus fractis sæpius proficiscuntur, quoniam cutis, universum corpus investiens glandulosaque ejusdem loca atonia, debito robore labefactato laborant, qui haud raro colliquationem tabemque accersunt. Aliquando & sudores frigidi ob eandem naturæ debilitatem observantur V. HIPPOCRAT. *L. I. de Morb.* §. 58. qui pessimi ut plurimum sunt, præsertim quando interiora ex inflammatione ardent, unde idem *S. IV. Aph.* 37. item in *Prog. C. II. f.* eos, cum febre acuta mortem indicare affirmat, in minori autem morbo, ejus longitudinem.

§. XIX. Sequuntur inprimis in variis partibus varii tumores, abscessus, ulcera atque apostemata, si dolores membra manus pedes &c. præ aliis invadunt, expectanda. Nam ubi propter virium debilitatem præsertim multi nocivi humores cumulantur, nec debito modo & tempore expurgantur teste AETIO *Serm. XII. Cap. VII.* & GALENO *Com. IV. Aphor. 45.* fit, morborum causarumque morbificarum ex locis interioribus ad ossium receptacula, ad articulos metastasis, bono non raro naturæ molimine, quam sane frequentissimam esse, multiplici observatione constat; præsertim in hæmorrhoidum consuetarum aut menstruæ purgationis suppressione, ut & a colica, dysenteria & febribus maxime chronicis, ut jam annotarunt HIPPOCRATES *IV. Aphor. 44. & Lib. VI. Sect. IV. de morbis popularibus*, AVICENNAS *Lib. III. Ten. V.* SAVONAVOLA *Tract. VI. Cap. XXII.* VICTOR TRINCAVELLVS *Lib. XII. de Rat. cur. hum. corp. affect. Cap. I.* C. CELSVS *Lib. IV. Med. Cap. XXII.* AVERRHOES *Lib. VII. Collig. Cap. XXXI.* HIER. CABVCINVS *Com. de Podagra.* Post affectus soporosos paralyticos & hemiplecticos, atque ejusmodi cerebri & medullæ spinalis ægritudines, juxta cachexiam, febres lentas, in variis partibus exulcerationes, erysipelata, dolores rheumatici proveniunt, quoniam in his affectibus progressus sanguinis & humorum languidior languidam sæpe secretionem feri superflui impuri inducit, unde fit, ut summa subnascatur impuritas. Tumores etiam tales

tanquam morborum reliquæ, vel ab inepta medicatione vel malo ægrorum regimine, obstructionibus factis, relinquuntur, speciatim tumores artuum, a scabie sanata quandoque observantur. Phrenitidi curatæ omnium familiarissimi tremores artuum sunt. Maniam & insaniam frequenter dolores quidam vagi, varias partes excruciantes, modo pectus modo alterum pedum, modo utrosque, sequuntur. A variolis & morbillis non bene repurgato corpore, vappescentiaque contracta atque fuccis corruptis visceribusque sic gravi labe vitiatis, maligna varia ulcera, in oculis, artubus &c. propullulant. Speciatim morborum chronicorum & tardorum, qui labem notabilem variis partibus corporis imprimunt, habeatur ratio ac commemoratio circa quam rem G. BAGLIVIVS notat in *Op. p. 615.* in morbis diuturnis semper prospiciendum pulmonibus & renibus, ob rationes, quas fuscè simul explicavit.

§. XX. De Diagnosi hic pauca modo referantur: signa morbi præteriti ex effectis relictis post læsas partes solidas pariter ac fluidas ipsasque functiones petantur; morborum vero præsentium signa, eorum causas, naturam, statum, symptomata, eventum spectant. Signa imminantium morborum sunt; actionis mutatio, fames, sitis, somnus, vigiliæ ut & excretorum nec non, visus, olfactus, gustus mutatio, lassitudinis & doloris cujusdam sensatio; ut & pulsus atque urinæ mutatae v. gr. si hæc perturbata non subsidet humores adhuc in perturbata motione, & solutione & mistione depravata subsistere indicium præbet &c. Equidem in pulsu sæpe (& urina) nullum fere signum aut mutatio apparet, nisi quod pulsus debilis observetur. Ad specialiora descendere non vacat, qualia sunt: Si convalescentibus sanguis, per quas vias etiam fiat, per febres erumpat humidam alvum promittit Conf. HIPPOCR. IV. *Aph.* 27. Abscessus fiunt in illa parte quæ laborat Conf. iterum HIPPOCR. XXXII. *Aphor.* qui L. de Hum. Sect. II. 10. p. m. 61. quoque dicit, quod pedes calidi infra, futurum abscessum frigidi vero supra denunciant, & si statim in manibus & pedibus dolores contingunt in his abscessus oriuntur. Convalescentibus, si dolores caput, membra, manus, pedes &c. invadunt tumores ibi sunt expectandi &c.

§. XXI. Cognitis recte præsentibus signis, symptomatibus, quæ morbos comitantur, non consistat medicus sagax & industrius; verum etiam prognosin formet, quæ monstrat vel eventum atque tempus certum fixumque

xumque terminationis, vel modum & durationem. Hæc certe majoris divinioreque contemplationis est, qua prævidet singula certioresque ægros & adstantes reddit, quo præfagio famam perpetuam fidemque eorum atque fiduciam sibi medicus conciliare potest. Ad curationem quoque probe perficiendam non leve hæc cognitio momentum suppeditat, cum exploratis viribus ægri exploratoque præfinito morbi exitu, exacta collatione habita, qua ratione diæta præsertim servanda atque victus liberior vel parcior præbendus sit. Generatim quidem HIPPOCRATES nihil boni sperare dixit *L. de affect.* dicens: *Morbus cum alter alteri succedit, plerumque occidit, rationemque afferens: cum corpori a morbo debilitato alius morbus accesserit, præ imbecillitate perit:* Quoniam malitia redit, naturaque debilis est; pro morborum tamen indole variat horum prognosis: Alii eorum brevius leviusque cedunt, alii non modo diuturniores; sed & periculo pleni existunt. Ibi nimirum, ubi causa atrocior pertinaciorque fuerit, qui diuturniores morbos & summa debilitas, per illos, sequatur, atque efficiant, qui internas & nobiliores partes obsident. Vix ac ne vix quidem curati medelam inter omnes admittunt, ubi partium conformatio alterata ac vitiata exinde sit. Ad hæc porro notetur, morbi reversionem tutiorem esse, si malam victus rationem tantummodo secuta recidiva, & non relictum a priore morbo vitium subest, & quo citius revertitur morbus, & quo vires simul infirmiores sunt eo esse pejorem. Si appetitus constat spes optima est. Ejusmodi consideratio hic pro hac generali tractatione sufficiat, ad specialiora enim descendere longissimum foret; legantur tamen aliquæ saltem de multis observationes, quæ commode in mentem incidunt: Hydrops, si ex febribus & continuis morbis oritur, malus est & lethalis, quoniam magnam humorum colliquationem & viscerum exsiccationem arguit, ille vero, qui ex chronico quodam morbo v. gr. chlorosi aut febre quartana atque ab infarctu solo viscerum oriri videtur, (adeoque facilius quam illa indicata vitia corrigi potest) felicius curatur. Tussis si variis morbis se prodit fere periculosa habetur. Sic paralyfin passi raro pristinae sanitati restituuntur, ut & qui anhelatione, memoriæ debilitate & sopore diu laborarunt. Pariter curati a cancro occulto cito intereunt observante P. M. ROSSIO *Consult. & Obs. chir. p. 145.* Post longos morbos vertiginem tenebricosam cum parvis tumoribus malum exitiosum prænunciare constat, cum apoplexia & epilepsia frequenter sequantur. Abscessus si tempore hyemali subveniunt, (subveniunt ve-

ro

ro, tum frequentissime) tardius quidem cessant, sed non adeo facile recurrunt. Hi eo mitiores censentur, quo longissime a morbo fiant conf. HIPPOCR. *Lib. II. Epid. Sect. I.* Abscessus quoque meliores sunt, qui deorsum fiunt ex observatione ipsius *Epid. 2. Sect. I.* confirmat idem GALLENUS 6. *Epid. 5. com. 14.* Ideo ut plurimum abscessus in superioribus excitati difficiliores sunt, quod membra illa majus quam inferiora discrimen afferant, cum utraque eodem affectu vexata sint: sive enim cerebrum, sive guttur aut gula, aut pulmo aut pectus aut cor inflammata sunt, mortifera ægritudo est; membris infra jecur inflammatis pauci admodum pereunt, si recta curatio adhibeatur. Cæterum signa pessima quæ internecionem præsagiunt, præsertim sunt urina nigra, viridis & plumbea, summa in actionibus debilitas, virium jactura, ad pedes delapsus, pulsuum inordinatio omnimoda aut asphyxia. Ossium præsertim affectus inducti & inprimis strepitus eorum curatu admodum difficiles sunt. Ad hanc partem pertinere videtur, quosdam morbos aliis supervenientes illos solvi, quod vel unico saltem exemplo eoque lethargi abscessu pone aures exorto (ne alia longius adducamus) sublatis, indicasse hic quidem sufficiat. Memorandum insuper est, dari affectus quosdam cum quibus valetudinarii diu conflictati fuerunt, qui si subito & sine evidenti causa cessant, alium graviores morbum sæpiusque summum vitæ periculum significant. Sic notat DOLÆVS *Encycl. chir. Lib. I. cap. 10. p. 75.* diuturnis oculorum affectibus obnoxios, si ab iisdem subito liberentur, raro solere annum supervivere & Eph. G. N. C. referunt vid. *A. VII. & VIII. Obs. 203. D. III.* furditatem in sene sexagenario cessantem, sinistri lateris stuporem & memoriæ abolitionem subsequutam esse. De podagra aliisque alii idem observaverunt.

§. XXII. Prolixum nimis foret therapiam singulorum affectuum his pagellis recensitorum secundum triplices illas indicationes ibique observandas præservatoriam curatoriam & vitalem afferre, nec instituti ratio id patitur: proinde sufficiant generalia, quæ in primis paragraphis sunt adducta. Brevibus id saltem adhuc notemus, quod præservatione maxime opus sit, vel ad causam sive dispositionem morbosam ægrum vel utrumque dirigenda. Dein juxta illud, quod in omnibus morbis præcipue febribus curandum, ut curatio sit constans, nec recidivent, generatim indolem causæ morbificæ præcedentis, labem affricam atque immu-

immutatam naturalem constitutionem, particularum sanguinis aliorumque humorum, magnitudinis, figuræ, quantitatis, qualitatis, situs ut & solidarum partium, curandi modum diætæ regimen ejusque forte errores circa illud commissos, serum præsertim collectum & colliquatum, vappidum educendum, colliquationem & conturbationem avertendam relictum morbosum tollendum aut exhaustas vires deperditas, imbecillemque corporum constitutionem partesque solidas maxime relaxatas, aliasque circumstantias, bene attendat Medicus providus atque intelligens, quod scrutinium ansam dabit, indicationes suas formandi convenientiaque media afferendi, e. gr. a febribus intermittentibus præpostere constringentium usu nimisque cito curatis aut potius suppressis, viscerum infarctus, obstructions, scirrhi, lentæ febres, hydropes, martialibus, de obstruentibus, balsamicis & similibus curentur. Sic & speciatim recidivæ repurgantibus, præcipitantibus & balsamicis possunt præcaveri. Qui fiunt decubitus per abscessus, partim universalibus dispellentibus, partim particularibus subigendi sunt &c. His etiam bene consideratis cognoscet, plurimos convalescentium morbos, methodo vulgari, vix sanari v. gr. in inflammatione oculorum a variolis relictæ, vesicatoria non bene conducunt, quia sanguinis fervorem adaugerent & spirituum animalium orgasmum efferatum redderent, aut si in diarrhœa post easdem catharticis, si quis vellet curationem inchoare, male ageret; colliquationem enim humorum a reliquiis activis variolorum, item per glandulosam intestinorum tunicam deturbationem augeret, potius sedativis opiatibus & roborantibus cura tentanda esset. Sic ubi menses convalescentibus ex diuturno succos confumente morbo, aut puerperio, largiori lochiorum fluxu stipato emanent, inconvenienter ageret qui emmenagogis fortioribus & venæ sectionibus eos restituere vellet, nihil aliud enim efficeret, quam ut per inconvenientem ejusmodi medicationem miseram in longe majorem miseriam, tormina ventris, cachexiam, lentas febres ipsamque hæcticam funestam conjiceret; feliciter procederet, qui naturæ tantum negotium relinqueret ac exspectaret, donec viribus restitutis sponte redeant; interim vero imbecillia languentiaque hæc succis bonis viribus exhausta ac malis & depravata digestionem succis referta corpora, blandis laxantibus stomachicis temperatis & jusculis nutrientibus confortet, atque reficiat, siquidem firmissime tenendum: in lentis foëminarum febribus ipsisque hæcticis atque phthisi licet ex mensium, defectu primam traxerint originem menstruum fluxum

H h h h h h

per

per venæ sectionem ac emmenagoga nunquam esse moliendum. Simili modo alvi segnities, quæ sæpius post certos morbos remanet, non purgantibus positivis sed oleosis saltem & lenientibus tollenda. Rursum imprudentiæ nota esset, si medicus, languenti ex longo morbo inflammatione laboranti, largam venæ sectionem imperare vellet. Ex consilio vero ageret is, qui pro curatione febrium lentarum post febres intermittentes suppressas ac ubi infarctus viscerum & mesenterii, ut in cachecticis & hypochondriacis, priores febres, si ipsi datum est, refuscitet, quem modum CELSVS *Lib. III. cap. IX.* describit. Pariter in præcavendis ulterioribus morbis, maxime recidivis præcipue providendum, ut omne quod adhuc noxium & morbificum relictum est, si-ve in ventriculo & intestinis, si-ve in venis substituerit, excludatur & ut succi laudabiles refarciantur; partes vero solidæ læsæ ac relaxatæ restituantur atque firmentur totaque natura præ aliis ventriculus, per congruam diætam & commoda roborantia dicta & stomachica roboretur, qualia sunt balsamica, amara, salia volatilia moderata aliisque simul mixta, ut & gummata & resinosa, ut gummi ammoniacum, hederæ, elemi, storax, terebinthina item, opobalsamum, mastiche, sandaracha, flores benzoës, ex quibus ex. gr. pilulæ compositæ e re erunt, ex extractis absinthii, cardui benedicti, centaurii minoris, myrrha. Quæ juxta curationem quoque præservationi maxime inserviunt, quam in rem secretionem & excretionem probe attendantur, in quarum observatione multum certe ponitur, & causarum antecedentium materialium excretio promoveatur, viæque per quas fieri debent rite considerentur, simulque provideatur, ne commotio præternaturalis, irritatio atque confusio inducantur potius, quam exoptatus effectus insequatur. Vix silentio dimittendus est error, recidivarum occasione, quoniam mihi nonnullæ observationes suppetunt: nimirum cum idem morbus recurrit sæpius ad ea pharmaca quibus convaluerant, confugiunt quondoque haud consulto medico; verum eadem quæ prius profligaverunt morbum postea sæpissime aggravant, ideo quia non data fuerunt a medico provido atque intelligente, quando & quomodo danda essent.

§. XXIII. De reliquo utile admodum sedulaque observatione dignum quoque est, uti intelligentis providique medici est bene omnia hic ut & alibi atque ubique attendat & historiam morborum practicam
clini-

clinicam atque ex ea addiscat, quænam accidentia maxime alterent, qualemque modum singula sistant, in illudque sedulo incumbat, ut in praxi obvenientes affectus, ex arte dignoscat atque perspiciat, ac simplicem quendam eorum ac non variatum a complicato & variato larvatoque discernat atque præcipue omni modo prohibeat avertatque ne malus in pessimum convertatur, quoniam notum perspectumque est, morbos, qui notabilem alterationem patiuntur per hanc ipsam pejores evadere. Insuperque in malis ducat curam palliativam suscipere, qua major noxa ægrotantibus inducitur. Hæc historia morborum practica rite observata atque expensa, simul ansam dabit cognoscendi, tam quænam morborum genera facilius in alterationes periculi plenas abeant, quam quomodo ex ejusmodi alterationibus, quæ primo quidem intuitu leviores appareant, levi autem negotio, varii & gravissimi casus exinde suboriantur.

L I P S I A E

LITTERIS EISFELDIANIS,



Sphalmata typographica conspectiora.

pag. 9. linea 14. lege *libroque*

- 12.	- 19.	-	<i>emittunt</i>
- 20.	- 28.	-	<i>emanantia</i>
- 21.	- 3 & 4.	-	<i>cænofo, viscido</i>
- 22.	- 33.	-	<i>solutorum</i>
- 23.	- 6.	-	<i>ducant -- lavent</i>
- 33.	- 21.	-	<i>liberas</i>
- 36.	- 1.	-	<i>variavum -- concentu</i>
- 41.	- 30.	-	<i>de tonationibus</i>
- 44.	- 16.	-	<i>quos</i>
- 45.	- 22.	-	<i>temperati</i>
- 48.	- 31.	-	<i>lotum</i>
-	- 37.	-	<i>lotophagites</i>
- 58.	- 32.	-	<i>post decenter adde: observetur</i>
- 185.	- 25.	-	<i>libræ</i>
-	- 34.	-	<i>sudetis</i>

pag. 413. linea 14. lege *hand obscura*

- 481.	- 28.	-	<i>bilariis</i>
- 513.	- penult.	-	<i>ab</i>
- 514.	- 32.	-	<i>relinquere viden- tur</i>
- 545.	- 15.	-	<i>colonque</i>
- 626.	- 14.	-	<i>Imperet</i>
-	- 20.	-	<i>Belgis</i>
- 658.	- 35.	-	<i>recreet</i>
- 702.	- 29.	-	<i>dysuria</i>
- 741.	- 3.	-	<i>detrectantium</i>
- 764.	- 3.	-	<i>artuum</i>
- 827.	- 28.	-	<i>hac</i>
- 902.	- 9.	-	<i>ponderosiores</i>
-	- 22.	-	<i>morbos</i>
- 905.	- 11.	-	<i>cascarilla, millefolii</i>
- 940.	- 4.	-	<i>querelæ</i>

